


Tí Nuevo Testamento cuènte Inchéni Jesucristo

C'óna Nquìva



New Testament in Popoloca, San Juan Atzingo

**Tí Nuevo Testamento cuènte Inchéni Jesucristo C'óna
Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 25 Nov 2022 from source files dated 29 Jan 2022
b9b09122-b3f6-59f0-9594-749907b32b5b

Contents

| | |
|----------------------------|-----|
| SAN MATEO | 1 |
| SAN MARCOS | 67 |
| SAN LUCAS | 109 |
| SAN JUAN | 179 |
| LOS HECHOS | 231 |
| ROMANOS | 291 |
| 1 CORINTIOS | 316 |
| 2 CORINTIOS | 341 |
| GALATAS | 357 |
| EFESIOS | 366 |
| FILIPENSES | 374 |
| COLOSENSES | 380 |
| 1 TESALONICENSES | 386 |
| 2 TESALONICENSES | 391 |
| 1 TIMOTEO | 394 |
| 2 TIMOTEO | 401 |
| TITO | 406 |
| FILEMÓN | 409 |
| HEBREOS | 411 |
| SANTIAGO | 429 |
| 1 PEDRO | 435 |
| 2 PEDRO | 442 |
| 1 JUAN | 446 |
| 2 JUAN | 452 |
| 3 JUAN | 453 |
| SAN JUDAS | 454 |
| APOCALIPSIS | 456 |

Tí tan jína chrónka ch'ín Mateo

*Tí sín k'uaxrjeníxin ch'ín Jesús
(Lc. 3.23–38)*

¹ Tíhi mé chrónka nkexro kaín tí sín k'uaxrjeníxin ch'ín Jesucristo. Mé jehe ch'án k'uaxrjeníxin ch'án tí ch'ín David la ko tí ch'ín Abraham. ² Ch'ín Abraham mé it'é tí ch'ín Isaac la ko ch'ín Isaac mé it'é tí ch'ín Jacob la jehe ch'án mé it'é tí ch'ín Judá la ko kaín kíchó ch'án. ³ Ch'ín Judá mé it'é tí ch'ín Fares la ko ch'ín Zara la tí iné sín mé it'in Tamar. Ch'ín Fares mé it'é tí ch'ín Esrom la jehe ch'án mé it'é tí ch'ín Aram. ⁴ Ch'ín Aram mé it'é tí ch'ín Aminadab la jehe mé it'é tí ch'ín Naasón la jehe mé it'é tí ch'ín Salmón. ⁵ Ch'ín Salmón mé it'é tí ch'ín Booz la iné mé tjan Rahab. Ch'ín Booz mé it'é tí ch'ín Obed la iné tí ch'ín Obed mé tjan Rut. Tí ch'ín Obed mé it'é tí ch'ín Isaí. ⁶ Ch'ín Isaí mé it'é tí rey David la jehe ch'án la ko tí tjan k'uéchjién ch'ín Urías mé táha it'é la ko iné tí ch'ín Salomón.

⁷ Ch'ín Salomón mé it'é tí ch'ín Roboam la jehe mé it'é tí ch'ín Abías la jehe ch'án mé it'é tí ch'ín Asa. ⁸ Ch'ín Asa mé it'é tí ch'ín Josafat la ch'ín Josafat mé it'é tí ch'ín Joram la ch'ín Joram mé it'é tí ch'ín Uzías. ⁹ Ch'ín Uzías mé it'é tí ch'ín Jotam la ch'ín Jotam mé it'é tí ch'ín Acáz la ch'ín Acáz mé it'é tí ch'ín Ezequías. ¹⁰ Ezequías mé it'é tí ch'ín Manasés la ch'ín Manasés mé it'é tí ch'ín Amón la ch'ín Amón mé it'é tí ch'ín Josías. ¹¹ Ch'ín Josías mé it'é tí ch'ín Jeconías la ko kíchó ch'án. Tí sín a mé k'uéjó sín tí yaon a ntá xrínahya ikui tí sín Babilonia sákjuíko sín tí sín israelita kixin ts'ejóchjina sín tí chjasén sín Babilonia.

¹² Ntá kjuixin sákjuí sín mé ch'ín Jeconías mé it'é tí ch'ín Salatiel la ch'ín Salatiel mé it'é tí ch'ín Zorobabel. ¹³ Ch'ín Zorobabel mé it'é tí ch'ín Abiud la ch'ín Abiud mé it'é tí ch'ín Eliaquim la ko ch'ín Eliaquim mé it'é tí ch'ín Azor. ¹⁴ Ch'ín Azor mé it'é tí ch'ín Sadoc la ko ch'ín Sadoc mé it'é tí ch'ín Aquim la ko ch'ín Aquim mé it'é tí ch'ín Eliud. ¹⁵ Ch'ín Eliud mé it'é tí ch'ín Eleazar la ch'ín Eleazar mé it'é tí ch'ín Matán la ch'ín Matán mé it'é tí ch'ín Jacob. ¹⁶ Ch'ín Jacob mé it'é tí ch'ín José la ch'ín José mé k'óna xii tjan María la jehe tjan María mé iné tí ch'ín Jesús. Tí ch'ín Jesús la mé nchek'in sín Cristo.

¹⁷ Mé xikaha catorce t'áchrji k'uaxrjeníxin tí ch'ín Abraham ntá kjuák'e ch'ín David la í jnko catorce t'áchrji k'uaxrjeníxin tí ch'ín David la ntá tí sín Babilonia sákjuíko tí sín israelita chjasén sín la ntá í jnko catorce t'áchrji k'uéjó la ntá kokjíhi Cristo.

*Kokjíhi Jesucristo
(Lc. 2.1–7)*

¹⁸ Tí kokjíhi Jesucristo mé xikihi kónhen. Tí tjan María iné ch'án mé tsoṭehe tjan ch'ín José. A ntá naxa kuákjahya kíchó sín ntá kónoxín kixin jehe tjan la ó tjejá tjan kixin tíha la kjuachaxién Nchakuen Dios. ¹⁹ Ch'ín José mé tí nkexro ts'óna xii tjan María, mé ijnko chojni jína la tjinkakonhya ch'án noxín chrók'óxroan ch'án tjan ntá kjuenkayáxin ch'án imó chrókjuákehe ch'án tjan kixin tjinkaon ch'án kixin ninkexró tsoñoehya. ²⁰ Ntá tí naxa tjenkayáxin ch'án kixin xikaha sich'e ch'án ntá kotáchríén ch'án chrónkaxín titàya k'uúkuèn ch'án ikui ijnko ángel kuènte Ìnchéni nixja, chrónka kixin:

—José jaha mé k'uaxrjeníxian David. Tóxakuanhya la ko chrakonhya chrókuákjá tjan María ts'óna ichjián kixin tí xjan tsochóna tjan la kjuachaxin kuèté Nchakuen Dios ikui mé k'óna tí xjan a.
²¹ Sinchekokjíhi tjan ijnko xjan ntoa la its'in xjan Jesús mé xikaha its'in xjan kixin jehe xjan tsjakjìn ijé chojni —mé xikaha chrónka tí ch'ín ángel.

²² Kaín tíha kónhen kixin tsoxiteyá tí nkehe chrónka Ìnchéni k'uénixja tí sín k'uéchrónka itén ch'án ósé. Mé ntáchro xikihi:

²³ Ijnko tjan naxa chónahya chojni ntoa mé tsjak'eyá tjan la tsochóna tjan ijnko xjan,

la sinchek'in sín ch'án Emanuel,*

la tíha t'axrjexín kixin Dios tjejókoni. Mé xikaha chrónka itén Dios.

²⁴ Ntá k'uàya ch'in José ntá kjuínchexiteyá ch'án tí nkehe k'uetoan tí ángel kuènte Ìnchéni la kuákja ch'án tjan María ts'óna ichjién ch'án. ²⁵ A ntá kjónté xikaha la naxa kójnkojiéhya sín tí naxa kokjiéhya xjan la ntá tí xjan mé kjuínchek'in sín Jesús.

2

Tí sín mago kjuítsjehe sín xjan

¹ Tí kokjéxín ch'ín Jesús tí chjasin Belén estado Judea la tí yaon a kjuák'e ijnko ch'ín rey it'in Herodes mé k'uetoenhen ch'án tí nación a. A ntá xrínahya iso chojni ntoa kjuixín ijnko chjasin nó tjitoxín yaon mé kjuíji sín chjasin Jerusalén. Jehe sín mé sín mago mé tónoexín sín tí konotsé.

² Ntá kjuanchankí sín kixin:

—¿Nketí tjen tí xjan tsíkokjíhi ts'óna tí rey ts'etuenhen tí sín judío? K'uikonxínni tí konotsé kuènte ch'án nó tjitoxín yaon na ntá ó kjuini kixin tsochjéheni ch'án kjuasáya —ichro sín.

³ Ntá kuínhin tí ch'ín rey Herodes tí xikaha ichro sín ntá imá tóxakonhen ch'án la ko tóxakonhen kaín tí sín chjasin Jerusalén. ⁴ Ntá tí ch'ín rey k'uetoan kixin síxraoa kaín tí sín nchát'á t'etoan la kaín tí sín tjako tí ley la ntá kjuanchankíhi sín ch'án nketí chrókokjéxín tí nkexro Cristo. ⁵ Ntá jehe sín kjuátehe sín kixin:

—Tsokjéxín xjan chjasin Belén estado Judea mé xikaha tsíkinjín tí sín tsíchrónka itén Dios. Ntáchro xikihi:

⁶ Jaha chjasin Belén nonte Judá, jaha la jehya ijnko chjasin imá ntsí;

kixin tí nonte ts'axrjexín tí nkexro antsí t'etoan,

la jehe ch'án ts'ayakonhen tí chjasin kuèntana mé chjasin Israel.*
 Mé xikaha nixja itén Dios.

⁷ Ntá imó k'uíyehé ch'in Herodes tí sín mago la kjuanchankíhi ch'án sín nkesá kjuankíxín k'uikon sín tí konotsé. ⁸ Ntá chrónka sín ntá tuénxín k'uetoan ch'án kixin sátsji sín chjasin Belén la ntáchro ch'án kixin:

—Sátjirá ntíha la tjéyará tí xjan la tió ts'itjará xjan la tsochronkará kixin ntá kjaxian janhan sátsjia ntíha tsotjahá xjan kjuasáya —mé xikaha k'uetoan ch'ín Herodes.

⁹ Ntá kuínhin tí sín mago tí nkehe k'uetoan tí ch'ín rey ntá sákjuí sín la xík'ikon sín tí konotsé inaá la kjuítaón va ntíja la ntá chréhe sín hasta kjuák'e va chrítaón tí nchia tjen tí xjan a. ¹⁰ Ntá tió k'uikon tí sín mago nketí kjuák'e tí konotsé la imá kóchéhe sín. ¹¹ La k'uixenhen sín tí nchia la

* 1:23 Isaías 7.14 * 2:6 Miqueas 5.2

k'uikon sín tí xjan kjuák'eko tí tjan María ìné xjan. Ntá k'uéjoxin toch'in sín la chjéhe sín kjuasáya ntá kuakitjehe sín tí nkehe kjuikao sín la kjuanjon sín chica oro la ko ihnti tsochéxin chjinc̄o la ko xroan xraxé náxrjón. ¹² Ntá chr'éxin kotáchrién sín chrónkaxín kixin chrókjanhya sín tí tjen ch'ín Herodes. Méxrā kjanxin sín í jnko ntja la sákjuí sín chjasén sín.

Ch'ín José la ko tjan María sákjuí sín chjasin Egipto

¹³ Ntá tió kjuixin sákjuí tí sín mago la ntá kotáchrién ch'ín José chrónkaxín titàya k'uikon ch'án ijnko ángel kuènte Ìnchéni chrónka kixin:

—T'àyá sátsjikoa xjan la ko ìné xjan la sátsjirá chjasin Egipto la ntahó ts'ejorá hasta tsoxrjankajia, kixin tí ch'ín Herodes xritjeyá tí xjan chrók'óyán ch'án xjan —mé xikaha chrónka tí ángel.

¹⁴ Ntá ch'ín José k'uàya la ntá sákjuíko ch'án xjan la ko ìné xjan la sákjuí sín chjasin Egipto tí tie a. ¹⁵ Ntahó k'uéjó sín hasta ik'uén ch'ín Herodes. Mé xikaha kónhen kixin tsoxiteyá kaín tí nkehe chrónka Ìnchéni, k'uénixja tí sín tsíchrónka itén ch'án. Mé ntáchro sín kixin: “Chjasin Egipto kjuák'e xjanna ntá k'uíyah̄a ch'án”. †

Ch'ín Herodes mé k'uetoan its'en xjan

¹⁶ Ā ntá kónohe ch'ín rey Herodes kixin tí sín mago mé kjuích'iyehe sín ch'án ntá imá kóninkaon ch'án la k'uetoan ch'án kixin its'en kaín tí chánjan ntoá siín chjasin Belén ó chóna iyó nánó la ko tí xjan naḡa chónahya iyó nánó. Mé xikaha k'uetoan ch'án kixin ó xraxinkaon ch'án nkehe kuínhin ch'án chrónka tí sín mago. ¹⁷ Mé xikaha ó xiteyá tí nkehe tsíkjin tí ch'ín Jeremías ntáchro ch'án kixin:

¹⁸ Kuínhin sín itén chojni chjasin Ramá mé tsjánka sín.

Tíha mé tí tjan Raquel la tsjánkamā tjan xjeen tjan.

Kohya nkexro sinchechéhe tjan kixin ó kaín xjan tsík'en xjan. ‡

Mé xikaha chrónka itén Dios.

¹⁹ Ntá tió kjuixin k'uén ch'ín Herodes ntá ijnko ángel kuènte Ìnchéni mé k'uikonxin ch'ín José kotáchrién ch'án tí kjuák'e ch'án chjasin Egipto mé ntáchro kixin:

²⁰ —T'àyá sátsjikoa tí xjan la ko tí ìné xjan la tsokjan chjasin Israel kixin ó kjuixin k'uén tí nkexro chrók'óyán tí xjan a —mé xikaha k'uetoan tí ch'ín ángel.

²¹ Ntá ch'ín José mé k'uàya ch'án la sákjuíko ch'án tí xjan la ko tí ìné xjan la sákjuí sín chjasin Israel. ²² Ā ntá kuínhin ch'ín José kixin ch'ín Arquelaos xjeen ch'ín Herodes mé k'uetoan ch'án tí estado Judea la ntá chrakon ch'án la sáchrókjuihya ch'án ntiha. Ā ntá kotáchrién ch'án chrónkaxín Dios kixin sáchrókjuí ch'án estado Galilea. ²³ Ntá tió kjuíji sín ntiha ntá sákjuí sín ijnko chjasin it'in Nazaret la ntaha k'uéjó sín. Mé xikaha xiteyá tí nkehe tsíchrónka tí sín k'uénixja itén Dios senó. K'uéntáchro sín kixin jehe ch'án mé tsíkítexín sín nazareno.

3

Juan el Bautista mé kjuák'e ch'án nteje
(Mr. 1.1–8; Lc. 3.1–9, 15–17; Jn. 1.19–28)

† 2:15 Oseas 11.1 ‡ 2:18 Jeremías 31.15

¹ A ntá tí yaon a kjuák'e ch'ín Juan Bautista nteje Judea la kjuako ch'án.

² Ntáchro ch'án kixin:

—Títóhéra ijárá la tjínkírá tí nkehe tjenkayáxinrá kixin í séhya itsi kjuachaxiэн Dios.

³ Tí ch'ín Isaiás, mé ijnko ch'ín tsíchrónka itén Dios, mé tsíkjin ch'án kuènte tí ch'ín Juan mé chrónka ch'án kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntja tsixin Ìnchéni.

Takitjehérá ijnko ntja ntoí.”*

⁴ Tí iké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko itsjen kotsjenta tónoxín nteje. ⁵ Itsjé chojni kuixin sín chjasin Jerusalén la ko í so chjasin sín estado Judea la ko chjinaxón tí ntarío Jordán kixin tsinhin sín nkexrí tjechrónka ch'án. ⁶ Ntá chrónka sín ijje sín ntá ch'ín Juan kuikítexin ch'án sín tí ntarío Jordán.

⁷ Ntá xrinahya k'uúikon ch'ín Juan ikui nchónhya tí sín fariseo la ko tí sín saduceo kixin tjinkaon chrókuikite sín la ntá ntáchro ch'án kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkéhérá tí kjuanínkaon kuènte Dios ó tsi? ⁸ T'ichjánxin kixin chrók'uejorá jnkojína chrókjuáqoxinrá kixin chaxín kjuítóxinhínrá tí nkehe tjenkayáxinrá. ⁹ Jahará nchehnerá ntáchrórá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham. ¹⁰ Tí chica hacha ó tjechónhen tsochrínjin sín nta. A ntá kaín sín nta t'ónahya to jína mé tsochrínjin kixin tsoche. ¹¹ Janhan mé intá tíkitexiэн chojni kixin tsjakoxin sín kixin ó kjuítóxinhin sín ntié sín. A ntá tí nkexro itsi chr'éxin mé tsíkítexinrá tí Nchakuen Dios la ko xrohi. Antsí tjetóxin t'etqan ch'án a ntá janhan la kánhyó. Méxra chrókósuàna sáchrókjuikian tokaté ch'án. ¹² Jehe ch'án la ó tjexraá ch'án pala sinchetjuáxin ch'án noatrigó kixin tí ntáchjiji trigo la ókjé ts'ejo ch'án a ntá tí noatrigó la tsjenájín ch'án la ts'enkachjina ch'án. A ntá tí ntáchjiji trigo la tsjakaxín ch'án ijnko xrohi ts'ankahya jnkochríxin —mé xikaha kjuako ch'ín Juan.

Kuikite ch'ín Jesús

(Mr. 1.9-11; Lc. 3.21-22)

¹³ Ntá ch'ín Jesús kjuixin ch'án nó estado Galilea ikui ch'án tí ntarío Jordán tí tjen ch'ín Juan kixin ch'ín Juan tsíkíte tí jehe ch'án. ¹⁴ A ntá tí saoxin chrohya ch'ín Juan chrókuikíte tí ch'ín Jesús ntáchro ch'án kixin:

—Náhi. Jeheni t'ichjánxinhinni jaha chrókuikíte tí jeheni. A ntá jaha k'uinka kixin jeheni chrókuikítia tí jaha —ichro ch'ín Juan.

¹⁵ Ntá kjuátehe ch'ín Jesús kixin:

—A ntá jie la títóhé tí xikaha tjenkayáxian kixin t'ichjánxin tsikiteni kixin sinchexiteyáni tí nkehe k'uetqan Dios.

Ntá ch'ín Juan kuítekaon ch'án la xikaha kjuích'e ch'án. ¹⁶ Ntá tío kuikite tí ch'ín Jesús la ntá xrinahya titàya xitjehe nkajní la k'uúikon ch'án tí Nchakuen Dios, éxí kontóá tsjehe, k'uínkajinxin nkaya nkajní ntá kjuák'e chrítaón kja ch'ín Jesús. ¹⁷ Ntá xrinahya kuínhin sín ijnko tan kuixin nkaya nkajní ntáchro kixin:

* 3:3 Isaiás 40.3

—Tíhi mé xjanna la imá tjuahá ch'án la imá chána kixin nchexiteyána ch'án.

4

Ch'ín Tsochren chrókjuachroe ch'ín Jesús
(Mr. 1.12-13; Lc. 4.1-13)

¹ Ntá tí Nchakuen Dios mé sákjuiko ch'ín Jesús tí nteje a ntá ch'ín Tsochren tjinkaon chrókjuachroe ch'ín Jesús. ² Tí nteje a mé kjuák'e ch'án kjónehya ch'án cuarenta yaon la ko cuarenta tie la ntá chr'éxin kónohe ch'án ik'uén ch'án kjinta. ³ Ntá ch'ín Tsochren mé kóchjinehe tí ch'ín Jesús kixin tjinkaon chrókjuachaxin ch'án. Ntáchro ch'án kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ Ntá kjuátehe ch'ín Jesús ntáchro kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kain tí tán nixja Dios tjejóhónxin chojni”^{*} —ichro ch'án.

⁵ Ntá ch'ín Tsochren mé sákjuiko ch'ín Jesús tí chjasin tjóá mé chjasin Jerusalén, la sákjuiko ch'án tí chrítaón tí kja núnko a ⁶ la ntáchro ch'án kixin:

—Tí chaxín Xjeen Dios jaha la títóhé t'anótjenxian tí noi ntihi kixin ntáchro xroon itén Dios kixin:

Dios mé ts'etuénhen tí sín ángel kuente ch'án kixin ts'ayakonhan sín.

Tsotsé sín itjá

kixin tsotéhya totá ts'itja xro tí ts'anótjen†

—ichro ch'ín Tsochren.

⁷ Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjinihya chrókjuásixián kjuaxroan kjuachaxin kuente Ìnchéni Dios”[‡] —ichro ch'ín Jesús.

⁸ A ntá tió kjuixixín sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kain xín tí nacióon siín chjasintajni la ko tí nkehe t'etoan kuente. ⁹ La ntáchro ch'ín Tsochren kixin:

—Kain tíha mé tsotjaha tí tsjak'éxian tóch'ian tsjikosáyana tí janhan —mé xikaha ichro ch'ín Tsochren.

¹⁰ Ntá kjuátehe ch'ín Jesús ntáchro ch'án kixin:

—Sátjia Satanás kixin xroon itén Dios ntáchro kixin: “Chrókjuíkosáyehé Ìnchéni Dios la jehó ch'án chrókjuich'ehé xra”[§] —ichro ch'ín Jesús.

¹¹ A ntá ch'ín Tsochren mé kuítóhe tí ch'ín Jesús la iso tí sín ángel ikui tsjinkitsa tí jehe ch'án.

Ch'ín Jesús kjuankixin ch'án tí xra kuente ch'án estado Galilea
(Mr. 1.14-15; Lc. 4.14-15)

¹² A ntá ch'ín Jesús mé kuínhin ch'án kixin tí ch'ín Juan mé tjechjina ch'án ntóechiso a, a ntá jehe ch'án mé sákjuí ch'án estado Galilea.

¹³ Kuítóehya ch'án chjasin Nazaret ntiha. Náhi. Sákjuí ch'án chjasin Capernaum la kjuák'e ch'án ntiha. Tí chjasin a mé tjen chrínta ntayaon chjino estado Zabulón la ko estado Neftalí. ¹⁴ Mé xikaha kjuích'e ch'án kixin tsoxiteyá tí nkehe tsíkjin ch'ín Isaías, ijnko nkexro k'uéchrónka itén Dios. Ntáchro ch'án kixin:

¹⁵ Tí estado Zabulón la ko Neftalí tí ntja chrínta ntayaon la tí nó chók'á tjitoxin yaon tí ntario Jordán, mé tí estado Galilea tí tjejó tí sín jehya judío.

* 4:4 Deuteronomio 8.3 † 4:6 Salmo 91.11-12 ‡ 4:7 Deuteronomio 6.16 § 4:10 Deuteronomio 6.13

¹⁶ Mé ntiha tjejó tí sín siín tí sítié mé ts'ikon sín ijnko xrohi jíé, la tí sín éxí tsík'en xritjejó sín mé ts'inkaséyanxín ts'ejó sín.

¹⁷ Ntá kjuankixin kjuako ch'ín Jesús ntáchro ch'án kixin:

—Tjitóxinhinrá ntíjará. Tsákjára ijnko ntia nixin kixin kjuachaxin kuènte Dios tjen nkaya nkajní la í séhya tsi.

Ch'ín Jesús k'uíyehé noó chojni k'uétsé koche
(Mr. 1.16-20; Lc. 5.1-11)

¹⁸ Ntá sákjuí ch'ín Jesús chrínta ntayaon Galilea ntá xríñahya k'uíkon ch'án yaá sín jnkokoá kichó sín, ijnko mé it'in Simón mé kjaxín it'in ch'án Pedro la ko í jnko it'in Andrés. Jehé sín mé koche xritsé sín. Ntá tinkák'e sín nchísén chrínkí ntá. ¹⁹ Ntá ch'ín Jesús nixjehé sín ntáchro ch'án kixin:

—Chréhérá tí janhan ntá tsotjahará xra tsjéyará chojni.

²⁰ Ntá tuénxín kuítóhe sín tí nchísén k'uétséya sín koche, ntá sákjuíko sín ch'án.

²¹ Ntá kjínhya kjuíji ch'án ntá k'uíkon ch'án ijnko yaá sín, jnkokoá kichó sín, mé tí ch'ín Jacobo la ko ch'ín Juan, mé xjeen tí ch'ín Zebedeo. Tjejóko sín it'é sín tí ntabároç la tjejótonjite sín tí nchísén tséya sín koche. Ntá kjaxín tí sín a k'uíyehé ch'ín Jesús. ²² La ntá tuénxín kuítóhe sín tí ntabároç la ko tí it'é sín ntá sákjuíchréhe sín tí ch'ín Jesús.

Kjuakohé ch'ín Jesús nchónhya chojni
(Lc. 6.17-19)

²³ Ntá sákjuí ch'ín Jesús nkuíxín tí estado Galilea la kjuakoxín ch'án tí njnko Israel siín jnkojnko chjasin mé kjuako ch'án tí tan jína chrónka nkexrí tí kjuachaxin kuènte Dios la ko kjuínchekitohe ch'án jína kaín chojni chóna kaín xín chin la ko kaín kjuatjoté. ²⁴ Ntá kaín xín tí sín tjejó tí estado Siria mé kuínhin sín kuènte Jesús la kjuíkáo sín kaín xín tí sín níhi chóna kaín chin la ko tí sín imá tjotéhe sín la ko tí sín chóna nchakuen tí jínahya la ko tí sín t'aniáte sín la ko tí sín síxénká toté sín, la ntá ch'ín Jesús mé kjuínchekitohe ch'án sín jína. ²⁵ Ntá itsjé chojni kjuíchréhe tí ch'ín Jesús, mé kjuixín sín estado Galilea la ko tí chjasin chjinaxón Decápolis la ko chjasin Jerusalén la ko kuenté tí estado Judea la ko tí nó chók'á tjitoxín yaon tí ntario Jordán.

5

Kjuakoxín ch'ín Jesús ijnko jna

¹ K'uíkon ch'ín Jesús kixin k'uéjó nchónhya chojni la ntá chrín ch'án ijnko jna la ntaha kjuák'etjaxín ch'án. Ntá tí sín k'uájiko ch'án a mé kóchjina sín chjinaxón tjejóntaxin sín tí tjen ch'án. ² Ntá ch'ín Jesús kjuankixin kjuakohé ch'án sín kixin:

Tí nkexro tjejó náxrjón
(Lc. 6.20-23)

³ —Náxrjón tjejó tí sín nohe kixin t'ichjánxinhin sín nkehe kuènte Dios kixin ntá jehé sín mé tsochóna sín tí kjuachaxin kuènte Dios.

⁴ Náxrjón tjejó tí sín t'ává kixin Dios mé sinchechéhe asén sín.

⁵ Náxrjón tjejó tí sín hnkehya asén kixin jehé sín mé ts'áyéhe sín tí nonte tsjanjon Dios.

6 'Náxrjón tjejó tí sín éxí yóhe chrók'uenxín sín kjinta la chrók'uenxín sín ntá kixin xikaha imá tjinkaon sín sinchexiteyéhe sín Dios ntá Dios tsjinkítsa sín kixin ts'áyéhe sín tí nkehe tjinkaon sín.

7 'Náxrjón tjejó tí sín tikonóhehe kichó sín kixin ntá Dios kjaxin tsikonóhehe tí jehe sín.

8 'Náxrjón tjejó tí sín kótjóá asén kixin ntá jehe sín sátsjik'ikon sín Dios.

9 'Náxrjón tjejó tí sín tjinkaon kjuaxróxin kixin Dios sinchek'in ch'án xjeen ch'án tí jehe sín.

10 'Náxrjón tjejó tí sín kjónté tjejójtjasótexín sín kixin kjuínchexiteyéhe sín Dios kixin ntá jehe sín mé kuènte sín nkaya nkajní.

11 'Náxrjón tjejórá kjónté t'ántaxínhanrá sín la ko ntachrakonrá sín la ko kaín nkehe náxrjónhya ntácho sín kixin tinkachónkirá tí janhan.

12 Chrókócháhará la ko kjuaxróxin chrók'uejórá kixin ntá chr'éxin jahará ts'ayéhérá ijnko nkehe antsí má jína nkaya nkajní. Mé xikaha kjuasóte tí sín k'uéjó óse k'uéchrónka sín tí itén Dios.

Jahará la éxí yóhe xjnta la ko éxí xrohi t'inkaséyanxín chjasintajni
(Mr. 9.50; Lc. 14.34-35)

13 'Jahará mé yóhe éxí xjnta chjasintajni. A ntá tí chrók'uánkéhé tí jní tí xjnta la ntá xitjahya chrókójní inaá. Ninkehó chrókjuich'ehya xra la chrók'uikitíjí ntója la ko chrókuinkátja chojni.

14 'A ntá jahará la mé tí xrohi t'inkaséyanxín chjasintajni. Ijnko chjasin itjen chrítaón jna la xitjahya tsjak'emá. 15 La ko kohya nkexro sinchek'ákjen ijnko lámpara ntá tsjak'e chrínkí ijnko ntacajón. Íchá jína tsjak'e ch'án xrohi noi kixin ntá ts'inkaséyanxín kaín nkexro síin tí nchia ntiha. 16 Mé xikaha tí jahará chrókóyóhará éxí tí xrohi t'inkaséyanxín kixin ts'ikon kaín chojni tí xra jína tjejóch'erá la ntá chrókjuanchehe sín kjuasáyé It'éni tjen nkaya nkajní.

Kjuako ch'in Jesús kuènte tí ley

17 'Jahará chróntáchrohýará kixin k'uinka kixin tsjakjíyan tí ley tsík'etoan ch'in Moisés la ko tí nkehe kjuako tí sín k'uéchrónka itén Dios. Náhi. Jehya xikaha k'uinka kixin tsjakjíyan tíha. Náhi. K'uinka janhan kixin tsjákoxian nkehe chaxín t'axrxjén tíha. 18 Chaxín xrxanka kixin tí naxa tjen nkajní la ko chjasintajni la kohya ninkehó ley tsjlinhya, mé tsjlinhya nijnko punto la nijnko letra kuènté tí ley tsjixinjian tsoxiteyá kaín tí nkehe t'ichjánxin tsoxiteyá. 19 Mé xikaha tí nkexro tsitekakonhya tí nkehe k'uetoan tí ley kjónté ijnko nkehe imá intsí, la ko chrókjuako kixin xikaha chrókuitekakonhya chojni, la jehe sín la imá tsontsí sín tí tsi tí kjuachaxin kuènte Dios. A ntá tí nkexro tsitekaon la ko tsjakohe ókjé nkexro tsitekaon sín, mé antsí imá ts'etoan sín tí tsi kjuachaxin kuènte Dios. 20 Méxra tjonkará kixin t'ichjánxin kixin antsí jína ts'ejórá la tsoyóahýará tí sín tjako ley la ko tí sín fariseo kixin tí tsoyóhará sín la ntá xitjahya tsákjára tí kjuachaxin kuènte Dios tjen nkaya nkajní.

Kjuako ch'in Jesús kuènte tí kjuanínkaon
(Lc. 12.57-59)

21 'Jahará tsíkinhínra kixin tí sín óse tsík'ítuenhen sín kixin: "T'oyánhyará kíchuára* kixin tí nkexro t'óyán kichó mé t'ichjánxin tsjasóte sín." 22 A ntá janhan tjonkará kixin jnkójín nkexro tsonínkakonhen kichó mé t'ichjánxin

* 5:21 Éxodo 20.13; Deuteronomio 5.17

tsjasóte. **A** ntá tí nkexro t'ántaxínhìn kichó la mé tí sín t'etōan mé sinchekitoexín ijje ch'án. La ntá tí nkexro tsontáche kichó kixin tsixénká ch'án la tíha mé sátsji tsjasótexín tí síin xrohi. ²³ **A** ntá tí tsjikuehérá Dios nkehe tsochjehérá ch'án ntá tsjasánrá tí altar ntá tsoxráxinkáonrá tí jnkojín kichuárá kjuánjnkoará sín ²⁴ la ntá tí xíkaha la tītōhérá tí nkehe tí altar la sátsjirá tsonixjehérá ch'án jnkojína kixin í tsokehya kjuanínkaon. La ntá tsjixin la ntá tsjihará tsjánjonrá tí nkehe tjinkáonrá tsjánjonrá.

²⁵ 'Tí síin jnkojín nkexro tjanchia jje tí jahará la tjinkaon chrókjuikoárá ch'án juzgado, a ntá íchá jina jnkokoá chrókjuenkayáxinrá, jehe ch'án la ko jahará, ntia ó, kixin ntá sáchrókjuihará tí tjen ch'in juez. Kixin sáchrókjuirá tí tjen ch'án ntá jehe ch'án ts'etuenhen ch'án tí policía kixin ts'ixenhenrá ntōechiso. ²⁶ **A** ntá chaxín tjonkará kixin tí ts'ikjahará sín ntōechiso la ts'axrjéxinhyará ntiha tsjixinjian tsjenkeherá sín kaín xín chichaon chontará.

Ch'in Jesús kjuako kixin chrókjuasinhya sín jje, chróchóntahya sín chojni chjin ókjé

²⁷ 'Jahará tsikinhínrá tí nkehe tsík'ítuenhen tí sín ósé ntáchro kixin: "Chrókjuásinhyará jje, chróchóntahyará chojni chjin ókjé."† ²⁸ **A** ntá janhan tjonkará kixin tí nkexro tsokomá ijnko tjan ókjé tjak'e asén chrókuákja ch'án la ó kjuixin kjuasin ch'án jje nkaya asén ch'án.

²⁹ **A** ntá tí ikuan chjina chrókjuásixián jje la chrókuakitsjenkiá ikuan la chróchr'an ikjín kixin íchá jina ts'ítjáyán it'o cuerpo kuéntá kixin jehya kuénté cuerpo kuéntá sátsji tsjasótexín tí síin xrohi. ³⁰ **A** ntá tí itja chjina chrókjuásixián jje la chróchrínjian tí tjá a la chróchr'an ikjín kixin íchá jina ts'ítjáyán it'o cuerpo kuéntá kixin jehya kuénté cuerpo sáchrókjuí tsjasóte tí síin xrohi.

Ch'in Jesús kjuako kixin chrók'uitjéhya kichó sín

(Mt. 19.9; Mr. 10.11-12; Lc. 16.18)

³¹ 'Kjaxin tsík'ítuenhen tí sín ósé kixin tí nkexro tjinkaon chrók'uitjéhi ichjién t'ichjánxin ts'óna xroon tsakja tí ichjién kixin ts'itjéxin kichó sín.‡ ³² **A** ntá janhan tjonkará kixin ijnko nkexro tsjákehe ichjién tí chróchóntahya tjan ókjé nkexro la jehe ch'án kuítóhe ch'án tjan kixin tsjasin tjan jje. **A** ntá tí nkexro tsotehe ijnko tjan tsíkítsinkehe la kjaxin ó kjuasin ch'án jje.

Ch'in Jesús kjuako kixin chjiníhya chrók'uákjenxinni ihnié Dios

³³ 'Kjaxin tsíkinhínrá tsík'ítuenhen tí sín ósé kixin: "T'ichjánxin sijnchexiteyará tí nkehe tsintáchorá kixin chrók'uákjenxinhyará ihnié Ìnchéni chjiní."§ ³⁴ **A** ntá janhan mé tjonkará kixin chrók'uákjenxinhyará ihnié Dios ninkehó la ko chrók'uákjenxinhyará nkajní kixin ntaha tjan Dios t'etōan. ³⁵ La ko chrók'uákjenxinhyará chjasintajni kixin ntaha tjejókjen toté ch'án la ko chrók'uákjenxinhyará chjasin Jerusalén kixin ntiha la itjen tí Rey t'etōan. ³⁶ La tjenkayáxixínhyará ikjára ó kixin jahará xitjahya tsjakérá ijnko kaxíhi tjóá o nijnko kaxíhi tié. ³⁷ Tí nkehe tsontáchorá chaxín la chaxín la tí nkehe náhí la náhí la kohya nkehe chrókjuakét'oxinrá chróchrónkará. **A** ntá ichrén nkehe tjakét'oxinrá tsochrónkará la táha mé jínahya.

† 5:27 Éxodo 20.14; Deuteronomio 23.21 ‡ 5:31 Deuteronomio 24.1-4 § 5:33 Números 30.2; Deuteronomio 23.21

Ch'ín Jesús tjako ch'án kuènte tí sín t'itjáyenhya ichrén kjuanínkaon
(Lc. 6.29-30)

³⁸ Jahará mé ó tsíkinhínrá tsík'ítuenhen tí sín ósé kíxin tí takitsjenkí sín ikonrá la kjaxinrá chrókuakitsjenkírará ikon sín. A ntá tí chrókuakitsjenkí sín nènorá la kjaxinrá chrókuakitsjenkírará neno sín kjaxin.* ³⁹ A ntá janhan mé tjonkará kíxin tí jnkojín nkexro ichrén nkehe jínahya sit'ahará la jahará ch'ehyará xíkaha. Náhí. Tí chjéhe ijnko nkexro ijnko tuʒaan la ntá tjóka tí í jnko nàngo tuʒaan. ⁴⁰ La tí síin jnkojín nkexro tjanchia jje la tjinkaon sín chrókuakitsjaha sín camisá la tjtóhé sín sátsjiko sín tí ka t'ínkayate kjaxin. ⁴¹ La tí t'etuahanhá sín tsámárá nkehe ijnko kilómetro la tjakét'oxinrá í yaá kilómetro. ⁴² Tí jnkojín nkexro tsanchia nkehe la tí tjinkaon ch'án nkehe la chróntáchrohyará kíxin “náhí”, chrókjuinchejenrá ch'án.

Tjuèhérá tí sín nínkakonhanrá sín
(Lc. 6.27-28, 32-36)

⁴³ Kjaxin ó tsíkinhínrá tsík'ítuenhen tí sín ósé kíxin: “Tjuèhérá tí nkexro choxinrá la tsoninkákonhénrá tí sín jínahya kjuít'ahará.” † ⁴⁴ A ntá janhan mé tjonkará kíxin chrótjuèhérá tí sín nínkakonhanrá la chrókjuincheyaonrá tí sín jínahya kjuít'ahará la jína chrókjuinkitsará tí sín tjínkakhya tí jahará la chrónixjehérá Dios kíxin chrókjuinkitsa ch'án tí sín t'ántaxínhanrá la ko tí sín t'ahará tí jínahya. ⁴⁵ Tí xíkaha sích'erá la ntá jahará chaxín xjeen It'éni tjen nkaya nkajní kíxin jehe ch'án mé t'etóan ch'án tsjiton yaon ts'inkaséyenhen tí sín jínahya la ko tí sín jína la ko kjaxin t'etóan ch'án kíxin ts'aniá ichrin tí síin tí sín jína la ko tí sín jínahya. ⁴⁶ Tí jehó tjuèhérá tí nkexro tjuáhará, ¿la ntá nkehe chrókjuachará? A ntá kjaxin tí sín nchekjènkj la xíkaha ch'e sín. ⁴⁷ La tí jehó nixjehérá tí sín kichuárá la ntá, ¿á chaxín imá jína tíha ní? Kíxin tí xíkaha la kjaxin tí sín chónhya Dios la xíkaha ich'e sín. ⁴⁸ Kjaxinrá jahará ntoá chrók'uejorá kíxin It'éni tjen nkaya nkajní la antsí má ntoá tjen ch'án.

6

Kjuako ch'ín Jesús kuènté tí xra jína

¹ Chrókjuásixínhyará kjuaxroan tí nkehe tinkachónkirá kíxin tjínkáonrá chrók'uikon chojni ó. A ntá jahará tí xíkaha chrókjuich'erá ntá It'éni tjen nkaya nkajní la ninkehó nkehe tsotjáhyará ch'án. ² Tí tjínkitsará ijnko chojni nõa la ninkexró chróchenkahyará. Jahará chrókóyóahyará tí sín ntoáhya tjenkayáxin ixri t'óxroan kíxin mé xíkaha ch'e sín t'óxroan sín nkaxenhen nínko la ko tí ntja kíxin chrók'uikon chojni la chrókjuikosáyehe sín tí jehe sín kíxin jína tjejóch'e sín. A ntá janhan ntáxrxan kíxin ó kjuixin k'uáyéhe sín nkehe la í ts'áyèhya sín inaá. ³ A ntá tí jahará tíó chrókjuinkitsará ijnko chojni chaxín nõa la íchá jína kíxin chrókónoehya ninkexró kjónté ijnko nkexro tjuá jína. ⁴ A ntá jahará tí chrókjuánjonrá ichrén nkehe la ninkexró chrókónoehya la ntá tí It'éni ts'ikon ch'án kíxin xíkaha ch'erá la ninkexró noehya la ntá tí jehe ch'án mé tsotjáhará ch'án nkehe.

Tjako ch'ín Jesús nkexrí tsonixjeheni Dios
(Lc. 11.2-4)

⁵ A ntá tíó nixjehérá Dios la jehya éxí tí sín jnkojínxónhya tjenkayáxin sín chrónixjará. Jehe sín mé tóxrxjnhjn sín ts'ejóxin toté sín nkaxenhen

* 5:38 Éxodo 21.24; Levítico 24.20; Deuteronomio 19.21 † 5:43 Levítico 19.18

nínko la ko ts'ejó sín esquina calle kuènte ntasin kixin ts'ikon kaín chojni kixin tjeónixjehé sín Dios. Ntá janhan chaxín ntáxrjan kixin jehe sín la xikaha kjuich'e sín la ó kjuixin k'uáyéhe sín nkehe la í ts'áyèhya sín inaá. ⁶ A ntá tió nixjehérá Dios la t'ixenhenrá nchia ntoará la t'íkjhérá tí puerta la nixjehérá It'eni kixin ntaha tjekoará ch'án. A ntá jehe ch'án ts'ikon kixin xikaha ninkexró ts'ikonhya ntá jehe ch'án tsjanjon ch'án nkehe ts'ayéhérá.

⁷ 'Ntá tió chrónixjehérá Dios la chrókjatèehya chrónixjará kixin chrókóyóahyará éxi tí sín chónhya Dios kixin jehe sín tjenkayáxin sín kixin nchónhya tsonixja sín, la mé xikaha mé chrókuinhin Dios, ichro sín. ⁸ A ntá jahará chrókóyóahyará éxi tí jehe sín. It'eni ó nohe ch'án nkehe t'ichjánxinhanrá kjónté naxa tjanchéhyará ch'án. ⁹ Méxra xikihí chróntáchrórá:

It'eni tjen nkaya nkajní jaha imá tjóá.

¹⁰ Chrókui tí kjuachaxin kuènta.

Chrókjuich'e tí nkehe tóxrjínhan jaha ntihi chjasintajni éxi tjech'e nkaya nkajní.

¹¹ Ijie la tsjánjuan tí niqtja t'ichjánxinhinni.

¹² T'oxíka tí nkehe jínahya kjuich'eni kixin kjaxin jeheni ts'itjáyhenni tí nkehe kjuich'ehe ni chojni.

¹³ Tjtoéhyani kixin xrahya chrókjuasinni jie. Nchekaáni kaín tí jínahya chrókónhenni,

kixin jaha mé kuèntá tí kjuachaxin kixin ó noheni kixin jaha tjetétoan tí kjuachaxin jnkochríxín. Amén.

¹⁴ 'Tí jahará ts'itjáyanhanrá tí nkexro kjuasinhánrá ichrén jie la mé kjaxin It'eni tjen nkaya nkajní mé ts'ikon ch'án kixin xikaha kjuich'erá la ntá kjaxin jehe ch'án ts'óxíka ch'án tí jie kjuásinrá. ¹⁵ A ntá tí jahará ts'itjáyanhyará tí jie kjuasinhánrá í jnko chojni la ntá kjaxin It'eni tjen nkaya nkajní ts'ikon kixin xikaha kjuich'erá k'uitjáyanhyará la ntá kjaxin jehe ch'án la ts'óxíkahya ch'án tí jie chontará.

Ch'ín Jesús kjuako kixin chrók'óxroanhya sín kixin kjónehya sín

¹⁶ A ntá tí jahará tí naxa kjóntehyará kixin tjinkáonrá tsonixjehérá Dios la ntá chrók'uejohyará éxi t'avará éxi ch'e tí sín jehya jnkojínxón tjenkayáxin sín. Mé xikaha ch'e sín kixin tjinkaon sín ts'ikon chojni kixin naxa kjónehya sín. Tí xikaha ch'e sín la janhan ntáxrjan kixin ó kjuixin k'uáyéhe sín nkehe la í ts'áyèhya sín inaá. ¹⁷ A ntá tí jahará kjónté naxa kjóntehyará kixin tjinkáonrá tsonixjehérá Dios la t'ontirá ikonrá la tjéntoará kjará ¹⁸ kixin tsonoehya chojni kixin naxa kjóntehyará. Jehó It'eni tjekoará ntiha mé jehe ch'án nohe ch'án xikaha ntá tsjanjon ch'án nkehe ts'ayéhérá.

Tí nkehe chaxín tjete síin nkaya nkajní

(Lc. 12.33-34)

¹⁹ Jahará chrókjuásitonhyará nkehe tjete ntihi chjasintajni kixin ntihi la ts'in kué tí nkehe tjete sinchek'itjáyanhanrá va la ko tsqchjisen tí chichaon la ko xíchee ts'ixenhen tsaáhará. ²⁰ Íchá jína tjásitonrá tí nkehe tjete nkaya nkajní kixin ntaha kohya iko sinchek'itjáján nkehe la tsqchjisenhya tí nkehe la ko kohya xíchee ts'ixenhen tseé. ²¹ A ntá tí nkaya nkajní tsqchontará nkehe tjete la ntá tí nkehe tjenkayáxinrá la kjaxin ntaha tjen.

Tí xrohi t'inkaséyanxín cuerpo

(Lc. 11.34-36)

²² Tí ikonrá mé éxí yóhe ijnko xrohi t'inkaséyanxín tí cuerpo kuéntará. Tí jína ikonrá la ntá kjaxin kuenté ti cuerpo kuéntará mé chóna xrohi. ²³ A ntá tí ikonrá la jínahya la ntá kuenté tí cuerpo kuéntará la sítié tjen. A ntá tí chrókjuak'ehya tí xrohi la ntá antsí má chrókjuinchetié tí sítié.

Dios la ko tí chichaon

(Lc. 16.13)

²⁴ 'Kohya ninkexró tsjacha sich'ehe xra yaá lamó. Tí xikaha chrókjuich'e ch'án la ntá ijnko tsonínkakonhen ch'án la tí í jnko tsotjuéhe ch'án o ijnko la tsitekakonhen ch'án la tí í jnko la tsitekakuenhya ch'án. Méxra xitjahya chrókjuich'ehe chojni xra Dios tí tjinkaon sín chróchóna sín itsjé chichaon.

Dios mé t'áyakonhen tí xjeen ch'án

(Lc. 12.22-31)

²⁵ A ntá ntáxrjan kixin chrókóxakuanhyará tí nkehe chrókjónterá o tí nkehe chrók'uirá o tí ka chrók'uítará. ¿Á jehya antsí má sínkí tí kjuachón chróchontará, a ntá kánhyó sínkí tí nkehe chrókjónterá, la á jehya antsí má sínkí tí cuerpo kuéntará, a ntá kánhyó sínkí tí ka chrók'uítará? ²⁶ Xráxinkáonrá nkexrí síin tí koxroxé xritjaka. Jehe va la t'enkahya va noa la ko tjáhya va la ko chóntahya va nketí ts'ínkajhinayá va tí noa, la kjánchó It'éni tjen nkaya nkajni la tjanjon ch'án nkehe sine va. A ntá jahará mé antsí tjetóan a ntá tí koxroxé la kénhyó. ²⁷ ¿Á tjejó jnkojínra tjenkayáxinrá kixin tí chrókóxakonhanrá imá a ntá naxa chrók'uankirá it'o metro ntetoxinrá inaá?

²⁸ ¿Nkekuénté kixin imá tóxakonhanrá ikará ó? Tsjehérá nkexrí sít'ánkí tí catsjo síin nteje. Tí itsjo la ní ch'ehya xra la ko tjonhya. ²⁹ La tjonkará kixin kjónté ch'ín rey Salomón k'uéchóna itsjé chichaon la naxa kjuíncheyóehya ch'án nkexrí náxrjón tsjehe tí tsjo a. ³⁰ A ntá tí Dios la nchek'ítsa tí ka yoa síin nteje kjónté ijie síchón ka la ntóye tsochexín tí nkaxenhen tja, a ntá jahará mé antsí chrókjuintak'itsará ch'án. ¿A ntá nkekuénté títekákonhyará ch'án? ³¹ Méxra xikaha chrókóxakuanhyará chrókjuanchankíhyará kixin nkehe chrókjónterá o nkehe chrók'uirá o nkehe chrók'uítará. ³² Kaín tí nkehe la tí sín chónhya Dios mé tóxakonhen sín tíha. A ntá jahará chontará It'éni tjen nkaya nkajni la mé nohe ch'án kaín nkehe t'ichjánxinhanrá. ³³ A ntá senó mé chrókjuéyará tí kjuachaxin kuénté Dios la chrókjuínchexitéyará tí nkehe jína tjinkaon ch'án, a ntá jehe ch'án mé tsjanjon ch'án kaín nkehe t'ichjánxinhanrá. ³⁴ Tóxakuanhyará tí nkehe tsonhen ntóye xikaha kixin ntóye la í jnko yaon táha la jnkojnko yaon tjikao kjuaxikaon kuénte.

7

Chrók'uantaxíenhyará kichuára

(Lc. 6.37-38, 41-42)

¹ Chrókuékahyará ókjé chojni jie kixin ntá Dios kjaxin chrókjuanchahya jie tí jahará. ² A ntá Dios la tsjanhia ch'án jie tí jahará tí tsékará ókjé chojni jie. A ntá tí xikaha sích'erá la mé xikaha tsonhanrá kjaxin. ³ ¿A ntá nkekuénté tsjehé tí chjíninó ntsí tjenkánkí ikon tí kichuá tí naxa ántosán tí inta jie tjenkánkí ikuan? ⁴ A ntá tí chonta jaha tí nta jie tjenkánkí ikuan,

ǵa ntá nkexrí kixin chróntáche tí kichuá kixin: “T̄itohé tsakitsjenkíni tí chjínínó ntsí tjenkánkí tí kuan?” ⁵ A ntá jaha la ntoáhya tjenkayáxian. Senó chrókuakitsjenkiá tí nta jié tjenkánkí ikuan kixin ntá chrók'uikuan tsakitsjenkiá chjínínó ntsí tjenkánkí ikon tí kichuá.

⁶ 'Chróchjéehyará tí nkehe tsikótjóa tí konjā kixin jehe va tsokjan va tsonínakakonhanrá va ntá sinchekuenrá va. La ko kjaxin chróchjéehyará tí cochíno tí xro perla tjete kixin tsinkátja va la tsokuen.

Tjanchia la tjéyá la t'inka puerta

(Lc. 11.9-13; 6.31)

⁷ 'Tjanchiará nkehe la Dios tsotjáhará. Tjéyará nkehe la ts'itjará. T'inkará puerta la ntá tsoxitjehe. ⁸ Kixin tí nkexro tjanchia nkehe la ts'áyehé tí nkehe la tí nkexro tjejá nkehe la ts'itja la tí nkexro t'inka puerta la tsoxitjehe.

⁹ 'ǵÁ tjejó jnkójín nkexro ntihi chrókjuanjon xro chrókjóné xjeen tí chrókjuanchia xjan niotja? Kja náhi. ¹⁰ Q tí chrókjuanchia xjan ijnko koche la, ǵá chróchjéhe ch'án tí xjeen ch'án konche chrókjóné ní? Kja náhi. ¹¹ A ntá jahará kjónté jínahyará la ó nohará nkehe jína chjehérá xjaanrá. A ntá It'éni tjen nkaya nkajní kjaxin antsí tsochjéhe ch'án nkehe jína tí nkexro tsjanchia nkehe.

¹² 'Méxra xikaha chrókjuikosáyehérá kichuárá éxí yóhe nkexrí tjinkáonrá chrókjuikosáyahará sín mé xikaha k'uetoan ch'in Moisés la ko xikaha ntácho tí xroon kuente tí sín k'uéchrónka itén Dios ósé.

Tí puerta tekahya

(Lc. 13.24)

¹³ 'Tixeenxínrá tí puerta tekahya. Kixin tí puerta la ko tí ntja ts'itjáyaxín chojni la imá iton la ko teka la nchónhya chojni sátsji tí ntja ntiha. ¹⁴ A ntá tí puerta la ko tí ntja sátsjixinni tí kjuachón la tekahya ntiha la ko tsjéhya chojni ts'itja tí ntja a.

Tí to mé tjátsoanxínni tí nta

(Lc. 6.43-44)

¹⁵ 'Méxra tóxakonhanrá tí ts'ikonrá itsi tí sín ch'ia tsontácho sín kixin kjaxin sín nixja sín itén Dios. Jehe sín la chrítaón ó tjoé kolélo ó, a ntá nkaya la kolobo jiehe. ¹⁶ Jahará la chrókjuátsoanxínrá tí jehe sín kixin tí xra ch'e sín kixin tí ntach'lj la xitjahya chrók'óna to uva la ko tí kach'lj xitjahya chrók'óna to higo. ¹⁷ Méxra kaín inta jína la t'óna to jína la ntá tí nta jínahya la kjaxin tí to la jehya to jína. ¹⁸ Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína. ¹⁹ Kaínxín tí nta t'ónahya to jína mé tsochrínjin la tsoche. ²⁰ Mé xikaha chrókjuatsoanxínrá jahará tí sín jehya jína kixin tí xra tjejóch'e sín.

Jehya kaín chojni ts'ixenhen tí kjuachaxién Dios tjen nkaya nkajní

(Lc. 13.25-27)

²¹ 'Kénhya chojni tsontácho: “Ìnchéni, Ìnchéni”, mé ts'ixenhen sín tí kjuachaxién Dios tjen nkaya nkajní. Náhi. Jehó tí nkexro sinchexiteyá tí nkehe tóxrjínjin T'aná t'etoan tjen nkaya nkajní. ²² Tsjixraká tí yaon a la ntá itsjé sín tsontácho sín kixin: “Ìnchéni, Ìnchéni, k'uénixjaxínni ihniá la ko tí ihniá mé kuakitsjexínni nchakuen tí jínahya la ko kjuachaxién ihniá kjuasixínni nchónhya kjuaxroan.” ²³ A ntá janhan tsjatahā kixin: “Janhan la chonhya tí jahará. T̄itōnará sájtirá kixin jahará imá jínahyará.”

Ch'ín Jesús kjuíncheyóexin ch'án kixin yaá nchia

(Lc. 6.47-49; Mr. 1.22)

²⁴ Méxra tí nkexro tinhin tí nkehe ntáxrjan la titekaon ch'án la jehe ch'án mé éxi yóhe ijnko nkexro chóna kjuaxrexinkaon jina la kjuich'ena nchia chrítaón tjō. ²⁵ A ntá xríñahya xrakoa chrin, ikui yeé ntānínche la tñjan chjéhe xrintō la kjónté xikaha la xikaha tí nchia kixin itjō tjekjen nchia. ²⁶ A ntá tí nkexro tinhin tí xrxanka la titekakonhya mé jehe la éxi yóhe ijnko nkexro lōntj la kjuich'ena ch'án ijnko nchia tí síin nchesen. ²⁷ La ntá xríñahya xrakoa chrin ntá antsí kóyeé ntānínche tí tsaka la ko chjéhe xrintō la ntá xika tí nchia, la ijnko kjuachrakon kónhen tíha.

²⁸ A ntá tió kjuixin nixja ch'ín Jesús la ntá imá chrakon tí chojni kixin nkexrí kjuako ch'án. ²⁹ Kixin kjuako ch'án éxi ijnko nkexro chóna imá kjuachaxin la tóyóehya ch'án tí sín maestro kjuako tí ley.

8

Ch'ín Jesús kjuínchekitōhe jina ijnko chojni chóna chin lepra

(Mr. 1.40-45; Lc. 5.12-16)

¹ A ntá ch'ín Jesús k'uínkajinxin ch'án tí jñā la chréhe nchónhya chojni. ² La ntá kóchjina ijnko ch'ín níhi chóna chin lepra la kjuák'exín toch'ín ch'án nkayakon ch'ín Jesús la ntáchro ch'án kixin:

—Ínchéni tí tjinkávan la jina chrókjuínchekitōhéni jina —ichro ch'án.

³ Ntá ch'ín Jesús mé kjuak'etja itja ch'án chrítaón tí ch'ín a la ntáchro ch'án kixin:

—Méxra xikaha tjinkávan. Ntá jie sintakitōha jina.

A ntá tuénxín kuítóhe ch'án jina la ó kjuin tí chin k'uéchóna ch'án.

⁴ La ntá ntáchro ch'ín Jesús kixin:

—Ninkexró chēnkahya ntihi. Jehó sátjia tjákohe tí ch'ín nchat'á kixin kuítóha jina la ko sátjioa tí nkehe tsík'etōan ch'ín Moisés* kixin ntá xikaha tsonoexín kaín xín chojni kixin ó kuítóha jina —mé xikaha k'uetōan ch'ín Jesús.

Ch'ín Jesús kjuínchekitōhe jina ijnko nkexro ch'ehe xra ijnko capitán romano

(Lc. 7.1-10)

⁵ A ntá tió k'uixenhen ch'ín Jesús chjasin Capernaum la ntá xríñahya kóchjina ijnko capitán romano la chróna ch'án ⁶ ntáchro ch'án kixin:

—Ínchéni ntōeni itjen ijnko ch'ín ch'ehe ni xra mé níhi ch'án, tjetsínka ch'án, tsík'en toté ch'án la imá tjetéhe ch'án —ichro ch'án.

⁷ A ntá ch'ín Jesús kjuátehe ch'án ntáchro ch'án kixin:

—¿Á sátsjia sintakitōha jina tí ch'ín a? —ichro ch'án.

⁸ Ntá tí ch'ín capitán kjuátehe kixin:

—Náhí, Ínchéni, tósuēheni kixin chrók'uixēnhén ntōeni kixin jehya chojni jínani. Jehó chrókjuánjuan kjuachaxin kuéntá, ntá tí ch'ín ch'ehe ni xra chrókuitōhe ch'án jina. ⁹ Janhan na kjaxin chonta chojni t'etuanna la ko kjaxin janhan tétuñhan tí sín soldado. Tió tétuñhan ijnko sín sátsji sín la ntá ó sátsji sín. La kjaxin tió tétuñhan ijnko sín kixin xrakoa sín la mé tji sín. La ko tió tétuñhan ijnko nkexro ch'ena xra kixin sich'e xra la ich'e xra —ichro ch'án.

* 8:4 Levítico 14.1-32

¹⁰Ntá kuínhin ch'ín Jesús ntá kóxakonhen ch'án kixin xikaha chro tí ch'ín a, ntá nixjehe ch'án tí sín chréhe ch'án ntáchro ch'án kixin:

—Chaxín ntáxrjan kixin kuénté tí nación Israel la k'uitjahya janhan ninkexró tinkáchónki xikaha éxí tinkáchónki tí ch'ín i. ¹¹Janhan xrjanka kixin nchónhya chojni ókjé tji_xin tí tji_toxin yaon la ko tí tjiátóxin yaon la sineko sín tí ch'ín Abraham la ko Isaac la ko Jacob tí tjen tí kjuachaxin kuènte Dios. ¹²A ntá itsjé tí sín chrók'uejó tí tjen tí kjuachaxin kuènte Dios la ts'axrjexín sín ntiha, sátsji sín tí sítié la ntaha tsotsjánka sín la sinetaón neno sín.

¹³La ntá ch'ín Jesús mé nixjehe ch'án tí ch'ín capitán ntáchro ch'án kixin:

—Sátjia ntóa. Éxí kuítekáván jaha la tsoxiteyá tsonhen tíha —ichro ch'án.

La ntá tí ch'ín ch'e xrá la o tuénxín tí hora a tsíkitóhe ch'án jína.

Ch'ín Jesús kjuínchekitohe ich'ee ch'ín Pedro jína

(Mr. 1.29-31; Lc. 4.38-39)

¹⁴A ntá sákjuí ch'ín Jesús tí ntóe ch'ín Pedro la ntaha k'uíkon ch'án kixin tí ich'ee ch'ín Pedro la níhi tjan tjetsínka tjan la chóna tjan sóa. ¹⁵Ntá itsé ch'án itja tjan la ntá kjuíinhin tjan tí sóa la ntá k'uínkatjen tjan la kjuankixin yaxínhin tjan kixin tsjanjon tjan nkehe sine sín.

Ch'ín Jesús kjuínchekitohe nchónhya tí sín níhi jína

(Mr. 1.32-34; Lc. 4.40-41)

¹⁶La ntá tí ó kóntanonte ntá kjuikohe sín ch'ín Jesús nchónhya chojni chóna nchakuen tí jínahya. La ntá jnkokoá nixja ch'án la k'uaxrjexín tí nchakuen tí jínahya tí jehe sín la kjaxin kjuínchekitohe ch'án jína kaín tí sjnníhi. ¹⁷Mé xikaha kjuích'e ch'án kixin tsoxiteyá tí nkehe tsíchrónka tí ch'ín Isaías tí ch'ín k'uéchrónka itén Dios. Mé ntáchro ch'án xikihi: “Jehe ch'án kuákja ch'án tí chin chóntani la ko jehe ch'án kuámá ch'án tí kjuatjoté.”† Mé xikaha ichro itén Dios.

Tí sín tjinkaon tsochréhe tí ch'ín Jesús

(Lc. 9.57-62)

¹⁸Tió k'uíkon ch'ín Jesús kixin nchónhya chojni k'uántatjen sín ch'án la ntá k'ueñoan ch'án kixin ts'átóye sín í jnko chrínta ntá. ¹⁹La ntá ijnko tí sín maestro tjako tí ley mé kóchjinehe ch'án tí ch'ín Jesús la ntáchro ch'án kixin:

—Maestro tjinkaonni chróchréheni tí jaha kjónté nketí tjinkáván sátsjia —ichro tí ch'ín a.

²⁰La ntá kjuátehe ch'ín Jesús ntáchro ch'án kixin:

—Tí koxróntá chóna va itjueé va la ko tí koxroxé chóna va kaké va. A ntá tí Xjeen Dios K'óna Chojni mé chóntahya nketí ts'ok'èxin ch'án.

²¹A ntá ijnko tí chojni k'uájiko ch'án, mé ntáchro ch'án kixin:

—Ínchéni, tjtóhéni senó sátsjikjaváni it'éni —ichro ch'án.

²²La ntá kjuátehe ch'ín Jesús ntáchro ch'án kixin:

—Náhi, chréhe tí janhan. Tjtóhé kixin tí chojni tsík'en la jnkokón sín tsík'en tsjavá kichó sín —mé xikaha ichro ch'ín Jesús.

Ch'ín Jesús kjuínchek'ixrata tí xrínto la ko tí nta

(Mr. 4.35-41; Lc. 8.22-25)

²³Ntá ch'ín Jesús k'uíxenhén tí ntabárcó la k'uíxenko ch'án tí sín k'uájiko ch'án. ²⁴La ntá xrinahya imá síchrica ntá la ó chjina sítikia ntá tí ntabárcó.

La kjánchó ch'ín Jesús la tjejua ch'án. ²⁵ La ntá tí sín k'uájiko ch'án kjuínchek'àya sín ch'án la ntáchro sín kixin:

—Ínchéni nchekaáni kixin tí ntabárço la ó meró ts'aniánkí ntá —ichro sín.

²⁶ Ntá kjuátèhe ch'án ntáchro ch'án kixin:

—¿Nkekuènté kixin imá chrakonrá? Intsíkoá tinkachónkirá Dios —ichro ch'án.

Kjuixin ntáchro ch'án xíkaha ntá k'uàya ch'án la k'uètuènhen ch'án tí xrinto la ko tí ntayaon la ntá tuénxín k'uixrata. ²⁷ La ntá imá chrakon sín la ntáchro sín kixin:

—¿Xá nkexro tíhi? Kjónté xrinto la ko ntayaon la mé nchexiteyéhe ch'án —ichro sín.

Tí sín chóna nchakuen tí jínahya tí nonte Gadara

(Mr. 5.1-20; Lc. 8.26-39)

²⁸ Ntá tió k'uátòye ch'ín Jesús tí ntayaon a ntá kjuíji sín tí nonte Gadara. La ntá yaá chojni chóna nchakuen tí jínahya k'uaxrjexín tòyé chojni tsík'en la kóchjinehe sín ch'án. Jehé sín mé imá jìehe sín la kohya ninkexró tjacha ts'atsínka tí ntja ntiha. ²⁹ La ntá kjuankixin k'óyako sín ntáchro sín kixin:

—Tjiátèhya jaha tí jeheni jaha Jesús mé Xjeen Dios. ¿Á k'uinka ntihi kixin sìnchekjasóteni kjónte naxa kjuixrakáhya tí yaon tsjasóteni? —ichro sín.

³⁰ A ntá ntiha kánhyó kjín síin itsjé cochíno xrine va. ³¹ La ntá tí nchakuen tí jínahya mé chrónóehé tí ch'ín Jesús kixin:

—Tí tsétoan kixin sátsjini la chrókuánjuan kjuachaxin chrók'uixenhenni tí cochíno —ichro sín.

³² Ntá ntáchro ch'ín Jesús kixin:

—Tí xíkaha la sátsjia —ichro ch'án.

La ntá tí nchakuen tí jínahya a mé k'uaxrjexín tí chojni la k'uixenhen tí cochíno. La ntá kaín xín tí cochíno kuinká va, k'uínkajinxín va ntiha kjuítsínkayá va tsaka, ntá kjuítsínkankí va ntá, kjuínhin va ntá.

³³ La ntá tí chojni t'ayakonhen tí cochíno mé chrakon sín ntá kuinká sín sákjuí sín chjasin la kjuankixin chrónka sín kaín tí nkehe kónhen la ko kaín nkehe kónhen tí sín k'uéchóna tí nchakuen tí jínahya. ³⁴ A ntá kaín tí sín chjasin ntiha sákjuítsjehe sín ntá kjuíji sín tí tjen ch'ín Jesús ntá k'uíkon sín kixin xíkaha tsíkónhen la chrónóehé sín ch'án kixin sáchrókjuí ch'án ókjé.

9

Ch'ín Jesús kjuínchekitòhe jína ijnko chojni tsík'en toté

(Mr. 2.1-12; Lc. 5.17-26)

¹ La ntá kjuixin tíha ntá ch'ín Jesús mé k'uixenhen ch'án ijnko ntabárço la k'uátsínka ch'án íjnko lado chrínta ntá la kjuíji ch'án chjasén ch'án. ² A ntá ntiha kjuíkəo sín ijnko ch'ín tsík'en toté la tjetsínkaták'á ijnko kania. Ntá k'uíkon ch'ín Jesús kixin chaxín tinkáchónki sín ch'án la ntá nixjehe ch'án tí sijníhi ntáchro ch'án kixin:

—Xjeenni nchechéhé asán. Tí jìe chonta la ó kjuixin kjuínhan —ichro ch'án.

³ La ntá iso tí sín maestro tjako tí ley mé jehó sín ikjo sín asén sín, ntáchro sín kixin:

—Tí ch'ín i mé ncheyóhé ch'án asén ch'án Dios kixin xíkaha nixja ch'án.

⁴ Ntá ch'ín Jesús mé ó nohe ch'án kixin nkehe tí kjo sín asén sín ntá ntácho ch'án kixin:

—¿Nkekuènté kixin xikaha jínahya tjenkayáxinrá? ⁵ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuinhin ch'án tí jie yámá ch'án o á antsí xrahya chróntátjan ch'án kixin chrók'uínkatjen ch'án sáchrókjui ch'án? ⁶ Méxra tsjákoxian kixin tí Xjeen Dios K'óna Chojni mé ntihi chjasintajni chóna kjuachaxin tsjakjinhin ijie chojni.

Ntá ntáche ch'án tí sinníhi a kixin:

—Ijie la t'inkatjen tjatsíyan kaniáa na sátsjia ntóa —ichro ch'án.

⁷ Ntá tí ch'ín tsík'en toté na tuénxín k'uínkatjen ch'án la sakjuí ch'án ntóe ch'án. ⁸ Ntá kaín tí sín siín ntiha k'uíkon sín kixin xikaha kónhen la imá chrakon sín la kjuanchehe sín Dios kjuasáya kixin tí nkexro imá kjuakoxin ch'án kjuachaxin kuènte Dios.

Ch'ín Jesús k'uíyehé ch'án tí ch'ín Mateo

(Mr. 2.13-17; Lc. 5.27-32)

⁹ A ntá ch'ín Jesús sákjuixin ch'án ntiha la k'uíkon ch'án ijnko ch'ín it'ín Mateo tjetjaxin ch'án ntiha nchekjènkí ch'án. Ntá ntácho ch'ín Jesús kixin: —Chrèhé tí janhan —ichro ch'án.

Ntá ch'ín Mateo tuénxín k'uínkatjen ch'án chrèhé ch'án tí ch'ín Jesús.

¹⁰ A ntá chr'éxin ch'ín Jesús kjuák'e ch'án ntóe tí ch'ín Mateo la ntaha xranjon nkehe sine ch'án la ntá itsjé tí sín nchekjènkí la ko í so sín chóna jie mé kjuíji sín la kjaxin kjóneko sín tí ch'ín Jesús la ko tí sín k'uájiko ch'án. ¹¹ La ntá tí sín fariseo kjaxin k'uíkon sín xikaha la kjuanchankíhi sín tí sín k'uájiko ch'ín Jesús, ntácho sín kixin:

—¿Nkekuènté kixin tí ch'ín maestro kuèntará mé neko ch'án tí sín nchekjènkí la ko tí í so sín chóna jie? —ichro sín.

¹² Ntá ch'ín Jesús la kuínhin ch'án nkehe tí tjo sín la ntácho ch'án kixin:

—Tí sín níehya la t'ichjánxienhya sín nkexro sich'e xroan. Náhi. Jehó tí chojni níhi mé t'ichjánxinhin sín nkexro sich'ehe sín xroan. ¹³ Sátjirá la ts'ítjará nkexrí t'axrjexín tí nkehe ntácho xroon itén Dios. Mé ntácho kixin: “Janhan tjínkavan kixin chrókuikonóhéhá chojni la tjínkakhonhya kixin chrók'oyánrá iko chrókjuánjonrá.”* Mé xikaha ichro itén Dios. Janhan na k'uinkahya ntihi kixin chrók'uíyahá chojni jína tjejó. Náhi. K'uinka kixin ts'íyahá tí chojni chóna jie kixin chrókuítóhe sín tí ijie sín ntá chrókuinkí sín tí tjenkayáxin sín —ichro ch'án.

Kjuanchankí sín kuènte tí nehya sín

(Mr. 2.18-22; Lc. 5.33-39)

¹⁴ Ntá iso tí sín k'uék'ajiko tí ch'ín Juan Bautista mé kóchjinehe sín ch'ín Jesús la kjuanchankíhi sín ch'án, ntácho sín kixin:

—Jeheni la ko tí sín fariseo la jnkoyaxon nehiani, a ntá tí sín xrikoá la, ¿nkekuènte xikahya ch'e sín? —ichro sín.

¹⁵ Ntá kjuátèhe ch'ín Jesús, ntácho ch'án kixin:

—¿Xá chrók'uává kaín tí sín tsík'íyehé sín tsochjina tsotèhe ijnko chojni kixin naxá tjen tí ch'ín tsíkótèhe tjejóko sín ntiha? A ntá tsjixraká ijnko yaon tsotsé sín tí ch'ín tsíkótèhe sátsjiko sín ch'án ntá kaín tí sín tsíkóchjina mé ts'ává sín la í sinehya sín.

* 9:13 Oseas 6.6

16 Nijnko chojni chrókjuak'enięhe tí ka ó ntaxin it'õ ka nixin kixin ntá chrókjuixéhe tí ka nixin chrók'uitjian tí ka ntaxin ntá antsí má chrók'uichje. 17 La ko kjaxin éxí yóhe chrókuikiahya chojni xranvino nixin ijnko tjuaxran ó ntaxin kixin tí xikaha chrókjuich'e sín ntá chrók'uichje tí tjuaxran ntaxin. Ntá chrók'uitjayan tí xran la ko chrok'uitjayan tí tjuaxran. Ntá tí xranvino nixin chrókuikia ijnko tjuaxran nixin la ntá xikaha la yóí nkehe chrók'uitjanyha.

Ch'ín Jesús kjuínchexechón tí tjachjin xjeen ch'ín Jairo la ko kjuínchekitõhe jína ijnko tjan kuákóxin iké ch'án

(Mr. 5.21-43; Lc. 8.40-56)

18 Ntá naḡa tjenixja ch'ín Jesús la ntá ikjui ijnko ch'ín t'etõan kuente tí sín judío la kjuák'exin toch'in ch'án nkayakon tí ch'ín Jesús la chrónóęhe ch'án kixin:

—Tí xjanna na ntá kjuixin k'uén. Xrjanóęha sáchrókjuini chrókjuakétja tjá jehe tjan ntá chróxechón tjan —ichro ch'án.

19 Ntá k'uínkatjen ch'ín Jesús ntá sákjuiko ch'án tí ch'ín a la ko sákjuikotoxin ch'án tí sín k'uájiko ch'án. 20 A ntá itjen ijnko chojni chjin níhi tjan, ó teyó nánó chóna tjan ijnko chin ts'itji tjan jni. Ntá kóchjina tjan nóton tí ch'ín Jesús ntá kuákóxin tjan tí iké ch'án 21 kixin tjenkayáxin tjan kixin kjónté chrínta iké ch'án ó chrókuákóxin tjan, la táhó chrókuítõęxin tjan jína. 22 Ntá nkátjía ch'ín Jesús la k'uíkon ch'án tí tjan a ntá ntáchro ch'án kixin:

—Xjeenni, nchechéhe asán jaha. Jaha la ó kuítõha jína kixin kuítekáván tí janhan —ichro ch'án.

Na ntá tuénxín ó kuítõhe tjan jína.

23 Ntá tió kjuíji ch'ín Jesús ntõęe tí ch'ín judío t'etõan la k'uíkon ch'án kixin ó yaxínhin tí sín músico kixin ó sátsjixravá xjan. La kaín tí chojni tsíkójnkotsé la tsjánkãmá sín xjan. 24 La ntá ntáchro ch'ín Jesús kixin:

—Tí xjan méhe títõhéré, kixin tsík'enhya xjan, la tjejua xjan ó —ichro ch'an.

Ntá kjuanoá sín ch'án. 25 A ntá tí k'uaxrje kaín chojni la ntá ch'ín Jesús la k'uíxenhén ch'án la itsé ch'án itja tí tjan a la ntá tuénxín k'uínkatjen tjan.

26 Ntá kuenté chjasin ntiha la kuínhin sín kixin xikaha kónhen.

Ch'ín Jesús kjuínchekitõhe jína yaá sín t'íkonhya

27 Ntá sákjuixin ch'ín Jesús ntiha la ntá yaá chojni t'íkonhya kjuíchréhe tí jehe ch'án la k'uíyęhe sín ch'án ntáchro sín kixin:

—Tíkonóęhéni jaha tsík'axrjeníxian David.

28 Ntá k'uíxenhén ch'ín Jesús ijnko nchia na ntá kóchjina tí yaá sín t'íkonhya la ntá ch'ín Jesús kjuanchankíhi sín ch'án, ntáchro ch'án kixin:

—¿Á títekáván kixin tsjácha sít'a xikaha? —mé xikaha kjuanchankí ch'án.

Ntá kjuátęhe sín kixin:

—Jeén, Ìnchéni, titekaonni.

29 Ntá ch'ín Jesús kjuak'etja tja ch'án chrítaón ikon sín la ntáchro ch'án kixin:

—Tí xikaha kuítekáván la tsoxiteyá —mé xikaha ichro ch'án.

30 La ntá tuénxín ó jína t'íkon sín. Ntá ch'ín Jesús k'uętuęnhén sín ch'án kixin:

—Ninkexró tsochenkahyará —ichro ch'án.

³¹ Ntá tuénxín sákjuí sín la nkuíxín chjasin ntiha chrónka sín tí kjuaxroan kjuasin ch'ín Jesús.

Ch'ín Jesús kjuínchekitohe jína ijnko ch'ín nósín

³² Tió sákjuí tí sín k'uék'ikonhya, a ntá iso chojni kjuikao sín ijnko ch'ín nósín ch'án la chónka ch'án nchakuen tí jínahya. ³³ Ntá ch'ín Jesús kuakitsje tí nchakuen tí jínahya ntá tí ch'ín nósín la ó kjuankíxín nixja ch'án. Ntá kaín chojni la k'uíkon sín la ntáchro sín kíxín:

—Nunca t'ikonhyéni ijnko kjuaxroan xikaha kuenté tí nación Israel —ichro sín.

³⁴ A ntá tí sín fariseo ntáchro sín kíxín:

—Tí nkexro t'etuenhen tí nchakuen tí jínahya tsíkjanjon kjuachaxin mé xikaha takitsje tí ch'ín i tí nchakuen tí jínahya —mé xikaha ichro sín.

Ch'ín Jesús kuíkonóehé ch'án chojni

³⁵ Ntá k'uátsínka ch'ín Jesús itsjé chjasin jié la ko chjasin ntsí la kjuakoxín ch'án jnkojnko njnko Israel. Chrónka ch'án tí tan jína nkexrí tjen tí kjuachaxin kuènte Dios. La ntá kjuínchekitohe ch'án jína chojni níhi chónka kaín xín chin la ko chojni chónka kjuatjoté. ³⁶ K'uíkon ch'án kíxín nchónhya chojni k'uéjé sín ntá kuíkonóehé ch'án sín kíxín imá tóxakonhen sín la k'uéjé sín éxí kolélo chónthaya nkexro t'ayakonhen. ³⁷ Ntá ntáche ch'án tí sín k'uájiko ch'án kíxín:

—Chaxín ntáxrjan janhan kíxín imá tsík'óna, kjánchó chojni sich'e xra mé tsjéhya. ³⁸ Chrókjuancheherá tí Inché tí nonte kíxín chróchr'án ch'án itsjé chojni chrókjuich'e xra —mé xikaha ichro ch'ín Jesús.

10

Ch'ín Jesús kjueyá teyó sín ts'ajiko ch'án

(Mr. 3.13-19; Lc. 6.12-16)

¹ Ntá ch'ín Jesús mé kjueyá ch'án teyó sín ts'ajiko ch'án la kjuanjón ch'án kjuachaxin tsakitsje sín kaín tí nchakuen tí jínahya t'etuenhen asén chojni la ko sinchekitohe sín jína kaín chojni chónka kaín chin la ko kaín xín kjuatjoté.

² Na mé tí teyó sín k'uájiko ch'án mé it'in sín xikihi: saoxín mé ch'ín Simón na mé kjaxin it'in ch'án Pedro la ko kichó ch'án Andrés la ko ch'ín Jacobo la ko kichó ch'án Juan mé tí xjeen ch'ín Zebedeo. ³ La ko kjaxin ch'ín Felipe la ko ch'ín Bartolomé la ko ch'ín Tomás la ko ch'ín Mateo mé tí ch'ín nchekjènkí la ko ch'ín Jacobo xjeen ch'ín Alfeo la ko ch'ín Lebeo, mé jehe ch'án kjaxin it'in ch'án Tadeo. ⁴ La ko kjaxin ch'ín Simón, mé kuènte tí sín cananista, la ko kjaxin ch'ín Judas Iscariote, mé tí nkexro chr'éxín kjuínchekji tí ch'ín Jesús.

Ch'ín Jesús k'uetuenhen tí teyó sín kíxín sátsjikako sín kjuachaxin kuènte Dios

(Mr. 6.7-13; Lc. 9.1-6)

⁵ Ntá k'uetuenhen ch'ín Jesús tí teyó sín kíxín sátsji sín la k'uetōan ch'án kíxín:

—Tjihará tí tjejó tí sín jehya judío la ko t'ixeenhyará tí chjasin siín estado Samaria. ⁶ Náhí. Íchá jína sátsjirá tí tjejó tí chojni éxí kolélo kjuíchroe kuènte nación Israel. ⁷ Sátsjirá tjácohérá sín kíxín kjuachaxién Dios tjen nkaya nkajni la í séhya tsi. ⁸ Sínchekitoherá jína chojni níhi la ko sínchekitoherá jína tí sín chónka chin lepra la ko sínchexechónrá chojni

tsík'en la takítsjerá tí nchakuen tí jínahya. Jahará kjaxin kuitonhanrá tí kjuachaxién Dios, méxra chrókuachahyará jahará kjaxin.

⁹Chrókuikuahyará ninkehó chichaon oro la ko ninkehó chichaon plata la ko ninkehó chichaon cobre ¹⁰la ko tí sátjirá ntia la chrókuikuahyará ka bolsa la chrókuikuahyará yaá ka chrók'uínkayaterá la ko chrókuankahyará tokatárá la ko chrókuikuahyará nta tjixinrá. Tí nkexro ch'e xra la jehí siín kjuachaxin ntiha chrókjóné.

¹¹ A ntá tió tsjasánrá ijnko chjasin jié o ijnko chjasin ntsí la tjéyará ijnko nkexro tsjanjon kjuachaxin la ntøe sín ntahó chrókuitharhá ntá tsjixin tí xra ntá sátsjirá. ¹² A ntá tió t'ixenhénrá ntøe sín la nixjehérá sín tjákoxinrá jnkojina. ¹³ A ntá tí chaxín jina asén sín la ts'áyéhe sín tí kjuaxróxin, a ntá tí náhi la sátjikorá tí kjuaxroxin. ¹⁴ A ntá tí tsochrohya sín tsjanjon sín kjuachaxin tsitøhará la tjinkakonhya sín tsinhin sín tí nkehe tsochronkará na mé t'axrjéxinrá tí ntøe sín o tí chjasén sín la t'oxénjinrá tí inche chóna totárá. ¹⁵ A ntá chaxín tjonkará kixin tió tsjixraká tí yaon tsjixixín na mé tí sín chjasin Sodoma la ko tí sín Gomorra kjónté imá k'uéchóna sín jié la kánhyó tsjasóte sín, a ntá tí sín chjasin a la antsí tsjasóte sín kixin k'uéjóróxinhya sín tí tan chrókuaáxin sín.

Ókjé sín tsonínkakohen tí sín kuénte Cristo

¹⁶ Janhan tsochr'an tí jahará éxi yóhe chróchr'an kolélo ts'ejóyakjan kolóbo. Listo chrók'uejorá éxi konche xikaha la chrók'uejorá éxi kontóá chrókójiyahyará. ¹⁷ Chrókóxakonhanrá kixin itsi chojni tsotsé sín tí jahará la sátsjikoará sín tí tjejó tí sín t'etøan la ko nkaxenhen tí ninkoé sín tsjatiaxínrá sín. ¹⁸ La ntá tsjikaánrá sín tí tjejó tí sín t'etøan la ko tí siín tí sín rey kixin tinkachónkirá tí janhan. Ntá jina tsochronkará kixin tinkachónkirá tí janhan nkayakon tí jehe sín la ko nkayakon tí sín chónhya Dios. ¹⁹ A ntá tió sátsjikoará sín tí tjejó tí sín t'etøan la tóxakuanhyará nkehe tsontáchrará o nkexrí tsonixjará kixin tió tsjixraká tí hora la ntá Dios mé tsjinkitsará tsonixjará. ²⁰ Kixin jehya jahará tsonixjará. Náhi. Tí Nchakuen It'éni mé tsochronka nkehe tsonixjará.

²¹ Ntá iso chojni mé tsjikaán sín tí kíchó sín kixin its'en la ko tí it'é mé tsjikaán tí xjeen. A ntá tí xjan mé tsokjan tsonínkakohen tí it'é kixin its'en. ²² Kaínxín chojni chjasintajni tsonínkakohenrá sín kixin tinkachónkirá tí janhan. A ntá tí nkexro tsitøehya tsinkáchónki sín tí janhan hasta tsjéje chjasintajni mé tsaá. ²³ Tió má chónkíhará sín ijnko chjasin la ntá sátsjirá í jnko chjasin. La ntá chaxín tsoxrjanka kixin tí Xjeen Dios K'óna Chojni mé tsokjan tí naxa tjixinhya ts'atsínkará kaín tí chjasin Israel.

²⁴ Tí nkexro xrakøhe la kánhyó tjetøan la tí maestro la antsí tjetøan, la ko kjaxin tí nkexro ch'e xra la tjetøanhya la antsí tjetøan tí lamo. ²⁵ A ntá tí nkexro xrakøhe chrókuakoxin ch'án éxi tí nkexro kjuakøhe ch'án la ko tí nkexro ch'e xra chrókuakoxin ch'án éxi tí lámoé ch'án ch'ehe ch'án xra. Tí ch'ín inché nchia la kjaxin nchek'in sín Beelzebú la kjaxin tí sín kjéhya xikaha nchek'in sín.

*Nkexro tí chróchrakonhénrá
(Lc. 12.2-9)*

²⁶ Méxra chróchrakuénhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kixin chrókónoehya chojni chr'éxin. ²⁷ Tí nkehe tjonkará sítie la t'ichjánxin tsochronkará tió itsi xrohi t'inkaséyanxín tí yaon. La ko tí nkehe tjonkará ijie ninkexró noehya

la t'ichjánxin chrónkará chrókuinhin kaín sín. ²⁸ Chróchrakuénhyará tí sín t'óyán cuérpóé chojni kixin asén chojni xitjahya ts'óyán sín. Íchá jína chróchrakonhénrá tí nkexro tsjacha sinchek'itjáyanxín cuérpóé chojni la ko asén chojni tí xrohi ts'ankahya.

²⁹ '¿Á chrókóxiñhuya yaá koxroxé ntsíntí ijnko chichaon ntsí? A ntá kjónté xikaha la chrók'uánótjehya nijnko tí jehe va nonte tí chrókjuanjonhya It'eni kjuachaxin. ³⁰ A ntá kjónté tí kaxihí chóna ikjárá la ó nohe ch'án nkekjaín ka chontará. ³¹ A ntá jahará chróchrakonhyará kixin tóyóghyará tí koxroxé kixin antsí sínkí tí jahará, a ntá tí koxroxé, kjónté nchónhya va, la kánhyó sínkí tíha.

Tí sín tósuèhya tsochrónka sín kixin tinkáchónki sín Cristo nkayakon chojni (Lc. 12.8-9)

³² 'Kain tí chojni tsochrónka kixin tinkáchónkina sin nkayakon chojni la janhan mé kjaxin tsoxrjanka kixin choxian tí jehe sín nkayakon T'aná tjen nkaya nkajní. ³³ A ntá tí nkexro sinchemána tsontáchro sín kixin chónhya sín tí janhan nkayakon chojni la kjaxin janhan tsontáxrjan kixin chonhya tí jehe sín nkayakon T'aná tjen nkaya nkajní.

Jnkoqóahya tsjenkayáxin chojni kixin ó kui Ìnchéni Jesús (Lc. 12.51-53; 14.26-27)

³⁴ 'Tjenkayáxinhyará kixin k'uinkakian kjuaxróxin chjasintajni. Náhí. Janhan k'uinkakianhya kjuaxróxin. Tsjanjonko kichó chojni kixin k'uinka janhan. ³⁵ Janhan k'uinka kixin tsonínkakonhen chojni it'é, la ko tí xjeen sín chjin mé tsonínkakonhen iné, la ko tí tikánta tsonínkakonhen ich'ee. ³⁶ Mé xikaha tí sín tsonínkakonhen kichó la mé tí sín naxa kjéhya sín.

³⁷ 'A ntá tí nkexro antsí tjuèhe it'é sín la ko iné sín la kánhyó tjuèhe tí janhan la mé xitjahya ts'óna sín kuèntana, la ko tí nkexro antsí tjuèhe xjeen sín la kánhyó tjuana sín la mé xitjahya ts'óna sín kuèntana. ³⁸ La tí nkexro tamáhya ntacruz, chrèhya sín tí janhan la mé xitjahya ts'óna sín kuèntana. ³⁹ Tí nkexro tjinkaon kixin kohya nkehe chrókónhen sín mé ts'itjáyan sín, a ntá tí nkexro chrókjuinçek'itjáyanxín asén kixin tinkáchónki sín tí janhan la mé tsaá sín.

Tí nkexro ts'áyéhe nkehe (Mr. 9.41)

⁴⁰ 'Tí nkexro chrókjuanjon kjuachaxin chrók'uejorá la mé éxi chrók'uáyéhe sín tí janhan la ko tí nkexro chrók'uáyéhe tí janhan la éxi yóhe chrók'uáyéhe sín tí nkexro ichr'ánna k'uinka. ⁴¹ La tí nkexro chrókjuanjon kjuachaxin tsjak'e ijnko nkexro nixja itén Dios kixin táha la Dios ichr'án la mé ts'áyéhe nkehe éxi ts'áyéhe tí nkexro kjuako. La ko tí nkexro chrókjuanjon kjuachaxin tsjak'e ijnko chojni jína kixin jína ch'án mé xikaha ts'áyéhe sín nkehe éxi ts'áyéhe tí nkexro jína. ⁴² A ntá tí nkexro sinchekitonhen ijnko vaso ntá kin kjónté ijnko chojni noehya má, chréhe tí janhan, la mé chaxín ntáxrjan kixin tí ch'ín a mé chaxín ts'áyéhe ch'án nkehe jína kixin xikaha kjuích'e ch'án.

11

Ch'ín Juan Bautista k'uètuènen iso sín (Lc. 7.18-35)

¹ Ntá ch'ín Jesús kjuixin kjuakohe ch'án tí teyó sín xriko ch'án la ntá sákjuixin ch'án ntiha la sákjuíkako ch'án iso chjasin chjinaxón ntiha.

² A ntá ch'ín Juan mé tjechjina ch'án ntøechiso ntá xrínahya kuínhin ch'án nkerí xrā tjeche Cristo. La ntá k'uetuenhen ch'án iyó tí sín k'uék'ajiko ch'án kixin sátsjitsjehe sín tí ch'ín Jesús. ³ Ntá sákjuí sín kjuíji sín ntiha ntá kjuanchankíhi sín ch'án ntáchro sín kixin:

—¿Á jaha tí nkexro itsi ní o á naxā tsochónhenni í jnko nkexro? —ichro sín.

⁴ A ntá kjuátehe ch'ín Jesús, ntáchro ch'án kixin:

—Sátjirá tjichenkará tí ch'ín Juan tí nkehe k'uíkonrá la ko tí nkehe kuínhínrá. ⁵ Chenkará ch'án kixin tí sín k'uék'ikonhya la ó t'ikon sín jie la tí sín xitjahya k'uékji la ó tji sín la ko tí sín k'uéchóna chin lepra la ó kótjóa sín kuítóhe sín jina la ko tí sín k'uékienhya la ó tinhin sín jie. Kjaxin tí sín tsík'en ná ó xechón sín inaá la ko kaín tí sín nòa mé síxraçhe sín tí tan jina tsaáxin sín. ⁶ Méxra imá náxrjón tí nkexro kohya nkehe t'inkákonhen tinkáchónki tí janhan.

⁷ Tió sákjuí sín ntá ch'ín Jesús kjuankíxin nixjehe ch'án tí sín k'uéjío la chrónka ch'án kuènte ch'ín Juan ntáchro ch'án kixin:

—Tí sákjuítsjehérá ch'ín Juan nteje la, ¿nkexrí k'uíkonrá tí jehe ch'án? ¿Á k'uíkonrá ch'án éxi ijnko tji nchexrayehe xrinto? ⁸ Tí náhi, la ¿nkehe k'uíkonrá? ¿Á k'uíkonrá ch'án éxi ijnko nkexro tsík'itsa jina? Jahará ó nohará kixin chojni tsík'itsa jina la tjejó sín tí nchia kuènte tí sín rey. ⁹ ¿A ntá nkehe k'uíkonrá? ¿Á ijnko nkexro chrónka itén Dios? Jehe chaxín la antsí chóna ch'án kjuachaxin la tí sín k'uéchrónka itén Dios la kánhyó. ¹⁰ Ch'ín Juan mé tí nkexro kui éxi xikaha chrónka xroon itén Dios ósé. Mé ntáchro xikihi:

Janhan mé tsochr'an ijnko nkexro tsochrónka itan kuèntana tsitónxin ntja,

kixin tsjasíyóxin ch'án ntja kuèntá.*

Mé xikaha chrónka itén Dios. ¹¹ Ntá ijnko nkehe chaxín tsojjonkará kixin kaín tí nkexro k'uéjío senó la kánhyó tjetooan sín la antsí tjetooan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxién Dios tjen nkaya nkajní la antsí tjetooan sín la ntá jehe ch'ín Juan la kénhyó.

¹² Tí ikui ch'ín Juan Bautista hasta ijie la imá tjanjonxin tí sín tjinkaon ts'ikon sín tí kjuachaxin kuènte nkaya nkajní. La jehó tí sín imá chóna kjuachaxin mé tsjacha sín. ¹³ Kaín tí sín profeta la ko tí ley kuènte ch'ín Moisés mé chrónka nkexrí tí kjuachaxin kuènte Dios hasta ikui ch'ín Juan.

¹⁴ A ntá tí jahará chrókuítekáonrá tíhi; kixin ch'ín Juan la mé ikui kixin tí xrā kuènte ch'ín Elías tsjintaxín sich'e ch'án kixin ch'ín Elías la t'ichjánxin chrókui ch'án inaá. ¹⁵ Tí nkexro tjinkaon chrókuinhin la chrókuinhin.

¹⁶ ¿Nkexrí chrókuíntayóaxian tí chojni tjejó ijie? Tóyóhe sín tí chánjan tjejótjaxin sín ntasin tsítan sín la t'íyehé sín kichó sín ¹⁷ ntáchro sín kixin: “K'uánoani flauta kjánchó jahará la tēhyará. Itsjeni isón kuènte chojni tsík'en la ntá k'uaváhyará la ko tsjankahyará.” ¹⁸ Kixin tí ikui ch'ín Juan la kjónehya ch'án la k'uíhya ch'án vino la jahará ntáchrórá kixin ijnko nchakuen tí jínahya mé chóna ch'án. ¹⁹ A ntá tió kui tí Xjeen Dios K'óna Chojni ntá kjóne ch'án la ko ik'ui ch'án, ntá ntáchrórá kixin imá itsjé kjóne ch'án la imá ik'ui ch'án la ko imá t'ito ch'án tí chojni chóna jie la ko tí sín nchekjènkí, ichrorá. A ntá tí kjuachaxin kuènte Dios mé tjákoxin tí xjeen ch'án.

* 11:10 Malaquías 3.1

Tí chjasin titekakonhya

(Lc. 10.13-15)

²⁰ Ntá ch'ín Jesús mé kjuankíxin ch'án ntáche ch'án tí sín tjejó iso tí chjasin imá kjuasixín ch'án kjuaxroan kíxin kjónté xíkaha la naxa kuinkáchónkihya sín Dios. ²¹ Ntá ntáchro ch'án kíxin:

—Nòará jahará tjejorá chjasin Corazín la ko nòará jahará tjejorá chjasin Betsaida. Tí chrók'uixín tí kjuaxroan tí chjasin Tiro la ko chjasin Sidón éxí k'uíkonrá jahará ntá tí chrókójehe sín la tjoka chrókuinkáchónki sín Dios la tjoka chrókjuakoxín sín chrók'uinkáya sín ka tié la ko nteso chrókjuinçek'ia sín asén sín. ²² Ntá ntáxrjan kíxin tí yaon tsitoxín ijíé chojni a ntá jahará antsí tsjasótiará, a ntá tí sín chjasin Tiro la ko chjasin Sidón la kénhyó tsjasóte sín. ²³ A ntá jahará chojni chjasin Capernaum tjenkayáxinrá kíxin imá nohará a ntá sátsjírá nkaya nkajni, ichrorá, kjánchó chaxínhya. Jahará la tsjasinkajinxinrá ntiha sátsjírá tsjasótiará tí síin tí sín tsík'en. Tí chrókjuásian tí kjuaxroan tí chjasin Sodoma éxí kjuásian chjasánrá la tí chjasin la kjá naxa chrók'uixín sín naxa chrók'uitjáyanyha sín tí yaon ijie kíxin tjoka chrókuitekaon sín. ²⁴ A ntá tjonkará kíxin tió sinčekitoxín Dios ijíé chojni la antsí tsjasótiará la tí sín chjasin Sodoma la kénhyó tsjasóte sín.

Xrákirá tí tjén janhan la ts'ok'áhará

(Lc. 10.21-22)

²⁵ Ntá tí yaon a ch'ín Jesús mé nixjehe ch'án It'é ch'án ntáchro ch'án kíxin:

—Tjáncháha kjuasáya It'éni mé Inché nkaya nkajni la ko chjasintajni kíxin jaha kjuánjonhya kjuachaxin chrók'uitja tí sín imá nohe a ntá kjuánjuan kjuachaxin kíxin ts'itja tí sín noehya. ²⁶ Mé xíkaha It'éni jaha kóxrjínhan kíxin xíkaha tsonhen —ichro ch'ín Jesús.

²⁷ Ntá ntáchro ch'ín Jesús kíxin:

—T'aná mé chjina kaín xín nkehe. Kohya ninkexró chaxín chóxin tí Xjeen ch'án. Jehó It'é ch'án mé chóxin ch'án la kohya ninkexró chóxin tí It'é ch'án. Jehó tí Xjeen ch'án mé chóxin ch'án la ko tí sín tsík'eyá ch'án tsochóxin sín ch'án. ²⁸ Xrákirá kaín rá tí tjén janhan tí jahará imá tsíkóxrjérá kjujich'erá xrá la yamará nkehe iye la ntá janhan mé sjintak'ok'áhará. ²⁹ Tákjára tí xrá kuéntana la ts'itjará kuéntana kíxin janhan mé jina asenná la ntahnkehya. Ntaha mé ts'itjará ts'ok'èxin asánrá. ³⁰ Tí xrá tsotjahará la xráhya la tí nkehe tsotjahará la yehya.

12

Tí sín k'uajiko ch'ín Jesús mé ik'uín sín iso noatrigo ijnko yaon t'ok'éhe tí sín Israel

(Mr. 2.23-28; Lc. 6.1-5)

¹ A ntá ijnko yaon la ch'ín Jesús k'uátsínka ch'án ijnko nonte síin noatrigo tí yaon t'ok'éhe tí sín Israel. Na ntá tí sín xriko ch'án mé tsík'en sín kjinta la ntá kjuankíxin sín ik'uín sín iso noatrigo a kíxin sine sín. ² A ntá iso tí sín fariseo k'uíkon sín kíxin xíkaha kjuich'e tí sín xriko ch'ín Jesús la ntá ntáchro sín kíxin:

—Tsjehé tí sín xrikoa mé tjejóch'e sín xrá tí yaon t'ok'éheni na mé kohya kjuachaxin tsonhen xrá tí yaon i —ichro sín.

³ Ntá kjuátehe ch'ín Jesús kíxin:

—Jahará ¿a kjuínchekuáxinhyará tí xroon chrónka nkehe kjuich'e ch'ín David la ko tí sín k'uajiko ch'án tió k'uén sín kjinta? ⁴ A ntá jehe sín mé

k'uixenhen sín tí nchia kuènte Dios la kaín sín kjóne sín tí niqtja tsíkóyaon kuènte Dios kjónté kohya kjuachaxin sine ch'án ni tí sín k'uájiko ch'án. Jehó siín kjuachaxin sine tí sín ncha'tá. ⁵ Jahará zá nchekuáxinhyará tí xroon tsikjin ch'ín Moisés ntáchro kixin tí sín ncha'tá kuènte nínko mé t'ok'èhya sín tí yaon sábadó la kjónté xikaha la jehya jie tíha? ⁶ Ntáxrjan kixin itjén janhan la antsí má chonta kjuachaxin la ntá tí nínko la kénhyó. ⁷ Jahará la tiénxinhyará nkexrí t'axrjexín tí nkehe ntáchro xroon itén Dios. Mé ntáchro kixin: “Janhan Dios tjínkavan kixin chrókuikonóéhérá chojni la tjínkakhya kixin chrók'oyánrá iko chrókjuánjonrá.”* Tí chrókuiénxinrá tíha la ntá chrókóninkákuénhyará tí janhan kixin ninkehó jie chontahya. ⁸ A ntá tí Xjeen Dios K'óna Chojni mé chóna kjuachaxin ts'etqan nkexrí tsonhen tí yaon t'ok'èheni —ichro ch'ín Jesús.

Ch'ín Jesús kjuínchekitohe jína ijnko chojni tsixámá tja
(Mr. 3.1-6; Lc. 6.6-11)

⁹ Ntá ch'ín Jesús mé sákjuixin ch'án ntiha la k'uixenhen ch'án ijnko nínko Israel. ¹⁰ Mé ntiha itjen ijnko ch'ín tsixámá tja. Na ntá tjejontaxín iso sín fariseo a tjinkaon sín tsjanchia sín jie. La ntá kjuanchankíhi sín ch'án kixin:

—zá siín kjuachaxin sinchekitoheni jína ijnko chojni níhi tí yaon t'ok'èheni ní? —ichro sín.

¹¹ Ntá kjuátehe ch'ín Jesús ntáchro ch'án kixin:

—Jnkojín tí jahará chontará ijnko kolélo chrókuítsinkáya ijnko tòye tí yaon t'ok'èheni zá chrókjuíhyará chrókuakitsjetaónrá va tòye ní? ¹² Kjánchó tí chojni antsí má tjete sinkí a ntá tí kolélo la kénhyó. Méxra jína sich'eni tí xra jína kjónté tí yaon t'ok'èheni.

¹³ Méxra nixjehe ch'án tí ch'ín níhi a, ntáchro ch'án kixin:

—Tjéntoá tja —ichro ch'án.

A ntá tí ch'ín níhi tja kjuentoá tja ch'án la ó kjuixin kuítóhe jína éxi tí íjnko tja ch'án xikaha. ¹⁴ Ntá tí sín fariseo kónínkaon sín k'uaxrjexín sín ntiha sákjuí sín la kjuenkayáxin sín nkexrí ts'óyán sín tí ch'ín Jesús.

Itén Dios senó chrónka kuènte ch'ín Jesús

¹⁵ A ntá ch'ín Jesús mé kónohe ch'án kixin xikaha tjenkayáxin sín la ntá sákjuixin ch'án ntiha la itsjé sín chréhe sín ch'án. Kjuínchekitohe ch'án jína kaín tí sinníhi ¹⁶ la k'uetoan ch'án kixin tsochrónkahya sín noxín kixin nkexro tí jehe ch'án. ¹⁷ Mé xikaha ó xiteyá tí nkehe chrónka ch'ín Isaías, tí nkexro chrónka itén Dios ósé, mé tsíntáchro ch'án xikíhi:

¹⁸ Ntihi tjen tí nkexro ch'ena xra la janhan mé kjuéyá ch'án,

janhan tjuaha ch'án la chàna kixin itjen ch'án.

Tsotjaha ch'án tí nchakuenná

la jehe ch'án mé tsochrónka ch'án nkexrí sjintakitoxián ijie chojni chjas-intajni.

¹⁹ Tsonínkakuenhya ch'án chojni la chjiníhya ts'óyako ch'án,

la ko kohya nkexro tsinhin itén ch'an tí ntia.

²⁰ Ts'óchjenjinhya ch'án kjónté itji tsixréya,

la ts'ók'ankahya ch'án kjónté ijnko nkehe sílnchikoá.

Jehe ch'án naxa sich'e ch'án xra tsjixrakájia tí yaon ts'etqan ch'án.

²¹ La kaín xín chojni chjasintajni mé tsitekaon sín tí jehe ch'án.†

Mé xikaha chrónka itén Dios ósé.

* 12:7 Oseas 6.6 † 12:21 12.18–21 Isaías 42.1-4

Tí sín fariseo mé ntáchro sín kixin ch'ín Tsochren t'etuenhen asén tí ch'ín Jesús

(Mr. 3.19-30; Lc. 11.14-23; 12.10)

²² Ntá iso chojni sákjuikohe sín ch'ín Jesús ijnko ch'ín t'ikonhya la ko nixjahya kixin chóna ch'án nchakuen tí jínahya. A ntá ch'ín Jesús mé kjuínchekitohe ch'án jína la ntá jína nixja ch'án la ko jína t'ikon ch'án. ²³ Ntá kaín xín chojni la chrakon sín la tjanchankíhi kichó sín ntáchro sín kixin:

—¿Á jehya xjeen David tíhi? —ichro sín.

²⁴ Ntá kuínhin tí sín fariseo la ntáchro sín kixin:

—Tí ch'ín a takitsje ch'án nchakuen tí jínahya kixin chóna ch'án tí kjuachaxin kuènte ch'ín Beelzebú, mé tí ch'ín mé Tsochren t'etuenhen kaín tí nchakuen tí jínahya.

²⁵ Ntá ó kónohe ch'ín Jesús tí nkehe tjenkayáxin sín ntá ntáchro ch'án kixin:

—Jnkójín gobierno jnkokoáhya tjenkayáxin sín ntá tjanjonko kichó sín na mé ts'itjayan tí kjuachaxin ts'etoxin sín, la ko kjaxin tí sín jnkokoá chjasin o tí sín jnkokoá nchia jnkokónhya tjenkayáxin sín la kjaxin xikaha ts'itjayan sín. ²⁶ A ntá tí chaxín ch'ín Tsochren chrókuakitsjexín asén ntihi kja í chróchóntahya kjuachaxin naxa chrók'uetoxan. ²⁷ Jahará ntáchrórá kixin janhan kuakítsjexián tí nchakuen tí jínahya kjuachaxin kuènte ch'ín Beelzebú. A ntá tí chaxín xikaha la ntá ¿nkexro chjéhe kjuachaxin tí sín chréhe tí jahará kixin tjacha sín takitsje sín nchakuen tí jínahya? Jehe sín mé tjakoxin sín kixin ntoáhya tjenkayáxinrá. ²⁸ A ntá janhan mé kuakítsjexián tí nchakuen tí jínahya kjuachaxin kuènte Nchakuen Dios la tíha mé chrókónoaxínrá kixin tí kjuachaxién Dios mé ó kui tí tjejorá.

²⁹ ¿Nkexrí chrók'uixenhen ijnko nkexro ijnko ntøe ijnko ch'ín jjehe la chrókuakitsjehe ch'án tí nkehe chóna ch'án? Senó la chrókónteto ch'án kixin jína chrókueéhe sín ch'án.

³⁰ Tí nkexro titekakonhya tí janhan la mé nínkakonna sín. A ntá tí nkexro tjinkakonhya tí janhan mé t'inkákonhen tí xra it'a.

³¹ Méxra xrxanka kixin Dios tsjakjlin jnkojnko jie tjasin chojni la ko kaín nkehe jínahya nixja sín. A ntá tí t'ántaxínhin sín Nchakuen Dios la xitjahya tsjin ijje sín. ³² La ko xrxanka kixin kaín nkehe t'ántaxínhínrá tí Xjeen Dios K'óna Chojni la tsjakjlin Dios. A ntá tí ts'ántaxínhínrá Nchakuen Dios la ntá mé í tsjinhya tí ijjará kjónté ntihi chjasintajni la ko kjónté tí chr'éxin.

Tí nta chrókjuatsoxan sín tí to jína

(Lc. 6.43-45)

³³ Tí nta tsik'ánkí jína la t'óna to jína la tí nta tsik'ánkíhya jína la t'ónahya to jína. Méxra tí nta mé chrókjuatsoxánini tí to a. ³⁴ Jahará tsik'axrjeníxinrá konche. ¿Nkexrí jína chróntáchrórá jahará tí jehya jínará? Tí nixja ir'vará la éxi ntáchro asánrá mé nixja ir'vará. ³⁵ Ijnko chojni jína mé jína nixja kixin jína asén ch'án. A ntá ijnko chojni jínahya mé nixja tí nkehe jínahya kixin tí asén ch'án kjaxin jínahya. ³⁶ Ntá tjonkará kixin itsi tí yaon tsjixixín tió sinchekitoxin Dios ijje chojni ntá tsonohará kaín nkehe chjini tsínixjará. ³⁷ Kixin tí nkehe nixjará tsjakoxin á kjuásinrá jie ní o náhi.

Tí sín jehya jína tjanchehe sín ch'ín Jesús kixin tsjakoxin ch'án ijnko kjuaxroan jie

(Mr. 8.12; Lc. 11.29-32)

³⁸ Ntá iso tí sín fariseo la ko tí sín maestro tjako tí ley mé nixjehę sín ch'ín Jesús ntáchro sín kixin:

—Maestro, tjinkaonni chrók'uikonni chrókjuásian ijnko kjuaxroan náxrjón tsonoxínni kixin nkexro jaha —ichro sín.

³⁹ Ntá kjuátehe ch'ín Jesús ntáchro ch'án kixin:

—Tí sín jínahya la ko tí sín kuitohe Dios mé tjanchia sín chrókjuásian kjuaxroan náxrjón. Kjánchó tsjáko_xinhya í jnko kjuaxroan la jehó tí kjuaxroan kónhen ch'ín Jonás, tí nkexro k'uéchrónka itén Dios ósé. ⁴⁰ Éxí yóhe kjuák'e ch'ín Jonás iní yaon la iní tie nkaxenhen tsee koche jíé mé xikaha tí Xjeen Dios K'óna Chojni tsjak'e nkaxenhen tõe tsoxravá iní yaon la iní tie. ⁴¹ A ntá tí yaon tsitoxín ijíé chojni la ntá tí sín chjasin Nínive mé tsjanchia sín jie kixin tí sín tjejó jie, kixin tí sín chjasin Nínive mé kuitohe sín ijíé sín tió kuínhin sín itén Dios chrónka ch'ín Jonás. A ntá ijie itjén janhan la antsí má chonta kjuachaxin. A ntá tí ch'ín Jonás la kénhyó k'uéchónka ch'án kjuachaxin, kjánchó jahará kuitekákonyará tí janhan. ⁴² Kjaxin tí yaon tsitoxín ijíé chojni la tí tjan reina k'uetqan kjuixín nó Sur mé tsjanchia tjan jie kixin tí sín tjejó ijie kixin jehe tjan kjuixín imá ikjín kixin chrókuinhin tjan tí kjuaxrexinkaon jína k'uékjako ch'ín Salomón. A ntá ijie itjén janhan la janhan antsí má nõna a ntá ch'ín Salomón la kénhyó k'uénohe ch'án.

Tió tsokjan tí nchakuen tí jínahya

(Lc. 11.24-26)

⁴³ A ntá ijnko nchakuen tí jínahya tsík'axrjexín ijnko chojni la mé ixri tí nonte xamá xritjeyá nketí náxrjón ts'ok'éhe. A ntá k'uitjahya nketí náxrjón ts'ok'éhe. ⁴⁴ La ntá kjuenkayáxin kixin: “Áxri tsokjan ntõna k'uaxrjéxian”, ichro. A ntá tió ikjan tí nchakuen la t'ikon éxí ijnko nchia kohya ninkexró la éxí ijnko chojni tsík'ánjón ntõe la náxrjón tsjehe tí nkaxenhen nchia. ⁴⁵ A ntá k'uíkon tí jínahya xikaha tjen nchia la ntá sákjuikakjín í jnko yato nchakuen tí jínahya antsí má jínahya. A ntá káin k'uixenhen tí ntiha. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen káin tí sín siín ijie titekakonyaha.

Tí iné la ko kichó ch'ín Jesús

(Mr. 3.31-35; Lc. 8.19-21)

⁴⁶ Ntá ch'ín Jesús naxa tjenixjehę ch'án chojni la ntá xrínahya kjuíji iné ch'án la ko kichó ch'án. Ntá kuitohe sín ntõja ó la tjinkaon sín chrónixjehę sín ch'ín Jesús. ⁴⁷ Ntá ijnko nkexro ntiha sákjuíchénka tí ch'ín Jesús, ntáchro ch'án kixin:

—Iná la ko kichua tjejó sín ntõja la tjinkaon sín chrónixjaha sín tí jaha.

⁴⁸ A ntá ch'ín Jesús kjuátehe ch'án nixjehę ch'án tí nkexro chrónka a, ntáchro ch'án kixin:

—¿Xá nkexro tí naná la ko nkexro tí kichiná? —ichro ch'án.

⁴⁹ Ntá kjuakoxin tja ch'án tí sín xriko ch'án la ntáchro ch'án kixin:

—Tí sín i la mé naná la ko kichiná. ⁵⁰ Tí jnkojín sín i nchexiteyá nekehe tjinkaon T'aná tjen nkaya nkajní na mé táha mé naná la ko kichiná mé xikaha t'íkuān tí jehe sín —ichro ch'án.

13

Ch'ín Jesús mé kjuíncheyóexin ch'án éxí ijnko chojni t'enka nontee
(Mr. 4.1-9; Lc. 8.4-8)

¹ **A** ntá tí yaon a ntá ch'ín Jesús k'uaxrjexín ch'án nchia la sákjuí ch'án kjuák'etjəxín ch'án chrínta ntəyaon. ² Ntá k'uixikóchjina nchónhya chojni tí tjen ch'án la ntá jehe ch'án mé k'uit'ótjen ch'án ijnko ntábərcə kjuák'etjəxín ch'án la kaín sín na tí chrínta ntá ó kuitəhe sín. ³ **A** ntá nchónhya nkehe kjuako ch'án kjuíncheyóəxin ch'án, ntáchro ch'án kixin:

—Éxí ijnko ch'ín sákjuík'enka nontee ⁴ mé xikaha sákjuík'enka ch'án iso tí noatrigo a. Ntá iso noa la tsík'ánótjen ntja ntá ikui koxroxə k'uinka va noa. ⁵ **A** ntá iso noa na mé k'uitji chrík'á xro tí kohya itsjé nche ntá tjoka k'uayan kixin ntaha tjinhya chóna nche. ⁶ Ntá tí kjuítəon yaon la ntá tí ka la xamá kixin njnkahya chóna nuèe. ⁷ **A** ntá í so noa kjuítsínkak'á tí siín kach'í na k'uánkí tí kach'í a na ntá í xitjahya k'uánkí tí noatrigo a kixin tsíkəte tí kach'í. ⁸ **A** ntá tí noa tsík'itjí nche jina na ntá tió k'uánkí la mé k'óna jina. Iso tí no na jnkokəə noatje mé k'óna ciento neno noa, a ntá í jnko mé k'óna sesenta neno noa, a ntá í jnko mé k'óna treinta. ⁹ Tí nkexro tjinkaon chrókuinhin la chrókuinhin —ichro ch'ín Jesús.

Nkekuènté kjuíncheyóəxin ch'ín Jesús

(Mr. 4.10-12; Lc. 8.9-10)

¹⁰ Ntá iso tí sín k'uájiko ch'ín Jesús mé kóchjinehe ch'án sín la ntá kjuanchankíhi sín kixin:

—¿Nkekuènté xikaha nixjehé sín ncheyóəxián? —ichro sín.

¹¹ **A** ntá ch'ín Jesús kjuátəhe ch'án ntáchro ch'án kixin:

—Jahará la Dios me tsjinkitsa tsonohará tí nkehe noehya í so chojni kuènté tí kjuachaxin kuènté Dios. **A** ntá tí jehe sín a la náhi. ¹² Tí nkexro ó chóna nkehe la antsí ts'áyəhe sín kixin antsí má tsochóna sín. **A** ntá tí nkexro chónahya la kjónté tí ntsí chóna sín la ts'axrjehe sín. ¹³ Mé xikaha kjuíntayóəxuán kjuákuaxián sín kixin jehe sín t'ikon sín la ntá kjónté tjátsoanhya sín la tjejótinhin sín a ntá kjónté kienxínhya sín. ¹⁴ Mé xikaha ó xiteyá tí nkehe k'uéchrónka ch'ín Isaías tí nkexro k'uéchrónka itén Dios, mé ntáchro ch'án xikihi:

Jehe sín tsinhin sín a ntá tsienxínhya sín

la ts'ikon sín la tsjatsəanhya sín tí nkehe ts'ikon sín.

¹⁵ Imá icha asén tí sín chjasin i.

Chóna sín ntatsjon kjánchó ts'íkjehe

la chóna sín ikon sín kjánchó t'ikonhya sín,

kixin chrók'uikonhya sín

la chrókuienhya sín la ko

xitjahya kíenxín sín,

kixin í tjinkakonhya sín chrókjan sín kixin janhan mé chrókjuíntakitəha

sín jina.*

Mé xikaha tsíkjin ch'ín Isaías.

¹⁶ Ntá ntáchro ch'ín Jesús inaá kixin:

—**A** ntá jahará la imá náxrjón tjejorá kixin t'ikonrá la ko tinhínrá.

¹⁷ Chaxín xrjanka kixin itsjé tí sín k'uéchrónka itén Dios la ko tí sín jina mé k'uétjinkaon sín chrók'uikon sín tí nkehe t'ikonrá la ntá k'uikonhya sín la ko k'uétjinkaon sín chrókuinhin sín tí nkehe tjejotinhínrá la ntá kuíenhya sín.

Ch'ín Jesús chrónkaxín nkexrí t'axrjexín tí nkexro sákjuík'enka

(Mr. 4.13-20; Lc. 8.11-15)

* **13:15** 13.14–15 Isaías 6.9–10

18 'Tinhínrá nkexrí t'axrjexín tí ch'ín sákjuík'enka nontee. 19 Tí nkexro kuínhin tí itén Dios chrónka nkexrí tí kjuachaxin kuènte Dios la ntá kíenxínhya sín la yóhe tí noa xènjintja ntĩa. Ó kui ch'ín Tsochren ntá kjuínchek'itjáyán ch'án tí itan jína kuínhin sín. 20 A ntá tí tje kjuítsínkak'á xrə la mé t'axrjexín kixin tí chojni kuínhin itén Dios la tjoka kóxrjínhin sín la kuínkáchónki sín. 21 Kjánchó nínkahya chóna nuèe na ntá itsi tí kjuaxróxinhya o tsochónkíhi sín chojni chrók'óyán sín kixin tí itén Dios kuítekaon sín, a ntá tsítóhe sín tí tinkáchónki sín Dios. 22 A ntá tí tje kjuítsínkak'á kach'j na mé éxí yóhe ijnko chojni kuínhin itan jína kjánchó tjítóxiénhya ntje sín kixin tóxakonhen sín tí xrə chóna sín chjasintajni la ko tjínkaon sín tsochóna sín itsjé nkehe. Kaín tíha mé t'ínkákonhen tí itén Dios kuínhin sín la ntá xíkaha xitjahya sich'ehe sín xrə Dios. 23 A ntá tí tje k'uínka tí nonte chóna nche jína na mé yóhe tí chojni kuínhin tí itén Dios na ko kíenxín sín la ntá xíkaha jína ch'ehe sín Dios xrə. Na iso sín la yóhe éxí tí tje k'óna ijnko ciento neno noa la iso sín la yóhe tí k'óna sesenta neno noa la iso sín la yóhe tí k'óna treinta neno noa —mé xíkaha chrónka ch'ín Jesús.

Ch'ín Jesús kjuíncheyóexin ch'án éxí tí kajnto k'uánkíkué tí noatrigó

24 Ntá ch'ín Jesús kjuíncheyóexin ch'án inaá ntáchro ch'án kixin:

—Tí kjuachaxin kuènte Dios mé yóhe ijnko ch'ín k'uénka noa jína nontee ch'án. 25 A ntá tíó k'uéjójua kaín sín ntá ikui ijnko nkexro nínkakonhen sín la k'uénka ch'án kajnto chrík'á tí noa a la ntá sákjuík ch'án. 26 La ntá tí noatrigó k'uánkí la ntá ó sítintaa la ntá ntiha kjaxin kónoxixin k'uánkí tí kajnto. 27 Ntá tí sín ch'e xrə mé sákjuínixjehé sín tí lámoe sín la ntáchro sín kixin: “Tí noa k'uènká nontaa la noa jína tíha. A ntá ¿nketí kjuixín tí kajnto tsík'ayan?” ichro sín kjuanchankí sín. 28 Ntá kjuátehe tí inché tí nonte ntáchro kixin: “Kjá ijnko nkexro nínkakonna mé kjuích'e xíkaha”, ichro ch'án. Ntá tí sín ch'e xrə mé kjuanchankí sín kixin: “¿Á tjínkávan kixin sátsjini tsakitsjenkíni tí kajnto?” ichro sín. 29 A ntá kjuátehe ch'án kixin: “Náhi. Tí sátsjia tsakitsjenkiá tí kajnto la kjá chóna tí katrigó ts'axrjenkí. 30 Íchá jína títóhé kixin ts'ánkíkué tsjixin tsotjájiani. Ntá ts'etuénhenni tí sín tsotjá kixin senó ts'ejo sín tí kajnto la sinchenteto sín kixin tsoche la ntá chr'èxin tsotjá sín tí noatrigó ntá ts'ínkachjina tí noa a” —mé xíkaha chrónka ch'ín Jesús.

Ch'ín Jesús kjuíncheyóexin ch'án éxí tí xroqan ijnko ntayoa it'in mostaza (Mr. 4.30-32; Lc. 13.18-19)

31 Ntá ch'ín Jesús kjaxin kjuíncheyóexin inaá ntáchro ch'án kixin:

—Tí kjuachaxin kuènte Dios mé éxí yóhe ijnko tje mostaza k'uénka ijnko chojni nontee ch'án. 32 Tí tje a mé antsí má ntsí la ntá tí í so tje la kánhyó, a ntá chr'èxin ntá ts'ayan tí nta mostaza la ts'ánkí ijnko nta imá jje la tí í so nta la kánhyó. Ntá koxroxé xritjaká mé itsi va sich'èna va kəké va tí chrík'á tí chaon nta.

Ch'ín Jesús kjuíncheyóexin ch'án éxí tí xroqan t'ánkíxin niotja (Lc. 13.20-21)

33 Kjaxin kjuíncheyóexin ch'án tíhi mé ntáchro ch'án kixin:

—Tí kjuachaxin kuènte Dios mé éxí yóhe tí xroqan t'ánkíxin niotja. Kjuínkíjānxin ijnko chojni chjin iní medida harina ntá tí ch'o mé k'uánkí.

Tí nkehe kjuíncheyóexin ch'ín Jesús tí nixja ch'án

(Mr. 4.33-34)

³⁴ Ch'ín Jesús kjuakohe ch'án tí chojni la kjuíncheyóexón ch'án la nixjahya ch'án ninkehó tí kohya nkehe chrókjuincheyóexin ch'án. ³⁵ Mé xikaha kjuako ch'án kixin tsoxiteyá tí nkehe tsíchronka ijnko nkexro k'uéchrónka itén Dios ntáchro xikihi:

Mé tsoníxjaxian sintayóaxión nkehe

tsontáxrjan tí nkehe ninkexró noehya desde k'óna chjasintajni.†

Ch'ín Jesús chrónkaxín ch'án nkexrí t'axrjexín tí kjuíncheyóexin ch'án tí kajnto la ko tí notrigo

³⁶ Ntá kjuixin nixjehe ch'ín Jesús tí sín a ntá sákjuí sín kaín sín la jehe ch'án k'uixenhen ch'án nchia. Ntá kóchjina tí sín k'uájiko ch'án la ntáchro sín kixin:

—Chronkaxián nkexrí t'axrjexín tí kajnto k'uánkíkué tí noa trigo tí nonte —ichro sín.

³⁷ Ntá ch'ín Jesús kjuátehe ch'án ntáchro ch'án kixin:

—Tí nkexro k'uenka tí noa jína mé tí Xjeen Dios K'óna Chojni. ³⁸ A ntá tí nonte mé chjasintajni tíha. Tí noa jína mé éxí yóhe tí chojni kuákja kjuachaxin kuènte Dios. La ntá tí kajnto mé éxí yóhe tí chojni t'etuenhen Tsochren. ³⁹ Tí nkexro nínkakonhenni mé k'uenka tí kajnto mé Tsochren tíha. A ntá tí tsotjá sín la mé tsjeje chjasintajni. A ntá tí sín tsotjá la mé tí sín ángel. ⁴⁰ Éxí xrenájín tí kajnto la tsoche mé xikaha tsonhen tió tsjixixín tsjeje chjasintajni. ⁴¹ Tí Xjeen Dios K'óna Chojni mé t'etuenhen tí sín ángel kixin tsakitsjexín sín tí tjet'etōan Dios kaín tí chojni tjachroe í so chojni la ko tí sín ch'e tí nkehe jínahya. ⁴² La tsochr'án sín sátsji sín tí tja sín xrohi la ntaha tsotsjánka sín la sinetaón neno sín. ⁴³ Ntá kaín xín tí sín nchexiteyá tí nkehe tjinkaon Dios mé éxí tí yaon xikaha tsotsjehe sín tí tjet'etōan It'eni Dios. Tí nkexro tjinkaon chrókuinhin la chrókuinhin —mé xikaha ichro ch'ín Jesús.

Ch'ín Jesús kjuíncheyóexin ch'án éxí ijnko nkehe tjete tjemá

⁴⁴ Tí kjuachaxin kuènte Dios mé éxí yóhe ijnko nkehe tjete tjemá ijnko nonte. Ijnko chojni k'uitja ch'án tí nkehe tjete la ntá kjuak'emā ch'án inaá ntahó. Ntá chéhe ch'án sákjuí ch'án la kjuínchekji ch'án kaín nkehe chóna ch'án la ntá ikjan ch'án la k'uēna ch'án tí nonte a.

Ch'ín Jesús kjuíncheyóexin éxí ijnko xro perla tjete

⁴⁵ Ntá ntáchro ch'ín Jesús kixin:

—Kjaxin tí kjuachaxin kuènte Dios mé éxí yóhe ijnko nkexro tjejá xro perla náxrjón. ⁴⁶ Ntá tió ts'itja ch'án ijnko xro imá tjete la ntá sátsji ch'án sinchekji ch'án kaín nkehe chóna ch'án kixin ts'ena ch'án tí xro perla.

Ch'ín Jesús kjuíncheyóexin éxí ijnko nchísén tséya sín koche

⁴⁷ Ntáchro ch'ín Jesús kixin:

—Kjaxin tí kjuachaxin kuènte Dios mé éxí yóhe ijnko nchísén tséya chojni koche t'enkí sín tí ntayaon la ntá tsotsé nchónhya clase koche. ⁴⁸ Ntá tió tsíkaón koche tí nchísén tséya sín va la ntá tsakitsjenkí sín la tsjak'e sín chrínta ntā la ntaha ts'ejótjaxin sín la tsíchéhe sín koche jína la t'enka sín ntaxra. La ntá tí jehya koche jína la it'e sín. ⁴⁹ Mé xikaha tsonhen tió tsjeje chjasintajni. Sátsji tí sín ángel la tsakitsjekjan sín chojni

jínahya la tsitohé tí chojni jína. ⁵⁰ La tsochr'án sín tí sín jínahya sátsji sín tí tjen tja tí siín xrohi la ntaha tsotsjánka sín la ko sinetaón neno sín.

Tí nkehe tjete nixin la tí nkehe tjete ntaxin

⁵¹ Ntá ch'ín Jesús mé kjuanchankí ch'án kixin:

—¿Á tiénxinrá jahará kaín tí nkehe ní? —ichro ch'án.

Ntá kjuátehe sín kixin:

—Jeén, Ìnchéni, ó kíenxínni —ichro sín.

⁵² Ntá ntáchro ch'ín Jesús kixin:

—Ijnko maestro nohe tí nkehe kuènte ley la ntá ó nohe ch'án kuènte tí kjuachaxin kuènte Dios la jehe ch'án la éxí yóhé injnko inché nchia chóna itsjé nkehe tjete tjejóchjina la ntá nohe ch'án tsakítsje tí nkehe tjete nixin la tí nkehe tjete ntaxin —mé xikaha ichro ch'ín Jesús.

Ch'ín Jesús kjuák'e ch'án chjasin Nazaret

(Mr. 6.1-6; Lc. 4.16-30)

⁵³ Ntá kjuixin nixja ch'ín Jesús kjuíncheyóexin ch'án tíha na ntá sákjuíxin ch'án ntiha. ⁵⁴ La ntá sákjuí ch'án chjasén ch'án Nazaret. Ntaha kjuankíxin kjuakoxin ch'án tí ninko Israel. Ntá itsjé sín la kóxakonhen sín kuínhin sín tí tjako ch'án la ntáchro sín kixin:

—Tí ch'ín i la, ¿nketí tsíxrakohé ch'án kixin imá nohe ch'án la ko nkexrí kixin tjasin ch'án kjuaxroan? ⁵⁵ ¿Á jehya tíhi xjeen tí ch'ín carpintero la iné ch'án mé María? La ko chóxinni tí kíchó ch'án a mé ch'ín Jacobo la ko ch'ín José la ko ch'ín Simón la ko ch'ín Judas. ⁵⁶ Kjaxin tí sín chjin kíchó ch'án na ntihi tjejó sín. Méxra ¿nkexrí nohe ch'án kaín tí nkehe? —ichro sín.

⁵⁷ Mé xikaha chrohya sín tsitekakonhen sín ch'án. Ntá ntáchro ch'ín Jesús kixin:

—Nkuíxín tjikosáyehe chojni injnko nkexro chrónka itén Dios. A ntá tí sín chjasén ch'án la ko kaín tí sín ntøe ch'án mé tjikosáyeheya sín ch'án —ichro ch'án.

⁵⁸ A ntá tsjéhya kjuaxroan kjuasin ch'án ntiha kixin kuítekakuenhya sín ch'án.

14

Ik'uén ch'ín Juan Bautista

(Mr. 6.14-29; Lc. 9.7-9)

¹ A ntá tí yaon a ntá tí ch'ín Herodes mé tí nkexro k'uøtoan tí estado Galilea mé kuínhin ch'án nkexrí ichro ch'ín Jesús. ² Ntá nixjehe ch'án tí sín ch'ehe ch'án xra, ntáchro ch'án kixin:

—Kjá tíha la ch'ín Juan Bautista ó tsíxechón ch'án inaá. Mé xikaha chóna ch'án kjuachaxin tjasin ch'án kjuaxroan —ichro ch'ín Herodes.

³ Méxra tí ch'ín Herodes mé tsík'etøan kixin ch'ín Juan tsontetoxín cadena la ko tsjak'echjina ch'án. Mé xikaha kjuích'e ch'án kixin xikaha tsíkjanchia tí tjan Herodías, tí tjan ichjién tí ch'ín Felipe, kíchó ch'án. ⁴ Tí ch'ín Juan tsintáche ch'án tí ch'ín Herodes kixin:

—Jehya jína tsochonta tí ichjién tí kichúa —mé xikaha tsintáchro ch'án.

⁵ Ntá ch'ín Herodes tjinkaon ch'án chrók'óyan ch'án tí ch'ín Juan kjánchó chrakonhen ch'án tí chojni kixin kaín sín ntáchro sín kixin ch'ín Juan mé nixja itén Dios, ichro sín. ⁶ A ntá tí yaon kia tsíkjitoxinhin nánó ch'ín Herodes la tí xjeen tjan Herodías mé ité tjan tí tjejó tí chojni

tsík'íyehē ch'án. A ntá imá kóxrjínhin ch'ín Herodes nkexrí ité tjan. ⁷ La ntá nixjehē ch'án tjan k'uákjenxin ch'án ihnié Dios ntáchro ch'án kixin tsochjehē ch'án tjan kjónté jnkojín nkehe tsjanchia tjan, ichro ch'án. ⁸ Ntá jehe tjan la senó kjuikjanchankíhi tjan iné tjan ntá iné tjan tsíntachro kixin ikja ch'ín Juan mé tsjanchia tjan ntá jehe tjan mé nixjehē tjan tí ch'ín Herodes ínaá ntáchro tjan kixin:

—Chjehéni ijnko plato tsjak'enkáya kja ch'ín Juan Bautista —ichro tjan kjuanchia tjan.

⁹ Na ntá ch'ín Herodes la mé imá k'uává ch'án kixin xíkaha kjuanchia tjan. Na ntá kaín tí sín siín ntiha ó kuínhin sín kixin kjuínchenohe ch'án Dios kixin ichrén nkehe tsjanchia tjan tsjanjon ch'án. ¹⁰ Méxra k'uetōan ch'án kixin ts'óchrínjin sín ikja ch'ín Juan tí tjan ch'án ntoechiso. ¹¹ Ntá kjuikao sín kjuikoyá sín tí kja ch'ín Juan ijnko plato la chjéhe sín tí tjan tjarisoá ntá jehe tjan la sákjuikénhen tjan iné tjan.

¹² Ntá tí sín k'uék'ajiko ch'án a mé sákjuikakitsje sín tí cuérpōé ch'án la sákjuikjává sín. La ntá chr'éxin la sákjuí sín sákjuíchénka sín tí ch'ín Jesús kixin xíkaha tsíkónhen ntiha.

Ch'ín Jesús kjuínchekjine ch'án in'ó mil chojni
(Mr. 6.30-44; Lc. 9.10-17; Jn. 6.1-14)

¹³ Ntá tí kuínhin ch'ín Jesús kixin xíkaha tsíkónhen la ntá jehó ch'án sákjuí ch'án k'uit'ótjen ch'án ijnko ntabáro la sákjuí ch'án ijnko nonte ninkexró tjihya. A ntá kaín tí chojni la kuínhin sín nketí tjan ch'án la ntá k'uaxrjexín sín chjasén sín la ntá tótó sín sákjuíchréhe sín ch'án. ¹⁴ A ntá k'uaxrjexín ch'ín Jesús tí ntabáro a, a ntá k'uíkon ch'án kixin nchónhya chojni siín ntiha ntá kuíkonóehē ch'án tí jehe sín na ntá kjuínchekitohe ch'án jína tí sín níhi tsíkikao sín. ¹⁵ La ntá ó k'uúxin tie na ntá tí sín k'uájiko ch'ín Jesús a mé kóchjinehe sín ch'án, ntáchro sín kixin:

—Ntá ó kóntó la kohya nkexro tjejó ntihi. Na ntá jaha chrókuétuēnhén sín kixin sátsji sín tí chjasín ntsí chjinaxón tsjik'ēna sín nkehe sine sín —ichro sín.

¹⁶ Ntá kjuátehe ch'ín Jesús, ntáchro ch'án kixin:

—T'ichjánxinha sátsji sín. Chjehérá sín nkehe sine sín —ichro ch'án.

¹⁷ Ntá kjuátehe sín kixin:

—Chóntahyani itsjé nkehe. Jehó in'ó niqtja la ko yaá koche chóntani —ichro sín.

¹⁸ Ntá ntáchro ch'ín Jesús kixin:

—Xrakoanará tí nkehe méhe ntihi —ichro ch'án.

¹⁹ Ntá k'uetōan ch'án kixin kaín xín sín ts'ixitjxin sín tí chrítaón kaxi a. Ntá kuákja ch'án tí in'ó niqtja la ko tí yaá koche ntá konta ch'án nkajní la kjuanchehe ch'án kjuasáyé Dios. Ntá kóchrít'ō ch'án tí niqtja chjéhe ch'án tí sín k'uájiko ch'án la jehe sín mé k'ókikayehē sín chjéhe sín tí chojni siín a. ²⁰ Ntá kaín sín kjuixin kjóne sín kókjehe sín. Ntá kjuixin ntá tí sín k'uájiko ch'ín Jesús kjuenájín kaín tí nkehe síxèhe sín la mé teyó ntaxra kaón. ²¹ Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkejajín tí sín a.

Ch'ín Jesús mé tjetjitaón ch'án nta
(Mr. 6.45-52; Jn. 6.16-21)

²² Ntá kjuixin tíha ntá k'uetuēnhen ch'ín Jesús tí sín k'uájiko ch'án kixin ts'it'ótjen sín tí ntabáro ts'atòye sín íjnko nánko ntayaon. Ntá jehe ch'án naxa kuítóhe ch'án nixjehē ch'án tí sín siín ntiha. ²³ Ntá kjuixin xíkayehē

sín na ntá jehó ch'án chrîin ch'án ijnko jnâ tsonixjehê ch'án It'é ch'án tjen nkaya nkajní. Na ntá ó k'uixin tie la jehó ch'ín Jesús itjen ch'án ntiha. ²⁴La ntá tí ntabárcø na mé tjenkátaón ntâ jnkosiné ntayaon. Ntá imá chjéhe ntá tí ntabárcø kixin tí xrîntø la chjéhe la xitjahya sátsji ntabárcø. ²⁵Na ntá las tres nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon la ntá kóchjinehe ch'án tí tjejó sín. ²⁶Na ntá tí sín k'uájiko ch'án mé k'uíkon sín kixin tjetjitaón ch'án tí ntayaon na ntá imá chrakon sín la k'óyako sín. Ntáchro sín kixin kjuacha sín ichro sín, chrakon sín.

²⁷Na ntá nixjehê ch'ín Jesús tí jehe sín ntá ntáchro ch'án kixin:

—Nchefuérte asánrá, chrakonhyará. Janhan kjuihá —ichro ch'án.

²⁸Ntá ch'ín Pedro mé nixjehê ch'án Ìnchéni, ntáchro ch'án kixin:

—Ìnchéni tí chaxín jaha la ntá chrókjuánjuan kjuachaxin chrókjuitaónni tí ntâ tsjijini tí tjen jaha —ichro ch'án.

²⁹Ntá ntáchro ch'ín Jesús kixin:

—Xrákiá.

Ntá k'uínkajinxin ch'ín Pedro tí ntabárcø la kjuankixin ch'án tjetjitaón ch'án ntâ sákjuíchréhe ch'án tí tjen ch'ín Jesús. ³⁰À ntá xrínahya ntá kónohe ch'án kixin imá chjéhe xrîntø chrítaón ntâ, ntá chrakon ch'án la kjuankixin tinkák'aniánkí ch'án ntâ, ntá k'uèya ch'án ntáchro ch'án kixin:

—Ìnchéni, nchekaáni —ichro ch'án.

³¹À ntá tuénxín ch'ín Jesús mé itsé ch'án tja ch'ín Pedro la ntáchro ch'án kixin:

—Intsíkoá tinkachónkia tí janhan. ¿Nkekuènté títekákonhya? —ichro ch'án.

³²Na ntá tió k'ujit'ótjen sín yóí sín tí ntabárcø la ntá tuénxín k'uíxratá tí xrîntø. ³³Ntá kaín xín tí sín tjejóxenhen tí ntabárcø mé k'uéjoxin tochr'ín sín nkayakon ch'ín Jesús la ntáchro sín kixin:

—Jaha mé chaxín Xjeen Dios —ichro sín.

Ch'ín Jesús mé kjuínchekitøhe jína tí chojni níhi nonte Genesaret

(Mr. 6.53-56)

³⁴Ntá tió k'uátòye sín tí ntayaon ntá kjuíji sín tí nonte Genesaret. ³⁵Ntá tí sín síin ntiha tjoka kjuátsoan sín kixin jehe ch'ín Jesús tíha, ntá kuínhin tí sín chjasin chjinaxón ntiha la ntá kuíkao sín kaín tí sín níhi tí tjen ch'án.

³⁶Na ntá chrónøehê sín ch'án kixin chrókuítøhe ch'án kixin kjónté chrínta iké ch'án chrókuákóxin sín, la ntá kaín tí sín kuákóxin iké ch'án mé kuítøhe sín jína.

15

Tí jìe tjasin chojni

(Mr. 7.1-23)

¹À ntá chjasin Jerusalén kjuixin iso sín fariseo la ko iso tí sín maestro tjako tí ley la kjuíchréhe sín tí ch'ín Jesús. Ntá kjuanchankíhi sín ch'án kixin:

²—¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín tsík'axrjeníxinni kixin t'óntihya sín ítja sín ntá kjónté ine sín? —ichro tí sín fariseo a.

³À ntá kjuanchankí ch'ín Jesús kixin:

—¿Nkekuènté jahará kjaxin títekákonhyará nkehe tsík'etøan Dios? À ntá jahará tjinkáonrá naxa chrókuínkachónkirá tí nkehe kuínkachónki tí sín tsík'axrjeníxínrá. ⁴Ntáchro Dios kixin: “Tsochontehérá kjuasáya it'ará

la ko inará”, la ko ntáchro ch'án kixin: “Tí nkexro t'ántaxínhin it'é la ko iné la chrók'uen.”* 5 A ntá jahará tsíntáchrorá kixin ó nchoxon kixin ijnko nkexro tsochénta it'é la ko iné kixin: “It'éni, inéni, chrokjuahya tsjinkitsani tí jaha kixin kaín nkehe chóntani la ó chjéheni Dios.” 6 A ntá jnkójín nkexro tsontáchro ch'án tíhi ntá í t'ichjánxinhya tsjinkitsa tí it'é la ko tí iné, mé xikaha tsixrorá. Mé xikaha jahará kuitóhérá tí nkehe k'uetóan Dios kixin tjinkáonrá chrókjuich'erá éxí kjuich'e tí sín tsík'axrjeníxinrá. 7 Jahará la jehya jnkójínxón tjenkayáxinrá. Ntoá tsíntáchro tí ch'ín Isaías, tí nkexro k'uéchrónka itén Dios ósé. Mé chrónka ch'án kixin nkexrí tjejórá la xikaha tsíkjin ch'án kixin:

8 Tí chojni tí chjasin í ir'va ó xraxinkakonxín sín tí janhan a ntá tí asén sín la ikjín kuitóhe sín tí janhan.

9 Méxra ó chónko tóchjina sín xraxinkaon sín tí janhan kixin tí nkehe tjako sín la tí nkehe tsík'etóan chojni ó.† Mé xikaha ichro itén Dios.

10 Ntá k'uíyehé ch'ín Jesús tí chojni inaá la ntáchro ch'án kixin:

—Chrókuinhínrá la ko chrókuíenxinrá. 11 Kaín nkehe ine chojni la ó nchoxon, jehya jie. Tí jie la tí nkehe t'axrjexín ir'va chojni —mé xikaha ichro ch'ín Jesús.

12 A ntá tí sín k'uájiko ch'ín Jesús mé kóchjinehe ch'án la ntáchro sín kixin:

—¿Á noha kixin tí sín fariseo mé kónínkaon sín tí kuínhin sín tí nkehe ntáche sín? —ichro sín.

13 Ntá kjuátehe ch'án ntáchro ch'án kixin:

—Kaín tí ka jehya T'aná tjen nkaya nkajní k'uenkaxin la mé ts'axrjenkixin nuée. 14 Nté títóhé sín. Tí jehe sín la ntakótán sín la t'etuenhen sín í so sín ntakótán. A ntá tíó ijnko chojni ntakótán tjitaón ntja la ntá yóí sín ts'anótjenyá sín ichrén tòye —ichro ch'án.

15 Ntá ntáchro ch'ín Pedro kixin:

—Chrónka nkexrí t'axrjexín tíha —ichro ch'án.

16 Ntá kjuátehe ch'ín Jesús ntáchro ch'án kixin:

—¿Á kjaxinrá jahará tiénxinhyaará? 17 ¿Á tiénxinhyaará kixin kaín tí nkehe ineni na sátti nkaya tseeni na ko xik'axrjexín tí cuérpoeni inaá? 18 A ntá tí nkehe t'axrjexín ir'va chojni la t'axrjeníxin asén chojni la tíha la mé tí jie tjasixín chojni. 19 Kaín tíha mé t'axrjeníxin asén chojni, mé tí jínahya tjenkayáxin sín la ko tí t'oyán kichó sín la ko tí tjachehe kichó sín la ko tí chóna sín í jnko chojni chjin ókjé la ko teé sín la ko tí kjuach'ia la ko tí t'ántaxínhin kichó sín. 20 Tí nkehe a mé tjasixín chojni jie. A ntá tí sineni kjónté nchexiteyáhyani ts'ónti tjani la tíha la jehya jie —mé xikaha ichro ch'ín Jesús.

Ijnko tjan jehya sín israelita mé kuinkáchónki tí ch'ín Jesús

(Mr. 7.24-30)

21 Ntá ch'ín Jesús mé k'uaxrjexín ch'án ntiha la ntá sákjuí ch'án nó chjasin Tiro la ko chjasin Sidón. 22 Ntá ikui ijnko chojni chjin na mé ijnko tjan cananea na kjuák'e tjan tí chjasin ntiha. Kóchjinehe tjan tí ch'ín Jesús la k'uèya tjan ntáchro tjan kixin:

—Ìnchéni, Xjeen David, tikonóghéni kixin tí xjeenni chjin la mé níhi tjan chóna tjan ijnko nchakuen tí jínahya —ichro tí tjan a.

* 15:4 Éxodo 20.12; 21.17; Levítico 20.9 † 15:9 15.8-9 Isaías 29.13

23 **A** ntá ch'ín Jesús la ninkehó kjuátēehya ch'án. **A** ntá tí sín k'uájiko ch'án na kóchjina sín la ntáche sín ch'án kixin:

—Tétuēnhén tjan sátsji tjan kixin tinkák'óyako tjan chréhe tjan tí jeheni —ichro sín.

24 **Ntá** ntáchro ch'ín Jesús kixin:

—Dios mé ichr'ánna tsjéyá jehó tí kolélo kjuíchroē kuènte naciòn Israel —ichro ch'án.

25 **A** ntá tí tjan a kóchjina la kjuák'exín toch'in tjan nkayakon tí ch'ín Jesús la ntáchro tjan kixin:

—Ìnchéni, tjínkítsani —ichro tjan.

26 **A** ntá ch'ín Jesús kjuátēhe ch'án ntáchro ch'án kixin:

—Jehya tí jina chrókuakitsjahā niotjā tí xjan ntá chrótjahā koniā chrókjónē va —ichro ch'án.

27 **A** ntá jehe tjan la ntáchro tjan kixin:

—Chaxín xikaha, inchéni. Kjánchó kjónté tí koniā na tí nkehe tsjixènjinnkí mesa kuènte inché la ine va —ichro tjan.

28 **Ntá** ntáchro ch'ín Jesús kixin:

—Jaha imá tinkachónkia tí janhan. Tí nkehe tjinkávan la tsoxiteyá —ichro ch'án.

Ntá tuénxín tí hora la tí xjeen tjan ó kuítóhe jina.

Ch'ín Jesús mé kjuínchekitōhe jina nchónhya chojni níhi

29 **Ntá** ch'ín Jesús mé sákjuúxin ch'án ntiha la kjuíji ch'án chrínta ntayaon Galilea. **Ntá** chriin ch'án ijnko jnā la ntiha kjuák'etjāxin ch'án. 30 **Ntá** kójnkotsé itsjé chojni tí tjen ch'án la kjuíkāo sín tí sinníhi, mé tí sín xitjahya tji la ko tí sín t'ikonhya la ko tí sín nixjahya la ko tí sín tsixénká la kaín xín tí í so sinníhi. K'uejo sín tí sinníhi toté tí ch'ín Jesús kixin jehe ch'án mé sinchekitōhe ch'án sín jina. 31 **Kaín** chojni la imá chrakon sín kixin k'uíkon sín kixin tí sín k'uénixjahya la ó nixja sín la tí sín tsixénká la tsíkitohe sín jina la tí sín xitjahya tji la ó tji sín la ko tí sín k'uék'ikonhya la ó t'ikon sín. Méxra kjuanchehe sín kjuasáyé tí Dios kuènte tí sín Israel.

Ch'ín Jesús mé kjuínchekjine noó mil chojni

(Mr. 8.1-10)

32 **Ntá** k'uíyēhe ch'ín Jesús tí sín k'uájiko ch'án la ntáchro ch'án kixin:

—Imá tikonóghā kaín tí chojni kixin ó ní yaon tjejókoni sín ntá kjuēhe sín nkehe sine sín. Tjinkakonhya chrókuétuanhan sín sáchrókjui sín nteō sín kixin naḡa nehya sín la ntā ó tsótiēxín sín kjinta —ichro ch'án.

33 **Ntá** ntáchro tí sín k'uájiko ch'án kixin:

—Ntá jaha la ó noha kixin nteje tjejóni la kohya nkehe tsochjéheni kaín xín tí chojni a —ichro sín.

34 **Ntá** ch'ín Jesús mé kjuanchankíhi sín, ntáchro ch'an kixin:

—¿Nkekjaín niotjā chontará? —ichro ch'án.

Ntá ntáchro sín kixin:

—Yato niotjā chóntani la ko iso koche ntsíntsi —ichro sín.

35 **Ntá** ch'ín Jesús k'ueṭoan ch'án kixin kaín xín sín ts'ixitjāxin sín nonte, ichro ch'án. 36 **Ntá** kuákja ch'án tí yato niotjā la ko tí koche ntsíntsi la kjuanchehe ch'án kjuasáyé Dios. **Ntá** kóchrít'ō ch'án tí niotjā a la ntá k'ueṭuēnhen ch'án tí sín k'uájiko ch'án kixin ts'óxikayēhe sín tí niotjā la ko tí koche kaín xín tí sín siín a, sine sín. 37 **Na** mé kaín xín sín kjónē sín na kókjehe sín ntá kjuenájín sín yato ntaxra tot'ō tí nkehe naḡa tsixehe.

38 **A** ntá tí sín kjónē mé noó mil chojni ntoa. **A** ntá tí chojni chjin la ko

chánjan la mé kuákjahya sín cuenta nkekjaín tí sín a. ³⁹ Ntá ch'ín Jesús mé nixjehe ch'án sín sákjuí sín la ntá k'uit'ótjen ch'án ntabárcó la sákjuí ch'án nó Magdala.

16

Tí sín fariseo la ko tí sín saduceo tjanchia ijnko kjuaxroan náxrjón
(Mr. 8.11-13; Lc. 12.54-56)

¹ A ntá iso tí sín fariseo la ko iso tí sín saduceo mé sákjuítsjehe sín tí ch'ín Jesús. Tjinkaon sín chrókjuachaxín sín ch'án la kjuanchehe sín ch'án kixin chrókjuakoxín ch'án ijnko kjuaxroan kixin á chaxín jehe ch'án tsíkixín ch'án tí tjen Dios. ² A ntá ch'ín Jesús na kjuátehe ch'án, ntáchro ch'án kixin:

—Jahará ntáchrórá kixin ijie ntá kónjín ó tsi ijnko yaon jina kixin kjátse nkajní. ³ La ntá nchítjen ntáchrórá kixin ijie la náxrjónhya kixin kjátse nkajní la tjenkáya tjuj. Méxra jahará ntoáhya tjenkayáxinrá. Ó nohará tjátsoanrá tí nkajní, a ntá tjátsoanhyará tí kjuaxroan sitónhen jie. ⁴ Tí sín jínahya la tí sín titekakonhya la tjanchia sín ijnko kjuaxroan jíé. A ntá ts'ikonhyará í jnko kjuaxroan, jehó tí kjuaxroan kuènte ch'ín Jonás mé ts'ikonrá —mé xikaha ichro ch'ín Jesús.

Ntá kuitóhe ch'án sín la sákjuí ch'án.

Ch'ín Jesús ntáchro kixin chrókuitekakonhya sín tí nkehe tjako tí sín fariseo
(Mr. 8.14-21)

⁵ Ntá tí sín k'uájiko ch'ín Jesús mé k'uátòye sín ntayaon la ntá k'uitjáyenhen sín tsíkikohya sín niotja. ⁶ Ntá ntáchro ch'ín Jesús kixin:

—Chrókóxakonhanrá kixin tí xroan ts'ánkixin niotjé tí sín fariseo la ko tí sín saduceo.

⁷ Ntá tí sín k'uájiko tí ch'ín Jesús mé ikjo sín kichó sín ntachro sín kixin:

—Mé xikaha ichro ch'án kixin tsíkikohyani niotja —ichro sín.

⁸ Ntá kónohe ch'ín Jesús kixin nkehe tí kjo sín kichó sín, ntá ntáchro ch'án kixin:

—¿Nkekuènté tjórá kixin chontahyará niotja? Jahará la intsíkoá tinkachónkirá tí janhan. ⁹ Jahará ¿á naxa tiénxinhyará la ko á xráxinkákonhyará tí in'ó niotja k'óxikayeheni kjóne tí in'ó mil chojni la ko á xráxinkákonhyará nkekjaín ntaxra kjuenájinnrá tí nkehe tsíxehe?

¹⁰ La ko ¿á xráxinkákonhyará jahará tí yato niotja xikayehi kjóne tí noó mil chojni la ko á xráxinkákonhyará nkekjaín ntaxra kjuenájinnrá tí nkehe tsíxehe? ¹¹ A ntá ¿nkekuènté kixin kuiénxinhyará kixin janhan la jehya kuènte niotja tjénixja tió ntáxrjan kixin chrókóxakonhanrá kixin tí xroan ts'ánkixin niotjé tí sín fariseo la ko tí sín saduceo? —mé xikaha ichro ch'ín Jesús.

¹² Na ntá kuienxín sín kixin nixjahya ch'án kuènte tí xroan t'ánkixin niotja. Náhí. Tjenixja ch'án kixin chrókóxakonhen sín kixin tí nkehe tjako tí sín fariseo la ko tí sín saduceo.

Chrónka ch'ín Pedro kixin ch'ín Jesús mé tí nkexro Cristo
(Mr. 8.27-30; Lc. 9.18-21)

¹³ Kjuíji ch'ín Jesús chjino tí chjasin Cesarea de Filipino ntá jehe ch'án mé kjuanchankíhi ch'án tí sín k'uájiko ch'án, ntáchro ch'án kixin:

—¿Nkehe tjo sín kixin nkexro tí Xjeen Dios K'óna Chojni? —ichro ch'án.

¹⁴ Ntá jehe sín kjuátehe sín ntáchro sín kixin:

—Iso sín mé ntáchro sín kixin Juan Bautista, ichro sín. **A** ntá í so sín na mé ntáchro sín kixin Elías, ichro sín. **A** ntá í so sín mé ntáchro sín kixin Jeremías o í jnko nkexro k'uéchrónka itén Dios —ichro sín.

¹⁵ Ntá ntáchro ch'ín Jesús kixin:

—¿**A** ntá jahará nkechrorá kixin nkexro tí janhan? —ichro ch'án.

¹⁶ **A** ntá ch'ín Simón Pedro kjuátehe ch'án ntáchro ch'án kixin:

—Jaha mé tí Cristo mé Xjeen Dios tjechón —ichro ch'án.

¹⁷ Ntá kjuátehe ch'ín Jesús ntáchro ch'án kixin:

—Náxrjón tjen jaha Simón xjeen Jonás kixin kohya nijnko chojni kjuakoha tíha. Jehó T'aná tjen nkaya nkajní mé kjuakoha tíha. ¹⁸ Méxra ntáxrjan kixin jaha mé Pedro mé t'axrjexín kixin ijnko xro la chrítaón tí xro mé sít'ána njnko la kjónté tí kjuachaxin kuènte kjuach'én la tsjachahya sinchek'itjáyán. ¹⁹ Méxra jaha mé tsotjaha tí llave kuènte kjuachaxin nkaya nkajní la ntá tí nkehe tjánjonhya kjuachaxin tsonhen ntihi chjasintajni la kjaxin nkaya nkajní tsochóntahya kjuachaxin. **A** ntá tí nkehe tsjánjuan kjuachaxin tsonhen ntihi chjasintajni la ntá kjaxin nkaya nkajní síin kjuachaxin.

²⁰ Ntá ch'ín Jesús mé k'uetuenhen ch'án tí sín k'uájiko ch'án kixin ninkexró tsochénkahya sín kixin jehe mé tí Cristo.

Ch'ín Jesús chrónka ch'án kixin its'en ch'án

(Mr. 8.31—9.1; Lc. 9.22-27)

²¹ Ntá ch'ín Jesús kjuankixin ch'án chénka ch'án tí sín k'uájiko ch'án kixin t'ichjánxin satsji ch'án chjasin Jerusalén la ntaha la tí sín t'etōan kuènte njnko la tí sín nchát'á tjetōan la ko tí sín maestro tjako ley mé imá sinchekjasóte sín ch'án. La chrónka ch'án kixin ts'óyán sín ch'án kjánchó tí níxin yaon mé tsoxechón ch'án inaá. ²² Ntá ch'ín Pedro mé kuakitsjenta ch'án tí ch'ín Jesús la kjuankixin nixjehe ch'án ntáchro ch'án kixin:

—Kjá Dios tsjanjonhya kjuachaxin xikaha tsonhan Ìnchéni kixin jaha la xitjahya tsjasóte xikaha —ichro ch'ín Pedro.

²³ **A** ntá ch'ín Jesús mé kuinkátjía ch'án la nixjehe ch'án tí ch'ín Pedro, ntáchro ch'án kixin:

—Sátjia ntáha, Sátanas. Tjiatehya tí jaha tí nkehe tsonna. Jaha chrók'uínkakhén tí nkehe tjinkaon Dios. Jaha tjenkayáxinhya éxi tjinkaon Dios. Náhí. Tjenkayáxian éxi tjenkayáxin chojni ó —ichro ch'ín Jesús.

²⁴ Ntá nixjehe ch'ín Jesús tí í so sín k'uájiko ch'án, ntáchro ch'án kixin:

—Jnkojínrá tjinkáonrá tsochréhérá tí janhan la t'ichjánxin tsjtohérá kaín tí nkehe tjaké asánrá, ntá tsámárá tí ntacruz kuéntará, **a** ntá tsochréhérá tí janhan. ²⁵ **A** ntá tí nkexro tjinkaon jehó sinchekaá asén la ts'itjáyán. **A** ntá tí nkexro chrókuinçek'itjáyánxín asén kixin tinkáchónki sín tí janhan la tsaá. ²⁶ ¿**A** ntá nkehe tsonhen tí chrókuacha ijnko chojni chróchónta kaín nkehe síin chjasintajni **a** ntá tí kjuachón chrókuinçek'itjáyán? ¿Nkehe chrókuenka chojni kixin chróchónta tí kjuachón? ²⁷ Tí Xjeen Dios K'óna Chojni tsikao ch'án tí kjuachaxin jíe kuènte It'é ch'án tjen nkaya nkajní la kaín tí sín ángel tsikao ch'án na ntá tsjenkehe ch'án jnkojnko chojni nkexrí tí xra kjuích'e jnkojnko tí jehe sín. ²⁸ Chaxín xrjanka kixin isorá tjejorá ntihi la naxa ts'énhyará naxa ts'ikonjjará kixin nkexrí tí kjuachaxin tsochónta tí Xjeen Dios K'óna Chojni tí tsikao ch'án kjuachaxin jíe —ichro ch'ín Jesús.

17

Ch'ín Jesús mé k'uixitóxin nkexrí tsjehe ch'án
(Mr. 9.2-13; Lc. 9.28-36)

¹ Ntá injón yaon chr'éxin ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan, kichó ch'ín Jacobo, la k'uit'ótjen sín ijnko jnā imá noi. ² Ntá ntiha tjejó sín ntá xrínahya k'uikon sín kixin ch'ín Jesús mé k'uixitóxin nkexrí tsjehe ch'án. Tí nkayakon ch'án la imá tjákiní tsjehe éxí yaon la ko iké ch'án la k'óna imá tjóá la tsjehe éxí yóhé ijnko xrohi t'inkaséyan. ³ Na ntá xrínahya k'uikon sín itjen ch'ín Moisés la ko tí ch'ín Elías tjejójtjo sín tí ch'ín Jesús.

⁴ Na ntá ch'ín Pedro mé ntáche ch'án tí ch'ín Jesús kixin:

—Inchéni, jina kixin tjejóni ntihi. Tí tjinkávan la chrókjuich'énani iní nchia la mé ijnko kuéntá jaha la ijnko kuénte ch'ín Moisés la íjnko kuénte ch'ín Elías —ichro ch'án.

⁵ Ntá naxa tjenixja ch'ín Pedro na ntá xrínahya ikui ijnko tjuj imá t'inkaséyan kjuák'etja chrítaón tí jnā tjejó sín. Ntá xrínahya chríkjan tí tjuj kuínhin sín itén ijnko nkexro nixja na mé ntáchro kixin:

—Tíhi mé xjanna. Imá tjuahā ch'án la ko chàna kixin itjen ch'án. Chrókuinhínrá tí nkehe tjako ch'án —ichro Dios.

⁶ Kuínhin tí sín k'uájiko ch'án xíkaha la ntá kjuítsínka sín nonte kixin imá chrakon sín. ⁷ Na ntá ch'ín Jesús mé kóchjina tí tjejó sín la kuákóxin sín ch'án la ntáchro ch'án kixin:

—T'áya chrakonhyará —ichro ch'án.

⁸ Na ntá xrínahya k'uikon sín kixin kohya ninkexró. Jehó ch'ín Jesús mé tjen.

⁹ Na ntá tí k'uínkajinxin sín tí jnā ntá k'uetqan ch'ín Jesús, ntáchro ch'án kixin:

—Ninkexró chenkahyará tí nkehe k'uikonrá ijie hasta tsoxechónjian tí Xjeen Dios K'óna Chojni —ichro ch'án.

¹⁰ Ntá tí sín k'uájiko ch'ín Jesús mé kjuanchankí sín, ntáchro sín kixin:

—¿Nkekuénté ntáchro tí sín maestro tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹¹ Ntá kjuátehe ch'ín Jesús, ntáchro ch'án kixin:

—Chaxín senó itsi ch'ín Elías kixin tsjasiyóxin ch'án kaín nkehe.

¹² Kjánchó ó xrjanka kixin chaxín ó kui ch'ín Elías la tí sín chjasintajni la mé kjuátsoanhya sín ch'án la kjuínchekjasóte sín ch'án éxí kóxrjínhin sín. Mé xíkaha kjaxin tí Xjeen Dios K'óna Chojni la mé kjaxin sinchekjasóte tí jehe sín —mé xíkaha ichro ch'ín Jesús.

¹³ Ntá tí sín k'uájiko ch'án mé kónohe sín kixin ch'ín Jesús la nixja ch'án kuénte Juan Bautista.

Ch'ín Jesús mé kjuínchekitohe jina ijnko xjan t'aniáte
(Mr. 9.14-29; Lc. 9.37-43)

¹⁴ Ntá tió k'uíji sín tí sijn nchónhya chojni la ntá kóchjina ijnko ch'ín tí tjen ch'ín Jesús la kjuák'exin toch'in ch'án nkayakon ch'án. La ntáchro ch'án kixin:

¹⁵ —Inchéni, tikonóehéni kixin xjeenni la níhi, chóna ch'án chin t'aniáte. Nchónhya veces tjítsínkate ch'án xrohi la tjítsínkankí ch'án ntā. ¹⁶ Ntá kjuíkajoni ch'án ntihi la tí sín xrikoá la kjuachahya sín kjuínchekitohe ch'án jina.

¹⁷ Ntá kjuátehe ch'ín Jesús ntáchro ch'án kixin:

—Jahará la chaxínhya tinkachónkirá tí janhan la imá tjásinrá jie. ¿Xá hasta nkesá tjinkáonrá naxá ts'ejóni? ¿Hasta nkesá tsjácha tsjak'é tsjákohará? Xrakoa tí xjan méhe ntihi —ichro ch'án.

¹⁸ Ntá ch'ín Jesús mé k'uetuenhen ch'án tí nchakuen tí jínahya la ntá k'uaxrjexín tí nchakuen tí jínahya tí chánjan la tuénxín kuitóhe xjan jína.

¹⁹ Ntá kjuixin sákjuí sín la jehó ch'ín Jesús tjen ch'án la ntá tí sín k'uájiko ch'án mé kjuanchankíhi sín ch'án, ntáchro sín kixin:

—¿Nkekuènté kixin kjuachahyani kuakitsjeni tí nchakuen tí jínahya a? —ichro sín.

²⁰ Ntá ntáchro ch'ín Jesús kixin:

—Jahará la kjuachahyará kuakítsjerá nchakuen tí jínahya kixin intsíkoá tinkachónkirá tí janhan. Chaxín xrjanka kixin tí chrókuinkachónkirá kaín asánrá kjónté intsíkoá éxi ijnko tje mostaza intsi la ntá chróntácherá tí jnā kixin: “Sátjixian ntihi la sátsjia ókjé”, chróchrórá chróntácherá tí jnā la ntá tí jnā sáchrókjuixin ntiha. Mé xíkaha kaín nkehe chrókjuachará chrókjuich'erá tí chaxín tinkachónkirá tí janhan. ²¹ A ntá tí tsakítsjerá ijnko nchakuen tí jínahya la t'ichjánxín tsonixjehérá Dios la ko sintehyará.

*Ch'ín Jesús chrónka ch'án ínaá kixin its'en ch'án
(Mr. 9.30-32; Lc. 9.43-45)*

²² Naxá k'uék'aji sín jnkokoá tí estado Galilea la ntáchro ch'ín Jesús kixin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí síin chojni t'etoan sinchekjasóte sín ch'án ²³ la ts'óyán sín ch'án. A ntá tí yaon níxin ntá tsoxechón ch'án ínaá, ichro ch'án. Ntá tí sín k'uájiko ch'án mé kuínhin sín la imá k'uává sín.

Ch'ín Jesús kjuenkā ch'án tí nkehe kjuanchia tí sín kuènte nínko

²⁴ Ntá tió kjuíji ch'ín Jesús la ko tí sín k'uájiko ch'án tí chjasin Capernaum la ntá tí sín nchekjènkj kuènte nínko mé sákjuítsjehe sín tí ch'ín Pedro la kjuanchankí sín kixin:

—Tí maestro kuèntá la, ¿a tjenkāhya ch'án tí nkehe tjanchia tí sín nchekjènkj kuènte nínko? —ichro sín.

²⁵ Ntá kjuátehe ch'ín Pedro, ntáchro ch'án kixin:

—Kjá tjenkā ch'án —ichro ch'án.

Ntá k'uixenhen ch'ín Pedro tí nchia la ch'ín Jesús mé senó nixja ch'án ntáchro kixin:

—¿Nkechrúa, Simón? ¿Nkexro chrókjuenkā tí nkehe tjanchia tí sín t'etoan chjasintajni, á tí sín kuènte ntiho o á tí sín tsíkjixín ókjé? —ichro ch'ín Jesús.

²⁶ Ntá kjuátehe ch'ín Pedro, ntáchro ch'án kixin:

—Tí sín tsíkjixín ókjé mé tjenkā sín —ichro ch'án.

Ntá ntáchro ch'ín Jesús kixin:

—A ntá tí sín chjasén sín la t'ichjánxínhya chrókjuenkā sín. ²⁷ Kjánchó tjínkākónhya tsonínkaon ninkexró ntihi. La ntá sátsjia tí ntayaon sátsjikoá tí ichjón chóna gancho tséxin sín koche la ntaha itsé tí chjón chrínkí ntayaon. Ntá tsákjé tí koche saoxín sítsé gancho. Ntá takitjehe nkaya ir'va va la ts'itja ijnko chichaon. Táha mé tsjacha tsjenkā kaín tí tjásikáhā sín la ko tí tjásikehé sín jaha. Táha mé sátsjikoá tjenka —ichro ch'ín Jesús.

18

*¿Nkexro tí imá ts'etoan?
(Mr. 9.33-37; Lc. 9.46-48)*

¹ **A** ntá tí yaon a tí sín k'uájiko ch'ín Jesús mé kóchjinehe sín ch'án ntá kjuanchankíhi sín ch'án kixin:

—¿Nkexro tí antsí má ts'etean tí kjuachaxin kuente nkaya nkajní? —ichro sín.

² Ntá ch'ín Jesús mé k'uíyehé ch'án ijnko chánjan la kjuak'e jnkosiné tí tjejó tí jehe sín ³ la ntáchro ch'án kixin:

—Chaxín xrjanka kixin tí ts'ónahyará éxí ijnko xjan ntsí ntá xitjahya tsákjára tí kjuachaxin kuente Dios. ⁴ Tí jnkójín nkexro ts'óna éxí tí chánjan ihnkehya la mé antsí tjeotan ntiha. ⁵ **A** ntá tí nkexro ts'áyéhe ijnko chánjan kixin tinkáchónki sín tí janhan la mé xikaha éxí chrók'uáyéhe sín tí janhan —mé xikaha ichro ch'ín Jesús.

Tí chojni tjasin jie mé tsjasóte sín

(Mr. 9.42-48; Lc. 17.1-2)

⁶ 'Tí jnkójín nkexro chrókjuachroe ijnko chánjan ntsí tinkáchónki tí janhan la íchá jína chrókjuincheteyá sín ch'án ijnko xro tsik'óna xrochre ntá chrókjuikakánki ch'án ntayaon ninka. ⁷ Imá náxrjónhya tjejó tí sín chjasintajni kixin siín nkehe tjasixín chojni jie. Xráxín la jehí siín, a ntá nòa tí nkexro tjasin tí nkehe tsjasixín chojni jie.

⁸ 'Tí itjá o totá tjásixián jie na chrókójína chrókochrínjian chróchr'an ikjín kixin íchá jína chróchonta kjuachón kjónté it'oo itjá o it'oo totá. **A** ntá tí yói itjá o yói totá chróchonta tsjásixián jie la tíha mé sátsjixián tí síche xrohi jnkochrín. ⁹ La ko kjaxin tí ikuan tjásixian jie na chrókójína chrókuakitsjenkiá tí ikuan chróchr'an ikjín kixin kjónté náyo ikuan na chróchonta kjuachón. **A** ntá tí yói ikuan chróchonta tsjásixián jie la tíha mé sátsjixián tí síche xrohi jnkochrín.

Kjuíncheyóexin ch'ín Jesús éxí ijnko kolélo tsík'itjáyán

(Lc. 15.3-7)

¹⁰ 'Chrókókjoniéhyará nijnko tí chánjan ntsíntsí. Tjonkará kixin nkaya nkajní la tí sín ángel kuente tí xjanntsi la xráxín tjejó sín tí tjen T'aná nkaya nkajní. ¹¹ Tí Xjeen Dios K'óna Chojni la mé ikui kixin chrókjuinchekaá tí chojni xrichroe.

¹² '¿Jahará nkechorá? Ijnko chojni chóna ijnko ciento kolélo ntá chrók'uitjáyán ijnko va na zá chrókuítgehya ch'án tí noventa y nueve va tí jna ó a ntá á chrókjuikjeyáhya ch'án tí ijnko tí ko k'uitjáyán ní?

¹³ **A** ntá tí tsjacha ch'án ts'itja ch'án va ntá antsí tsochéhe ch'án kixin tí kolélo k'uitja ch'án la ntá kánhyó tsochéhe ch'án kixin tjejó tí noventa y nueve ko tsík'itjáyánhya va. ¹⁴ Mé xikaha kjaxin It'eni tjen nkaya nkajní la tjinkakonhya ch'án kixin chrók'uitjáyán ninkexró kjónté ijnko chojni kánhyó tjeotan.

Chrók'uitjáyánhanrá tí jie kjuasinhanrá kichuára

(Lc. 17.3)

¹⁵ 'Tí kichuá tí chrókjuit'aha ichrén nkehe jínahya la ntá jahvá chrónixjehé ch'án la nhexraxinkaon ch'án tí jie kjuasin ch'án. **A** ntá tí kjuacha nixjehé tí kichuá la í kohya kjuanínkaon. ¹⁶ **A** ntá tí tahya ch'án kuentá nkechrua la ntá ntáche á jnko o yaá chojni sátojkoa kixin tsinhin sín á chaxín titekakonhya ch'án. ¹⁷ **A** ntá tí kjónté xikaha naxá titekakuenhya ch'án sín la ntá chenka tí sín tsíkójnkotsé nkehe tí jie kjuasin ch'án la ntá tí naxá titekakuenhya ch'án tí sín tsíkójnkotsé la ntá ts'ikonrá ch'án éxí ijnko chojni tinkáchónkihya Dios o éxí ijnko chojni nchekjènkí.

18 'Chaxín ntáxrjan kixin tí tsjánjonhyará kjuachaxin nkehe tsonhen ntihi chjasintajni la ntá kjaxin nkaya nkajni tsjanjonhya Dios kjuachaxin la ko tí tsjánjonra kjuachaxin nkehe tsonhen ntihi chjasintajni la kjaxin ntaha nkaya nkajni tsjanjon Dios kjuachaxin.

19 'Kjaxin ntáxrjan kixin tí tjejó yaará ntihi chjasintajni la tí jnkokoá tjejótkenayáxinrá chrókjuancheherá Dios ijnko nkehe tjinkáonrá la ntá jehe ch'án mé tsotjáhará ch'án. 20 Kixin tí tjejó yaá o iy'á chojni tjejó jnkokoá t'ákjenxin sín niná la janhan koína tjéntaxian tí tjejó sín ntiha.

21 Ntá kóchjina ch'ín Pedro mé kjuanchankí ch'án ntáchro ch'án kixin:
—Ínchéni, ¿nkejaín veces chrók'uitjáyenhenni tí jię kjuasin kichó ni? ¿Á yato veces ó ní? —ichro ch'án.

22 Ntá kjuátehe ch'ín Jesús, ntáchro ch'án kixin:

—Náhí, jehya yato veces ó. Náhí, hasta setenta veces tí yato.

Ch'ín Jesús kjuíncheyóxin ch'án ijnko chojni ch'exón xra k'uitjáyenhya ch'án ijie kichó ch'án

23 'Tí kjuachaxin kuènte Dios la éxi yóhe ijnko rey tjinkaon ch'án tsjentoáko ch'án kuentá tí sín ch'ehe ch'án xra. 24 Ntá kjuankixin ch'án tsítsínkaxín cuenta la ntá xrínahya kóchjina ijnko ch'ín ch'e xra síká nchónhya millones chichaon. 25 Tí ch'ín a mé chóntahya ch'án chichaon ts'ókjenhen ch'án tí ch'ín rey la ntá tí ch'ín rey mé k'ueŕtoan ch'án kixin tí nkexro a mé tsoxi ch'án la koí tí ichjién ch'án la ko xjęen ch'án la ko kaín nkehe kuènte ch'án kixin ntá xikaha mé tsoxenka kaín tí síká ch'án. 26 A ntá tí nkexro ch'e xra mé kjuák'exín toch'in ch'án nkayakon tí rey la chrónóhe ch'án, ntáchro ch'án kixin: “Jaha Ínchéni tikonóhéni la kjónté kjaxón tsjenkahani kaín tí síkähani”, ichro ch'án. 27 A ntá tí ch'ín rey kujkonóhe ch'án tí ch'ín a kjónté itsjé síká ch'án, ntá kuitohe ch'án sákjuí. 28 A ntá tí sákjuí tí ch'ín a ntá xrínahya xéta ch'án ijnko nkexro ch'eko ch'án xra mé ijnko nkexro síkéhe ch'án iso chichaon. La ntá tí ch'ín a mé tsénkíhi ch'án isin la ntáchro ch'án kixin: “¡Tsjékaná tí nkehe tjasíkàna ní o náhi!” ichro ch'án. 29 A ntá tí ch'ín chóxin ch'án mé kjuák'exín toch'in ch'án nkayakon ch'án la chrónóhe ch'án ntáchro ch'án kixin: “Tikonóhéni ijie la kjónté kjaxón tsjenkahani kaín tí nkehe síkähani”, ichro ch'án. 30 A ntá jehe ch'án la kujkonóheya ch'án. K'ueŕtoan ch'án kixin tí ch'ín a mé tsjak'echjina ch'án tsjixinjian tsjenka ch'án kaín tí síká ch'án. 31 Ntá tí í so sín ch'exón xra mé k'uíkon sín la ntá imá kóxakonhen sín la sákjuíchénka sín tí lámoé sín nkexrí kaá kónhen tí ch'ín síká. 32 A ntá tí lamo mé k'ueŕtoan tsjik'íyehę sín tí nkexro jínahya la ntá ntáchro ch'án kixin: “Imá jínahya jaha. Janhan mé kjuintak'itjáyahanhan tí nkehe tjasíkàna kixin jaha chronóana. 33 A ntá jaha mé kjaxin chrókujkonóhé tí nkexro choxian éxi janhan kujkonóaha tí jaha”, ichro tí ch'ín lamo. 34 A ntá imá kónínkaon tí lamo a la k'ueŕtoan ch'án kixin tsjasóte tí ch'ín a tsjixinjian tsjenka ch'án kaín tí síká ch'án.

35 A ntá tí ch'ín Jesús ntáchro ch'án kixin:

—Mé xikaha T'aná tjen nkaya nkajni xikaha sit'ahará jahará tí jehya kaín asánrá ts'itjáyahanhá tí jię chóna kichuárá —ichro ch'ín Jesús.

19

*Tjako ch'ín Jesús kuènte tí sín t'itjíhi kichó
(Mr. 10.1-12; Lc. 16.18)*

¹ A ntá kjuixin nixja ch'ín Jesús kaín tíha, ntá sákjuixin ch'án estado Galilea la kjuíji ch'án estado Judea nó tóhe tí ntarío Jordán. ² Ntá nchónhya chojni kjuíjichréhe sín ch'án ntá ntiha mé kjuínchekitohe ch'án jína tí chojni níhi.

³ Ntá iso sín fariseo mé kóchjinehe sín tí ch'ín Jesús kjuanchankíhi sín ch'án kixin tsotsjehe sín nkexrí tsixro ch'án, ntáchro sín kixin:

—¿Á síin kjuachaxin tsjákehe jnkojín chojni ichjién kjónté kohya jie jie?
—mé xikaha kjuanchankí sín.

⁴ Ntá kjuátehe ch'ín Jesús ntáchro ch'án kixin:

—¿Á nunca kjuínchekuáxinhyará jahará kixin ntáchro xroon itén Dios kixin tí nkexro kjuích'éna kaín chojni síin chjasintajni tí xrankíxixín, la tí nkexro mé “kjuích'éna ch'án chojni ntoa ko chojni chjin”?* ⁵ La ko ntáchro kixin: “Mé xikaha tí chojni ntoa la tsítóhe sín it'é sín la ko iné sín la tsakja sín ichjién sín la yóí sín la éxí ó jnko chojni xikaha ts'óna sín.”† ⁶ Mé xikaha la í jehya yaá chojni tí jehe sín. Náhí. Ó jnko chojni k'óna tí jehe sín la mé Dios kjuanjon kjuachaxin kixin kuákja kichó sín, la i xitjahya ts'itjíhi kichó sín.

⁷ Ntá tí sín fariseo mé kjuanchankíhi sín ch'án kixin:

—¿Ntá nkexrí kixin tí ch'ín Moisés k'uetqan kixin ts'óna ijnko xroon tsakja tí ichjién kixin tsjákeexín kichó sín?‡ —ichro tí sín fariseo.

⁸ Ntá ntáchro ch'ín Jesús kixin:

—A ntá jahará títekákonhyará. Méxra ch'ín Moisés kjuanjon ch'án kjuachaxin kixin ts'óna tí xroon ts'itjéxín kichuárá. Kjánchó tí xrankíxixín la xikaha kónhen. ⁹ Méxra ntáxrjan kixin jnkojín sín tjákehe ichjién tí kjuasinhya jie, chóntahya tjan í jnko chojni, ntá kjuákehe ch'án tjan ntá tsakja ch'án í jnko chjin mé xikaha la ó jie tíha. La ko kjaxin tí ijnko chojni chjin tsikítsínkehe ntá tsakja í jnko chojni la kjaxin jie tíha.

¹⁰ La ntá tí sín k'uájiko ch'ín Jesús ntáchro sín kixin:

—Tí xikaha tjanjonko kichó sín chrók'uitjíhi kichó sín la íchá jína chrókóteehya sín.

¹¹ Ntá ntáchro ch'ín Jesús kixin:

—Kénhya chojni tsjacha tienxín tíha. Jehó tí sín kjuanjon Dios kjuachaxin tienxín sín. ¹² Síin iso chojni tí tsík'ónaxín sín la chóntahya sín kojé sín la xitjahya tsochónta sín ichjién sín. La í so sín la chrokjuahya tsakja kichó sín kixin ókjé chojni kjaxin kjuích'ehe sín xikaha, la ko í so sín la takjahya kichó sín kixin tjinkaon Dios kixin xikaha sich'ehe sín ch'án xra. Tí sín tsjacha sich'e tíha la chrókjuích'e sín xikaha.

Ch'ín Jesús mé kjuíncheyaon ch'án chánjan

(Mr. 10.13-16; Lc. 18.15-17)

¹³ Ntá ikjui chojni kjuíkaon sín iso xjan kixin tjinkaon sín tsjak'etja tja ch'ín Jesús chrítaón tí chánjan la sincheyaon ch'án sín. Ntá tí sín k'uájiko ch'án mé kónínkakonhen sín tí sín kjuíkaon tí xjan. ¹⁴ A ntá ntáchro ch'ín Jesús kixin:

—Nté tjtóhérá tsoxrakoa xjan tí tjén janhan la t'ínkakuènhyará xjan kixin tí sín kuènte kjuachaxin nkaya nkajni la mé tóyóhe éxí tí jehe xjan —ichro ch'án.

¹⁵ Ntá kjuak'etja tja ch'án chrítaón tí xjan la ntá kjuixin ntá sákjuí ch'án ókjé.

* 19:4 19.4: Génesis 1.27; 5.2 † 19:5 Génesis 2.24 ‡ 19:7 Deuteronomio 24.1-4

Ijnko ch'ín ntasoá rico mé kjuínixjehē ch'án tí ch'ín Jesús

(Mr. 10.17-31; Lc. 18.18-30)

¹⁶ A ntá ijnko ch'ín ntasoá sákjuítsjehe ch'án tí ch'ín Jesús la kjuanchankíhi ch'án kixin:

—Jaha la ijnko Maestro jína. La ntá ñkehe jína chrókjuich'eni kixin chróchóntani kjuachón jnkochrín? —ichro ch'án.

¹⁷ Ntá ch'ín Jesús kjuátehe ch'án, ntáchro ch'án kixin:

—¿Nkekuènté ntáchrua kixin jína tí janhan? Jehó jnkokoá nkexro la mé jína la tíha mé Dios. A ntá tí tjinkávan tsochonta kjuachón jnkochrín la títekávan tí nkehe k'uętoan Dios —ichro ch'ín Jesús.

¹⁸ Ntá ntáchro tí ch'ín ntasoá kixin:

—¿Nkehe tíha? —ichro ch'án.

Ntá ntáchro ch'ín Jesús kixin:

—Chrók'oyánhya chojni la ko chrókjuich'iyehya nijnko chojni chjin la ko chrókueghya la ko chrókjuich'énahya kjuach'ia kuènte ókjé chojni ¹⁹ la ko chrókjuíkósáyehé it'á la ko ñná la ko chrótjuèhé kichuá éxí tjuèxian asán. S —mé xikaha ichro ch'ín Jesús.

²⁰ Ntá ntáchro tí ch'ín ntasoá kixin:

—Kaín tíha la kjuínchexiteyáni desde tí ntasoáni. ¿A ntá nkehe tí naxa t'itjáyan? —ichro ch'án.

²¹ Ntá ntáchro ch'ín Jesús kixin:

—Tí tjinkávan antsí ntoá sìnchexiteyá la sájtia sìnchekjia kaín tí nkehe chonta la sìnchekitónhén tí sín nòa. Ntá kaín tí nkehe tjete la tsochonta nkaya nkajní. Ntá tsjixin ntá tsjihá la chréhé tí janhan —ichro ch'ín Jesús.

²² Ntá kuínhin tí ch'ín ntasoá a xikaha ntá t'ává ch'án sákjuí ch'án kixin imá itsjé nkehe chóna ch'án.

²³ Ntá ch'ín Jesús mé nixjehē ch'án tí sín k'uájiko ch'án, ntáchro ch'án kixin:

—Chaxín tjonkará kixin tí chojni chóna imá itsjé nkehe na imá xra ts'áyéhé sín tí kjuachaxin kuènte nkaya nkajní. ²⁴ Kjateē xrjanka kixin antsí xrahya chrók'uatsínka ijnko kocamello ijnko tjar'i ntachica tjexrja. A ntá antsí xra kixin tí sín chóna itsjé nkehe chrók'uáyéhé tí kjuachaxin kuènte Dios —ichro ch'ín Jesús.

²⁵ Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kichó sín kixin:

—Tí xikaha la ¿xá nkexro chrókjuacha chrókuaá? —ichro sín.

²⁶ Ntá komá ch'ín Jesús tí jehe sín la ntáchro ch'án kixin:

—Chojni chjasintajni la xitjahya xikaha sich'e. A ntá Dios mé tsjacha sich'e xikaha —ichro ch'ín Jesús.

²⁷ Ntá ntáchro ch'ín Pedro kixin:

—Ínchéni, jeheni kaín ni la kuítóheni kaín nkehe chóntani kixin tsochréheni tí jaha. A ntá ñkehe ts'áyéhéni? —ichro ch'án.

²⁸ Ntá kjuátehe ch'ín Jesús kixin:

—Chaxín ntáxrjan kixin tió itsi tí yaon tsonixin kaín nkehe la tí Xjeen Dios K'óna Chojni la mé tsjak'e tí trono tsochóna kjuachaxin jié la ntá kjaxinrá jahará chréhérá tí janhan la ts'ejorá teyó trono sìnchekitoxénrá ijíé kaín tí sín tsík'axrjenixin tí teyó xjeen ch'ín Israel. ²⁹ La ko kaín tí sín kuítóhe sín ntøe sín la ko kuítóhe sín tí kichó sín la ko kuítóhe sín it'é sín o ñné sín la ko kuítóhe sín ichjién sín la ko xjeen sín la ko nontee sín

kíxin tinkáchónki sín tí janhan, na ntá antsí má tsochónta sín la ko kjaxin tsochónta sín kjuachón jnkochrín. ³⁰ A ntá nchónhya tí sín t'etóan ijie, mé tsjixín tsochréhe sín. A ntá nchónhya tí sín t'ítuenhen ijie la tí sín a mé ts'etóan sín tí ntiha.

20

Ch'ín Jesús kjuíncheyóexin ch'án éxí tí sín ch'e xra

¹ Tí kjuachaxin kuènte Dios la éxí yóhe ijnko chojni chóntha xra nontee ch'án la ntá ijnko yaon imá nchítjen sákjuíkjejá ch'án chojni tsotjéhe ch'án to uva. ² Ntá tí k'uitja ch'án tí sín sich'ehe ch'án xra ntá ikjo ch'án sín kíxin ijnko denario tsjenkehe ch'án sín tí xra sich'e sín nontee ch'án tí yaon a. ³ Ntá chr'éxin como las nueve nchítjen ntá sákjuí ch'án ntasin la k'uikon ch'án í so sín tjejó ntasin chóntahya sín xra. ⁴ Ntá nixjehe ch'án sín ntáchro ch'án kíxin: “Kjaxinrá sáchrókjuirá chrókjuich'erá xra nonteeni la jina chrókjuénkahará”, ichro ch'án. La ntá jehe sín sákjuí sín. ⁵ A ntá tí inché nonte la sákjuí ch'án inaá chonkíxin naxa xík'itja ch'án í so sín ch'ehe ch'án xra la nta tí las tres kónjín la xíkaha naxa xík'itja ch'án í so sín inaá. ⁶ A ntá las cinco kónjín sákíki ch'án ntasin inaá la k'uitja ch'án í so chojni ntaha chóntahya sín xra la ntá kjuanchankíhi ch'án sín kíxin: “¿Nkekuènté tjejorá ntihi ch'ehyará xra kuenté yaon? —ichro ch'án.

⁷ Ntá ntáchro sín kíxin: “Kohya nkexro kjuanjon xra chrókjuich'eni”, ichro sín. Ntá ntáchro ch'án kíxin: “Kjaxinrá chrókjuirá chrókjuich'erá xra nonteeni la jina chrókjuénkahará”, ichro ch'án. ⁸ A ntá ó kóntó ntá tí inché nonte mé nixjehe ch'án tí ch'ín t'etóan sítónhen xra nontee ch'án la ntáchro ch'án kíxin: “Tiyehé kaín tí sín kjuich'e xra tjénkehé sín. Tjankíxian tjénkehé tí chojni kjuixín k'uixenhen xra la chr'éxin tjénkehé tí sín saoxín k'uixenhen xra”, ichro ch'án. ⁹ A ntá kóchjina kaín tí sín k'uixenhen xra las cinco kónjín la jnkojnko sín k'uáyéhe sín jnkojnko denario. ¹⁰ Ntá chr'éxin, tió kóchjina tí sín k'uixenhen xra nchítjen la ntá kjuenkayáxin sín kíxin antsí itsjé chichaon chrókjuacha sín, ichro sín. Kjánchó kjaxin sín k'uáyéhe sín jnkojnko denario ó. ¹¹ A ntá tí kjuachahya sín tjete ntá kjuankíxin sín kónínkakhonhen sín tí inché nonte ¹² la ntáchro sín kíxin: “Tí sín ikui kjuixín la kjuich'e sín xra jnkokoá hora la ntá kjaxin kjuénkehé sín jnkokón éxí kjuacha tí jeheni. La ntá jeheni kjuich'eni xra kjónté sóa la kuenté yaon kjuich'eni xra”, ichro sín. ¹³ A ntá kjuátehe tí inché nonte nixjehe ch'án ijnko tí jehe sín, ntáchro ch'án kíxin: “Janhan la kjuít'ayahyará ninkehó. Ó kuítóexínni kíxin ijnko denario tsjénkahará tí yaon. ¹⁴ Ntá tsákjá chíchakōan la sátjia. Janhan tjínkavan tsjénkahá tí sín k'uixenhen kjuixín éxí tí kjuénkahá jaha. ¹⁵ ¿Á chontahya janhan kjuachaxin xíkaha chrókjuénkahá sín kíxin tíha la chíchakōonna? ¿Nkekuènté tóchjinoxínhan jaha kíxin xíkaha kjuénkahá sín?” ichro ch'án. ¹⁶ Mé xíkaha iso tí sín tsjixín chréhe sín la tí sín a senóxin ntiha la ntá itsjé tí sín senó la mé tsjixín tsochréhe sín ntiha kíxin nchónhya sín k'uíyaha kjánchó tsjéhya sín k'uitja —ichro ch'ín Jesús.

Chrónka ch'ín Jesús inaá kíxin its'en ch'án (Mr. 10.32-34; Lc. 18.31-34)

¹⁷ Ntá ch'ín Jesús sákjuí ch'án ntja nó chjasin Jerusalén la ntá k'uaxrjentako ch'án tí teyó sín k'uájiko ch'án la ntáchro ch'án kíxin:

18 —Jahará ts'ikonrá ó sátsjini chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'án tí síin tí sín nchat'á t'etōan la ko tí sín maestro tí tjako ley. Ntá jehe sín ts'etōan sín kixin its'en ch'án. 19 Ntá tsjikaán sín ch'án tí síin chojni jehya judío la jehe sín mé tsjanoá sín ch'án la ko tsjate sín ch'án ntá tsjak'enkanı sín ch'án ijnko ntacruz kjánchó yaon níxin mé tsoxechón ch'án ínaá —mé xikaha chrónka ch'ín Jesús.

Tí nkehe kjuanchia tí iné ch'ín Jacobo la ko ch'ín Juan

(Mr. 10.35-45)

20 A ntá tí iné tí xjeen ch'ín Zebedeo mé kjuikao tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exin toch'in tjan nkayakon tí ch'ín Jesús la chrónóehē tjan ch'án. 21 Ntá ch'ín Jesús kjuanchankíhi ch'án tjan kixin:

—¿Nkehe tjinkávan? —ichro ch'án.

Ntá kjuátehe tjan ntáchro tjan kixin:

—Tió tsétōanxián tí kjuachaxián jié la tsjánjuan kjuachaxin kixin tí iyó xjeenni chrók'uejō sín ijnko la itjá chjina la íjnko la itjá ikjon —ichro tjan.

22 Ntá kjuátehe ch'ín Jesús, ntáchro ch'án kixin:

—Jahará la noahyará nkehe tjanchiará.

¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

Ntá kjuátehe sín, ntáchro sín kixin:

—Kja tsjachani —ichro sín.

23 Ntá ntáchro ch'ín Jesús kixin:

—Chaxín kjónté chrókjuachará chrók'uirá éxí tí nkehe itsjá its'ia la ko chrókuikiterá éxí tsikite janhan, kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná ikjon kixin janhan la tónahya tocar kixin tsjánjuan tíha. Jehó T'aná tjen nkaya nkajni mé nohe kixin nkexro tsíkjejá ch'án ts'áyéhe tíha —ichro ch'ín Jesús.

24 Ntá kuínhin tí ite sín kixin xikaha tsíkjanchia tí sín a ntá kóninkakonhen sín tí yaá a. 25 A ntá ch'ín Jesús mé k'uíyehē ch'án tí jehe sín ntá ntáchro ch'án kixin:

—Jahará ó nohará kixin tí sín t'etōan chjasintajni la imá t'etuēnhen sín kaín chojni la tí sín t'etōan imá nchehnkehe asén sín kixin ihyé sín t'etōan sín. 26 Kjánchó jahará la xikahya chrókjuich'erá. Náhí. Tí jnkojínrá tjinkáonrá chrókuétōanrá la chrókjuínkjsará tí í so sín. 27 A ntá tí jnkojínrá tjinkáonrá chrókuétōanrá mé t'ichjánxin senó chrókjuákoxinrá chrókjuich'eherá kichuárá xrā. 28 Mé xikaha tí Xjeen Dios K'óna Chojni mé kuihya kixin chojni chrókjuich'ehe xrā. Náhí. Ikui ch'án kixin sich'ehe ch'án sín xrā la ko ts'enyákonhen chojni kixin tsaáxin nchónhya sín.

Ch'ín Jesús kjuínchekitōhe jína yaá chojni t'ikonhya

(Mr. 10.46-52; Lc. 18.35-43)

29 Ntá k'uaxrjexín sín chjasin Jericó la nchónhya chojni chréhe tí ch'ín Jesús. 30 Ntá ntaha chrínta ntjá tjejótjāxin yaá sín t'ikonhya. La ntá kuínhin sín kixin k'uatsínka ch'ín Jesús la ntá kjuankixin t'íyehē sín ch'án ntáchro sín kixin:

—Inchéni, jaha tsík'axrjenixian David, tikonóehéni —ichro sín.

31 Ntá nchónhya chojni mé ntáche sín tí sín t'ikonhya kixin:

—Tánirá tí jahará —ichro sín.

Ntá tí jehe sín ǎntsí itsén k'uèya sín, ntáchro sín kíxin:

—Ìnchéni, jaha tsik'axrjeníxian David, tikonóehéni —ichro sín.

³² Ntá ch'ín Jesús kjuák'echónhen ch'án ntá k'uíyehé ch'án tí sín t'íkonhya la kjuanchankíhi ch'án sín ntáchro ch'án kíxin:

—¿Xá nkehe tí tjinkáonrá chrókjuít'ahará? —ichro ch'án.

³³ Ntá jehe sín kjuátehe sín ntáchro sín kíxin:

—Jaha Ìnchéni, tjinkaonni chrókjuínchek'ikuanni —ichro sín.

³⁴ Ntá ch'ín Jesús mé kuikonóehé ch'án tí jehe sín la kjuínchekuákóxin tja ch'án tí ikon tí sín t'íkonhya. Ntá tuénxín k'uíkon sín la chréhe sín tí ch'ín Jesús.

21

K'uixenhen ch'ín Jesús chjasin Jerusalén

(Mr. 11.1-11; Lc. 19.28-40; Jn. 12.12-19)

¹ Ntá kjuíji chjina sín chjasin Jerusalén, mé kjuíji sín tí chjasin ntsí Betfagé itjen chjinaxón tí jnǎ Olivo. Ntá ch'ín Jesús k'uetuēnhen ch'án iyó tí sín k'uájiko ch'án ² ntáchro ch'án kíxin:

—Sátjirá tí chjasin ntsí itjen tóhe ntiha. Ntiha mé ts'ítjará ijnko kolócho tjechroé va la ko ijnko kolóchóxjan. Ntá tjasintankehéra va ntá tsjúkuaná va ntihi. ³ A ntá tí jnkojín nkexro tsjanchankíhará nkekuénté tjasintankehéra va la ntá tsontáchrórá kíxin “Ìnchéni t'ichjánxinhin va la ntá tíó tsjixin ntá tuénxín tsjikaáni va”, ichrorá —ichro ch'ín Jesús.

⁴ Mé xíkaha kónhen kíxin tsoxiteyá tí nkehe chrónka ijnko ch'ín k'uéchrónka itén Dios ósé ntáchro xíkíhi:

⁵ Ntáche tí chojni chjasin Sión kíxin:

“Tsjuhéra ó kui tí ch'ín Rey kuéntará.

Ihnkehya ch'án la ijnko kolócho ó tjejen ch'án,

mé ijnko kolóchóxjan, xjeen ijnko kolócho támá nkehe.”*

Mé xíkaha ichro tí itén Dios ósé.

⁶ Ntá tí iyó sín mé sákjuí sín la kjuínchexiteyá sín tí nkehe k'uetōan ch'ín Jesús. ⁷ Ntá kjuíkǎo sín kolócho la ko xjeen va la kuakitsje sín ika titsáte sín ntá kjuínchekamá sín va ntá kjuák'ekjen ch'ín Jesús. ⁸ Ntá itsjé chojni kuakitsje sín ka titsáte sín na kjuentoá sín ka tinkák'íkjínxín sín ka tí ntja ts'atsínkaxín ch'ín Jesús. La iso sín xraá kajni la ko chaon nta yoa tsíkóchrínjin sín la tinkákjasin sín ntja a. ⁹ Ntá iso sín tsítaón ntja la ko í so sín chréhe iton ch'án mé kjuankíxin sín itsje sín kíxin:

—Tjancheheni kjuasáyé tí nkexro k'uaxrjeníxin tí rey David. Jína tí nkexro kjuixín kjuachaxiēn ihnié Ìnchéni. Tjancheheni kjuasáyé Dios —ichro sín itsje sín.

¹⁰ Ntá k'uixenhen ch'ín Jesús tí chjasin Jerusalén la ntá kaín tí sín ntiha mé kóxakonhen sín la itsjé sín kjuanchankí sín kíxin:

—¿Xá nkexro tíhi? —ichro sín.

¹¹ La ntá nchónhya sín kjuátehe sín ntáchro sín kíxin:

—Tíhi mé tí nkexro Jesús chrónka itén Dios kjuixín ch'án chjasin Nazaret estado Galilea —ichro sín.

Ch'ín Jesús kjuínchetjóá tí nínko

(Mr. 11.15-19; Lc. 19.45-48; Jn. 2.13-22)

* 21:5 Isaías 62.11; Zacarías 9.9

¹² A ntá ch'ín Jesús mé k'uixenhen ch'án tí nínko la ntá kuakitsje ch'án kaín tí sín nchekjixin nkehe ntiha la ko tí sín t'ena nkehe ntiha. La kótéka ch'án tí mesa tjinkítóxixin sín chichaon la ko tí silla tjejóksen tí sín nchekji kontóá. ¹³ La ntá ntáchro ch'án kixin:

—Tí xroon itén Dios tsíkjin sín ósé mé ntáchro kixin: “Tí ntona imé it'in nchia tsonixjanaxian sín.” A ntá jahará tí nchia i tsíkjih'énará itjuéé xíchee† —mé xíkaha ichro ch'ín Jesús.

¹⁴ Ntaha nkaxenhen nínko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitohe ch'án sín jina. ¹⁵ A ntá tí sín ncha†'á tjetoo la ko tí sín maestro tjako tí ley mé k'uikon sín kaín tí kjuaxroan kjuích'e ch'án la ko kuínhin sín kixin iso chánjan mé itsje sín nkaxenhen nínko ntáchro sín kixin: “Chjéheni kjuasáyé tí nkexro k'uaxrjenixin rey David”, ichro sín. Ntá kuínhin tí sín a xíkaha ntá kónínkaon sín ¹⁶ la nixjehe sín tí ch'ín Jesús ntáchro sín kixin:

—¿Á kuínhín tí nkehe itsje tí chánjan? —kjuanchankí sín.

Ntá ntáchro ch'ín Jesús kixin:

—Ó kuínhan. Kjánchó, ¿á nunca kjuínchekuáxinhyará tí xroon itén Dios? La xíkíhi chro:

Jaha kjuánjuan kjuachaxin kixin tí sín chánjan hyé la ko chánjan naxa tjejótakí

mé tsotsje sín‡

—mé xíkaha ichro ch'ín Jesús.

¹⁷ Ntá jehe ch'án mé kuítóhe ch'án sín la k'uaxrjexín ch'án chjasin Jerusalén la sákjuí ch'án chjasin Betania la ntiha k'ok'éhe ch'án tí tie a.

Ch'ín Jesús kónínkakonhen ch'án ijnko nta t'óna to higo

(Mr. 11.12-14, 20-26)

¹⁸ A ntá tí kóyaon nchítjen ntá kjan sín chjasin Jerusalén inaá la ikui sín ntia ntá ch'ín Jesús mé ik'uén ch'án kjinta. ¹⁹ Ntá k'uikon ch'án itjen ijnko nta t'óna to higo chjino ntia. La ntá sákjuítsjehe ch'án tí nta, ntá k'uikon ch'án kixin jehó ka itsa tí nta, naxa k'ónahya to. A ntá jehe ch'án mé nixjehe ch'án tí nta, ntáchro ch'án kixin:

—Í nunca ts'ónahya to inaá —ichro ch'án.

Ntá tí nta t'óna to higo mé tuénxín xamá. ²⁰ Ntá tí sín k'uájiko ch'ín Jesús mé k'uikon sín kixin xíkaha kónhen tí nta, ntá chrakon sín la kjuanchankíhi sín tí ch'ín Jesús kixin:

—¿Nkekuènté kixin tí nta t'óna to higo tuénxín xamá? —ichro sín.

²¹ Ntá kjuátehe ch'ín Jesús, ntáchro ch'án kixin:

—Ntá chaxín ntáxrjan kixin tí tinkachónkirá Dios chaxín la ntá jehya jehó tí nta xíkaha kónhen, la kjaxin chrónixjeherá tí jna i kixin: “Sátjixian ntihi sátjíkjanikiá ntayaon”, la mé xíkaha tsonhen. ²² Tí tinkachónkirá Dios kaín nkehe tsjancheherá ch'án la ts'ayéhé —ichro ch'ín Jesús.

Tí kjuachaxin chóna ch'ín Jesús

(Mr. 11.27-33; Lc. 20.1-8)

²³ Ntá kjuixin ntá ch'ín Jesús mé k'uixenhen ch'án tí nínko ntiha. Ntá tió tjetjako ch'án ntá kóchjina iso tí sín ncha†'a t'etoo la ko tí sín táda judío t'etoo la kjuanchankíhi sín ch'án ntáchro sín kixin:

† 21:13 Isaías 56.7; Jeremías 7.11 ‡ 21:16 Salmo 8.2

—¿Nkehe tí kjuachaxin chonta kixin xikaha ch'e la ko nkexro tí kjuanjon kjuachaxin? —mé xikaha kjuanchankí sín.

²⁴ Ntá kjuátehe ch'ín Jesús ntáchro ch'án kixin:

—Ntá kjaxian janhan tsjánhankíhará ijnko nkehe siná tsjateherá ntá janhan tsotjonkará nkehe tí kjuachaxin chonta tjet'a tí xra i. ²⁵ ¿A ntá nkexro k'uetuēnhen ch'ín Juan kixin tsikite ch'án chojni? ¿Á Dios ní o á chojni ó? —mé kjuanchankí ch'ín Jesús.

Ntá jehe sín itjo sín kichó sín kixin:

—A ntá tí tsontáchroni kixin Dios tsík'etuēnhen tí ch'ín Juan ntá tsjanhankí tí ch'ín a kixin nkekuēnté kuítekakuenhyani ch'án. ²⁶ A ntá tí tsontáchroni kixin chojni ó tsík'etuēnhen ch'án la ntá chrakonhenni tí chojni kixin kaín sín kuítekaon sín kixin ch'ín Juan la nixja ch'án itén Dios —ichro sín.

²⁷ A ntá kjuátehe sín ntáche sín tí ch'ín Jesús kixin:

—Náhi, noehyani —ichro sín.

Ntá ntáchro ch'án kixin:

—La ko kjaxin janhan tsoxrjankahya nkexro kjuanjon kjuachaxin kixin tjet'a tí xra —ichro ch'án.

Ch'ín Jesús mé kjuíncheyóexin ch'án kixin éxi yaá xjan

²⁸ Ntá ntáchro ch'ín Jesús kixin:

—¿Nkehe tsixrorá? Itjen ijnko chojni chóna yaá xjeen ch'án la ijnko yaon nixjehe ch'án ijnko xjan ntáchro ch'án kixin: “Xjeenni ijie la sátsjia t'akjínjián to uva nonteeni”, ichro ch'án. ²⁹ Ntá kjuátehe tí xjan kixin: “Náhi tjinkakonhyani”, ichro ch'án. A ntá chr'éxin ntá k'uixitoxin tí kjuenkayáxin ch'án la sákjuikjich'e ch'án tí xra a. ³⁰ A ntá tí it'é xjan a mé kjuínixjehe ch'án tí ijnko xjan la jnkokón k'uetuēnhen ch'án la kjuátehe tí xjan kixin: “Jeén, ó sátsjini”, ichro ch'án. La ntá chaxínhya sátsíkji ch'án —ichro ch'ín Jesús.

³¹ Ntá kjuanchankí ch'ín Jesús kixin:

—¿Nkexéhe tí yaá chánjan kjuínchexiteyá tí nkehe k'uetuēnhen it'é? —ichro ch'án.

Ntá kjuátehe sín kixin:

—Tí xjan saó —ichro sín.

Ntá ntáchro ch'ín Jesús kixin:

—Méxra chaxín tjonkará kixin tí sín nchekjènkj la ko tí chojni chjin ch'iyehē nchónhya chojni ntoa la saoxín ts'ixenhen sín tí kjuachaxin t'etqan Dios la ntá jahará la náhi. ³² Kixin ch'ín Juan Bautista mé ikui ch'án kjuakohará ch'án nkexrí chrók'uejorá la ntá jahará kuítekákuenhyará tí chrónka ch'án. A ntá tí sín nchekjènkj la ko tí chojni chjin ch'iyehē nchónhya chojni ntoa mé kuítekaon sín. A ntá jahará kjónté xikaha k'uíkonrá la kjuítoxiénhyará tí tjenkayáxinrá la ko kuítekákonyará —ichro ch'ín Jesús.

Ch'ín Jesús kjuíncheyóexin ch'án kixin éxi chojni ch'e xra la jínahya asén sín (Mr. 12.1-12; Lc. 20.9-19)

³³ Ntá ch'ín Jesús ntáchro ch'án kixin:

—Tsinhínrá ijnko nkehe sintayóaxian. Éxi ijnko ch'ín k'uenkaxin ch'án itsjé ntanoa t'óna to uva nontee ch'án. Ntá kjuích'éna ch'án ijnko corral. La ko ijnko tjo kjuích'éna ch'án tòye kixin ts'énya sín ìnté to uva. La

ko kjuích'éna ch'án ijnko tʃat'o noi kixin ts'it'ótjen ch'án tsotsjehe ch'án nkuíxín. §

³⁴ A nta kjuínčekjen ch'án tí nontee ch'án iso tí sín ch'e xra nta kjuixin nta sákjuí ch'án imá ikjín. ³⁴ A nta tí kjuixraká tí yaon k'óna nkehe nta jehe ch'án mé ichr'án ch'án iso tí chojni ch'ehe ch'án xra kixin tsjikjanchehe sín tí sín ch'e xra nontee ch'án kixin tsjanjon sín tí nkehe tsakja ch'án. ³⁵ A nta tí sín t'ayakonhen tí nonte mé itsé sín tí sín kjuíkjanchia tí nkehe la kjuate sín iso la ko í so la k'óyán sín la í so la ixro k'uíchexín sín. ³⁶ A nta tí inché nonte a xíchr'án ch'án iso chojni ch'ehe ch'án xra inaá, a nta tí sín ch'e xra la kjaxin xikahó kjuích'ehe sín tí sín kjuíji.

³⁷ A nta xikaha tsíkónhen nta kjuenkayáxin ch'án ichr'án ch'án tí xjeen ch'án, la kja chróchóntehe sín kjuasáyé tí xjeen ch'án, ichro ch'án. ³⁸ A nta tí k'uíkon tí sín ch'e xra tí xjeen ch'án la nta jehó sín kjuenkayáxin sín kixin: “Tí ch'ín i mé ts'áyéhe ch'án kaín nkehe. Ts'óyáni ch'án kixin nta tsitgekoni kaín tí nkehe kuente ch'án”, ichro sín. ³⁹ Nta itsé sín tí xjeen ch'án nta kuakitsjexín sín ch'án tí nonte ntaha nta k'óyán sín ch'án —mé xikaha kjuako ch'ín Jesús.

⁴⁰ Nta kjuanchankíhi ch'ín Jesús tí sín kóchjina, ntáchro ch'án kixin:

—Tió itsi tí inché tí nonte a la, ¿nkehe sich'ehe ch'án tí sín ch'e xra? —ichro ch'ín Jesús.

⁴¹ Nta kjuátehe sín kixin:

—Mé tsjiji ch'án la tsikonóehya ch'án tí sín jínahya la ts'óyán ch'án sín la tsjeyá ch'án ókjé chojni sinčekjen ch'án tí nonte a. Tsjeyá ch'án chojni jina tsjanjon tí to tsjixraká tí yaon ts'ínjin sín to —ichro sín.

⁴² Nta ntáchro ch'ín Jesús kixin:

—¿Á nunca kjuínčekuáxinhyará tí xroon itén Dios tsíkjin sín ósé? Mé ntáchro xikíhi:

Tí xro náxrjónhya kuitóenta tí sín ch'éna tʃat'o,
a nta mé jie k'óna tí xro tjeotan.

Mé xikaha kjuích'e Inchéni Dios,

na nta tíha mé ijnko nkehe kjuachrakon k'uíkonni.*

Mé xikaha ichro itén Dios.

⁴³ Nta ntáchro ch'ín Jesús kixin:

—Tjonkará kixin Dios tsakitsjahará tí kjuachaxin kuente ch'án la nta sinček'áyéhe ch'án tí sín ch'e xra jina. ⁴⁴ A nta jnkojin nkexor tsjitsínka chrítaón tí xro i mé tsókuen ch'án la tí ts'ánótjen tí xro tsoxratja ijnko chojni la jehe sín ts'óna inche —mé xikaha ichro ch'ín Jesús.

⁴⁵ Nta tí sín nch'at'a tjeotan la ko tí sín fariseo mé kuínhin xikaha kjuíncheyóexin ch'ín Jesús nta kienxín sín kixin kaín tí ntáchro ch'án kjuíncheyóexin ch'án kixin tí jehe sín xikaha tsonhen sín. ⁴⁶ La nta tjinkaon sín chrókjuínčekjasóte sín ch'án kjánchó chrakonhen sín tí chojni kixin kaín sín ntáchro sín kixin chaxín tí nkehe nixja ch'ín Jesús la kuente Dios.

22

Ch'ín Jesús kjuíncheyóexin éxi ijnko kia kótehe sín

¹ Nta ch'ín Jesús mé kjuankíxin nixja ch'án inaá la kjuíncheyóexin ch'án ntáchro ch'án kixin:

² —Tí kjuachaxin kuènte Dios mé éxí yóhē ijnko ch'ín rey kjuasin ch'án ijnko kia kixin tsotehe xjeen ch'án. ³ K'uetuēnhen ch'án tí sín ch'ehe ch'án xṛa kixin tsjik'íyehē sín tí sín kjueyá ch'án, kjánchó jehe sín mé tjinakonhya sín tsochjina sín. ⁴ A ntá k'uetuēnhen ch'án inaá í so tí sín ch'ehe ch'án xṛa ntáchro ch'án kixin: “Chenka tí sín ó k'uíyahā kixin kaín tí nkehe sineni la ó tjechónhen. Ó kuétoan its'en tí koxinta la ko í so ko tsanka la kaín nkehe la ó síchónhen. A ntá chróxrakoa sín tí síin kia”, mé xikaha k'uetōan ch'án. ⁵ A ntá tí sín tsík'íyehē ch'án mé ántosén sín. Ijnko sín la sákjuí nontee la í jnko la sákjuí ch'án í jnko xṛa chóna ch'án. ⁶ La í so tí sín a mé tsísé sín tí sín tsík'etueñhen tí ch'ín rey la k'óka tí sín a hasta ik'uén tí jehe sín. ⁷ Ntá tí ch'ín rey mé kónínkaon ch'án ntá k'uetuēnhen ch'án tí sín soldado kixin its'en tí sín kjuaya la ko tsoche tí chjasén sín. ⁸ Ntá nixjehē ch'án tí sín ch'ehe ch'án xṛa inaá ntáchro ch'án kixin: “Kaín nkehe la ó síchónhen kixin tí nkexro tsotehe la ntá tí sín k'uíyahā kuitekakonhya sín la kjuihya sín. ⁹ Méxṛa sátsjirá tí esquina tí ntia jié la t'iyehérá kaín tí sín tsoxetará kixin itsji sin ti kia”, ichro ch'án. ¹⁰ Ntá tí sín ch'e xṛa mé sákjuí sín la k'uíyehē sín kaín tí sín t'átsínka tí ntia ntiha, mé chojni jina la ko chojni jinahya hasta k'uíxikaón chojni tí nchia ntiha.

¹¹ Ntá tí ch'ín rey mé kuitsjehe kaín tí sín tsík'íyehē ch'án la ntá k'uikon ch'án ijnko ch'ín ntiha chónahya ka jina kuènte tí kia a. ¹² La ntá nixjehē ch'án, ntáchro ch'án kixin: “Amigo, ¿nkexrí k'uíxenhén kixin tsík'ítsahya kuènte kié chojni tsotehe?” ichro ch'án. Ntá tí ch'ín a kjuáteehya ch'án ninkehó. ¹³ A ntá tí ch'ín rey mé k'uíyehē ch'án tí sín ch'ehe ch'án xṛa la ntáchro ch'án kixin: “Sinchenteto toté la ko itja tí ch'ín a la ité ntója sítie la nta ntiha a mé tsotsjánka ch'án la sinetaón ch'án neno ch'án.”

¹⁴ Ntá ntáchro ch'ín Jesús kixin:

—Nchónhya sín k'uíyahā la séhya sín k'uitja —mé xikaha kjuako ch'án Jesús.

*Ch'ín Jesús ntáchro ch'án kixin ó nchōxon tsjenkehe sín gobierno
(Mr. 12.13-17; Lc. 20.20-26)*

¹⁵ Ntá tí sín fariseo mé sákjuí sín ókjé la jnkokoá kjuenkayáxin sín kixin tsjachaxin sín tí ch'ín Jesús kixin ách'e ichrén jje tsjasin ch'án la ntá tsjanchia sín jie. ¹⁶ Ntá ichr'án sín iso tí sín ch'ehe sín xṛa la iso tí sín ch'ehe tí ch'ín Herodes xṛa kixin tsjachaxin sín tí ch'ín Jesús. Ntá tí sín a nixjehē sín ch'án ntáchro sín kixin:

—Maestro, ó noheni kixin tí nkehe ntáchrua jaha la chaxín, la ko ntoá tjákua ntje Dios, la ko jehya nkexrí tsjehe chojni tjenkayáxixián kixin á jina sín. ¹⁷ A ntá jaha chronka nkehe tjenkayáxian. ¿Á jina chrókjuenkehēni tí gobierno romano o náhi? —ichro sín kjuanchankí sín.

¹⁸ Ntá ch'ín Jesús kónohe ch'án kixin ntoáhya tjenkayáxin sín ntá ntáchro ch'án kixin:

—Jahará ntoáhya tjenkayáxinrá. ¿Nkekuènte chrókjuáchaxinráni? ¹⁹ Tjákonará tí chichaon tjenkehérá sín méhe —mé xikaha k'uetōan ch'ín Jesús.

Ntá kjuikohe sín ch'án tí chichaon a. ²⁰ Ntá k'uikon ch'ín Jesús ntá kjuanchankí ch'án kixin:

—¿Nkexro tí tsík'axrxén tjenkáni tí chichaon méhe la ko nkexro ihnié chóna? —ichro ch'án.

²¹ Ntá kjuáteehe sín kixin:

—Tí ch'ín t'etōan mé tjenkáni ch'án —ichro sín.

Ntá ntáchro ch'ín Jesús kixin:

—Chróchjehérá tí ch'ín gobierno t'etōan tí nkehe kuènte ch'án la kjaxin tí nkehe kuènte Dios la chróchjehérá Dios —mé xikaha chro ch'ín Jesús.

²² Ntá tí kuínhin sín xikaha la chrakon sín la komá sín ch'án ntá sákjuí sín.

Kjuanchankí sín kixin á tsoxechón chojni

(Mr. 12.18-27; Lc. 20.27-40)

²³ Ntá tí yaon a la iso sín saduceo sákjuítsjehe sín tí ch'ín Jesús. A ntá tí sín saduceo mé titekakonhya sín kixin tsoxechón chojni tsík'en la mé xikaha chrókjuachaxin sín ch'ín Jesús. Ntáchro sín kixin:

²⁴ —Maestro, tsintáchro ch'ín Moisés kixin tí its'en ijnko chojni la naxa itjen tí ichjién ch'án la tsík'ikonhya sín xjeen sín, ntá tí kichó tí nkexro tsík'en chrókuakja ch'án tí tjan k'án, a ntá tí xjeen sín mé ts'óna éxi xjeen tí ch'ín sao tsík'en. ²⁵ Ntá ntihi k'uejó yato sín jnkokoá kichó sín. Ntá tí ch'ín sao kótehe ch'án. La ntá ik'uén ch'án. A ntá k'uéchóntahya sín xjeen sín la ntá tí ichjién ch'án kótehe tjan tí ch'ín tsoyo. ²⁶ A ntá tí ch'ín yóxin ik'uén kjaxin la tí ch'ín níxin kuákja ch'án tjan la ntá xikaha kónhen inaá. La kayatoé tí sín k'uéchónta sín tjan xikaha kónhen sín kaín sín ik'uén sín. ²⁷ A ntá kjuixixín ntá kjaxin tjan ik'uén tjan. ²⁸ Ntá tió tsoxechón kaín xín chojni tsík'en, ¿ntá nkexro ts'óna xii tí jehe tjan kixin kayatoé sín kótehe tjan? —mé xikaha kjuanchankíhi sín tí ch'ín Jesús.

²⁹ Ntá ch'ín Jesús kjuátēhe ch'án ntáchro ch'án kixin:

—Jahará la ntoáhya tjenkayáxinrá kixin noahyará nkehe chro xroon itén Dios la ko chonhyará tí kjuachaxin kuènte Dios. ³⁰ A ntá tí chojni tsík'en tió tsoxechón la tsotēehya sín la ko tsotēehya tí xjeen sín kixin tí sín tsík'en la éxi tí sín ángel kuènte Dios ts'ejó sín nkaya nkajní. ³¹ A ntá tí kaín tí sín tsík'en tsoxechón, ¿á kjuinchekuáxinhyará nkehe ntáchro Dios? Jehe ch'án xikihi chro ch'án: ³² “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob.”* Méxra tí Dios i la jehya tinkáchónki tí sín tsík'en. Náhi. Tí Dios i la tinkáchónki tí sín tjejóchón —mé xikaha ichro ch'ín Jesús.

³³ Ntá kuínhin sín nkexrí kjuako ch'án ntá chrakon sín.

Ch'ín Jesús chrónka tí nkehe imá tjetoan

(Mr. 12.28-34)

³⁴ Ntá tí sín fariseo mé tsíkójnkotsé sín tió kónohe sín kixin nkehe chro ch'ín Jesús la ninkehó kjuátēehya tí sín saduceo. ³⁵ La ijnko tí sín maestro tjako tí ley mé tjinkaon ch'án chrókjuachaxin ch'án tí ch'ín Jesús. Ntá kjuanchankí ch'án kixin:

³⁶ —Maestro, ¿nkexéhe tí nkehe imá tjetoan kuènte tí ley? —ichro ch'án.

³⁷ Ntá ntáchro ch'ín Jesús kixin:

—“Chrótjuèhérá Inchéni Dios kaín asánrá la ko kaín kjuaxrexinkaon kuèntará.”† ³⁸ Mé tíha mé tí ley imá tjetoan la ko saoxín k'ueṭōan Dios tíha. ³⁹ A ntá tí nkehe yóxin la tóyóhe la mé ntáchro xikihi: “Chrótjuèhérá kichuárá éxi tjuéxinrá asánrá.”‡ ⁴⁰ Tí iyó nkehe i la mé antsí tjetoan kuènte tí ley tsík'etōan Moisés la ko tí nkehe kjuako tí sín k'uéchrónka itén Dios.

¿Xá nkexro it'é tí Cristo?

(Mr. 12.35-37; Lc. 20.41-44)

* 22:32 Éxodo 3.6 † 22:37 Deuteronomio 6.5 ‡ 22:39 Levítico 19.18

⁴¹ A ntá tí sín fariseo la naxa jnkokoá tjejó sín ⁴² la ntá ch'ín Jesús mé kjuanchankí ch'án ntáchro ch'án kixin:

—¿Nkehe tjenkayáxinrá jahará? ¿Nkexro tí Cristo la nkexro tí tsík'axrjeníxin ch'án? —kjuanchankí ch'án.

Ntá ntáchro sín kixin:

—Tí Cristo mé tsík'axrjeníxin ch'án ch'ín David —ichro sín.

⁴³ Ntá ntáchro ch'ín Jesús kixin:

—¿Ntá nkexrí kixin Nchakuen Dios chénkaxín ch'ín David kixin David chróntáchro ch'án kixin Ìnché ch'án tí Cristo? Ntáchro ch'ín David xíkíhi:

⁴⁴ Ìnchéni Dios ntáche tí Ìnchéni kixin:

“Tjak'e tjaná chjina ntiho tsétoan,

tsjixinjian kaín xín tí sín nínkakonhan la tsjachahya sín ts'etóan sín kixin jahvá mé tsétoan.”[§]

Mé xíkaha chro itén Dios. ⁴⁵ A ntá ¿xá nkexrí kixin Cristo chrók'óna xjeen David a ntá jehe ch'ín David kuikítexín ch'án Ìnché ch'án tí Cristo? —ichro ch'ín Jesús.

⁴⁶ A ntá ninkexró xitjahya kjuátehe sín ninkehó la desde tí yaon a chrakon sín la í nínkehó kjuanchankíehya sín ch'án.

23

Ch'ín Jesús tjanchia jie tí sín fariseo la ko tí sín maestro tjako tí ley

(Mr. 12.38-40; Lc. 11.37-54; 20.45-47)

¹ Ntá kjuixin tíha ntá ch'ín Jesús mé nixjehe ch'án tí chojni la ko tí sín k'uájiko ch'án, ntáchro ch'án kixin:

² —Tí maestro tjako tí ley la ko tí sín fariseo mé chóna sín kjuachaxin tsochrónkaxín sín tí ley kjuako ch'ín Moisés. ³ Méxra chrókjuin chexiteyéherá kaín tí nkehe t'etóan sín la ko chrókjuich'erá kaín nkehe ntáchro sín kjánchó chrókuankíehyará tí jehe sín kixin jehe sín la ijnko nkehe ntáchro sín la ókjé nkehe ch'e sín. ⁴ T'etuenhen sín chojni tsamá ijnko nkehe imá ye, mé ijnko nkehe chrókjuachahya chrókuamá chojni. A ntá jehe sín na nijnko dedo tja sín chrókjuinkítsa sín tí nkehe imá ye yamá chojni. ⁵ Ich'e sín kaín xín nkehe kixin tsotsjehe chojni. Tóxrjínhín sín tsjak'enkání totjen sín la ko itja sín ijnko xroon kjinjin iton ts'ínixín itén Dios la tjinkaon sín iké sín síxinkání nkehe tjákini. ⁶ Tjinkaon sín tsochóna sín silla jína ts'ejókjen sín sine sín tió sátsji sín tí síin kia la ko xritjeyá sín tí silla antsí náxrjón chrók'uejóya sín nkaxenhen njnko. ⁷ La ko tjinkaon sín kixin chojni chrókjuikosáyehe sín tsoxeta sín tí ntja la ko tjinkaon sín kixin tsontáchro chojni kixin maestro tí jehe sín.

⁸ A ntá jahará la titoéhyará kixin tsontáchro sín kixin maestro tí jahará kixin jehe sín la ko jahará la ó jnkokónrá, la jahará chontará jnkokoá Maestro la mé Cristo tíha. ⁹ La ntá chróntáchrohýará kixin ninkexró mé it'ará ntihi chjasintajni kixin jahará la chontará jnkokoá It'ará mé itjen nkaya nkajni. ¹⁰ La ko jehe sín chróntáchrohýa sín kixin jefe tí jahará kixin jehó Cristo mé jefe. ¹¹ Tí nkexro antsí tsjinkítsa iso chojni la jehe ch'án mé antsí t'etóan ch'án. ¹² Kixin tí nkexro ntáchro kixin imá ijié la mé imá tsontsi. A ntá tí nkexro nchehnkehya la antsí tsojié.

¹³ Nòará tí jahará maestro tjakorá tí ley la ko tí jahará chojni fariseo. Jahará la jnkójínxónhýa tjenkayáxinrá. Jahará la t'ikjéherá tí puerta ts'ixenxín chojni tí kjuachaxin kuente Dios kixin titoéhyará ts'ixenhen

ókjé chojni. A ntá ni jahará la xitjahya t'ixenhyará la ko tjánjonhyará kjuachaxin ts'ixenhen tí sín tjinkaon chrók'uixenhen.

¹⁴ 'Nòará tí jahará maestro tjàkorá tí ley la ko chojni fariseo. Jnkojínxónhya tjenkayáxinrá. Jahará takitsjeherá ntøe tí chojni tsikók'án la ntá isé nixjehérá Dios kixin ch'iyexínrá chojni kixin jína tí jahará. A ntá xikaha kjuich'erá jahará la antsí tsjasótiará.

¹⁵ 'Nòará tí jahará maestro tjàkorá tí ley la ko chojni fariseo. Jahará la jnkojínxónhya tjenkayáxinrá. Jahará sáttjirá nonte la chrítaon ntayaon kixin tsjákohérá ijnko chojni tsinkáchónki xikaha tí tinkachónkirá la ntá tió kjuachará kjuachroerá sín la ntá jehe sín antsí má tsjasótexín sín tí xrohi la kánhyó jahará.

¹⁶ 'Nòará tí jahará kixin tétøanrá kjánchó ntakótánrá. Ntáchrórá kixin tí jnkojín chojni tsontáchro kixin sinchexiteyá sín nkehe la t'ákjenxin sín tí nínko la ntá t'ichjánxinhya sinchexiteyá sín. A ntá tí tsontáchro sín kixin sinchexiteyá sín nkehe la t'ákjenxin sín tí chica oro siín nkaxenhen nínko la ntá t'ichjánxin sinchexiteyá sín. ¹⁷ Imá lontjirá la ko ntakótánrá. ¿Á imá tjetøan tí chica oro o á imá tjetøan tí nínko kixin tí nínko mé kótjuáxin tí chica oro? ¹⁸ Kjaxin ntáchrórá kixin: "Tí jnkojín chojni tsontáchro sín kixin sinchexiteyá sín nkehe la t'ákjenxin sín tí altar la ntá t'ichjánxinhya sinchexiteyá sín. A ntá tí tsontáchro sín kixin sinchexiteyá sín nkehe la t'ákjenxin sín tí nkehe tjokehe sín Dios chrítaon tí altar la ntá t'ichjánxin sinchexiteyá sín tí nkehe tsíntáchro sín." ¹⁹ Imá lontjirá la ko ntakótánrá. ¿Á imá tjetøan tí nkehe tsochjehérá Dios o á imá tjetøan tí altar kixin tí altar mé tótjuáxin tí nkehe tsjánjonrá? ²⁰ Kixin tí nkexro tsontáchro kixin sinchexiteyá nkehe la t'ákjenxin ch'án tí altar la jehya t'ákjenxin ch'án tí altar ó. Náhí. Kjaxin t'ákjenxin ch'án kaín tí nkehe siín chrítaon ntiha. ²¹ A ntá tí nkexro tsontáchro kixin sinchexiteyá ch'án nkehe la t'ákjenxin tí nínko la jehya t'ákjenxin ch'án nínko ó. Náhí. Kjaxin t'ákjenxin ch'án tí Dios itjen ntiha. ²² A ntá tí nkexro t'ákjenxin nkaya nkajní la ntá kjaxin t'ákjenxin sín tí trono kuènte Dios la ko tí nkexro tjet'etøan ntiha.

²³ 'Nòará jahará maestro tjàkorá ley la ko jahará chojni fariseo. Jahará jnkojínxónhya tjenkayáxinrá. Jahará la chjehérá Dios ijnko ite parte kaín tí kaxroan tsjiko tí nkehe ineni, mé tí menta la ko anís la ko comino. Kjánchó tahyará kuentá tí nkehe imá tjetøan kuènte tí ley. Mé ntóá chrókuenkayáxinrá la ko chrókuikonóehérá kichuára la ko chrókuinkachónkirá Dios. Tíhi la antsí tjetøan chrókuinchesiteyará la kjaxin chrókuítóehyará chrokuich'erá tí í so nkehe. ²⁴ Jahará la tétøanrá kjánchó ntakótánrá. Jahará la nchek'ankihirá kjónté ijnko kochjisen intsí chóna tí nkehe its'irá, a ntá ijnko kocamello kjónté ijié va la t'ínkará.

²⁵ 'Nòará tí jahará maestro tjàkorá ley la ko jahará fariseorá. Jahará la jnkojínxónhya tjenkayáxinrá. Jahará la imá nchetjóará chrítaon tí vaso la ko tí plato, a ntá tí nkaxenhen tsíkaón kjuachee la ko jahórá tjínkáonrá chróchontará itsjé nkehe. ²⁶ Jahará chojni fariseorá imá ntakótán jahará. Saoxín chrókuinchesiteyará tí nkehe nkaxenhen tí vaso la ko tí plato la ntá ó chrókótjóá tí chrítaon kjaxin.

²⁷ 'Nòará jahará maestro tjàkorá tí ley la ko chojni fariseorá. Jnkojínxónhya tjenkayáxinrá. Jahará la éxi yóhe ijnko tøyé tsíxravá chojni, imá náxrjón tsjehe ntója, a ntá nkaxenhen mé tsíkaón huésoé chojni tsík'en la ko kaín nkehe tjuáhya. ²⁸ Mé xikaha tí jahará la tsjehe éxi chojni jína xikaha, a ntá jnkojínxónhya tjenkayáxinrá la ko jínahyará.

²⁹ 'Nòará tí jahará maestro tjàkorá ley la ko chojni fariseorá. Jahará la jnkójnxónhya tjenkayáxinrá. Jahará la kjuích'énará tjàt'ò náxrjón chrítaón tí tòye tsixravá tí sín k'uékjako itén Dios ósé la ko nchek'ítsará tjàt'ò chrítaón tòye kuènte tí sín jína asén. ³⁰ La ntá ntáchrórá kíxin tí chrók'uejorá tí k'uéjó tí sín tsík'axrjeníxinrá la ntá chrókjuínkítsahyará chrók'uén tí sín kjuako itén Dios. ³¹ Méxra xíkaha jahorá ntáchrórá kíxin chaxín tsík'axrjeníxinrá tí sín k'óyán tí sín k'uékjako itén Dios. ³² Méxra ijie la tjinkáonrá tsjixinhanrá tí xra kjuích'e tí sín tsík'axrjeníxinrá.

³³ 'Jahará la tsík'axrjeníxinrá konche. ¿Ntá nkexrí chrókuaará kíxin itsi tí tsjasótiará? ³⁴ Méxra janhan mé tsétuānhan chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrá sín ts'ejoyánirá sín ntacruz la í so sín la tsjatexínrá sín nkaxenhen nínko la ko tsochonkíhirá sín chjasin la chjasin. ³⁵ Méxra jahará la yamará tí jie kíxin tí sín jína k'uitjixin ijnié senó. Méxra tsamará tí jie kíxin ik'uén ch'ín Abel, tí nkexro jína, la ko kaín tí í so sín hasta ik'uén ch'ín Zacarías, xjeen Berequías, tí nkexro k'oyánxinrá chjino tí altar. ³⁶ Chaxín tjonkará kíxin kaín tí jie a mé yamá tí chojni síin ijie.

Tsjánka ch'ín Jesús

(Lc. 13.34-35)

³⁷ Ntá ntáchró ch'ín Jesús kíxin:

—Jerusalén, Jerusalén, jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuínkítsará. Nchónhya veces tjínkavan chrókójnkotsérá la chrók'uáyakonhánrá éxi ijnko cochiká mé t'ayakonhen xjeen va chrínki kanēnee va mé xíkaha tjínkavan chrók'uáyakonhánrá tí jahará. Kjánchó jahará la tjinkákonhyará xíkaha. ³⁸ Ntá jie la Dios la tsítóhe tí jahará. ³⁹ Ntáxrjan kíxin í ts'ikonhyará tí janhan inaá tsjixrakájia tí yaon tsontáchrórá kíxin: “Imá jína tí nkexro kujixin kjuachaxiēn ihnié Ìnchéni” —mé xíkaha ichro ch'ín Jesús.

24

Chrónka ch'ín Jesús kíxin ts'itjáyan tí nínko

(Mr. 13.1-2; Lc. 21.5-6)

¹ Ntá ch'ín Jesús k'uaxrjexín ch'án tí nínko la ntá ó sáchrókjuí ch'án la ntá tí sín k'uájiko ch'án mé kóchjina sín kíxin tsochónhen ch'án kíxin kjaxin ch'án chrótsjehe ch'án kíxin náxrjón tsík'óna tí nínko a. ² A ntá ch'ín Jesús mé kjuátehe ch'án kíxin:

—Jahará ¿á tjejotsjehérá kaín tíha? Chaxín tjonkará kíxin tsjixraká tí yaon ts'oya kuenté nínko. Nijnko xro ts'ejókjehya kichó kíxin kaín tíha la tsóxika —ichro ch'án.

Tí nkehe tsōnhen tió tsjixixín

(Mr. 13.3-23; Lc. 21.7-24; 17.22-24)

³ Ntá sákjuí sín chrítaón tí jna Olivo la ch'ín Jesús kjuák'etjaxin ch'án la ntá tí sín k'uájiko ch'án mé kjuanchankíhi sín ch'án kíxin:

—Tjinkaonni tsochronka nkesá tsōnhen tíha. ¿Nkexrí tsoñoexínni tíó ts'inka tí jaha la ko nkexrí tsoñoexínni tí itsi tí tsjixixín chjasintajni? —ichro sín.

⁴ Kjuátehe ch'ín Jesús kíxin:

—Tóxakonhanrá títóéhyará kíxin ninkexró chrókjuít'áyahará. ⁵ Nchónhya chojni itsi sich'iyaxín nina tsontáchró kíxin: “Janhan mé tí Cristo” tsixro

sín, la sich'iyehé sín nchónhya chojni. ⁶ A ntá tió tsinhínra tsontáχρο chojni kixin ó siín kjuanínkaon la ko ts'ixin kjuachrakon kixin tsjanjonko kichó sín la kjónté xikaha tsonhen la chrakonhyará. Ó jehí tsonhen tíha tí naxa ts'itjáyannya chjasintajni. ⁷ Ijnko nación tsjanjonko í jnko nación la tsjanjonxin sín tí xra ts'etóan sín. La ko itsjé chjasin na tsokjinta la ko tsoníhi chojni la ko ntihi la ntaha sinki nonte. ⁸ Kaín tíha la ntá tsoxránkixión tí kjuatjoté tsonhen chojni.

⁹ A ntá tsotserá chojni la tsjikaánra sín tí tjejó tí síxreé kixin sinchekjasótiará sín la ntá ts'oyánra sín. La ko kaín xín chojni siín chjasintajni tsonínkakonhanra sín kixin tinkachónkirá tí janhan. ¹⁰ Ntá tí yaon a la itsjé sín la tsítóhe sín tsinkáchónkihya sín tí janhan la ko tsonínkakonhen sín kichó sín la ko sinchekji kichó sín. ¹¹ Ntá itsi nchónhya chojni ntoáhya tsjako la ntá sich'iyehé sín nchónhya chojni. ¹² La ts'ixin nchónhya jie jínahya la ntá ts'ixin itsjé chojni tsojtjuèhya sín kichó sín. ¹³ A ntá tí nkexro naxa tjejóntinkáchónki tí janhan hasta tí tsjixixín la mé tsaá. ¹⁴ La ko tí itán jína chrónka nkexrí tjen tí kjuachaxin kuènte Dios la t'ichjánxin tsinhin sín kuenté chjasintajni, la tió tsjixin tsinhin sín kuenté chjasintajni la ntá ó ts'itjáyannya chjasintajni.

¹⁵ 'Ch'ín Daniel k'uéchrónka itén Dios mé tsíkjin ch'án kixin tsjixraká ijnko yaon tsjak'e ijnko nkehe jínahya nkaxenhen njnko tjóá.* Ntá jahará ts'ikonrá tíha. A ntá tí nkexro nchekuáxin mé tsienxín nkehe tíha. ¹⁶ Ntá kaín tí sín tjejó estado Judea tsochrín sín jna sátsji sín. ¹⁷ A ntá tí sín tjejó chrítaón nchia ntoé sín la í xitjahya tsakitsje sín ninkehó. ¹⁸ Ntá tí tjejóch'e sín xra nontee sín la kjá í tsokjanhya sín tsjikakja sín iké sín. ¹⁹ Ntá nòà tí chojni chjin tjejóyá sín la ko nòà tí sín nchekakí xjan tí yaon a. ²⁰ Chrókjuancheherá Dios kixin tí tsonhen tíha la chrókójhya nchakuen kin la ko chrókójhya tí yaon t'ok'éhe chojni. ²¹ Kixin tíha mé ijnko kjuachrakon imá ijié la desde tí xrankixixín chjasintajni la nunca xikahya kónhen. ²² Ntá tí chrók'uetóannya Dios kixin tjoka ts'atsínka tíha ntá chrókuaáhya ninkexró. Ntá ts'etóan ch'án kixin tjoka ts'atsínka tí kjuachrakon jie kixin jehe ch'án mé imá tjuèhe ch'án tí sín tsíkjeýá ch'án.

²³ Ntá tí tsontáχρο chojni kixin: “Tsjehé ntihi itjen Cristo”, o “Tsjehé ntiha itjen ch'án”, la ntá chrókuítekákuénhyará sín. ²⁴ Kixin ntá itsi iso sín tsontáχρο sín kixin Cristo tí jehe sín la ko kjaxin itsi í so sín ntoáhya tsjako la ko tsjasin sín kjuaxroan jie kixin tjinkaon sín chrókjuich'iyehé sín chojni kjónté tí sín tsíkjeýá Dios. ²⁵ Ó xrxanka senó nkehe tsonhen kixin tsonohará. ²⁶ Méxra tí chróntáχρο sín kixin: “Tsjeherá tí nteje ntiha tjen ch'án”, la ntá tsjihyará nó ntiha. O tí chróntáχρο sín kixin: “Tsjeherá ntihi tí cuarto mé tjen ch'án”, la chrókuítekákonhyará. ²⁷ Méxra éxí tsjonkixín la t'ikon chojni t'inkaséyanxín tí tjttoxín yaon hasta tsjiatóxin yaon mé xikaha ts'ikon chojni tió itsi tí Xjeen Dios K'óna Chojni. ²⁸ Mé éxí yóhe tí tjen ijnko cuerpo tsik'en la ntiha tsojnkotsé tí kontexjuen.

Tsoxjan tí Xjeen Dios K'óna Chojni

(Mr. 13.24-37; Lc. 21.25-33; 17.26-30, 34-36)

²⁹ A ntá séhyó tí tsjixixín tí kjuachrakon jie la ntá tí yaon la tsotie a ntá tí nitjó la í ts'inkaséyanxínnya. La ko tí konotsé la tsoxènjinxín nkajní la kjaxin kaín nkehe siín nkaya nkajní la sinkí. ³⁰ La ntá ts'ikon chojni kixin nkajní tsjixín tí Xjeen Dios K'óna Chojni. La ntá kaín chojni chjasintajni

* 24:15 Daniel 9.27

tsochraon sín la tsotsjánka sín la ts'ikon sín kixin itsi tí Xjeen Dios K'óna Chojni, mé chríkjan tjuí mé tsjak'enkakjan ch'án tsíkao tí kjuachaxin jie. ³¹ Ntá tsochr'án Dios tí sín ángel kixin ts'ánoa sín tí trompeta itsen kixin tsochjina kaín tí nkexro kjueyá Dios tsjixín kanóe lado chjasintajni.

³² 'Chrók'uitjará nkexrí sintayóaxian kuente ijnko nta to higo. Éxí yóhe tió chóna ntahnte la ko ts'ixin kayoa la nta tsonoaxínrá kixin í séhya tsokjan ichrin. ³³ Mé xíkaha tí ts'ikonrá ts'atsínka kaín tíha la ntá xíkaha tsonoaxínrá kixin í séhya itsi ìnchéni. ³⁴ Ntá tjonkará chaxín kixin kaín tíha senó tsonhen tí naxa ts'enhya tí chojni síin jie. ³⁵ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la nunca ts'itjáyanhya tsoxiteyá tíha.

³⁶ Á ntá tí yaon la ko tí hora tsoxiteyá tíha la kohya ninkexró nohe. Ni tí sín ángel tjejó nkaya nkajní noehya sín la ko ni tí Xjeen Dios noehya. Ó jehó tí It'é mé nohe.

³⁷ 'Éxí yóhe tí nkehe kónhen tí yaon k'uékjak'e ch'ín Noé mé xíkaha tsonhen tí tsokjan tí Xjeen Dios K'óna Chojni. ³⁸ Tí naxa titjiéhya sín nta la kaín chojni la jína k'uéjío sín la kjóne sín la ko ik'uú sín la ko sitótehe sín kjuixrakájia tí yaon k'uúixenhen ch'ín Noé ntabarco.† ³⁹ A ntá jehe sín mé kienxínhya sín hasta kuijia tí k'uániá chrin ntá ikui nta la k'uátjóá kaín sín. Mé xíkaha tsonhen tió itsi tí Xjeen Dios K'óna Chojni. ⁴⁰ A ntá yaá chojni ntoa tjejóch'e sín xra nonte la ntá ijnko la sátsji la í jnko la tsitóhe. ⁴¹ La ko yaá chojni chjin mé tjejó't'o sín la ijnko la sátsji la í jnko la tsitóhe.

⁴² 'Chrók'uejotsjehérá kixin noahyará nkehora la ko nkesá ts'inka janhan. ⁴³ Chrókónohará tíhi: tí chrókónohe ijnko ìnché nchia nkehora tie chrókjui ijnko nkexro tseé la ntá chrókjuak'echónhen tí ìnché tí nchia ntá xitjahya ts'ixenhen tí nkexro tjinkaon chrókueé. ⁴⁴ Méxra jahará la jína chrók'uejorá kixin tí Xjeen Dios K'óna Chojni me titàya itsi.

Tí nkexro jina ch'e xra la tí nkexro ch'ehya xra jina

(Lc. 12.41-48)

⁴⁵ 'Tí nkexro chaxín ch'e xra jína la ko imá nohe la ntá tí lámoé ch'án ts'etuenhen kixin ts'ayakonhen ch'án tí sín síin ntóe ch'án la ko tsjanjon ch'án nkehe sine sín chintji tí hora a. ⁴⁶ Náxrjón tjen tí nkexro ch'e xra tió itsi tí lamo la ts'ikon kixin xíkaha tjenchexiteyá ch'án tí xra k'uítuenhen ch'án. ⁴⁷ Chaxín tí lamo la tsjanjon ch'án kaín tí xra chóna ch'án ts'etóan tí ch'ín a. ⁴⁸ A ntá ijnko chojni ch'ehya xra jína la ntá tsjenkayáxin ch'án kixin kjá tjokahya tsokjan tí lámoe ch'án ⁴⁹ la ntá tsjankíxin ch'án tsjanjonko ch'án tí í so sín ch'e xra la ko tsjankíxin sineko ch'án la ko its'ikao ch'án kaín tí sín sitókoan. ⁵⁰ Ntá xrinahya tsokjan tí lamo ijnko yaon la ko ijnko hora noehya tí nkexro ch'e xra. ⁵¹ La ntá jehe ch'án la sinchekjasóte tí ch'ín kuitóhehe xra kjuínchexiteyáhya la ts'etóan ch'án kixin tsjasóte tí ch'ín a éxí tí sín jnkojínxónhya tjenkayáxin. Ntá ntiha la tsotsjánka ch'án la ko sinetaón neno ch'án.

25

Ch'ín Jesús kjuíncheyóexin ch'án kixin ite sín tjarisoá

¹ Ntácho ch'ín Jesús kixin:

—Tí kjuachaxin kuente Dios mé éxí yóhe ite sín tjarisoá sátsji tí tsotēhe chojni chuénko linterna tjia aceite la sákjuíchónhen sín tí ch'ín tsikótēhe.

† 24:38 Génesis 6.5-8

2 In'ó sín la tsikóyaxíenhya sín la in'ó sín ó tsikóyaxínhin sín. 3 Tí sín tsikóyaxíenhya na kjaxin la tsíkijiko sin linterna kjánchó tsíkijikohya sín aceite tsíkja ínaá. 4 A ntá tí sín tsikóyaxínhin la sátsíkiko sín xro tjá aceite la ko tí linterna kuènte sín. 5 A ntá tí ch'ín tsikótehe la tjokahya kui ch'án la ntá jehe sín mé tsíkíhi sín kotáchrín la tsik'ejóua sín kaín sín. 6 A ntá kuichjina k'áxrótjen la kuínhin sín t'èya ijnko chojni kixin: “Ó kui tí ch'ín tsikótehe na t'axrjerá ntója tsoxetará ch'án”, ichro ch'án. 7 A ntá kaín tí sín tjarisoá la k'uàya sín la kjuasiyóxin sín tí linterna kuènte sín. 8 A ntá tí in'ó sín tsikóyaxíenhya la nixjehe sín tí sín in'ó tsikóyaxínhin ntáchro sín kixin: “Chjehéni intsí aceite kuèntará kixin ó k'uànká aceite tjá linternéni”, ichro sín. 9 A ntá tí sín tsikóyaxínhin mé ntáchro sín kixin: “Náhi, tí aceite tí xíkaha tsjanjonni intsí jahará la antsí jeheni la tsjachahya. Íchá jína sáttjik'ènará tí sítoxín ntiha”, ichro sín. 10 Ntá tí in'ó tí sín kóyaxíenhya mé sákjuík'èna sín aceite la ntá ó kui tí ch'ín tsikótehe. Tí in'ó sín tjejóchónhen mé sákjuíko sín ch'án tí kia tsikótehe sín la ntá ó tuénxín k'uíkjéhe tí puerta. 11 Ntá chr'éxin ikui tí in'ó sín tjarisoá tsikóyaxíenhya la t'ínka sín puerta ntáchro sín kixin: “Ó kuini takitjehé nchia.” 12 A nta jehe ch'an kjuátehe ch'án ntáchro ch'án kixin: “Chaxín tí jahará la ní chonhyará”, ichro ch'an.

13 Ntá ntáchro ch'ín Jesús ínaá kixin:

—Méxra xíkaha tí jahará chrók'uejótsehérá kixin noahyará nkeyaon la nkehora itsi tí Xjeen Dios K'óna Chojni —ichro ch'án.

Ch'ín Jesús kjuíncheyóexin ch'án kuènte chichaon

14 Ntá ntáchro ch'ín Jesús kixin:

—Tí kjuachaxin kuènte Dios la yóhe ijnko chojni tjinkaon sáchrókjui ch'án í jnko nación la ntá k'uíyehé ch'án tí sín ch'ehe ch'án xra la ntá chjéhe ch'án sín tí chichaon a kixin ts'ayakonhen sín.

15 Ijnko ch'án la k'uáyéhe ch'án in'ó mil chichaon, la í jnko la k'uáyéhe ch'án iyó mil chichaon, la í jnko la k'uáyéhe ijnko mil chichaon. Tí nkexro kjuanjon chichaon la mé kónohe ch'án nkexro tí tsjacha sich'e jnkojnko xra. Ntá jehe ch'án tió kjuixin kjuanjon ch'án la ntá sakjuí ch'án íkjín. 16 Ntá tí nkexro k'uáyéhe in'ó mil chichaon la kjuích'eko ch'án xra tí chichaon kuákja ch'án la kjuacha ch'án í jnko in'ó mil. 17 Kjaxin tí nkexro k'uáyéhe iyó mil chichaon mé xíkja ch'án í jnko iyó mil. 18 A ntá tí nkexro k'uáyéhe ijnko mil chichaon mé sákjuí ch'án la kjuích'èna ch'án ijnko tòye kjuavá ch'án tí chichaon kuènte lámogé ch'án.

19 A ntá nchónhya nánó k'uátsínka la ntá ikjan tí lámogé sín kixin ntá tsjentoáko sín ch'án cuenta. 20 Saoxín kui tí nkexro k'uáyéhe tí in'ó mil la chjéhe ch'án tí lamo í jnko in'ó mil la ntáchro ch'án kixin: “Jaha me chjehéni in'ó mil la ó kjuachani í jnko in'ó. Tákjá tjinhin tí chichaon í”, ichro ch'án. 21 Ntá tí lamo mé ntáchro kixin: “Nchoxon tí xíkaha. Jaha la ijnko chojni jína ch'e xra. La ó kjuínchexiteyá jína. Kjónté jehya xra jíe la kjuínchexiteyá jína la ntá tsotjaha ijnko xra antsí jíe la tjak'e tsochéheni.” 22 Ntá chr'éxin ikui tí nkexro k'uáyéhe iyó mil la ntáchro ch'án kixin: “Jaha mé chjehéni iyó mil la kjuachani í jnko iyó. Tákjá tjinhin tí chichaon í”, ichro ch'án. 23 La ntá tí lamo ntáchro kixin: “Nchoxon jaha mé ijnko nkexro jína ch'e xra la ó kjuínchexiteyá. Kjónté jehya xra jíe la kjuínchexiteyá jína la ntá tsotjaha í jnko xra antsí jíe. Tjak'e tsochéheni”, ichro ch'án. 24 A ntá ikui tí ch'ín k'uáyéhe ijnko mil la ntáchro ch'án kixin: “Ó nóna kixin ijnko chojni imá jjehe tí jaha la itjaa tí

nonte jehya jaha k'uénkaxian la tsákjá nkehe kjónté k'uénkahya. ²⁵ Méxra chrakonni la sákjuíkjak'emáni tí chichaon chrínkí nche. Tákjá chíchakoan tjinhin", ichro ch'án. ²⁶ A ntá kjuátehe tí lamo kixin: "Jaha ijnko chojni jínahya la ko séhe. Jaha la ó noha kixin chrótjaa tí nonte k'uénkahya la chrókuákjaá tí nkehe k'uénkahya. ²⁷ A ntá tí chichaon chróchr'an banco. Ntiha chrókjuich'exín xra ntá tí ikjan janhan ntá chrók'uayáha antsí itsjé chichaon chrókjuacha kíchó chica", ichro tí lamo. ²⁸ A ntá nixjehé ch'án tí í so sín tjejó la ntáchro ch'án kixin: "Takitsjehérá tí mil chóna ch'án la chjehérá tí nkexro chóna tí ite mil chichaon ²⁹ kixin tí nkexro kjónté itsjé chóna la mé ts'áyéhe antsí la ntá tí nkexro chóntahya la kjónté tí intsi chóna la ts'axrjehe. ³⁰ A ntá tí nkexro ch'ehya xra la tsétuenhén sátsji ch'án tí sitié ntója la ntá ntiha la tsotsjánka ch'án la ko sinetaón ch'án neno ch'án."

Tsitqexín ijié chojni chjasintajni

³¹ A ntá tí tsi tí Xjeen Dios K'óna Chojni la tsikao ch'án kjuachaxién jié éxi ijnko Réy la ko tsikao ch'án kaín xín tí sín ángel ntá ntaha tsjak'etjaxin ch'án tí trono ts'etqanxín tí kjuachaxién jié. ³² Ntiha kaín xín tí chojni tsíkjiixin nkuixín nación tsochjina tí tjen ch'án la jehe ch'án tsakitsjekjan ch'án ijnko la íjnko. Éxi ijnko nkexro t'ayakonhen kolélo mé tsakitsjekjan ch'án tí kolélo la ókjé ts'ixin va la ko tí koténtso la ókjé ts'ixin. ³³ Méxra ts'etqan ch'án kixin tí kolélo la ts'ixin nó tja ch'án chjina, a ntá tí koténtso la nó ti tja ch'án kjon. ³⁴ Ntá tí Rey tsonixjehé tí sín tjejó tja ch'án chjina tsontáchro kixin: "Xrákirá jahará tí tjen kjuachaxin kuènte T'aná kixin T'aná ó kjuíncheyaonrá ch'án. Tí naxa kjuich'énahya Dios chjasintajni la xráxin kjuenkayáxin ch'án xikaha tsonhen. ³⁵ Janhan mé k'uén kjinta la jahará kjuánjonrá nkehe kjoné. La ik'uén nta la jahará kjuánjonrá nkehe ik'uia, la k'uájia éxi ijnko chojni kjuixín ikjín la jahará kjuánjonrá nketí k'ók'ána. ³⁶ La ko k'uéchontahya kaná la jahará kjuánjonrá ika k'uítsa, la ko kónina la jahará kjuasántsjeherá tí janhan, la kjuak'échjina la ntá jahará kjuasántsjeherá tí janhan." ³⁷ A ntá tí sín jína la tsjanchankí sín kixin: "Inchéni, ¿nkesá k'uíkonní kixin ik'uén kjinta ntá kjuanjonni nkehe kjónte? ¿La nkesá k'uíkonní kixin ik'uén nta la kjuanjonni nkehe ik'uia? ³⁸ ¿La ko nkesá k'uíkonní kixin ikjín kjuixian ntá kjuanjonni nketí k'ók'áha? ¿La ko nkesá k'uíkonní kixin chontahya iká la kjuanjonni ika k'uítsa? ³⁹ ¿La nkesá k'uíkonní kixin kóniha o kjuak'échjina la ntá kjuíjitsjeheni tí jaha?" mé xikaha tsjanchankíhi sín ch'án. ⁴⁰ A ntá tí Rey tsontáchro kixin: "Tió kjuínkítará ijnko kíchó ni kjónté ijnko chojni nóe la mé yóhe kixin tí janhan chrókjuínkítará."

⁴¹ A ntá tí Rey t'etqan mé tsonixjehé tí sín tjejó nó tja ch'án kjon tsontáchro kixin: "Sátjirá jahará kixin jahará tsjasótiará. Sátjirá tsjasótiará tí tjen tí xrohi ts'ankahya. Mé tí xrohi tjechónhen kixin tsoche tí ch'ín Tsochren la ko kaín tí sín ángel kuènte ch'án. ⁴² Tí ik'uén kjinta la jahará kjuánjonhyará nkehe kjoné la ko ik'uén nta la jahará kjuánjonhyará nkehe ik'uia. ⁴³ K'uájia éxi ijnko nkexro kjuixín kjín la jahará kjuánjonhyará nketí k'ók'ána la ko k'uéchontahya kaná la jahará kjuánjonhyará ka chrók'uítsa la ko k'uénina la kjuak'échjina la jahará kjuasántsjeheará tí janhan." ⁴⁴ Ntá tí jehe sín la tsjanchankí sín kixin: "Inchéni, ¿nkesá k'uíkonní kixin ik'uén kjinta la ik'uén nta la ko kjuixian kjín la ko chontahya iká la ko níha la ko kjuak'échjina? ¿Mé nkesá k'uíkonní

xikaha la ntá kjuínkĩtsahyani ti jaha?” tsixro sín. ⁴⁵ La ntá tí Rey tsjatehe ch'án tsontáchro ch'án kixin: “Tí xikaha kaín tíha kjuínkĩtsahyará ijnko chojni imá nõe la éxí xikaha kjuínkĩtsahyará tí janhan.” ⁴⁶ A ntá tí sín jínahya xikaha kjuích'e la mé sátsjixin sín ntihi tsjasõte sín jnkochrixin. A ntá tí sín jína la sátsji sín ts'áyéhe sín kjuachón jnkochrixin —mé xikaha chrónka ch'ín Jesús.

26

Tí sín nínkakonhen ch'ín Jesús tjenkayáxin sín kixin nkexrí ts'óyan sín ch'án (Mr. 14.1-2; Lc. 22.1-2; Jn. 11.45-53)

¹ Ntá kjuixin chrónka ch'ín Jesús kaín tíha, ntá nixjehe ch'án tí sín k'uájiko ch'án, ntáchro ch'án kixin:

² —Jahará ó nohará kixin t'itjáyan iyó yaon ntá tsjasin sín tí kia pascua la ntá tí Xjeen Dios K'óna Chojni mé tsotsé sín ch'án tsjikaán sín ch'án tí tjejó tí sín t'etõan ntá tsjak'enkanı sín ch'án ijnko ntacruz —ichro ch'ín Jesús.

³ Ntá tí sín nchat'á t'etõan la ko tí sín maestro tjako tí ley la ko tí sín táda kuènte tí sín judío mé kójnkotsé sín tí ntasin kuènte tí nchia kjuák'e ch'ín Caifás tí ch'ín nchat'á t'etõan. ⁴ Ntaha tjenkayáxin sín kixin nkexrí tsotsé sín ch'ín Jesús la ts'óyan sín ch'án. ⁵ A ntá ntáchro sín kixin:

—Tí sín kia la chrótséhyani ch'án kixin imá tsónínkaon tí chojni —ichro sín.

Ijnko tjan kjuikao aceite xraxé kuikite tjan ikja ch'ín Jesús (Mr. 14.3-9; Jn. 12.1-8)

⁶ Ch'ín Jesús tjen chjasin Betania ntõe ch'ín Simón tí ch'ín k'uéchõnta chinlepra. ⁷ Ntá xrínahya kóchjina ijnko tjan kjuikao tjan ijnko xro tsík'óna xro mármol mé kuikaón aceite xraxé náxrjón la imá tjete k'uíte. A ntá tí tjene ch'ín Jesús ntá tí tjan a mé kuikite aceite ikja ch'án. ⁸ A ntá tí sín k'uájiko ch'ín Jesús mé k'uikon sín xikaha ntá kónínkaon sín la ntáchro sín kixin:

—¿Nkekuènté kóxénhen tí xroan a? ⁹ Ichá jína chrókóxixin itsjé chichaon tí xroan ntá tí chichaon a chrókjuinkĩtsa tí sín nõe a —ichro sín.

¹⁰ Ntá kuínhin ch'ín Jesús tí nkehe tjo sín, ntá ntáchro ch'án kixin:

—¿Nkekuènté t'antaxínhínrá tí tjan i? Ó nchõxon ijnko nkehe jína kjuích'e tjan. ¹¹ Tí sín nõe la ó xráxin ts'ejókoará sín, a ntá janhan la jnkochrínhaya ts'ejóni. ¹² Tí nkehe kjuích'e tjan mé kjuíncheka tjan aceite xraxé tí cuerpo kuèntana la mé xikaha kjuakoxin tjan kixin xikaha tsoxravána. ¹³ Ntá chaxín tjonkará kixin kuenté chjasintajni tió tsjako sín tí tán jína tsaáxin sín ntá tsochrónka sín kixin xikaha kjuích'e tjan ntá tsoxraxinkakonxin sín kixin nkehe tí kjuích'e tjan —ichro ch'ín Jesús.

Ch'ín Judas kjuínchekji tí ch'ín Jesús

(Mr. 14.10-11; Lc. 22.3-6)

¹⁴ A ntá ijnko tí teyóxin sín k'uájiko ch'ín Jesús mé it'in Judas Iscariote sákjuínixjehe ch'án tí sín nchat'á t'etõan ¹⁵ la ntáchro ch'án kixin:

—¿Nkekjaín tsochjinará tsoxrjanka nketí tjen tí ch'ín Jesús? —mé xikaha chro tí ch'ín Judas.

Ntá tí sín nchat'á t'etõan kjuenkehe sín ch'án treinta chichaon plata. ¹⁶ Ntá tuénxin tí hora tí ch'ín Judas mé xritjeyá ch'án nkexrí tsochénka ch'án sín nketí tjen tí ch'ín Jesús.

Kjuixixín kjóneko sín tí ch'ín Jesús

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Ntá ikui tí yaon xrankixixín kia sine sín niotja tsíkjhohya tí xroan t'ánkixín niotja. Ntá tí sín k'uájiko ch'ín Jesús mé kóchjina sín kjuanchankihi sín ch'án kixin:

—¿Inchéni, nketí tjinkávan sincheyaxixinni tí sineni tí kia pascua? —ichro sín.

¹⁸ Ntá ntáchro ch'án kixin:

—Sátsjirá Jerusalén la tsjasánrá ntoe ijnko ch'ín la nixjehérá ch'án tsontáchrórá kixin: “Ntáchro Maestro kuénténi kixin í séhya naxa tsjak'e ch'án la ntá ijie ntoa ntihi tsoyaxixín kixin sineko ch'án tí sín xriko ch'án tí kia pascua”, tsixrorá —mé xíkaha ichro ch'ín Jesús.

¹⁹ A ntá tí sín k'uájiko ch'ín Jesús mé kjuínchexiteyá sín la kjuíncheyaxixín sín ntiha tí nkehe sine sín kia pascua.

²⁰ Tió ntá kóntó la ntá ch'ín Jesús k'uéjóko tí teyó sín k'uájiko ch'án kjóne sín. ²¹ La ntá tió naxa tjejóne sín la ntáchro ch'ín Jesús kixin:

—Chaxín tjonkará kixin jnkojínrá tjejorá ntihi mé sinchekjirána —ichro ch'án.

²² Ntá kaín sín la kjuankixín kóxakonhen sín k'uává sín la ntá kjuankixín sín jnkojnko sín kjuanchankihi sín tí ch'ín Jesús kixin:

—Inchéni, ¿á jeheni ní? —ichro sín.

²³ Ntá kjuátehe ch'ín Jesús kixin:

—Tí nkexro tsochr'ánkíkián niotja tí plato a mé tí nkexro a mé sinchekjina ch'án. ²⁴ Tí Xjeen Dios K'óna Chojni xíkaha tsjasóte ch'án éxí nixja xroon itén Dios, a ntá nòda tí ch'ín sinchekji ch'án. Íchá jina chrókokjéhya ch'án —mé xíkaha ichro ch'ín Jesús.

²⁵ Na ntá tí ch'ín Judas tí ch'ín sinchekji ch'ín Jesús, mé ntáchro ch'án kixin:

—Maestro, ¿á janhan? —ichro ch'án.

Ntá ntáchro ch'ín Jesús kixin:

—Méxra xíkaha tsintáchrúa —ichro ch'án.

²⁶ Ntá tió tjejóne sín na ch'ín Jesús mé kuákja ch'án tí niotja ntá kjuanchehe ch'án kjuasáyé Dios. Ntá kóchrít'o ch'án tí niotja ntá chjéhe ch'án kaín tí sín k'uájiko ch'án sine sín. Ntá ntáchro ch'án kixin:

—Sinterá tíhi mé cuerpo kuéntana —ichro ch'án.

²⁷ Na ntá kuákja ch'án ijnko vaso tjiá ínté to uva na ntá kjuanchehe ch'án kjuasáya Dios ntá kjuixin ntá chjéhe ch'án kaín tí sín tjejóko ch'án ik'ui sín. Ntá ntáchro ch'án kixin:

—Tíhi mé kaín rá it'irá ²⁸ kixin tíhi mé jnina mé chrónkaxín ijnko nkehe nixin tsonhen. Mé tí jnina ts'ítji na mé tsjacha tsjinkítsa nchónhya chojni kixin ts'íjmaxín ijje sín. ²⁹ Tjonkará kixin ts'íhya janhan tí ínté to uva inaá tsjixrakájia tí yaon ts'ayàjia kjuachaxin kuénte T'aná ntá xík'ini ínté to uva inaá —mé xíkaha ichro ch'ín Jesús.

Ntá chrónka ch'ín Jesús kixin ch'ín Pedro sinchemá ch'án kixin chónhya ch'án tí ch'ín Jesús

(Mr. 14.26-31; Lc. 22.31-34; Jn. 13.36-38)

³⁰ Ntá itsje sín ijnko himno ntá kjuixin ntá sákjuí sín tí jna Olivo. ³¹ Ntá ntáchro ch'ín Jesús kixin:

—Jahará tsítónaráni kaín rá ijie tie kixin ntáchro tí xroon itén Dios kixin: “Its'en tí nkexro Pastor t'ayakonhen kolélo ntá kaín tí ko mé tsjichroe

va.”* 32 Na ntá tió tsoxechónna ntá sátsjia senó estado Galilea, a ntá jahará la chr'éxin tsochréhéra —ichro ch'án.

33 Ntá kjuátehe ch'ín Pedro ntáchro ch'án kixin:

—Kjónté kaín sín tsítóha sín ntá janhan la náhi —ichro ch'án.

34 Ntá ntáchro ch'ín Jesús kixin:

—Chaxín tsoxrjanka kixin tí tie i naxa tsotsjehya kochíntoa la ó sinchemána níya —ichro ch'án.

35 Ntá ntáchro ch'ín Pedro kixin:

—Kjónté koína its'én la sintamáhya tí jaha —ichro ch'án.

La ntá kaín tí sín k'uájiko ch'án na xikaha ichro sín kaín sín.

*Ch'ín Jesús chrónóehē ch'án It'é ch'án tí tjen ch'án tí Huerto Getsemaní
(Mr. 14.32-42; Lc. 22.39-46)*

36 Ntá ch'ín Jesús la ko tí sín k'uájiko ch'án mé kjuíji sín tí nonte ntiha mé nchek'in sín Getsemaní. Ntá jehe ch'án mé ntáchro ch'án kixin:

—Tjejorá ntiho ntá janhan sátsjia tsonixjaha T'aná —ichro ch'án.

37 Ntá sákjuiko ch'án tí ch'ín Pedro la ko tí iyó xjeen ch'ín Zebedeo la kjuankixin kóxakonhen ch'án la ko k'uává ch'án. 38 Ntá ntáche ch'án tí iy'á sín kixin:

—Imá t'ává asenná éxi its'én ntá ts'axrje asenná. Ntá jahará ntiho tsitohará ts'ejotsjehekoarána —ichro ch'án.

39 Ntá sákjuí ch'án antsí kjínxin ntá kjuák'exín toch'in ch'án k'uísén ch'án hasta caxín kja ch'án nonte ntá chrónóehē ch'án It'é ch'án tjen nkaya nkajni, ntáchro ch'án kixin:

—It'eni, tí tjinkávan chrókjuinchekaáni kixin chrók'uihyani tí nkehe tsjá tjía tí copa i. Kjánchó jehya éxi tjinkaonni jeheni. Náhi. Éxi tjinkávan jaha —ichro ch'án.

40 Ntá ikjan ch'án tí kuítóhe sín la ó k'uíkon ch'án kixin tjejójua sín. Ntá nixjehe ch'án tí ch'ín Pedro ntáchro ch'án kixin:

—Xá xitjahya chrók'uejótsehekoarána ijnko hora. 41 Titohará tjejot-sjehéra la nixjehéra Dios kixin tsjinkitsará ch'án kixin chrókjuachroehyará ch'ín Tsochren. Asánrá tóxrjínjin kjánchó tí cuerpo chontará la imá ntá —mé xikaha ichro ch'ín Jesús.

42 Ntá sákjuí ch'án yóxin ínaá chrónóehē ch'án It'é ch'án, ntáchro ch'án kixin:

—Jaha It'eni tí xitjahya tsjakjíyan tí nkehe tsjasótexínni la ntá tjinkaonni éxi jaha tjinkávan —mé xikaha ichro ch'án.

43 Ntá ikjan ch'án la k'uíkon ch'án tjejójua tí sín k'uájiko ch'án ínaá kixin tjehya sín kotáchrin. 44 Ntá kuítóhe ch'án sín ínaá la níxin sáxíkji ch'án ntá ó xikahó xínixa ch'án ínaá. 45 Ntá kjan ch'án tí k'uéjéjó sín la ntáchro ch'án kixin:

—¿A ntá jie, tjejochrinrá la t'ok'áhará ní? Ntá ó tjen. Ntá jie kjuixraká tí hora ntá tí Xjeen Dios K'óna Chojni tsotsé tí sín chóna jie tsjikaán sín ch'án.

46 Ntá ijie t'inkatjenrá sátsjini kixin ó kjui tí ch'ín sinchekjina —ichro ch'án.

*Sákjuíko sín tí ch'ín Jesús tsjak'echjina ch'án ntqechiso
(Mr. 14.43-50; Lc. 22.47-53; Jn. 18.2-11)*

47 Ntá naxa tjenixja ch'ín Jesús ntá xrínahya kui ch'ín Judas, mé ijnko tí teyóxin sín k'uájiko ch'án. A ntá jehe ch'án kuikao ch'án nchónhya chojni kjuíjiko sín chica espada la ko inta. Na mé kjuachaxién tí sín nchat'á

* 26:31 Zacarías 13.7

t'etōan la ko tí sín táda kuènte tí sín judío mé kui sín. ⁴⁸ Ntá ch'ín Judas, tí ch'ín kjuínchekji, mé tsintáchro ch'án kixin:

—Tí ch'ín tsakíha tuēn ch'án na mé tsonoaxínrá kixin jehe ch'án. Ntá itserá ch'án —mé xíkaha tsintáchro ch'ín Judas.

⁴⁹ Ntá kóchjinehe ch'án tí ch'ín Jesús la nixjehe ch'án ntáchro ch'án kixin:

—¿Á jína tjen, Maestro? —ichro ch'án.

Ntá kjóneko ch'án kochíto. ⁵⁰ Ntá kjuátehe ch'ín Jesús, ntáchro ch'án kixin:

—Amigo, á ó k'uinka tí xra tjinkávan s'ich'e?

Ntá xíkaha kaín sín kóchjinehe sín ch'án la itsé sín ch'án.

⁵¹ Ntá ijnko ch'ín k'uájiko ch'ín Jesús mé kuakitsje ch'án chica espada kóchrínjin ch'án tatsjon ijnko tí sín ch'ehe tí nchat'á t'etōan xra. ⁵² Ntá ntáchro ch'ín Jesús kixin:

—Chr'axenhén tjoē chica espada méhe. Kaínxín tí sín tjà yaxín chica espada la xíkaha ts'enxín sín. ⁵³ ¿Á noahyará kixin janhan jína chrókjuáncháha T'aná la ntá tuénxín chróchr'án ch'án teyo ejército sín ángel? ⁵⁴ Kjánchó tí xíkaha chrókónhen la chróxiteyáhya éxi nixja xroon itén Dios kixin itén Dios mé chrónka kixin t'ichjánxin ó jehí xíkaha tsonhen —ichro ch'ín Jesús.

⁵⁵ Ntá ch'ín Jesús mé ntáche ch'án tí sín ikui kixin:

—Jahará k'uinkakoará chica espada la ko inta kixin tsotserána éxi chrótserá ijnko síchee xíkaha. A ntá kaín yaon kjuak'é nkaxenhen nínko kjuákua ¿na ntá nkexrí ntiha mé tsexinhyarána? ⁵⁶ Kjánchó jehí kaín tíha tsonhen kixin tsoxiteyá tí chrónka tí sín tsíkjin xroon itén Dios ósé —ichro ch'án.

Mé xíkaha ntá kaín tí sín k'uájiko ch'ín Jesús na mé kuítóhe sín ch'án, ntá sákjuí sín.

Ch'ín Jesús kóchjina ch'án tí síxreé t'etōan

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ntá tí sín itsé ch'ín Jesús la sákjuíko sín ch'án ntōe ch'ín Caifás, tí nchat'á t'etōan. Ntaha mé tsíkójkotsé kaín tí sín maestro tjako tí ley la ko tí sín t'etōan kuènte nínko. ⁵⁸ Ntá ch'ín Pedro ikjín tinkáchréhe ch'án ntá kjuíji ch'án tí ntásin ntōe tí nchat'á t'etōan la kjaxin k'uixenhen ch'án tí ntásin la kjuák'eko ch'án tí sín policía kuènte nínko kixin tsotsjehe ch'án nkeri tsonhen.

⁵⁹ Ntá tí sín nchat'á t'etōan la ko tí sín táda la ko kaín tí sín t'etōan mé kjueyá sín nkexrí ts'eka sín jie tí ch'ín Jesús kixin jína chrók'óyan sín ch'án.

⁶⁰ Ntá kjónté nchónhya chojni kuikjanchia sín jie kjánchó k'uitjahya sín nkeri jie t'íká ch'án. Ntá kjónté la kóchjina iyó testigo ntoáhya chrónka sín ⁶¹ la ntáchro sín kixin:

—Ó kuínhinni ntáchro ch'án kixin: “Janhan na ts'oxíka tí nínko kuènte Dios la ntá iní yaon koá la ó tsjaké inaá”† —mé xíkaha chro sín.

⁶² Ntá tí nchat'á t'etōan k'uínkatjen la kjuanchankíhi ch'án tí ch'ín Jesús, ntáchro ch'án kixin:

—¿Nkekuènté tjáteéhya ninkehó? ¿Á chaxín xíkaha tsintáchrúa éxi xíkaha ichro sín? —ichro ch'án.

⁶³ Ntá ch'ín Jesús la táníkoá ch'án nixjahya ch'án. Ntá ntáchro tí nchat'á t'etōan kixin:

—Kjuachaxién ihnié tí Dios tjechón t'akjénxian chronka ntoá, ¿á jaha tí Cristo Xjeen Dios? —kjuanchankí ch'án.

⁶⁴ Ntá kjuátehe ch'ín Jesús ntáchro ch'án kixin:

—Éxí tí ntáchrúa jaha. Ntá kjaxin xrjanka kixin chr'éxin ts'ikuan kixin tí Xjeen Dios K'óna Chojni mé tsjak'etjaxin nánko tí tja chjina Dios chóna kaín xín kjuachaxin la ko ts'ikuan itjuj mé tsixin ch'án nkaya nkajní —ichro ch'ín Jesús.

⁶⁵ Ntá kuínhin tí nchat'á t'etoan la ntá imá kónínkaon ch'án ntá kótséche ch'án tí iké ch'án la ntáchro ch'án kixin:

—Tí ch'ín a k'uántaxínhin ch'án Dios kixin xikaha nixja ch'án. Méxra t'ichjánxinha í so chojni tsochrónka. La ntá jahará la ó kuínhínrá kixin nkexrí nixja ch'án. ⁶⁶ ¿A ntá jahará la, ¿nkechorá? —mé ichro tí nchat'á a.

Ntá kjuátehe sín ntáchro sín kixin:

—Chóna ch'án jie la chrók'uen ch'án —ichro sín.

⁶⁷ Ntá iso sín la kuikite sín ntate sín nkayakon ch'án na í so sín na kjuate sín ch'án la í so la chjéhe sín ikon ch'án. ⁶⁸ La ntáchro sín kixin:

—Tí chaxín tí Cristo jaha la tónoha nkexro kjuatia —ichro sín.

Ch'ín Pedro kjuínchemá ch'án kixin chónhya ch'án tí ch'ín Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Ntá ch'ín Pedro naxa tjetjaxin ch'án tí ntasin la ntá ikui ijnko tjan ch'e xra ntiha kóchjinehe ch'án, la ntáchro tjan kixin:

—Kjaxian xrikoa tí ch'ín Jesús tsíkixin estado Galilea —ichro tjan.

⁷⁰ A ntá ch'ín Pedro kjuínchemá ch'án nkayakon kaín sín la ntáchro ch'án kixin:

—Nonahya nkehe tí ntáchrúa —ichro ch'án.

⁷¹ Ntá sákjuí ch'án kjuíji ch'án chjina tí puerta. La ntá í jnko tjan k'uíkon tí jehe ch'án la nixjehe tjan kaín sín tjejontaxín, la ntáchro tjan kixin:

—Tí ch'ín i la kjaxin k'uájiko ch'án tí ch'ín Jesús tsíkixin chjasin Nazaret —ichro tjan.

⁷² Ntá ch'ín Pedro kjuínchemá ch'án inaá, k'uákjenxin ch'án ihnié Dios, ntáchro ch'án kixin:

—Chonhya tí nkexro a —ichro ch'án.

⁷³ Ntá antsí chr'éxin tí sín k'uéjontaxín kóchjinehe sín ch'ín Pedro la ntáchro sín kixin:

—Chaxín jaha kjaxin jnkojín tí sín a kixin jtásoanxínni tí nixja jaha —ichro sín.

⁷⁴ Ntá k'uákjenxin ch'án ihnié Dios ntáchro ch'án kixin:

—Chonhya tí nkexro a —ichro ch'án.

Na ntá xrínahya itsje kochíntoa. ⁷⁵ Ntá ch'ín Pedro mé xraxinkaon ch'án kixin nkexrí chrónka ch'ín Jesús senó kixin: “Naxa tsotsjehya kochíntoa mé ó tsjixin sinchemána níya kixin chonhyana.”[†] Ntá xikaha xraxinkaon ch'ín Pedro ntá k'uaxrjenta ch'án ntiha la imá tsjánka ch'án la ó mero ts'enixín ch'án tí kjuancheníhi, la sákjuí ch'án.

27

Kjuikénhen sín ch'ín Jesús tí ch'ín Pilato

(Mr. 15.1; Lc. 23.1-2; Jn. 18.28-32)

† 26:75 Mateo 26.34

¹ Ntá tí kóyaon k'uínkaséyan ntá kaín sín ncha't'á t'et'otan la ko tí sín t'et'otan kuènte tí sín judío kjuenkayáxin sín nkexrí ts'óyán sín tí ch'ín Jesús.
² Ntá tjechronteto ch'án sákjuiko sín ch'án tí tjen tí ch'ín Poncio Pilato, tí ch'ín gobernador romano.

Ik'uén ch'ín Judas

³ Ntá tí ch'ín Judas, tsíkjinchekji ch'ín Jesús, mé k'uíkon ch'án kixin ts'óyán sín tí ch'ín Jesús. La ntá xraxinkaon ch'án tí jié kjuasin ch'án la sákjuikénhen ch'án sín inaá tí treinta chichaon plata kuákja ch'án, mé chjéhe ch'án tí sín ncha't'á t'et'otan la ko tí sín táda. ⁴ La ntá ntáchro ch'án kixin:

—Ó kjuasinni jié kixin kjuínchekjini ijnko nkexro tjóá —ichro ch'án.

À ntá jehe sín kjuátehe sín kixin:

—Ntá janhanna la nonahyana tíha. Tíha la ó jié kuènta —ichro sín.

⁵ Ntá ch'ín Judas mé sákjuik'e tí chichaon nkaxenhen n̄jnko ntá sákjuí ch'án kjuísik'á isin ch'án nta.

⁶ Ntá tí sín ncha't'á t'et'otan kjuenájín sín tí chichaon la ntáchro sín kixin:

—Tí chichaon la kóxīxin ijnié chojni la chrokjuahya chr'áxenhenni tí caja kuènte ofrenda —ichro sín.

⁷ La ntá kjuenkayáxin sín jnkokoá kixin tí chichaon la ts'enaxín sín ijnko nonte it'in Nontee Tí Ch'ín Ch'éna Nchésen kixin tsochónta sín nketí tsoxravá tí chojni tsíkjīxin ikjín. ⁸ Mé x̄ikaha kjuínchek'in sín tí nonte mé Campo Kuènte Jni la hasta ijie la naxa x̄ikaha nchek'in sín. ⁹ Mé x̄ikaha ó xiteyá tí nkehe k'uéntáchro profeta Jeremías, ntáchro ch'án kixin: “Kuákja sín tí treinta chichaon plata (tí chichaon kjuanjon tí sín israelita kuènte tí ch'ín a), ¹⁰ la k'uénaxín sín tí nonte kuènte tí ch'ín ch'éna nchésen kixin x̄ikaha kjuínchexiteyá sín tí nkehe k'uetuanna Ìnchéni.”*

Ch'ín Jesús kóchjina nkayakon tí gobernador Pilato

(Mr. 15.2-5; Lc. 23.3-5; Jn. 18.33-38)

¹¹ Na ntá ch'ín Jesús sákjuíko sín ch'án nkayakon tí ch'ín gobernador la ntá jehe ch'án kjuanchankí ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús, ntáchro ch'án kixin:

—Éxí ntáchrua jaha —ichro ch'án.

¹² Na ntá tí sín ncha't'á t'et'otan la ko tí sín táda t'et'otan t'eka sín jié tí ch'ín Jesús kjánchó la ch'ín Jesús la ninkehó kjuáteehya.

¹³ À ntá ch'ín Pilato kjuanchankí ch'án kixin:

—¿Á kiénhya kaín tí jié t'eka sín tí jaha? —ichro ch'án.

¹⁴ Kjánchó ch'ín Jesús la ninkehó kjuáteehya ch'án. Ntá tí ch'ín gobernador la chrakon ch'án.

K'uet'otan sín kixin its'en ch'ín Jesús

(Mr. 15.6-20; Lc. 23.13-25; Jn. 18.38—19.16)

¹⁵ À ntá tí kié pascua mé kuènten tí ch'ín gobernador kixin jnkojnko nánó takitsjexín ch'án nt'ochiso ijnko chojni tjechjina. Ntá tí chojni mé tsjanchia sín nkexro tí tsítóhe ch'án sátsji. ¹⁶ Ntá tjechjina ijnko ch'án, mé kaín sín ntiha ó nohe sín kixin jínahya ch'án, mé it'in ch'án Barrabás. ¹⁷ Ntá itsjé chojni kójnkotsé la ntá ch'ín Pilato mé kjuanchankí ch'án kixin:

* 27:10 Zacarias 11.12–13

—¿Nkexro tjinkáonrá ts'atjánta, á tí ch'ín Barrabás o á tí ch'ín Jesús nchek'in sín Cristo? —ichro ch'án.

¹⁸ Kíxin tí ch'ín Pilato la ó nohe ch'án kíxin kjuachjinoxínhin chóna tí sín kjuikaán tí ch'ín Jesús.

¹⁹ Ntá jehe ch'án naxa tjetjaxin ch'án tí nchekitoexíxin ch'án ijíé chojni la ntá tí ichjién ch'án mé k'uɛtuɛnhen tjan ijnko chojni tsjichénka ch'án kíxin tsjiatéhya ch'án tí nkexro jina kíxin kóntó náxrjónhya k'uikónxín tjan kotáchríén tjan kíxin tí jehe ch'án.

²⁰ A ntá tí sín nchat'á t'ɛtoan la ko tí sín táda t'ɛtoan a mé nixjehe kaín tí chojni tsíkóchjina kíxin chrókjuanchia sín kíxin chrókuitóhe ch'án tí ch'ín Barrabás sáchrókjui, a ntá ch'ín Jesús mé chrók'uɛn. ²¹ A ntá tí ch'ín gobernador mé nixjehe ch'án sín inaá kjuanchankí ch'án kíxin:

—¿Nkexro tí yaá sín tjejó ntihi tjinkáonrá ts'atjánta? —ichro ch'án.

Ntá kjuátehe sín ntáchró sín kíxin:

—Ch'ín Barrabás mé chrók'uatjánta ch'án —ichro sín.

²² A ntá ch'ín Pilato mé kjuanchankí ch'án kíxin:

—¿A ntá nkehe sít'aha tí ch'ín Jesús tí ch'ín nchek'inrá Cristo? —ichro ch'án.

Ntá kaín sín kjuátehe sín kíxin:

—¡Tsjak'enkáni ch'án ntacruz! —ichro sín.

²³ Ntá ch'ín Pilato kjuanchankí ch'án ntáchró ch'án kíxin:

—¿Xá nkehe tí kjuích'e tí ch'ín i kíxin? —ichro ch'án.

Ntá antsí má itsen k'uixite sín, k'óyako sín, ntáchró sín kíxin:

—¡Tsjak'enkáni ch'án ntacruz! —ichro sín.

²⁴ Ntá ch'ín Pilato k'uikon ch'án kíxin í kohya tsjitóxinhin sín tsjenkayáxin sín la antsí má k'uixité sín, nínkaon sín, la ntá kjuanchia ch'án xrakao sín inta, la nkayakon kaín tí sín tsíkójkotsé ntaha k'ònti ch'án tja ch'án. La ntáchró ch'án kíxin:

—Janhan tsámáhya jje tí its'en tí nkexro í chónthaya jje. Jahará xikaha tjinkáonrá tsonhen —ichro ch'án.

²⁵ Ntá kaín sín kjuátehe sín kíxin:

—Jeheni la ko xjeenni mé yámáni tí jje tí its'en tí nkexro i —ichro sín.

²⁶ Ntá ch'ín Pilato kuitóhe ch'án kíxin sáchrókjui tí ch'ín Barrabás. Ntá tuénxín k'uɛtoan ch'án kíxin tsjate sín tí ch'ín Jesús la ntá kjuínchek'áyéhe ch'án tí sín tsjak'enkanı sín ch'án ntacruz.

²⁷ A ntá tí sín soldado a mé sákjuiko sín tí ch'ín Jesús tí palacio kuènte tí ch'ín gobernador. Ntaha kójkotséxin kaín tí sín soldado romano la k'uántatjen sín tí jehe ch'án. ²⁸ Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié. ²⁹ La kjuak'enkaya sín kja ch'án ijnko corona tsíkjich'éna sín ntach'í la ko kjuanjon sín ijnko nta vara kíxin tjenkáya tja ch'án chjina. La ntá k'uéjóxín toch'in sín nkayakon ch'án la kjuanoá sín ch'án, ntáchró sín kíxin:

—Jnkochrín tsjak'é tsétuɛnhén tí sín judío —ichro sín.

³⁰ La ko kjaxin ntáté sín kuikite sín nkayakon ch'án la ko kuákja sín tí nta tjexraa ch'án la t'íchjéxin sín kja ch'án. ³¹ Ntá kjuixin kjuanoá sín ch'án na ntá kuakitsjehe sín ch'án tí ka kjátse tié ntá kjuínchek'inkáya sín tí iké ch'án xráxín. Ntá sákjuiko sín ch'án kíxin tsjak'enkanı sín ch'án ntacruz.

*Kjuák'enkáni ch'ín Jesús ntacruz
(Mr. 15.21-32; Lc. 23.26-43; Jn. 19.17-27)*

³² A ntá sákjuixin sín ntiha la xéta sín ijnko ch'ín kjuixin ch'án chjasin Cirene, mé it'in ch'án Simón. Ntá k'uetuēnhen sín ch'án kíxin tsámá ch'án tí ntacruz tsjak'enkáni ch'ín Jesús.

³³ Ntá kjuíji sín ijnko tjo it'in Gólgota na mé nkívee sín t'axrjexín Nta Hueso Kja Chojni Tsík'en. ³⁴ Ntá chjéhe sín ch'ín Jesús xranvino tsík'ixinkíkjanxín xroan tsjá kjánchó jehe ch'án k'uíhya ch'án.

³⁵ A ntá tí sín soldado kjuixin kjuak'enkáni sín ch'án tí ntacruz ntá tí iké ch'án kjuích'exín sín suerte kíxin nkexro tsakja. Mé xíkaha xiteyá tí nkehe nixja tí sín k'uéchrónka itén Dios ósé, ntáchro kíxin: “Nchónhya suerte kjuích'exín sín tí kaná.”† ³⁶ Ntá tí sín soldado ntaha k'uéjóna sín t'ayakonhen sín ch'án. ³⁷ Ntá kjuak'enkáni sín tí ikja tí ntacruz ijnko ntachiso ntáchro kíxin: “Ch'ín Jesús mé tí ch'ín Rey t'etuēnhen tí sín judío.”

³⁸ Kjaxin yaá tí síchee k'uéjónyáni sín ntacruz ijnko la nó tja chjina la í jnko la nó tja kjon. ³⁹ Ntá tí sín tinkák'atsínka mé kjuanoá sín ch'án tinkátjía kja sín ⁴⁰ la ntáchro sín kíxin:

—Jaha ntáchrúa kíxin chrók'oxíka tí nínko a ntá iní koá yaon la ó chrókjuixin chrókjuích'éna ínaá,‡ ichrua. Méxra ijie jahvá nchekaá asán. Tí chaxín jaha Xjeen Dios la jahvá tjasinkajinxíán tí ntacruz méhe —ichro sín.

⁴¹ La ntá kjaxin tí sín nchat'á t'etoan la ko tí sín maestro tjako tí ley la ko tí sín fariseo la ko tí sín k'uetuēn kuènte nínko kjuanoá sín ch'án, ikjo sín kíchó sín kíxin:

⁴² —Jehe ch'án mé kjuínchekaá ch'án ókjé chojni ntá jehe ch'án xitjahya sinchekaá asén ch'án. Kja tí chaxín jehe ch'án tí Rey kuènte Israel ntá jehó ch'án chrókjuinkajinxín ch'án asén ch'án tí ntacruz kíxin ntá kjaxinni chrókuitekaonni tí jehe ch'án. ⁴³ Jehe ch'án tsintáchro ch'án kíxin Dios tjinkítsa tí jehe ch'án la ntá tsotsjeheni á chaxin tjinkaon Dios sinchekaá tí jehe ch'án kíxin tsintáchro ch'án kíxin Xjeen Dios tí jehe ch'án —ichro sín.

⁴⁴ Kjaxin tí síchee sínkáni ntacruz k'uántaxínhin sín ch'án.

Ik'uén ch'ín Jesús

(Mr. 15.33-41; Lc. 23.44-49; Jn. 19.28-30)

⁴⁵ Ntá chonkíxin hasta las tres kónjin mé k'uíxin tie chjasintajni. ⁴⁶ Ntá tí hora a ch'ín Jesús itsen k'uèya ch'án, ntáchro ch'án kíxin:

—Elí, Elí, ¿lama sabactani? —mé tíhi t'axrjexín kíxin: It'éni, It'éni, ¿nkekuènté kujtohéni?§ —mé xíkaha ichro ch'án.

⁴⁷ Ntá iso sín tjejóntaxín kuínhin sín ntá ntáchro sín kíxin:

—Tí ch'ín a mé t'íyehé tí ch'ín profeta Elías —ichro sín.

⁴⁸ Ntá ijnko ch'ín kuínká ch'án sákjuíkkaja ch'án ijnko ka ntá chr'ánki ch'án xranvino isán ntá tí ka a kjuak'ekjen ch'án ijnko nta kjinjin ntá kjuínchechriin ch'án kíxin chrók'ui ch'ín Jesús.

⁴⁹ Ntá í so sín ntáchro sín kíxin:

—Nté tjtóhé ch'án. Tsotsjeheni á tsi ch'ín Elías sinchekaá tí jehe ch'án —ichro sín.

⁵⁰ Ntá ch'ín Jesús itsen k'uíyato ch'án ínaá, ntá kjuixin ik'uén ch'án. ⁵¹ Mé ntá tuénxín k'uíchje tí ka tjenkákuènxín nkaxenhen nínko. Mé k'uíchje tí ka k'óna yaá tí kjuankíxixín noi hasta nonte. La ko kuínki nonte la ko tí tjo la kjaxin xitjehe. ⁵² La ko ó xitjehe tí tòye síxravá chojni la ko ó xechón itsjé tí sín k'uékinkáchónki Dios. ⁵³ Káin tí sín a mé k'uaxrjexín sín tí tòye, la

tió kjuixin xechón ch'ín Jesús ntá k'uixenhen sín tí chjasin tjóá mé chjasin Jerusalén la ntaha itsjé chojni k'uíkon kíxin xíxechón tí sín a.

⁵⁴ Ntá tí ch'ín capitán la ko tí sín k'uéjoko ch'án, mé tí sín t'ayakonhen ch'ín Jesús, na ntá k'uíkon sín kuínki nonte la kaín tí í so nkehe la ntá imá chrakon sín, la ntácho sín kíxin:

—Chaxín tí nkexro a mé Xjeen Dios.

⁵⁵ Ntá ntiha nchónhya chojni chjin ikjín tjejó sín, tjejótsjehe sín. Jehe sín k'uékinkáchréhe sín ch'ín Jesús tí kjuixin ch'án estado Galilea kíxin mé ntiha kjuankíxixín sín k'uékjinkítsa sín ch'án. ⁵⁶ Ntaha kjaxin tjen tjan María Magdalena la ko tjan María, iné tí ch'ín Jacobo, la ko ch'ín José la ko tí iné tí xjeen tí ch'ín Zebedeo.

Ntá xrává ch'ín Jesús

(Mr. 15.42-47; Lc. 23.50-56; Jn. 19.38-42)

⁵⁷ Ntá tí ó ntá kóntó ikui ijnko ch'ín it'in José, mé ijnko ch'ín rico. Chjasén ch'án mé Arimatea la jehe ch'án kjaxin k'uéchréhe ch'án tí ch'ín Jesús. ⁵⁸ Ntá tí ch'ín José sákjuítsjehe ch'án ch'ín Pilato kjuikjanchia ch'án tí cuérpóé tí nkexro Jesús. Ntá ch'ín Pilato mé kjuanjon ch'án kjuachaxin. ⁵⁹ Ntá ch'ín José mé kuákja ch'án tí cuerpo ntá kjuínchek'isímá ch'án ijnko ka tjóá. ⁶⁰ Na ntá kjuak'enkaya ch'án ijnko tòye nixin kuènte ch'án kíxin senó tsíkjach'éna ch'án. Ntá ijnko xro jie k'uíkjèxín ch'án tí ntója tí tjo, ntá kjuixin ntá sákjuí ch'án. ⁶¹ Ntaha kjuak'e tí tjan María Magdalena la ko í jnko tjan María tjejótxaxin sín ntoí chok'èxin tjen tòye.

Tí sín soldado k'uáyakonhen tí tòye xrává ch'ín Jesús

⁶² A ntá tí yaon ó kjuixin kjuasiyóxin sín nkehe kuènte tí yaon t'ok'éhe sín, la ntá tí sín nchát'á t'etqan la ko tí sín fariseo sákjuítsjehe sín tí ch'ín Pilato ⁶³ la ntá ntácho sín kíxin:

—Ó xraxinkaonni kíxin tió naxa kjuák'echón tí nkexro kjuích'ia la tsintácho ch'án kíxin ts'atsínka iní yaon ntá tsoxechón ch'án inaá, tsícho ch'án. ⁶⁴ Méxra tsétuènhén tí sín soldado kíxin ts'ayakonhen sín tí tòye tsoxétjajia tí nixin yaon. Tí náhi, la kjá tie itsi tí sín k'uájiko ch'án la tseé sín tí cuerpo kuènte ch'án la ntá chr'éxin tsochénta sín chojni kíxin ó xíxechón tí nkexro a, mé xíkaha sich'ia sín. La ntá tí xíkaha sich'e sín antsí má sich'ia sín que tí xrankíxixín —mé xíkaha ichro sín.

⁶⁵ Ntá ntácho ch'ín Pilato kíxin:

—Ntíhi tjejó soldado. Satsjirá la ts'ayakonhenrá jína tí tòye éxí tjinkáonrá —ichro ch'án.

⁶⁶ Na ntá sákjuí sín la kjuak'e sín ijnko sello chrítaón tí xro tjejkèxin tí tòye la kuítqhe sín tí sín soldado ntahó kíxin ts'ayakonhen sín.

28

Ó xechón ch'ín Jesús

(Mr. 16.1-8; Lc. 24.1-12; Jn. 20.1-10)

¹ Ntá ó k'uátsínka tí yaon t'ok'éhe sín. Ntá chjino t'inkaséyan tí yaon xrankíxixín semana, la ntá tjan María Magdalena la ko tí í jnko tjan María sákjuítsjehe sín tí tsíkji xrává Jesús. ² Ntá xrínahya kuínki nonte imá tjian kíxin ijnko ángel kuènte Inchéni k'uínkajinxin nkaya nkajní la kjuíji ch'án tí tsíxará Jesús la kjuakjün ch'án tí xro a tjejkèxin tòye la ntá chrítaón tí xro a kjuák'ekjen ch'án. ³ Tí ángel la imá tjákiní tsjehe éxí ijnko xrohi la tí iké ch'án la imá tjóá tsjehe éxí chrinta. ⁴ Tí sín soldado mé k'uíkon sín

xikaha la ntá síxřánka sín chrakon sín la éxí tsík'en sín xikaha k'uéjó sín.

⁵ La ntá tí ángel mé ntáche ch'án tí chojni chjin kixin:

—Chrakonhyará. Janhan ó nòna kixin xřitjéyará tí nkexro Jesús mé tí nkexro tsíkjak'enkáni ntacruz. ⁶ Kjánchó í kohya ch'án ntihi ó tsíxechón ch'án inaá éxí chrónka ch'án senó. Xrákirá tsjehérá tí tsíkjak'e sín ch'án, í kohya ch'án. ⁷ Ntá sáťjirá tjoka tjíchenkará tí sín k'uájiko ch'án kixin: “Tí nkexro la ó tsíxechón. Ó kuítónxin ch'án ntia sáťsji ch'án estado Galilea. Ntiha ts'ikonrá ch'án”, mé xikaha tsochronkará. Kaín tíha mé tjonkará —mé xikaha chrónka tí ch'ín ángel.

⁸ A ntá tí chojni chjin tjoka sákjuixin sín tí tsíxřavá tí nkexro Jesús, la chrakon sín la ko chéhe sín la sákjuíchénka sín tí sín k'uék'ajiko ch'ín Jesús.

⁹ Ntá xřínahya titáya k'uíkuèn sín kixin itjen tí ch'ín Jesús la nixjehe sín ch'án. Ntá kóchjinehe sín ch'án la kjóa sín toté ch'án, kuítekaon sín ch'án.

¹⁰ La ntáchro ch'án kixin:

—Chrakonhyará sáťjirá tjíchenkará tí sín kichó ni kixin sáchrókjui sín estado Galilea la ntaha ts'ikon sín tí janhan —mé xikaha ichro ch'ín Jesús.

Tí nkehe chrónka tí sín soldado

¹¹ Tió sáťsíkji tí chojni chjin la nta iso tí sín soldado k'uáyakonhen tí tsíxřavá ch'ín Jesús mé sákjuí sín chjasin Jerusalén la chénka sín tí nchať'á t'etóan kaín tí nkehe tsíkónhen tí k'uéjó sín ntiha. ¹² Ntá tí sín nchať'a t'etóan kjuínixjehe sín tí sín táda la ntá jnkokoá kjuenkayáxin sín ntá chjéhe sín nchónhya chichaon tí sín soldado. ¹³ La ntáchro sín kixin:

—Chronkará kixin tí tie naxa tjejochrinrá ikui tí sín k'uék'ajiko tí nkexro Jesús, mé kueé sín cuerpo kuènte ch'án, ichrorá. ¹⁴ A ntá tí chrókónohe tí ch'ín gobernador tíha la ntá jeheni tsonixjeheni ch'án kixin tsonínkakuanhyará ch'án —mé xikaha ichro tí sín nchať'á.

¹⁵ La ntá tí sín soldado k'uáyéhe sín tí chichaon la sákjuí sín la xikaha kjuích'e sín éxí k'uítuenhen sín. La mé xikaha chrónkaxín tí sín judío, la hasta tí yaon ijie la xikahó ichro sín, chrónkaxín sín.

Ch'ín Jesús k'uetuenhen ch'án tí sín k'uék'ajiko ch'án tí xřa sich'e sín (Mr. 16.14-18; Lc. 24.36-49; Jn. 20.19-23)

¹⁶ A ntá tí tejnko sín k'uék'ajiko ch'ín Jesús sákjuí sín ijnko jna estado Galilea kixin xikaha tsík'etóan ch'ín Jesús. ¹⁷ Ntá k'uíkon sín ch'ín Jesús la ntá kuinkáchónki sín ch'án kjónté iso sín naxa kjuenkayáxin á chaxín jehe ch'án o náhí. ¹⁸ Ntá ch'ín Jesús kóchjinehe tí jehe sín la ntáchro ch'án kixin:

—Dios mé chjina kaín xín kjuachaxin nkaya nkajni la ko chjasintajni. ¹⁹ Méxřa sáťjirá kaín xín nación la tjákoherá chojni kixin tsitekaon sín tí janhan. Tíkítexínra sín kjuachaxièn ihnié It'eni la ko ihnié tí Xjeen la ko Nchakuèn Dios. ²⁰ Tjákoherá sín kixin sinchexiteya sín kaín xín nkehe kuétuanhanrá. Ijje la ó nohará kixin tsjak'é ts'ejokoará jnkochrín hasta tsjeje chjasintajni. Mé xikaha tsonhen. Amén —ichro ch'ín Jesús.

Tí tan jína chrónka ch'ín Marcos

*Nteje mé kjuakoxin ch'ín Juan Bautista
(Mt. 3.1-12; Lc. 3.1-9, 15-17; Jn. 1.19-28)*

¹ Xikihi mé xrankixixín tí tan jína kuente Jesucristo mé tí Xjeen Dios.

² Ósé mé kjuák'e ch'ín Isaías mé ijnko nkexro tsíchr'án Dios chrónka itén ch'án k'uékjin ch'án nkexrí nixjehe Dios tí Xjeen ch'án ntáchro kixin: Janhan tsochr'an ijnko nkexro tsochrónka tan kuèntana tsitónxin ntja, kixin tsjasíyóxin ch'án ntja kuèntá.*

³ Ntá tsinhin sín itén ijnko nkexro tsjak'e nteje ts'èya tsontáchro kixin: “Tóxakonhanrá ncheyóxinrá ntja tsixin Ìnchéni, takitjehérá ijnko ntja ntoí.”†

⁴ Tíha mé xíteya ikui ch'ín Juan Bautista, mé xikaha kjuák'e ch'án nteje kuikite ch'án chojni. Kjuakohe ch'án chojni ntiha kixin chrókjuinkí sín tí nkehe tjenkayáxin sín chrókuítohe sín tí ijíé sín ntá chrókuikite sín kixin xikaha mé chrókjuin ijíé sín. ⁵ Itsjé chojni kuixin estado Judea la ko tí chjasin Jerusalén ikui sín tí kjuák'e ch'ín Juan kuínhin sín tí nkehe kjuako ch'án ntá chrónka sín tí jje yámá sín ntá ch'ín Juan mé kuikitexin sín ch'án ntarío Jordán.

⁶ Tí ké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxin nteje. ⁷ Mé kjuák'ekjakohe ch'án chojni ntáchro ch'án kixin:

—Itón tí janhan mé tsichréhe ijnko nkexro antsí má chóna kjuachaxin, a ntá janhan la kánhyó. Méxra chrókósuàna chrókjuasintanka tí correa tí tokaté ch'án. ⁸ Janhan mé ìnta ó kuikitexínrá. Ntá jehe ch'án mé tsikitexínrá ch'án tí Nchakuen Dios —ichro ch'ín Juan.

*Ch'ín Juan kuikite ch'án tí ch'ín Jesús
(Mt. 3.13-17; Lc. 3.21-22)*

⁹ Ntá tí yaon a ch'ín Jesús, k'uaxrjexín ch'án chjasin Nazaret estado Galilea. Na ntá ch'ín Juan mé kuikitexin ch'án tí ntarío Jordán. ¹⁰ Tió k'uaxrjenkixin ch'ín Jesús tí ìnta, ntá xríñahya titaya k'uíkuèn ch'án na ó xitjehe nkajní la ntá tí Nchakuen Dios éxí kontóá k'uínkajinxin ntiha ntá kjuák'e chrítaón kja ch'án. ¹¹ Ntá xríñahya kuínhin sín nixja Dios nkaya nkajní, ntáchro kixin:

—Janhan mé xjanna imá tjuaha tí jaha. Imá chàna kixin nchexiteyàna tí jaha —mé xikaha kuínhin sín.

*Ch'ín Tsochren chrókjuachroe tí ch'ín Jesús kixin chrókjuasin ch'án jje
(Mt. 4.1-11; Lc. 4.1-13)*

¹² Ntá tí Nchakuen Dios mé sákjuíko tí ch'ín Jesús nteje. ¹³ Kjuák'e ch'án cuarenta yaon tí nteje la ko ntiha mé k'uixin ko jjehe ntá ch'ín Tsochren a na mé tjinkaon chrókjuachroe ch'án. La ntá tí sín ángel kui k'uàyakonhen tí jehe ch'án.

*Ch'ín Jesús kjuankixixín kjuako ch'án estado Galilea
(Mt. 4.12-17; Lc. 4.14-15)*

* 1:2 Malaquías 3.1 † 1:3 Isaías 40.3

¹⁴ Kjuixin kjuák'echjina ch'ín Juan ntqechiso ntá ch'ín Jesús na mé sákjuí ch'án nó estado Galilea sákjuíkjakohē ch'án tí sín ntiha tí tan jina kuente Dios. ¹⁵ Ntá ntáchro ch'án kixin:

—Ó kjuixraká tí yaon, la ó tsi tí kjuachaxin kuente Dios ts'etoan ch'án. Chrókuítqohérá tí nkehe jínahya k'uékjenkayáxinrá a ntá chrókuítekáonrá tí tan tsaáxinrá —mé xikaha kjuako ch'ín Jesús.

Ch'ín Jesús k'uíyehē noó tí sín itsé koche

(Mt. 4.18-22; Lc. 5.1-11)

¹⁶ Ch'ín Jesús tjetji ch'án chrínta ntayaon Galilea ntá xrínahya k'uíkon ch'án tí ch'ín Simón la ko tí kichó ch'án mé it'in Andrés, mé koche xritsé sín, ntá tinkák'e sín tí nchísén chrínki ntá. ¹⁷ Ntá ntáchro tí ch'ín Jesús kixin: —Chréhérá tí janhan, ntá tsotjahárá xra tsjéyará chojni —ichro ch'án.

¹⁸ Ntá tuénxín kuítqhe sín tí nchísén k'uétséya sín koche ntá sákjuíko sín ch'án.

¹⁹ Ntá kjínhya kjuíji ch'ín Jesús ntá k'uíkon ch'án tí yaá xjeen ch'ín Zebedeo. Ijnko mé it'in Jacobo. A ntá tí í jnko la mé it'in Juan. Jehe sín la ko tí it'é sín tjejóxenhén sín tí ntabárcq tjejójtjonité sín tí nchísén tséya sín tí koche. ²⁰ Na ntá ch'ín Jesús mé k'uíyehē tí jehe sín kixin kjaxin tsóchréhe sín ch'án. A ntá tuénxín kuítqhe sín tí it'é sín ch'ín Zebedeo kuítqeko ch'án tí ntabárcq la ko tí sín tjinkítsa ch'án ch'e xra. A ntá jehe sín sákjuíko sín ch'ín Jesús.

Ijnko chojni chóna ijnko nchakuen tí jínahya

(Lc. 4.31-37)

²¹ Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uíxenhén ch'ín Jesús tí nínko Israel. Na ntá ntaha mé kjuankixin ch'án kjuako ch'án. ²² A ntá tí chojni sín ntiha mé chrakon sín kuínhin sín tí nkehe kjuako ch'án kixin kjuakqoxin ch'án kixin chóna ch'án kjuachaxin, la jehya éxi tí sín maestro tjako tí ley, ichro sín. ²³ Ntá tí nínko Israel chjasin ntiha itjen ijnko chojni chóna ijnko nchakuen tí jínahya k'uíyato ntáchro kixin:

²⁴ —¿Nkekuenté tjiaté tí jeheni kaín ni? Jaha Jesús kjuíxian Nazaret. ¿Á k'uinka kixin sijnchek'itjáyanni? Janhan mé ó kjuátsoan tí jaha, la ko nóna kixin jaha tí nkexro tjóá kuente Dios —mé xikaha ichro tí nchakuen tí jínahya.

²⁵ Ntá ch'ín Jesús mé k'uetuénhen tí nchakuen tí jínahya ntáchro ch'án kixin:

—Tániá, t'axrjéxian tí jehe ch'án —mé xikaha ichro ch'ín Jesús.

²⁶ A ntá tí nchakuen tí jínahya mé kjuínchek'aniáte tí ch'ín a la ko k'uíyatoxín tsen ntá k'uaxrjéxín tí ch'ín a. ²⁷ A ntá kaín sín chrakon sín ntá kjuanchankíhi sín kichó sín, ntáchro sín kixin:

—¿Xá nkexro tíha kixin tjako ch'án nkehe nixin? Jehe ch'án chóna kjuachaxin kixin t'etuénhen ch'án tí nchakuen tí jínahya la titekakonhen —mé xikaha ichro sín.

²⁸ A ntá imá tjoka k'uíxikónohe kaín xín sín estado Galilea kixin nkexrí tí kjuachaxin chóna tí ch'ín Jesús a.

Ch'ín Jesús kjuínchekitohe jína tí ich'ee tí ch'ín Simón Pedro

(Mt. 8.14-15; Lc. 4.38-39)

²⁹ Ntá tí ch'ín Jesús mé k'uaxrjéxín ch'án tí nínko, a ntá tuénxín sákjuíko ch'án ch'ín Jacobo la ko ch'ín Juan, sákjuí sín ntqē ch'ín Simón la ko ch'ín Andrés. ³⁰ Ntá tí ich'ee ch'ín Simón na tjetsínka tjan, níhi tjan kixin chóna

tjan sóa. Ntá chénka sín tí ch'ín Jesús. ³¹ Ntá kóchjina ch'án tí tjetsínka tjan ntá itsé ch'án tja tjan k'uínkatjen tjan. Ntá tuénxín kjuínhin tjan tí sóa chóna tjan. Ntá kjuanjon tjan nkehe sine sín.

Ch'ín Jesús kjuínchekitohe jina nchónhya chojni níhi
(Mt. 8.16-17; Lc. 4.40-41)

³² A ntá tió kjuíataón yaon tió k'uúxin tie kuíkohe sín tí ch'in Jesús kaín tí sín níhi la ko tí sín chóna nchakuen jínahya; ³³ na ntá kuenté chjasin kójnkontsé sín k'uúxintankí sín ntója tí nchia a. ³⁴ Ntá kjuínchekitohe ch'án jina kaín tí chojni níhi chóna nchónhya clase chin la ko kuakitsje ch'án kaín tí nchakuen tí jínahya. Na í kjuanjonhya ch'án kjuachaxin kixin tsonixja tí nchakuen tí jínahya kixin ó kjuátsōan tíha nkexro tí jehe ch'án.

Ch'ín Jesús mé kjuako ch'án estado Galilea
(Lc. 4.42-44)

³⁵ Ntá naxá sítie k'uàya ch'ín Jesús k'uaxrjexín ch'án tí chjasin a sákjuí ch'án nteje kixin ntiha nixjeexín ch'án It'é ch'án tjen nkaya nkajní. ³⁶ Ntá ch'ín Simón la ko tí sín xriko ch'án mé sákjuíkjejá sín ch'án. ³⁷ Ntá k'uitja sín ch'án ntá chénka sín kixin:

—Kaín sín xritjejá sín tí jaha —ichro sín.

³⁸ Ntá ntáchro ch'ín Jesús kixin:

—Sátsjini ókjé chjasin chjinaxón kixin ntaha kjaxin tsjákōhā sín tí tan jina, kixin xíkaha mé tí k'uaxrjexian chjasin ntiha.

³⁹ Ntá nkuúxin estado Galilea sákjuí ch'án kuinkákjako ch'án jnkojnko nínko la ko kuakitsje ch'án tí nchakuen tí jínahya chóna sín.

Ch'ín Jesús kjuínchekitohe jina ijnko ch'ín chóna chinlepra
(Mt. 8.1-4; Lc. 5.12-16)

⁴⁰ Ntá kui ijnko ch'ín chóna chinlepra kjuák'exín toch'in ch'án nkayakon ch'ín Jesús ntá chrónóehē ch'án ntáchro ch'án kixin:

—Tí tjínkávan jaha la jina chrókjuínchekitohéni jina —ichro ch'án.

⁴¹ Ntá ch'ín Jesús na imá kuíkonóehē ch'án tí ch'ín a na ntá kjuentoá tja ch'án kjuak'e tja ch'án chrítaón tí ch'ín níhi a ntá ntáchro ch'án kixin:

—Méxra xíkaha tjínkávan. Ntá jie sintakitōha jina —ichro ch'án.

⁴² A ntá xíkaha ntáchro ch'án ntá tuénxín kjuíin tí chinlepra ntá kuítóhe ch'án jina. ⁴³ Ntá k'uetuēnhen ch'ín Jesús tí ch'ín a kixin tjoka sátsji ch'án, ntáchro ch'án kixin:

⁴⁴ —Ninkexró chenkahya ntihi; jehó sátsja tjákohé tí ch'ín nchat'á kixin ó kjuínhan tí chinlepra la ko tjánjuan tí nkehe tsík'etōan ch'ín Moisés† kixin tsonoexín kaín xín chojni kixin ó kuítóha jina —ichro ch'án.

⁴⁵ A ntá tí ch'ín tsíkitohe jina, a ntá sákjuí ch'án kjuankíxin ch'án chénka ch'án kaín xín chojni kixin nkexrí kuítóhe ch'án jina. Méxra xitjahya ts'ixenhen ch'ín Jesús noxín nijnko chjasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuixín sín nkuúxin chjasin.

2

Ch'ín Jesús mé kjuínchekitohe jina ijnko chojni tsík'en toté
(Mt. 9.1-8; Lc. 5.17-26)

¹ Ntá ó k'uátsínka iso yaon ntá ch'ín Jesús mé xíkjan ch'án chjasin Capernaum. Ntá k'uúxikónohe chojni kixin ijnko nchia ntiha kjuák'e

† 1:44 Levítico 14.1-32

ch'án. ² Ntá tuénxín nchónhya chojni kóchjina ntá kjuachahya tí nchia k'uúixixenhen sín la ko kjaxin kjuachahya tí ntója nchia chrók'uúixintankí sín. ³ Ntá kui noó sín tinkátsénkí sín ijnko ch'ín tsík'en toté ch'án. ⁴ Kjánchó xitjahya kóchjina sín tí tjen ch'ín Jesús kixin nchónhya chojni síin. La ntá k'uúit'ótjen sín tí chritaón nchia a ntá k'óxrat'o sín. Na ntá ijnko hno kjuak'ete sín tí kania tjenkáya tí sinníhi a ntá kjuinkajin sín ntoí tí tjen ch'ín Jesús a. ⁵ Tió k'uúikon ch'ín Jesús tí nkehe kjuich'e sín ntá ó nohe ch'án kixin chaxín imá tinkáchónki sín tí jehe ch'án. Ntá nixjehe ch'án tí sinníhi ntáche ch'án kixin:

—Xjeenni, ó kjuixin kjuinhan tí jie chonta —mé xikaha ichro ch'án.

⁶ Na ntá iso tí sín maestro tjako tí ley tjejótjaxin sín ntiha na ntá jehó sín mé kjo sín asén sín kixin: ⁷ “¿Nkekuènté xikaha nixja tí ch'ín i ncheyóhe ch'án asén ch'án Dios? Kixin ninkexró xitjahya tsjatsiin ijie kixin jehó Dios mé chóna kjuachaxin tsjatsen ijie chojni”, mé xikaha ikjo sín asén sín. ⁸ Ntá ch'ín Jesús la ó nohe ch'án nkehe tjenkayáxin sín. Ntá ntáchro ch'án kixin:

—¿Nkekuènté kixin xikaha tjenkayáxinrá? ⁹ ¿Nkehe antsí má xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuinhan ch'án tí jie yamá ch'án, ó á antsí xrahya chróntátjan ch'án kixin chrók'uúinkatjen ch'án chrókjuenájin ch'án kaniee ch'án ntá sáchrókjuí ch'án? ¹⁰ Méxra jie tsjákoxian kixin tí Xjeen Dios K'óna Chojni mé ntihi chjasintajni chóna kjuachaxin tsjakjinhin ijie chojni —ichro ch'án.

Ntá ntáche ch'án tí ch'ín xitjahya tji kixin:

¹¹ —Jaha tétuanhan t'inkatjen, tjenájian kaniia na sátjia ntója —ichro ch'án.

¹² A ntá tí sinníhi na tuénxín k'uúinkatjen ch'án kjuak'exín toté ch'án na kjuenájin ch'án kaniee ch'án na kuámá ch'án k'uaxrxjén ch'án nchia sákjuí ch'án. Na ntá kaín tí sín síin a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntáchro sín kixin:

—K'uúikonhyéni tí nkehe í —ichro sín.

Ch'ín Jesús k'uúyehé ch'ín Leví

(Mt. 9.9-13; Lc. 5.27-32)

¹³ A ntá chr'éxin ch'ín Jesús mé sáxíkji ch'án inaa chrínta ntayaon. Ntá kaín xín chojni kóchjina sín tí tjen ch'án ntá kjuako ch'án. ¹⁴ Ntá k'uúátsínka ch'án k'uúikon ch'án tí ch'ín Leví xjeen ch'ín Alfeo tjetjaxin ch'án tjenchekjènkj ch'án. Ntá ch'ín Jesús mé k'uúyehé ch'án, ntáchro ch'án kixin: —Chr'éhé tí janhan —ichro ch'án.

Ntá ch'ín Leví mé tuénxín k'uúinkatjen ch'án chr'éhe ch'án tí ch'ín Jesús.

¹⁵ A ntá ch'ín Jesús kjuak'e ch'án ntóje tí ch'ín Leví, la ntá kjuanjón sín nkehe sine ch'án la ko kjaxin k'uúéjó nchónhya tí sín nchekjènkj la ko kjaxin í so chojni chóna jie. Mé kaín tí sín a mé tjejótjaxin sín tjejóneko tí ch'ín Jesús la ko tí sín k'uúájiko ch'án, kixin nchónhya chojni chr'éhe sín tí jehe ch'án. ¹⁶ Na ntá tí sín maestro tjako tí ley la ko tí sín fariseo k'uúikon sín kixin ch'ín Jesús tjejóneko kaín tí sín nchekjènkj la ko tí í so sín chóna jie, a ntá ntáche sín tí sín k'uúájiko ch'án kixin:

—¿Nkekuènté kixin tí maestro kuéntará neko ch'án la ko t'ikao ch'án tí sín nchekjènkj la ko tí í so sín chóna jie? —ichro sín.

¹⁷ Na ntá ch'ín Jesús kuínhin ch'án nkehe tí tjo sín a. Ntá nixjehe ch'án tí sín a ntáchro ch'án kixin:

—Tí sín níehya t'ichjánxienhya sín nkexro sich'e xroan. Náhí. Jehó tí sín níhi mé t'ichjánxinhin sín nkexro sich'ehe sín xroan. Janhan na k'uinkahya ntihi kixin chrók'uíyahá chojni jina tjejó sín. Náhí. K'uinka kixin ts'íyahá chojni chóna jie —ichro ch'án.

Tjanchankíhi sín tí ch'ín Jesús kixin á chrókjónehya sín tió tsonixjehe sín Dios

(Mt. 9.14-17; Lc. 5.33-39)

¹⁸ Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé kjónehya sín kuenté yaon kixin mé xikaha ts'áyéhe sín kjuaxróxin, ichro sín. A ntá kui iso chojni nixjehe sín tí ch'ín Jesús ntáchro sín kixin:

—¿Nkekuénté kixin tí sín k'uék'ajiko sín tí ch'ín Juan la ko tí sín fariseo la nehya sín jie, a ntá tí sín xrikoa la ine sín? —ichro sín.

¹⁹ Ntá kjuátehe ch'ín Jesús ntáchro ch'án kixin:

—¿Xá chrókjónehya tí chojni tsík'íyehé sín kóchjina ijnko kia tsotehe chojni tí naḡa tjejóko sín tí nkexro tsotehe? Tí naḡa tjen tí nkexro tsotehe la xitjahya kixin chrókjónehya sín. ²⁰ A ntá itsi ijnko yaon itsi chojni sátsjiko sín tí ch'ín tsikótehe, ntá tí yaon la chaxín sinehya sín.

²¹ Ninkexró chrókjuak'eniēhe ijnko ka ó ntaxin it'o ka nixin kixin ntá chrókjuixéhe tí ka nixin ntá antsí má chrók'uichje tí ka ntaxin a. ²² La ko kjaxin ninkexró chrókuiqia xran vino nixin ijnko tjuaxran ó ntaxin; kixin tí xran vino nixin la chrókótséche tí tjuaxran ntaxin ntá chrók'uitjayan tí xran la ko tí tjoa. Méxra tí xran vino nixin chrókuikia ijnko tjuaxran nixin —mé xikaha ichro ch'ín Jesús.

Tí sín k'uájiko ch'ín Jesús mé ik'uín sín iso neno noatrigó ijnko yaon t'ok'éhe sín

(Mt. 12.1-8; Lc. 6.1-5)

²³ Ijnko yaon t'ok'éhe sín na ch'ín Jesús la ko tí sín k'uájiko ch'án mé k'uátsínka sín ijnko nonte siín noatrigó. Na ntá tí sín k'uájiko ch'án kjuankixin sín ik'uín sín iso noatrigó. ²⁴ Na ntá iso tí sín fariseo kjuanchankíhi sín tí ch'ín Jesús a kixin:

—¿Nkekuénté kixin tí sín xrikoa tjejóch'e sín xra ije? Na mé kohya kjuachaxin tsonhen xra tí yaon t'ok'éheni —ichro sín.

²⁵ Ntá kjuátehe ch'án ntáchro ch'án kixin:

—¿Á kjuinchekuáxinhyará jahará tí xroon chrónka nkehe kjuich'e ch'ín David la ko tí sín k'uájiko ch'án tí k'uén sín kjinta? ²⁶ A ntá jehe ch'án k'uixenhen ch'án ntóe Dios tió kjuák'e nchat'á Abiatar k'uetoan, a ntá kjóne ch'án tí niotja tsikóyaon kjónté jehó tí sín nchat'á mé k'uéchóna kjuachaxin sine sín la kjaxin chjéhe ch'án tí sín k'uájiko ch'án* —ichro ch'ín Jesús.

²⁷ Kjaxin ntáchro ch'ín Jesús kixin:

—K'óna tí yaon ts'ok'éhe chojni kixin t'ichjánxin sín, la jehya kixin chrókjuikosáyehe tí yaon a. ²⁸ A ntá tí Xjeen Dios K'óna Chojni mé chóna kjuachaxin ts'etóan nkehe tsonhen tí yaon t'ok'éheni —ichro ch'án.

3

Ijnko chojni tsixámá tja
(Mt. 12.9-14; Lc. 6.6-11)

* 2:26 1 Samuel 21.1-6; Levítico 24.5-9

¹ Ntá ch'ín Jesús k'uixenhen ch'án ijnko njnko Israel inaá. Na mé ntiha tjen ijnko ch'ín tsixámá ijnko tja ch'án. ² Na ntá kóchjina iso chojni tsáyehe sín ch'ín Jesús ts'ikon sín kixin á sinchekitohe ch'án jína tí ch'ín tsixámá tja tí yaon t'ok'éhe sín kixin mé jína tsjanchia sín jie, ichro sín. ³ Ntá ch'ín Jesús mé ntáche ch'án tí ch'ín tsixámá tja a kixin:

—T'inkatjen, tjak'e jnkosiné ntihi —ichro ch'án.

⁴ **A** ntá kjuanchankíhi ch'ín Jesús tí sín síin ntiha kixin:

—¿Nkehe síin kjuachaxin tsonhen tí yaon t'ok'éheni? ¿Á chrókjuich'eni tí jína ní o á chrókjuich'eni tí jínahya? ¿Á chrókjuinchekitohe chojni jína ní o á chrók'óyánni chojni? —ichro ch'án.

A ntá jehe sín la táníkoá sín. ⁵ Na ntá ch'ín Jesús la nínkaon ch'án komá ch'án tí jehe sín la ko t'avá ch'án kixin tjinkakonhya sín tsikonóehē sín chojni. Na ntá k'uetuēnhen ch'án tí ch'ín a kixin:

—Tjéntoá tjá —ichro ch'án.

A ntá kjuéntoá ch'án tja ch'án la ó kuítóhe tja ch'án jína. ⁶ Na ntá tí sín fariseo a k'uaxrjexín sín njnko sákjuí sín k'uíto sín tí sín kuēnte ch'ín Herodes ntá kjuenkayáxinko kichó sín kixin nkexrí chrók'óyán sín tí ch'ín Jesús.

Nchónhya chojni síin chrínta ntayaon

⁷ Ntá ch'ín Jesús la ko tí sín k'uájiko ch'án sákjuí sín chrínta ntayaon a. **A** ntá nchónhya chojni kjuíjchréhe sín tsíkixín sín nó estado Galilea la ko kjaxin tsíkixín sín nó estado Judea ⁸ la ko chjasin Jerusalén la ko estado Idumea la ko ikjé sín kuixín sín nó tóhe ntario Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsíkinhin sín kixin nkexrí tí kjuaxroan jie kjuasin ch'ín Jesús ntá kuichréhe sín ch'án kixin chrók'uikon sín tíha kjaxin. ⁹ Ntá k'uetuēnhen ch'án tí sín k'uájiko ch'án a kixin ntahó chrókjuak'echonhen sín ijnko ntabárcō. **A** ntá tí imá chrók'uixitja sín ch'án ntá chrók'uixenhen ch'án tí ntabárcō, a ntá ntiha chrókjuak'e ch'án tsochrónka ch'án. ¹⁰ Kixin itsjé chojni tsíkjinchekitohe ch'án jína, na ntá kaín xín tí sín níhi k'uixitja sín ch'án kixin tjinkaon sín chrókuákóxin sín ch'án. ¹¹ Kjaxin tí sín chóna nchakuen tí jínahya na mé tió k'uikon sín tí ch'ín Jesús ntá k'uéjóxin sín toch'in sín nkayakon ch'án. Ntá k'óyako tí nchakuen tí jínahya a ntáchro kixin:

—Jaha mé tí Xjeen Dios.

¹² **A** ntá ch'ín Jesús ntáche ch'án tí nchakuen tí jínahya kixin kohya kjuachaxin tsochrónka kixin nkexro tí jehe ch'án.

Ch'ín Jesús kjueyá ch'án teyó sín ts'ajiko ch'án (Mt. 10.1-4; Lc. 6.12-16)

¹³ **A** ntá chr'éxin chr'in ch'ín Jesús ijnko jna, a ntá ntiha k'uíyehē ch'án tí sín tjinkaon ch'án chrók'uajiko ch'án ntá kóchjinehe sín ch'án. ¹⁴ Ntá kjueyá ch'án teyó tí sín ts'ajiko ch'án kixin ts'etuēnhen ch'án sín sátsji sín tsjako sín tí tan jína. ¹⁵ Kjuanjon ch'án kjuachaxin sinchekitohe sín chojni níhi jína la ko tsakitsje sín nchakuen tí jínahya chóna chojni. ¹⁶ **A** ntá tí sín i mé tí teyó sín tsíkjejá ch'án mé it'in sín xíkíhi: Simón na mé kjuínchek'in ch'án Pedro; ¹⁷ la ko Jacobo la ko tí kicho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjexín kixin Xjeen Sítjonta. ¹⁸ La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko í jnko Simón

tíhi mé kuènte tí sín cananista, ¹⁹ la ko Judas Iscariote, mé kjuínchekji tí ch'ín Jesús chr'éxin.

Ntáchro sín kixin ch'ín Jesús chóna kjuachaxin kuènte tí Jínahya
(Mt. 12.22-32; Lc. 11.14-23; 12.10)

Na ntá chr'éxin ch'ín Jesús la ko tí sín k'uájiko ch'án k'uixenhen sín ijnko nchia. ²⁰ A ntá inaá kójnkotsé nchónhya chojni, a ntá xitjahya sine sín. ²¹ Ntá kónohe tí sín naxa kjéhya ch'ín Jesús ntá ikui sín sátsjiko sín ch'án kixin ntáchro sín kixin ó tsík'ixikján ch'án.

²² Kjaxin tí sín tjako ti ley kuixin sín Jerusalén, ntáchro sín kixin:

—Tí ch'ín i chóna ch'án tí ch'ín Beelzebú, mé ch'ín Tsochren, mé tí nkexro t'etuènen kaín tí nchakuen tí jínahya ntá xikaha tjacha ch'án takitsje ch'án nchakuen tí jínahya a —ichro sín.

²³ Ntá ch'ín Jesús k'uíyehé ch'án tí sín ntá kjuíncheyóexin ch'án ntáchro ch'án kixin:

—¿Nkexrí kixin jnkokón ch'ín Tsochren chrókuakitsje asén? ²⁴ A ntá tí sín t'etóan ijnko nación tjanjonko kichó la tsjachahya ts'etóan. ²⁵ La ko kjaxin tí sín jnkokoá ntóe jnkokoáhya tjenkayáxin sín ntá xitjahya ts'ejóko kichó sín. ²⁶ A ntá tí chaxín ch'ín Tsochren jnkokónhya tjenkayáxin tjanjonko kichó la ntá ts'itjayan kjuachaxin kuènte.

²⁷ Ninkexró tsjacha ts'ixenhen ntóe ijnko chojni jjehe kixin ts'axrjehe tí nkehe chóna ch'án. Náhí. T'ichjánxin saxín sinchenteto ch'án tí ch'ín jjehe kixin jína tseéhe ch'án nkehe chóna tí ch'ín a.

²⁸ Ijnko nkehe chaxín tsotjonkará kixin tió tsoxraxinkaon ijnko chojni tí jie chóna la ko tsochronóehé Dios la ntá tsjakjinhin ch'án kaín tí jie la ko kaín tí nkehe jínahya tsíntáchro sín. ²⁹ A ntá tí nkexro ts'ántaxinhin tí Nchakuen Dios na mé xitjahya tsjin tí jie na mé jnkochrín tsochóna sín tí jie a —ichro ch'án.

³⁰ Mé xikaha ichro ch'án kixin tí sín a tsíntáchro sín kixin ijnko nchakuen tí jínahya mé chóna tí jehe ch'án.

Tí iné la ko kichó ch'ín Jesús
(Mt. 12.46-50; Lc. 8.19-21)

³¹ A ntá kui iné ch'ín Jesús la ko kichó ch'án tjejó sín ntója ó na ntá k'uetuènen sín ijnko chojni tsjik'íyehé ch'án. ³² A ntá tí sín tjejótxaxin tí tjen ch'ín Jesús ntiha chénka sín ch'án kixin:

—Íná la ko kichuá tjejó sín ntója xritjeyá sín ti jaha. —ichro sín.

³³ Ntá ntáchro ch'án kixin:

—¿Xá nkexro tí nana la ko nkexro tí kichiná? —ichro ch'án.

³⁴ Ntá komá ch'án tí chojni tjejótxaxin tí tjen ch'án ntá ntáchro ch'án kixin:

—Jahará mé nana la ko kichiná. ³⁵ Kaín tí sín nchexiteyá tí nkehe tjinkaon Dios na mé tí sín a mé kichiná la ko nana —ichro ch'án.

4

Kjuíncheyóexin ch'án éxi ijnko chojni t'enka nonte
(Mt. 13.1-9; Lc. 8.4-8)

¹ Ch'ín Jesús mé kjuankixin ch'án kjuakoxin ch'án chrínta ntayaon inaá. A ntá ntiha mé kójnkotsé nchónhya chojni tí tjen ch'án. Ntá ijnko ntabarco tjenkátaon ntá k'ujit'ótjen ch'án, a ntá ntaha kjuák'e ch'án kjuakoxin ch'án. Ntá kaín tí sín tsíkójkotsé mé kuítóhe sín chrínta ntayaon k'uéjókinhin sín.

² Nchónhya nkehe kjuako ch'án kjuíncheyóexin ch'án. Ntá ntáchro ch'án kixin:

³ —Tinhínrá tíhi: Ijnko chojni sákjuík'enka nontee. ⁴ Mé xikaha sákjuík'enka ch'án iso tí noatrigó a. Ntá iso noa la tsík'ánótjen ntia ntá kui koxroxé k'uínka va tí noa. ⁵ A ntá iso noa na mé k'uitji chrík'á xro tí kohya itsjé nche ntá tjoka k'uayan kixin tjínhya chóna nche. ⁶ A ntá tió kjuiton yaon la ntá tí ka la chján; la ko chónahya nuèe a ntá xamá. ⁷ A ntá í so noa kjuítsínkak'á tí siín kach'j la ntá tí kach'j k'uánkí la ntá tí noa í k'ónahya kixin síja tí kach'j. ⁸ A ntá iso tí noa k'uitji nche jína la ntá k'uayan la ko k'uánkí nteto la ko k'óna jína. A ntá injko noa la mé k'óna treinta neno noa. A ntá í jnko la mé k'óna sesenta neno noa, a ntá í jnko la k'óna injko ciento neno noa —ichro ch'án.

⁹ Ntá ntáchro ch'án kixin:

—Tí nkexro tjínkaon chrókuinhin la chrókuinhin —ichro ch'án.

Ch'in Jesús chronkaxín nkexrí t'axrjexín tí nkehe ntáchro ch'án
(Mt. 13.10-17; Lc. 8.9-10)

¹⁰ A ntá chr'éxin, tió kuítóhe ch'in Jesús jehó ch'án, a ntá tí sín tjejó chjinaxón tí tjen ch'án la ko tí teyó sín k'uájiko ch'án mé kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án. ¹¹ Ntá ntáchro ch'án kixin:

—A ntá jahará la Dios mé sintanohará tí nkehe tienxínhya chojni kuènte tí kjuachaxin kuènte Dios, a ntá tí sín titekakonhya la ó kjuintayóaxuán kaín nkehe kuínhin sín. ¹² Kixin kjónté ts'ikon sín la éxi k'uíkonhya sín, la ko kjónté tsinhin sín la tsienxínhya sín kixin ntá chrók'uitoxínhya tí tjenkayáxin sín a la ko chrókjuínhya tí ijíé sín* —ichro ch'án.

Ch'in Jesús chrónkaxín nkexrí t'axrjexín tí nkexro sákjuík'enka
(Mt. 13.18-23; Lc. 8.11-15)

¹³ Ntá ntáche ch'án sín kixin:

—¿Á kiénxinhyará jahará nkexrí t'axrjexín tí nkehe kjuintayóaxian ní? ¿A ntá nkexrí chrókiénxinrá tí í so nkehe naxa sintayóaxian? ¹⁴ A ntá tí nkexro sákjuík'enka tí tje a mé yóhe injko nkexro sákjuík'á itén Dios. ¹⁵ A ntá iso chojni la éxi tí tje kjuítsínka ntia; kixin kuínhin sín itén Dios, ntá chr'éxin ó kui ch'in Tsochren kjuínchek'itjáyán ch'án tí tan jína kuínhin sín. ¹⁶ A ntá í so chojni la éxi yóhe tí tje kjuítsínkak'á xro: mé kuínhin sín itén Dios ntá tjoka kóxrjínhin sín kuítekaon sín. ¹⁷ Kjánchó njínkahya chóna nuèe, a ntá séhya kuítóhe; a ntá itsi tí kjuaxróxinhya tsonhen sín, o tsochónkíhi sín chojni kixin tí itén Dios kuítekaon sín ntá tsítóhe sín tí tinkáchónki sín Dios. ¹⁸ A ntá í so chojni la éxi yóhe tí tje k'uínka chrík'á kach'j na mé kuínhin sín itén Dios ¹⁹ kjánchó tóxakonhen sín tí nkehe siín chjasintajni la ko tí nkehe tjete tóxrjínhin sín la ko tjínkaon sín tsochóna sín kaín xín nkehe. Kaín tíha mé t'inkákonhen tí itén Dios kuínhin sín a, la tí chojni xikaha la xitjahya sich'ehe sín xra Dios. ²⁰ A ntá í so chojni kuínhin tí itén Dios na kuínkáchónki sín la ntá xikaha jína ch'ehe sín Dios xra. La iso sín la éxi yóhe tí tje k'uínka tí nonte jína k'óna treinta neno noa la ko iso sín la yóhe tí tje k'óna sesenta neno noa la ko iso sín la yóhe tí tje k'óna ciento neno noa —mé xikaha ichro ch'in Jesús.

Ch'in Jesús mé kjuíncheyóexin éxi injko xrohi tjeche
(Lc. 8.16-18)

* 4:12 Isaiás 6.9-10

21 Kǵaxin ntáchro ch'ín Jesús kixin:

—ǵÁ chrókuiķaonni xrohi tjeche chrókjuak'emá chrínkí ntacajón o chrínkí cama? Kǵá náhí. Tí xrohi la noi chrókjuak'e ts'inkaséyanxín. 22 Mé xǵikaha kaín tí nkehe tjejóma jie tsonoxín chr'éxín la ko kaín tí nkehe ninkexró noehya jie la tsonoxín chr'éxín. 23 A ntá tí nkexro tjinkaon chrókuihin la chrókuihin tíhi —ichro ch'án.

24 Kǵaxin ntáchro ch'án kixin:

—Chrókjuenkayáxinrá jína tí nkehe tjejótinhinrá. Tí nkehe tjáchoayára jahará la Dios la kǵaxin tíha tsjáchoayá ch'án tí nkehe ts'ayéhérá jahará, a ntá antsí má ts'ayéhérá tí jahará tjejontinhinrá. 25 A ntá tí nkexro chóna nkehe la antsí má ts'áyéhe sín. A ntá tí nkexro chónahya la kjónté tí ntsí chóna la ts'axrjehe —ichro ch'án.

Ch'ín Jesús mé kjuíncheyóexin ch'án éxi ijnko tje ts'ayan ts'ánki

26 Kǵaxin ntáchro ch'ín Jesús kixin:

—Tí kjuachaxin t'etōan Dios tóyóhe ijnko chojni sátsjik'enķa nonte. 27 Ntá sáķjuík'ajua ch'án tí tie la ko k'uàya ch'án tí nchítjen. A ntá xǵikahó k'uátsínka iso yaon la ko iso tie, a ntá tí tje la k'uayan la k'uánki. A ntá tí nkexro k'uēnķa la noehya ch'án nkexrí kónhen tíha. 28 A ntá tí nche mé kjuích'e xra jehó. Senó k'uayan tí chaon tí ka, a ntá kjuíntaa, a ntá chr'éxín icha tí noa tsjinjin; 29 a ntá tió tsícha tí noa, a ntá tsakjinjin sín tí noa kixin ó kjuixraká tí yaon tsojtá sín.

Ch'ín Jesús kjuíncheyóexin ch'án éxi ijnko tje it'in mostaza

(Mt. 13.31-32; Lc. 13.18-19)

30 Kǵaxin ntáchro ch'ín Jesús kixin:

—ǵNkehe chrókóyóhe tí kjuachaxin t'etōan Dios, nkehe chrókóyóexin tíha? 31 Mé éxi yóhe tí tje it'in mostaza tsík'inka nonte. Tíha mé ijnko tje imá ntsí, a ntá tí í so tje síin chjasintajni la kénhyó. 32 A ntá jnkonaá tsík'inka tí tje la tsík'ayan tsík'ánki imá ihyé, a ntá tí í so nta la kánhyó. A ntá kǵaxin tí chaon tí nta tsík'ánki imá ihyé, a ntá kjónté koxroxé xritjaka la jína ts'ok'éhe va chrínkí tí ts'van chaon tí nta.

Nkehe tí xra kjuích'e tí nkehe kjuíncheyóexin ch'ín Jesús

(Mt. 13.34-35)

33 Mé xǵikaha ch'ín Jesús kjuakóhe ch'án tí jehe sín, kjuíncheyóexin ch'án nchónhya nkehe éxi tí nkehe a kixin chrókjuacha chrókiēnxín sín tíha. 34 Kaínxín nkehe kjuakóhe ch'án tí jehe sín la kjuíncheyóexin ch'án. A ntá jehó tí sín k'uájiko ch'án la chrónka ch'án nkexrí t'axrjexín kaín tí nkehe kjuíncheyóexin ch'án.

Ch'ín Jesús k'uetuēnhen ch'án tí xrīntō la ko tí ntā síchrica kixin ts'ixita

(Mt. 8.23-27; Lc. 8.22-25)

35 A ntá tí yaon a la ntá ó kóntó ntá ntáche ch'ín Jesús tí sín k'uájiko ch'án a kixin:

—Sátsjini tóhe tí ntayaon —ichro ch'án.

36 Ntá kuítóhe sín kaín tí chojni a ntá sáķjuíko sín tí ch'ín Jesús naxa tjenkáya ch'án tí ntabárco la ko kǵaxin í so ntabárco sáķjuí koí. 37 Ntá xrinahya tǵian chjéhe xrīntō la ntá síchrica ntā t'ixēnhen tí ntabárco, ó mero tsokaón ntā tí ntabárco. 38 A ntá ch'ín Jesús na mé tjejua ch'án tí tjar'i nóton tí tjejó sín nkaxēnhen tí ntabárco a tjeķjón ch'án ijnko ka. Na ntá kjuínchekjāya sín ch'án ntáchro sín kixin:

—¡Maestro! ¿Á ntosán kixin ts'itjáyanni, ts'aniánkíni ntá ní? —ichro sín.

³⁹ A ntá ch'ín Jesús k'uàya ch'án, k'uētuenhen ch'án tí xr̄nto la ko tí ntá kixin ts'ixita, ntáchro ch'án kixin:

—Taniá, tjak'eta —ichro ch'án.

Na ntá tí xr̄nto la ko tí ntá k'uíxratá. ⁴⁰ Ntá kjuanchankíhi ch'án tí sín k'uájiko ch'án ntáchro ch'án kixin:

—¿Nkekuènté kixin imá chrakonrá? ¿Á naxa tinkachónkihyará Dios? —ichro ch'án.

⁴¹ Ntá imá chrakon sín ntá kjo sín kichó sín kixin:

—¿Xá nkexro tíhi? Kjonté xr̄nto la ko ntayaon la mé kjuínchexiteyéhe ch'án —ichro sín.

5

Ijnko chojni chóntha nchónhya nchakuen tí jínahya nonte Gadara

(Mt. 8.28-34; Lc. 8.26-39)

¹ Ntá tió k'uátòye sín tí ntayaon, a ntá kjuíji sín tí nonte Gadara. ² Ntá k'uínkajinxin ch'ín Jesús tí ntabarco a. Ntá xrínahya xeta ch'án injko ch'ín kuixin nó tsíkji xravá chojni mé chóntha ch'án injko nchakuen tí jínahya. ³ Tí ch'ín a mé kjuák'e ch'án tí tsíkji xravá chojni. Ninkexró tjachahya sinchenteto ch'án kjonté cadena tjachahya. ⁴ Nchónhya veces kjuínchentetoxín sín ch'án cadena toté ch'án la ko itja ch'án, la kjonté kóchr̄ton ch'án kjuínchekuen ch'án tí cadena. Kohya ninkexro tjacha ts'etuenhen tí jehe ch'án. ⁵ K'uék'aji ch'án nchakotjin la ko tie t'iyato ch'án nó jna la ko tí tsíkji xravá chojni la ko chjéhe asén ch'án xro. ⁶ Na ntá k'uíkon ch'án kixin kui ch'ín Jesús kjonté ikjín la kuinká ch'án kjuíji ch'án kjuák'exín toch'in ch'án nkayakon ch'ín Jesús a ⁷ k'óyako ch'án ntáchro ch'án kixin:

—¿Nkekuènté tjiaté jaha tí jeheni, jaha Jesús Xjeen Dios tjen nkaya nkajni? Dios nchenoheni kixin xrjanóaha nchekjasótehyani —ichro ch'án.

⁸ Mé xikaha ichro ch'án kixin tsintáchro ch'ín Jesús kixin:

—Jaha nchakuen tí jínahya, t̄t̄ohé tí ch'ín i —ichro ch'án.

⁹ Ntá ch'ín Jesús mé kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni kixin nchónhyani —ichro ch'án.

¹⁰ Ntá imá chrónòehe ch'án tí ch'ín Jesús kixin tsochr'ánhya ch'án ókjé tí nchakuen tí jínahya. ¹¹ Na ntá siín nchónhya cochíno xrine va chjinaxón tí jna ntiha. ¹² A ntá chrónògá tí nchakuen tí jínahya ntáchro kixin:

—Tétuenhénni sátsjini tí siín tí cochíno, t̄t̄ohé ts'ixenhenni tí jehe va —ichro tí nchakuen tí jínahya a.

¹³ Ntá ch'ín Jesús mé kjuanjon ch'án kjuachaxin. Ntá kaín xín tí nchakuen tí jínahya a mé k'uaxrjexín tí ch'ín a sákjuí kjuik'ixenhen tí cochíno a. Na ntá kaín xín tí ko a mé chjina iyó m̄il va siín va xrine va. Na mé kaín xín va k'uínkajinxin va ntiha kjuítsínkayá va tsaka ntá kjuítsínkankí va ntayaon ntá kjuínhin va ntá.

¹⁴ Na ntá tí chojni t'ayakonhen tí cochíno a na mé kuinká sín kixin chrakon sín na ntá sákjuí chrónka sín chjasén sín la ko nontee chojni. Na ntá itsjé chojni mé kuitsjehe sín nkehe tí tsíkónhen ntiha. ¹⁵ Ntá kjuíji sín tí tjen ch'ín Jesús a na k'uíkon sín kixin itjen tí ch'ín k'uéchóntha tí nchónhya nchakuen tí jínahya senó la ó jína tjen ch'án tjetjaxin ch'án tjenkáya ch'án

iké ch'án, na ntá chrakon sín. ¹⁶ A ntá tí sín tsík'íkon mé chrónka sín nkexrí k'uék'aji tí ch'ín k'uéchóna tí nchakuen tí jínahya la ko nkexrí kónhen tí cochíno a. ¹⁷ Ntá kjuankíxin sín chrónóehé sín tí ch'ín Jesús a kixin sáchrókjuixin ch'án ntíha.

¹⁸ A ntá ó ts'it'ótjen ch'ín Jesús tí ntabárcɔ na ntá tí ch'ín k'uéchóna nchakuen tí jínahya na mé chrónòa ch'án kixin kjaxin ch'án sáchrókjuiko sín ch'án, ichro ch'án. ¹⁹ Ntá ch'ín Jesús kjuanjónhya ch'án kjuachaxin sátsjiko sín ch'án. Náhí. K'uetɔan ch'án kixin:

—Sátjia ntɔa tjíchenka tí sín naxa kjéhya tí jaha kixin nkexrí kaín tí kjuaxroan jíe kjuasin Dios kjuínchekitɔha jína kuíkonóaha ch'án tí jaha —ichro ch'án.

²⁰ Na ntá tí ch'ín a sákjuí ch'án kjuankíxin chrónka ch'án kaín tí chjasin kuènte Decápolis kixin nkexrí kaín tí nkehe kjuích'e ch'ín Jesús kjuínchekitɔhe ch'án jína. A ntá kaín tí sín kuínhin na chrakon sín.

Tí xjeen ch'ín Jairo la ko tí tjan kuákóxín iké ch'ín Jesús

(Mt. 9.18-26; Lc. 8.40-56)

²¹ Ntá tíó xíjankao ch'ín Jesús tí ntabárcɔ tóhe tí ntayaon inaá ntá kóchjina nchónhya chojni ntá ntahó chrínta ntá kuítɔhe ch'án inaá. ²² Na ntá íkui ijnko ch'ín t'etɔan kuènte njnko mé it'ín ch'án Jairo. A ntá tíó k'uíkon ch'án kixin itjen ch'ín Jesús ntá kjuák'exín toch'ín ch'án chrínkí tɔté ch'ín Jesús a ²³ imá chrónóehé ch'án kixin:

—Tí ijnko xjanna chjin ó tjet'en xjan. Xrjanóaha chrókjuini chrókjuak'éjta itjá chrítaón kja xjan ntá chrókuitɔhe xjan jína —ichro ch'án.

²⁴ Ntá ch'ín Jesús sákjuíko tí ch'ín a. Na nchónhya chojni chréhe sín tinkák'ixitja sín ch'án inaá. ²⁵ A ntá kjaxin tjenkákjan sín ijnko chojni chjin níhi tjan, ó chóna teyó nánó sítji tjan jni. ²⁶ Imá tjote tjan kixin nchónhya chojni kjuanjón xroan kónhen tjan na ó kjuixin kjuèhe tjan kaín xín nkehe k'uéchóna tjan. Ó jehí títɔehya tjan jína la íchá ntsí tinkákótao tjan. ²⁷ A ntá tíó kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxín tjan tí ké ch'án, ²⁸ ntáchro tjan kixin kjónté iké ch'án ó chrókuákóxín tjan na ó tíhó mé chrókuitɔhe tjan jína, ichro tjan. ²⁹ Ntá tuénxín tí jni na mé ó kjuixié tjan la ko kónohe tjan kixin ó kjuixin kuítɔhe tjan jína tí chin k'uéchóna tjan. ³⁰ Ntá ch'ín Jesús na ó kónohe ch'án kixin kjuachaxién ch'án mé kuítɔexín ijnko chojni jína ntá kuinkátjía ch'án kjuanchankíhi ch'án tí chojni síin a kixin:

—¿Nkexro kuákóxín tí kaná? —ichro ch'án.

³¹ Ntá kjuátɔhe tí sín k'uajiko ch'án a ntáchro sín kixin:

—Ó noha kixin nchónhya chojni sítja, ¿ntá nkekuènté kixin naxa tjan-chankía kixin nkexro tí kuákóxian? —ichro sín.

³² Ntá kuinkátjía ch'án tsjehe ch'án nkuíxín kixin tsonohe ch'án nkexro tí kuákóxín tí ké ch'án. ³³ Ntá tí tjan a na mé chrakon tjan síxranka tjan ó nohe tjan kixin ó kuítɔhe tjan jína ntá xrakoa tjan kjuák'exín toch'ín tjan nkayakon ch'ín Jesús ntá ntoá chrónka tjan kaín nkehe kónhen tjan. ³⁴ Ntá ntáchro ch'ín Jesús kixin:

—Xjeenni, kaín asán kuinkachónkia tí janhan ntá kuítɔha jína. Ijie la kjuaxróxin sátsjia ntɔa la ó kuítɔha jína a —ichro ch'án.

³⁵ Na ntá naxa tjenixja ch'án ntá ó kui chojni kuíxín sín ntɔe tí ch'ín t'etɔan tí njnko. Ntá chénka sín ch'án kixin:

—Xjaan na ó kjuixin k'uén. ¿Nkekuènté naxa chjehé xra tí Maestro a? —ichro sín.

³⁶Ntá ch'ín Jesús na ántosén ch'án tí chrónka sín ntá nixjehé ch'án tí ch'ín t'etōan tí n̄nko ntáchro ch'án kixin:

—Chrakonhya jaha, jehó tsinkachónke tí janhan —ichro ch'án.

³⁷Ntá kjuanjonyha ch'án kjuachaxin kixin sátsji kaín sín, na ó jehó ch'ín Pedro la ko ch'ín Jacobo la ko ch'ín Juan mé kichó ch'ín Jacobo, sátsji sín.

³⁸Na ntá tió kjuíji sín tí ntōe tí ch'ín t'etōan tí n̄nko na k'uíkon sín kixin imá sítjité sín tsjankàma sín tí xjan a. ³⁹Ntá k'uixenhen ch'ín Jesús nchia kjuanchankí ch'án kixin:

—¿Nkekuènté ánta tjasitérá tsjankàmará tí xjan a? Tí xjan na tsík'lenhya xjan na tjeua xjan —ichro ch'án.

⁴⁰A ntá kjuanoá sín ch'án. Ntá k'uetōan ch'án kixin kaín sín sátsji sín ntója. Ntá kjuíko ch'án tí it'é la ko tí iné xjan la ko tí iy'á sín xriko ch'án ntá k'uixenko sín ch'án tí tjen tí xjan a. ⁴¹Itse ch'án tja xjan ntá nkivee xjan mé nixjexin ch'án ntáchro ch'án kixin:

—Talita, cumi —mé t'axrxjén kixin: Lonchí, tétuanhan kixin t'áya.

⁴²A ntá tí xjan a ó chóna tjan teyó nánó na mé tuénxín k'uínkatjen tjan ó jina tji tjan. Ntá kaín tí chojni siín ntiha la chrakon sín k'uíkon sín xikaha.

⁴³Ntá fuerte k'uetōan ch'ín Jesús kixin chróchenkahya sín ninkexró. La kjaxin k'uetōan ch'án kixin tsjanjon sín nkehe sine tjan.

6

Ch'ín Jesús kjuák'e ch'án chjasin Nazaret
(Mt. 13.53-58; Lc. 4.16-30)

¹A ntá chr'éxin k'uaxrxjén ch'án chjasin ntiha. Ntá jehe ch'án la ko tí sín k'uájiko ch'án na mé sákjuí sín Nazaret tí chjasin tsík'ánkixin ch'án.

²Na ntá tió kui tí yaon t'ok'éhe sín ntá kjuankixin ch'án kjuakoxin ch'án tí n̄nko ntiha. Na ntá nchónhya chojni kuínhin sín ntá chrakon sín ntáchro sín kixin:

—¿Nketí tsíxrakehé tí ch'ín i kaín tíhi? ¿Nketí kuxin tí kjuaxrexinkaon chóna ch'án la ko tí kjuaxroan tjasin ch'án? ³¿Á jehya ch'án tí ch'ín ch'éna nta na mé xjeen tí tjan María, la tí kichó ch'án a na mé ch'ín Jacobo, la ch'ín José, la ch'ín Judas, la ch'ín Simón? ¿A kjaxinhya ntihi tjejókoni tí kichó ch'án chjin? —ichro sín.

Méxra tahya sín kuentá nkerí ch'e ch'án. ⁴Na ntá ntáchro ch'ín Jesús kixin:

—Kaín chojni tjikosáyehe sín ijnko nkexro chrónka iten Dios. Ntá tí chjasén ch'án la ko kaín tí sín kjéhya ch'án la ko tí sín ntōe ch'án na mé tjikosáyehya sín ch'án —ichro ch'án.

⁵Méxra ninkehó kjuaxroan xitjahya kjuasin ch'án ntiha, la jehó kjuak'etja tja ch'án chrítaón ikja iso chojni níhi kjuínchekitōhe ch'án sín jina. ⁶Ntá chrakon ch'án kixin xikaha kuítékakuenhya sín ch'án. Na ntá k'uáji ch'án tí chjasin ntsínsi chjinaxón ntiha kjuako ch'án.

Ch'ín Jesús mé ichr'án tí teyó sín kixin sátsji sín tsjikjako sín itén Dios
(Mt. 10.5-15; Lc. 9.1-6)

⁷Na ntá k'uíyehé ch'ín Jesús tí teyó sín k'uajiko ch'án a. Ntá kjuankixin k'uetuénhen ch'án kixin yóyó sín sátsji sín la ko kjaxin kjuanjon ch'án kjuachaxin kixin tsakitsje sín nchakuen tí jinhya chóna chojni. ⁸La ko k'uetōan ch'án kixin ninkehó tsjikohya sín kuènte ntja. Jehó tí nta tjixin

sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon. ⁹ Na ko tokate ó tsjanka sín la ko tsjiko sín jehó tí ka tjejóya sín ó. ¹⁰ Kjaxin ntáchro ch'án kixin:

—A ntá tí ts'ixenhénrá ijnko nchia a ntá ntaha tsjanjon sín kjuachaxin na ntahó chókuitohará. A ntá tsjixinjian tí xra ntá sátsjixinrá ntiha. ¹¹ Na ntá tí tsjasánrá ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhín sín tí nkehe chrókjuákohérá sín na ntá t'axrxéxinrá tí chjasin a ntá ts'oxènjínrá tí nche chóna totará kixin xikaha tsjákoxinrá kixin ntoáhya kjuich'e tí jehe sín. A ntá chaxín ntáxrijan kixin tí yaon tsitoxén ijie chojni ntá antsí má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

¹² Na ntá sákjuí sín kuinkákjakohe sín tí chojni a kixin mé chrókjuítóxinhin sín ntje sín. ¹³ La ko kjaxin kuakitsje sín itsjé tí nchakuen tí jínahya chóna chojni. Na ko aceite mé kuikite sín itsjé chojni níhi a la ntá kuítóhe sín jina.

Ik'uén ch'ín Juan Bautista

(Mt. 14.1-12; Lc. 9.7-9)

¹⁴ Na ntá tí ch'ín rey Herodes mé kuínhin ch'án nkehe tí kjuaxroan kjuasin ch'ín Jesús. Na ntáchro ch'ín Herodes kixin:

—Kjá tí ch'ín Juan Bautista mé ó tsíxechón ch'án inaá kixin xikaha tí kjuachaxin chóna tí ch'ín a —ichro ch'ín Herodes a.

¹⁵ A ntá iso sín ntáchro sín kixin:

—Kjá ch'ín Elías k'uéchrónka itén Dios —ichro sín.

A ntá í so sín mé ntáchro sín kixin:

—Kjá ijnko nkexro yóhe tí sín k'uékjako itén Dios ósé —ichro sín.

¹⁶ Ntá kuínhin ch'ín Herodes tíha ntá ntáchro ch'án kixin:

—Kjá ó jehe tí ch'ín Juan tí kuétoan chrínjin kja ch'án, mé ó tsíxechón ch'án jie —ichro ch'án.

¹⁷ Méxra tí ch'ín Herodes mé tsík'etōan ch'án kixin tsontetoxín tí ch'ín Juan cadena tsjak'echjina ch'án kixin xikaha tsíkjanhia tí tjan Herodías. A ntá tí tjan Herodías k'uéchjién tí ch'ín Felipe. A ntá tí savé ch'án Herodes mé kuákja tí tjan a kixin ts'óna ichjién ch'án. ¹⁸ A ntá tí ch'ín Juan tsintáche ch'án tí ch'ín Herodes kixin:

—Kohya kjuachaxin tsochonta tí ichjién tí kichuá —ichro ch'án.

¹⁹ Mé xikaha tí tjan Herodías mé imá kónínkakonhen tjan tí ch'ín Juan ntá chrók'óyán tjan ch'án, kjánchó xitjahya ²⁰ kixin tí ch'ín Herodes mé chrakonhen ch'án tí ch'ín Juan kixin ó nohe ch'án kixin tí ch'ín a mé ijnko nkexro jina la ko tjóá asén la méxra kuítóehya ch'án kixin jehe tjan chrók'óyán tjan ch'án. A ntá kénhyó kienxín ch'án la kjónté kóxrjínhin ch'án tí nkehe kuínhin ch'án kjuako ch'ín Juan. ²¹ A ntá tí tjan Herodías mé kjuacha tjan tí yaon kia tsíkjitoxinhin nánó tí ch'ín Herodes a kixin tsík'íyehé ch'án tí síxreé la ko tí sín k'uētuenhen tí sín soldado la ko tí sín t'etōan estado Galilea kixin itsi sín ntōe ch'án kixin siín kia. ²² A ntá tí xjeen tí tjan Herodías mé k'uixenhen tí tjejó sín, a ntá ité tjan, la kóxrjínhin ch'ín Herodes la ko kaín tí sín tjejóneko ch'án ntiha. Na ntá tí ch'ín rey ntáche ch'án tí tjan tjarisoá a kixin:

—Tjanhana tí nkehe tjinkávan na tsotjahá —ichro ch'án.

²³ Ntá kjuínchenohe ch'án Dios ntáchro ch'án kixin tsjanjon ch'án tí nkehe tsjanhia tjan kjónté jnkosiné tí chjasin t'etōan ch'án. ²⁴ Ntá jehe tjan na

mé kuínhin tjan ntá sákjuí tjan chénka tjan ìné tjan kixin tsintáchro ch'ín Herodes kixin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kixin:

—¿Nkehe tí chrókjuanchiani? —ichro tjan.

Ntá tí ìné tjan mé ntáchro kixin:

—Ijie la itjia tjanhia tí kja tí ch'ín Juan Bautista, ichrúa —ichro tjan.

²⁵ **A** ntá tí tjarisoá ikjan tjan tjoka k'uixenhen tjan tí tjen tí ch'ín rey, ntá ntáchro tjan kixin:

—**A** ntá ijie tjinkaonni ijnko plato tsjak'enkáya ikja ch'ín Juan Bautista tsochjehéni —ichro tjan.

²⁶ Na ntá tí ch'ín rey la mé imá k'uává ch'án kixin xikaha kjuanchia tjan kjánchó tsikjinchenohe ch'án Dios la ko tsikinhin kaín tí sín tsík'íyehé ch'án, la ntá xitjahya tsontáchro ch'án “Náhi” tí nkehe kjuanchia tjan. ²⁷ Na ntá tuénxín k'uëtuénhen ch'án ijnko ch'ín soldado kixin tsjikáo ch'án tí kja ch'ín Juan a. ²⁸ Ntá tí ch'ín soldado mé sákjuí ntöechiso, ntá kóchrínjin ch'án ikja tí ch'ín Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuíkénhen tjan ìné tjan.

²⁹ Na ntá kuínhin kaín tí sín k'uék'ajiko ch'ín Juan kixin xikaha tsikónhen. Na ntá sákjuíkakja sín tí cuérpöe ch'án ntá kjuikáo sín ntá sákjuíkjavá sín.

Ch'ín Jesús mé kjuanjon nkehe kjóne in'ó mil chojni
(Mt. 14.13-21; Lc. 9.10-17; Jn. 6.1-14)

³⁰ **A** ntá chr'éxin tí sín k'uájiko ch'ín Jesús a na mé ó kjan sín tí tjen ch'án inaá, chrónka sín nkexrí tí xra kjuích'e sín na ko nkexrí kjuako sín. ³¹ **A** ntá ntáchro ch'ín Jesús kixin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xikaha ntáchro ch'án kixin sásitji la ko síti nchónhya chojni na ntá xrankahya ts'ejó sín sine sín. ³² Na ntá ch'ín Jesús la ko tí sín k'uájiko ch'án jehó sín k'uít'ótjen sín ijnko ntabárcö sákjuí sín ijnko nonte jehó tjen. ³³ Na ntá itsje chojni k'uikon sín kixin sákjuí sín la ko kjuátsoan sín kixin ch'ín Jesús. Ntá xrákuaxín sín chjasén sín kuinká sín na ntá senó kjuíji sín tí chrínta ntayaon tí tsjiji ch'ín Jesús. ³⁴ Ntá k'uínkajínxín ch'án tí ntabárcö, a ntá k'uikon ch'án kixin nchónhya chojni síin ntiha ntá kuikonóhē ch'án tí jehe sín na mé éxí yóhē kolélo tjejó sín chóntahya va nkexro ts'ayakonhen va. Ntá kjuankíxín ch'án kjuakohē ch'án sín nchónhya nkehe a. ³⁵ Na ntá ó kóntó na ntá tí sín k'uájiko ch'ín Jesús a mé kóchjina sín tí tjen ch'án ntáchro sín kixin:

—Ntá ó kóntó la kohya ninkexró tjejó ntihi ³⁶ na ntá jaha chrókuítöhé sín kixin sátsji sín tí chjasín chjinaxón a tsjik'ena sín nkehe kixin chóntahya sín nkehe sine sín —ichro sín.

³⁷ **A** ntá ch'ín Jesús kjuátehe ch'án ntáchro ch'án kixin:

—Chjehé sín nkehe sine sín —ichro ch'án.

Ntá kjuátehe sín ntáchro sín kixin:

—¿Á tsjik'enani iyó ciento denario niotja tsochjeheni sin sine sín ní? —ichro sín.

³⁸ Ntá ch'ín Jesús mé kjuanchankíhi ch'án sín kixin:

—¿Nkekjaín niotja chontará? Sátjitsjehérá —ichro ch'án.

Ntá sákjuítsjehe sín na ntá chrónka sín kixin:

—In'ó niotja la ko yaá koche mé síin —ichro sín.

³⁹ Na ntá k'uet̩oan ch'án kixin kaín xín sín chrók'uíxítjaxín sín tí chrítaón tí ka yoa a. ⁴⁰ Na ntá xíkaha kójnkojié sín ciento sín la ko cincuenta sín k'uíxítjaxín sín. ⁴¹ Na ntá ch'ín Jesús kuákja ch'án tí in'ó niot̩ja na ko tí yaá koche ntá konta ch'án nkajní ntá kjuanchia ch'án kjuasáyé Dios. Na ntá kóchrít'ò ch'án tot'ò tí niot̩ja a ntá chjéhe ch'án tí sín k'uájiko ch'án kixin ts'óxikayehé sín sine tí sín siín a la ko kjaxin kóchrít'ò ch'án tí yaá koche ntá k'óxikayehé sín kixin sine sín kaín sín. ⁴² Ntá kaín xín sín kjóne sín kókjehe sín. ⁴³ A ntá kjuixin kjóne sín ntá tí sín k'uájiko ch'ín Jesús na mé kjuínchekaón sín teyó ntaxra tot'ò tí niot̩ja la ko tí koche tsíxehé. ⁴⁴ A ntá tí sín kjóne na mé in'ó mil chojni ntoa.

Ch'ín Jesús mé tjitaón ntayaon

(Mt. 14.22-27; Jn. 6.16-21)

⁴⁵ A ntá tuénxín k'uet̩nhen ch'ín Jesús tí sín k'uájiko ch'án kixin ts'it'ótjen sín tí ntabárcò a ts'atòye sín ntayaon sátsji sín nó chjasin Bet-saida, ichro ch'án. Na ntá jehe ch'án na mé naxa kuítóhe ch'án nixjehe ch'án kaín tí sín siín a. ⁴⁶ Kjuixin nixjehe ch'án sín na ntá jehe ch'án chr̩in ch'án ijnko jnā tsonixjēxín ch'án Dios. ⁴⁷ A ntá tió k'uíxin tie ntá tí ntabárcò na mé ó kjuíji jnkosiné ntayaon, a ntá jehe ch'án jehó ch'án kjuíji ch'án chr̩nta ntayaon. ⁴⁸ Ntá kotohe ch'án k'uíkon ch'án kixin imá xra tjiko sín tí ntabárcò a kixin tí xrintò imá chjéhe. Nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uátsínké ch'án sáchrókjui ch'án. ⁴⁹ A ntá tí k'uíkon sín kjuítaón ch'án ntá, ntá kjuenkayáxin sín kixin kjuacha sín, ichro sín, ntá k'óyako sín ⁵⁰ kixin kaín sín k'uíkon sín ch'án la chrakon sín. Na ntá jehe ch'án mé tuénxín nixja ch'án ntáchro ch'án kixin:

—Chrakonhyará. Janhan tíhi —ichro ch'án.

⁵¹ Ntá k'ujt'ótjen ch'án tí ntabárcò tí tjejó sín, a ntá tí xrintò la ó k'uíxratá. Ntá imá chrakon sín kixin xíkaha kónhen ⁵² kixin kienxínhya sín tí kjuaxroan kjuích'e ch'án kuènte tí niot̩ja kixin naxa kénhya asén sín kuinkáchónki sín ch'án.

Ch'ín Jesús mé kjuínchekitóhe jina tí chojni níhi tí nonte Genesaret

(Mt. 14.34-36)

⁵³ Ntá tió k'uátòye sín tí ntayaon ntá kjuíji sín tí nonte Genesaret ntá kjuak'echroé sín tí ntabárcò a tí chr̩nta ntá. ⁵⁴ Na ntá tió k'uínkajinxín sín tí ntabárcò, a ntá tí sín siín ntiha tjoka kjuátsòan sín tí ch'ín Jesús. ⁵⁵ Ntá sákjuí sín nkuíxín chjinaxón ntiha kjuankíxin sín kuíkao sín tí s̩nníhi tinkátsénki sín kuíkao sín tí tjen ch'ín Jesús. ⁵⁶ La ko kaín nketí kjuíji ch'án, á chjasin ntsí, á chjasin hyé, á nontee sín ó kjuíjiko sín tí s̩nníhi a chr̩nta ntá. Na ntá chrónóhehe sín tí ch'ín Jesús kixin kjónté chr̩nta iké ch'án ó chrókúákóxin sín, ichro sín. Na kaín xín tí sín kuákóxin iké ch'án mé kuítóhe sín jina.

7

Tí nkehe nchekj̩t̩a asén chojni

(Mt. 15.1-20)

¹ A ntá iso sín fariseo la ko iso tí sín tjako tí ley kuíxin sín chjasin Jerusalén ntá kóchjinehe sín tí ch'ín Jesús. ² Tí sín a, tió k'uíkon sín kixin iso tí sín k'uájiko ch'ín Jesús mé k'óntihya sín tja sín na kjónté ine sín mé t'axrjexín kixin kjuínchexiteyáhya sín tí ley, ntá kjonta tí sín a. ³ (Mé xíkaha

kjuích'e sín kixin tí sín fariseo la ko kaín tí sín judío mé kuinkáchónki sín éxí k'uékjich'e tí sín táda ósé kixin ná t'òntó itja sín ntá sine sín. ⁴ Na ko tí tsokjanxin sín ntasin ná t'ònti sín ntá sine sín. Na ko kjaxin itsjé í so nkehe tinkáchónki sín, éxí tjonemá sín tí vaso t'iyá sín nkehe la ko tí nchésen la ko tí chj chjányan nkehe ne sín la ko tí kámé sín nchetjóá sín.) ⁵ Méxra tí sín fariseo la ko tí sín maestro tjako tí ley a na mé kjuanchankíhi sín tí ch'ín Jesús kixin:

—¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjé ósé? Na mé tí sín xrikoa t'óntihya sín tja sín ntá kjónté ine sín —ichro sín.

⁶ Kjuátehe ch'ín Jesús ntáchro ch'án kixin:

—Ntoá tsíchrónka ch'ín Isaías ósé k'uéchónka iten Dios tsíntáchro ch'án kixin ntoáhya tsjenkayáxinrá tí jahará kixin xikíhi tsíkjin ch'án ntáchro ch'án kixin:

Tí chojni tí chjasin i ir'va ó xraxinkakonxín sín tí janhan, a ntá tí asén sín ikjín kuítóhe sín tí janhan

⁷ Méxra ó chónkó tóchjina sín xraxinkaon sín tí janhan,

kixin tí nkehe tjako sín la tí nkehe tsík'etōan chojni ó.*

Mé xikaha ichro itén Dios. ⁸ Ntá jahará kuítóhérá tí nkehe tsík'etōan Dios ntá chréhérá tí nkehe ch'e chojni, a la mé tjonemará nchésen, la ko tí vaso t'iárá nkehe, la ko kjaxin í so nkehe yóhe tinkachónkirá —ichro ch'án.

⁹ Kjaxin ntáchro ch'án kixin:

—Jahará chréhérá tí nkehe k'uékjich'e chojni ntá xikaha títóhérá ntáha tí nkehe tsík'etōan Dios. ¹⁰ Tsíntáchro ch'ín Moisés kixin: “Tsochonteherá kjuasáyé it'ará la ko inárá”, la ko “A ntá tí nkexro t'ántaxínhin it'é o iné la chrók'óyán sín.”† ¹¹ A ntá jahará ntáchrórá kixin ó nchoxon kixin ijnko nkexro tsochénta it'é la ko iné kixin: “It'eni, Inéni, chrokjuahya tsjinkitsani tí jaha kixin kaín tí nkehe chóntani mé k'óna Corbán” (mé t'axrjexín kixin kaín tí chichaon k'uáyéhe Dios). ¹² A ntá xikaha jnkojín nkexro tsontáchro ch'án tíhi ntá jahará tsontáchrórá kixin í t'ichjánxinhya tsjinkitsa ch'án tí it'é ch'án la ko tí iné ch'án. ¹³ A ntá tí xikaha la títóhérá tí nkehe tsík'etōan Dios éxí sínkíhya, a ntá ókjé nkehe ich'era, ntá tánkíhará chojni. Mé xikaha ich'era nchónhya nkehe tóyóhe tíha —ichro ch'ín Jesús.

¹⁴ Na ntá k'uíyehé ch'ín Jesús tí chojni inaá ntáchro ch'án kixin:

—Tinhínrá kaín rá tí nkehe ntáxrjan la ko tiénxinrá. ¹⁵ Tí nkehe ine chojni la jehya jje tíha. Tí nkehe t'axrjeníxin asén chojni mé jje tíha. ¹⁶ Tí tjinkáonrá chrókuinhínrá la chrókuinhínrá —ichro ch'án.

¹⁷ A ntá tió kuítóhe ch'án kaín tí sín tsíkóchjina a na ntá jehe ch'án la ko tí sín k'uájiko ch'án mé k'uixenhen sín nchia. Na ntá kjuanchankíhi sín ch'án kixin nkexrí t'axrjexín tí nkehe kjuako ch'án a. ¹⁸ Na ntá ntáchro ch'ín Jesús kixin:

—¿Á kjaxinrá tiénxinhyará? ¿Á noahyará kixin tí nkehe ineni na jehya jje ¹⁹ kixin jehya asénni sátsji? Tí nkehe ineni na sáti nkaya tseeni na ko xik'axrje inaá —ichro ch'án.

Mé t'axrjexín kixin tí nkehe sineni la jehya jje.

²⁰ Ntá ntáchro ch'ín Jesús kixin:

—A ntá tí nkehe t'axrjeníxin chojni na mé jje táha. ²¹ Nkaya asánrá mé t'axrjeníxin tí jínahya tjenkayáxinrá, la ko tí tjachehe kichuárá, la ko

* 7:7 Isaías 29.13 † 7:10 Éxodo 20.12; 21.17

tí tjinkáonrá tsochontará chojni chjin ókjé, la ko tí t'oyán kíchuará ²² la ko tí chrókueerá, la ko tí tjaké asánrá tí nkehe chóna ókjé sín, la ko tí jínahya ch'ehérá kíchuará, la ko tí kjuach'ia xríkoará la ko tí jínahya tjenkayáxinrá, la ko tí chjinoxinhanrá, la ko tí ch'énará kjuach'ia, la ko tí kjuahnke chontará, na kó tí chontahyará kjuaxrexinkaon jína. ²³ Kaín tí nkehe jínahya a mé t'axrjeníxin chojni, la mé tjasixín sín jie.

Ijnko tjan tsíkjiixin kjín mé kuítekaon tjan tí ch'ín Jesús
(Mt. 15.21-28)

²⁴ Ntá ch'ín Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uúixenhen ch'án injko nchia kixin tjinkakon-hya ch'án kixin chrókonohe chojni kixin ntaha tjen ch'án. Kjánchó xitjahya kjuák'emá ch'án ntiha. ²⁵ Na ntá injko iné injko tjan tjarisoá chóna injko nchakuen tí jínahya mé kuínhin nkehe tí xrə ch'e ch'ín Jesús kixin tjasin ch'án kjuaxroan, ntá tuénxín kui tjan kjuák'exín toch'in tjan chrínki toté ch'ín Jesús. ²⁶ Na mé jehe tjan tsíkjiixin kjín, na mé tsíkjiixin tjan nó nación Sirofenicia. Na ntá jehe tjan a mé kui tjan chrónóehé tjan tí ch'ín Jesús kixin chrókuakitsje ch'án tí nchakuen tí jínahya chóna xjeen tjan.

²⁷ Ntá ntáchro ch'ín Jesús kjuátehe ch'án kixin:

—Títóhé senó chrókjóne tí xjan. Jehya tí jína chrókuakítsjahə xjan tí niotja ntá chrótjahə konja chrókjóne va —ichro ch'án.

²⁸ Ntá jehe tjan kjuátehe tjan ntáchro tjan kixin:

—Chaxín xikaha, Ìnchéni. Kjánchó kjónté tí konja tjejoyánkí mesa ine tí tot'o niotja tóxənjín tí chánjan —ichro tjan.

²⁹ Na ntá ntáchro ch'ín Jesús kixin:

—Táha la chaxín ntoá ntáchrua. Sátjia kixin tí nchakuen tí jínahya ó k'uaxrjexín tí xjaan —ichro ch'án.

³⁰ A ntá tió kjuíji tjan ntəe tjan, na ntá k'uúikon tjan kixin tí xjeen tjan na mé ó ntoá tjetsínkaták'á xjan tí cama kixin ó tsík'axrje tí nchakuen tí jínahya a.

Ch'ín Jesús mé kjuínchekitohe jína injko ch'ín tienhya la ko nixjahya

³¹ Ntá ch'ín Jesús mé ó k'uaxrjexín ch'án inaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntayaon Galilea. ³² Ntá kuikəo sín injko ch'ín tienhya na ko ntoáhya nixja ch'án. Ntá chrónóehé sín tí ch'ín Jesús a kixin tsjak'etja tja ch'án chrítaón kja tí ch'ín a kixin tsitöhe ch'án jína. ³³ Na ntá ch'ín Jesús k'uaxrjentako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxenhen ch'ín Jesús tatsjon tí ch'ín tienhya. La ko kjaxín tí dedo tja ch'án mé kuikite ch'án ntaté ch'án ntá kjuínchekákóxin ch'án nejen tí ch'ín nixjahya a. ³⁴ Ntá konta ch'án nkajní k'uáváxin ch'án na ntá nixjehé ch'án tí ch'ín tienhya a, ntáchro ch'án kixin:

—Efata —mé t'axrjexín nkívee sín kixin: ¡Tsoxitjehé!

³⁵ Na ntá tuénxín xítjehé tatsjon tí ch'ín tienhya ntá kuínhin ch'án la ko kuítóhe jína tí nejen ch'án, ntá jína nixja ch'án. ³⁶ Ntá ch'ín Jesús k'uetəoan ch'án kixin ninkexró tsochenkahya sín. Ntá kjónté imá k'uetəoan ch'án ntá ántosén sín kjónté íchá xrichronka sín. ³⁷ Na mé imá chrakon sín ntá ntáchro sín kixin:

—Kaín nkehe ch'e ch'án la jína. Tí chojni tienhya la tinhin sín la ko tí chojni nixjahya la nixja sín —ichro sín.

8

Ch'in Jesús mé kjuanjon nkehe kjóne noó mil chojni
(Mt. 15.32-39)

¹ A ntá ijnko yaon nchónhya chojni k'uíxikóchjina inaá. A ntá chóntahya sín nkehe sine sín. Na ntá ch'in Jesús mé k'uíyehé ch'án tí sín k'uájiko ch'án, a ntá ntáchro ch'án kixin:

² —Imá tikonóahá kaín tí sín i kixin ó ní yaon tjékian sín ntihi ntá chóntahya sín nkehe sine sín. ³ Ntá chrókuétuánhya sín sáchrókjui sín ntóe sín tí naxá nehya sín kixin ntja ó chrókótiénxín sín kixin iso sín la imá kjin tsíkjin sín —ichro ch'in Jesús.

⁴ Na ntá kjuátéhe tí sín k'uájiko ch'án ntáchro sín kixin:

—¿Nkexrí chrókónoxín nchónhya niótja chrókjóne kaín tí sín a kixin kohya nchia tí tjejóni? —ichro sín.

⁵ Na ntá ntáchro ch'in Jesús kixin:

—¿Nkekjaín niótja chontará jahará? —ichro ch'án.

Ntá jehe sín kjuátéhe sín ntáchro sín kixin:

—Yato niótja chóntani —ichro sín.

⁶ Na ntá ch'in Jesús k'uetuénhen ch'án kaín xín sín kixin ts'ixitjaxín sín nonte. Ntá kuákja ch'án tí yato niótja ntá kjuanchehe ch'án kjuasáyé Dios ntá kóchrít'o ch'án tí niótja a. Ntá chjéhe ch'án tí sín k'uájiko ch'án kixin jehe sín ts'óxíkayehé sín tsakja kaín xín tí sín siín a. ⁷ Na ko iso koche ntsínsi chóna sín. Ntá ch'in Jesús kjuanchia ch'án kjuasáya ntá k'uetóan ch'án ts'óxíkayehé sín kjaxín. ⁸ Na mé kaín xín sín kjóne sín na kókjehe sín. Ntá chr'éxín naxá kjuínchekaon sín yato ntaxra tí tot'o tí nkehe tsixehe. ⁹ Na mé chjina noó mil chojni kjóne sín. Ntá ch'in Jesús mé nixjehe ch'án sín sákjuí sín ¹⁰ ntá tuénxín jehe ch'án la ko tí sín k'uájiko ch'án na mé k'uit'ótjen sín tí ntabárcø a sákjuí sín nó tí nonte Dalmanuta.

Tí sín fariseo tjanchia sín ijnko kjuaxroan jíé
(Mt. 16.1-4; Lc. 12.54-56)

¹¹ Na ntá kui iso sín fariseo kjuankixin sín tjo sín tí ch'in Jesús kjuanchehe sín ch'án kixin chrókjuakoxín ch'án ijnko kjuaxroan jíé kuènte nkaya nkajní kixin tjinkaon sín chrókjuachaxín sín ch'án. ¹² A ntá ch'in Jesús na mé k'uáváxin ch'án ikjín kjanxin asén ch'án ntá ntáchro ch'án kixin:

—¿Nkekuènté kixin tí chojni i na mé tjanchia sín ijnko kjuaxroan jíé? Ijie la ninkehó kjuaxroan tsjákoxínhya —ichro ch'án.

¹³ Na ntá kuitohe ch'án tí sín a, ntá xík'it'ótjen ch'án tí ntabárcø ntá sákjuí ch'án íjnko tóhe ntayaon inaá.

Tí xroan nchek'ánkí tí niótjé tí sín fariseo
(Mt. 16.5-12)

¹⁴ Ntá k'uitjáyenhen sín tsíkjikohya sín nkehe sine sín. Jehó jnkokoá niótja chóna sín nkaxenhen tí ntabárcø a. ¹⁵ Ntá ch'in Jesús k'uetuénhen ch'án tí jehe sín kixin:

—Chrókóxakonhanrá kixin tí xroan nchek'ánkí niótjé tí sín fariseo la ko niótjé tí ch'in Herodes a —ichro ch'án.

¹⁶ Ntá tí sín xriko ch'án mé kjo sín kichó sín kixin:

—Mé xikaha ichro ch'án kixin tsíkjikohyani niótja.

¹⁷ Ntá kónohe ch'in Jesús kixin nkehe tí kjo sín kichó sín ntá ntáchro ch'án kixin:

—¿Nkekuènté tjórá kixin chontahyará niotja? ¿Á naxa tiénxinhyará la ko naxa noahyará? ¿Á kénhya asánrá tinkachónkirá Dios? ¹⁸ ¿Á t'ikonxinhyará ikonrá la ko á tiénxinhyará tátsjinrá? ¿Á xráxinkákonhyará? ¹⁹ Tió kóchrít'va tí n'ó niotja kjóne in'ó mil chojni na ¿nkekjaín ntaxra tí tot'ó niotja naxa kjuenájinnrá? —ichro ch'án.

Ntá jehe sín kjuátehe sín ntáchro sín kixin:

—Teyó ntaxra tí nkehe kjuenájinni —ichro sín.

²⁰ Xíntáchro ch'ín Jesús inaá kixin:

—Na ko tí kóchrít'va tí yato niotja kjóne noó mil chojni na ¿nkekjaín ntaxra tí tot'ó niotja kjuenájinnrá? —ichro ch'ín Jesús.

Ntá ntáchro sín kixin:

—Yato ntaxra —ichro sín.

²¹ Ntá ch'ín Jesús ntáchro ch'án kixin:

—Kjonté xíkaha la, ¿á naxa tiénxinhyará? —ichro ch'án.

Ch'ín Jesús mé kjuínchekitohe jina ijnko ch'ín t'ikonhya tí chjasin Betsaida

²² A ntá chr'éxin kujji sín chjasin Betsaida, a ntá ikui iso sín kuikao ijnko ch'ín t'ikonhya. Ntá chrónóhe sín tí ch'ín Jesús kixin chrókjuínchekitohe ch'án jina tí ch'ín a. ²³ Ntá ch'ín Jesús mé itsé ch'án tja tí ch'ín t'ikonhya a ntá k'uaxrjentako ch'án ikon tí chjasin a. Na ntá kuikitehe ch'án ntaté ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kixin:

—¿Á ó t'ikuan ntsí? —ichro ch'án.

²⁴ Ntá ntáchro tí ch'ín t'ikonhya kixin:

—T'ikonni chojni, kjánchó éxí nta tsjehe itji —ichro ch'án.

²⁵ Ntá ch'ín Jesús mé xíkjak'etja tja ch'án inaá tí kon tí ch'ín t'ikonhya a. A ntá tí ch'ín k'uikonhya kuítóhe ch'án jina la jina t'ikon ch'án kaín nkehe.

²⁶ Na ntá ch'ín Jesús mé k'uëtuënhen ch'án tí ch'ín k'uék'ikonhya kixin sátsji ch'án ntøe ch'án ntáchro ch'án kixin:

—Chrók'uixenhya chjasin la ko ninkexró chróchenkahya ntiha —ichro ch'án.

Ch'ín Pedro chrónka ch'án kixin ch'ín Jesús mé tí nkexro Cristo

(Mt. 16.13-20; Lc. 9.18-21)

²⁷ A ntá tí ch'ín Jesús la ko tí sín k'uájiko ch'án sákjuí sín tí chjasin ntsí chjino Cesarea de Filipino. A ntá tí ntia mé kjuanchankíhi ch'ín Jesús tí sín k'uájiko ch'án kixin:

—¿Nkehe ntáchro chojni kixin nkexro tí janhan? —ichro ch'án.

²⁸ Ntá ntáchro sín kixin:

—Iso sín mé ntáchro sín kixin jaha mé ch'ín Juan Bautista, ichro sín. A ntá í so sín mé ntáchro sín kixin jaha mé ijnko tí sín tsíchronka itén Dios ósé —ichro sín.

²⁹ Ntá kjuanchankíhi ch'án sín inaá kixin:

—¿A ntá jahará nkechorá kixin nkexro tí janhan? —ichro ch'án.

Ntá kjuátehe ch'ín Pedro ntáchro ch'án kixin:

—Jaha mé tí Cristo, ichroni —mé chro ch'án.

³⁰ Ntá k'uëtoan ch'ín Jesús kixin tsochenkahya sín ninkexró.

Ch'ín Jesús chrónka ch'án kixin ts'en ch'án

(Mt. 16.21-28; Lc. 9.22-27)

³¹ Na ntá kjuankíxin kjuako ch'ín Jesús kixin tí Xjeen Dios K'óna Chojni mé t'ichjánxin kixin imá tsjasóte ch'án la ko tsotjinkakonhya kaín tí sín táda kuente nínko la ko tí sín t'etqan kuente tí sín ncha'tá la ko tí sín maestro tjako tí ley. A ntá tí sín a mé ts'óyán sín ch'án. Kjánchó tí nixin yaon na ó tsoxechón ch'án inaá. ³² Kaín tíha mé ntoá chrónka ch'án. A ntá ch'ín Pedro mé kuakitsjenta ch'án tí ch'ín Jesús chrókjuentuéhe ch'án. ³³ Na ntá kuinkátjía ch'ín Jesús komá ch'án kaín tí sín k'uájiko ch'án a. Ntá kjuentuéhe ch'án tí ch'ín Pedro a ntáchro ch'án kixin:

—jSátjia ntáha, Satanás! Jaha la tjenkayáxinhya éxi tjenkayáxin Dios. Náhí. Jaha tjenkayáxian éxi tjenkayáxin chojni ó —ichro ch'án.

³⁴ Ntá ch'ín Jesús mé k'uíyehé ch'án tí sín k'uájiko ch'án la ko tí sín tsíkóchjina a. Ntá ntáchro ch'án kixin:

—Tí jnkojínrá tjinkáonrá tsochréhérá tí janhan na t'ichjánxin tsjtohérá kaín tí nkehe tjaké asanrá na ntá tsamárá tí ntacruz kuéntará, a ntá tsochréhérá tí janhan. ³⁵ A ntá tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyanxín asén kixin tinkáchónki tí janhan la ko chrónkaxín tí tan tsjanjon kjuachón mé tsaá. ³⁶ ¿A ntá nkehe tsonhen tí chrókjuacha ijnko chojni chróchóna kaín nkehe siín chjasintajni, a ntá kjuachón chrókjuinchek'itjáyan? ³⁷ ¿Nkehe chrókjuenka chojni kixin chróchóna tí kjuachón? ³⁸ A ntá jnkojín nkexro tsosuehé kixin tinkáchónki tí janhan la ko tí tan kuéntana nkayakon tí chojni jínahya chóna jie la kjaxin tí Xjeen Dios K'óna Chojni tsosuehé ch'án tsontáchro ch'án kixin chóxin ch'án tí jehe sín tió tsokjan ch'án tsikao ch'án tí kjuachaxin jie kuente It'é la ko tsikao tí sín ángel.

9

¹ Na ko kjaxin chrónka ch'ín Jesús kixin:

—Chaxín ntáxrjan kixin isorá tjejorá ntihi la naxa ts'énhyará ts'ikonjjará itsi tí kjuachaxin ts'etqan Dios —ichro ch'án.

*Ch'ín Jesús mé k'uúxitoxin nkexrí tsjehe ch'án
(Mt. 17.1-13; Lc. 9.28-36)*

² Ntá k'uátsínka injon yaon ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan sákjuí sín jehó sín ijnko jna noi. Ntá ntiha mé xrínahya k'uúxitoxin ókjé nkexrí tsjehe ch'án k'uúkon tí jehe sín. ³ A ntá iké ch'án tsik'óna imá tjákini la ko imá tjóá éxi chrinta tsjehe, a ntá ntihi chjasintajni kohya ninkexró chrókjuen tí ka chrókuithé imá tjóá xikaha. ⁴ Na ntá titàya k'uúkuèn sín ntiha itjen tí ch'ín Elías la ko tí ch'ín Moisés tjejótjo sín tí ch'ín Jesús. ⁵ A ntá ch'ín Pedro mé ntáche ch'án tí ch'ín Jesús kixin:

—Maestro, jína kixin tjejóni ntihi. Chrókjuich'énani iní nchia la mé ijnko kuéntá la ko ijnko kuente ch'ín Moisés la ko ijnko kuente ch'ín Elías.

⁶ Mé xikaha ichro ch'án kixin kaín sín la imá chrakon sín la tí ch'ín Pedro la mé í noehya ch'án nkehe tsixro ch'án. ⁷ Na ntá xrínahya ikui ijnko tjuí kjuák'etja chrítaón kaín xín tí tjejó sín. Na ntá chríkjan tí tjuí kuínhin sín itén ijnko nkexro nixja na mé ntáchro kixin:

—Tí nkexro i mé xjanna. Imá tjuahá ch'án. Chrókuinhínrá tí nkehe tjako ch'án.

⁸ Na ntá tió tsjehe sín nkuíxín tí tjejó sín la í kohya tí iyó sín a. Jehó tí ch'ín Jesús tjejóko sín.

⁹ **A** ntá tí ó k'uínkajinxin sín tí jna ntá k'uetōan ch'ín Jesús kixin tsochenkahya sín ninkexró tí nkehe k'uíkon sín hasta tsoxechónjian tí Xjeen Dios K'óna Chojni. ¹⁰ Ntá ninkexró chenkahya sín tí nkehe k'uíkon sín. Na ntá jehó sín mé tjejóto sín kixin nkehe t'axrjexín tí nkehe chrónka ch'án kixin tsoxechón ch'án inaá. ¹¹ Na ntá kjuanchankíhi sín tí ch'ín Jesús ntáchro sín kixin:

—¿Nkekuènte kixin ntáchro tí sín tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹² Ntá ntáchro ch'ín Jesús kixin:

—Chaxín saoxín itsi ch'ín Elías la ntá tsjasiyóxin ch'án kaín xín nkehe. ¿A ntá nkehe ntáchro xroon itén Dios kixin nkehe tsonhen tí Xjeen Dios K'óna Chojni? Na mé ntáchro kixin t'ichjánxin tsjasóte la ko tsojtinkakonhya sín. ¹³ Kjánchó ó xrjanka kixin chaxín ó tsiki ch'ín Elías, ntá kjuínchekjasóte sín ch'án éxí kóxrjinhin sín éxí nixja tí xroon itén Dios kixin xikaha tsonhen —mé xikaha chrónka ch'ín Jesús.

Ch'ín Jesús mé kjuínchekitohe jína ijnko xjan chóna ijnko nchakuen tí jínahya

(Mt. 17.14-21; Lc. 9.37-43)

¹⁴ **A** ntá tió ikjan sín tí kuitōhe tí í so sín k'uájiko ch'án ntá k'uíkon sín kixin nchónhya chojni tsík'antatjen tí jehe sín. Kjaxin ntaha siín tí sín tjako tí ley ikjo tí jehe sín. ¹⁵ **A** ntá tuénxín tió k'uíkon sín tí ch'ín Jesús na ntá kaín sín kóchéhe sín tinká sín sákjuíchréhe sín ch'án, tsonixjehe sín ch'án. ¹⁶ Ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tjórá tí sín í? —ichro ch'án.

¹⁷ Ntá tjen ijnko ch'án tjenkákjan sín ntiha kjuátēhe ch'án kixin:

—Maestro, ntihi kjuíkian ijnko xjanna chóna nchakuen tí jínahya na mé nchenixjahya xjan. ¹⁸ Kjonté nkerí tjen xjan la tí nchakuen tí jínahya mé tjáka xjan nonte, ntá ntalóxrjo sítixin ir'va xjan na netaón xjan neno xjan na méxra tjiehya xjan. Ntá xrjanógha tí sín xrikoa kixin chrókuakitsje sín tí nchakuen tí jínahya a. Kjánchó kjuachahya sín —ichro ch'án.

¹⁹ Ntá ch'ín Jesús kjuátēhe ch'án ntáchro ch'án kixin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá naxa ts'ejóni? ¿Xá hasta nkesá tsjácha tsjak'é tsjákoahará? Xrákoará ntihi tí xjan méhe —ichro ch'án.

²⁰ Na ntá kóchjinako sín tí xjan a. Na ntá tí nchakuen tí jínahya mé k'uíkon tí ch'ín Jesús ntá kjuínchek'aniáte tí xjan a kjuítsínka xjan nonte la kjaminkítaón xjan nonte la sítji ntalóxrjo ir'va xjan. ²¹ Ntá ch'ín Jesús mé kjuanchankíhi tí it'é tí xjan a ntáchro ch'án kixin:

—¿Á ósé xikaha tónhen xjan? —ichro ch'án.

Ntá ntáchro tí it'é tí xjan kixin:

—Desde naxa xjanntsi xjan. ²² **A** ntá jnkoyaxón tí nchakuen tí jínahya a mé tjákate xjan xrohi la ko tjákánki xjan ìnta kixin tjinkaon chrók'óyán tí xjan a. **A** ntá jaha ¿á tsjácha tsjínkítsani? La tikonóghéni tsjínkítsani —ichro ch'án.

²³ Ntá ntáchro ch'ín Jesús kixin:

—¿Nkekuènté tjanchankina kixin á tsjácha? Tí tsitekávan la kaín nkehe la jína tsonhen, kixin tí nkexro tsitekaon Dios la jína tsonhen kaín nkehe —ichro ch'án.

²⁴ Ntá tuénxín itsen kjuátēhe tí it'é xjan, ntáchro ch'án kixin:

—Ó titekaonni. Tsjínkĩtsani kixin ańsĩ má tsitekaonni tí jaha —ichro ch'án.

²⁵ Ntá k'uĩkon ch'ín Jesús kixin itsjé chojni kóhjiná. Ntá nixjehe ch'án tí nchakuen tí jínahya chónťa tí xjan a ntáchro ch'án kixin:

—Jaha la ijnko nchakuen tí jínahya nchenixjahya chojni la ko nchekíenhya chojni. Ijie la tétuanhan kixin t'axrjéxian tí xjan na ko tsĩtohé xjan la í tsokjanhya ínaá —ichro ch'án.

²⁶ Ntá tí nchakuen tí jínahya a na mé k'óyato la ko kjuínchek'aniáte tí xjan a ínaá, ntá k'uaxrjexín ntiha. Na éxĩ tsík'en xjan xĩkaha tsjehe xjan. Ntá itsjé sín ntáchro sín kixin ó tsíkjinín tsík'en xjan, ichro sín. ²⁷ Na ntá ch'ín Jesús mé tséhe tja tí xjan kjuínchek'inkatjen ch'án xjan.

²⁸ Ntá ch'ín Jesús la ko tí sín k'uájiko ch'án k'uixenhen sín ijnko nchia. Ntá jehe sín kjuanchankĩhi sín ch'án kixin:

—¿Nkekuénté kixin kjuachahyani kuakitsjeni tí nchakuen tí jínahya a? —ichro sín.

²⁹ Ntá ntáchro ch'án kixin:

—Tĩhi la t'ichjánxin kixin nchónhya tsochronóhéřa T'aná la ko sintehyará —ichro ch'án.

Yóxin chrónka ch'ín Jesús kixin its'en ch'án

(Mt. 17.22-23; Lc. 9.43-45)

³⁰ A ntá tíó sákjuixin sín ntiha ntá k'uátsínka sín estado Galilea. A ntá ch'ín Jesús tjinkakonhya ch'án kixin ninkexró ntiha tsonohe sín ³¹ kixin tinkákjakohé ch'án tí sín k'uájiko ch'án a. Na mé chrónka ch'án ntáchro ch'án kixin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yaon níxin na ó tsoxechón ch'án ínaá —ichro ch'án.

³² Ntá jehe sín mé kíenxínhya sín nkehe tí ntáchro ch'án la chrakon sín chrókjuanchankĩhi sín ch'án nkexrĩ t'axrjexín tíha.

¿Nkexro tí ímá tjetoan?

(Mt. 18.1-5; Lc. 9.46-48)

³³ Ntá kjuĩjĩ sín chjasin Capernaum; a ntá tí tjejó sín tí nchia ntiha ntá ch'ín Jesús mé kjuanchankĩhi ch'án sín ntáchro ch'án kixin:

—¿Nkehe tí tinkakjórá kíchuárá tí kuini ntĩa? —ichro ch'án.

³⁴ Ntá jehe sín la táníkoá sín kixin tí ntĩa kui sín tinkákjo kíchó sín kixin nkexro tí ímá ts'etjoan. ³⁵ Ntá ch'ín Jesús mé kjuák'etjajxin ch'án ntá k'uíyehé ch'án tí teyó sín k'uájiko ch'án, a ntá ntáche ch'án sín kixin:

—Tí jnkojĩnrá tjinkáonrá chrókuétjoanrá má ntá t'ichjánxin kixin tsjixixín tsochrehéřa kaín sín, ts'ítuanhanrá la ko tsjínkĩtsará kaín xín sín —ichro ch'án.

³⁶ Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

³⁷ —Tí jnkojĩn nkexro chrók'uáyehé ijnko chánjan kixin tinkáchónki sín tí janhan la mé xĩkaha chrók'uáyehé sín tí janhan la ko kjaxin éxĩ chrók'uáyehé sín tí nkexro ichr'ánna —ichro ch'án.

Tí nkexro nínkakuenhyani tí jeheni la tjinkĩtsa tí jeheni

(Lc. 9.49-50; Mt. 10.42)

³⁸ A ntá ch'ín Juan mé ntáchro ch'án kixin:

—Maestro, k'uúkonni ijnko chojni na mé kjuachaxin ihniá mé takit-sjexín ch'án nchakuen tí jínahya chóna chojni. Ntá k'uetuenhenni ch'án kixin xikahya chrókjuich'e ch'án kixin xrikohyani ch'án —ichro ch'án.

³⁹ Ntá ntáchro ch'ín Jesús kixin:

—Nté títóhé ch'án kixin ninxeró tjasixín kjuaxroan kjuachaxin nina la tuénxín chrókjuacha chrók'uantaxína sín. ⁴⁰ Tí nkexro ninkakuenhyani la mé tjinkjtsa tí jeheni. ⁴¹ A ntá jnkojín nkexro tsojtáhará kjónté ijnko vaso intá tsjanjonxín sín nina kixin jahará la tinkachónkirá Cristo, ntáxrjan kixin chaxín ts'áyéhe sín nkehe.

Tí chojni tjasin jie mé tsjasóte sín

(Mt. 18.6-9; Lc. 17.1-2)

⁴² A ntá jnkojín nkexro chrókjuachroe ijnko xjan kixin chrókjuasin xjan jie tió tinkáchónki xjan tí janhan la íchá jína chrókjuincheteyá sín ch'án ijnko xro jie tsik'óna xrochre la chrókjuikákánkí sín ch'án ntayaon. ⁴³ A ntá tí itjá tjásixián jie na mé íchá chrókójína chrókochrínjian kixin kjónté jnkokoá tjá mé tsochontaxián kjuachón. A ntá tí yói tjá la tíha mé sáchrókjuíxian tí siín xrohi xitjahya ts'anka, ⁴⁴ tí siín kosjnto t'enhya la ko síche xrohi ts'ankahya. ⁴⁵ A ntá kjaxin tí totá tjásixián jie na íchá jína chrókochrínjian kixin kjónté jnkokoá totá mé tsochontaxián kjuachón. A ntá tí yói totá la tíha sáchrókjuíxian tí siín xrohi xitjahya ts'anka, ⁴⁶ tí siín kosjnto t'enhya la ko síche xrohi ts'ankahya. ⁴⁷ A ntá tí ikuan tjásixián jie na íchá jína chrókuakitsjenkiá tí kuan a kixin kjónté jnkokoá kuan mé sáchrókjuia tí tjen Dios t'etoan. A ntá tí yói kuan la tíha mé sáchrókjuíxian tí síche xrohi ⁴⁸ tí siín kosjnto t'enhya la ko siín xrohi ts'ankahya.

⁴⁹ A ntá kaín nkexro t'ichjánxín tsjasóte. A ntá kaín nkehe ts'áyéhe Dios chóna xjnta. ⁵⁰ Tí xjnta la jína. A ntá tí chrók'uankehe tí jní la ntá xitjahya chrókójní inaá. Jahará mé chrókóyohará éxí xjnta kixin kjuaxroxin chrók'uejokoará kichuára —ichro ch'án.

10

Tjako ch'ín Jesús kixin chrókjuákehya kichó sín

(Mt. 19.1-12; Lc. 16.18)

¹ Na ntá ch'ín Jesús mé k'uaxrjexín ch'án chjasin Capernaum sákjuí ch'án nó estado Judea la ko nó tóhe ntario Jordán. Ntá nchónhya chojni kójnkotsé sín tí tjen ch'án ntiha. Ntá kjuakohe ch'án tí jehe sín kixin xikaha kuèhen ch'án. ² Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókjuachaxín sín ch'án. Ntáchro sín kixin:

—¿Á siín kjuachaxin tsjákeh chojni ntoa ichjién? —ichro sín.

³ Ntá kjuátehe ch'án ntáchro ch'án kixin:

—¿Nkehe tí k'uetuanhanrá tí ch'ín Moisés? —ichro ch'án.

⁴ Ntá ntáchro sín kixin:

—Ch'ín Moisés kjuanjon ch'án kjuachaxin kixin ts'óna ijnko xroon tsakja tí ichjién kixin ts'itjixín kichó sín —ichro sín.

⁵ Ntá ch'ín Jesús ntáchro ch'án kixin:

—Ntá jahará icha asánrá títekákonhyará ntá k'uetoan ch'án ts'óna tí xroon a. ⁶ Kjánchó tí xrankixixín tió kjuích'éna Dios kaín xín nkehe la kjuích'éna ch'án ijnko chojni ntoa la ko ijnko chojni chjin.* ⁷ Méxra tí chojni ntoa tsítóhe ch'án tí it'é ch'án la ko iné ch'án kixin tsakja ch'án

* 10:6 Génesis 1.27; 5.2

ichjién ch'án ⁸ ntá yóí sín ts'óna sín éxí jnkokoá chojni. Méxra jehya yaá chojni. Náhí, jnkokoá.† ⁹ Na mé xikaha tí kjuachaxin kuènte Dios kójnkojiéxin sín ntá jehe sín chrók'uitjéhya kíchó sín —ichro ch'án.

¹⁰ A ntá tjejó sín nchia ntá tí sín k'uájiko ch'án a mé kjuanchankíhi sín ch'án inaá kixin á xitjahya ts'itjíhi kíchó sín. ¹¹ Na ntá ntáchro ch'ín Jesús kixin:

—Tí jnkojín nkexro tsjákehe ichjién ntá tsakja ch'án í jnko chjin na mé xikaha tsjáchehe ch'án tí tjan tsíkótehe ch'án saoxín. ¹² La ko kjaxin tí chojni chjin tsíkjákehe xii tsakja tjan í jnko chojni ntoa na mé xikaha kjaxin tjan tjasin tjan jie —ichro ch'án.

Ch'ín Jesús kjuíncheyaon ch'án xjan

(Mt. 19.13-15; Lc. 18.15-17)

¹³ Ntá kjuikao sín xjan kixin tjinkaon sín tsjak'etja tja ch'ín Jesús tí xjan a. Ntá tí sín k'uájiko ch'án mé kóninkakonhen sín tí sin kjuikao xjan. ¹⁴ Ntá k'uikon ch'ín Jesús ntá kónínkaon ch'án ntáchro ch'án kixin:

—Nté tjtóhérá tí xjan tsoxrakoa tí tjén janhan la t'inkakuènyará xjan kixin tí sín kuènte kjuachaxin kuènte Dios la mé tóyóhe éxí tí xjan a. ¹⁵ Ntá chaxín ntáxrjan kixin tí nkexro ts'ónahya éxí ijnko chánjan xitjaha ts'ejó sín tí ts'etqan Dios tí kjuachaxin kuènte ch'án —ichro ch'án.

¹⁶ Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

Ijnko ch'ín ntasoá rico nixjehe ch'án tí ch'ín Jesús

(Mt. 19.16-30; Lc. 18.18-30)

¹⁷ A ntá tió sákjuí ch'ín Jesús inaá ntá xrakoa ijnko ch'ín tinká ch'án kjuák'exín toch'in ch'án nkayakon tí ch'ín Jesús kjuanchankí ch'án kixin:

—Jaha, maestro jína. ¿Nkexrí chrókjuich'eni kixin chrók'uitjani kjuachón jnkochrín? —ichro ch'án.

¹⁸ Ntá ntáche ch'ín Jesús tí jehe ch'án kixin:

—¿Nkekuènté ntáchrúa kixin jína tí janhan? Jehó jnkokoá nkexro mé jína la tíha mé Dios. ¹⁹ Ntá jaha ó noha kixin nkexrí k'uetqan Dios kixin: “Chrókjuacheéhya kichuá la chrók'oyánhya chojni la chrókueehya la chrókjontahya kichuá la chrókjuich'iahya la ko chróchontehé kjuasáya it'á la ko iná”‡ —ichro ch'án.

²⁰ A ntá jehe ch'án kjuátehe ch'án ntáchro ch'án kixin:

—Maestro, kaín tíha kjuínchexiteyáni desde ntasoáni —ichro ch'án.

²¹ Ntá ch'ín Jesús mé komá ch'án la ko tjuèhe ch'án tí ch'ín a. Ntá ntáchro ch'án kixin:

—Naxa t'itjayan jnkokoá nkehe chrókjuich'e. Sátjia nchekjia kaín tí nkehe chonta. A ntá tí chichaon sijnchekjixián tí nkehe chonta la mé nchekjionhén tí chojni nò, a ntá tí nkehe tjete tsochonta nkaya nkajní. A ntá tió tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

²² Ntá tió kuínhin ch'án xikaha ntá k'uává ch'án sákjuí ch'án, kixin imá tsje nkehe chóna ch'án.

²³ Ntá ch'ín Jesús komá ch'án tí sín siín ntiha ntáche ch'án tí sín siín k'uájiko ch'án kixin:

—Imá xra ijnko chojni chóna imá tsje nkehe ts'ixenhen sín tí tjen Dios t'etqan —ichro ch'án.

† 10:8 Génesis 2.24 ‡ 10:19 Éxodo 20.12-16; Deuteronomio 5.16-20

24 Ntá tóxakonhen tí sín k'uájiko ch'án kixin xikaha ntáchro ch'án. Ntá chrónka ch'án inaá kixin:

—Tí sín tjejonhen tí nkehe chóna sín na imá xra ts'ixenhen sín tí tjen Dios t'etqan. 25 Antsí xrahya chrók'uátsínka ijnko kocamello ijnko tjar'in ntachica tjexrja. A ntá antsí má xra ijnko ch'ín chóna itsjé nkehe chrók'uixenhen ch'án tí tjen Dios t'etqan —ichro ch'án.

26 Ntá jehe sín kuínhin sín xikaha ntá imá chrakon sín. Ntá tjanckankíhi kichó sín kixin:

—Tí xikaha la, ¿xá nkexro chrókjuacha chrókuaá? —ichro sín.

27 Ntá komá ch'ín Jesús tí jehe sín ntáchro ch'án kixin:

—A ntá chojni ó tsjachahya sich'e tíha, a ntá Dios jína sich'e kaín nkehe, kixin Dios la kohya nkehe tsjachahya sich'e —ichro ch'án.

28 Ntá ch'ín Pedro ntáchro ch'án kixin:

—Inchéni, kaín ni mé kuitqheni kaín nkehe chóntani ntá chréheni tí jaha —ichro ch'án.

29 Ntá kjuátehe ch'ín Jesús ntáchro ch'ín kixin:

—Chaxín ntáxrjan kixin jnkojín nkexro tsítóhe ntqe sín la o tí kichó ntoa o tí kichó chjin la o it'é o iné sín o ichjién sín o xjeen sín o nontqe kixin tinkáchónki sín tí janhan la ko tjinkaon sín chrókjuako sín tí tan tsjanjon kjuachón 30 na mé ntíhi chjasintajni tsochóna sín ciento veces nchónhya ntqe sín la ko éxí kichó sín la ko éxí iné sín la ko éxí xjeen sín ts'ikon sín itsjé chojni kjé la ko éxí nontqe sín xikaha ts'ikon sín itsjé nontqe. Kjónaté tsjasóte sín ntíhi chjasintajni ntá chr'éxin tsochóna sín tí kjuachón jnkochríxín.

31 A ntá itsjé tí sín t'etqan ijie mé tsjixixín tsochréhe sín. A ntá itsjé tí sín t'ítuenhen ijie, na mé tí sín a mé ts'etqan sín tí ntíha.

Níxin chronka ch'ín Jesús kixin its'en ch'án

(Mt. 20.17-19; Lc. 18.31-34)

32 Ntá tjejótji sín chríin sín tí ntja sátsji chjasin Jerusalén. Ntá ch'ín Jesús mé tjetaón ch'án ntja ntá tí sín k'uájiko ch'án mé tóxakonhen sín chrakon sín chréhe sín. Ntá k'uiyehé ch'án jehó tí teyó sín inaá ntá kjuankixin ch'án chénka ch'án sín nkexrí tí nkehe tsonhen ch'án. 33 Ntá ntáchro ch'án kixin:

—Ijie sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikénhen sín tí sín nchat'á t'etqan la ko tí sín tjako tí ley. Ntá ts'etqan sín kixin its'en ch'án. Ntá sinchek'áyéhe sín ch'án tí sín jehya judío. 34 Ntá jehe sín la tsjanoá sín tí jehe ch'án la ko ntaté sín tsikite sín ch'án la ko tsjate sín ch'án ntá ts'óyán sín ch'án. Kjánchó tí yaon níxin mé tsoxechón ch'án inaá —mé xikaha ichro ch'ín Jesús.

Ch'ín Jacobo la ko ch'ín Juan tjanckhia sín nkehe

(Mt. 20.20-28)

35 A ntá tí ch'ín Jacobo la ko ch'ín Juan mé xjeen ch'ín Zebedeo mé kóchjinehe sín tí ch'ín Jesús ntá ntáchro sín kixin:

—Maestro, tjanckhani ijnko xra —ichro sín.

36 Ntá kjuanchankí ch'ín Jesús ntáchro ch'án kixin:

—¿Nkehe tí xra tjinkáonrá chrókjuít'ahar? —ichro ch'án.

37 Ntá ntáchro sín kixin:

—Tió tsétoanxián tí kjuachaxián jíe na tjinkaonni kixin ijnkonni chrókjuak'eni itjá chjina a í jnkonni chrókjuak'eni itjá kjon —ichro sín.

38 Ntá ntáche ch'ín Jesús tí jehe sín kixin:

—Jahará la noahyará nkehe tí tjanchará. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

³⁹ Ntá jehe sín kjuátehe sín ntáchro sín kixin:

—Kjá tsjachani —ichro sín.

Ntá ntáche ch'ín Jesús tí jehe sín kixin:

—Chaxín its'irá éxí tí nkehe tsjá its'ia la ko tsikiterá éxí tsikite janhan. ⁴⁰ Kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná kjon kixin janhan na tónahya tocar tsjánjuan tíha kixin tí sín a la xráxín ó tsikónoxín —ichro ch'án.

⁴¹ A ntá tió kuínhin tí ite sín xikaha tsintáchro tí sín a ntá kjuankixin kónínkakohen sín tí ch'ín Jacobo la ko tí ch'ín Juan. ⁴² Ntá k'uíyehé ch'ín Jesús kaín tí jehe sín ntá ntáche ch'án sín kixin:

—Ó nohará kixin tí sín t'etōan chjasintajni la imá t'etūenhen sín kaín chojni la ko tí sín imá tjetōan mé imá nchehnkehe asén sín kixin ihyé sín ts'etōan sín. ⁴³ Kjánchó jahará la xikahya chrókjuich'erá. Náhí. Tí jnkojínrá tjnkáonrá chrókuétōanrá la chrókjuínkītsará tí í so sín. ⁴⁴ A ntá tió jnkojínrá antsí chrókuétōanrá mé t'ichjánxin senó chrókjuákōxinrá chrókjuich'eherá kichuárá xrá. ⁴⁵ Kixin tí Xjeen Dios K'óna Chojní mé kuilha ch'án kixin chojni chrókjuich'ehe ch'án xrá. Náhí. Iku ch'án kixin sich'ehe ch'án sín xrá la ko ts'enyákohen nchónhya chojni kixin tsaáxin sín ch'án —ichro ch'án.

Ch'ín Bartimeo k'uék'ikonhya ch'án ntá ch'ín Jesús kjuínchekitōhe ch'án jína

(Mt. 20.29-34; Lc. 18.35-43)

⁴⁶ Ntá kjuíji sín chjasin Jericó. Ntá ch'ín Jesús la ko tí sín k'uájiko ch'án la ko nchónhya chojni k'uaxrjexín sín tí chjasin ntiha. Ntá ntiha tjen ijnko ch'ín t'ikonhya mé it'in ch'án Bartimeo ntá it'é ch'án mé it'in Timeo. Tjetjāxin ch'án chrínta ntīa tjanchak'á ch'án. ⁴⁷ Ntá kuínhin tí ch'ín t'ikonhya kixin ó kuichjina ch'ín Jesús, mé tí nkexro kjuixín chjasin Nazaret, ntá tí ch'ín t'ikonhya kjuankixin t'èya ch'án ntáchro ch'án kixin:

—Jaha Jesús, tsík'axrjeníxian ch'ín David tikonóehéni —ichro ch'án.

⁴⁸ Ntá nchónhya sín k'uetūenhen sín ch'án kixin tsotání ch'án. Ntá íchá antsí má tsen t'èya ch'án ntáchro ch'án kixin:

—Jaha, tsík'axrjeníxian ch'ín David tikonóehéni —ichro ch'án.

⁴⁹ Ntá ntahó kjuák'e ch'ín Jesús. Ntá k'uetōan ch'án kixin:

—T'iyehérá tí ch'ín a —ichro ch'án.

Ntá k'uíyehé sín tí ch'ín t'ikonhya ntá chénka sín ch'án kixin:

—Tócháha la t'inkatjen kixin tjet'iyāha ch'án. —ichro sín.

⁵⁰ Ntá kjuak'ē ch'án tí ka tītsáte ch'án ntá chrika k'uínkatjen ch'án kóchjinehe ch'án tí tjen ch'ín Jesús. ⁵¹ Ntá ch'ín Jesús kjuanchankíhi ch'án tí ch'ín a kixin:

—¿Xá nkehe tjnkávan chrókjuīt'ahá? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Maestro, tjinkaonni kixin chrók'uikonni —ichro ch'án.

⁵² Ntá ntáche ch'ín Jesús tí ch'ín a kixin:

—Ijie la jína sátsjia. Ó kuítōha jína kixin kuítekávan tí janhan —ichro ch'án.

Ntá tuénxín tí ch'ín t'ikonhya la ó k'uíkon ch'án ntá chréhe ch'án tí ch'ín Jesús.

11

*Ntá ch'ín Jesús k'uíxenh ch'án chjasin Jerusalén
(Mt. 21.1-11; Lc. 19.28-40; Jn. 12.12-19)*

¹ Ntá tió kjuíji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jna Olivo ntá k'uetuēnhen ch'ín Jesús iyó tí sín k'uájiko ch'án, ² ntáchro ch'án kixin:

—Sátjirá tí chjasin ntsi chok'èxin ntiha. Ntá ikon chjasin ts'ikonrá kixin ntaha tjechroé ijnko kolócho naxa ninkexró tjiták'áhya va. Ntá tjasintankehéra va ntá tsjikoanará va ntihi. ³ A ntá tí jnkójín chojni tsjanchankíhará sín kixin nkekuènté xikaha ch'erá ntá tsontáchrórá kixin: “Tí Maestro mé t'ichjánxinhin va ntá tió tsoxéhe va la tsjikaáni va”, ichrorá —ichro ch'án.

⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehe sín va. ⁵ Ntá iso tí chojni tjejó ntiha kjuanchankí sín kixin:

—¿Nkekuènté xikaha ch'erá tjasintankehéra tí kolócho a? —mé chro sín.

⁶ Ntá kjuatēxín sín éxí k'uetoan ch'ín Jesús. Ntá kjuanjón sín kjuachaxin sátsjiko sín va. ⁷ Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús. ⁸ Ntá itsjé chojni kuakitsje sín iké sín la kjuentoá sín tinkák'ikjínxín sín ka tí ntja ts'atsínkaxín ch'án. Ntá iso sín la mé tóchrínjin sín chaon nta itsá kayoa ntá xráqo sín tinkát'itjí sín ntja.

⁹ A ntá tí sín tsítaón ntja la ko tí sín chréhe iton kjuankixin sín itsje sín chéhe sín ntáchro sín kixin:

—Tsjancheheni kjuasáyé Dios. Jína tí nkexro kujixín kjuachaxin ihnjé Ìnchéni. ¹⁰ Jína tí kjuachaxiēn Dios itsi mé ts'etuēnhen tí nkexro k'uaxrjeníxín it'èni David. Ntá tsjancheheni kjuasáyé Dios tjen nkaya nkajní —ichro sín.

¹¹ Ntá k'uíxenh ch'ín Jesús chjasin Jerusalén la ko kjaxin k'uíxenh ch'án tí nínko jíé tsjehe ch'án nkuíxín tí nkaxenh. Ntá ó kóntó ntá ch'ín Jesús sákjuíko ch'án tí teyó sín k'uájiko ch'án sákjuí sín chjasin Betania.

*Ch'ín Jesús kónínkakonhen ch'án ijnko nta t'óna to higo tsík'ónahya to
(Mt. 21.18-19)*

¹² A ntá tí kóyaon ntá kjanxín sín chjasin Betania ntá ch'ín Jesús mé k'uén ch'án kjinta. ¹³ Ntá k'uíkon ch'án kjin kixin itjen ijnko nta t'óna to higo itsá kayoa. Ntá sákjuítsjehe ch'án tí nta kixin ákué tsahya to. Ntá k'uíkon ch'án kixin jehó ka itsa tí nta a kixin jehya tí yaon ts'óna to. ¹⁴ Ntá nixjéhe ch'ín Jesús tí nta t'óna to higo k'uetuēnhen ch'án tí nta kixin:

—Í ninkexró sinehya tí to ts'óna tí jaha inaá —ichro ch'án.

A ntá tí sín k'uájiko ch'án mé kuínhin sín xikaha.

*Ch'ín Jesús kjuínchetjóá ch'án nínko
(Mt. 21.12-17; Lc. 19.45-48; Jn. 2.13-22)*

¹⁵ Ntá kjuíji sín chjasin Jerusalén. Ntá k'uíxenh ch'ín Jesús nkaxenh nínko a. Ntá kjuankixin ch'án k'uinkité ch'án tí sín nchekjixín nkehe ntiha la ko tí sín t'èna nkehe ntiha. A ntá kótéka ch'án tí mesa tjínkítóxixín sín chichaon la ko tí silla tjejókjen tí sín nchekji kontóá ¹⁶ la ko kjuanjónhya

ch'án kjuachaxin kixin tsamá sín nkehe ts'ajixenhen sín n̄nko. ¹⁷ Ntá kjuakohe ch'án sín ntáchro ch'án kixin:

—Ntáchro xroon itén Dios kixin: “Tí ntóna i mé it'in nchia tsonixjanaxín chojni nkuíxín nación”, a ntá jahará tsíkjach'énará itjuéé xíchee* —ichro ch'án.

¹⁸ Ntá tí sín ncha't'á t'etoan la ko tí sín maestro tjako tí ley na mé kuínhin sín tíha, ntá kjueyá sín nkexrí chrók'óyán sín ch'án, kjánchó chrakon sín kixin kóxrjínhin tí chojni tí nkehe kjuako ch'án. ¹⁹ Kjánchó ntá ó kóntó ntá k'uaxrjexín ch'án tí chjasin a sákjuí ch'án.

Ó tsíxámá tí nta t'óna to higo

(Mt. 21.20-22)

²⁰ A ntá tí nchítjen k'uátsínka sín tí tjen tí nta t'óna to higo ntá k'uikon sín kixin ó tsíxámáxin nuèè tí nta. ²¹ A ntá ch'ín Pedro xráxinkaon ch'án ntáche ch'án tí ch'ín Jesús kixin:

—Maestro, tsjehé tí nta t'óna to higo kónínkakohén jna na ó tsíxámá nta —ichro ch'án.

²² Ntá kjuátehe ch'ín Jesús ntáchro ch'án kixin:

—Tinkachónkirá Dios. ²³ Chaxín ntáxrjan kixin jnkojínrá chróntácherá tí jna i kixin: “Sátjixián ntihi tjíkjiánkiá ntayaon”, a ntá tí kaín asánrá chrókujinachónkirá Dios kixin chróxiteyá tí nkehe tsontáchorá, ntá xikaha chaxín tsonhen. ²⁴ Mé xikaha ntáxrjan kixin kaín tí nkehe tsjancheherá Dios tí tsítekáonrá kixin chaxín ts'ayéherá ntá xikaha tsonhen tsoxiteyá. ²⁵ A ntá tió tjejonixjehérá Dios ntá jnkojín nkexro naxa ninkákonhénrá, la chrók'uitjáyahanhárá tíha kixin It'ará tjen nkaya nkajní kjaxin chrókjuinçek'itjáyan ch'án tí jie chontará. ²⁶ A ntá tí sinçek'itjáyanyhárá tí ijje chojni ntá It'ará tjen nkaya nkajní la kjaxin sinçek'itjáyanyhá ch'án tí jie chontará.

Tjanchankíhi sín tí ch'ín Jesús nkehe tí kjuachaxin chóna ch'án

(Mt. 21.23-27; Lc. 20.1-8)

²⁷ Ntá xíkjan sín chjasin Jerusalén inaá. Ntá xritjak'e ch'án nkaxenhen n̄nko ntá kóchjina tí sín ncha't'á t'etoan la ko tí sín tjako tí ley la ko tí sín táda t'etoan n̄nko ²⁸ kjuanchankíhi sín ch'án kixin:

—¿Nkehe tí kjuachaxin chonta jaha kixin xikaha ch'e? ¿Nkexro tjáha tí kjuachaxin kixin xikaha kjuich'e? —ichro sín.

²⁹ Ntá kjuátehe ch'ín Jesús ntáchro ch'án kixin:

—Ntá kjaxin janhan tsjánchánkíhárá ijnko nkehe, siná á chrókjuáteherá, ntá tsotjónkará nkehe tí kjuachaxin chonta janhan kixin xikaha it'a. ³⁰ ¿A ntá nkexro k'uętuęnhen ch'ín Juan kixin tsíkite ch'án chojni? ¿Á Dios ní ó á chojni ó? A ntá jie la jtáteherá —ichro ch'án.

³¹ Ntá kjuankixin jehó sín tjo sín kichó sín kixin:

—Tí tsontáchroni kixin Dios tsík'ętuęnhen tí ch'ín Juan ntá tsjanchankí tí ch'ín a kixin nkekuènté kuítekakuęnyani ch'án. ³² ¿Á chróntáchroni kixin chojni ó tsík'ętuęnhen ch'án? —ichro sín.

Kjánchó chrakonhen sín tí chojni chjasin kixin kaín sín kuítekaon sín kixin ch'ín Juan mé k'uénixja ch'án itén Dios. ³³ Ntá ntáche sín tí ch'ín Jesús kixin:

—Noehyani —ichro sín.

Ntá ntáchro ch'ín Jesús kixin:

* 11:17 Isaías 56.7; Jeremías 7.11

—La ko kjaxin janhan tsoxrjankahya nkexro kjuanjon kjuachaxin kixin xikaha t'a —ichro ch'án.

12

Ch'ín Jesús mé kjuíncheyóexin ch'án éxí chojni ch'ehya xra jína
(Mt. 21.33-46; Lc. 20.9-19)

¹ Ntá ch'ín Jesús kjuíncheyóexin ch'án inaá ntáchro ch'án kixin:

—Itjen ijnko ch'ín k'uenkaxin ch'án itsjé ntanòda t'óna to uva nontee ch'án la ko kjuích'éna ch'án corral la ko kjuích'éna ch'án ijnko tòye ts'énya sín to uva. A ntá kjuích'éna ch'án ijnko tjat'o noi kixin ts'it'ótjen ch'án tsokotohe ch'án.

A ntá kjuínchekjen ch'án tí nonte iso chojni ch'e xra. Ntá sákjuí ch'án kjín. ² Ntá tí kjuixraká tí yaon ts'óna to ntá k'uetuñhen ch'án ijnko tí nkexro ch'ehe ch'án xra kixin sátsjikjanchehe ch'án tí sín ch'e xra jnkosiné tí to tsakja ch'án. ³ Ntá tí sín ch'e xra mé tsé sín tí ch'ín a, kjuate sín ch'án ntá ninkehó chjéhya sín ch'án ntá sákjuí ch'án. ⁴ A ntá tí ìnehé tí nonte mé xíchr'án ch'án tí í jnko nkexro ch'ehe ch'án xra. Ntá kjuíji ch'án ntiha ntá chjéhe sín ch'án xro kjuíncheníhi sín kja ch'án la ko k'uántaxínhin sín ch'án. ⁵ Ntá tí ìnehé tí nonte a xíchr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí ìnehé mé xíchr'án ch'án í so nkexro ch'ehe ch'án xra sákjuitsjehe sín, kjánchó iso sín k'uékon sín la í so sín la k'óyán sín.

⁶ Ntá jehe ch'án chóna ch'án jnkokoaxón xjeen ch'án na imá tjuèhe ch'án tí xjan a. Ntá kjuixixín chr'án ch'án tí xjan sákjuí xjan kixin kjuenkayáxin ch'án kixin: “Tsochóntehe sín kjuasáyé tí xjanna”, ichro ch'án. ⁷ A ntá tí sín ch'e xra a tjo sín kíchó sín kixin: “Tí ch'ín i mé ts'áyéhe kaín nkehe siín ntihi. A ntá jie ts'óyanni ch'án, a ntá jeheni ts'áyéheni kaín tí nkehe a”, ichro sín. ⁸ Ntá xikaha itsé sín ch'án k'óyán sín ch'án ntá kuakitsjexín sín ntoe ch'án tí nontee ch'án.

⁹ A ntá kjuanchankí ch'ín Jesús ntáchro ch'án kixin:

—¿A ntá nkehe chrókuich'e tí ìnehé tí nonte a? Chrókui ch'án chrók'óyán ch'án tí sín ch'e xra, a ntá chróchjéhe ch'án ókjé chojni.*

¹⁰ ¿A kjuínchekuáxinhyará jahará tí xroon itén Dios? Ntáchro xikihí: Tí xro náxrjónhya kuitóenta tí sín ch'éna tjat'o, mé jie k'óna tí xro tjeoan.

¹¹ Mé xikaha kjuích'é Ìnehéni Dios,

na ntá tíha mé ijnko nkehe kjuachrakon k'uíkonnit —ichro ch'ín Jesús.

¹² Ntá chrótsé sín tí ch'ín Jesús chrókuak'echjina sín ch'án kixin kíenxín sín kixin kaín tí ntáchro ch'án la jehe ch'án k'uántaxínhin tí jehe sín. Kjánchó chrakon sín kixin nchónhya chojni kóchjina ntá kuitóhe sín ch'án ntá sákjuí sín.

¿A jína chrókuenkehe sín gobiernó?
(Mt. 22.15-22; Lc. 20.20-26)

¹³ A ntá ichr'án sín iso tí sín fariseo la ko iso tí sín kuènte ch'ín Herodes kixin tsjanchankíhi sín ch'án iso nkehe kixin tí ntoáhya chrókuatehe ch'án ntá jína chrók'ueka sín ch'án jie. ¹⁴ Ntá kjuíji sín tí tjen ch'ín Jesús ntáchro sín kixin:

* **12:9** Isaías 5.1-7 † **12:11** Salmo 118.22-23

—Maestro, ó noheni kixin tí nkehe chronka la chaxín tíha la ko jehya nkexrí tsjehe chojni tjenkayáxixián kixin á jína sín, la ko ntoá tjákua ntje Dios. ¿Á jína chrókjuenkeheni tí gobierno tí chichaon tjanchia? ¿Á chrókjuenkeheni sín ní o náhi? —ichro sín.

¹⁵ Ntá ch'ín Jesús kjuátsoan ch'án kixin jehya jína tjenkayáxin sín ntáchro ch'án kixin:

—Jehya jína kixin tjáchaxinráni. Xrákəará ijnko tí chichaon tjanchia sín tsotsjáha —ichro ch'án.

¹⁶ Ntá xrákəo sín ijnko tí chichaon tsotsjehe ch'án. A ntá kjuanchankí ch'án kixin:

—¿Nkexro tí tsík'axrjexín tjenkání tí chichaon i la ko nkexro ihnié chóna? —ichro ch'án.

Ntá jehe sín kjuátəhe sín kixin:

—Tí ch'ín t'ətoan mé tjenkání ch'án —ichro sín.

¹⁷ Ntá kjuátəhe ch'ín Jesús ntáchro ch'án kixin:

—Chróchjehérá tí ch'ín gobierno t'ətoan tí nkehe kuente ch'án; a ntá tí nkehe kuente Dios la chróchjehérá Dios —ichro ch'án.

Ntá chrakon sín kixin xikaha kjuátəhe ch'án.

Kjuanchankí sín kixin á chaxín tsoxechón chojni
(Mt. 22.23-33; Lc. 20.27-40)

¹⁸ A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kixin chaxínhya tsoxechón chojni tsík'en mé xikaha chrókjuachaxin sín tí ch'ín Jesús ntáchro sín kixin:

¹⁹ —Maestro, ch'ín Moisés mé tsíkjin ch'án xroon ntáchro kixin tí ts'en ijnko savé chojni la ko naxa tjen tí ichjién ch'án na ko tsíkjich'énahya sín xjeen sín ntá tí kichó tí nkexro tsík'en mé chrókuakja tí tjan k'án a ntá tí xjeen sín mé ts'óna éxi xjeen tí nkexro tsík'en.† ²⁰ Kjánchó k'uéjó yato sín jnkokəá kichó sín. Ntá tí ch'ín saə mé kuákja ch'án ichjién ch'án. Ntá ik'uén ch'án, kjánchó ninkehó xjan tsíkjich'énahya sín. ²¹ Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá kjaxin tsíkjich'énahya sín xjan. A ntá tí ch'ín nixin kuákja ch'án tí jehe tjan ntá xikaha kónhen inaá. ²² Ntá kayatoé sín k'uéchóna sín tjan la ko kaín sín ik'uén sín la ko ninkehó xjan kjuích'énahya sín kaín sín. Ntá kjuixixín ntá k'uén tjan kjaxin tjan. ²³ Ntá tió tsoxechón kaín xín chojni la, ¿Ntá nkexro ts'óna xii tjan kixin kayatoé sín tsíkótehe tjan? —ichro sín.

²⁴ Ntá kjuátəhe ch'ín Jesús ntáchro ch'án kixin:

—Ntoáhya tjenkayáxinrá kixin tiénxinhyará nkehe ntáchro tí xroon itén Dios la ko chonhyará tí kjuachaxién Dios. ²⁵ A ntá tió tsoxechón tí chojni tsík'en la tsəteehya sín la ko tsjanjonhya sín xjeen sín kixin tsətehe sín kixin tí sín tsík'en la éxi sín ángel ts'ejó sín nkaya nkajní. ²⁶ A ntá tí tsoxechón tí sín tsík'en, ¿a kjuinchekuáxinhyará tí xroon tsíkjin ch'ín Moisés chrónka nkexrí k'uénixjeexín Dios ijnko nta yoa tjeche ntáchro ch'án xikihi: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob”?§ ²⁷ Méxra tí Dios i la jehya tinkáchónki tí sín tsík'en. Náhi. Jehe ch'án mé Dios tinkáchónki tí sín tjejóchón. Ntá jahará la imá tiénxinhyará kixin xikaha ichrorá tjanchankirá —ichro ch'án.

Tí nkehe antsí imá tjeətoan tsík'ətoan Dios
(Mt. 22.34-40)

28 Ntá kui ijnko ch'ín tjako tí ley kjuák'ekinhin ch'án nkexrí kjuachaxín sín ch'ín Jesús. Ntá kuínhin ch'án kixin imá jína kjuátehe ch'ín Jesús. Ntá kjuanchankí ch'án ntáchro ch'án kixin:

—¿Nkehe tí antsí tjetóan tsík'etóan Dios? —ichro ch'án.

29 Ntá kjuátehe ch'ín Jesús ntáchro ch'án kixin:

—Tí nkehe antsí tjetóan tsík'etóan Dios mé tíhi: “Tinhínrá kaín rá chojni Israel kixin Ìnchéni Dios la mé jnkokoá la kohya í jnko nkexro. 30 Ntá kaín asánrá la ko kaín kjuaxrexinkaon kuèntará la ko kaín fuerza kuèntará chrótjuèxínrá.”* Mé xíkaha tí nkehe antsí tjetóan tsík'etóan Dios. 31 A ntá tí nkehe yóxin tsík'etóan Dios la mé tóyohé na mé ntáchro xíkíhi: “Chrótjuèhérá kichuára éxí tjuèxínrá asánrá,”† la kohya í jnko nkehe antsí má tjetóan tsík'etóan ch'án —ichro ch'ín Jesús.

32 A ntá kjuátehe tí ch'ín tjako nínko a ntáchro ch'án kixin:

—Ntoá ntáchrúa tíha, Maestro kixin chaxín itjen jnkokoáxón Dios la ko kohya í jnko Dios.‡ 33 Noheni kixin kaín asénni la ko kaín kjuaxrexinkaon kuènténi la ko kaín fuerza kuènténi chrótjuèxinni Dios la ko chrótjuèheni kichó ni éxí tjuèxinni asénni.§ Tíha mé antsí má sínkí. A ntá kaín tí ko chrók'óyánni chrókjuanjónni chróchjánxin chrítaón altar la kánhyó tjetóan tíha —ichro ch'án.

34 A ntá tió k'uúikon ch'ín Jesús kixin jína kjuenkayáxin ch'án kjuátehe ch'án ntá ntáchro ch'án kixin:

—Jaha la kjinhya tjen tí kjuachaxin kuènte Dios —ichro ch'án.

Ntá kóxakonhen sín ntá ninkexró kjuanchankíehya sín ch'án í so nkehe.

¿Xá nkexro It'é tí Cristo?

(Mt. 22.41-46; Lc. 20.41-44)

35 Ntá ch'ín Jesús kjuák'ekjako ch'án tí nínko jíé. Ntá kjuanchankí ch'án ntáchro ch'án kixin:

—¿Nkexrí kixin tí sín tjako tí ley mé ntáchro sín kixin tí Cristo mé ts'axrjeníxin tí ch'ín David? 36 A ntá tí Nchakuen Dios mé kjuínkítsa tí ch'ín David ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntihó tsétoan,

tsjixinjian kaín xín tí sín nínkakonhan la tsjachahya sín ts'etóan sín kixin jahvá mé tsétoan”*

37 ¿Xá nkexrí kixin Cristo chrók'óna xjeen ch'ín David kixin jehe ch'ín David ntáchro ch'án kixin Ìnché ch'án tí Cristo a? —ichro ch'án.

Ntá itsjé chojni k'uéjókinhin sín kóxrjínhin sín tí nkehe kjuako ch'án.

Ch'ín Jesús chrónka nkexrí ch'e tí sín tjako tí ley

(Mt. 23.1-36; Lc. 11.37-54; 20.45-47)

38 Ntá ch'ín Jesús kjuako ch'án ntáchro ch'án kixin:

—Tankíehyará tí sín tjako tí ley. Jehe sín mé tóxrjínhin sín chrók'uinkáya sín ka kjinjin la ko tjinkaon sín kixin kaín tí chojni tsoxeta sín ntía mé tsjikosáyehe sín. 39 Jehe sín xritjeyá sín tí nta antsí náxrjón ts'ejóyá sín tí nkaxenhen nínko. La ko kjaxin tió sátsji sín tí sine sín xritjeyá sín tí nta antsí náxrjón ts'ejóksen sín sine sín. 40 La ko takitsje sín ntóe chojni k'án. La ko ch'iyexín sín chojni kixin isé nixjehé sín Dios kixin chrókuinhin chojni

* 12:30 Deuteronomio 6.4-5 † 12:31 Levítico 19.18 ‡ 12:32 Deuteronomio 4.35 § 12:33

Oseas 6.6 * 12:36 Salmo 110.1

chróntáchro sín kixin imá jína tí jehe sín. Tí sín a mé antsí má tsjasóte sín —ichro ch'án.

Tí ofrenda kjuanjon ijnko tjan k'án

(Lc. 21.1-4)

⁴¹ A ntá jnkonaá mé ch'ín Jesús tjetjaxin ch'án nkaxenhen ninko chók'èxin tjen tí ntacajón tjetóxroyéya ofrenda. Ntá tjetsjehe ch'án kixin nchónhya chojni tinkáki sín chr'áxenhen sín chichaon tí ntacajón. La ko kjaxin nchónhya tí sín rico chr'áxenhen sín nchónhya chichaon tí ntacajón a. ⁴² Ntá kjaxin ntiha mé kjuí ijnko tjan k'án nòa tjan ntá chr'áxenhen tjan tí ntacajón yaá chichaon kánhyó tjete sínkí. ⁴³ Ntá ch'ín Jesús k'uíyēhe ch'án tí sín k'uájiko ch'án ntáchro ch'án kixin:

—Chaxín ntáxrjan kixin tí tjan k'án nòa tjan antsí tjete k'uíkon Dios tí chichaon chr'áxenhen tjan tí ntacajón, a ntá tí sín í so la kánhyó ⁴⁴ kixin kaín sín la ó chichaon xéhe sín kjuanjon sín. Ntá jehe tjan la kjónté nòa tjan la kjuanjon tjan kaín tí chichaon k'uéchóna tjan chrók'uíte nkehe chrókjone tjan —ichro ch'án.

13

Ch'ín Jesús chrónka kixin tsqxika ninko

(Mt. 24.1-2; Lc. 21.5-6)

¹ A ntá tió k'uaxrjexin ch'ín Jesús tí ninko jié ntá ijnko tí sín k'uájiko ch'án ntáchro ch'án kixin:

—Maestro, kjuánchí náxrjón tí xro la ko tí nchia tsík'óna —ichro ch'án.

² Ntá kjuátehe ch'ín Jesús ntáchro ch'án kixin:

—¿Á tsjehé jaha tí nchia jié tsík'óna ní? Tsjixraká tí yaon la í ninkehó xro ts'ejókjenhya kichó, la kaín tíha la tsqxika —ichro ch'án.

Tí nkehe tsonhen chjina tí tsjixixín

(Mt. 24.3-28; Lc. 21.7-24; 17.22-24)

³ A ntá sákjuí sín chrítaón tí jna Olivo chók'èxin tjen tí ninko a. Ntiha kjuák'etjaxin ch'ín Jesús. Ntá ntiha ch'ín Pedro, la ko ch'ín Jacobo, la ko ch'ín Juan, la ko ch'ín Andrés kjuanchankíhi sín ch'án nkehe, ntáchro sín kixin:

⁴ —Tjinkaonni tschronka nkesá tsonhen tíha la ko nkexrí tsonoxínni nkesá tsoxiteyá kaín tíha —ichro sín.

⁵ Ntá ch'ín Jesús kjuátehe ch'án ntáchro ch'án kixin:

—Tóxakonhanrá tjtóéhyará kixin ninkexró chrókjuít'ayahyará.

⁶ Nchónhya chojni tsi tsontáchro sín kixin jehe sín mé Cristo. Ntá xikaha sich'iyehe sín nchónhya chojni.

⁷ A ntá tió tsinhínrá kixin tjanjonko kichó sín la t'óyán kichó sín la chrakonhyará tóxakuanhyará ó jehí tsonhen tíha. Kjónté xikaha naxa tsjejehya chjasintajni. ⁸ Ijnko nación tsjanjonko í jnko nación. La ntiha la ntaha la tsinkí nonte la ko itsjé chjasin na tsokjinta la ko ts'ixité sín tsonínkaon sín. Tíha na ntá xrankixixón tí kjuatjoté.

⁹ Tóxakonhanrá jahará kixin mé tsjikaánrá sín nkayakon tí sín t'etōan ntá tí nkaxenhen ninko ntiha mé tsjatiaxínrá sín. Jahará t'ichjánxin tsochjinará tí tjejó tí sín gobernador la ko tí sín rey kixin tinkachónkirá tí janhan; ntá tsjachará tsochronkará nkexrí tinkachónkirá tí janhan nkayakon tí jehe sín. ¹⁰ Tí naxa ts'itjáyanyha chjasintajni la mé t'ichjánxin tsinhin chojni kaín xín nación tí tan jína tsaáxin sín. ¹¹ Tió sátsjikoará sín tsjikaánrá sín tí tjejó tí sín t'etōan, la tóxakuanhyará nkehe tsjateherá

la ko nkehe tsjenkayáxinrá. Náhi. Chronkará tí nkehe kjuanjon Dios tsontáchrórá tí hora a, kixin jahyará tsonixjará. Náhi. Nchakuen Dios mé tsonixja. ¹² Iso chojni kjónté naxa kjéhya sín tsjikaán tí kichó sín kixin its'en. La ko kjaxin xikaha iso chojni tsjikaán tí xjeen sín la ko kjaxin iso sín tsonínkakonhen sín tí it'é la ko ìné la tsjikaán sín kixin its'en. ¹³ Kaínxín chojni chjasintajni tsonínkakonhanrá sín kixin tinkachónkirá tí janhan. A ntá tí sín tsítqehya tinkáchónki sín tí janhan hasta tsjixixín ná mé tsaá sín.

¹⁴ 'Tsjixraká ijnko yaon ts'ikonrá tsjak'e tí nkehe jínahya tí chrókjuak'ehya éxí tsintáchró profeta Daniel* —ntá tí chojni sinchekuáxin tí xroon i mé chrókuienxín sín tíha—, a ntá tí chojni tjejó estado Judea ts'ikon sín xikaha la sátsji sín tsochrin sín jna tsjik'ejómá sín. ¹⁵ A ntá tí sín tjejó chrítaón nchia la í chrók'uínkajinhya sín, chrók'uixenhya sín nkaxenhen nchia chrókuakitsje sín ichrén nkehe chóna sín. ¹⁶ Ntá tí sín tjejó nontee sín la í chrókjanhya sín naxa chrókjuikakja sín iké sín. ¹⁷ Ntá nòa tí chojni chjin ts'ejóyá tí yaon a la ko tí sín tjejónchekakí xjeen. ¹⁸ Chrókjuancheherá Dios kixin jehya nchakuen kin chrókónhen tíha. ¹⁹ A ntá tí yaon a mé imá kjuaxróxinhya ts'ejó chojni kixin ninkehó yaon kuènhya xikaha desde ti kjuankixixín Dios kjuích'éna ch'án chjasintajni la ko kjá xikahya tsonhen chr'éxin inaá. ²⁰ A ntá tí chrókjuanjon Ìnchéni Dios kjuachaxin kixin isé chrókónhen tíha, ntá ninxeró chrókjuacha chrókuaá. A ntá náhi la kuíkonóhē ch'án tí sín tsíkjejá ch'án ntá k'uetqan ch'án kixin tjoka ts'atsínka tí kjuachrakon a.

²¹ A ntá jnkojin nkexo tsontáchró kixin: “Tsjehe, ntihi itjen tí Cristo”, o tsontáchró sín kixin: “Tsjehe, ntiha tjen ch'án”, la títekákuènyhará sín. ²² Na mé itsi iso sín tsontáchró sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jíe tjinkaon sín chrókjuich'iyexín sín chojni, kjónté tí sín tsíkjejá Dios. ²³ A ntá jahará chroxakonhanrá kaín tíha. Tjéjtonkará senó kixin tsonohará kixin xikaha tsonhen.

Itsi tí Xjeen Dios K'óna Chojni

(Mt. 24.29-35, 42-44; Lc. 21.25-36)

²⁴ Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi. ²⁵ A ntá tí konotsé la ts'anótjenxín nkajni la ko tí kjuachaxin siín nkaya nkajni la kjaxin tsinkí. ²⁶ Ntá ts'ikon sín tí Xjeen Dios K'óna Chojni itsi chríkjan tjuj tsíkao tí kjuachaxin jíe. ²⁷ Ntá tsochr'án ch'án tí sín ángel sátsji sín kuenté chjasintajni tsjikjenájín sín kaín chojni tsíkjejá ch'án.

²⁸ Chrókiénxinrá tí nkehe sintayóaxian. Éxí yóhe tí nta t'óna to higo tió sít'ayan kahntē ntá nohará kixin ts'ixenhen nchakuen sóa ²⁹ mé xikaha tió ts'ikonrá xikaha tsonhen kaín tíha ntá tsonoxínrá kixin ó kuichjina tí tsjeje chjasintajni. ³⁰ Chaxín ntáxrjan kixin kaín tíha tsonhen tí naxa t'enhya tí chojni siín chjasintajni. ³¹ A ntá tí nkajni la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

³² A ntá tí yaon la tí hora tsoxiteyá tíha la ninxeró noehya. Kjaxin noehya tí sín ángel tjejó nkaya nkajni la ko kjaxin tí Xjeen Dios K'óna Chojni la noehya. Ó jehó It'eni mé nohe.

³³ Méxra chrók'uejotsjehérá, chrók'uejochonhénrá chrónixjehérá Dios kixin noahyará nkesá la ko nkehora tsonhen tíha. ³⁴ Éxí yóhe ijnko

* 13:14 Daniel 9.27; 11.31; 12.11

chojni sátsji kjín, a ntá tí naxa sátxixínhya ch'án ntøe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntøe ch'án, la jnkojnko sín ts'áyéhe sín jnkojnko xra kuente sín. La ko ts'etuenhen ch'án ijnko ch'ín tsjak'e ts'ayakonhen ch'án tí ntója nchia. ³⁵ Méxra jahará chrók'uejotsjehérá kixin noahyará nkesá tsokjan tí inché tí nchia a, á ijnko tsontanonte o á ijnko k'áxrótjen o á ijnko tjetee tsje cochiká o á ijnko ts'inkaséyan. ³⁶ Ntá xrinahya tsi ch'án ts'itjaxín ch'án kixin tjejochrinrá. ³⁷ Mé xikaha tjonkará la ko xikaha ntátjan kaín chojni kixin chrók'uejótsehe sín —ichro ch'án.

14

Tjoyá sín kixin nkexrí tsotsé sín tí ch'ín Jesús
(Mt. 26.1-5; Lc. 22.1-2; Jn. 11.45-53)

¹ Naxa t'itjáyan iyó yaon ntá tsjasin sín tí kia pascua, la ko sine sín tí niotja tsíkjhohya tí xroan nchek'ánki niotja.

Ntá tí sín nchat'á t'etøan la ko tí sín maestro tjako tí ley mé kjueyá sín kixin nkexrí sich'iyehé sín tí ch'ín Jesús kixin tsotsé sín ch'án a ntá ts'óyan sín ch'án. ² Ntá ntáchro sín kixin:

—Kjánchó jehya yaon kia chrókónhen tíha kixin chrók'uixitéhya chojni chrókóninkaon sín —ichro sín.

Ijnko tjan kuikitexin aceite náxrjón xraxé ikja ch'ín Jesús
(Mt. 26.6-13; Jn. 12.1-8)

³ A ntá ch'ín Jesús kjuák'e ch'án chjasin Betania ntøe ch'ín Simón, tí ch'ín k'uéchóna chinlepra. A ntá tí tjene ch'ín Jesús ntá xrinahya ikui ijnko tjan kuikao tjan ijnko xro mé tjáa tí aceite xraxé itsjo nardo, imá tjete tsík'ite. Ntá tí tjan a mé kuakitjehé tjan tí xro a ntá kuikite tjan kja ch'ín Jesús tí aceite a. ⁴ A ntá iso tí sín tjejó ntiha kónínkakohen sín tjan ntáchro sín kixin:

—¿Nkekuente kjuínchexénhen tjan tí aceite náxrjón xraxé? ⁵ Íchá jína chrókóxiin iní ciento chichaon denario tí aceite a ntá tí chichaon a mé chrókuitønhén tí chojni nòa —mé xikaha ichro sín k'uántaxínhin sín tjan.

⁶ Ntá ntáchro ch'ín Jesús kixin:

—Nté tjtøherá tjan; ¿nkekuente t'antaxínhínrá tjan? Ó nchøxon tí nkehe kjuích'ena tjan. ⁷ A ntá tí chojni nòa la ó xráxín ts'ejókoará sín la jína tsjínkítará sín jnkójín yaon. Ntá janhan la jnkochríxínhya ts'ejóni. ⁸ Ntá jehe tjan kjuích'e tjan kaín nkehe tjinkaon tjan tsjanjon tjan. Ó senó kjuíncheka tjan xroan cuerpo kuéntana kixin tsoxravána. ⁹ Chaxín ntáxrjan kixin tí tsjako sín tí tan jína tsaáxin chojni nkuíxín chjasintajni ntá tsochronka sín kixin xikaha kjuích'e tí jehe tjan, a ntá xikaha tsoxraxinkakonxín sín tjan kixin xikaha kjuích'e tjan —ichro ch'án.

Ch'ín Judas kjuínchekji ch'án tí ch'ín Jesús
(Mt. 26.14-16; Lc. 22.3-6)

¹⁰ A ntá ch'ín Judas Iscariote mé ijnko teyóxin sín k'uájiko ch'ín Jesús a mé sákjuitsjehe ch'án tí sín nchat'á t'etøan kixin tsochronka ch'án nkexrí tsotsé sín tí ch'ín Jesús. ¹¹ A ntá jehe sín la chéhe sín kuínhin sín ntá ntáchro sín kixin chaxín tsjanjon sín chichaon ts'áyéhe tí ch'ín Judas. Ntá kjuankíxín ch'án kjueyá ch'án nkexrí tsochronka ch'án kixin tsotsé sín tí ch'ín Jesús.

Kjóneko sín tí ch'ín Jesús
(Mt. 26.17-29; Lc. 22.7-23; Jn. 13.2-30; 1 Co. 11.23-26)

12 **A** ntá kui tí yaon xrankíxixín kia sine sín niotja tsíkjikohya tí xroan nchek'ánkí nio tió ts'óyán sín tí kolélo kuènte kia pascua. **A** ntá tí sín k'uájiko ch'ín Jesús mé kjuanchankíhi sín ch'án kixin:

—¿Nketí tjinkásan sátsjini sincheyaxíxinni kixin sineni kuènte tí kia pascua? —ichro sín.

13 Ntá k'uetuenhen ch'án iyó tí sín k'uájiko ch'án ntáchro ch'án kixin:

—Sátjirá chjasin Jerusalén ntá ntiha tsoxetará ijnko ch'ín yámá tóa tjiá ntá. Tí ch'ín a tsochréhérá. 14 **A** ntá tí nchia ts'ixenhen ch'án la tsjanchankíhírá tí inché nchia, tsontáchrórá kixin: “K'uetōan tí Maestro kixin: ¿Nketí tjen tí cuarto sinexínko ch'án tí sín xriko ch'án tí kia pascua a?”, xíkaha mé tsixrorá. 15 Ntá tsjakohará ch'án ijnko cuarto jíé, yóxin piso mé chóna kaín nkehe t'ichjánxin. Mé ntaha mé sincheyaxíxínrá tí nkehe sineni —ichro ch'án.

16 Ntá jehe sín la sákjuí sín chjasin Jerusalén na ntá éxí chrónka ch'ín Jesús mé xíkaha k'uitja sín. Ntá tí cuarto a mé kjuincheyaxíxin sín tí nkehe sine sín kuènte tí kia pascua.

17 **A** ntá ó kóntó ntá ó kjuíji ch'ín Jesús la ko tí teyó sín k'uájiko ch'án tí nchia ntiha. 18 Ntá k'uéjé sín, a ntá tió tjejóne sín ntá ntáchro ch'ín Jesús kixin:

—Chaxín ntáxrjan kixin ijnko tí jahará tjejóne jnkokoá ntihi mé sinchekjiráni —ichro ch'án.

19 Ntá jehe sín mé kjuankíxin k'uává sín. Ntá kjuankíxin sín jnkójnko kjuanchankíhi sín tí jehe ch'án kixin:

—¿Á janhan ní? —ichro sín.

20 Ntá kjuátehe ch'ín Jesús ntáchro ch'án kixin:

—Jehe ch'án mé ijnko tí teyóxinrá, mé tí nkexro tjenekian jnkokoá plato ntihi. 21 Chaxín tí Xjeen Dios K'óna Chojni mé tsonhen éxí nixja xroon itén Dios. Kjánchó nòà tí ch'ín sinchekji ch'án. Íchá jina tí ch'ín a la chrókokjéhya ch'án —mé xíkaha ichro ch'án.

22 **A** ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'ō ch'án tí niotja ntá kjuanjon ch'án k'uáyéhe sín. Ntá ntáchro ch'án kixin:

—Interá, tíhi mé cuerpo kuèntana —ichro ch'án.

23 Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uí sín kaín sín tí nkehe tjiá. 24 Ntá ntáchro ch'án kixin:

—Tíhi mé jñina mé chrónkaxín kixin chaxín tsoxiteyá tí nkehe nixin tsonhen na mé ts'itjí kixin tsaáxin nchónhya chojni. 25 Chaxín ntáxrjan kixin ts'íhya janhan tí inté to uva ínaá tí naxa tsjixrakáhya tí yaon itsi kjuachaxin kuènte Dios, a ntá tí yaon a xik'ía inté to uva nixin —mé xíkaha ichro ch'ín Jesús.

Ntá ch'ín Jesús chrónka ch'án kixin ch'ín Pedro sinchemá ch'án kixin chónhya tí jehe ch'án

(Mt. 26.30-35; Lc. 22.31-34; Jn. 13.36-38)

26 Ntá kjuixin itsje sín ijnko himno kuènte Dios ntá sákjuí sín tí jna Olivo. 27 Ntá ch'ín Jesús ntáchro ch'án kixin:

—Ijie tie kaín rá tsochrakonrá ntá tsjtonará. Ntá tsoxiteyá éxí ntáchro xroon iten Dios kixin: “Ts'óyán sín tí nkexro t'ayakonhen tí kolélo ntá tsokohya nkexro ts'ayakonhen va, a ntá tsjichroe va.”* 28 **A** ntá tió

* 14:27 Zacarías 13.7

tsoxechónna ntá sátsjia estado Galilea ntá ntiha tsoxetani —ichro ch'án.

²⁹ Ntá ntáchro ch'ín Pedro kixin:

—Kjonté kaín sín tsítqha sín ntá janhan la náhi —ichro ch'án.

³⁰ Ntá ntáchro ch'ín Jesús kixin:

—Chaxín ntáxrjan kixin ijie tie tí naxa tsjehya kochíntqa yáya, la jaha mé sinchemána nía kixin chonhyana, tsixrua —ichro ch'án.

³¹ Ntá itsen kjuátehe ch'ín Pedro ntáchro ch'án kixin:

—Kjonté koína its'én la sintamáhya tí jaha —ichro ch'án.

La ko xikaha ntáchro sín kaín sín.

Ch'ín Jesús nixjeexín ch'án Dios tí Huerto Getsemaní

(Mt. 26.36-46; Lc. 22.39-46)

³² Ntá kjuíji sín ijnko nonte mé it'in Getsemaní. Ntá k'uetuēnhen ch'ín Jesu s'ín k'uájiko ch'án kixin:

—Tjejórá ntihyó nachrohe janhan tsonixjaha Dios —ichro ch'án.

³³ Ntá sákjuiko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankixin imá k'uává asén ch'án kóxakonhen ch'án. ³⁴ Ntá ntáche ch'án sín kixin:

—Imá t'ává asenná éxi chrók'uén xikaha. Ijie la ntihyó titohará tjejot-sjehérá —ichro ch'án.

³⁵ Ntá sákjuí ch'án ijnko kjínhya ntá kjuák'exín toch'in ch'án. Ntá kjuankixin chrónóhe ch'án Dios kixin chrókjuanjon ch'án kjuachaxin kixin chrókjuasótehya ch'án tí nkehe chrókónhen ch'án tí yaon a. ³⁶ A ntá ntáchro ch'án kixin:

—It'eni jaha. Jaha mé chonta kaín xín kjuachaxin na ntá chrónóghani tsjakjínhínni kaín tí jínahya tsonhenni tsjasóteni jie. Jehya kixin chrókónhen éxi tjinkaonni jeheni. Náhi. Éxi tjinkávan jaha —ichro ch'án.

³⁷ Ntá kjan ch'án ntá k'uitjaxín ch'án tí sín kuítqhe la tjejójua sín. Ntá ntáche ch'án tí ch'ín Pedro kixin:

—Simón, tjechrian jaha. ¿Xá xitjahya chrókjuak'etsjehé ijnko hora?

³⁸ Ijie la tjejotsjehérá la ko chronóghérá Dios kixin títoehya ch'án tí jínahya chrókjuichroerá. Tí asánrá ntáchro kixin chrókjuinchexiteyará tí jína kjánchó tí cuérpora la tsjachahya —ichro ch'án.

³⁹ Ntá sákjuí ch'án inaá chrónóhe ch'án Dios. Ntá ó jehe xikahó xínixja ch'án. ⁴⁰ Ntá ikjan ch'án la ó tjejójua sín inaá kixin kuíh'j sín kotáchrin. Ntá í noehya sín nkexrí chrókjuatehe sín. ⁴¹ Ntá nixin sákíjki ch'án ntá kjan ch'án ntá ntáchro ch'án kixin:

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojni ts'áyéhe tí sín chóna jie sinchekjasóte sín ch'án. ⁴² Ntá t'ayará sátsjini kixin ó kjui tí nkexro sinchekjina.

Sákjuiko sín tí ch'ín Jesús tsjak'echjina ch'án

(Mt. 26.47-56; Lc. 22.47-53; Jn. 18.2-11)

⁴³ Naxa tjenixja ch'ín Jesús ntá xrínahya kjuíji ch'ín Judas, mé ijnko tí teyóxin sín k'uájiko ch'ín Jesús. Nchónhya chojni kjuikao ch'án kjuíjiko sín chica espada la ko inta. Na mé kjuachaxién tí sín nchat'á t'etoan la ko tí sín maestro tjako tí ley la ko tí sín táda t'etoan nínko mé kjuixín sín.

⁴⁴ A ntá tí ch'ín Judas mé tí ch'ín sinchekji tsintáchro ch'án kixin:

—Tí ch'ín sinekian kochíto mé jehe tíha la itsérá ch'án sátsjikoará ch'án —ichro ch'án.

⁴⁵ Ntá kjui sín ntá tuénxín kóchjinehe ch'ín Judas tí ch'ín Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochíto. ⁴⁶ A ntá tí sin kjuíji mé tsé sín tí ch'ín Jesús, sákjuíko sín ch'án.

⁴⁷ A ntá ijnko ch'ín tjentaxín ntiha mé kuakitsje ch'án chica espada kóchrínjin ch'án tatsjon tí ch'ín ch'ehe tí nchat'á t'etoan xra. ⁴⁸ Ntá ch'ín Jesús mé ntáche ch'án tí sín a kixin:

—¿Nkekuènté kixin éxí chrótserá xíchee mé xíkaha k'uinkakoará chica espada la ko inta kixin tsotseráni? ⁴⁹ Kaín yaon kjuak'é nkaxenhen nínko kjuákoará, ¿ntá nkekuènté tsehvaráni? Kjánchó t'ichjánxín xíkaha tsonhen kixin tsoxiteyá tí nkehe nixja xroon itén Dios —ichro ch'án.

⁵⁰ Ntá kaín tí sín k'uájiko ch'án na mé kuítøhe sín ch'án jehó ch'án ntá sákjuí sín.

Ijnko ch'ín ntasoá sákjuixín ch'án ntiha

⁵¹ A ntá ijnko ch'ín ntasoá mé kjaxin tinkáchréhe ch'án ntiha, a ntá jehó ijnko kamantá tjetsáte ch'án, ntá kjaxin itsé sín ch'án. ⁵² Kjánchó tí ké ch'án ó tsítsé sín ntá kjónté tjóchín ch'án sákjuí ch'án.

Ch'ín Jesús kóchjina ch'án tí tjejó tí sín t'etoan

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Ntá sákjuíko sín tí ch'ín Jesús tí ntøe tí nchat'á imá t'etoan. Ntaha mé tsikójnkotsé kaín tí sín nchat'á t'etoan la ko tí sín táda t'etoan nínko la ko tí sín maestro tjako tí ley. ⁵⁴ Ntá ch'ín Pedro la ikjín tjechréhe ch'án ntá kjuíji ch'án tí ntásin ntøe tí nchat'á imá t'etoan a. Ntaha síche xrohi. A ntá ntiha tjejótxajin tí sín policía tjejóchjixrohe sín, ntá kjaxin ch'án ntaó kuítøhe ch'án tjechjixrohe ch'án.

⁵⁵ Ntá tí sín t'etuènnen tí sín nchat'á la ko kaín tí sín t'etoan kjueyá sín chojni kixin tsochrónka sín nkehe tí jie chóna ch'ín Jesús kixin jina chrók'óyán sín ch'án. Kjánchó ninkexró k'uitjahya sín tsjinkitsa tsochrónka. ⁵⁶ Kjánchó itsjé sín ntáchro sín kjuach'ia ó t'eka sín ch'án jie kixin jnkokónhya tí nkehe ntáchro sín. ⁵⁷ Ntá k'uínkatjen iso sín ntá chaxínhya tí jie kjuanchia sín. Ntá ntáchro sín kixin:

⁵⁸ —Jeheni ó kuínhinni kixin ntáchro ch'án kixin ts'óxíka ch'án tí nínko tsíkjjich'énaxín chojni tja ntá iní yaon koá la ó tsjak'e ch'án í jnko nínko jehya chojni sich'éna† —ichro sín.

⁵⁹ Kjónté xíkaha la jnkokónhya tí nkehe chrónka sín.

⁶⁰ Ntá tí ch'ín t'etuènnen tí sín nchat'á k'uínkatjen ch'án tí tjejó kaín sín ntá kjuanchankíhi ch'án tí ch'ín Jesús kixin:

—¿Á ninkehó tjatøehya jaha? ¿Á chaxín tí jie t'eka sín tí jaha? —ichro ch'án.

⁶¹ Ntá ch'ín Jesús tání ch'án la ninkehó tjatøehya ch'án. Ntá xíkjanchankí tí nchat'á t'etoan ntáchro ch'án kixin:

—¿Á jaha tí Cristo Xjeen Dios imá tjóá? —ichro ch'án.

⁶² Ntá ntáchro ch'ín Jesús kixin:

—Chaxín janhan tíha. Ntá chr'éxín ts'ikonrá kixin tí Xjeen Dios K'óna Chojni mé tsjak'etjaxin ch'án tí tja chjina kjuachaxin kuènte Dios la ko itjuí mé ts'inkajinxín ch'án nkaya nkajíní —ichro ch'án.

⁶³ A ntá tí nchať'á t'etōan kótséchéje ch'án tí iké ch'án kjuakoxin ch'án kixin imá nínkaon ch'án ntáchro ch'án kixin:

—T'ichjánxinhya í so chojni tsochrónka nkehe. ⁶⁴ Jahará ó kuínhínrá kixin k'uántaxínhin ch'án Dios. ¿Ntá nkehe tsixrorá? —ichro ch'án.

Ntá kaín sín kjuátehe sín kixin chrók'uen ch'án.

⁶⁵ Ntá ikjé sín la kjuankixin sín kuikite sín ch'án ntate sín. Na iso sín na k'uíkjehe sín ikon ch'án na ntá kjuate sín ch'án na ko kjuanchankíhi sín ch'án kixin:

—Tónoha kixin nkexro kjuatia —ichro sín.

A ntá tí sín policia kuente nínko chjéhe sín nkayakon ch'án.

Ch'in Pedro kjuínchemá ch'án kixin chónhya ch'án tí ch'in Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ntá tí ntasin nonte itjen ch'in Pedro. Ntá ikui ijnko tjan ch'ehe tjan xra tí nchať'á t'etōan. ⁶⁷ Ntá k'uikon tjan kixin tjechjixrohe ch'in Pedro. Ntá komá tjan ch'án ntá ntáchro tjan kixin:

—Jaha la kjaxin xrikoa tí ch'in Jesús kjuixin chjasin Nazaret —ichro tjan.

⁶⁸ Ntá ch'in Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrúa —ichro ch'án.

Ntá k'uaxrjexín ch'án ntiha sákjui ch'án ntója. Ntá xrinahya itsje ijnko kochíntōa. ⁶⁹ Ntá tí tjan a mé k'uikon tjan tí jehe ch'án ntá chénka tí sín sintaxín ntaha kixin:

—A ntá tí ch'in í mé jnkojín tí sín a —ichro tjan.

⁷⁰ Kjánchó kjuínchemá ch'án inaá. Ntá antsí chr'exin tí sín k'uejontaxín ntáche sín tí ch'in Pedro kixin:

—Chaxín kjaxian jaha tsíkjixian estado Galilea kixin tjatsoanxínni kixin nixja jaha éxi nixja tí jehe sín —ichro sín.

⁷¹ Ntá ch'in Pedro kjuankixin ch'án kjuínchenohe ch'án Dios ntáchro ch'án kixin:

—Chonhya tí ch'in ntáchrórá jahará —ichro ch'án.

⁷² Ntá yóxin itsje kochíntōa. Ntá ch'in Pedro mé xraxinkaon ch'án kixin nkexrí ó chrónka ch'in Jesús kixin: “Naxa tsotsjehya kochíntōa yáya mé ó tsjixin sinchemána níya kixin chonhyana.”[‡] Ntá xraxinkaon ch'án tíha la ntá kjuankixin ch'án tsjánka ch'án kixin ntoáhya kjuích'e ch'án kjuínchemá ch'án tí ch'in Jesús.

15

Ch'in Jesús nkayakon tí ch'in Pilato

(Mt. 27.1-2, 11-14; Lc. 23.1-5; Jn. 18.28-38)

¹ A ntá ó k'uinkaséyan ntá tí sín nchať'á t'etōan kójnkotséko sín tí sín táda la ko tí sín tjako tí ley la ko kaín sín t'etōan kuente nínko mé kójnkotsé sín ikjo kichó sín. Ntá kjuixin ntá kjuínchenteto sín tí ch'in Jesús ntá kjuikaán sín ch'án tí tjen tí ch'in Pilato. ² Ntá tí ch'in Pilato mé kjuanchankí ch'án ntáchro ch'án kixin:

—¿Á jaha tí Rey kuente tí sín judío? —ichro ch'án.

Ntá kjuátehe ch'in Jesús ntáchro ch'án kixin:

—Kjaxian jaha ntáchrúa —ichro ch'án.

³ A ntá tí sín nchať'á t'etōan mé k'ueka sín ch'án nchónhya jje. ⁴ Ntá ch'in Pilato xikjanchankí ch'án inaá ntáchro ch'án kixin:

—¿Jaha, nkekuènté tjatēehya ninkehó? Tsjehé kixin nchónhya jje t'eka sín tí jaha —ichro ch'án.

⁵ A ntá ch'ín Jesús la ninkehó kjuátēehya ch'án. Ntá ch'ín Pilato la í noehya ch'án nkehe tsjenkayáxin ch'án.

K'uáyéhe ch'ín Jesús kixin sinchekjasóte sín ch'án ntá its'en ch'án
(Mt. 27.15-31; Lc. 23.13-25; Jn. 18.38—19.16)

⁶ A ntá ch'ín Pilato mé kuènnen ch'án kixin tí kia a tsjanjon ch'án kjuachaxin kixin sátsji ijnko chojni tjechjina, éxí tjinkaon tsjanchia tí sín tsíkójkotsé tí kia a. ⁷ A ntá ntiha tjechjina ijnko ch'ín mé it'in Barrabás, la ko í so sín kuítekakuenhya sín tí síxreé ntá k'óyán sín chojni. ⁸ Ntá kui nchónhya chojni kjuankíxin sín kjuanchehe sín tí ch'ín Pilato kixin chrókjuich'e ch'án éxí kaín nánó xíkaha. ⁹ Ntá kjuátēhe ch'ín Pilato kixin:

—¿Á tjinkáonrá tsitōhā sátsji tí ch'ín Rey t'etuenhen tí sín judío? —ichro ch'án.

¹⁰ Mé xíkaha ichro ch'án kixin jehe ch'án la ó nohe ch'án kixin kjuachjinoxínhin xriko tí sín nchāt'á t'etōan, a ntá tsé sín tí ch'ín Jesús kjuikénhen sín ch'án. ¹¹ A ntá tí sín nchāt'á t'etōan a mé kjuínchekóninkaon sín kaín tí chojni síin, ntáche sín kixin íchá jina chrókjuanchia sín kixin chrók'uatjánta ch'án tí ch'ín Barrabás. ¹² Ntá ch'ín Pilato kjuanchankí ch'án ntáchro ch'án kixin:

—A ntá tí ch'ín tikítexínrá kixin ch'ín Rey t'etuenhen tí sín judío la ¿nkehe tjinkáonrá sīt'ahā ch'án? —ichro ch'án.

¹³ Ntá jehe sín kjuátēhe sín k'óyako sín kjuanchia sín kixin:

—¡Tjakénkǎnia ch'án ntacruz!

¹⁴ Ntá ch'ín Pilato mé kjuanchankíhi ch'án tí jehe sín kixin:

—¿Xá nkehe tí jínahya kjuích'e ch'án? —ichro ch'án.

Kjánchó antsí má itsen k'óyako sín kjuanchia sín kixin:

—¡Tjakénkǎnia ch'án ntacruz! —ichro sín.

¹⁵ Ntá ch'ín Pilato mé tjinkaon ch'án sinchexiteyá ch'án tí nkehe kjuanchia tí sín k'uíxité ntá kuítōhe ch'án kixin sátsji tí ch'ín Barrabás. Ntá k'uetōan ch'án kixin tsjate sín tí ch'ín Jesús. Ntá kjuixin ntá kjuanjon ch'án kjuachaxin kixin tí sín soldado sátsjiko sín ch'án tsjak'enkǎni sín ch'án ntacruz.

¹⁶ Ntá tí sín soldado a mé sákjuíko sín ch'án tí ntāsin tí palacio. Ntaha kójkotséxin kaín tí sín soldado. ¹⁷ Ntá ntiha kuakitsje sín iké ch'án ntá kjuínchek'inkáya sín ch'án ijnko ka kjátse tié la ko kjuak'enkaya sín kja ch'án ijnko corona tsík'óna ntach'í. ¹⁸ Ntá kjuankíxin k'uíxité sín ntáchro sín kixin:

—Jnkochrín sín tsjak'e tsétuenhén tí sín judío —ichro sín.

¹⁹ Na ntá ntavara chjéhe sín ikja ch'án na ko ntāté sín kuíkíte sín ch'án. K'uéjóxin toch'ín sín nkayakon ch'án kjuích'eyáxixin sín éxí imá chrókjuikosáyehe sín ch'án. ²⁰ Ntá tíó kjuixin xíkaha kjuích'ehe sín ch'án kjuanoá sín ch'án ntá kuakitsjehe sín ch'án tí ka kjátse tié tsíkjinchek'inkáya sín ch'án ntá kjuínchek'inkáya sín ch'án iké ch'án xráxin inaá. Ntá kuakitsjexín sín ch'án ntiha sákjuíko sín ch'án kixin ntá tsjak'enkǎni sín ch'án ntacruz.

Ntá kjuak'enkǎni sín ch'ín Jesús ntacruz

(Mt. 27.32-44; Lc. 23.26-43; Jn. 19.17-27)

²¹ A ntá ijnko ch'ín tsíkjinín chjasin Cirene, mé it'in ch'án Simón, mé xjeen ch'án mé tí ch'ín Alejandro la ko tí ch'ín Rufo, mé tsíkjinín

ch'án nontee ch'án, ntá k'uátsínka ch'án ntiha. Ntá tí sín soldado a mé k'uetuēnhen sín ch'án kíxin tsochréhe ch'án tsamá ch'án tí ntacruz tsjak'enkáni ch'ín Jesús.

²² A ntá sákjuiko sín tí ch'ín Jesús ijnko tjo it'in Gólgota, na mé nkívee sín t'axrjexín kíxin Tjo Calavera. ²³ Ntá ntiha chjéhe sín ch'án xranvino tsík'ixinkíkjanxín xroan mirra chrók'ui ch'án, kjánchó k'uíhya ch'án. ²⁴ Ntá tí sín soldado kjuak'enkáni sín ch'án tí ntacruz a. Kjuixin ntá kjuích'exín sín suerte tí ké ch'án kíxin tsohohe sín nkexéhe tí ka sátsjiko sín jnkojnko sín.

²⁵ A ntá ó las nueve nchítjen tí kjuak'enkáni sín ch'án tí ntacruz a. ²⁶ Ntá ikja tí ntacruz kjuak'enkáni sín ijnko ntachiso ntsí tsikjin sín nixja nkekuēnte kjuínchekjasóte sín ch'án na mé ntáchro kíxin: “Jehe ch'án mé Rey kuēnte tí sín judío”. ²⁷ Na ko kjaxin k'uéjójáni sín ntacruz yaá tí síchee la ijnko la nánko chjina la í jnko la nó kjon tí tjen ch'ín Jesús. ²⁸ Na mé xíkaha xiteyá éxí nixja xroon itén Dios ntáchro kíxin: “Éxí yóhe ijnko chojni kjuasin jie mé k'uíkon sín ch'án”*.

²⁹ Ntá tí sín k'uatsínka ntiha mé kjuanoá sín ch'án la ko k'uántaxínhín sín ch'án tinkátjía kja sín ntáchro sín kíxin:

—Kjá na ntáchrúa kíxin chrók'oxíka tí njnko, a ntá iní yaon koá la ó chrókjuixin chrókjuich'éna ínaá, † ichrúa. ³⁰ Nchekaá asán jahvá tjasinkajinxíán tí ntacruz méhe —ichro sín.

³¹ Ntá tí sín nchát'á t'etōan la ko tí sín tjako tí ley mé kjuanoá sín ch'án ikjo sín kíchó sín kíxin:

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án asén ch'án. ³² A ntá chaxín jehe ch'án tí Cristo tí Rey kuēnte tí naciōn Israel ntá chrók'uikōnni kíxin jehó ch'án chrókjuinkajinxín ch'án asén ch'án tí ntacruz ntá kjaxin chrókuitekaonni ch'án —ichro sín.

Kjonté tí yaá sín kjaxin tjejójáni ntacruz mé k'uántaxínhín sín ch'án.

Ntá k'uén ch'ín Jesús

(Mt. 27.45-56; Lc. 23.44-49; Jn. 19.28-30)

³³ A ntá tió kui chonkíxin mé k'uíxin tie kuenté chjasintajni, kóxrjenhen tí sítié hasta las tres kónjín ³⁴ ntá tí hora a mé itsen k'uèya ch'ín Jesús ntáchro ch'án kíxin:

—Eloi, Eloi, ¿lama sabactani? —tí nkívee sín mé t'axrjexín kíxin: It'éni, It'éni, ¿nkekuēnté kujtōhēni?, ‡ mé xíkaha ichro ch'án.

³⁵ Ntá iso sín síin ntiha kuínhin sín, ntá ntáchro sín kíxin:

—Tinhínrá kíxin t'yēhe ch'án tí ch'ín Elías tí ch'ín k'uéchrónka itén Dios óse —ichro sín.

³⁶ Ntá ijnko tí jehe sín síin ntiha kuínká ch'án kuákja ch'án ijnko ka ntá kjuínchekjataxín ch'án vino náxrxónhya ntá kjuak'ekjen ch'án ijnko nta kjínjin ntá kjuínchekhina ch'án tí tjen ir'va ch'ín Jesús chrók'ui ch'án tí vino náxrxónhya. Ntáchro tí ch'ín a kíxin:

—Tsitōheni tsotsjeheni á chaxín tsi tí ch'ín Elías tsjinkajin tí jehe ch'án —ichro ch'án.

³⁷ Ntá ch'ín Jesús itsen k'uíyato ch'án ntá kjuixin k'uén ch'án. ³⁸ A ntá tí ka tjenkáuēnxín nkaxenhen njnko mé yaá k'óna k'uichje kjuankíxixín noi la hasta nonte k'uichje. ³⁹ Ntá tí ch'ín capitán romano mé tjen ch'án

* 15:28 Isaías 58.12 † 15:29 Marcos 14.58; Juan 2.19 ‡ 15:34 Salmo 22.1

chok'èxin tí tjen ch'ín Jesús ntá k'uíkon ch'án kixin xíkaha ó kjuixin k'uén ch'án ntá ntáchro ch'án kixin:

—Chaxín tí nkexro i la Xjeen Dios —ichro ch'án.

⁴⁰ Kjaxin ntiha k'uejó iso chojni chjin, ikjín k'uéjó sín tsjehe sín. Tjejóko sín tjan María Magdalena la ko í jnko tjan María na mé ijnko xjeen tjan it'in Jacobo na mé tí ch'ín tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé. ⁴¹ A ntá tí chojni chjin í mé kuinkáchréhe sín tí ch'ín Jesús ntá kjuikao sín ch'án kixin k'uékjinkitsa sín ch'án tí k'uékjak'e ch'án estado Galilea la ko kjaxin í so chojni chjin inaá chréhe sín ch'án sákjuiko sín ch'án chjasin Jerusalén.

Ntá xrává ch'ín Jesús

(Mt. 27.57-61; Lc. 23.50-56; Jn. 19.38-42)

⁴² A ntá ó kóntó tí yaon a mé tí yaon t'óyaxínhin sín kixin tí xrankíxixín tí yaon t'ok'éhe sín, ⁴³ mé kui ijnko ch'ín it'in José chjasén ch'án mé Arimatea. Jehé ch'án mé koí ch'án t'etoan ch'án tí xra kuènte tí síxreé. Kjaxin jehe ch'án tjechónhen ch'án itsi tí kjuachaxin kuènte Dios. Chrakonhya ch'án sákjuí ch'án ntøe ch'ín Pilato kjuikjanchia ch'án tí cuerpo kuènte ch'ín Jesús. ⁴⁴ Ntá ch'ín Pilato chrakon ch'án kixin ó tsíkjixin tsík'en ch'ín Jesús, ntá k'uíyehé ch'án tí ch'ín capitán a kjuanchankíhi ch'án kixin á chaxín xíkaha kónhen. ⁴⁵ Ntá chrónka tí ch'ín capitán kixin chaxín ó kjuixin k'uén ch'án. Ntá kuínhin ch'ín Pilato xíkaha ntá kjuanjon ch'án kjuachaxin kixin tsjikakja ch'ín José tí cuerpo kuènte ch'ín Jesús. ⁴⁶ Ntá ch'ín José mé k'uena ch'án ijnko ka sávana náxrjón. Ntá kjuinkajin ch'án tí cuerpo kuènte ch'ín Jesús, a ntá jehe tí ka a mé kjuínchek'isímá ch'án tí cuerpo kuènte ch'án. Ntá kjuak'enkaya ch'án ijnko tòye tsíxrayá itjo. Ntá ijnko xro jíé mé k'uíkjèxin ch'án tí ntója tí tòye. ⁴⁷ A ntá tí tjan María Magdalena la ko tí tjan María ìné ch'ín José mé k'uíkon sín nketí xrává ch'án.

16

Ó xechón ch'ín Jesús

(Mt. 28.1-10; Lc. 24.1-12; Jn. 20.1-10)

¹ A ntá tió k'uátsínka tí yaon t'ok'éhe sín ntá tí tjan María Magdalena la ko tí tjan María ìné ch'ín Jacobo la ko tí tjan Salomé mé k'uena sín xroan xraxé sátsjiko sín sincheka sín tí cuerpo kuènte ch'ín Jesús. ² Ntá imá nchítjen tí yaon xrankíxixín tí semana mé kjuíji sín tí tòye tsíxravá ch'án, na mé ó kjuítøn yaon. ³ A ntá jehe sín mé tinkákjo kíchó sín kixin:

—¿Xá nkexro tí chrókuakjìnhinni tí xro tjejkèxin tí tòye? —ichro sín.

⁴ A ntá xrínahya k'uíkon sín kixin ó tsíkjixin tsíkjin tí xro jíé tjejkèxin tí tòye kixin í tjenhya éxí k'uékjak'e senó. ⁵ Ntá kjuíji sín ikon tí tòye ntá k'uíkon sín kixin tjetjaxín ijnko ch'ín ntasoá tí tja sín chjina tjenkáya ch'án ka kjinjin tjóá ntá imá chrakon sín k'uíkon sín. ⁶ Ntá ntáchro ch'án kixin:

—Chrakonhyará. Ó nòna kixin xritjéyará jahará tí ch'ín Jesús tsíkjixin chjasin Nazaret kjuák'enkáni ch'án ntacruz. Ntá ó tsíxechón ch'án í kohya ch'án ntihi. Tsjehérá tí tsíkjak'e sín ch'án. ⁷ Ntá sájtirá tjíchenkará tí sín k'uék'ajiko ch'án la ko tí ch'ín Pedro kixin tí ch'ín Jesús senó sátsji ch'án estado Galilea ntá ntaha tsoxetará ch'án éxí tsíchrónka ch'án —mé xíkaha chrónka tí ntasoá a.

⁸ Ntá tí chojni chjin a mé sákjuixin sín tí tsíxravá tí ch'ín Jesús imá síxran̄ka sín chrakon sín. Ntá nax̄a chenkahya sín ninkexró kixin chrakon sín.

*Ch'ín Jesús titàya xeta tí tjan María Magdalena
(Jn. 20.11-18)*

⁹ Tió tsíkjin tsíxechón ch'ín Jesús nchítjen tí yaon xrankíxixín semana ntá titàya xeta ch'án saoxín tí tjan María Magdalena na mé jehe tjan tsíkakitsjexín ch'án yato nchakuen tí jínahya. ¹⁰ Ntá sákjuichenka tjan tí sín k'uék'ajiko tí jehe ch'án t'ává sín tsjánka sín. ¹¹ A ntá tió kuínhin sín kixin tjechón tí ch'ín Jesús kixin xikaha tsík'ikon tjan la kjónté kuítekakonhya sín.

*Iyó sín k'uék'ajiko ch'ín Jesús titàya k'uíkuèn sín tí jehe ch'án
(Lc. 24.13-35)*

¹² A ntá chr'éxin ntá iyó tí sín a titàya k'uíkuèn sín tí ch'ín Jesús, ókjé nkexrí tsjehe ch'án. Tí sín a mé tjejótti sín ntja sátsji sín ijnko nonte. ¹³ A ntá jehe sín sákjuichenka sín tí sín í so a; la kjónté xikaha la kuítekakonhya sín.*

*Ch'ín Jesús k'uetuenhen ch'án tí sín k'uék'ajiko ch'án tí xra sich'e sín
(Mt. 28.16-20; Lc. 24.36-49; Jn. 20.19-23)*

¹⁴ A ntá tió kjuixixín la titàya k'uíkon tí tejnko sín tí jehe ch'án tí tjejóne sín. Ntá nixjehe ch'án sín kixin nkekuènté icha asén sín tsíkitekakuenhya sín tí sín tsík'ikon kixin tsíxechón ch'án. ¹⁵ Ntá ntáche ch'án sín kixin:

—Sátjirá kuenté chjasintajni tjákohérá kaín sín chojni tí tan jína tsaáxin sín. ¹⁶ Tí nkexro tsitekaon la tsikite la mé tsaá. A ntá tí nkexro tsitekakonhya na mé tsjasóte. ¹⁷ Ntá tí sín tsinkáchónki tí janhan mé tsjasin sín kjuaxroan kixin kjuachaxin nina tsakitsjexín sín tí nchakuen tí jínahya chóna chojni la ko tsonixja sín ókjé nkiva. ¹⁸ Kjónté konche chrótsé sín la kohya nkehe tsonhen sín la ko kjónté chrók'ui sín ijnko ntá chóna veneno la kohya nkehe tsonhen sín. Kjaxin ts'ejotja tja sín chojni níhi la tsitqhe sín jína.

*Ch'ín Jesús chr'in ch'án nkaya nkajní
(Lc. 24.50-53)*

¹⁹ Ntá ó kjuixin nixjehe Ìnchéni Jesús tí jehe sín ntá sákjuí ch'án nkaya nkajní. A ntá ntiha kjuák'etjaxin ch'án tí tja chjina Dios. ²⁰ A ntá jehe sín sákjuí sín nkuíxín sákjuíkjako sín tí tan jína tsaáxin chojni. A ntá jehe Ìnchéni mé kjuínktsa ch'án tí sín a la ko kjuachaxièn ch'án mé kjuasixín sín kjuaxroan kixin tíha mé tsonoxín tí sín tjejótinhin kixin chaxín nkehe kuènte Dios kjuako sín. Amén.

* 16:13 Lucas 24.13-35

Tí tan jína chrónka ch'ín Lucas

Tíhi mé xrankíxín tí xroon i

¹ Nchónhya chojni tjinkaon chrókjin sín ntoá kaín xín nkehe nkexrí kónhen k'uátsínka Ìnchéni tí k'uéjóni. ² Éxí kjuakoheni tí sín tsík'ikonxín kon sín tí xrankíxín nkehe k'uátsínka ch'án la ntá k'uáyéhe sín tí xra sákjuíchronka sín tí tan jína ³ a ntá janhan kjaxian kjuánchánkiá jína kaín nkehe k'uátsínka tí xrankíxín. Ntá nõna jína ikjian kaín tíha éxí tsíkónhen ntá tsochr'anhan jaha Teófilo kíxín imá tjuaha ⁴ kíxín ntá jaha tsonoha jína tí nkehe chaxín tsíkjakoha sín.

Ijnko ángel mé chrónka kíxín tsokjíhi Juan Bautista

⁵ A ntá tí ch'ín rey Herodes k'uetqan ch'án tí estado Judea la ko ntiha kjuák'e ijnko nchat'á mé it'in Zacarías. Jehe ch'án mé kuènte tí sín tsík'axrjeníxin tí ch'ín Abías.* A ntá ichjién ch'án mé it'in Elisabet. Jehe tjan mé tsík'axrjeníxin tjan tí nchat'á Aarón. ⁶ Yóí sín na mé jína sín kíxín éxí tjinkaon Dios la mé kjuínchexiteyéhe sín kaín nkehe k'uetqan ch'án. Méxra ninkexró chrók'uekahya jie tí jehe sín. ⁷ A ntá jehe sín chóntahya sín xjeen sín kíxín ó jehí tsíkítqenhya tjan Elisabet kíxín sich'éna tjan xjan la ko ntá jie la ó táda ch'án la ko ó nána tjan.

⁸ A ntá ijnko yaon tónhen tocar ch'ín Zacarías la ko tí í so sín tjejóko ch'án sich'e sín xra nchat'á kuènte Dios. ⁹ A ntá xikaha kuènnen tí sín nchat'á a ntá jie ch'ín Zacarías mé kónhen tocar ts'ixenhen ch'án tí cuarto tjóá kuènte njnko tsjak'e ch'án chjincó chrítaón tí altar kuènte Dios. ¹⁰ Ntá kjuák'e ch'án ntiha kjuak'e ch'án tí chjincó la nachrohe kaín tí chojni k'uéjón sín ntója nixjehe sín Dios. ¹¹ Ntá xrinahya k'uikon ch'ín Zacarías ijnko ángel kuènte Dios tjexín toté ch'án nángo chjina tí altar tjak'exín sín chjincó. ¹² A ntá tió k'uikon ch'ín Zacarías tí ángel la imá kóxakonhen ch'án la ko imá chrakon ch'án. ¹³ A ntá ntáchro tí ch'ín ángel kíxín:

—Zacarías, chrakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'éna tjan ijnko xjan ntoa na mé sinchek'ian xjan Juan. ¹⁴ Jaha la tsocháha má la ko itsjé chojni tsochéhe sín kíxín tsokjíhi xjan ¹⁵ kíxín imá tjetqan tsjak'e tí xjaan éxí tóxrjinhin Dios. Ninkehó xran vino la ko ninkehó í jnko xran ts'ihya ch'án. Tsochónta ch'án kjuachaxin kuènte Nchakuen Dios kjónté naqa tokjéhya ch'án. ¹⁶ Jehe ch'án mé tsjakqhe ch'án tí chojni nación Israel a ntá itsjé sín tsokjan sín tsinkáchónki sín Ìnché sín Dios. ¹⁷ Jehe ch'ín Juan tsítaón ch'án ntja tsixín Ìnchéni. Éxí k'uékjako ch'ín Elías ósé mé tsjako ch'án la ko tsochónta ch'án kjuachaxin éxí k'uéchónta ch'ín Elías kíxín tí sín it'é xjan la mé jína ts'ejóko xjeen sín la ko kjaxin tí sín titekakonhya mé tsitekaon sín. Mé xikaha tsonixjehe ch'án chojni kíxín ó itsi Ìnchéni la chrókuinkáchónki sín tí jehe ch'án.

¹⁸ A ntá tí ch'ín Zacarías kjuanchankíhi ch'án tí ch'ín ángel ntáchro ch'án kíxín:

—¿Nkexrí chrókónona kíxín chaxín chrókónhen tíhi? Janhan la ó tádana la ko tí chjin chonta la kjaxin ó nána tjan —ichro ch'án.

¹⁹ Ntá kjuátehe tí ch'ín ángel ntáchro ch'án kíxín:

* 1:5 1 Crónicas 24.10

—Janhan mé Gabriel la mé t'ahá xrá Dios. A ntá jehe ch'án mé k'uətuanna k'uinka tsonixjaha tsoxrjanka tí nkehe jína tsonhen. ²⁰ A ntá jie kuitekákonhya tí nkehe xrxjanka a ntá tsonósian jaha xitjahya tsonixja jaha tsoxitjajia tí yaon tsokjíhi tí xjaan. Mé xíkaha tsoxiteyá kaín tíha —ichro ch'án.

²¹ A ntá tí í so sín ntiha k'uéjóchónhen sín ntója nínko kixin ts'axrje ch'ín Zacarías, ntá kóxakonhen sín kixin imá sé kóxrjenhen ch'án nkaxenhen nínko. ²² Ntá tió k'uaxrxjén ch'ín Zacarías tí nkaxenhen nínko la í xitjahya nixja ch'án. Ntá kónohe sín kixin ichrén kjuaxroan kuente Dios tsík'ikon ch'án tí nkaxenhen nínko. Ntá itja ch'án ó tjəkoxin ch'án tí nkehe chróntácho ch'án kixin í xitjahya nixja ch'án.

²³ A ntá tió kjuixin tí yaon kjuích'e ch'ín Zacarías xrá nínko ntá sákjuí ch'án ntəe ch'án. ²⁴ A ntá chr'éxin ntá kjuák'eyá tí ichjién ch'án Elisabet. Ntá ntəe tjan ó kuítóhe tjan in'ó nitjó kjuenkayáxin tjan kixin: ²⁵ “Mé xíkaha ijnko kjuaxroan kjuanjon Ìnchéni kixin chrók'uántaxíenhyani chojni kixin ó tsochóntani xjeenni jie chrókjuikosáyeheni sín”, ichro tjan.

Ijnko ángel chrónka kixin tsokjíhi Jesús

²⁶ A ntá k'uátsínka injon nitjó ntá Dios k'uətuənenhen tí ch'ín ángel Gabriel kixin sátsji ch'án ijnko chjasin estado Galilea mé it'in Nazaret, ²⁷ sátsji nixjehe ch'án ijnko tjan tjarisoá naxá kuákjahya tjan chojni ntoá mé it'in tjan María. Jehe tjan mé tsíkatehe tjan kixin tsotehe tjan ijnko ch'ín mé it'in José, mé tsík'axrjeníxin ch'án tí ch'ín rey David. ²⁸ A ntá tí ch'ín ángel k'uíxenhen tí tjen tjan ntá ntáchro ch'án kixin:

—K'uinka nixjaha jaha kixin Dios kjuínkítsa tí jaha. Ìnchéni Dios tjekoa tí jaha. A ntá jaha imá kjuíntayavan ch'án ntá tí í so chojni chjin la kénhyó —ichro ch'án.

²⁹ Kjánchó tió k'uíkon tjan tí ch'ín ángel na mé kóxakonhen tjan kjuenkayáxin tjan kixin nkekuente xíkaha nixjehe ch'án, ichro tjan. ³⁰ A ntá ntáchro tí ch'ín ángel kixin:

—Chrakonhya, María. Dios la imá tjetjinkítsa tí jaha. ³¹ A ntá jie la tsjak'èyá jaha, tsochonta ijnko xjan ntoá la ko sìnchek'ian xjan Jesús. ³² Imá ts'ətoan ch'án la ko its'in ch'án Xjeen Dios nkaya nkajní. Ìnchéni Dios mé tsjanjon ch'án kjuachaxin ts'ətoan ch'án éxí ijnko rey éxí k'uətoan ch'ín David, tí nkexro ts'axrjeníxin ch'án. ³³ Jnkochrín tsjak'e ch'án ts'ətuənenhen ch'án tí sín nación Israel, la mé tsjejehya tí kjuachaxin ts'ətoan ch'án —ichro tí ch'ín ángel.

³⁴ Ntá kjuanchankíhi tjan María tí ch'ín ángel kixin:

—¿Nkekuente kixin xíkaha chrókónhen kixin janhan la naxá chontahya chojni ntoá? —ichro tjan.

³⁵ Ntá kjuatehe tí ch'ín ángel, ntáchro ch'án kixin:

—Tí Nchakuen Dios mé ts'inkajin éxí ijnko tjuí la ko tí kjuachaxin kuente Dios mé tsjak'etja tí jaha, a ntá ts'óna tí xjan. Mé xíkaha tí xjan tsokjíhi la mé tjóá xjan la mé its'in xjan Xjeen Dios. ³⁶ La ko kjaxin tjan Elisabet kjéhya jaha kjónté ó nána tjan la mé tjeýá tjan. Senó la k'uéchóntahya tjan xjan, a ntá jie la ó injon nitjó tjeýá tjan. ³⁷ Kixin tí kjuachaxién Dios la tsjacha tsonhen kaín xín nkehe —ichro tí ch'ín ángel.

³⁸ Ntá ntáchro tjan María kixin:

—Janhan mé t'ahá Ìnchéni Dios xrá. Ó nchoxon tí nkehe k'uətoan ch'án sintaxiteyáha ch'án éxí chrónka jaha —ichro tjan.

Ἀ ntá kjuixin chrónka tí ch'ín ángel ntá sákjuí ch'án.

Tjan María sákjuitsjehe tí tjan Elisabet

³⁹ Ἀ ntá ijnko yaon tí tjan María tjian sákjuí tjan ijnko chjasin tjen tí jna estado Judea. ⁴⁰ Ntá kjuíji tjan tí chjasin ntiha ntá k'uixenhen tjan ntōe ch'ín Zacarías la ntá nixjehe tjan tí tjan Elisabet. ⁴¹ Ἀ ntá tió kuínhin tjan Elisabet nixja tjan María ntá chrika tí xjan nkaya tsee tí tjan Elisabet. Ntá antsí k'uáyéhe tjan kjuachaxién Nchakuen Dios ⁴² ntá itsen nixja tjan ntáchro tjan kixin:

—Dios imá kjuíntayavan la ntá tí í so chojni chjin la kénhyó la ko kjaxin kjuíncheyaon ch'án tí xjaan. ⁴³ ¿Xá nkexro tí janhan kixin kjuínixjana ñé Ìnchéni? ⁴⁴ Tió kuínhan nixjana ntá tí xjan la chrika xjan nkaya tseña kixin chéhe xjan kjuíha. ⁴⁵ Ntá jaha la cháha kixin kuítekávan kixin Ìnchéni Dios sinchexiteyá tí nkehe ntáchro ch'án —ichro tjan.

⁴⁶ Ntá ntáchro tjan María kixin:

Ἀsenná imá tjikosáyehe Ìnchéni Dios

⁴⁷ la ko chéhe asenná kixin Dios sinchekaáni ch'án.

⁴⁸ Kixin Dios ikuá kuentá ijnko tí chojni chjin nóe ch'exón xra kuènte ch'án.

Ἀ ntá ijie la ko jnkochrín tsontáchro chojni kixin náxrjón tjèn janhan, tsixro sín.

⁴⁹ Kixin Dios chóna kaín kjuachaxin ntá janhan mé kjuasixínna ch'án ijnko kjuaxroan jíe;

imá tjóá tí ihníe ch'án.

⁵⁰ Jnkochrín tsikonóehe ch'án kaín tí sín tjikosáyehe sín ch'án.

⁵¹ Tsíkjasin ch'án itsje kjuaxroan jíe;

kuakitsjehe ch'án tí kjuachaxin chóna tí sín nchehnke.

⁵² Kuakitsjehe ch'án tí kjuachaxin chóna tí sín t'etōan,

Ἀ ntá tí sín nóa k'uék'etuñhya senó la mé jie chjehe ch'án kjuachaxin ts'etōan sín.

⁵³ Ἀ ntá tí sín t'enxín kjinta la kjuanjon ch'án kaín nkehe tsicháxinhin sín, a ntá tí sín rico xráxin jehó tja sín sákjuí sín.

⁵⁴ Kjuínkítsa ch'án tí sín nación Israel kixin tjejóch'ehe sín ch'án xra;

k'uitjáyenhya ch'án tí jehe sín kuikonóehe ch'án sín,

⁵⁵ éxi k'uéchenka ch'án tí sín k'uaxrjeníxinni k'uéjé sín ósé,

na mé tí ch'ín Abraham la ko kaín tí sín naḡa ts'axrjenixin ch'án —mé xíkaha ichro tjan María.

⁵⁶ Ἀ ntá tjan María kuítoeko tjan tí tjan Elisabet iní nitjó la ntá chr'éxin xíkjan tjan ntōe tjan.

Kokjíhi ch'ín Juan Bautista

⁵⁷ Ntá xétja tí yaon sinchekokjíhi tjan Elisabet tí xjeen tjan, a ntá kjuínchekokjíhi tjan ijnko xjan ntoa. ⁵⁸ Ἀ ntá tí sín chjinaxón ntōe la ko tí sín kjéhya tjan mé kjuíjitsjehe sín kixin tsochéheko sín tjan kixin kuínhin sín kixin Dios imá tsíkikonóehe tí jehe tjan. ⁵⁹ Ntá tí yaon jnixin ikui sín sincheka sín xjan tí xroye kuènte tí sín judío. Ntá chrókuincheck'in sín xjan Zacarías éxi it'in it'é. ⁶⁰ Kjánchó ntáchro ñé xjan kixin:

—Náhi. T'ichjánxin its'in xjan Juan —ichro tjan.

⁶¹ Ntá ntáchro sín kixin:

—¿Nkekuènte kixin xíkaha chrók'uin xjan? Kohya nkexro naḡa kjéhya xíkaha it'in —ichro sín.

⁶² A ntá kaín tí sín kjéhya kjuakoxin sín tja sín kjuanchankíhi sín tí it'é xjan kixin nkexrí tjinkaon ch'án chrók'uin tí xjan. ⁶³ A ntá tí it'é xjan mé kjuanchia ch'án ijnko ntachiso ntsí tsokjin ch'án ntá kjin ch'án kixin: "Thnié xjan mé Juan." A ntá kaín tí sín tjejó sín ntiha la chrakon sín kuínhin sín xikaha kónhen. ⁶⁴ A ntá xrínahya ch'ín Zacarías kjuankixin ch'án nixja ch'án inaá kjuanchehe ch'án Dios kjuasáya. ⁶⁵ A ntá kaín tí sín chjinaxón ntøe sín mé chrakon sín. La ntá nkuíxín tí jnə kuènte estado Judea mé kjo sín kichó sín chrónka sín kixin xikaha tsikónhen. ⁶⁶ A ntá kaín tí sín kuínhin mé kjuenkayáxin sín kjuanchankíhi sín kichó sín kixin:
—¿Xá nkehe tí xrə tsíkítonhen tí xjan i? —ichro sín.
Kixin chaxín Inchéni Dios tsíkjincheyaon ch'án tí xjan.

Tí ch'ín Zacarías itsje ch'án

⁶⁷ A ntá it'é tí xjan mé ch'ín Zacarías, mé antsí k'uáyéhe ch'án kjuachaxin kuènte Nchakuen Dios ntá xikaha nixja ch'án itén Dios ntáchro ch'án kixin:

⁶⁸ Imá jína Inchéni, na mé tí Dios kuènte tí nación Israel,

kixin ikui ch'án tí tjejóni kjuínchekaá ch'án nación kuénténi.

⁶⁹ La ko kjuanjon ch'án ijnko nkexro t'etoan sinchekaáni ch'án

na mé ijnko nkexro k'uaxrjeníxin tí ch'ín David, tí nkexro k'uékjich'ehe Dios xrə.

⁷⁰ Éxi k'uéchronkaxín tí sín kjueyá Dios k'uéchronka itén Dios ósé,

⁷¹ k'uéchronka Dios kixin sinchekaáni ch'án kixin ntá tsjachahya kaín tí sín nínkakonhenni,

⁷² tsikonóehé ch'án tí sín k'uaxrjeníxinni ósé,

ts'itjáyenhya ch'án tí nkehe tsíchronka ch'án tsoxiteyá.

⁷³ Tíhi mé tsíkjo Dios tí ch'ín Abraham ósé kixin nkehe chaxín tsoxiteyá chr'éxin

⁷⁴ kixin sinchekaáni ch'án kixin kohya nkehe sich'eheni tí sín nínkakonhenni kixin jína sich'eheni ch'án xrə tsochrakonhyani,

⁷⁵ la ntá jína ts'ejóni sinchetjóani ch'án kaín yaon tí naxə tjejóchónni.

⁷⁶ A ntá jaha xjeenni mé tsontáchro Dios kixin jaha ijnko nkexro tsochrónka itén Dios tjen nkaya nkajní.

Jaha tsítónxian ntja tsixín Inchéni la ko jaha tsjásiyóxian ntja tsixín ch'án.

⁷⁷ Jaha tsjákohé tí chojni chjasintajni nkexrí tsjin tí jie chóna sín, ntá tsaá sín.

⁷⁸ A ntá Dios mé tjuèheni ch'án la ko kujikonóeheni ch'án, kixin nkajní kujxin ijnko xrohi níxin ts'inkaséyanxín tí yaon níxin.

⁷⁹ Tíha mé tsíkəo tí xrohi ts'inkaséyanxín tí sín tjejó sítie la ko tí sín chrók'uitjáyan, la ko ts'ikonxínni tí ntja tsjanjon kjuaxróxin.

Na mé kaín tíhi chrónka tí ch'ín Zacarías.

⁸⁰ A ntá tinkák'ánkí tí xjan a la ko Dios kjuínchek'ánkí tí kjuaxrexinkaon kuènte xjan kixin antsí tsonohe xjan nkexrí tjen Dios. A ntá kjuák'e xjan nteje k'uánkí xjan kjuixrakájia tí yaon kjuankixin kjuakohé ch'án tí chojni nación Israel.

2

Kokjíhi ch'ín Jesús
(Mt. 1.18-25)

¹ A ntá tí yaon a na mé tí ch'ín imá t'etoan mé it'in Augusto César na mé k'uetoan ch'án kixin ts'ínixín ihnié kaín xín chojni síin tí chjasin t'etoan

ch'án kixin tsonohe ch'án nkekjaín chojni síin. ² Tí xrankíxixín k'uínixín ihníé sín tió Cirenio mé k'uégobrnador k'uętoan estado Siria. ³ Kaínxín chojni t'ichjánxín sátsji sín chjasén sín kixin ntaha ts'inixín ihníé sín. ⁴ Mé xíkaha ch'ín José kjaxin k'uaxrjexín ch'án tí chjasin Nazaret estado Galilea ntá sákjuí ch'án tí estado Judea na mé sákjuí ch'án chjasin Belén tí tsíkokjéxín tí ch'ín rey David kixin jehe ch'ín José mé tsík'axrjeníxín ch'án tí ch'ín David. ⁵ Sákjuí ch'án chjasin Belén sákjuíko ch'án tí tjan María kixin ntiha ts'inixínko ihníé ch'án tjan kixin jehe tjan tsíkatehe kixin tsotęhe ch'án. A ntá jehe tjan na mé ó tjeýá tjan. ⁶ A ntá xíkaha kónhen nachrohe k'uéjó sín chjasin Belén, ntá kjuixraká tí yaon tsokjíhi xjeen tjan María. ⁷ A ntá ntiha kokjéxín tí xjeen tjan saó. Ntá kjuínchek'ísímá tjan xjan ka, a ntá kjuak'enkaya tjan ijnko nta neýá iko kixin jehe sín la k'uitjahya sín nchia xranka ts'ok'èxín sín mé kjónté ntiha k'uéjó sín.

Tí sín ángel la ko tí sín k'uáyakonhen kolélo

⁸ Kjaxin chjinaxón tí chjasin Belén tjejó iso chojni nteje ó la ntá ntahó titohe sín tí tie a kixin t'ayakonhen sín kolélo. ⁹ A ntá titàya k'uíkuèn sín ijnko ángel kuènte Dios la ko nkuíxín tí tjejó sín la k'uínkaséyan kixin tí kjuachaxin jé kuènte Dios kuíkao ch'án. Ntá jehe sín la imá chrakon sín. ¹⁰ A ntá tí ch'ín ángel ntáchro kixin:

—Chrakonhyará jahará. Ijie k'uinka tsotjonkará nkehe jína nixin kixin tsotchéhe kaín xín chojni ¹¹ kixin ijie tí chjasén ch'ín David kokjéxín tí nkexro tsaáxinrá jahará na mé Ìnchéni Cristo tíha. ¹² Ntá tsonoaxínrá jahará kixin tí xjan a kixin ika tjechr'ísímá xjan la ko ijnko nta neýá iko mé tjetsínkayá xjan —mé xíkaha chrónka tí ch'ín ángel.

¹³ A ntá titàya k'uíkuèn sín kixin nchónhya sín ángel kuixín nkaya nkajní tjejóko tí ch'ín ángel tjejótsje sín tjanchehe sín Dios kjuasáya, ntáchro sín kixin:

¹⁴ Kjuasáyé Dios tjen nkaya nkajní kixin imá chóna ch'án kjuachaxin. Ntá chjasintajni ts'ixín kjuaxróxin tí tjejó tí sín sinchexiteyéhe ch'án. Mé xíkaha ichro sín.

¹⁵ A ntá tí sín ángel xíkjan sín nkaya nkajní, a ntá tí sín t'ayakonhen kolélo ikjo sín kichó sín ntáchro sín kixin:

—Íntá sátsjini tí chjasin Belén tsjitsjeheni tí nkehe tsíkónhen kixin Ìnchéni k'uętoan kui tí nkexro kjuínchenoheni —ichro sín.

¹⁶ Ntá tjan sákjuí sín ntiha la k'uitja sín tí tjan María la ko tí ch'ín José la ko tí xjan a tjetsínkayá nta neýá iko. ¹⁷ A ntá tió k'uíkon sín xíkaha ntá chrónka sín tí nkehe tsíchrónka tí ángel kixin nkexrí tjen tí xjan a. ¹⁸ Ntá chrakon kaín tí sín kuínhin kixin xíkaha chrónka tí sín k'uáyakonhen kolélo. ¹⁹ Kjánchó tí tjan María la asén tjan ó xraxinkakonxín tjan kaín tíha. ²⁰ A ntá tí sín k'uáyakonhen kolélo la sákjuí sín ntja kuinkákjanchehe sín Dios kjuasáya kixin kaín tí nkehe tsíkinhin sín la ko k'uíkon sín kixin ó xiteýá kaín nkehe éxí tsíchrónka tí ángel.

Sákjuíko sín tí xjan Jesús tí nínko Jerusalén

²¹ A ntá tió xétja tí ijní yaon ntá kjuíncheka sín xjan xroye kuènte tí sín israelita ntá kjuínchek'in sín xjan Jesús éxí tsíntáchro tí ch'ín ángel chénka tí tjan María tí naxa kjuák'eyáhya tjan.

22 **A** ntá tió kuítóhe tjan María jína éxí chrónka ley kuènte Moisés * ntá sákjuiko sín tí xjan tí chjasin Jerusalén kixin tsochjéhe sín Dios kjuasáya. 23 Éxí ntáchro tí xroon ley kuènté Ìnchéni Dios kixin: “**A** ntá kaín xjan ntoa tsokjíhi saoxín la mé tsochjéhe sín Dios tí xjan a sich'ehe xjan xra Dios.”† 24 Ntá xíkaha sákjuí sín kixin ntaha tsjanjon sín iko ts'enxín ntiha tsochjéxín sín Dios kjuasáyé éxí t'etóan tí ley kuènte ch'án na mé yaá kontóá najni o yaá kontóá nteje chrókjuanjon sín.

25 **A** ntá tí yaon a kjuák'e chjasin Jerusalén ijnko ch'án ó táda ch'án mé it'in ch'án Simeón. Jehe ch'án ijnko chojni jína la ko jnkochrín xraxinkaon ch'án Dios la ko kjuák'echónhen ch'án kixin itsi tí nkexro tsaáxin tí nacióon Israel. Tí Nchakuen Dios tjeko tí ch'in Simeón 26 tsíkjinchenohe ch'án kixin naxa ts'enhya ch'án ts'ikonjia ch'án tí nkexro Cristo, na mé tí nkexro tsochr'án Ìnchéni Dios. 27 **A** ntá tí Nchakuen Dios kjuínchexraxinkaon tí ch'in a kixin sátsji ch'án nínko. **A** ntá tió kui tí iné la ko it'é xjan Jesús k'uixenko sín xjan nkaxenhen nínko kixin sinchexiteyéhe sín tí nkehe t'etóan tí ley 28 ntá ch'in Simeón kuakja ch'án tí xjan a kjóa ch'án ntá kjuanchehe ch'án Dios kjuasáya ntáchro ch'án kixin:

29 Ijie jaha Ìnchéni Dios, tsjánjuan kjuachaxin kixin kjuaxróxin its'én janhan

kixin jaha ó kjuínchexiteyá tí nkehe tsintáchrúa

30 kixin ó k'uikoxin kuán tí nkexro tsaáxinni,

31 mé xíkaha kjuich'e kixin ts'ikon kaín xín chojni.

32 Jehe ch'án mé tí xrohi ts'inkaséyanxín ntje tí sín jehya kuènte Israel, la ko jehe ch'án tsjikosáyehe ch'án tí chjasín kuéntá Israel, mé ichro ch'in Simeón.

33 Ntá ch'in José la ko tí iné ch'in Jesús la chrakon sín kixin xíkaha kuínhin sín ntáchro ch'in Simeón kixin nkexrí tjen tí xjan. 34 Ntá ch'in Simeón kjuíncheyaon ch'án sín ntá chénka ch'án tí tjan María mé tí iné xjan Jesús kixin:

—Tí xjan i tsíkikao itsjé xra la itsjé tí sín Israel tsitekakuenhya sín xjan la tsítóhe sín la ko itsjé sín tsitekaon sín antsí tsonohe sín la ko nchónhya chojni tsotjinkakonhya tsinhin sín tí nkehe tsjako ch'án. 35 Mé xíkaha tsonoxín nkexrí tjenkayáxin jnkojnko asén chojni. Kjánchó kaín tíha tsoyóhe éxí ijnko chica espada chróchr'áte asán na mé tsoxakonhan la ko ts'avá má —ichro ch'án nixjehe ch'án tí tjan María.

36 Kjaxin ntaha kjuák'e ijnko tjan chrónka itén Dios mé it'in tjan Ana, it'é mé it'in Fanuel, la mé tsík'axrjeníxin ch'án tí ch'in Aser. Jehe tjan la ó nána tjan. Tí naxa k'uétjarisoá tjan la kótehe tjan. Ntá yatokoá nánó kjuák'eko tí xii tjan 37 ntá jie ochenta y cuatro nánó tsíkók'án tjan. Kuítóehya tjan tí xra kuènte nínko la mé ntahó tjen tjan ch'ehe tjan Ìnchéni Dios xra nchakotjin la ko tie la jnkoyaxón nehya tjan kixin jína tsonixjehe tjan Dios. 38 Ntá kóchjina tí tjan Ana tí yaon, a ntá kjuixin kjuanchehe tjan kjuasáyé Dios ntá kjuankixin chrónka tjan nkexrí tjen tí xjan Jesús nixjehe tjan kaín tí sín tjejóchónhen kixin itsi nkexro sinchekaá tí chjasin Jerusalén.

Ntá kjan sín chjasin Nazaret

39 Na ntá tió kjuixin kjuínchexiteyá sín kaín nkehe t'etóan tí ley kuènte Dios ntá kjan sín estado Galilea na mé chjasén sín chaxín Nazaret. 40 **A**

* 2:22 Levítico 12.1–8 † 2:23 Éxodo 13.2,12

ntá tí xjan a mé k'uánkí xjan la ko tsanká xjan la ko imá kónohe xjan kixin Dios imá tjinkítsa tjencheyaon xjan.

Tí xjan Jesús kjuák'e xjan tí nínko Jerusalén

41 Tí it'é la ko ìné tí xjan Jesús xráxín k'uékji sín kaín nánó tí chjasin Jerusalén kixin tí kia pascua. 42 A ntá tió xetjehe ch'ín Jesús tí teyó nánó, ntá sákjui sín kaín sín tí chjasin Jerusalén kixin xíkaha kuènhen sín kixin tí kia a. 43 A ntá kjanxin sín ntiha sáchrókjui sín chjasén sín tió k'uátsínka kia la tí xjan Jesús ó tsíkítóhe xjan Jerusalén ntahó, kjánchó ìné xjan la ko ch'ín José xraxinkakonhya sín kixin kohya tí xjan. 44 Jehe sín mé kjuenkayáxin sín kixin ách'e tí sín kuichréhe mé kuikao sín xjan la ntá xíkaha chjina ijnko yaon ó tjejóyá sín ntia tsíkji sín. A ntá kjueyá sín xjan tí tjejó tí sín kjéhya la ko tí sín chóxin sín 45 kjánchó k'uitjaha sín xjan. Ntá kjan sín tí chjasin Jerusalén kixin tsjeyá sín xjan ntiha.

46 Ntá k'uátsínka iní yaon ntá k'uitja sín xjan la mé nkaxenhen nínko ntiha tjetjaxin xjan jnkosiné tí tjejó tí sín maestro tjako tí ley la tjetinhin xjan tí nkehe ntáchro sín la ko tjetjanchankíhi xjan tí jehe sín. 47 Ntá kaín tí sín tjejóntaxín tjejótinhin sín mé chrakon sín kixin xíkaha imá nohe xjan la ko xíkaha tjatehe xjan kaín nkehe tjanchankíhi sín xjan. 48 Ntá tió k'uíkon ìné la ko it'é la chrakon sín. Ntá ntáchro ìné kixin:

—Xjèenni, ¿nkekuènte xíkaha kjuich'e? It'á la ko janhan imá kóxakönhenni kjueyáni tí jaha —ichro tjan.

49 Ntá ntáchro ch'ín Jesús kixin:

—¿Nkekuènte tjejá tí jeheni? ¿Á noahya jaha kixin tóxakönhenni kixin tí xra kuènte It'èni? —ichro ch'án.

50 Kjánchó kíenxínhya sín nkexrí t'axrjexín tí nkehe ntáchro ch'án.

51 Ntá kjan sín chjasin Nazaret. A ntá ntiha naxá kuítেকakonhen xjan tí jehe sín. A ntá tí ìné la ntá asén tjan xráxín ó nohe kixin xíkaha kónhen.

52 La ko naxá k'uánkí xjan kónteto xjan la ko k'uánkí tí kjuaxrexinkaon kuènte xjan la ko Dios kóxrjínhin nkexrí kjuínchexiteyá xjan la ko kjaxin kaín chojni kóxrjínhin sín kixin jina tjen xjan.

3

Ch'ín Juan Bautista kjuák'e nteje kjuako itén Dios

(Mt. 3.1-12; Mr. 1.1-8; Jn. 1.19-28)

1 A ntá quince nánó k'uék'etqan ch'ín Tiberio tí xra gobierno, la ko tí ch'ín Poncio Pilato k'uégobernador tí estado Judea, la ko tí ch'ín Herodes k'uégobernador tí estado Galilea, la ko tí kichó ch'án Felipe mé k'uégobernador estado Iturea la ko estado Traconite, la ko ch'ín Lisancias k'uégobernador tí estado Abilinia. 2 A ntá ch'ín Anás la ko ch'ín Caifás k'uéchóna sín xra nchat'á t'etqan. A ntá Dios mé kjuanjon kjuachaxin k'uáyéhe ch'ín Juan itjen ch'án nteje tsochrónka ch'án itén Dios. Ntá jehe ch'án it'é ch'án Zacarías. 3 Ch'ín Juan k'uátsínka ch'án kaín tí chjasin chjino tí ntario Jordán kjuakohe ch'án chojni ntiha kixin chrókuinkí sín tí nkehe tjenkayáxin sín chrókuítóhe sín tí ijíé sín ntá chrókuikite sín kixin xíkaha mé chrókuin ijíé sín. 4 Mé xíkaha kónhen éxi k'uéchronka la ko tsíkjin ch'ín Isaías, mé tí nkexro k'uéchronka itén Dios ósé kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntia tsixin Ìnchéni

Takítjehérá ijnko ntia ntoí.

⁵ Kaínxín tsaka mé tsoyóxin,
la ko kaín xín jna la ko kaín xín itjo tsitöhe yóxin,
la ko tí ntja tsixrèya mé tsoxrentoá,
la ko kaín tí ntja yóxinhya la mé tsoyóxin;

⁶ Xikaha mé kaín xín chojni chjasintajni mé ts'ikon sín kixin Dios mé chrókuaáxin sín.”*

Mé xikaha ichro itén Dios.

⁷ A ntá tió kjuíji chojni ntiha kixin ch'ín Juan chrókuikite ch'án sín ntá ntáche ch'án tí jehe sín kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkeherá tí kjuanínkaon kuènte Dios ó tsi? ⁸ T'ichjánxín kixin chrók'uejorá jnkojína chrókjuákoxinrá kixin chaxín kjuitoxinhínrá tí nkehe tjenkayáxinrá. Jahará nchehnkerá ntáchrórá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham. ⁹ Kixin tí chica hacha ó tjechónhen tsochrínjinxín tí nta. A ntá kaín xín nta t'ónahya to jína mé tsochrínjin kixin tsoche —ichro ch'án.

¹⁰ A ntá tí chojni mé kjuanchankíhi sín ch'án kixin:

—A ntá tí xikaha, ¿a ntá jeheni nkehe tí chrókjuich'eni? —ichro sín.

¹¹ Ntá kjuátèhe ch'ín Juan kixin:

—Tí nkexro chóna yaá camisa la chrókjuinchekitonhen tí nkexro chóntahya. La ko tí nkexro chóna nkehe sine chróchjéhe sín tí nkexro chóntahya nkehe sine —ichro ch'án.

¹² Kjaxin ikui iso tí sín nchekjènkj kixin chrókuikite sín. Ntá kjuanchankíhi sín tí ch'ín Juan kixin:

—Maestro, ¿nkehe chrókjuich'eni jeheni? —ichro sín.

¹³ Ntá ntáchro ch'ín Juan kixin:

—Jehó éxí tí tsík'ítuanhanrá chrókjuinchekjènkirá —ichro ch'án.

¹⁴ Kjaxin iso sín soldado kjuanchankíhi sín ch'án kixin:

—¿Kjaxin jeheni nkehe chrókjuich'eni? —ichro sín.

Ntá kjuátèhe ch'án kixin:

—Teéhyará ninkexró tí chichakoen sín la ko ninkexró sich'énéhyará kjuach'ia la ko kjónté tí chichaon tjachará ó la kjuaxróxin chrók'uejorá —ichro ch'án.

¹⁵ Kaín tí chojni chjasin k'uéjóchónhen sín tóxakonhen asén sín tjinkaon sín tsonohe sín kixin á tí ch'ín Juan mé tí Cristo. ¹⁶ Kjánchó chénka ch'ín Juan kaín tí sín tjejó a kixin:

—Janhan mé inta tikítexián chojni. A ntá tí nkexro itsi chr'éxin mé tsikítexinrá tí Nchakuen Dios la ko xrohi. Antsí t'etoan ch'án a ntá janhan la kánhyó. Méxra chrókósuána chrókjuasintankaha ch'án tí correa tí tokaté ch'án. ¹⁷ Jehe ch'án la ó tjexra ch'án pala sinchetjuáxin ch'án noatrigó kixin tí ntáchjiji trigo la ókjé tsjejo ch'án a ntá tí noatrigó la tsjenájín ch'án la ts'enkachjina ch'án. A ntá tí ntáchjiji trigo la tsjakaxín ch'án ijnko xrohi ts'ankahya jnkochríxín —mé xikaha ichro ch'ín Juan.

¹⁸ Mé xikaha chronkaxín ch'án la ko itsjé í so nkehe kjuínchexraxinkaon ch'án chojni mé xikaha kjuakoxén ch'án sín tí tan jína. ¹⁹ Kjaxin kjuentuéhe ch'án tí ch'ín Herodes kixin chóna ch'án tí tjan Herodías, mé tí ichjién kichó ch'án Felipe, la ko kjuentuéhe ch'án tí ch'ín Herodes kixin tí í so nkehe jínahya tsíkjich'e ch'án. ²⁰ Kjánchó ch'ín Herodes ántosén

* 3:6 3.4-6 Isaías 40.3-5

ch'án kjónté kuínhin ch'án la kjuínchek'ánkí ch'án tí ijjé ch'án inaá kixin kjuák'echjina ch'án tí ch'ín Juan tí ntqechiso.

Kuíkite ch'ín Jesús

(Mt. 3.13-17; Mr. 1.9-11)

²¹ A ntá naxa kuènhya tíha naxa kjuák'e ch'ín Juan kuíkite ch'án chojni ntá kjaxin ch'ín Jesús mé kuíkite ch'án. A ntá tjenixjehe ch'án Dios ntá xitjehe nkajní ²² ntá k'uínkajin Nchakuen Dios éxí ijnko kontóá tsjehe la kjuák'e chrítaón kja ch'án. Ntá xrinahya kuínhin sín itén nkexro nkaya nkajní ntáchro kixin:

—Jaha mé xjanna la tjuaha tí jaha. Imá chàna kixin nchexiteyána tí jaha.

Tí sín tsík'axrjenixin ch'ín Jesucristo

(Mt. 1.1-17)

²³ Ch'ín Jesús k'uéchónta ch'án chjino treinta nánó tió kjuankíxin kjuako ch'án. Ntá kjuenkayáxin sín kixin it'é la mé ch'ín José. Ntá it'é tí ch'ín José la mé ch'ín Elí. ²⁴ A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José. ²⁵ A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí ch'ín Amós la mé ch'ín Nahum, a ntá it'é tí ch'ín Nahum la mé ch'ín Esli; a ntá it'é ch'ín Esli la mé ch'ín Nagai, ²⁶ a ntá it'é tí ch'ín Nagai la mé ch'ín Maat, a ntá it'é tí ch'ín Maat la mé ch'ín Matatías, a ntá it'é tí ch'ín Matatías la mé ch'ín Semei, a ntá it'é tí ch'ín Semei na mé ch'ín José, a ntá it'é tí ch'ín José na mé ch'ín Judá, ²⁷ a ntá it'é tí ch'ín Judá na mé ch'ín Joana, a ntá it'é tí ch'ín Joana la mé ch'ín Resa, a ntá it'é tí ch'ín Resa na mé ch'ín Zorobabel, a ntá it'é tí ch'ín Zorobabel na mé ch'ín Salatiel, a ntá it'é tí ch'ín Salatiel na mé ch'ín Neri, ²⁸ a ntá it'é tí ch'ín Neri na mé ch'ín Melqui, a ntá it'é tí ch'ín Melqui na mé ch'ín Adi, a ntá it'é tí ch'ín Adi na mé ch'ín Cosam, a ntá it'é tí ch'ín Cosam na mé ch'ín Elmodam, a ntá it'é tí ch'ín Elmodam na mé ch'ín Er; ²⁹ a ntá it'é tí ch'ín Er na mé ch'ín Josué, a ntá it'é tí ch'ín Josué na mé ch'ín Eliezer; a ntá it'é tí ch'ín Eliezer na mé ch'ín Jorim, a ntá it'é tí ch'ín Jorim na mé ch'ín Matat, ³⁰ a ntá it'é tí ch'ín Matat la mé ch'ín Leví, a ntá it'é tí ch'ín Leví na mé ch'ín Simeón, a ntá it'é tí ch'ín Simeón na mé ch'ín Judá, a ntá it'é tí ch'ín Judá na mé ch'ín José, a ntá it'é tí ch'ín José na mé ch'ín Jonán, a ntá it'é tí ch'ín Jonán na mé ch'ín Eliaquim, ³¹ a ntá it'é tí ch'ín Eliaquim na mé ch'ín Melea, a ntá it'é tí ch'ín Melea na mé ch'ín Mainán, a ntá it'é tí ch'ín Mainán na mé ch'ín Matata, a ntá it'é tí ch'ín Matata na mé ch'ín Natán, ³² a ntá it'é tí ch'ín Natán na mé ch'ín David, a ntá it'é tí ch'ín David na mé ch'ín Isaí, a ntá it'é tí ch'ín Isaí na mé ch'ín Obed, a ntá it'é tí ch'ín Obed na mé ch'ín Booz, a ntá it'é tí ch'ín Booz na mé ch'ín Salmón, a ntá it'é tí ch'ín Salmón na mé ch'ín Naasón, ³³ a ntá it'é tí ch'ín Naasón na mé ch'ín Aminadab, a ntá it'é tí ch'ín Aminadab na mé ch'ín Aram, a ntá it'é tí ch'ín Aram na mé ch'ín Esrom, a ntá it'é tí ch'ín Esrom na mé ch'ín Fares, a ntá it'é tí ch'ín Fares na mé ch'ín Judá, ³⁴ a ntá it'é tí ch'ín Judá na mé ch'ín Jacob, a ntá it'é tí ch'ín Jacob na mé ch'ín Isaac, a ntá it'é tí ch'ín Isaac na mé ch'ín Abraham, a ntá it'é tí ch'ín Abraham ná mé ch'ín Taré, a ntá it'é tí ch'ín Taré na mé ch'ín Nacor, ³⁵ a ntá it'é tí ch'ín Nacor na mé ch'ín Serug, a ntá it'é tí ch'ín Serug na mé ch'ín Ragau, a ntá it'é tí ch'ín Ragau na mé ch'ín Peleg, a ntá it'é tí ch'ín Peleg na mé ch'ín Heber, a ntá it'é tí

ch'ín Heber na mé ch'ín Sala, ³⁶ a ntá it'é tí ch'ín Sala na mé ch'ín Cainán, a ntá it'é tí ch'ín Cainán na mé ch'ín Arfaxad, a ntá it'e tí ch'ín Arfaxad na mé ch'ín Sem, a ntá it'é tí ch'ín Sem na mé ch'ín Noé, a ntá it'é tí ch'ín Noé na mé ch'ín Lamec, ³⁷ a ntá it'é tí ch'ín Lemec na mé ch'ín Matusalén, a ntá it'é tí ch'ín Matusalén na mé ch'ín Enoc, a ntá it'é tí ch'ín Enoc na mé ch'ín Jared, a ntá it'é tí ch'ín Jared na mé ch'ín Mahalaleel, a ntá it'é tí ch'ín Mahalaleel na mé ch'ín Cainán, ³⁸ a ntá it'é tí ch'ín Cainán na mé ch'ín Enós, a ntá it'é tí ch'ín Enós na mé ch'ín Set, a ntá it'é tí ch'ín Set na mé ch'ín Adán, a ntá Dios mé xjeen ch'ín Adán.

4

Ch'ín Tsochren chrókjuachroe tí ch'ín Jesús

(Mt. 4.1-11; Mr. 1.12-13)

¹ A ntá ch'ín Jesús imá chóna ch'án kjuachaxién Nchakuen Dios ntá kjanxin ch'án tí ntarío Jordán. Ntá tí Nchakuen Dios sákjuiko ch'án nteje. ² Ntaha kjuák'e ch'án cuarenta yaon na ntá tí ch'ín Tsochren tjinkaon chrókjuachroe tí jehe ch'án. Kjónehya ch'án ninkehó tí cuarenta yaon a, a ntá chr'éxin ntá xriñahya ik'uén ch'án kjinta. ³ Ntá ntáchro tí ch'ín Tsochren kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ A ntá kjuátehe ch'ín Jesús ntáchro ch'án kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tan nixja Dios tjejóchónxin chojni”* —ichro ch'án.

⁵ Ntá sákjuiko ch'ín Tsochren tí ch'ín Jesús ijnko jñá imá noi ntá kjuako tí Jínahya kaín tí nación siñ chjasintajni. ⁶ Ntá ntáchro tí ch'ín Tsochren kixin:

—Janhan tsotjaha kaín tí kjuachaxin la ko kaín tí nkehe tjete chóna kaín tí nación a. Janhan na k'uayáha kaín tíha la ntá jie tsotjaha tí nkexro tjínkavan tsotjaha. ⁷ Tí tsjak'éxian tóch'ian tsjikosáyana tí janhan ntá kaín tí nkehe la ts'óna kuéntá —ichro ch'án.

⁸ Ntá kjuátehe ch'ín Jesús ntáchro ch'án kixin:

—Sátjia Satanás, kixin xroon itén Dios ntáchro kixin “Chrókjuikosáyehé Ìnchéni Dios la jehó ch'án chrókjuich'ehé xra”† —ichro ch'án.

⁹ A ntá ch'ín Tsochren mé sákjuiko ch'ín Jesús tí chjasin Jerusalén la sákjuiko ch'án tí chrítaón tí kja nínko, a ntá ntáchro ch'án kixin:

—Tí chaxín Xjeen Dios jaha la tìtòhé t'anótjénxian tí noi ntihi ¹⁰ kixin ntáchro xroon itén Dios kixin:

Dios mé ts'etuenhen tí sín ángel kuènte ch'án kixin ts'ayakonhan sín.‡

¹¹ Tsotsé sín itjá

kixin tsotéhya totá ts'itja xro tí ts'anótjén§

—mé xikaha ichro ch'ín Tsochren.

¹² Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjíníhya chrókjuásixián kjuaxroan kjuachaxin kuènte Ìnchéni Dios”* —ichro ch'ín Jesús.

¹³ Mé xikaha tió kjuachahya tí ch'ín Tsochren kaín nkehe chrók'uetuenhen tí ch'ín Jesús ntá k'uaxrjenta ch'án iso yaon.

Ch'ín Jesús kjuankixin ch'án tí xra kuènte ch'án estado Galilea

(Mt. 4.12-17; Mr. 1.14-15)

* 4:4 Deuteronomio 8.8 † 4:8 Deuteronomio 6.13 ‡ 4:10 Salmo 91.11 § 4:11 Salmo 91.12 * 4:12 Deuteronomio 6.16

14 Ntá ch'ín Jesús xíkjan ch'án estado Galilea ínaá na imá chóna ch'án kjuachaxin kuente Nchakuen Dios. Ntá tjejóto sín nkuíxin ntiha kixin nkexro tí jehe ch'án. 15 Kjuakoxin ch'án tí ninkoe sín kaín chjasin la ko kaín xín chojni kjuanchia sín kjuasáya kixin kóxrjnhin sín tí kjuako ch'án.

Ch'ín Jesús kjuák'e ch'án chjasin Nazaret

(Mt. 13.53-58; Mr. 6.1-6)

16 Ntá ch'ín Jesús sákjuí ch'án chjasin Nazaret na mé tí chjasin tsík'ánkíxin ch'án. Ntá tí yaon t'ok'éhe sín mé k'uixenhen ch'án ijnko nínko Israel kixin xíkaha kuèhen ch'án. Ntá kjuák'exín toté ch'án kixin sinchekuáxin ch'án tí xroon itén Dios. 17 Chjéhe sín ch'án tí xroon kuente tí profeta Isaías. Ntá kuakitjehé ch'án tí xroon ntá k'uitja ch'án nketí nixja xíkíhi:

18 Tí Nchakuen It'éni Dios tjetjinkítsana má,

kixin kjueyána ch'án kixin tsóxrjanka tí tan jína kuente Dios tsjakohá tí sín nòa.

K'uetuanna ch'án kixin sintakjtohá jína tí sín t'avá asén kixin chóntahya sín nkerí tsaáxin sín,

la ko tsjakohá tí sín tjejóchjina kixin nkexrí tsaá sín,

la ko sintak'ikuán tí sín t'ikonhya,

la ko sintakaá kaín tí sín tjejótasóte kohya nkehe tsaáxin sín,

19 la ko tsóxrjanka kixin ó kjuixraká tí yaon kixin tí nkexro tsitekaon la tsaá sín.†

20 A ntá ch'ín Jesús kjuixin kjuínchekuáxin ch'án tí xroon, a ntá chjéhe ch'án tí ch'ín tjinkítsa tí xra nínko ntá kjuák'etjaxin ch'án. Ntá kaín tí sín tsikójnkotsé ntiha nínko naxa tjejókomá sín tí jehe ch'án. 21 Ntá kjuankíxin chronkaxín ch'án ntáchro ch'án kixin:

—Ntá ijie la ó xiteyá tí nkehe kjujntakuáxian tí xroon itén Dios kuínhínrá —ichro ch'án.

22 Ntá kaín sín kóxrjnhin sín tí kjuako ch'ín Jesús la ko chrakon sín kixin náxrjón tí nkehe nixja ch'án. Ntá kjuanchankíhi sín kíchó sín ntáchro sín kixin:

—¿A jehya xjeen ch'ín José tíhi? —ichro sín.

23 Ntá kjuátjehé ch'ín Jesús ntáchro ch'án kixin:

—Kjá tsontáchorá kixin janhan ijnko chojni ch'e xroan chrókjujntakjtohá jína asenná senó, la ko tsontáchorá kixin tí nkehe kuínhínrá kjuj't'a tí chjasin Capernaum xíkaha chrókjuj't'a ntihi chjasenná, tsixrorá —ichro ch'án.

24 Naxa tjenixja ch'án ntáchro ch'án kixin:

—Ijnko nkehe chaxín tsotjonkará kixin tí sín chjasén ijnko nkexro chrónka itén Dios la mé xráxin chóntehya sín kjuasáyé tí nkexro a.

25 Chaxín ntáxrjan kixin k'uéjé itsjé chojni chjin tsikók'án tí nación Israel tió kjuák'e ch'ín Elías tí nkexro k'uéchrónka itén Dios la ntá í k'uániáhya chrin iní nánó ko t'ò la ko imá kókjinta nkuíxin chjasin ntiha. 26 Kjánchó Dios la k'uetuenhya ch'ín Elías sáchrókjuitsjehe ch'án nijnko chojni chjin tsikók'án tí nación Israel. Náhí. Dios k'uetuenhén ch'án kixin sátsjitsjehe ch'án ijnko chojni chjin tsikók'án itjen chjasin Sarepta chjino chjasin Sidón.‡ 27 Kjaxin nación Israel k'uéjé nchónhya chojni chóna chinlepra tió kjuák'e ch'ín Eliseo chrónka ch'án itén Dios, kjánchó nijnko sín

† 4:19 4.18-19 Isaías 61.1-2 ‡ 4:26 4.25,26 1 Reyes 17.9;18.1

kuítóehya sín jína la mé jehó ch'ín Naamán kjuixín ch'án nación Siria mé kuítóhe ch'án jína[§] —mé xikaha ichro ch'án.

²⁸ A ntá tió kuínhin sín xikaha ntáchro ch'ín Jesús la ntá kaín tí chojni k'uéjóxehen nínko la mé imá kónínkaon sín. ²⁹ K'uínkatjen sín itsé sín ch'án sákjuiko sín ch'án tí ikon chjasin la sákjuiko sín ch'án chrítaón tí tjo tí tjen tí chjasin a chrókjuinçek'anótjenxin sín ch'án tí tjo a. ³⁰ A ntá ch'ín Jesús k'uátsínka jnkosiné tí siín tí jehe sín la sákjuí ch'án.

Ijnko chojni chóna injko nchakuen tí jínahya
(Mr. 1.21-28)

³¹ A ntá ch'ín Jesús sákjuí ch'án tí chjasin Capernaum na mé injko chjasin estado Galilea, na ntá ntaha kjuankíxin ch'án kjuakohé ch'án chojni tí yaon t'ok'éhe sín. ³² Chrakon sín kixin nkexrí kjuako ch'án kixin kjuakoxín ch'án kixin chóna ch'án kjuachaxin.

³³ A ntá nkaxenhen nínko kjuák'e injko ch'ín chóna injko nchakuen tí jínahya k'óyakoxín itén tí ch'ín a, ntáchro kixin:

³⁴ —Títóhéni; ¿nkekuente tjiaté tí jeheni kaín ni, jaha Jesús kjuixian chjasin Nazaret? ¿Á k'uinka kixin sinček'itjáyanni? Ó tjátsaon tí jaha la ko nóna kixin jaha mé tí nkexro tjóá kuente Dios —ichro tí nchakuen tí jínahya.

³⁵ Ntá ch'ín Jesús jiehe k'uetuenhen tí nchakuen tí jínahya ntáchro ch'án kixin:

—Tánía. T'axrjéxian tí ch'ín a —ichro ch'án.

A ntá tí nchakuen tí jínahya kjuáka tí ch'ín a kjuítsínka ch'án nonte jnkosiné tí siín sín la k'uaxrje tí nchakuen tí jínahya la kohya ninkehó kónhen tí ch'ín kjuítsínka. ³⁶ A ntá kaín sín chrakon sín itjo sín kichó sín kixin:

—¿Xá nkexrí kixin xikaha nixja tí ch'ín i? Jehe ch'án chóna kjuachaxin kixin k'uetuenhen ch'án tí nchakuen tí jínahya k'uaxrjéxín tí nkexro i —ichro sín.

³⁷ A ntá nkúixín ntiha ikjo sín kichó sín kixin nkerí kjuaxroan kjuích'e ch'ín Jesús.

Ch'ín Jesús kjuínčekitohe jína tí tjan ich'ee ch'ín Simón Pedro
(Mt. 8.14-15; Mr. 1.29-31)

³⁸ Ntá ch'ín Jesús k'uaxrjéxín ch'án tí nínko la ntá k'uixenhen ch'án ntóe ch'ín Simón. A ntá tí tjan ich'ee ch'ín Simón mé níhi tjan chóna tjan injko sóa jie ntá chronóehé sín ch'án kixin chrókjuinčekitohe ch'án tjan jína. ³⁹ Ntá k'uísén ch'ín Jesús tí tjen tjan ntá k'uetuenhen ch'án tí sóa a ntá kjuiin. Ntá tuénxín k'uàya tjan la ntá kjuanjon tjan nkehe sine sín.

Ch'ín Jesús kjuínčekitohe ch'án jína itsjé chojni níhi
(Mt. 8.16-17; Mr. 1.32-34)

⁴⁰ A ntá kuétaón yaon ntá kaín tí sín chóna sín sinníhi chóna sín nchónhya clase chin mé kuikao sín tí tjen ch'ín Jesús. Ntá kjuak'etja tja ch'án jnkoinko tí jehe sín a ntá xikaha kuítóhe sín jína. ⁴¹ La ko nchónhya chojni níhi chóna nchakuen tí jínahya la mé k'uaxrje tí nchakuen tí jínahya la k'óyako la ko ntáchro kixin:

—Jaha mé Xjeen Dios —mé ichro tí nchakuen tí jínahya.

Kjánchó ch'ín Jesús k'uɛtuɛnhen ch'án tí nchakuen tí jínahya la kjuan-jonhya ch'án kjuachaxin kixin tsonixja kixin ó nohe tí nchakuen tí jínahya kixin jehe ch'án na mé tí nkexro Cristo.

Ch'ín Jesús kjuako ch'án tí estado Galilea

(Mr. 1.35-39)

⁴² A ntá tí kóyaon k'uínkaséyan ntá ch'ín Jesús k'uaxrjenta ch'án chjasin sákjuj ch'án nteje. A ntá kaín tí chojni kjuíkjoyá sín ch'án la k'uitja sín tí tjen ch'án. Tjinkaon sín chrókjuinchexrjenhen sín ch'án kixin sáchrókjuihya ch'án ókjé. ⁴³ Kjánchó kjuátehe ch'ín Jesús ntáchro ch'án kixin:

—T'ichjánxin kixin sátsja kaín chjasin ókjé tsoxrjanka tí tan jína kuènte Dios kixin nkexrí tí kjuachaxin t'etoan Dios, kixin xra ó mé k'uinka —ichro ch'án.

⁴⁴ A ntá xikaha k'uájikjako ch'ín Jesús kaín tí nínko Israel tí estado Galilea.

5

Kjuaxroan itsé sín koche

(Mt. 4.18-22; Mr. 1.16-20)

¹ Ntá ijnko yaon kjuák'e ch'ín Jesús chrínta ntayaon Genesaret ntá kóchjina nchónhya chojni na mé k'uúitja kichó sín kixin tjinkaon sín chrókuinhin sín itén Dios. ² Ntá k'uúikon ch'ín Jesús kixin tjejó iyó ntabárcɔ jehó chjino chrínta ntayaon. A ntá tí sín itsé koche mé tsík'axrjexín sín ntiha la k'uéjó sín tjentoá sín la ko tjejótnemá sín tí nchísén tséya sín koche. ³ Ntá ch'ín Jesús k'uit'ótjen ch'án ijnko tí ntabárcɔ ntiha na mé ntabárcɔ kuènte ch'ín Simón na ntá chronóhe ch'án tí ch'ín Simón kixin sátsjiko ch'án ntabárcɔ ijnko chrínta ntá kjínhya. Ntá ntahó kjuák'enkáya ch'ín Jesús tí nta kjuák'etjaxin ch'án kjuakohe ch'án nchónhya chojni síin chrínta ntá. ⁴ A ntá tió kjuixin nixja ch'án ntá ntáche ch'án tí ch'ín Simón kixin:

—Tjíkoa ntabárcɔ tí tjiá ntá nínka ntá iterá tí nchísén tseyará koche —ichro ch'án.

⁵ Ntá kjuátehe ch'ín Simón ntáchro ch'án kixin:

—Maestro, kjuích'eni xra kuenté tie la tséhyani ninkehó koche. Kjánchó tí jaha xikaha kuétuénhénni la mé tsochr'ánni tí nchísén inaá —ichro ch'án.

⁶ Na ntá xikaha kjuích'e sín la ntá nchónhya koche tsítsé tí nchísén la ntá tí nchísén kjuankixin tinkák'ichje. ⁷ Ntá k'uèyaxin sín tja sín kixin chróxrakoa tí sín ch'eko sín xra tjejóxehen tí í jnko ntabárcɔ kixin tsjinkitsa sín. Ntá xrákao sín ntabárcɔ kuènte sín ntá kjuínchekaón sín yóí tí ntabárcɔ ntá chrókjuachahya tí ntabárcɔ na tjinkaon chrók'uániánkí ntá. ⁸ Ntá xikaha k'uúikon ch'ín Simón Pedro ntá kjuák'exín toch'in ch'án nkayakon ch'ín Jesús ntá ntáchro ch'án kixin:

—Títóhéni Ìnchéni kixin jeheni ijnko chojni chóna jie —ichro ch'án.

⁹ Mé xikaha ichro ch'ín Simón kixin chrakon ch'án la ko kjaxin chrakon tí í so sín tjejóko ch'án kixin xikaha kónhen xrenájín nchónhya koche. ¹⁰ La ko ch'ín Jacobo la ko ch'ín Juan, xjeen ch'ín Zebedeo, na mé jnkokoá ch'eko sín xra ch'ín Simón, la kjaxin chrakon sín. Kjánchó ntáche ch'ín Jesús tí ch'ín Simón kixin:

—Chrakonhya. Senó la koche k'uétse la nta jie la náhi la mé chojni tsjéya —ichro ch'án.

¹¹ Ntá tió kjuújiko sín tí ntabárcɔ tí chrínta ntá la kuítɔhe sín kaín nkehe kuènte sín ntá chréhe sín sákjuúko sín tí ch'ín Jesús.

Ch'ín Jesús kjuínchekitohe ch'án jína ijnko chojni chóna chinlepra
(Mt. 8.1-4; Mr. 1.40-45)

¹² Kjuák'e ch'ín Jesús ijnko tí chjasin, ntá kui ijnko chojni níhi chóna chinlepra. A ntá tió k'uúikon ch'án tí ch'ín Jesús ntá kjuák'exín toch'in ch'án chronóhe ch'án jnkójína ntáchro ch'án kixin:

—Ínchéni, tí tjinkávan jaha la jína chrókjuínchekitohéni jína —ichro ch'án.

¹³ Ntá ch'ín Jesús kjuéntoá tja ch'án ntá kjuak'etja tja ch'án chrítaón tí sɪnníhi ntáchro ch'án kixin:

—Méxra xikaha tjínkavan. Ntá jie sintakitoha jína —ichro ch'án.

Ntá xikaha ichro ch'án ntá tí chinlepra tuénxín kjuínhin tí sɪnníhi. ¹⁴ A ntá k'uētuenhen ch'ín Jesús tí ch'ín a kixin chróchenkahya ch'án ninkexró. Ntáchro ch'án kixin:

—Sátjia tjítsjehé tí nchat'á la tsjánjuan tí nkehe tsík'etɔan ch'ín Moisés ts'áyehé Dios* kixin ntá tsoñoexín kaín xín chojni kixin ó kuítɔha jína —ichro ch'án.

¹⁵ Kjánchó antsí k'uúixikónohe sín nkexrí tí kjuaxroan kjuasin ch'ín Jesús, ntá nchónhya chojni k'uúixikóchjinehe sín ch'án kixin tsinhin sín nkehe tsjako ch'án, la ko tsitɔexín sín jína tí chin chóna sín. ¹⁶ Kjánchó ch'ín Jesús la k'uaxrjenta ch'án tí kohya chojni la ntaha nixjeexín ch'án Dios.

Ch'ín Jesús kjuínchekitohe ch'án jína ijnko ch'ín tsík'en toté
(Mt. 9.1-8; Mr. 2.1-12)

¹⁷ A ntá ijnko yaon kjuák'ekjako ch'ín Jesús na ntá ntiha k'uéjótjaxín iso sín fariseo la ko iso tí sín tjako tí ley, tsíkjixín sín kaín tí chjasin ntsí estado Galilea la ko kaín tí chjasin ntsí estado Judea la ko tí chjasin Jerusalén. Ntá tí kjuachaxin kuènte Dios kjuakoxín ch'án kixin sinchekitohe ch'án chojni jína. ¹⁸ Ntá kui iso chojni tinkátsénki sín ijnko ch'ín tsík'en tote tjenkáya ijnko kania. Ntá tjinkaon sín chrók'uixenko sín ch'án tí nchia kixin chrókjuak'e ch'án tí tjen ch'ín Jesús tjetjako ch'án. ¹⁹ Kjánchó xitjahya ts'ixenhen sín kixin nchónhya chojni síxenhen nchia. Ntá k'ujit'ótjen sín tí chrítaón nchia, ntá kjuakjiiin sín iso teja la ko tí nta sít'ó ntá ntiha kjuinkajinxín sín tí ch'ín níhi tjenkáya kania ntoí tí tjen ch'ín Jesús. ²⁰ Na ntá tió k'uúikon ch'ín Jesús kixin imá tinkáchónki sín ch'án ntá nixjehe ch'án tí ch'ín níhi, ntáchro ch'án kixin:

—Jaha, ó kjuixin kjuínhan tí jie chonta —ichro ch'án.

²¹ A ntá tí sín maestro tjako tí ley la ko tí sín fariseo kjuankixin sín kjo sín asén sín kixin: “¿Xá nkexro tíhi ch'ia ch'án ncheyóhe ch'án asén ch'án Dios? Ninkexró xitjahya tsjakjiiin ijie kixin jehó Dios mé chóna kjuachaxin tsjatsen ijie chojni”, mé xikaha kjuenkayáxin sín.

²² Ntá ch'ín Jesús la ó nohe ch'án tí nkehe tjenkayáxin sín ntá ntáchro ch'án kixin:

—¿Nkekuènte kixin xikaha tjenkayáxinrá? ²³ ¿Nkehe antsí xrahya chróntátjan ch'án? ¿A antsí xrahya chróntátjan ch'án kixin ó kjuixin kjuínhin ch'án tí ijie yámá ch'án, o á antsí xrahya chróntátjan ch'án kixin chrók'uúinkatjen ch'án sáchrókjui ch'án? ²⁴ Méxra ijie tsjako xian kixin tí Xjeen Dios K'óna Chojni mé chóna kjuachaxin ntihi chjasintajni tsjakjiiin ijie chojni —ichro ch'án.

* 5:14 Levítico 14.4-8

Ntá k'uetuenhen ch'án tí ch'ín tsík'en tote ntáchro ch'án kixin:

—Jaha tetuanhan t'inkatjen tjatsiyan kaniaa la sátja ntoa —ichro ch'án.

²⁵ Ntá tuénxín k'uínkatjen tí ch'ín tsík'en tote nkayakon kaín tí sín siín a la kuákja ch'án kaniee ch'án k'uékjak'eták'á ch'án ntá sákjuí ch'án ntoe ch'án la kjuanchehe ch'án Dios kjuasáya. ²⁶ Ntá kaín sín imá chrakon sín la kjuanchehe sín Dios kjuasáya kjónté chrakon sín la ntáchro sín kixin:

—Ijie mé k'uíkonní antsí má kjuaxroan jíe —ichro sín.

Ch'ín Jesús k'uíyehe ch'án tí ch'ín Leví

(Mt. 9.9-13; Mr. 2.13-17)

²⁷ Ntá chr'éxin ntá ch'ín Jesús k'uaxrjexín ch'án nchia ntá k'uíkon ch'án ijnko ch'ín nchekjènkí mé it'ín ch'án Leví tjetjaxín ch'án tjech'e ch'án xra nkaxenhen tí nchia ntsí tí xenkaxín chichaon a. Ntá ntáchro ch'án kixin: —Chréhé tí janhan —ichro ch'án.

²⁸ Ntá ch'ín Leví mé tuénxín k'uínkatjen ch'án la ntá kuítohe ch'án kaín xín nkehe ntá chréhé ch'án tí ch'ín Jesús.

²⁹ Ntá chr'éxin ch'ín Leví chónta ch'án ijnko kia jíe ntoe ch'án kjuikosáyehe ch'án tí ch'ín Jesús. Kjaxin k'uéjó itsjé tí sín nchekjènkí la ko itsjé í so chojni chónta jíe k'uéjótjaxinko sín tí ch'ín Jesús chjino tí mesa a. ³⁰ A ntá tí sín fariseo la ko tí sín maestro tjako tí ley la mé kjuankixin sín tjonta sín tí sín k'uájiko ch'ín Jesús ntáchro sín kixin:

—¿Nkekuente ntekoará la ko t'ikoará tí sín nchekjènkí la ko tí sín chónta jíe? —ichro sín.

³¹ A ntá kjuátehe ch'ín Jesús ntáchro ch'án kixin:

—Tí chojni níehya t'ichjánxienhya sín nkexro sich'e xroan. Náhí. Jehó tí sín níhi mé t'ichjánxinhin sín nkexro sich'ehe sín xroan. ³² Janhan la k'uinkahya ntíhi kixin chrók'uíyahá tí sín jina tjejó. Náhí. Janhan k'uinka kixin ts'iyahá tí sín chónta jíe kixin chrókuítohe sín tí ijíe sín ntá chrókjuinkí sín tí tjenkayáxin sín —ichro ch'án.

Tjanchankíhi sín tí ch'ín Jesús kixin á chrókjónehya sín tió tsonixjehe sín Dios

(Mt. 9.14-17; Mr. 2.18-22)

³³ A ntá kjuanchankíhi sín tí ch'ín Jesús kixin:

—¿Nkekuente kixin tí sín k'uék'ajiko ch'ín Juan jnkoyaxón nehya sín na nixjehe sín Dios, la ko kjaxin xikaha ch'e tí sín xriko tí sín fariseo, a ntá tí sín xrikoa la ine sín la ko it'i sín? —ichro sín.

³⁴ Ntá kjuátehe ch'ín Jesús kixin:

—¿Xá chrókjuachará chrókuetuenhenrá kaín tí sín tsík'iyehe sín tsíkóchjina tí tjejó tí sín tsíkótehe kixin chrókjónehya sín tí naxa tjejóko sín tí ch'ín tsíkótehe? ³⁵ Kjánchó tsjixraká tí yaon itsi chojni tsotsé sín tí ch'ín tsíkótehe sátsjiko sín ch'án. Ntá tí sín tsíkóchjina la ts'ává sín la í sinehya sín —ichro ch'án.

³⁶ Kjaxin kjuíncheyoxin ch'án ntáchro ch'án kixin:

—Ninkexró chrókuaté ijnko camisa nixin ntá chrókjuak'eniehe ijnko camisa ntaxin kixin xikaha chrókjuich'e sín ntá chrók'uitjáyán tí camisa nixin la ko kjaxin tí t'o ka k'uaxrjexín tí camisa nixin tsoyoehya tí camisa ntaxin. ³⁷ Kjaxin chrókuíkiahyará xranvino nixin ijnko tjuaxran ntaxin kixin tí xikaha chrókjuich'erá la chrók'uiche tí tjuaxran ntaxin ntá chrók'uitjáyán tí xran la ko chrók'uitjáyán tí tjuaxran. ³⁸ A ntá tí xranvino nixin chrókuikia ijnko tjuaxran nixin kixin yóí la chrók'uitjáyanhya. ³⁹ La ko kjaxin ninkexró tió tsík'i tí xran ntaxin naxa chrókóxrjinhin chrók'ui

xran nixin. Náhí. Tsontáchro ch'án kixin íchá jína tí xran ntaxin, tsixro ch'án —mé xikaha ichro ch'in Jesús.

6

Tí sín k'uájiko ch'in Jesús mé k'uín sín iso noatrigo ijnko yaon t'ok'éhe tí sín israelita

(Mt. 12.1-8; Mr. 2.23-28)

¹ Ijnko yaon t'ok'éhe sín la ch'in Jesús k'uátsínka ch'án iso nonte t'óna noatrigo. Na ntá tí sín k'uájiko ch'án mé ik'uín sín iso noatrigo la kjuankixin sín nkaya tja sín ó k'óntajinyá sín tí noa ntá kjóne sín. ² Ntá iso tí sín fariseo kjuanchankí sín kixin:

—¿Nkekuènte kixin tjejoch'erá xrá jie? La mé kohya kjuachaxin tsonhen xrá tí yaon t'ok'éheni —ichro sín.

³ Ntá kjuátehe ch'in Jesús kixin:

—¿Jahará á kjuínchekuáxinhyará tí xroon chrónka nkehe kjuích'e ch'in David la ko tí sín k'uájiko ch'án tió k'uén sín kjinta? ⁴ Na mé jehe ch'án mé k'uixenhen ch'án ntöe Dios la kjóne ch'án tí niotja tsikóyaon, la ko kjaxin chjéhe ch'án tí niotja tí sín k'uájiko ch'án kjónté jehó siín kjuachaxin sine tí sín nchat'á* —ichro ch'in Jesús.

⁵ Kjaxin ntáchro ch'án kixin:

—A ntá tí Xjeen Dios K'óna Chojni mé chóna kjuachaxin ts'etöan nkexrí tsonhen tí yaon t'ok'éheni —ichro ch'án.

Ch'in Jesús kjuínchekitohe jína ijnko ch'in tsíxamá tja

(Mt. 12.9-14; Mr. 3.1-6)

⁶ A ntá í jnko yaon t'ok'éhe chojni ntá k'uixenhen ch'in Jesús ijnko ninko Israel la ntá kjuankixin kjuako ch'án. A ntá ntaha kjuák'e ijnko ch'in tsíxamá tja ch'án chjina. ⁷ Na ntá tí sín tjako tí ley la ko tí sín fariseo tjejó sín tsáyehe sín tí ch'in Jesús chrók'uikon sín á sinchekitohe ch'án chojni jína tí yaon t'ok'éhe sín kixin ntá chrók'ueka sín ch'án jie. ⁸ Kjánchó jehe ch'án ó nohe ch'án nkehe tjenkayáxin asén sín ntá nixjehé ch'án tí ch'in tsíxamá tja ntáchro ch'án kixin:

—T'ínkatjen, tjak'e jnkosiné ntihi —ichro ch'án.

Ntá k'uínkatjen tí ch'in a kjuák'exín töte ch'án. ⁹ Ntá nixjehé ch'in Jesús tí í so sín ntáchro ch'án kixin:

—Tsjánchánkíhára ijnko xrá. Tí yaon t'ok'éheni la, ¿á jína chrókjuich'eni ijnko nkehe jína ní o á chrókjuich'eni ijnko nkehe jínahya? ¿Á chrókjuinchekitoheni chojni jína ní o á chrók'óyánni chojni? —ichro ch'án.

¹⁰ Ntá ch'in Jesús komá ch'án kaín tí chojni siín ntiha ntá nixjehé ch'án tí ch'in níhi ntáchro ch'án kixin:

—Tjéntoá tjá —ichro ch'án.

A ntá tí ch'in a xikaha kjuích'e ch'án ntá kuítóhe tja ch'án jína. ¹¹ Kjánchó tí sín fariseo tjejó mé kónínkaon sín mé ntá kjo sín kichó sín kixin tjínkaon sín chrók'óyán sín tí ch'in Jesús.

Ch'in Jesús kjueya ch'án tí teyó sín ts'ajiko ch'án

(Mt. 10.1-4; Mr. 3.13-19)

¹² A ntá ijnko yaon ch'in Jesús sákjui ch'án ijnko jnā kixin ntaha tsonixjexín ch'án Dios la ntá ntahó kjuák'e ch'án kuenté tie tjenixjehé

* 6:4 6.3-4 1 Samuel 21.6; Levítico 24.5-9

ch'án Dios. ¹³ A ntá tí k'uínkaséyan a na mé k'uíyehē ch'án tí sín chréhe sín ch'án ntá kjueyá ch'án teyó sín kixin ts'óna sín apóstol ts'ajiko sín ch'án. ¹⁴ A ntá tí sín í mé xikihi it'in sín. Na mé ch'ín Simón la ntá ch'ín Jesús kjuínchek'in ihnié ch'án Pedro kjaxin; la ko kichó ch'án ch'ín Andrés; la ko ch'ín Jacobo la ko ch'ín Juan, la ko ch'ín Felipe, la ko ch'ín Bartolomé, ¹⁵ la ko ch'ín Mateo, la ko ch'ín Tomás, la ko ch'ín Jacobo la mé it'é mé it'in Alfeo; la ko í jnko ch'ín Simón na mé tí ch'ín a mé k'uék'aji tí partido cananista; ¹⁶ la ko ch'ín Judas la kichó ch'án mé it'in Jacobo; la ko ch'ín Judas Iscariote tí ch'ín kjuínchekji tí ch'ín Jesús.

Ch'ín Jesús kjuakohē ch'an nchónhya chojni
(Mt. 4.23-25)

¹⁷ Ntá ch'ín Jesús la ko tí jehe sín k'uínkajinxin sín tí jna ntá k'uéjé sín nonte yóxin jehe ch'án la ko tí sín kjueyá ch'án. Kjaxin k'uixikóchjina nchónhya chojni kjuixin nkuixín estado Judea la ko chjasin Jerusalén la ko tí chrínta ntayaon tí síin tí chjasin Tiro la ko tí chjasin Sidón. Ó kjuí sín kixin tsinhin sín tí nkehe tsjako ch'ín Jesús la ko tsitohe sín jína. ¹⁸ A ntá tí sín kjuaxróxinhya k'uéjé k'uéchónta sín nchakuen jínahya na mé kuítohe sín jína kjaxin. ¹⁹ Kaín chojni tjinkaon chrókuákóxin sín tí ch'ín Jesús kixin kjuínchekitohe ch'án jína kaín xín chojni kixin jehe ch'án chóntha ch'án kjuachaxin jié.

Tí kjuachéhe la ko tí kjuaxróxinhya
(Mt. 5.1-12)

²⁰ Ntá komá ch'ín Jesús tí sín k'uájiko ch'án ntá ntáchro ch'án kixin:

—Náxrjón tjejorá jahará nõará kixin chontará kjuachaxiēn Dios.

²¹ Náxrjón tjejorá jahará t'énxinrá kjinta ijie kixin chr'éxin sinterá jína.

²² Náxrjón tjejorá jahará tsjanará ijie kixin chr'éxin tsjanorá.

²² Náxrjón tjejorá jahará nínkakonhanrá chojni la ko ts'inkítíará sín sátsjirá ókjé, la ko t'ántaxínhanrá sín la ko t'ákjenxin sín ihniará éxi ijnko nkehe jínahya kixin tinkachónkirá tí Xjeen Dios K'óna Chojni. ²³ Tsocháhará má la ko imá tsochontará kjuachéhe tí yaon a kixin ts'ayéhérá nkehe kuēnte nkaya nkajni. A ntá xikaha tí t'áchrjí tí sín jínahya ch'e la mé ósé kjuate sín tí sín k'uéchónka itén Dios.

²⁴ A ntá jahará rícorá kjuaxróxinhya ts'ejorá chr'éxin kixin ó kjuixin k'uayéhérá kaín nkehe.

²⁵ A ntá jahará kjónterá jína, kjuaxróxinhya ts'ejorá chr'éxin kixin ts'énxinrá kjinta.

A ntá jahará tjanorá jie, kjuaxróxinhya ts'ejorá chr'éxin kixin ts'avará la ko tsotsjanará.

²⁶ Kjuaxróxinhya ts'ejorá tió kaín chojni tsjikosáyahará sín kixin xikaha tí t'áchrjí sín kjuikosáyehe tí sín ntoáhya k'uéchónka itén Dios ósé.

Tsojtjuèhēni tí sín nínkakonhēni
(Mt. 5.38-48; 7.12)

²⁷ A ntá jahará tjejotinhínrá mé tjéxrjanka kixin chrójtjuéhérá tí sín nínkakonhanrá la ko jína chrókjuínkítsará tí sín tjinkakonhya tí jahará. ²⁸ Jína nixjehérá tí sín t'ántaxínhanrá la ko tjanchehéra Dios kixin tsjinkítsa ch'án tí sín chónkíhará sín. ²⁹ Tí chjéhe ijnko nkexro ijnko tuaanrá chrókjóka tí í jnko nánko kixin chróchjéhe sín tíha kjaxin. La ko tí síin ijnko nkexro tjinkaon sín tsakítsjaha sín tí chamara tjín t'ínkayate na mé tjtóhé kixin kjaxin sátsjiko sín camisá kjaxin. ³⁰ Tí jnkojín nkexro tjanchaha

nkehe chonta la chjehé sín. A ntá tí tsakja sín nkehe kuèntá la tjanchehya sín kixin naxa ts'ókjanhan sín. ³¹ Méxra chrókjuikosáyehérá kichuárá éxi yóhe nkexrí tjinkáonrá chrókjuikosáyahará tí jehe sín kjaxin.

³² 'Tí jehó tjuèhérá tí nkexro tjuàhará la tí xikaha la kohya ninkehó tsjachahyará. Kjónté tí sín jínahya tjasin jie la xikaha ch'e sín. ³³ A ntá tí tjikosáyehérá jehó tí sín tjikosáyahará la kohya ninkehó tsjachahyará xikaha. Kjónté tí sín jínahya tjasin jie mé kjaxin xikaha ch'e sín. ³⁴ La ko tí nchekjenrá chichaon jehó tí sín tjenkayáxinrá kixin ts'ókjanhanrá sín tí chichaon, la tí xikaha kohya ninkehó tsjachahyará. Kjónté tí sín jínahya tjasin jie xikaha ch'e sín nchekjen kichó sín chichaon la ko chónhen sín kixin tsokjan tí chichakqen sín inaá. ³⁵ Kjánchó jahará chrótjuèhérá tí sín nínkakonhanrá la ko jína chrókjuich'eherá sín xra la ko chrókjuinchekjenrá sín chichaon la chróchoénhyará kixin chrókjan tí chichakqonrá inaá. Mé xikaha chrókjuich'erá la imá tsjachará la ko ts'ónará xjeen Dios nkaya nkajní kixin jehe ch'án ch'ehe ch'án jína tí sín chóntehya ch'án kjuasáya la ko tí sín jínahya. ³⁶ Chrókuikonóéhérá kichuárá éxi yóhe It'ará nkaya nkajní tikonóehé ch'án chojni.

*Chrók'uantaxienhyani kichó ní
(Mt. 7.1-5)*

³⁷ 'Chrókuékahyará jie ókjé chojni kixin ntá Dios chrókjuanchahya ch'án jie tí jahará. Chrókuétuanhyará kixin chrókjuasóte í jnko chojni kixin Dios kjaxin chrókjuinchekjasótiahayará ch'án tí jahará. Chrók'uitjányanhanrá ichrén jie kjuasinhanrá í jnko chojni kixin ntá Dios chrókjuinchek'itjányanhanrá ch'án tí jie kjuásinrá. ³⁸ Chjehérá í so sín tí nkehe ts'áyéhe sín kixin ntá Dios tsotjáhará ch'án nkehe jína kjaxin, tjetóxin ijnko medida jína chrókjuanjon ch'án, icha tsík'enka ch'án kixin tsík'ótsjéyehe ch'án tí nkehe tsíkjachraqayá ch'án tjetóxin tsjanjon ch'án. Dios tsotjáhará xikaha yóhe éxi tsíchjehérá í so chojni.

³⁹ Ntá kjuíncheyóexin ch'ín Jesús ntáchro ch'án kixin:

—¿Xá á chrókójína ijnko chojni t'ikonhya chrókjuiko í jnko chojni t'ikonhya? Tí xikaha la yóí sín chrók'uanótjenyá sín ichrén tóye. ⁴⁰ Ijnko nkexro xrakohe la noehya éxi tí nkexro tjako. Kjánchó tió tsjixin tsoxrakohe ch'án ntá tsonohe ch'án éxi nohe tí nkexro kjuakohe ch'án.

⁴¹ '¿A ntá nkekuènté tsjehé tí chjínínó ntsí tjenkánkí ikon tí kichuá, tí naxa ántosán tí nta jie tjenkánkí ikuan? ⁴² ¿Mé xikaha nkexrí kixin chróntáche kichuá kixin chrókuítóhe ch'án kixin chrókuakitsjenkíhí ch'án tí chjínínó ntsí tjenkánkí ikon ch'án tí naxa ántosán tí nta jie tjenkánkí ikuan? Jaha la ntoáhya tjenkayáxian ch'ia jaha. Senó chrókuakitsjenkiá tí nta jie tjenkánkí ikuan kixin ntá chrók'uikuan chrókuakitsjenkiá chjínínó ntsí tjenkánkí ikon tí kichuá.

*Tí nta mé tjatsoanxínni tí to tsík'óna
(Mt. 7.17-20; 12.34-35)*

⁴³ 'Kohya nta jína chrók'óna to jínahya, la ko kjaxin kohya nta jínahya chrók'óna to jína. ⁴⁴ Jnkojnko tí nta mé tjatsoanxínni tí to t'óna. Tí ntach'ijitjahya tsjakjinjinni to higo la ko xitjahya ts'inni to uva. ⁴⁵ Ijnko chojni jína la jína nixja ch'án kixin jína asén ch'án. A ntá ijnko chojni jínahya la mé nixja tí nkehe jínahya kixin jínahya asén ch'án. Kixin éxi tjenkayáxin asén mé xikaha nixja ir'va.

Ch'ín Jesús kjuíncheyóexin éxí yaá nkexro kjuích'éna nchia
(Mt. 7.24-27)

⁴⁶ ¿Nkekuènte ntáchrórá kixin janhan Ìnchárá, la ntá tahyará kuenté tí nkehe tétuanhanrá? ⁴⁷ Méxra káin tí nkexro tóchjina tinhin tí nkehe ntáxrjan la ko titekaon sín la mé tsontáxrjan nkexro tí tóyóhe sín. ⁴⁸ Na mé jehe sín tóyóhe ijnko nkexro kjuích'éna nchia la senó k'óxraya ch'án tòye njnka kixin ntá sich'éna ch'án nchia chrítaón tí tjo a. A ntá tió k'uánkí tí ntarío la ikui tí ntá k'uúntate tí nchia, kjónté xikaha la k'uátjoákohya la ní kuínkíhya tí nchia a kixin jina tsík'óna chrítaón tjo tjekjen. ⁴⁹ A ntá tí nkexro tinhin tí nkehe ntáxrjan la ntá tahya sín kuenté la mé tóyóhe ijnko nkexro kjuích'éna nchia chrítaón nche la kohya tjo chrínkí. A ntá tió k'uánkí tí ntarío la ikui tí ntá k'uúntate tí nchia la ntá k'uátjoáko ntá tí nchia la ntá kuenté tí nchia la k'uitjayan —mé ichro ch'ín Jesús.

7

Ch'ín Jesús kjuínchekitohe jina ijnko ch'ín ch'ehe ijnko soldado romano xra
(Mt. 8.5-13)

¹ Ntá ch'ín Jesús kjuixin nixjehe ch'án tí chojni a ntá sákjuí ch'án chjasin Capernaum. ² Ntaha kjuák'e ijnko capitán romano la mé chóna ch'án ijnko nkexro ch'ehe ch'án xra imá tjuèhe ch'án la ntá jie níhi tí ch'ín a tjet'en ch'án. ³ A ntá tió kuínhin tí ch'ín capitán itjo sín nkexrí tjen ch'ín Jesús ntá ichr'án ch'án iso sín táda judío tsjjijtsjehe sín tí ch'ín Jesús tsochronóehe sín ch'án kixin chrókjuiji ch'án chrókjuínchekitohe ch'án jina tí ch'ín ch'ehe ch'án xra. ⁴ Ntá kjuíji sín kóchjinehe sín tí ch'ín Jesús kjuankíxin chrónóehe sín ch'án ntáchró sín kixin:

—Imá jina tí ch'ín capitán la mé tjinkaon ch'án chrókjuinkítsa ch'án ⁵ kixin tjuèhe ch'án tí nacióon kuènteni la ko jehe ch'án kjuínkítsa ch'án la ko k'uetóan kixin ts'óna ijnko njnko kuènteni —ichro sín.

⁶ Ntá ch'ín Jesús sákjuiko sín ch'án. Ntá ó kjuíjichjina sín chjino tí nchia la mé tí ch'ín capitán k'uetuènen ch'án iso chojni chóxin ch'án tsontáche sín tí ch'ín Jesús kixin:

—Tadá. Tjinkakonhya ch'án chrótjáha ch'án xra kixin jehe ch'án la jehya chojni jina la ko chrókósuèhe kixin chrók'uixenhén ntoe ch'án. ⁷ Mé xikaha chrókósuèhe ch'án chrókjuiji ch'án chrókjuéyá ch'án tí jaha. Méxra tí kjuachaxin chrónixja ó chrókuitóexín jina tí ch'ín ch'ehe ch'án xra. ⁸ Kixin jehe ch'án kjaxin t'ítuènen ch'án la ko kjaxin chóna ch'án soldado t'etuènen ch'án inaá. Tió t'etuènen ch'án ijnko sín kixin sátsji la mé sátsji la ko tió t'etuènen ch'án í jnko sín kixin xrákoa la mé xrákoa la ko tió t'etuènen ch'án í jnko sín kixin sich'e ijnko xra la mé nchexiteyá ch'án —mé xikaha ichro tí sín kui.

⁹ Ntá ó kuínhin ch'ín Jesús xikaha ntá chrakon ch'án kixin xikaha tjenkayáxin tí ch'ín a, a ntá nkátjía ch'án komá ch'án tí chojni chréhe ntáchró ch'án kixin:

—Ntáxrjan kixin naxa k'uitjahya nijnko nkexro israelita xikaha tinkáchónki éxí tí ch'ín í —ichro ch'án.

¹⁰ A ntá ó kjan nchia tí sín tsík'ítuènen la ó k'uúkon sín kixin ó tsíkitohe jina tí ch'ín níhi.

Ch'ín Jesús kjuínchexechón tí xjeen ijnko tjan k'án chjasin Naín

¹¹ Ntá chr'éxin ntá sákjuí ch'ín Jesús ijnko chjasin it'in Naín la ko sákjuíko ch'án tí sín k'uájiko ch'án la ko nchónhya í so chojni. ¹² Tió kjuíjichjina

sín tí chjasin a la k'uíkon sín nchónhya chojni sákjuíkjava sín ijnko chojni tsík'en na mé tí jnkokoá xjeen ijnko tjan k'án. Itsjé chojni chjasin ntiha sákjuíkotoxin sín tjan. ¹³ Ntá tió k'uíkon Ìnchéni tí tjan a ntá kuíkonóhe ch'án tjan ntáchro ch'án kixin:

—Tsjan kahya —ichro ch'án.

¹⁴ Ntá ch'ín Jesús kóchjinehe ch'án tí sín tinkátsénki tí nkexro tsík'en la kjuak'etja tja ch'án tí nkehe tinkátsénkia sín tí ch'ín tsík'en. A ntá tí sín kuámá nta k'uejóchónhen sín. Ntá ch'ín Jesús nixjehe ch'án tí ch'ín tsík'en ntáchro ch'án kixin:

—Ntásoá. Tétuqhan t'áya —ichro ch'án.

¹⁵ Ntá tí ch'ín tsík'en tuénxín kjuák'etjixin ch'án la ko kjuankixin nixja ch'án. Ntá ch'ín Jesús kjuínchek'áyéhe ch'án iné tí ch'ín ntasoá la sákjuíko. ¹⁶ A ntá tió k'uíkon sín xikaha kónhen la kaín sín imá chrakon sín la ko kjuankixin kjuanchehe sín Dios kjuasáya ntáchro sín kixin:

—Dios mé ichr'án ijnko chojni imá t'etqan chrónka itén Dios ts'ejókoni —ichro sín.

Kjixin ntáchro sín kixin:

—Ó kui Dios tsjinkitsa ch'án chjasén ch'án —ichro sín.

¹⁷ A ntá nkuíxín estado Judea la ko kaín tí chjasin chjinaxón mé kuínhin sín kixin nkehe tí kjuaxroan kjuích'e ch'ín Jesús.

Tí sín ichr'án ch'ín Juan Bautista

(Mt. 11.2-19)

¹⁸ A ntá tí sín k'uájiko ch'ín Juan mé chénka sín ch'án kaín tí nkehe tsíkónhen. Ntá k'uíyehe ch'án iyó tí sín k'uájiko ch'án ¹⁹ k'uetuqnen ch'án sín sátsjitsjehe sín tí ch'ín Jesús tsjikjanchankíhi sín ch'án kixin á jehe ch'án tí nkexro tsi ó á tsochónhen sín í jnko nkexro, tsixro sín. ²⁰ A ntá tí sín ichr'án ch'ín Juan mé kóchjina sín tí tjen ch'ín Jesús ntáchro sín kixin:

—Ch'ín Juan Bautista k'uetqan ch'án kuini tsjikjanchankíhani kixin á jaha tí nkexro tsi ní ó á tsochónhenni í jnko nkexro —ichro sín.

²¹ A ntá tí yaon kjuíji sín na mé ch'ín Jesús kjuínchekitohe ch'án itsjé chojni jína la mé kjuatsen ch'án kaín tí chin chóna sín la ko kuakitsje ch'án tí nchakuen jínahya chóna sín la ko kjuínchek'ikon ch'án itsjé chojni t'ikonhya. ²² A ntá kjuátéhe ch'ín Jesús ntáchro ch'án kixin:

—Sátjirá tjíchenkará tí ch'ín Juan kaín nkehe k'uíkonrá la ko kaín nkehe kuínhínrá kixin tí sín k'uíkonhya la ó t'ikon sín jie, la ko tí sín k'uékjihya la ó tji sín jie, la ko tí sín k'uéchóna chinlepra la ó kuitóhe sín jína, la ko tí sín kienhya la ntá jie la ó tinhin sín, la ko tí chojni tsík'en la ó sixechón sín jie, la ko tí sín nòa síxrakóhe sín tí tan jína tsaáxin sín. ²³ Ntá náxrjón tjen tí nkexro kohya nkehe t'ínkákónhen tí tinkáchónki sín tí janhan —mé ichro ch'án.

²⁴ Tió sátsíkji tí sín ichr'án ch'ín Juan ntá kjuankixin nixjehe ch'ín Jesús tí sín k'uejó ntiha kixin nkexrí tjen ch'ín Juan ntáchro ch'án kixin:

—Tió sákjuítsjehérá ch'ín Juan nteje, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nchexrayehe xríntó? ²⁵ Tí náhi, ¿la ntá nkehe k'uíkonrá? ¿Á k'uíkonrá ch'án éxí ijnko nkexro tsík'itsa jína? Jahará ó nohará kixin chojni tsík'itsa jína la ko chóna kaín nkehe náxrjón la mé ntqo rey tjejó sín. ²⁶ ¿A ntá nkexrí k'uíkonrá ch'án? ¿Á k'uíkonrá ch'án éxí ijnko nkexro chrónka itén Dios? Na mé xrjanka kixin chaxín xikaha jehe ch'án na mé ántsi t'etqan ch'án la ntá tí sín k'uechrónka itén Dios ósé la

kánhyó. ²⁷ Ch'ín Juan mé tí nkexro kui éxí chrónka tí xroon itén Dios ósé ntáchro kixin:

Janhan mé tsochr'an ijnko nkexro tsochrónka itan kuèntana tsitónxin ntja,

kixin tsjasiyóxin ch'án ntja kuéntá.*

Mé xikaha chrónka tí xroon itén Dios. ²⁸ Ntá ijnko nkehe chaxín tsotjonkará kixin kaín tí nkexro k'uéjé senó k'uéchrónka itén Dios la kánhyó tjetóan sín la antsí tjetóan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxién Dios nkaya nkajni la antsí tjetóan sín a ntá jehe ch'ín Juan la kánhyó —ichro ch'ín Jesús.

²⁹ A ntá tió kuínhin sín tíhi la ntá kaín tí chojni la ko tí sín nchekjènkj tsikikite ch'ín Juan la ó kjuátsoan sín kixin Dios la jína ch'án. ³⁰ Kjánchó tí sín fariseo la ko tí maestro tjako tí ley tsikikitehya ch'ín Juan la mé tjinkakonhya sín tí nkehe tjinkaon Dios chrókjuinkitsa tí jehe sín. ³¹ Ntá ntáchro Ìnchéni kixin:

—¿Nkexrí chrókjuintayóaxian tí chojni tjejó jie? ¿Nkehe chrókóyóhe sín? ³² Tóyóhe sín tí chánjan tjejótxajin sín tí ntasin tsítan sín la t'íyehé kichó sín ntáchro sín kixin: “Kjuínchéntáchroni flauta la tēhyará la ko tsjeni isón kuènte chojni tsík'en la tsjankahyará.” ³³ Kixin ó kui ch'ín Juan Bautista la kjónehya ch'án niotja la ko k'uíhya ch'án vino la ntá jahará ntáchrórá kixin ijnko nchakuen tí jínahya chónka ch'án. ³⁴ A ntá kjaxin ikui tí Xjeen Dios K'óna Chojni la kjóne ch'án la ko ik'ui ch'án la ntáchrórá kixin imá kjóne ch'án la ko imá ik'ui ch'án vino la ko t'ito ch'án tí sín tjasin jie la ko tí sín nchekjènkj. ³⁵ A ntá tí xjeen Dios mé tjakoxin sín kaín tí nkehe tjinkaon Dios.

Ch'ín Jesús mé kjuák'e ch'án ntøe ijnko ch'ín fariseo it'in Simón

³⁶ Ijnko ch'ín fariseo mé chronóehé ch'án tí ch'ín Jesús kixin tsjiji ch'án ntøe ch'án sineko sín ch'án. Ntá sákjui ch'án ntøe tí ch'ín a, a ntá ntiha kjuák'etjaxin ch'án tí tjen mesa. ³⁷ A ntá itjen ijnko tjan nchónhya jie chónka tjan. Itjen tjan tí chjasin ntiha la ntá kónohe tjan kixin tsíkji ch'ín Jesús ntøe tí ch'ín fariseo la ko ntaha sineko sín ch'án. Ntá kui tjan ntiha kujkao tjan ijnko xro tjete tsikaón aceite xraxé náxrjón. ³⁸ Ntá tsjánka tjan kóchjina tjan toté ch'ín Jesús ntá ntakon tjan kjuátanxín toté ch'án la ko kaxihi tjan kjuínchexámáxin tjan toté ch'án la ko kjóneko kochíto toté ch'án la ko kjuíncheka tjan toté ch'án tí aceite xraxé náxrjón. ³⁹ A ntá tió k'uikon tí ch'ín fariseo tsík'íyehé tí ch'ín Jesús ntá kjo ch'án asén ch'án kixin: “Tí chrókóchaxín tí nkexro i ijnko ch'ín chrónka itén Dios ntá chrókónohe ch'án kixin nkexrí xéhe tí tjan tjetároxin ch'án kixin ijnko tjan jínahya tíha”, ichro ch'án. ⁴⁰ Ntá ch'ín Jesús ntáche ch'án tí ch'ín fariseo kixin:

—Simón, janhan chonta ijnko nkehe tsonixjaha —ichro ch'án.

Ntá kjuátēhe tí ch'ín fariseo ntáchro ch'án kixin:

—Chronka, Maestro —ichro ch'án.

⁴¹ Ntá ntáchro ch'ín Jesús kixin:

—K'uéjé yaá chojni ntoa síkéhe sín chichaon ijnko ch'ín nchekjen chojni chichaon. Ijnko la síká ch'án quinientos denario. A ntá tí í jnko a la síká ch'án cincuenta denario. ⁴² A ntá kjuachahya sín k'ókjenhen sín tí chichaon tí ch'ín síkéhe sín ntá kujkonóehé ch'án sín ntá k'óxíka ch'án

* 7:27 Malaquías 3.1

tí cuenta síká yóí sín. **A** ntá jie chrónka jaha kixin nkexro tí yóí sín antsí chrótjuêhe tí nkexro kuikonóêhe ch'án —ichro ch'ín Jesús.

⁴³ Ntá kjuátêhe tí ch'ín Simón ntáchro ch'án kixin:

—Janhan ntáxrjan tí nkexro kuikonóêhe má —ichro ch'án.

Ntá ntáchro ch'ín Jesús kixin:

—Ntoá tjenkayáxian —ichro ch'án.

⁴⁴ Ntá ch'ín Jesús komá ch'án tí tjan a ntá ntáche ch'án tí ch'ín Simón kixin:

—¿Á t'ikuan tí tjan a ní? Janhan na mé k'uixanhan ntõa la ntá jaha la kjuánjonhya ntá chrók'ontia totená. Kjánchó jehe tjan tí ntakon tjan kjuínchek'óntixin tjan totená la ko kaxihi tjan kjuínchexámáxin tjan. ⁴⁵ **A** ntá jaha la kjóntekoahyana kochíto. Kjánchó jehe tjan naxa kuítóehya tjan neko kochíto totená. ⁴⁶ Jaha la kuikítexinhya aceite kja. **A** ntá jehe tjan kuikite tjan aceite xraxé náxrjón totená. ⁴⁷ Mé xikaha ntáxrjan kixin imá tjuana tjan kixin kaín tí nchónhya jie kjuasin tjan la mé kjuínhin tjan. **A** ntá ijnko nkexro kjuínhin intsíkoá jie la mé xikaha intsíkoá tjakoxin kixin tjuana sín —ichro ch'án.

⁴⁸ Ntá nixjêhe ch'án tí tjan a ntáchro ch'án kixin:

—Ó kjuínhan tí jie chonta —ichro ch'án.

⁴⁹ **A** ntá kaín tí sín tsíkóchjina sín k'uéjótjaxin sín tí tjan ch'án mé kjuankixin kjo sín kichó sín ntáchro sín kixin:

—¿Xá nkexro tíhi kixin tjakjínhin ch'án ijé chojni?

⁵⁰ **A** ntá ch'ín Jesús ntáche ch'án tí tjan a kixin:

—Ó kuaá jaha kixin kuitekávan tí janhan. **A** ntá jie kjuaxróxin sátsjia ntõa —ichro ch'án.

8

Iso chojni chjin kjuínkítsa tí xra kjuích'e ch'ín Jesús

¹ **A** ntá chr'éxin ntá ch'ín Jesús k'uáji ch'án itsjé chjasin hyé la ko chjasin ntsínsí kjuako ch'án la ko chrónka ch'án tí tan jina kixin nkexrí tí kjuachaxin t'etõan Dios. **A** ntá tí teyó sín mé k'uájiko ch'án. ² Kjaxin chrêhe iso chojni chjin tsikjinchekitohe ch'án jina tsikakitsje ch'án tí nchakuen tí jínahya k'uéchónta sín la ko tsikjatsen ch'án tí chin k'uéchónta sín. Ijnko tjan mé it'in María la ko kjaxin tikítexin tjan Magdalena na mé tsík'axrje yato nchakuen tí jínahya k'uéchónta tjan, ³ la ko í jnko tjan it'in tjan Juana ne mé xii mé it'in ch'án Chuza. Jehe ch'án mé ch'ehe ch'án xra tí ch'ín Herodes t'etõan ch'án, la ko í jnko tjan mé it'in tjan Susana, la ko itsjé í so sín k'uéjó sín. **A** ntá kaín sín kjuanjon sín tí nkehe k'uéchónta sín kjuínkítsa sín tí ch'ín Jesús la ko tí sín k'uájiko ch'án.

Ch'ín Jesús kjuíncheyóexin ch'án éxí ijnko ch'ín k'uenkã nonte

(Mt. 13.1-9; Mr. 4.1-9)

⁴ Ntá nchónhya chojni kójnkotsé sín kjuítsjehe sín tí ch'ín Jesús, k'uaxrxéxin sín kaín tí chjasin ntiha. **A** ntá ch'ín Jesús kjuíncheyóexin ch'án ntáchro ch'án kixin:

⁵ —Éxí ijnko ch'ín sákjuík'enã noatrigo nontêe ch'án. Mé xikaha sákjuí ch'án ik'ue ch'án tí noatrigo a. Ntá iso noa la k'uanótjen chrínta ntã ntá nkaxénjin chojni tí noa a la ko kjaxin tí koxroxé k'uinkã va. ⁶ **A** ntá í so la k'uítji chrík'á xro ntá k'uayan la xamá kixin kánhyó síin tjo. ⁷ **A** ntá í so la kjuítsínkák'á kach'í ntá k'uánkí kach'í la ntá í xitjahya k'uánkí tí no a kixin

tsíkjate tí kach'í. ⁸ A ntá í so la mé tsík'itjí nche jína. A ntá tió k'uánkí la k'óna jína la mé jnkojnko noatje k'óna ciento neno noa —mé xíkaha ichro ch'án.

Na ntá kjuixín kjuako ch'ín Jesús kaín tíha ntá itsen ntáchro ch'án kixin: —Tí tjinkáonrá chrókuinhínrá la tinhínrá —ichro ch'án.

Ch'ín Jesús chronkaxín nkekuènte kjuíncheyóexín ch'án
(Mt. 13.10-17; Mr. 4.10-12)

⁹ Ntá tí sín k'uájiko ch'án kjuanchankíhi sín ch'án kixin nkexrí t'axrjexín tí nkehe kjuíncheyóexín ch'án. ¹⁰ Ntá ntáchro ch'án kixin:

—Dios mé tsjinkítsa kixin tsonohará tí nkehe noehya í so chojni nkexrí t'etóan Dios. Kjánchó tí í so sín tjákoḥa sín kjuintayóaxoán kixin ntá k'uikon sín la kjónté tsjátsoanhya sín la ko kuínhin sín na kjónté naxa tienxínhya sín.

Ch'ín Jesús chronkaxín nkexrí t'axrjexín tí ch'ín k'uenká nonte
(Mt. 13.18-23; Mr. 4.13-20)

¹¹ Ntá tsoxrjanka nkexrí t'axrjexín tí nkehe kjuintayóaxoán. Tí noatje mé tí itén Dios. ¹² A ntá tí noa k'uanótjen chrínta ntja la mé tóyóḥe tí sín kuínhin tí tan a. A ntá ó kui ch'ín Tsochren ntá kjuínchek'itjáyan ch'án kaín tí itén Dios kuínhin sín chrókuaáxin sín kixin ntá chrókuitekakonhya sín tí nkehe chrókuaáxin sín. ¹³ A ntá tí noa kjuítsínkak'á xro la éxí yóḥe tí chojni kuínhin itén Dios la tjoka kóxrjínḥín sín kuínkáchónki sín. Na ntá itsi tí kjuaxróxinhya, a ntá tsítóḥe sín tí itén Dios kuínhin sín kixin naxa nínkahya chónṭa nuèe. ¹⁴ A ntá tí noa kjuítsínkak'á kach'í na mé éxí yóḥe ijnko chojni kuínhin tí tan jína kjánchó tjitoxienhya ntje sín kixin tóxakonhen sín tí xra chónṭa sín la ko tjinkaon sín tsochónṭa sín itsjé nkehe la ko kaín tí nkehe tóxrjínḥín sín mé t'inkákonhen kixin xíkaha la xitjahya sich'ehe sín xra Dios. ¹⁵ A ntá tí noa k'uínka nonte jína na mé éxí yóḥe tí chojni kuínhin tí itén Dios a ntá kaín asén sín kuítekaon sín la ntá kuítóehya sín tí tan, a ntá xíkaha la jína ch'ehe sín Dios xra.

Ch'ín Jesús mé kjuíncheyóexín éxí ijnko xrohi tjeche
(Mr. 4.21-25)

¹⁶ Nijnko nkexro chrókjuínchek'ákjen xrohi chrókjuak'ema nkaxenhen ch'í o chrókjuak'ema chrínkí cama. Náhi. Noi chrókjuak'e xrohi kixin ntá tí sín ts'ixenhen nchia ts'ikonxín sín tí t'inkaséyan. ¹⁷ Kohya nkehe chrók'uejómá a ntá chr'éxin chrókónoxínhya; la ko kohya nkehe mó chrókónoehyani chr'éxin kixin kaín nkehe la tsonoxíxin tí xrohi a. ¹⁸ A ntá chrókuinhínrá jína kixin tí tjen ijnko nkexro chónṭa nkehe la mé ts'áyéḥe ch'án má. A ntá tí nkexro chónṭahya nkehe la mé ts'axrjehe ch'án kjónté tí nkehe ntsí tónhen ch'án kixin chónṭa ch'án.

Tí iné la ko tí kichó ch'ín Jesús
(Mt. 12.46-50; Mr. 3.31-35)

¹⁹ A ntá kjuíji iné la ko kichó ch'ín Jesús tí tjen ch'án. Ntá xitjahya tsochjinehe sín ch'án kixin nchónhya chojni síin. ²⁰ A ntá ijnko sín ntiha tsíkjichenka ch'ín Jesús kixin:

—Íná la ko kichuá tjejó sín ntója la tjinkaon sín chrók'uikon sín tí jaha —ichro sín.

²¹ Kjánchó kjuáteḥe ch'án ntáchro ch'án kixin:

—Tí sín tinhin itén Dios la ko titekaon sín na mé t'íkuan tí jehe sín éxí naná la ko kichiná —ichro ch'án.

Ch'ín Jesús k'uetuēnhen tí xr̄nto la ko tí nt̄a ḱixin ts'ixita

(Mt. 8.23-27; Mr. 4.35-41)

²² Nt̄a ijnko yaon k'uixenhen ch'ín Jesús ijnko ntabárc̄o la koí tí s̄ín k'uájiko ch'án. Nt̄a ntáchro ch'án ḱixin:

—Sátsjini tóhe nt̄ayaon —ichro ch'án.

Nt̄a sákjuí s̄ín. ²³ Nt̄a nachrohe tjejó'tat̄oye s̄ín a nt̄a ch'ín Jesús mé kjuák'ejua ch'án. A nt̄a xr̄inahya t̄jian chjéhe xr̄nto chr̄itaón nt̄a nt̄a xranḱixin sítikia nt̄a tí ntabárc̄o nt̄a chrakon s̄ín ḱixin ts'aniankí nt̄a tí ntabárc̄o. ²⁴ Nt̄a kjuínchekjayehe s̄ín tí ch'ín Jesús, ntáchro s̄ín ḱixin:

—Maestro, Maestro. Tjejó'taniankíni nt̄a —ichro s̄ín.

Nt̄a ch'ín Jesús k'uàya ch'án nt̄a k'uetuēnhen ch'án tí xr̄nto la ko tí nt̄a ḱixin ts'ixita, a nt̄a náxr̄jón k'uixita tí nt̄a la ko tí xr̄nto. ²⁵ Nt̄a ntáche ch'án tí s̄ín k'uájiko ch'án ḱixin:

—¿Á nax̄a tinkachónkihyará Dios? —ichro ch'án.

Kjánchó jehe s̄ín mé chrakon s̄ín it̄jo s̄ín ḱíchó s̄ín ḱixin:

—¿Xá nkexro tíhi ḱixin t'etuēnhen ch'án xr̄nto la ko tí nt̄a la titekakonhen ch'án?

Ijnko ch'ín nonte Gadara chón̄ta nch̄akuen tí j́inahya

(Mt. 8.28-34; Mr. 5.1-20)

²⁶ Nt̄a kjuíji s̄ín tí nonte Gadara, na mé tóhe nt̄ayaon ntoí chók'èxin estado Galilea. ²⁷ Nt̄a k'uínkajinx̄in ch'ín Jesús tí ntabárc̄o nt̄a kóchjina ijnko ch'ín chjasin ntiha. Nt̄a ó má sé chón̄ta ch'án nch̄akuen tí j́inahya. Na nt̄a ni ké ch'án t'inkáyahya ch'án, la ko jehya nt̄oē ch'án k'uékjak'e ch'án na mé t̄jen ch'án tí panteón. ²⁸ Tió k'uíkon ch'án tí ch'ín Jesús nt̄a kjuák'ex̄in toch'ín ch'án nkayakon tí ch'ín Jesús, nt̄a k'óyako ch'án ntáchro ch'án ḱixin:

—¿Nkekuēnte t̄j̄at̄é tí jeheni, jaha Jesús Xjeen Dios it̄jen nkaya nkajni? Chronóahani nchekjasótehyani —ichro ch'án.

²⁹ X̄ikaha ntáchro ch'án ḱixin ch'ín Jesús tsík'etuēnhen tí nch̄akuen tí j́inahya ḱixin ts'axrjex̄in tí jehe ch'án. Nchónhya veces tí nch̄akuen tí j́inahya k'uék'etuēnhen tí jehe ch'án; a nt̄a tí chojni k'uésé s̄ín ch'án k'uékjinchenteto s̄ín t̄ja ch'án la ko toté ch'án la mé cadena tsikóntetox̄in ch'án ḱixin t̄j̄inkaon s̄ín chrókjuak'e ch'án. Kjánchó k'uékóchr̄nj̄in ch'án tí nkehe tsikóntetox̄in ch'án ḱixin nch̄akuen tí j́inahya t̄j̄inkaon sáchrókjuiko ch'án nteje. ³⁰ Nt̄a ch'ín Jesús kjuanchankíhi ch'án tí ch'ín a ḱixin:

—¿Nkexrí it'ian? —ichro ch'án.

Nt̄a kjuátehe ch'án ntáchro ch'án ḱixin:

—Legión mé it'inni —ichro ch'án.

Ntáchro ch'án x̄ikaha ḱixin nchónhya nch̄akuen tí j́inahya chón̄ta ch'án. ³¹ A nt̄a kaín tí nch̄akuen tí j́inahya chronóēhe tí ch'ín Jesús ḱixin chrók'uet̄oanhya ch'án ḱixin chrókjuitsínkayá tí t̄oye n̄inka. ³² A nt̄a ntiha tí j̄n̄a s̄ín nchónhya cochíno xr̄ine va. A nt̄a tí nch̄akuen tí j́inahya chronóēhe tí ch'ín Jesús ḱixin chrókjuanj̄on ch'án kjuachaxin chrók'uixenhen tí cochíno a. A nt̄a kjuanj̄on ch'án kjuachaxin. ³³ A nt̄a tí nch̄akuen tí j́inahya k'uaxrjex̄in tí ch'ín a, a nt̄a k'uixenhen tí cochíno a. A nt̄a kaín tí cochíno kuinká va sákjuí va nó nkaya ts̄aka k'uánótjenkí va nt̄a kjuínhin va nt̄a.

³⁴ A nt̄a tí s̄ín sít'ayakonhen tí cochíno k'uíkon s̄ín ḱixin x̄ikaha kónhen nt̄a chrakon s̄ín kuinká s̄ín sákjuíchronka s̄ín tí chjasén s̄ín la ko tí rancho. ³⁵ A nt̄a tí chojni k'uaxrjex̄in s̄ín chjasin sákjuitsjehe s̄ín nkehe tí tsíkónhen. A nt̄a kjuíji s̄ín ntiha tí t̄jen ch'ín Jesús nt̄a k'uíkon s̄ín ḱixin ntaha t̄jen tí ch'ín tsík'axrjex̄in tí nch̄akuen tí j́inahya. Ntaha tjetj̄ax̄in ch'án chr̄ínkí

toté tí ch'ín Jesús, ó tsík'inkáya ch'án iké ch'án kixin ó jína tjen ch'án, a ntá chrakon sín tí k'uíkon sín xíkaha. ³⁶ A ntá tí jehe sín tsík'ikon sín kixin xíkaha kónhen la chrónka sín kixin nkexrí kuítóhe jína tí ch'ín k'uéchónta tí nchákuen tí jínahya. ³⁷ A ntá kaín tí chojni chjasin Gadara kjuankixin chronóehé sín tí ch'ín Jesús kixin sáchrókjuixin ch'án ntiha kixin imá chrakon sín. A ntá tí ch'ín Jesús k'ujt'ótjen ch'án tí ntabároç sákjuixin ch'án ntiha. ³⁸ A ntá tí ch'ín tsík'axrjexín tí nchákuen tí jínahya chronóehé ch'án tí ch'ín Jesús kixin á chrókjuanjonhya ch'án kjuachaxin sáchrókjui ch'án koí ch'án. Kjánchó ch'ín Jesús k'uetuēnhen ch'án kixin tsitōhe ch'án ntáchro ch'án kixin:

³⁹ —Titōha satjia ntōa la ko chrónka nkexrí ti kjuachaxin jié kuēnte Dios kuítóaxián jína jaha —ichro ch'án.

A ntá sákjuí tí ch'ín a chrónka ch'án nkuíxín tí chjasén ch'án kixin ijnko kjuaxroan jié kjuích'e ch'ín Jesús kjuínchekitōhe ch'án jína.

Tí xjeen ch'ín Jairo la ko tí tjan kuákóxin iké ch'ín Jesús

(Mt. 9.18-26; Mr. 5.21-43)

⁴⁰ Tió ch'ín Jesús kjan ch'án tí í jnko chrínta ntā ntá nchónhya chojni siín ntiha la chéhe sín kjuíji ch'án ntiha, kixin kaín sín tjejóchónhen sín ch'án. ⁴¹ Ntá kui ijnko ch'ín it'in Jairo na mé ijnko ch'ín t'etōan kuēnte nínko. A ntá kjuák'exín toch'in ch'án tote tí ch'ín Jesús chronóehé ch'án kixin sáchrókjui ch'ín Jesús ntōe ch'án ⁴² kixin chóntha ch'án jnkokoáxón xjeen ch'án chjin chóntha teyó nánó la ó mero tjet'en tjan. A ntá sákjuí ch'ín Jesús la ntá nchónhya chojni chréhe k'uíxitja kíchó sín.

⁴³ Ntá siín sín ntiha. Na mé ntiha tjenkákjan ijnko chojni chjin níhi tjan sítji tjan jñi na mé chóntha tjan teyó nánó titōehya tjan jína. A ntá kaín nkehe k'uéchónta tjan kjuenkehe tjan tí sín ch'e xroan la ko nijnko sín kjuachahya sín kjuínchekitōhe sín tjan jína. ⁴⁴ A ntá jehe tjan kóchjina tjan nóton tí ch'ín Jesús na ntá kuákóxin tjan tí iké ch'án, a ntá tuénxín tí jñi la í kjuíhya tjan.

⁴⁵ Ntá kjuanchankí ch'ín Jesús kixin:

—¿Nkexro tí kuákóxinna? —ichro ch'án.

A ntá kaín sín ntáchro sín kixin ninkexró, ichro sín. A ntá ch'ín Pedro la ko tí sín k'uéjóko ch'án ntáchro sín kixin:

—Maestro, nchónhya chojni siín la ko tótéka sín la ntáhi ntáha, ¿ntá nkekuēnte kixin naxā tjanchankiá kixin nkexro tí kuákóxin? —ichro sín.

⁴⁶ Kjánchó ntáchro ch'ín Jesús kixin:

—Jnkojín nkexro kuákóxinna kixin kónōna kixin kjuachaxin kuēntāná kuítóexín ijnko chojni jína —ichro ch'án.

⁴⁷ A ntá tió k'uíkon tjan kixin ó kónoxín ntá kóchjina tjan chrakon tjan kjuák'exín tjan toch'in tjan chrínkí toté tí ch'ín Jesús. Ntá chrónka tjan nkayakon kaín xín chojni kixin nkekuēnte kuákóxin tjan iké ch'án la ko nkexrí kuítóexín tjan jína xíkaha.

⁴⁸ Ntá ntáchro ch'án kixin:

—Jaha, xjeenni, ó kuítóha jína kixin kuítekávān tí janhan. Kjuaxróxin sátjia —ichro ch'án.

⁴⁹ Naxā tjejótjo sín ntiha ntá xrinahya ikui ijnko nkexro kjuixín ntōe tí ch'ín t'etōan kuēnte nínko, a ntá chénka ch'án tí ch'ín t'etōan kixin:

—Xjāan na mé ó kjuixín k'uén. Áxri í chjeéhya xra tí maestro —ichro ch'án.

⁵⁰ A ntá tió kuínhin ch'ín Jesús la kjuátehe ch'án ntáchro ch'án kixin:

—Chrakonhya. Títekáván tí janhan la tsitq̄he xjaan jína —ichro ch'án. **A** ntá sákjuí sín.

⁵¹ **A** ntá tí kjuj̄ik'ixenhen sín nchia ntá kuítq̄ehya ch'ín Jesús kixin ókjé nkexro chrók'uixenko ch'án nchia. Jehó ch'ín Pedro la ko ch'ín Jacobo la ko ch'ín Juan la ko tí it'é la ko tí iné tí xjachjín chrók'uixenhen sín tí tjen tí xjan a. ⁵² Kaín tí sín tjejó ntaha tsjánkama sín tí xjan a. Kjánchó jehe ch'án ntáchro ch'án kixin:

—Tsjankahyará. Tí xjan la tsík'enhya la tjejua xjan —ichro ch'án.

⁵³ Ntá tjanoá sín ch'án kixin jehe sín la ó nohe sín kixin tsík'en xjan. ⁵⁴ **A** ntá jehe ch'án itsé ch'án tja xjan ntá itsen k'uíyehē ch'án tí xjan ntáchro ch'án kixin:

—Tjarisoá, t'aya —ichro ch'án.

⁵⁵ Ntá kjan asén tjan ntá tuénxín k'uúinkatjen tjan. Ntá k'ueṭq̄an ch'ín Jesús kixin tsjanjon sín nkehe sine tjan. ⁵⁶ Ntá it'é la ko iné xjan la chrakon sín. **A** ntá ch'ín Jesús k'ueṭq̄enhen ch'án sín kixin ninkexró chróchenkahya sín kixin x̄ikaha kónhen.

9

Ch'ín Jesús ichr'án ch'án tí teyó sín

(Mt. 10.5-15; Mr. 6.7-13)

¹ Ntá ch'ín Jesús k'ueṭq̄an kixin tsq̄chjina tí teyó sín k'uájiko ch'án. Ntá chjéhe ch'án sín kjuachaxin tsakitsje sín kaín tí nchaq̄uen tí jínahya chóna chojni la ko sinchekitq̄he sín chojni jína. ² Ntá k'ueṭq̄an ch'án kixin sátsjikjako sín nkexrí tí kjuachaxin t'etq̄an Dios la ko sinchekitq̄he sín chojni jína. ³ La ko k'ueṭq̄an ch'án kixin:

—Ninkehó nkehe sátsjikohyará nt̄ia sátsjirá, ni tí nta tj̄ixínrá la náhí, ni bolsa la náhí, ni niqt̄ja, ni chichaon, la ko tsjikoará jehó tí ka tjejóyará ó. ⁴ **A** ntá tí tsjasánrá ijnko nchia tsjanjon sín kjuachaxin la ntahó tsitq̄hará la tsjixixín tí xra ntá sátsjixínrá nt̄iha. ⁵ **A** ntá tí tsjasánrá ijnko chjasin la ntá tsjanjonhya sín kjuachaxin tsjãkorá ntá t'axrjéxinrá tí chjasén sín nt̄iha tsotsénkará tí nche chóna totárá tsjãq̄oxínrá x̄ikaha kixin Dios sinchekjasóte tí jehe sín —ichro ch'án.

⁶ Ntá sákjuí sín kaín tí chjasin ntsíntsí sákjuíchronka sín tí tan jína tsaáxin chojni la ko kjuínchekitq̄he sín chojni jína kaín chjasin.

Ik'uén ch'ín Juan Bautista

(Mt. 14.1-12; Mr. 6.14-29)

⁷ **A** ntá tí ch'ín Herodes t'etq̄an kuínhin ch'án kaín tí xra tjech'e ch'ín Jesús la tóxakonhen ch'án kixin iso sín ntáchro sín kixin ch'ín Juan Bautista la ó tsixechón ch'án, ichro sín. ⁸ **A** ntá iso sín ntáchro sín kixin ch'ín Elías tsíxechón ch'án mé tí nkexro k'uéchronka itén Dios ósé. **A** ntá í so sín la ntáchro sín kixin jnkojín tí sín k'uéchronka itén Dios ósé la mé ó tsixechón, ichro sín. ⁹ Kjánchó ntáchro ch'ín Herodes kixin:

—Janhan mé kuéṭq̄an kóchrínjin sín kja ch'ín Juan. ¿Á chrókóchaxín jehe ch'án kixin nchónhya kjuaxroan kuínhan tí tjech'e ch'án? —ichro ch'án. **A** ntá kjaxin jehe ch'án tóxakonhen ch'án sáchrókjuitsjehe ch'án tí ch'ín Jesús.

Ch'ín Jesús kjuanjon nkehe kjóne in'ó mil chojni

(Mt. 14.13-21; Mr. 6.30-44; Jn. 6.1-14)

¹⁰ **A** ntá tió kjan tí sín k'uájiko ch'ín Jesús ntá chénka sín tí jehe ch'án kaín tí xra kjuích'e sín. Ntá k'uaxrjentako sín ch'án tí kohya ninkexró

chjinaxón chjasin Betsaida. ¹¹ Ntá tió k'uixikónohe chojni kixin ntaha tjen ch'in Jesús ntá sákuichréhe sín ch'án. A ntá kjuanjon ch'án kjuachaxin ts'ejó sín. Ntá kjuanxín chrónka ch'án nkexrí tjen tí kjuachaxin t'etōan Dios la ko kjuínchekitohe ch'án chojni jina.

¹² A ntá ó ntá kóntó ntá tí teyó sín k'uájiko ch'in Jesús kóchjinehe sín ch'án ntáchro sín kixin:

—Nixjehé tí chojni kixin sátsji sín tí chjasin ntsí la ko tí ichrén nchia chjinaxón sátsjik'ok'éhe sín la ko sátsjikjeyá sín nkehe sine sín kixin jaha la ó noha kixin nteje tjejóni la kohya nkehe tsochjéheni sín —ichro sín.

¹³ Kjánchó ch'in Jesús ntáche ch'án sín kixin:

—Chjehérá sín nkehe sine sín —ichro ch'án.

Ntá kjuátehe sín ntáchro sín kixin:

—Chóntahyani itsjé nkehe; jehó in'ó niotja la ko yaá koche chóntani. ¿Á tjinkávan sátsjik'enani nkehe sine kaín tí chojni siín? —ichro sín.

¹⁴ Kixin siín chjina in'ó mil chojni ntoa. A ntá ch'in Jesús ntáche ch'án tí sín xriko ch'án kixin:

—Ntácherá sín tsojnkoié sín ts'ixitjaxin sín jnkoiñko cincuenta sín —ichro ch'án.

¹⁵ A ntá xikaha kjuich'e sín k'uetoan sín, a ntá k'uixitjaxin sín kaín sín.

¹⁶ A ntá ch'in Jesús kuákja ch'án tí n'ó niotja la ko tí yaá koche. Ntá konta ch'án nkajní kjuanchehe ch'án kjuasáyé Dios kixin kjuanjon tí nkehe sine sín. Ntá kóchrít'ō ch'án tí niotja la ko tí koche la chjéhe ch'án tí sín xriko ch'án. A ntá jehe sín k'óxikayéhe sín chjéhe sín kaín tí chojni siín. ¹⁷ A ntá kaín sín kjóne sín la kókjehe sín. A ntá chr'éxin kjuenájín sín kaín tí nkehe síxehe mé teyó ntaxra kjuínchekaón sín.

Ch'in Pedro mé chrónka kixin ch'in Jesús mé tí Cristo

(Mt. 16.13-19; Mr. 8.27-29)

¹⁸ Ntá iñko yaon ch'in Jesús k'uaxrjenta ch'án tjenixjéhe ch'án Dios. Ntá tjejóko ch'án tí sín xriko ch'án ntá kjuanchankíhi ch'án tí jehe sín kixin:

—¿Nkehe ichro tí chojni kixin nkexro tí janhan? —ichro ch'án.

¹⁹ A ntá jehe sín kjuátehe sín ntáchro sín kixin:

—Iso sín ntáchro sín kixin jaha tí Juan Bautista. A ntá í so sín ntáchro sín kixin jaha la tí ch'in Elías. A ntá í so sín ntáchro sín kixin jaha iñko nkexro k'uéchrónka itén Dios ósé mé ó tsíxechón —ichro sín.

²⁰ A ntá kjuanchankíhi ch'in Jesús tí jehe sín kixin:

—A ntá jahará, ¿nkechorá, nkexro tí janhan? —ichro ch'án.

Ntá ntáchro ch'in Pedro kixin:

—Jaha tí Cristo ichr'án Dios —ichro ch'án.

Ch'in Jesús chrónka kixin its'en ch'án

(Mt. 16.20-28; Mr. 8.30—9.1)

²¹ Ntá ch'in Jesús k'uetoenhen ch'án sín kixin ninkexró tsochenkahya sín kixin nkexro tí jehe ch'án. ²² Ntá chénka ch'án sín kixin:

—Tí Xjeen Dios K'óna Chojni t'ichjánxin tsjasóte nchónhya nkehe tsoñhen la ko tsitekakuenhya tí sín t'etōan kuènte nñko la ko tí sín t'etōan kuènte tí sín nchat'á la ko tí sín maestro tjako tí ley. Ts'óyán sín tí jehe ch'án, kjánchó tí nixin yaon na ó tsoxechón ch'án inaá —ichro ch'án.

²³ Ntá chr'éxin chénka ch'án kaín sín kixin:

—Tí chaxín tsochréhérá tí janhan na t'ichjánxin tsjtohérá kaín tí nkehe tjaké asánrá, ntá tsamárá tí ntacruz kuéntará jnkoiñko yaon, a ntá tsochréhérá tí janhan. ²⁴ Tí nkexro tjinkaon jehó sinchekaá asén mé

ts'itjáyán. **A** ntá tí nkexro sinchek'itjáyánxín asén kixin tinkáchónki tí janhan la tsaá. ²⁵ **A** ntá nkehe tsonhen tí chrókjuacha ijnko chojni chróchónka káin nkehe siín chjasintajni **a** ntá kjuachón chrókjuinchek'itjáyán ch'án? ²⁶ **A** ntá jnkojin chojni chrókósuèhe kixin tinkáchónki tí janhan la ko tí nkehe tjákua, **a** ntá kjaxin tí Xjeen Dios K'óna Chojni mé tsosùèhe chróntáchro ch'án kixin chóxin ch'án tí jehe sín tió tsi ch'án éxí ijnko rey tsjkaò ch'án tí kjuachaxin kuènte It'é ch'án la ko tí sín ángel jína. ²⁷ Tíhi mé ntoá xrxanka kixin iso chojni tjejó ntihi tjejótinhin sín naxa ts'enhya sín ts'ikon sín kixin Dios ts'etòan tí kjuachaxin kuènte ch'án.

K'uixitóxin nkexrí tsjehe ch'in Jesús

(Mt. 17.1-8; Mr. 9.2-8)

²⁸ **A** ntá k'uátsínka ijní yaon tí tsíchronka ch'án tíhi ntá sákjuiko ch'án ch'ín Pedro la ko ch'ín Juan la ko ch'ín Jacobo la chrìn sín ijnko jna kixin tsonixjehe ch'án Dios. ²⁹ Ntá ch'ín Jesús tjenixjehe ch'án Dios ntá k'uixitóxin nkexrí tsjehe ch'án la ko tí iké ch'án la tjóá la ko tjákini tsjehe. ³⁰ Ntá xrínahya k'uikon sín yaá chojni tjejótjo sín tí jehe ch'án na mé jehe sín la tí ch'ín Moisés la ko tí ch'ín Elías. ³¹ Imá t'inkáséyan jnkontatjen tí tjejó sín tjejótjo sín tí ch'ín Jesús kixin nkexrí its'en ch'án la ko nkexrí tsjasótexín ch'án tí chjasin Jerusalén. ³² **A** ntá ch'ín Pedro la ko tí sín tjejóko ch'án la imá kuihi sín kotáchrin; kjónté la k'uéjótjsjehe sín k'uikon sín tí kjuachaxin kuènte ch'ín Jesús la ko k'uikon sín tí yóí chojni ntoa tjejóko sín ch'án. ³³ **A** ntá tió sátsji tí yóí sín tjejóko ch'ín Jesús ntá ch'ín Pedro ntáche ch'án tí ch'ín Jesús kixin:

—Maestro, jína kixin tjejóni ntihi. Chrókjuich'é nani iní nchia la mé ijnko kuéntá la ijnko kuènte ch'ín Moisés la ko ijnko kuènte ch'ín Elías —ichro ch'án.

Kjánchó ch'ín Pedro í noehya ch'án nkehe chróntáchro ch'án kixin chrakon ch'án. ³⁴ **A** ntá naxa tjenixja ch'án ikui ijnko tjuí kjuák'etja tí jna tjejó sín. Ntá chrakon sín tjejó sín chrínki tí tjuí. ³⁵ Ntá xrínahya kuínhin sín chríkjan tí tjuí itén nkexro ntáchro kixin:

—Tíhi mé Xjanna, imá tjuahá ch'án. Tinhínrá tí nkehe tsochronka ch'án la ko tí nkehe tjako ch'án.

³⁶ **A** ntá tió kjuixin kuínhin sín tí tan nixja ntá k'uikon sín kixin jeho ch'ín Jesús tjen. **A** ntá tí jehe sín la tání sín kixin xikaha k'uikon sín tí yaon a la ninkexró chenkahya sín tí nkehe k'uikon sín.

Ch'in Jesús kjuínchekitohe jína ijnko chánjan chónka nchakuen tí jínahya

(Mt. 17.14-21; Mr. 9.14-29)

³⁷ **A** ntá tí yaon chr'éxin k'uínkajinxin sín jna la ntá nchónhya chojni sákjuixinhin sín ntía ch'ín Jesús. ³⁸ **A** ntá ijnko chojni tjenkákjan ch'án tí chojni kjuíji ntá itsen nixja ch'án ntáchro ch'án kixin:

—Maestro, chronóghani kixin chrótsjehé tí xjeenni kixin jnkokoaxón ó chóntani **a** ntá níhi xjan. ³⁹ Chónka xjan nchakuen tí jínahya la ntá nchek'iyato xjan la ko nchek'aniáte xjan nchexránkə xjan kixin tjetéhe xjan la ko ntalórxjo sítjixin ir'va xjan la ko ncheníhi xjan, na mé chrohya tsjünhin xjan. ⁴⁰ **A** ntá chronógheni tí sín xríkoa chrókuakitsje sín tí nchakuen tí jínahya, kjánchó kjuachahya sín —ichro ch'án.

⁴¹ Ntá kjuátehe ch'ín Jesús ntáchro ch'án kixin:

—Jahará chaxínhya chojni tinkáchónki tí janhan. Jehya jína tjenkayáxinrá. ¿Xá hasta nkesá tjinkáonrá ts'ejóni tsjákohará kixin nunca t'itjáhyará? Xrákoa tí xjan ntíhi —ichro ch'án.

⁴² A ntá kóchjina tí chánjan. A ntá tí nchakuen tí jínahya kjuáka xjan nonte la ko kjuínchek'aniáte xjan ínaá. Kjánchó ch'ín Jesús jjehe k'uetuénhen tí nchakuen tí jínahya kixin ts'axrjexín xjan. Ntá k'uaxrje tí nchakuen tí jínahya ntá kuitóhe xjan jína. A ntá ch'ín Jesús kjuínchek'áyéhe tí it'é xjan. ⁴³ A ntá kaín sín chrakon sín kixin k'uíkon sín tí kjuachaxin jié kuènte Dios.

Ch'ín Jesús chrónka ch'án ínaá kixin its'en ch'án
(Mt. 17.22-23; Mr. 9.30-32)

Naxa chrakon sín kaín sín kixin tí kjuaxroan kjuích'e ch'ín Jesús la ntá ntáche ch'án tí sín xriko ch'án kixin:

⁴⁴ —Tinhínrá jína tíhi la ko t'itjáyanhyará. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etóan —ichro ch'án.

⁴⁵ Kjánchó jehe sín kienxínhya sín tí nkehe ntáchro ch'án kixin naxa kjuanjonhya Dios kjuachaxin kixin chrókuiexín sín, ntá chrakon sín na kjuanchankíehya sín ch'án kixin nkexrí t'axrjexín tí nkehe ntáchro ch'án.

Nkexro tí imá tjeotan ts'etóan
(Mt. 18.1-5; Mr. 9.33-37)

⁴⁶ A ntá tí sín k'uájiko ch'ín Jesús kjuankíxin sín itjo sín kíchó sín kixin nkexro tí jehe sín antsí má tjeotan ts'etóan. ⁴⁷ Kjánchó ch'ín Jesús kónohe ch'án nkehe tjenkayáxin asén sín. Ntá kuákja ch'án ijnko chánjan ntá kjuak'e ch'án tí tjen ch'án ⁴⁸ ntá ntáche ch'án sín kixin:

—Tí jnkojín nkexro chrók'uáyéhe tí xjan i kixin tinkáchónki sín tí janhan mé xikaha chrók'uáyéhe sín tí janhan. A ntá jnkojín nkexro chrók'uáyéhe tí janhan mé xikaha chrók'uáyéhe tí nkexro chr'ánna k'uinka. A ntá tí jnkojín nkexro antsí chrókjuinchehnkehya la mé antsí chrók'uáyéhe kjuachaxin chrók'uetóan.

Tí nkexro nínkakuenhya tí jeheni la mé tóxrjínhin ch'án tí xra ch'eni
(Mr. 9.38-40)

⁴⁹ Ntá ntáchro ch'ín Juan kixin:

—Maestro, k'uíkonni ijnko nkexro kjuachaxin ihniá kuakitsjexín ch'án nchakuen tí jínahya chóna chojni. A ntá chénkani ch'án kixin xikahya chrókjuich'e ch'án kixin xrikohyani ch'án.

⁵⁰ Kjánchó ch'ín Jesús ntáchro ch'án kixin:

—Xikahya chróntáche ch'án kixin tí nkexro nínkakuenhya tí jeheni la kjá tóxrjínhin tí xra ch'eni —ichro ch'án.

Ch'ín Jesús kjuentuéhe ch'án tí ch'ín Jacobo la ko tí ch'ín Juan

⁵¹ A ntá ó kóchjina tí yaon sátsji ch'ín Jesús nkaya nkajní, na ntá táhó kjuenkayáxin ch'án sátsji ch'án chjasin Jerusalén. ⁵² Ich'án ch'án chojni kuitónxin ntía a ntá jehe sín sákjui sín ijnko chjasin ntsí estado Samaria sákjuikjeyá sín nchia ts'ok'èxin sín. ⁵³ Kjánchó tí sín samaritano kjuanjonhya sín kjuachaxin chrók'uejó sín kixin k'uíkon sín kixin ó xra ó sátsji ch'án chjasin Jerusalén. ⁵⁴ A ntá tió k'uíkon tí sín k'uájiko ch'án la mé ch'ín Jacobo la ko ch'ín Juan la ntáchro sín kixin:

—Ínchéni, ¿á tjinkávan kixin chrókjuanchiani xrohi chrók'uinkajinxin nkaya nkajní chrókjuinчек'itjáyan tí jehe sín éxi kjuanchia tí ch'ín Elías?*

* 9:54 1 Reyes 18.30-40

—ichro sín.

⁵⁵ Ntá ch'ín Jesús kuinkátjá ch'án komá ch'án tí jehe sín ntá kjuentuéhe ch'án sín ntáchro ch'án kixin:

—Jahará la kjá noahyará nkexro nchakuen chontará. ⁵⁶ Kixin tí Xjeen Dios K'óna Chojni kuihya ch'án kixin chrókjuinchek'itjáyan ch'án chojni. Náhí. Xra ó ikui ch'án sincheakaá ch'án chojni —ichro ch'án.

Ntá sákjuí sín í jnko chjasin ntsí.

Tí sín tjinkaon chróchréhe sín tí ch'ín Jesús

(Mt. 8.19-22)

⁵⁷ A ntá jehe sín sákjuí sín ntja inaá. Ntá xeta sín ijnko nkexro ntáche ch'án tí ch'ín Jesús kixin:

—Inchéni, tjinkaonni chróchréheni tí jaha nketí tjinkávan sátsjia —ichro ch'án.

⁵⁸ Ntá ch'ín Jesús kjuátehe ch'án ntáchro ch'án kixin:

—Tí koxróntá chóna va itjué va la ko tí koxroxé chóna va kaké va. A ntá tí Xjeen Dios K'óna Chojni chónahya nketí ts'ok'èxin ch'án —ichro ch'án.

⁵⁹ A ntá ntáche ch'án í jnko nkexro:

—Chréhé tí janhan —ichro ch'án.

Kjánchó kjuátehe ch'án kixin:

—Inchéni, tjtóhéni senó sátsjikjaváni it'eni —ichro ch'án.

⁶⁰ Ntá kjuátehe ch'ín Jesús ntáchro ch'án kixin:

—Tjtóhé kixin tí chojni tsík'en la jnkokón sín tsík'en tsjavá kichó sín. A ntá jaha la sátsjikjækua nkexrí tjen tí kjuachaxin t'etóan Dios —ichro ch'án.

⁶¹ Ntá ntáchro í jnko nkexro kixin:

—Inchéni, tjinkaonni tsochréheni tí jaha. Jehí tjtóhé tsjinixjeheni tí sín siín ntóeni —ichro ch'án.

⁶² Kjánchó ntáchro ch'ín Jesús kixin:

—Tí nkexro kjuankixin tsotsé ch'án arado ntá chrókjan chrókotónhen nóton mé xíkaha xitjahya sich'ehe ch'án Dios xra.

10

Ch'ín Jesús k'uetuenhen setenta chojni sátsjikjako sín

¹ Ntá chr'éxin Inchéni kjueyá ch'án í jnko setenta chojni ntá k'uetuenhen ch'án sín sátsji sín yóyó sín sátsji sín tsitónxin sín ntja tí kaín chjasin na ko nkuixín tjinkaon ch'án sáchrókjuí ch'án. ² Ntá ntáchro ch'án kixin:

—Chaxín ntáxrjan kixin imá tsík'óna, a ntá tí chojni ch'e xra mé tsjéhya. Chrókjuanchehérá tí Inché nonte kixin chróchr'án ch'án itsjé chojni chrókjuich'e xra. ³ Sátjirá jahará. Xráxinkáonrá kixin tétuanhanrá sátsjirá éxí kolélo ts'ejóyákanrá chrikjan tí kolobo. ⁴ Tsjikoahyará kabólsa la ko tjoa t'inka chichaon la ko toqate tjikoahyará la ko tí nixjehérá chojni tí ntja tjtóéhyará kixin chrókjuintaxrjanhanrá sín. ⁵ A ntá tió ts'ixenhenrá jnkojín nchia la senó nixjehérá sín ntáchrórá kixin ts'áyéhe sín kjuaxróxin, tsixrorá. ⁶ A ntá tí tjejó sín kjuaxróxin ntiha la nixjehérá sín la ts'áyéhe sín kjuaxróxin. A ntá tí la náhi, a ntá tí kjuaxróxin chrók'uáyéhe sín na sátsjikoará inaá. ⁷ A ntá tí nchia ntiha chrókjuanjon sín kjuachaxin chrókuítóhará, ntaha mé tsjanjon sín nkehe chóna sín sinterá la ko its'irá, kixin tí nkexro ch'e xra la siín kjuachaxin tsoxenkehe. Tsjíhyará í jnko

nchia la ko í jnko nchia. ⁸ A ntá tsjasánrá ijnko chjasin tsjanjon sín kjuachaxin ts'ejorá ntiha ntá interá tí nkehe tsjanjon sín. ⁹ Nchekitohérá chojni níhi jína. Ntá chenkará sín kixin tí kjuachaxin t'etōan Dios la kjínhya tjen tí tjejó sín, ichrorá. ¹⁰ A ntá tió tsjasánrá ijnko chjasin a ntá tsjanjonhya sín kjuachaxin la ntá t'axrjéxinrá ntōe sín sájtirá tí ntja chjasin ntiha ntá ntáchrórá kixin ¹¹ kjónté tí nche tsík'ixitja totará tsotsénkará kixin tsjákoxinrá kixin tí kjuaxróxinhya ts'áyéhe sín chr'éxin. Kjánchó chrókónohe sín kixin tí kjuachaxin t'etōan Dios la kjínhya tjen tí tjejó sín, ichrorá. ¹² Ntáxrjan kixin tí yaon tsjejexín chjasintajni la kjuaxróxinhya ts'atsínka tí chjasin a. Antsí náxrjónhya tí nkehe ts'atsínka sín, a ntá tí nkehe ts'atsínka chjasin Sodoma* la kénhyó —ichro ch'án.

Iso chjasin titekakonhya

(Mt. 11.20-24)

¹³ Nòará jahará chjasin Corazín. Nòará jahará chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxi k'uikonrá jahará, ntá chrókójehe sín la tjoka chrókjuitóxinhin ntje sín, tjoka chrók'uinkáya sín ka tié la ko chrókjuikjanjin sín ikja sín nteso, kixin chrókjuakoxin sín kixin t'ává sín. ¹⁴ A ntá tí yaon tsitōexín ijje chojni a ntá jahará antsí tsjasótiará, a ntá tí sín kuènte chjasin Tiro la ko chjasin Sidón la kénhyó tsjasóte sín. ¹⁵ A ntá jahará chjasin Capernaum, tjenkayáxinrá kixin imá nohará a ntá sátsjirá nkaya nkajni, ichrorá. Chaxínhya. Jahará la tsjasinkajinrá sátsjirá tí tsjasótexín tí sín tsík'en.

¹⁶ Tí nkexro tinhin tí nkehe ntáchrórá la mé xikaha tinhin tí nkehe ntáxrjan la ko tí sín titekakonhya sín tí jahará na mé xikaha titekakon-nahya sín tí janhan. A ntá tí nkexro titekakonnahya sín tí janhan xikaha titekakonhya sín tí nkexro chr'ánna k'uinka.

Ó kjan tí sín setenta sátsíkji

¹⁷ A ntá ó kjan tí sín setenta sátsíkji la imá chéhe sín ntáchro sín kixin:

—Inchéni, kjónté tí nchakuen tí jínahya titekakonhenni tió t'ákjénxinni ihniá —ichro sín.

¹⁸ Ntá ntáchro ch'ín Jesús kixin:

—Kja chaxín k'uikuān kixin ch'ín Tsochren k'uánótjénxín nkajni éxi ijnko kjónkixin xikaha kónhen.† ¹⁹ Ó tjahará kjuachaxin kixin kjónté konche la ko konchiá tsinkátjará la ko tsjachahya ninkehó tí kjuachaxin kuènte tí ch'ín Tsochren kixin ninkehó tsoanhyará. ²⁰ Kjánchó jehya tíha chrókóchàxinrá kixin tí nchakuen tí jínahya kuitekakonhanrá. Náhí. Chrókóchàxinrá kixin ihniárá ó ts'ínixín nkaya nkajni —ichro ch'án.

Tí Xjeen Dios nixjehe It'é ch'án

(Mt. 11.25-27; 13.16-17)

²¹ A ntá tuénxín tí Nchakuen Dios kjuínchechéhe tí ch'ín Jesús ntá ntáchro ch'án kixin:

—Tjáncháha kjuasáya It'éni Inché nkaya nkajni la ko chjasintajni kixin kjuánjonhya kjuachaxin chrók'uitja tí sín imá nohe, a ntá kjuánjuan kjuachaxin kixin ts'itja tí sín noehya. Mé xikaha It'éni, jaha kóxrjínhan kixin xikaha tsonhen.

²² T'aná mé chjina kaín xín nkehe. Ninkexró noehya nkexro tí Xjeen ch'án. Na mé jehó It'é ch'án mé nohe. La ko ninkexró noehya nkexro tí

* 10:12 Génesis 19.24–28 † 10:18 Isaias 14.12

It'é ch'án. Na mé jehó tí Xjeen ch'án mé nohe ch'án la ko tí sín tsíkjejá ch'án kixin tjinkaon ch'án tsonohe sín nkexro It'é ch'án —ichro ch'án.

²³ Ntá komá ch'án tí sín k'uájiko ch'án ntá ntáche ch'án tí jehó sín kixin:

—Chéhe tí sín k'uíkonxín kon sín éxí k'uíkonrá. ²⁴ Ntáxrjan kixin nchónhya tí sín k'uéchronka itén Dios ósé la ko nchonhya tí sín rey k'uétjinkaon sín chrók'uikon sín éxí t'ikonrá, kjánchó k'uíkonhya sín, la ko k'uétjinkaon sín chrókuinhin sín tí nkehe tjejotinhínrá jie, kjánchó í kíenhya sín —ichro ch'án.

Ch'ín Jesús kjuíncheyóexin éxí ijnko samaritano jína

²⁵ Ntá ijnko maestro tjako tí ley k'uínkatjen ch'án nixjehe ch'án tí ch'ín Jesús tjinkaon ch'án tsonoexín ch'án á chaxín nohe ch'án tsjatehe ch'án ntá kjuanchankí ch'án kixin:

—Maestro, ¿nkexrí chrókjuich'eni chrók'uitjani tí kjuachón jnkochrín? —ichro ch'án.

²⁶ Ntá kjuátehe ch'ín Jesús ntáchro ch'án kixin:

—¿Nkexrí nixja tí ley? ¿Nkexrí tiénxian? —ichro ch'án.

²⁷ A ntá tí maestro tjako tí ley mé kjuátehe ch'án ntáchro ch'án kixin:

—Chrótjuèheni Ìnchéni Dios kaín asénni la ko kaín fuerza chóntani la ko kaín kjuaxrexinkaon kuénténi la ko chrótjuèheni kíchó ni éxí tjuèxínni asénni† —ichro ch'án.

²⁸ Ntá ntáchro ch'ín Jesús kixin:

—Jína kjuátehe. A ntá tí jaha xíkaha sích'e la tsochonta kjuachón —ichro ch'án.

²⁹ Ntá tí maestro tjako tí ley mé tjinkaon chrókjuachaxín ch'án tí ch'ín Jesús ntá kjuanchankí ch'án inaá kixin:

—¿Xá nkexro tí kíchó ni chrótjuèheni, ichrua? —ichro ch'án.

³⁰ Ntá ch'ín Jesús kjuátehe ch'án ntáchro ch'án kixin:

—Ijnko chojni k'uínkajinxín nó ntja kjuixín chjasin Jerusalén sátsji ch'án chjasin Jericó, ntá kuátóhe ntja iso síchee kueéhe sín ch'án kaín nkehe sáchrókjuiko ch'án, la ko iké ch'án tsíkakitsjehe sín ch'án, la tsíkiate sín ch'án, la ntá sátsíkji sín tsíkitohe sín ch'án la ó mero tjet'en ch'án. ³¹ Ntá xrinahya k'uátsínka ijnko nchaj'á tí ntja ntiha ntá k'uikon ch'án xíkaha ntá ántosén ch'án k'uátsínké ch'án. ³² A ntá kjaxin ijnko ch'ín levita k'uátsínka chjinaxón ntiha. Ntá k'uikon ch'án xíkaha ntá ántosén ch'án k'uátsínké ch'án kjaxin. ³³ A ntá ijnko ch'ín kjuixín estado Samaria k'uátsínka tí ntja ntiha ntá k'uikon ch'án xíkaha tjetsínka tí nkexro ntá kuíkonóehe ch'án.

³⁴ Ntá kóchjinehe ch'án tí nkexro tsíkónihi ntá kjuích'ehe ch'án xroan tí síchrit'o chjéhe ch'án aceite la ko vino la ko kjuínchentetoxín ch'án ka. Ntá kjuixín ntá kjuínchekíták'á ch'án tí kolóchge ch'án. Ntá sákjuíko ch'án ijnko nchia t'ok'èxín chojni ntiha la k'uáyakonhen ch'án. ³⁵ Ntá tí kóyaon ntá sátsji tí ch'ín samaritano kuakitsje ch'án iyó tí chichaon la chjéhe ch'án tí inché tí nchia ntáchro ch'án kixin: “T'ayakonhén tí nkexro i, a ntá antsí má ts'ichjánxinhin ch'án la tió tsokjan ntá tsjénkaha ts'ókjanhan kaín tíha,”

ichro ch'án. ³⁶ A ntá tí iní nkexro k'uátsínka ntja la, ¿nkexro tjuèhe tí nkexro kjuíncheníhi tí síchee? —mé kjuanchankí ch'ín Jesús.

³⁷ A ntá kjuátehe tí maestro tjako tí ley kixin:

—Tí nkexro kuíkonóehe tí jehe ch'án —ichro ch'án.

Ntá ntáchro ch'ín Jesús kixin:

—Sátjia jaha la xíkaha chrókjuich'e —ichro ch'án.

Ch'ín Jesús sákuí ch'án ntøe tjan Marta la ko tjan María

³⁸ Naxa tjetji ch'ín Jesús kjuíji ch'án ijnko chjasin ntsí. A ntá ntiha itjen ijnko tjan it'in Marta, a ntá kjuanjon tjan kjuachaxin kuitøhe ch'án ntøe tjan ntiha. ³⁹ A ntá tjan Marta chóna tjan ijnko kíchó tjan it'in María. A ntá jehe tjan kjuák'etjaxin tjan chrínkí toté tí ch'ín Jesús tjetinhin tjan nkehe tí tjechro ch'án. ⁴⁰ A ntá tjan Marta tóxakonhen tjan kixin nchónhya xra chóna tjan, ntá kóchjinehe tjan tí ch'ín Jesús ntáchro tjan kixin:

—Inchéni, ¿á tóxakuanhya kixin tí tjan kíchó ni kuitøheni tjan, a ntá jehóni tjech'eni kaín xra? Ntáche tjan kixin tsjinkitsani tjan —ichro tjan.

⁴¹ Kjánchó ch'ín Jesús kjuátøhe ch'án ntáchro ch'án kixin:

—Marta, Marta, jaha imá tóxakonhan kixin t'inkákonhen nchónhya xra chonta. ⁴² Kjánchó jnkokoá nkehe t'ichjánxin. A ntá tjan María kjueyá tjan tí nkehe antsí jína la ko ninkexró tsakitsjehya tjan tíha —ichro ch'án.

11

Ch'ín Jesús tjako ch'án nkexrí tsonixjeheni Dios

(Mt. 6.9-15; 7.7-11)

¹ A ntá jnkonaá ch'ín Jesús tjenixjehø ch'án Dios ijnko lugar tjen. Ntá kjuixin la ijnko tí sín xriko ch'án ntáchro kixin:

—Inchéni, tjákehéni nkexrí tsonixjeheni Dios kixin xikaha ch'ín Juan kjuakohe ch'án tí sín k'uájiko ch'án.

² Ntá ch'ín Jesús ntáchro ch'án kixin:

—Tió nixjehérá Dios ntáchrorá kixin:
It'éni tjen nkaya nkajní, jaha imá tjóá.
Chrókui ti kjuachaxin kuéntá.

Chrókjuich'e tí nkehe tóxrjínhan jaha ntihi chjasintajni éxí tjech'e nkaya nkajní.

³ Ijie tsjánjuan tí niotja t'ichjánxinhinni jnkojnko yaon.

⁴ T'óxika tí nkehe jínahya kjuich'eni kixin kjaxin jeheni ts'itjáyenhenni tí nkehe kjuich'eheni chojni.

Tjtoéhyani jeheni xrahya chrókjuasinni jie. Nchekaáni kaín tí nkehe jínahya chrókónhenni

—mé xikaha ichro ch'ín Jesús.

⁵ Kjaxin ntáchro ch'án kixin:

—A ntá jnkojínrá chróchontará ijnko chojni choxian, a ntá sáchrókjuia ntøe ch'án k'áxrótjen chróntáche ch'án kixin: “Amigo, nchekjenni iy'á niotja ⁶ kixin nantá ó kui ijnko chojni chóxinni kjuixin ch'án kjín kjuíji ch'án ntøeni ntá chóntahyani ninkehó tsochjéheni ch'án.” ⁷ A ntá tí chrókjuatøhe tí nkexro choxian tjen nkaxenhen chróntáchro kixin: “Chjeéhyani xra. Tí ntója ntøeni méhe t'ikjéhe. A ntá xjeenni tjejót'ok'èkoni xjan. Ntá xitjahya ts'àyani tsotjáhani nkehe”, ichro ch'án. ⁸ Ntáxrjan kixin kjónté chrók'uayahya ch'án chrótjáhya ch'án nkehe kjónté chóxian ch'án, kjá ts'àya ch'án tsotjáha ch'án kaín nkehe t'ichjánxinhan kixin tjinkakonhya ch'án kixin naxa chrókjuak'é chrók'uèya jaha. ⁹ Mé xikaha ntáxrjan kixin: Tjanchará nkehe la Dios tsotjáhará; tjéyará nkehe la ts'itjará; t'inkará puerta la tsoxitjehø. ¹⁰ A ntá tí nkexro tjanchia nkehe la ts'áyéhe tí nkehe; la ko tí nkexro tjeyá nkehe la ts'itja; la ko tí nkexro t'ínka puerta la tsoxitjehø.

¹¹ '¿á jnkojínrá chontará xjaanrá chrókjuanchahará xjan niotja la ¿á chrókjuánjonrá ijnko xro? O chrókjuanchahará xjan koche la ¿á

chróchjehérá ijnko konche? ¹² Q chrókjuanchahará xjan koja la çá chrókjuánjonrá ijnko konchjã? ¹³ A ntá jahará kjónté jínahyará la ó nohará nkehe jína tsochjehérá xjaanrá, la mé antsí chrókónohará kixin It'eni tjen nkaya nkajní tsotjáhará Nchakuen ch'án tí jnkojínrá chrókjuanchehérá ch'án —ichro ch'ín Jesús.

Tjanchia sín jie kixin ch'ín Jesús chóna kjuachaxin tí Jínahya
(Mt. 12.22-30; Mr. 3.19-27)

¹⁴ Ntá ch'ín Jesús kuakitsje ch'án ijnko nchakuen tí jínahya tsíkjinchenósín ijnko chojni. A ntá tió tsík'axrje tí nchakuen tí jínahya a ntá tí ch'ín xitjahya nixja la jína nixja ch'án. Ntá kaín chojni chrakon sín kixin xikaha tsík'jich'e ch'án. ¹⁵ A ntá jnkojín tí jehe sín ntáchro sín kixin:

—Tí ch'ín a mé takitsje ch'án nchakuen tí jínahya kixin chóna ch'án kjuachaxién tí ch'ín Beelzebú mé tí ch'ín Tsochren, na mé jehe ch'án mé t'etuennen kaín tí nchakuen tí jínahya —ichro sín.

¹⁶ A ntá iso sín tjínkaon sín chrókjuachaxin sín tí ch'ín Jesús ntá kjuanchehe sín ch'án ijnko kjuaxroan náxrjón kuente nkaya nkajní. ¹⁷ Kjánchó jehe ch'án ó nohe ch'án nkehe tjenkayáxin sín la ntáchro ch'án kixin:

—Jnkojín gobierno jnkokónhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etoanxín sín, la ko tí sín jnkokoá nchia jnkokónhya tjenkayáxin sín xitjahya ts'ejóko kichó sín jnkokoá. ¹⁸ A ntá kjaxin tí ch'ín Tsochren chrókjuánjonko kichó ch'án, çla nkexrí chróchóna ch'án kjuachaxin naxa chrók'uetoan ch'án tí chrók'uaxrje tí jínahya? A ntá jahará ntáchrorá kixin janhan takítsjé nchakuen tí jínahya kixin tí kjuachaxién ch'ín Tsochren chonta janhan, ichrorá. ¹⁹ A ntá tí xikaha la, çntá nkexro chjéhe kjuachaxin tí sín chréhe tí jahará kixin tsjacha sín tsakitsje sín nchakuen tí jínahya? Jehe sín mé tjakoçin sín kixin jahará ntoáhya tjenkayáxinrá. ²⁰ A ntá tí kjuachaxién Dios mé takitsjéxian tí nchakuen tí jínahya na mé chrókónoaxínrá kixin tí kjuachaxién Dios t'etoan ch'án mé ó kui tí tjejorá.

²¹ A ntá ijnko chojni jiehe yamá chica t'ayakonhen ch'án ntøe ch'án kixin tí nkehe chóna ch'án ts'itjáyannya. ²² A ntá itsi ijnko nkexro antsí má tsehe, a ntá tsjanjonko ch'án tí ìnché nchia, a ntá tsjacha tsakitsjehe tí ìnché nchia kaín tí chica yamá ch'án kixin imá jieexín ch'án. A ntá tí ch'ín antsí tsehe mé tsakja ch'án kaín nkehe siín ntiha. ²³ Tí nkexro titekakonhya tí janhan mé nínkakonna ch'án. A ntá tí nkexro tjinkítsahya tí janhan mé t'ínkákonhen tí xra t'a —ichro ch'án.

Ijnko tí nchakuen tí jínahya mé tsokjan inaá
(Mt. 12.43-45)

²⁴ A ntá ijnko nchakuen tí jínahya tsík'axrjexín ijnko chojni na mé ixri tí nonte xámá xritjeyá nketí náxrjón ts'ok'éhe. A ntá tí k'uitjahya ntá tjenkayáxin kixin: “Áxri tsokjan ntøna k'uaxrjéxian.” ²⁵ A ntá tió kjan la éxí ijnko chojni tsík'ánjón ntøe la náxrjón tsjehe tí nkaxenhen nchia. A ntá k'uíkon tí jínahya xikaha tjen nchia ²⁶ a ntá sákjuíkajín yato nchakuen tí jínahya antsí má jínahya. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen ijnko chojni kénhya asén tinkáchónki Dios —ichro ch'án.

Tí kjuachéhe chaxín

27 Ntá ch'ín Jesús tjenixja ch'án chrónka ch'án kaín tíha ntá ijnko chojni chjin tjenkákjan tí jehe sín a itsen nixja tjan ntáchro tjan kixin:

—Chéhe tí nkexro k'uaxrjenixin tí jaha kjuíntak'ánkiá —ichro tjan.

28 Ntá jehe ch'án kjuátehe ch'án ntáchro ch'án kixin:

—Antsí chéhe tí nkexro tinhin tí itén Dios la ko titekaon sín —ichro ch'án.

Tí sín jínahya mé tjanchia sín ijnko kjuaxroan náxrjón

(Mt. 12.38-42; Mr. 8.12)

29 Ntá nchónhya chojni sítójnksé sín tí tjen ch'ín Jesús ntá jehe ch'án kjuankixin nixja ch'án ntáchro ch'án kixin:

—A ntá tí chojni siín jie la jínahya sín, a ntá tjanchia sín kixin chrókjuásian ijnko kjuaxroan náxrjón. Kjánchó tsjácoxinhya í jnko kjuaxroan la jehó tí nkehe tsikónhen ch'ín Jonás. 30 Ntá éxí yóhe kónhen ch'ín Jonás kónoexín tí sín chjasin Nínive mé xikaha tsonhen tí Xjeen Dios K'óna Chojni la ts'ikon tí chojni siín jie. 31 A ntá tí yaon tsitoxín ijíe chojni tjejó jie la mé tí tjan reina k'uetōan kjuixín nó Sur mé ts'inkatjen tjan tsjanchia tjan jie kixin tí sín tjejó jie. Kixin jehe tjan imá kjín kjuixín tjan tsinhin tjan nkexrí imá k'uénohe ch'ín Salomón.* A ntá jie itjèn janhan antsí chonta kjuachaxin, a ntá ch'ín Salomón la kénhyó. 32 La ko tí sin chjasin Nínive kjaxin ts'inkatjen sín tió tsitoxín ijíe chojni la tsjanchia sín jie kixin tí sín tjejó jie la ko tsontácho sín kixin chrókjuasóte tí chojni tjejó jie kixin tió kuínhin tí sín Nínive chrónka ch'ín Jonás itén Dios la kjuítóxinhin sín ntje sín. A ntá jie itjèn janhan antsí má chonta kjuachaxin, a ntá ch'ín Jonás la kénhyó.

Xrohi t'inkaséyanxín cuerpo kuènte chojni

(Mt. 5.15; 6.22-23)

33 'Nijnko chojni chrokjuinçek'ákjen ijnko xrohi chrókjuak'ema ch'án la ko chrókjuak'ehya ch'án chrínki ijnko ntacajón. Náhí. Noí chrókjuak'e xrohi chrókjuak'enkáya candelero kixin ts'ikonxín chojni tí t'inkaséyan.†

34 Tí ikonrá mé éxí yóhe ijnko xrohi t'inkaséyanxín tí cuerpo kuèntará. A ntá tí chontará ikonrá jina la ntá kuènté cuerpo kuèntará chóna xrohi. A ntá tí chontará ikonrá jínahya la ntá kuènté cuerpo kuèntará la sítie tjen. 35 Chrókóxakonhanrá kixin chrók'uayakonhénrá tí xrohi chontará kixin chrók'uankahya kixin chrók'uixitiéhya tí tjejorá. 36 A ntá tí kuènté tí cuerpo kuèntará chróchóna xrohi la ko nit'ō chrók'uixitiéhya la ntá kuènté la chrók'uikonrá jina la éxí ijnko lámpara kuènté ch'e xra jina.

Ch'ín Jesús chrónka kixin ntoáhya tjako tí sín fariseo la ko tí sín tjako ley

(Mt. 23.1-36; Mr. 12.38-40; Lc. 20.45-47)

37 A ntá tió kjuixin nixja ch'ín Jesús ntá ijnko ch'ín fariseo chrónóehē ch'án tí ch'ín Jesús kixin sátsjiko ch'án ntōe ch'án sineko ch'án. Ntá tió kjuíji sín ntiha la k'uixenhen sín nchia ntá kjuák'etjāxin ch'ín Jesús chjino tjen tí mesa a. 38 A ntá tí ch'ín fariseo chrakon ch'án k'uikon ch'án kixin ch'ín Jesús k'óntihya ch'án tja ch'án senó tí sine ch'án éxí tinkáchónki tí jehe sín.

39 Kjánchó Ìnchéni ntáchro ch'án kixin:

—Jahará fariseorá nchetjóará tí ntója tí vaso la ko tí plato. A ntá nkaxenhen la tsíkaón kjuachee la ko kjuachjinoxínhin. 40 Jahará lontirá. ¿A noahyará kixin tí nkexro kjuích'éna tí ntója la koí tí nkaxenhen kjuích'éna

* 11:31 1 Reyes 10.1–10 † 11:33 Lucas 8.16

ch'án? ⁴¹ Tí chrókjuinchekitonhénrá chojni nòa kaín asánrá tí nkehe chontará la ntá chrókóxakuanhyará tí chrók'ónti chojni o náhi.

⁴² 'Nòará jahará fariseorá. Jahará chjehérá Dios ijnko ite parte kaín kaxroan tsjiko tí nkehe sineni. A ntá tahyará kuentá tí nkehe ntoá la ko nkexri chrótjuèhérá Dios la ko nkexri chrótjuèhérá kíchuará. Jína chróchjehérá Dios nkehe la ko chrók'uitjáyanyará tí chrókjuínkĩsará kíchuará.

⁴³ 'Nòará jahará fariseorá. Tjinkáonrá ts'ejokjenrá tí silla náxrxjón nkaxenhen njnko la ko tjinkáonrá kixin jnkojína tsonixjahará sín tió tsoxétará sín ntasin.

⁴⁴ 'Nòará jahará maestro tjàkorá tí ley la ko jahará fariseorá. Ntoáhya tjenkayáxinrá ch'iará. Jahará éxi yóhe tòye tsíxravá chojni tsík'en t'ikonyha chojni la t'atsínka sín nátaón la noehya sín kixin tsíxravá chojni ntíha.

⁴⁵ A ntá kjuátehe ijnko tí maestro tjako tí ley ntáchro ch'án kixin:

—Maestro, xikaha ntáchrua la, ¿á kjaxinhya jeheni kaín ni t'ántaxínhinni ní? —ichro sín.

⁴⁶ A ntá ntáchro ch'ín Jesús kixin:

—Kjaxin nòará tí jahará tjàkorá tí ley. Tétuenhénrá chojni tsamá sín ijnko nkehe imá ye chrókjuachahya chojni chrókuamá. A ntá jahará nijnko dedo tjárá chrókjuínkĩsará tí nkehe imá ye yámá sín.

⁴⁷ 'Nòará tí jahará. Ch'énará tjàt'oe tí sín k'uéchrónka itén Dios ósé tsík'óyán tí sín k'uaxrjeníxinrá. ⁴⁸ Xikaha jahará tjákoxinrá kixin ó nchoxon tí nkehe kjuích'e tí sín k'uaxrjeníxinrá ósé kixin jehe sín k'óyán sín tí nkexro k'uéchrónka itén Dios ósé. A ntá jahará ch'énará tjàt'oe tí tsíxravá sín.

⁴⁹ 'Mé xikaha Dios chóna kjuaxrexinkaon imá jína ntá ntáchro ch'án kixin tsochr'án ch'án chojni tsochrónka itén ch'án la ko tsochr'án ch'án chojni tsjikjako itén ch'án. A ntá chojni ts'óyán jnkojín tí jehe sín la ko tsochónkíhi tí í so sín, ichro ch'án. ⁵⁰ A ntá Dios mé tsjanchia jie tí chojni síin jie kixin k'uitji ijnié kaín tí sín k'uéchrónka itén ch'án ósé desde tí xrankíxin k'óna chjasintajni ⁵¹ la mé xrankíxixin k'uitji ijnié ch'ín Abel la mé kjuixixín k'óyán sín ch'ín Zacarías k'óyáxin sín ch'án jnkosiné tí tjen tí altar la ko tí njnko. Ntá Dios sinchekjasóte ch'án tí sín síin jie kixin xikaha ik'uén kaín tí sín a.

⁵² 'Nòará jahará maestro tjàkorá tí ley. Jahará tjinkákonhyará kixin í so chojni tsonohe sín tí nkehe chaxín la ni jahará tjinkákonhyará sijnchexiteyará la ko titoéhyará kixin í so chojni chrókjuinchexiteyá sín —ichro ch'án.

⁵³ A ntá kjuixin nixja ch'ín Jesús kaín tíha ntá tí sín maestro tjako tí ley la ko tí sín fariseo imá kónínkakohen sín ch'án ntá kjuankíxin sín kjuanchankíhi sín ch'án nchónhya nkehe ⁵⁴ chrókjuachaxín sín ch'án kixin ách'e ntoáhya chrókjuatehe ch'án ntá chrókjuanchia sín jie tí jehe ch'án.

12

Ch'ín Jesús chrónka kixin ntoáhya ch'e tí sín fariseo

¹ A ntá nchónhya mil chojni kójnkotsé sín ntá tinkák'íntate kíchó sín. Ntá ch'ín Jesús saoxín kjuankíxin chénka ch'án tí sín k'uájiko ch'án ntáchro ch'án kixin:

—Chrókuítekákonhyará tí nkehe ntoáhya tjenkayáxin tí sín fariseo ch'ia sín, na mé éxi yóhe tí xroan nchek'ánki niotja tí nkehe tjako sín. ² Kohya

nkehe mó jie chrókónoxínhya chr'éxin la ko kohya nkehe tjemá jie chrókónoahya chojni chr'éxin. ³ A ntá kaín nkehe ntáchrórá tí sítié la chr'éxin tsinhin chojni tí nchakotjin; la ko kaín nkehe mó ntáchrórá k'uikjéhérá nchia la chr'éxin ts'èya sín chrítaón nchia tsinhin kaín xin chojni.

Nkexro tí chróchrakõhenni
(Mt. 10.26-31)

⁴ Jahará chojni chóxin kichó ni mé tjonkará kixin chróchrakuenhyará tí chojni t'oyán tí cuerpo, a ntá chr'éxin la kohya nkehe tsjacha sín chrókjuich'e sín. ⁵ Kjánchó tjonkará kixin nkexro chróchrakõhénrá. Chróchrakõhénrá Dios mé tí nkexro tsakitsje kjuachón ntá chóna kjuachaxin tsochr'án chojni tí síin xrohi tsjasótéxin sín. Tí nkexro a mé chróchrakõhénrá ch'án má.

⁶ ¿Á chrókóxiñinhyá in'ó koxroxé yaá chichaon ntsíntí? Kjánchó Dios la ts'itjáyenhyá ch'án nijnko tí jehe va. ⁷ Kjónté tí kaxihí chóna ikjárá la nohe ch'án nkekjaín ka chontará. Méxra chrakõhyará tí jahará kixin antsí má tjete sínkí tí jahará. A ntá kjónté nchónhya koxroxé la kánhyó sínkí tíha.

Chróchrónkani kixin tinkáchónkini Inchéni Jesucristo nkayakon chojni
(Mt. 10.32-33; 12.32; 10.19-20)

⁸ Ntáxrjan kaín tíhi kixin tí nkexro tsochrónka kixin tinkáchónkina sín nkayakon chojni la kjaxin tí Xjeen Dios K'óna Chojni tsochrónka kixin chóxin ch'án tí jehe sín nkayakon tí sín ángel kuènte Dios. ⁹ A ntá tí sín sinchemá sín kixin chónhyana sín nkayakon chojni la ntá kjaxian janhan sjntamá kixin chonhya tí jehe sín nkayakon tí sín ángel kuènte Dios.

¹⁰ A ntá jnkójín nkexro ts'ántaxínhin sín tí Xjeen Dios K'óna Chojni naxa jina ts'itjáyan tí jie k'uántaxínhin sín. A ntá tí nkexro ts'ántaxínhin tí Nchakuen Dios la xitjahya tsjin tí jie tí xikaha tsixro sín.

¹¹ Tíó tsjikoará sín nkaxenhen njnko Israel la ko tí tjejó tí sín t'etóan la ko tí tjejó tí síxreé la tóxakuanhyará nkehe tsjateherá la ko tóxakuanhyará nkehe tsixrorá ¹² kixin tíó tsonixjará la tí Nchakuen Dios sinchexraxinkaonrá nkehe tsixrorá —ichro ch'án.

Tí kjuaxikaon tsochóna chojni itsjé nkehe

¹³ Ijnko nkexro tjenkákjan tí sin tsíkójnkotsé ntáche ch'án tí ch'ín Jesús kixin:

—Maestro, ntáche tí kichó ni a kixin tsjanjon ch'án tí nkehe tónhenni tocar tsíkitohe it'eni tsakjani —ichro ch'án.

¹⁴ Ntá kjuátehe ch'ín Jesús ntáchró ch'án kixin:

—Lontia jaha. ¿Nkekuènte chrókjuich'éenárá juez tí janhan chrók'oxikayahá tí nkehe chrókuakjará jahará? —ichro ch'án.

¹⁵ Kjaxin ntáchró ch'án kixin:

—Tóxakonhanrá tí chróchontará itsjé nkehe. Jehya tí nchónhya nkehe chróchontará ntá náxrxón chrók'uejorá —ichro ch'án.

¹⁶ Ntá kjuíncheyóexin ch'án ntáchró ch'án kixin:

—Kjuák'e ijnko chojni rico, a ntá tí nonté ch'án na mé imá k'óna. ¹⁷ A ntá tí ch'ín rico kjuenkayáxin ch'án ntáchró ch'án kixin: “¿Nkexrí chrókjuít'a jie kixin chontahya nketí ts'ínkachjina tí noa k'ónana?” ichro ch'án. ¹⁸ Ntá kjuenkayáxin ch'án ntáchró ch'án kixin: “Ó nòna nkehe sjt'a jie. Ts'oxíka tí t'ínkachjinayá noa chonta ntá sjt'ána ijnko antsí jie

ts'inkachjinayá kaín nkehe k'ónana jie chonta. ¹⁹ Ntá tsontátjan asenná kixin: Asénni, nchónhya nkehe chonta jaha tsíchjina tsjacha nchónhya nánó. Ntá jie t'ok'áha la inte la its'ia la tócháha,” ichro ch'án. ²⁰ Kjánchó ntáche Dios tí jehe ch'án kixin: “Lontia xíkaha ichrua la, kixin ijie tie itsi nkexro tsjanchia asán. A ntá tí nkehe kjuásichjina la, ¿xá nkexro kuènte tíha?” ichro ch'án. ²¹ Mé xíkaha tsonhen tí nkexro chónata nchónhya nkehe chjasintajni ntihi, a ntá naxa kjueyáhya ch'án nkehe kuènte nkaya nkajní —mé ichro ch'ín Jesús.

Dios mé t'ayakonhen tí xjeen ch'án

(Mt. 6.25-34)

²² Ntá chr'éxin ntáche ch'ín Jesús tí sín k'uájiko ch'án kixin:

—Tjonkará kixin chrókóxakuanhyará tí nkehe chrókjónterá la ko tí ka chrók'uítsará. ²³ Antsí sínkí tí kjuachón, a ntá tí nkehe chrókjónterá la kánhyó sínkí. La ko antsí sínkí tí cuerpo kuèntará, a ntá kánhyó sínkí tí ka chrók'uítsará. ²⁴ Xráxinkáonrá nkexrí síin tí kontálo. T'enkahya va la ko tjáhya va la ko chónthya va nketí ts'inkachjinayá va tí noa. Kjánchó Dios la tjanjon nkehe sine va. A ntá jahará la antsí tjetóan, a ntá tí ko xritjaka la kénhyó. ²⁵ ¿Á tjejó jnkójínrá tjenkayáxinrá kixin tí chrókóxakonhanrá má ntá naxa chrók'uankirá it'o metro ntetoxinrá inaá? ²⁶ A ntá xitjahya chrókjuich'erá tíha kjónté ijnko nkehe ntsí, ¿a ntá nkehe tsonhen tóxakonhanrá í so nkehe síin?

²⁷ Xráxinkáonrá nkexrí sí'ánkí tí catsjo lirio ch'ehya xra la ko tjonhya. Ntá kjónté ntáxrjan kixin tí ch'ín rey Salomón kaín ka náxrjón k'uék'inkáya ch'án naxa kjuíncheyóehya ch'án kixin antsí náxrjón tí tsjo a. ²⁸ A ntá xíkaha Dios mé nchek'itsa ch'án kaín kayoa kjónté ijie síchón la ntóye tsoche, la mé xíkaha tsjanjon ch'án tí nkehe chrok'uítsará jahará. ¿Ntá nkekuènte kixin naxa titekákonhyará ch'án? ²⁹ ¿Ntá nkekuènte ixrírá tóxakonhanrá xritjéyará nkehe sinterá la ko nkehe its'irá? ³⁰ A ntá tí chojni chjasintajni xritjeyá sín kaín tí nkehe a. Kjánchó It'ará ó nohe ch'án kixin t'ichjánxinhanrá kaín tí nkehe a. ³¹ Senó chrókjuéyará tí kjuachaxin kuènte Dios, a ntá jehe ch'án mé tsjanjon ch'án kaín nkehe t'ichjánxinhanrá.

Tí nkehe tjete síin nkaya nkajní

(Mt. 6.19-21)

³² 'Chrakonhyará jahará kolélo kuèntana. Kjónté tsjéhyará la It'ará tóxrjínjin ch'án tsojtáhará ch'án tí kjuachaxin kuènte ch'án. ³³ Nchekjirá kaín nkehe chontará la ntá chjeherá tí chichaon tí sín chónthya. A ntá xíkaha sích'erá la tí tjoa t'inka chíchakóanrá tsontaxinhya kixin tí nkehe tjete síin nkaya nkajní tsjejehya la ko ntaha kohya xíchee la ko ts'ínhya kué la ko ts'itjáyanhya. ³⁴ A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

T'ichjánxin listo chrók'uejóchónhenni

³⁵ T'ichjánxin listo ts'ejochonhénra la ko tsjak'ekoará xrohi tjeche. ³⁶ Listo chrók'uejorá éxí chojni ch'e xra tjejóchónhen sín tsokjanxin tí lámoe sín tí tsikótehe chojni kixin tió tsi ch'án la ts'éya ch'án, la ntá tsakitjehe sín tí puerta tjoka. ³⁷ Náxrjón tí nkexro ch'e xra tió chrókjan tí lámoe sín chrók'uikon ch'án kixin naxa tjejótsjehe sín. Ntá chaxín ntáxrjan kixin tí ch'ín lamo ts'etoan ch'án kixin ts'ejótjaxin sín tí tjen mesa ntiha ntá tsjanjon ch'án nkehe sine sín. ³⁸ Kjónté chrókui ch'án k'áxrótjen o

chrókui ch'án nantóye mé xíkaha chrók'uikon ch'án kixin tjejótsjehe sín la náxrjón tí sín ch'ehe ch'án xra. ³⁹ Chrókónohará tíhi kixin tí chrókónohe tí ìnché nchia nke hora chrókui tí xíchee ntá chrókjuak'etsjehe ch'án chrókuítóehya ch'án chrók'uixenhen xíchee tí ntøe ch'án chrókueé. ⁴⁰ Ntá jahará kjaxinrá xíkaha chrók'uejotsjehérá kixin titáyá tsi tí Xjeen Dios K'óna Chojni.

Tí nkexro jína ch'e xra la ko tí ch'ín ch'ehya xra jína
(Mt. 24.45-51)

⁴¹ A ntá ch'ín Pedro kjuanchankí ch'án kixin:

— Ìnchéni, ¿á jehóni kaín ni kjuíncheyóéxian nkehe ntáchrúa o kaín chojni? — ichro ch'án.

⁴² Ntá ntáchró Ìnchéni kixin:

— ¿Nkexro tí t'etøan tí xra jína, a ntá tí lámøe ts'etuenhen kixin ts'ayakonhen ch'án tí chojni siín tí nchia ntiha kixin tsjanjon ch'án nkehe sine sín xintíi tí hora a? ⁴³ Náxrjón tjen tí nkexro a tió tsi tí lámøe ts'ikon ch'án kixin náxa tjech'e tí xra. ⁴⁴ Tíhi mé chaxín tsonáxrjan kixin tí ch'ín lamo tsochjéhe ch'án kaín xra chóna ch'án ts'etøan tí ch'ín a. ⁴⁵ A ntá tí ch'ín t'etøan sitónhen xra tsjenkayáxin kixin tjokahya tsokjan tí lámøe ch'án, a ntá tsjankíxin ch'án tsonínkakohen ch'án tsjanjonko ch'án tí í so chojni ch'é xra, tí chojni ntoa la ko tí chojni chjin, a ntá jehe ch'án sine ch'án la its'i ch'án la tsøkoan ch'án. ⁴⁶ A ntá tí lamo tsokjan tí yaon tjenkayáxinhya tí ch'ín ch'e xra, na mé ijnko hora noehya ch'án. A ntá imá sinchekjasóte ch'án tí ch'ín kuítóhehe xra la ntá tsjasóteko ch'án tí sín titekakonhya.

⁴⁷ A ntá tí nkexro nohe ch'án nkehe tí xra tjinkaon tí lámøe ch'án la tóxakuenhya ch'án la titekakonhya ch'án la mé tí ch'ín a imá tsjasóte ch'án ts'ekon ch'án. ⁴⁸ A ntá tí nkexro noehya nkehe tí xra tjinkaon tí lámøe ch'án ntá ch'e ch'án nkehe chrókjuasótexín ch'án la kjónté kánhyó tsjasóte ch'án ts'ekon ch'án. A ntá tí nkexro k'uáyéhe nchónhya nkehe la antsí tsjé xra ts'áyéhe ch'án sich'e ch'án; la ko antsí tsjé xra tsoxranchehe tí nkexro k'uáyéhe itsjé nkehe.

Jnkokoáhya tsjenkayáxin chojni kixin ó kui Ìnchéni Jesús
(Mt. 10.34-36)

⁴⁹ Janhan k'uinka kixin sjintak'ákjen xrohi chjasintajni. Ách'e ntáxrjan kixin ó tjechr'ákjen tí xrohi a ntá náxa náhi. ⁵⁰ T'ichjánxin nchónhya tsona tsjasótena. Tóxakonna tsoxiteyájia kaín tíha. ⁵¹ ¿Á tjenkayáxinrá kixin k'uinkakian kjuaxróxin tí chjasintajni ní? Méxra ntáxrjan náhi. Jnkokoáhya tsjenkayáxin chojni xíkaha. ⁵² Kixin ijie xrankíxixín in'ó chojni náxa kjéhya jnkokoáhya tsjenkayáxin sín. Tí iní tsonínkakohen tí yaá. Tí yaá tsonínkakohen tí iní. ⁵³ A ntá tí it'é tsonínkakohen tí xjeen ntoa, la ko tí xjeen ntoa tsonínkakohen tí it'é. A ntá tí iné tsonínkakohen tí xjeen chjin, la ko tí xjeen chjin tsonínkakohen tí iné. Tí ich'ee tsonínkakohen tí tikíntøe la ko tí tikíntøe tsonínkakohen tí ich'ee tjan.

Tí nkehe chronkaxín nkehe tsonhen
(Mt. 16.1-4; Mr. 8.11-13)

⁵⁴ Ch'ín Jesús kjaxin ntáche ch'án tí chojni siín kixin:

— A ntá ts'ikonrá ts'àya tjuj tí tjiátóxin yaon, a ntá ntáchrórá kixin ts'aniá chrin, a ntá xíkaha chaxín tsonhen ts'aniá chrin. ⁵⁵ A ntá tí chjéhe xrinto

nó sur ntá ntáchrórá ḱixin tsosóa, a ntá xikaha chaxín tsosóa. ⁵⁶ Jahará ntoáhya tjenkayáxinrá. Ó nohará tjenkayáxinrá nkexrí tsonhen nkajní la ko chjasintajni. ¿Ntá nkexrí naxa tiénxinhyará nkehe sítónhen tí tjejorá jie?

Chrókóxakonhenni kjuaxróxin chrók'uejókoni tí sín nínkakonhenni (Mt. 5.25-26)

⁵⁷ ¿Nkekuènte tjéyáhyará jahará nkehe tí jína? ⁵⁸ Tí jnkojín nkexro ts-janchia jie sátjikoará ch'án nkayakon tí sín t'etóan na tí ntia ó chrónkakjórá ch'án ḱixin tsoyóxin ts'ixinhya kjuanínkaon ḱixin sátsjikoahyará nkayakon tí ch'ín juez, ḱixin tí ch'ín juez chrók'uetóan ch'án ḱixin sátsjikoará tí sín comandante. A ntá tí ch'ín comandante chróchr'áxanhanrá ch'án ntóechiso. ⁵⁹ Ntáxrjan kjá ni chrók'uaxrxéxinhyará ntiha tsjenkajiará kaín xín chichaon chonta.

13

T'ichjánxin chrókuinkí chojni tí nkehe tjenkayáxin sín

¹ A ntá tí yaon k'uejó iso sín chénka sín tí ch'ín Jesús ḱixin nkexrí kjuích'e ch'ín Pilato k'uetóan its'en iso chojni tsíkjin estado Galilea k'uitji ijnié sín kójnkojiéko tí ijnié tí ko k'óyán sín kjuanchexín sín kjuasáyé Dios. ² A ntá kjuátehe ch'ín Jesús ntáchró ch'án ḱixin:

—¿Á tjenkayáxinrá ḱixin xikaha kónhen tí sín tsíkjin estado Galilea ḱixin antsí jie chóna sín, a ntá tí í so sín chjasén sín la á náhi ní? ³ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha its'enrá kjaxin. ⁴ ¿Á tjenkayáxinrá ḱixin antsí má k'uéchóna jie tí dieciocho chojni ik'uén xrátja sín tí torre Siloé, a ntá tí í so sín chjasin Jerusalén la á náhi ní? ⁵ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha ts'itjayanrá kjaxin.

Ch'ín Jesús kjuíncheyóexin ch'án éxi ijnko nta to higo t'ónahya to

⁶ A ntá ch'ín Jesús kjuíncheyóexin ch'án ntáchró ch'án ḱixin:

—Ijnko chojni chóna ijnko nta to higo nóntee ch'án. Ntá sákjuítsjehe ch'án á k'óna to. A ntá náhi k'uitjahya ch'án ninkehó to. ⁷ Ntá ntáche ch'án tí nkexro t'ayakonhen tí nonte a ḱixin: “Ó ní nánó t'inkatsjaha tí nta la k'uitjähya ninkehó to higo. T'ochrínjian tí nta ḱixin tsoxéhe tí nonte a.” ⁸ A ntá tí ch'ín t'ayakonhen nonte kjuátehe ch'án ntáchró ch'án ḱixin: “Áxri, títóhé ijie nánó ḱixin sintantá nche la ko tsjiko nchekátjehe. ⁹ A ntá tí xikaha ách'e ts'óna to. A ntá tí náhi na ntá ts'ochrínjian chr'éxin.”

Ch'ín Jesús kjuínchekitóhe jína ijnko tjan níhi tí yaon t'ok'éhe chojni

¹⁰ Ch'ín Jesús kjuák'e ch'án ijnko nínko kjuakoxin ch'án ijnko yaon t'ok'éhe chojni. ¹¹ Ntiha tjen ijnko chojni chjin chóna dieciocho nánó chonta tjan ijnko nchakuen tí jínahya kjuíncheníhi tjan tjesékoá tjan xitjahya xrentoá tjan. ¹² A ntá ch'ín Jesús k'uikon ch'án ḱixin xikaha tjen tjan ntá k'uíyehé ch'án tjan ntáchró ch'án ḱixin:

—Naná, ó kjuínhan tí chin chonta —ichro ch'án.

¹³ A ntá jehe ch'án kjuak'etja tja ch'an chrítaón tí jehe tjan a ntá tuénxín xrentoá tjan ntá chéhe tjan kjuasáyé Dios. ¹⁴ A ntá tí ch'ín t'etóan kuènte nínko kónínkaon ch'án ḱixin ch'ín Jesús kjuínchekitóhe jína ijnko chojni ijnko yaon t'ok'éhe sín, ntá ntáche ch'án tí chojni a ḱixin:

—Siín injon yaon mé chrókónhen xra chrók'uinkará chrókuitharhá jína na jehya tí yaon t'ok'éheni chrókónhen tíha —ichro ch'án.

¹⁵ A ntá Ìnchéni kjuátehe ch'án ntáchro ch'án kixin:

—Ntoáhya tjenkayáxinrá jahará. ¿Á chrókjuasintankehýará tí koxintaará la o tí kolóchoará chrókjuikoará va nta tí yaon t'ok'éheni ní? ¹⁶ A ntá tí tjan mé tsík'axrjenixin tí ch'ín Abraham na mé ó chóna dieciocho nánó tsíkjinchenteto ch'ín Tsochren tí jehe tjan, ¿á jehya jína kjaxin chrókjuasintanká tí nkehe tsíkóntetoxín tjan tí yaon t'ok'éheni? —ichro ch'án.

¹⁷ Ntá xikaha ichro ch'ín Jesús la ntá kaín tí sín kónínkakonhen ch'án la kósuèhe sín. A ntá kaín tí chojni siín ntaha chéhe sín k'uíkon sín kaín tí kjuaxroan jié kjuakoxin tí jehe ch'án.

Kjuíncheyóexin ch'ín Jesús éxi ijnko tje ntsí kuènte nta mostaza
(Mt. 13.31-32; Mr. 4.30-32)

¹⁸ Ntá ntáchro ch'ín Jesús kixin:

—¿Nkehe tóyóexin tí t'etóan Dios tí kjuachaxin kuènte ch'án la ko nkehe jína chrókjuintayóaxian? ¹⁹ Éxi yóhe ijnko tje kuènte nta mostaza k'uénká ijnko chojni nontee ch'án. A ntá tió k'uánkí kóyóhe éxi ijnko nta jié. A ntá tí koxroxé xritjaká mé kui va kjuích'éna va kaké va chrík'á tí chaon tí nta.

Ch'ín Jesús kjuíncheyóexin éxi tí xroan t'ánkixin niotja
(Mt. 13.33)

²⁰ Ntá ntáchro ch'ín Jesús ínaá kixin:

—¿Nkehe chrokjuintayóaxian tí t'etóan Dios tí kjuachaxin kuènte ch'án? ²¹ Éxi yóhe tí xroan nchek'ánkí niotja kjuinkíkjanxin ijnko chojni chjin iní medida harina. A ntá tí ch'o la k'uánkí.

Tí puerta tekahya
(Mt. 7.13-14, 21-23)

²² K'uátsinka ch'ín Jesús kaín chjasin hyé la ko kaín chjasin ntsíntí nkákjako ch'án tí tan jína kixin jehe ch'án ó sátsji ch'án chjasin Jerusalén.

²³ A ntá ijnko nkexro kjuanchankí ch'án kixin:

—Ìnchéni, ¿á tsjéhya tí sín tsaá? —ichro ch'án.

A ntá jehe ch'án kjuátehe ch'án ntáchro ch'án kixin:

²⁴ —Tóxakonhanrá t'ixeenxínrá tí puerta tekahya kixin nchónhya sín tjinkaon sín chrók'uixenhen sín, kjánchó tjachahya sín. ²⁵ A ntá tí ìnché nchia ts'ikjéhe ch'án tí puerta. A ntá chr'éxin jahará ts'ejorá ntója ts'èyará ts'inkará tí puerta tsontáchrórá kixin: “Tadá, takítjehé nchia”, tsixrorá. Kjánchó jehe ch'án tsjatehe ch'án tsontáchro ch'án kixin: “Nonahya nketí k'uinkaxínrá jahará”, tsixro ch'án. ²⁶ A ntá tsjankixinrá tsontáchrórá kixin: “Kjóneni la ko k'uúni jnkokoá la ko jaha kjuákoxian tí ntajjinni”, tsixrorá.

²⁷ A ntá jehe ch'án tsjatehe ch'án tsontáchro ch'án kixin: “Ó ntáxrjan janhan kixin chonhya tí jahará. Tjìtòhérá tí janhan sájtjirá ókjé kaín tí jahará jínahya kjuích'erá.” ²⁸ Ntaha tsotsjankará la ko sintetaónrá nénorá tió ts'ikonrá kixin ch'ín Abraham la ko ch'ín Isaac la ko ch'ín Jacob la ko kaín tí sín k'uéchronkaxín itén Dios mé tjejó sín tí tjen Dios t'etóan ch'án, a ntá jahará la ts'axrjéxinrá ntója ntiha. ²⁹ Tsijxin chojni nó tjìtóxin yaon la ko nó tjíátóxin yaon la ko nó norte la ko nó sur ntá ts'ejótjixin sín tí tjen Dios t'etóan ch'án la sine sín. ³⁰ A ntá iso tí sín k'uítuenhen senó la mé ts'etóan sín, la ko iso tí sín k'uék'etóan senó la mé ts'ítuenhen sín.

T'ává ch'ín Jesús

(Mt. 23.37-39)

³¹ **A** ntá tí yaon a ikui iso sín fariseo ntáche sín tí ch'ín Jesús kixin:

—Sátjixian ntihi kixin ch'ín Herodes tjinkaon chrók'oyán ch'án tí jaha —ichro sín.

³² **A** ntá jehe ch'án kjuátēhe ch'án ntáchro ch'án kixin:

—Sátjirá chenkará tí ch'ín jínahya ch'ia kixin: “Tjie la ko ntóye tsakítsje nchakuen tí jínahya la ko sintakítóhə chojni níhi jína la ntá tí nixin yaon a ntá tsjixinna tí xra kuéntana,” tsixrorá. ³³ Kjánchó t'ichjánxin kixin naxa sátjiya tí jie yaon la ko ntóye la ko tí yaon chr'éxin kixin t'ichjánxin kixin ijnko nkexro chrónka itén Dios chrók'uenxin ch'án chjasin Jerusalén.

³⁴ Jerusalén, Jerusalén. Jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuínkitsará. Imá itsjé veces tjínkavan chrókójnkotsérá la chrók'uáyakonhanrá éxi ijnko cochiká mé t'ayakonhen xjeen va chrínki kanēnee va mé xikaha tjínkavan chrók'uáyakonhanrá tí jahará. Kjánchó jahará la tjínkakonhyará xikaha. ³⁵ Chrókónohará kixin Dios la tsítóhe ch'án tí jahará la ts'ikonhyará tí janhan tsjixrakájia tí yaon tsontáchrórá kixin: “Jína tí nkexro kjuixin kjuachaxin ihnjé Inchéni Dios.”

14

Ch'ín Jesús kjuínchekitōhe jína ijnko nkexro tsík'atjoyé kuenté

¹ **A** ntá tí yaon t'ok'éhe sín sákjuí ch'ín Jesús ntōe ijnko ch'ín fariseo t'etōan kixin ntaha sineko sín ch'án. **A** ntá tí í so sín fariseo tinkáchréhe sín tsotsjehe sín nkehe sich'e ch'án. ² **A** ntá ntiha ntoí chók'èxin tí tjen ch'án itjen ijnko chojni tsík'atjoyé kuenté. ³ **A** ntá ch'ín Jesús kjuanchankíhi ch'án tí sín maestro tjako tí ley la ko tí sín fariseo kixin:

—¿**A** sín kjuachaxin sinchekitōheni jína ijnko chojni níhi tí yaon t'ok'éheni o náhi? —ichro ch'án.

⁴ **A** ntá jehe sín la tání sín. **A** ntá ch'ín Jesús sákjuíko ch'án tí ch'ín níhi la kjuínchekitōhe ch'án jína la k'uetuēhen ch'án kixin sátsji ch'án. ⁵ **A** ntá ntáche ch'án tí sín fariseo kixin:

—Jnkojín tí jahará chontará kolóchoará o koxintaará chrókjuítsínkáya va tōye ¿á senóhya chrókuakítsjetaónrá va tōye kjónté yaon t'ok'éheni ní? —ichro ch'án.

⁶ **A** ntá jehe sín ninkehó kjuátēehya sín kixin xikaha ichro ch'án.

Tí sín tsík'iyēhe sín sátsji sín kia tsíkótehe chojni

⁷ Ntá k'uíkon ch'ín Jesús kixin tí sín tsíkóchjina tí kia a kjueyá sín silla náxrxjón ts'ejóya sín tí tjen mesa ntá kjuíncheyóexin ch'án ntáchro ch'án kixin:

⁸ —Tió jnkojín nkexro ts'iyaha sín kixin tsjasán ijnko kia tsotēhe chojni la tjéyáhya tí nta silla kuénte tí sín t'etōan kixin ách'e tsi jnkojín nkexro antsí t'etōan ⁹ **a** ntá tí nkexro k'uíyahará yóirá itsi ch'án tsjanchahará ch'án kixin t'inkátjenxian tí tjen jaha méhe kixin ntaha tsjak'e í jnko nkexro, tsixro ch'án. Ntá tsosuaħa sátsjia tsjak'etjāxian tí silla kjuixixín.

¹⁰ Íchá jína tió t'iyaha sín chrókjuak'etjāxian tí silla tjetuanhya, kixin ntá chrókui tí ch'ín tsík'iyaha tsontáchró ch'án kixin: “Jína tjoni la t'atsínka tjak'etjāxian tí silla antsí náxrxjón”, kixin ntaha tsjikosáyaha sín nkayakon káin tí sín ts'ejótjāxínkoa sín ntiha. ¹¹ Kixin tí nkexro sinchehnkehe asén kixin imá chrók'uetōan ch'án la mé chr'éxin Dios tsjanjonhya kjuachaxin

kixin ts'etqan ch'án. A ntá tí nkexro k'uék'etqanhya la mé chr'éxin Dios tsjanjon kjuachaxin kixin antsí ts'etqan ch'án.

¹² Kjaxin ntáche ch'án tí nkexro tsík'iyehé ch'án kixin:

—Tió tsjásian kia it'ò yaon la o tsonjin la t'iyéehya tí sín choxian la ko tí sín kichuá la ko tí sín naxa kjéhya la ko tí sín rico chjino ntqa, kixin jehe sín la chr'éxin ts'iyaha sín inaá la xikahó la o kjuixin kjan tí k'uiyehé sín. ¹³ Íchá jína chrók'uiyehé tí sín nòla la ko tí sín tsixénká toté sín la ko tí sín xitjahya tji la ko tí sín t'ikonhya. ¹⁴ Ntá chrókóchaha jaha kixin jehe sín xitjahya ts'iyaha sín tsjasin sín kia. A ntá tió tsoxechónjian tí sín jína la mé Dios mé tsjenkaha kixin kjuínkítsa tí jehe sín.

Ch'ín Jesús kjuíncheyóexin ch'án éxi ijnko kia jié

¹⁵ A ntá kuínhin ijnko tí sín tjejótjaxin sín chjino tí mesa, a ntá ntáche ch'án tí ch'ín Jesús kixin:

—Náxrjón tí sín sine niotja tí tjen Dios t'etqan ch'án —ichro ch'án.

¹⁶ Ntá ntácho ch'ín Jesús kixin:

—Ijnko chojni kjuasin ijnko kia jié ijnko kónjin la k'uiyehé ch'án nchónhya chojni tsi sín tí kia a. ¹⁷ A ntá ó kuichjina tí hora sine sín ntá k'uetuénhen ch'án ijnko chojni ch'ehe ch'án xra tsjichenka ch'án kaín tí sín ó tsík'iyehé ch'án kixin chrókóchjina sín kixin ó tjejóchónhen kaín nkehe sine sín. ¹⁸ Ntá kaín sín kjuankixin sín chrónòla sín kixin xitjahya tsjiji sín sine sín. A ntá tí ch'ín saxín kjuítsjehe ch'án ntácho ch'án kixin: “Na ntá k'uénani ijnko nonteeni la t'ichjánxin tsjitsjeheni la xitjahya tsjjini tí t'iyeheni ch'án, ntá chénka ch'án kixin chrókóninkakuenhyani ch'án”, ichro ch'án. ¹⁹ A ntá í jnko ch'ín ntácho ch'án kixin: “Na ntá k'uénani in'ó yunta koxinta, a ntá t'ichjánxin tsotsjeheni á jína ch'e va xra, ntá chénka ch'án kixin chrókóninkakuenhyani ch'án”, ichro ch'án. ²⁰ A ntá í jnko ch'ín ntácho kixin: “Na ntá kóteheni, méxra xitjahya tsjjini”, ichro ch'án. ²¹ Ntá ó kjan tí ch'ín ch'e xra chénka ch'án tí ch'ín lámo kaín tí nkehe tsintácho sín. A ntá tí ch'ín lámo kuínhin ch'án xikaha la ntá kónínkaon ch'án ntá ntáche ch'án tí ch'ín ch'ehe ch'án xra kixin: “Tjoka sátja kaín ntja chjasin i la tsjioa ntihi tí sín nòla la ko tí sín tsixénká toté sín la ko tí sín xitjahya tji la ko tí sín t'ikonhya”, ichro ch'án. ²² A ntá chr'éxin ntá kjan tí ch'ín ch'e xra chénka ch'án tí lámo kixin: “Ó kjuínchexiteyáni xikaha kuétuénhéni la kjónté naxa xranka chrókui chojni”, ichro ch'án. ²³ A ntá tí ch'ín lámo ntáche ch'án tí ch'ín ch'ehe ch'án xra kixin: “Sátja kaín ntja jié la ko kaín ntja ntsí la tétuénhén chojni siín chrókui sín chrók'uiixixenhen nchia ntqona naxa xranka. ²⁴ Kixin ntáxrjan kixin nijnko tí sín k'uiyaha senó chrókui sín chrókjone sín tí nkehe chrótjaha sín”, ichro ch'án.

Ixra tsochréheni Cristo

²⁵ Nchónhya chojni nkáchréhe sín tí ch'ín Jesús, ntá jehe ch'án kuinkátjá ch'án kotónhen ch'án ton ch'án ntácho ch'án kixin:

²⁶ —A ntá jnkójín chojni tsojtjinkaon tsochréhe tí janhan la antsí má tjetqan chrótjuana sín la kjónté kénhyó chrótjuèhe it'é sín la ko ìné sín la ko ichjién sín la ko xjeen sín la ko kichó sín ntoa la ko kichó sín chjin la ko kjónté kénhyó chrótjuèhe asén sín. A ntá náhi la xitjahya ts'óna discípulo kuéntana jehe sín. ²⁷ Tí nkexro tsamáhya tí ntacruz kuente sín tsochréhya sín tí janhan la xitjahya ts'óna discípulo kuéntana. ²⁸ A ntá jnkójín tí jahará chrókjuich'énará ijnko tjat'ò nteto, zá senóhya chrókjuenkayáxinrá kixin nkekjaín chichaon ts'ichjánxin ts'ixenhen chrótsjehérá á nchoxon

chrókjuixixín chrók'ónaxín tí t̄jat'o a? ²⁹ A ntá tió tsjankíxinrá s̄ich'énará tí t̄jat'o ntá chr'éxin xitjahya tsjixin s̄ich'énará, ntá kaín chojni ts'ikon sín tsjanoará sín ³⁰ tsontáchro sín k̄ixin jaha kjuankíxian kjuich'éna, a ntá jie xitjahya s̄inchekjixian ts'óna, tsixro sín. ³¹ A ntá jnkójín tí ch'ín rey t'et̄oan tsjanj̄onko í jnko rey t'et̄oan k̄jaxin násenó chrókjuenkayáxin ch'án k̄ixin ite mil soldado chón̄ta ch'án, á chrókjuacha ch'án chrókjuachaxin ch'án tí kán mil soldado chón̄ta tí í jnko ch'ín t'et̄oan. ³² A ntá ti chrókjuachahya ch'án chrókjuanj̄onko ch'án tí í jnko ch'ín rey, ntá naxa ikjín t̄jen ch'án la íchá jina chróchr'án ch'án ijnko nkexro tsochronóeh̄e ch'án k̄ixin chrók'uitjini n̄t̄oja. Tí nkexro t̄jinkaon chrókuinhin la chrókuinhin kaín tíhi —ichro ch'ín Jesús.

Tí x̄jnta tsík'ánkéhé tí jni
(Mt. 5.13; Mr. 9.50)

³⁴ A ntá jina tí x̄jnta, k̄jánchó tí chrók'uánkéhé tí jni la ntá xitjahya chrókójni inaá. ³⁵ Ntá tí x̄ikaha la ni tí nche xitjahya tsjiko la chrók'ónahya nkehe la chrók'uitjini n̄t̄oja. Tí nkexro t̄jinkaon chrókuinhin la chrókuinhin kaín tíhi —ichro ch'ín Jesús.

15

Kjuíncheyóexin ch'ín Jesús éxí ijnko kolélo tsik'itjáyán
(Mt. 18.10-14)

¹ Kaín tí sín nchekj̄enk̄i la ko tí sín chón̄ta nchón̄hya jie kóchjinehe sín tí ch'ín Jesús k̄ixin t̄jinkaon sín chrókuinhin sín tí nkehe t̄jechronka ch'án. ² A ntá tí sín fariseo la ko tí sín maestro tjako tí ley kjuankíxin sín tjonta sín ch'án ntáchro sín k̄ixin:

—Tí ch'ín i la k̄jonté tí sín chón̄ta nchón̄hya jie la t'ito ch'án la ko neko ch'án —ichro sín.

³ Ntá ch'ín Jesús kjuíncheyóexin ch'án ntáchro ch'án k̄ixin:

⁴ —A ntá jnkójín tí jahará, tí chontará ijnko ciento kolélo ntá chrók'uitjáyán ijnko va, ¿á chrókuit̄oéhyará tí noventa y nueve va tí nteje ó, a ntá á chrókjuik̄jéyáhyará tí ko tsík'itjáyán hasta chrók'uitjájíará va ní?

⁵ A ntá tí ts'itjárá va ntá tsamárá va tsocháhará. ⁶ Ntá tió tsokjanrá n̄t̄oará ntá ts'iyehérá kaín tí sín choxinrá t̄jórá jina la ko tí sín chjinaxón n̄t̄oará ntá tsontácherá sín k̄ixin: “Tsochéh̄eni ts'ejóni jie k̄ixin ó k'uitjá tí kolélo tsík'itjáyán.” ⁷ Na mé k̄jaxin x̄ikaha tsot̄jonkará k̄ixin antsí tsochéh̄e kaín tí sín s̄in nkaya nkajni tió ijnko chojni tsit̄ohe kaín tí jie tsíkjenkayáxin ch'án. Ntá kánhyó tsochéh̄in tí sín nkaya nkajni k̄ixin tí noventa y nueve chojni jina t'ichj̄ánxienhya chrókjuinkí sín tí nkehe t̄jenkayáxin sín.

Kjuíncheyóexin ch'án éxí chichaon k'uitjáyán

⁸ A ntá ijnko chojni chjin chón̄ta ite chichaon, a ntá tí chrókjuinck'itjáyán tjan ijnko tí chichaon a la, ¿á chrókjuinck'ákjenhya tjan xrohi k̄ixin chrókjueyáxin tjan la ko chrok'uánjón tjan tí nchia k̄ixin chrótsjehe tjan jina hasta chrók'uitjajia tjan? ⁹ A ntá tió chrók'uitja tjan la ts'iyeh̄e tjan kaín tí chojni chjin jina tjo tjan la ko tí sín chjinaxón n̄t̄oé tjan la ntá tsontáche tjan sín k̄ixin: “Tsochéh̄eni ts'ejóni k̄ixin ó k'uitjani tí chichaon kjuínck'itjáyanni.” ¹⁰ Ntá k̄jaxin x̄ikaha tsot̄jonkará k̄ixin imá tsochéh̄e kaín tí sín ángel kuénte Dios tió ijnko chojni tsit̄ohe kaín tí jie tsíkjenkayáxin ch'án.

Ch'ín Jesús kjuíncheyóexin ch'án éxi ijnko ch'ín kuicháxinhin chichaon

¹¹ Kjaxin ntáchro ch'ín Jesús kixin:

—Ijnko nkexro chóna yaá xjeen ch'án. ¹² A ntá tí ch'ín tsoyo ntáche ch'án tí it'é ch'án kixin: “It'éni, chjehéni kaín nkehe chróchjehéni.” A ntá tí it'é sín k'óchrít'ohé ch'án tí nkehe chóna ch'án. A ntá tí ch'ín tsoyo k'uáyéhe tí nkehe kuénte ch'án. ¹³ A ntá kánhyó tsjé yaon chr'éxin tí xjeen ch'án tsoyo kjuínchekji ch'án kaín nkehe tsík'áyéhe ch'án, ntá sákjuíko ch'án tí chichaon sákjuí ch'án ókjé chjasin kjín. A ntá ntiha kjuínchexénhen ch'án kaín chichaon chóna ch'án kixin jehya tí jína kjuích'e ch'án. ¹⁴ A ntá tió kjuixin kjuèhe ch'án tí chichaon kuicháxinhin ch'án ntá xrínahya kókjinta tí chjasin ntiha ntá kohya nkehe sine kaín sín. A ntá jehe ch'án kjuankixin ch'án t'énxín ch'án kjinta. ¹⁵ Ntá jehe ch'án sákjuíkjayá ch'án xrá sich'e ch'án. Ntá chjasin ntaha tjen ijnko ch'ín kjuanchehe ch'án xrá. Ntá tí ch'ín a kjuanjon ch'án xrá ntá k'uętoan ch'án kixin sátsji ch'án nontęe ch'án kixin ntiha ts'ayakonhen ch'án cochíno. ¹⁶ A ntá jehe ch'án t'énxín ch'án kjinta ntá tjinkaon ch'án chrókjóné ch'án tí nkehe ine tí cochíno kixin ninkexró tí ntiha chrohya tsjanjon nkehe sine ch'án. ¹⁷ Ntá jehe ch'án kjuák'e ch'án kjuenkayáxin ch'án kixin: “Nchónhya chojni síin ntęe t'aná ch'e sín xrá la chóna sín nkehe sine sín. Ntá janhan tjet'énxian kjinta ntihi. ¹⁸ Ntá jie tsokjan tí tjen t'aná la ntá tsontáxrjan kixin: It'éni, kjuasinni jie kuítekakuenhya It'éni nkaya nkajní la ko kjuasinhanni jie kuítekakuanhyani tí jaha. ¹⁹ Tósuèheni tsontáchrúa kixin xjaan tí jeheni. Ch'énani éxi ijnko chojni t'aha xrá”, mé xikaha kjuenkayáxin ch'án tsontáchró ch'án. ²⁰ Ntá kuákja ch'án ntja xrakoa ch'án tí ntęe it'é ch'án.

A ntá kjonté naxá kjín kui ch'án a ntá tí it'é ch'án la ó tsík'ikon ntá kuikonóhe ch'án tí xjeen ch'án. Ntá kuinká ch'án la kjuíxinhin ch'án ntja la kjóa ch'án la ko kjóneko ch'án kochíto. ²¹ Na ntá ntáchro tí xjeen kixin: “It'éni kjuasinni jie kuítekakuenhyani Dios la ko kjuasinhanni jie kuítekakuanhyani tí jaha. Tósuèheni tsontáchrúa kixin xjaan tí jeheni”, ichro ch'án. ²² A ntá tí it'é ch'án k'uíyehę ch'án tí sín ch'ehe ch'án xrá ntáchro ch'án kixin: “Xrákoará tí ka antsí jína nchek'inkáyará ch'án la ko chr'axenhenrá dedo tja ch'án ijnko koch'aninko la ko nchekjankará ch'án tojtjoa. ²³ La ko tjičakjínrá koxintáxjan tsanká la t'oyánrá va kixin sinekoní ch'án tsjasinhinni ch'án kia. ²⁴ Kixin tí xjanna i la éxi ó tsík'en ch'án xikaha ntá jie la éxi ó xechón ch'án la tsík'itjáyán ch'án la ntá jie la ó kónoxín ch'án inaá”, ichro ch'án. Ntá kjuankixin sín kjuasin sín kia.

²⁵ A ntá tí xjeen ch'án saó la nonte tjech'e ch'án xrá. A ntá tió kjan ch'án kui ch'án chjinaxón nchia ntá kuínhin ch'án síin són la ko ité sín. ²⁶ Ntá k'uíyehę ch'án ijnko ch'ín ch'e xrá ntá kjuanchankíhi ch'án kixin nkekuénte xikaha sitónhen. ²⁷ A ntá tí ch'ín a ntáchro ch'án kixin: “Kíchuá la ó tsíkjan. A ntá it'á la k'uętoan k'uén koxintáxjan tsanká kixin jína xíkjan ch'án”, ichro ch'án. ²⁸ A ntá tí ch'ín saó la kónínkaon ch'án chrohya ch'án ts'ixenhen ch'án nchia. A ntá tí it'é ch'án k'uaxrjexín nchia chronóhe ch'án kixin chrók'uixenhen nchia. ²⁹ Kjánchó jehe ch'án kjuátęhe ch'án ntáche ch'án it'é ch'án kixin: “Nchónhya nánó t'ahani xrá, la xráxin kuítekakonhanni kaín nkehe kuętoan la kjuánjonhya nijnko kotęntso chrókjónekoni tí sín chóxinni. ³⁰ A ntá jie ikui tí xjaan i kjuínchek'itjáyán ch'án kaín nkehe chjehé ch'án kjuínchek'itjáyánxin ch'án chojni chjín. A ntá jie ikjan ch'án la naxá t'oyán koxintáxjan tsanká”, ichro ch'án. ³¹ A

ntá ntáchro tí it'é ch'án kixin: “Xjeenni jaha, xráxín tjejóko kichó ni ntihi. Kaínxín nkehe kuéntana la kuénta jaha kjaxin. ¿Nkekuénte ninkávan? ³² A ntá jie la t'ichjánxin tsjasinhinni kichuá kia tsochéheni kixin éxi tsík'en ch'án la ntá jie la ó tsíxechón, la tsík'itjáyán ch'án xikaha la ntá jie la kónoxín ch'án inaá.”

16

Ch'in Jesús kjuíncheyóexin ch'án éxi tí ch'in k'uáyéhe xra la ntá kjuích'ehya xra jina

¹ Kjaxin ntáche ch'in Jesús tí sín k'uájiko ch'án kixin:

—Kjuák'e ijnko ch'in lámó ricó chóna ch'án ijnko nkexro chjéhe ch'án kjuachaxin kixin ts'etóan tsonhen xra. Ntá kui ijnko nkexro chénka tí lámó kixin: “Tí nkexro t'etóan nchexénhen ch'án tí nkehe chóna”, ichro ch'án. ² A ntá tí ch'in lámó k'uíyéhe ch'án tí ch'in ch'ehe ch'án xra ntáche ch'án kixin: “¿Á chaxín xikaha ch'e kixin xikaha ichro sín? A ntá jie tsjánjuan jaha kuénta tí xra kjuích'e kixin ijie í sich'ehya xra tsétoan ntihi”, ichro ch'án. ³ A ntá tí ch'in t'etóan tónhen xra kjuenkayáxin ch'án kixin: “¿Nkehe chrókuít'a jie kixin tí lámó la í tsjanjonhya ch'án xra sít'a? La ko janhan la chontahya fuérza sít'a xra nontee chojni la ko tósuàna kixin chrók'uájia chrókuánchák'á nkehe. ⁴ Ó nòna nkehe sít'a kixin ntá tsochonta nkexro tsjanjon kjuachaxin tsjak'é ntóe sín tí í tsochontahya xra sít'a”, ichro tí ch'in t'etóan. ⁵ Ntá k'uíyéhe ch'án jnkojnko jnkojnko tí sín síkéhe tí lámóe ch'án. A ntá tí ch'in sao kui ntá tí ch'in t'etóan mé kjuanchankíhi ch'án kixin: “¿Nkekjaín tjasikéhe lámóeni?” ichro ch'án. ⁶ A ntá jehe ch'án kjuátehe ch'án ntáchro ch'án kixin: “Síkani ijnko ciento ntabarril aceite”, ichro ch'án. A ntá tí ch'in t'etóan ntáchro ch'án kixin: “Ntihi tjen xroon tsjénkaxian a. Tjak'e nonte tjoka la ch'éna í jnko xroon la í cincuenta ó ténixián”, ichro ch'án. ⁷ Ntá chr'éxin la kjuanchankíhi ch'án í jnko nkexro kixin: “A ntá jaha, ¿nkekjaín tjasiká?” ichro ch'án. Ntá ntáchro ch'án kixin: “Ijnko ciento medida noatrigó síkani”, ichro ch'án. A ntá ntáchro tí ch'in t'etóan kixin: “Tí xikaha la ntihi tjen tí xroon tsjénkaxian. A ntá jie la ch'éna ochenta ó”, ichro ch'án. ⁸ A ntá tí ch'in lámó kjuátsoan ch'án kixin kjónté jehya xra jina kjuích'e tí ch'in t'etóan kjuích'ehe ch'án xra la kjánchó tí kjuích'ia ch'án la antsí nohe ch'án kjuích'ia ch'án. Méxra tí sín chjasintajni antsí nohe sín ch'iyéhe kichó sín, a ntá tí sín ixrí tí t'inkaséyan la xikahya chrókjuenkayáxin sín chrókjuích'ia sín, chrókjuenkayáxin sín tí jina.

⁹ Janhan la tétuanhanrá kixin chrókuicháxinhanrá tí chichaon síin chjasintajni kjónté tjuáhya kixin tsjínkít'sará chojni kixin ntá itsjórá sín jina. A ntá tió tsjeje kaín chichaon ntá jehe sín ts'ejóchónhen sín nkaya nkajní ts'áyáhará sín jnkochríxin.

¹⁰ Tí nkexro k'uáyakonhen tí nkehe chóna kjónté tsjéhya la kjaxin chrókjuacha chrók'uáyakonhen itsjé nkehe chróchóna. A ntá tí nkexro kjuachahya k'uáyakonhen tí nkehe tsjéhya chóna la kjaxin chrókjuachahya chrók'uáyakonhen tí tsjé nkehe chróchóna ch'án. ¹¹ Mé xikaha tí xit-jahya t'ayakonhénra tí chichaon kuénte chjasintajni ntiho la, ¿ntá nkexrí chrók'uáyéhéra nkehe tjete chaxin kuénte nkaya nkajní? ¹² Mé xikaha tí kjuachahyará k'uáyakonhénra tí chichaon kuénte ókjé nkexro, ¿ntá nkexro chrójtáhará jahará tí nkehe chaxín tjete chrók'uáyakonhénra?

13 'Nijnko nkekro xitjahya sich'ehe yaá lamó xra kixin ijnko la tsonínkakonhen ch'án la ko tí í jnko tsotjuèhe ch'án, o ijnko la tsitekakonhen ch'án, la tí í jnko la tsitekakuenhya ch'án. Xitjahya chrókjuich'ehe chojni xra Dios tí tjinkaon sín tsochónta sín itsjé chichaon —ichro ch'án.

14 A ntá tí sín fariseo imá kóxrjnhjn sín chichaon, ntá kuínhin sín kaín tíha nkerí ichro ch'ín Jesús, ntá kjuanoá sín ch'án. 15 Na ntá ch'ín Jesús ntáche ch'án sín kixin:

—A ntá jahará tjinkáonrá chrók'uejójnra jína nkayakon chojni. A ntá Dios la chóxin ch'án asánra. A ntá tí nkehe imá tóxrjnhjn ch'e chojni la Dios la tóxrjnhya ch'án.

Tí ley la ko tí t'etoan Dios tí kjuachaxin kuènte ch'án

16 'Naxa kjuakohya ch'ín Juan la k'uékjako sín tí ley kuènte ch'ín Moisés la ko tí nkehe k'uékjin tí sín k'uéchronka itén Dios ósé. A ntá kui ch'ín Juan la chrónka ch'án tí tan jína nkexrí ts'etoan Dios tí kjuachaxin kuènte ch'án ntá kaín chojni imá tjinkaon sín chrókjuacha sín chrók'uejó sín tí tjen Dios t'etoan ch'án.

17 'Antsí xrahya chrók'uitjáyán tí nkehe siín nkajní la ko chjasintajni. A ntá xitjahya kixin chróxiteyáhya kjónté ijnko nkehe ntsí t'etoan tí ley.

Ch'ín Jesús tjako ch'án kixin chrókjuákehya kichó chojni

(Mt. 19.1-12; Mr. 10.1-12)

18 A ntá ijnko chojni tsjakehe ichjién la ntá tsakja ch'án í jnko chojni chjin la ijje tíha. A ntá tí ch'ín tsakja ijnko tjan tsíkítsinkehe la kjaxin ijje tíha.

Tí ch'ín rico la ko tí ch'ín Lázaro

19 'Ntá kjuák'e ijnko ch'án imá rico ch'án la ko k'uítsá ch'án ka imá tjetje náxrjón kjátse tié la ko kaín yaon kjuasin ch'án kia. 20 A ntá ntója ntøe ch'án kjuák'etjaxin ijnko ch'ín nòà mé it'in ch'án Lázaro tjanchak'á ch'án la ko níhi ch'án tsich'enka kuenté ntøe ch'án. 21 A ntá tí ch'ín nòà la imá kjuak'e asén ch'án chrókjóne ch'án la ko chrókókjeexín ch'án tí nkehe tot'ø tsjixènjinkixin mesa kuènte tí ch'ín rico. A ntá tí konja la kjuamá va tí tósóa chónta ch'án. 22 A ntá ijnko yaon mé ik'uén tí ch'ín nòà. A ntá tí sín ángel mé sákjuiko ch'án tí náxrjón tjen ch'ín Abraham. La ko kjaxin ik'uén tí ch'ín k'uéríko la sákjuikjavá sín ch'án. 23 Ntá tjen ch'án tí sátsji tí sín tsík'en tjetjasóte ch'án. Ntá konta ch'án k'uíkon ch'án kixin ikjín náxrjón tjen ch'ín Abraham tjeko ch'án tí ch'ín Lázaro. 24 Ntá k'uèya tí ch'ín k'uéchónta tsjé nkehe ntáchro ch'án kixin: “It'èni Abraham, tikonóana tétuènhén tí ch'ín Lázaro kixin sinchekjataxín ch'án kóhe dedo tja ch'án inta ntá tsi ch'án tsjak'etak'á ch'án nejen kixin tsoxruehe kixin tjinhya sóa tí xrohi siín ntihi”, ichro ch'án. 25 Kjánchó ntáchro ch'ín Abraham kixin: “Xjeenni, xráxinkávan kixin tió kjuák'e chjasintajni na ó k'uayéhé itsjé nkehe náxrjón. A ntá ch'ín Lázaro mé k'uáyéhe ch'án nkehe náxrjónhya. A ntá jie ntihi kjuaxróxin tjen ch'án, a ntá jaha tjetjasótia méhe. 26 A ntá kjaxin jnkosiné tjen tsaka imá jié xitjahya ts'átøye tí sín siín ntihi tsjihya sín tí tjen jaha la ko kjaxin tí sín siín méhe xitjahya ts'átøye sín itsji sín ntihi”, mé ichro ch'ín Abraham. 27 A ntá tí ch'ín k'uéríko mé ntáchro ch'án kixin: “Ntá xrjanóaha jaha It'èni Abraham kixin tétuènhén tí ch'ín Lázaro sátsji ch'án ntøe t'aná 28 kixin ntaha kuítohe in'ó tí sín kichiná, ntá chróchenka ch'án sín kixin chrókuihya sín ntihi chrókjuasótehya sín kixin imá náxrjónhya ntihi”, mé ichro ch'án. 29 Kjánchó

kjuátēhe ch'ín Abraham ntáchro ch'án kixin: “Ó chóna sín tí nkehe tsikjin ch'ín Moisés la ko tí sín k'uéchronka itén Dios ósé a. Chrókuinhin sín tí nkehe tsintáchro tí sín a”, ichro ch'án. ³⁰ Ntá ntáchro tí ch'ín a inaá kixin: “Náhí, It'éni Abraham. Chrókójina sáchrókjuitsjehe ijnko chojni tsík'en ntá chrókuitekaon sín chrókuítóhe sín ijíé sín”, ichro ch'án. ³¹ Ntá ntáchro ch'ín Abraham kixin: “Tí tsitekakonhya sín tí nkehe tsintáchro ch'ín Moisés la ko tí nkehe tsintáchro tí í so sín tsíchronka itén Dios ósé, ntá kjaxin tsitekakonhya sín kjónté chróxechón ijnko chojni tsík'en chrókjuichronka inaá”, ichro ch'án.

17

Tí kjuaxikaon naxa tjasin chojni jie
(Mt. 18.6-7, 21-22; Mr. 9.42)

¹ Ch'ín Jesús ntáche ch'án tí sín k'uájiko ch'án kixin:

—Xrácín síin nkehe tsjasixín chojni jie. Kjánchó nòa tí nkexro tjasin tí nkehe tsjasixín chojni jie. ² Íchá jína chrókjuincheteyá sín ch'án ijnko xro tsík'óna xrochre chrókjuikákánkí sín ntayaon kixin tjasin ch'án tí nkehe tjasixín jie ijnko chánjan naxa noehya. ³ Tóxakonhanrá kixin xikahya chrókjuásinrá nkehe.

Á ntá tí kichuára chrókjuasinhanrá ch'án ichrén jie chrónixjehérá ch'án chróchenkará ch'án kixin jehya jína tí xikaha kjuít'ahará ch'án. Á ntá tí chrókuitekaon ch'án chrókjuitoxinhin ch'án tí tjenkayáxin ch'án, ntá chrók'uitjáyanhanrá tí nkehe kjuít'ahará ch'án. ⁴ Kjónté chrókjuasinhanrá ch'án jie yato veces jnkokoá yaon la ko yato veces chróntáchro ch'án kixin í xikahya tsjasin ch'án jie inaá, la t'ichjánxin ts'itjáyanhanrá tí nkehe kjuít'ahará ch'án tí xikaha ntáchro ch'án.

Tí kjuachaxin chóntani kixin tinkáchónkini Cristo

⁵ Ijnko yaon tí sín k'uájiko Ìnchéni ntáche sín ch'án kixin:

—Tjínkítsani kixin antsí chrókuinkáchónkini tí jaha —ichro sín.

⁶ Á ntá Ìnchéni ntáchro ch'án kixin:

—Kjónté intsí chrókuinkáchónkirá tí janhan éxí jíéxin ijnko tje ntsí kuènte nta mostaza la jína chrókuétuènhénrá tí nta sicómoro kixin chrók'uaxrjenkixin tí tjen ntihi sáchrókjuí chróxenkaxín jnkosiné ntayaon ntiha, a ntá tí nta la chrókjuinchexiteyá tí xikaha chróntáchrorá.

Nkexrí chrókjuinchexiteyá tí nkexro ch'e xra

⁷ Jnkójín tí jahará tí chróchontará ijnko nkexro t'ahará xra, a ntá tí chrókjanxin ch'án nontaará kjuínchenta ch'án nche o k'uàyakonhen ch'án tí ko kuèntará, ¿á chróntácherá ch'án kixin senó chrókjuak'e ch'án chrókjóné ch'án? ⁸ Kjá náhí. Kjá chrókuétuènhénrá ch'án kixin senó chrókjuinchexján ch'án tí nkehe sinte la ko chrókóyáxinhin ch'án kixin tsjanjon ch'án nkehe nachrohe chrókjonte la ko chrók'uíia. Á ntá tsjixin sinte la ntá tsjak'e ch'án sine ch'án la ko its'i ch'án. ⁹ ¿Á chrókjuanchehérá ch'án kjuasáya kixin kjuínchexiteyá ch'án tí nkehe kuétuènhénrá ch'án? Kjá náhí. ¹⁰ Mé kjaxin xikaha tí jahará tió chrókjuixin kain tí xra k'uètuəhanhá Dios chróntáchrohyará kixin jína kjuich'erá xra kixin ó jehó tí nkehe k'uítuanhanrá kjuínchexiteyará, tsixrorá.

Ch'ín Jesús kjuínchekitohe ch'án jína ite chojni chóna chinlepra

¹¹ Ntá sátsji ch'ín Jesús chjasin Jerusalén ntá k'uátsínka ch'án nó estado Samaria la ko estado Galilea. ¹² Ntá kjuíji ch'án ijnko chjasin ntsí ntá xeta ch'án ite chojni ntoá níhi chóna sín chinlepra. Kjánchó ikjín tjejóchónhen sín ¹³ ntá itsen k'uíyehé sín ch'án ntáchro sín kixin:

—Jesús, Maestro, tikonóhéni kaín ni —ichro sín.

¹⁴ Ntá k'uíkon ch'ín Jesús tí jehe sín ikjín tjejó sín ntáche ch'án sín kixin:

—Sátsjirá tjakohérá tí sín nchat'á kixin ó kuítóhará jína, ichrorá.

Nachrohe sákjuí sín tinkákitohe sín jína. ¹⁵ Ntá ijnko tí jehe sín tió kónohe ch'án kixin kuítóhe ch'án jína ntá kjan ch'án chjéhe ch'án kjuasáya Dios la itsen nixja ch'án. ¹⁶ Kjuák'exín toch'ín ch'án chrínkí toté ch'ín Jesús k'uísén ch'án xrákjanyani ch'án nonte kixin kjuanchia ch'án kjuasáya. A ntá tí ch'ín a mé tsíkijxin ch'án estado Samaria. ¹⁷ A ntá ch'ín Jesús ntáchro ch'án kixin:

—¿Xá jehya ite chojni kuítóhe jína? ¿Xá kjá tí sín ina? ¹⁸ ¿Á jehó tí ch'ín i kjónté ikjín tsíkijxin ch'án ikjan ch'án kjuanchehe ch'án kjuasáyé Dios ní? —ichro ch'án.

¹⁹ A ntá ntáche ch'án tí ch'ín a kixin:

—T'ínkatjen sáttja. Kixin tí kuitekávan Dios la kuítóha jína —ichro ch'án.

Itsi tí kjuachaxién Dios

(Mt. 24.23-28, 36-41)

²⁰ A ntá tí sín fariseo kjuanchankíhi sín tí ch'ín Jesús kixin nkesá tsi tí kjuachaxin kuénte Dios. A ntá jehe ch'án kjuátehe ch'án ntáchro ch'án kixin:

—A ntá tí tsi kjuachaxin kuénte Dios la me tíha ijnko nkehe xitjahya ts'ikon chojni. ²¹ Xitjahya tsontáchorá kixin: “Ntíhi tjen,” o “Ntíha tjen”; kixin tí kjuachaxin kuénte Dios itjen jnkosiné tí tjejorá —ichro ch'án.

²² Ntá ntáche ch'án tí sín k'uájiko ch'án kixin:

—A ntá itsi tí yaon tsotjinkáonrá jnkójín yaon chrók'uikonrá tí Xjeen Dios K'óna Chojni, ntá í ts'ikonhyará ch'án. ²³ Tsontáchro sín kixin ntihi tjen ch'án, o ntiha tjen ch'án. Kjánchó sáchrókjuihyará la ko chróchréhyará sín. ²⁴ Kixin éxi ts'ikonrá tsjonkixin ts'inkaséyanxín kuénté nkajní mé xikaha tsonhen tió itsi tí Xjeen Dios K'óna Chojni. ²⁵ T'ichjánxin senó tsjasóte ch'án nchónhya la ko tí sín siín jie tsitekakuenhya sín ch'án. ²⁶ Éxi kónhen tí yaon kjuák'e ch'ín Noé mé xikaha tsonhen tió tsokjan tí Xjeen Dios K'óna Chojni. ²⁷ K'uékjine sín la ko k'uék'i sín la ko kótehe tí xjeen sín. A ntá xrinahya kui tí yaon k'uixenhen ch'ín Noé tí ntabárcq ntá k'uániá chrin, a ntá tí sín kuítóhe ntója la kaín sín k'uitjáyan sín.* ²⁸ Mé kjaxin xikaha kónhen tí kjuák'e ch'ín Lot k'uékjine sín la ko k'uék'i sín la ko k'uék'ena sín nkehe la ko k'uékjinchekji sín nkehe la ko k'uék'enka sín nontee sín la ko k'uékjich'éna sín nchia. ²⁹ A ntá tí yaon k'uaxrjexín ch'ín Lot tí chjasin Sodoma, na mé nkajní kujxin xrohi la ko azufre, na mé tíha k'uénxín kaín xín tí sín ntiha.† ³⁰ Mé xikaha tsonhen tí yaon itsi tí Xjeen Dios K'óna Chojni.

³¹ A ntá tí yaon i tí tjejó jnkójín nkexro chrítaón nchia tjejót'ok'éhe sín, a ntá ichrén nkehe chóna sín kuítóhe sín nkaxenhen nchia la í chrók'uinkajinhya sín chrókuakitsje sín tí nkehe chóna sín, tjoka sáchrókjui sín ókjé. Kjaxin xikaha jnkójín chojni tjejó sín nontee sín la í chrókjanhya sín ntqe sín. ³² Xráxinkáonrá nkehe kónhen ichjién ch'ín Lot.‡ ³³ Tí nkexro

* 17:27 17.26–27 Génesis 6.5—7.24 † 17:29 17.28–29 Génesis 18.20—19.25 ‡ 17:32 Génesis 19.26

tjinkaon kixin kohya nkehe chrókónhen na mé ts'itjáyan. A ntá tí nkexro chrókjuinchek'itjáyanxín asén kixin chróchronka itén Dios la mé tsaá. ³⁴ A ntá tsontáxrjan kixin tí tie a jnkokoá ts'ejóhua yaá chojni la ijnko la sátsji la ko tí í jnko la tsitohe. ³⁵ Yaá chojni chjin its'o sín jnkokoá, la ijnko la sátsji la ko ijnko la tsitohe. ³⁶ Yaá chojni ts'ejóh'e sín xrá nonte, la ijnko la sátsji a ntá ijnko la tsitohe —ichro ch'án.

³⁷ Ntá kuínhin sín tíha ntá kjuanchankíhi sín ch'án kixin:

—¿Xá nketí tsonhen tíha, Ìnchéni? —ichro sín.

A ntá jehe ch'án kjuátēhe ch'án ntáchro ch'án kixin:

—Tí tjen tí cuerpo kuènte chojni tsík'en la mé ntiha tsojnkotsé tí kontexjuen —ichro ch'án.

18

Ch'ín Jesús kjuíncheyóexin ch'án éxi ijnko tjan k'án la ko ijnko ch'ín juez

¹ A ntá ch'ín Jesús kjuíncheyóexin ch'án kjuakoxin ch'án kixin jnkochrínin chrónixjehe chojni Dios la ko chrókóxrjéhya sín. ² Ntá ntáche ch'án sín kixin:

—Ijnko chjasin kjuák'e ijnko ch'ín juez kjuikosáyehya ch'án Dios la ko k'uéchóntehya ch'án kjuasáyé ninkexró. ³ Kjaxin chjasin ntiha kjuák'e ijnko tjan k'án, jnkoyaxón sákjuítsjehe tjan tí ch'ín juez kjuanchia tjan jie ntáchro tjan kixin chrókuitóexin kixin ijnko chojni nínkakonhen tjan ntiha. ⁴ Nchónhya veces tjitsjehe tjan tí ch'ín juez la chrohya ch'án chrókjuinchekitóexin ch'án. Ntá chr'éxin kjuenkayáxin ch'án ntáchro ch'án kixin: “Kjonté í tsjikosáyàhya Dios la ko ninkexró tsjikosáyàhya ⁵ a ntá tí tjan k'án jnkoyaxón tjanchia tjan jie, la tsjínkítsa tjan tsitóexin tí jie tjanchia tjan kixin í jnkoyaxónhya itsi tjan tsochronòa tjan kixin ó kjuixin kónínkavan jie”, ichro ch'án.

⁶ Ntá ntáchro Ìnchéni kixin:

—Mé xíkaha ichro tí ch'ín juez jínahya. ⁷ ¿Xá chrókjuinkítsahya Dios tí sín kjueyá ch'án tí chróchronóehē sín ch'án nchakotjin la ko tie? ¿Á tjokahya chrókjuatehe chrókjuinkítsa sín ch'án? ⁸ Ntáxrjan kixin kjá tjoka chrókjuinkítsa sín ch'án. A ntá tió itsi tí Xjeen Dios K'óna Chojni, ¿á naxá chrók'uitja ch'án chojni tinkáchónki tí jehe ch'án ntihi chjasintajni? —mé chro ch'án.

Ch'ín Jesús kjuíncheyóexin ch'án éxi ijnko ch'ín fariseo la ko ijnko ch'ín nchekjènkì

⁹ Ntá ch'ín Jesús kjuíncheyóexin ch'án nixjehe ch'án iso chojni tjenkayáxin sín kixin imá jina sín a ntá tí í so sín la náhi, ichro sín. Ntá ntáchro ch'án kixin:

¹⁰ —Iyó sín ntoa sákjuí nkaxenhen nínko kixin tsonixjehe sín Dios. Ijnko la fariseo la ko ijnko la ch'ín nchekjènkì. ¹¹ A ntá tí ch'ín fariseo tjexin ch'án toté ch'án nixjehe ch'án Dios ntáchro ch'án kixin: “It'eni Dios, kjuasáya tjahá kixin jeheni la chóntahyani jie éxi tí sín í so kixin teé sín la ko ch'iyehē kichó sín la ko ch'iyehē sín chojni chjin. Kjaxin jeheni la jehya éxi tí ch'ín nchekjènkì tjinhin. ¹² Jeheni la nehyaní iyó yaon jnkojnko semana la ko kjaxin tjanjonni tí chichaon tjachani tí diezmo kuéntá”, ichro ch'án. ¹³ A ntá tí ch'ín nchekjènkì la imá kjin kuitóhe ch'án kóxakonhen ch'án chrókonta ch'án nkajni la mé chjéhe ch'án ntakuin ch'án ntáchro ch'án kixin: “It'eni Dios tikonóehéni tí jeheni kixin nchónhya jie chóntani”, ichro ch'án. ¹⁴ Tjonkará kixin tí ch'ín nchekjènkì tió kjan ch'án ntóe ch'án la Dios

kuikonóhē tí jehe ch'án la kjuínhin ch'án tí jiē chóna ch'án, a ntá tí ch'ín fariseo la náhí. Kíxin kaín chojni nchehnkehe asén kíxin imá jína tí jehe sín la mé imá tsontsí. A ntá tí chojni nchehnkehya asén la imá ts'ánkí tí kjuaxrexinkaon kuènte sín.

Ch'ín Jesús kjuíncheyaon ch'án chánjan
(Mt. 19.13-15; Mr. 10.13-16)

¹⁵ Kjaxin kjuikao sín chánjan ntsíntsí tí tjen ch'ín Jesús kíxin chrókjuincheyaon ch'án xjan. Kjánchó tió k'uikon tí sín k'uájiko ch'án la í kjuanjonhya sín kjuachaxin kíxin tsochjinako sín xjan. ¹⁶ A ntá ch'ín Jesús k'uíyehē ch'án sín ntáchro ch'án kíxin:

—Títóhéra chánjan méhe xrakoa tí tjen janhan la t'ínkakuènyará xjan kíxin tí sín kuènte kjuachaxin kuènte Dios la mé tóyóhē tí jehe xjan. ¹⁷ Ntá chaxín ntáxrjan kíxin tí nkexro ts'ónahya éxí ijnko chánjan xitjahya ts'ejó sín tí ts'etqan Dios tí kjuachaxin kuènte ch'án.

Ijnko ch'ín ntasoá ríco kjuínixjehē ch'án tí ch'ín Jesús
(Mt. 19.16-30; Mr. 10.17-31)

¹⁸ Ijnko ch'ín t'etqan kuènte nínko kjuanchankíhi ch'án tí ch'ín Jesús kíxin:

—Jaha la ijnko maestro jína la, ¿nkehe naxa t'itjayan chrókjuich'eni kíxin chróchóntani kjuachón jnkochrín? —ichro ch'án.

¹⁹ Ntá kjuátehe ch'ín Jesús ntáchro ch'án kíxin:

—¿Nkekuènte ntáchrúa kíxin jína tí janhan? Jnkokoá nkexro la mé jína la tíha mé Dios. ²⁰ Jaha la ó noha nkehe tí k'uetqan Dios kíxin chrókjuacheéhya kichuára, la ko chrók'oyánhya chojni, la ko chrókueehya, la ko chróntáchrohya ninkehó nkehe chaxínhya kuènte ókjé chojni, la ko chrókjuíkosáyehé it'á la ko iná —ichro ch'án.

²¹ A ntá jehe ch'án kjuátehe ch'án ntáchro ch'án kíxin:

—Kaín tíha kjuínchexiteyáni desde xjanntsíni —ichro ch'án.

²² A ntá kuínhin ch'ín Jesús kaín tíha ntá jehe ch'án ntáchro ch'án kíxin:

—A ntá jnkokoá nkehe naxa t'itjayan chrókjuich'e, chrókjuínchekjia kaín nkehe chonta la chróchjehé tí chichaon tí sín nòa. A ntá tí nkehe tjete la tsochonta nkaya nkajní. A ntá tió tsjixin sijnchekitonhén sín nkehe, a ntá tsjihá ntá chréhé tí janhan —ichro ch'án.

²³ A ntá tí ch'ín a kuínhin ch'án xíkaha la kóxakonhen ch'án kíxin imá itsjé nkehe chóna ch'án. ²⁴ Tió k'uikon ch'ín Jesús kíxin kóxakonhen tí ch'ín a la ntá ntáchro ch'án kíxin:

—Imá xra kíxin tí chojni chóna itsjé nkehe chrók'uixenhen sín tí tjen Dios t'etqan. ²⁵ Antsí xrahya chrók'uatsínka ijnko kocamello ijnko tjar'i ntachica tjejrja, a ntá antsí má xra kíxin ijnko chojni chóna itsjé nkehe chrókjuak'e tí t'etqan Dios —ichro ch'án.

²⁶ A ntá kuínhin sín kíxin xíkaha ntáchro ch'án ntá ntáchro sín kíxin:

—¿Xá nkexro chrókjuacha chrókuaá? —ichro sín.

²⁷ Ntá ntáchro ch'ín Jesús kíxin:

—Tí nkehe tsjachahya chojni chrókjuínchexiteyá, la Dios la tsjacha ch'án sich'e ch'án kaín tíha —ichro ch'án.

²⁸ A ntá ch'ín Pedro ntáchro ch'án kíxin:

—Ínchéni, jeheni la ó kuitóheni kaín nkehe chóntani kíxin tsochréheni tí jaha —ichro ch'án.

²⁹ Ntá kjuátehe ch'ín Jesús ntáchro ch'án kíxin:

—Ntá chaxín tsotjonkará kixin jnkojínra chrókuiñohérá ntoa, la o chrókuiñohérá it'á la ko iná, la o chrókuiñohérá kichuárá, la o chrókuiñohérá ichjiánra, la o chrókuiñohérá xjaanra kixin chrókuiñohérá xra kuente Dios ³⁰la antsí nkehe ts'ayéhérá ntihi chjasintajni la ko tí chr'éxin la ts'ayéhérá kjuachón jnkochrín —ichro ch'án.

Ch'ín Jesús chrónka ch'án inaá kixin its'en ch'án

(Mt. 20.17-19; Mr. 10.32-34)

³¹ Ntá ch'ín Jesús k'uiyehé ch'án jehó tí teyó sín k'uájiko ch'án ntá chrónka ch'án kixin:

—Ijie sátsjini Jerusalén. A ntá ntaha tsoxiteyá kaín tí nkehe tsíkjin tí sín tsíchronka itén Dios ósé nkexrí tsonhen tí Xjeen Dios K'óna Chojni.

³² Tsjikaán sín ch'án tí tjejó tí sín jehya judío la ko tsjanoá sín ch'án la ko ts'ántaxinhín sín ch'án la ko ntate sín tsíkite sín ch'án. ³³ Tsjate sín ch'án, a ntá chr'éxin la ts'óyan sín ch'án. A ntá nixin yaon tsoxechón ch'án —ichro ch'án.

³⁴ A ntá jehe sín la ninkehó kienxínhya sín tí nkehe nixja ch'án kixin tíha ijnko nkehe naxá tsjachahya sín chrókienxín sín.

Ch'ín Jesús kjuínchekitohe ch'án jina ijnko chojni t'ikonhya chjasin Jericó

(Mt. 20.29-34; Mr. 10.46-52)

³⁵ A ntá ch'ín Jesús tió chjina chrók'uixenhen ch'án chjasin Jericó ntá ntiha chrínta ntja tjetjaxín ijnko ch'ín t'ikonhya tjanchak'á ch'án. ³⁶ Ntá xrinahya kuínhin tí ch'ín t'ikonhya kixin sít'atsínka nchónhya chojni, ntá kjuanchankí ch'án kixin:

—¿Xa nkerí sítónhen? —ichro ch'án.

³⁷ Ntá chénka sín ch'án kixin ch'ín Jesús tsíkijxin chjasin Nazaret ts'atsínka ch'án ntiha.

³⁸ Ntá k'uèya ch'án ntáchro ch'án kixin:

—Jaha Jesús tsík'axrjeníxian ch'ín David, tikonóhéni —ichro ch'án.

³⁹ A ntá tí sín tsitaón ntja la k'uètuénhen sín ch'án kixin tsotáni ch'án. Kjánchó jehe ch'án antsí tsen k'uèya ch'án ntáchro ch'án kixin:

—Jaha tsík'axrjeníxian ch'ín David, tikonóhéni —ichro ch'án.

⁴⁰ A ntá ch'ín Jesús ntá ntahó kjuák'echónhen ch'án ntá k'uètoan ch'án kixin tsjikakjín sín tí ch'ín a. Ntá tió kuikao sín ch'án tí chjinaxón tjen ch'ín Jesús ntá kjuanchankí ch'ín Jesús kixin:

⁴¹ —¿Nkehe tjinkávan sít'aha? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Jaha Ìnchéni, tjinkaonni chrókjuínchek'ikuanni —ichro ch'án.

⁴² Ntá ntáchro ch'ín Jesús kixin:

—Ó ts'ikuan. Ó kuítóha jina kixin kuítekávan tí janhan —ichro ch'án.

⁴³ Ntá tuénxín k'uíkon tí ch'ín k'uék'ikonhya, a ntá jehe ch'án chréhe ch'án tí ch'ín Jesús la ko kjuanchehe ch'án kjuasáyé Dios. La ko kaín tí sín k'uíkon kixin xikaha kónhen kjuanchehe sín kjuasáyé Dios.

19

Ch'ín Jesús la ko ch'ín Zaqueo

¹ A ntá ch'ín Jesús k'uixenhen ch'án chjasin Jericó la ntá k'uátsínka ch'án tí chjasin a. ² A ntá ntiha tjen ijnko chojni ríco it'in ch'án Zaqueo, t'etuénhen ch'án tí sín nchekjèñki. ³ Tjinkaon ch'án chrókjuatsoan ch'án nkexro tí ch'ín Jesús, kjánchó nchónhya chojni síin la xitjahya t'ikon ch'án

kíxin intsí ch'án. ⁴ Ntá kuinká ch'án kuítaón ch'án ntja kíxin tjinkaon ch'án chrók'uikon ch'án. Ntá kuátsé ch'án ijnko nta sicómoro chjinaxón tí ts'atsínka ch'ín Jesús. ⁵ A ntá tió k'uatsínka ch'ín Jesús ntiha kontá ch'án tí nta ntáchro ch'án kíxin:

—Zaqueo, tjoka tjasinkajían kíxin ntõa ntahó tsitõna jie —ichro ch'án.

⁶ Ntá ch'ín Zaqueo la tjoka k'uínkajin ch'án kóchéhe ch'án. ⁷ Ntá kaín sín k'uikon sín xíkaha ntá kjuankíxin sín tjonta sín tí ch'ín Jesús, ntáchro sín kíxin ntõe ijnko chojni chóna nchónhya jie tsitõhe ch'án. ⁸ Ntá ch'ín Zaqueo kjuák'exín toté ch'án ntáche ch'án Ìnchéni kíxin:

—Jaha Ìnchéni, chrókónoha kíxin tsjánjuan jnkosiné tí nkehe chonta sintakitonhan tí sín nõa. A ntá tí jnkójín nkexro kjuít'áyahá kuaáha la noó veces ts'okjanhan sín tí chichaon jie —ichro ch'án.

⁹ A ntá ntáchro ch'ín Jesús kíxin:

—A ntá jie la tsaá chojni tí nchia i kíxin tí ch'ín a mé k'uaxrjeníxin ch'ín Abraham. ¹⁰ A ntá tí Xjeen Dios K'óna Chojni mé kuikjeyá la ko sinchekaá tí chojni chóna jie.

Ch'ín Jesús kjuíncheyóexin ch'án éxi ite chichaon imá tjete sínkí

¹¹ A ntá tí chojni síin ntiha nachrohe tjejóthinin sín nkerí tjechro ch'ín Jesús, a ntá jehe ch'án kjuíncheyóexin ch'án nkehe kíxin ó tjen ch'án chjinaxón chjasin Jerusalén, a ntá jehe sín kjuenkayáxin sín kíxin tí kjuachaxin kuènte Dios la ách'e ó tuénxín tsi, ichro sín. ¹² A ntá ntáchro ch'án kíxin:

—Itjen ijnko nkexro tsík'axrjeníxin ijnko nkexro imá k'uék'etõan. Ntá sákjuí ch'án ókjé naciõn kíxin ts'áyéhe ch'án kjuachaxin ts'óna ch'án rey, a ntá chr'éxin la xíkjan ch'án inaá. ¹³ A ntá tió chjina sátsji ch'án ntá k'uíyehé ch'án ite tí sín ch'ehe ch'án xrá ntá chjéhe ch'án jnkójnko tí jehe sín jnkójnko chichaon imá tjete sínkí. Ntá k'uétõan ch'án kíxin: “Tsjan kíxinrá ch'ekoará xrá tí chichaon hasta tí tsokjanjian”, ichro ch'án. ¹⁴ A ntá tí sín chjasén ch'án ntiha imá kónínkakonhen sín ch'án, ntá ichr'án sín iso chojni chréhe sín tí sákjuí ch'án tsochenka sín tí sín síin ntiha kíxin tjinkakonhya sín tí nkexro a ts'óna rey ts'etuenhen sín. ¹⁵ Kjónté xíkaha ichro tí sín a la k'uáyéhe ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uétõan ch'án xrakoa tí sín ch'ehe ch'án xrá, na mé tí sín tsík'áyéhe tí chichaon, kíxin tsonõhe ch'án nkehe tí xrá kjuích'eko sín tí chichaon k'uáyéhe sín. ¹⁶ A ntá tí ch'ín xrankíxixín kóchjina la ntáchro ch'án kíxin: “Tí chjichakõan la kjuachani ite chichaon inaá”, ichro ch'án. ¹⁷ A ntá kjuátéhe tí ch'ín rey kíxin: “Ó nchõxon tí xíkaha jaha la ijnko chojni jína ch'e xrá. Jína kjuích'e xrá kjónté jehya xrá jie ntá tsjánjuan kjuachaxin tsétõan ite chjasin”, ichro ch'án. ¹⁸ A ntá kóchjina tí ch'ín í jnko a inaá ntáchro ch'án kíxin: “Tí chjichakõan la kjuachani in'ó chichaon inaá”, ichro ch'án. ¹⁹ A ntá xíkaha inaá kjuátéhe tí ch'ín rey kíxin: “Tsjánjuan kjuachaxin tsétõan in'ó chjasin”, ichro ch'án. ²⁰ A ntá kóchjina tí ch'ín níxin ntáchro ch'án kíxin: “Tí chjichakõan la tjinhin. K'uánkíntani panítõéni ²¹ kíxin chrakonhanni kíxin jaha la jiáha la tjinkávan tsákjá tí nkehe jehya jaha kjuaké la ko tsotjá tí nkehe jehya jaha kuènkaxian”, ichro ch'án. ²² A ntá tí rey ntáchro ch'án kíxin: “Jehya chojni jína ch'e xrá jaha. Tí nkehe ntáchrúa tsjánchaxian jie. Jaha la ó noha kíxin jièna janhan tsákjáa tí nkehe kjuakéhya, ichrúa, la ko tsotjá tí nkehe kuènkahya. ²³ ¿Ntá nkekuènte kíxin chr'anhya tí chichaon ijnko banco chrókjuích'exín xrá? A ntá tió kjan ntõna la antsí

tsjé chichaon chrók'uayáha tí chrókjuacha kichó chica”, ichro ch'án. ²⁴ A ntá ntáche ch'án tí sín siín ntiha kixin: “Takítsjehérá ch'án tí chichaon tsík'áyéhe ch'án la ntá chjehérá tí ch'ín chóna ite chichaon”, ichro ch'án. ²⁵ A ntá jehe sín ntáchro sín kixin: “¿Nkekuènte chrók'uáyéhe ch'án kixin ó chóna ch'án ite chichaon?” ichro sín. ²⁶ A ntá tí ch'ín rey kjuátehe ch'án ntáchro ch'án kixin: “Kjónté jnkojín nkexro itsjé chóna la ts'áyéhe má. A ntá tí nkexro chónahya la kjónté tí ntsí chóna ch'án la ts'axrjehe ch'án. ²⁷ A ntá tí sín nínkakonna sín tjinkakonhya sín kixin ts'ónana rey la xrákoará sín ntihi ts'íkoxín kuən ts'ochrínjinrá kja sín.”

Ch'ín Jesús k'uixenhen ch'án chjasin Jerusalén
(Mt. 21.1-11; Mr. 11.1-11; Jn. 12.12-19)

²⁸ Tió kjuixin ntáchro ch'ín Jesús tíhi ntá chrìin ch'án sátsji ch'án chjasin Jerusalén. ²⁹ A ntá ó kjuíji chjinaxón tí chjasin Betfagé la ko chjasin Betania chjinaxón tí jnə nchek'in sín Olivo, ntá k'uetuenhen ch'án iyó tí sín k'uájiko ch'án ³⁰ ntáche ch'án sín kixin:

—Sátjirá tí chjasin ntsí chok'èxin ntihi, a ntá tió tsjasánrá ntiha ts'tjará ijnko kolocho tjechroé va naxa ninkexró tjták'áhya va. Tjas-intankehérá va la tsjúkuanará va ntihi. ³¹ A ntá tí jnkojín nkexro tsjan-chankíhará nkekuènte tjasintankehérá va la ntácherá sín kixin: “Inchéni ts'ichjánxinhin va”, tsixrorá.

³² A ntá tí sín k'uítuenhen sákjuí sín k'uitja sín éxi ntáchro ch'án. ³³ A ntá tió tjejójtjasintankehé sín va la ntá tí sín inché va kjuanchankíhi sín kixin:

—¿Nkekuènte tjasintankehérá tí kolócho? —ichro sín.

³⁴ A ntá jehe sín kjuátehe sín kixin:

—Inchéni ts'ichjánxinhin va —ichro sín.

³⁵ Ntá sákjuíkohe sín va tí ch'ín Jesús, la ntá tí iké sín kjuínchekamá sín va, ntá kjuíták'á ch'ín Jesús tí kolócho a. ³⁶ A ntá tinkákji tí kolócho tjejken ch'án la tinkák'ikjínxin sín tí iké sín ntja kixin nátaón tí ka ts'atsínka tí kolocho tjejken ch'án. ³⁷ Ntá tió kjuíjichjina sín tí chjinaxón tí t'inkajinxin chojni tí jnə Olivo, a ntá kaín tí sín kuítekaon tí jehe ch'án chréhe sín kjuankixin sín itsen nixja sín chéhe sín kjuanchehe sín kjuasáyé Dios kixin kaín tí kjuaxroan k'uíkoxín kon sín. ³⁸ Ntá ntáchro sín kixin:

—Jína tí nkexro Rey kjuixín kjuachaxin ihnié Dios. Tsjak'e kjuaxróxin nkaya nkajní la ko kjuasáyé Dios tjen nkaya nkajní —ichro sín.

³⁹ A ntá iso tí sín fariseo tjejóyákan sín í so chojni tjejónchexroan sín ntiha ntáchro sín kixin:

—Maestro, tétuenhén tí sín chréhe tí jaha kixin tsotání sín —ichro sín.

⁴⁰ A ntá ch'ín Jesús kjuátehe ch'án ntáche ch'án sín kixin:

—A ntá tí sín i tsotání sín la ixro tsotsje —ichro ch'án.

⁴¹ A ntá tió kjuíjichjina ch'án chjasin Jerusalén ntá k'uíkon ch'án tí chjasin la ntá tsjánka ch'án kixin kuítekakonhya sín ⁴² ntáchro ch'án kixin:

—Chrókuiénxinrá la ko chrókónohará nkexrí chrók'uayèxinrá tí kjuaxróxin, kjánchó jahará kuítekákonyhará. A ntá ó kjuixin k'uátsínka tí kjuaxróxin chrók'uíkonrá la xitjahya ts'ikonrá jie. ⁴³ A ntá tsi iso yaon jínahya itsi tí sín nínkakonhanrá la sich'éna sín ijnko tjat'ə ts'ántatjen tí chjasin tjejorá ntihi ts'inkákonhen kixin xitjahya ts'axrjéxinrá chjasin ntihi kixin nkuixín ts'ejó sín ts'inkákonhanrá sín ⁴⁴ ntá ts'óxika sín kaín tí tjat'ə siín ntihi la ko ts'óyan sín kaín tí chojni siín la ko tsítəheya sín

kíxin ninkehó xro naxa ts'ejókjen kichó, kíxin jahará kjuátsqanhýará kíxin kuitsjehe Dios tí chjasin tjejorá ntihi.

Ch'in Jesús kjuínchetjóá ch'án nkaxenhen nínko

(Mt. 21.12-17; Mr. 11.15-19; Jn. 2.13-22)

⁴⁵ A ntá ch'in Jesús k'uixenhen ch'án tí nínko jíé, a ntá kjuankíxin ch'án kuakitsje ch'án tí sín nchekji nkehe la ko tí sín t'ena nkehe ntiha. ⁴⁶ Ntá ntáchro ch'án kíxin:

—A ntá ntáchro xroon itén Dios chrónka kíxin: “Tí ntóna i mé it'in nchia tsonixjanaxián chojni”,* ichro. A ntá jahará tí nchia i tsíkijch'énará itjueé xíchee —ichro ch'án.

⁴⁷ A ntá tí nínko ntiha kjuák'e ch'in Jesús kjuako ch'án kaín yaon. A ntá tí sín nchát'á t'etóan la ko tí maestro tjako tí ley la ko kjaxin tí sín t'etóan tí chjasin ntiha kjueyá sín nkexrí chrók'óyán sín ch'án. ⁴⁸ Kjánchó k'uitjahya sín nkexrí chrók'óyán sín ch'án kíxin kaín chojni tjejótinhin tí nkehe tjechronka ch'án.

20

Tí kjuachaxin chóna ch'in Jesús

(Mt. 21.23-27; Mr. 11.27-33)

¹ A ntá ijnko yaon kjuák'e ch'in Jesús tí nínko ntiha kjuakohe ch'án chojni tí tan jína tsaáxin sín. A ntá kjui tí sín nchát'á t'etóan la ko tí sín maestro tjako tí ley la ko kjaxin tí sín t'etóan kuènte nínko. ² Ntá kjuanchankíhi sín ch'án kíxin:

—Chronka nkehe tí kjuachaxin chonta kíxin xíkaha ch'e. ¿Nkexro kjuanjón tí kjuachaxin a? —ichro sín.

³ Ntá kjuátehe ch'in Jesús ntáchro ch'án kíxin:

—Kjaxin janhan tsjánchánkíhará ijnko nkehe siná nkexrí tsjateherá.

⁴ ¿A ntá nkexro k'uetuènenhén tí ch'in Juan kíxin tsíkíte ch'án chojni? ¿A Dios ní o chojni ó? —ichro ch'án.

⁵ Ntá kjuankíxin sín tjo sín kichó sín ntáchro sín kíxin:

—¿Nkehe chrókjuateheni? A ntá tí tsontáchroni kíxin Dios tsíchr'án tí ch'in Juan la ntá tsjanchankí ch'án kíxin nkekuènte kuítekakuenhyani ch'án. ⁶ A ntá tí tsontáchroni kíxin chojni ó k'uetuènenhén sín ch'án la ntá kaín chojni tsonínkaon sín la ixro ts'óyánxinni sín kíxin tjenkayáxin sín kíxin ch'in Juan chaxín k'uékjako ch'án itén Dios —mé xíkaha ikjo sín.

⁷ Ntá kjuátehe sín kíxin noehya sín nkexro tsíchr'án tí ch'in Juan. ⁸ Ntá ntáchro ch'in Jesús kíxin:

—Kjaxin janhan tsóxrjankahya nkexro kjuanjón kjuachaxin tjet'a tíhi —ichro ch'án.

Ch'in Jesús kjuíncheyóexin ch'án éxi tí sín ch'ehya xra jína

(Mt. 21.33-44; Mr. 12.1-11)

⁹ Ntá tuénxín kjuankíxin ch'in Jesús nixjehe ch'án chojni kjuíncheyóexin ch'án ntáchro ch'án kíxin:

—Kjuák'e ijnko chojni k'uènkaxin ch'án nta to uva tí nontee ch'án, a ntá chr'éxin kjuínchekjen ch'án tí iso tí sín ch'e xra. A ntá kjuixin ntá sákjuí ch'án imá sé. ¹⁰ A ntá kui tí yaon tsakjinjin sín to uva. Ntá k'uetuènenhén ch'án ijnko nkexro ch'ehe ch'án xra kíxin tsjikjanchehe ch'án tí sín ch'e xra nontee ch'án kíxin tsjanjón sín tí to tónhen ch'án tocar. A ntá jehe sín kjuate sín tí ch'in a la ntá k'uinkité sín ch'án la ninkehó tsíchjéhya sín ch'án.

* 19:46 Isaías 56.7

11 **A** ntá tí ch'ín nontee ichr'án ch'án í jnko nkexro ch'ehe ch'án xra. **A** ntá kjaxin k'uantaxínhin sín ch'án la ko kjuate sín ch'án la ko kjaxin ninkehó tsíchjéhya sín ch'án inaá. 12 **A** ntá tí ch'ín nontee ichr'án ch'án í jnko nkexro. **A** ntá tí sín ch'e xra kjaxin xikahó tsíkjich'ehe sín inaá, tsík'inkité sín ch'án.

13 'Ntá tí ch'ín nontee ntáchro ch'án kixin: “¿Nkexrí chrókjuít'a jie? Tsochr'an tí xjanna imá tjuaha. Ách'e chrókuitekakonhen sín ch'án chróchóntehe sín ch'án kjuasáya”, ichro ch'án. 14 **A** ntá kjónté kui ch'án la k'uikon tí sín ch'e xra ntá chénka sín kichó sín kixin: “Tí ch'ín i mé ts'áyéhe ch'án kaín nkehe kuènte it'é ch'án. Ts'óyánni ch'án kixin jeheni tsitqekoni kaín tí nkehe a,” ichro sín. 15 **A** ntá kuakitsjexín sín ch'án tí nonte ntiha la k'óyán sín ch'án.

A ntá kjuanchankí ch'ín Jesús kixin:

—**A** ntá tí inché nonte la, ¿nkehe chrókjuich'e ch'án kixin xikaha kónhen tí xjeen ch'án? 16 Chrókui ch'án chrókjuinchek'itjáyan ch'án tí sín ch'e xra kixin xikaha kjuich'e sín k'óyán sín tí xjeen ch'án, a ntá chróchjéhe ch'án í so nkexro chrókjuich'e xra tí nonte a —ichro ch'án.

A ntá tió kuínhin sín xikaha ntáchro sín kixin:

—Kjá Dios la xikahya tjinkaon ch'án —ichro sín.

17 **A** ntá ch'ín Jesús komá ch'án tí jehe sín ntáchro ch'án kixin:

—¿**A** ntá nkehe t'axrjexín tí nkehe ntáchro xroon itén Dios ntáchro xikihí?:

Tí xro náxrxónhya kuítóenta tí sín ch'éna tjat'o, a ntá mé jie k'óna tí xro tjetooan.*

18 **A** ntá jnkojín chojni tsjitsínka chrítaón tí xro i tsokuen ch'án. **A** ntá ts'ánótjen tí xro i tsoxratja ijnko chojni la tsokuen, ts'óna nche.

Tí xra tsjenkehe sín gobierno

(Mt.21.45-46; 22.15-22; Mr.12.13-17)

19 **A** ntá tí nchat'a t'etooan la ko tí maestro tjako tí ley tjinkaon sín chrótsé sín tí ch'ín Jesús tuénxín tí hora a kixin ó kónohe sín kixin jehe sín kuakitsjexín tí nkehe nixja ch'án. Kjánchó xitjahya tsotsé sín ch'án kixin chrakonhen sín tí chojni síin. 20 Ntá k'uetuēnhen sín chojni tsotsáyehe sín ch'án, éxí chojni chóna kjuasáyé ch'án chrókjo sín ch'án jnkojína kixin ách'e ichrén nkehe ntoáhya tsonixja ch'án. **A** ntá jína tsjanchaxín sín jie tsjikaán sín ch'án tí tjen tí ch'ín gobernador. 21 Mé xikaha kjuanchankíhi sín ch'án nkehe, a ntá ntáchro sín kixin:

—Maestro, ó noheni kixin kaín nkehe ntáchrua la ko kaín nkehe tjákua la chaxín ntoá la ko jehya nkexrí tsjehe chojni tjenkayáxixián kixin á jína sín, la ntá ntoá tjákua ntje Dios. 22 **A** ntá jie la chronka, ¿á jína chrókjuenkeheni tí gobierno romano o náhi? —ichro sín.

23 **A** ntá ch'ín Jesús la ó kónohe ch'án kixin ntoáhya tjenkayáxin sín ntá ntáchro ch'án kixin:

—¿Nkekuènte chrokjuachaxinráni? 24 Tjákonará ijnko tí chichaon méhe. ¿Nkexro tí tsík'axrjexín tjenkání tí chichaon i la ko nkexro ihnjé chóna méhe? —ichro ch'án.

Ntá kjuátehe sín kixin:

—Tí ch'ín t'etooan mé tjenkání ch'án —ichro sín.

25 Ntá ntáchro ch'án kixin:

—Chróchjehérá tí ch'ín gobierno t'etooan tí nkehe kuènte ch'án; a ntá tí nkehe kuènte Dios chróchjehérá Dios —ichro ch'án.

* 20:17 Salmo 118.22

26 **A** ntá ninkehó kjuachahya sín kjuachaxin sín ch'án tí nkehe ntáchro ch'án nkyakon chojni chjasin ntiha. **A** ntá chrakon sín kuínhin sín kaín nkehe kjuátehe ch'án la ntá tí sín kjuanchankí la tání sín kohya nkehe ichro sín.

Kjuanchankí sín kixin á tsoxechón chojni

(Mt.22.23-33; Mr.12.18-27)

27 **A** ntá chr'éxin iso tí sín saduceo sákjuítsjehe sín tí ch'ín Jesús. Kjánchó tí sín saduceo titekakhya sín kixin tsoxechón chojni tsík'en. Xíkaha ntáche sín tí ch'ín Jesús kixin:

28—Maestro, ch'ín Moisés tsíkjin ch'án tí xroon ley ntáchro kixin tió ts'en ijnko chojni la ntá tsitohe ichjién, tí chóntahya sín xjeen, la t'ichjánxin kixin kichó tí ch'ín tsík'en tsotehe tí tjan k'án kixin tsochónta sín xjeen sín éxi xjeen tí ch'ín saó tsík'en ts'ikon sín.† 29 **A** ntá k'u'éjó sín yato sín jnkokoá kichó sín. **A** ntá tí ch'ín saó la kótehe ch'án. Ntá k'uén ch'án la chóntahya ch'án ninkehó xjeen ch'án. 30 **A** ntá tí ch'ín yóxin kichó ch'án la kótehe tí tjan k'án. Kjaxin k'uén ch'án chóntahya sín xjeen sín. 31 **A** ntá tí ch'ín níxin xikótehe jehe tjan inaá. Kjaxin xíkaha kayatoé sín. Kaín sín k'uén sín ninkehó xjeen sín chóntahya sín. 32 **A** ntá kjuixixín kjaxin jehe tjan ik'uén tjan. 33 **A** ntá tió tsoxechón chojni tsík'en, ¿ntá nkexro tí jehe sín ts'óna ichjién tí jehe tjan kixin yato tí jehe sín kótehe tjan? —ichro sín.

34 Ntá ch'ín Jesús kjuátehe ch'án ntáchro ch'án kixin:

—Ntíhi chjasintajni tí chojni ntoa la ko tí chojni chjin tótehe sín takja kichó sín. 35 **A** ntá tí sín kuítekaon sín tí janhan ntá tsjacha sín tsoxechón sín inaá la í tsoteehya sín la koí tsoteehya tí xjeen sín. 36 Kixin tí sín a la xitjahya ts'en kixin éxi tí sín ángel ts'ejó sín kixin xjeen Dios tí jehe sín kixin Dios kjuínchexechón ch'án sín. 37 Kjaxin ch'ín Moisés tió chrónka ch'án kuènte tí nta tjeche kjuínchenoheni ch'án kixin tí sín tsík'en tsoxechón sín. Ntáchro ch'án kixin Ìnchéni Dios na mé tí Dios tinkáchónki ch'ín Abraham la ko ch'ín Isaac la ko ch'ín Jacob.‡ 38 Tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóchón, la Dios la t'ikon ch'án kixin kaín chojni la síchón —ichro ch'án.

39 **A** ntá iso tí sín tjako tí ley la ntáchro sín kixin:

—Jína kjuàkua la ko jína ntáchrúa, Maestro— ichro sín.

40 **A** ntá chrakon sín la í ninkehó kjuanchankíehya sín ch'án.

¿Xá nkexro tí it'é tí Cristo?

(Mt. 22.41-46; Mr. 12.35-37)

41 Ntá ntáchro ch'ín Jesús kixin:

—¿Nkexrí kixin ntáchro sín kixin tí Cristo mé ts'axrjeníxin tí ch'ín David?

42 **A** ntá ch'ín David ikjin ch'án tí libro Salmos la ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntíhó tsétoan

43 tsjixinjian kaín xín tí sín nínkakonhan la tsjachahya sin ts'etóan sín kixin jahvá mé tsétoan.”§

44 ¿Xá nkexrí kixin Cristo chrók'óna it'é David, kixin jehe David kujukitexín ch'án Ìnché ch'án tí Cristo? —ichro ch'ín Jesús.

Ch'ín Jesús kjuanchia ch'án jie tí sín tjako tí ley

(Mt. 23.1-36; Mr. 12.38-40; Lc.11.37-54)

† 20:28 Deuteronomio 25.5 ‡ 20:37 Éxodo 3.6 § 20:43 20.42-43 Salmo 110.1

⁴⁵ Kaín chojni tjejótinhin sín nixjehe ch'ín Jesús tí sín k'uájiko ch'án ntáchro ch'án kixin:

⁴⁶ —Chrókóxakonhanrá chrókuankiéhyará tí sín maestro tjako tí ley. Tóxrjínhin sín chrók'uinkáya sín ka kjinjin la ko tjinkaon sín kixin kaín chojni chrókjuikosáyehe sín tsoxeta sín ntaşin la ko tjejá sín silla antsí náxrjón chrók'uejóyá sín nkaxenhen nınko la ko tjejá sín kixin jına chrók'uejó sín tí sátsji sín kia, ⁴⁷ la ko kjaxin takitsjehe sín ntøe tí chojni chjin k'án. A ntá kjuixin kjuich'iyehhe sín chojni ntá náxrjón nixjehe sín Dios. A ntá jehe sín antsí má sinchekjasóte sín Dios kixin xıkaha kjuich'ia sín.

21

Tí chichaon kjuanjon ijnko tjan k'án nòa
(Mr. 12.41-44)

¹ A ntá tí nkaxenhen nınko ch'ín Jesús k'uikon ch'án kixin tí sín rico kjuıkao sín chichaon chr'áxenhen sín tí ntacajón tjetóxyoyéya chichaon.

² A ntá kjaxin k'uikon ch'án ikjui ijnko tjan k'án nòa la ntá jehe tjan chr'áxenhen tjan yaá chichaon ntsintsí. ³ Ntá ntáchro ch'ín Jesús kixin:

—La chaxín ntáxrjan kixin tí tjan k'án i nòa tjan kjánchó antsí tjeje sínkí tí chichaon kjuanjon tjan kixin kaín asén tjan kjuanjon tjan, a ntá tí sín kjuanjon nchónhya la náhi. ⁴ Kixin kaín tí chichaon kjuanjon sín la chichaon síxèhe sín. A ntá jehe tjan kjónté nòa tjan na kjuanjon tjan kaín tí chichaon chrókuicháxinhin tjan —ichro ch'án.

Ch'ín Jesús ntáchro ch'án kixin tí nınko ts'itjáyan
(Mt. 24.1-2; Mr. 13.1-2)

⁵ Iso sín tjejóto sín kixin nkexrí tsjehe nınko tsík'óna xro náxrjón la ko í so nkehe tsíkjanjon chojni éxi ijnko nkehe chjéhe sín Dios. A ntá ch'ín Jesús ntáchro ch'án kixin:

⁶ —A ntá tsi ijnko yaon tí nınko tjejokomará ntihi la tsoxıka. A ntá tsokohya ninkehó xro ts'ejókjen kichó inaá —ichro ch'án.

Tí nkehe tşonhen tí naxa ts'itjáyanhya chjasintajni
(Mt. 24.3-28; Mr. 13.3-23)

⁷ Ntá kjuanchankíhi sín ch'án kixin:

—Maestro, ¿nkesá tşonhen tíha? ¿Nkexrí tşonhen tí tşonoexinni tí nkehe tşonhen? —ichro sín.

⁸ Ntá ntáchro ch'ín Jesús kixin:

—Chrókóxakonhanrá tıtoéhyará sit'áyahará chojni. Nchónhya chojni tsi tsontáchro sín kixin jehe sín tí Cristo, tsixro sín, la ko tsontáchro sín kixin: “Ijie mé tsoxiteyá tşonhen.” Kjónté xıkaha tsontáchro sín la chrókuítekákuenhyará tí jehe sín. ⁹ A ntá tió tsinhínrá tsontáchro chojni kixin ó sijn kjuanínkaon tjanjonko kichó sín, kjónté xıkaha naxa chróchrakonhyará kixin kaín tíha t'ichjánxin ts'atsınka senó tí naxa tsjixixínhya ts'itjáyan chjasintajni —ichro ch'án.

¹⁰ Naxa tjechrónka ch'án ntáchro ch'án kixin:

—Ijnko nación la tsjanjonko íjnko nación la ko ijnko chjasin tsjanjonko íjnko chjasin. ¹¹ Kjaxin imá tjian tsínkí nonte la ko tsokjinta la ko tşoníhi chojni nchónhya chjasin, a ntá nkajni nchónhya kjuachrakon jie ts'ixin ts'ikon chojni.

¹² Naxa ts'atsínkahya tíha la tşonínkakonhanrá sín tsotsérá sín sátsjikoará sín tí nınko tsanchia sín jie la ko sátsjikoará sín ts'ıkjohará la ko sátsjikoará

nkayakon tí sín rey la ko tí sín gobernador kixin tinkachónkirá nina. ¹³ A ntá tí yaon xikaha tsonhen la ts'ixin kjuachaxin kixin tsochronkará nkexro tinkachónkirá. ¹⁴ Tóxakuanhyará senó nkexrí tsjateherá tí nkehe tsjanchankíhará sín ¹⁵ kixin janhan la tsánjuan kjuaxrexinkaon jina tsonixjará kixin nijnko tí sín ninkakonhanrá xitjahya tsochácho sín kixin ntoáhya tí nkehe tsjateherá. ¹⁶ Kixin kjónté it'ará la ko kichuárá la ko tí sín kjéhyará la ko tí sín tjóra jina mé sintakjirá sín. Jehe sín ts'oyán sín jnkójnirá. ¹⁷ Kaín chojni chjasintajni tsonínkakonhanrá sín kixin tinkachónkirá nina. ¹⁸ Kjánchó xikaha la nijnko kaxihí chóna kjará ts'itjáyanhya. ¹⁹ Tí tsjtoéhyará tinkachónkirá tí janhan la tsochontará kjuachón jnkochrín.

²⁰ 'A ntá tió ts'ikonrá kixin kuenté chjasin Jerusalén tsík'ántatjen sín soldado ntá tsonoaxínrá kixin í séhya ts'itjáyan tí chjasin a. ²¹ A ntá tí sín tjejó sín Judea la t'ichjánxin sátsjixin sín ntiha sátsji sín jna. A ntá tí sín siin chjasin Jerusalén kjaxin t'ichjánxin sátsjixin sín ntiha la ko ti sin tjejó sín nontee sín la í xitjahya tsokjan sín chjasin. ²² Kixin tí yaon ts'ixin tsjasóte chojni tsoxiteyá tsonhen kaín nkehe nixja xroon itén Dios. ²³ Nòa tí chojni chjin tjejóyá tí yaon a la ko tí sín chóna xjanhnté naxa nchekakí sín. Kixin tí yaon a la ts'ixin kjuatjoté tí chjasin la Dios tsjanjon kjuachaxin kixin imá tsjasóte chojni ntiha. ²⁴ Jnkójnirá ts'énxínrá tí siin kjuanínkaon ntiha la ko jnkójnirá tsotsérá sín sátsjikoará sín sinchekjasótiará kaín tí í so nación. A ntá tí sín jehya judío tsjixín ókjé nación tsinkátja sín chjasin Jerusalén kixin Dios mé tsjanjon kjuachaxin iso yaon xikaha tsonhen. A ntá chr'éxin tsochácho ch'án kixin: “La í kohya nkehe tsonhen.”

A ntá tió itsi ti Xjeen Dios K'óna Chojni
(Mt. 24.29-35, 42-44; Mr. 13.24-37)

²⁵ 'A ntá tsonoaxínrá nkexrí tsonhen tí yaon la ko nkexrí tsonhen nitjó la ko nkexrí tsonhen konotsé. A ntá chjasintajni tsokohya kjuaxróxin kaín nación la ko tsochakon chojni kixin imá tsojna ntayaon. ²⁶ A ntá chojni la tsoťnhin sín kixin tsochakon sín tsjenkayáxin sín nkehe tsonhen chjasintajni kixin kaín tí nkehe sínkáni nkajní la tsinkí. ²⁷ Ntá xikaha ts'ikon chojni kixin itsi tí Xjeen Dios K'óna Chojni itsi ch'án chríkjan ijnko tjuí tsjkaó ch'án tí kjuachaxin jie kuente nkaya nkajní. ²⁸ A ntá tió tsoxrankixin tsonhen kaín tíha chrókócháhará chrókjuaya kjará ntá chróntáchorá kixin kjínhya tjen tí nkexro tsaáxinrá —ichro ch'án.

²⁹ Kjaxin kjuíncheyóexin ch'án í jnko nkehe ntácho ch'án kixin:

—Tjenkayáxinrá nkexrí siin tí nta t'óna to higo la ko kaín tí í so nta. ³⁰ Tió ts'ikonrá kixin tinkák'ayan kahnté tí nta, ntá tsonoaxínrá kixin í séhya ts'ixenhen nchakuen chrin. ³¹ Mé kjaxin xikaha tió ts'ikonrá kixin kaín tí nkehe sítónhen, ntá tsonoaxínrá kixin tí kjuachaxin kuente Dios la ó chjino tjen.

³² 'Mé chaxín ntáxrjan kixin kaín tíhi tsonhen senó naxa t'enhya chojni tjejó jie. ³³ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

³⁴ 'Chrókóxakonhanrá chrókuítóéhyará kixin chrókjuichróderá kixin tí imá chrókjónterá la ko tí chrókókoanrá. Kixin tí xikaha la ntá titáya tsi tí yaon la chrók'uejochoénhyará. ³⁵ Na mé éxi ijnko trampa xrinahya ts'ikjehe mé xikaha itsi tí yaon a, la ko xikaha tsonhen kaín chojni siin chjasintajni tí ts'ejóchóenhya sín. ³⁶ Méxra listo chrók'uejorá la ko chrónixjehérá Dios

kaín yaon chronógherá ch'án kixin tió tsi kaín tí kjuaxikaon xikaha la ntá tsjinkitsará ch'án tsaará kixin ntá tsjachará tsochjineherá tí tjen tí Xjeen Dios K'óna Chojni —ichro ch'án.

³⁷ Ch'ín Jesús kjuák'ekjako_xin ch'án tí ninko ntiha jnkojnko yaon, a ntá tie la sákjuí ch'án tí jnā nchek'in sín Olivo, la ntaha kuitōhe ch'án. ³⁸ A ntá kaín chojni kóchjina sín tí ninko jnkojnko nchítjen kixin tsinhin sín tí nkehe tsochronka ch'án.

22

Imó kjuenkayáxin sín nkexrí tsotsé sín tí ch'ín Jesús

(Mt. 26.1-5,14-16; Mr. 14.1-2, 10-11; Jn. 11.45-53)

¹ Ntá kuichjina tí yaon kia sine sín tí niotja tjikohya tí xroan t'ánkixin niotja na mé tí kia nchek'in sín pascua. ² Ntá tí nchát'á t'etōan la ko tí sín maestro tjako tí ley kjuenkayáxin sín nkexrí chrók'óyán sín tí ch'ín Jesús kixin chrakonhen sín tí chojni chjasin ntiha.

³ A ntá ch'ín Tsochren k'uíxehen asén ch'ín Judas, mé kjaxin it'in ch'án Iscariote, mé jehe ch'án ijnko tí teyó tí sín k'uájiko ch'ín Jesús. ⁴ Tí ch'ín a mé sákjuitsjehe tí sín nchát'á t'etōan la ko tí sín t'etōan kuente ninko, ikjo kichó sín kixin nkexrí tsjikaán sín tí ch'ín Jesús. ⁵ Ntá jehe sín kóchéhe sín la ko ntáchro sín kixin tsjenkehe sín tí ch'ín Judas. ⁶ Ntá kjuátēhe ch'án sinchexiteyá ch'án ntá kjueyá ch'án nkexrí tsotsé sín tí ch'ín Jesús tí kohya chojni.

Kjuixixín kjoneko sín tí ch'ín Jesús

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ntá ó kui yaon kia sine sín niotja tjikohya tí xroan t'ánkixin niotja, a ntá t'ichjánxin ts'óyán sín tí kolélo sine sín kuente tí kia pascua. ⁸ A ntá ch'ín Jesús k'uetuēhen ch'án tí ch'ín Pedro la ko tí ch'ín Juan kixin sátsji sín sincheyaxín sín tí nkehe sine sín kuente tí kia pascua. ⁹ Ntá jehe sín kjuanchankíhi sín ch'án kixin:

—¿Nketí tjinkávan sincheyaxíxinni? —ichro sín.

¹⁰ Ntá kjuátēhe ch'án kixin:

—Tió ts'ixenhenrá chjasin Jerusalén tsoxetará ijnko chojni ntoa yámá ijnko toá tjiá ntá. Chréhérá ch'án sátsjirá tí nchia ts'ixenhen ch'án. ¹¹ Tsontácherá tí ñché tí nchia kixin: “Ntáchro Maestro kixin: ¿Nketí tjen tí cuarto tsjánjuan kjuachaxin tsoyaxíxin sineko ch'án tí sín teyó xriko ch'án tí yaon pascua?” tsixrorá. ¹² A ntá jehe ch'án tsjakohará ch'án ijnko cuarto jié tí yóxin piso la ntiha siín nkehe t'ichjánxin, la ntaha sincheyaxínrá tí sineni tsojnín —ichro ch'án.

¹³ A ntá jehe sín sákjuí sín k'uitja sín kaín nkehe éxí tsíchronka ch'ín Jesús. Ntá ntiha kjuíncheyaxíxin sín sine sín kuente pascua.

¹⁴ A ntá kui tí hora, a ntá ch'ín Jesús la ko tí sín k'uájiko ch'án kjuíji sín ntiha k'uéjótjaxín sín tí tjen tí mesa. ¹⁵ Ntá ntáchro ch'ín Jesús kixin:

—Imá tjínkavan kixin tsjasinni kia sinekianrá tí yaon pascua naxa ts'énhya janhan. ¹⁶ Ntáxrjan kixin sinehya janhan xikaha ínaá tí naxa tsoxiteyáhya tíha tió tsi kjuachaxin kuente Dios —ichro ch'án.

¹⁷ Ntá kuákja ch'án tí nkehe tjiá ñnté to uva ntá chjéhe ch'án kjuasáya Dios ntá ntáchro ch'án kixin:

—Tákjará tíhi la its'irá kaín rá ¹⁸ kixin ntáxrjan kixin xík'ikianhyará tí ñnté to uva tí naxa tíhya tí kjuachaxin kuente Dios —ichro ch'án.

¹⁹ A ntá kjuixin ntá kuákja ch'án tí niotja ntá kjuanchehe ch'án kjuasáyé Dios, ntá kóchrít'ò ch'án chjéhe ch'án tí jehe sín ntáchro ch'án kixin:

—Tíhi mé cuerpo kuéntana kixin ts'ényákonhanrá. Mé xikaha tsoxráinkákonxínrá tí janhan —ichro ch'án.

²⁰ Kjaxin xikaha kjuanjon ch'án tí nkehe tjíá ínté to uva tió kjuixin kjóne sín la ntáchro ch'án kixin:

—Tí nkehe tjíá tí vaso chronkaxín tí nkehe nixin tsoñhen tsoxiteyá kixin tí jnina ts'itjí tsotjuáxin tí ijjará.

²¹ Tí nkexro sinchekjina mé tjejian tí tjen mesa ntihi. ²² Méxra tí Xjeen Dios K'óna Chojni its'en éxi k'uítuenhen; kjánchó ña tí ch'ín sinchekji ch'án kixin tsjasóte ch'án —ichro ch'án.

²³ A ntá jehe sín kjuankixin sín tjanchankíhi kichó sín:

—¿Xá nkexro sinchekji ch'án? —ichro sín.

Ikjo sín kixin nkexro tí imá ts'etōan

²⁴ A ntá jehe sín mé tjo sín kixin nkexro antsí ts'etōan. ²⁵ A ntá ntáchro ch'ín Jesús kixin:

—Tí sín reyes kuente tí naciones imá t'etōan sín. A ntá tí chojni mé ntáchro sín kixin tí sín t'etōan la mé chojni ch'e xra jina. ²⁶ A ntá jahará xikahya chrókjuich'erá. Íchá jina tí nkexro imá t'etōan chrók'óna éxi tí nkexro antsí ntasoá chróchóxin chrók'uítuenhen, na mé tí nkexro t'etōan chrók'óna éxi ijnko nkexro ch'exón xra. ²⁷ ¿A ntá nkexro tí antsí t'etōan, á tí nkexro lámō tjetjaxin tí tjen mesa ntá sine ch'án, o á antsí t'etōan tí nkexro kujkao tí nkehe sine ch'án? Náhí. Tí nkexro tjetjaxin tí tjen mesa mé antsí t'etōan ch'án. Mé xikaha janhan tjénkákjánrá éxi ijnko nkexro ch'exón xra tí janhan.

²⁸ Jahará xráxin k'uéjontaxínrá k'uíkonrá kaín nkehe náxrjónhya kónna. ²⁹ Méxra janhan tsjánjuan kjuachaxin tsétoanrá éxi chjina T'aná tí tétōan janhan ³⁰ kixin sinterá la ko its'irá tí tsjak'e mesa kuéntana tí tsétoan janhan nkaya nkajní la ko tsétoanrá sinchekitoexínrá tí ijie kaín tí sín k'uaxrjenixin tí teyó xjeen ch'ín Israel.

Ch'ín Jesús chrónka ch'án kixin ch'ín Pedro sinchemá kixin chónhya tí jehe ch'án, tsixro ch'án

(Mt. 26.31-35; Mr. 14.27-31; Jn. 13.36-38)

³¹ Ntá ntáchro Ìnchéni kixin:

—Simón, Simón, chrókónoha jaha kixin ch'ín Tsochren kjuanchia ch'án tí jahará chrók'ótsjéyehe ch'án tí jahará éxi noatrigo. ³² Kjánchó janhan xrjanóhā T'aná kixin jaha chrókuitōéhya tí tinkachónkia tí janhan. A ntá jaha kjónté tsjásian jie, a ntá tsokjan inaá ts'itjáyanyha tinkachónkia tí janhan ntá sinchechéhé kichuára —ichro ch'án.

³³ A ntá ntáchro ch'ín Simón kixin:

—Ìnchéni, listo tjenni sátsjini ts'ikjéhekoani la jehya ts'ikjéheni ó la kjaxin ts'enkoani —ichro ch'án.

³⁴ A ntá kjuátehe ch'ín Jesús ntáchro ch'án kixin:

—Pedro, ntáxrjan kixin ijie jaí naxā tsjehya kochíntōa sinchemána iníya kixin chonhya tí janhan, tsixrua —ichro ch'án.

Ntá ó kuichjina tí hora xikaha tsoñhen ch'án

³⁵ Ntá ch'ín Jesús kjuanchankíhi ch'án tí jehe sín kixin:

—Tió kuétuanhanrá sákjuírá kjuíkoahyará kabolsa la ko kjuíkoahyará tí nkehe t'inka chichaon la ko kjuíkoahyará tokate na, ¿á naxa t'itjáyán ichrén nkehe ní? —ichro ch'án.

Ntá kjuátehe tí jehe sín ntáchro sín kixin:

—Náhi. Ninkehó nkehe t'itjáyánhya —ichro sín.

³⁶ Ntá ntáchro ch'án kixin:

—A ntá jie tí nkexro chóna kabolsa la tsakja sátsjiko la ko kjaxin tí nkehe t'inka chichaon. A ntá tí nkexro chóntahya chica espada chrókjuinchekji ch'án tí ka t'inkáya ch'án kixin chrók'ueñaxín ch'án ijnko chica. ³⁷ Ntáxrjan kixin t'ichjánxin tsoxiteyá tsona éxi nixja xroon itén Dios ntáchro kixin: “Éxi yóhe ijnko chojni kjuasin jie mé xikaha ts'ikon sín ch'án.”* Mé xikaha kaín nkehe chrónka xroon itén Dios kixin tsona mé t'ichjánxin tsoxiteyá —ichro ch'án.

³⁸ A ntá jehe sín ntáchro sín kixin:

—Inchéni, ntihi tjejó yaá chica espada —ichro sín.

Ntá kjuátehe ch'án kixin:

—Kjonté ó táhó la ó nchoxon —ichro ch'án.

Ch'ín Jesús nixjeexín ch'án Dios tí Huerto Getsemani

(Mt. 26.36-46; Mr. 14.32-42)

³⁹ Ntá ch'ín Jesús sákjuixin ch'án chjasin Jerusalén sákjuí ch'án ijna Olivo kixin xikaha kuénhen ch'án k'uékjich'e ch'án la koí tí sín k'uájiko ch'án tinkáchréhe sín. ⁴⁰ Ntá kjuíji sín ntiha ntá ntáchro ch'án kixin:

—Nixjehérá Dios kixin tsjinkítsa ch'án tí jahará kixin tsjásinhyará jie —ichro ch'án.

⁴¹ Ntá ch'ín Jesús k'uaxrjenta ch'án tí jehe sín sákjuí ch'án ijnko kjínxin éxi chrók'ue chojni xro. Ntá kjuák'exín toch'in ch'án kixin tsonixjehe ch'án Dios. ⁴² Ntá ntáchro ch'án kixin:

—It'éni, tí tjinkávan chrókjuinchekaáni kaín nkehe náxrxónhya chrók'uaatsínkani. Kjánchó jehya éxi tjinkaonni jeheni chrókónhenni. Náhi. Éxi tjinkávan jaha —ichro ch'án.

⁴³ Ntá xrínahya k'uikon ch'án itjen ijnko ángel tsíkixín nkaya nkajní kixin tsjinkítsa ch'án. ⁴⁴ A ntá imá tóxakonhen ch'án, a ntá antsí fuerte nixjehe ch'án Dios, ntá k'uixin ch'án ntachjin éxi yóhe jni xikaha k'uitji k'uánójtjen nonte.

⁴⁵ Ntá tió kjuixin nixjehe ch'án Dios ntá k'uínkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxín ch'án kixin tjejójua tí jehe sín kixin kjuachahya sín imá t'ává sín. ⁴⁶ A ntá ntáchro ch'án kixin:

—¿Nkekuènte tjejochrinrá? T'àyará. Nixjehérá Dios kixin tsjinkítsará ch'án kixin tsjachroehyará ch'ín Tsochren —ichro ch'án.

Itsé sín tí ch'ín Jesús

(Mt. 26.47-56; Mr. 14.43-50; Jn. 18.2-11)

⁴⁷ A ntá ch'ín Jesús naxa tjenixja ch'án ntá xrínahya kui nchónhya chojni yámá chica. Tí ch'ín it'in Judas, ijnko tí teyo sín k'uájiko ch'ín Jesús, kuítaón ch'án ntja, ntá kóchjinehe ch'án tí ch'ín Jesús kixin sineko ch'án kochító.

⁴⁸ A ntá ntáchro ch'ín Jesús kixin:

—Judas, ¿á ijnko kochító ó sìnchekjixian tí Xjeen Dios K'óna Chojni? —ichro ch'án.

⁴⁹ A ntá tí sín tjejóko ch'ín Jesús tió k'uikon sín kixin xikaha kónhen ntá kjuanchankíhi sín ch'án kixin:

* 22:37 Isaías 53.12

— Ìnchéni, ¿á chrókuatéxinni sín chica espada? — ichro sín.

⁵⁰ A ntá ijnko tí jehe sín kjuíncheníhi ch'án ijnko ch'ín ch'ehe xra nchat'á t'etoan, kóchrínjin ch'án ntatsjon ch'án chjina.

⁵¹ A ntá ntáchro ch'ín Jesús kíxin:

— Táhó, t̄jtohé, ó t̄jen — ichro ch'án.

Ntá ch'ín Jesús itsé ch'án tí ntatsjon tí ch'ín ch'e xra a, ntá kjuínchekit̄ohe ch'án jina. ⁵² Ntá tuénxín ch'ín Jesús ntáche ch'án tí sín nchat'á t'etoan la ko tí sín t'etoan kuènte n̄jnko la ko tí sín táda t'etoan mé tí sín tsíki sátsjiko sín ch'án ntáchro ch'án kíxin:

— ¿Nkekuènte k'uinkakoará chica espada la ko inta éxí chrótserá ijnko xíchee? ⁵³ A ntá kaín yaon kjuak'é janhan k'uejóni kjuákoáxinrá tí n̄jnko ntiha la ninkehó t̄shyará tí janhan. A ntá jie mé tí hora kuèntará ntá kjuacha tí kjuachaxin kuènte sítíé — ichro ch'án.

Ch'ín Pedro kjuínchemá ch'án kíxin chónhya ch'án tí ch'ín Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Ntá itsé sín tí ch'ín Jesús kjuínchenteto sín ch'án sákjuíko sín ch'án nt̄ohe nchat'á t'etoan. A ntá ch'ín Pedro ikjín tinkáchréhe ch'án. ⁵⁵ A ntá tí nt̄asin ntiha kjuaka sín xrohi síxrohe sín. A ntá ch'ín Pedro kjaxin kjuák'entaxín ch'án tí t̄jéjó sín ntiha. ⁵⁶ A ntá ijnko tjachjin ch'e xra tió k'uíkon tjan kíxin koí ch'ín Pedro t̄jehjixrohe ch'án ntiha ntá komá tjan tí jehe ch'án ntá ntáchro tjan kíxin:

— Kjaxin tí ch'ín i xriko tí ch'ín Jesús — ichro tjan.

⁵⁷ Ntá ch'ín Pedro kjuínchemá ch'án ntáchro ch'án kíxin:

— ¿Nkekuènte x̄ikaha ichrúa jaha? Ni chonhya tí nkexro a — ichro ch'án.

⁵⁸ A ntá ant̄síkoá chr'éx̄in ikui í jnko chojni k'uíkon tí jehe ch'án ntá ntáchro kíxin:

— Kjaxin jaha x̄rikoa tí nkexro a — ichro.

Ntá ch'ín Pedro ntáchro ch'án kíxin:

— Náhí, janhya — ichro ch'án.

⁵⁹ Ntá éxí ijnko hora chr'éx̄in ntá nixja í jnko ch'ín chénka tí í so sín kíxin: — Tí ch'ín i chaxín xriko tí ch'ín Jesús kíxin kjaxin sík̄j̄ix̄in ch'án estado Galilea — ichro ch'án.

⁶⁰ Ntá ntáchro ch'ín Pedro kíxin:

— Nonahya janhan nkehe tí ntáchrúa — ichro ch'án.

Ntá tuénxín nax̄a t̄jenixja ch'án ntá x̄rínahya ó tsje koch̄int̄oá. ⁶¹ Ntá Ìnchéni kuinkát̄jía ch'án komá ch'án tí ch'ín Pedro. Ntá ch'ín Pedro xraxinkaon ch'án kíxin x̄ikaha tsíchronka Ìnchéni kíxin: “Nax̄a tsotsjehya koch̄int̄oá s̄inchemána iníya.”† ⁶² Ntá ch'ín Pedro sákjuí ch'án ntója, tsjánka ch'án xraxinkaon ch'án tí jie kjuasin ch'án.

Kjuanoá sín tí ch'ín Jesús

(Mt. 26.67-68; Mr. 14.65)

⁶³ Tí sín sákjuíko ch'ín Jesús kjuanoá sín ch'án la ko kjuate sín ch'án. ⁶⁴ K'uikjéhe sín ka kon ch'án ntá kjuate sín ch'án ntá kjuanchankíhi sín ch'án kíxin:

— Ijie la tónoha nkexro kjuatia — ichro sín.

⁶⁵ La ko í so nkehe ntáchro sín k'uántaxín̄in sín ch'án.

Ntá sákjuíko sín tí ch'ín Jesús nkayakon tí sín t'etoan

(Mt. 26.59-66; Mr. 14.55-64; Jn. 18.19-24)

† 22:61 Lucas 22.34

⁶⁶ A ntá kóyaon nchakotjin la kójnkotsé kaín tí sín táda t'etuenhen tí sín judío, la ko tí nchat'á t'etōan, la ko tí sín maestro tjako tí ley la sákjuiko sín tí ch'ín Jesús nkayakon tí sín imá t'etōan. Ntá ntiha kjuanchankíexín sín ch'án kixin:

⁶⁷ —Ijie la chronka, ¿á jaha tí Cristo? —ichro sín.

Ntá jehe ch'án kjuátehe ch'án kixin:

—Tí tsontáxrjan kixin chaxín janhan na tsitekákonhyará. ⁶⁸ A ntá tí chrókjuánchánkíhará ichrén nkehe la chrókjuáteehyará la ko chrók'uatjántahyarána. ⁶⁹ A ntá jie tí Xjeen Dios K'óna Chojni mé tsjak'etjaxín tí tja chjina kuènte Dios chóna kaín xín kjuachaxin —ichro ch'án.

⁷⁰ A ntá tuéxín kaín sín kjuanchankíhi sín ch'án kixin:

—¿Á chaxín jaha tí Xjeen Dios? —ichro sín.

A ntá kjuátehe ch'ín Jesús ntáchro ch'án kixin:

—Chaxín janhan xíkaha ntáchrorá tí jahará —ichro ch'án.

⁷¹ Ntá kjo sín kichó sín kixin:

—¿Nkehe tsonhen naxa chróchrónka í so chojni? Jeheni kaín ni kuínhinni nkehe k'uaxrjexín ir'va ch'án —ichro sín.

23

Sákjuiko sín tí ch'ín Jesús nkayakon tí ch'ín Pilato

(Mt. 27.1-2, 11-14; Mr. 15.1-5; Jn. 18.28-38)

¹ Ntá kaín sín k'uínkatjen sín ntá sákjuiko sín tí ch'ín Jesús nkayakon tí ch'ín Pilato. ² A ntá ntiha kjuankíxin sín t'eka sín jie tí jehe ch'án ntáchro sín kixin:

—K'uitjani tí nkexro i tjachroe ch'án chojni nación kuènténi ntáchro ch'án kixin chrókjuenkeehyani tí gobierno romano, la ko kjaxín ntáchro ch'án kixin jehe ch'án mé Cristo ch'án, na mé ijnko rey tíha —ichro sín.

³ A ntá ch'ín Pilato kjuanchankíhi ch'án tí ch'ín Jesús ntáchro ch'án kixin:

—¿Á jaha tí Rey t'etuenhen tí sín judío a ní? —ichro ch'án.

Ntá ch'ín Jesús kjuátehe ch'án ntáchro ch'án kixin:

—Chaxín xíkaha ntáchrua jaha —ichro ch'án.

⁴ A ntá ch'ín Pilato ntáche ch'an tí sín nchat'á t'etōan la ko tí chojni tsíkikao sín kixin:

—T'itjáhya nijnko jie chóna tí nkexro i —ichro ch'án.

⁵ A ntá jehe sín antsí itsen nixja sín ntáchro sín kixin:

—Tjachroe ch'án kaín xín chojni estado Judea kixin tí nkehe tjako ch'án. Kjuankíxin ch'án kjuako ch'án estado Galilea, a ntá jie ó kui ch'án ntihi la xíkaha tjako ch'án —ichro sín.

Sákjuiko sín tí ch'ín Jesús nkayakon tí ch'ín Herodes

⁶ A ntá kuínhin ch'ín Pilato xíkaha ntáchro sín ntá kjuanchankí ch'án á tí ch'ín i la á Galilea tsíkijxin ch'án. ⁷ A ntá kjuátehe sín kixin ntaha tsíkijxin ch'án, ntá k'uetoan ch'ín Pilato kixin sátsjiko sín ch'án tí tjen ch'ín Herodes kixin jehe ch'án mé gobernador tí estado Galilea kixin kjaxín ch'án tjen ch'án chjasin Jerusalén tí yaon a. ⁸ A ntá ch'ín Herodes k'uíkon ch'án kjuíji tí ch'ín Jesús ntá imá kóchéhe ch'án kixin isé tjinkaon ch'án chrók'uikon ch'án tí ch'ín Jesús kixin tsíkíkin ch'án chrónka chojni nkexrí tjako ch'án, ntá tjinkaon ch'án chrók'uikon ch'án ijnko kjuaxroan chrókjuakoxín ch'ín Jesús. ⁹ Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuáteehya ch'án. ¹⁰ Kjaxín ntiha k'uejó tí sín nchat'á

t'etōan la ko tí sín maestro tjako tí ley la ntá nchónhya jię k'ueka sín ch'án k'ixin nínkakonhen sín ch'án.

¹¹ A ntá ch'ín Herodes la ko tí sín soldado kuente ch'án kjuank'ixin sín kjuikosáyehya sín ch'án la ko kjuanoá sín ch'án kjuínchek'inkáya sín ch'án ka tjete náxrjón éxí t'inkáya tí sín rey. A ntá tuénxín ch'ín Herodes k'uetōan ch'án k'ixin sátsji ch'án inaá tí tjen ch'ín Pilato. ¹² A ntá tí yaon a ch'ín Pilato la ko ch'ín Herodes kjuank'ixin sín tjuèhe k'ichó sín k'ixin tí senó la k'uénínkakohen k'ichó sín.

K'uetōan sín k'ixin its'en ch'ín Jesús

(Mt. 27.15-26; Mr. 15.6-15; Jn. 18.39—19.16)

¹³ A ntá ch'ín Pilato k'uíyehę ch'án tí nchat'á t'etōan la ko tí sín gobernador la ko kaín chojni chjasin ntiha k'ixin tsjinkotsé sín ¹⁴ ntá ntáche ch'án sín k'ixin:

—Jahará kjuikuąnará tí nkexro i ntáchrórą k'ixin ntoáhya tjakohę ch'án chojni k'ixin chrókónínkakohen sín tí gobierno. Kjánchó janhan kjuánchánkíha ch'án itsjé nkehe kuínhínrá ntá k'uíkonrá k'ixin k'uitjahya ninkehó tí jię tékará ch'án. ¹⁵ La ko kjaxin ch'ín Herodes k'uitjahya ch'án tí jię tékará tí ch'ín Jesús ntá chr'án ch'án inaá ntihi. Ó k'uíkonrá k'ixin ninkehó jię chóntahya ch'án chrók'uenxín ch'án. ¹⁶ Sıntakjasóte ch'án ntá chr'éxin tsjánjuan kjuachaxin sátsji ch'án —ichro ch'án.

¹⁷ A ntá tí yaon kia a la t'ichjánxin k'ixin ch'ín Pilato tsjanjon kjuachaxin sátsji ijnko chojni tjechjina k'ixin xíkaha kuénhen sín ósé. ¹⁸ Ntá kaín sín kjuank'ixin sín k'óyako sín ntáchro sín k'ixin:

—¡Tí nkexro la náhi! ¡Ch'ín Barrabás mé t'atjánta! —ichro sín.

¹⁹ A ntá ch'ín Barrabás tsík'ikjéhe sín ch'án k'ixin jehe ch'án la ko í so chojni kónínkakohen sín tí chjasin ntiha la ko tsík'óyan ch'án chojni. ²⁰ A ntá ch'ín Pilato tjinkaon ch'án chrókjuanjon ch'án kjuachaxin sáchrókjui ch'ín Jesús. A ntá xíkjanchankíhi ch'án tí chojni síin ntiha inaá. ²¹ Kjánchó jehe sín antsí má tsen k'óyako sín ntáchro sín k'ixin:

—¡Tjakékanirá ch'án ntacruz! ¡Tjakénkanirá ch'án ntacruz! —ichro sín.

²² Níxin xíkjanchankí ch'ín Pilato ntáchro ch'án k'ixin:

—¿Xá nkehe ntoáhya kjuích'e ch'án? Janhan la k'uitjahya ninkehó jię chóna ch'án chrók'uenxín ch'án. Sıntakjasóte ch'án la ntá chr'éxin tsjánjuan kjuachaxin sátsji ch'án —ichro ch'án.

²³ Kjánchó jehe sín antsí tsen kjuanchia sín ntáchro sín k'ixin chrókjuak'enkáni ch'án ntacruz. A ntá k'óyako sín la ko k'óyako tí sín nchat'á t'etōan ntá kjuacha sín kjuanchia sín tí nkehe tsonhen. ²⁴ A ntá ch'ín Pilato kjuanjon ch'án kjuachaxin xíkaha tsonhen tí nkehe kjuanchia sín. ²⁵ A ntá kjuanjon ch'ín Pilato kjuachaxin sátsji tí ch'ín Barrabás éxí kjuanchia sín, na mé tí ch'ín k'uikjéhe sín k'ixin k'uékje ch'án kjuanínkaon la ko k'uék'óyan ch'án chojni. A ntá ch'ín Pilato kjuanjon ch'án kjuachaxin k'ixin sátsjiko sín tí ch'ín Jesús sinchekjasóte sín ch'án éxí tjinkaon sín.

Kjuak'enkani sín ch'án ijnko ntacruz its'en ch'án

(Mt. 27.32-44; Mr. 15.21-32; Jn. 19.17-27)

²⁶ A ntá tió sákjuiko sín ch'ín Jesús tsjak'enkani sín ch'án ntacruz, ntá itsé sín ijnko ch'ín tsíkjin chjasin Cirene it'ín ch'án Simón, mé kjuixin ch'án nontęe ch'án, ntá kjuínchekamá sín ch'án tí ntacruz tsjak'enkani ch'ín Jesús la tinkáchréhe ch'án.

²⁷ Kjaxin chréhe nchónhya chojni ntoa la ko nchónhya chojni chjin chréhe sín tsjánkàma sín ch'án. ²⁸ Kjánchó ch'ín Jesús nkátjía ch'án komá ch'án tí jehe sín kixin tsjánka sín ntáchro ch'án kixin:

—Jahará chojni chjin chjasin Jerusalén, chrótsjankamañarará tí janhan. Chrótsjankará kixin tí nkehe tsonhanrá jahará la ko xjaanrá. ²⁹ Kixin itsi yaon tsontáchorá kixin náxrjón tí sín chóntahya xjan la ko tí sín kjuínchekokjéhya xjan la ko tí sín kjuínchekakíhya ninkehó xjan. ³⁰ Ntá tsjankixin chojni tsontáche sín tí jna kixin tsoxrátja sín la ko tsontáche sín tjo kixin tsjavá sín. ³¹ Kjónté tí nta yoa la ó sítónhen kaín tíhi la íchá tió chróxámá tí nta la ¿nkehe tí kaá chrókónhen tí nta tsíxámá? —ichro ch'án.

³² Kjaxin sákjuiko sín iyó sín tsíkjasin jie kixin ts'óyánko sín ch'ín Jesús. ³³ Ntá tió kjuíji sín tí jna tikítexín sín tí jna Nta Hueso Kja Chojni, na mé ntiha kjuak'enkani sín ch'ín Jesús tí ntacruz la ko kjaxin tí iyó sín chóna jie, la ijnko la tja ch'án chjina la íjnko la tja ch'án kjon tjejóyáni sín ntacruz kjaxin. ³⁴ Ntá tió kjuixin kjuak'enkani sín tí ch'ín Jesús tí ntacruz ntá nixjehe ch'án tí It'é ch'án Dios ntáchro ch'án kixin:

—It'éni, tónínkakuénhya sín kixin tí nkehe kjuích'ehe ni sín kixin noehya sín nkehe tí kjuích'e sín —ichro ch'án.

A ntá tí sín soldado k'óxikayehé sín iké ch'án ch'exín sín suerte kixin tsonoxén sín nkexro tsakja tí ka a. ³⁵ Kaín chojni chjasin ntiha tjejótsjehe sín kixin xikaha sítónhen la ko kjaxin tí sín t'etōan tjanoá sín tí jehe ch'án ntáchro sín kixin:

—Kjuínchekaá ch'án ókjé chojni, a ntá jie jehe ch'án chrókjuínchekaá ch'án asén ch'án tí chaxín jehe ch'án tí Cristo tí nkexro tsíkjejá Dios —ichro sín.

³⁶ La ko kjaxin tí sín soldado kjuanoá sín ch'án kóchjinehe sín ch'án kjuikao sín xranvino náxrjónhya chjéhe sín ch'án chrók'ui ch'án, ³⁷ ntáche sín ch'án kixin:

—Tí jaha chaxín rey kuente tí sín judío ntá jahvá chrókjuínchekaá asán —ichro sín.

³⁸ Kjaxin ntiha ikja tí ntacruz kjuak'enkani sín ijnko ntachiso ntsí tsíkjin sín nkiva griego la ko nkiva latín la ko nkiva hebreo ntáchro kixin: “Tíha mé Rey kuente tí sín judío”, ichro.

³⁹ Ijnko tí sín chóna jie tjenkani ntacruz k'uántaxínhin ch'án tí ch'ín Jesús ntáchro ch'án kixin:

—Tí jaha chaxín Cristo, jahvá chrókjuínkajian asán, ntá tsjixin ntá chrókjuínkajian tí jeheni —ichro ch'án.

⁴⁰ A ntá tí ch'ín jnko a k'uētuēnhen tí í jnko ch'ín a kixin tsotání ch'án, ntáchro ch'án kixin:

—Ntáchrohya xikaha. ¿Á chrakuenhya Dios kixin xikaha ichrua kixin kjaxin jeheni na ó tjejótsjasóteni? ⁴¹ Yóini na nchoxon tjejótsjasóteni tjejótsjenkani tí jie kjuasinni. A ntá tí nkexro i ninkehó nkehe jínahya kjuích'e ch'án, la ntá koí ch'án tjetjasóte ch'án —ichro tí ch'ín a.

⁴² Ntá ntáchro ch'án kixin:

—Jesús, xráxinkávan tí janhan tió ts'ayéhé kjuachaxin tsétōan jaha —ichro ch'án.

⁴³ Ntá kjuátēhe ch'ín Jesús ntáchro ch'án kixin:

—Chaxín ntáxrjan kixin ijie jaí ts'ejóko kíchó ni nkaya nkajni —ichro ch'án.

Ntá ó k'uén ch'ín Jesús

(Mt. 27.45-56; Mr. 15.33-41; Jn. 19.28-30)

44 Ntá ó chjina chonkíxin. A ntá k'uúxin tie kuenté chjasintajni hasta las tres kónjín. 45 Ik'uén yaon, la ko tí ka t'inkákuènxín nkaxenhen njnko k'uichje jnkosiné. 46 Ntá ch'ín Jesús k'uèya ch'án itsen ntáchro ch'án kíxin: —It'èni tjen nkaya nkajní, jaha ts'ayéhé asènni —ichro ch'án.

Xikaha ichro ch'án ntá k'uén ch'án.

47 A ntá k'uíkon tí ch'ín capitán romano kaín xikaha kónhen ntá kjuanchehe ch'án kjuasáyé Dios ntáchro ch'án kíxin:

—Chaxín tí nkexro la jína la ninkehó jie chóntahya —ichro ch'án.

48 A ntá kaín tí chojni tsíkójnkotsé ntiha k'uíkon sín xikaha kónhen ntá sákjuúxin sín ntiha chrakon sín tjate sín ntakuin sín kíxin xikaha kónhen. 49 A ntá kaín tí sín chóxin ch'ín Jesús la ko kjaxin tí chojni chjin k'uékinkáchónki sín ch'án tsíkjixín sín estado Galilea ikjín tjejó sín tjejótsjehe sín nkerí sítónhen.

Sákjuúkjává sín tí ch'ín Jesús

(Mt. 27.57-61; Mr. 15.42-47; Jn. 19.38-42)

50 A ntá ntiha tjen ijnko ch'ín it'in José, chjasén ch'án mé Arimatea estado Judea. Kjaxin jehe ch'án ijnko tí sín imá t'etóan kuènte tí sín judío, jehe ch'án mé ijnko nkexro jína. 51 Jehe ch'án kjuák'echónhen ch'án itsi tí kjuachaxin kuènte Dios. Méxra kóxrjienhya ch'án nkexrí kjuích'e tí sín í so t'etóan. 52 Méxra sákjuútsjehe ch'án tí ch'ín Pilato kjuikjanchia ch'án tí cuerpo kuènte ch'ín Jesús. A ntá ch'ín Pilato kjuanjon ch'án kjuachaxin. 53 Ntá sákjuí sín tsjinkajinxín sín ch'án ntacruz. Ntá kjuixín kjuinkajin sín ch'án ntá kjuínchek'ísímá sín ch'án ijnko ka jie, ntá sákjuíko sín tsoxravá ch'án ijnko tòye xráxín tsíkjich'èna ch'ín José jehó tjo la ko naxa ninkexró tsixraváhya ntiha. 54 Kaín tíha kónhen tí yaon viernes kónjín. Tí yaon mé tjejóyaxínhin sín kíxin í séhya tsoxrankíxin tí yaon t'ok'éhe sín sábadó kíxin kohya kjuachaxin sich'e sín ninkehó xra.

55 A ntá tí chojni chjin nkáchréhe kjuikoxín ch'ín Jesús estado Galilea kjaxin sákjuíko sín sákjuútsjehe sín tí tòye tsoxravá ch'án la ko k'uíkon sín jína nkexrí kjuak'e sín tí cuerpo kuènte ch'án. 56 A ntá tió kjan sín tí nchia tjejó sín k'óyaxínhin sín kjueya sín xroan xraxé náxrjón itsa ntóé ch'án kíxin xikaha k'uékinkáchónki tí sín judío. A ntá k'ok'éhe sín tí yaon sábadó éxi t'etóan tí ley.

24

Ó xechón ch'ín Jesús

(Mt. 28.1-10; Mr. 16.1-8; Jn. 20.1-10)

1 Tí yaon domingo, mé tí yaon xrankíxixín semana tí chojni chjin na xíkjan sín inaá tí tsixravá ch'ín Jesús sákjuíko sín xroan xraxé tsík'èna sín. La ko í so chojni chjin sákjuúkotoxín sín. 2 Ntá ó kjuíji sín ntiha k'uíkon sín tí xro tsíkjèxín tí tòye la í xikahya tjen tí sákjuí sín. 3 Ntá k'uíxenhen sín tòye ntá k'uitjahya sín cuerpo kuènte Ìnchéni Jesús. 4 Ntá chrakon sín ntá noehya sín nkehe sich'e sín. Ntá xrínahya k'uíkon sín iyó chojni ntoa tjejóxin toté chjinaxón tí tjejó sín, la iké sín la tjákini tsjehe. 5 A ntá tí chojni chjin kjuínchek'ísén kja sín tjejótsjehe sín nonte kíxin imá chrakon sín, a ntá tí chojni ntoa ntáchro sín kíxin:

—¿Nkekuènte xritjéyará tí nkexro tjechón tí síin tí sín tsík'en? 6 Tjenhya ch'án ntihi la ó xechón ch'án. Xráxinkáonrá nkehe ntáchro ch'án tí kjuák'e ch'án estado Galilea 7 ntáchro ch'án kíxin jehe ch'án tí Xjeen Dios K'óna

Chojni t'ichjánxin tsotsé tí sín chón̄ta jie tsjak'enkani sín ch'án ntacruz la ko tí nixin yaon tsoxechón ch'án inaá —ichro sín.

⁸ A ntá tí síchjin xráxinkaon sín kixin nkexrí tsíchronka ch'ín Jesús, ⁹ a ntá tió kjanxin sín tí tsíxravá ch'án ntá chénka sín tí tejnko tí sín k'uek'ajiko ch'án la ko kaín tí í so sín. ¹⁰ A ntá tí sín sákjuíchenka tí sín apóstol la mé tjan María Magdalena la ko tjan Juana la ko tjan María iné ch'ín Jacobo la ko tí í so chojni chjin. ¹¹ A ntá tí sín apóstol kuínhin sín éxí ijnko nkehe chaxínhya tí nkehe chrónka tí jehe sín ntá kuítekakonhya sín.

¹² Kjánchó ch'ín Pedro k'uaxrjexín ch'án nchia tinká ch'án sákjuítsjehe ch'án tí tsíkixravá ch'ín Jesús. Ntá kjuíji ch'án k'uíkon ch'án tí nkaxenhen tōye k'uíkon ch'án kixin jehó tí ka tsík'ísímá ch'án ntaha tjen. Ntá kjan ch'án tí nchia tjen ch'án chrakon ch'án kixin xikaha tsíkónhen.

Tí ntia Emaús sákjuí sín la kjuíjichréhe Ìnchéni
(Mr. 16.12-13)

¹³ A ntá tí yaon a iyó sín sákjuí sín ijnko chjasin ntsí it'in Emaús, mé kjínxin tejnko kilómetro tí chjasin Jerusalén. ¹⁴ Tinkákjo sín kichó sín kixin kaín tí nkehe tsíkónhen tí chjasin Jerusalén. ¹⁵ A ntá nachrohe nixja sín tinkákjo sín, a ntá ch'ín Jesús kóchjinehe ch'án tí jehe sín sákjuíko sín ch'án. ¹⁶ Kjónté k'uíkon sín ch'án la kjuanjonhya Dios kjuachaxin kixin chrókjuatsōan sín tí jehe ch'án. ¹⁷ A ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tinkakjórá tí k'uinkará ntia? ¿Nkeuente kixin t'avará? —ichro ch'án.

¹⁸ A ntá ijnko tí jehe sín mé it'in Cleofas, mé kjuátehe ch'án kixin:

—Kaín chojni ó nohe sín nkehe tí tsíkónhen chjasin Jerusalén. A ntá jaha kjaxin kjuák'e ntiha la ¿á jahvá noahya nkehe tí tsíkónhen tí yaon a ní? —ichro ch'án.

¹⁹ A ntá jehe ch'án kjuanchankíhi ch'án tí jehe sín kixin:

—¿Xá nkehe tsíkónhen? —ichro ch'án.

Ntá chénka sín ch'án kixin:

—Tí nkehe tsíkónhen ch'ín Jesús tsíkixxin ch'án chjasin Nazaret. Jehe ch'án na ijnko nkexro k'uechronka itén Dios, na mé kjuakoxin ch'án kjuachaxin kuente nkaya nkajní kaín tí nkehe k'uekjich'e ch'án la ko kaín nkehe k'uéntáchro ch'án mé xikaha k'uíkon Dios la ko k'uíkon tí chojni. ²⁰ A ntá tí nchat'á t'etoan la ko tí sín gobierno kjuínchek'áyéhe sín ch'án kixin its'en ch'án la tsjak'enkani sín ch'án ntacruz. ²¹ A ntá jeheni k'uejóchónhenni kixin jehe ch'án chrókjuinchekaá ch'án tí sín Israel. A ntá jie ó chón̄ta iní yaon xikaha kónhen. ²² A ntá iso chojni chjin kjaxin k'uekinkáchónki sín ch'án kjuínchechrakon sín tí jeheni kixin jehe sín tsíkijtsjehe sín tí tsíxravá ch'án imá nchítjén ²³ la mé tsík'itjahya sín tí cuerpo kuente ch'án, ntá kjan sín chrónka sín kixin tsík'ikon sín iyó sín ángel chrónka sín kixin ch'ín Jesús la tjechón ch'án, ichro sín. ²⁴ Ntá tuénxín iyó tí sín k'uájikoni kjaxin sákjuítsjehe sín tí tsíxravá ch'án la kuik'itja sín éxí chrónka tí chojni chjin, kjánchó ch'ín Jesús la k'uíkonhya sín —ichro tí yaá sín a.

²⁵ Ntá kjuátehe ch'ín Jesús ntáchro ch'án kixin:

—Lontirá jahará la tjokahya kuítekáonrá tí nkehe k'uechronka tí sín profeta k'uejó ósé. ²⁶ ¿Xá t'ichjánxinhya chrókjuasóte Cristo senó ntá chrók'uáyéhe ch'án tí kjuachaxin chrók'uetoan ch'án? —ichro ch'án.

27 Ntá kjuankíxin ch'án chronkaxín ch'án nkexrí t'axrjexín kaín tí nkehe nixja xroon itén Dios kixin nkehe tsonhen tí jehe ch'án la mé kjuankíxixín ch'án chronkaxín ch'án tí nkehe tsíkjin ch'ín Moisés la ko kjuintaxín chronkaxín ch'án tí nkehe tsíkjin tí í so sín profeta.

28 Ntá kjuíji sín tí chjasin ntsí a, a ntá ch'ín Jesús tsjehe ch'án éxí naxa sáchrókjui ch'án k'ín. 29 A ntá jehe sín mé chronóehē sín ch'án kixin ntahó chrókuitqhe ch'án, ntáchro sín kixin:

—Titoḡa ts'ejóni ntihi kixin ntá ó kóntó la ó ts'ixitie —ichro sín.

Ntá ch'ín Jesús la k'uíxenhēn ch'án nchia kixin tsitqeko sín ch'án. 30 A ntá tjejótxaxínko sín ch'án tí tjen tí ntamesa, ntá ntiha xranjon nkehe sine sín, ntá kuákja ch'án tí niotja la kjuanchehe ch'án kjuasáyé Dios la kóchrít'q ch'án kuákja tí jehe sín. 31 Ntá tuénxín xraxinkaon sín ntá kjuátsoan sín tí jehe ch'án. Ntá tuénxín k'uitjáyankoá ch'án. 32 Ntá jehe sín itjo sín kichó sín ntáchro sín kixin:

—¿Á chaxínhya chéhe ḡsenni tí kuikaoni ch'án ntia kixin chronkaxín ch'án nkexrí t'axrjexín tí itén Dios tsíkjin sín ósé? —ichro sín.

33 Ntá tuénxín k'uínkatjen sín kjan sín chjasin Jerusalén. A ntá ntaha k'uitja sín tí tejnko sín jnkokoá tjejó sín la ko tí í so sín. 34 A ntá tí sín ntiha chrónka sín kixin:

—Chaxín tjechón Ìnchéni la mé ch'ín Simón tsík'ikon ch'án tí jehe ch'án —ichro sín.

35 Ntá jehe sín kjaxin chrónka sín nkehe tsíkónhen tí ntia sákjuí sín kixin nkexrí kjuátsoanxín sín tí ch'ín Jesús tí kóchrít'q ch'án niotja kjuanjon ch'án.

*Titàya k'uikuèn sín ikui ch'ín Jesús
(Mt. 28.16-20; Mr. 16.14-18; Jn. 20.19-23)*

36 A ntá jehe sín naxa tjejótxo sín kaín tí nkehe tsíkónhen, a ntá xríñahya ch'ín Jesús kjuák'e jnkosiné tí tjejó sín, nixjehe ch'án tí jehe sín ntáchro ch'án kixin:

—¿Á kjuaxróxin tjejorá? —ichro ch'án.

37 A ntá jehe sín la imá chrakon sín kjuenkayáxin sín kixin k'uíkon sín ijnko xrintqo chojni.

—Ách'e kjuachani —ichro sín.

38 A ntá ntáche ch'ín Jesús tí jehe sín kixin:

—¿Nkekuènte chrakonrá? ¿Nkekuènte xíkaha tjenkayáxin ḡsánrá?

39 Tsjehérá tjaná la ko totená kixin chaxín janhan. Itserána la ko komárána, kixin ijnko xrintqo chojni chóntahya nto la ko chóntahya hueso éxí t'íkonrá kixin chonta janhan —ichro ch'án.

40 A ntá xíkaha ichro ch'án ntá kjuako ch'án itja ch'án la ko toté ch'án.

41 Ntá kjónté xíkaha k'uíkon sín la naxa kuitekakonhya sín kixin chéhe sín la ko chrakon sín. A ntá ch'ín Jesús ntáchro ch'án kixin:

—¿Á chontará ichrén nkehe sineni ntihi ní? —ichro ch'án.

42 Ntá chjehe sín ch'án it'q koche tsíchjántaón xrohi la ko ijnko t'q katjé kotsjenta tjia tsjen. 43 A ntá jehe ch'án kuákja ch'án kjóne ch'án k'uíkonxín kon sín, 44 Na ntá ntáchro ch'án kixin:

—Kaín tí nkehe k'uátsínka tí janhan mé k'uéntáxrjan tí naxa k'uék'ejóni senó; kixin t'ichjánxin tsoxiteyá kaín tí nkehe chrónka tí ley tsíkjin ch'ín Moisés la ko tí nkehe tsíkjin tí sín profeta la ko tí nkehe ntáchro tí salmo kixin nkexrí tsona janhan —ichro ch'án.

⁴⁵ Ntá kjuanjon ch'án kjuachaxin kixin tsienxín sín tí xroon itén Dios tsíkjin sín ósé. ⁴⁶ Ntá chénka ch'án sín kixin:

—Mé xíkaha nixja tí xroon itén Dios kixin tí Cristo la t'ichjánxin ts'en, la nixin yaon t'ichjánxin tsoxechón ch'án. ⁴⁷ A ntá t'ichjánxin tsjakoxin sín ihnié ch'án tsjankíxixín sín chjasin Jerusalén la ko chrókuinhin chojni kuenté chjasintajni kixin chrókuítóhe sín ijje sín chrókuitekaon sín tí jehe ch'án kixin jehe ch'án mé chrókjuincheyaon tí ijje sín. ⁴⁸ A ntá jahará mé tsochronkaxínrá kixin xíkaha k'uíkonrá kaín tíha. ⁴⁹ Ntá tsochr'an janhan tí Nchakuen T'aná éxí tsintáchro ch'án. Kjánchó chjasin Jerusalén ntahó titohará tsoxiteyájia ts'ayéhérá kjuachaxin tsixin nkaya nkajní.

Ch'in Jesús sákjuí ch'án nkaya nkajní

(Mr. 16.19-20)

⁵⁰ A ntá ch'in Jesús sákjuíko sín ch'án k'uaxrjexín sín chjasin Jerusalén sákjuí sín chjasin Betania. Ntá kjuàya ch'án tja ch'án kjuíncheyaon ch'án tí jehe sín. ⁵¹ A ntá kjuixin kjuíncheyaon ch'án sín ntá k'uaxrjenta ch'án tí jehe sín ntá sákjuí ch'án nkaya nkajní. ⁵² A ntá jehe sín k'uíkon sín xíkaha, a ntá xraxinkaon sín ch'án, ntá kjan sín chjasin Jerusalén chéhe sín. ⁵³ A ntá kaín yaon tjejó sín nkaxenhen njnko tjanchehe sín Dios kjuasáya. Amén.

Tí tan jína chrónka ch'ín Juan

Tí nkexro chrónkaxín nkexrí tjen Dios mé k'óna ijnko chojni chjasintajni

¹ 12A ntá tí xrankíxixín naxa k'ónahya tí chjasintajni a na mé xráxín tjen tí nkexro chrónkaxín nkexrí tjen Dios, na mé Cristo tíha, na mé kjuák'eko Dios na mé kjaxin Dios tíha. ² Tí xrankíxixín na mé tí nkexro xráxín kjuák'eko Dios ³ la ko kjuachaxin kuente ch'án na mé k'ónaxín kaín xín nkehe síin jie. A ntá kohya ninkehó nkehe k'ónakoá, na mé kaín xín nkehe síin na mé k'ónaxín tí kjuachaxin kuente ch'án. ⁴ Jehé ch'án na mé kjuanjon kjuachaxin kaín nkehe síchón síin chjasintajni la ko jehe ch'án mé xrohi t'inkaséyanxínhin jnkojnko ntje chojni chjasintajni. ⁵ Tí xrohi a mé t'inkaséyanxín tí sítié a. A ntá tí sítié a mé tjinkaon chrók'ók'anka tí xrohi a, kjánchó kjuachahya k'ók'anka.

⁶ Ntá kjuák'e ijnko chojni k'uetuēnhen Dios kui mé it'in ch'án Juan. ⁷ Ikui ch'án kjuák'echrónka ch'án nkexrínchi tjen tí xrohi t'inkaséyanxín chjasintajni kixin kaín xín chojni chrókuitekaon sín tí tjechrónka ch'án a. ⁸ A ntá tí ch'ín Juan la jehya tí xrohi a. Ó k'uituēnhón ch'án kui ch'án kixin tsochrónka ch'án nkerí kuente tí xrohi a. ⁹ A ntá tí xrohi chaxín t'inkaséyanxínhin kaín xín chojni na ó tsiki ch'án chjasintajni jie.

¹⁰ Kjuák'e ch'án chjasintajni na mé Dios tsík'jich'éanaxín ch'án chjasintajni tí kjuachaxin kuente tí nkexro a na kjónté kjuák'e ch'án chjasintajni na naxa kjuátsoanhya sín ch'án. ¹¹ Ikui ch'án tí tjejó tí sín judío k'uaxrjeníxín ch'án, kjánchó kuitekakuenhya sín ch'án. ¹² A ntá tí sín kuitekaon sín ch'án mé k'uáyéhe sín kjuachaxin kixin ts'óna sín xjeen Dios. ¹³ Ntá yóehya ts'axrjeníxín sín it'é sín chjasintajni ntihyó la ko yóehya ijnko it'é chrókjuenkayáxín ch'án chrókjuich'éna ch'án ijnko xjan. Náhí. Dios mé kjueyá ch'án nkexro ts'óna xjeen ch'án.

¹⁴ A ntá tí nkexro chrónkaxín nkexrí tjen Dios na mé k'óna ijnko chojni chjasintajni kjuák'enkákjanni ch'án na mé imá k'uetjuéhé ch'án chojni chjasintajni la ko imá ntoá chrónka ch'án. Kuayeni k'uíkonní kixin imá t'etqan ch'án kixin jehe ch'án mé tí jnkokoáxón Xjeen It'éni tjen nkaya nkajní na mé xikaha imá t'etqan ch'án.

¹⁵ Ch'ín Juan mé chrónka ch'án nkexrí tjen tí nkexro a. Ntáchro ch'án kixin:

—Senó k'uékjákohará kixin chr'éxín tsi tí nkexro a, na mé antsí má t'etqan ch'án, a ntá janhan la náhi kixin tí janhan naxa kohyana la tí jehe ch'án la ó xráxín tjen ch'án —mé xikaha chrónka ch'ín Juan.

¹⁶ Kaínni ó k'uáyéheni tí kjuachaxin jíe tjetjanjon ch'án la ko antsí má tjencheyaonni ch'án la ko tjencheyaonni ch'án. ¹⁷ Dios mé tsík'etuēnhen ch'ín Moisés kixin tsokjin ch'án tí ley. A ntá Ìnchéni Jesucristo mé kjuakoqxin ch'án kixin nkexrí imá tjuéhé Dios tí chojni chjasintajni. A ntá kaín nkehe chrónka ch'án mé antsí ntoá. ¹⁸ Kohya ninkexró chjasintajni k'uíkon sín Dios a. A ntá tí jnkokoáxón Xjeen ch'án na mé xráxín jnkokoá tjenkayáxinko It'é ch'án la mé jehe ch'án mé ó kjuínchekónoheni ch'án nkexrí tjen It'é ch'án nkaya nkajní.

*Ch'ín Juan mé chrónka ch'án nkexrínchi tjen ch'ín Jesús
(Mt. 3.11-12; Mr. 1.7-8; Lc. 3.15-17)*

¹⁹ Iso tí sín judío k'uéjó sín chjasin Jerusalén na ntá ichr'án sín iso chojni nch'at'á la ko iso tí sín levita, ikui sín kuinixjehē sín tí ch'in Juan kjuanchankíhi sín ch'án kixin:

—¿Nkexro tí jaha? —ichro sín.

²⁰ Ntá kjuínchemáhya ch'án, ntáchro ch'án kixin:

—Náhi. Jehya janhan tí Cristo —ichro ch'án.

²¹ Ntá xíkjanckhankíhi sín ch'án inaá, ntáchro sín kixin:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'in Juan la xíkatehe ch'án ntáchro ch'án kixin:

—Náhi. Jehya janhan Elías —ichro ch'án.

Ntá xíkjanckhankíhi sín ch'án inaá kixin:

—¿Á jaha tí nkexro tjejóchónhenni itsi tsochrónka itén Dios? —ichro sín.

Na ntá ntáchro ch'in Juan inaá kixin:

—Náhi. Janhya —ichro ch'án.

²² Ntá kjuanchankíhi sín ch'án inaá kixin:

—¿Ntá nkexro jaha? T'ichjánxin tsonoheni tsochénkani tí sín ichr'ánni ikuini. ¿Nkehe tsochrónka kixin nkexro tí jaha? —ichro sín.

²³ Ntá kjuátehe ch'in Juan ntáchro ch'án kixin:

—Janhan mé tí nkexro tsjak'e nteje ts'èya tsoxrjanka kixin: “Tak-itjehérá ijnko ntia ntoí tsixin Ìnchéni” —mé xíkaha ichro ch'án kjuátexin ch'án itén ch'in Isaías k'uéchrónka xroon itén Dios ósé.*

²⁴ A ntá tí sín fariseo mé tsichr'án tí jehe sín kuikjanckhankíhi sín tí ch'in Juan. ²⁵ A ntá kjuanchankíhi sín ch'án kixin:

—Ó ntáchra kixin jahya tí Cristo tí nkexro tsaáxin chojni la ko jahya tí Elías, la ko jahya nijnko tí nkexro k'uéchrónka itén Dios ósé. ¿A ntá nkekuènté tíkite chojni tí xíkaha? —mé ichro sín.

²⁶ Ntá ntáchro ch'in Juan kixin:

—Janhan na mé ìntà ó tíkítexián chojni. Ó ntihi tjenkákjan ijnko nkexro naxa tjátsòanhyará. ²⁷ Jehe ch'án mé tsi ch'án nóton tí janhan. A ntá antsí má t'etòan ch'án, a ntá janhan na kénhyó. A ntá tósuàna chrókjuasintanka tí correa tokaté ch'án —ichro ch'án.

²⁸ Kaín tíha mé tsikónhen tí chjasin it'in Betábara tí nó tjitoxin yaon tóhe tí ntarío Jordán tí kjuák'e ch'in Juan kuikite chojni.

Ch'in Jesús na mé éxí yóhē ijnko kolélo kuènte Dios

²⁹ A ntá tí yaon chr'éxin mé k'uúkon ch'in Juan kixin ó tje kui ch'in Jesús. Ntá nixjehē ch'án tí sín tsíkóhchina ntáchro ch'án kixin:

—Tsjehérá tí nkexro tje kui mé tí Kolélo kuènte Dios jehe ch'án. Tíha mé tsjiinxín ijié chojni chjasintajni. ³⁰ Janhan mé k'uéxrjanka kixin tí iton tí janhan mé tsichréhē ijnko nkexro antsí t'etòan, a ntá janhan la kénhyó tétòan kixin naxa kohyana na jehe ch'án la ó xráxin tjen ch'án.

³¹ Kjaxin janhan naxa chonhya nkexro tíha. A ntá xra ó k'uinka kjuak'é kuikítexián chojni ìntà kixin tí chojni naciòn Israel mé chrókjuátsòanxin sín ch'án —ichro ch'in Juan

³² Kjuintaxín ntáchro ch'in Juan kixin:

—Ó k'uúkuàn kixin tí Nchakuen Dios mé k'uúnkajinxin nkaya nkajni na éxí yóhē ijnko kontóá k'uúnkajin la ko kjuák'e va ntoí tí tjen ch'án. ³³ A ntá janhan kjaxin naxa chonhya nkexro tíha. A ntá tí nkexro k'uetuanna kixin tsjak'é tsíkítexián chojni ìntà mé tsíchronka ch'án kixin tí Nchakuen

* 1:23 Isaías 40.3

Dios mé ts'inkajin tsjak'e ntoí tí tjen ijnko chojni na mé tsjatsqanxián janhan kixin tí nkexro a mé tsikítexín ch'án Nchakuen Dios chojni. ³⁴ A ntá janhan jie mé ó k'uúikonxín kuan kixin xikaha kónhen tí jehe ch'án, a ntá xrjanxaxián kixin táha mé Xjeen Dios tíha —mé xikaha chrónka ch'án.

Tí sín saoxín kjueyá ch'ín Jesús

³⁵ Tí yaon chr'éxín kjuák'e ch'ín Juan la ko iyó tí sín k'uúájiko ch'án, ³⁶ a ntá xríngahya k'uúikon ch'án k'uúátsínka ch'ín Jesús. Ntá ntáchro ch'ín Juan kixin:

—Tsjehérá tí nkexro i mé tí Kolélo kuènte Dios —ichro ch'án.

³⁷ Ntá kuínhin tí yóí sín k'uúájiko ch'ín Juan na ntá sákjuíchréhe sín tí ch'ín Jesús. ³⁸ Ntá kuinkátjá ch'ín Jesús k'uúikon ch'án kixin tinkáchréhe sín ntá kjuanchankíhi ch'án sín kixin:

—¿Xá nkehe xritjéyará? —ichro ch'án.

Ntá ntáchro sín kixin:

—Maestro, ¿xá nketí nchia itjen? —ichro sín.

³⁹ Ntá kjuátéhe ch'án ntáchro ch'án kixin:

—Íntá sátsjini ts'ikonrá nketí —ichro ch'án.

Ntá kuinkáchréhe sín ch'án k'uúikon sín nketí nchia kjuák'e ch'án ntá k'uuéjóko sín ch'án kuenté tí kónjín kixin kjuíji sín ntiha como las cuatro kónjín.

⁴⁰ A ntá yóí sín tsíkinhin sín tí chrónka ch'ín Juan ntá sákjuíchréhe sín tí ch'ín Jesús na mé ijnko mé it'in Andrés. Jehe ch'án chóna ch'án ijnko savé mé it'in Simón Pedro. ⁴¹ Na ntá tuénxín tí ch'ín Andrés sákjuíkjejá ch'án tí savé ch'án Simón. Ntá chénka ch'án tí savé ch'án kixin:

—Ó k'uitjani tí nkexro Mesías —ichro ch'án. Tíha mé t'axrjexín kixin Cristo.

⁴² A ntá ch'ín Andrés mé kuikao ch'án tí savé ch'án Simón tí tjen ch'ín Jesús. Ntá ch'ín Jesús mé komá ch'án tí ch'ín Simón ntáchro ch'án kixin:

—Jaha mé Simón, it'á mé it'in Jonás. Ntá jie sintak'ian Cefas —ichro ch'án. A ntá tí palabra Cefas la ko tí palabra Pedro na mé yóí mé t'axrjexín kixin ixro tíha.

Ch'ín Jesús mé kjueyá ch'án tí ch'ín Felipe la ko tí ch'ín Natanael

⁴³ A ntá tí yaon chr'éxín mé sáchrókjui ch'ín Jesús tí estado Galilea. Ntá k'uitja ch'án tí ch'ín Felipe, na ntá ntáche ch'án kixin:

—Chr'éhé tí janhan —ichro ch'án.

⁴⁴ A ntá tí ch'ín Felipe mé chjasén ch'án mé it'in Betsaida tí chjasén ch'ín Andrés la ko ch'ín Pedro. ⁴⁵ Ntá tí ch'ín Felipe mé sákjuíkjejá ch'án tí ch'ín Natanael na ntá chénka ch'án kixin:

—Ó k'uitjani tí nkexro tsi éxi k'uéchrónka tí ch'ín Moisés tí tsíkjin ch'án tí xroon chrónka tí nkehe k'ueñoan Dios. Kjaxin tí sín k'uéchrónka tí itén Dios chr'éxín mé k'uéchrónka sín kixin itsi tí nkexro a. Na ntá ó k'uitjani ch'án na mé jehe ch'án mé it'in Jesús, la it'é mé it'in José, la mé chjasén ch'án mé Nazaret —ichro ch'ín Felipe.

⁴⁶ A ntá ntáchro ch'ín Natanael kixin:

—¿Xá kjuánchí má chrókójina tí nkehe chrók'uaxrjexín tí chjasin Nazaret a? —ichro ch'án.

Ntá kjuátéhe ch'ín Felipe ntáchro ch'án kixin:

—Xrákiá ts'ikuan —ichro ch'án.

⁴⁷ Na ntá k'uúikon ch'ín Jesús kixin ó kui tinkákóchjina ch'ín Natanael, na ntáchro ch'án kixin:

—Ó kui ijnko ch'ín chaxín israelita la kohya nijnko kjuach'ia xriko ch'án —ichro ch'án.

⁴⁸ Na ntá ntáchro ch'ín Natanael kjuanchankíhi ch'án tí ch'ín Jesús kixin: —¿Nkexrí kixin tjátsoanna? —ichro ch'án.

Ntá kjuátehe ch'ín Jesús ntáchro ch'án kixin:

—Naxa nixjaahya tí ch'ín Felipe mé k'uíkuan tí jaha tjenkankiá tí nta t'óna to higo —ichro ch'án.

⁴⁹ Na ntá ntáchro ch'ín Natanael kixin:

—Maestro, jaha la chaxín tí Xjeen Dios tjen nkaya nkajní tsétuenhén tí naciön Israel —ichro ch'án.

⁵⁰ Ntá kjuátehe ch'ín Jesús ntáchro ch'án kixin:

—Jehya tí nkehe ntáxrjan k'uíkuan tjenkankiá nta t'óna to higo, jehya táho tsitékákoxian. Náhi. Chr'éxin xiki í jnko kjuaxroan antsí má jié ts'íkuan, a ntá tíhi la kénhyó —ichro ch'án.

⁵¹ Kjaxin ntáchro ch'ín Jesús kixin:

—Ijnko nkehe ntoá tsoxrjanka kixin tsoxitjehe tí nkajní ts'ikonrá itsi itsjé tí sín ángel kuente Dios mé ts'it'ótjen la ko ts'inkajin tí tjén janhan mé tí Xjeen Dios K'óna Chojni —ichro ch'án.

2

Chjasin Caná estado Galilea kótehe ijnko chojni

¹ A ntá iní yaön chr'éxin ntá kótehe ijnko ch'ín chjasin Caná estado Galilea. Mé koí tí iné ch'ín Jesús tsík'íyehé sín tjan la ntiha tjen tjan koí.

² Kjaxin tsík'íyehé sín tí ch'ín Jesús la ko tí sín k'uájiko ch'án kixin sátsji sín tí tsíkótehe sín ntiha. ³ Ntá ó tsík'ankehe sín tí xranvino ik'uí sín na ntá tí iné ch'ín Jesús mé ntáche tjan tí jehe ch'án kixin:

—Ó tsík'ánkã xranvino its'i sín —ichro tjan.

⁴ Ntá ntáchro ch'ín Jesús kixin:

—Naná, ¿nkehe tsoñhen chronka? Naxa kjuixrakáhya tí yaön tsjásian kjuaxroan —ichro ch'án.

⁵ A ntá tí iné ch'án na mé ntáche tjan tí sín ch'e xra kixin:

—Tí chrén nkehe chrók'uetuñhanrá ch'án chrókjuin chexiteyará —ichro tjan.

⁶ A ntá siín ntiha injon chj tsík'óna xro na mé tíha tjiá ntã t'ònti sín kixin xikaha mé ts'axrjehe tí jje chóna sín koí, mé xikaha kuinkáchónki tí sín judío. Na mé jnkojnko chj mé tjacha tikia ochenta litro la o ciento litro ntã. ⁷ Ntá k'uetuñhen ch'ín Jesús tí sín ch'e xra kixin:

—Tíkiará ntã kaín tí chj a tsokaón —ichro ch'án.

Ntá kjuínchexiteyá sín kjuínchekaón sín ntã jnkojnko tí chj a. ⁸ A ntá ntáche ch'ín Jesús tí jehe sín inaá kixin:

—Tákjá intsí ntã tjiá chj tjikuehé tí ch'ín t'etoan tí kia a —ichro ch'án.

Ntá xikaha kjuích'e sín kjuínchexiteyá sín. ⁹ A ntá tí ch'ín t'etoan tí kia a mé tsjexín ch'án tí ntã tsík'óna xranvino kjónté noehya ch'án nketi kuixin tí xran a. Jehó tí sín ch'e xra kuikao sín mé nohe sín kixin jehe sín mé tsíkakitsje sín ntã. Ntá tí ch'ín t'etoan mé k'uíyehé ch'án tí ch'ín tsíkótehe.

¹⁰ Ntáche ch'án kixin:

—Xrácín tí sín tjasin kia la senó tí xranvino náxrjón tjanjon sín na tió chrók'uihya tí sín tsíkóchjina na ntá tjanjon sín tí xranvino náxrjónhya. A ntá jaha la náhi. Senó kjuakéchjina tí xranvino antsí má náxrjón, a ntá tí jie tjetjánjuan jaha —ichro ch'án.

¹¹ Tí kjuaxroan a kjuích'e ch'ín Jesús chjasin Caná estado Galilea mé tí kjuaxroan saoxín kjuasin ch'án mé kjuakoxin ch'án nkexrí imá jié tí kjuachaxin kuènte ch'án, a ntá tí sín k'uájiko ch'án mé kuítekaon sín tí jehe ch'án.

¹² Ntá ó k'uaúsínka kia, a ntá sákjuí ch'án chjasin Capernaum, sákjuíko ch'án iné ch'án la ko kichó ch'án la ko tí sín k'uájiko ch'án, kóxrjenhen sín ntiha iso yaon.

Ch'ín Jesús mé kjuínchetjóá ch'án tí nínko jié

(Mt. 21.12-13; Mr. 11.15-18; Lc. 19.45-46)

¹³ A ntá ó kuichjina tí yaon kia kuènte pascua kuènte tí sín judío. Ntá ch'ín Jesús sákjuí ch'án chjasin Jerusalén. ¹⁴ Ntá nkaxenhen tí nínko jié ntiha k'uíkon ch'án tí sín nchekjixin koxinta la ko kolélo la ko kontóá. La ko ntiha kjaxin tjejótxaxin tí sín tjinkíxixín chichaon. ¹⁵ Ntá ch'ín Jesús mé kuákja ch'án ihno tsíxehe sín ntiha, kjuích'éna ch'án ijnko chikoté, ntá kuakitsjexín ch'án sín nkaxenhen nínko kaín xín sín la ko tí kolélo la ko tí koxinta. Na ntá tí ntamesa tjinkítóxixín sín tí chichaon mé kótéka ch'án tsíkjamikí xèjxin tí chichaon a. ¹⁶ Ntá k'ueŭenhen ch'án tí sín nchekji tí kontóá a kixin:

—Takítsjerá kaín tí nkehe a. Ch'énahyará ijnko ntasin tí ntøe T'aná ntihi —ichro ch'án.

¹⁷ Ntá xráxinkaon tí sín k'uájiko ch'án ti nkehe tsíkjin sín ósé kixin: “Éxí xrohi k'uákjen asenná nínkavan kixin tí ntøa tjikosáyehya sín.” *

¹⁸ Ntá tí sín judío mé kjuanchankíhi sín ch'án kixin:

—¿Xá nkerí kjuaxroan tsjásixián tsjákoxian nketí kjuachaxin chonta kixin xíkaha kjuích'e tíhi? —ichro sín.

¹⁹ Ntá kjuátehe ch'ín Jesús kixin:

—Tí ts'oxíkará tí nínko i ntá iníkoá yaon la ó sít'ána nixin tsjak'e ínaá —ichro ch'án.

²⁰ Na ntá ntáchro tí sín judío a kixin:

—Cuarenta y seis nánó k'uejó sín kjuích'éna sín tí nínko i, a ntá jaha ntáchrúa kixin iní yaon koá sích'éna ínaá, ichrúa —ichro sín.

²¹ Kjánchó kienxínhya sín kixin tí nínko ntáchro ch'ín Jesús la tí cuerpo kuènte ch'án. ²² Ntá tió kjuixin xechón ch'án ntá xráxinkaon tí sín k'uájiko ch'án kixin xíkaha tsíchrónka ch'án, ntá kuítekaon sín tí xroon itén Dios tsíkjin sín ósé la ko tí nkehe tsíchrónka ch'án.

Ch'ín Jesús mé nohe nkehe tónhen asén kaín xín chojni

²³ Tió kjuák'e ch'ín Jesús chjasin Jerusalén tí kia pascua, a ntá itsjé chojni kuinkáchónki sín tí jehe ch'án kixin ó k'uíkon sín tí kjuaxroan kjuasin ch'án. ²⁴ Kjánchó ch'ín Jesús la kuítekakuenhya ch'án tí jehe sín kixin jehe ch'án la ó nohe ch'án jina nkexrí tónhen asén jnkojnko chojni ²⁵ a ntá t'ichjánxienhya ch'án kixin nínkexró chróchenka ch'án nkexrí tjenkayáxin chojni kixin ó kónohe ch'án kaín nkehe tónhen asén kaín xín chojni.

3

Ch'ín Nicodemo kuinixjehe ch'án tí ch'ín Jesús

¹ Kjuák'e ijnko ch'án kuènte tí sín fariseo a mé it'in ch'án Nicodemo. Jehe ch'án mé ijnko nkexro imá tjetóan kuènte tí sín Israel. ² A ntá ijnko tie kjuíchréhe ch'án tí ch'ín Jesús a nixjehe ch'án ntáchro ch'án kixin:

* 2:17 Salmo 69.9

—Maestro, kónoheni ḱixin It'eni tjen nkaya nkajní mé tsíchr'án k'uinka tsjákohéni ḱixin tí Jehya Dios chrókjuak'ekoa la xitjahya chrókjuásian kjuaxroan jié —ichro ch'án.

³ Ntá kjuátehe ch'ín Jesús ntáchro ch'án ḱixin:

—A ntá tsotjonka ijnko nkehe imá tjetóan. Tí nkexro tsokjéhya nixien mé xitjahya ts'ikon tí kjuachaxin ts'etóan Dios —ichro ch'án.

⁴ A ntá ch'ín Nicodemo kjuanchankí ch'án ntáchro ch'án ḱixin:

—Ó tádana, ¿nkexrí chrókokjína nixien? ¿Á chrók'uixanhān tsee naná inaá ntá chrókokjína nixien ní? —ichro ch'án.

⁵ Ntá kjuátehe ch'ín Jesús ntáchro ḱixin:

—Ntá tsotjonka ijnko nkehe imá tjetóan. Jehó tí sín tsíkokjéxín ntá la ko kjaxin tsíkokjéxín Nchakuen Dios mé ts'áyéhe sín tí kjuachaxin kuente Dios. ⁶ Tió ijnko xjan ts'axrjeníxin chojni na mé tí xjan mé chojni ó. A ntá tí Nchakuen Dios tsokjéxín nixien ijnko chojni na ntá ts'áyéhe sín tí Nchakuen Dios a. ⁷ Chrakonhya tí nkehe xrjanka ḱixin “Kaín chojni t'ichjánxin tsokjíhi nixien.” ⁸ Éxí yóhe tí tinhín tí chjéhe xrjntó ntá noahya nketí kuixín tí xrjntó la ko noahya nketí sátsji na mé kjaxin xíkaha kónhen kaín tí nkexro tsíkokjéxín Nchakuen Dios —ichro ch'án.

⁹ Ntá xikjanchankí ch'ín Nicodemo inaá ḱixin:

—¿Nkekuénté ḱixin xíkaha chrókónhen? —ichro ch'án.

¹⁰ Ntá kjuátehe ch'ín Jesús ntáchro ch'án ḱixin:

—¿Jaha ijnko maestro imá t'etóan tí nación Israel ntá naxā tiénxinhya tí nkehe ní? ¹¹ Chaxín tjetjonka tí nkehe nòna la ko tí nkehe k'uikuan ntá titekákonnahya jaha. ¹² Tí nkehe tjetjonka la kuente chjasintajni ó ntá kjónté la titekákonnahya jaha. ¿Ntá nkexrí chrókuítekávān tí chrótjonka nkehe kuente nkaya nkajní? ¹³ Kohya í jnko nkexro k'uit'ótjen chjasin nkaya nkajní. Jehó tí Xjeen Dios K'óna Chojni mé kjuák'e chjasin nkaya nkajní la ko ntiha kuixín ch'án. ¹⁴ Éxí yóhe ch'ín Moisés tió k'uixín sín tí nteje, a ntá Dios mé k'uetoan ḱixin sinchekjangoya ch'án ijnko konche tsjak'enkanı ch'án ijnko nta, ntá xíkaha kjuích'e ch'án kjuak'enkanı ch'án tí konche tí nta a komá sín tí konche ntá kuaá sín k'uénhya sín, * mé xíkaha tsonhen tí Xjeen Dios K'óna Chojni mé t'ichjánxin ḱixin tsjak'enkanı ch'án ijnko ntacruz ¹⁵ ḱixin mé xíkaha kaín nkexro tsínkáchónki tí jehe ch'án mé tsaá sín tsochóna sín kjuachón jnkochŕixin.

Dios imá tjuèhe ch'án tí chojni chjasintajni

¹⁶ Ḱixin Dios mé imá tjuèhe ch'án chojni chjasintajni ntá kjuanjon ch'án jnkokoáxón Xjeen ch'án, ḱixin ntá jnkójnko chojni tsínkáchónki tí Xjeen ch'án mé ts'itjāyanhya sín tsochóna sín kjuachón jnkochŕixin. ¹⁷ Chr'ánhya Dios tí Xjeen ch'án chjasintajni ḱixin sinchekjasóte chojni ḱixin tí jié kjuasin sín. Náhí. Ó jehí ichr'án ch'án tí Xjeen ch'án chjasintajni ḱixin sinchekaá chojni.

¹⁸ Na mé tí sín tsitekaon tí Xjeen Dios la tsjasótehya sín. A ntá tí sín titekakuenhya sín na mé ó kjuixin kjuínchekitóexín Dios tí ijje sín tsjasóte sín ḱixin titekakuenhya sín tí jnkokoáxón Xjeen Dios. ¹⁹ Na mé xíkaha Dios sinchekjasóte sín jnkochŕixin ḱixin ó kui tí nkexro t'inkaséyanxín chjasintajni na kjónté ntá ántsí má tóxrjínhín sín tí sítié a. A ntá tí t'inkaséyan la náhi ḱixin naxā tóxrjínhín sín tí nkehe jínahya tjejóch'e sín. ²⁰ Kaín tí sín tjejóch'e nkehe jínahya na mé tóxrjénhya sín t'inkaséyan

* 3:14 Números 21.9

chrókóchjinehya sín kixin tsonoxínhya tí nkehe jínahya tjejóch'e sín. ²¹ **A** ntá tí sín tjejóch'e sín tí jína a na mé chéhe sín tóchjinehe sín tí t'inkaséyan kuènte Dios kixin tsonoxín tí nkehe ch'e sín kixin ntá kaín xín chojni mé tsjatsjoan sín kixin tjejóch'e sín tí nkehe tóxrjínhin Dios.

Ch'in Juan Bautista chrónka inaá kuènte ch'in Jesús

²² Na ntá chr'éxin ch'in Jesús la ko tí sín k'uájiko ch'án na sákjuí sín estado Judea. Ntaha k'uéjoko sín ch'án kuikite ch'án chojni. ²³ Kjaxin ch'in Juan kjuák'e ch'án chjasin Enón chjino tí chjasin Salim na mé ntiha kjuák'e kuikite ch'án chojni kixin ntiha mé yeé ntá sín. Na ntá nkáki sín kuikite sín. ²⁴ Mé xikaha kónhen naxa kjuák'echjinahya ch'in Juan.

²⁵ Ntá tí sín k'uájiko ch'in Juan la ko tí sín judío mé kjuachaxin kichó sín kixin nkexrí íchá jína chrókótjuáxin chojni, ichro sín. ²⁶ **A** ntá tí sín k'uájiko ch'in Juan sákjuítsjehe sín ch'án chénka sín ch'án kixin:

—Maestro, tí ch'in kjuák'ekoa tóhe ntario Jordán, na mé tí nkexro tsichronka kuènte ch'án, la mé itjen ch'án tikite ch'án chojni la ko kaín xín chojni mé tjichréhe sín ch'án —ichro sín.

²⁷ Na ntá ntáchro ch'in Juan kixin:

—Tí chrókjuanjonyha Dios kjuachaxin ntá chrokjuahya chrók'uáyéhe chojni. ²⁸ Ó kuínhínra ntoá k'uéxrjanka senó kixin janhya tí Cristo. Náhí. Janhan ó kuítuannuá kuítónxián ntia tsoxrjanka kixin ó tsi ch'án. ²⁹ Éxi yóhe ijnko ch'in tsoqhe na mé jehe ch'án mé ts'áyéhe ch'án tí ichjién ch'án. **A** ntá tí ch'in chóxin ch'án mé chéhe asén ch'án tjetinhin ch'án tjenixja tí ch'in ts'áyéhe ichjién a. Mé xikaha janhan imá chàna kixin xikaha sítónhen kixin itsjé chojni sítóchjinehe sín tí ch'in Jesús tsinhin sín nkehe tí tjenixja ch'án. ³⁰ **A** ntá jehe ch'án t'ichjánxin antsí ts'etjoan ch'án. **A** ntá janhan la kénhyó —mé chro ch'in Juan.

Tí nkexro kuixin nkaya nkajni

³¹ Tí nkexro kuixin nkaya nkajni mé kaín nkehe t'etuenhen ch'án. **A** ntá ijnko chojni kuènte chjasintajni ó mé chrónka kuènte chjasintajni ó. **A** ntá tí nkexro kuixin nkaya nkajni mé kaín nkehe t'etuenhen ch'án. ³² Jehe ch'án mé chrónka ch'án tí nkehe tsík'ikon ch'án la ko tí nkehe tsíkinhin ch'án. Kjánchó kohya chojni titekaon sín tí nkehe chrónka ch'án. ³³ **A** ntá jnkojín nkexro titekaon sín tí nkehe chrónka ch'án na mé xikaha tjakoqin ch'án jie kixin chaxín ntoá chrónka Dios ³⁴ kixin tí nkexro ichr'án Dios mé nixja itén Dios kixin jehya intsíkoá tí Nchakuen Dios k'uáyéhe ch'án. Náhí. ³⁵ It'eni Dios mé tjuéhe ch'án tí Xjeen ch'án na mé xikaha ó tsíchjéhe ch'án kjuachaxin kixin kaín xín nkehe ts'etuenhen ch'án. ³⁶ **A** ntá tí nkexro tsitekaon tí Xjeen Dios mé xikaha tsochónta sín tí kjuachón jnkochríxín. **A** ntá tí sín titekakuenhya sín tí Xjeen Dios mé tsochóntahya sín tí kjuachón jnkochríxín xikaha. Tí sín a mé Dios sinchekjasóte sín jnkochríxín.

4

Ch'in Jesús ikjo ch'án ijnko tjan samaritana

¹ **A** ntá tí sín fariseo mé kónohe sín kixin antsí tsjé chojni chréhe sín tí ch'in Jesús kuikite ch'án sín na ntá tí chojni chréhe sín tí ch'in Juan la kánhyó tsjé sín. ² Kjánchó jehya ch'in Jesús kuikite ch'án chojni. Méxra tí sín k'uájiko ch'án mé kuikite sín chojni. ³ **A** ntá tíó kónohe ch'in Jesús kixin xikaha tsíkinhin tí sín fariseo ntá k'uaxrjéxín ch'án tí estado Judea xikjan ch'án estado Galilea inaá.

⁴ Ntá t'ichjánxìn ts'átsínka ch'án estado Samaria. ⁵ A ntá kjuíji ch'án ijnko chjasin mé it'in Sicar kuènte estado Samaria, mé chjino tí nonte tsíkjinchekitõnhen ch'ín Jacob tí xjeen ch'án José. ⁶ La ó chjino tjen tí tòye takitsje chojni ìntà mé it'in Ìnté Jacob. Na ntá ó chonkíxin kjuí sín ntíha. Méxra tí ch'ín Jesús la imá kóxrjé ch'án kíxin imá kjin tí ntia kjuixìn ch'án ntá kjuák'etjaxìn ch'án chrínta tí tòye takitsje sín ìntà. ⁷⁻⁸ Ntahó kuitõhe ch'án. A ntá tí sín k'uájiko ch'án sákjuí sín tí chjasin chjinaxón sákjuík'ena sín nkehe sineko sín ch'án. Ntá séhyó ikui ijnko tjan kuènte estado Samaria ikui tjan tsakitsje tjan ìntà. Ntá ntáchro tí ch'ín Jesús kíxin:
—Chjìna intsí ntà its'ia —ichro ch'án.

⁹ A ntá tí tjan samaritana mé kjuanchankíhi tjan tí ch'ín Jesús kíxin:
—¿Nkekuènté kíxin jaha ijnko chojni judío mé chrókjuanchana ntà kíxin janhan ijnko chojni samaritana? —mé chro tí tjan a.

(Mé xíkaha kjuanchankí tjan kíxin tí sín judío mé ninkehó t'ikonhya tí sín samaritano.) ¹⁰ Na ntá ntáchro ch'ín Jesús kíxin:

—Chrókónoha tí nkehe tjanjon Dios la ko chrókjuatsõan jaha nkexro tí tjetjanchaha ntà ntá chrókjuanchana ntà, ntá chrótjaha tí ntà tjechón chaxín —ichro ch'ín Jesús.

¹¹ Na ntá ntáchro tí tjan a kíxin:

—¿Ntá nkexrí kíxin xraahya jaha ninkehó nkehe tsakítsjeyá ntà kíxin tí tòye i la imá nínka? ¿Ntá nkexrí tsochjìna tí ntà tjechón tjimé? ¹² Tí nkexro k'uaxrjeníxinni mé Jacob mé kuitõeheni tí tòye tjiá ntà ntihi la ko kjaxìn ik'uí ch'án tí ntà la ko kjaxìn ik'uí tí xjeen ch'án la ko tí iko kuènte ch'án. ¿A ntá xá jaha la xá antsí má tjetjoan jaha, a ntá jehe ch'án la kénhyó ní? —mé kjuanchankíhi tjan tí ch'ín Jesús.

¹³ Na ntá kjuátehe ch'ín Jesús ntáchro ch'án kíxin:

—Tí sín it'i sín tí ntà ntihi tí tòye i nántaxón its'en sín ntà inaá. ¹⁴ A ntá tí sín its'i sín tí ntà sintakitõnhan sín mé í ts'enhya sín ntà inaá. Tí ntà sintakitõnhan sín mé ts'óna éxí yóhe ijnko ntà ts'axrje nkaya asén sín mé tsinkákjanjon tí kjuachón tsochõnta sín jnkochrín —ichro ch'án.

¹⁵ Ntá ntáchro tí tjan a inaá kíxin:

—Chjìna tí ntà, a ntá ts'énhyana ntà inaá la ko ts'inkahya ntihi tsakítsje ntà —ichro tjan.

¹⁶ Ntá k'uetõan ch'ín Jesús kíxin:

—Sátjia tjík'iyehé xiá ntá ts'inkará ntihi inaá —ichro ch'án.

¹⁷ Ntá ntáchro tjan kíxin:

—Chontahya xìná —ichro tjan.

Ntá ntáchro ch'ín Jesús kíxin:

—Chaxín ntáchrua kíxin chontahya jaha xiá. ¹⁸ K'uéchonta jaha in'ó xiá, a ntá tí ch'ín chonta jie jehya xiá. Na mé chaxín tí nkehe ntáchrua kíxin chontahya xiá chaxín —ichro ch'án.

¹⁹ Na ntá kuínhin tjan tíha ntá ntáchro tjan kíxin:

—T'íkuan kíxin jaha ijnko nkexro chrónka itén Dios. ²⁰ A ntá tí sín k'uaxrjeníxinni k'uíxin ósé mé k'uéxrxinkakonxín sín Dios tí jnà ntihi. Kjánchó jahará chojni judío mé ntáchrorá kíxin tí nínko jié chjasin Jerusalén kaín ni chrórxinkakonxíni Dios —ichro tjan.

²¹ Ntá ch'ín Jesús ntáche ch'án tjan kíxin:

—Títekáván kíxin tjetsi tí hora a tsoxráxinkakonxínhyará It'eni Dios tí jnà ntihi la ko tsoxráxinkakonxínhyará ch'án chjasin Jerusalén kjaxìn. ²² Jahará chojni samaritano chonhyará tí nkexro xráxinkáonrá. Ntá kaín

ni chojnini judío mé chóxinni tí nkexro xráxinkaonni. Méxra tí nkexro tsjakjijnhin chojni tí jie yámá sín mé ts'axrjeníxin tí sín judío. ²³ Ntá tjetsi tí hora a na mé tí jie ó kui tí hora a na tí sín chaxín tjinkaon sín chróxraxinkaon sín It'éni la mé asén sín ó tsoxraxinkakonxín sín It'éni Dios. Dios mé tóxrjínhjn ch'án kíxin chojni xikaha chrókuich'e sín chróxraxinkakonxín sín ch'án. ²⁴ Jehe Dios na mé nchakuen ó, a ntá tí sín chróxraxinkaon sín ch'án na mé t'ichjánxin kíxin asén sín ó tsoxraxinkakonxín sín ch'án —mé xikaha chrónka ch'ín Jesús.

²⁵ A ntá ntáchro tí tjan a kíxin:

—Ó nòna kíxin itsi tí nkexro Mesías, tí nkexro a mé Cristo. Tió tsi ch'án ntá tsjakoheni ch'án kaín xín nkehe —ichro tjan.

²⁶ Ntá ntáchro ch'ín Jesús kíxin:

—Tí nkexro a la mé janhan tjétjuá jie —ichro ch'án.

²⁷ Na ntá tí sín k'uájiko ch'án mé kjanxin sín tí chjasin a, ntá chrakon sín k'uíkon sín kíxin tjenixjehe ch'án mé ijnko chojni chjin. Kjánchó nijnko sín kjuanchankíehya sín ch'án kíxin nkehe tjinkaon ch'án na nkekuèté nixjehe ch'án tí tjan a. ²⁸ A ntá tí tjan mé kjuak'e tjan tí toa nonte ntá sákjuí tjan tí chjasin ntaha ntáche tjan tí sín ntaha kíxin:

²⁹ —Íntará sátsjtsjeheni ijnko ch'ín chrónka ch'án kaín xín nkehe kjuít'a tí senó a. ¿Xá chrókójehya tí nkexro i Cristo? —ichro tjan.

³⁰ Na ntá tí chojni a mé xrákuaxín sín tí chjasin a ntá kuitsjehe sín tí ch'ín Jesús. ³¹ Naxa tihya sín nachrohe tí sín k'uájiko ch'án mé chrónóehe sín ch'án ntáchro sín kíxin:

—Maestro, kjaxian chrókjónte nkehe —ichro sín.

³² Kjánchó ntáchro ch'án kíxin:

—Ó chonta janhan nkehe siné. Jahará la kjá naxa noahyará —ichro ch'án.

³³ A ntá tí sín k'uájiko ch'án mé kjuanchankíhi sín kíchó sín kíxin:

—¿Xá jnkojín sín tsíkikao sín nkehe kjóne ch'án? —ichro sín.

³⁴ Kjánchó ntáchro ch'ín Jesús kíxin:

—Éxi yóhe chrókjóné nkehe mé tí sít'a tí xra la ko tsjixinna tí xra kuènte tí nkexro chr'ánna k'uinka. ³⁵ Ntáchrorá kíxin: “Noó nitjó naxa t'itjáyan tsochónhenni ntá tsotjáni noatrigó”, ichrorá. Kjánchó ntáxrjan kíxin chrótsjehérá tí no a kíxin ó tsícha la ko ó tinkáxamá kíxin ó jina chrótjáni. ³⁶ Tí sín ch'e xra tjá sín mé tsoxenkehe sín. A ntá tí nkehe tjá sín mé ts'áyéhe kjuachón jnkochrín. Ntá tí sín k'uenka sín nonte la ko tí sín tjá sín jnkokón tsochéhe sín. ³⁷ Mé xikaha tsoxiteyá tí nkehe ntáchro sín kíxin: “Íjnko nkexro mé t'enka noa, a ntá ókjé sín tsotjá sín tí noa a”, ichro sín. ³⁸ A ntá janhan ichr'an tí jahará tsotjará ijnko nonte tsík'énkahyará. Na mé ókjé sín kjuích'e sín xra ntá jahará tsjachará tí xra kjuích'e tí sín a —ichro ch'án.

³⁹ A ntá itsjé tí sín samaritano kuènte tí chjasin ntiha mé kjuankíxin kuinkáchónki sín tí jehe ch'án kíxin xikaha chrónka tjan kíxin jehe ch'án ó chrónka ch'án kaín xín nkehe kjuích'e tjan tí senó a. ⁴⁰ A ntá tió kuínhin sín tí nkehe chrónka tjan ntá kui sín tí tjan ch'ín Jesús ntá chrónóehe sín ch'án kíxin tsitóhe ch'án ntiha. Ntá kuitóhe ch'án ntiha iyó yaon. ⁴¹ Ntá itsjé sín kjaxin kuinkáchónki sín ch'án kíxin tí nkehe kuínhin sín nixja ch'án. ⁴² Ntá ntáche sín tí tjan a kíxin:

—Ntá jie jehya jehó tí nkehe chrónka kuítekaonni. Náhi. Tí jie ó kuínhini nixja ch'án ntá kónoheni kixin jehe ch'án chaxín tí nkexro Cristo sinchekaá tí chojni chjasintajni —ichro sín.

Ch'ín Jesús kjuínchekitohe jina ijnko xjeen ijnko ch'ín ch'ehe xra gobierno

⁴³ A ntá k'uátsínka iyó yaon ntá ch'ín Jesús k'uaxrjexín ch'án estado Samaria ntá sákjuí ch'án nó estado Galilea. ⁴⁴ A ntá jehe ch'án tsintáchro ch'án kixin tí nkexro chrónka itén Dios la tí chjasén sín mé tjikosáyehya sín ch'án. ⁴⁵ Kjánchó tió kjuíji ch'án tí estado Galilea na mé k'uáyéhe sín ch'án la ko kjuikosáyehya sín ch'án jina kixin kjaxin sín sátsíkji sín tí kia pascua chjasin Jerusalén tsík'ikon sín kain tí kjuaxroan kjuasixin ch'án tí kia ntiha.

⁴⁶ Ntá xíkjan ch'ín Jesús inaá chjasin Caná, estado Galilea, na mé ntiha tsíkjinchekjamina ch'án tí ntá tí xranvino a. Ntaha mé kjuák'e ijnko ch'ín ch'ehe xra gobierno. A ntá níhi tí xjeen ch'án ntoa itjen chjasin Capernaum. ⁴⁷ Ntá kuínhin tí ch'ín ch'ehe xra gobierno kixin itjen ch'ín Jesús tí estado Galilea tsíkixín ch'án estado Judea ntá sákjuíchréhe ch'án chrónóehé ch'án tí ch'ín Jesús kixin sáchrókjuí ch'ín Jesús ntóe ch'án sinchekitohe jina tí xjeen ch'án ó tjet'en xjan. ⁴⁸ Ntá ntáchro ch'ín Jesús kixin:

—Kja tí jahará tí chrók'uikonhyará kjuaxroan chrókjuásian la chrókuinkachónkihyará tí janhan —ichro ch'án.

⁴⁹ Ntá chrónòta tí ch'ín ch'ehe xra gobierno ntáchro ch'án kixin:

—¿Á chrókójínahya sáchrókjuíni ntóna jaí kixin xjanna ó tjet'en? —ichro tí ch'ín a.

⁵⁰ Ntá kjuátehe ch'ín Jesús ntáchro ch'án kixin:

—Ikjan sátjia ntóta kixin tí xjaan na ó jina tjen jie —ichro ch'án.

Ntá kuítekaon ch'án nkerí ichro ch'ín Jesús ntá sákjuí ch'án. ⁵¹ A ntá kjuíji ch'án chjino ntóe ch'án ntá xrinahya tí sín ch'ehe sín ch'án xra kjuíxinhin sín ntja chrónka sín kixin:

—Xjaan la ó jina tjen —ichro sín.

⁵² Ntá kjuanchankíhi ch'án sín kixin nkehora kjuankixin kuítóhe xjan jina, na ntá chrónka sín kixin:

—Ijna la una kónjín mé kjuín tí sóa —ichro sín.

⁵³ Ntá kónohe tí it'é xjan kixin xíkaha tí hora tsintáchro ch'ín Jesús kixin tí xjeen ch'án na ó jina tjen. A ntá jehe ch'án la ko kain tí sín siín ntóe ch'án mé kuinkáchónki sín tí ch'ín Jesús.

⁵⁴ Tíha mé tí yóxin kjuaxroan kjuasin ch'ín Jesús tió kjuíxin ch'án estado Judea ikjan ch'án estado Galilea.

5

Ch'ín Jesús kjuínchekitohe jina ijnko ch'ín tsík'en tote chjasin Betesda

¹ Ntá chr'éxin tí sín judío mé kjuasin sín ijnko kia na ntá ch'ín Jesús xíkjan ch'án chjasin Jerusalén inaá. ² A ntá ntaha chjino tí ntója t'ixenxín kolélo chjasin mé tjen ijnko pila tóxroyéya ntá mé nkiva hebreo tí ntá mé it'in Betesda. A ntá chrínta tí pila siín in'ó cuarto ntsíntsi. ³ Ntaha tjejótsínka nchónhya chojni níhi, iso sín t'ikonhya la ko iso sín xitjahya tji la ko iso sín tsík'en toté. Tjejóchónhen sín kixin nkehora tsinkí ntá ⁴ kixin nántaxón k'uínkajin ijnko ángel kjuíánki ntá kjuínchekinkí ntá. A ntá tí nkexro senó tsjiánki ntá mé tsitohe jina kjónté cualquierra chin chóna. ⁵ A ntá ntaha kjuák'e ijnko ch'ín na mé chóna ch'án treinta y ocho nánó níhi

ch'án. ⁶ A ntá tió k'uikón ch'ín Jesús kíxin tjetsínka tí ch'ín a la ko kónohe ch'án kíxin ósé níhi ch'án, ntá kjuanchankí ch'án kíxin:

—¿Á tjinkávan tsitoḥa jína? —ichro ch'án.

⁷ Ntá ntáchro tí sinníhi kíxin:

—Chóntahyani nínkexró tsjinkítsani tsjiánkíni ntá. A ntá tí tjinkaonni chrókjuíánkíni ntá la ntá ókjé nkexro tjítaón ntía tjiánkí ntá senó —mé chro tí sinníhi.

⁸ A ntá k'ueṭoan ch'ín Jesús kíxin:

—Ijie la t'inkatjen, tjatsíyan kañiáa, itjia —ichro ch'án.

⁹ Ntá tuénxín kuítóhe ch'án jína, ntá kjuátsen ch'án kañiee ch'án kjuankíxin itji ch'án. Kjánchó yaon sábadó tíha mé tí yaon t'ok'éhe sín.

¹⁰ Mé xíkaha tí sín judío ntáche sín tí ch'ín kuítóhe jína kíxin:

—Ijie tí yaon t'ok'éheni ntá kohya kjuachaxin tsamá kañiáa —ichro sín.

¹¹ A ntá ntáchro tí ch'ín a kíxin:

—Tí nkexro kjuínchekitona jína mé k'ueṭuanna kíxin tsjatsíyan kañiána la ko sátsjia —ichro ch'án.

¹² Ntá kjuanchankíhi sín ch'án kíxin:

—¿Nkexéhe tí nkexro k'ueṭuanhan kíxin tsjatsíyan kañiáa la ko sátsjia? —ichro sín.

¹³ A ntá tí ch'ín tsíkitohe jína na í kjuátsoanhya ch'án tí nkexro kjuínchekitōhe ch'án jína kíxin ntaha la sín nchónhya chojni, a ntá ntahó k'uitjáyanxín ch'ín Jesús. ¹⁴ A ntá chr'éxin ch'ín Jesús xeta ch'án tí ch'ín a nkaxenhen tí nínko jie ntá ntáchro ch'án kíxin:

—Tsjehe kíxin ijie la ó jína tjen jaha la í tjásinhya jie inaá. A ntá tí tsjásian jie inaá a ntá antsí má jínahya tsonhan —ichro ch'án.

¹⁵ A ntá sákjuí tí ch'ín a ntá chénka ch'án tí sín judío kíxin jehe ch'ín Jesús mé kjuínchekitōhe ch'án jína. ¹⁶ Mé xíkaha tí sín judío kjuankíxin sín chónkíhi sín tí ch'ín Jesús la ko chrók'óyán sín ch'án kíxin kjuínchekitōhe ch'án chojni jína tí yaon t'ok'éhe sín. ¹⁷ Kjánchó ch'ín Jesús ntáche ch'án tí jehe sín kíxin:

—Méxra T'aná naxa tjech'e ch'án xra. A ntá janhan kjaxin tjét'a xra —ichro ch'án.

¹⁸ Méxra xíkaha tí sín judío antsí tjinkaon sín chrók'óyán sín ch'án kíxin kuítékakuenhya ch'án tí ley kuente tí yaon t'ok'éhe sín la ko kjaxin ntáchro ch'án kíxin tí It'é ch'án la mé Dios, mé xíkaha ncheyóhe ch'án asén ch'án Dios.

Tí kjuachaxin chónta tí Xjeen Dios

¹⁹ Ntá ntáche ch'ín Jesús tí jehe sín kíxin:

—Ijnko nkehe tjetoan tsotjonkará kíxin tí Xjeen Dios nkaya nkajní tí jehó kjuachaxin kuente ó la mé xitjahya sich'e xra. Jehó tí xra t'ikon ch'án tjech'e It'é ch'án mé kjaxin ch'án xíkaha ch'e ch'án. ²⁰ A ntá tí It'é mé tjuèhe tí Xjeen ch'án, la ko tjakohe ch'án kaín xín xra ch'e ch'án, la ko antsí tjetoan tí xra naxa tsjakohe ch'án kíxin ntá tsochrakonrá kíxin ts'ikonrá tí xra sich'e ch'án. ²¹ Tí It'é mé chónta kjuachaxin nchexechón tí sín tsík'en la ko chjéhe ch'án sín kjuachón. A ntá tí Xjeen kjaxin chónta kjuachaxin tsochjéhe kjuachón tí nkexro tjinkaon tsochjéhe ch'án. ²² A ntá It'é la í sinchekitōexínhya ch'án ijie nínkexró. Kaín tí kjuachaxin kuente ch'án chjéhe ch'án tí Xjeen kíxin sinchekitōexín ch'án ijie chojni chjasintajni ²³ kíxin ntá kaín chojni tsjikosáyehe sín tí Xjeen éxi yóhe tjikosáyehe sín tí

It'é ch'án. Tí sín tjikosáyehya tí Xjeen xíkaha kjaxin tjikosáyehya sín tí It'é kixin jehe ch'án mé tsíchr'án tí Xjeen.

²⁴ 'Ijko nkehe tjetoan tsotjonkará kixin tí jnkojínra tjejetinhínra tí nkehe tjákua la ko tinkachónkirá tí T'aná, mé tí nkexro ichr'ánna, na mé xíkaha ó chontará tí kjuachón la ko tsjasótiahyará, na mé kuítóhéra tí ntia chrók'uénxinra, la ntá jie kjuankixinra tsochontará tí kjuachón jnkochrín. ²⁵ Ijko nkehe tjetoan tsotjonkará kixin ó tsi tí yaon, na mé jie tíha, mé xíkaha tsonhen kixin tí sín tsík'en tsinhin sín tsonixja tí Xjeen Dios. A ntá tí sín tsitekaon sín na mé ts'ejóhón sín. ²⁶ Tí It'é mé chóna ch'án kjuachaxin tsjanjon ch'án tí kjuachón la ko jehe ch'án mé chjéhe ch'án kjuachaxin tí Xjeen kixin kjaxin tí Xjeen tsjanjon tí kjuachón ²⁷ la ko kjaxin chjéhe ch'án kjuachaxin tí Xjeen ch'án sinchekitoexin tí ijie chojni chjasintajni kixin jehe mé tí Xjeen Dios K'óna Chojni. ²⁸ Chrakonhyará tjetjonkará xíkaha. Na mé ó tsi tí yaon kixin kaín tí sín tsík'en mé tsinhin sín tsonixja ch'án. ²⁹ A ntá ts'axrjexín sín tí tòye la tí sín kjuích'e sín xra jina mé tsoxechón sín ntá tsochóna sín tí kjuachón. A ntá tí sín kjuích'e sín xra jínahya na mé kjaxin tsoxechón sín ntá sátsji sín tsjasóte sín.

Tí kjuachaxin chóna ch'ín Jesús

³⁰ 'Tí jehó kjuachaxin kuéntana xitjahya sít'a ninkehó xra. A ntá jie ntákitóaxián tí ijie éxi k'uetuanna T'aná. A ntá tí nkehe ntákitóaxián la jina ntoá kixin tjínkaonhya sít'a éxi tjínkavan. Náhi. Éxi tjínkaon T'aná, tí nkexro ichr'ánna, mé xíkaha tjet'a. ³¹ A ntá tí chróxrjanka kixin nkexrí imá jina janhan la tíha la ninkehó kjuachaxin chróchóntahya. ³² Itjen í jnko nkexro tjechrónka nkexrí tjén janhan a ntá ó nóna kixin tí nkehe chrónka ch'án la síki. ³³ Jahará tsíkétuénhénra chojni kjuíkjanckankíhi sín tí ch'ín Juan kixin nkexríchi tjén janhan. A ntá tí nkehe tsíkjetéhe ch'án la chaxín ntoá tíha. ³⁴ Kjánchó chontiaxinhya tí nkehe tsochrónka nijnko chojni chjasintajni nkexríchi tjén janhan. Jehí ntáxrjan tíha kixin jahará jina chrókuaará. ³⁵ Tí ch'ín Juan kjuák'e éxi yóhe ijnko xrohi kjuák'eche k'uínkaséyanxín la ko jahará kócháhará xíkaha, kjánchó séhya kóxrjínhanra tí xrohi a. ³⁶ Kjánchó síin nkehe antsí tjetoan tjáqoxin nkexrí tjén janhan, a ntá kánhyó tjetoan tí nkehe tsíchrónka tí ch'ín Juan. Tí xra tjet'a, mé tí xra kjuanjon T'aná sít'a tsjixinna tí xra, na mé tíha mé tjáqoxin kixin chaxín T'aná tsíchr'án k'uinka. ³⁷ Kjaxin jehe T'aná, tí nkexro ichr'ánna, mé chrónkaxín ch'án nkexrí tjén janhan. A ntá jahará naxa kiénhyará tí nkehe nixja ch'án la ko k'uíkonhyará ch'án ³⁸ la ko kjaxin itén ch'án kuítóehya nkaya kjará kixin tjínkákonhyará tsítekáonra tí Xjeen Dios tsíchr'án síki. ³⁹ Jahará nchekuáxinra jina tí xroon tsíkjin tí sín tsíchrónka itén Dios ósé kixin ntáchrora kixin ntaha ts'itjaxinra tí kjuachón tsochontará jnkochrín. A ntá tí nkehe tsíkjin sín ósé mé chrónka kuénte janhan. ⁴⁰ Kjánchó jahará tjínkákonhyará tsochjinará tí tjén janhan kixin chrók'uayéhéra tí kjuachón a.

⁴¹ 'Janhan na tjéyáhya kixin chojni chrókjuikosáyana sín. ⁴² A ntá janhan ó nóna kixin jahará la tjuéhyará Dios. ⁴³ Mé k'uinkaxian janhan tí kjuachaxin kuénte T'aná. Kjánchó jahará la títékákonnahyará. A ntá tí chrókui í jnko nkexro kjuachaxin chrókuakitsjenín asén ó, a ntá tíha mé tjínkáonra chrókuítekákonhénra. ⁴⁴ ¿Nkexrí chrókuítekáonra jahará kixin tjéyará kixin tí chojni chjasintajni chrókjuikosáyahará sín, a ntá tjéyáhyará tí kjuachaxin chrókjuanjon jnkokoá Dios? ⁴⁵ Tsontáchrohyará

kixin janhan tsjánciá jié tí jahará nkayakon T'aná. Náhi. Ch'ín Moisés mé tsjanchia ch'án jié tí jahará kixin tsontáchrórá kixin jehe ch'án kuinkachónkirá. ⁴⁶ Kja tí jahará chrókuítekáonrá nkehe tsintáchro ch'ín Moisés ná chrókuítekáonrá tí janhan kixin tí xroon tsíkin ch'án mé chrónka kuènté tí janhan. ⁴⁷ A ntá tí títekáonhyará tí nkehe tsíkin ch'án, ¿ntá nkexrí chrókuítekáonrará nkehe ntáxrjan janhan? —ichro ch'án.

6

Ch'ín Jesús kjuanjon ch'án nkehe kjóne in'ó mil chojni

(Mt. 14.13-21; Mr. 6.30-44; Lc. 9.10-17)

¹ A ntá chr'éxin ntá sákjuí ch'ín Jesús k'uátòye ch'án tí ntayaon Galilea na mé tí ntayaon Tiberias tíha. ² A ntá nchónhya chojni tinkáchréhe sín kixin k'uikon sín tí kjuaxroan jié kjuasin ch'án kjuínchekitohe ch'án jina tí sijníhi. ³ A ntá jehe tí ch'ín Jesús chr'in ch'án ijnko jna na ntá ntaha kjuák'etjaxin ch'án la koí tí sín k'uájiko ch'án a. ⁴ A ntá í séhya ts'ixin tí kia pascua a mé kié tí sín judío a. ⁵ A ntá tí ch'ín Jesús k'uikon ch'án kixin nchónhya chojni chriin sín kjuichréhe sín ch'án ntá kjuanchankíhi ch'án tí ch'ín Felipe kixin:

—¿Nketí chrók'ueñani nkehe sine kaín tí chojni a? —ichro ch'án.

⁶ Mé xikaha ntáchro ch'án kixin siná nkehe tsixro ch'ín Felipe. A ntá tí ch'ín Jesús la ó nohe ch'án nkehe tí kjuaxroan tsjasin ch'án. ⁷ Ntá kjuátehe ch'ín Felipe ntáchro ch'án kixin:

—Kjóté doscientos chichaon denario chróchóntani chrók'uínáxin tí niotja la naxa chrókjuachahya chrók'uáyéhe jnkojnko sín tot'ò tí niotja a —ichro ch'án.

⁸ A ntá ch'ín Andrés, ijnko tí sín k'uájiko ch'ín Jesús la savé mé ch'ín Simón Pedro mé ntáchro ch'án kixin:

⁹—Ntíhi tjen ijnko xjan ntoa chóna in'ó niotja tsík'óna noa cebada la ko chóna ch'án yaá koche. ¿Xá chrókjuacha tíhó kixin nchónhya chojni siín? —ichro ch'án.

¹⁰ A ntá ntáchro ch'ín Jesús kixin:

—Tétuèhén tí sín siín a kixin ts'ixitjaxin sín —ichro ch'án.

A ntá nchónhya ika yoa siín na ntá ntaha k'uixitjaxin sín na mé éxi in'ó mil chojni k'uixin sín. ¹¹ A ntá ch'ín Jesús kuákja ch'án tí niotja ntá kjuanchehe ch'án Dios kjuasáya ntá chjéhe ch'án tí sín k'uájiko ch'án. A ntá jehe sín k'óxikayéhe sín chjéhe sín kaín tí sín sitjaxin a. Xikaha kjaxin k'óxikayéhe sín tí koche. A ntá kaín sín kjóne sín éxi tjinkaon sín. ¹² Kjuixin kjóne sín ntá k'uetuèhnen ch'ín Jesús tí sín k'uájiko ch'án ntáchro ch'án kixin:

—Tjénájínrá tí nkehe tot'ò síxèhe sín kixin ts'itjányanhya ninkehó —ichro ch'án.

¹³ Ntá xikaha jehe sín kjuenájín sín kjuínchekaón sín teyó ntaxra tí tot'ò tí in'ó niotja tsík'óna noa cebada síxèhe sín tí kjuixin tsíkjine sín. ¹⁴ A ntá tí sín kjóne tí niotja k'uikon sín tí kjuaxroan jié kjuasin ch'ín Jesús ntáchro sín kixin:

—Jehe ch'án mé chaxín tí nkexro tsíchr'án Dios kixin itsi tí chjasintajni tsjakoheni ch'án —ichro sín.

¹⁵ Kjánchó ch'ín Jesús mé kónohe ch'án kixin tjinkaon sín sáchrókjuiko sín ch'án chróchr'áxenhon sín ch'án tí xrá rey kixin chrók'uetóan ch'án. A ntá jehe ch'án tjinkakonhya ch'án tíha ntá jehó ch'án sáxíkji ch'án nteje inaá kjuák'e ch'án ntíha.

Éxí ijnko ntja xikaha kjuítaón ch'ín Jesús tí ntayaon

(Mt. 14.22-27; Mr. 6.45-52)

¹⁶ A ntá ó kóntó ntá tí sín k'uájiko ch'ín Jesús k'uínkajinxin sín jna sákjuí sín chrínta ntayaon ¹⁷ k'uit'ótjen sín ijnko ntabárcō kjuankíxin sín ts'atòye sín ntayaon sátsji sín chjasin Capernaum. Na ó k'uíxin tie na naxa kjanhya ch'ín Jesús. ¹⁸ Ntá kjuankíxin chjéhe xríntō tsankā ntá kjuankíxin tinkákjaminkí ntá. ¹⁹ A ntá tíó kjuacha sín á in'ó o injon kilómetro ntá xrinahya k'uikon sín tí ch'ín Jesús tinkákóchjinehe ch'án tí ntabárcō, éxí ijnko ntja tjetjitaón ch'án tí ntá, ntá k'uikon sín ntá imá chrakon sín. ²⁰ Kjánchó ntáchro ch'án kixin:

—Janhan tíha. Chrakonhyará —ichro ch'án.

²¹ Ntá imá chéhe sín k'uit'ótjen ch'án tí ntabárcō. Ntá ó tuénxín kjuíji sín tí chjasin sátsji sín.

Tí chojni xritjeyá sín tí ch'ín Jesús

²² A ntá tí yaon chr'éxin na mé tí sín kuitōhe tóhe ntayaon na mé ó nohe sín kixin jnkokoáxón ntabárcō k'uékjak'e ntiha la ko ó nohe sín kixin ch'ín Jesús kjá ní sátsíkikohya sín ch'án na mé k'uikon sín kixin jehó tí sín k'uájiko ch'án sátsíkji sín. ²³ Kjánchó síin ntabárcō tixín chjasin Tiberias tinkákóchjinehe tí nó kjónexín sín tí niotja kjuanchaxín ch'ín Jesús kjuasáyé Dios. ²⁴ A ntá tíó k'uikon sín kixin kohya ch'ín Jesús la ko kjaxín kohya tí sín k'uájiko ch'án, ntá jehe sín mé k'uit'ótjen sín iso ntabárcō ntá sákjuí sín chjasin Capernaum sákjuíkjeyá sín tí ch'ín Jesús.

Ínchéni Jesús mé éxí niotja tjanjon kjuachón

²⁵ A ntá tóhe ntayaon xéta sín tí ch'ín Jesús ntá kjuanchankíhi sín ch'án kixin:

—Maestro, ¿nkesá k'uinka ntihi? —ichro sín.

²⁶ Ntá kjuátehe ch'ín Jesús ntáchro ch'án kixin:

—Ó nōna kixin jahará tjéyará tí janhan kixin kjónterá niotja kókjahará, la jehya kixin kiénxinrá tí kjuaxroan kjuásian. ²⁷ Chrókjuich'ehyará tí xra chrók'uite tí nkehe chrókjónterá tjoka tsjeje ó. Náhí. Chrókjuéyará tí nkehe chrókjuejehya chrókjónterá chrók'uayéxinrá tí kjuachón jnkochrín. Tí nkehe tjanjon tí Xjeen Dios K'óna Chojni mé chrókjónterá kixin It'é ch'án mé tjakoxín ch'án kixin tí Xjeen ch'án mé chóna kjuachaxién tí jehe ch'án —ichro ch'ín Jesús.

²⁸ A ntá kjuanchankíhi sín ch'án kixin:

—¿Nkexrí chrókjuich'eni chrokjuinchexiteyáni nkexrí tjinkaon Dios? —ichro sín.

²⁹ A ntá kjuátehe ch'ín Jesús ntáchro ch'án kixin:

—Dios mé tjinkaon ch'án kixin chrókuinkachónkirá tí nkexro tsíchr'án ch'án —ichro ch'án.

³⁰ Ntá kjuanchankíhi sín ch'án kixin:

—¿Nkehe tí kjuaxroan chrókjuákoéxianni chrók'uikonni kixin ntá chrókuitekaonni tí jaha? ¿Nkehe tí xra ch'e jaha? ³¹ Tí sín tsík'axrjeníxinni k'uéjó sín ósé mé kjóne sín maná k'óna niotja tíó k'uíxin sín nteje mé xikaha tí xroon kuènte Dios tsíkjin ijnko nkexro ósé ntáchro kixin: “Kjuanjon ch'án tí nkehe kjóne sín mé niotja tsíkixin nkaya nkajní”^{*} —ichro sín.

³² A ntá kjuátehe ch'ín Jesús ntáchro ch'án kixin:

* 6:31 Salmo 78.24

—Ijko nkehe tjetooan tjonkará kixin jehya ch'in Moisés kjuanjon tí maná k'óna niotja k'uínkajinxin nkaya nkajní. Náhí. T'aná mé tjetjanjon tí niotja chaxín jina k'uínkajinxin nkaya nkajní. ³³ Tí niotja tjanjon Dios mé tí nkexro k'uínkajinxin nkaya nkajní tjejóchónxin chojni chjasintajni —ichro ch'án.

³⁴ Na ntá kjuanchia sín kixin:

—Jaha Ìnchéni, jnkochrín chjehéni tí niotja a —ichro sín.

³⁵ A ntá ntáchro ch'in Jesús kixin:

—Janhan mé tí niotja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín nta. ³⁶ Kjánchó éxí k'uétjonkará senó na ó k'uíkonrá tí janhan na kjónté naxa titekákonhyará. ³⁷ A ntá kaín tí sín chjina T'aná la tsochjina sín tí janhan. A ntá kaín tí sín tjejótóchjinehe sín tí janhan la tsétuanyha sín kixin sátsji sín. ³⁸ Janhan k'uinkaxian nkaya nkajní jehya tí xra tóxrjina chrókjuít'a. Náhí. K'uinka kixin chrókjuít'a tí xra tóxrjínhin tí nkexro tsíchr'ánna. ³⁹ A ntá T'aná mé tí nkexro tsíchr'ánna mé tjinkaon ch'án kixin sintak'itjáyanha ninkexró tí sín chjina ch'án na mé tjinkaon ch'án kixin janhan mé sintaxechón kaín sín tí yaon tsjixixín. ⁴⁰ Mé xíkaha tjinkaon tí nkexro tsíchr'ánna kixin kaín tí sín ts'ikon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochrín. A ntá janhan sintaxechón sín tí yaon tsjixixín —ichro ch'án.

⁴¹ A ntá tí sín judío kjuankixin sín kjonta sín tí ch'in Jesús kixin tsintáchro ch'án kixin jehe ch'án mé tí niotja k'uínkajinxin nkaya nkajní. ⁴² Mé ntáchro sín kixin:

—¿Á jehya tí Jesús, it'é mé it'in José, na mé chóxinni tí it'é la ko tí iné ch'án? ¿Ntá nkekuénté ntáchro ch'án kixin nkajní k'uínkajinxin ch'án? —ichro sín.

⁴³ Ntá kjuátehe ch'in Jesús ntáchro ch'án kixin:

—Títóhérá tjóntahyará tí janhan. ⁴⁴ Kohya nkexro chrókóchjina tí tjén janhan tí chrókjuínkítsahya T'aná. A ntá tí sín tóchjina na mé sintaxechón sín tí yaon tsjixixín. ⁴⁵ Na mé tí sín k'uéchrónka itén Dios ósé mé tsíkjin sín xroon ntáchro kixin: “Dios mé tsjakohe ch'án kaín chojni.”† A ntá kaín tí sín tsíkinhin tí nixja T'aná la ko kjuakohe ch'án sín mé sítóchjina sín tí tjén janhan.

⁴⁶ Jehya kixin itjen ijko chojni tsík'ikon T'aná. Náhí. Jehó tí nkexro kuixin tí tjen Dios mé tsík'ikon ch'án Dios. ⁴⁷ Chaxín tí nkehe tjéxrjanka kixin tí sín titekaon sín tí janhan mé ó tsochóna sín kjuachón jnkochrín. ⁴⁸ Janhan na mé tí niotja tjanjon kjuachón. ⁴⁹ Tí sín k'uaxrjenixinrá k'uéjé ósé kjóne sín tí maná k'óna niotja tíó k'uéjé sín nteje, a ntá kjónté ik'uén sín k'uítjáyan sín. ⁵⁰ Tí nkehe xrjanka mé tí niotja k'uínkajinxin nkaya nkajní, a ntá tí sín sine tí niotja a mé ts'enhya sín. ⁵¹ Janhan mé tí niotja tjechón k'uínkajinxin nkaya nkajní. A ntá tí sín sine tí niotja a mé ts'ejóchón sín jnkochrín. Tí niotja tsjánjuan ts'ejóchónxin chojni chjasintajni mé ntóna tíha —ichro ch'in Jesús.

⁵² A ntá tí sín judío mé sítjité sín itjo sín kichó sín ntáchro sín kixin:

—¿Nkexrí chrókjuanjon ch'án ntøe ch'án chrókjóneni? —ichro sín.

⁵³ A ntá kjuátehe ch'in Jesús ntáchro ch'án kixin:

—Ntá tsotjonkará kixin tí sintehyará ntøe tí Xjeen Dios K'óna Chojni, la ko tí ts'ihyará ijnié ch'án, ntá tsochontahyará kjuachón jahará. ⁵⁴ Tí

sinterá ntona la ko it'irá jnina ntá tsochontará kjuachón jnkochrín la ko janhan mé sintaxechnónrá tí yaon tsjixixín. ⁵⁵ Kíxin ntona na mé chaxín nkehe ine chojni la ko jnina na mé chaxín nkehe it'i chojni. ⁵⁶ Tí sín ine ntona la ko it'i sín jnina mé jnkokoá tjenkayáxinkian sín la ko janhan mé xríkian sín. ⁵⁷ T'aná tsíchr'án ch'án tí janhan mé chóna kjuachaxin, a ntá janhan mé tjéchnonxian tí jehe ch'án. Ntá tí sín sine tí ntona mé ts'ejóchnonxin sín tí janhan. ⁵⁸ A ntá tjénixja kuènte tí niotja k'uínkajinxin nkaya nkajní na mé yóehya tí maná tsík'óna niotja kjóne tí sín tsík'axrjeníxinrá ósé kíxin jehe sín na kjóne sín na kjónté k'uén sín. A ntá tí sinterá tí niotja k'uínkajinxin nkaya nkajní ntá ts'ejóchnónrá jnkochrín —mé chro ch'in Jesús.

⁵⁹ Kaín tíha mé kjuakohé ch'án tí sín tsíkójnkotséxin tí nínko Israel chjasin Capernaum.

Tí nkehe chrónka ch'in Jesús mé tjanjon kjuachón jnkochrín

⁶⁰ A ntá tió kuínhin sín tí nkehe kjuako ch'in Jesús ntá itsjé tí sín k'uájiko ch'án ntáchro sín kíxin:

—Imá xrá tí nkehe chrónka ch'án. ¿Xá nkexro chrókuinhin tíha? —ichro sín.

⁶¹ A ntá kónohe ch'in Jesús kíxin xíkaha tóxakonhen sín kíenxínhya sín tí nkehe tsintáchro ch'án ntá kjuanchankíhi ch'án sín kíxin:

—¿Á kjaxinrá tjinkákonhyará tsinhínrá tíhi? ⁶² ¿Ntá nkexrí tsonhen chrók'uikonrá kíxin tí Xjeen Dios K'óna Chojni mé sátsji ch'án inaá tí nó tsíkixín ch'án tí tsíkjak'e ch'án ósé? ⁶³ Tí Nchakuen Dios mé tjanjon tí kjuachón, a ntá tí nto la ninkehó sínkíhya. Na ntá tí nkehe tjétjonkará na mé kuènte tí Nchakuen Dios na mé tjejóchnonxin chojni. ⁶⁴ Kjánchó isorá naxa títekákonnahyará —ichro ch'án.

Mé xíkaha ichro ch'án kíxin tí xránkixixín ó kónohe ch'án kíxin nkexro tí sín tsitekakuenhya sín ch'án la ko kónohe ch'án kíxin nkexro sinchekji ch'án. ⁶⁵ A ntá ntáchro ch'án kíxin:

—Méxra xíkaha k'uétjonkará kíxin ninkexró tsóchjina tí tjén janhan tí tsjinkítsahya T'aná —ichro ch'án.

⁶⁶ A ntá kjuixin tíha ntá nchónhya tí sín k'uék'ajiko ch'in Jesús ntá xrinahya kuítóhe sín, í chrèhya sín ch'án. ⁶⁷ Ntá kjuanchankíhi ch'án tí teyó sín k'uájiko ch'án ntáchro ch'án kíxin:

—¿Á kjaxinrá tjinkáonrá xíkaha sáchrókuirá? —ichro ch'án.

⁶⁸ Ntá kjuátéhe ch'in Simón Pedro kíxin:

—Jaha Ìnchéni, ¿nkekuènté tjanchankíhíni á sáchrókuini ókjé? Jaha tí tan chrónka a mé tsochóntaxínni kjuachón jnkochrín ⁶⁹ ntá kuítekaonni ntá ó noheni chaxín kíxin jaha tí Cristo mé Xjeen Dios tjechón —ichro ch'án.

⁷⁰ Ntá kjuátéhe ch'in Jesús ntáchro ch'án kíxin:

—Janhan kjuéyá tí kaín rá teyórá la ko jnkójínrá ntíhi mé ts'ónará ijnko jínahya —ichro ch'án.

⁷¹ Tíha mé t'axrjéxin tí ntáchro ch'in Jesús chrónka ch'án kíxin ch'in Judas Iscariote, tíha it'é mé it'in Simón, mé ijnko tí teyó sín tsíkjejá ch'án ntá kjónté sinchekji ch'án tí ch'in Jesús.

7

Tí sín jnkokoá kíchó ch'in Jesús mé kuítekakuenhya sín ch'án

¹ Ntá kjuixin tíha ntá k'uáji ch'ín Jesús tí estado Galilea. Chrók'uajihya ch'án tí estado Judea kixin tí sín judío tjinkaon sín chrók'oyán sín ch'án. ² Kjánchó ó kuichjina tí yaon kia ntá tí sín judío sich'éna sín itsjé its'van tsjasixín sín kia. * ³ A ntá tí sín kichó ch'ín Jesús ntáche sín ch'án kixin:

—Chrókuitoahya ntihi. Sáchrókjuia estado Judea kixin ntá kjaxin tí sín chréhe tí jaha tjejó ntiha chrók'uikon sín tí kjuaxroan tsjásian. ⁴ Kixin tíó tjinkaon ijnko nkexro kixin chojni tsochóxin sín ch'án ntá móhya chrókjuich'e ch'án xra. A ntá tí chaxín tjetjásian kjuaxroan la jehya mó chrókjuásian kjuaxroan. Náhí. Chrók'uikon kaín xín chojni síin chjasintajni —mé chro sín.

⁵ Xikaha ntáchro tí sín kichó ch'án kixin kjaxin jehe sín titekakuenhya sín tí jehe ch'án. ⁶ A ntá kjuátehe ch'ín Jesús ntáchro ch'án kixin:

—Naxa kjuixrakáhya tí hora kuéntana tsjásian kjuaxroan. Ntá jahará la cualquier hora tjinkáonrá jína chrók'uikonrá kjuaxroan. ⁷ Tí sín chjasintajni xitjahya tsonínkakonhanrá sín tí jahará. Ntá janhan na imá nínkakonna sín kixin ntátjan sín kixin jehya jína tí nkehe tjejóch'e sín. ⁸ Jahará la sátjírá tí kia a. A ntá janhan la tjíhya kixin naxa kjuixrakáhya tí hora kuéntana —ichro ch'án.

⁹ Mé xikaha ntáchro ch'án ntá kuítóhe ch'án estado Galilea.

Itjen ch'ín Jesús tí kia a

¹⁰ A ntá ó kjuixin sátsíkji tí sín jnkokoá kichó ch'ín Jesús ntá jehe ch'án la kjaxin sákjuí ch'án tí kia a kjánchó noxínhya xritjak'e ch'án. ¹¹ A ntá tí sín judío mé xriteyá sín ch'án tí kia a la ntáchro sín kixin:

—¿Xá nketí tjen tí ch'ín a? —ichro sín.

¹² A ntá itsjé sín ntiha mé kjo sín kichó sín kixin nkexrí tjen ch'án. Iso sín ntáchro sín kixin: “Jína ch'án”; kjánchó í so sín ntáchro sín kixin: “Jehya chojni jína ch'án, méxra imá ch'iyehé ch'án chojni”, ichro sín.

¹³ Kjánchó noxínhya kjo sín xikaha kixin chrakonhen sín tí sín judío a.

¹⁴ A ntá ó kjuíji jnkosiné tí kia a ntá k'uixenhen ch'ín Jesús tí nínko jíé ntá kjuankixin ch'án kjuako ch'án. ¹⁵ A ntá tí sín judío chrakon sín komá sín ch'án ntáchro sín kixin:

—¿Xá nkexrí nohe tí ch'ín i nchónhya tí nkehe kixin tsíxrakóehya ch'án? —ichro sín.

¹⁶ Ntá kjuátehe ch'ín Jesús ntáchro ch'án kixin:

—Tí nkehe tjákua la jehya kuéntana na mé tí xra kuente tí nkexro tsíchr'ánna k'uinka. ¹⁷ Tí jnkojinrá tjinkáonrá chrókjuínchexiteyéherá éxi tóxrjínhin Dios la tsonohará á chaxín kuente Dios tí nkehe tjákua o á kuéntana tíha. ¹⁸ A ntá tí nkexro tjako tí nkehe t'axrjeníxin kja sín ó mé xikaha ch'e kixin tjinkaon sín kixin tí chojni ó mé chróchóntehe sín ch'án kjuasáya. A ntá tí nkexro tjinkaon kixin tí chojni a mé chrókjuikosáyehe sín tí nkexro tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

¹⁹ ¿Á jehya ch'ín Moisés tjáhará tí itén Dios chrókuítekáonrá? Kjánchó nijnkorá kuitekákuenhyará tí nkehe tsíkjin ch'án. ¿Méxra nkekuenté tjinkáonrá chrók'oyánrá tí janhan? —ichro ch'án.

²⁰ Ntá kjuátehe tí sín a ntáchro sín kixin:

—Jaha chonta ijnko nchakuen tí jínahya. ¿Xá nkexro chrók'oyán tí jaha? —ichro sín.

²¹ Ntá kjuátehe ch'ín Jesús ntáchro ch'án kixin:

* 7:2 Levítico 23.34

—Jnkokoá kjuaxroan kjuásian tí yaon t'ok'éheni ntá chrakonrá.†
 22 A ntá ch'ín Moisés tsík'etōan kixin xjaanrá ntoo itsa xjan xroye, (kjánchó jehya ch'ín Moisés kjuankixin ch'án kjuako ch'án tíha, na mé tí sín tsík'axrjenínrá kjuankixin sín kjuako sín tíha). Mé xikaha nchekará xjan tí xroye a kjónté yaon t'ok'éheni. 23 A ntá xikaha nchekará xjan xroye tí yaon t'ok'éheni kixin xikaha chrókjuinchek'itjáyankíhyará ninkehó tí nkehe k'uetōan ch'ín Moisés, ¿ntá nkekuènté kixin ninkákonnará tí janhan kixin kjuintakitoḥa jína ijnko chojni tí yaon t'ok'éheni? 24 Chrókjuanchahyará jie kixin tí nkehe t'ikonxínrá ikonrá ó. Chrókjuenkayáxinrá tí nkehe jína tóxrjnhin Dios —mé chro ch'ín Jesús.

Ch'ín Jesús chrónka kixin nketí k'uaxrjenixin ch'án

25 A ntá iso sín chjasin Jerusalén kjuankixin sín kjo sín kichó sín kjuanchankí sín kixin:

—¿Á jehya tí ch'ín a xritjeyá sín chrók'óyán sín? 26 Ntá jie noxín tjen ch'án nixja ch'án kohya ninkexró nínkakonhen ch'án. Kjá tí síxreé titekaon sín kixin tí nkexro a chaxín Cristo tíha. 27 Kjánchó ó noheni nketí tsík'jixin ch'án. A ntá tió tsi tí nkexro Cristo ntá ninkexró tsonoehya nketí tsixín ch'án —ichro sín.

28 A ntá ch'ín Jesús kjuák'ekjako ch'án tí nínko jié ntá kuínhin ch'án kixin xikaha kjo sín, ntá itsen nixja ch'án ntáchro ch'án kixin:

—Chaxín choxinrá tí janhan la ko nohará nketí chjasin tsík'jixian. Kjánchó jehya kixin k'uinka sintaxiteyá tí nkehe ntáchro asenná ó. Ó k'uinka kixin ichr'ánna tí nkexro chaxín tjechón tjen nkaya nkajní. Jahará naxa chonhyará tí nkexro a. 29 Janhan la choxian ch'án kixin ntaha tsík'inkaxian na mé jehe ch'án mé tsíchr'ánna ch'án —ichro ch'ín Jesús.

30 Ntá chrótsé sín ch'án chrókjuak'echjina sín ch'án ntá kjónté ninkexró tséhya sín ch'án kixin naxa kjuanjonhya Dios kjuachaxin chrótsé sín ch'án.

31 Kjánchó itsjé chojni kuítekaon sín tí jehe ch'án. A ntá ntáchro sín kixin:

—A ntá tió chrókui tí Cristo la, ¿á má jié kjuaxroan chrókjuasin ch'án, a ntá tí ch'ín i la kénhyó ní? —ichro sín.

Tí sín fariseo ichr'án sín chojni policia tsotsé sín tí ch'ín Jesús tsjak'echjina sín ch'án

32 A ntá tí sín fariseo kuínhin sín nkehe tí ntáchro chojni kixin nkexrí tjen ch'ín Jesús, ntá jehe sín la ko tí sín ncha'tá t'etōan k'uetuenhen sín iso sín policia kuènte nínko tsotsé sín ch'án tsjak'echjina sín ch'án. 33 A ntá ntáchro ch'ín Jesús kixin:

—Kjaxin í séhya tsjak'é ntihi ts'ejóni ntá sáxikjiya tí tjen tí nkexro ichr'ánna. 34 A ntá jahará tsjéyará tí janhan na ts'itjahyará kixin xitjahya tsjasánrá tí tsjak'é janhan —ichro ch'án.

35 A ntá tí sín judío kjuankixin sín kjuanchankíhi sín kichó sín kixin:

—¿Ntá nketí nó sátsji ch'án kixin tsjachahyani ts'itjani ch'án? ¿Xá sátsjichréhe ch'án tí sín judío tjejóyákjan tí sín nixja nkíva griego kixin ntá tsjakōhe ch'án tí sín griego? 36 ¿Nkexrí t'axrjéxín tí nkehe ntáchro ch'án kixin tsjeyáni ch'án na kjónté ts'itjahyani ch'án la tsjachahyani tsjichréheni ch'án tí tsjak'e ch'án? —ichro sín.

Ntario tjechón

37 A ntá tí yaon tsjixixín tí kia a mé tí yaon jié mé k'uínkatjen ch'ín Jesús, a ntá itsen nixja ch'án ntáchro ch'án kixin:

—Kja tí jnkojínrá ik'uénrá ntə xrákirá its'irá ntə. ³⁸ A ntá éxí ntáchro xroon Itén Dios kixin tí sín titekaon sín tí janhan na mé nkaya asén sín ts'óna ijnko río ts'axrje intə tjechón —ichro ch'án.

³⁹ Mé xikaha chrónkaxín ch'ín Jesús nkexri tjen tí Nchakuen Dios ts'áyéhe tí sín tsitekaon sín tí jehe ch'án. Kjánchó naxə tihya tí Nchakuen Dios kixin ch'ín Jesús naxə sətjijhya ch'án nkaya nkajní.

Jnkokoáhya kjuenkayáxin tí chojni

⁴⁰ A ntá iso sín tió kuínhin sín tí nkehe ntáchro ch'ín Jesús ntá ntáchro sín kixin:

—Kja chaxín tí ch'ín i mé tí profeta ó tsíkji —ichro sín.

⁴¹ Ikjé sín ntáchro sín kixin:

—Jehe ch'án mé tí nkexro Cristo —ichro sín.

A ntá í so sín ntáchro sín kixin:

—¿Xá nkekuèté chrókjuixín Galilea tí nkexro Cristo? ⁴² Tí xroon tsíkjin sín ósé mé chrónka kixin tí nkexro Cristo mé ts'axrjenixin tí sín k'uaxrjenixin tí ch'ín rey David la ko tsjixín ch'án chjasin Belén mé tí chjasin k'uékjak'e ch'ín David —ichro sín.

⁴³ Mé xikaha jnkokoáhya kjuenkayáxin sín kaín sín kixin nkexro tí ch'ín Jesús. ⁴⁴ Iso sín tjinkaon sín sáchrókjuiko sín ch'án chrókjuikjehe sín ch'án kjánchó ninkexró kjuích'ehya xikaha.

Tí síxreé kuítekakonhya sín tí ch'ín Jesús

⁴⁵ A ntá tí sín policia kuènte nínko mé kjan sín tí tjejó tí sín fariseo la ko tí sín nchat'á t'ətoan. Ntá tí sín a mé kjuanchankíhi sín tí sín policia kixin:

—¿Nkekuèté kjuikoahyará ch'án? —ichro sín.

⁴⁶ Ntá kjuátehe tí sín policia kixin:

—Kohya ninkexró nixja éxí xikaha nixja tí ch'ín a —ichro sín.

⁴⁷ Ntá ntáche tí sín fariseo tí sín policia kixin:

—¿Á kjaxinrá kuítəhéra kjuít'ayahará ch'án? ⁴⁸ ¿Á kuítekaon tí jehe ch'án jnkojín tí sín t'ətoan kuèténi o tí sín fariseo? ⁴⁹ A ntá tí sín a mé chónhya sín tí ley na mé tsjasóte sín —ichro sín.

⁵⁰ A ntá tí ch'ín Nicodemo, tí ch'ín kjuítsjehe tí ch'ín Jesús ijnko tie senó na mé jehe ch'án fariseo ch'án na ntá ntáche ch'án sín kixin:

⁵¹ —Tí ley kuèténi la kohya kjuachaxin sincheejasóteni ijnko chojni tí naxə kíenhyani nkehe nixja ch'án la ko kíenhyani tí jie kjuasin ch'án —ichro ch'án.

⁵² Ntá kjuátehe sín ntáchro sín kixin:

—¿Á kjaxian jaha kjuíxian estado Galilea ní? Nchekuáxian tí xroon itén Dios ntá tsonoha kixin nijnko tí sín k'uéchrónka itén Dios tsíkijixinhya sín tí estado Galilea —ichro sín.

Ijnko tjan kjuasin jie chóna ókjé chojni ntoa

⁵³ Ntá jnkojnko tí sín xíka sín sákjuí sín ntəe sín.

8

¹ Ntá ch'ín Jesús mé sákjuí ch'án tí jnə Olivo. ² Ntá tí kóyaon nchítjen ikjan ch'án k'uíxenhén ch'án tí nínko jie a la ko kaín xín tí chojni mé kóchjinehe sín ch'án. Ntá kjuák'etjaxín ch'án kjuankíxin ch'án kjuako ch'án. ³ Ntá tí sín tjako tí ley la ko tí sín fariseo mé kjuíkəo sín ijnko tjachjin kónoxín kixin chóna tjan ókjé chojni ntoa. Ntá kjuák'ə sín tjan jnkosiné tí sín tjejó ntiha. ⁴ Ntá ntáche sín tí ch'ín Jesús kixin:

—Maestro, tí tjan i kónoxín kixin kjuasin tjan jié chóna tjan ókjé chojni ntoa. ⁵ A ntá tí ley tsíkjin ch'in Moisés mé t'etóan kixin ixro chrók'óyánxinni tí chojni chjin xikaha ch'e. ¿A ntá jaha, nkechrua? —ichro sín.

⁶ Mé xikaha ichro sín kixin tjinkaon sín kixin ách'e ntoáhya chrókjuátehe ch'in Jesús ntá chrókjuanchia sín jié. Ntá ch'in Jesús mé k'uísén ch'án kjinxin ch'án dedo tja ch'án nonte a. ⁷ Ntá naxa tinkákjanchankíhi sín ch'án. Ntá k'uínkatjen ch'án k'uetoan ch'án kixin:

—Xá nkexro tí tjejorá ntihi chónahya ninkehó jié mé saoxín chróchéhe sín tjan xro —ichro ch'án.

⁸ Ntá xik'isén ch'án inaá ikjin ch'án tí nche inaá. ⁹ Ntá tí sín a mé kuínhin sín tí nkehe k'uetoan ch'in Jesús ntá kósuèhe sín kixin koí sín chóna sín jié, ntá jnkójnko jnkójnko sín, sásítji sín na mé saoxín tí ch'in antsi má táda ch'án sákjuí ch'án, ntá kaín tí sín í so a sákjuí sín kjaxin sín.

Ntá jehó tí ch'in Jesús la ko tí tjan a kuítóhe sín ntiha. ¹⁰ Ntá xrentoá ch'án la kjuanchankíhi ch'án tjan kixin:

—¿Nkekjá tí sín kjuanchia jié? ¿Á kohya ninkexró kjuínchekjasótiahya ní? —ichro ch'án.

¹¹ Ntá ntáchro tjan kixin:

—Náhi, Inchéni, ninkexró —ichro tjan.

Ntá ntáchro ch'in Jesús kixin:

—Kjaxin janhan sintakjasótiahya. Sátjia la í tjásinhya jié inaá —ichro ch'án.

Ch'in Jesús mé xrohi t'inkaséyanxín chjasintajni

¹² Ntá ch'in Jesús xínixjehe ch'án tí sín tsíkóchjina inaá ntáchro ch'án kixin:

—Janhan mé xrohi t'inkaséyanxín chjasintajni. Tí tsochréhérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sítie a —ichro ch'án.

¹³ Ntá tí sín fariseo ntáchro sín kixin:

—Jahvá tjechronka nkexrí tjen jaha na mé chaxínhya tíha kixin jahvá tjechronka —ichro sín.

¹⁴ Ntá kjuátehe ch'in Jesús ntáchro ch'án kixin:

—Janhván tjetjonkará nkexrí tjen na kjónté chaxín xrjanka kixin ó nòna nketí nó k'uinkaxian la ko nòna nketí sátsjiyá. A ntá jahará noahyará nketí k'uinkaxian la ko noahyará nketí sátsjiyá. ¹⁵ Jahará la éxí chojni chjasintajni ó tékará jié. A ntá janhan la tékahya jié ninkexró. ¹⁶ Kjánchó ntoá chrókjuintakitoaxián ijie chojni kixin jehya janhván t'a tíha, T'aná tjékian, na mé tí nkexro k'uetoanna k'uinka ntihi na mé jehe ch'án mé tjékian ch'án ntihi ntakitoaxínkian ijie chojni. ¹⁷ A ntá tí ley tsíkjin ch'in Moisés mé ntáchro kixin tí tsonoxín iyó sín tsochronka á chaxín xikaha tsíkónhen ntá chrókuitekaon chojni. ¹⁸ Ntá janhan na mé tjéxrjanka nkexrí tjen janhan la ko kjaxin T'aná mé tí nkexro k'uetoanna k'uinka mé jehe ch'án kjaxin chrónka ch'án nkexrí tjen janhan —ichro ch'án.

¹⁹ Ntá kjuanchankíhi sín ch'án kixin:

—¿Nketí tjen It'á? —ichro sín.

Ntá kjuátehe ch'in Jesús ntáchro ch'án kixin:

—Jahará la chonhyará tí janhan la ko kjaxin chonhyará T'aná. Tí chrókóchoxinrá tí janhan ntá kjaxin chrókóchoxinrá tí T'aná —ichro ch'án.

²⁰ Mé xikaha chro ch'in Jesús tí kjuák'ekjakoxxin ch'án tí nínko jíé chjino ntacajon tjetóxyéya chichaon tjanjon sín. Kjánchó ninkexró tséhya sín ch'án kixin naxa kjuixrakáhya tí hora tsotsé sín ch'án.

“Xitjahya tsjasánrá tí nó sátsjiyá janhan”

²¹ Ntá ch'ín Jesús ntáche ch'án sín inaá kixin:

—Ntá sátsjiyá janhan. Ntá jahará tsjéyará tí janhan, ntá tió ts'énrá naxa yamará ijjará. Xitjahya tsjasánrá tí nó sátsjiyá janhan —ichro ch'án.

²² Ntá ntácho tí sín judío ikjo sín kichó sín kixin:

—¿Á ts'óyán ch'án asén ch'án kixin xikaha ntácho ch'án kixin xitjahya tsjijini tí nó sátsji ch'án? —ichro sín.

²³ Ntá ntáche ch'ín Jesús tí jehe sín kixin:

—Jahará la nonte ntihi k'uaxrjénixínra. A ntá janhan la nkaya nkajní k'uaxrjénixián. Jahará la kuènte chjasintajni ntihi. A ntá janhan la janhya kuènte chjasintajni. ²⁴ Mé xikaha tjonkará kixin tió ts'énrá naxa tsochontará ijjará kixin tí tsitekákonhyará tí janhan, mé tí nkexro xráxin tjen,* ntá kjónté ts'énrá naxa tsochontará tí ijjará —ichro ch'án.

²⁵ Ntá kjuanchankí sín ntácho sín kixin:

—¿Nkexro tí jaha? —ichro sín.

Ntá kjuátehe ch'ín Jesús ntácho ch'án kixin:

—Tí xrankixixín kjuankixián tjonkará kixin nkexro tí janhan. ²⁶ Itsjé nkehe chonta chróntáxrjan kixin chrókjuintakitoaxián tí jié chontará. Kjánchó tí nkexro k'ueṭuanna k'uinka na mé tí nkehe chrónka ch'án la chaxín. A ntá jehó tí nkehe kuinhān chrónka ch'án mé tjáqohā tí sín chjasintajni —ichro ch'án.

²⁷ Kjánchó jehe sín mé kiéxínhya sín kixin nixja ch'án kuènte It'é ch'án tjen nkaya nkajní. ²⁸ A ntá ntácho ch'án kixin:

—Tió sinchek'it'ótjenrá noi tí Xjeen Dios K'óna Chojni, ntá tsonohará kixin janhan mé tí nkexro xráxin tjen.† Ntá tsonohará kixin jehya janhan tétōan tí xra tjet'a. Náhi. Jehó tí nkehe kjuakona T'aná mé tjétjākua. ²⁹ Tjékián tí nkexro k'ueṭuanna k'uinka kixin jehí xráxin T'aná la kuítōnahya janhvān kixin xráxin ntaxiteyáhā tí nkehe tóxrjínhīn ch'án —ichro ch'án.

³⁰ Mé xikaha ntácho ch'án ntá nchónhya chojni kuítekaon sín tí jehe ch'án.

Nkexrí tjejó tí sín xjeen Dios la ko nkexrí tjejó tí sín chrokjuahya tsitōhe sín ijjé sín

³¹ Ntá nixjehe ch'ín Jesús tí sín judío kuinkáchónki sín ch'án ntácho ch'án kixin:

—Tí tsitōehyará tí tan kjuákoohará ntá jahará chaxín discípulo kuèntāna ³² la ko tsjátsoanrá tí nkehe chaxín, la ko tí nkehe chaxín mé tsotjáhará kjuachaxín tsaáxinrá, a ntá tsokohya nkehe ts'inkákonhēn —ichro ch'án.

³³ Ntá kjuátehe sín ntácho sín kixin:

—Jeheni mé tsík'axrjenixinni ch'ín Abraham na í xráxin kohya nkexro k'ueṇa tí jeheni. ¿Nkekuènté ntáchrúa jaha kixin ts'áyéhēni kjuachaxin tsaáxinni? —ichro sín.

³⁴ Ntá ntácho ch'ín Jesús kixin:

—Tjetoan tí nkehe tjetjonkará kixin tí sín tjasin jié mé éxi chojni k'uíná chrokjuahya tsitōhe sín ijjé sín. ³⁵ A ntá ijnko chojni k'uíná la jnkochrínhya tsjak'e ch'án tí ntōe tí nkexro a. A ntá tí xjeen tí nkexro na mé jnkochrín tsitōhe ntiha. ³⁶ Ntá tí tsaáxinrá tí Xjeen Dios ntá chaxín tsochontará kjuachaxin, a ntá tsokohya nkehe ts'inkákonhēn. ³⁷ Ó

* 8:24 Éxodo 3.14 † 8:28 Éxodo 3.14

nòna kixin jahará tsík'axrjeníxinrá ch'ín Abraham. Kjánchó tjinkáonrá chrók'oyánrá tí janhan kixin títekákonhyará tí nkehe tjéxrjanka. ³⁸ Janhan xrjanka tí nkehe k'uíkuan kixin nkexrí tjen T'aná. A ntá jahará tjejonchex-iteyéhérá tí nkehe kuínhínrá chrónka it'ára —ichro ch'án.

³⁹ A ntá jehe sín kjuátehe sín ntáchro sín kixin:

—It'éni mé ch'ín Abraham —ichro sín.

Kjánchó ntáchro ch'ín Jesús kixin:

—A ntá tí jahará chrókóchaxín xjeen ch'ín Abraham ntá chrókjuích'erá éxi kjuích'e ch'án. ⁴⁰ A ntá tjétjonkará tí tan chaxín kuínhan chrónka Dios na kjónté chrók'oyánrá tí janhan. A ntá ch'ín Abraham xikahya kjuích'e ch'án. ⁴¹ Jahará tjejoch'erá éxi kjuích'e it'ára —ichro ch'án.

Ntá ntáchro sín kixin:

—Jehya k'ónamá tí jeheni. Náhi. Chóntani jnkokoá It'éni mé Dios —ichro sín.

⁴² Ntá ntáche ch'ín Jesús tí jehe sín kixin:

—Tí chrókóchaxín kixin Dios mé It'ára la ntá chrótjuanará kixin janhan kjaxin k'uaxrjeníxinna Dios k'uinkaxian tí tjen ch'án. Jehya kixin janhván k'uinka. Náhi. Dios mé ichr'ánna k'uinka. ⁴³ ¿Nkekuènté kixin tiénxinhyará tí nkehe tjonkará? Jehí tjinkákonhyará chrókuinhínrá tí nkehe xrjanka. ⁴⁴ Jahará mé xjeen Tsochren la ko jahará tsík'axrjeníxinrá ch'án la ko tjinkáonrá sinchexiteyará tí nkehe tjinkaon ch'án. Tsochren mé xrankixixin kjuaya ch'án. Nunca k'uénixja ch'án ntoá. Xrácín ch'ia ch'án kixin xikahó tjenkayáxin ch'án. Jehe ch'án mé it'é kaín tí kjuach'ia. ⁴⁵ A ntá janhan tjétjonkará nkehe ntoá ntá títekákonnahyará. ⁴⁶ ¿Á tjejorá jnkójínrá nohará nkerí jie kjuásian janhan? A ntá tí ntáxrjan tí nkehe ntoá, ¿ntá nkekuènté títekákonnahyará? ⁴⁷ Tí sín tinkáchónki Dios mé tjinkaon sín chrókuinhin sín itén Dios. A ntá jahará la tinkáchónkihyará Dios ntá tjinkákonhyará chrókuinhínrá itén ch'án —ichro ch'ín Jesús.

Cristo la ó xrácín tjen ntá chr'éxin kjuák'e ch'ín Abraham

⁴⁸ A ntá tí sín judío ntáche sín tí ch'ín Jesús kixin:

—Chaxín ntoá ntáchroni kixin jaha mé ijnko chojni samaritano la ko chonta ijnko nchakuen tí jínahya —ichro sín.

⁴⁹ Ntá kjuátehe ch'ín Jesús ntáchro ch'án kixin:

—Janhan chontahya ninkehó nchakuen tí jínahya. Tí xrá t'a mé tjikosáyaha T'aná. Ntá jahará mé chontahyará kjuasáyé tí janhan. ⁵⁰ Janhan na tjéyáhya nkexro tsjikosáyana. Kjánchó itjen ijnko nkexro tjinkaon ch'án chrókjuikosáyana chojni, a ntá jehe ch'án mé tsjanchia jie tí sín kuítekakonhya. ⁵¹ Imá tjetoan tí nkehe tjétjonkará kixin tí tsítekáonrá tí nkehe tjákua la í ts'énhyará —ichro ch'án.

⁵² Ntá kjuátehe tí sín judío ntáchro sín kixin:

—Ntá ó noheni kixin chaxín chonta ijnko nchakuen tí jínahya. Ch'ín Abraham la ko kaín tí sín k'uéchrónka itén Dios ósé la mé ik'uén sín. Ntá jaha ntáchrua kixin tí tsítekaonni tí nkehe tjákua jaha ntá í ts'énhyani, ichrua. ⁵³ ¿Xá imá tétōan jaha la ntá kánhyó t'etōan it'éni Abraham? Jehe ch'án la ik'uén ch'án la ko kjaxin ik'uén tí sín k'uéchrónka itén Dios ósé. ¿Xá nkexro tí jaha, ichrua? —mé chro sín.

⁵⁴ Ntá kjuátehe ch'ín Jesús ntáchro ch'án kixin:

—Tí chrókjuikosáyaha asenná na mé sínkíhya tíha. A ntá T'aná mé tjikosáyana ch'án na ntá jahará ntáchrorá kixin jehe ch'án mé Dios kuèntará. ⁵⁵ Kjánchó chonhyará ch'án. A ntá janhan choxian ch'án.

Tí chróntáxrjan kixin janhan chonhya ch'án ntá chrókóyona tí jahará chrókjuít'ayahará. Kjánchó janhan na choxian ch'án la ko ntáxiteyáha tí nkehe t'etoan ch'án. ⁵⁶ Ch'ín Abraham tí nkexro tsík'axrjeníxínrá la imá kóchéhe ch'án kixin ts'íkon ch'án tí yaon ts'ínka janhan. Ntá ó kjuixin k'uíkon ch'án ntá kóchéhe ch'án —ichro ch'án.

⁵⁷ A ntá tí sín judío ntáche sín tí ch'ín Jesús kixin:

—Jaha naxa chontahya cincuenta nánó, ¿na ntá nkekuènté ntáchrua kixin ó k'uíkuan tí ch'ín Abraham? —ichro sín.

⁵⁸ Ntá kjuátehe ch'ín Jesús ntáchro ch'án kixin:

—Imá tjetooan tí nkehe tjetjonkará kixin naxa kohya ch'ín Abraham mé xráxín itjén janhan —ichro ch'án.

⁵⁹ Ntá kuákja sín xro chróchjéhe sín tí ch'ín Jesús. Kjánchó kjuák'emá ch'án nínko ntá chr'éxín k'uaxrjexín ch'án ntiha. K'uátsínka ch'án jnqosiné tí tjejó sín sákjuí ch'án.

9

Ch'ín Jesús kjuínchekitohe jina ijnko ch'ín tsíkokjéxín t'íkonhya ch'án

¹ K'uátsínka sín ijnko ntá ntá k'uíkon ch'ín Jesús ntiha tjen ijnko ch'ín tsíkokjéxín t'íkonhya ch'án. ² Ntá tí sín k'uájiko ch'ín Jesús kjuanchankíhi sín ch'án kixin:

—Maestro, ¿Nkekuènté tsíkokjéxín ch'án t'íkonhya ch'án? ¿Á ijíé it'é o iné ch'án o á ijíé ch'án? —ichro sín.

³ Ntá kjuátehe ch'ín Jesús ntáchro ch'án kixin:

—Jehya ijíé ch'án la ko jehya ijíé it'é la ko iné ch'án. Náhí. Jehí xíkaha tsíkonhen ch'án kixin tí kjuachaxién Dios tsjakoxín kixin tsitoxén ch'án jina. ⁴ Naxa nchakotjin t'ichjánxín sít'a tí xra tjinkaon tí nkexro tsichr'ánna. Ntá ts'ixin tie ntá kohya ninkexró tsjacha sich'e xra. ⁵ Naxa itjén janhan mé ntihi chjasintajni na mé janhan xrohi t'inkaséyanxín tí chjasintajni —ichro ch'án.

⁶ Ntá ó kjuixin ntáchro ch'án tíha ntá kuíkite ch'án ntáten ch'án intsí nche k'óna nchet'o ntá kuátematóxín ch'án ikon tí ch'ín t'íkonhya. ⁷ Ntá k'uetuénhen ch'án tí ch'ín t'íkonhya kixin:

—Sátjia tí pila tjiá ntá it'in Siloé t'ontia kuan —ichro ch'án. (A ntá tí ihnjé Siloé mé t'axrjexín nkívee sín kixin K'uítuénhen.)

Ntá sákjuí tí ch'ín t'íkonhya k'ónti ch'án ikon ch'án ntá kjan ch'án k'uíkon ch'án. ⁸ Ntá tí sín ntqej chjinaxón ntqej ch'án la ko tí sín k'uék'íkon sín kixin t'íkonhya ch'án mé ntáchro sín kixin:

—¿Á jehya tí ch'ín i k'uékjak'etjaxín ch'án k'uékjanachak'á ch'án? —ichro sín.

⁹ Iso sín ntáchro sín kixin:

—Kjá chaxín jehe ch'án —ichro sín.

Ikjé sín ntáchro sín kixin:

—Náhí, jehya jehe ch'án. Tóyóhó ch'án tí ch'ín a —ichro sín.

Kjánchó jehe ch'án kjuátehe ch'án kixin:

—Chaxín janhan —ichro ch'án.

¹⁰ Ntá kjuanchankíhi sín ch'án kixin:

—¿Nkexrí kixin jaí t'íkuan jaha? —ichro sín.

¹¹ Ntá kjuátehe ch'án ntáchro ch'án kixin:

—Ijnko ch'ín mé it'in Jesús mé kjuích'éna ch'án nchet'o kuátematóxín ch'án kuan la ntá k'uetuánna ch'án kixin satsjia ti pila tjiá ntá nchek'in

sín Siloé ts'ontia kuən, ichro ch'án. Ntá sákjuia k'ontia, ntá xringhya ó k'uíkuən —ichro ch'án.

¹² Ntá kjuanchankíhi sín ch'án ntáchro sín kixin:

—¿Nketí tjen tí ch'ín a? —ichro sín.

Ntá kjuátehe ch'an ntachro ch'an kixin:

—Nonahya janhan —ichro ch'an.

Tí sín fariseo tjanchankíhi sín tí ch'ín k'uék'ikonhya kuitohe jína

¹³ Ntá tí sín a sákjuiko sín tí ch'ín k'uék'ikonhya sákjuichrehe sín tí sín fariseo a. ¹⁴ A ntá tí yaon t'ok'éhe sín mé tsíkijch'éna ch'ín Jesús tí nchet'o kjuínchekitoexín jína tí ch'ín k'uék'ikonhya. ¹⁵ A ntá tí sín fariseo xíkjanckankíhi sín ch'án inaá kixin nkexrí kuitohe ch'án jína t'ikon ch'án jie. Ntá kjuátehe ch'án ntáchro ch'án kixin:

—Kuátematóxin ch'án nchet'o kuən, ntá k'ontia kuən ntá jie t'íkuən —ichro ch'án.

¹⁶ Ntá iso tí sín fariseo ntáchro sín kixin:

—Tí chojni a jehya kuente Dios kixin ch'ántahya ch'án kjuasáyé tí yaon t'ok'éheni —ichro sín.

Kjánchó ikjé sín ntáchro sín kixin:

—¿Xá nkexrí chrókjuasin ch'án kjuaxroan jie tí ch'óna ch'án jie? —ichro sín.

Mé xíkaha jnkokónhya kjuenkayáxin tí jehe sín. ¹⁷ Ntá xíkjanckankíhi sín tí ch'ín k'uék'ikonhya inaá kixin:

—¿Ntá jaha nkechrua nkexro tíha tí nkexro kjuíntak'ikuan? —ichro sín.

Ntá kjuátehe ch'án ntáchro ch'án kixin:

—Janhan ntáxrjan kixin jehe ch'án mé ijnko nkexro chrónka itén Dios —ichro ch'án.

¹⁸ Kjánchó tí sín judío kuítekakonhya sín kixin chaxín k'uék'ikonhya ch'án ntá jie t'ikon ch'án. Ntá k'uíyehé sín tí it'é la ko tí iné tí ch'ín tsíkitohe jína.

¹⁹ Kjuanchankíhi sín ntáchro sín kixin:

—¿Á xjaan tíhi tí ntáchrórá kixin tí tsíkokjéxín ch'án t'ikonhya ch'án? ¿Ntá nkexrí jie t'ikon ch'án? —ichro sín.

²⁰ Ntá kjuátehe tí it'é la ko tí iné ch'án ntáchro sín kixin:

—Ó noheni kixin xjeenni ch'án la ko noheni kixin tí kokjéxín ch'án t'ikonhya ch'án. ²¹ Kjánchó noehyani nkexrí kixin t'ikon ch'án jie la ko noehyani nkexro kjuínchekitohe ch'án jína. Tjanckankíhirá ch'án, ó nteto ch'án, ntá jehe ch'án tsochrónka ch'án kixin nkexrí kuitohe ch'án jína —ichro sín.

²² Mé xíkaha kjuátehe tí it'é la ko tí iné ch'án kixin chrakonhen sín tí sín judío kixin ó kjuixin chrónka tí sín judío kixin tsjanjonhya sín kjuachaxin ts'ixenhen njnko tí sín titekaon kixin ch'ín Jesús mé tí nkexro Cristo. ²³ Mé xíkaha ntáchro tí it'é la ko tí iné ch'án kixin chrókjuanchankíhi sín ch'án, ó nteto ch'án, ichro sín.

²⁴ Ntá yóxin xík'íyehé tí sín judío tí ch'ín k'uék'ikonhya ntá k'uetuenhen sín ch'án kixin:

—Tjetsjehe Dios ntá ntoá chrónka kixin ó noheni kixin tí ch'ín a na ch'óna ch'an jie —ichro sín.

²⁵ Ntá tí ch'ín k'uék'ikonhya kjuátehe ch'án kixin:

—Nonahya á ch'óna ch'án jie o á ch'ónahya ch'án jie. Jnkokoá nkehe n'óna kixin senó k'uék'ikonhya ntá jie t'íkuən —ichro ch'án.

²⁶ Ntá xíkjanckankíhi sín ch'án inaá kixin:

—¿Nkexrí kjuích'e ch'án kixin kjuíntak'ikuan ch'án? —ichro sín.

²⁷ Ntá kjuátehe ch'án ntáchro ch'án kixin:

—Ó kjuixin tjonkará kjánchó titekákonhyará. ¿Nkekuènté tjinkáonrá kixin tsotjonkará inaá? ¿Á kjaxinrá tjinkáonrá tsochréhérá ch'án? —ichro ch'án.

²⁸ Ntá kónínkakohenen sín ch'án la k'uántaxínhìn sín ch'án la ko kjuátehe sín kixin:

—Jaha la chréhe tí chojni a. A ntá jeheni na chréheni tí nkehe k'uetōan ch'ín Moisés. ²⁹ Ó noheni kixin Dios k'uénixjehē ch'ín Moisés. A ntá tí ch'ín a la noehyani nketí tsíkjin ch'án —ichro sín.

³⁰ Ntá kjuátehe tí ch'ín ntáchro kixin:

—Imá ókjé tíha. Tí ch'ín a mé kjuínchek'ikonna. A ntá jahará ntáchrórá kixin noahyará nketí tsíkjin ch'án. ³¹ Ó noheni kixin tienhya Dios tí nkehe tjanchia tí chojni chóna jie. Jehó tinhin ch'án tí nkehe tjanchia tí sín titekaon Dios la ko nchexiteyéhe sín tí nkehe tjinkaon ch'án. ³² Nunca kienhyéni kixin ijnko nkexro chrókjuinček'ikon ijnko chojni tsíkokjéxín t'ikonhya. ³³ A ntá tí nkexro a tí chrókujínhyá ch'án tí tjen Dios la kjá ninkehó nkehe xitjahya chrókjuich'e ch'án —ichro ch'án.

³⁴ Ntá kjuátehe tí sín fariseo ntáchro sín kixin:

—Jaha la nchónhya jie chonta tió kokjía. A ntá jie ¿á tjinkávan kixin jaha chrókjuákohéni ní? —ichro sín.

Ntá kótéka sín tí ch'ín a kixin ts'axrjéxín ch'án tí nínko a sátsji ch'án.

Ntakótán nchakuen sín

³⁵ Ntá kuínhin ch'ín Jesús kixin xikaha k'uetuēnhen tí sín judío kixin ts'axrjéxín nínko tí ch'ín k'uék'ikonhya. Ntá xeta ch'ín Jesús tí ch'ín a ntá kjuanchankí ch'án kixin:

—¿Á tinkachónkia tí Xjeen Dios K'óna Chojni? —ichro ch'án.

³⁶ Ntá kjuátehe tí ch'ín a ntáchro ch'án kixin:

—Tjákohéni nkexro tíha kixin ntá tsinkáchónkini ch'án.

³⁷ Ntá kjuátehe ch'ín Jesús ntáchro ch'án kixin:

—Ó k'uúkan jaha. Janhan mé tí nkexro tjetjuá jaha —ichro ch'án.

³⁸ Ntá kjuák'exín toch'in ch'án toté ch'ín Jesús ntáchro ch'án kixin:

—Ijie kuítékavan tí jaha Inchéni —ichro ch'án.

³⁹ Ntá ntáchro ch'ín Jesús kixin:

—K'uinka ntihi chjasintajni kixin sintakitoaxián ijje chojni kixin ntá tí sín t'ikonhya la mé ts'ikon sín, a ntá tí sín t'ikon jie la í ts'ikonhya sín —ichro ch'án.

⁴⁰ A ntá iso tí sín fariseo k'uejontaxín kuínhin sín kixin xikaha ntáchro ch'ín Jesús, ntá kjuanchankíhi sín ch'án kixin:

—¿Xá kjaxin jeheni ntakótáni? —ichro sín.

⁴¹ Ntá kjuátehe ch'ín Jesús ntáchro ch'án kixin:

—A ntá tí jahará tí chaxín chrók'uikonhyará ntá chróchontahyará jie. Kjánchó ntáchrórá kixin t'ikonrá. Méxra chontará jie —ichro ch'án.

10

Ch'ín Jesús ncheyóexín tí t'inkachjina kolélo

¹ Ntá ntáchro ch'ín Jesús kixin:

—Imá tjeotan tí nkehe tjetjonkará kixin tí ts'ixenhen ijnko chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'uixenxín ch'án na mé xíchee tíha la tjinkaon chrókueé. ² A ntá tí

nkexro t'ixenxín tí puerta na mé nkexro t'ayakonhen tí kolélo a. ³ La ko tí ch'ín tjet'ayakonhen tí puerta a mé tsakitjehe ch'án tí puerta a kixin ts'ixenhen tí nkexro chaxín t'ayakonhen tí kolélo a. A ntá tí kolélo a mé tsjatsqan va itén ch'án. Ntá t'íyexín ch'án jnkojnko ihnié jnkojnko tí kolélo kuènte ch'án ntá ts'axrjexín va ntq̄e va. ⁴ Ntá t'ikon ch'án kixin k'uaxrje kaín va ntá kuítonhen ch'án va nt̄ja ntá tinkáchrehe va kixin tjatsqan va itén ch'án. ⁵ Chrohya va tjichréhe va ijnko chojni ókjé na mé tsinkéhe va tí chojni a kixin tjatsqanhya va itén ókjé chojni —ichro ch'án.

⁶ Mé x̄ikaha ntáchro ch'ín Jesús kjuíncheyóexin ch'án. Kjánchó tienxínhya sín nkexrí t'axrjexín tíha.

Ch'ín Jesús mé tí pastor jína

⁷ Ntá chrónka ch'ín Jesús inaá ntáchro ch'án kixin:

—Ijnko nkehe tjettoan tsotjonkará kixin janhan la éxí tí puerta t'ixenxín tí kolélo tí t'inkachjina va. ⁸ Kaín tí sín kuitónxin nt̄ja kuí senó mé x̄ichee la ko chrókueé. La ntá tí kolélo la ántosén va tí nkehe ntáchro tí jehe sín. ⁹ Janhan mé tí puerta a mé t'ixenxínrá tí janhan mé tsaará la mé tsoyóhará tí kolélo síin kjuachaxin ts'axrjexín va tí korré va sátsjikjine va la ko síin kjuachaxin ts'ixenhen va tí ts'inkachjina va inaá.

¹⁰ A ntá x̄ichee mé jehó chrókueé la ko tjinkaon chrók'óyán la ko chrókjuinçek'itjáyan kaín nkehe. A ntá janhan k'uinka kixin tsochontaxinrá kjuachón na mé kjuachón jnkochrín. ¹¹ Janhan mé ijnko pastor jína a ntá tí pastor jína mé ts'enyákonhen tí kolélo a. ¹² A ntá tí nkexro ch'e x̄ra tjinkaon chrókjuacha ó na mé ts'ikon ch'án itsi ijnko kolobo tsítóhe ch'án tí kolélo sátsji ch'án kixin jehe ch'án la jehya tí nkexro t'ayakonhen tí kolélo la ko jehya kolélo kuènte ch'án. Ntá tí kolobo mé tsotsé va tí kolélo ntá tsinká va la sátsjichroe va. ¹³ Mé x̄ikaha tí chojni tjinkaon chrókjuacha tí x̄ra chrókjuich'e ó la mé sátsji. A ntá tí kolélo la ántosén ch'án kuáhya ch'án kuénté tí jehe va.

¹⁴⁻¹⁵ A ntá janhan mé ijnko pastor jína. Mé x̄ikaha T'aná chóxin ch'án tí janhan la ko kjaxin janhan choxian tí jehe ch'án mé x̄ikaha choxian janhan tí sín éxí kolélo kuéntana la ko jehe sín mé chóxin sín tí janhan. Ntá ts'enyákonhan tí sín éxí kolélo kuéntana. ¹⁶ Kjaxin chonta kolélo nax̄a jehya korré va ntihi mé kjaxin t'ichjánxin sátsjicakjián va. A ntá tí tsitekakonna va ntá ts'óna jnkokoá korré va la ko jnkokoá nkexro ts'ayakonhen va.

¹⁷ Tjuana T'aná kixin kjónté its'én la tsoxechónna inaá. ¹⁸ Kohya nkexro tsakitsjena tí kjuachón chonta janhan tí chrókjuánjonhya kjuachaxin. Chonta janhan kjuachaxin its'én la ko chonta janhan kjuachaxin tsoxechónna inaá. Tíhi mé k'uetuanna T'aná —ichro ch'ín Jesús.

¹⁹ Tió kuínhin tí sín judío tí nkehe ntáchro ch'ín Jesús ntá kjuankixin jnkokoáhya kjuenkayáxin sín. ²⁰ Nchónhya tí jehe sín ntáchro sín kixin:

—¿Nkekuénté tinhínrá tí nkehe ntáchro ch'án? Jehe ch'án mé chóna ch'án nchakuen tí jínahya la ko lóco ch'án —ichro sín.

²¹ Ntá ikjé sín ntáchro sín kixin:

—X̄ikahya chrónixja ijnko chojni chóna nchakuen tí jínahya. ¿Á ijnko nchakuen tí jínahya la á jína chrókjuinçek'ikon ijnko chojni t'ikonhya? —ichro sín.

Tí sín judío kuítekakuenhya sín tí ch'ín Jesús

22 A ntá tí nchakuen kin tí chjasin Jerusalén k'uúixin kia xraxinkakonxín sín tí yaon tsíkjin tsík'óna nínko. 23 Ntá ch'ín Jesús itjen ch'án tí nínko tí ntásin kuente Salomón. 24 Ntá tí sín judío k'uántatjen sín tí ch'ín Jesús kjuanchankíhi sín ch'án kixin:

—¿Hasta nkesá ts'ejóchónhenni tsinhinni jína? A ntá jie chrónka ntoá kixin á chaxín jaha tí Cristo —ichro sín.

25 Ntá kjuátehe ch'ín Jesús kixin:

—Ó tjonkará ntá naxa titekákonhyará. Kaín tí xra tjet'a janhan tí kjuachaxin kuente T'aná mé tjakoxin nkexro tí janhan. 26 Kjánchó jahará titekákonhyará kixin jahará la jehya kolélo kuentana éxí tjonkará senó. 27 Tí kolélo kuentana mé tjatsoan va tí tanná la ko kjaxin janhan tjátsoan tí jehe va la ko jehe va mé chréhe va tí janhan. 28 Janhan mé tjaha va tí kjuachón jnkochrín la í ts'itjáyanhya va la ko ninkexró tsjachahya tsakitsjexín va tjaná. 29 Ó kjuanjon T'aná, mé tí nkexro tjetóxin t'etqan, na ninkexró tsjacha tsakitsjexín va tí tja ch'án. 30 Janhan la ko T'aná na mé jnkokoá nkexro tíha —ichro ch'án.

31 Ntá tí sín judío kuákja sín xro chróchjéhe sín ch'án inaá. 32 Ntá kjuátehe ch'ín Jesús ntáchro ch'án kixin:

—Nchónhya nkehe jína k'uúkonrá kjuákoxian kjuachaxin kuente T'aná. ¿Ntá nkekuenté chróchjínará xro? —mé chro ch'án.

33 Ntá kjuátehe tí sín judío kixin:

—Jehya tí kjuaxroan jína tjásian chrótjiáxiánni xro. Náhí. Jaha ijnko chojni ó ntá kjuíncheyóhé asán Dios na mé tsotjiáxiánni xro —ichro sín.

34 Ntá ntáchro ch'ín Jesús kixin:

—Ntá ntáchro xroon itén Dios tsíkjin sín ósé kixin ntáchro Dios kixin: “Kjaxinrá éxí Dios tí jahará.”* 35 Ntá ó noheni nkehe ntáchro xroon itén Dios na ntá xitjahya tsitekakonhyani tíha. Mé xikaha ntáchro Dios kixin éxí Dios jnkójnko nkexro k'uáyéhe itén ch'án. 36 A ntá kjueyána Dios ichr'ánna ch'án chjasintajni, ¿ntá nkekuenté ntáchrorá kixin k'uántaxínhan Dios kixin janhan ntáxrjan kixin Xjeen Dios tí janhan? 37 Kja tí chrókjuít'ahya tí xra ich'e T'aná la chrókuítekákonhyará. 38 A ntá kjónté tjet'a tí xra a kjónté titekákonhyará tí janhan na mé chrókuítekaonrá tí xra tjet'a chrókónoaxínrá chrókiénxinrá kixin T'aná la ko janhan mé jnkokoá tjékian ch'án —ichro ch'án.

39 Mé xikaha chrótsé sín tí ch'ín Jesús inaá chrók'uíkjéhe ch'án ntá kjuachahya sín ntá sákjuí ch'án.

40 Ntá ch'ín Jesús xíkjan ch'án tí í jnko lado ntario Jordán inaá tí k'uékjak'e ch'ín Juan k'uékikítexín ch'án chojni senó. 41 Ntá nchónhya chojni sákjuíchréhe sín ch'án ts'ikon sín ch'án ntáchro sín kixin:

—Chaxín ch'ín Juan kjuasinhya ch'án kjuaxroan jie la kjónté ntoá tí nkehe chrónka ch'án kuente tí ch'ín í —ichro sín.

42 Ntá nchónhya sín kuítekaon sín tí ch'ín Jesús tí kjuíji sín ntiha.

11

Ik'uén ch'ín Lázaro

1 Itjen ijnko ch'ín níhi mé it'in ch'án Lázaro, chjasén ch'án na mé Betania, mé tí chjasén tí tjan María la ko tí kjavé tjan Marta. 2 Tí tjan María mé jnkokoá kichó tí ch'ín Lázaro mé tí ch'ín níhi na mé jehe tjan mé tí

* 10:34 Salmo 82.6

tjan kuik̄itexín aceite xraxé toté Ìnchéni la ko kjuínchexámáxin tjan kax̄ihi tjan toté ch'án.* ³ A ntá yóí tí kichó ch'án chjin ichr'án sín ijnko nkexro tsochénta tí ch'ín Jesús kixin:

—Ìnchéni jaha, tí nkexro choxian tjuèhé la níhi ch'án —ichro ch'án.

⁴ Ntá kuínhin ch'ín Jesús ntá ntáchro ch'án kixin:

—Tí chin chóna ch'án jehya kixin ónaá chrók'uitjáyanxón ch'án tí ts'en ch'án. Náhi. Tíha mé tsjakox̄in tí kjuachaxin jié kuente tí Xjeen Dios —ichro ch'án.

⁵ A ntá tí ch'ín Jesús la imá tjuèhé ch'án tí tjan Marta la ko tí tjan kichó tjan la ko tí ch'ín Lázaro. ⁶ Na ntá tió kuínhin ch'án kixin níhi ch'ín Lázaro na kjónté kuit̄ohe ch'án iyó yaon ínaá tí nó kjuák'e ch'án. ⁷ A ntá chr'éxin ntáche ch'án tí sín k'uájiko ch'án kixin:

—Sátsjini estado Judea ínaá —ichro ch'án.

⁸ Ntá kjuátehe tí sín k'uájiko ch'án kixin:

—Maestro, naḡa séhya tí sín judío ntiha chrótjáha sín xro tjinkaon sín chrók'óyánxian sín xro. ¿Á tjinkávan sátsjia ntiha ínaá? —ichro sín.

⁹ Ntá ntáchro ch'ín Jesús kixin:

—Jnkojnko yaon mé chóna teyó hora. Tió ixri chojni nchakotjin tsóténkix̄inhya sín ninkehó kixin t'inkaséyanxín xrohi chjasintajni a. ¹⁰ Tí sín ixri tie mé tsóténkix̄in sín nkehe kixin chónahya sín xrohi —ichro ch'án.

¹¹ Ntá chr'éxin ntáche ch'ín Jesús tí sín k'uájiko ch'án kixin:

—Ó k'uájua tí nkexro chóxinni mé ch'ín Lázaro. Ntá sátsjia sintakjayaḡa ch'án —ichro ch'án.

¹² Ntá ntáchro tí sín k'uájiko ch'án kixin:

—Ìnchéni, tí k'uájua ch'án la mé chrókuit̄ohe ch'án jina —ichro sín.

¹³ Kjánchó tí nkehe ntáchro ch'ín Jesús mé t'axrjexín kixin ó tsík̄jixin tsík'en tí ch'ín Lázaro. Ntá tí sín k'uájiko ch'án kjuenkayáxin sín kixin ó jehí tjeju ch'ín Lázaro. ¹⁴ Ntá ntoá chrónka ch'ín Jesús kixin:

—Ó tsík'en ch'ín Lázaro. ¹⁵ Ntá chàna kixin kohyana ntiha kixin mé xikaha tsitékákox̄inrá. A ntá jie íntará sátsjitsjeheni ch'án —ichro ch'án.

¹⁶ Ntá ch'ín Tomás, kjaxin tik̄itexín sín ch'án ch'ín Nóhé, mé ntáche ch'án tí í so sín kixin:

—Sátsjini koíni kaín ni ts'enkaoni Ìnchéni —ichro ch'án.

Ch'ín Jesús ntáchro ch'án kixin sinchexechón ch'án chojni ínaá

¹⁷ Ntá kjuíji ch'ín Jesús kuínhin ch'án kixin ch'ín Lázaro la ó chóna noó yaon tsik̄jixravá ch'án. ¹⁸ A ntá tí chjasin Betania mé chjinaxón tí chjasin Jerusalén, chóna iyó kilómetro ko t'ò kjín̄xin. ¹⁹ A ntá itsjé tí sín judío sátsík̄jitsjehe sín tí tjan Marta la ko tí tjan María tjeónixjeḡe sín kixin kánhyó ts'ává sín kixin tsík'én tí kichó sín a. ²⁰ Ntá kuínhin tjan Marta kixin ó kui ch'ín Jesús ntá k'uaxrjexín tjan nchia tsjixinhin nt̄ia. A ntá tí tjan María kuit̄ohe tjan nchia. ²¹ Ntá tí tjan Marta ntáche tí ch'ín Jesús kixin:

—Ìnchéni jaha. Chrók̄juak'e ntihi ntá chrók'uenhya kichó ni. ²² Kjánchó ó nõna kixin Dios tsotjáha kaín nkehe tsjanchehé ch'án —ichro tjan.

²³ Ntá ntáchro ch'ín Jesús kixin:

—Tsoxechón kichuá ínaá —ichro ch'án.

²⁴ Ntá ntáchro tjan Marta kixin:

* 11:2 Juan 12.3

—Ó nõna kixin tsoxechón ch'án tió tsoxechón kaín tí sín tsík'en, tí yaon tsjixixin —ichro tjan.

²⁵ Ntá ntáchro ch'ín Jesús kixin:

—Janhan mé ntaxechón chojni la ko tsochóna sín kjuachón. Tí nkexro tsitekaon sín tí janhan na kjónté ó tsík'en sín la naxa sintaxechón sín inaá.

²⁶ La ko kaín xín tí sín naxa tjejóhón sín la tsitekaon sín tí janhan na ts'enhya sín. ¿Á titekávan xikaha ní? —ichro ch'án.

²⁷ Ntá ntáchro tjan kixin:

—Chaxín Ìnchéni titekávan kixin jaha mé Cristo, mé Xjeen Dios, mé tí nkexro kui chjasintajni —ichro tjan.

Tsjánka ch'ín Jesús tí tsíkixravá nkexro Lázaro

²⁸ Ó kjuixin ntáchro tjan Marta xikaha ntá sákjuik'íyehé tjan kichó tjan María ntá imó chénka tjan kixin:

—Ntiha tjeen Maestro t'iyahá ch'án —ichro tjan.

²⁹ Ntá kuínhin tjan María ntá tuénxín k'uínkatjen tjan sákjuitsjehe tjan tí ch'ín Jesús. ³⁰ Naxa tsík'ixenhya ch'án chjasin naxa tjeen ch'án tí xéta ch'án tjan Marta. ³¹ Ntá tí sín judío tjejónixjehé tjan María kixin kánhyó ts'ává tjan, mé k'uikon sín kixin tjoka k'uaxrxjéxín tjan nchia, ntá kjuichréhe sín tjan kjuenkayáxin sín kixin sátsji tjan tí tsíkixravá kichó tjan, ntaha tsjitsjánkama tjan ch'án, ichro sín.

³² Ntá tí tjan María mé kjuíji tjan tí tjeen ch'ín Jesús ntá kjuák'exín toch'ín tjan toté ch'án ntáchro tjan kixin:

—Ìnchéni jaha, chrókjuak'e jaha ntihi ntá chrók'uenhya kichiná —ichro tjan.

³³ Ntá k'uikon ch'ín Jesús kixin tsjánka tí tjan María la ko tí sín judío kjuikotoxin tjan ntá imá k'uává ch'án kóxakonhen asén ch'án. ³⁴ Ntá kjuanchankí ch'án kixin:

—¿Nketí kjuavará ch'án? —ichro ch'án.

Ntá ntáchro sín kixin:

—Ìnchéni, ¿á sátsjitsjehé? —ichro sín.

³⁵ Ntá tsjánka ch'ín Jesús. ³⁶ Ntá ntáchro tí sín judío kixin:

—Tsjehérá kixin imá tjuèhe ch'án tí ch'ín tsík'en —ichro sín.

³⁷ Kjánchó í so sín ntáchro sín kixin:

—Jehe ch'án mé kjuínchek'ikon tí ch'ín t'ikonhya. ¿Á xitjahya chrókjuanjon ch'án intsí kjuachaxin chrók'uenhya tí ch'ín Lázaro ní? —ichro sín.

Ó xechón ch'ín Lázaro

³⁸ Ntá imá t'ává asén ch'ín Jesús kóchjinehe ch'án tí tòyè. Tí tòyè mé ijnko tjo, a ntá tí ntója tí tjo mé tsík'ikjèxin ijnko xro. ³⁹ Ntá k'uetqan ch'ín Jesús kixin:

—Tjakjían tí xro a —ichro ch'án.

A ntá tí tjan Marta mé kichó tí nkexro k'uén mé ntáchro tjan kixin:

—Ìnchéni, kjá noha kixin kjá imá xra kixin ó chóna noó yaon tsík'en ch'án —ichro tjan.

⁴⁰ Ntá kjuátehe ch'ín Jesús ntáchro ch'án kixin:

—Ó tjonka kixin tsitekávan ntá ts'ikuan tí kjuachaxin jié kuente Dios —ichro ch'án.

⁴¹ Ntá kjuakjiiin sín tí xro a. Ntá ch'ín Jesús konta ch'án nkajní ntáchro ch'án kixin:

—It'èni, tjáncháha kjuasáya kixin ó kuínhín tí nkehe ntáxrjan. ⁴² Janhan na ó nòna kixin xráxín tjetínhín tí nkehe ntáxrjan ntá xíkaha ntáxrjan jie kixin tsinhín tí sín tjejóntaxín ntihi ntá tsitekaon sín kixin jaha mé kuétoan k'uinka —mé ichro ch'ín Jesús.

⁴³ Ntá kjuixin nixja ch'án tíha ntá itsen k'uèya ch'án kixin:

—¡Lázaro, t'axrjéxian méhe! —ichro ch'án.

⁴⁴ Ntá tí ch'ín tsík'en k'uaxrjéxín ch'án tòye, na tí tja ch'án la ko tí toté ch'án naxa tjejóchróntetoxín ka la ko tí nkayakon ch'án tjejkéxín ijnko ka. Ntá k'uétoan ch'ín Jesús kixin:

—Tjasintankarà tí ka chróntetoxín ch'án kixin jína tsji ch'án —ichro ch'án.

*Imó kjuenkayáxin sín kixin nkexrí ts'óyán sín tí ch'ín Jesús
(Mt. 26.1-5; Mr. 14.1-2; Lc. 22.1-2)*

⁴⁵ Ntá itsjé tí sín judío sákjuíkotoxín sín tí tjan María mé k'uíkon sín tí kjuaxroan kjuasin ch'ín Jesús ntá kuítekaon sín tí jehe ch'án. ⁴⁶ Kjánchó iso tí jehe sín sákjuítsjehe sín tí sín fariseo kjuíchénka sín tí kjuaxroan tsíkjasin ch'ín Jesús. ⁴⁷ Ntá tí sín fariseo la ko tí sín nchat'á t'etóan jnkokoá kójnkotséko sín tí sín antsí t'etóan, la ntáchro sín kixin:

—¿Xá nkexrí chrókjuich'ehe ni tí ch'ín a kixin jehe ch'án mé tjasin ch'án kjuaxroan jie? ⁴⁸ A ntá tí chrókuitóhene ch'án xíkaho ntá kaín xín chojni chrókuítekaon sín tí jehe ch'án, ntá tsi tí sín romano t'etóan sinchek'itjáyán sín tí nínkoéni la ko tí xra chóntani la ko tí nación kuénténi —ichro sín.

⁴⁹ Ntá ch'ín Caifás mé tí nkexro t'etuehenen tí sín nchat'á tí nánó a ntáche ch'án tí jehe sín kixin:

—Jahará la noahyará ninkehó tíha ⁵⁰ la ko kjá ní tjenkayáxinhyará kixin íchá jína kixin jnkokoá chojni chrók'uenyákonhen chjaséni kixin ntá chrók'uitjáyánhya kuénté tí nación kuénténi —ichro ch'án.

⁵¹ Kjánchó ch'ín Caifás la jehya jehó ch'án chrókjuenkayáxin ch'án tíha. Náhí. Jehe ch'án mé k'uetuehenen tí sín nchat'á tí nánó, a ntá tí Nchakuen Dios kjuínchekónohe ch'án kixin ch'ín Jesús mé ts'enyákonhen tí nación judía. ⁵² A ntá jehya tí nación kuénte sín ó chrók'uenyákonhen ch'án. Náhí. Kjaxin kixin sinchekaá ch'án kaín tí sín ts'óna xjeen Dios tjejó sín kuénté chjasintajni. ⁵³ A ntá tí yaon a tí sín t'etuehenen tí sín judío mé kjuankixin sín kjuenkayáxin sín kixin chrók'óyán sín tí ch'ín Jesús.

⁵⁴ A ntá ch'ín Jesús la í noxínhya k'uájí tí k'uéjé tí sín judío, na mé k'uaxrjéxín ch'án tí estado Judea, sákjuí ch'án chjinaxón nteje, tí tjen ijnko chjasin it'én Efraín. Ntaha kuítóeko ch'án tí sín k'uájiko ch'án.

⁵⁵ Ntá í séhya ntá ts'ixín tí kia pascua mé ijnko kié tí sín judío. Ntá itsjé chojni k'uaxrjéxín sín chjasén sín sákjuí sín chjasin Jerusalén kixin ntaha tsoyaxínhin sín kixin tsotjóá sín kjónté naxa xrankixinhya ts'ixín tí kia pascua. ⁵⁶ Ntaha k'uájikjeyá sín tí ch'ín Jesús k'uéjóxehenen sín tí nínko jie ntá kjuanchankíhi sín kichó sín kixin:

—¿Jahará nkechorá? ¿Á chrókjuí ch'án tí kia ní o náhí? —ichro sín.

⁵⁷ A ntá tí sín fariseo la ko tí sín t'etuehenen tí sín nchat'á na ó k'uétoan sín kixin tí siín ijnko nkexro nohe nketí tjen ch'ín Jesús chróchrónka sín kixin ntá jína chrókjuítsé sín ch'án chrókjuinchenteto sín ch'án la ko chrókjuak'echjina sín ch'án.

12

Ijnko tjan kjuíncheká tjan aceite xraxé náxrjón toté tí ch'ín Jesús
(Mt. 26.6-13; Mr. 14.3-9)

¹ Naxa t'itjáyan injon yaon ntá ts'ixin tí kia pascua. A ntá ch'ín Jesús sákjuí ch'án chjasin Betania tí tjen ch'ín Lázaro. Tí ch'ín Jesús mé tsíkjinchexechón ch'án. ² Ntá ntiha kjóne sín ijnko kónjín kjuikosáyehe sín tí ch'ín Jesús. A ntá tí tjan Marta mé kjuíncheyaxín tjan. A ntá tí ch'ín Lázaro la ko í so sín k'uéjío sín kjóneko sín tí ch'ín Jesús. ³ Ntá tjan María kuikao tjan it'o litro aceite tsík'óna xroan nardo imá tjete tsík'enaxín tjan ntá kjuíncheka tjan toté ch'ín Jesús ntá kaxihi tjan kjuínchexámáxin tjan tí toté ch'án. Na mé kuenté nkaxenhen nchia kókaxraxé tí xroan. ⁴ Ntá ch'ín Judas Iscariote, it'é ch'án mé it'in Simón, jehe ch'án mé ijnko tí sín k'uájiko ch'ín Jesús, na mé tí ch'ín sinchekji tí ch'ín Jesús chr'éxin, mé ntáchro ch'án kixin:

⁵ —¿Nkekuénté kóxiha tí xroan xraxé, chrókóxixin iní ciento chichaon denario kixin chrókjuinkitsa tí sín nòà? —ichro ch'án.

⁶ Kjánchó ch'ín Judas la jehya ntáchro ch'án xikaha kixin chrókujikonóhe ch'án tí sín nòà. Náhí. Ntáchro ch'án tíhi kixin xráxin chee ch'án kixin jehe ch'án t'ayakonhen ch'án tí nkehe tjinká chichaon ntá xráxin teé ch'án tí chichaon tsixrenájín ntiha. ⁷ Ntá ntáchro ch'ín Jesús kixin:

—Nté tjtóherá tjan. Tsíkjak'echjina tjan tí xroan a kixin tí yaon tsoxrávana. ⁸ Tí sín nòà jnkochrín sín ts'ejokoará sín. A ntá janhan jnkochrínnya ts'ejóni —ichro ch'án.

Tí sín judío itjo sín nkexrí chrók'óyán sín tí ch'ín Lázaro

⁹ A ntá itsjé tí sín judío k'uixikónohe sín kixin ch'ín Jesús kjuák'e ch'án tí chjasin Betania, a ntá sákjuí sín ntiha. Jehya kixin chrókjuitsjehe sín tí ch'ín Jesús ó. Náhí. Kjaxin tjinkaon sín chrókjuitsjehe sín tí ch'ín Lázaro mé tí ch'ín tsíkjinchexechón ch'ín Jesús. ¹⁰ Ntá tí sín ncha'tá t'etoan mé kójnkotsé sín kjuenkayáxin sín chrók'óyán sín tí ch'ín Lázaro kjaxin ¹¹ kixin itsjé tí sín judío kuítekaon sín tí ch'ín Jesús kixin xikaha kjuínchexechón ch'án tí ch'ín Lázaro ntá k'uaxrjekjanxín sín tí sín ncha'tá.

K'uixenhen ch'ín Jesús chjasin Jerusalén

(Mt. 21.1-11; Mr. 11.1-11; Lc. 19.28-40)

¹² Nchónhya chojni sátsíkji sín chjasin Jerusalén kixin tí kia pascua. A ntá tí yaon chr'éxin k'uixikónohe sín kixin tsjiji ch'ín Jesús tí chjasin ntiha. ¹³ Ntá kóchrínjin sín chaan ntakajni kjuixinhin sín ntja itsji ch'ín Jesús, itsje sín, ntáchro sín kixin:

—Tjancheheni Dios kjuasáya. Imá jína tí nkexro kuixin tí kjuachaxién It'éni tjen nkaya nkajni. Imá jína tí ch'ín Rey ts'etuñenhen tí nación Israel —ichro sín itsje sín.

¹⁴ Ntá tsík'itja ch'ín Jesús ijnko kolócho la ntá kjuák'ekjen ch'án, éxi nixja itén Dios kixin:

¹⁵ Chrakonhyará jahará tjejorá chjasin Jerusalén,

tsjehérá ó tjekui tí ch'ín Rey kuéntará,

tjekjen ch'án ijnko kolócho.*

¹⁶ A ntá tió kónhen tíha kíenxínnya tí sín k'uájiko ch'ín Jesús kixin nkekuénté xikaha kónhen. A ntá chr'éxin tió kjuixin sákjujia ch'án nkaya nkajni ntá xraxinkaon sín kixin xikaha tsíkjin tí sín k'uéchrónka itén Dios

* 12:15 Zacarías 9.9

ósé nkexrí tsonhen ch'án, na ntá xíkaha chaxín xiteyá tí chrónka sín senó kixin xíkaha tsonhen ch'án.

¹⁷ Mé xíkaha kaín tí sín tsíkójnkotsé tí kjuák'e ch'ín Jesús tió k'uíyehé ch'án tí ch'ín Lázaro kixin ts'axrjexín ch'án tí tóye tsíkijxravá ch'án ntá xechón ch'án mé tí sín a mé chrónka sín tí nkehe k'uíkon sín. ¹⁸ Mé xíkaha sákjuixinhin sín tí ntja tsjixín ch'ín Jesús, k'uíxikónohe sín kixin xíkaha tsíkjasin ch'ín Jesús tí kjuaxroan jié. ¹⁹ Mé xíkaha ntáchro tí sín fariseo itjo sín kichó sín kixin:

—Tsjehérá kaín rá, ninkehó tsjachahyani sich'eni kixin kaín xín chojni sákjuíchréhe tí jehe ch'án —ichro sín.

Iso sín nkivee griego tjeýá sín tí ch'ín Jesús

²⁰ Iso sín nixja griego k'uéjyákjan tí sín sákjuí sín tí kia chjasin Jerusalén tsoxraxinkakonxín sín Dios. ²¹ Ntá kóchjinehe sín tí ch'ín Felipe, chjasén ch'án mé Betsaida, estado Galilea, chrónóehé sín ch'án kixin:

—Tjinkaonni chrók'uikonni tí ch'ín Jesús —ichro sín.

²² Ntá ch'ín Felipe sákjuíchenka ch'án tí ch'ín Andrés. Na ntá yóí sín sákjuíchenka sín tí ch'ín Jesús. ²³ Ntá ntáchro ch'ín Jesús kixin:

—Ó kjuixraká tí yaon, a ntá tí Xjeen Dios K'óna Chojni mé sátsji ch'án ts'áyehé ch'án tí kjuachaxin kuènte It'é. ²⁴ A ntá tsojjonkará ijnko nkehe chaxín kixin tí chrókjuítsínkahya ijnko noatrigó tí nche chrók'uenhya tí noa a, ntá jnkokoá noa chrókjuak'e. A ntá tí chrók'uen tí noa a ntá chrók'óna nchónhya noa kixin chrótjá sín. ²⁵ A ntá tí nkexro imá tjuéhé asén kixin kohya nkehe chrók'uatsínka na mé tsochóntahya ch'án kjuachón jnkochrín. A ntá tí nkexro tjekuènhya asén kjónté chrók'uénxin ntihi chjasintajni tí chrónka ch'án itén Dios na mé chr'éxin tsochónta ch'án kjuachón jnkochrín. ²⁶ A ntá tí jnkójn nkexro tjinkaon chrókjuich'ena sín xra t'ichjánxin tsochréhe sín tí janhan. A ntá tí tjén janhan na mé kjaxin tjejó tí sín ch'ena sín xra. A ntá jnkójn sín sich'ena sín xra xíkaha na mé T'aná mé tsjikosáyehe tí jehe sín.

Ch'ín Jesús chrónka ch'án kixin its'en ch'án

²⁷ Ntá jie imá tóxakonhen asenná. ¿Nkehe chróntáxrjan? ¿Á chrókjuáncháha T'aná kixin sinchekaána ch'án tí nkehe tsona jie o náhi? Kjánchó xra ó k'uinka xíkaha tsona. ²⁸ Jaha It'éni, tjákoxian tí kjuachaxin kuènte ihnjá —ichro ch'án.

Ntá kuínhin sín nixja ijnko nkexro nkajní ntáchro kixin:

—Ó kjuixin kjuákoxian tí kjuachaxin la ko xíkaha xikjákoxian inaá.

²⁹ A ntá tí sín tjejóntaxín tsíkinhin sín mé ntáchro sín kixin kjónta, la ko í so sín ntáchro sín kixin:

—Ijnko ch'ín ángel nixjehe ch'án —ichro sín.

³⁰ Kjánchó ntáchro ch'ín Jesús kixin:

—Náhi. Jehya kixin janhan tí jie chrókujinhan tí nixja ch'án. Náhi. Nixja ch'án kixin tsinhínrá jahará. ³¹ Ntá jie tsitoxén tí ijje chojni chjasintajni na mé tí nkexro t'etōan chjasintajni mé ts'axrjehe ch'án tí xra t'etōan ch'án. ³² A ntá tió tsjak'énkania ijnko ntacruz ntá nchónhya sín ts'íkon sín ntá tsitekaon sín tí janhan —ichro ch'án.

³³ Mé xíkaha chrónkaxín ch'án kixin nkexrí ts'enxín ch'án. ³⁴ A ntá kjuátehe tí sín ntiha ntáchro sín kixin:

—Kuínhini nchekuáxin sín tí xroon tsíkjin sín ósé chrónka kixin Cristo la jnkochrín tsjak'e ch'án. ¿Ntá nkekuènté ntáchrua kixin tí Xjeen Dios

K'óna Chojni t'ichjánxin tsjak'enkáni ch'án ijnko ntacruz? ¿Xá nkexéhe tí Xjeen Dios K'óna Chojni? —ichro sín.

³⁵ Ntá ntáchro ch'ín Jesús kixin:

—Naxa tjen tí xrohi t'inkaséyanxín ntia. A ntá náhi la ó ts'ixín tie. A ntá tí sín ixri tí sítié a mé noehya sín nketí sátsji sín. ³⁶ Títékáonrá tí xrohi tí naxa tjen t'inkaséyan kixin mé ts'ónará chojni kuènte t'inkaséyan —ichro ch'án.

Ntá kjuixin chrónka ch'ín Jesús tíha ntá sákjuí ch'án kjuák'eméhe ch'án tí jehe sín.

Tí sín judío kuítekakonhya sín tí ch'ín Jesús

³⁷ K'uékjasin ch'ín Jesús nchónhya kjuaxroan jié k'uikonxín kon sín ntá kjónté kuítekakuenhya sín ch'án ³⁸ kixin mé xikaha tsoxiteyá tí nkehe tsintáchro ch'ín Isaías tsíkjin ch'án ósé kixin:

Ìnchéni, kohya nkexro kuítekaon tí nkehe chrónkani.

Kohya nkexro kjuínchenohe Dios tí kjuachaxin jié kuènte ch'án.†

³⁹ Méxra kuítekakuenhya sín tí ch'ín Jesús éxi tsíkjin ch'ín Isaías kjaxin kixin:

⁴⁰ Dios kjuínchek'ikonhya ch'án sín la ko kjuínchecha ch'án asén sín, kixin ntá chrók'uikonhya sín, la ko chrókiénxínhya sín,

kixin ntá chrókóchjinehya sín tí janhan kixin chrókjuintakitoha sín jina.‡

⁴¹ Xikaha k'uéchrónka ch'ín Isaías imá ósé kixin k'uék'ikon ch'án tí kjuachaxin jié kuènte Jesús ntá k'uéchrónka ch'án nkexrí tsjak'e tí ch'ín Jesús.

⁴² Kjánchó itsjé tí sín judío t'etqan kuítekaon sín tí ch'ín Jesús kjánchó noxínhya chrónka sín. Chrakonhen sín tí sín fariseo kixin chrókónínkaon sín la í chrókjuanjonhya sín kjuachaxin chrók'uixenhen sín tí njnkoé sín judío. ⁴³ Mé xikaha imá kóxrjnhjn sín kixin chojni chjasintajni chrókjuikosáyehe sín ntá kánhyó kjueyá sín kixin chrókjuikosáyehe sín Dios.

Tí nkehe ntáchro ch'ín Jesús mé tsitqexín ijié chojni

⁴⁴ Ntá itsen nixja ch'ín Jesús ntáchro ch'án kixin:

—Tí títékáonrá tí janhan na mé jehya janhván títékáonrá na mé kjaxin títékáonrá T'aná, mé tí nkexro k'uetuanna k'uinka. ⁴⁵ Éxi tí t'ikonrá tí janhan mé xikaha t'ikonrá tí nkexro k'uetuanna k'uinka. ⁴⁶ A ntá janhan mé xrohi k'uinka chjasintajni kixin tí sín titekaon sín tí janhan ts'ejóhya sín tí sítié a. ⁴⁷ A ntá tí jnkojnra tinhínra tí nkehe xrjanka ntá títékáonnahyará la jehya janhan sintakjasótiará kixin jehya kixin k'uinka sintakjasóte chojni chjasintajni. Náhi. K'uinka kixin sintakaá chojni. ⁴⁸ A ntá tí títékáonhyará tí janhan la ko títékáonhyará tí tan kuèntana la ó síin nkexrí tsitqexín ijiará, na mé éxi tí tan xrjanka mé Dios sinchekitqexín ijiará tí yaon tsixixín chjasintajni. ⁴⁹ Jehya tí nkehe kuèntana tjéxrjanka. Náhi. T'aná na mé tí nkexro k'uetuanna k'uinka mé k'uetuanna nkehe tsqxrjanka la ko nkehe tsákua. ⁵⁰ A ntá nóna kixin tí nkehe k'uetoan T'aná mé xranjonxín tí kjuachón jnkochrín. Mé xikaha tí nkehe ntáxrjan mé tjéxrjanka kixin T'aná mé k'uetuanna.

13

Ch'ín Jesús kjuínchek'ònti ch'án toté tí sín k'uájiko ch'án

¹ A ntá tí yaon xiká tí ntóye tsjasin sín tí kia pascua. A ntá ch'ín Jesús ó nohe ch'án kixin ó kjuixraká tí hora tsítóhe ch'án chjasintajni sátsjichréhe ch'án It'é ch'án. Xrácín tjuèhé ch'án tí sín kuènte ch'án chjasintajni, a ntá jie tsjakoxin ch'án kixin imá tjuèhe ch'án tí jehe sín.

² A ntá tí ch'ín Tsochren tsík'etuenhen asén ch'ín Judas Iscariote, it'é mé it'in Simón, kixin sinchekji ch'án tí ch'ín Jesús. ³ Ntá ch'ín Jesús la ó nohe ch'án kixin tsíkixin ch'án tí tjen Dios la ko xikjan ch'án sátsjichréhe ch'án Dios inaá. La ko ó nohe ch'án kixin It'é ch'án tsíkjanjon kjuachaxin ts'etuenhen ch'án kaín xín nkehe. ⁴ Ntá naxa tjejóne sín ntá k'uínkatjen ch'ín Jesús kuakitsje ch'án tí ka titsáte ch'án la kuákja ch'án ijnko ka xamáxin chojni t'ónti k'uínkat'óxin ch'án. ⁵ Ntá kuíkja ch'án ijnko nkehe nta, ntá kjuankixin ch'án kjuínchek'ónti ch'án toté jnkojnko tí sín k'uájiko ch'án la ko kjuínchexámáxin ch'án tí ka k'uínkat'óxin ch'án.

⁶ Na ntá tió kjujixraká tí tjen ch'ín Pedro, a ntá ntáchro ch'ín Pedro kixin: —Jaha Ìnchéni la, ¿nkekuèté chrókjuínchek'óntia toténi? —ichro ch'án.

⁷ Ntá kjuátehe ch'ín Jesús ntáchro ch'án kixin:

—Jaha la naxa tiénxinhya tí nkehe tjét'a janhan. Chr'éxin ntá tsiénxian nkekuèté tjét'a tíha —ichro ch'án.

⁸ Ntá ntáchro ch'ín Pedro kixin:

—Jaha la sijnchek'óntihya toténi —ichro ch'án.

Ntá ntáchro ch'ín Jesús kixin:

—Tí sintak'óntihya tí jaha la kjá ninkehó tsochontahya tí janhan —ichro ch'án.

⁹ Ntá kjuátehe ch'ín Simón Pedro ntáchro ch'án kixin:

—Náhi, Ìnchéni. Jehya tí toténi ó chrókjuínchek'óntia. Kjaxin itjani la ko ikjani chrókjuínchek'óntia —ichro ch'án.

¹⁰ Ntá ntáchro ch'ín Jesús inaá kixin:

—Tí sín tsikjixin tsík'ónti la t'ichjánxinhya kuenté sín ts'ónti sín inaá. Náhi. Jehó toté sín ó mé t'ichjánxin naxa ts'ónti kixin kuenté la ó tjóá. A ntá jahará la ó tjóará, kjónté kénhyará —ichro ch'án.

¹¹ Mé xikaha ntáchro ch'ín Jesús kixin kénhya sín tjóá sín kixin ó nohe ch'án nkexro sinchekji ch'án.

¹² Ntá tió kjuixin kjuínchek'ónti ch'án toté sín kaín sín ntá xík'inkáya ch'án inaá tí ka kuítsáte ch'án ntá kjuák'etjaxin ch'án tí k'uínkatjenxin ch'án. Ntá ntáchro ch'án kixin:

—¿Á kiénxinrá tí nkehe kjuít'a? ¹³ Jahará la ntáchrórá kixin janhan Maestro kuèntará la ko Ìnchárá. Chaxín ntoá ntáchrórá kixin janhan tíha. ¹⁴ Janhan tí Maestro kuèntará la ko inchárá kjuíntak'óntia totará. A ntá jahará kjaxin xikaha chrókjuínchek'óntirá toté kichuárá. ¹⁵ Janhan mé kjuákoxián kixin xikaha chrókjuích'erá éxi kjuít'a janhan. ¹⁶ Ijnko nkehe chaxín tsotjonkará kixin tí sín ch'exón xra mé t'etqanhya sín éxi t'etqan tí lámoe sín, la ko tí sín k'uáyéhe sín ijnko xra t'etqanhya sín éxi t'etqan tí sín kjuanjon tí xra a. ¹⁷ Tí chrókiénxinrá nkehe tíha la ko chrókjuínchexiteyará la chrókócháhará má.

¹⁸ Jehya kaín rá xikaha ntáxrjan. Ó nòna kixin nkexro kjuéyá janhan. Kjánchó t'ichjánxin tsoxiteyá tí nkehe tsíkjin sín ósé ntáchro kixin: “Ijnko nkexro tjéneqian mé tsjanjonkian.”* ¹⁹ Mé xikaha tjétjonkará senó kixin tió ts'atsínka tíha ntá tsítekáonrá kixin janhan mé tí nkexro xrácín

* 13:18 Salmo 41.9

tjen. ²⁰ Ijnko nkehe tjetooan tjetjónkará kixin tí tsjánjonrá kjuachaxin tsitohe tí chojni ichr'an janhan, mé éxí yóhe chrókjuánjonrá kjuachaxin chrókuitohe tí janhan, a ntá tí tsjánjonrá kjuachaxin tsitona janhan mé éxí yóhe chrókjuánjonrá kjuachaxin chrókuitohe tí nkexro k'uetuanna k'uinka —ichro ch'ín Jesús.

Ch'ín Jesús chrónka kixin ch'ín Judas sinchekji ch'án

(Mt. 26.20-25; Mr. 14.17-21; Lc. 22.21-23)

²¹ Ntá kjuixin chrónka ch'ín Jesús tíha, ntá kóxakonhen asén ch'án má ntá ntoá chrónka ch'án kixin:

—Ijnko nkehe tjetooan tsotjónkará kixin jnkojínrá tjejórá ntihi mé sinchekjiráni —ichro ch'án.

²² Ntá tí sín k'uájiko ch'án kjuanjíxin komáxin la ko í komáxin kichó sín kixin noehya sín nkexro tí ntáchro ch'án. ²³ A ntá injko ch'ín k'uájiko ch'ín Jesús imá tjuèhe ch'án itjen ch'án chjinaxón tí tjen ch'ín Jesús tjejóne sín. ²⁴ Ntá ch'ín Simón Pedro kjuakoxín seña k'uetuennen ch'án tí í jnko ch'ín a kixin:

—Tjanchankíhí ch'án nkexro tíha —ichro ch'án.

²⁵ A ntá tí ch'ín a na mé antsí kóchjinehe ch'án tí ch'ín Jesús, ntá kjuanchankí ch'án ntáchro ch'án kixin:

—Ínchéni, ¿nkexro tíha? —ichro ch'án.

²⁶ A ntá kjuátèhe ch'ín Jesús ntáche ch'án tí ch'ín a kixin:

—Sintakjata it'ò niotja, a ntá tí nkexro tsotjaha tí t'ò niotja a mé tí nkexro a —ichro ch'án.

A ntá mé xikaha kjuínchekjata ch'ín Jesús it'ò niotja ntá chjèhe ch'án tí ch'ín Judas Iscariote, it'é ch'án mé it'in Simón. ²⁷ Ntá k'uáyéhe ch'án tí niotja ntá tuénxín k'uúixenhen asén ch'án tí ch'ín Tsochren. Ntá ntáche ch'ín Jesús tí jehe ch'án kixin:

—Tí xra tjinkávan sich'e la jaí tóxakonhan —ichro ch'án.

²⁸ Kjánchó nijnko tí sín tjejóne ntiha kienxínhya sín nkekuènté xikaha ntáchro ch'án. ²⁹ Ch'ín Judas la t'ayakonhen ch'án tí nkehe tjinká chichaon ntá iso sín kjuenkayáxin sín kixin ách'e ch'ín Jesús mé k'uetuennen ch'án tí ch'ín Judas kixin ichrén nkehe sátsjik'ena ch'án kuènte tí kia a, o ách'e ichrén nkehe sinchekjionhen ch'án tí sín nòa a. ³⁰ Ntá k'uáyéhe ch'ín Judas tí niotja, a ntá k'uaxrjexín ch'án ntiha. A ntá ó k'uúixin tie.

Ijnko nkehe nixin k'uetooan ch'ín Jesús

³¹ A ntá ó kjuixin sátsíkji ch'ín Judas, ntá ntáchro ch'ín Jesús kixin:

—A ntá jie tsonoxín tí kjuachaxin jíe kuènte tí Xjeen Dios K'óna Chojni la ko tsjakoxin ch'án tí kjuachaxin jíe kuènte Dios. ³² Na mé xikaha tí Xjeen Dios K'óna Chojni mé tsjakoxin tí kjuachaxin jíe kuènte Dios. A ntá Dios mé tsjakoxin ch'án tí kjuachaxin kuènte Xjeen ch'án la tjoka tsoxiteyá. ³³ Xjeenni, í séhya naxa tsjak'é janhan ts'ejókoará ntihi. Ntá jahará mé ts'ajikjeyará tí janhan. Ntá éxí yóhe k'uetjanka tí sín judío mé tjónkará kjaxinrá kixin: Ninkexró xitjahya tsjiji sín tí sátsjiyá janhan.†

³⁴ Ijnko nkehe nixin tétuanhanrá ijie kixin chrótjuèhérá kichuára éxí yóhe tjuahará mé xikaha chrótjuèhérá kichuára. ³⁵ Tí tsotjuèhérá kichuára ntá tsonoxín kaín xín chojni síin chjasintajni kixin tinkachónkirá tí janhan —ichro ch'án.

† 13:33 Juan 7.33

Chrónka ch'ín Jesús kixin ch'ín Pedro sinchemá ch'án kixin chónhya ch'án tí jehe ch'án

(Mt. 26.31-35; Mr. 14.27-31; Lc. 22.31-34)

³⁶ Ntá kjuanchankíhi ch'ín Simón Pedro tí ch'ín Jesús kixin:

— Ìnchéni, ¿nketí sátsjia? — ichro ch'án.

Ntá kjuátehe ch'ín Jesús ntáchro ch'án kixin:

— Tí nó sátsjiyá xitjahya tsochréhérá jaí. Ntá chr'éxín tsjasánchréhérá ntiha — ichro ch'án.

³⁷ A ntá ntáchro ch'ín Pedro kixin:

— ¿Nkekuènté xitjahya tsochráha tí jaha jaí? Kjónté chrók'uenyákonhán — ichro ch'án.

³⁸ Ntá kjuátehe ch'ín Jesús ntáchro ch'án kixin:

— ¿Á chaxín ts'enyákonna jaha? Ijnko nkehe chaxín tsotjonka kixin naxa tsotsjehya tí kochínto la ó tsjixin sìnchemána níya kixin chonhyana, tsixrua.

14

Jesús mé ntia sátsjixinni tí tjen It'éni tjen nkaya nkajní

¹ Tóxakuanhyará jahará. Títekáonrá Dios la ko kjaxin títekáonrá tí janhan. ² Ntoe T'aná nchónhya nchia siín ts'ejóni. A ntá tí xikahya chrók'uixin la xikahya chrótjonkará. Méxra sátsjiyá s'intayóxian tí chrók'uejóni. ³ A ntá tí sátsjiyá s'intayóxian, ntá tió tsjixin ntá ts'inka inaá, ntá sátsjini kixin jahará kjaxin chrók'uejorá ntiha tí tsjak'é janhan. ⁴ Jahará la ó nohará nketí sátsjiyá la ko ó nohará tí ntia a — ichro ch'án.

⁵ Ntá kjuátehe ch'ín Tomás ntáchro ch'án kixin:

— Ìnchéni, noehyani nketí sátsjia jaha. ¿A ntá nkexrí chrókónoheni tí ntia a? — ichro ch'án.

⁶ Ntá kjuátehe ch'ín Jesús ntáchro ch'án kixin:

— Janhan mé tí ntia la ko janhan mé tí tan chaxín la ko janhan mé tsjánjuan tí kjuachón. Jehó tí nkexro tsitekaon tí janhan mé jína tsjiji tí tjen T'aná. ⁷ Tí chrókjuátsoanrá tí janhan ntá xikaha chrókjuátsoanrá T'aná kjaxin. Na ntá ó choxínrá ch'án jie la ko ó tjejókomará ch'án — ichro ch'án.

⁸ Ntá ntáchro ch'ín Felipe kixin:

— Ìnchéni, títoghéni kixin tsochóxinni It'á. Táhó mé tjinkaonni — ichro ch'án.

⁹ Ntá kjuátehe ch'ín Jesús ntáchro ch'án kixin:

— Felipe, ósé tjejóni, ¿a ntá naxa tjátsoanhya tí janhan ní? A ntá xikaha tí t'ikonrá tí janhan na mé xikaha chrók'uikonrá T'aná. ¿Nkekuènté tjanchána kixin chrókujitoha chrók'uikonrá tí T'aná? ¹⁰ ¿Á títekáonhya jaha kixin janhan jnkokoá tjékian T'aná, la ko T'aná tjen tí tjen janhan? Tí nkehe níxja janhan la jehya kuéntana. Náhí. T'aná tjékian janhan mé tjech'e ch'án tí xra kuènte ch'án. ¹¹ Títekáonrá kixin jnkokoá tjékian T'aná, a ntá T'aná itjen tí tjen janhan. Kjónté kuítekáonhyará xikaha la chrókuítekáonrá kixin tí kjuaxroan jie kjuákoxian k'uikonrá. ¹² Ijnko nkehe chaxín tjonkará kixin tí chaxín tsítekáonrá tí janhan ntá kjaxinrá tsjachará sich'erá xra yóhe tjét'a la ko kjaxin ixra antsí jie tsjachará sich'erá kixin janhan la ó sátsjiyá tí tjen T'aná. ¹³ Káin nkehe tsjanchatóxixínrá tí njina na mé tsjánjuan kixin xikaha tsjákoxian tí kjuachaxin kuènte T'aná. ¹⁴ Tí chrén nkehe tsjanchatóxixínrá njina la janhan la tsjánjuan.

Ch'ín Jesús chrónka ch'án kixin chaxín tsochr'án ch'án tí Nchakuen Dios

¹⁵ Tí chaxín tjuèhérá tí janhan ntá chrókjuinchexiteyéhérá tí nkehe kuétuñhanrá. ¹⁶ Ntá tsoxrjannógha T'aná kixin tsochr'án ch'án Nchakuen ch'án kixin tsjinkítsa tí jahará la ko sinchechéhe asánrá la mé ts'ejokoará jnkochrixin. ¹⁷ Jehé ch'án mé Nchakuen chaxín. Tí sín chjasintajni xitjahya ts'áyéhe sín ch'án kixin t'ikonhya sín ch'án la ko chónhya sín ch'án. Kjánchó jahará ó choxínrá ch'án kixin tjejokoará ch'án la ko ts'ejokoará ch'án jnkochrixin. ¹⁸ Janhan na tsitoáhyará nòerá jahórá, na mé tsokjan inaá kixin ts'ejóni. ¹⁹ A ntá séhya ntá tí sín chjasintajni ts'ikonhya sín tí janhan inaá. Kjánchó jahará mé ts'ikonrá tí janhan. Ntá kjaxinrá ts'ejochónrá kixin janhan na tjéchuñ. ²⁰ A ntá tí yaon a chrókónohará kixin T'aná la ko janhan jnkokoá tjékian la ko kjaxin jahará la ko janhan jnkokoá tjejóni. ²¹ Tí nkexro nohe tí nkehe tétōan la ko sinchexiteyéhé sín mé xikaha tsjakoxin sín kixin chaxín tjuèhe sín tí janhan. A ntá tí tjuèhe sín tí janhan ntá T'aná mé tsotjuèhe tí jehé sín la ko kjaxin janhan tsotjuahá sín la ko tsjakoxian nkexrí tñen janhan —ichro ch'ín Jesús.

²² A ntá tí ch'ín Judas, jehya tí ch'ín Iscariote tíha, na mé kjuanchankí ch'án kixin:

—Inchéni, ¿nkekuènté jehóni tjákoxian, a ntá tjákoéxinhya tí chojni chjasintajni? —ichro ch'án.

²³ Ntá kjuátehe ch'ín Jesús ntáchro ch'án kixin:

—Tí nkexro tjuèhe tí janhan mé sinchexiteyéhé tí nkehe tétōan. La ko T'aná mé tsotjuèhe tí jehé sín la ntá T'aná la ko janhan ts'ejókoni sín. ²⁴ A ntá tí sín tjuèhya tí janhan la mé nchexiteyèhya sín tí nkehe tjákua. A ntá tí nkehe tjákua tjejotinhínrá la jehya kuèntana. Náhi. Kuènte T'aná tí nkexro k'uetuanna k'uinka.

²⁵ Naxá tjejóni la tjetjónkará kaín tíhi. ²⁶ A ntá Nchakuen T'aná tsochr'án ch'án kjuachaxin nina mé tsjinkítsa tí jahará la ko sinchechéhe asánrá la ko tsjakohará kaín nkehe la ko sinchexraxinkaonrá kaín nkehe xrjanka.

²⁷ Kjuaxróxin tsitōha la ko kjuaxróxin kuèntana tsotjahará. Jehya éxí tí kjuaxróxin chrókjuanjon tí sín chjasintajni. Náhi. Chrókóxakuenhya asánrá la ko chróchrakonhyará. ²⁸ Ó kuínhínrá ntáxrjan kixin sátsjiyá la ko tsokjan janhan ts'ejóni inaá. Tí chaxín tjuèhérá tí janhan ntá chrókócháhará tí kuínhínrá kixin sátsjiyá tí tñen T'aná kixin antsí t'etōan ch'án la kánhyó tétōan janhan. ²⁹ Senó tjetjónkará tíhi kixin tió tsonhen tíha la ts'ikonrá ntá tsitékaonrá jahará.

³⁰ Ntá jie la í séhya tsonixjahará kixin tí jie itsi tí ch'ín Tsochren, mé tí nkexro t'etuñhen tí sín chjasintajni. A ntá jehé ch'án la ninkehó t'etuñnahya tí janhan. ³¹ Kjánchó t'ichjánxin kixin xikaha tsonhen ntá tí sín chjasintajni mé tsonhe sín kixin tjuahá T'aná la ko nchexiteyáha tí nkehe k'uetuanna ch'án. Ntá jie t'inkatjenrá sátsjixínni ntihi.

15

Tí nta t'óna to uva la ko tí chaan nta

¹ Janhan mé éxí yóhe ijnko ntanòa tjechón itsa to uva la ko T'aná mé éxí yóhe tí nkexro t'ayakonhen tí nta a. ² Tsochrínjin ch'án tí chaan nta t'ónaha to. A ntá tí chaan nta t'óna to mé nchetjuák'á ch'án kixin ntá ts'óna antsí má tsjé to. ³ A ntá jahará la kótjuáxinrá tí tanná k'uetjónkará senó. ⁴ Tí tsitoéhyará tí janhan ntá kjaxin janhan tsitoahya tí jahará.

Mé xikaha ijnko chaan nta ts'axrjentehe tsjachahya jehó ts'óna to, la ko xikaha jahóra tsjachahyará sich'erá tí xra kuéntana tí tsitohérá tí janhan.

⁵ Janhan na mé yóhe tí ntanò, a ntá jahará la tí chaan tí ntanò tsík'ayanta. Tí nkexro jnkokoá tjenkayáxinkian mé tsjacha ts'óna nchónhya to. A ntá tí tsínkáchónkihya sín tí janhan la ninkehó xra tsjachahya sín sich'e sín. ⁶ A ntá tí nkexro jnkokoáhya tjenkayáxinkian na mé éxi yóhe tí nta ch'ehya xra tsíkóchrínjin sín tsík'itjí sín chrínta tí nonte a tsoxámá ntá tsoxrejo ntá tsoche.

⁷ Ntá tí chaxín tsitohéhyará tsínkáchónkirá tí janhan la ko ts'itjáyanhyará tí nkehe kjuákoHará ntá tsjanchiará ichrén nkehe tjínkáonrá la ts'ayéHérá. ⁸ A ntá T'aná la tsochéhe ch'án tí ts'ónará itsjé to. Mé xikaha tsjákoXínrá kíxin tinkáchónkirá tí janhan. ⁹ Janhan tjuahará tí jahará éxi tjuana T'aná. Chrókónohará kíxin tjuahará. ¹⁰ Tí tsítekáonrá tí nkehe kuétuanhanrá ntá tsonohará kíxin tjuahará éxi yóhe kjaxin janhan ntaxiteyá tí nkehe k'uetuanna T'aná ntá kónona janhan kíxin tjuana ch'án.

¹¹ Mé xikaha tjonkará kaín tíha kíxin ntá éxi chána mé xikaha tsjintaxín tsochéhe asánrá. ¹² Tí nkehe kuétuanhanrá la mé tíhi kíxin chrótjuéhérá kíchuárá éxi tjuahará xikaha. ¹³ Ninkexró chrókóyóhe éxi tí nkexro imá tjuéhe tí sín chóxin ch'án ntá ts'enyákonhen ch'án tí jehe sín. ¹⁴ Jahará la chojni choxian tí tsítekáonrá tí nkehe tétuanhanrá. ¹⁵ Ntáxrxjanhya janhan kíxin jahará chojni ch'exón xra kíxin tí chojni xikaha ch'exón xra mé noehya sín nkehe tí xra ch'e tí lámøe sín a. Náhi. A ntá jahará la chojni choxian kíxin kaín xín nkehe kjuakona T'aná mé kjuákoHárá. ¹⁶ Jehya kíxin jahará kjuéyará tí janhan. Náhi. Janhan mé kjuéyá tí jahará kíxin tsotjahará xra, a ntá éxi yóhe to xé mé chrók'uaxrje jina tí xra sich'enará kíxin chrók'uitjáyanhya. A ntá T'aná mé tsotjahará ch'án kaín xín nkehe tsjanhexínrá njina. ¹⁷ Mé xikaha tétuanhanrá kíxin tsotjuéhérá kíchuárá.

Tí sín chjasintajni nínkakonhen sín tí ch'ín Jesús la ko tí sín tinkáchónki ch'án

¹⁸ Tí tsonínkakonhanrá tí chojni chjasintajni ntá chrókónohará kíxin senó janhan nínkakonna sín. ¹⁹ Tí chrókókuéntará chjasintajni ntá tí sín chjasintajni chrótjuahará sín kíxin naxa kjéhyará sín. Kjánchó janhan kjuéyá tí jahará kíxin chrók'uaxrjéjjanxínrá tí sín síin chjasintajni. A ntá tí sín chjasintajni nínkakonhanrá sín kíxin jahará jahará kuéntará chjasintajni. ²⁰ Xráxinkáonrá tí nkehe tsítjonkará kíxin tí sín ch'ehé lámøe sín xra tjetóxinhya ts'etøan sín.* Éxi yóhe chónkina sín mé xikaha tsochónkíhi sín tí jahará. A ntá tí kuítekaon sín tí nkehe kjuákoHá sín ntá kjaxin tsitekaon sín tí nkehe naxa tsjákoHérá sín. ²¹ Mé xikaha sit'ahará sín kíxin jahará tinkáchónkirá tí janhan la ko jehe sín chónhya sín tí nkexro ichr'ánna k'uinka ntihi.

²² Tí chrók'uinkahya janhan ntihi chrónixjahya sín ntá chrókuamáhya sín jie. Ntá jie kohya nkerí tsaáxin sín kíxin tí jie tinkákjasin sín. ²³ Tí sín nínkakonna mé xikaha nínkakonhen sín T'aná. ²⁴ Chróchóntahya sín jie tí chrók'uejókianhya sín ntihi chrókjuásinhya janhan kjuaxroan jie éxi tsíkjasinhya ninkexró senó. Ntá jie ó k'uíkon sín kaín tí kjuaxroan, a ntá kjónté nínkakonna sín tí janhan la ko nínkakonhen sín T'aná kjaxin. ²⁵ Mé xikaha tsonhen kaín tíha kíxin ntá tsoxiteyá tí nkehe ntáchro tí ley kuénte sín kíxin: “Kohya jie kjuásian janhan ntá kjónté kónínkakonna sín.”† ²⁶ A ntá tsi tí nkexro tsjínkjitsa la ko sinchechéhe asánrá. Tíha mé tí Nchakuen

* 15:20 Juan 13.16 † 15:25 Salmo 35.19; 69.4

Dios chaxín. Janhan mé tsochr'an ch'án kixin tí kjuachaxin kuènte T'aná. A ntá jehe ch'án mé tsochrónka nkexrí t'jén janhan ²⁷ la ko jahará kjaxinrá tsochrónkará nkexrí t'jén janhan kixin tí xrankíxixín la k'uéjóni jnkokoá.

16

¹ Kaín tíhi t'jétjonkará kixin chrókujtoéhyará tí nkehe kjuákohará. ² Tí sín judío tsjanjonhya sín kjuachaxin ts'ixenhenrá nínkoé sín la ko tsjixraká tí yaon kixin tí sín ts'óyán sín tí jahará tsontácho sín kixin xíkaha mé t'jéjoch'e sín xra kuènte Dios, tsixro sín. ³ Mé xíkaha sich'e sín kixin chónhya sín T'aná la ko chónhyana sín. ⁴ A ntá tjonkará kaín tíhi kixin tió tsjixraká tí yaon xíkaha tsonhen ntá tsoxráinkáonrá kixin ó k'uétjonkará senó a.

Tí xra ch'e Nchakuen Dios

'Tí xrankíxixín k'uétjonkahyará tíhi kixin jnkokoá k'uék'ejóni. ⁵ Ntá jie sátsjiyá tí t'jén tí nkexro ichr'ánna k'uinka. Kjánchó nijnkorá tjan-chankíhyará nketí sátsjiyá. ⁶ Ntá kjuixin tjonkará tíha ntá imá t'avará kixin kuínhínra xíkaha xrxanka. ⁷ A ntá chaxín tí nkehe t'jétjonkará kixin íchá jína sátsjiyá kixin jahará jína chrók'uejorá. A ntá tí sáchrókjuíhya ntá chrókuihya tí nkexro tsjinkítsará. A ntá tí sátsjiyá janhan ntá tsétoan kixin itsi ch'án ntihi. ⁸ A ntá tió tsi ch'án mé sinchexraxinkaon ch'án tí chojni chjasintajni kixin jehe sín mé tjasin sín jie, la ko itjen ijnko ntia ntoá chrókuakja sín la ko Dios mé sinchekitoexín tí jie kjuasin sín. ⁹ Xíkaha chóna sín jie kixin tinkáchónkihya sín tí janhan. ¹⁰ A ntá tsonohe sín kixin itjen tí ntia ntoá kixin sátsjiyá tí t'jén T'aná ntá ts'ikonhyará tí janhan inaá, ¹¹ la ko tsonohe sín kixin Dios sinchekitoexín ijje kixin ó kjuixin kuítoexín ijje tí nkexro t'etoan chjasintajni kixin tsjasóte.

¹² 'Naxa chonta janhan itsjé nkehe chrótjonkará, kjánchó chrókjuachahyará chrókiénxinrá jie. ¹³ A ntá tió tsi tí Nchakuen Dios chaxín ntoá ntá jehe tí Nchakuen Dios mé tsjakohará ch'án kaín xín nkehe ntoá. Méxra jehya tí nkehe kuènte ch'án tsochrónka ch'án na mé tí nkehe tsinhin ch'án mé tsochrónka ch'án tsjakohará ch'án tí nkehe tsonhen chr'éxin. ¹⁴ Jehe ch'án mé tsjikosáyana ch'án kixin ts'áyéhe ch'án tí nkehe kuéntana ntá tsjakohará ch'án nkehe tíha. ¹⁵ Kaínxín nkehe chóna T'aná na mé kuéntana. Mé xíkaha ntáxrxan kixin tí Nchakuen Dios chaxín ntoá mé ts'áyéhe ch'án tí nkehe kuéntana ntá tsjakohará ch'án nkehe tíha.

Senó ts'avá sín ntá chr'éxin tsochéhe sín

¹⁶ Ntá í séhya la í ts'ikonhyará tí janhan. La ko kjaxin séhya xik'ikonrá tí janhan inaá kixin sátsjiyá tí t'jén T'aná —ichro ch'án.

¹⁷ Ntá iso tí sín k'uájiko ch'án mé kjuanchankíhi sín kíchó sín kixin:

—¿Nkexrí t'axrxexín tí nkehe ntácho ch'án kixin í séhya ts'ikonhyani ch'án la ko kjaxin séhya ntá xik'ikonni ch'án inaá kixin sátsji ch'án tí t'jén It'é ch'án? ¹⁸ ¿Nkexrí t'axrxexín tí ntácho ch'án kixin “í séhya”? Méxra tienxínhya nkehe tí ntácho ch'án —ichro sín.

¹⁹ Ntá kónohe ch'ín Jesús tí nkehe chrókjuanchankíhi sín ch'án ntá ntáche ch'án sín kixin:

—Xíkaha tjonkará kixin í séhya ts'ikonhyará tí janhan la ko kjaxin séhya xik'ikonrá tí janhan inaá. ¿Á tíha mé t'jetjanchankíhírá kichuárá ní? ²⁰ T'jétjonkará ijnko nkehe chaxín kixin imá tsotsjankará la ko ts'avará. A ntá tí chojni chjasintajni la tsochéhe sín. A ntá jahará ts'avará la

ko sɨntaníhará kjónté chr'éxɨn tsoçáhará má. ²¹ Éxí yóhɛ ijnko tjan sinchekokjíhi tjan xjeen tjan mé imá tóxakonhen tjan kíxin ó kjuixraká tsjoté tjan. A ntá tsjixin tsokjíhi xjan ntá í xraxinkakonhya tjan nkexrí kjoté tjan kíxin chéhe tjan kokjíhi ijnko xjan ntihi chjasintajni. ²² Mé xíkaha jahará ijie t'avará. Ntá xik'íkuaɨn tí jahará ínaá ntá imá tsoçhéhe asánrá la ko tsoçohya ninkexró tsakitsajahará tí kjuachéhe tsochontará.

²³ 'Tió tsi tí yaon a ntá tsjanchankínahyará ninkehó. Chaxín tí nkehe tjétjonkará kíxin T'aná tsotjáhará ch'án kaín nkehe tsjanchatóxixínrá nina. ²⁴ Naxa kjuánchatóxixínhyará ninkehó tí nina. Ntá jie tjanchiará la ts'ayéhérá, a ntá tsjintaxín tsoçáhará.

Inchéni Jesucristo mé kjuacha ch'án k'ueɨtoan ch'án, ntá chjasintajni la náhi

²⁵ 'Tí nkehe tjétjonkará mé kjuintayóaxián ó. Ntá tsjixraká tí yaon la í ninkehó sɨntayóaxián na mé ntoá tsotjonkará nkexrí tjen T'aná. ²⁶ A ntá tí yaon a mé tsjanchaxínrá nkehe nina. Ntá ntáxrjanhya tíhi kíxin tsonixjayákonhanrá tí tjen T'aná ²⁷ kíxin jehe T'aná mé tjuahará jahará. Na mé tjuahará ch'án kíxin jahará tjuanará tí janhan la ko kíxin kuítekáonrá kíxin janhan k'uinkaxian tí tjen Dios. ²⁸ K'uaxrjéxian tí tjen T'aná k'uinka chjasintajni. Ntá jie la ó tsitohá chjasintajni ntá sátsjiyá ínaá tí tjen T'aná —ichro ch'án.

²⁹ Ntá ntáchro tí sín k'uájiko ch'án a kíxin:

—Ntá jie ntoá tjéchronka ninkehó ncheyoéxinhya. ³⁰ Ntá jie tienxínni kíxin jaha mé noha kaín xín nkehe la ko t'lichjánxinhya kíxin jnkojín nkexro chrókjuanchankíha sín ichrén nkehe. Méxra xíkaha titekaonni kíxin jaha mé k'uinkaxian tí tjen Dios —ichro sín.

³¹ Ntá kjuátehe ch'ín Jesús ntáchro ch'án kíxin:

—¿Á jie kuítekáonrá ní? ³² Ntá tsi tí yaon na mé jie tíha na ntá tsochraonrá jnkojnkorá tsoxíkará sátsjirá ntá tsitonará janhván tsjak'é. Kjánchó jehya janhván tjeen. T'aná mé tjékjan. ³³ Tjétjonkará kaín tíhi kíxin ntá kjuaxróxin ts'ejó asánrá tinkachónkirá tí janhan. A ntá ntihi chjasintajni kjónté kjuaxróxinhya tjejorá tjejotjasóterá kjánchó chraonhyará kíxin janhan mé ó kjuixin kjuacha tsétoan. A ntá tí chjasintajni la kjuachahya ts'etóan —ichro ch'án.

17

Ch'ín Jesús chrónóhɛ ch'án It'é ch'án kíxin chrók'uayakonhen tí sín k'uájiko ch'án

¹ Ntá ó kjuixin chrónka ch'ín Jesús kaín tíha ntá konta ch'án nkajní ntáchro ch'án kíxin:

—Jaha It'éni, ó kjuixraká tí yaon a. A ntá jie chróçhéhé tí Xjaan antsí má kjuachaxin kíxin kjaxin tí Xjaan chrókjuikosáyehe tí jaha. ² Jaha tsíchjéhé kjuachaxin tí Xjaan kíxin ts'etuɛnhen ch'án kaín xín chojni na ntá jehe ch'án tsoçhéhe kjuachón jnkochrínín kaín tí sín tsíchjéhé ch'án. ³ Tí kjuachón jnkochrínín mé t'axrjéxín kíxin tsoçhóxian sín tí jaha tí jnkokoá Dios chaxín tjechón la ko kjaxin tsoçhóxian sín Jesucristo la mé jaha kuétuɛnhén ch'án kui ch'án ntihi chjasintajni.

⁴ Ó kjuixin kjuikosáyaha tí jaha ntihi chjasintajni kjuixinna tí xra çhjina sɨt'a. ⁵ A ntá jie It'éni, çhjina jaha tí kjuachaxin jie k'uéchonta janhan tí k'uéjóni jnkokoá naxa k'ónahya chjasintajni.

6 'Ó kjuixin kjuákoḥa tí sín chjina chjasintajni kixin nkexro tí jaha. Jaha mé k'uékuéntá sín tí ósé ntá jie chjina tí janhan la ó kjuákoḥa sín itán la ntá ijie la ó kuítekaon sín. 7 Ntá jie ó kjuátsoḥan sín kixin kaín tí kjuachaxin chonta janhan la jaha tsíkánjuan. 8 Kixin ó kjuixin kjuákoḥa sín tí tán chjina jaha, ntá kuítekaon sín, ntá kuénxín sín kixin mé chaxín tsík'inkaxian tí tjen jaha, na mé kuítekaon sín kixin jaha kuétuanna k'uinka.

9 'Janhan mé xrjanóaha kixin chrók'uayakonhén tí jehe sín. Jehya kixin xrjannóaha kixin chrók'uayakonhén kaín tí chojni siín chjasintajni. Náhí. Jehó xrjanóaha kixin chrók'uayakonhén tí sín chjina kixin kuéntá sín. 10 A ntá kaín tí nkehe chonta janhan na mé kuéntá jaha la ko kaín tí nkehe kuéntá la mé kuéntana kjaxin. A ntá tí kjuachaxin jie kuéntana mé ts'inkaséyanxín tí jehe sín.

11 'A ntá jie tsitonahya janhan ntihi chjasintajni. Kjánchó jehe sín naxa tsitohe sín chjasintajni. A ntá jie tsjasán tí tjen jaha. Jaha It'eni imá jina jaha, t'ayakuenxián sín tí kjuachaxin tí ihniá kixin ntá jnkokoá chrókjuenkayáxin sín éxi tí jaha la ko janhan jnkokoá tjenkayáxinni. 12 A ntá tí naxa k'uejókian tí jehe sín ntihi chjasintajni la k'uáyakuánxián sín tí kjuachaxin tí ihniá chjina. Nijnko tí jehe sín k'uitjáyanhya sín. A ntá jnkokoá nkexro mé k'uitjáyan mé tí ch'in xráxín ts'itjáyan kixin xikaha tsoxiteyá éxi nixja tí xroon tsíkjin sín.

13 'Ntá jie ó tsjasán tí tjen jaha. A ntá naxa itjén janhan chjasintajni mé ntáxrjan tíhi kixin ntá tsochéhe sín éxi yóhe imá chàna. 14 Janhan mé kjuákoḥa sín itán jaha, a ntá jie tí sín chjasintajni mé ninkakonhen tí jehe sín kixin jehe sín la jehya kuénte chjasintajni éxi kjaxin janhan na janhya kuéntana chjasintajni. 15 Tjáncháhya kixin chrókuakítsjehé sín chjasintajni. Náhí. Tjáncháhá kixin chrók'uayakonhén sín kixin chrókjuich'i'yehya sín tí Jínahya. 16 Jehe sín la jehya kuénte chjasintajni éxi yóhe janhan kjaxin janhya kuénte chjasintajni. 17 Nchetjuáxian sín tí kjuachaxin kuéntá kixin itán jaha mé tí tan chaxín ntoá. 18 Éxi yóhe jaha kuétuanna k'uinka chjasintajni mé xikaha janhan tétuñhan sín kixin chrók'uejókian sín tí sín chjasintajni. 19 Jehó tí xra kuéntá chrókjuít'a kixin chrókjuinkítsa tí jehe sín, a ntá jehe sín kjaxin chrókjuich'e sín tí xra kuéntá kixin kuínhin sín itán chaxín ntoá.

20 'Kjánchó jehya kixin xrjanóaha kixin chrókjuinkítsa tí jehó sín. Náhí. Kjaxin xrjanóaha kixin chrókjuinkítsa kaín tí sín tsitekaon sín chr'éxin tsinhin sín tí nkehe tsochrónka tí sín a. 21 Mé xikaha xrjanóaha kixin kaín tí jehe sín jnkokoá chrókjuenkayáxin sín éxi jaha It'eni la ko janhan jnkokoá tjenkayáxinni mé xikaha xrjanóaha kixin kaín tí jehe sín la ko jaha la ko janhan jnkokoá chrókjuenkayáxinni. A ntá tí sín chjasintajni chrókuítekaon sín kixin jaha tsíkétuanna k'uinka ntihi. 22 A ntá tí kjuachaxin jie chjina na mé tjaha tí jehe sín kixin ntá kaín sín jnkokoá chrókjuenkayáxin sín éxi yóhe jaha la ko janhan jnkokoá tjenkayáxinni. 23 Janhan la ko jehe sín jnkokoá chrókjuenkayáxinni éxi jaha la ko janhan jnkokoá tjenkayáxinni. Mé xikaha tí sín chjasintajni chrókónohe sín kixin jaha kuétuanna k'uinka la ko kjaxin chrókónohe sín kixin jaha tjuéhé tí jehe sín éxi yóhe tjuana tí jaha.

24 'Jaha It'eni, tí sín kjuánjuan la tjínkavan kixin tí jehe sín chrók'uejókian sín tí tsjak'é janhan kixin chrók'uikon sín tí kjuachaxin jie chjina; kixin xráxín naxa k'ónahya chjasintajni k'uétjuana jaha. 25 It'eni jaha, imá jina

jaha. Kjónté tí sín chjasintajni naxa chónhya sín tí jaha, ntá janhan na ó xráxín choxian tí jaha la ko kaín tí sín i kjaxin ó nohe sín kixin jaha kuétuanna k'uinka. ²⁶ Ó kjuákoḥa sín kixin nkexro tí jaha la ko xikaha naxa tsjákoḥa sín, kixin éxi tjuana jaha mé xikaha chrótjuèhe sín kichó sín la ko janhan chrók'uejókjan tí jehe sín —mé xikaha chrónoḗḗ ch'ín Jesús tí It'é ch'án.

18

Ch'ín Jesús sákjuíko sín ch'án tsjak'echjina ch'án
(Mt. 26.47-56; Mr. 14.43-50; Lc. 22.47-53)

¹ Ó kjuixin ntáchro ch'ín Jesús kaín tíha ntá jehe ch'án la ko tí sín k'uájiko ch'án k'uaxrjexín sín ntiha k'uatoye sín tí tsaka Cedrón. Ntaha tjen ijnko nonte siín nchónhya nta k'uúixenhen ch'ín Jesús la ko tí sín k'uájiko ch'án. ² Kjaxin ch'ín Judas tí ch'ín sinchekji tí ch'ín Jesús mé nohe ch'án kixin ntaha tjen tí huerto a kixin ntaha jnkoyaxón kójnkotséko ch'ín Jesús tí sín k'uájiko ch'án a. ³ A ntá ch'ín Judas ó kjuikao ch'án nchónhya sín soldado la ko iso sín policia kuente nínko tsík'etuēnhen tí sín nchat'á t'etoan la ko tí sín fariseo. Ntá kjuí sín kaín sín xraá sín chica la ko kjuikao sín xrohi t'inkaséyanxín tí kjuixín sín. ⁴ A ntá ch'ín Jesús ó nohe ch'án kaín xín nkehe ts'atsínka ch'án, ntá sákjuí ch'án kjuanchankíhi ch'án sín ntáchro ch'án kixin:

—¿Nkexro xritjéyará? —ichro ch'án.

⁵ Ntá kjuátehe sín ntáchro sín kixin:

—Tjeyáni tí ch'ín Jesús tsíkjiixín chjasin Nazaret —ichro sín.

Ntá kjuátehe ch'ín Jesús ntáchro ch'án kixin:

—Janhan tíha —ichro ch'án.

A ntá ch'ín Judas tí ch'ín tsíkjinchekji tí ch'ín Jesús mé koí tjenkákjan ch'án tí jehe sín ntiha. ⁶ A ntá tió kjuátehe ch'ín Jesús kixin jehe ch'án tíha, ntá jehe sín xráchonka sín kjuítsínka sín nonte. ⁷ Ntá xíkjanchankí ch'ín Jesús inaá ntáchro ch'án kixin:

—¿Nkexro xritjéyará? —ichro ch'án.

Ntá xíntáchro sín kixin:

—Tjeyáni tí ch'ín Jesús tsíkjiixín chjasin Nazaret —ichro sín.

⁸ Ntá ntáchro ch'ín Jesús kixin:

—Ó kjuixin tjonkará kixin janhan tíha. Tí xritjéyará tí janhan ntá títōhérá sátsji tí í so sín xríkjan —ichro ch'án.

⁹ Mé xikaha ntáchro ch'ín Jesús kixin ntá tsoxiteyá tí nkehe tsíntáchro ch'án kixin: “Tí sín kjuanjon T'aná la ninkexró kjuintak'itjáyanyha.”*

¹⁰ Ntá ch'ín Simón Pedro kuakitsje ch'án tí chica espada chrinkatoxin ch'án kóchrínjin ch'án tatsjon chjina ijnko ch'ín it'in Malco, mé ijnko ch'ín ch'ehe nchat'á t'etoan xra. ¹¹ Kjánchó ch'ín Jesús ntáche ch'án tí ch'ín Pedro kixin:

—Chr'axenhén tjoje chica espada méḗ. Kjá ntáchrúa kixin tsjasótehyana, kjá ichrúa. Kjánchó T'aná kjuanjon kjuachaxin kixin nchónhya tsjasótēna —ichro ch'án.

Ch'ín Jesús kjuák'e nkayakon tí ch'ín t'etuēnhen tí sín nchat'á
(Mt. 26.57-58; Mr. 14.53-54; Lc. 22.54)

¹² A ntá tí sín soldado la ko tí ch'ín comandante t'etuēnhen sín la ko tí sín policia judío kuente nínko mé itsé sín tí ch'ín Jesús kjuínchenteto sín ch'án.

* 18:9 Juan 17.12

¹³ **A** ntá sákjuíko sín ch'án ntøe ch'ín Anás ich'ee tí ch'ín Caifás mé tí nkexro tsík'áyéhe xra nchat'á t'etøan tí nánó a. ¹⁴ **A** ntá tí ch'ín Caifás, jehe ch'án na mé tí nkexro tsintáche tí sín judío kixin íchá jína kixin jnkokoá chojni chrók'uenyákonhen kaín tí sín chjasén ch'án.†

Ch'ín Pedro kjuínchemá ch'án kixin chóxin ch'án tí ch'ín Jesús
(Mt. 26.69-70; Mr. 14.66-68; Lc. 22.55-57)

¹⁵ Ch'ín Simón Pedro la ko i jnko ch'ín k'uék'ajiko ch'ín Jesús mé kuinkáchréhe sín ch'án. Tí ch'ín ijnko a mé chóxin ch'án tí nchat'á t'etøan. Ntá k'uixenko ch'án tí ch'ín Jesús tí ntasin ntøe tí nchat'á t'etøan. ¹⁶ Kjánchó ch'ín Pedro kuítøhe ch'án ntója ntasin ó. Ntá tí ch'ín ijnko a chóxin tí nchat'á t'etøan mé k'uaxrje ch'án ntasin nixjehe ch'án tí tjan t'ayakonhen tí ntója ntasin chrónøhe ch'án tjan ntá xranjon kjuachaxin ntá k'uixenhen ch'ín Pedro kjaxin. ¹⁷ Na ntá tí tjan t'ayakonhen tí ntója ntasin kjuanchankíhi tjan tí ch'ín Pedro kixin:

—¿Á jahya kjaxin xríkoa tí ch'ín a? —ichro tjan.

Ntá kjuátehe ch'ín Pedro kixin:

—Náhí, janhya —ichro ch'án.

¹⁸ Ntá imá kin ntá tí sín ch'exón xra la ko tí sín policia kjuaka sín xrohi ntaha tjejóxin toté sín tjejóchjixrohe sín. La ko koí ch'ín Pedro tjechjixrohe ch'án ntiha.

Tí nchat'á t'etøan mé kjuanchankíhi ch'án tí ch'ín Jesús
(Mt. 26.59-66; Mr. 14.55-64; Lc. 22.66-71)

¹⁹ Ntá tí nchat'á t'etøan kjuankixin kjuanchankíhi ch'án tí ch'ín Jesús kixin nkexro tí sín k'uájiko ch'án la ko nkehe tí kjuákohe ch'án sín. ²⁰ Ntá kjuátehe ch'ín Jesús ntáchro ch'án kixin:

—Noxín kjuak'é kjuákua, la ntá kaín xín chojni kuínhin sín. Xráxín k'uék'jákoxián kaín xín tí nínko ntsí la ko tí nínko jíé tójnkotséxin kaín xín sín judío. Nínkehó nkehe kjuákohya imó. ²¹ ¿Nkekuénté tjanchankína tí janhan xíkaha? Chrókjuanchankíhi tí sín kuínhin kixin nkexrí kjuákohe sín. Jehe sín mé nohe sín nkehe kjuákohe sín —ichro ch'án.

²² Kjuixin ntáchro ch'ín Jesús tíhi ntá ijnko ch'ín policia kuénte nínko mé tjentaxín ch'án ntiha chjéhe ch'án nkayakon tí ch'ín Jesús ntáchro ch'án kixin:

—¿Á xíkaha jiehe tsjátéhé tí nchat'á t'etøan ní? —ichro ch'án.

²³ Ntá kjuátehe ch'ín Jesús ntáchro ch'án kixin:

—Tí ntoáhya tí nkehe xrjanka ntá chronka nkehe tí ntoáhya. **A** ntá tí ntoá tí nkehe xrjanka, ¿ntá nkekuénté kixin tjatena? —ichro ch'án.

²⁴ Ntá k'uetøan ch'ín Anás kixin tjechróntetoxinhín ch'ín Jesús sátsji ch'án tí tjen ch'ín Caifás tí nchat'á t'etøan.

Ch'ín Pedro xíkjinchemá ch'án inaá kixin chóxin ch'án tí ch'ín Jesús
(Mt. 26.71-75; Mr. 14.69-72; Lc. 22.58-62)

²⁵ Ntá ch'ín Simón Pedro mé naxa tjexin toté ch'án tjechjixrohe ch'án. Ntá kjuanchankíhi sín ch'án kixin:

—¿Á kjaxinhya jaha xríkoa tí nkexro i ní? —ichro sín.

Ntá ch'ín Pedro kjuínchemá ch'án inaá ntáchro ch'án kixin:

—Náhí, janhya —ichro ch'án.

† 18:14 Juan 11.49–50

²⁶ A ntá ijnko ch'ín ch'ehe tí nchat'á t'etōan xra, na mé tí ch'ín a mé naxa kjéhya ch'án tí ch'ín tsíkóchrínjin ch'ín Pedro ntatsjon, na mé kjuanchankí ch'án kixin:

—¿Á jehya jaha tí k'uíkuan tjekoa ch'án tí huerto ní? —ichro ch'án.

²⁷ Ntá ch'ín Pedro xikjinchemá ch'án inaá kixin jehya ch'án, ichro ch'án. Ntá xrinahya tuénxín itsje ijnko kochíntōa.

Ch'ín Jesús kjuák'e nkayakon tí ch'ín Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Ntá k'uaxrjexín sín ntōe ch'ín Caifás, sákjuiko sín ch'ín Jesús tí palacio t'etōanxín tí ch'ín gobernador. Ntá ó kjuankixín k'uínkaséyan kjuíji sín ntiha. A ntá tí sín judío la mé í k'uixenhya sín tí palacio kixin tí xikaha chrók'uixenhen sín tí nchia a la chrókuamá sín tí jiē síin ntiha la í xitjahya sine sín tí kia pascua, ichro sín. ²⁹ A ntá ch'ín Pilato k'uaxrjexín ch'án tí nchia t'etōanxín ch'án kjuanchankíhi ch'án sín kixin:

—¿Nkehe tí jiē chóna tí nkexro í? —ichro ch'án.

³⁰ Ntá kjuátehe sín ntáchro sín kixin:

—Tí chróchóntahya ch'án jiē jié la chrókjuíkōahyani ch'án —ichro sín.

³¹ Ntá k'uetōan ch'ín Pilato kixin:

—Sátjikoará ch'án nchekitōexínrá nkerí jiē chóna ch'án kixin éxí ntáchro tí ley kuéntará —ichro ch'án.

Ntá kjuátehe tí sín judío ntáchro sín kixin:

—Jeheni chojni judíoni la chóntahyani kjuachaxin ts'óyanni ninkexró —ichro sín.

Mé xikaha tsoxiteyá tí nkehe tsíntachro ch'ín Jesús kixin nkexrí ts'enxín ch'án. ³³ Ntá ch'ín Pilato xík'ixenhen ch'án tí nchia t'etōanxín ch'án ntá k'uíyehē ch'án tí ch'ín Jesús kjuanchankíhi ch'án kixin:

—¿Á jaha tí nkexro Rey t'etuēnhen tí sín judío ní? —ichro ch'án.

³⁴ Ntá ntáchro ch'ín Jesús kjuanchankí ch'án kixin:

—Tí nkehe tjanchankíná, ¿á jahyá kjuenkayáxian xikaha, o á í jnko nkexro kjuanchia jiē kixin tí janhan? —ichro ch'án.

³⁵ Ntá kjuátehe ch'ín Pilato ntáchro ch'án kixin:

—¿Á kjanhya janhan tí judío kixin? Tí sín chjasán la ko tí sín nchat'á t'etōan mé kjuikaán sín tí jaha. ¿Xá nkehe kjuich'e kixin? —ichro ch'án.

³⁶ Ntá kjuátehe ch'ín Jesús ntáchro ch'án kixin:

—Tí kjuachaxin chonta janhan jehya kixin chjasintajni chrókuétoan. Náhí. Tí chrókuétoan chjasintajni ntá tí sín xrikian chrókjuikánhyana sín ntihi. Kjánchó tí kjuachaxin chonta janhan jehya kixin chjasintajni chrókuétoan —ichro ch'án.

³⁷ Ntá ntáchro ch'ín Pilato kixin:

—¿Á jaha chaxín ijnko rey? —ichro ch'án.

Ntá kjuátehe ch'ín Jesús ntáchro ch'án kixin:

—Janhan tí rey éxí ntáchrúa jaha. Tí xra ó kokjina la ko tí xra ó k'uinka chjasintajni kixin tsoxrjanka nkehe tí chaxín ntoá. Káin tí sín titekaon tí nkehe chaxín ntoá mé tjejótinjin sín tí nkehe tjákua —ichro ch'án.

³⁸ Ntá ntáchro ch'ín Pilato kixin:

—¿Xá nkehe tí nkehe chaxín ntoá, ichrúa? —ichro ch'án.

Ch'ín Pilato kjuanjon kjuachaxin kixin its'en ch'ín Jesús

(Mt. 27.15-31; Mr. 15.6-20; Lc. 23.13-25)

Ntá kjuixin kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí tjejó tí sin judío nixjehe ch'án sín ntáchro ch'án kixin:

—K'úitjáhya ninkehó jie chóna tí nkexo i. ³⁹ Kjánchó jahará la ó kuánhanrá kixin tí kia pascua tsjánjuan kjuachaxin kixin ts'atjánta ijnko nkexo tjechjina. ¿Á tjinkáonrá kixin ts'atjánta tí ch'ín Rey t'etuenhen tí sín judío? —ichro ch'án.

⁴⁰ Ntá kaín sín k'óyako sín kjuanchia sín kixin:

—Tí ch'ín a la náhí. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

19

¹ Ntá ch'ín Pilato mé k'uetoan ch'án kixin tsjate sín tí ch'ín Jesús. ² Ntá tí sín soldado kjuich'éna sín ntach'í ijnko corona ntá kjuak'enkaya sín ikja tí ch'ín Jesús. La ko kjuínchek'inkaya sín ch'án ijnko ka kjátse tié kixin jehe sín tsjikosáyehe sín ch'án éxí ijnko rey, kjánchó chaxínhya tíha. ³ Ntá kóchjinehe sín tí tjen ch'án ntáchro sín kixin:

—Isé tsjak'e tsétuenhén tí sín judío —ichro sín.

Kjánchó chaxínhya tíha kjuanoá sín ch'án. La ntá tuénxín itja sín kjuatexín sín nkayakon ch'án.

⁴ Ntá ch'ín Pilato k'uaxrjexín ch'án tí nchia t'etoxín ch'án ínaá nixjehe ch'án tí sín tsíkójkotsé ntáchro ch'án kixin:

—Tsjeherá tsakítsjexián ch'án ntihi kixin tsonohará kixin k'úitjáhya janhan ninkehó jie chóna ch'án —ichro ch'ín Pilato.

⁵ Ntá k'uaxrjexín ch'ín Jesús ntiha tjenkaya kja ch'án tí corona tsik'óna ntach'í la ko tjenkaya ch'án tí ka kjátse tié. Ntá ntáchro ch'ín Pilato kixin:

—Tsjeherá, ntihi tjen ch'án —ichro ch'án.

⁶ A ntá tió k'uikon tí sín nchat'á t'etoxan la ko tí sín policía kuènte njnko ntá kjuankixin sín t'óyako sín ntáchro sín kixin:

—¡Tjakénkanirá ch'án ntacruz! ¡Tjakénkanirá ch'an ntacruz! —ichro sín.

Ntá ntáchro ch'ín Pilato kixin:

—Jahará tjikoará ch'án tjaké nkanirá ch'án ntacruz kixin janhan k'úitjáhya ninkehó jie chóna tí jehe ch'án —ichro ch'án.

⁷ Ntá kjuátēhe tí sín judío kixin:

—Jeheni chojni judío mé chóntani ijnko ley t'etoxan kixin chrók'uen ch'án kixin ncheyóhe ch'án asén ch'án kixin Xjeen Dios tí jehe ch'án —ichro sín.

⁸ Ntá tió kuínhin ch'ín Pilato tíha ntá antsí chrakon ch'án ⁹ ntá xík'ixenhen ch'án tí nchia t'etoxín ch'án ínaá kjuanchankíhi ch'án tí ch'ín Jesús kixin:

—¿Nketí k'uinkaxian jaha? —ichro ch'án.

Ntá ch'ín Jesús ninkehó kjuátēhya ch'án.

¹⁰ Ntá ntáchro ch'ín Pilato kixin:

—¿Jaha nkekuènté tjátēhya nkehe tjánchánkíha? ¿Á noahya jaha kixin chonta janhan kjuachaxin tsétoan tsjak'enkania ntacruz la ko kjaxin chonta janhan kjuachaxin tsontáxrjan kixin sátsjia kohya nkehe tsonhan? —ichro ch'án.

¹¹ Ntá kjuátēhe ch'ín Jesús ntáchro ch'án kixin:

—Ninkehó kjuachaxin chróchontahya jaha chrókuétoan chrók'uén o sáchrókjuia tí Dios chrótjáhya tí kjuachaxin. A ntá tí chojni kjuikaána tí tjen jaha la antsí jie jie chóna sín, a ntá jaha la kánhyó —ichro ch'án.

¹² Ntá kuínhin ch'ín Pilato tíhi ntá kjuankíxin ch'án kjueyá ch'án nkexrí chrók'ueṭoan ch'án kíxin sáchrókjui ch'ín Jesús kohya nkehe chrókónhen ch'án. Kjánchó tí sín judío k'óyako sín ntáchro sín kíxin:

—Kja tí tsitohé sátsji ch'án kohya nkehe tsonhen ch'án ntá jaha jnkokoáhya tjenkayáxinkoa tí ch'ín t'etuenhen tí nación kuénténi. Tí nkexro ch'éna asén ch'án éxí ijnko rey mé nínkakonhen ch'án tí ch'ín t'etuenhenni —ichro sín.

¹³ Ntá kuínhin ch'ín Pilato tíhi ntá k'ueṭoan ch'án kíxin tsakitsje sín tí ch'ín Jesús ntója ntá ch'ín Pilato kjuák'etjāxín ch'án tí silla nchekitoexín ch'án jie, mé nkiva hebreo mé it'ín Gabata, mé t'axrjexín kíxin tjat'ò noi jehó xró tsík'óna. ¹⁴ Na mé ó chjina chonkíxin ntá tí tsonjín la mé ó tsjasin sín tí kia pascua. Ntá ch'ín Pilato ntáche ch'án tí sín judío kíxin:

—Ntíhi itjen tí ch'ín rey kuéntará —ichro ch'án.

¹⁵ Kjánchó jehe sín k'óyako sín ntáchro sín kíxin:

—¡Its'en ch'án! ¡Its'en ch'án! ¡Tsjak'enkáni ch'án ntacruz! —ichro sín.

Ntá ntáchro ch'ín Pilato kíxin:

—¿Á tjinkáonrá kíxin janhan chrókjuakénkǎnia ijnko ntacruz tí ch'ín rey kuéntará ní? —ichro ch'án.

Kjánchó tí sín nchat'á t'etṭoan mé kjuátehe sín kíxin:

—Náhi. Chóntahyani í jnko rey, jehó tí ch'ín César —ichro sín.

¹⁶ Ntá ch'ín Pilato kjuanjon ch'án kjuachaxin sátsjiko sín tí ch'ín Jesús tsjak'enkáni sín ch'án ntacruz. Ntá sákjuíko sín ch'án.

Kjuák'enkáni ch'ín Jesús ntacruz

(Mt. 27.32-44; Mr. 15.21-32; Lc. 23.26-43)

¹⁷ Ntá sákjuíko sín tí ch'ín Jesús kuámá ch'án tí ntacruz tsjak'enkáni ch'án. Ntá kjuíjiko sín ch'án ijnko tjo t̄ik̄itexín sín Hueso Kja Chojni. A ntá nkiva hebreo mé t̄ik̄itexín sín Gólgota. ¹⁸ Ntaha mé kjuak'enkáni sín ch'án tí ntacruz. Ntá k̄jāxín yaá sín nánánko k'uéjó jnkojnko sín ntá jnkosiné kjuák'e ch'ín Jesús. ¹⁹ Ntá k'ueṭoan ch'ín Pilato kíxin tsokjin sín ijnko ntachiso tsjak'enkáni sín ikja tí ntacruz ntáchro kíxin: “Ch'ín Jesús kjuixín ch'án chjasin Nazaret, mé tí ch'ín Rey kuénte tí sín judío”, tsixro. ²⁰ A ntá itsjé tí sín judío mé kjuínchekuáxin sín tí letra tsík'óna kíxin chjino tí chjasin Jerusalén tsíkjak'enkáni sín ch'ín Jesús ntacruz la ko iní nkiva tsíkjin sín, na mé ijnko nkiva la hebreo, la ijnko nkiva la griego, la ijnko nkiva la latín. ²¹ Ntá tí sín nchat'á t'etṭoan kuénte tí sín judío mé ntáche sín tí ch'ín Pilato kíxin:

—Chrókjinhya jaha x̄ikaha kíxin jehe ch'án mé tí “Ch'ín Rey kuénte tí sín judío.” Náhi. Íchá jína chrókjian jaha kíxin “Jehe ch'án ntáchro ch'án kíxin jehe ch'án mé tí ch'ín Rey kuénte tí sín judío” —ichro sín.

²² Kjánchó kjuátehe ch'ín Pilato kíxin:

—Tí letra kuéṭoan k'óna la ó k'óna, kjónté x̄ikahó tsitohé —ichro ch'án.

²³ Ntá tí sín soldado tió tsík̄jixín tsík̄jak'enkáni sín tí ch'ín Jesús tí ntacruz ntá kuákja sín tí ké ch'án la k'óxikeyehe sín jnkojnko ka kuákja sín kanoé sín. La ko k̄jāxín kuákja sín tí ka k̄jínjin k'uék'inkáya ch'án. Tí ka mé tsíxronhya ka la me jnkokoá ka tíha. ²⁴ Ntá tí sín soldado kjo sín kichó sín ntáchro sín kíxin:

—Tsótséchéhyani tí ké ch'án. Íchá jína sich'exínni suerte ntá tsotsjeheni siná nkexro ts'áyéhe tí ka.

Mé xikaha xiteyá éxí ntáchro xroon itén Dios tsíkjin sín ósé ntáchro kixin: “Kjuich'exín sín suerte ntá k'óxikayēhe sín kaná.”* Mé xikaha kjuich'e tí sín soldado.

²⁵ A ntá chjino tí ntacruz kjuák'enkání ch'ín Jesús mé kjuák'e tí ñé ch'án la ko tí tjan kichó tjan mé tjan María ichjién ch'ín Cleofas, la ko tí tjan María Magdalena. ²⁶ A ntá tió k'uikon ch'ín Jesús kixin itjen tí ñé ch'án la ko chjino tjen tí ch'ín antsí tjuéhé ch'án k'uék'ajiko ch'án, ntá nixjehé ch'án tí ñé ch'án, ntáchro ch'án kixin:

—Naná, tsjehé kixin ntaha tjen xjaan —ichro ch'án.

²⁷ Ntá nixjehé ch'ín Jesús tí ch'ín a ntáchro ch'án kixin:

—Tsjehe kixin ntaha itjen ñá —ichro ch'án.

A ntá tí ch'ín a mé k'uáyéhe ch'án tí tjan a sákjuiko ch'án tjan ntøe ch'án k'óna éxí ñé ch'án xikaha.

Ik'uén ch'ín Jesús

(Mt. 27.45-56; Mr. 15.33-41; Lc. 23.44-49)

²⁸ Ntá ó nohe ch'ín Jesús kixin kaín xra ó kjuixin xiteyá ntá tjinkaon ch'án kixin tsoxiteyá kaín nkehe ntáchro tí xroon tsíkjin sín ósé ntá xikaha ntáchro ch'án kixin:

—Ik'uén ntá.

²⁹ Ntá ntiha tjen ijnko nchésen tsíkaón xranvino sán ntá kjuínchekjataxín sín ijnko ka tí xranvino, a ntá tí ka a kjuak'ekjen sín ijnko nta kijnjin, ntá kjuínchechrín sín tí tjen ir'va ch'án. ³⁰ Ntá ik'uí ch'ín Jesús tí xranvino sán ntá ntáchro ch'án kixin:

—Ó kjuixin xiteyá kaín xín nkehe —ichro ch'án.

Ntá k'uísén kja ch'án ntá ó kjuixin k'uén ch'án.

Ijnko soldado chr'áte ch'án chica yo tí chjia ch'ín Jesús

³¹ A ntá xikaha yaon ntóye mé tí yaon kia pascua ntá tí sín judío tjinkakonhya sín kixin tí cuerpo kuènte tí sín tsík'en naxa ts'ejóyáni tí ntacruz tí yaon t'ok'éhe sín kixin tí yaon pascua mé ijnko yaon imá jié, ichro sín. Mé xikaha kjuanchehe sín tí ch'ín Pilato kixin ts'etøan ch'án kixin tsochjenjin toté tí sín tjejóyáni tí ntacruz la ko ts'inkajin tí cuerpo kuènte tí sín tsík'en. ³² Ntá tí sín soldado sákjuí sín k'óchjenjin sín tí toté tí ch'ín saoxín tjen la ko k'óchjenjin sín tí toté tí ch'ín tjen nánko a tjejóyáni sín tí ntacruz tí tjen ch'ín Jesús. ³³ Ntá kjuíji sín tí tjen ch'ín Jesús ntá k'uikon sín kixin ó tsíkjin tsík'en ch'án, ntá í k'óchjenjinhya sín toté ch'án.

³⁴ A ntá ijnko ch'ín soldado mé chr'áte ch'án chica yo tí chjia tí ch'ín Jesús ntá tuénxín k'uaxrje jni la ko ñntá. ³⁵ A ntá janhan mé tjéjkjan tí xroon í mé kjuak'é ntiha k'uikuán kixin xikaha kónhen ntá ntoá tjéxrjanka kixin jahará kjaxinrá chrókuítekáonrá. ³⁶ Mé xikaha kónhen tíha kixin tsoxiteyá tí nkehe ntáchro xroon itén Dios tsíkjin sín ntáchro kixin: “K'óchjenjinhya sín ninkehó huésøe ch'án.”† ³⁷ Kjaxin itjen íjnko nketí nixja tí xroon itén Dios tsíkjin sín ósé ntáchro kixin: “Tsokomá sín tí nkexro tsíchr'áte sín chica.”‡

Xravá ch'ín Jesús

(Mt. 27.57-61; Mr. 15.42-47; Lc. 23.50-56)

³⁸ Ntá ó kjuixin kónhen kaín tíha ntá ch'ín José, mé ijnko ch'ín kjuixin chjasin Arimatea, mé kjuanchehe ch'án tí ch'ín Pilato kjuachaxin kixin tsjinkajinxín ch'án tí ntacruz tí cuerpo kuènte ch'ín Jesús sátsjiko ch'án tsjavá ch'án. Jehé ch'án imó kuínkáchónki ch'án tí ch'ín Jesús kixin

* 19:24 Salmo 22.18 † 19:36 Salmo 34.20 ‡ 19:37 Zacarías 12.10

chrakonhen ch'án tí sín judío. Ntá ch'ín Pilato mé kjuanjon ch'án kjuachaxin ntá sákjuiko ch'ín José tí cuerpo kuènte ch'ín Jesús. ³⁹ Kjaxin ch'ín Nicodemo, tí ch'ín kjuínixjehé tí ch'ín Jesús ijnko tie a mé kjui ch'án kjuikao ch'án treinta kilo xroan xraxé tjiko xroan mirra la ko xroan áloes. ⁴⁰ Mé xikaha ch'ín José la ko ch'ín Nicodemo k'uáyéhe sín tí cuerpo kuènte ch'ín Jesús kjuínchek'ísímá sín ijnko ka kjínjin tsíka tí xroan xraxé a kixin xikaha k'uékinkáchónki tí sín judío k'uékjavá sín chojni tsík'en. ⁴¹ Tí kjuák'enkáni ch'ín Jesús ntacruz ntá chjinaxón ntiha tjen ijnko huerto itjen ijnko tòye nixin naxa ninkexró tsíxráváhya ntiha. ⁴² Ntaha kjuavá sín tí ch'ín Jesús kixin chjinaxón tjen tí tòye a la ko í séhya tsoxrankíxin tí yaon t'ok'éhe tí sín judío.

20

La ntá ó tsíxechón ch'ín Jesús

(Mt. 28.1-10; Mr. 16.1-8; Lc. 24.1-12)

¹ A ntá tí yaon xrankíxixin semana ntá tí tjan María Magdalena naxa sítie sákjuí tjan tí tjen tí tòye, ntá k'uíkon tjan kixin ó tsíkjiin tí xro tsík'íkjàxin tí tòye a. ² Ntá kuinká tjan sákjuí tjan tí tjen tí ch'ín Simón Pedro la ko tí ch'ín í jnko, mé tí nkexro imá k'uétjuèhe ch'ín Jesús, ntá ntáchro tjan kixin:

—Ó tsíkakitsjéxin sín tòye tí cuerpo kuènte Ìnchéni ntá noehyani nketí tsíkjak'e sín —ichro tjan.

³ Ntá ch'ín Pedro la ko tí ch'ín í jnko mé kuínhin sín xikaha ntá sákjuí sín tí tjen tí tòye a. ⁴ Ntá yóí sín kuinká sín sákjuiko kichó sín. Kjánchó tí ch'ín í jnko antsí tjan kuinká ch'án ntá kánhyó tjan kuinká ch'ín Pedro, ntá tí ch'ín í jnko senó ch'án kjuíji ch'án tí tjen tí tòye a. ⁵ K'uísén ch'án tsjehe ch'án nkaxenhen tí tòye a. A tí ka tsík'ísímá ch'ín Jesús mé naxa tjejó k'uíkon ch'án, kjánchó jehe ch'án k'uíxenhya ch'án tí tòye a. ⁶ Ntá kjónté chr'éxin kjuíji ch'ín Simón Pedro ntá k'uíxenhén ch'án tí tòye a. Ntá kjaxin k'uíkon ch'án kixin tjejó tí ka tsík'ísímá ch'ín Jesús ⁷ la ko k'uíkon ch'án tí ka tsík'ísímá ikja ch'án na mé tí ka tsíxrèya ka la ókjé tjen ka, a ntá tí í so ka na mé ókjé tjejó ka kjaxin. ⁸ Na ntá tí ch'ín í jnko k'uék'ajjiko ch'ín Jesús, mé tí ch'ín tsíkjií senó na kjaxin k'uíxenhén ch'án tí tòye ntá k'uíkon ch'án tí nkehe tsíkónhen ntá kuítekaon ch'án. ⁹ Kixin naxa k'uékiénxínhya sín tí nkehe k'uéchrónka xroon itén Dios kixin t'ichjánxin tsoxechón tí ch'ín Jesús. ¹⁰ A ntá tí sín sátsíkjiítsjehe tòye la xíkjan sín ntøe sín.

Titàya k'uikuèn tjan María Magdalena tí ch'ín Jesús

(Mr. 16.9-11)

¹¹ Ntá tjan María mé ntahó kuitohe tjan ntója tí tòye tsjánka tjan. Naxa tsjánka tjan k'uísén tjan tsjehe tjan nkaxenhen tí tòye ¹² ntá xrínahya k'uíkon tjan yaá sín ángel tjejóyá sín ka tjóá tjejótjaxin sín tí tsíkjak'e tí cuerpo kuènte ch'ín Jesús na mé ijnko ch'ín ángel na mé tjen ch'án tí tsíkjak'e ikja ch'ín Jesús la ko tí í jnko a itjen ch'án tí tsík'ejó toté ch'án. ¹³ A ntá tí sín ángel mé kjuanchankí sín kixin:

—Naná, ¿kuènte tsjánka? —ichro sín.

Ntá kjuátehe tjan ntáchro tjan kixin:

—Sátsíkjií sín Ìnchéni, ntá nonahya nketí tsíkjak'e sín ch'án —ichro tjan.

¹⁴ Kjuixin ntáchro tjan tíha ntá kuinkátjía tjan ntá k'uíkon tjan kixin itjen ch'ín Jesús, kjánchó kjuátsoanhya tjan kixin jehe ch'án. ¹⁵ Ntá ch'ín Jesús kjuanchankíhi ch'án tjan ntáchro ch'án kixin:

—Naná, ¿nkekuénté tsjanka? ¿Nkexro tjejá? —ichro ch'án.

Ḃ ntá jehe tjan kjuenkayáxin tjan kixin jehe ch'án mé t'ayakonhen ch'án tí huerto, a ntá ntáchro tjan kixin:

—Kja tí jaha sákjuíkoa ch'án ntá jie chrónka nketí sákjuíkoa ch'án kixin janhan sátsjikian ch'án jie —ichro tjan.

¹⁶ Ntá ch'ín Jesús mé nixjehe ch'án tjan ntáchro ch'án kixin:

—¡María! —ichro ch'án.

Ntá kuinkátjía tjan ntá nixjaxin tjan nkíva hebreo ntáchro tjan kixin:

—¡Raboni! —ichro tjan. Tíha mé t'axrjexín kixin Maestro.

¹⁷ Ntá ntáchro ch'ín Jesús kixin:

—Tatjántana kixin naxá sátsjihya janhan tí tjen T'aná. Sátjia tjítsjehé tí sín kichiná chénka sín kixin sátsjiyá tí tjen T'aná na mé kjaxin It'ará tí jahará na mé Dios kuéntana la ko kjaxin Dios kuéntará —ichro ch'án.

¹⁸ Ntá tí tjan María Magdalena sákjuíchénta tjan tí sín k'uék'ajiko ch'ín Jesús chrónka tjan kixin xikaha tsík'ikon tjan Ìnchéni. La ko kjaxin chrónka tjan kixin xikaha tsintáchro ch'án.

Tí sín k'uék'ajiko ch'ín Jesús titàya k'uíkuèn sín ch'án

(Mt. 28.16-20; Mr. 16.14-18; Lc. 24.36-49)

¹⁹ Ḃ ntá ó kónjín tí yaon a mé tí yaon xrankíxixin semana, a ntá tí sín k'uék'ajiko ch'ín Jesús jnkokoá kójnkotsé sín nkaxenhen nchia tsík'ikjehe sín ntója nchia jína kixin chrakonhen sín tí sín judío. Ntá xríñahya titàya kónohe sín k'uíkon sín kixin jnkosiné tí tjejó sín itjen ch'ín Jesús, ntá nixjehe ch'án kjuajna tí sín k'uék'ajiko ch'án ntáchro ch'án kixin:

—Jína tjejorá —ichro ch'án.

²⁰ Ntá kjuixin ntáchro ch'án tíhi ntá kjuako ch'án itja ch'án la ko chjia ch'án. Ntá kóchéhe tí sín k'uék'ajiko ch'án kixin k'uíkon sín Ìnchéni. ²¹ Ntá ntáchro ch'ín Jesús inaá kixin:

—Kjuaxróxin ts'ejorá. Yóhe T'aná k'uetuanna k'uinka, a ntá jie la janhan tétuanhan tí jahará —ichro ch'án.

²² Ntá k'uánote ch'án tí jehe sín ntáchro ch'án kixin:

—T'ayéhérá Nchakuen Dios. ²³ Tí ts'itjáyannahrá tí jie kjuasin jnkojín chojni ntá xikaha tsjìn tí ijie sín. Ntá tí ts'itjáyanyhará tí jie kjuasin jnkojín chojni ntá naxá kjuinhya tí ijie sín —ichro ch'án.

Ch'ín Tomás k'uíkon ch'án kixin tsíxechón Ìnchéni

²⁴ Ḃ ntá tí ch'ín Tomás, ijnko tí teyóxin sín k'uék'ajiko ch'ín Jesús mé kjaxin tikítexin sín ch'ín Nóhé mé kohya ch'án tí kui ch'ín Jesús. ²⁵ Ntá chr'éxin tí í so sín k'uék'ajiko ch'ín Jesús ntáche sín ch'án kixin:

—Ó k'uíkonni Ìnchéni —ichro sín.

Kjánchó ntáchro ch'ín Tomás kixin:

—Tí ts'íkónhya janhan tí tsíkjiatexín chica clavo itja ch'án la ko tsochr'ánxianhya dedo tjaná ntiha la ko tí tsochr'ánxianhya tjaná tí chjia ch'án, ¿na mé nkexrí chrókuítekavan? —ichro ch'án.

²⁶ Ḃ ntá tí k'uátsínka ijnko semana ntá jnkokoá kójnkotsé sín nkaxenhen nchia la ko kjaxin kjuák'eko sín ch'ín Tomás. Tsík'ikjehe sín ntója nchia jína ntá xríñahya titàya kónohe sín k'uíkon sín kixin jnkosiné tí tjejó sín itjen

ch'ín Jesús, ntá nixjehe ch'án tí jehe sín k'uék'ajiko ch'án ntáchro ch'án kixin:

—Kjuaxróxin ts'ejorá —ichro ch'án.

²⁷ Ntá ntáche ch'án tí ch'ín Tomás kixin:

—Chr'axénhén dedo tjá tí tsíkjiatexín chica clavo tjaná la ko xrákoa tjá chr'axénhén chjiana. Chróntáchrohya kixin chaxínhya. Tsítekávan kixin chaxín —ichro ch'án.

²⁸ Ntá kjuátehe ch'ín Tomás ntáchro ch'án kixin:

—j'ínchéni jaha la ko Dios kuéntana! —ichro ch'án.

²⁹ Ntá ntáche ch'ín Jesús tí ch'ín Tomás kixin:

—Jaha Tomás k'uikonjian ntá kuítekávan. Ntá antsí náxrjón tjejó tí sín kjónté k'uikonhya la titekaon sín —ichro ch'án.

Tíhi mé chrónka nkekuente tsikjin ch'ín Juan tí xroon i

³⁰ Ch'ín Jesús kjuasin ch'án itsjé í so kjuaxroan náxrjón k'uikon tí sín k'uájiko ch'án kjónté chrónkahya tí xroon i kixin xikaha kónhen. ³¹ Tí nkehe chrónka tí xroon i ikjian janhan kixin chrókuítekáonrá jahará kixin Jesús mé tí Cristo, mé tí Xjeen Dios kixin ntá kaín ni chróchóntani kjuachón jnkochrín kixin chrókuítekaonni ch'án.

21

Yato tí sín k'uék'ajiko ch'ín Jesús xrínahya titàya k'uikon sín ch'án

¹ A ntá chr'éxin tí sín k'uék'ajiko ch'ín Jesús titàya xík'ikon sín tí jehe ch'án inaá chrínta ntayaon Tiberias. Mé xikaha kónhen ² kixin jnkokoá k'uéjó sín ch'ín Simón Pedro la ko ch'ín Tomás, me tí ch'ín tikítexín sín ch'ín Nóhé, la ko ch'ín Natanael kuixin ch'án chjasin Caná estado Galilea, la ko tí yaá xjeen ch'ín Zebedeo la ko tí yaá sín inaá k'uék'ajiko ch'ín Jesús.

³ Ntá ntáchro ch'ín Simón Pedro kixin:

—Sátsjitse koche —ichro ch'án.

Ntá kjuátehe sín kixin:

—Koíni sátsjikoani —ichro sín.

Ntá sákjuí sín k'uit'ótjen sín ijnko ntabarco. Kjánchó ninkehó koche tséhya sín kuenté tie. ⁴ A ntá ó chjina ts'inkaséyan ntá xrínahya titàya k'uikon sín itjen ch'ín Jesús chrínta ntayaon, kjánchó kjuátsoanhya tí sín k'uék'ajiko ch'án kixin jehe ch'án. ⁵ Ntá kjuanchankíhi ch'án sín kixin:

—Jahará ntasoá, ¿á naxa ninkehó koche tsehyará? —ichro ch'án.

Ntá kjuátehe sín ntáchro sín kixin:

—Naxa ninkehó ko tséhyani —ichro sín.

⁶ Ntá ch'ín Jesús ntáche ch'án sín kixin:

—Itérá tí nchísén tí nánko chjia chjina tí ntabarco la tsotserá va —ichro ch'án.

Ntá xikaha kjuích'e sín k'ue sín nchísén ntá í tjachahya sín tsakit-sjenkixin sín ntá tí nchísén kixin nchónhya koche tjinká. ⁷ A ntá tí ch'ín antsí tjuèhe ch'ín Jesús mé ntáche ch'án tí ch'ín Pedro kixin:

—j'ínchéni tí méhe! —ichro ch'án.

Ntá kuínhin ch'ín Simón Pedro kixin j'ínchéni tíha ntá k'uinkáya ch'án iké ch'án inaá (kixin tsíkakitsje ch'án iké ch'án) ntá kjuíankí ch'án ntá. ⁸ Tí í so sín k'uék'ajiko ch'ín Jesús mé kjuíji sín tí chrínta ntayaon kjuikao sín tí ntabarco tinkánkákjéntóxin tí nchísén tjinká koche chrítaon ntá kixin ijnko ciento metro kjínxin tí chrínta ntá k'uéjó sín. ⁹ Ntá kjuíji sín chrínta ntá ntá k'uínkajinxín sín tí ntabarco ntá k'uikon sín tjeche xrohi síxènkí xrinta

ntá chrítaon tí xrinta tjekjen ijnko koche la ko nánko siín niotjã. ¹⁰ Ntá kjuanchia ch'ín Jesús ntáchro ch'an kixin:

—Xrákoará iso koche tsítserá nantá —ichro ch'án.

¹¹ Ntá ch'ín Simón Pedro k'uit'ótjen ch'án tí ntábárcõ kuákja ch'án tí nchísén kuinkánkákjen ch'án xrákao ch'án tí nchísén tjinká koche iye na mé ijnko ciento cincuenta y tres va. Ntá kjónté nchónhya va la k'uichjehya tí nchísén a. ¹² Ntá ntáchro ch'ín Jesús kixin:

—Xrákirá, interá —ichro ch'án.

A ntá nijnko tí sín k'uék'ajiko ch'án chrókjuanchankíhi sín ch'án kixin nkexro tí jehe ch'án kixin ó kjuátsoan sín kixin Ìnchéni tíha. ¹³ Ntá kóchjina ch'ín Jesús kuákja ch'án tí niotjã chjéhe ch'án tí jehe sín la ko xíkaha xíkjanjon ch'án tí koche.

¹⁴ Tíhi mé níxin k'uikon tí sín k'uék'ajiko ch'ín Jesús kixin tsíxechón ch'án.*

Ch'ín Jesús itjo ch'án tí ch'ín Simón Pedro

¹⁵ Kjuixin kjóne sín ntá kjuanchankíhi ch'ín Jesús tí ch'ín Simón Pedro kixin:

—Jaha Simón, xjeen Jonás, ¿á antsí tjuana jaha, a ntá tí í so la kánhyó? —ichro ch'án.

Ntá kjuáttehe ch'ín Pedro ntáchro ch'án kixin:

—Jeén, Ìnchéni, ó noha kixin tjinkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha la t'ayakonhén tí kolélo kuèntana —ichro ch'án.

¹⁶ Ntá yóxin kjuanchankí ch'ín Jesús inaá kixin:

—Jaha Simón, xjeen Jonás, ¿á tjuana jaha? —ichro ch'án.

Ntá kjuáttehe ch'ín Pedro ntáchro ch'án kixin:

—Jeén, Ìnchéni, ó noha kixin tjinkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha la t'ayakonhén tí kolélo kuèntana —ichro ch'án.

¹⁷ Ntá níxin kjuanchankí ch'ín Jesús kixin:

—Jaha Simón, xjeen Jonás, ¿á tjinkavan tí janhan? —ichro ch'án.

A ntá k'uává ch'ín Pedro kixin níxin kjuanchankí ch'ín Jesús kixin á tjinkaon ch'án tí jehe ch'án ntá ntáchro ch'án kixin:

—Jaha Ìnchéni, ó noha káin xín nkehe. Ó noha kixin tjinkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha t'ayakonhén tí kolélo kuèntana. ¹⁸ Ntá ijnko nkehe chaxín tjétjonka kixin tí naxã k'uéntasoyá jaha k'uék'inkaya ká jahvá la ko k'uékjia tí k'uékóxrjínhan jaha. A ntá tíó tsotáda jaha ntá tsjéntoá tjá ntá í jnko nkexro sintak'inkáya ka la ko sátsjioa sín tí tóxrjíanhya sáchrókjuia —ichro ch'án.

¹⁹ A ntá tíhi mé chrónkaxín ch'ín Jesús kixin nkexrí ts'enxín ch'ín Pedro na mé t'axrjexín nkexrí tsochjéhe ch'án Dios kjuasáya. Ntá kjuixin ntáchro ch'ín Jesús kixin:

—Chréhé tí janhan —ichro ch'án.

Nkehe tsonhen tí ch'ín antsí tjuèhe ch'ín Jesús

²⁰ Ntá kuinkátjía ch'ín Pedro ntá k'uikon ch'án kixin tinkáchréhe tí ch'ín antsí tjuèhe ch'ín Jesús, na mé tí nkexro kjuák'e chjinaxón tí kjuák'e ch'ín

* 21:14 Juan 20.19,26

Jesús tí kjóne sín tsíkjančankíhi ch'án tí ch'ín Jesús kixin nkexro sinčekji ch'án.† ²¹ Ntá ch'ín Pedro k'uikon ch'án kixin tinkáchréhe tí ch'ín a ntá kjuanchankíhi ch'án tí ch'ín Jesús kixin:

—Ínchéni, ǵa ntá tí ch'ín i la nkehe tsonhen ch'án a? —ichro ch'án.

²² Ntá kjuátehe ch'ín Jesús kixin:

—Tí tjínkavan naxa chrókjuak'echón ch'án tí chrókjan la jaha la chrókjuiatéhya tíha. Ntá jaha la chréhe tí janhan —ichro ch'án.

²³ Ntá kjuankixin kjo tí sín k'uék'ajiko ch'ín Jesús kixin ts'enhya tí ch'ín a. Ntá jehya kixin ntáchro ch'ín Jesús kixin chrók'uenhya tí ch'ín a. Náhí. Ó jehí ntáchro ch'án kixin tí tjínkaon ch'án naxa chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsonhen í jnko chojni.

²⁴ A ntá tí nkexro a mé tí nkexro chrónka kixin chaxín kónhen kaín tíha la ko ikjin ch'án tí xroon i. Ntá ó noheni kixin tí nkehe tsíkjin ch'án la chaxín ntoá tíha.

²⁵ Naxa siín nchónhya nkehe kjuakoxin ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kixin kjá chrókjuachahya tí chjasintajni chrók'uinka kaín tí xroon chrók'óna xikaha. Amén. Ó tjen.

† 21:20 Juan 13.25

Tí xrā kjuích'e tí sín kjueyá ch'ín Jesús

Itsi Nchakuen Dios

¹ Tjuǵha jaha Teófilo na tí libro saoxín mé kjiǵn kaín nkehe kjuako ch'ín Jesús la ko tí xrā kjuích'e ch'án tí xrankíxixín ² hasta tí yaon sákjui ch'án nkaya nkajní. Ā ntá ti naxā sákjuihya ch'án nkajní la kjueyá ch'an tí sín sich'ehe ch'án xrā la ntá tí Nchakuen Dios mé kjuínkítsa ch'án ntá nixjehe ch'án sín la k'uetuēnhen ch'án sín kixin tsonohe sín nkehe tí xrā chrókjuich'e sín. ³ Tió kjuixin k'uén ch'án ntá kónoxín kixin tjechón ch'án, k'uikon tí jehe sín la ko cuarenta yaon mé k'uikon sín ch'án jnkoyaxón. Itsjé nkehe kjuakoxin ch'án kixin tsonoexín sín kixin chaxín tjechón ch'án la ko kjuako ch'án nkexrí tí kjuachaxin kuente Dios.

⁴ Ti naxā kójnkotséko ch'án tí sín k'uájiko ch'án la jehe ch'án mé k'uetuēnhen ch'án sín kixin naxā sátsjixinhya sín tí chjasin Jerusalén. Chrónka ch'án kixin:

—Chróchonhénrá ntiho chrók'uayéhérá tí nkehe tsjanjon T'aná, me tí nkehe kuinhínrá xrxanka janhan. ⁵ Ā ntá chaxín ch'ín Juan ìntá ó kuíkítexín ch'án chojni. Ā ntá ijie kánhyó itsjé yaon ntá jahará la Nchakuen Dios la tsikitiaxínrá.

Sákjui ch'ín Jesús nkaya nkajní

⁶ Ntá ti naxā kójnkotséko sín ch'ín Jesús, kjuanchankíhi sín ch'án kixin:

—Jaha Ìnchéni, ¿á tsjánjonhya kjuachaxin jaí ts'etōanni chjasénni Israel inaá? —ichro sín.

⁷ Ntá kjuátehe ch'ín Jesús kixin:

—Náhi. Chontahyará kjuachaxin tsonohará nkesá tsonhen tíha. Jehó T'aná chóna kjuachaxin ts'etōan tíha. ⁸ Ntá itsi tí Nchakuen Dios ntá ts'ayéhérá kjuachaxin sátsjichronkará nkehe tí xrā kjuít'a, mé sátsjirá tsjákohérá kaín sín chjasin Jerusalén, la ko estado Judea, la ko estado Samaria, la ko kuenté chjasintajni.

⁹ Ntá kjuixin nixja ch'ín Jesús ntá xríñahya tinkák'it'ótjen ch'án sákjui ch'án la tjejótsjehe sín. Sákjui ch'án hasta kjuák'enkákjan ch'án ijnko tjuí. Ntá í t'ikonhya sín nkerí kjuíji ch'án. ¹⁰ Ntá naxā tjejókonta sín tí sákjui ch'ín Jesús nkajní, ā ntá xríñahya titàya k'uikuén sín yaá chojni ntoa tjejóyá sín ka tjóá tjejó sín chjinaxón tí tjejó tí jehe sín. ¹¹ Ntá tí sín a mé ntáchro sín kixin:

—Jahará chojni kjuíxinrá estado Galilea, ¿nkehe tsonhen naxā kontará nkajní? Xíkaha tjejokontará sákjui Jesús la ko mé xíkaha xiki ch'án inaá —ichro sín.

Xreyá ch'ín Matías tsjiatéhe lùké ch'ín Judas

¹² Na ntá kjanxin sín tí jñá it'in Olivo na ikjan sín chjasin Jerusalén. Tíha a mé kjinhyó tjen kixin ó xíkahó k'uetōan tí ley sátsji sín tí yaon t'ok'éhe sín. ¹³ Na ntá kjuíji sín tí chjasin ntiha ntá k'uit'ótjen sín tí yóxin piso tí nchia tsíkjen sín k'uék'ejó sín. Mé ntiha tjen ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxin ch'ín Jacobo, mé it'é ch'án it'in Alfeo, la ko ch'ín Simón, mé tí ch'ín a mé kuente tí partido cananista, la ko kjaxin ch'ín Judas, savé ch'án mé it'in Jacobo. ¹⁴ Kaín sín kójnkotsé

sín ntiha tsonixjehe sín Dios la ko k'uéjoko sín tí kichó tí ch'ín Jesús la ko tí tjan María, iné ch'án, la ko iso chojni chjin.

¹⁵ Ntá tí yaon a tí ch'ín Pedro k'uínkatjen ch'án kjuák'exín toté ch'án jnkosiné tí tjejó tí sín tinkáchónki Ìnchéni mé ijnko ciento ikán chojni mé tsíkójnkotsé ntiha. Ntá ntáchro ch'án kixin:

¹⁶ —Kíchóni, t'ichjánxin tsoxiteyá éxí nixja xroon itén Dios éxí tsínixja ch'ín David tsíchronka Nchakuen Dios nkehe sich'e ch'ín Judas. Tí ch'ín Judas mé kjuikao ch'án tí sín tsotsé ch'ín Jesús. ¹⁷ Jehé ch'án mé kjaxin k'uék'ajikoni la jnkokón xra k'uáyèkoni ch'án. ¹⁸ A ntá jehe ch'án mé sákjuik'énaxin ch'án ijnko nonte tí chichaon kjuacha ch'án kixin tí jie kjuasin ch'án. Ntá k'uánótjen ch'án la ikja ch'án k'uitja nonte la xitjehe tsee ch'án k'uaxrje kaín sintandé ch'án. ¹⁹ Ntá xikaha kónohe kaín tí sín chjasin Jerusalén ntá tí nonte kjuínchek'in sín nkívee sín Acéldama mé t'axrjexín kixin ijnko nonte siín ijní. ²⁰ Tí xroon Salmo mé nixja xikihí: Tsitohe ntoé ch'án a, la kóhya nkexro ts'ejó ntiha.

La ko kjaxin ntáchro kixin:

Íjnko nkexro ts'áyéhe tí xra kuènte ch'án.*

Mé xikaha tsíkjin ch'ín David.

²¹ Tí tjejóni ntihi la siín chojni ó k'uájikoni xráxín tí k'uék'ajikoni Ìnchéni Jesús ²² desde k'uíkonni nkexrí kuíkite ch'ín Juan tí jehe ch'án la ko hasta k'uíkonni sákjuí ch'án nkaya nkajní. Ntá ijie t'ichjánxin tsoxreyá jnkójín tí sín a tsojnkotsékoni sín kixin kjaxin tsochrónka sín kixin chaxín xechón Ìnchéni Jesús —mé xikaha chrónka ch'ín Pedro.

²³ Ntá kjuenkayáxin sín tsonoxín yaá chojni mé tí ch'ín José, t'ikon ch'án Barsabás la ko Justo, la ko kjaxin í jnko ch'án it'in Matías. ²⁴ Ntá nixjehe sín Dios la ntáchro sín kixin:

—Ìnchéni jaha mé choxian asén kaín chojni. Tjákohéni nkexro tsonhen tocar xra tí yaá tí nkexro í kónoxín ²⁵ tsjiatéhe xra apóstol kuènte ch'ín Judas. A ntá tí ch'ín Judas mé kuítohe ch'án tí xra kixin kjuasin ch'án ijie la ntá ijie sákjuí ch'án tjetjasóte ch'án —ichro sín.

²⁶ Ntá kjuích'e sín suerte ntá xríñahya kónhen tocar tí ch'ín Matías, ntá tuénxín tí hora a kuákja ch'án xra k'uéjoko ch'án tí tejnko tí sín kjueya Ìnchéni.

2

Ó kui Nchakuen Dios

¹ Ntá ó kui tí yaon kia Pentecostés ntá kaín tí sín tinkáchónki Jesús mé kójnkotsé sín jnkokoá tjejó sín. ² Xríñahya kuínhin sín ijnko tóvéntó kuixín nkajní. Tí tóvéntó mé éxí ijnko xrinto fuerte chjehe. Kuenté tí nchia tjejóxehen sín mé kóvéntó kjaxin. ³ Ntá xríñahya k'uíkon sín nkehe éxí xrohi nene tsjehe. Ntá tíha xikayehe la k'uéjókjen jnkójnko kja tí jehe sín. ⁴ Na ntá kaín sín k'uáyéhe sín tí Nchakuen Dios ntá kjuankíxin sín nixja sín í jnko nkíva kixin Nchakuen Dios kjuínkítsa sín nixja sín.

⁵ A ntá tí yaon a la tí chjasin Jerusalén k'uéjó chojni judío tjinkaon sín sinchexiteyéhe sín tí nkehe tinkáchónki sín, mé tsíkjin sín nkuixín chjasintajni. ⁶ A ntá jehe sín mé tsíkinhin sín tí tóvéntó ntá tsíkóhijina nchónhya chojni. Ntá í noehya sín nkehe chrókjuenkayáxin sín kixin

* 1:20 Salmos 69.25; 109.8

jnkojnko tí jehe sín mé kuínhin sín kixin nixja tí sín a jnkojnko nkívee sín.
 7 Ntá síxranka sín, chrakon sín ntá jehe sín mé tjo sín kichó sín kixin:

—¿Á jehya kaín tí sín tjejónixja mé tsíkjixín sín estado Galilea? ⁸ La çnkekuènté tjejótinhinni kixin nixja sín jnkojnko nkíveeni? ⁹ Kixin ntihi mé síin chojni tsíkjixín chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia, ¹⁰ la ko Frigia, la ko Panfilia, la ko Egipto la ko nkuíxín Africa antsí nó ntaha Cirene. La ko kjaxin chojni romano tjejó ntihi. Iso tí sín a mé chaxín tsíkokjixén judío, la í so la tinkáchónki sín Dios éxi tí sín judío xíkaha. ¹¹ La kjaxin síin chojni tsíkjixín Creta, la ko Arabia. Mé xíkaha kaín ni tsíkjixinni tí chjasin a mé tsíkinhinni tjejónixja tí sín a tí kjuaxroan kuènte Dios jnkojnko nkíveeni —mé xíkaha ichro sín.

¹² Ntá tóxakonhen kaín sín la chrakon sín ntá kjuanchankíhi kichó sín kixin:

—¿Nkehe t'axrjexín kaín tíha? —ichro sín.

¹³ A ntá iso sín kjuanoá sín ntáchro sín kixin:

—Tsékoan tí sín a —ichro sín.

A ntá ch'ín Pedro chénka tí sín síin

¹⁴ Ntá jehe ch'ín Pedro mé k'uínkatjen ch'án, kjuák'exín toté ch'án la ko tí tejnko sín apóstol mé k'uínkatjen sín la ntá ch'ín Pedro mé itsen nixja ch'án. Ntáchro ch'án kixin:

—Jahará chojni judío la ko jahará tjejorá chjasin Jerusalén. Kaínrá tjejorá tinhínrá tí nkehe tsoxrjanka. ¹⁵ Tí sín tjejó ntihi la jehya tsékoan sín éxi ntáchrórá, kixin na ntá las nueve nchítjen la kohya nkexro tsékoan. ¹⁶ Tíhi mé tsíchrónka ch'ín profeta Joel:

¹⁷ Ntáchro Dios kixin: Itsi ijnko yaon tsjixixín

ntá tsochr'an Nchakuenná ntá ts'áyéhe chojni.

Ntá tí xjaanrá ntoa la ko tí xjaanrá chjin mé tsonixja tan kuèntana.

La ko tí sín ntasoá mé titàya ts'íkuèn sín tí nkehe tsjákoḡa sín.

La ko tí sín ó tada la kotáchrién sín ts'íkonxín sín kixin nkexrí tjinkaon Dios.

¹⁸ Tí yaon tsonhen kaín tíha la tsochr'an tí Nchakuenná ts'áyéhe kaín tí síntoa ch'ena xra la ko tí síchjin kjaxin

la tsochrónka sín tanná.

¹⁹ Ntá janhan mé tsjákoxiḡan ijnko kjuachrakon nkajní.

A ntá chjasintajni tsjákoxiḡan kjuaxroan:

mé ts'ixín ijnḡi la ko xrohi la ko itjuḡ tsík'óna ihnchi.

²⁰ Mé tí yaon la ts'inkaséyanxínhya, ts'óna ts'ixín tie.

A ntá tí nitjó mé ts'óna ijnḡi.

Xíkaha senó tsonhen ntá itsi Ìnchéni.

Tíhi mé ijnko yaon imá jié la imá náxrjón.

²¹ A ntá kaín tí nkexro tsjanchehe ihnḡié Ìnchéni kixin tsjinkḡitsa sín mé tsaá sín.*

Mé xíkaha tsíchrónka ch'ín Joel.

²² Jahará chojni israelita tinhínrá tí nkehe tsoxrjanka. Tí ch'ín Jesús tsíkjixín chjasin Nazaret mé Dios kjuakoḡxin ch'án kixin tsíchr'án ch'án kixin kjuasin ch'án itsjé kjuaxroan jié k'uíkonrá la ko kjuako ch'án kixin Dios tsíchjéhe ch'án kjuachaxin kixin tjinkaon ch'án chrók'uikonrá. Jahará ó jina nohará kaín tíha. ²³ Kjónté xíkaha k'uíkonrá la jahará itserá ch'án éxi tsíkjenkayáxin Dios ósé. A ntá jahará kjuinçek'ayéhérá ch'án

* 2:21 2.17–21 Joel 2.28–32

tí sín jínahya, a ntá tí sín jínahya mé k'óyán sín ch'án, kjuak'enkanı sín ch'án ijnko ntacruz. ²⁴ Kjánchó Dios la kjuínchexechón ch'án inaá la kjuatsen ch'án tí kjuatjoté kuènte kjuach'én kixin ntá tí kjuach'én xitjahya ts'etuenhen tí jehe ch'án. ²⁵ A ntá ósé tí ch'ín rey David tsíchronka ch'án kuènte Jesús ntáchro ch'án kixin:

Jaha Ìnchéni t'íkuan kixin jnkochrín tjétaón ntja tí xritjak'é janhan.

Jaha mé itjen tjaná chjina kixin chrókohya jie chrókuásian.

²⁶ Méxra imá chéhe asenná. Ir'va tsjexian tí nkehe náxrjón.

Ó nõna kixin kohya nkehe ts'atsínka kjónté its'én.

²⁷ Ó nõna kixin tí jaha tsitóéhya asenná chríkjan tí síin chojni tsík'en.

Tsjánjonhya kjuachaxin kixin tsoxíka ntõna kixin janhan mé ijnko nkexro t'aha xra jina tjuéhe.

²⁸ Jaha mé kjuákõna tí ntja tsjanjon kjuachón. Jaha mé nchechàna kixin t'ayakonna.†

Mé xíkaha tsíkjin ch'ín David.

²⁹ 'Kichóni tìtohérá tsontáxrjan kixin ch'ín David, tí nkexro k'uaxrjeníxinni mé tsík'én ch'án la ko tsíkjixravá ch'án. Ntá naxa noheni nketí tsíxravá ch'án. ³⁰ A ntá ch'ín David mé ijnko nkexro tsíchronka itén Dios la ó nohe ch'án kixin chaxín Dios chrónka kixin ijnko nkexro ts'axrjeníxin ch'án mé ts'óna rey mé ts'etõan éxí jehe ch'án k'uetõan ch'án. ³¹ Mé xíkaha ch'ín David la ósé ó nohe ch'án nkehe tsonhen la mé chrónka ch'án kixin tsoxechón Cristo la ko ntáchro ch'án kixin tí asén ch'án tsitõehya tí síin tí sín tsík'en la ts'itjáyanhya tí cuerpo kuènte ch'án.

³² Méxra Dios kjuínchexechón tí ch'ín Jesús, mé k'uíkonni kaín ni la mé chrónkani kixin chaxín tíha. ³³ Ntá ijie Jesús mé sákjuiko ch'án Dios la nàno itja chjina Dios mé tjen ch'án. Ntá tsintáchro It'é ch'án Dios kixin tsochr'án ch'án tí Nchakuen ch'án. Ntá jie ó kui la ó k'uíkonrá la ko kuínhínrá nkehe kónhen. ³⁴ Tí ch'ín David la jehya jehe ch'án sákjuí nkaya nkajní, kixin jehe David ntáchro ch'án kixin:

Ìnchéni Dios mé ntáche tí Ìnchéni kixin:

“Tjak'e tjaná chjina ntihó tsétõan,

³⁵ tsjixinjian kaín xín tí sín nínkakonhan la tsjachahya sín ts'etõan sín kixin jahvá mé tsétõan.”‡

Mé xíkaha tsíkjin ch'ín David.

³⁶ 'Ntá kaín rá chojni israelita chrókónohará chaxín kixin jehe tí ch'ín Jesús ó kjuakénkanirá tí ntacruz la Dios mé kjuích'éna Ìnchárá ijie, mé tí Cristo —mé xíkaha chrónka ch'ín Pedro.

³⁷ Ntá tí kuínhin sín tíha ntá imá kóxakonhen asén sín. La ntá kjuanchankíhi sín ch'ín Pedro la ko tí í so sín kjueyá ch'ín Jesús. Ntáchro sín kixin:

—Kichóni, a ntá jie la ¿nkexrí chrókuich'eni?

³⁸ Ntá kjuátehe ch'ín Pedro ntáchro ch'án kixin:

—Chrókuìtõhérá tí ijjará la chrórxáinkáonrá Dios. Ntá chrókuikitiaxínrá ihnjé Jesucristo ntá Dios mé tsjakjìinhanrá tí ijjará ntá jehe ch'án tsjanjon ch'án Nchakuen ch'án ts'ayéhérá. ³⁹ Dios mé sinchekìtonhanrá ch'án tí Nchakuen ch'án ts'ayéhérá jahará la ko xjaanrá la ko kjaxin tsochjéhe ch'án Nchakuen ch'án kaín xín tí sín tjejó íkjín. Mé jehe ch'án tsochjéhe ch'án Nchakuen ch'án jnkojnko tí nkexro tsjeyá ch'án.

⁴⁰ Mé xikaha ntáchro ch'ín Pedro la ko í so nkehe ntáchro ch'án. Nta nixjehe ch'án sín inaá, ntáchro ch'án kixin:

—Chrókujitohérá tí jínahya tjenkayáxin tí chojni síin chjasintajni kixin jahará me jina chrókuaará.

⁴¹ Ntá kaín tí sín kuítekaon tí nkehe chrónka ch'án la ntá kuíkite sín la tí yaon a kóchjina iní mil chojni kjuankíxin tinkáchónki Ìnchéni Jesús la k'uíto tí sín ó xráxin síin. ⁴² Ntá kaín sín mé jina k'uék'ejó sín mé kuítekaon sín tí nkehe kjuako tí sín kjueyá Jesús la kjuínkítsa sín kjuanjon sín tí nkehe chrókjóne tí í so sín la ko chjéhe sín Dios kjuasáya la ko kójnkotsé sín kixin sine sín niotja xraxinkakonxín sín kixin ik'uén Ìnchéni.

Mé xikaha k'uéjé tí sín xrankíxixín tinkáchónki Ìnchéni

⁴³ La ntá kaín tí í so sín mé chrakon sín kixin tí sín tsíkjejá Jesús kjuasin sín itsjé kjuaxroan. ⁴⁴ La kaín tí sín tinkáchónki Jesús mé jnkokoá k'uéjé sín la jnkokoá chóna sín tí nkehe sine sín. ⁴⁵ Kjuínchekji sín tí nkehe chóna sín ntá k'óxikayehe sín tí chichaon la chjéhe sín tí sín chóntahya. ⁴⁶ Jnkojnko yaon kójnkotsé sín tí nínko la ntá jnkojnko ntøe sín kjóneko kichó sín. La ko kjóne sín niotja kixin xraxinkakonxín sín kixin ik'uén Ìnchéni la ko kjuaxróxin k'uéjé sín la kohya nkexro kjuínchehnke. ⁴⁷ Kjuanchehe sín kjuasáyé Dios. Ntá kaín chojni k'uéchónthehe sín kjuasáya. A ntá jnkojnko yaon Ìnchéni mé kjueyá iso chojni kixin tsøtsjé tí sín tsaá.

3

Kuítohe jina ijnko nkexro xitjahya tji

¹ Jnko yaon tí ch'ín Pedro la ko ch'ín Juan mé chríin sín sákjuí sín tí tjen tí nínko. Mé kjuíji sín las tres kónjín, tí hora mé nixjehe sín Dios.

² Kaín yaon kjuák'e ntiha ijnko ch'ín tsíkokjéxín xitjahya tji. Sátsíkjiko sín ch'án tí nínko la tsíkjak'etjāxin sín ch'án tí ntója puerta mé it'in Ntója Náxrjón. Ntaha tjetjančak'éhe ch'án chichaon tí sín sít'ixenhen ntiha.

³ Ntá xrínahya k'uíkon tí ch'ín xitjahya tji kjuíji tí ch'ín Pedro la ko ch'ín Juan ts'ixenhen sín nínko, a ntá kjuanchak'éhe ch'án sín chichaon. ⁴ Na ntá ch'ín Pedro la ko ch'ín Juan mé komá sín tí ch'ín a la ntá ntáchro ch'ín Pedro kixin:

—Tsjehé ntihi.

⁵ A ntá tí ch'ín a tjetsjehe ch'án jina kixin ách'e ichrén nkehe tsjanjon tí sín a, ichro ch'án. ⁶ A ntá ch'ín Pedro ntáchro kixin:

—Na chontahya plata ni oro kjánchó tí nkehe chonta la tsøtjahá. Mé kjuachaxin ihnié Jesucristo, tí nkexro tsíkjiixín chjasin Nazaret, la t'inkatjen itjia —mé xikaha ichro ch'ín Pedro.

⁷ Ntá ch'ín Pedro mé itsé ch'án tí tja chjina tí ch'ín xitjahya tji ntá k'uínkatjen ch'án. Ntá xrínahya ó kósóji tí nta ntoá toté ch'án. ⁸ Ntá tí ch'ín xitjahya tji la chrika ch'án la kjuák'exín toté ch'án ntá kjuankíxin ch'án itji ch'án. Ntá k'uixenko sín ch'án nkaxenhen nínko. Tjetji ch'án la ko chrika ch'án la chjéhe ch'án kjuasáya Dios. ⁹ Na ntá kaín tí chojni síin tí chjasin ntiha la k'uíkon sín kixin ó tji ch'án la ko chjéhe ch'án kjuasáya Dios. ¹⁰ Ntá chrakon sín kixin xikaha tsíkónhen kixin tsíkjatsøan sín kixin jehe tí nkexro kjuák'etjāxin kjuanchak'á ch'án chichaon ntója nínko it'in Ntója Náxrjón.

Nixjehe ch'ín Pedro tí chojni síin tí ntasin Salomón

¹¹ Na tí ch'ín xitjahya tji la mé títoehya ch'án tí ch'ín Pedro la ko ch'ín Juan. Ntá kaín xín tí sín síin ntiha chrakon sín kuínká sín sákjuítsjehe sín tí

ntaşin kuènte n̄nko it'in n̄taşin Salomón kixin ntaha tjejó tí sín a. ¹² Ntá tí k'uíkon ch'ín Pedro x̄ikaha la ntáche ch'án sín kixin:

—Jahará chojni israelita, ¿nkekuènte chrakonrá jahará la ko nkekuènte komaráni? ¿Á tjenkayáxinrá kixin jehóni kjuínchekitoheñi jína tí ch'ín i kixin jehóni chóntani kjuachaxin la ko kixin imá tinkáchónkini Dios? ¹³ Náhi. Tí Dios k'uékinkáchónki ch'ín Abraham, la ko Isaac, la ko Jacob mé imá chjéhe ch'án kjuachaxin tí Xjeen ch'án Jesús. Kjánchó jahará tsíkjikēhenrá ch'án tí sín t'etōan. Ntá tí ch'ín Pilato mé tjinkaon ch'án chrók'uátjánta ch'án tí ch'ín Jesús kjánchó jahará la tjinkákonhyará x̄ikaha. ¹⁴ A ntá jahará chrókjuanchiará chrókuítóhe sáchrókjui tí nkexro tjóá jína asén. A ntá náhi. A ntá jahará mé tjinkáonrá sátsji ijnko chojni chóna nchónhya jie. ¹⁵ A ntá jahará tsík'oyánrá tí nkexro tjanjon kjuachón. A ntá Dios mé kjuínchexechón tí jehe ch'án la mé x̄ikaha k'uíkonni la chrónkani. ¹⁶ Tí kjuachaxiēn ihnjé Jesús mé tinkáchónkini la ntá tíha mé kuítóexín jína tí nkexro k'uíkonrá la ko choxinrá. Tí ch'ín a mé kuítekaon ch'án ntá kuítóhe ch'án jína. Mé x̄ikaha ó k'uíkonrá kaín rá.

¹⁷ Kíchóni ó nōna kixin tió jahará la ko tí sín t'etōan k'oyánrá Jesús la ni kōnoahyará nkehe kjuich'erá. ¹⁸ Ntá ó xiteyá tí nkehe tsintáchro Dios tsínixjaxin tí sín tsíchrónka itén ch'án kixin tí Cristo t'ichjánxin tsjasóte ch'án. ¹⁹ Méxra tsitōhérá ijjará ntá xráxinkáonrá Dios ntá jehe ch'án mé ts'óxika ijjará ntá Ìnchéni mé sinchekitohará ch'án jína. ²⁰ Ntá jehe ch'án mé tsochr'án Jesucristo ínaá la x̄ra ó tsi kixin tsaáxinrá. ²¹ Na ntá ijie la Jesucristo la nkaya nkajni ntahó tsitōhe ch'án hasta tsjasiyóxinjian Dios kaín nkehe éxi tsintáchro ch'án tsínixjaxin ch'án tí sín tsíchrónka itén ch'án ósé. ²² A ntá senó tí ch'ín Moisés tsíchénka tí sín tsík'axrjeníxinni kixin: “Ìnchéni Dios mé tsochr'án ijnko nkexro ts'axrjeníxinrá tsochrónka itén ch'án éxi tsíchr'án ch'án tí janhan. T'ichjánxin tinhínrá kaín tí nkehe tsontáchro ch'án. ²³ A ntá tí chojni titekakonhya tí nixja tí nkexro a la ts'itjáyán sín la tsitōhe sín tí nación Israel,”* mé x̄ikaha tsíchrónka ch'ín Moisés.

²⁴ Kaínxín tí sín tsíchrónka itén Dios kjuankixixín ch'ín Samuel la ko kaín tí sín kui ch'érxin mé chrónka sín kixin kaín tíha tsonhen x̄ikaha tí yaon i. ²⁵ Mé tí nkehe tsintáchro Dios tsínixjaxin ch'án tí sín tsíchrónka itén ch'án kixin x̄ikaha chrók'uayéhérá jahará tí nkehe chrókjuanjon ch'án kixin chrók'uejorá jína. Dios tsíkjich'éna ch'án ijnko pacto mé nixjehé ch'án tí sín tsík'axjeníxinrá mé tsintáche ch'án tí ch'ín Abraham kixin: “Kaínxín chojni chjasintajni mé tsoyaonxín sín kixin ijnko nkexro ts'axrjeníxin tí jaha.”† ²⁶ Dios kjuínchexechón ch'án tí Xjeen ch'án la saoxín ichr'án ch'án tí tjejorá jahará israelitará kixin chrókjuintayaonrá ch'án kixin jnkojnko tí jahará chrókuítóhérá tí nkehe jínahya ich'erá —ichro tí ch'ín Pedro.

4

Tí ch'ín Pedro la ko ch'ín Juan nkayakon tí sín t'etōan

¹ Ch'ín Pedro la ko ch'ín Juan la naxa tjejónixjehé sín tí sín tsíkójnkotsé ntá xrínahya ikui tí sín ncha'tá la ko tí ch'ín t'etuēnhen tí sín soldado kuènte tí n̄nko la ko tí sín saduceo. ² Imá kónínkaon sín kixin ch'ín Pedro la ko ch'ín Juan kjuakōhe sín tí sín tsíkójnkotsé nkexrí tsoxechón chojni tsík'en kixin x̄ikaha xechón ch'ín Jesús. ³ Ntá kuínhin sín x̄ikaha ntá itsé

* 3:23 3.22–23 Deuteronomio 18.15,19 † 3:25 Génesis 22.18

sín tí sín a ntá sákjuíko sín, chr'áxenhén sín ntqechiso. Ntahó k'uéjó sín hasta kóyaon kixin ó ntá kóntó. ⁴ A ntá nchónhya tí sín tsíkinhin tí tan a la kuítekaon sín. Ntá kjuixraká tí número tí chojni ntoa mé in'ó mil chojni ntoa ó.

⁵ A ntá tí yaon chr'éxin kójnkotsé tí chjasin Jerusalén tí sín t'etqan kuènte tí sín judío la ko tí sín tjako tí ley. ⁶ Mé kjaxin ntaha tjen ch'ín Anás, mé jehe ch'an mé tí nchat'á imá t'etqan, la ko ch'ín Caifás, la ko kjaxin ch'ín Juan, la ko ch'ín Alejandro, la ko kaín tí chojni kjéhya tí nchat'á t'etqan. ⁷ Ntá k'uetoan sín kixin síxrakoa ch'ín Pedro la ko ch'ín Juan. Ntá k'uéjó sín jnkosiné la ntá kjuanchankíhi sín ntáchro sín kixin:

—¿Nkexro kjuanjon kjuachaxin o nkexro kjuachaxin ihnié kixin xikaha ich'erá tí nkehe?

⁸ Ntá ch'ín Pedro imá chóntha ch'án kjuachaxin kuènte Nchakuen Dios ntá kjuátehe ch'án ntáchro ch'án kixin:

—Jahará chojni t'etqan kuènte chjasin la ko jahará sín táda kuènte chjasin Israel, ⁹ jahará mé tjanchankirá kixin nkexrí kuítóhe ijnko chojni níhi jína kixin tjinkáonrá tsonohará. ¹⁰ Ntá tinhínrá jína tí nkehe tsochrónkaxinni kixin kaín rá chojni chjasin Israel tsonohará kixin tí ch'ín i itjen ntihi mé kuítóhe ch'án jína kjuachaxién ihnié Jesucristo, tí nkexro tsíkixin chjasin Nazaret. A ntá jahará mé tsíkjakénkanirá ch'án tí ntacruz la ntá Dios kjuínchexechón ch'án inaá. ¹¹ Tí ch'ín Jesús i mé tí xro náxrxónhya kuítóéntará tió kjuich'énará tjt'q' ntá mé jie k'óna tí xro tjetqan.* ¹² Kohya í jnko nkexro chóntha kjuachaxin chrókuááxinni kixin kohya í jnko ihnié chojni ntihi chjasintajni chrókuinkáchónkini chrókuááni —mé xikaha ichro ch'ín Pedro.

¹³ Tí síxreé mé k'uíkon sín kixin ch'ín Pedro la ko ch'ín Juan mé nixja sín kaín asén sín la ntá kónohe sín kixin tí sín a mé noehya sín xroon la tjetuanhya sín. Ntá chrakon tí sín t'etqan ntá kjuátsoan sín kixin tí sín a mé tsík'ajiko ch'ín Jesús. ¹⁴ A ntá tí ch'ín tsíkitohe jína mé ntiha tjejóko sín ch'án. Méxra xitjahya tsjanchia sín jie tsjasóte tí sín a. ¹⁵ Ntá tí síxreé a mé k'uetoan sín kixin tí sín a ts'axrje sín ntója ntá jehó sín k'uéjóxenhén sín nchia ikjo sín kichó sín. ¹⁶ Ntá ntáchro sín kixin:

—¿Nkehe chrókuich'eheni tí sín a? Kaínxín tí chojni ntihi chjasin Jerusalén mé ó k'uíkon sín kixin kjuínkítsa Dios tí sín a ntá kjuasin sín ijnko kjuaxroan jie ntá xitjahya tsontáchroni kixin chaxínhya tíha. ¹⁷ Í tjinkakonhyani kixin naḡa tsochrónka sín tíha kixin naḡa tsinhin chojni. Méxra ts'etqanni kixin í tsochénkahya sín ninkexró tí ihnié Jesús.

¹⁸ Na ntá k'uíyehé sín tí sín a inaá ntá k'uetoenhen sín kixin ninkehó chrónixja sín la ko chrókuako sín ihnié Jesús, ichro sín. ¹⁹ A ntá ch'ín Pedro la ko ch'ín Juan kjuátehe sín ntáchro sín kixin:

—Tjenkayáxinrá jahará, ¿á chrókóxrjínhin Dios chrókjuintaxiteyáharáni jahará o chrókjuinchexiteyéhéni tí jehe ch'an? ²⁰ A ntá jeheni la xitjahya tsitoheni tsochrónkani tí nkehe ó k'uíkonni la ko tí nkehe kuínhinni —ichro sín.

²¹ A ntá kjónté xikaha kuínhin tí síxreé la jiehe k'uetoan sín ntá kjuanjon sín kjuachaxin kixin sátsji tí sín a kixin k'uitjahya sín nkexrí sinchekjasóte sín tí sín a kixin kaín tí sín chjasin ntiha chjéhe sín Dios kjuasáya kixin tí kjuaxroan kjuích'e sín. ²² Na mé tí ch'ín kuítóhe jína kixin tí kjuaxroan mé chjina k'uaxitjehe ch'án cuarenta nánó a.

* 4:11 Salmo 118.22

Tí sín tinkáchónki Jesús tjanchia sín kixin tsochraKonhya sín

²³ Ntá tí ch'ín Pedro la ko ch'ín Juan tsíxranjon kjuachaxin sátsji sín na ntá sákjuí sín tí tsikójnKotsé iso tí sín chóxin sín. Ntá chrónka sín kaín nkehe k'uetoan tí sín ncha't'á t'etoan la ko tí sín táda. ²⁴ Ntá kjuixin kuínhin tí sín tsikójnKotsé na ntá kaín sín nixjehe sín Dios la ntáchro sín kixin:

—Inchéni, jaha mé kjuich'ena nkajní la ko chjasintajni la ko tí ntayaon la ko kaín sín tí nkehe síin. ²⁵ Jaha mé kjuachaxién Nchakuan nixjaxian ch'ín David tí nkexro kjuít'aha xra. Ntáchro ch'án kixin:

¿Nkeuente kixin kóninkaon kaín tí chojni nación ókjé?

À ntá tí chojni israelita mé tjenkayáxin nkehe ninkehó sínkíhya.

²⁶ Tí sín rey síin chjasintajni la ko kaín tí sín tí chjasin kójnKotsé sín

nínkakonhen sín Inchéni la ko Cristo.†

Mé xikaha tsikjin ch'ín David ósé.

²⁷ 'Mé xikaha chaxín ch'ín Herodes, la ko ch'ín Poncio Pilato, la ko kjaxin tí chojni tsíkjin ókjé, la ko tí sín israelita mé tsikójnKotsé sín tí chjasin ntihi kixin kóninkakonhen sín tí Xjaan Jesús chóntahya jie, mé tí nkexro tsíkjéyá jaha sit'aha xra. ²⁸ Mé xikaha kjuínchexiteyá sín tí nkehe ósé tsíkjenkayáxin kixin t'ichjánxin xikaha tsonhen. ²⁹ À ntá Inchéni, tsjehé kixin imá jiehe k'uetoan tí sín a. La ntá jaha tsjínkita sín sín sit'aha xra tsochraKonhya sín tsochrónka sín itán. ³⁰ La ko tí kjuachaxián sijnchekitöexín jína tí chojni nihi la ko tsjáKoxian kjuaxroan kjuachaxián ihnjé tí nkexro Jesús t'aha xra —mé xikaha nixjehe sín Dios nkaya nkajní.

³¹ À ntá tí kjuixin nixjehe sín Dios a ntá tí tjejó sín mé kuínkí nonte. La ntá kaín sín antsí k'uáyéhe sín Nchakuen Dios ntá kaín asén sín kjuankíxin sín chrónka sín itén Dios.

Tí kaín nkehe síin la kaín sín mé kuente sín

³² La kaín tí sín kuinkáchónki sín Jesús mé jnkokoá kjuenkayáxin sín. Kohya nkexro ntáchro kixin jehó kuente tí nkehe síin. Náhí. Kaín sín mé kuente sín. ³³ Tí sín tsíkjéyá Jesús mé kaín asén sín chrónkaxin sín kixin nkexrí xechón Inchéni Jesús. Ntá Dios antsí kjuíncheyaon kaín sín. ³⁴ Kohya ninkexró nóaxinhya tjejó ntiha kixin kaín tí sín chóna nontee sín o ntöe sín kjuínchekji sín. Na ntá tsíkjikao sín tí chichaon ³⁵ chjéhe sín tí sín kjuéyá Jesús. À ntá tí sín k'óxikayéhe sín tí chichaon, kuákja tí sín nóa. ³⁶ Mé xikaha kjuich'e ijnko ch'ín levita it'in José. Jehe ch'án la tsíkjin ch'án nonte Chipre jnkosiné ntayaon. Tí sín kjuéyá Jesús mé kjuínchek'in sín ch'án Bernabé, mé t'axrjéxin kixin tí ch'ín nchechéhe asén chojni. ³⁷ Jehe ch'án a mé kjuínchekji ch'án ijnko nontee ch'án ntá kjuíkao ch'án tí chichaon kjuínchek'áyéhe ch'án tí sín kjuéyá Jesús.

5

Ijie kjuasin ch'ín Ananías la ko tjan Safira

¹ À ntá í jnko ch'án mé it'in Ananías, a ntá ichjién ch'án mé it'in Safira, mé jehe sín mé kjuínchekji sín ijnko nontee sín. ² À ntá tí ch'ín a kjuenkayáxinko ichjién ch'án ntá kuakitsjentehe sín iso tí chichaon. Ntá í so mé sákjuíko ch'án la chjéhe ch'án tí sín kjuéyá Jesús la kjuanjon ch'án éxi kaín. ³ Ntá ntáchro ch'ín Pedro kixin:

—Ananías, ¿kuénté chjehé kjuachaxin tí Tsochren kixin k'uetuennen asán? Ntá kjuich'iyehé tí Nchakuen Dios kixin kjuínchemá iso chichaon

kjuinčekjixián nontaa. ⁴ ¿Á jehya nontaa tíha? Ntá tió kjuinčekjia la, tí chichaon la, ¿á jehya kuèntá? ¿Kuènte kjuenkayáxian sích'e tíha? Kjuich'iyehé Dios, jehya chojni kjuich'iyehé.

⁵ Na ntá kuínhin tí ch'ín Ananías ntá kjuítsínka ch'án ntá ik'uéen ch'án. La ko kaín xín tí sín ntiha kónohe sín nkehe kónhen tí ch'ín a la imá chrakon sín. ⁶ Na ntá ikjui iso sín ntasoá la ntá kjuinček'ísímá sín ika tí cuerpo kuènte ch'án la ntá sákjuiko sín, sákjuikjavá sín.

⁷ Ntá k'uátsínka iní hora ntá kjuíji ichjién ch'ín Ananías k'uixenhen tjan tí nchia ntaha a. La noehya tjan nkehe tsíkónhen tí ntiha. ⁸ Ntá ch'ín Pedro mé kjuanchankíhi tí tjan a, ntáchro ch'án kixin:

—Chronka, ¿á chaxín xikahó kóxiixin tí nonte ó kjuinčekjirá? —ichro ch'án.

Ntá kjuátehe tjan kixin:

—Chaxín xikahó kóxiixin.

⁹ Ntá ntáchro ch'ín Pedro kixin:

—¿Nkekuènte jnkokoá kjuenkayáxinrá kjuich'iyehérá Nchakuen Ìnchéni? Kjá ntáchrórá kohya nkehe chrókónhanrá. Ntihi ó kui tí sín ntasoá sákjuikjavá sín xia na ntá jaí sátsjiko sín tí jaha —mé xikaha ichro ch'ín Pedro.

¹⁰ Ntá tuénxín kjuítsínka tjan Safira toté tí itjen ch'ín Pedro ntá ik'uéen tjan. Ntá k'uixenhen tí sín ntasoá tí nchia a ntá k'uikon sín kixin tsíkixin tsík'en tjan. La ntá sákjuiko sín tí cuerpo kuènte tjan la kjuavá sín tjan tí chjinaxón tsixrává tí xii tjan. ¹¹ Na kaín tí sín kuènte ninko la ko tí í so sín kuínhin tí xikaha tsíkónhen, mé imá chrakon sín.

Itsje kjuaxroan kjuakoxin sín

¹² A ntá tí sín kjueyá Jesús mé kjuakoxin sín nchónhya kjuaxroan tí siin chojni ntiha la ko kaín sín mé kójnkotsé sín tí ntasin it'ín Salomón. ¹³ Chrakon iso sín k'uítohya tí jehe sín la kjónté la kaín chojni tjikosáyehe tí jehe sín. ¹⁴ La ntá xrínahya nchónhya chojni ntoa la ko chojni chjin kjuankixin tinkáchónki sín Ìnchéni. ¹⁵ Ntá itsje chojni mé kuakitsje sín tí chojni níhi k'uejo sín ntja. Tjejóták'á sín chrítaón cama la ko kania kixin ts'atsínka ch'ín Pedro ntá kjónté its'ueen ch'án ó ts'atsínka tí tjejó sín mé chrókuitoxén sín jina. ¹⁶ Kjaxin tí chjasin chjino mé kjuixin nchónhya chojni ikjui sín chjasin Jerusalén la kjuikao sín tí chojni níhi la ko tí chojni chóna nchakuen tí jínahya. La kaín sín a mé kuítóhe sín jina.

Ch'ín Pedro la ko ch'ín Juan mé chónkíhi sín

¹⁷ Na ntá tí sín nchat'á t'etōan la ko tí sín kuènte tí sín saduceo mé imá kóchjinoxínhin sín. ¹⁸ Na ntá itsé sín tí sín kjueyá Jesús la chr'áxenhen sín ntōechiso. ¹⁹ A ntá ijnko ángel kuènte Ìnchéni ikui tí tie a kuakitjehe ch'án ntója ntōechiso ntá kuakitsje ch'án tí sín a. La ntá k'uetuēnhen ch'án sín kixin:

²⁰ —Sátjirá ninko la tsjákohérá kaín tí sín ntiha tí tan nixin tsjanjon kjuachón.

²¹ Kjuixin kuínhin sín ntá sákjuí sín ntá tí k'uínkaséyan k'uixenhen sín tí ninko kjuako sín.

A ntá tí nchat'á t'etōan la ko tí sín k'uejóko ch'án mé k'uíyehé sín tsójnkotsé kaín tí síxreé, mé tí sín t'etōan kuènte Israel. Na ntá k'uetōan sín kixin tsoxrakoa tí sín tzejóchjina tsíkjeýá Ìnchéni. ²² A ntá kjuíji tí sín policía tí ntōechiso a ntá k'uitjahya sín tí sín a. La ntá ikjan sín la ²³ ntáchro sín kixin:

—Kjujini ntiha la k'uikonna tsikjehe jina ntqechiso a la k'uejó tí sín soldado a ntója. Ntá kuakitjeheni ntqechiso la k'uitjahyani ninkexró tí nkaxenhen —ichro sín.

²⁴ Ntá kaín tí nchat'á t'etqan la ko tí ch'ín k'uetuñhen tí policía kuente nínko la ko i so tí sín nchat'á t'etqan mé kuínhin sín ntá ntáchro sín kixin xá nkexrí chrókónhen chrók'uitjáyán tí xra kuente tí sín a. ²⁵ Na ntá tuénxín kjujji ijnko nkexro ntáchro kixin:

—Tí sín k'uejochjinará jahará mé ó nkaxenhen nínko ntaha tjejó sín tjejótkaqohé sín chojni —ichro ch'án.

²⁶ La ntá tí ch'ín k'uetuñhen tí sín policía mé sákjuiko ch'án tí sín policía la kjuikakjín tí sín tjako. Ninkehó kjuich'ehya tí sín policía tí sín tjako kixin chrakon sín kixin ách'e tí sín siín ntiha mé tsjak'e sín xro, ichro sín. ²⁷ Na ntá tió kjuikao sín tí sín a la k'uejó sín nkayakon tí sín t'etqan ntá tí nchat'á t'etqan ntáchro ch'án kixin:

²⁸ —Jeheni kujanjonhyani kjuachaxin kixin tsjákorá ihnié tí nkexro a. ¿A ntá nkehe kjuich'erá jahará? Kuenté chjasin Jerusalén tsikjákorá. La tjinkáonrá tsékaráni jie kixin jeheni tsik'óyánni tí ch'ín a —ichro ch'án.

²⁹ A ntá ch'ín Pedro la ko tí iso sín kjueya Jesús ntáchro sín kixin:

—A ntá jeheni t'ichjánxin sinchexiteyeheni Dios senó. A ntá chr'éxin sinchexiteyeheni chojni. ³⁰ Tí Dios tsikinkáchónki tí sín tsik'axjenixinni ósé mé kjuínchexechón Jesús, ti nkexro a mé kjuakénkanirá tí ntacruz tsik'oyánrá. ³¹ Ntá ijie tjeko ch'án Dios nkaya nkajni la nánko itja chjina Dios mé tjen ch'án la Dios kjuich'éna ch'án ijnko nkexro t'etqan kixin sinchekaá ch'án chojni kixin tí nación Israel chrókjan chrókuinkáchónki sín Dios ntá chrók'uitjáyán tí jie chóna sín. ³² La ko kjaxin jeheni chrónkani kaín tí nkehe k'uikonna kjuachaxién Nchakuen Dios. Tí Nchakuen ch'án mé chjéhe Dios kaín tí nkexro chaxín sinchexiteyéhé tí jehe ch'án.

³³ La ntá tí sín t'etqan a mé kuínhin sín tíha ntá kóninkaon sín la ko tjinkaon sín chrók'óyán sín tí sín a. ³⁴ Na ntá tjen ijnko chojni fariseo mé ijnko síxreé it'in ch'án Gamaliel. Jehe ch'án mé ijnko maestro kjuako tí ley la kaín chojni chjasin ntiha chónthe ch'án kjuasáya. Mé k'uínkatjen ch'án kjuák'exín toté ch'án la nixja ch'án k'uetoan ch'án kixin tí sín tsikjeyá Ìnchéni mé ts'axrje sín ntója intsi, ichro ch'án. ³⁵ Na ntá nixjehe ch'án kaín tí síxreé ntáchro ch'án kixin:

—Jahará chojni israelita, tóxakonhanrá kixin kohya nkehe chrókjuich'ehera tí sín a. ³⁶ Xráxinkáonrá kixin senó kjuák'e ijnko ch'ín it'in Teudas la tónhen asén ch'án kixin imá t'etqan ch'án. Ntá itsjé sín mé noó ciento chojni kjuíchréhe ch'án. Na ntá ókjé chojni k'óyán sín tí ch'ín a la ntá kaín tí sín kuinkáchréhe tí jehe ch'án mé xíka sín sákjuí sín ntá ntahó kjuéxín tí xra k'uékjich'e sín. ³⁷ Ntá chr'éxin tió xrenájín kaín ihnié chojni k'uejó na ntá ikjuí ijnko ch'ín mé it'in ch'án Judas la kjuixín ch'án estado Galilea. Ntá itsjé chojni kjuíchréhe ch'án. La ntá kjaxin k'óyán sín ch'án la ntá kaín xín tí sín kjuíchréhe ch'án xíka sín sákjuí sín inaá. ³⁸ Méxra tjtóhéra tjtátéhyará tí jehe sín a. A ntá tí tjejóch'e sín xra kuente chojni ó la kjaxin ts'itjáyán. ³⁹ A ntá tí chaxín tjako sín kjuachaxién Dios ntá tsjachahyará sinchek'itjáyánrá tíha. Méxra tjtóhéra sín kixin tsjánjonkohyará Dios.

⁴⁰ Na ntá kaín tí síxreé mé kuítekaon sín la ntá k'uíyehé sín tí sín kjueya Jesús. La ntá kjuante sín la xik'etuñhen sín kixin í tsonixjahya sín ihnié Jesús la ntá kujanjon sín kjuachaxin kixin sátsji sín. ⁴¹ Ntá tí sín kjueya Jesús mé k'uaxrjéxín sín tí tjejó tí sín t'etqan kjónté xíkaha kónhen sín

la chéhe sín kixin Dios kjuanjon kjuachaxin kjuasóte sín kixin tí kjuako sín ihnié Jesús. ⁴² Kuítøehya sín tsjako sín kuènte Jesucristo kaín yaon tí nkaxenhen n̄inko la ko tí jnkojnko ntøe chojni.

6

Kjueyá sín yato chojni tsjinkĩtsa

¹ Na ntá tí yaon a tjoka sítinkákótsjé tí sín tinkáchónki Ìnchéni. A ntá tí sín nixja nk̄iva griego mé kónínkakonhen sín tí sín nixja nk̄iva hebreo. Ntáchro sín kixin tí sín chjin k'án kuènte sín la kánhyó jina k'uáyéhe tí nkehe síxikayēhe sine sín jnkojnko yaon, ichro sín. ² Na ntá tí teyó tí sín tsíkjeýá Jesús mé k'uíyēhe sín kaín tí sín tinkáchónki Ìnchéni. Ntá nixjēhe sín, ntáchro sín kixin:

—Jeheni la jehya jina tsítóheni tí xr̄a tjakoni itén Dios, kixin ntá sit'aharáni xr̄a ts'óxíkayēheni tí nkehe sine tí sín k'án. ³ Méxr̄a jahará kichó ni tsjéýará yato chojni ntoa tí tjejórá, tí chojni jina choxinrá la ko nohe sín la ko antsi chóna sín Nchakuen Dios mé tí sín a sinchek'áyéheni tí xr̄a a. ⁴ A ntá jeheni la tsonixjēheni Dios la ko tsinkákjakoni itén ch'án —mé xikaha ichro sín.

⁵ La ntá kaín sín mé kuínhin sín xikaha ntá jnkokoá kjuenkayáxin sín. La ntá kjueyá sín ch'ín Esteban, mé ijnko nkexro imá tinkáchónki Ìnchéni la ko antsi chóna ch'án tí Nchakuen Dios. La kjaxin kjueyá sín ch'ín Felipe, la ko ch'ín Prócoro, la ko ch'ín Nicanor, la ko ch'ín Tímón, la ko ch'ín Parmenas la ko ch'ín Nicolás. Jehé ch'án mé tsíkjīxin ch'án chjasin Antioquía la ósé mé tsíkinkáchónki ch'án ti nkehe tinkáchónki tí sín judío. ⁶ Ntá kjuixin kjueyá sín tí sín a ntá kjuikao sín ti tjejó tí sín tsíkjeýá Ìnchéni. La ntá tí sín a mé nixjēhe sín Dios la ko k'uejotja tja sín chrítaón tí ikja tí sín tsíkónoxín.

⁷ Tí itén Dios sítinkákji la tinkákótsjé tí sín tinkáchónki Ìnchéni chjasin Jerusalén. Kjaxin itsjé tí sín nchat'a judío kjuankixin sín tinkáchónki sín Ìnchéni.

A ntá itsé sín ch'ín Esteban

⁸ Tí ch'ín Esteban mé ijnko nkexro k'uéchóna kjuachaxin kixin Dios tsíkjincheyaon ch'án la nchónhya kjuaxroan kjuakox̄in ch'án tí siín chojni. ⁹ A ntá iso sín tsíkjīxin tí n̄inko judío kuènte tí sín senó k'uejó esclavo sín tsíkjīxin sín chjasin Cirene, la ko Alejandría, la ko Cilicia, la ko estado Asia, mé kjuankixin sín ikjo sín ch'ín Esteban. ¹⁰ Kjónté xikaha la kjuachahya sín kixin Nchakuen Dios mé kjuínkĩtsa tí ch'ín Esteban nixja ch'án. ¹¹ Na ntá jehé sín mé kjuenkēhe sín ókjé chojni kixin tsochrónka sín kixin kuínhin sín k'uántaxínhin ch'án ch'ín Moisés la ko Dios, ichro sín. ¹² Mé xikaha k'uixité kaín chojni la ko tí sín t'etøan kuènte n̄inko la ko tí sín tjako tí ley. La ntá itsé sín tí ch'ín Esteban la tinkánkákjen sín ch'án sákjuiko sín ch'án tí siín tí síxreé a. ¹³ Kjaxin kjueyá sín chojni tsochrónka kixin ntoáhya kjuako ch'ín Esteban la ntáchro tí sín a kixin:

—Tí ch'ín a mé títoehya ch'án t'ántaxínhin ch'án tí n̄inko kuènténi la ko tí ley. ¹⁴ Ó kuínhini kixin chrónka ch'án kixin tí ch'ín Jesús, tí ch'ín tsíkjīxin chjasin Nazaret, mé sinchek'itjáyan ch'án tí n̄inkoēni ntihi la ko tsjitóxinhin ch'án tí nkehe tinkáchónkini mé tí nkehe tsík'etøan ch'ín Moisés —mé xikaha ichro sín.

¹⁵ Ntá tí síxreé la ko kaín tí sín sítjaxín ntiha la komá sín tí ch'ín Esteban la mé k'uíkon sín kixin tí kàré ch'án mé éxi ijnko ángel mé xíkaha tsjehe tí jehe ch'án.

7

Tí nkehe kjuátehe ch'ín Esteban

¹ A ntá tí sín nchat'á t'etōan kjuanchankíhi sín tí ch'ín Esteban kixin:

—¿Á chaxín kaín tíhi tsíntáchrúa?

² Na ntá jehe ch'án kjuátehe ch'án ntáchrō ch'án kixin:

—Kaínrá kíchó ni Israel la ko sín táda tinhínrá tí nkehe tsontáxrjan. Dios kuènteni chóna kjuachaxin mé kjuakohe ch'ín Abraham tí nkexro k'uaxrjeníxinni tíó kjuák'e ch'án nación Mesopotamia tí naxa sátjihya ch'án tsjak'e ch'án nonte Harán. ³ Dios tsíntáchrō kixin: “Títōhé chjasán la ko kaín tí nkexro kjéhya. Na ntá sátjia tí nonte tsjákohá jaha.”* ⁴ Na ntá ch'ín Abraham k'uaxrjéxín ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixin ik'uén it'é ch'án na ntá Dios kjuíkao tí jehe ch'án tí nonte tjejorá ijie. ⁵ Kjánchó ch'ín Abraham la kuákjahya ch'án nít'ō nonte hasta ni tí tsjak'e tóté ch'án la chóntahya ch'án. A ntá chrónka Dios kixin chaxín chr'éxín tíó tsjixin ts'en ch'ín Abraham la tí sín ts'axrjeníxín ch'án mé ts'áyéhe sín tíha. Kjónté naxa kohya nijnko xjeen ch'án la mé xíkaha ntáchrō Ínchéni. ⁶ Kjaxin tsíntáchrō Dios kixin tí sín ts'axrjeníxín ch'ín Abraham la ts'ejó sín ókjé nonte, la ko sich'exón sín xra la ko náxrjónhya ts'ejó sín noó ciento nánó. ⁷ La kjaxin xíntáchrō Dios inaá kixin: “Ntá chr'éxín janhan sítakjasóte tí sín kjuíncheejasóte xjaan. La ntá tí xjaan mé tsokjan sín ntihi ntá tsoxraxinkakonxín sín tí janhan,” mé xíkaha ichro Dios. ⁸ Na ntá Dios mé tsíkjo ch'ín Abraham kixin kaín tí chojni ntoa ts'axrjeníxín ch'án mé itsa sín xroye. Na ntá xíkaha tíó kokjíhi xjeen ch'an Isaac ntá ch'ín Abraham mé chjéhe ch'án xjan xroye tíó xétjehe xjan ijní yaon. Ntá kjaxin xíkaha kjuích'e ch'ín Isaac tíó chóna ch'án xjeen ch'án Jacob, la ntá ch'ín Jacob la xíkaha kjuích'e ch'án inaá. Ntá tí sín a mé k'óna it'é tí teyó tribu tsík'axrjeníxín tí sín Israel.

⁹ Tí xjeen ch'ín Jacob mé tí sín k'uaxrjeníxinni ósé la jehe sín k'uéchjinoxínhin sín tí kíchó sín José ntá kjuínchekji sín ch'án la tí sín k'uena la sákjuiko sín ch'án nó nación Egipto, kjánchó Dios mé kjuínkítsa tí jehe ch'án. ¹⁰ Dios mé kjuínchekaá ch'án tí náxrjónhya k'uékjak'e ch'án. La ko Dios kjuanjon kjuachaxin kixin imá tsonohe ch'án. Na ntá k'uíkon ch'ín Faraón tí rey kuente nación Egipto a xíkaha tí xra jina kjuích'e ch'ín José ntá kjuanjon ch'án kjuachaxin kixin ts'etōan ch'ín José tí nación Egipto la ko tí ntōe ch'án.

¹¹ Na ntá kókjinta xrínahya la náxrjónhya k'uejō tí sín nación Egipto la ko nonte Canaán la tí sín tsík'axrjeníxinni la k'uitjahya sín nkehe sine sín. ¹² A ntá tsíkinhin ch'ín Jacob kixin tí nación Egipto mé sítóxi noa trigo ntá k'uetuenhen ch'án tí sín xjeen ch'án kixin sátsji sín ntiha tsjik'ena sín noa, la jehe tí sín a mé tí sín tsík'axrjeníxinni. Tíha mé tí saoxín sákjuí sín. ¹³ Ntá tí yóxin sákjuí sín ntiha ntá ch'ín José kjuínchenohe ch'án sín kixin tí sín a la savé ch'án. La ntá kjuakohe ch'án tí ch'ín Faraón tí sín naxa kjéhya ch'án. ¹⁴ La ntá k'uetōan tí ch'ín José kixin sátsjikakjín sín it'é ch'án Jacob la ko kaín tí sín kjéhya ch'án, mé ijnko setenta y cinco chojni kjéhya ch'án. ¹⁵ Mé

* 7:3 Génesis 12.1

xikaha kónhen la tí ch'ín Jacob mé sákjuí ch'án la kjuák'e ch'án nación Egipto ntá chr'éxin ntiha mé k'uénxin ch'án. La ntá chr'éxin kjaxin tí sín tsík'axrjeníxinni k'uénxin sín ntiha. ¹⁶ Ntá chr'éxin kuakitsjexín sín tóye tí huésóé tí ch'ín Jacob la sákjuíko sín tí nonte Siquem, la ntá ntiha mé kjuavá sín tí nonte tsík'ena ch'ín Abraham mé tsík'enehe ch'án tí xjeen ch'ín Hamor chjasin Siquem.

¹⁷ 'La ntá ó kuichjina tsoxiteyá tí nkehe tsintáchro Dios tsíkjo ch'ín Abraham ntá tí sín Israel imá kótsjé sín nación Egipto. ¹⁸ A ntá xrínghya í jnko ch'ín rey kjuankíxin k'uetóan nación Egipto la k'uéchónhya ch'án tí ch'ín José. ¹⁹ La ntá tí ch'ín rey kjuích'iyehé ch'án tí sín naxa kjéhyani la ko kjuínchekjasóte ch'án sín. La tsík'etóan ch'án kixin tí xjan ntoa na ntá kokjíhi mé tsjik'itjí sín xjan kixin its'en xjan. ²⁰ Na ntá tí yaon a tsíkokjíhi ch'ín Moisés ntá imá kóxrjínhjin Dios tí xjan a. It'é la ko iné xjan mé k'uéchónhta sín xjan iní nitjó koá ntóe sín. ²¹ Ntá chrokjuahya tsjak'ema sín xjan la ntá kjuíkjáka sín xjan. La ntá xjeen tí ch'ín rey kuénte Egipto mé kjuíakja tjan xjan la sákjuíko tjan ntóe tjan la kjuínchek'ánkí tjan xjan éxi xjeen tjan xikaha. ²² La ntá tí ch'ín Moisés mé k'uitja ch'án kaín nkehe nohe tí sín Egipto a la imá tjetóan tí nkehe k'uéntáchro ch'án la ko tí nkehe k'uékjich'e ch'án.

²³ 'La ntá tió chónhta tí ch'ín Moisés cuarenta nánó ntá tjinkaon ch'án tsjitsjehe ch'án tí sín israelita naxa kjéhya ch'án. ²⁴ Ntaha mé k'uíkon ch'án kixin ijnko chojni Egipto kjuate ijnko chojni naxa kjéhya tí jehe ch'án. Ntá chrókjuinkítsa ch'án tí sín naxa kjéhya ch'án ntá k'oyán ch'án tí ch'ín Egipto a. ²⁵ Kjuenkayáxin ch'án kixin tí sín naxa kjéhya ch'án, mé tí sín israelita, mé tsonoxín sín kixin Dios mé tsíchr'án tí jehe ch'án sinchekaá sín ch'án. Kjánchó tí sín a kjuátsoanhya sín. ²⁶ La ntá í jnko yaon tí ch'ín Moisés k'uíkon ch'án kixin yaá sín israelita tjanjonko kichó sín. La ntá tjinkaon ch'án chrókjuít'oxin ch'án kixin chrokjuanjonhya sín. La ntáchro ch'án kixin: "Jahará jnkokoá kichuárá la, ¿nkekuénté tjanjonrá?". ²⁷ A ntá tí nkexro chónhta tí jje mé kóninkaon ch'án la kótéka ch'án tí ch'ín Moisés. Ntá ntáchro ch'án kixin: "¿Nkexro kjuanjon kjuachaxin kixin jaha k'óna juez kuénténi? ²⁸ ¿Á tjinkávan ts'oyánni kjaxinni éxi k'oyán tí ch'ín Egipto ijna ní?" ²⁹ A ntá kuínhin tí ch'ín Moisés tíha ntá tjoka sákjuí ch'án. Sákjuí ch'án tí nación Madián ntá ntiha kjuák'e ch'án éxi ijnko chojni tsíkjixín ókjé. Ntá ntaha tsíkótehe ch'án la ko kjuích'éna ch'án yaá xjan ntoa.

³⁰ 'Na ntá k'uátsínka cuarenta nánó ntá tí nteje chjino jna it'in Sinaí mé xrínghya k'uíkon ch'án ijnko ángel tjenkákjan tí xrohi chríkjan tí ntayoa tjeche. ³¹ Ntá tí ch'ín Moisés la chrakon ch'án kixin xikaha k'uíkon ch'án la ntá kóchjinehe ch'án kixin chrótsjehe ch'án la ntá kuínhin ch'án itén Ìnchéni ntáchro kixin: ³² "Janhan mé Dios tinkáchónki tí sín tsík'axrjeníxian mé Abraham, la ko Isaac, la ko Jacob," mé xikaha ichro Dios. Ntá tí ch'ín Moisés la kjuankíxin chrakon ch'án la síxránká ch'án ntá í tjinkakonhya ch'án tsotsjehe ch'án. ³³ Na ntá ntáchro Ìnchéni kixin: "Takítsje tókátá kixin tí nonte tinkatja la nonte tjóá chóntahya jje. ³⁴ Ó k'uíkuan kixin tí sín kuéntana mé imá tjetotjasóte sín nación Egipto. La ó kuínhan kixin t'èya sín. La ntá ijie ó k'uinka kixin tsjínkítsa sín. Méxra xrákía jaha tsétuanhan jaha sátsjia nación Egipto,"† ichro Dios.

† 7:34 7.30–34 Éxodo 3.1–10

35 'Tí sín israelita mé kjuanoá sín tí ch'ín Moisés. Tsíntáchro sín kixin: "¿Nkexro kjuanjon kjuachaxin kixin jaha k'óna juez?" ichro sín. Kjánchó Dios ichr'án ch'án tí ch'ín Moisés kixin ts'etōan ch'án la ko sinchekaá ch'án tí sín israelita kjuachaxin tí ángel k'uikon ch'án chríkjan tí nta. 36 Ntá tí ch'ín Moisés kuakitsjexín ch'án Egipto tí sín tsík'axrjeníxinni ósé. La imá itsjé kjuaxroan kjuasin ch'án la itsjé kjuakoxin ch'án tí naciōn Egipto, la ko tí Ntayaon Kjátse, la ko tí nteje k'uáji sín cuarenta nánó. 37 Jehe tí ch'ín Moisés a mé chénka tí sín israelita kixin: "Dios mé tsochr'án ijnko chojni tsoníxja itén Dios ts'axrjeníxin tí sín kíchuará éxí ichr'án ch'án tí janhan. Títekákonhénrá tí jehe ch'án."† 38 Tí ch'ín Moisés mé kjuák'eko ch'án tí chojni tí k'uéjō sín tí nteje. Nta ijnko ángel mé nixjehe ch'án tí jnā Sinaí la ko tí sín k'uaxrjeníxinni mé k'uáyéhe sín tí tan tjanjon kjuachón, ntá tí tan mé k'uátsínka tí jeheni ijie.

39 'A ntá tí sín k'uaxrjeníxinni ósé mé tjinkakonhya sín kixin chrókuitekaon sín la kjuanoá sín tí ch'ín Moisés la ko tjinkaon inaá chrókjan sín naciōn Egipto. 40 A ntá ntáche sín ch'ín Aarón kixin: "Tjinkaonni sích'éna ijnko dios kixin tsinkáchónkini kixin í noehyani nkehe kónhen tí ch'ín Moisés, tí nkexro kjuínkítsa k'uaxrjexínni naciōn Egipto."§ 41 Ntá kjuínchekjangya sín ijnko koxintáxjan la ntá k'óyán sín iko kjokehe tí nkehe tsíkjangya a la imá kóchéhe sín k'uikon sín tí nkehe tsík'ónaxín tja chojni. 42 A ntá Dios mé kuítóhe tí jehe sín kixin tsinkáchónki sín tí konotsé síin nkajní. Tíhi mé tsíkjin ijnko nkexro k'uéchrónka itén Dios ntáchro xíkíhi: Jahará chojni Israel, ¿á k'oyánrá tí iko kjókanará tí janhan tí cuarenta nánó k'uejorá nteje ní?

43 Kja náhi, jehó tí nkehe kjuích'énará mé kjókehérá tí ko a. Kjuikoará tí nínkōe tí dios Moloc

la ko kjaxin kjuikoará tí konotsé kuente dios Renfán.

A ntá tí nkehe tsíkjich'énará jahará mé xráxinkákonxínrá éxí Dios kuéntará. Méxra janhan tsakítsjexínrá tí tjejorá la tsétuānhánrá sátsjirá chjasin Babilonia.*

Mé xíkaha ntáchro Dios ósé.

44 'Naxa k'uéjō tí sín k'uaxrjeníxinni tí nteje la chóna sín ijnko nínko kamantá chóna tí ley tsík'etōan Dios. Tíhi kjuích'éna sín éxí tsík'etuenhen Dios tí ch'ín Moisés kixin sích'éna ch'án kain nkehe k'uikon ch'án. 45 Ntá tí sín tsík'axrjeníxinni mé k'uáyéhe sín tí nínko kuítonhen sín. Ntá tí sín kjuíkao ch'ín Josué mé kjuíkao sín tí nínko tió kjuacha sín k'uáyéhe sín í jnko nonte kuente í so chojni kuakitsje Dios, kixin ts'áyéhe tí jehe sín. Mé xíkaha kónhen hasta tí yaon kjuankíxin k'uētoan ch'ín David. 46 Imá kjuíncheyaon Dios tí ch'ín rey David la ntá tí ch'ín David mé tjinkaon ch'án sích'éna ch'án ijnko nínko kuente Dios mé tí Dios k'uékinkáchónki ch'ín Jacob. 47 Kjánchó jehe ch'án kjuích'énahya ch'án tí nínko a. Tí ch'ín Salomón mé kjuích'éna. 48 Kjánchó Dios nkaya nkajni chrohya tsjak'exenhen ijnko nchia tsíkjich'énaxín chojni itja. Ntáchro ijnko ch'ín nixja itén Dios kixin:

49 Janhan Dios nkaya nkajní itjén tétōanxián ntá chjasintajni tjejen totená.

¿Xá nkexéhe tí nchia chrókjuích'énará?

¿Xá nketí chrókjuak'é chrók'ok'ánaxián?

50 ¿Xá jehya tjaná kjuít'ánaxián kaín tí nkehe ní?†

Mé xíkaha ichro Dios.

⁵¹ A ntá jahará la icha asánrá xráxín titekákonhyará. Jahará tinhínrá kjánchó ich'erá éxí chojni chónhya Dios. Xráxín tjanjonkoará Nchakuen Dios. Jahará mé tóyohará tí sín tsík'axrjeníxinrá ósé. ⁵² Tí sín tsík'axrjeníxinrá kjuínchekjasóte kaín tí sín tsíchronka itén Dios. K'óyán sín tí sín k'uechrónka kixin itsi tí nkexro chóntahya jje. A ntá ó kui tí nkexro a ntá jahará kjuínchekjirá ch'án ntá k'óyán sín ch'án. ⁵³ Jahará k'uayéhérá tí nkehe k'uetōan Dios senó, mé tí nkehe chrónka tí ángel, la kjónté xíkaha kuitekákonhyará —ichro ch'ín Esteban.

Ik'úen ch'ín Esteban

⁵⁴ Ntá tí kuínhin tí jehe sín tí nkehe ntáchro tí ch'ín Esteban ntá imá kónínkaon sín la netaón neno sín kixin nínkakonhen sín ch'án. ⁵⁵ A ntá ch'ín Esteban antsí chóna ch'án Nchakuen Dios la konta ch'án nkajní k'uíkon ch'án kjuachaxién Dios la ko k'uíkon ch'án kixin ch'ín Jesús tjexín toté ch'án nánko tja chjina Dios. ⁵⁶ Ntá ntáchro ch'ín Esteban kixin:

—Tsjehérá kixin k'uíkuan kixin xitjehē nkajní la ntaha itjen tí Xjeen Dios K'óna Chojni nánko tja chjina Dios.

⁵⁷ A ntá jehe sín la k'uikjehē sín ntatsjon sín la itsen k'uixité sín ntá sákjuí sín k'uixitja sín ch'án ⁵⁸ sákjuiko sín ch'án ikon chjasin ntá ixro chjéhe sín ch'án. La tí sín tjanchia jje mé kuakitsje sín iké sín la k'uejo sín toté ijnko ch'ín ntasoá it'in Saulo kixin ts'ayakonhen ch'án tí ka a. ⁵⁹ La it'e sín xro ntá ch'ín Esteban mé chrónóehē ch'án Inchéni la ntáchro ch'án kixin:

—Inchéni Jesús takjá nchakuenná.

⁶⁰ Ntá tuénxín kjuák'exín toch'in ch'án la k'uèya ch'án itsen ntáchro ch'án kixin:

—Inchéni jaha mé tahya kuentá tí jje kjuasin sín.

Mé xíkaha ichro ch'án ntá ik'úen ch'án.

8

Ch'ín Saulo chrók'óyán ch'án tí sín tinkáchónki Jesús

¹ La tí ch'ín Saulo mé jnkokón kjuenkayáxinko ch'án tí sín k'óyán tí ch'ín Esteban.

A ntá tí yaon a na mé kjuankixin sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankixin tinkáchónki Cristo mé xíkayehē sín sákjuí sín nkuixín estado Judea la ko estado Samaria. A ntá jehó tí sín tsíkjeyá Jesús mé kuítóhe sín ntiha. ² Na iso sín imá tinkáchónki Dios mé kjuavá sín ch'ín Esteban la ko tsjánkama sín ch'án la ko t'avéhe sín ch'án. ³ A ntá tí ch'ín Saulo la kjuankixin kónínkakonhen ch'án tí sín tinkáchónki Cristo. K'uixenhen ch'án jnkojnko jnkojnko ntōe sín la itsé ch'án tí sín ntoa la ko tí chojni chjin. La ntá kuinkánkákjen ch'án sín sákjuiko ch'án sín kixin ts'ejóchjina sín.

Kjuako sín itan jína tí estado Samaria

⁴ A ntá tí sín sákjuixin chjasin Jerusalén mé xritjako sín nkexrí tí tan tsáaxinni nkuixín tí sákjuí sín. ⁵ La ijnko ch'ín it'in Felipe mé sákjuí ch'án ijnko chjasin estado Samaria la kjuankixin ch'án chrónka ch'án itan kuènte Cristo. ⁶ Na ntá nchónhya chojni kójnkotsé ntiha la kaín sín kuínhin sín jína tí nkehe ntáchro ch'ín Felipe kixin ó k'uíkon sín tí kjuaxroan

† 7:50 7.49–50 Isaías 66.1–2

kjuakoxin ch'án. ⁷ Itsjé chojni chóna nchakuen tí jínahya mé kuítqhe sín jína la tí nchakuen tí jínahya k'óyako k'uaxrjexín tí jehe sín. La nchónhya tí sín chóna chin xitjahya itji la ko tí sín síxénká toté mé kuítqhe sín jína. ⁸ A ntá imá kóchéhe kain tí sín síin chjasin ntiha.

⁹ Tí chjasin a mé kjuák'e ijnko ch'ín it'in Simón mé ijnko ch'ín ósé mé k'uékjinchexroan ch'án. K'uékjich'iyehé ch'án tí sín estado Samaria ntáchro ch'án kixin ijnko chojni imá tjetoan tí jehe ch'án. ¹⁰ La kain tí sín ntiha k'uejó sín kuínhin sín jína, mé tí chánjan ntsíntsí hasta tí chojni imá táda la k'uéntáchro sín kixin:

—Tí ch'ín i imá chóna ch'án tí kjuachaxin kuènte Dios —ichro sín.

¹¹ K'uékitekakonhen sín ch'án kixin k'uékjinchexroan ch'án k'uékjich'iyexín ch'án sín itsjé nánó. ¹² Ntá tió kuítekaon sín tí tan jína kjuako ch'ín Felipe kuènte tí kjuachaxin kuènte Dios la ko Jesucristo la ntá chojni ntoa la ko chojni chjin mé kuíkite sín. ¹³ A ntá kjaxin tí ch'ín Simón, mé kuítekaon ch'án la kuíkite ch'án, koí ch'án. Ntá kjuankixin k'uájiko ch'án tí ch'ín Felipe la imá chrakon ch'án kixin k'uúikon ch'án tí kjuaxroan jié kjuasin tí ch'ín Felipe.

¹⁴ A ntá tí sín apóstol, mé tí sín tsíkítqhe chjasin Jerusalén, kuínhin sín kixin itsjé tí sín estado Samaria ó kuítekaon sín itén Dios. Ntá k'uetuenhen sín ch'ín Pedro la ko ch'ín Juan sátsji sín ntiha. ¹⁵ Ntá tió kjuúji sín ntá kjuanchehe sín Dios kixin tí sín ntiha tinkáchónki Cristo chrók'uáyéhe sín Nchakuen Dios. ¹⁶ kixin nijnko tí jehe sín ntiha naxa tsík'áyèhya sín Nchakuen Dios. Jehó tsíkikitexín sín ihnié Ìnchéni Jesús. ¹⁷ Ntá tí ch'ín Pedro la ko tí ch'ín Juan mé k'uejotja itja sín chrítaón kja tí sín a la ntá ó k'uáyéhe sín Nchakuen Dios.

¹⁸ Na ntá tí ch'ín Simón mé k'uúikon ch'án kixin tí sín apóstol k'uejotja itja sín chrítaón kja tí sín a ntá k'uáyéhe tí sín a Nchakuen Dios. La ntá xróxin ch'án chichaon ¹⁹ la ntáchro ch'án kixin:

—Chjehéni jeheni tí kjuachaxin kixin kjaxin jeheni chrókjuak'etja itjani chrítaón ikja jnkojín chojni ntá chrók'uáyéhe sín Nchakuen Dios —ichro ch'án.

²⁰ Ntá ntáchro ch'ín Pedro kixin:

—Jaha la ko tí ch'íhakoán ts'itjáyankoa kixin tjenkayáxian kixin chrók'uèna tí kjuachaxin kuènte Dios. ²¹ Jaha chontahya kjuachaxin ts'ixenhén tí xra a kixin ó nohe Dios kixin jaha la tjuáhya asán. ²² Méxra tsitqhé tí ijiá la chrónóqhé Dios kixin ách'e tsjakjínhan ch'án tí jié tjenkayáxian. ²³ Ó t'íkuan kixin imá chjinoxínhin asán la ko nchónhya jié chonta —ichro ch'ín Pedro.

²⁴ La ntá ch'ín Simón kjuátqhe ch'án ntáchro ch'án kixin:

—Nixjehérá Ìnchéni kixin tí janhan kixin chrókónnahya tí janhan éxi tí ntáchrorá —ichro ch'án.

²⁵ Ntá kjuixin chrónka tí sín apóstol tí tan kuènte Dios ntiha ntá sákjuí sín kjuako sín tí tan tsjanjon kjuachón nchónhya tí chjasin ntsíntsí estado Samaria. Ntá ikjan sín chjasin Jerusalén.

Tí ch'ín Felipe la ko tí ch'ín tsíkixin nación Etiopía

²⁶ A ntá kjuixin tíha ntá ijnko ángel kuènte Ìnchéni mé ntáche tí ch'ín Felipe kixin:

—T'ínkatjen sátsja nó sur tsoxeta tí ntja t'ínkajinxin chjasin Jerusalén hasta chjasin Gaza —ichro tí ch'ín ángel.

Na ntá tí ntjia a mé ijnko ntjia t'atsínka nó nteje. ²⁷ Na ntá tí ch'ín Felipe k'uínkatjen sákjuí tí ntjia. La ntiha xrínahya xeta ch'án ijnko chojni tsíkjin nó nación Etiopía. Jehe ch'án mé ijnko chojni eunuco mé tja ch'án síin ch'áchakoen tí tjan reina Candace t'etuēnhen tí nación Etiopía. Jehe ch'án sátskji ch'án chjasin Jerusalén xraxinkakonxín ch'án Dios. ²⁸ A ntá tí ch'ín a la xíkjan ch'án inaá chjasén ch'án. Kjuák'exenhen ch'án ijnko carro la tjenchekuáxin ch'án ijnko xroon tsíkjin ch'ín Isaías, ijnko nkexro k'uéchrónka itén Dios. ²⁹ La ntá tí Nchakuen Dios mé k'uētuēnhen tí ch'ín Felipe ntáchro kixin:

—Sátjia tóchjina antsí tí tjen tí carro.

³⁰ Ntá kóchjinehe tí ch'ín Felipe tí tjen tí carro a, la ntá kuínhin ch'án kixin tjenchekuáxin tí ch'ín a tí xroon tsíkjin ch'ín Isaías. La ntá kjuanchankíhi ch'án kixin:

—¿Á tiénxian tí nkehe tjenchekuáxian méhe?

³¹ La ntá kjuátehe tí ch'ín a ntáchro ch'án kixin:

—¿Nkexrí chrókuanxian kixin kohya nkexro tsjinkitsana tsochrónkaxín nkexrí t'axrjexín tíha? —ichro ch'án.

Ntá kjuanchia ch'án kixin tí ch'ín Felipe ts'it'ótjen la tsjak'etjāxin chjinaxon tí tjen ch'án.

³² Na tí xroon itén Dios tjenchekuáxin ch'án mé tíhi:

Jehe ch'án mé sákjuíko sín éxi ijnko kolélo kjuíko sín ts'óyán sín.

La éxi ijnko kolélo tsjánkahya tió kjínhin sín kaxree va mé xíkaha jehe ch'án ninkehó xitjeehya ir'va ch'án.

³³ K'uíkon sín ch'án éxi ijnko chojni chóna jje la ntoáhya kjuínchekjasóte sín ch'án.

Kohya nkexro tsjacha tsochrónka kuēnte tí sín chrók'uaxrjeníxin ch'án kixin jehe ch'án la k'uēnxín ch'án chjasintajni.*

Mé xíkaha chrónka tí xroon itén Dios.

³⁴ A ntá tí ch'ín eunuco mé kjuanchankíhi ch'án tí ch'ín Felipe ntáchro ch'án kixin:

—Tsotsenkávan chrónka nkexro tsonhen tíha. ¿Á jehe ch'án tsonhen tíha o á ókjé nkexro ní? —mé xíkaha kjuanchankí ch'án.

³⁵ La ntá tí ch'ín Felipe kjuankíxin chrónka ch'án kuēnte tí nkehe tjenchekuáxin tí ch'ín a la chrónka ch'án tí tan jina kuēnte Jesús. ³⁶ A ntá xrínahya kjuíji sín tí tjia ntā, ntá ntáchro tí ch'ín eunuco kixin:

—Tsjehé tjia ntā. ¿Á xitjahya chrókuíkítēna? —ichro ch'án.

³⁷ Na ntá ntáchro tí ch'ín Felipe kixin:

—Ti kuítekávan kaín asán la kjá jina tsikitia.

La ntá kjuátehe tí ch'ín a, ntáchro ch'án kixin:

—Títekávan kixin tí Jesucristo la Xjeen Dios —ichro ch'án.

³⁸ La ntá tí ch'ín tsíkjin Etiopía a k'uētoan ch'án tsochónhen tí carro a la ntá yóí sín mé tí ch'ín Felipe la ko tí ch'ín tsíkjin Etiopía mé k'uínkajin sín ntá kjuíankí sín ntā la tí ch'ín Felipe kuíkite ch'án tí ch'ín a. ³⁹ La ntá kjuíxin k'uaxrjenkí sín ntā la ntá tí Nchakuen Ìnchéni sátsíkiko tí ch'ín Felipe ókjé. A ntá k'uíkonhya kichó sín inaá. Ntá kjónté xíkaha la tí ch'ín eunuco sákjuí ch'án la antsí chéhe asén ch'án. ⁴⁰ A ntá tí ch'ín Felipe xrínahya kjuíji chjasin Azoto. Ntá nkák'atsínka ch'án la chjasin la í chjasin la chrónka ch'án itén Ìnchéni kixin nkexrí tsaáxin sín hasta kjuíji ch'án chjasin Cesarea a.

* 8:33 8.32–33 Isaías 53.7–8

9

*Tí nkehe kónhen ch'ín Saulo
(Hch. 22.6-16; 26.12-18)*

¹ A ntá tí ch'ín Saulo la imá tjinkaon ch'án chrók'óyán ch'án tí sín tinkáchónki Ìnchéni Jesús. Méxra sákjuítsjehe ch'án tí ch'ín nchat'á t'etqan.

² Ntá kjuanchia ch'án ijnko xroon kixin ts'áyéhe ch'án kjuachaxin kixin sátsji ch'án tí nínko chjasin Damasco tsjeyá ch'án tí sín kuákja ntja nixin mé tí sín ntoa la ko tí síchjin la tsotsé ch'án sín la ntá sátsjiko ch'án sín chjasin Jerusalén. ³ La ntá kjuíji ch'án chjinaxón chjasin Damasco, a ntá xrinaḡhya titàya ikui ijnko xrohi t'inkaséyan kuixin nkaya nkajní k'uqantatjen ch'án a. ⁴ A ntá ch'ín Saulo mé kjuítsínka ch'án nonte, a ntá kuínhin ch'án nixja ijnko nkexro kixin:

—Saulo, Saulo, ¿nkekuènte ninkákonna xritjéyá tí janhan?

⁵ A ntá ch'ín Saulo kjuanchankí ch'án kixin:

—¿Xá nkexro jaha?

Ntá tí tan mé kjuáteḡhe, ntáchro kixin:

—Janhan mé Jesús, mé tí nkexro xritjéyá jaha. ⁶ T'àya sáttja. T'ixenhén tí chjasin Damasco, ntá ntiha mé tsinhín nkehe sích'e —ichro tí ch'ín Jesús a.

⁷ La ntá tí sín k'uáájiko ch'ín Saulo la imá chrakon sín. Kuínhin sín tí itén tí nkexro kjánchó k'uíkonhya sín ninkexró. ⁸ La ntá tuénxín k'uàya ch'ín Saulo ntá kuakitjenkí ch'án ikon ch'án kjánchó t'íkonhya ch'án. A ntá tí sín xriko ch'án tinkátséhe sín itja ch'án sákjuíko sín ch'án chjasin Damasco. ⁹ A ntá ntiha kjuák'e ch'án la iní yaon k'uíkonhya ch'án la ko kjaxin kjónehya ch'án la ko ninkehó k'uíhya ch'án.

¹⁰ A ntá chjasin Damasco mé kjuák'e ijnko ch'ín tinkáchónki Ìnchéni it'in Ananías. La ntá titàya k'uíkuèn ch'án Ìnchéni ntáchro kixin:

—Ananías.

A ntá ch'ín Ananías mé kjuáteḡhe ch'án kixin:

—Ntihi tjenni, Ìnchéni.

¹¹ Ntá ntáchro Ìnchéni kixin:

—T'inkatjen sáttja tí ntja it'in Ntja Ntoí. Ntá tió tsjasán ntqo ch'ín Judas tjanchankíhí sín á ntahya itjen ijnko ch'ín tsíkjjxin chjasin Tarso me it'in ch'án Saulo. Jehé ch'án mé tjechrónóana ch'án. ¹² A ntá titàya k'uíkuèn ch'án kixin tsjiji ijnko ch'ín it'in Ananías ts'ixenhen ch'án tsjak'etja tja ch'án chrítaón kja tí jehe ch'án kixin xik'ikon ch'án inaá —ichro Ìnchéni.

¹³ Ntá kuínhin ch'ín Ananías tíha ntá ntáchro ch'án kixin:

—Ìnchéni náhi, tsjihyani kixin ó kuínhinni chrónka nchónhya chojni kixin nkexrí xéhe tí ch'ín a. Imá tsjé nkehe jehya jína kjuích'ehe ch'án tí sín kuítekaon tí jaha chjasin Jerusalén. ¹⁴ A ntá jie la ó kjuí ch'án ntihi kixin tsík'áyéhe ch'án kjuachaxin kuènte nchat'á t'etqan kixin tsotsé ch'án kaín tí sín tinkáchónki ihnjá.

¹⁵ Kjánchó Ìnchéni ntáchro kixin:

—Sáttja. Janhan kjuéyá tí ch'ín a kixin tsjako ch'án tanná. Tsjakohe ch'án tí sín ókjé nación la ko tí sín rey la ko kjaxin tí sín israelita. ¹⁶ Janhan tsjakoḡa ch'án kixin nchónhya tsjasóte ch'án kixin tsinkáchónkina ch'án.

¹⁷ A ntá ch'ín Ananías sákjuí ch'án tí nchia itjen ch'ín Saulo la ntá k'uixenhen ch'án. La ntá kjuak'etja tja ch'án chrítaón ikja tí ch'ín Saulo la ntáchro ch'án kixin:

—Kíchóni Saulo, Ìnchéni Jesús, tí nkexro k'uúikuan tí ntjia k'uinkaxian, mé k'uëtuanna kjujha kíxin sintak'ikuan ínaá la ko ts'ayéhé Nchakuen ch'án —ichro tí ch'ín Ananías a.

¹⁸ Ntá tuénxín k'uanojtjénxín ikon ch'ín Saulo ijnko nkehe éxí kjøe koche xíkaha. Ntá xík'ikon ch'án ínaá. La ntá k'uínkatjen ch'án la ko kuíkite ch'án. ¹⁹ La ntá chr'éxín ntá kjóne ch'án la ntá ikjan asén ch'án ínaá. Ntá kuítóhe ch'án iso yaon k'uéjóko ch'án tí sín tinkáchónki Ìnchéni chjasin Damasco.

Kjuako ch'ín Saulo chjasin Damasco

²⁰ Na ntá kjuankíxin ch'ín Saulo kjuakoxín ch'án iso nínko Israel kíxin Jesús mé Xjeen Dios. ²¹ La kaín tí sín tjejótinhin imá chrakon sín la ntáchro sín kíxin:

—¿Á jehya tí ch'ín i tjinkaon sinchek'itjáyan ch'án kaín tí chojni tinkáchónki Jesús chjasin Jerusalén? ¿Á jehya tí xra a kjujxín ch'án ntihi kíxin tsotsé ch'án sín la sátsjiko ch'án sín tí tjejó tí sín nchat'á t'etoan? —ichro sín.

²² Kjánchó antsí má fuerte kjuako ch'ín Saulo kíxin chaxín tí ch'ín Jesús mé tí Cristo. La tí sín judío k'uéjó chjasin Damasco kjuachaxín sín ch'án.

Kjuachahya tí sín judío chrótsé sín tí ch'ín Saulo

²³ Na ntá ó k'uátsínka nchónhya yaon ntá tí sín judío kjuenkayáxin sín nkexrí chrók'óyán sín tí ch'ín Saulo. ²⁴ A ntá ó kuínhin ch'án nkehe kjuenkayáxin sín. A ntá nchakotjin la ko tie tjejóchónhen tí sín chrók'óyán tí jehe ch'án tí ntója ts'axrjéxín ch'án chjasin. ²⁵ A ntá tí sín tinkáchónki Ìnchéni mé kjuak'enkaya sín tí ch'ín Saulo ijnkontaxra jíé ijnko tie. Ntá kjuinkajjínxín sín tíntaxra tjenkáya tí ch'ín Saulo nóton tí tjat'ó tsík'antatjen tí chjasin a. Ntá kuaá ch'án.

Ch'ín Saulo sákjuí chjasin Jerusalén

²⁶ Ntá tí kjujji ch'ín Saulo chjasin Jerusalén ntá tjinkaon ch'án chrókójnkotséko ch'án tí sín tinkáchónki Ìnchéni. Kjánchó kaín sín chrakonhen sín ch'án kíxin kuítékakonhya sín kíxin á chrókóchaxín kjaxín ch'án tinkáchónki ch'án Ìnchéni. ²⁷ A ntá ch'ín Bernabé mé sákjuíko ch'án tí ch'ín Saulo tí tjejó tí sín apóstol la ntá chrónka ch'án kíxin ch'ín Saulo mé tsík'ikon ch'án Ìnchéni tí ntjia sákjuí ch'án ntá Ìnchéni mé nixjehe ch'án. Méxra chjasin Damasco k'uékjako ch'án ihnié Ìnchéni la chrakonhya ch'án. ²⁸ Méxra ch'ín Saulo kuítóhe ch'án chjasin Jerusalén la ko k'uájiko ch'án tí sín a. La chrakonhya ch'án kjuako ch'án kjuachaxiën ihnié Ìnchéni Jesús. ²⁹ La ikjo ch'án tí sín judío nixja nkiva griego. A ntá jehe sín la tjinkaon sín chrók'óyán sín tí jehe ch'án. ³⁰ A ntá tí sín kíchó ní tinkáchónki Cristo mé tsíkinhin sín nkehe chrókónhen ch'án la ntá sákjuíko sín ch'án tí chjasin Cesarea la k'uëtuënhen sín ch'án sátsji ch'án chjasin Tarso.

³¹ Na ntá tí sín tinkáchónki Ìnchéni kuenté estado Judea, la ko estado Galilea, la ko estado Samaria la kjuaxróxin k'uéjó sín la antsí má tinkáchónki sín Ìnchéni. K'uéchóntha sín kjuasáyé Ìnchéni la ko tí Nchakuen Dios kjuínkítsa sín la ntá antsí má sítinkákótsjé sín.

Ch'ín Eneas kuítóhe ch'án jína

³² Na ntá tí ch'ín Pedro xritsjehe ch'án kaín tí sín tinkáchónki Ìnchéni. Kjàxin sákjuitsjehe ch'án tí sín kíchó ni tjejó chjasin Lida. ³³ Ntiha mé k'uitja ch'án ijnko ch'ín it'in Eneas. Ijní nánó tjetsinkaták'á ch'án cama kixin tsík'en toté ch'án. ³⁴ Na ntá ntáchro ch'ín Pedro kixin:

—Eneas, Jesucristo mé sintakitoha jína ijie. T'inkatjen tjatsìyan camá —ichro ch'án.

Na ntá ch'ín Eneas tuénxín k'uínkatjen ch'án. ³⁵ La kaín tí sín síin chjasin Lida la ko chjasin Sarón k'uíkon sín kixin kuitohe ch'án jína la ntá kjàxin sín kuinkáchónki sín Ìnchéni.

Ó xechón tjan Dorcas

³⁶ A ntá tí yaon a mé kjuák'e ijnko tjan chjasin Jope tinkáchónki tjan Ìnchéni mé it'in tjan Tabita. Ntá nkìva griego la mé t'axrjexín kixin Dorcas. A ntá tí tjan a mé jína kjuích'e tjan tí k'uékjak'e tjan la kjuínkìtsa tjan tí chojni nòa. ³⁷ Ntá ijnko yaon imá kónihi tjan ntá ik'uén tjan. La ntá kjuínchek'ónti sín cuéropé tjan la ntá tí yóxin piso noi kjuak'e sín tjan. ³⁸ Tí chjasin Jope mé chjino tí chjasin Lida la mé ntiha kjuák'e ch'ín Pedro. A ntá tí sín tinkáchónki Ìnchéni mé nohe sín kixin ntiha tjen ch'án. Ntá ichr'án sín iyó chojni tsontáche sín ch'án kixin tjoka itsji ch'án í sinchexrjenhya ch'án, tsixro sín.

³⁹ Na ntá sákjuíko sín ch'ín Pedro. Ntá kjuíji sín ntiha ntá tuénxín sákjuíko sín ch'án tí tjen tí cuéropé tí tjan tsík'en. La ntaha tjejó kaín chojni chjin k'án imá tsjánka sín. La kjuako sín tí iké sín tsíkjon tí tjan Dorcas tí naxa kjuák'e tjan. ⁴⁰ A ntá k'uetoan ch'ín Pedro kixin kaín sín ts'axrje sín ntója. Na ntá kjuák'exín toch'in ch'án nixjehé ch'án Dios. Ntá komá ch'án tí tjan tsík'en ntá ntáchro ch'án kixin:

—Tabita, t'aya.

Ntá kuakitjenkì tjan ikon tjan ntá k'uíxon tjan kixin ntaha itjen ch'ín Pedro ntá k'uàya tjan, kjuák'etjaxin tjan. ⁴¹ A ntá itsé ch'án itja tjan la k'uínkatjen tjan. La ntá k'uíyehé ch'án kaín tí sín tinkáchónki Ìnchéni la ko kjàxin kaín chojni chjin k'án kixin ntá ts'ikon sín kixin ó xíxechón tjan. ⁴² Na ntá kaín sín síin chjasin Jope mé kónohe sín tí kjuaxroan kjuích'e ch'ín Pedro ntá itsjé sín kuinkáchónki Ìnchéni. ⁴³ A ntá ch'ín Pedro kuitohe ch'án itsjé yaon tí chjasin a la kjuák'e ch'án ntøe ch'ín Simón, ijnko ch'ín nchentá tjøe iko.

10

Ch'ín Pedro la ko ch'ín Cornelio

¹ Chjasin Cesarea kjuák'e ijnko ch'ín it'in ch'án Cornelio. Jehe ch'án mé capitán k'uetoenhen tí sín soldado italiano. ² Tí ch'ín a la imá jína ch'án la kaín tí sín kjéhya ch'án mé imá xraxinkaon sín Dios. Kjàxin kjuanjon ch'án nchónhya chichaon kixin tjinkaon ch'án tsjinkìtsa tí sín judío la ko xráxin nixjehé ch'án Dios. ³ La ntá ijnko yaon las tres kónjín titàya k'uíkuèn ch'án ijnko ángel kuènte Dios k'uíxenhen tí tjen ch'án ntáchro kixin:

—Cornelio.

⁴ A ntá tí ch'ín Cornelio komá ch'án tí ángel la chrakon ch'án kjuanchankíhi ch'án kixin:

—¿Nkehe tjinkávan jaha? —ichro ch'án.

Ntá ntáchro tí ángel kixin:

—Dios kóxrjínhin kixin tí nixjehé ch'án la ko tí jína ch'e tjinkìtsa tí sín nòa.

⁵ Ntá jaha tétuènhén jnkojín chojni sátsji chjasin Jope kixin tsjikakjín sín

ch'ín Simón k̄j̄axin it'in ch'án Pedro. ⁶ Itjen ch'án nt̄ōe ijnko ch'ín k̄j̄axin it'in Simón. Tí ch'ín a mé nchentá t̄j̄ōé iko. Mé tjen nt̄ōe ch'án ch̄jinaxón tí nt̄ayaon a.

⁷ Ntá tió sák̄j̄ui tí ángel nix̄j̄ehe ch'ín Cornelio la ntá j̄ehe ch'an k'uíȳehe ch'án yaá sín ch'ehe ch'án x̄r̄a la ko ijnko ch'ín soldado k̄j̄axin x̄raxinkaon Dios, la chón̄tehe sín k̄juasáya k̄íchó sín. ⁸ Ntá k̄juixin chénka ch'án kaín sín tí nkehe k'uíkon ch'án ntá k'uet̄uēnhen ch'án sín sáts̄ji sín ch̄jasin Jope.

⁹ Í jnko yaon chr'ēx̄in ch̄jina chonk̄ix̄in t̄j̄ej̄oyá sín nt̄ja ch̄jino ch̄jasin Jope ntá ch'ín Pedro mé k'uit'ót̄jen ch'án chr̄ítaón nchia k̄ix̄in ntaha nix̄j̄eex̄in ch'án Dios. ¹⁰ Ntá imá k'uén ch'án k̄jinta la t̄j̄inkaon ch'án chrók̄j̄one ch'án. Nachrohe tsoch̄j̄án tí nkehe sine ch'án la ntá tit̄aya k'uíkuēn ch'án nkehe ¹¹ mé k'uíkon ch'án k̄ix̄in xit̄j̄ehe nkaya nkaj̄ní ntá ntiha k'uínkaj̄inx̄in ijnko ka j̄ié. Kanoé punté tí ka t̄j̄ej̄ote. ¹² Tí nkaxenhen tí ka a t̄j̄inká ko noó toté la ko konche la ko kaín ko x̄rit̄jaká. ¹³ Ntá kuín̄hin ch'án nix̄ja ijnko nkexro ntáchro ch'án k̄ix̄in:

—Pedro, t'àya, t'oyán tí ko a ntá inte.

¹⁴ Ntá ch'ín Pedro k̄juát̄ehe ch'án k̄ix̄in:

—Náhi, Ìnchéni. Nunca neh̄yani tí nkehe t̄juáhya.

¹⁵ Ntá k̄juát̄ehe tí tan inaá ntáchro k̄ix̄in:

—Tí nkehe ó k̄juín̄chet̄j̄oá Dios. La ntáchrohya k̄ix̄in t̄juáhya —ichro ch'án.

¹⁶ X̄ikaha kónhen iní veces ntá tuén̄x̄in sák̄j̄ui tí ka nkaya nkaj̄ní. ¹⁷ Ntá ch'ín Pedro nax̄a t̄jenkayáxin ch'án nkehe t'ax̄r̄j̄ex̄in tí k'uíkon ch'án la x̄r̄inahya ó kui tí sín ichr'án ch'ín Cornelio ntója nchia. Ó tsík̄j̄anchankí sín nketí t̄jen nt̄ōe ch'ín Simón. ¹⁸ Ntá k̄juanchankí sín itsen k̄ix̄in:

—¿Á ntihi t̄jen ch'ín Simón k̄j̄axin it'in ch'án Pedro?

¹⁹ Nax̄a t̄jenkayáxin tí ch'ín Pedro tí nkehe k'uíkon ch'án ntá Nch̄akuen Dios chrónka k̄ix̄in:

—Ts̄j̄ehé ó kui iní sín x̄rit̄j̄eyá tí jaha. ²⁰ T'àya t'inkaj̄ián sá̄t̄j̄ikoa tí sín a. Tóxakuanhya jaha, janhan mé kuét̄uān̄h̄an sín ikui sín —ichro Nch̄akuen Dios.

²¹ Ntá k'uínkaj̄in tí ch'ín Pedro tí t̄j̄ej̄ó tí sín a ntá ntáchro ch'án k̄ix̄in:

—Janhan tí nkexro x̄rit̄j̄eyárá. ¿Nkehe tí t̄sonhen t̄j̄inkáonr̄á?

²² Ntá k̄juát̄ehe sín ntáchro sín k̄ix̄in:

—K'uet̄ōan tí ch'ín capitán Cornelio ikuini ntihi. J̄ehe ch'án me ijnko chojni imá j̄ina la ko x̄raxinkaon ch'án Dios. Kaín tí sín judío t̄j̄ikosáyehe ch'án la ko t̄j̄uēhe sín ch'án. Ijnko ángel kuēnte Dios mé nix̄j̄ehe ch'án chénka ch'án k̄ix̄in chrók̄'uíȳehe ch'án tí jaha k̄ix̄in chrók̄juia nt̄ōe ch'án la ntá chrókuin̄hin ch'án tí nkehe tsontáchrua —mé x̄ikaha chrónka sín.

²³ Na ntá tí ch'ín Pedro k̄juanj̄on k̄juachaxin k̄ix̄in ntahó chrók'ok'éhe sín ti tie a. Ntá kóyaon ntá sák̄j̄uiko ch'án sín. K̄j̄axin iso sín tinkáchónki Ìnchéni t̄j̄ej̄ó ch̄jasin Jope mé sák̄j̄uikotox̄in sín.

²⁴ Na ntá í jnko yaon a k̄juíji sín ch̄jasin Cesarea. Ntiha chónhen tí ch'ín Cornelio la ko k̄j̄axin kaín sín k̄j̄ehya ch'án la ko tí sín chóxin ch'án. K'uíȳehe ch'án tí j̄ehe sín k̄ix̄in tsin̄hin sín. ²⁵ Ntá tió k̄juíji tí ch'ín Pedro nt̄ōe tí ch'ín Cornelio ntá k'uax̄r̄j̄ex̄in ch'án nchia nix̄j̄ehe k̄íchó sín. Ntá k̄juák'ēx̄in toch'in tí ch'ín Cornelio nkayakon tí ch'ín Pedro la k̄juikosáyehe ch'án. ²⁶ A ntá tí ch'ín Pedro k̄juín̄chek'inkat̄jen ch'án tí ch'ín a la ntáchro ch'án k̄ix̄in:

—T'inkat̄jen. T̄jak'ēxián totá. Janhan mé ijnko chojni éx̄í tí jaha.

²⁷ **A** ntá kjuixin ikjo sín la ntá k'uixenhen sín ntøe ch'án la ntá k'uikon tí ch'ín Pedro kixin nchónhya chojni tsikójnkotsé ntiha. ²⁸ Ntá ntáchro ch'án kixin:

—Jahará nohará kixin tí jeheni judíoni chóntahyani kjuachaxin tsojnkotsékoni chojni ókjé la ko chóntahyani kjuachaxin ts'ixenhenni ntøe chojni ókjé. Kjánchó Dios kjuakona kixin xitjahya tsontáxrjan kixin tjuáhya nijnko chojni. ²⁹ Méxra tió k'uíyanará la tjoka k'uinka. Tjínkavan chrókónona kixin nkekuènte k'uíyanará.

³⁰ Ntá kjuátøhe ch'ín Cornelio ntáchro ch'án kixin:

—K'uátsínka tí noó yaon ntá tí hora kjuák'eni ntihi ntøeni kjónehyani la nixjeheni Dios. Ntá xrinahya k'uíkonni ijnko chojni chóna iké tjákini. ³¹ La ntáchro ch'án kixin: “Cornelio, ó kuínhin Dios tí nkehe nixjehé ch'án la ó nohe ch'án kixin imá tjínkítsa jaha tí chojni nða. ³² Méxra tétuènhén chojni sátsji chjasin Jope kixin tsjakakjín sín tí ch'ín Simón mé kjaxin it'in ch'án Pedro. Itjen ch'án ntøe ijnko ch'ín mé kjaxin it'in Simón nchentá ch'án tjoé iko. Chjino tí ntayaon a itjen ntøe ch'án,” ichro tí ángel. ³³ Méxra xikaha tjoka ichr'anni sín tsíkjeýá sín tí jaha. Jína k'uinka ntøeni. Ntá ijie ó nohe Dios kixin kaín ni tjínkaonni tsinhinni nkehe tí k'uøtuånhan Ìnchéni tsochronka tsinhinni.

Ch'ín Pedro kjuakøhe ch'ín Cornelio ntøe ch'án

³⁴ Ntá ntáchro ch'ín Pedro kixin:

—Ijie ó t'íkuan kixin jnkokón t'ikon Dios kaín xín chojni. ³⁵ Tí nkexro kaín nación titekaon la chónthehe kjuasáyé Dios la mé tóxrjínhin ch'án. ³⁶ Dios mé nixjehé ch'án tí sín k'uaxrjenixin tí sín Israel la kuínhin sín tí tan tjanjon kjuaxróxin chrónka Ìnchéni Jesucristo. Jehé ch'án mé Ìné ch'án kaín nkehe. ³⁷ Jahará ó nohará jína kaín tí nkehe tsikónhen nkuixín tí tjejó tí sín judío mé kjuankixin estado Galilea tió kjuixin kjuako ch'ín Juan kixin t'ichjánxin tsikite chojni. ³⁸ Jahará ó nohará kixin Dios kjuanjon kjuachaxièn ch'án la ko Nchakuen ch'án k'uáyéhe tí ch'ín Jesús tí nkexro tsíkjin chjasin Nazaret. Ó nohará kixin tí ch'ín Jesús mé k'uáji ch'án ntiha la tí nkehe jína kjuích'e ch'án kixin kjuínchekitøhe ch'án jína kaín chojni tjasótéxin kaín tí kjuachaxièn tí jínahya. Mé xikaha jína kjuích'e ch'án kixin Dios tjeko tí jehé ch'án. ³⁹ **A** ntá jeheni mé chaxín k'uíkonni kaín tí nkehe kjuích'e tí ch'ín Jesús tí estado Judea la ko tí chjasin Jerusalén. **A** ntá chr'éxin kjuak'enkani sín ch'án ijnko ntacruz la k'óyán sín ch'án. ⁴⁰ **A** ntá Dios kjuínchexechón ch'án tí nixin yaon la kjuanjon ch'án kjuachaxin kixin k'uíkonni ch'án inaá. ⁴¹ Jehya kixin kaín chojni chrók'uikon sín ch'án. Náhí. Jehó tí sín tsíkjeýá Dios kixin ts'ikon chaxín xechón ch'án. Jeheni kjónekoni ch'án la ko k'uíkani ch'án tió xíxechón ch'án inaá. ⁴² K'uøtuån ch'án kixin jeheni tsjakøhèni chojni la tsochronkani kixin jehé ch'án mé tí nkexro juez sinchekitøexín ijie tí sín tjejóchón la ko tí sín ó tsík'en. ⁴³ Kaín tí sín k'uéchronka itén Dios mé chronka sín kixin jnkojnko tí sín tinkáchónki Jesús mé ts'ókika ch'án ijie sín —ichro ch'ín Pedro.

Tí sín jehya judío k'uáyéhe sín Nchakuen Dios

⁴⁴ Naxa tjenixja ch'ín Pedro ntá kaín tí sín tjejótinhin tí nkehe kjuako ch'án k'uáyéhe sín tí Nchakuen Dios. ⁴⁵ Ntá tí sín judío kjuikotoxin ch'ín Pedro la chrakon sín kixin Dios mé kjuanjon Nchakuen ch'án, kjaxin k'uáyéhe tí sín jehya judío. ⁴⁶ Méxra kuínhin sín nixja sín jnkojnko nkíva

ókjé la ko kuínhin sín tjanchehe sín Dios kjuasáya. ⁴⁷ Ntá ntáchro ch'ín Pedro kixin:

—Jehe sín ó k'uáyéhe sín tí Nchakuen Dios xikaha jeheni. Ntá chrókjuanjoni kjuachaxin kixin tsikite sín —ichro ch'án.

⁴⁸ La ntá k'uetōan ch'ín Pedro kixin tsikite kaín sín kjuachaxién ihnié Jesucristo. Ntá tí sín kuíkite mé kjuanchia sín kixin chrókuitōhe tí ch'ín Pedro ntiha iso yaon.

11

Nixjehe ch'ín Pedro tí sín tinkáchónki Cristo chjasin Jerusalén

¹ Na ntá tí sín tsíkjejá Ìnchéni la ko kaín tí sín tinkáchónki Ìnchéni k'uéjé estado Judea mé kuínhin sín kixin tí sín jehya judío ó tinkáchónki sín itén Dios. ² Na ntá ch'ín Pedro ikjan ch'án chjasin Jerusalén. La ntá iso tí sín judío tinkáchónki sín Ìnchéni tjonta sín ch'án. ³ Kjuanchankíhi sín ch'án ntáchro sín kixin:

—¿Nkekuènté kjuítsjehé tí sín jehya judío, la ko kjóntekoa tí jehe sín? —mé xikaha kjuanchankí sín.

⁴ Ntá tí ch'ín Pedro kjuankixin ch'án chrónka ch'án desde tí xrankixín kaín nkehe tsíkónhen ch'án. Ntáchro ch'án kixin:

⁵ —Janhan mé kjuak'é chjasin Jope kjuak'énixjahā Dios. La ntá titāya k'uíkuen ijnko ka jié k'uínkajinxin nkaya nkajni. Kanoé punté tí ka tjejóte la kjuak'e chjino tí tjén. ⁶ Ntá tsjahā jína tí nkehe la k'uíkuan kixin tí nkaxenhen tí ka tjínká ko noó toté la ko iko nteje la ko konche la ko iko xritjaká. ⁷ La kjaxin kuínhan itén ijnko nkexro nixjana ntáchro ch'án kixin: “Pedro, t'āya t'oyán tí ko a ntá inte.” ⁸ A ntá kjuātāhā kixin: “Náhi, Ìnchéni. Nunca nehyani tí nkehe tjuáhya.” ⁹ A ntá kjuātehe tí tan kuixin nkaya nkajni a inaá chrónka kixin: “Tí nkehe a mé ó kjuínchetjóá Dios. La ntáchrohya kixin tjuáhya,” ichro ch'án. ¹⁰ Xikaha kónhen iní veces. Ntá sákjuí kaín tí nkehe a nkaya nkajni inaá. ¹¹ Ntá xriñghya tuénxín kjuíji iní chojni ntoa tí nchia tjejóni. Tsíkixín sín chjasin Cesarea xritjejá sín tí janhan. ¹² Tí Nchakuen Dios mé k'uetōan kixin sáchrókjuikian sín la chrókoxakonahya. Kjaxin sákjuikian injon tí sín kichó ni tjejó i. Kaínni k'uixenhenni ntōe tí ch'ín a. ¹³ A ntá tí ch'ín ntōe ntiha mé chrónka ch'án kixin k'uíkon ch'án ijnko ángel tjexín toté la nixja ntáchro kixin: “Tétuēnhén chojni sátsji chjasin Jope kixin tsjikakjín sín ijnko ch'ín it'in Simón la ko kjaxin it'in ch'án Pedro. ¹⁴ Jehe ch'án mé tsonixjahā ch'án tsochrónka ch'án nkexrí tsaá jaha la ko kaín tí sín kjéhya.” ¹⁵ Ntá kjuankixian nixjahā sín na ntá ó kui tí Nchakuen Dios k'uáyéhe sín éxi k'uáyéheni tí senó a. ¹⁶ Na ntá xraxinkaonni tí nkehe k'uénixja Ìnchéni. K'uéntáchro ch'án kixin: “A ntá chaxín ch'ín Juan intā ó kuíkítexín ch'án chojni, a ntá ijie jahará tsikitiaxínrá tí Nchakuen Dios.” ¹⁷ Éxi xikaha jeheni tió kjuankixin kuinkáchónkini Ìnchéni Jesucristo ntá kjuanjon Dios Nchakuen ch'án k'uáyéheni mé xikaha ijie la kjuanjon Dios tí Nchakuen ch'án k'uáyéhe tí jehe sín kjaxin. ¿Xá nkexro tí janhan kixin chrókjuánjonkian Dios? —ichro ch'ín Pedro.

¹⁸ A ntá tí sín kichó ni tjejó chjasin Jerusalén kuínhin tí nkehe tsíkónhen ntá tání sín ntá kjuanchehe sín kjuasáyé Dios. Ntáchro sín kixin:

—Kjuanjon Dios kjuachaxin kjaxin kixin tí sín jehya judío ts'áyéhe sín kjuachaxin kixin tsinkáchónki sín Dios la ko tsakja sín kjuachón jnkochríxín —mé xikaha ichro sín.

Tí n̄nko chjasin Antioquía

¹⁹ Tí kjuixin k'uen ch'ín Esteban ntá kjuankíxin sín chónkíhi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayaon la ko sákjuí sín chjasin Antioquía. Kjuakohe sín tí sín judío nkexrí tjen tí tan jína. ²⁰ A ntá tí sín jehya judío la náhi. ²⁰ A ntá í so sín tinkáchónki Ìnchéni tsíkjiixin chjasin Chipre la ko tsíkjiixin sín Cirene sákjuí sín chjasin Antioquía. Tió kjuíji sín ntiha mé kjuakohe sín tí sín jehya judío nkexrí tjen tí tan jína kuènte Ìnchéni Jesucristo. ²¹ Tí kjuachaxin kuènte Ìnchéni mé chóna tí jehe sín; méxra nchónhya tí sín ntiha mé kuítóhe sín tí nkehe k'uékinkáchónki sín ntá kuítekaon sín Ìnchéni Jesús.

²² Tí sín tinkáchónki Ìnchéni chjasin Jerusalén mé kuínhin sín nkehe tsíkónhen chjasin Antioquía. Ntá ichr'án sín ch'ín Bernabé sákjuí ch'án ntiha. ²³ Ntá tió kjuíji ch'án ntiha ntá k'uikon ch'án kixin Dios imá kjuinkitsa tí sín ntiha kjaxin. Ntá imá kóchéhe asén ch'án. Ntá nixjehe ch'án sín kixin kaín asén sín ts'ejó sín tsinkáchónki sín Ìnchéni. ²⁴ Ch'ín Bernabé la ijnko chojni imá jína asén la antsí chóna ch'án Nchakuen Dios la jína tinkáchónki ch'án; méxra kóchjina nchónhya sín kuinkáchónki sín Ìnchéni.

²⁵ Kjuixin tíha a ntá ch'ín Bernabé sákjuí ch'án chjasin Tarso sákjuíkjoyá ch'an tí ch'ín Saulo. ²⁶ Ntá tió k'uitja ch'án ntá sákjuiko ch'án chjasin Antioquía. Ntá k'uejóko sín tí sín tinkáchónki Ìnchéni ntiha kuenté ijnko nánó la kjuakohe sín itsjé chojni. Ntiha chjasin Antioquía kjuankíxin sín kuikítexín sín tí sín tinkáchónki Cristo mé ihnié cristiano.

²⁷ A ntá iso sín chrónka itén Dios sákjuíxin sín chjasin Jerusalén la kjuíji sín chjasin Antioquía. ²⁸ Ijnko ch'ín it'ín Agabo k'uínkatjen ch'án kjuák'exín toté ch'an tí tsíkójnksé tí sín tinkáchónki Jesús la kjuachaxién Nchakuen Dios chrónka ch'án kixin tsokjinta nkuíxín ntiha. Tí nkehe chrónka ch'án mé chaxín kónhen tió kjuák'e ch'ín Claudio k'uetōan ch'án. ²⁹ A ntá tí sín tinkáchónki Ìnchéni chjasin Antioquía kjuenkayáxin sín kixin jehe sín tsjinkitsa sín tí sín kichó sín tinkáchónki Ìnchéni estado Judea. La jnkoinko sín kjuanjon sín tí nkehe chóna sín. ³⁰ Mé xikaha kjuenájín sín chichaon sákjuiko ch'ín Bernabé la ko ch'ín Saulo chjéhe sín tí sín t'ayakonhen n̄nko estado Judea.

12

Ik'uéen ch'ín Jacobo la ko kjuák'echjina ch'ín Pedro

¹ A ntá tí yaon a tí ch'ín rey Herodes mé ntá kjuankíxin ch'án kónínkakonhen ch'án tí sín tinkáchónki Jesús. ² La k'uetōan ch'án kixin tí ch'ín Jacobo ts'enxín ijnko chica espada tjate. Jehe ch'án mé kichó ch'án tí ch'ín Juan a. ³ Ntá k'uikon ch'ín Herodes kixin imá kóchéhe tí sín judío kixin xikaha kónhen la ntá kjaxin itsé ch'án tí ch'ín Pedro. Tíha mé kónhen tí yaon kia pascua tió kjóne sín niotja chóntahya tí xroan nchek'ánkí niotja. ⁴ Kjuixin itsé ch'ín Herodes tí ch'ín Pedro ntá chr'áxehen ch'án ntogechiso. Ntá ntiha mé tjejónta noó grupo soldado la mé noó soldado jnkoinko grupo. Kjuenkayáxin ch'ín Herodes kixin tsjixin ts'átsínka tí kia pascua ntá sátsjiko ch'án tí ch'ín Pedro tí sín tí sín israelita kixin ts'ikon kuenté chjasin ntiha kixin nkexrí its'en ch'án. ⁵ Méxra ch'ín Pedro naxa tjechjina

ch'án la ntaha sínta sín ch'án, la ntá kaín tí sín tinkáchónki Ìnchéni la tjejónixjehe sín Dios kaín asén sín kixin tsjinkitsa Dios tí ch'ín Pedro.

Dios kjuínkítsa ch'ín Pedro k'uaxrjexín ch'án ntøechiso

⁶ Tí tie a mé kjuenkayáxin ch'ín Herodes kixin tsoyaon ntá tsakitsje ch'án ch'ín Pedro sátsjiko ch'án tí sín tí sín chjasin. A ntá ch'ín Pedro tjejua ch'án la nánánko tí jehe ch'án tjejó yaá soldado la chróntetoxín tja ch'án yaá chica cadena. Ntá í so sín soldado a tjejónta sín ntója ntøechiso. ⁷ A ntá xrínahya tuénxín ikui ijnko ángel kuènte Ìnchéni, a ntá tí nkaxenhen ntøechiso imá k'uínkaséyan ijnkòyé ntiha. Kjuak'etja itja tí ángel tí chjia ch'ín Pedro kjuínchekjayehe ch'án. Ntá k'uetoan tí ángel ntáchro kixin:

—Tjoka t'áya.

La ntá tí chica cadena tjejóchróntetoxín itja ch'ín Pedro mé k'uánótjen. ⁸ Ntá xík'etoan tí ángel ntáchro kixin:

—T'inkaya iká la tjanka tokatá.

Ntá kuítekaon ch'ín Pedro la kjatæe xík'etoan tí ángel ntáchro kixin:

—T'ítsate iká ntá chréhe sátsjini —ichro ch'án.

⁹ Ntá ch'ín Pedro chréhe ch'án iton tí ángel a ntá noehya ch'án á chaxín xikaha kónhen tí nkehe kjuích'e tí ángel o náhí. Ntáchro ch'án kixin ách'e ijnko nkehe k'uíkonxón ch'án. ¹⁰ Ntá kjuixin k'uátsínka sín tí tjejó tí soldado saoxín la kjuixin xík'atsínka sín tí tjejó tí soldado a yóxin. La ntá kjuíji sín ijnko puerta chica ijié chjinaxón ntja. La ntá tí puerta chica la jehó xitjehe. Ntá k'uaxrje sín tjejótti sín ijnko ntja la ntá xrínahya tí ángel ó sákjuí la ntá jehó ch'ín Pedro kuítóhe ch'án. ¹¹ A ntá tí ch'ín Pedro kónohe ch'án kixin chaxín kónhen tíha. Ntá ntáchro ch'án kixin:

—Ntá ó noheni kixin chaxín Ìnchéni tsíchr'án tí ángel kuènte ch'án kixin sinchekaáni kixin ts'óyánhyani ch'ín Herodes la ko tsoenhyani kaín tí nkehe tjinkaon tí sín judío —ichro ch'án.

¹² Ntá ó nohe ch'án kaín nkehe kónhen ch'án ntá sákjuí ch'án ntøe ijnko tjan María, ìné ch'ín Juan kjaxin tikítexín sín Marcos. Ntaha tsikójnkotsé itsje sín tinkáchónki Ìnchéni tjejónixjehe sín Dios. ¹³ La ntá t'ínka ch'án tí puerta chjinaxón ntja la nixja ch'án. La ntá ijnko tjan it'in Rode k'uaxrje tjan kjuitsjehe tjan kixin nkexro tíha. ¹⁴ A ntá tíó kjuátsøan tjan itén ch'ín Pedro ntá k'uitjáyenhen tjan kuakitjeehya tjan tí ntója a kixin imá kóchéhe tjan. Kuinká tjan sákjuíchrónka tjan kixin ntója puerta ntíha itjen ch'ín Pedro. ¹⁵ Ntá ntáchro sín kixin:

—Lontia.

La naxa chrónka tjan kixin chaxín jehe ch'án ntá xíntáchro sín kixin:

—Jehya jehe ch'án. Kjá tí xrintøe ch'án.

¹⁶ A ntá ch'ín Pedro naxa t'ínka ch'án tí ntója puerta la ntá tíó kuakitjehe sín la k'uíkon sín ch'án ntá chrakon sín. ¹⁷ A ntá kjuakoxín ch'ín Pedro itja ch'án kixin tsotání sín ntá chrónka ch'án kixin Ìnchéni mé kuakitsjexín ch'án ntøechiso. Ntá k'uetoan ch'án ntáchro ch'án kixin:

—Chenkará ch'ín Jacobo la ko kaín kíchó ní nkehe k'uátsínka janhan —ichro ch'án ntá sákjuí ch'án ókjé.

¹⁸ Ntá tí kóyaon a imá kóxakonhen tí sín soldado a kixin noehya sín nketí sátsíkji ch'ín Pedro. ¹⁹ La ntá k'uetoan ch'ín Herodes kixin sátsjikjeyá sín ch'án, kjánchó k'uitjahya sín ch'án. A ntá tí sín soldado kuamá sín tíha ntá k'uetoan ch'ín Herodes kixin its'en sín. Na ntá kjuixin tíha ntá ch'ín

Herodes k'uaxrjexín ch'án estado Judea ntá sákjuí ch'án chjasin Cesarea la ntiha kjuák'e ch'án.

Ik'uén ch'ín Herodes

²⁰ A ntá ch'ín Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokoá kjuenkayáxin sín kixin sátsjitsjehe sín ch'án. Ntaha itjen ijnko ch'ín it'in Blasto k'uàyakonhen ch'án ntøe ch'ín Herodes ntá kjuanchehe sín ch'án kixin tsonixjayákonhen sín ch'án tí ch'ín t'etøan. Kjuanchia sín kixin chrókónínkakuenhya sín ch'ín Herodes kixin naxa tsochr'án ch'án tí nkehe sine sín kixin chjasén ch'án sitixín tí nkehe ine sín. ²¹ Ntá ch'ín Herodes k'uíyehø ch'án sín kixin tsojnkotsé sín ijnko yaon. Ntá jehe ch'án k'uítsá ch'án ka náxrjón kuènte chojni t'etøan la kjuák'enkáya ch'án ijnko silla kuènte chojni t'etøan. La ntá kjuankíxin ch'án nixjehø ch'án tí sín tsíkójnkotsé. ²² A ntá tí sín a kjuankíxin k'uèya sín, ntáchro sín kixin:

—Jehya chojni tjenixja. Dios tjenixja —ichro sín.

²³ A ntá tuénxín ijnko ángel kuènte Ìnchéni kjuíncheníhi ch'ín Herodes kixin kjuíncheyøhø ch'án asén ch'án Dios. La ntá kosjntø kjóne nkaya tsee ch'án ntá k'uén ch'án.

²⁴ La ntá itsjé chojni tinkáki nhin itén Dios la nkuíxin tinkákótsjé tí sín tinkáchónki Ìnchéni.

²⁵ La ntá tí ch'ín Bernabé la ko tí ch'ín Saulo ó kjuixinhin sín ixra kuènte sín chjasin Jerusalén la ntá sákíki sín chjasin Antioquía la sákjuíko sín ch'ín Juan mé kjaxin tikítexín sín ch'án Marcos.

13

Ch'ín Saulo la ko ch'ín Bernabé sákjuíkjako sín

¹ A ntá tí nínko chjasin Antioquía la síin iso sín nixja sín itén Dios la kjuakohe sín chojni. Tí sín tjako mé ch'ín Bernabé la ko ch'ín Simón, kjaxin it'in ch'án Negro, la ko ch'ín Lucio, chjasen ch'án mé Cirene, la ko ch'ín Manaén, ijnko ch'ín tsík'ánkíko ch'ín Herodes tí ch'ín t'etøan estado Galilea, la ko ch'ín Saulo. ² Ijnko yaon la tjejótojnkotsé sín xraxinkaon sín Dios la kjónehya sín. Ntá Nchakuen Dios mé ntáche ch'án sín kixin:

—Tsakitsjekjan ch'ín Bernabé la ko ch'ín Saulo kixin ó kjuéyá sín tsjánjuan ijnko xra sich'e sín.

³ Ntá nixjehø sín Dios la kjónehya sín la ntá kjuixin ntá k'uejotja tja sín chritaón ikja tí sín a la nixja sín jnkójnko sín kixin ó sátsji sín.

Ch'ín Pablo la ko ch'ín Bernabé tjako sín nonte Chipre

⁴ A ntá tí Nchakuen Dios ichr'án ch'ín Bernabé la ko ch'ín Saulo sákjuí sín chjasin Seleucia. Ntá ntaha k'uíxenhén sín ijnko ntabárco sákjuí sín ijnko nonte it'in Chipre. ⁵ Ntá kjuíji sín ijnko puerto it'in Salamina. Ntaha kjuakoqxín sín itén Dios tí nínko kuènte tí sín judío. Kjaxin kjuíjiko sín ch'ín Juan kixin tsjinkítsa ch'án. ⁶ La ntá sákjuí sín nkuíxin nonte Chipre hasta kjuíji sín chjasin Pafos. Ntaha xéta sín ijnko ch'ín nchexroan me ijnko ch'ín judío it'in Barjesús. Jehe ch'án kjuích'ia ch'án ntáchro ch'án kixin kjaxin ch'án nixja ch'án itén Dios. ⁷ A ntá tí ch'ín nchexroan a mé kjuák'eko ch'án tí ch'ín gobernador Sergio Paulo. A ntá tí ch'ín gobernador mé imá jina kjuenkayáxin ch'án. K'uíyehø ch'án tí ch'ín Bernabé la ko tí ch'ín Saulo kixin jehe ch'án tjinkaon ch'án tsinhin ch'án itén Dios. ⁸ A ntá tí ch'ín nchexroan, nkíva griego mé tikítexín sín ch'án

Elimas, mé nínkakonhen ch'án tí sín tjako a kixin tjinkakonhya ch'án kixin tí ch'ín t'etöan chrókuitekaon ch'án Ìnchéni. ⁹ A ntá tí ch'ín Saulo, kjaxin tikítexín sín ch'án Pablo, imá chóna ch'án Nchakuen Dios. La ntá komá ch'án tí ch'ín nchexroan. ¹⁰ Ntáchro ch'án kixin:

—Jaha mé chojni ch'ía, jínahya, xjeen Diablo la nínkakonhén kaín nkehe jína. ¿Nkekuente kixin ch'éna jínahya tí ntja ntoá kuènte Ìnchéni? ¹¹ A ntá ijie la Ìnchéni sintakjasótia. Tsitöha ntakótán iso yaon la ts'ikonhya tí xrohi kuènte yaon —ichro ch'ín Pablo.

Ntá tuénxín tí ch'ín Elimas la k'uúxitie tjen ch'án. La ntá kjueyá ch'án ijnko nkexro tsinkátséhe tja ch'án sátsjiko ch'án kixin t'ikonhya ch'án. ¹² A ntá xíkaha mé k'uúkon tí ch'ín gobernador nkehe kónhen la ntá kjuankixin tinkáchónki ch'án Ìnchéni kixin k'uúkon ch'án tí kjuachaxin kuènte Ìnchéni.

Ch'ín Pablo la ko ch'ín Bernabé tjejó chjasin Antioquía estado Pisidia

¹³ Ntá tí ch'ín Pablo la ko tí sín xriko ch'án sákjuúxín sín chjasin Pafos. K'uixenhen sín ntabárco sákjuú sín kjuúji sín chjasin Perge estado Panflia. Ntá ntaha ch'ín Juan* kúitöhe tí jehe sín ntá kjan ch'án chjasin Jerusalén. ¹⁴ Ntá sákjuúxín ch'ín Pablo la ko ch'ín Bernabé chjasin Perge kjuúji sín chjasin Antioquía chjinaxón Pisidia. A ntá tí yaon t'ok'éhe sín ntá k'uixenhen sín tí nínko Israel na ntaha k'uéjótjaxín sín. ¹⁵ Ntá kjuixin kjuínchekuáxín sín tí xroon kuènte ley la ko tí nkehe tsíkjin tí sín k'uéchrónka itén Dios ntá tí sín t'etöan kuènte nínko mé k'uúyehé sín tí sín a ntá ntáchro sín kixin:

—Kíchóni tí chonta nkehe tsochronka kixin antsí má tsochéheni la chronka jie tsinhinni —ichro sín.

¹⁶ Ntá ch'ín Pablo k'uúkatjen ntá kjuakoxín itja ch'án kixin tsotání sín. Ntá ntáchro ch'án kixin:

—Chrókuinhínra jahará chojni israelita la ko kjaxin chrókuinhínra jahará tsíkjinra chjasin ókjé tí chaxín tjinkáonra nchexiteyéherá Dios. ¹⁷ Tí Dios tinkáchónki tí sín chjasin Israel mé kjueyá ch'án tí sín tsík'axreníxinni. Ntá chr'éxín Dios kjuanjón kjuachaxin kixin chrókótsjé tí jehe sín tí naxá k'uéjé sín chjasin Egipto. Éxí chojni tsíkjinín ókjé k'uéjé sín a ntá chr'éxín ntá kjuachaxién Dios kjuínkítsa sín k'uaxrjexín sín tí nonte ntiha ínaá. ¹⁸ Dios kjuínkítsa sín tí cuarenta nánó k'uéjé sín tí nteje. ¹⁹ Ntá chr'éxín kjuínchek'itjáyan ch'án yato nación k'uék'ejó nonte Canaán, kixin tí sín tsík'axreníxinni chrók'uáyéhe tí nonte a. ²⁰ Ntá kaín sín k'uéjé sín ntiha ijnko cuatrocientos cincuenta nánó. K'uék'etöan tí sín juez hasta ikjuí tí ch'ín Samuel ijnko ch'ín k'uéchrónka itén Dios. ²¹ Ntá kjuanchia tí sín israelita ijnko ch'ín rey ts'etuenhen sín. Ntá kjueyá Dios tí ch'ín Saúl la k'uetoan ch'án cuarenta nánó. Jehe ch'án it'é ch'án mé ch'ín Cis la k'uaxreníxín ch'án ch'ín Benjamín. ²² Ntá chr'éxín Dios kuakitsjehe ch'ín Saul tí xra kjuák'e ch'án ntá k'uáyéhe ch'ín David tí xra rey. Ntá ntáchro Dios kixin: “Ó k'uújtá ch'ín David, it'é ch'án mé Isaí. Jehe ch'án mé ijnko chojni nchexàna mé sinchexiteyàna ch'án kaín nkehe tjínkavan”. ²³ Ijnko tí chojni k'uaxreníxín tí ch'ín David mé Jesús. Tíha la Dios tsíchr'án ch'án kixin sinchekaá tí sín israelita. Mé xíkaha tsíntáchro ch'án. ²⁴ Naxá tjakohya ch'ín Jesús ntá ch'ín Juan kjuako ch'án tí tan kuínhin tí sín israelita la ntáchro ch'án kixin chrókjan sín chrórxaxinkaon sín Dios ntá chrokuikite sín. ²⁵ Ntá chjina its'en ch'ín Juan ntá ntáchro ch'án kixin: “Janhan na jehya tí nkexro tjenkayáxinra. Náhí. Chr'éxín na itsi í jnko

* 13:13 Hechos 12.25

nkexro la chrókósuàna chrókjuasintanka tí correa tokaté ch'án kixin antsí mé t'etoan tí jehe ch'án la kánhyó t'etoan tí janhan,” mé xikaha tsintáχρο ch'ín Juan.

²⁶ 'Jahará kichó ni tsík'axrjeníxinrá ch'ín Abraham tinhínrá la ko kaín rá chojni tsíkjixín ikjín nchexiteyéherá Dios, tinhínrá tí tán tsaáxinrá. ²⁷ Méxra tí sín k'uék'ejó sín chjasin Jerusalén la ko tí sín t'etoan ntiha mé kónoehya sín nkexro tí ch'ín Jesús la ko kuienxínhya sín tí nkehe tsíkjin tí sín k'uéchrónka itén Dios senó tió kjuínchekuáxin sín tí xroon tí nkaxenhen nínko jnkojnko tí yaon t'ok'éhe sín. Mé xikaha jehe sín tió kjuínchekjasóte sín tí ch'ín Jesús la kjuínchexiteyá sín éxi nixja tí xroon a. ²⁸ Ntá k'uitjahya sín ninkehó jje kixin chrók'uen ch'án ntá kjónté kjuanchehe sín tí ch'ín Pilato kixin ts'etoan ch'án kixin its'en ch'án. ²⁹ A ntá ó xiteyá tí nkehe tsíkjin tí sín ósé kuènte ch'án. Ntá kjuixin k'uén ch'án ntá kjuinkajinxín sín tí cuerpo kuènte ch'án tí ntacruz ntá kjuavá sín ch'án. ³⁰ A ntá Dios kjuínchexechón tí jehe ch'án inaá. ³¹ A ntá nchónhya yaon k'uíkon sín ch'ín Jesús tí sín k'uék'ajiko ch'án tió sákjuixin sín estado Galilea la sákjuí sín chjasin Jerusalén. A ntá ijie tí sín a mé tjeiónixja sín nkexrí kjuako ch'ín Jesús, tjakohe sín kaín chojni.

³² A ntá jie jeheni tjakoni tí tan jína, mé tí nkehe tsíkjanjon Dios tsík'áyéhe tí sín tsík'axrjeníxinni ósé. ³³ Mé xikaha xiteyá k'uáyéheni tí jeheni tsík'axrjeníxinni tí sín a. A ntá Dios kuènte tí sín a mé kjuínchexechón tí ch'ín Jesús éxi nixja tí xroon yóxin Salmo, ntáχρο kixin: “Jaha mé xjanna. Janhan mé tjahá kjuachón jie.”† ³⁴ Ntá tsintáχρο Dios kixin sinchexechón ch'án tí ch'ín Jesús kixin tsoxíkahya cuérpóé ch'án. Mé xikaha chrónka tí xroon itén Dios. Ntáχρο kixin: “Janhan mé sintaxiteyá tí nkehe chaxín tjanka ch'ín David.”‡ ³⁵ La ko í jnko Salmo mé ntáχρο xikihi: “Jaha tsjánjonhya kjuachaxin kixin tsoxíka tí cuérpóé tí nkexro tjóá kjuít'aha xra.”§ ³⁶ A ntá ch'ín David kjuínchexiteyá ch'án éxi tsík'etoan Dios tí kjuák'e ch'án ntá kjónté chr'éxin ik'uén ch'án ntá xravá ch'án xikaha k'uéxravá tí sín tsík'axrjeníxinni la ntá kjónté la xíka ntóe ch'án. ³⁷ A ntá tí cuérpóé tí nkexro kjuínchexechón Dios la kótjehya. ³⁸ Méxra kichó ni t'ichjánxin tsonohará kixin nkexrí tsjin ijíará kixin Jesús mé k'uenyákonhánrá. ³⁹ A ntá kaín nkexro tinkáchónki Jesús mé ó kjuínchetjóá ch'án asén sín. A ntá tí ley k'uetoan ch'ín Moisés kjuachahya kótjuáxin tí jje. ⁴⁰ Chrókóxakonhanrá kixin chrókuànhyará xikaha éxi tsíkjin tí sín ósé xikihi:

⁴¹ Tsjehérá jahara chojni titekakonhya. Ijie la tsochraconrá kixin nkehe tsonhen

kixin janhan Dios tsjákoxiān ijnko nkehe jie ijnko yaon kjánchó tsitekákonhyará kjónté ókjé nkexro chróchrónka.*

⁴² A ntá ch'ín Pablo la ko tí nkexro k'uájiko ch'án k'uaxrjexín sín nkaxenhen tí nínko, a ntá chrónða tí sín jehya sín judío tsíkókjéxin, kjuanchia sín kixin í jnko semana tí yaon t'ok'éhe sín la inaá tsochrónka ch'án éxi tí kjuako ch'án. ⁴³ Ntá tí kjuixin xíkaxín sín tí kójnkotsé sín tí nínko ntá nchónhya tí sín judío, la ko tí sín jehya sín judío, mé tí sín na ntá kuinkáchónki sín éxi tí sín judío la xraxinkaon sín Dios, la mé imá kóxrjnhjn sín tí nkehe kjuako ch'ín Pablo la ko ch'ín Bernabé

la ntá sákjuíchréhe sín. A ntá jehe sín mé k'uetōan sín kixin antsi jina chrókuinkáchónki sín tí Dios tjuèhe kaín chojni.

⁴⁴ A ntá í jnko semana kjuèxin, tí yaon t'ok'éhe sín la kójnkotsé kaín tí sín síin tí chjasin ntiha kixin tjinkaon sín tsinhin sín itén Dios. ⁴⁵ A ntá k'uikon tí sín judío a kixin nchónhya chojni tsikójnkotsé, ntá imá kóchjinoxínhin sín, ntá kjuankixin sín k'uántaxínhin sín tí ch'ín Pablo. ⁴⁶ A ntá ch'ín Pablo la ko ch'ín Bernabé la íchá antsi má chrakonhya sín nixja sín ntáchro sín kixin:

—T'ichjánxin senó jahará judiorá chrókuinhínrá itén Dios. Kjánchó tjinkákonhyará tsinhínrá tí nkehe jina tsjanjon kjuachón jnkochrixin. A ntá ijie la tsitohará tí jahara judiorá la ntá jeheni la sátsjini tsjakoheni tí sín jehya judío ⁴⁷ xikaha tsík'etōan Ìnchéni. Ntáchro ch'án kixin: Janhan ichr'an tí jahará éxí xrohi ts'inkaséyanxín kaín nación kixin sátsjikoará tí tan tsjanjon kjuachón tsaáxin chojni hasta tí antsi má kjin kjuèxin chjasintajni.†

Mé xikaha k'uetōan Dios.

⁴⁸ A ntá kuínhin tí sín jehya sín judío tíha la kjuankixin kóchéhe sín la ntáchro sín kixin tí tan kuènte Ìnchéni la nkehe jina, ichro sín.

La ntá kjuankixin kuinkáchónki kaín tí sín tsíkitoenzín sín kixin tsochóna sín kjuachón jnkochrixin. ⁴⁹ Ntá xikaha xrankixin xrako tí itén Ìnchéni nkuixín tí chjasin ntiha. ⁵⁰ A ntá tí sín judío nixjehe sín iso chojni chjin jina tjetōan la ko tí chojni ntoa t'etōan tí chjasin ntiha la ntá kjuínchekónínkaon tí sín a la ntá kjuankixin sín chrók'óyán sín tí ch'ín Pablo la ko tí ch'ín Bernabé ntá sákjuíxin sín chjasin ntiha. ⁵¹ A ntá jehe sín la kótsjénka sín tōkaté sín kixin tsoxénjin tí nche chóna toté sín. Tíha mé kjuakoxin sín kixin ntoáhya kjuenkayáxin tí sín a. A ntá sákjuí tí jehe sín chjasin Iconio. ⁵² Ntá tí sín tinkáchónki Ìnchéni la imá chéhe sín kixin antsi chóna sín Nchakuen Dios.

14

Ch'ín Pablo la ko ch'ín Bernabé tjejó chjasin Iconio

¹ Ntá kjuíji ch'ín Pablo la ko ch'ín Bernabé tí chjasin Iconio. Ntá k'uixenhen sín ninkōe tí sín judío ntá jina kjuako sín. La ntá nchónhya tí sín judío la ko tí sín jehya judío mé kuítekaon sín tí nkehe kjuako sín. ² A ntá iso tí sín judío kuítekakonhya la ntá kjuankixin nchekónínkaon sín tí chojni jehya judío kixin tsonínkakonhen sín tí sín tjako. ³ A ntá tí sín tjako la isé kuítóhe sín ntiha la chrakonhya sín nixja sín la ko tinkáchónki sín Ìnchéni Jesús. La ntá Ìnchéni kjaxin kóxrjínhin ch'án tí nkehe nixja sín kixin nkexrí tjuèheni Dios la kjuanjon ch'án kjuachaxin tsjasin sín kjuaxroan. ⁴ A ntá tí sín tjejó chjasin ntiha la jnkokónhya kjuenkayáxin sín. Iso sín kuítekakonhen sín tí sín judío la í so sín kuítekakonhen sín tí sín tsikjeyá Ìnchéni. ⁵ A ntá tí sín judío la ko tí sín jehya judío mé kjuenkayáxinko sín tí sín t'etōan kixin sinchechrakon sín tí sín tsikjeyá Ìnchéni la ko tsochjéhe sín xro. ⁶ La ntá tí ch'ín Pablo la ko tí ch'ín Bernabé kónohe sín nkehe kjuenkayáxin tí sín a ntá sákjuí sín chjasin Listra la ko chjasin Derbe estado Licaonia la nkuixín ntiha. ⁷ La kjaxin ntaha kjuako sín tí tan jina kuènte Ìnchéni.

Chjéhe sín xro ch'ín Pablo chjasin Listra

† 13:47 Isaías 42.6; 49.6

⁸ Ntá tí chjasin Listra itjen ijnko ch'ín xitjahya tji. Nunca xitjahya k'uájí ch'án kíxin tsíkókjéxín ch'án xitjahya itji ch'án. ⁹ Méxra ó tjetjaxínkoá ch'án ntá kuínhin ch'án nkehe tí tjako ch'ín Pablo. Ntá ch'ín Pablo komá ch'án tí ch'ín a ntá kónohe ch'án kíxin tí ch'ín qntsí tinkáchónki ch'án Ìnchéni kíxin tsítóhe ch'án jína. ¹⁰ Ntá jehe ch'án itsen ntáche ch'án tí ch'ín a kíxin:

—T'inkatjen, ntoá tjak'exián totá —ichro ch'án.

Ntá tuénxín k'uínkatjen ch'án, chrika ch'án, kjuák'exín ch'án toté ch'án ntá ó jína tji ch'án. ¹¹ Ntá kaín tí sín chjasin ntiha k'uíkon sín nkehe kjuíche ch'ín Pablo, ntá kaín sín k'uíyexin sín nkívee sín Licaonia ntáchro sín kíxin:

—Dios tsík'óna chojni mé tsíkixín nkajní tjejókoni ntihi —ichro sín.

¹² La ntá kjuínchek'ín sín ch'ín Bernabé mé tí dios Júpiter a ntá ch'ín Pablo mé tí dios Mercurio kíxin imá nixja ch'án. ¹³ Ntá tí ch'ín nchát'á kuènte tí dios Júpiter mé chóna ch'án nínko tí t'ixenxínni ikon chjasin ntá kjuíkao ch'án koxinta tjeteyá tsjo. A ntá jehe ch'án la ko kaín tí chojni la chréhe sín kíxin tjinkaon sín chrókjuikosáyehe sín tí sín tjako la ko tjinkaon sín chrók'óyán sín tí koxinta chrók'uáyéhe tí sín a. ¹⁴ A ntá tí sín apóstol mé ch'ín Pablo la ko ch'ín Bernabé mé kónohe sín tíha ntá kjuankíxin sín kótséchejhe sín iké sín la sákjuíkjiakjan sín tí chojni síin ntiha la t'oyako sín ntáchro sín kíxin:

¹⁵ —¿Kuènté kíxin tjejoch'erá xíkaha? Jeheni chojni éxí tí jahará. Tí xra ó kuini kíxin tsochrónkani itén Dios kíxin tsítóhéra kaín tí nkehe ninkehó sínkíhya la ntá chrókjanrá chrókuinkachónkirá Dios tjechón. Jehe ch'án mé kjuíchéna ch'án nkajní la ko chjasintajni la ko tí ntayaon la ko kaín tí nkehe síin. ¹⁶ Ntá ósé mé kuítóhe Dios chojni kíxin jehó ts'aji sín ntje sín. ¹⁷ Kjónté la Dios tjakoqxín ch'án kíxin jehe ch'án t'etóan ch'án kíxin kjuíchéna ch'án kaín nkehe. Jehe ch'án mé t'etóan kíxin ts'aniá chrin ntá ts'enkani la jína ts'óneheni, la jehe ch'án tjanjon ch'án nkehe kíxin jnkochríxín ts'ixín nkehe sineni, la ko jehe ch'án mé nchechéheni ch'án —mé xíkaha ichro ch'ín Pablo.

¹⁸ Kjónté xíkaha ichro tí sín tjako la naxa tjinkaon tí chojni chrokjuikosáyehe sín chrók'óyán sín koxinta chrókjokehe sín tí sín tjako.

¹⁹ A ntá ikui iso tí sín judío kjuixín sín chjasin Antioquía la ko chjasin Iconio. Nixjehe sín tí sín ntiha kíxin tsítóhe sín tí nkehe jehya jína tjako tí sín a ntá kónínkaon sín ntá kjuankíxin chjéhe sín xro tí ch'ín Pablo. La ntá ách'e ó kjuixín tsík'en ch'án ntá kuinkánkákjen sín ch'án sákjuíko sín ch'án ikon chjasin. ²⁰ Ntá tí sín tinkáchónki Ìnchéni mé kójnkotsé sín k'uantatjen sín tí ch'ín Pablo ntá k'uàya ch'án xíkjan ch'án tí chjasin ntiha inaá. Ntá tí yaon chr'éxín ntá sákjuíko ch'án tí ch'ín Bernabé chjasin Derbe.

²¹ A ntá ó kjuixín chrónka sín tí tan jína la ko kjuacha sín itsjé chojni kuinkáchónki Ìnchéni ntiha ntá kjan sín chjasin Listra la ko chjasin Iconio la ko chjasin Antioquía. ²² Nkuixín tí chjasin k'uátsínka sín mé kjuínchechéhe sín tí sín kuinkáchónki Ìnchéni. K'uétóan sín kíxin naxa jína chrókuinkáchónki sín Ìnchéni la ntáchro sín kíxin tí ts'ixenhenni tí kjuachaxin kuènte Dios t'ichjánxín tsjasóteni. ²³ A ntá ntiha kjueyá sín chojni jnkójnko nínko kíxin ts'etuñhen sín tí sín tinkáchónki Jesús kíxin jína ts'ejó sín. Ntá nixjehe sín Dios tí naxa kjónehya sín la ntá ntáche sín Ìnchéni kíxin ts'ayakonhen ch'án tí sín ó kuinkáchónki tí jehe ch'án.

Ch'ín Pablo la ko ch'ín Bernabé ikjan sín chjasin Antioquía estado Siria

24 Ntá chr'èxìn k'uátsínka sín estado Pisidia la ntá kjuíji sín estado Panfilia. 25 Ntá chjasin Perge kjuako sín tí tan kuènte Ìnchéni la ntá kjuixin ntá sákjuí sín chjasin Atalia. 26 Ntá ntiha k'uúixenxín sín ntabárc̄o ntá sákjuí sín chjasin Antioquía tí chjasin k'uénixjeh̄e chojni Dios k'uékjanchia sín kixin Dios tsjinkitsa tí sín a sich'e sín tí xra. La ntá ó kjuixin xiteyá. 27 Ntá tió kjuíji sín chjasin Antioquía ntá kójnkotsé kaín tí sín tinkáchónki Jesús. Ntá kjuankíxin chrónka ch'ín Pablo nkexrí kjuínkitsa Dios tí jehé sín la ko nkexrí kjuanjon Dios kjuachaxin tsjakoh̄e sín tí chojni jehya judío kixin kjaxin sín tsitekaon sín Ìnchéni. 28 A ntá tí ch'ín Pablo la ko tí ch'ín Bernabé itsjé yaon k'uéjóko sín tí sín tinkáchónki Ìnchéni ntiha.

15

Kójnkotsé sín chjasin Jerusalén

1 A ntá iso chojni tsíkixìn sín estado Judea ntá kjuíji sín chjasin Antioquía. Ntá kjuankíxin sín kjuakoh̄e sín tí sín kichó ni kixin xitjahya tsaáxin sín tí chóntahya sín tí xroye tsík'et̄oan ch'ín Moisés. 2 Ntá tí ch'ín Pablo la ko tí ch'ín Bernabé la ko tí sín judío kjuankíxin kjuanjonkoxín sín kichó sín. Ntá áxri ntá kónoxín kixin tí ch'ín Pablo la ko tí ch'ín Bernabé la ko í so chojni la sátsji sín chjasin Jerusalén. Ntaha tsonixjeh̄e sín tí sín apóstol la ko tí sín t'et̄oan n̄inko kixin nkexrí tsonhen tí xroye tsík'et̄oan ch'ín Moisés.

3 Tí sín tinkáchónki Ìnchéni chjasin Antioquía mé ichr'án sín tí sín a ntá k'uátsínka sín estado Fenicia la ko estado Samaria la tinkáchrónka sín kixin nkexrí tí sín ókjé jehya sín judío kjuitoxinhin tí k'uékjenkayáxin sín ntá kuákja sín ntj̄e Dios. Ntá kaín tí sín kichó ni imá kóchéh̄e sín tí kuínhin sín xikaha.

4 La ntá kjuíji ch'ín Pablo la ko ch'ín Bernabé chjasin Jerusalén ntá tí sín tinkáchónki Ìnchéni la ko tí sín apóstol la ko tí sín t'et̄oan kuènte n̄inko mé kjuanjon sín kjuachaxin ts'ejó tí sín a. Ntá chrónka sín kixin Dios imá kjuínkitsa tí jehé sín. 5 Ntá iso tí sín fariseo ó tsíkitekaoon Ìnchéni mé k'uínkatjen sín ntá ntáchro sín kixin:

—T'ichjánxin itsa xroye tí sín jehya judío tinkáchónki Ìnchéni la ko t'ichjánxin ts'ítuenhen sín sinchexiteyéh̄e sín kaín tí ley —ichro sín.

6 Na ntá kaín tí sín apóstol la ko tí sín t'et̄oan n̄inko mé kójnkotsé sín kjuenkayáxin sín nkexrí tsonhen kixin xikaha ichro tí sín judío. 7 Ntá imá nixjeh̄e kichó sín ntá k'uínkatjen ch'ín Pedro ntáchro ch'án kixin:

—Jahará kichó ni ó nohará nkexrí kixin senó Dios tsíkjeyá tí jeheni kixin tsjakoheni kaín tí sín jehya judío kixin tsinhin sín tí tán jina kuènte Cristo kixin kjaxin jehé sín tsitekaon sín. 8 Dios mé ó nohe ch'án nkexéhe kaín asén chojni. Kjuakoxin ch'án kixin k'uáyeh̄e ch'án tí sín jehya judío kixin chjeh̄e ch'án sín Nchakuen ch'án éxí tí xikaha k'uáyeh̄eni tí jeheni. 9 Dios la t'ikon kaín chojni jnkokón éxí tí jeheni. Ntá kjuínchetjóá ch'án asén sín kixin ó tinkáchónki sín Ìnchéni. 10 Méxrā çnkekuènté títékakonhyará tí nkehe kjuích'e Dios la ntá tétuenhénrā chojni sinchexiteyá sín kaín tí nkehe ixrā tsitekaon sín? Ni jeheni la ko ni tí sín tsík'axrjenixinni kjuachahya sín kjuínchexiteyá sín tíha. 11 Náhi. Ó noheni kixin kjuasáyé Ìnchéni Jesús mé kuaáxin la ko kjaxin xikaha kuaáxin tí jehé sín kuítekaon —mé xikaha ichro ch'ín Pedro.

¹² Ntá kaín tí sín tsíkójnkotsé tání sín kuínhin sín nkexrí chrónka tí ch'ín Bernabé la ko tí ch'ín Pablo kixin Dios kjuínkítsa sín kjuasin sín itsjé kjuaxroan k'uíkon tí sín jehya sín judío. ¹³ Kjuixin nixja ch'ín Pablo la ko ch'ín Bernabé ntá kjuankíxin nixja ch'ín Jacobo, ntáchro ch'án kixin:

—Kíchóni, tinhínrá tí nkehe tsoxrjanka. ¹⁴ Ch'ín Simón Pedro chrónka nkexrí kjuakoxin Dios kixin tjuèhe ch'án tí chojni jehya judío la nkexrí kjueyá Dios iso tí sín kixin tsinkáchónki sín tí jehe ch'án. ¹⁵ Mé xíkaha chaxín chrónka tí xroon tsíkjin tí sín k'uéchrónka itén Dios kixin:

¹⁶ Janhan mé tsokjan chr'éxin.

Tió ts'inka ntá sít'ána nixin tí nchia tsík'oya kuènte David la janhan la tsjínkítsa sín ts'etōan sín.

¹⁷ Kixin kjaxin kaín xín chojni mé tsjeyá sín Ìnchéni

la ko kjaxin kaín xín tí sín ókjé naciòn mé tí sín kótjuáxin njina mé tsinkáchónkina sín.

¹⁸ Ìnchéni mé kjuakoxin kaín tíha tí ósé la tsíkjanjon ch'án tí tan kuènte ch'án.*

Mé xíkaha ichro itén Dios

¹⁹ Méxra ntáxrjan kixin tí sín jehya judío la t'ichjánxinhya sinchexiteyá sín kuènté tí ley kixin ó kuítóhe sín tí nkehe kuinkáchónki sín senó kixin jina chrókjueyá sín Dios. ²⁰ Méxra tsochr'énhenni sín ijnko xroon la jehó ts'etūenhenni sín kixin chrókjónehya sín tí nto tsíkjokehe chojni tí nkehe tsíkjangya la ko chróchóntahya sín chojni chjin ókjé la ko chrókjónehya sín tí nto kuènte ko tsíchrínjinhya ikja va la ko chrókjónehya sín ijnié va. ²¹ A ntá jnkojnko chjasin sín nkexro chrónkaxín tí ley kuènte ch'ín Moisés nchekuáxin sín tí nkaxenhen njnko jnkojnko tí yaon t'ók'éhe sín —ichro ch'ín Jacobo.

²² Ntá kaín tí sín tsíkjeyá Ìnchéni la ko tí sín t'etōan kuènte njnko la ko kaín tí í so sín tinkáchónki Ìnchéni kjueyá sín iso chojni tsochr'án sín chjasin Antioquía, mé kjueyá sín ch'ín Judas, tjkítexín sín ch'án Barsabás, la ko ch'ín Silas sátsjiko sín ch'ín Pablo la ko ch'ín Bernabé. Tí sín a mé sín tjetōan ntiha. ²³ Ntá ichr'án sín tí xroon sákjuíko tí sín a ntáchro kixin:

“Jeheni chojni tsíkjeyá Ìnchéni la ko chojni t'etōan kuènte njnko ntihi la nixjahaaráni tí jahará, kíchó ni jehya judío, tjejorá chjasin Antioquía la ko estado Siria la ko estado Cilicia. ²⁴ Ó noheni kixin iso chojni tsíkixin chjaséni kjónté k'uéchóntahya sín kjuachaxin la kjuínchexakonhanrá sín kixin ntáchro sín kixin t'ichjánxin itsará tí xroye tsík'etōan ch'ín Moisés. ²⁵ Ntá jnkoka kjuenkayáxinni tsjeyáni nkexro tjejó ntihi kixin sáchrókjuitsjehe tí jahará la chrókjuijiko sín ch'ín Bernabé la ko ch'ín Pablo kixin imá tjuèheni sín. ²⁶ Tí sín a mé ántōsen sín kjónté chrók'uenxín sín kixin tí tinkáchónki sín Ìnchéni Jesucristo. ²⁷ Méxra tsochr'ánni ch'ín Judas la ko ch'ín Silas tsjiji sín kixin jehe sín mé tsonixjahaará sín tsochrónkaxín sín kaín tíha. ²⁸ Jina kixin Nchakuen Dios mé kjuínkítsani kjuenkayáxinni kixin jehya chrók'uetūanhanráni ijnko nkehe imá xra. Náhi. Jehó tí nkehe kánhyó xra t'ichjánxin sinchexiteyará mé t'etōanni: ²⁹ chrókjóntehyará tí iko tsíkjokehe chojni tí nkehe tsíkjangya la ko kjaxin chrókjóntehyará ijnié tí ko a la ko chrókjóntehyará tí nto kuènte tí ko tsíchrínjinhya kja la ko kjaxin ninkexró chrókuakjahya í jnko chojni chjin ókjé. Ntá tí sinchexiteyará kaín tí nkehe t'etōanni la jina ts'ejorá.” Mé xíkaha nixja tí xroon.

* 15:18 15.16–18 Amós 9.11–12

³⁰ Ntá kjuixin nixja sín ntá tí sín a sákjuí sín chjasin Antioquía. Ntá tió kjuíji sín ntiha ntá kójnkotsé tí sín tinkáchónki Jesús ntá kjuanjon sín tí xroon a. ³¹ Ntá tió kjuínchekuáxin tí sín kíchó ni tí xroon a ntá imá kóchéhe sín kixin xíkaha chrónka tí xroon a. ³² Ntá tí ch'ín Judas la ko tí ch'ín Silas kjaxin sín ó nohe sín tsochrónkaxín sín itén Dios la nixja sín jína la imá kjuínchechéhe sín tí sín kíchó ni kixin tí nkehe nixja sín. ³³ Ntá ntahó k'uéjéjó sín iso yaon, ntá tió sátsji sín ntá kaín tí sín tinkáchónki Ìnchéni nixjehe sín jína ntá ó xíkjan sín inaá tí tsíkixín sín tí tjejó tí sín tsíchr'án sín. ³⁴ Kjánchó ch'ín Silas kjuenkayáxin ch'án kixin ntahó chrókuítōhe ch'án. ³⁵ A ntá ch'ín Pablo la ko ch'ín Bernabé kuítōhe sín chjasin Antioquía. Jehe sín la ko í so chojni mé kjuako sín la ko chrónkaxín sín itén Ìnchéni.

Ch'ín Pablo kjuankíxin tí yóxin viaje

³⁶ A ntá chr'éxin ch'ín Pablo nixjehe ch'án ch'ín Bernabé. Ntáchro ch'án kixin:

—Sátsjtsjeheni tí sín kíchó ni kaín tí chjasin kjuakoxinni itén Ìnchéni ósé. Tsjtsjeheni nkexrí tjejó sín ntiha —ichro ch'án.

³⁷ A ntá ch'ín Bernabé la tjinkaon ch'án kixin kjaxin sáchrókjuiko sín ch'ín Juan kjaxin tīkītēxín sín ch'án Marcos. ³⁸ A ntá ch'ín Pablo kóxrjēnhya sátsjiko sín tí ch'ín Marcos a kixin jehe ch'án kuítōhe ch'án sín estado Panfilia la kjuínkītsahya ch'án kixin naxa tsonhen tí xra.† ³⁹ Méxra jnkokoáhya kjuenkayáxin sín la ntá xikayehe sín la ókjé sákjuí sín. Ch'ín Bernabé sákjuíko ch'án tí ch'ín Marcos la k'uixenhen sín ijnko ntabárcō sákjuí sín nonte Chipre. ⁴⁰ A ntá tí ch'ín Pablo la jehó ch'án mé kjueyá ch'án tí ch'ín Silas ntá chr'éxin sákjuí sín. Tí sín kíchó ni ntiha kjuanchehe sín Dios kixin jína ts'ayakonhen sín ch'án la ntá sákjuí sín. ⁴¹ Ntá k'uátsínka sín estado Siria la ko estado Cilicia la kjuínchechéhe sín asén tí sín tinkáchónki Ìnchéni nīnko ntiha.

16

Ch'ín Timoteo sákjuíko ch'án ch'ín Pablo la ko ch'ín Silas

¹ Ntá kjuíji ch'ín Pablo chjasin Derbe la ko chjasin Lистра. Ntá ntaha itjen ijnko ch'ín tinkáchónki Jesús it'in ch'án Timoteo. Jehe ch'án mé xjeen ijnko tjan judía tinkáchónki Ìnchéni. A ntá it'é ch'án mé ijnko ch'ín griego. ² Ntá tí sín kíchó ni tjejó chjasin Lистра la ko chjasin Iconio mé nixja sín kixin jína tí ch'ín Timoteo. ³ A ntá ch'ín Pablo mé tjinkaon ch'án sáchrókjuiko ch'án tí ch'ín Timoteo. Ntá senó k'uetōan ch'án chrókua tí ch'ín Timoteo a tí xroye kixin tsonínkakonhya tí sín judío tí chjasin sátsji sín kixin ó nohe tí sín a kixin it'é ch'ín Timoteo la mé griego. ⁴ Ntá sákjuí sín la kaín tí chjasin k'uátsínka sín la nixjehe sín tí sín kíchó ni la chrónkaxín sín tí nkehe tsík'etōan tí sín apóstol la ko tí sín t'etōan kuente nīnko chjasin Jerusalén. ⁵ Ntá tí chojni tinkáchónki Ìnchéni mé antsí má ntoá k'uéjéjó sín la ko jnkojnko yaon sitinkákótsjéjé sín.

Xrínahya titàya k'uúkuèn ch'ín Pablo ijnko chojni estado Macedonia

⁶ Ntá Nchakuen Dios kjuanjonhya kjuachaxin kixin sátsjikjako sín itén Dios estado Asia ntá k'uátsínka sín nó estado Frigia la ko estado Galacia. ⁷ Ntá tió kjuíji sín estado Misia ntá kjuenkayáxin sín sáchrókjuí sín nó estado Bitinia. Ntá Nchakuen Jesús kjuanjonhya kjuachaxin kixin sátsji

† 15:38 Hechos 13.13

sín nó ntiha. ⁸ Méxra k'uaátsínka sín ikjín tí estado Misia la ntá kjuíji sín chjasin Troas chrínta ntayaon. ⁹ Ntá ijnko tie xrínahya titàya k'uíkùèn ch'ín Pablo ijnko ch'ín estado Macedonia kjuák'exín toté ch'án chrónò ch'án kixin: "T'átsínka Macedonia tsjínkìtsani," ichro ch'án. ¹⁰ Méxra tíha tsík'ikon ch'ín Pablo la ntá tuénxín kóyaxínhinni kixin sátsjini estado Macedonia kixin kónoexínni kixin Dios kjueyáni kixin ntiha tsjakoni tí tan jína tsaáxin chojni. [Janhan tí ch'ín Lucas ikjinni tí xroon i k'uéjókotoxìnni kíchó ni ntiha.]

Ch'ín Pablo la ko ch'ín Silas, k'uéjó sín chjasin Filipos

¹¹ Ntá ntaha chjasin Troas k'uixénxínni ijnko ntabárco ntá sákjuíni ntoí ijnko nonte ntsí tinkátaón ntá it'in Samotracia. Ntá tí yaon chr'exín kjuíjini chjasin Neápolis. ¹² Ntá ntiha sákjuíxinni la kjuíjini chjasin Filipos. Tí chjasin a mé k'uéchónta tí sín romano ósé ntá ijnko chjasin antsí má tjetooan tí it'ò tí estado Macedonia. Ntaha mé k'uéjóni iso yaon. ¹³ Ntá tí yaon t'ok'éhe sín ntá k'uaxrjexínni tí chjasin Filipos ntá sákjuíni ijnko chrínta ntario mé ntiha kuèhnen sín tsojnkotsé sín tsonixjehé sín Dios. Mé ntaha k'uéjótjaxínni la kjuankíxinni kjuakoheni iso chojni chjin tsíkójnkotsé ntiha. ¹⁴ Ntá ijnko tí jehe sín mé ijnko tjan it'in tjan Lidia la tsíkìjxin tjan chjasin Tiatira. Jehe tjan mé nchekji tjan ika náxrjón kjátse tié. Ntá jehe tjan xraxinkaon tjan Dios la jína tjetinhin tjan la Ìnchéni mé kjuínkìtsa asén tjan kixin tsinhin tjan jína tí nkehe kjuako ch'ín Pablo. ¹⁵ Ntá jehe tjan la ko kaín tí sín tjejó ntøe tjan mé kuíkite sín. Ntá chrónòehé tjan tí ch'ín Pablo ntáchro tjan kixin:

—Tí chaxín tjátsoan kixin chaxín tinkáchónkini Ìnchéni la jína chrókuitøha ntøéni ntihi —ichro tjan.

Ntá kjónté kuítøheni ntiha.

¹⁶ Ntá ijnko yaon sákjuíni tí nó kuèhnen sín nixjeexín sín Dios ntá ó xétani ijnko tjan tjarisoá chóna nchakuen tí jínahya tónoexín tjan. Ó tsík'íná tjan la nchónhya chichaon tjacha tí ìnché tjan kixin xíkaha tónohe tjan. ¹⁷ A ntá tí tjan tjarisoá a kjuankíxin tjan tinkáchréhe tjan tí ch'ín Pablo la ko tí jeheni ntá t'èya tjan ntáchro tjan kixin:

—Tí sín i ch'ehe sín xra Dios nkaya nkajni la tjako sín ijnko ntja jína tsaáxin chojni.

¹⁸ Mé xíkaha kjuích'e tjan itsjé yaon. Ntá kóchjinhin ch'ín Pablo la nkátjía ch'án nixjehé ch'án tí nchakuen tí jínahya chóna tí jehe tjan, ntáchro ch'án kixin:

—Kjuachaxièn ihnié Jesucristo tétuànhan kixin ts'axrjéxian tí jehe tjan —ichro ch'án.

Ntá tuénxín ó k'uaxrjexín tí nchakuen tí jínahya tí jehe tjan.

¹⁹ Na ntá tí ìnché tí tjan a mé k'uíkon sín nkehe kónhen tjan la ó nohe sín kixin í tsjachahya sín chichaon kuènte tí xra ch'e tjan. Ntá kónínkaon sín ntá itsé sín tí ch'ín Pablo la ko ch'ín Silas la kuinkánkákjen sín sákjuíko sín tí tjejó tí síxreé ntsin tjetooan. ²⁰ Ntá kjuíkaán sín ntaha tí tjejó tí sín juez la ntáchro sín kixin:

—Tí sín i mé sín judío la imá sítjité sín chjasénni. ²¹ Tjako sín tí nkehe kuèhnyani tsonoheni la tóxrjénhyani sich'eni kixin jeheni mé chojni romanoni.

²² Kaín tí sín ntiha kónínkakohenen sín tí jehe sín. Ntá tí sín juez mé k'uøtoan ts'axrjehé sín iké sín ntá ts'ekoxín sín nta sé. ²³ Ntá tíó kjuixin k'uékon sín nchónhya ntá chr'áxehnen tí sín a ntøechiso ntá k'uøtuèhnen

sín tí ch'ín t'ayakonhen ntøechiso kixin jína chrók'uayakonhen sín tí sín a. ²⁴ Ntá tí ch'ín t'ayakonhen ntøechiso mé k'uáyéhe ch'án kjuachaxin ntá chr'áxenh ch'án tí sín a ijnko cuarto chríka ntøechiso kixin ts'axrjehya sín. Ntá chr'áxenh ch'án toté sín tí nta tjejóxrja la ko chica ye.

²⁵ A ntá tió k'áxrótjen la ch'ín Pablo la ko ch'ín Silas mé nixjehe sín Dios la ko itsje sín himno kuènte Dios. La tí sín í so tjejóchjina mé tjejóthin sín kixin xíkaha tjejóch'e sín tjejótsje sín. ²⁶ Ntá xrínahya tjian kuínki nonte la kjuínchekinki kuénté tí xrankíxixin ntøechiso ntá tuénxín kaín tí ntója puerta mé xítjehe la ko k'uánótjen tí chica cadena tsíchróntetoxín kaín tí sín tjejóchjina. ²⁷ Ntá tí ch'ín t'ayakonhen ntøechiso mé k'uàya ch'án. Ntá k'uíkon ch'án kixin síxítjehe tí ntója puerta ntøechiso a. Ntá kuakitsje ch'án chica espada ntá chrók'óyán ch'án asén ch'án kixin kjuenkayáxin ch'án kixin ó kjuixin tsíkinká kaín tí sín síchjina, ichro ch'án. ²⁸ Ntá ch'ín Pablo k'uèya ch'án itsen ntáchro ch'án kixin:

—Náhi kohya nkehe ch'ehé asán kixin kaín ni naxa tjejóni ntihyó —ichro ch'án.

²⁹ Ntá tí ch'ín t'ayakonhen ntøechiso kjuanchia kixin ts'ákjen xrohi ntá k'uíxenh ch'án kuínká ch'án la síxránka ch'án chrakon ch'án ntá kjuítsínka ch'án toté tí ch'ín Pablo la ko tí ch'ín Silas. ³⁰ Ntá tuénxín kuakitsjexín ch'án sín ntiha ntá kjuanchankíhi ch'án sín kixin:

—¿Nkexrí chrókjuít'a kixin chrókuaána? —ichro ch'án.

³¹ Ntá kjuátehe sín ntáchro sín kixin:

—Títekáván Ìnchéni Jesucristo la tsaá jaha la ko tí sín tjejó ntøa.

³² Ntá kjuakohe sín tí jehe ch'án a la ko kaín tí sín tjejó ntøe ch'án ti tan kuènte Ìnchéni. ³³ Na kjónté sítié la tí hora a sákjuíko ch'án sín kjuínchek'íjmá ch'án tí tsíchrít'ò sín. Ntá tuénxín jehe ch'án la ko kaín xín sín tjejó ntøe ch'án mé kuíkite sín. ³⁴ Na ntá chr'éxin tí jehe ch'án sákjuíko sín ntøe ch'án. Ntá ntiha kjuanjón ch'án nkehe sine sín. Imá chéhe ch'án la ko kaín tí sín ntøe ch'án kixin ó kuítekaon sín Dios.

³⁵ Ntá kóyaon nchítjen ntá tí sín juez k'uètuènhén sín tí sín policía sátsjitsjehe sín tí ch'ín t'ayakonhen ntøechiso kixin chrókjuanjón ch'án kjuachaxin ts'axrje ch'ín Pablo la ko ch'ín Silas. ³⁶ Ntá tí ch'ín t'ayakonhen ntøechiso mé chénka ch'án tí ch'ín Pablo tí nkehe chrónka sín ntáchro ch'án kixin:

—Tí sín juez a mé tsík'etøan sín kixin tsjánjuan kjuachaxin kixin sátsjirá. Méxra sátsjirá kjuaxróxin —mé xíkaha ichro tí ch'ín a.

³⁷ Ntá ch'ín Pablo ntáche ch'án tí sín policía kixin:

—A ntá jeheni kjónté chojni romanoni mé kjuateni sín nkayakon nchónhya chojni. Jehya kixin chrókjuanchia sín nke jie chóntani. Náhi. Kjónté la chr'áxenhenni sín ntøechiso. A ntá ijje la zá imó chrókuakitsjeni sín ní? Náhi. Tsijija tí jehe sín tsakitsjeni sín —ichro ch'án.

³⁸ Ntá tí sín policía mé sákjuíchénka sín tí sín juez nkehe ntáchro tí sín tjejóchjina. Ntá imá chrakon sín kixin kuínhin sín kixin tí sín a mé chojni romano. ³⁹ A ntá sákjuí tí sín juez ntá chrónøehé sín tí ch'ín Pablo la ko ch'ín Silas kixin tsonínkakonhya sín kixin xíkaha kónhen sín ntá k'uaxrjexín sín ntiha ntá chrónò tí sín a sátxixin sín tí chjasin ntiha. ⁴⁰ Ntá ch'ín Pablo la ko ch'ín Silas tió k'uaxrjexín sín tí ntøechiso ntá kjuíji sín ntøe tí tjan Lidia. Ntá tió kjuixin sákjuítsjehe sín tí sín kichó ni la kjuínchehéhe sín ntá sákjuíxin sín ntiha.

17

Kónínkaon tí chojni chjasin Tesalónica

¹ Ntá ch'ín Pablo la ko ch'ín Silas la k'uátsínka sín chjasin Anfípolis la ko chjasin Apolonia ntá kjuíji sín chjasin Tesalónica. Ntaha itjen ijnko nínko judío. ² A ntá ch'ín Pablo sákjuí ch'an nínko éxí kuènhen ch'án la jnkojnko yaon t'òk'éhe sín chjina iní semana ikjo ch'án tí jehe sín la chrónkaxín ch'án nkexrí ntáchro xroon itén Dios. ³ Kjuako ch'án kixin tí nkexro Cristo mé t'ichjánxin its'en la ko chr'éxin tsoxechón ch'án inaá. Ntáchro ch'án kixin:

—Tí ch'ín Jesús a mé jeheni chrónkaxínni kixin tsinhínra jahará mé Cristo tíha.

⁴ A ntá iso tí sín judío kuítekaon sín ntá k'uíto sín tí ch'ín Pablo la ko tí ch'ín Silas. Ntá kjaxin kuítekaon itsjé tí sín griego xraxinkaon Dios a la ko kjaxin nchónhya chojni chjin tjetooan kuítekaon. ⁵ A ntá iso tí sín judío tinkáchónkihya Ìnchéni mé imá kóchjio sín ntá kójnkotséko sín iso chojni jínahya ch'e, ch'ehya sín xra, ixri ntja. Ntá kaín sín k'uúixité sín la kjuínchexakonhen sín tí sín siín chjasén sín. Ntá itsjé sín k'uúixenhen sín ntøe ijnko ch'ín it'in Jasón kjueyá sín ch'ín Pablo la ko ch'ín Silas kixin tjínkaon sín sáchrókjuikohe sín tí sín a tí sín t'etooan. ⁶ A ntá k'uitjahya sín tí sín a ntá kjónté itsé sín tí ch'ín Jasón la ko í so tí sín tinkáchónki Ìnchéni ntá kuínkánkákjen sín sákjuíko sín tí sín tí síxreé tí chjasin ntiha. Ntaha nínkaon sín k'uèya sín ntáchro sín kixin:

—Tí sín i mé kjuínchexakonhen chojni kuenté chjasintajni. La ntá ó kjui sín chjasénni ntihi kjaxin. ⁷ La ntá tí ch'ín Jasón a mé kjuanjon ch'án kjuachaxin kixin tí sín a mé ts'ejó sín ntøe ch'án. Kaín sín titekakonhya sín tí ley kuènte tí ch'ín romano t'etooan. Ntáchro sín kixin itjen í jnko nkexro antsí má t'etooan, ntá tíha mé Jesús —ichro sín.

⁸ Ntá tió kuínhin kaín tí sín tsíkójnkotsé la ko tí síxreé ntá k'uúixité sín kónínkaon sín. ⁹ Ntá ch'ín Jasón la ko tí sín tjejóko ch'án kjuenka sín ntá tí síxreé kuítóhe sákjuí sín.

Ch'ín Pablo la ko ch'ín Silas sákjuí sín chjasin Berea

¹⁰ Ntá tuénxin tí tie a tí sín kichó ni mé ichr'án sín ch'ín Pablo la ko ch'ín Silas kixin sátsji sín chjasin Berea. Ntá tió kjuíji sín ntaha k'uúixenhen sín tí nínkoé tí sín judío. ¹¹ A ntá tí sín judío ntiha la antsí má jina asén sín, ntá tí sín chjasin Tesalónica la náhi. Antsí má kóxrjínhin sín tsinhin sín tí itén Dios la jnkojnko yaon kjuínchekuáxin sín tí xroon chóna itén Dios kixin tsonhe sín á chaxín ntoá xíkaha tí ntáchro tí sín a. ¹² Méxra nchónhya tí jehe sín kuítekaon sín la ko kjaxin nchónhya tí chojni chjin griego tjetooan mé kuítekaon la ko kjaxin tí chojni ntoa. ¹³ A ntá tí sín judío chjasin Tesalónica kónohe sín kixin ch'ín Pablo mé kjuakoxin itén Dios chjasin Berea inaá. Ntá sákjuí sín ntiha a ntá kjuínchekóninkaon tí sín a. ¹⁴ A ntá tí sín kichó ni tinkáchónki Ìnchéni ichr'án sín tí ch'ín Pablo sátsji nó chrínta ntayaon. A ntá ch'ín Silas la ko ch'ín Timoteo naxa kuítóhe sín tí chjasin Berea. ¹⁵ Ntá iso tí sín ntiha sákjuíko sín tí ch'ín Pablo la kjuíji sín tí chjasin Atenas. Ntá kjan sín chjasén sín kixin k'uetooan ch'ín Pablo kixin tsochrónka sín kixin tjoka chrókóxakonhen tí ch'ín Silas la ko tí ch'ín Timoteo tsjiji sín ntiha tsoxéta sín ch'án.

Ch'ín Pablo itjen chjasin Atenas

¹⁶ Ntá nachrohe kjuák'echónhen ch'ín Pablo kixin itsji tí ch'ín Silas la ko tí ch'ín Timoteo chjasin Atenas ntá imá k'uává asén ch'án kixin k'uikon ch'án kixin tí chjasin ntiha sín nchónhya tí nkehe tsíkjanoya. ¹⁷ Ntá tí njnko ntiha kjuakohé ch'án iso sín judío la ko iso tí chojni xraxinkaon Dios. La kaín yaon ntasin kjuák'e ch'án kjuakoxén ch'án tí chojni sín ntiha. ¹⁸ La iso tí sín kjuínchekuáxin tí xroon kuènte tí chojni it'in epicúreo la ko iso tí sín kjuínchekuáxin tí xroon kuènte tí chojni it'in estoico kjuankíxin nixjehe sín tí ch'ín Pablo. Iso sín ntáchro sín kixin:

—¿Nkekuènté kixin ánta tjenixja tí nkexro a?

La í so sín ntáchro sín kixin:

—Méxra tjenixja ch'án kuènte í jnko dios.

Mé xikaha ichro sín kixin kjuako ch'ín Pablo tí tán jína kuènte Jesús la ko kjuako ch'án kixin Jesús kjónté k'uén ntá xechón. ¹⁹ Ntá sákjuiko sín ch'ín Pablo ijnko tjo it'in Areópago. Ntiha mé kuènnen sín tójnkotsé sín kixin tjenkayáxixin sín. Ntá nixjehe sín tí ch'ín Pablo, ntáchro sín kixin:

—Tjinkaonni tsochronka tí nkehe njxin kjuíkoa. ²⁰ Itsjé tí nkehe ókjé tjetjákua la tjinkaonni tsonoheni nkehe t'axrjexín kaín tíha —ichro sín.

²¹ Ntá kaín tí sín chjasin Atenas la ko tí sín tsíkjin ókjé tjejó ntiha mé tóxrjénhya sín í jnko xra, jehí tóxrjinhin sín chrókuinhin sín la ko chrónixja sín ijnko nkehe njxin.

²² Ntá ch'ín Pablo k'uínkatjen ch'án kjuák'exín toté ch'án tí sín tí jehe sín chrítaón tí Tjo Areópago. Ntá ntáchro ch'án kixin:

—Jahará tjejorá chjasin Atenas tinhínrá. Janhan ó k'uíkuan kixin jahará la itsjé dios tinkachónkirá. ²³ Ntá tí kjuak'é ntiha k'uájia la k'uíkuan itsjé tí nketí tjásixínrá culto ntá k'uitja ijnko altar ts'inixín kixin: “Ntihi xraxinkakonxínni ijnko Dios naxa chónhyani”. Méxra tí Dios xráxinkáonrá kjónté naxa chonhyará mé tí Dios a mé tjákoará.

²⁴ Tí Dios mé kjuích'ena ch'án chjasintajni la ko kaín nkehe sín chjasintajni. Jehe ch'án mé inché nkajni la ko chjasintajni. La tjexenhya ch'án ijnko njnko tsíkjhich'énaxín chojni tja. ²⁵ La t'ichjánxienhya ch'án kixin chojni chrókuinkítsa tí jehe ch'án kixin jehe ch'án mé chjéhe kjuachón kaín chojni la ko tjanjon ch'án xrinto la ko kaín nkehe sín.

²⁶ Kaín tí nación k'uaxrjenixín jnkokoá chojni kixin chrók'uejó sín nkuixín chjasintajni. Kjaxin chrónka Dios nkesá la ko nketí ts'ejó chojni. ²⁷ Méxra jeheni t'ichjánxín tsjeyáni Dios kixin ntá tsienxínni nkexrí ts'itjani ch'án. Jehya imá ikjín itjen ch'án, chjino tí tjejóni itjen ch'án. ²⁸ Jehe ch'án tjejóchónxinni ch'án la ko nchekinkíni ch'án la jehe ch'án t'ayakonhenni ch'án. Mé xikaha tsintáchro jnko ch'ín chjasánrá ósé kixin: “Jeheni mé naxa kjéhya Dios.” ²⁹ Jeheni mé naxa kjéhyani Dios méxra xitjahya tsjenkayáxinni kixin sich'énani Dios chica oro o chica plata o xro kixin éxi tsíkjenkayáxin chojni kixin sich'ena sín dios kuènte sín. ³⁰ Senó Dios kónínkakhya ch'án kixin ó nohe ch'án kixin naxa chónhya sín ch'án. Ntá ijie t'etuènnen Dios kaín xín chojni sín chjasintajni tsokjan sín la tsínkáchónki sín tí jehe ch'án. ³¹ Dios tsíkjejá ijnko yaon sinchekitoxén ijje chojni chjasintajni. Tsíkjejá ch'án ijnko chojni la kjuakoxín kaín kjuachaxin kixin tí nkexro kjónté tsík'en la xechón inaá —ichro ch'ín Pablo.

³² Na ntá tíó kuínhin sín kixin nkexrí tsoxechón chojni tsík'en ntá iso sín kjuanoá sín ch'án. Ntá í so sín ntáchro sín kixin:

—Chr'exín tsinhinni inaá tí nkehe ntáchrua —ichro sín.

³³Ntá ch'ín Pablo kuítóhe ch'án tí jehe sín. ³⁴Na ntá iso sín kjuíchréhe sín ch'ín Pablo la kjuankíxin tinkáchónki sín Ìnchéni. Ijnko tí sín tinkáchónki a mé it'in ch'án Dionisio mé injnko tí síxreé kjuínchekitōexín ijíe chojni chrítaón tí Tjo Areópago la ko injnko tjan tinkáchónki tjan mé it'in tjan Dámaris la ko í so sín kjaxin kjuankíxin sín tinkáchónki sín Ìnchéni.

18

Sákjuí ch'ín Pablo chjasin Corinto

¹Ntá kjuixin tíha ntá ch'ín Pablo sákjuíxin ch'án chjasin Atenas la sákjuí ch'án chjasin Corinto. ²Ntiha mé xéta ch'án injnko ch'ín judío it'in Aquila. Jehe ch'án mé tsíkjiixin ch'án estado Ponto la séhya jehe ch'án la ko ichjién ch'án Priscila mé kjuixin sín nación Italia kíxin t'ichjánxin ts'axrjexín sín ntiha kíxin tí ch'ín t'etōan mé it'in Claudio k'uetōan ch'án kíxin kaín tí sín judío mé ts'axrjexín sín tí chjasin Roma. Ntá ch'ín Pablo mé kjuínixjehe ch'án sín. ³Jnkokón xra ch'e sín la ko jehe ch'án, ch'éna sín kamantá t'óna nchia. Méxra ntá ntahó kuítóeko kíchó sín kíxin jnkokoá sich'e sín tí xra a. ⁴Ntá jnkojnko tí yaon t'ok'éhe sín sákjuí ch'ín Pablo tí nínko nixjehe ch'án tí sín judío la ko tí sín jehya judío kíxin tjinkaon ch'án kíxin kaín tí chojni chrókuitekaon sín.

⁵Ntá tió ch'ín Silas la ko ch'ín Timoteo kjuixin sín estado Macedonia ntá ch'ín Pablo kjuák'e xra ó kjuako ch'án itén Dios kíxin tsonohe tí sín judío kíxin Jesús mé tí nkexro Cristo. ⁶Ntá tí sín judío mé kjuankíxin kónínkakohenen sín tí ch'ín Pablo la imá k'uántaxínhin sín ch'án. Ntá jehe ch'án k'ótsjēnka ch'án iké ch'án kíxin kjuakōxin ch'án kíxin xikaha tsjasóte sín. Ntá ntáchro ch'án kíxin:

—A ntá ijie la jahará kjuéyará tí jie ts'itjáyanxínrá. A ntá janhan la í chontahya jie kíxin ó kjuákoḡhará tí tán jína, a ntá kuítékákonhyará. A ntá ijie la íchá jína sátsjia tsjákoḡa tí sín jehya judío —ichro ch'án.

⁷Ntá k'uaxrjexín ch'án nínko ntá sákjuí ch'án ntōe injnko chojni mé it'in Justo mé jehe ch'án xraxínkaon ch'án Dios. Ntōe ch'án mé chjinaxón nínko. ⁸Ntá ch'ín Crispo, injnko nkexro t'etōan kuèntē nínko, la ko kaín tí sín tjejó ntōe ch'án, mé kjuankíxin sín kuítekaon sín Ìnchéni. Kjaxin itsjé tí sín tjejó chjasin Corinto mé kuínhin sín tí tan la ntá kjuankíxin sín kuítekaon sín Ìnchéni la kuíkite sín. ⁹Ntá injnko tie titàya k'uíkuèn ch'ín Pablo Ìnchéni nixjehe ch'án ntáchro kíxin:

—Chrakonhya tjákua itan kuèntāna. Tjítóehya tsochronka ¹⁰kíxin janhan tjejóko kíchó ni kíxin ninkexró kohya nkehe sit'aha. Kíxin janhan la chonta itsjé chojni tí chjasin ntihi tinkáchónki tí janhan.

¹¹Méxra ch'ín Pablo mé kuítóhe ch'án injnko nánó ko t'ō ntiha chjasin Corinto, kjuakōhe ch'án sín itén Dios.

¹²A ntá tí yaon k'uetōan ch'ín Galión estado Acaya, ntá itsjé tí sín judío kónínkakohenen sín tí ch'ín Pablo. Ntá itsé sín ch'án sákjuíko sín ch'án tí tjejó tí sín t'etōan. ¹³A ntá ntáche sín tí ch'ín t'etōan kíxin:

—A ntá tí nkexro i ixri ch'án tjachroe ch'án chojni kíxin ókjé nkexrí chrókuinkáchónki sín Dios la ko tsitekakonhya sín tí nkehe t'etōan tí ley.

¹⁴Na ntá tjinkaon ch'ín Pablo chrónixja, ntá ch'ín Galión ntáche ch'án tí sín judío kíxin:

—Tí chaxín injnko jie jie kjuasin tí ch'ín i ntá kjónté chrókuínhan tí nkehe ntáchrorá jahará judiorá. ¹⁵A ntá jehí tjanjonxinrá tí nkehe nixjará la ko ihnié chojni la ko tí ley tinkachónkirá. Méxra

jahorá chrókjuínchekitoexínrá tíha kíxin janhan tjínkəkonhya ts'óna juez sintakitoaxian kuènte tí nkehe a —ichro ch'án.

¹⁶ Ntá k'uətoan ch'án kíxin sátsjixin sín ntiha. ¹⁷ Ntá tí sín griego la kónínkaon sín la itsé sín tí ch'ín Sóstenes tí ch'ín t'ətoan kuènte tí nínko judío, la ntahó kjuatexín sín ch'án. Jehe ch'ín Galión a la mé kjónté k'uikon ch'án la ántosén ch'án.

Ch'ín Pablo xíkjan ch'án chjasin Antioquía ntá sákjuí ch'án nixin viaje

¹⁸ A ntá ch'ín Pablo kuítóhe ch'án chjasin Corinto itsjé yaon ntá nixjehe ch'án tí sín kichó ni ntiha ntá k'uixenhen ch'án ntabarco sákjuí ch'án nó estado Siria a sákjuíko ch'án tjan Priscila la ko ch'ín Aquila. Ntá kjuíji sín chjasin Cencrea la ntá naxə k'uixenhya ch'án ntabarco inaá la ikjín ch'án mólóé kíxin xíkaha kjuəkoxin ch'án kíxin kjuínchexiteyá ch'án tí nkehe chrónka ch'án. ¹⁹ Ntá tió kjuíji sín tí chjasin Éfeso ntá kuítóhe ch'ín Pablo tí tjan Priscila a la ko tí ch'ín Aquila. Ntá sákjuí ch'án ijnko nínko la ikjo ch'án tí sín judío tsíkójnkotsé ntiha. ²⁰ Ntá jehe sín chrónəa sín kíxin chrókuitəhe ch'án isé ntiha, kjánchó jehe ch'án la chrohya ch'án. ²¹ Ntá tuénxin nixjehe ch'án sín ntáchro ch'án kíxin:

—T'ichjánxin tsjak'é chjasin Jerusalén tí yaon kia itsi. Kjánchó tsokjan inaá tsotsjahə tí jahará tí naxə tjínkaon Dios —ichro ch'án.

Ntá kuítóhe ch'án sín ntá k'uixenhen ch'án ntabarco sákjuíxin ch'án chjasin Éfeso. ²² Ntá tió kjuíji ch'án chjasin Cesarea ntá sákjuí ch'án chjasin Jerusalén na ntá sákjuínixjehe ch'án tí sín tinkáchónki Ìnchéni ntiha. Ntá tuénxin xíkjan ch'án chjasin Antioquía. ²³ Ntá kuítóhe ch'án ntiha itsjé yaon ntá xíkji ch'án inaá ntá xík'atsínka ch'án itsjé chjasin estado Galacia la ko estado Frigia la kjuínchechéhe ch'án kaín tí sín tinkáchónki Ìnchéni.

Ch'ín Apolos kjuako ch'án chjasin Éfeso

²⁴ Ntá tí yaon a mé ijnko ch'ín judío it'ín Apolos ikui chjasin Éfeso mé tsíkjiixin ch'án chjasin Alejandría. Jehe ch'án mé ijnko nkexro antsí nohe chrónka kíxin chóxin ch'án xroon itén Dios. ²⁵ Jehe ch'án ó xrakəhe ch'án ntje Ìnchéni ntá imá tóxrjínhin ch'án nixja ch'án la ko tsjako jína kuènte ch'ín Jesús. Kjánchó jehó nohe ch'án nkexrí kuíkite chojni ch'ín Juan. ²⁶ A ntá ch'ín Apolos kjuák'e ch'án kjuako ch'án tí nínko la chrakonhya ch'án. Ntá tió kuínhin tí tjan Priscila la ko tí ch'ín Aquila tí kjuako ch'án ntá k'uaxrjentako sín ch'án la kjuəkohe sín ch'án tí nkehe naxə noehya ch'án kuènte ntje Dios. ²⁷ Ntá tjínkaon ch'ín Apolos sátsji ch'án estado Acaya. Ntá tí sín kichó ni kjuínkítsa sín ch'án la ikjin sín ijnko xroon chr'énhen sín tí sín tinkáchónki Ìnchéni tjejó ntiha kíxin jína tsjanjon sín kjuachaxin tsjak'e ch'án. Ntá tió kjuíji ch'án estado Acaya ntá kjuínkítsa ch'án kjuəkohe ch'án tí sín tsíkjinkítsa Dios tsíkitekaon sín ch'án. ²⁸ Ntá kjuəkoexín ch'án kaín chojni kíxin ntoáhya ch'e tí sín judío, la xitjahya tsontáchro sín náhi. Kjuəkohe ch'án sín kíxin tí xroon itén Dios chrónka kíxin Jesús mé tí nkexro Cristo.

19

Kjuák'e ch'ín Pablo chjasin Éfeso

¹ Ntá naxə itjen ch'ín Apolos tí chjasin Corinto ntá ch'ín Pablo k'uatésínka ch'án nchónhya chjasin chrík'á jnə la ntá kjuíji ch'án chjasin Éfeso la ntaha

xéta ch'án nchónhya chojni tinkáchónki ntje Dios. ² Ntá kjuanchankíhi ch'án sín kixin:

—¿A k'uayéherá Nchakuen Dios tió kuinkachónkirá Ìnchéni? —ichro ch'án.

Ntá kjuátehe sín kixin:

—Náhi, kienhyani á tjen Nchakuen Dios —ichro sín.

³ Ntá kjuanchankí ch'ín Pablo kixin:

—¿Nkexro kjuachaxién kuíkítará? —ichro ch'án.

Ntá kjuátehe sín kixin:

—Éxi kjuako ch'ín Juan kuíkíteni —ichro sín.

⁴ Ntá ntáchro ch'ín Pablo kixin:

—Ch'ín Juan mé kuíkíte ch'án chojni kixin chrókjan sín chrókuinkáchónki sín Dios la ko kjuako ch'án kixin chrókuitekaon sín tí nkexro itsi chr'éxin. Tíha mé Jesús, tí Cristo —ichro ch'án.

⁵ Ntá kuínhin sín xikaha ntá kuíkíte sín kjuachaxién ihnié Ìnchéni Jesús. ⁶ A ntá ch'ín Pablo kjuák'etja itja ch'án chrítaón ikja sín ntá ikui Nchakuen Dios k'uáyéhe sín ntá kjuankixin sín nixja sín itsje nkíva ókjé la ko kjuankixin sín kjuako sín tí nkehe kjuanjon Dios. ⁷ Kaín tí sín ntoa tinkáchónki mé chjina teyó sín.

⁸ A ntá chjina iní nitjó, la ch'ín Pablo k'uékji ch'án ninko la kjuako ch'án kaín asén ch'án. Nixjehe ch'án chojni la chrónka ch'án nkexrí tjen tí kjuachaxin kuènte Dios. ⁹ A ntá iso sín la kjónté la imá icha asén sín tjinkakonhya sín tsinkáchónki Ìnchéni. Ntá imá t'ántaxinhin sín tí tan jina kuènte Ìnchéni nkayakon chojni. Ntá tí ch'ín Pablo k'uaxrjentako ch'án tí sín tinkáchónki Ìnchéni ntá ijnko escuela it'in Tiranno ntaha kjuakoxin ch'án kaín yaon. ¹⁰ Mé xikaha kjuák'e ch'án kjuako ch'án iyó nánó, ntá kaín tí sín k'uéjé ntiha estado Asia mé kuínhin sín itén Ìnchéni Jesús, mé tí sín judío la ko kjaxin tí sín jehya judío. ¹¹ Ntá Dios antsí má kjuakoxin kjuaxroan jié kixin tí nixja ch'ín Pablo. ¹² Ntá itsje chojni kjuikao sín pañitoé sín la ko iké sín kuákóxin ch'ín Pablo ntá sákjuiko sín kjuínchekakóxin sín tí sín níhi ntá kuítohe sín jina la ko kjaxin nchakuen tí jínahya k'uaxrjexín tí jehe sín.

¹³ A ntá iso tí sín judío ixri sín ntáchro sín tónohe sín tsakitsje sín nchakuen tí jínahya ch'iyehé sín chojni mé tjinkaon sín tí kjuachaxién ihnié Jesús. La ntá ntáche sín tí nchakuen tí jínahya kixin:

—Kjuachaxién ihnié tí Jesús tjako tí ch'ín Pablo t'etəoxínni kixin jaha nchakuen jínahya sátxixian ntihi —ichro sín.

¹⁴ Mé xikaha k'uékjich'e tí yato xjeen ijnko ch'ín judío it'in Esceva mé ijnko nchat'á t'etəox. ¹⁵ Ntá ijnko yaon nixjehe sín nchakuen tí jínahya. Ntá tí nchakuen tí jínahya kjuátehe ntáchro kixin:

—Chóxinni nkexro ch'ín Jesús la ko ó noheni nkexro ch'ín Pablo. A ntá jahará, ¿la nkexro tí jahará? —ichro tí nchakuen tí jínahya.

¹⁶ Ntá tí ch'ín chóna tí nchakuen tí jínahya kjaminkitaón ch'án tí jehe sín a la ntá imá tsehe ch'án kjuacha ch'án kjuíncheníhi ch'án kaín sín la imá kjoté sín. Ntá k'uaxrjexín sín ntəe sín tjóchin sín la ko síchrít'ə cuérpoé sín. ¹⁷ Ntá kaín tí sín judío la ko tí sín jehya judío tjejó chjasin Éfeso mé kuínhin sín tí nkehe tsíkónhen la imá chrakon sín. Imá jié tí kjuachaxin ihnié Ìnchéni Jesús, ichro sín.

18 Kjaxin itsjé tí sín tinkáchónki Ìnchéni mé kjuíchrónka sín kixin tí ósé k'uékjich'e sín nchónhya nkehe jínahya. 19 Itsjé tí sín k'uékjich'e nkehe jínahya k'uékjinchexroan sín la kuikao sín libro k'uékjich'exín sín xra ntá kjuaka sín tí libro a la k'uikon nchónhya chojni. Ntá kuákjaxin sín cuenta nkekjaín k'uíte tí libro a ntá kónohe sín cincuenta mil peso k'uíte tí libro a kjuaka sín. 20 Ntá tí itén Ìnchéni sítinkák'ánkí la tjáqoxin kixin chaxín chóna kjuachaxin.

21 Ntá kjuixin tíha ntá ch'ín Pablo mé kjuenkayáxin ch'án chrókjuitsjehe ch'án tí sín nó Macedonia la ko Acaya ntá nataha sáchrókjuixin ch'án chjasin Jerusalén. Ntá kjaxin ntáchro ch'án kixin tsjixin sátsji ch'án chjasin Jerusalén ntá kjaxin t'ichjánxin sátsji ch'án chjasin Roma. 22 Ntá ichr'án ch'án iyó tí sín tjinkitsa ch'án sátsji sín estado Macedonia, mé ch'ín Timoteo la ko ch'ín Erasto, ntá nachrohe jehe ch'án naxa kuitohe ch'án estado Asia iso yaon.

Kónínkaon k'uúxité chojni chjasin Éfeso

23 Ntá itsjé chojni chjasin Éfeso kónínkaon sín la k'uúxité sín kixin kórxjienhya sín tí itén Ìnchéni. 24 Kixin ntiha mé itjen ijnko ch'ín it'in ch'án Demetrio. Kjuích'éna ch'án nkehe chica plata tsjehe éxí nínko kuènte tí dios Diana la nchónhya chichaon kjuacha ch'án la ko tí sín kjuích'eko ch'án xra. 25 Ntá kójnkotséko sín í so sín jnkokón tí xra ch'e sín. Ntá ntáchro ch'án kixin:

—Jahará nohará kixin tí xra ch'eni la tjachani jína la náxrjón tjejóni. 26 Kjánchó ó k'uikonrá la ko ó kuínhínrá tí nkehe xritjako ch'ín Pablo. Tjako ch'án kixin tí nkehe tsikjanoya mé jehya Dios. Kjánchó jehya chjasin Éfeso ó. Náhí, nkuíxín estado Asia kuítekaon chojni. 27 Imá tóxakonhenni kixin tí xra ch'eni ts'itjáyán la kjaxin tóxakonhenni tsontáchro sín kixin chónkó tí nínkoe tí dios Diana imá jié la ko ts'itjáyán tí kjuachaxin kuènte tjan. Ntá í tsitekakonhya sín tí kjuachaxin kuènte tjan nkuíxín estado Asia la ko kuenté chjasintajni —ichro ch'ín Demetrio.

28 Ntá tí kuínhin sín xikaha la imá kónínkaon sín ntá k'uèya sín ntáchro sín kixin:

—Ts'itjáyánhya tí dios Diana kuènte sín Éfeso.

29 Ntá imá tóxakonhen tí sín chjasin Éfeso la í noehya sín nkehe chrókjuich'e sín kixin kónínkakonhen sín tí ch'ín Gayo la ko tí ch'ín Aristarco mé iyó sín tsikjixin sín Macedonia. Ntá kuínkánkákjen sín kuikao sín tí nchia jié tójnksotéxin sín xráxín. 30 Ntá ch'ín Pablo tjinkaon ch'án chrók'uixenhen ch'án tí nchia kixin tsonixjehe ch'án sín, a ntá tí sín tinkáchónki Ìnchéni mé chrohya sín kixin ts'ixenhen ch'án tí nchia a. 31 Kjaxin iso tí síxreé kuènte tí estado Asia mé chóxin sín ch'ín Pablo, ntá k'uetōan sín kixin tsochéna chojni tí ch'ín Pablo kixin chrókjuiatéhya ch'án tí siín sín ntiha. 32 A ntá iso tí sín tsíkójnkotsé ntáchro sín ijnko nkehe, la í so sín ntáchro sín ókjé nkehe kixin nínkaon sín. La itsjé sín la í noehya sín nkehe xra tsíkójnkotséxin sín kixin nínkaon sín. 33 La iso sín judío chénka sín ijnko ch'ín it'in Alejandro nkerí xra kjuixin sín kixin tsonixja ch'án. Ntá kjuák'e ch'án jnkosiné ntá kjuakoxin ch'án itja ch'án kixin tsotáni sín ntá tsonixjaxin ch'án tí sín judío tsinhin kaín chojni. 34 Ntá tió kjuátsoan tí sín tsíkójnkotsé kixin kjaxin tí ch'ín a mé judío ch'án ntá kaín sín k'oyako sín chjina iyó hora ntáchro sín kixin:

—Ts'itjáyanhya tí dios Diana kuènte tí sín chjasin Éfeso —ichro sín.

³⁵ Ntá tí ch'ín secretario kuènte tí chjasin ntiha mé k'uətoan ch'án tsotání sín. Ntá ntáchro ch'án kixin:

—Chojni chjasén Éfeso tinhínrá. Kuenté chjasintajni nohe sín kixin tí sín chjasin ntihi mé t'ayakonhen sín tí nínko kuènte tí dios Diana. Tí retrato kuènte tjan mé tsikixin nkaya nkajní. ³⁶ Kohya nkeexo tsontáchro kixin chaxínhya tíha. Méxra tánírá. Tjenkayáxinrá jína nkehe chrókjuich'erá. ³⁷ Jahará kjuikoará tí sín a ntihi la kjánchó k'uántaxiēnhya sín tí nínkoeni la ko k'uántaxiēnhya sín tí tjan santo kuènténi. ³⁸ Méxra ch'ín Demetrio la ko tí sín ch'eko ch'án xra la tí tjanchia sín jiē jnkojin nkeexo la siin juez sinchekitoexín. Méxra tsochrónka sín tí tjen tí ch'ín juez kixin jnkojnko sín la chrókuitoexín tí jiē chóna sín. ³⁹ Ntá tí siin ijnko nkehe tsjanchiará ntá t'ichjánxin tsojnkotsérá la ntoá chrókuitoexín. ⁴⁰ Tóxakonhenni kixin kjá tí sín t'etoan ts'ekani sín jiē kixin jehya jína k'uúxiténi kónínkaonni. Noehyani nkehe tsjateheni kixin tí tsjanchankí sín nkekuènte k'uúxiténi, tsixro sín.

⁴¹ La ntá k'uətoan ch'án kixin sátsji sín kixin ó kjuixin tí kójnkotsé sín.

20

Sátsji ch'ín Pablo estado Macedonia la ko estado Grecia

¹ Ntá tí kjuixin k'uúxité sín, a ntá ch'ín Pablo k'uúyehē kaín tí sín tinkáchónki Ìnchéni ntiha ntá kjuako ch'án iso kjuaxrexinkaon jína, ntá nixjehē kichó sín ntá sáxíkji ch'án nó estado Macedonia. ² Ntá nkuíxin k'uatsínka ch'án la kjuínchechéhē ch'án tí sín tinkáchónki Ìnchéni kixin tí nkehe nixja ch'án. Ntá chr'éxin kjuji ch'án estado Grecia. ³ Ntiha kuítóhe ch'án iní nitjō ntá chrók'uixenhen ch'án ijnko ntabárcō ntá sáchrókjuí ch'án estado Siria. Ntá kónohe ch'án kixin iso sín judío nínkakonhen sín tí jehe ch'án a ntá kjuenkayáxin ch'án tsokjanxin ch'án toté ch'án inaá ts'atsínka ch'án Macedonia. ⁴ Ntá tí sín sákjuíko ch'ín Pablo mé tí ch'ín Sópater mé jehe ch'án tsíkjiēxin ch'án chjasin Berea, la ko kjaxin ch'ín Aristarco, la ko ch'ín Segundo. Jehe sín mé tsíkjiēxin sín chjasin Tesalónica, la ko ch'ín Gayo tsíkjiēxin ch'án chjasin Derbe, la ko kjaxin sákjuíko ch'án ch'ín Timoteo, la ko ch'ín Tíquico, la ko ch'ín Trófimo, mé tsíkjiēxin sín estado Asia. ⁵ Ntá tí sín kichó ni a mé kuítónxin sín ntja ntá tjejóchónhen sín tí jeheni chjasin Troas. ⁶ Kjuixin k'uátsínka tí kia tió kjóne sín niotja chóntahya tí xroan t'ánkíxin niotja, ntá k'uúixenhenni ijnko ntabárcō k'uaxrjexínni Filipos ntá k'uátsínka in'ó yaon ntá kjujini chjasin Troas ntá ntiha xétani tí sín kuítónxin sín ntja. A ntá ntiha kuítóheni yato yaon.

Ch'ín Pablo sákjuí chjasin Troas

⁷ Ntá tí yaon xrankíxixín semana ntá kójnkotséni kixin tsochrít'ō niotja tsoxraxinkakonxínni Ìnchéni. Ntá ch'ín Pablo nixjehē ch'án kaín tí sín tinkáchónki Ìnchéni la tjinkaon ch'án sátsjixin ch'án ntiha tí yaon chr'éxin, ntá antsí má sé tí nkehe chrónka ch'án la naxa tjenixja ch'án k'áxrótjen. ⁸ Tí tsíkójnkotsé sín a mé ijnko piso noi la ntiha mé síche nchónhya xrohi. ⁹ Ntá ntiha itjen ijnko ch'ín ntasoá it'in ch'án Eutico mé tjetjaxin ch'án chritaón ventana. Ntá tí ch'ín Pablo imá sé nixja ch'án ntá tí ch'ín ntasoá mé tsíkihi ch'án kotáchrin. A ntá xrínghya tsík'ajua ch'án ntá tsík'anótjēnxin ch'án tí ventana tí níxin piso ntiha ntá sákjuíkatsen sín ch'án la ó tsíkjiēxin tsík'en ch'án. ¹⁰ Ntá ch'ín Pablo k'uúnkajin ch'án ntá

kjuítsínkaták'á ch'án chrítaón tí ch'ín tsík'anótjen a la kjóa ch'án. Ntá ntáche ch'án tí sín kíchó ní kixin:

—Chrakonhyará tsík'enhya ch'án, tjechón ch'án —ichro ch'an.

¹¹ Ntá ch'ín Pablo k'ujit'ótjen ch'án inaá tí k'uínkajinxin ch'án kixin ntiha ts'óxikeye ch'án niotja sine sín tsoxraxinkakonxín sín Ìnchéni. Ntá naxa tjenixja ch'án hasta k'uínkaséyan a ntá sákjuí ch'án. ¹² Ntá tí ch'ín ntasoá tsík'anótjen sákjuiko sín la tjechón ch'án kohya nkehe xéhe ch'án ntá kaín sín imá kóchéhe sín.

Sákjuixin ch'ín Pablo chjasin Troas kjuíji ch'án chjasin Mileto

¹³ Jeheni mé kuitónxinni ntja saoxín la k'uixenhenni ijnko ntabarco sákjuíni nó chjasin Asón kixin ntiha tsoxetani ch'ín Pablo éxi tsintácho ch'án kixin tjinkaon ch'án sátsjixín ch'án toté ch'án ntiha. ¹⁴ Ntá ó xetani tí jehe ch'án chjasin Asón ntá k'uixenhen ch'án tí ntabarco kjaxin ch'án ntá sákjuíkoni ch'án nó chjasin Mitilene. ¹⁵ Ntá tí sákjuixinni ntiha ntá tí yaon chr'éxin ntá k'uátsínkani estado Quío ntá tí yaon chr'éxin kjuíjini chjasin Samos. Ntá inaá k'uixenhenni tí ntabarco ntá sákjuíni chjasin Trogilio ntá ntiha k'ok'éheni. Ntá xik'ixenhenni ntabarco inaá ntá tí yaon chr'éxin kjuíjini chjasin Mileto. ¹⁶ Mé xikaha kjuích'eni kixin ch'ín Pablo í tjinkakonhya ch'án chrókjuak'e ch'án isé estado Asia la í tjinkakonhya ch'án chrókjan chjasin Éfeso kixin tjinkaon ch'án tjoka chrókjuíji ch'án chjasin Jerusalén kixin ntiha chrókjuak'e ch'án tí yaon Pentecostés, ichro ch'án.

Nixjehe ch'ín Pablo tí sín t'etueñhen ninko chjasin Éfeso

¹⁷ Tí itjen ch'ín Pablo tí chjasin Mileto k'uíyehé ch'án tí sín t'etueñhen tí ninko chjasin Éfeso. ¹⁸ Ntá tió kui sín ntá ntácho ch'án kixin:

—Tí jahará la ó nohará nkexrí kjuak'é la ko kjuákua desde tí yaon xrankixixín k'uinka estado Asia. ¹⁹ Ó nohará kixin kaín tí yaon k'uéjóni la kaín asenná kjuít'aha xra Ìnchéni la kjuíntahnkehya. Imá tsjanka kixin nchónhya kjuasótena kixin tjinkaon tí sín judío chrók'óyánna sín. ²⁰ Janhan la kuitoahya kjuákua kaín tí nkehe jina t'ichjánxin tsonohará. Mé xikaha kjuákua tió kójnkotsérá la ko xikaha kjuík'júkua xian jnkojnko ntóará. ²¹ Kjuáqohá kaín chojni judío la ko kaín chojni jehya judío kixin t'ichjánxin tsítóhe sín tí jie tjasin sín la ko tsitekaon sín Dios la ko Ìnchéni Jesucristo. ²² Ntá ijie sátsjiyá chjasin Jerusalén kixin Nchakuen Dios k'uetuanna la í nonahya nkehe tsonna ntiha. ²³ Ntá jehó nòna kixin kaín chjasin ts'atsínka la chrónka Nchakuen Dios kixin tsjak'echjinana la ko tsjasótena. ²⁴ Kaín tíha la tóxakonahya. Kjonté chrókjuasótexián la ninkehó sínkílyana la janhan la chàna kixin tí xra chonta la chrókjuíntaxín la chrókjuíntaxiteyá tí xra chjina Ìnchéni Jesús kixin tsjàkua tí tan jina nkexrí tjuèhe Dios chojni.

²⁵ Ntá jie ó nòna kixin tí jahará kjuákohará kjuachaxin kuènte Dios la nijnkorá ts'ikonhyará tí janhan inaá. ²⁶ Méxra tinhínrá ijie kixin í jehya jieña kixin jnkojínrá chrók'uitjayanrá. ²⁷ Kixin ó kjuákua kaín tí nkehe tjinkaon Dios kixin tsonohará la í t'itjayanhya ninkehó. ²⁸ Méxra xráxinkáonrá ts'ejorá jnkojína la ts'ayakonhénrá kaín tí sín tinkáchónki Ìnchéni kixin Nchakuen Dios mé tjáhará tí xra pastor kixin ts'ayakonhénrá tí sín kuènte tí ninkoe ch'án k'uenaxín ch'án tí ijnie ch'án. ²⁹ Ó nòna tió sátsjia ntá itsji í so chojni éxi kolóbo jiehe tsotjinkaon sinchek'itjayan

tí sín tinkáchónki Ìnchéni. ³⁰ La ntá kjónté jahará la isorá tjejórá ntihi tsjankíxinrá tsjákorá kjuach'ia chrínkí chrókjuákohérá kíchuará tí nkehe chaxín. A ntá tí sín tinkáchónki tsjichréhe sín tí nkehe ntoáhya. ³¹ Méxra chróxráinkáonrá kíxin chjina iní nánó kjuak'é kjuákohára nchakotjin la ko tie la kuitoahya kjuintaxraxinkávan hasta kjuíncheníhi asenná nixjahará jnkojnko tí jahará.

³² A nta jie la jahará kíchó ni tjetjáncháha Dios kíxin t'ayakuanxínrá ch'án tí itén ch'án kíxin tjuahará ch'án. Jehe ch'án imá chóna kjuachaxin tsjinkitsará ntá ts'ayéhérá kaín tí nkehe tjinkaon ch'án tsochjéhe ch'án kaín tí chojni tsíkótjóá. ³³ Janhan mé kjuakéhya asenná chichakoen chojni o iké jnkojin chojni. ³⁴ Náhí. Jahará ó nohará jina kíxin janhan na mé tjaná kjuít'axián xra kjuácha k'uenaxín tí nkehe t'ichjánxinna la ko kjaxin tí nkehe t'ichjánxinhin tí chojni k'uejókian. ³⁵ Méxra kjuákuaxínrá xikaha sích'erá xra kíxin jina tsjinkitsará tí chojni chónahya. Xráxinkáonrá kíxin tsintáchro Ìnchéni Jesús kíxin: “Antsi tsochéheni kíxin tí nkehe chrókjuanjoni, a ntá kánhyó tsochéheni kíxin tí nkehe chrók'uáyéheni.”

³⁶ Ntá kjuixin ntáchro ch'ín Pablo xikaha ntá jehe ch'an la ko kaín sín k'uéjoxin toch'in sín ntá nixjehé sín Dios. ³⁷ Ntá kaín sín tsjanka sín la ko kjóa sín ch'án la ko tséhe sín tja ch'an. ³⁸ Imá k'uává sín kíxin chrónka ch'án kíxin í ts'ikonhya sín ch'án inaá. Ntá sákjuíkotoxin sín ch'án nó tí tjen tí ntabárco sátsjiko ch'án.

21

Sákjuí tí ch'ín Pablo nó chjasin Jerusalén

¹ A ntá tió kuitoheni tí sín kíchó ni ntá k'uixenhenni ntabárco la ntá tuénxín sákjuíni estado Cos. Ntá tí yaon chr'éxin sákjuíni chjasin Rodas, ntá ntiha sákjuíni chjasin Pátara. ² Tí chjasin Pátara la mé ntiha k'uitjani ijnko ntabárco sátsji nó estado Fenicia. Ntá k'uixenhenni tí ntabárco a ntá sákjuíni. ³ Ntá tió k'uátsínkani la k'uíkoni tí nonte Chipre itjani ikjon kuitohe ntá k'uatsínkani estado Siria. Ntá tí ntabárco la ts'atsínka tsítóhe tí nkehe tjinká tí puerto chjasin Tiro, la jeheni la nachrohe sákjuíni tí chjasin a. ⁴ Ntá ntiha k'uitjani tí sín tinkáchónki Ìnchéni a ntá ntiha kuitóhekoni sín yato yaon. A ntá jehe sín mé kjuínchenohe sín Nchakuen Dios chénka sín tí ch'ín Pablo kíxin sáchrókjuihya ch'án chjasin Jerusalén. ⁵ Ntá kjuixin k'uátsínka tí yato yaon a ntá sákjuíxinni ntiha. La kaín tí sín tinkáchónki Ìnchéni la ko ichjién sín la ko xjeen sín sákjuíkotoxinni tí k'uaxrjentani ikon chjasin ntá sákjuíni chrínta ntayaon. K'uéjoxinni toch'inni nixjeheni Dios ⁶ ntá tuénxín nixjeheni sín jnkojina ntá tséhe tja kíchó ni. Ntá k'uixenhenni tí ntabárco, a ntá jehe sín ikjan sín ntøe sín.

⁷ Ntahó chjasin Tiro kjuixixín tí k'uixenhenni tí ntabárco ntá kjujini chjasin Tolemaida. Ntiha kjuínixjeheni tí sín kíchó ni tinkáchónki Ìnchéni. Ntá ntiha k'uéjókoni sín ijnko yaon. ⁸ Ntá tí yaon chr'éxin sákjuíxinni ntiha ntá kjujini chjasin Cesarea. Ntá ntiha sákjuíni ntøe ch'ín Felipe, ijnko ch'ín kjaxin tjako itén Ìnchéni. Jehe ch'án mé ijnko tí sín yatoxin tjinkitsa tí sín kjueyá Ìnchéni. A ntá jeheni mé kuitoheni ntiha. ⁹ Tí ch'ín Felipe a mé chóna ch'án noó xjeen ch'án chjin naxa tóteehya sín. Tí xjeen ch'án a mé chrónkaxín sín tí itén Dios. ¹⁰ Ntá ntaha k'uéjókoni sín itsjé yaon ntá ikjuí ijnko ch'ín nixja itén Dios it'ín Agabo, tsíkjin ch'án estado Judea. ¹¹ Ikjuí ch'án kjuínixjehé ch'án tí jeheni la ntá kuákja ch'án tí tjoa t'ínkat'óxin ch'ín

Pablo na ntá kjuínchentetoxín tqté ch'án la ko itja ch'án ntá ntáchro ch'án kixin:

—Tí Nchakuen Dios mé ntáchro kixin mé xikaha chjasin Jerusalén tí sín judío sinchenteto sín ìnché tí tjoa sinchek'áyéhe sín ch'án tí sín jehya judío —ichro ch'án.

¹² Ntá kjuixin kuínhinni tíha ntá jeheni la ko tí sín chjasin Cesarea chrónógheni tí ch'ín Pablo kixin sáchrókjuihya ch'án tí chjasin Jerusalén.

¹³ Ntá kjuátehe ch'ín Pablo kixin:

—¿Nkekuènté tsjankará la ko nkekuènté nchek'ávaráni? Janhan na chrakonhya kjónté jehya tí sinchentetona sín ó. Náhí. Kjónté kjaxin chrók'uénxian chjasin Jerusalén tí tinkáchónkia Ìnchéni —ichro ch'án.

¹⁴ Ntá kjuachahyani nixjeheni ch'án ntá kuitoheni ch'án. Ntáchroni kixin:

—Tí nkehe tjinkaon Ìnchéni mé tsonhen —ichroni.

¹⁵ Ntá kjuixin tíha ntá kóyaxínhinni ntá sákjuíni nó chjasin Jerusalén.

¹⁶ Ntá sákjuíkoni iso tí sín tinkáchónki Ìnchéni tsíkixin chjasin Cesarea. Sákjuíkoni sín ntøe ijnko ch'ín tsíkixin Chipre it'in ch'án Mnasón. Jehe ch'án mé ósé tinkáchónki ch'án Ìnchéni. Ntá kjuanjon ch'án nketí kuitoheni.

Ch'ín Pablo sákjuítsjehé tí ch'ín Jacobo

¹⁷ Tió kjuíjini chjasin Jerusalén ntá tí sín kichó ni tinkáchónki Ìnchéni mé kjuanjon sín kjuachaxin k'uéjóni la chéhe sín. ¹⁸ Ntá tí yaon chr'éxin ch'ín Pablo sákjuíkoni ch'án kjuítsjeheni ch'ín Jacobo la ntaha tjejó kain tí sín t'etoan kuènte njnko. ¹⁹ Ntá ch'ín Pablo kjuixin nixjehé ch'án sín ntá tuénxín chrónka ch'án kain tí xra kjuích'e Dios tió kjuakøhe ch'án tí sín jehya sín judío. ²⁰ Tió kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kixin:

—Kichóni, jaha k'uíkuan kixin síin itsjé mil sín judío ó kuinkáchónki sín Jesús kjánchó kain sín ntáchro sín kixin t'ichjánxin tsítóehyani tí ley. ²¹ Ntá tsíkinhin sín kixin jaha mé tsíkjakohé tí sín judío tjejó chjasin ókjé kixin t'ichjánxienhya sinchexiteyéhe sín tí nkehe k'uetøan ch'ín Moisés. La kjaxin kuínhin sín kixin jaha tsíkjakohé sín kixin tí xjeen sín t'ichjánxienhya itsa sín tí xroye la ko t'ichjánxienhya tinkáchónki sín éxi k'uékinkáchónkini ósé. ²² ¿Ntá nkehe chrókjuich'eni? Kixin tió tsinhin sín kixin kjuihá la tsojnkotsé nchónhya sín. ²³ Méxra íchá jína jaha sinchexiteyá tíhi. Ntihi tjejó noó sín t'ichjánxin sinchexiteyá sín tí nkehe chénka sín Dios. ²⁴ Jaha sáchrókjuíkoa sín la chrókótjóá jaha la ko jehe sín. La ko kjaxin chrókjuènka tsokjín sín ntá tsonoxín tí sín judío kixin chaxínhya tí nkehe tsíkinhin sín la ko tsonoxín sín kixin kjaxian jaha nchexiteyéhe tí ley. ²⁵ A ntá tí sín jehya judío tsíkitekaon Ìnchéni la ikjinni ijnko xroon ó chr'énhenni sín. K'uetøenhenni sín kixin sinehya sín tí nto tsíkjokehe chojni tí nkehe tsíkjanoya, la ko kjaxin sinehya sín jni, la ko sinehya sín tí nto tsíchrínjinhya isin va, la ko chróchóntahya sín í jnko chojni chjin ókjé —ichro sín.

Tséxin sín tí ch'ín Pablo tí njnko

²⁶ Ntá ch'ín Pablo sákjuíko ch'án tí noó sín la ntá tí yaon chr'éxin kjuinchetjóá asén sín. Ntá kjuixin ntá k'uixenhen ch'án tí njnko kixin tsochrónka ch'án kixin ó kjuixin kjuínchexiteyá ch'án tí nkehe k'uitenhen ch'án. Tíhi mé t'axrxén kixin jnkojnko sín tsíkjo sín nkehe tsjanjon sín.

27 Ó chjina chróxétja tí yato yaon ntá iso tí sín judío tsíkjixín estado Asia mé tsík'ikon sín ch'ín Pablo nkaxenhen tí n̄nko. Ntá kjuínchekónínkaon sín kaín chojni chjasin ntiha ntá itsé sín tí ch'ín Pablo. 28 Ntá k'uèya sín ntáchro sín kixin:

—Kaínrá chojni chjasin Israel tsjínkĩtsaráni kixin tsotséni tí ch'ín i. Jehé ch'án mé ixri nkuíxín xritjakohé ch'án chojni nkehe jehya jína kuènte chjaséni, la ko titekakonhya ch'án tí ley kuènte Moisés, la ko titekakonhya ch'án n̄nkoeni. A ntá ijie la tsík'ixenko ch'án iso sín griego la kjuínchekjita sín nkaxenhen tí n̄nko tjóá —ichro sín.

29 Mé xikaha ichro sín kixin tsík'ikon sín senó kixin chjasén sín mé xriko ch'ín Pablo tí ch'ín Trófimo tsíkjixín chjasín Éfeso. Kjuénkayáxin sín kixin ch'ín Pablo la kjá tsíkjiko ch'án tí ch'ín a nkaxenhen n̄nko.

30 Ntá kuenté tí chjasin a kónínkaon sín la ntá kaín tí chojni kuínká sín ikuí sín ntá itsé sín tí ch'ín Pablo. Ntá kuínkánkákjenxín sín ch'án nkaxenhen n̄nko la kuakitsje sín ch'án ntója ntá tuénxín k'uíkjehe sín tí puerta n̄nko. 31 Ntá tjínkaon sín chrók'óyán sín ch'án ntá ijnko ch'ín comandante k'uetuénhen itsjé tí sín soldado romano kuínhin ch'án kixin kuenté tí chjasin Jerusalén k'uíxité nínkaon sín. 32 Ntá tí ch'ín comandante sákjuiko ch'án iso sín soldado la ko tí sín k'uetuénhen tí soldado a la kuínká sín sákjuí sín tí síin tí chojni. Ntá tió k'uíkon tí sín a kixin ó kjuíji tí ch'ín comandante la ko tí sín soldado a ntá kuítōhe sín, í kjuatehya sín ch'ín Pablo. 33 Ntá tí ch'ín comandante kóchjina ch'án la itsé ch'án tí ch'ín Pablo. Ntá k'uetōan ch'án kixin tí sín soldado sinchentetoxín sín tí ch'ín Pablo yaá chica cadena. Ntá chr'éxin kjuanchankíhi ch'án sín kixin nkexro tí jehé ch'ín Pablo la ko nkehe tí kjuích'e ch'án. 34 A ntá tí chojni tsíkójnkotsé la ijnko sín k'óyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuènte xikaha kjuích'e sín kixin k'uíxité sín. Ntá k'uetōan ch'án kixin tí sín soldado sátsjiko sín tí ch'ín Pablo tí cuartel síin tí sín soldado. 35 La ntá tió kjuíjiko sín ch'án tí t'it'ótjenxín sín tí nchia a ntá t'ichjánxín kuámá sín tí ch'ín Pablo kixin tí chojni tjínkaon sín chrókjuate sín ch'án kixin nínkaon sín. 36 Kaín tí chojni chréhe nóton t'èya sín ntáchro sín kixin:

—Chrók'uen ch'án —ichro sín.

Ch'ín Pablo chrónka nkayakon chojni kixin chóntahya ch'án jie

37 Ntá tió sáchrókjuíko sín ch'ín Pablo tí nkaxenhen tí cuartel kuènte tí sín soldado a ntá kjuanchankíhi ch'ín Pablo tí ch'ín comandante ntáchro ch'án kixin:

—¿Á jína tsonixjahani jaha intsi? —ichro ch'án.

Ntá kjuátehe tí ch'ín comandante ntáchro ch'án kixin:

—¿Jaha la á noha nixja griego? 38 Méxra ¿á jehya jaha tí chojni tsíkjixín Egipto kjuínchenínkaon chojni la ko sákjuiko nteje tí noó mil chojni tsíkjàya? —ichro ch'án.

39 Ntá kjuátehe ch'ín Pablo ntáchro ch'án kixin:

—Náhi, janhan mé ijnko chojni judío. Tsíkókjínaxián chjasin Tarso, estado Cilicia. Janhan me ijnko chojni tsíkjixín ijnko chjasin imá tjetōan. A ntá ijie xrjannóaha kixin tsjánjuan kjuachaxin tsonixjaha tí chojni —ichro ch'án.

40 Ntá tí ch'ín comandante kjuanjōn kjuachaxin ntá ch'ín Pablo kjuák'exín toté ch'án tí tjen escalera ntá tja ch'án ó kjuakoxín ch'án kixin

tsotání sín. Ntá tání sín ntá kjuankíxin nixjaxin ch'án nkíva hebreo. Ntáchro ch'án kíxin:

22

¹—Jahará kichó ni la ko chojni it'é xjan tinhínrá nkehe tí tsoxrjanka kíxin chontahya jie —ichro ch'án.

²Ntá kuínhin sín kíxin nixjaxin ch'án nkíva hebreo ntá antsí má tání sín. Ntá ntáchro ch'ín Pablo inaá kíxin:

³—Janhan mé ijnko chojni judío tsíkokjínaxián chjasin Tarso estado Cilia. K'uankíxián ntíhi chjasin Jerusalén la kjuíntakuáxian tí nkehe kjuako tí ch'ín Gamaliel la títékavan tí ley tsíkínáchónki tí sín tsík'axrjeníxinni óse. Tjínkavan chrókjuít'aha Dios xra kaín asenná éxí tjínkáonrá jahará ch'erá tí yaon ijie. ⁴Ti senó k'uénínkakonhan chrók'oyán tí sín tinkáchónki Ìnehéni kjuíntanteto chojni ntoa la ko chojni chjin kíxin chrók'uejóchjina sín. ⁵A ntá tí sín nchat'á t'etóan la ko kaín tí sín táda t'ayakonhen njnko la mé nohe sín kaín tíha kíxin jehe sín mé kjuanjon sín xroon ts'áyéhe tí sín kichó ni judío tjejó chjasin Damasco. Ntá sákjuia nó ntíha kíxin chrókjuíkjéyá tí sín tinkáchónki Ìnehéni kíxin chrótse sín ntá chrókjuikian sín ntíhi Jerusalén chrokjuaosóte sín.

Ch'ín Pablo chrónka nkexrí kjuankíxin tinkáchónki ch'án Ìnehéni (Hch. 9.1—9; 26.12—18)

⁶A ntá tió kjuasán chjina chjasin Damasco chjina chonkíxin ntá xrínahya k'uinkáséyan jnkontajtén tí tjén ijnko xrohi imá t'inkaséyan kuíxin nkajní. ⁷Ntá kjuachr'ítsínka nonte ntá tuénxín kuínhan itén ijnko nkexro nixjana ntáchro kíxin: “Saulo, Saulo, ¿nkekuénté ninkákonna xritjéyá tí janhan?” ⁸Ntá kjuánchánkiá kíxin: “¿Xá nkexro jaha?” Ntá kjuátehe ch'án ntáchro ch'án kíxin: “Janhan mé tí nkexro Jesús tsíkjixin chjasin Nazaret, mé tí nkexro xritjéyá.” ⁹La ntá tí sín k'uájikian mé k'uíkon sín tí xrohi la chrakon sín kjánchó kuíenhya sín itén tí nkexro nixjana. ¹⁰Ntá kjuánchánkiá kíxin: “¿Xá nkehe tsonhen tjínkavan sit'aha jaha?” Ntá kjuátehe ch'án ntáchro kíxin: “T'aya sátjia t'ixénhén chjasin Damasco ntá ntíha tsochrónka sín kaín nkehe sich'e.” ¹¹Ntá tí xrohi a mé k'uíenka ikuān ntá í xitjahya t'íkuān. Ntá tí sín chríkjan mé kuinkátséna sín sákjuíkian sín chjasin Damasco.

¹²Ntá ntaha kjuák'e ijnko ch'ín it'in Ananías ijnko chojni jina kjuínchexiteyéhe ch'án tí ley kuénte ch'ín Moisés. Kaín tí sín judío siín chjasin Damasco tjikosáyehe sín tí jehe ch'án. ¹³Ntá ch'ín Ananías mé kuítsjehe ch'án tí janhan ntá tió kuí ch'án ntáchro ch'án kíxin: “Kichóni Saulo, ijie la ts'ayéhé kjuachaxin ts'ikuan inaá.” Ntá ó jina t'íkuān. ¹⁴Ntá tuénxín ntáchro ch'án inaá kíxin: “Tí Dios kuinkáchónki tí sín tsík'axrjeníxinni la ó tsíkjéyá ch'án tí jaha kíxin tsonoha nkehe tjínkaon ch'án la ko kíxin ts'ikuan tí nkexro jina la ko tsinhín tan k'uaxrjéxín ir'va ch'án. ¹⁵Jaha mé tsochrónka tí nkehe k'uíkuan la ko tí nkehe kuínhín tsinhín kaín tí chojni chjasintajni. ¹⁶A ntá jie la í choénhya má. T'aya la tsikitiaxián ihnjé Ìnehéni kíxin mé ts'ímáxin ijíá,” ichro ch'ín Ananías.

Pablo chrónka kíxin Dios ichr'án ch'án tsjakohé tí sín jehya sín judío

¹⁷'Na ntá tió xíkjan chjasin Jerusalén ntá sákjuia njnko tsonixjaha Dios ntá titàya k'uíkuèn ¹⁸Ìnehéni ntáchro ch'án kíxin: “Tjoka ts'axrjéxian chjasin Jerusalén kíxin tsitekakuenhya sín tí nkehe tjákua mé tí tan

kuèntana.”¹⁹ Ntá janhan ntátjan ch'án kixin: “Ìnchéni, jehe sín ó nohe sín kixin senó k'uék'atsínka kaín tí nínko la k'uètse tí sín tinkáchónki tí jaha la sákjuíkian sín ntóechiso k'uékon sín.”²⁰ Tió k'óyán sín tí ch'ín Esteban tí nkexro k'uékjit'aha xra, k'uénixja ti tan kuènta ntá janhan kjaxin tjéntaxián ntiha la janhan ntáxrjan kixin ó nchoxon its'en ch'án la k'uáyakonhan tí iké tí sín kjuàya.”²¹ Ntá Ìnchéni xínixja inaá, ntáchro ch'án kixin: “Tétuānhan jaha kixin sátsjia chjasin kjín kixin tsjákohé tí chojni jehya judío.”

Ntá tí ch'ín comandante k'uáyéhe tí ch'ín Pablo kixin tsjasóte ch'án

²² Ntá tí sín tsíkójnkotsé mé kuínhin sín kaín tíha ntá kjuankixin k'uèya sín ntáchro sín kixin:

—Its'en ch'án, í tsjak'echónhya ch'án —ichro sín.

²³ Naxa t'ixratáhya sín t'óyako sín ntá tótsjénka sín iké sín la ko kuákja sín nche it'e sín. ²⁴ Ntá tí ch'ín comandante mé k'uétuēnhen ch'án tí sín soldado a kixin sátsjiko sín ch'ín Pablo nkaxenhen tí cuartel kuènte sín. Ntá ntiha k'uetoan ch'án kixin tsjatexín sín ch'án chikoté ntá tsonoxén tí ch'ín comandante nkekuènte imá t'óyako sín nínkakonhen sín tí jehe ch'án. ²⁵ Ntá kjuixin kjuínchenteto sín ch'án kixin tsjate sín ch'án ntá nixjehē ch'ín Pablo ijnko ch'ín capitán itjen ntiha ntáchro ch'án kixin:

—¿Á chontará kjuachaxin tsjaterá ijnko chojni romano, kixin naxa kjuéyáhyará nkerí jiē chonta? —ichro ch'án.

²⁶ Tió kjuixin kuínhin tí ch'ín capitán ntá sákjuíchénka ch'án tí ch'ín comandante ntáchro ch'án kixin:

—¿Nkehe s'ich'e jaha kixin tí nkexro i mé ijnko chojni romano?

²⁷ Ntá tí ch'ín comandante mé kóchjinehe ch'án tí ch'ín Pablo la kjuanchankí ch'án, ntáchro ch'án kixin:

—¿Á jaha chaxín chojni romano? —ichro ch'án.

Ntá kjuátehe ch'ín Pablo kixin chaxín jehe ch'án.

²⁸ Ntá ntáchro tí ch'ín comandante kixin:

—¿A ntá nkexrí kixin janhan nchónhya chichaon kjuènkā kixin ts'ónana chojni romano?

A ntá ntáchro ch'ín Pablo kixin:

—Janhan na chojni ntiha tsíkókjínaxián.

²⁹ Na ntá tí sín soldado chrókujeate ch'ín Pablo mé kuínhin sín kixin ch'ín Pablo ijnko chojni romano ntá kuítóhe sín ch'án sákjuí sín ókjé. Ntá tí ch'ín comandante a mé kónohe ch'án kixin tí ch'ín Pablo a mé ijnko chojni romano ch'án chaxín. Ntá chrakon ch'án kixin tsíkjinchenteto ch'án.

Ch'ín Pablo nixjehē ch'án tí sín t'etoan kuènte tí sín judío

³⁰ A ntá tí kóyaon ntá tí ch'ín comandante a mé tjínkaon ch'án tsonohe ch'án nkehe tí jiē chrók'ueka tí sín judío tí ch'ín Pablo. Ntá kjuasintānkā ch'án chica cadena tsíchróntetoxín tja tí ch'ín Pablo ntá k'uetoan ch'án kixin tsojnkotsé kaín tí nch'at'á t'etoan la ko tí sín t'etoan kuènte sín judío, a ntá kuakitsje ch'án tí ch'ín Pablo la kjuak'e ch'án jnkosiné tí síin tí jehe sín.

23

¹ Ntá ch'ín Pablo komá tí sín t'etoan kuènte sín judío ntá ntáchro ch'án kixin:

—Kíchóni, tí k'uékjak'é hasta ijie la Dios tjetsjehe kixin ijnko kjuaxrexinkaon jina chonta —ichro ch'án.

² Ntá tí ch'ín Ananías tí ch'ín nchat'á t'etōan mé k'uetuēnhen ch'án tí sín chjino tjejó tí tjen ch'ín Pablo tsochjéhe sín ir'va ch'án. ³ Ntá kjuátehe ch'ín Pablo kixin:

—Dios mé sinčekjasóte ti jaha kixin ntoáhya kjuich'e. Tjetjaxian méhe kixin tsjéyá nkehe tí jie chonta éxi nixja tí ley. A ntá ŷnkekuēnte kuítekákonhya tí ley, la kuétoan kixin ts'ékonna? —ichro ch'án.

⁴ A ntá tí sín siín ntiha ntáchro sín kixin:

—¿Á xikaha ts'antaxínhín tí nchat'á t'etōan kuēnte Dios?

⁵ Ntá kjuátehe ch'ín Pablo ntáchro ch'án kixin:

—Kíchóni, kjuatsoanhya janhan kixin jehe ch'án mé tí nchat'á t'etōan. Ntáchro tí xroon itén Dios kixin: “Chrók'uantaxiēnnya tí chojni t'etuēnhen chjasán”^{*} —ichro ch'án.

⁶ Ntá ch'ín Pablo mé kónohe ch'án kixin iso chojni siín ntiha mé chojni kuēnte partido saduceo, ntá í so sín a mé kuēnte partido fariseo. Ntá itsen k'uèya ch'ín Pablo, ntáchro ch'án kixin:

—Kíchóni, janhan mé ijnko chojni fariseo la tí sín kjéhyana mé fariseo kjaxin. Jahará mé tjéyará nkehe tí jie chonta kixin janhan mé tin-kachónkia kixin tsoxechón chojni tsík'en.

⁷ Ntá kjuixin ntáchro ch'án tíha ntá tí sín fariseo la ko tí sín saduceo mé kjuankixin sín ikjo kichó sín ntá xikaha jnkokónhya kjuenkayáxin tí sín tsíkójnkotsé ntiha. ⁸ Kixin tí sín saduceo a mé ntáchro sín kixin tsoxechónhya chojni tsík'en la ko kjaxin kohya sín ángel la ko kohya nchakuen. A ntá tí sín fariseo la titekaon sín kaín tí nkehe a. ⁹ Ntá kaín sín k'uèya sín la ntá iso tí sín maestro tjako ley kuēnte sín fariseo mé k'uínkatjen sín ntáchro sín kixin:

—Tí ch'ín i, kohya ninkehó nkehe jínahya kjuich'e ch'án. Ách'e ijnko nchakuen chojni o ijnko ángel mé nixjehe ch'án —ichro tí sín fariseo.

¹⁰ Ntá imá sítjité sín nínkaon sín. Ntá tí ch'ín comandante a mé tóxakonhen ch'án kixin chrókjuinčekuen sín tí ch'ín Pablo ntá k'uetuēnhen ch'án tí sín soldado a kixin sátsjikakjín sín ch'án la tsíkəo sín ch'án inaá tí cuartel kuēnte tí sín soldado.

¹¹ A ntá tí tie a na ntá xrínahya titàya k'uikuēn ch'ín Pablo Ìnchéni nixja ch'án, ntáchro kixin:

—Chrakonhya Pablo kixin éxi chronka tanná chjasin Jerusalén la mé xikaha tsochronka chjasin Roma.

Kjuenkayáxin sín chrók'óyán sín tí ch'ín Pablo

¹² Ntá tí yaon chr'exín a ntá iso tí sín judío a mé kjuenkayáxin sín kixin ts'óyán sín tí ch'ín Pablo. Ntá k'uákjénxín sín ihnié Dios chaxín tsoxiteyá la sinehya sín la ko ts'ihya sín ninkehó tí naxə ts'óyánhya sín ch'án. ¹³ Chjina cuarenta sín kjuenkayáxin sín kixin xikaha sich'e sín. ¹⁴ Ntá sákjuichenka sín tí sín nchat'á t'etōan la ko tí sín t'etuēnhen kuēnte tí sín judío la ntáche sín kixin:

—K'uákjénxinni ihnié Dios kixin chaxín tsoxiteyá kixin í sinehyani ninkehó tí naxə ts'óyánhyani tí ch'ín Pablo. ¹⁵ Méxra ntá jahará la ko í so tí sín t'etuēnhen tí sín judío tsontácherá tí ch'ín comandante a kixin tsjikəo sín tí ch'ín Pablo ntihi tí tjejorá ntóye nchitjen kixin antsí má tsjanchankíhírá ch'án nkehe siná á chaxín tí jie t'íká ch'án. A ntá jeheni senó ts'ejóchónhenni tí tsjixín ch'án ntá ts'óyanni ch'án kixin í tsjihya ch'án ntihi —ichro sín.

* 23:5 Éxodo 22.28

¹⁶ Ntá tí xjeen tí kjave tí ch'ín Pablo a mé tsíkinhin ch'án nkehe tí tjo tí sín a. Ntá sákjuí ch'án k'uíxenhén ch'án cuartel kuènté tí sín soldado kíxín tsochrónka ch'án nkehe tí tjo sín kuínhin ch'án. ¹⁷ La ntá ch'ín Pablo mé k'uíyehé ch'án ijnko tí sín capitán la ntáchro ch'án kíxín:

—Sátsjikoa tí ch'ín ntasoá tí tjen tí ch'ín comandante kíxín tjinkaon ch'án tsochrónka ch'án nkehe —ichro ch'án.

¹⁸ Ntá tí ch'ín capitán a mé sákjuíko ch'án tí tjen tí ch'ín comandante ntá ntáchro tí ch'ín capitán a kíxín:

—A ntá tí ch'ín Pablo tjechjina mé k'uíyeheni ch'án kíxín tsjikāoni tí ch'ín ntasoá ntihi kíxín tjinkaon ch'án tsonixjaha jaha —ichro ch'án.

¹⁹ Ntá tí ch'ín comandante a mé tséhe ch'án itja tí ch'ín ntasoá a ntá k'uaxrjentako ch'án jehó ch'án ntá kjuanchankíhi ch'án kíxín:

—¿Nkehe tí tjinkávan tsochrónka? —ichro ch'án.

²⁰ Ntá ntáchro tí ch'ín ntasoá a kíxín:

—Iso tí sín judío mé kjuenkayáxin sín kíxín tsjanchaha sín kíxín ntóye nchítjen sátsjikoa ch'ín Pablo tí tsojnkotsé tí sín judío t'etōan. Sit'ayaha sín tsonáchro sín kíxín tjinkaon sín tsjanchankíhi sín ch'ín Pablo tí nkehe antsí má xra. ²¹ A ntá jaha la chrókuítekákonhya kíxín chjina cuarenta chojni tjejóchónhen sín imó la k'uákjénxin sín ihnié Dios kíxín sinehya sín la ko ts'íhya sín ninkehó tsjixinjian its'en ch'ín Pablo. Ntá ijie tjejóchónhen sín tsonohe sín nkehe tsixrua jaha —ichro ch'án.

²² A ntá tí ch'ín comandante a mé nixjehé ch'án tí tí ch'ín ntasoá la k'uētōan ch'án kíxín:

—Tsochenkaha ninkexró kíxín xíkaha kjuíchrónka —ichro ch'án.

Ichr'án sín tí ch'ín Pablo tí itjen tí ch'ín gobernador Félix

²³ Ntá tí ch'ín comandante a mé k'uíyehé ch'án yaá tí sín capitán a ntá k'uētōan ch'án kíxín tsoyaxínhin sín sátsjiko sín iyó ciento sín soldado sátsjixin toté la ko setenta tí sín tsjiták'á kokatē la ko iyó ciento soldado sátsjiko chica lanza, ntá las nueve tie sátsji sín chjasin Cesarea, ichro ch'án.

²⁴ La ko k'uítuenhen sín sinchekamá sín kokatē tsjiták'á ch'ín Pablo la ts'ayakonhen sín ch'án jina kíxín kohya nkehe tsonhen kíxín tsjiji ch'án tí tjen ch'ín Félix, tí ch'ín gobernador. ²⁵ Ntá tí ch'ín comandante ikjin ch'án ijnko xroon a, ntáchro kíxín:

²⁶ “Janhan mé tí ch'ín Claudio Lisias chr'anhan ijnko xroon kíxín jaha ch'ín Félix ijnko gobernador jina, nixjaha. ²⁷ Tí sín judío a mé itsé sín tí ch'ín i kíxín chrók'óyán sín ch'án. Ntá tió kónóna kíxín ijnko chojni romano tí jehe ch'án la ntá sákjuíkian sín soldado kjuíntakaá ch'án. ²⁸ Tjínkavan tsonóna nkekuènté kíxín nínkakonhen sín ch'án. Ntá sákjuíkian ch'án tí tsíkójnkotsé tí sín judío. ²⁹ Ntá kónoxín kíxín nínkakuénxin sín ch'án kíxín tí ley kuènté sín kjuínchexiteyáhya ch'án, ichro sín. Jehya jie jie tsíkjasin ch'án kíxín chrók'óyán sín ch'án o chrókjuak'echjina sín ch'án. ³⁰ Ntá ó kuínhan kíxín tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxin kjuáncháha tí sín a kíxín chrókjuíi sín tí tjen jaha chrókjuá sín kíxín nkekuènté nínkakonhen sín ch'án. Kjuasáyá. Ó tjen.”

³¹ Ntá tí sín soldado a mé kjuínchexiteyá sín éxi k'uítuenhen sín a ntá sákjuíko sín tí ch'ín Pablo tí tie a chjasin Antípatris. ³² Ntá tí yaon chr'éxin tí sín soldado xrixín toté ó a mé xíkjan sín tí cuartel kuènté sín. Ntá tí sín k'uéjókjen kokatē a mé naxa sákjuíko sín tí ch'ín Pablo. ³³ Ntá tió kjuíji sín tí chjasin Cesarea ntá tí sín soldado a mé kjuanjon sín tí xroon a chjéhe sín tí ch'ín gobernador la ko kjaxin kjuínchek'áyehé sín ch'án tí ch'ín

Pablo. ³⁴ Ntá kjuixin kjuínchekuáxin tí ch'ín gobernador a tí xroon ntá kjuanchankí ch'án nketí chjasén ch'ín Pablo. La ntá kónohe ch'án kixin estado Cilicia tsíkji^xin tí ch'ín a. ³⁵ Ntá ntáchro ch'án kixin:

—Ntá tsjnhan nkehe tsixro tí sín itsji ts'eka jie.

Ntá k'ue^tu^enhen ch'án tí sín soldado a kixin ts'áyakonhen sín tí ch'ín Pablo tí nchia kuente ch'ín Herodes.

24

Ch'ín Pablo nixjehe ch'án ch'ín Félix chrónka ch'án kixin kjuasinhya ch'án jie

¹ Ntá k'uátsínka in'ó yaon, ntá ch'ín Ananías, tí nchát'a imá t'et^oan, kjuíji ch'án chjasin Cesarea. Kjaxin kuikao ch'án iso tí sín t'et^oan kuente nⁱnko a la ko ijnko ch'ín abogado it'in Tértulo. Tí ch'ín a mé tsonixjehe tí ch'ín gobernador kixin tsjanchia sín jie kuente ch'ín Pablo. ² Ntá tió kuikao tí sín soldado tí ch'ín Pablo ntiha ntá tí ch'ín Tértulo kjuankíxin ch'án nixjehe ch'án tí ch'ín Félix ntáchro ch'án kixin:

—Kjuasáyá jaha gobernador kixin imá kjuínkítsa kixin kjuaxróxin tjejóni la kjuasáyá kixin imá noha kjuíncheyóxian tí naci^on ku^enteni. ³ Kjuasáyá jaha Félix. Imá jína jaha kixin k'uáyéheⁿi kaín tíha. ⁴ Tjínk^akonhya sintak'itjáyanhan nchónhya tiempo la xrjanó^aha kixin chrókjuak'é chrókuinhín intsikoá tí nkehe ts^oxrjanka. ⁵ A ntá ijie ó k'uitjani kixin tí ch'ín i mé éxí ijnko chin t'óxika kuente chjasintajni kixin ch'iehe ch'án tí sín judío ntá xika sín. Jehe ch'án mé t'et^oan ch'án tí sín tinkáchónki tí ch'ín tsíkji^xin chjasin Nazaret. ⁶ Jehe ch'án mé kjaxin chrókjuinchekjita ch'án tí nⁱnko. A ntá itséni ch'án ntá chrókjuinchekit^oexínni tí ijie ch'án éxí t'et^oan tí ley ku^enteni. ⁷ A ntá tí ch'ín comandante Lisias kjuixrónkáxin ch'án kuikao ch'án nchónhya sín soldado la kuakitsje sín tí ch'ín Pablo. ⁸ Ntá k'ue^to^an ch'án kixin tí sín tjanchia jie chrókuitsjehe sín tí jaha kixin jaha chrókjuanchankíhí ch'án kixin chrókónoha jína nkexéhe tí jie chrókjuinchekj^asótexín sín ch'án —ichro tí ch'ín Tértulo.

⁹ Ntá ntáchro kaín tí sín judío siín ntiha kixin:

—Kaín tíha la chaxín —ichro sín.

¹⁰ Ntá tí ch'ín gobernador a mé kjuakoxin tja ch'án kixin tsonixja tí ch'ín Pablo a. Ntá ntáchro ch'ín Pablo kixin:

—Chéheⁿi kixin tsonixjahani tsochrónkani kixin kohya jie kjuasinni kixin ó noheni kixin jaha la juez kuente tí naci^on ntihi la nchónhya nánó t^oan. ¹¹ Jaha la kjaxin ó chrókónoha kixin na ntá teyó yaon kjuíjini chjasin Jerusalén kixin ntaha tsoxráxink^akonxínni Dios. ¹² Kónoxínhya kixin nijnko nkexro chrókjuachaxínni, la ko kjuínchexakuenhyani ninkexró nⁱnko la ko ni tí nⁱnko ntsí la ko ninketó chjasin. ¹³ Tí sín i la xitjahya tsontáchro sín kixin xikaha tí jie kjuasinni. ¹⁴ Janhan chaxín xrjanka kixin t'aha xra tí Dios k'uékinkáchónki tí sín tsík'axrjeníxinni mé yóhe tí ntja nixin. A ntá jehe sín ntáchro sín kixin ókjé nkehe tinkáchónkini. Kjánchó janhan mé tinkachónkia kaín tí nkehe tsíkjin sín tí xroon kuente ley la ko tinkachónkia kaín tí nkehe k'uénixja tí sín k'uéchrónka itén Dios. ¹⁵ Kjaxin tinkachónkia tí Dios tinkáchónki tí jehe sín kixin tjé^onhan kixin Dios sinchexechón kaín chojni jína la ko kaín chojni jínahya kjaxin. ¹⁶ Méxra tóxakonna kixin tjóá chrókjuak'é kixin chrókjuanchahya Dios jie la ko kjaxin chojni chrókjuanchahya jie.

17 'Nta kjuixin k'uatsínka iso nánó ixrini ókjé ntá kjuíjini chjasénni kixin tsjanjonni chichaon la ko kjaxin tsochjéheni Dios nkehe. 18 Méxra mé xikaha tjenni nkaxenhen nínko nta iso sín judío tsíkjin estado Asia ó xetani ntiha. Ntá kjuínchetjóáni asénni la tsjéhya chojni k'uikon la kohya chojni kjuánjonkoni. 19 A ntá tí sín a mé t'ichjánxin chrókui sín ntihi kixin chrókuanchia sín jie tí nínkakonna sín. 20 A ntá tí náhi la tí sín tjejó ntihi chróchrónka sín kixin nkehe tí jie k'uitjaxín sín tió kjuák'eni tí tjejó tí sín t'etóan kuènte tí sín judío. 21 Kjá tí tsontácho sín kixin náxrjónhya ijnko nkehe itsen k'uèya ntáxrjan kixin: "Ijie sinchekitoexinrá jièna kixin sinchekjasótenará kixin janhan tinkachónkia kixin tsoxechón chojni tsik'en" —ichro ch'án.

22 Ntá kjuixin kuínhin tí ch'ín Félix, la jehe ch'án jína kónohe ch'án kixin nkexrí tí ntia nixin. Ntá kjuínchekitoexínhya ch'án ijie ch'ín Pablo. Ntácho ch'án kixin:

—Tsjijia tí ch'ín comandante Lisias ntá tsochrónka ch'án nkekuènte tí jie tjanchará ntá tsonóna —ichro ch'án.

23 Ntá k'uetuènen ch'án ijnko ch'ín capitán kixin ts'ayakonhen ch'án ch'ín Pablo kjánchó tsítóhe sín ch'án intsi la ko tsítóhe sín ts'ixenhen tí sín chóxin ch'án, tsjitsjehe sín ch'án.

24 Ntá iso yaon chr'éxin ntá kjuíjiko ch'ín Félix tjan Drusila ichjién ch'án, mé ijnko tjan judía. Ntá k'uetóan ch'án kixin tsjik'íyehé sín tí ch'ín Pablo kixin tsochrónka ch'án nkexrí tinkáchónki chojni Jesucristo. 25 A ntá ch'ín Pablo mé kjuako ch'án kixin nkexrí ts'ejó chojni jína la ko nkexrí ts'etueñhen chojni asén sín kixin ch'ehya sín tí jínahya la ko nkexrí Dios sinchekitoexín ijie chojni tí tsjixixín. Ntá ch'ín Félix kuínhin ch'án xikaha ntá chrakon ch'án, ntácho ch'án kixin:

—A ntá jie la sájtia. Ntá ts'íyaha tió chonta tiempo —ichro ch'án.

26 A nta ch'ín Félix tjechónhen ch'án kixin kjá ch'ín Pablo tsjanjon ch'án chichaon ntá tsjanjon ch'án kjuachaxin sátsji ch'án. Ntá jnkoyaxón k'uíyehé ch'án tí ch'ín Pablo kixin tsonixjehe ch'án. 27 Ntá xikahó kónhen hasta k'uátsínka iyó nánó ntá tí ch'ín Félix kuítóhe ch'án tí xra gobernador la ntá í jnko ch'ín it'in Porcio Festo mé k'uixenhen ch'án tí xra a ínaá. A ntá ch'ín Félix mé kuítóhe ch'án tí ch'ín Pablo tjechjina ch'án kixin tjinkaon ch'án chrókuinchexiteyá ch'án tí nkehe tjinkaon tí sín judío.

25

Ch'ín Pablo nkayakon tí ch'ín Festo

1 Ntá tí ch'ín Festo kjuíji ch'án ntiha kixin ts'ixenhen ch'án tí xra gobernador. Ntá iní yaon chr'éxin ntá sákjuixin ch'án chjasin Cesarea la kjuíji ch'án chjasin Jerusalén. 2 Ntiha tí sín nchat'á t'etóan la ko tí sín judío imá tjetóan mé kjuanchia sín kixin tsjasóte ch'ín Pablo. 3 Kjuanchia sín kixin xra ó chrók'uetóan ch'án kixin chrókjui ch'ín Pablo ntiha chjasin Jerusalén. Kixin jehe sín ó tsíkjenkayáxin sín kixin tsochr'án sín iso chojni tsochónhen tí ntia ts'óyán sín tí ch'ín Pablo. 4 Kjánchó ch'ín Festo kjuátehe ch'an ntácho ch'án kixin ó tsíkjenkayáxin ch'án kixin í séhya tsjak'e ch'án ntiha. Méxra tí ch'ín Pablo la tjechjina ch'án chjasin Cesarea la xitjahya ts'etóan ch'án kixin tsjixrakoa. 5 Ntá ntácho ch'án kixin:

—Tí chojni tjetóan kuéntará sáchrókjuikian ntiha chjasin Cesarea. A ntá tí chaxín tsíkjasin ch'án jie ntá ntiha la jína tsjanchia sín jie —ichro tí ch'ín Festo.

⁶ Ntá ch'ín Festo kjuák'e ch'án chjasin Jerusalén chjina ijní o ite yaon ntá ikjan ch'án chjasin Cesarea ínaa. Ntá tí yaon chr'éxin a kjuák'etjaxin ch'án tí tjet'etoanxín ch'án ntá k'uetōan ch'án kixin tsjikakjín sín tí ch'ín Pablo. ⁷ Ntá tió k'uixenhen ch'ín Pablo ntiha ntá tí sín judío kuixin Jerusalén kóchjinehe sín ch'án ntá kjuanchia sín nchónhya jie imá hyé. Kjánchó ijnko nkehe chaxínhya t'eka sín ch'án jie. ⁸ A ntá tí ch'ín Pablo a chrónka ch'án kixin kjuasinhya ch'án jie. Ntáchro ch'án kixin:

—Ninkehó jie kjuasinhyani mé ninkexró kjuánjonkohyani la ko kjaxin jehya chrókuitekakonhyani tí ley kuènte tí sín judío la ko jehya chrókuitekakonhyani tí nínko la ko jehya chrókuitekakonhyani tí ch'ín gobernador romano.

⁹ A ntá ch'ín Festo tjinkaon ch'án kixin tsonínkakuenhya ch'án tí sín judío ntá kjuanchankíhi ch'án tí ch'ín Pablo ntáchro ch'án kixin:

—¿Á tjinkávan sátsjia chjasin Jerusalén kixin ntaha janhan chrókjuíntakitoaxián nkehe tí jie chonta jaha? —ichro ch'án.

¹⁰ Ntá kjuátehe ch'ín Pablo kixin:

—Náhi, jeheni ó ntihi tjenni tí t'etoanxín tí sín gobierno romano la jína chrókjuínchekitoexián ijieni kixin jaha la ó noha kixin ninkehó ijie kjuích'ehyani tí sín judío. ¹¹ Kja tí chaxín kjuásian ichrén jie jie chrók'uénxian la chrakonhyana kjónté chrók'uén. A ntá ti chaxínhya xikaha t'ekana sín jie la ninkexró chóntahya kjuachaxin chrók'uetōan sáchrókjuikoni tí jehe sín. A ntá tjánchá kixin jehe tí ch'ín imá t'etoan mé sinchekitoexín tí jie —ichro ch'án.

¹² Ntá ch'ín Festo mé kjuanchankíhi ch'án iso tí sín tjinkítsa ch'án ntá ntáchro ch'án kixin:

—Jaha mé tjanchia kixin tí ch'ín imá t'etoan sinchekitoexín ch'án ijia. Méxra tétuanhan sátsjia tí tjen tí ch'ín a —ichro ch'án.

Ch'ín Pablo nkayakon tí ch'ín rey Agripa

¹³ Ntá k'uaátsínka iso yaon ntá tí ch'ín rey Agripa la ko tjan Berenice kjuíji sín chjasin Cesarea kixin tsonixjehe sín tí ch'ín Festo. ¹⁴ Ntá ntiha mé kuítóhe sín itsjé yaon ntá ch'ín Festo a mé chénka ch'án tí ch'ín rey nkehe kuènte tí ch'ín Pablo. Ntáchro ch'án kixin:

—Ntihi itjen ijnko ch'ín tjechjina tsíkítóhe ch'ín Félix. ¹⁵ A ntá tió kjuak'é chjasin Jerusalén ntá tí sín nchát'á t'etoan la ko tí sín t'etuenhen tí sín judío a mé kjuíjitsjehe sín tí janhan ntá kjuanchia sín jie kuènte ch'ín Pablo. Kjuanchia sín kixin chrók'óyánni tí jehe ch'án. ¹⁶ Ntá janhan kjuátaha kixin: Jeheni chojni t'etoan kuènte sín romano mé kuènhyani ts'etoanni its'en ninkexró tí naxa tsochjinahya tí ch'ín kjuasin jie kixin tsontáchro ch'án á chaxín tí jie tjanchia sín o náhi. ¹⁷ Ntá ti sín judío kui ntihi ntá chuánhya má. Kjónté tí yaon chr'éxin kjuak'etjaxian tí ntakitōexián ijie chojni la kuétoan kixin síxrakoa tí ch'ín Pablo. ¹⁸ A ntá tí sín kóchjina kohya ninkehó ichro sín kuènte tí jehe ch'án éxi kjuenkayáxian janhan chróntáchro sín. ¹⁹ Jehó nínkakuénxín sín ch'án kixin tí nkehe tinkáchónki ch'án la ko nínkakuénxín sín ch'án kixin tí nkexro it'in Jesús mé ik'uén ch'án ntá jie ntáchro ch'ín Pablo kixin tjechón ch'án ínaa. ²⁰ Janhan la nonahya nkexrí tsitoexín tí ijie ch'án ntá kjuánchankíha tí ch'ín Pablo á tjinkaon ch'án sátsji ch'án chjasin Jerusalén kixin ntaha tsitoexin tí jie ch'án. ²¹ A ntá jehe ch'án tsíkjanhia ch'án kixin tí ch'ín imá t'etoan mé chrókjuínchekitoexín ch'án ijie ch'án. Ntá kuétoan janhan kixin naxa

ntihyó tsjak'echjina ch'án tsononajia janhan nkesá tsétuanhan ch'án sátsji ch'án ntiha —ichro ch'án.

²² A ntá ch'ín Agripa ntáche ch'an tí ch'ín Festo kixin:

—Kjaxian janhan tjínkavan tsinhan tí nkehe tsochrónka tí ch'ín a.

Ntá kjuátehe ch'ín Festo ntácho ch'án kixin:

—Ntóye tsinhín nkehe tsochrónka ch'án.

²³ Ntá tí yaon chr'éxin tí ch'ín Agripa la ko tí tjan Berenice kjuíji sín la k'uixenhen sín la ko tí sín soldado t'etóan tsíkjikao sín, la ko k'uixenko sín iso chojni tjetóan kuènte chjasin ntiha. Ntá k'uetóan ch'ín Festo kixin tsjixrakoa tí ch'ín Pablo. ²⁴ Ntá ntácho ch'ín Festo kixin:

—Jaha ch'ín rey Agripa tinhín la ko tinhínrá kaín rá tsíkójnkotsérá ntihi. Tsjehérá tí ch'ín Pablo itjen ntihi. Kaín tí sín judío k'ueka sín ch'án jie tí chjasin Jerusalén la ko kjaxin chjasin Cesarea ntihi la kuítóehya sín, tjanchana sín kixin chrók'uen ch'án. ²⁵ A ntá tónhenni kixin kohya jie jie kjuasin ch'án kixin chrók'uen ch'án. Kjánchó jehe ch'án mé tsíkjanhia ch'án kixin tí ch'ín imá t'etóan chrókjuinchekitóexín ijie ch'án. Ntá kjuenkayáxian kixin tsétuanhan ch'án sátsji ch'án ntiha. ²⁶ Nonahya nkehe chaxín tsokjian ts'áyéhe tí ch'ín t'etóan. Ntá jie kuétóan kjuikakjín sín ch'án kjuíkao sín ch'án tí tjejóni ntihi kixin tjetóan kixin jaha ch'ín Agripa la ko kaín rá tjejórá ntihi tsjanchankíhírá ch'án kixin mé tsonóna janhan nkehe tsokjian. ²⁷ Méxra náxrjónhya chróchr'an ijnko tí chojni tjechjina naxa nonahya nkehe tí jie t'eka sín ch'án.

26

Ch'ín Pablo nkayakon tí ch'ín rey Agripa chrónka ch'án tí jie t'eka sín ch'án

¹ Ntá tí ch'ín rey Agripa a mé ntáche ch'án tí ch'ín Pablo kixin:

—Ó nchoxon jahvá tsochrónka —ichro ch'án.

Ntá tí ch'ín Pablo mé kjuaya tja ch'án ntá kjuankixin nixja ch'án, ntácho ch'án xikihi:

² —Chàna kixin tsonixja nkayakuan tí jaha rey Agripa tsoxrjanka kaín tí jie t'ekana tí sín judío. ³ Ó noheni kixin jaha la ó noha jina kuènte tí ley la ko tí nkehe tinkáchónki tí sín judío, la ko jaha noha nkehe tí kjuachaxin sín kichó sín. Méxra xrjannóaha kixin tjak'etinhín jina.

Chrónka ch'ín Pablo nkexrí kjuák'e ch'án tí ósé

⁴ 'Kaín tí sín judío la ó nohe sín nkexrí k'uékjak'é tí chjasenná la ko chjasin Jerusalén tí naxa k'uéntasoána. ⁵ Kjaxin jehe sín la ó nohe sín la kjá jina chróchrónka sín kixin tí naxa k'uéntasoána la k'uéfariseona. A ntá tí sín fariseo a mé antsí má kjuínchexiteyéhe sín tí ley kuènte tí nkehe tinkáchónkini. ⁶ Ntá ijie sinchekitoexián jiena kixin nínkaon tí sín judío a kixin tjéchonhan kixin Dios mé sinchexechón chojni inaá xikaha tsíchénka ch'án tí sín tsík'axrjeníxinni. ⁷ Tí teyó tribu tsík'axrjeníxin ch'ín Israel mé tjejóchónhen sín kixin ts'ikon sín tsoxiteyá tí nkehe tsíchrónka Dios. Méxra xraxinkaon sín Dios nchakotjin la ko tie. Méxra mé xikaha tjéchonhan, jaha rey Agripa, la mé xikaha nínkakonna tí sín judío ijie. ⁸ ¿Á titekákonhyará jahará kixin Dios sinchexechón chojni tsík'en?

Ch'ín Pablo k'uénínkakonhen ch'án tí chojni tinkáchónki Ìnchéni

⁹ Janhan mé kjaxin k'uékjenkayáxian nchónhya nkehe k'uénínkakonhan tí sín tinkáchónki Jesús tí nkexro tsíkjixin chjasin Nazaret. ¹⁰ Mé xikaha

kjaxin k'uékjít'a chjasin Jerusalén. Tí sín nchat'á t'etōan mé kjuanjōn sín kjuachaxin kixin janhan tsochr'áxanhan ntōechiso nchónhya tí sín tinkáchónki Ìnchéni. Ntá tió k'óyán sín tí sín a mé janhan la ntáxrjan kixin ó nchōxon xikaha kónhen. ¹¹ Nchónhya veces kjuintakjasóte tí sín tinkáchónki Ìnchéni kixin chrókuítóhe sín tí nkehe tinkáchónki sín. Mé xikaha k'uékjít'a kaín xín nínko kixin imá k'uénínkakhōnhan tí jehe sín la xikaha k'uájichráhā sín kjónté sátsíkji sín chjasin ókjé.

Chrónka ch'ín Pablo nkexrí kuinkáchónki ch'án Ìnchéni
(Hch. 9.1—19; 22.6—16)

¹² Méxra xra ó sákjuia janhan chjasin Damasco. Tí sín nchat'á t'etōan mé ó kjuanjōn sín kjuachaxin kixin xikaha t'aha sín xra. ¹³ A ntá tí ntia a jaha rey chrókónoha kixin chonkixin k'uíkuan éxi ijnko xrohi t'inkaséyan kuixin nkaya nkajní antsí má fuerte la kánhyó fuerte tí xrohi kuente yaon la tí t'inkaséyan mé k'uantatjen tí janhan la ko tí sín xrikjan. ¹⁴ Ntá kaín ni kjuítsinkani nonte ntá xrinahya kuinhan nixja ijnko nkexro mé nkiva hebreo nixjāxin ch'án. Ntáchro tí nkexro a kixin: “Saulo, Saulo, ¿nkekuente nínkakōna xritjéyá tí janhan? Jahvá nchekjasóte asán kixin tjanjōnkoa tí janhan. Éxi yóhe ijnko koxinta kónínkaon va tí chriáte sín va chica yo mé xikaha jaha.” ¹⁵ Ntá kjuánchánkiá kixin: “¿Xá nkexro jaha?” Ntá tí nkexro me kjuátehe kixin: “Janhan mé Jesús mé tí nkexro chréhé jaha. ¹⁶ Ijie t'aya jaha, tjak'exián totá. Janhan kjuánjuan kjuachaxin kixin k'uíkuan tí janhan ijie kixin jaha sich'ena xra. Janhan kjuéyá tí jaha kixin tsochéna chojni kixin k'uíkuan tí janhan la ko tsochronka tí nkehe tsjákohá inaá tí xik'ikuan tí janhan inaá. ¹⁷ Janhan ts'ayakonhan kixin kohya nkehe sit'aha tí sín judío la ko tí sín jehya judío. A ntá jie tētoan satsjia. ¹⁸ Méxra tētoan sátsjia tí tjejó tí jehe sín kixin takítjenkia ikon sín kixin í ts'ajihya sín ntia sitié la ts'aji sín ntia t'inkaséyan la ko tsochóntahya tí jínahya kjuachaxiēn ts'etuēnhen tí jehe sín. Jehe sín mé tsinkáchónki sín tí janhan. Ntá janhan ts'áyáhā sín la tsjin ijie sín la ko tsitonhen sín tí nkehe ts'áyéhe kaín tí sín tsíkjinchetjóá Dios,” ichro Ìnchéni.

Ch'ín Pablo kuítekaon ch'án tí nkehe tsík'ikon ch'án

¹⁹ Mé xikaha jaha rey Agripa kjuintaxiteyáhā tí nkehe k'uíkuan kuixin nkaya nkajni. ²⁰ Saóxín kjuáqohā tí sín sín chjasin Damasco, la ntá chr'éxin chjasin Jerusalén, la ko kuenté tí estado Judea ntá kjaxin kjuáqohā tí sín jehya judío. Kjuáqohā sín kixin chrókuítóhe sín ijie sín, la chrókjan sín chrókuinkáchónki sín Dios, la ko chrókjuáqoxin sín xra jina kixin chaxín ó kjuítóxinhin sín tí nkehe tinkáchónki sín. ²¹ Mé xikaha tí xra tséxinna tí sín judío a nkaxenhen nínko la tjínkaon sín chrók'óyánna sín. ²² Ntá kjuasáyé Dios kjuínkítsana la ntoá itjén ijie tjáqohā kaín chojni ntsínsí la ko chojni ihyé la ninkehó k'uantaxiānhya kuente tí nkehe tsíchrónka tí sín tsíchrónka itén Dios la ko tí nkehe tsíchrónka ch'ín Moisés tsonhen, ²³ kixin t'ichjánxin its'en Cristo la ko tsoxechón ch'án inaá. Tí itén ch'án éxi ijnko xrohi sín t'inkaséyanxín tí sín sín ntihi la ko tí sín sín í so nación kixin tsaáxin sín.

Ch'ín Pablo nixjehé ch'án ch'ín Agripa kixin chrókuinkáchónki ch'án Ìnchéni

²⁴ Mé xikaha ichro ch'ín Pablo kixin kohya jie kjuasin ch'án ntá tí ch'ín Festo mé itsen k'uéya ch'án kixin:

—Pablo jaha la kjá tsík'ixikján. Imá tsíkjinchekuáxian mé xikaha tsikólókoxian —ichro ch'án.

²⁵ Ntá kjuátęhe ch'ín Pablo kixin:

—Jehya tsík'ixikjána. Jaha Festo imá tjuaha. A ntá tí nkehe ntáxrjan la ijnko nkehe jína la ijnko nkehe chaxín. ²⁶ Ntihi itjen tí ch'ín rey Agripa. Jehu ch'án mé jína nohe ch'án kaín tí nkehe a. Méxra tјenixjaha ch'án jnkójina kixin ó nona kixin jehu ch'án ó nohe ch'án kaín nkehe kónhen kixin jehya ijnko nkehe imó kónhen tíha. ²⁷ Jaha, rey Agripa, ¿á titekávan tí nkehe tsíkjako tí sín tsíchrónka itén Dios ósé? Janhan la ó nona kixin titekávan jaha.

²⁸ Ntá kjuátęhe ch'ín Agripa ntáchro ch'án kixin:

—Ó antsíkoá chrokjuacha chrókjuachródena kixin chrók'ónana cristiano —ichro ch'án.

²⁹ Ntá ntáchro ch'ín Pablo kixin:

—Ntáxrjan kixin á isé tsoxrjanka o á séhya la Dios mé tjinkaon kixin jehya jahvá chrókuinkachónkia ch'an. Náhí. Kјaxin tjinkaon ch'án kixin kaín nkexro tјejótinhin chrók'óna sín éxí tí janhan kјánchó xikahya chróchóna sín cadena.

³⁰ Ntá kjuixin nixja ch'ín Pablo ntá k'uínkatjen tí ch'ín rey, la ko kјaxin tí ch'ín gobernador, la ko kјaxin tí tјan Berenice, la ko kaín xín tí chojni tјejótјaxin tíha. ³¹ Ntá kaín sín k'uaxrјenta sín la ikjo sín kichó sín. Ntáchro sín kixin:

—Kohya ję tsíkjasin tí ch'ín a kixin chrók'uénxín ch'án la ko chrókjuak'echjinaxín ch'án ntęechiso.

³² Ntá tí ch'ín Agripa ntáche ch'án tí ch'ín Festo kixin:

—Ó nchoxon chrókjuánjuan kjuachaxin sáchrókјui tí ch'ín a tí jehu ch'án chrókjuanchahya ch'án kixin tí ch'ín imá t'ętoan sinchekitęxín iјié ch'án —mé xikaha ichro tí ch'ín Agripa.

27

Ch'ín Pablo sákuí ch'án chjasin Roma

¹ Ntá k'ųętoan sín sátsјini nación Italia. Tí ch'ín Pablo la ko í so sín tјejóchјina a mé k'ųáyéęhe ijnko ch'ín capitán mé it'in Julio. Jehu ch'án mé ijnko policia kuente tí ch'ín t'ętoan Augusto César. ² Ntá k'ųixenhenni ijnko ntabárcę tsíkјixin nó puerto Adramitio, la ó chјina sátsјi tí puerto nó estado Asia. Kјaxin tјejókoni tí ch'ín Aristarco tsíkјixin chjasin Tesalónica nó estado Macedonia. ³ A ntá tí yaoon chr'éxin mé kjuјjini tí puerto chjasin Sidón. Ntá ch'ín Julio mé ikjo jnkójina ch'ín Pablo ntá chјéhe ch'án kjuachaxin kixin sátsјitsјehe ch'án tí chojni chóxin ch'án ntiha kixin tsјinkitsa sín ch'án. ⁴ Ntá chr'éxin sákuixinni chjasin Sidón. Ntá kjuјjini ijnko isla it'in Chipre la nó tја kјonni kuitęhe tíha la imá chјéhe xrintę. ⁵ Ntá k'ųatőyeni tí ntayaon chјinaxón chjasin Cilicia la ko Panfilia la ntá kjuјjini chjasin Mira estado Licia.

⁶ A ntá ntiha tí ch'ín capitán, tí ch'ín k'ųętuęnhen tí sín soldado a, mé k'ųuitја ch'án í jnko ntabárcę tsíkјixin nó chjasin Alejandria sátsјi nó nación Italia. Ntá ntáchro ch'án kixin tíha sátsјikoni kixin tsјјini ntiha. ⁷ Nchónhya yaoon kjuјjixinni kixin imá iyó la imá xra kjuјjini chјino chjasin Gnido. Ntá naxa chјéhe xrintę tsanka ntá k'ųuátsínkani chјinaxón Salmón ntá kuinkátјiáxinni chјino tí isla Creta. ⁸ Ntá xikahó imá xra k'ųuátsínkani chјinó chrínta ntá kjuјjini ijnko chjasin it'in Puertos Jína chјino chjasin Lasea.

⁹ Ntá k'uitjáyannkí nchónhya yaon, ntá ó kjuixraká tí yaon xitjahya sátsjiko sín ntabárcō chrítaón ntayaon kixin ó kóchjina tí nchakuen kin. Méxra ch'ín Pablo nixjehe tí sín a. ¹⁰ Ntáchro ch'án kixin:

—Tinhínrá tí nkehe tsoxrjanka. T'íkuañ kixin nchónhya kjuachrakon tsonhen. Sinchek'itjáyanni tí ntabárcō a la ko tí nkehe tjinká la kjaxin jeheni chrók'uitjáyanni —ichro ch'án.

¹¹ A ntá tí ch'ín capitán kuente tí sín soldado a mé antsí má tjinkaon ch'án chrókuinhin tí nkehe chrónka tí ch'ín tjiko ntabárcō la ko tí nkehe chrónka tí inché tí ntabárcō a ntá tí nkehe ntáchro ch'ín Pablo la náhi. ¹² Jehya jina kixin tí puerto ntahó chrók'uejóni ntá chrók'uatsínkajia tí nchakuen kin, ichro sín. Kaín sín kjuenkayáxin sín kixin íchá jina sátsjixínni ntiha kixin ákué xitjahya chrókjuijini chjasin Fenice, ijnko puerto estado Creta nó chók'á noroeste la ko suroeste, la ntaha chrók'uejóni ntá chrók'uatsínkajia tí nchakuen kin.

Tí xrintō chjéhe chrítaón ntayaon

¹³ Ntá kjuankixin chjehe xrintō kjuixin nó sur kjánchó kánhyó fuerte ntá kjuenkayáxin sín kixin kjá jina sátsjini.

Ntá sákjuixínni ntiha kjánchó kjónté naxa sákjuíni chjinaxón tí chrínta tí isla Creta a. ¹⁴ A ntá chr'éxin ikjui ijnko xrintō kjuixin noroeste k'uúntaté tí ntabárcō. ¹⁵ La kjuankixin xrintō sákjuíko tí ntabárcō kixin tsjachahyani sátsjini tí sitjixin tí xrintō a. Ntá t'ichjánxin kuítóheni sákjuíko xrintō tí ntabárcō tjejóxenhenni. ¹⁶ Ntá k'uátsínkani chjino ijnko isla ntsí it'in Clauda kixin ntiha mé kánhyó tjian chjéhe xrintō. Ntá imá xra k'uitjanni tí ntabárcō ntsí t'etenixín nóton ntabárcō jíé. ¹⁷ Ntá kjuixin kjuínchek'ít'ótjen sín tí ntabárcō ntsí ntá imá chrakon sín ntá kjuínchenteto sín tí ntabárcō jíé kixin kohya nkehe tsonhen. Kjaxin tóxakonhen sín chrakon sín tsikjine nchesen tí ntabárcō tí tsjiji sín tí it'in Sirte. Ntá kuakjinjin sín tí ka chóna ntabárcō ntá kuítóhe sín sátsjiko xrintō. ¹⁸ Ntá tí yaon chr'éxin ntá naxa imá tjian chjéhe xrintō. Ntá ik'ue sín tí nkehe sitjinká tí ntabárcō a chrínta ntayaon kixin kánhyó tsoye. ¹⁹ A ntá tí yaon nixin a mé itjani ó kuakitsjexínni tí nkehe kuente tí ntabárcō. ²⁰ Isé k'uúkonhyani yaon la k'uúkonhyani konotsé kixin imá tjian chjéhe xrintō la ko kjaxin ó k'uitjáyenhenni kaín tí tjenkayáxinni kixin naxa chrókuaáni.

²¹ Ntá ó k'uatsínka itsjé yaon kjónehyani ntá k'uúkatjen ch'ín Pablo nixjehe ch'án kaín tí sín tjejóxenhenn ntabárcō a ntáchro ch'án kixin:

—Chrókuítekáonrá tí nkehe xrxjanka kixin chrókuítóheni tí estado Creta ntá chrók'uitjáyenhanyi tí nkehe tjinká tí ntabárcō a. ²² A ntá ijie la tóxakuanhyará kixin kohya nijnko tí jahará its'enrá kixin kjónté tí ntabárcō la ts'itjayan. ²³ Ntá tí tie a mé k'uúkuñ ijnko ángel tsíchr'án Dios tinkachónkia la ko t'aha xra. ²⁴ A ntá tí ángel mé chrónka kixin: “Chrakonhya jaha Pablo. T'ichjánxin tsjasán tí tjen tí ch'ín César t'etōan la kjaxin Dios la tsjinkítsa jaha la ko tí sín tjejókoa kixin ts'enhya sín.” ²⁵ Méxra chróchrakonhyará jahará kixin tí Dios tinkachónkia la chaxín nchexiteyá tíha, éxí tsintáchro tí ángel. ²⁶ Kjónté ó jehí t'ichjánxin sátsjikoni xrintō ijnko nonte jnkosiné ntayaon —ichro ch'án.

²⁷ Kjuixin k'uátsínka iyó semana ntá ijnko tie ntá kjuíjini ijnko ntayaon it'in Adria ntá sákjuíko tí ntabárcō ijnko lado la í jnko lado tí xrintō. Ntá chjino k'áxrótjen ntá tí sín tjiko ntabárcō mé ó kónohe sín kixin ó chjina kjuixraká sin ijnko nonte xamá. ²⁸ Ntá kjuáchrōa sín tí nkejajín ninkaxín

tí ntá mé chóna treinta y seis metro ninkaxín. Ntá sákjuíni kjínhya la ó xíkjachroa sín la veintisiete metro ó ninkaxín. ²⁹ Imá chakon sín kixin ts'itjatón tí ntabáro itjo ntá kjuinkajín sín noó chica gancho tí nóton tí ntabáro a kixin ntahó tsochónhen tí ntabáro hasta chrók'uinkaséyan. ³⁰ Ntá tí sín tjiko ntabáro kjuenkayáxin sín sáchrókjui sín ntá kjuankixin kjuinkajín sín tí ntabáro ntsí chrítaón ntá éxí tjinkaon sín chrókjuinkajín sín tí gancho chóna tí kja ntabáro. ³¹ A ntá ch'ín Pablo ntáche tí ch'ín capitán la ko kaín tí sín soldado kixin:

—A ntá tí tsitqehya tí sín i ntihi nkaxenhen ntabáro ntá xitjahya tsaára —ichro ch'án.

³² Ntá tí sín soldado a mé kóchrinjint'ó sín tí hno kuente ntabáro ntsí tsitqhe sín tsjankí ntá.

³³ Ntá chjina t'inkaséyan a ntá ch'ín Pablo nixjehe ch'án kaín tí sín siín ntiha ntácho ch'an kixin chrókjóné sín ichrén nkehe. Ntácho ch'án kixin:

—Ó k'uátsínka iyó semana k'uejóchrinhyará la ko kjóntehyará. ³⁴ Tinhínra t'ichjánxin chrókjónterá ichrén nkehe tí tjinkáonrá tsaára kixin ntihi la kohya nkexro ts'itjáyán la nijnko tí kaxihi chóna kjará ts'itjáyán.

³⁵ Ntá xíkaha ichro ch'ín Pablo ntá kuákja ch'án ijnko niotja a la ntiha tí tjejó kaín sín ntá kjuanchia ch'án kjuasáyé Dios ntá kóchrít'ó ch'án ntá kjuankixin kjóné ch'án. ³⁶ Ntá kóchéhe sín kaín sín kjuankixin kjóné sín kjaxin. ³⁷ Kaínni tsík'ixenhenni ntabáro mé iyó ciento setenta y seis chojni. ³⁸ Ntá kjuixin kjóné sín la kókjehe sín ntá ik'ue sín tí noa trigo a tjinká tí ntabáro a chrínki tí ntayaon a kixin kánhyó tsoye tí ntabáro a.

Tí ntabáro kjuixin k'uániánki ntá

³⁹ A ntá ó k'uínkaséyan, a ntá tí sín tjiko ntabáro la kjuátsoanhya sín tí nonte ntá k'uíkon sín ijnko chrínta ntá. Ntácho sín kixin ákué tsjachahya sín sátsjiko sín tí ntabáro ntiha. ⁴⁰ Ntá kóchrinjint'ó sín tí hno síchroéxin tí gancho kixin ntahó tsitqhe chrínki ntayaon. Ntá kjuínchenta sín tí nkehe tjikoxín sín tí ntabáro a. Ntá kjuínchek'it'ótjen sín tí ka tjiko nkayakon tí ntabáro. A ntá tí ntabáro kjuankixin sákjuí chrínta ntá. ⁴¹ Xríñahya kjuíji ntabáro tí iyó kójnkojiéxin ntayaon ntá ntiha kjuikjiat'ó tí kja tí ntabáro tí nchesen siín ntiha. Ntá í xitjahya nchekinkí ninkehó, a ntá nóton tí ntabáro kjuankixin síxíka kixin imá sítji chjéhe ntá a. ⁴² Ntá tí sín soldado a mé tjinkaon sín chrók'óyán sín tí sín tjejóchjina kixin tjinkakonhya sín kixin ninkexró sáchrókjui ókjé. ⁴³ A ntá tí ch'ín t'etueñhen tí sín soldado a mé tjinkakonhya ch'án kixin its'en ch'ín Pablo ntá kjuanjonhya ch'án kjuachaxin. Íchá k'uetqan ch'án kixin tí sín jína tjitaón ntá la senó sátsji sín kixin tsjiji nonte xámá ⁴⁴ la ko tí sín noehya tsjitaón ntá a mé sátsjiko sín ti ntabla o it'ó tí ntabáro. Ntá xíkaha kaín ni kjuíjini tí nonte xámá la ó kuaáni.

28

Itjen ch'ín Pablo tí isla Malta

¹ Ntá tió tjejóni kaín ni kuaáni ntá kónoheni kixin tí isla la mé nchek'in sín Malta. ² A ntá tí sín chjasin ntiha mé imá jína kjuínkítsa sín kaín ni la kjuaka sín ijnko xrohi jié kixin imá kin kixin sí'taniá chrin. Ntá k'uèya sín kixin tsochjinani kaín ni tsochjixroheni. ³ A ntá ch'ín Pablo mé sákjuikakja ch'án í so njo tsixámá ntá kjuasínkate ch'án tí xrohi a. Ntá

xrínahya k'uaxrjenkíxin ijnko konche tí xrohi a k'íxin imá sóa ntá xrínahya k'uáísimá itja ch'ín Pablo. ⁴ Ntá tí sín chjasin ntiha mé k'uíkon sín tí konche k'ítjijankítjen itja ch'án ntá ikjo sín k'íchó sín. Ntáchro sín k'íxin:

—Kjá tí ch'ín a la ijnko chojni tsíkjáya a k'íxin k'jonté kuaá ch'án k'uénxinhy ch'án nta yaon la Dios la í tjinkakonhya k'íxin naxa tsjak'echón ch'án.

⁵ A ntá jehe ch'án kótsjénka ch'án itja ch'án chrítaón tí xrohi k'íxin ntiha ts'anótjen tí konche, ntá jehe ch'an la kohya nkehe kónhen ch'án. ⁶ Ntá kaín sín tjejóchónhen sín k'íxin ách'e ts'atjoyé itja ch'án o ách'e its'en ch'án. Ntá kjuixín k'uéjóchónhen sín isé la k'uíkon sín k'íxin kohya nkehe kónhen ch'án ntá kjuítóxin sín tí nkehe kjuenkayáxin sín la ntáchro sín k'íxin jehe ch'án mé ijnko dios tíha, ichro sín.

⁷ Ntá chjino tí k'uéjóni a mé itjen nontee ijnko ch'ín t'etōan kuente isla me it'in Publio. Mé jína kjuanjon ch'án kjuachaxin k'uéjóni ntōe ch'án la kjuanjon ch'an nkehe k'jóneni iní yaon. ⁸ Ntá it'é tí ch'ín Publio a mé tjetsínka ch'án k'íxin níhi ch'án chóna ch'án sóa la ko chinjni. Ntá ch'ín Pablo sákjuítsjehe ch'án la kjuixín nixjehe ch'án Dios, ntá kjuák'etja itja ch'án tí ch'ín a ntá kuítóhe ch'án jína. ⁹ Mé xíkaha kjaxín kóchjina í so tí sín níhi sín tí isla ntá kaín sín kuítóhe sín jína. ¹⁰ Na ntá imá kjuikosáyehe sín ch'án. A ntá chr'éxin tíó kjuixín k'uíxenhenni ntabárcō inaá ntá kjuanjon sín kaín nkehe t'ichjánxinhinni sátsjikoni.

Kjuíji ch'ín Pablo chjasin Roma

¹¹ Ntá k'uátsínka iní nitjó tjejóni tí isla ntá k'uíxenhenni ijnko ntabárcō mé ntahó tsíkitohe k'uátsínkajia tí nchakuen kin. Tí ntabárcō a mé tsíkixín chjasin Alejandría la ko mé chóna nkehe tsíkjanoya chóna ihníé dios Cástor la ko Pólux. ¹² Ntá sákjuíni ntá kjuíjini puerto chjasin Siracusa la ntaha kuítóheni iní yaon. ¹³ Ntá xík'ixenhenni tí ntabárcō la k'uátsínkani chjinaxón tjen ijnko nonte ntá kjuíjini chjasin Regio. Ntá tí yaon chr'éxin a ntá kjuankíxin chjéhe xríntō kjuixín nó sur, ntá yaon yóxin ntá kjuíjini chjasin Puteoli. ¹⁴ Ntá ntiha xetani iso k'íchó ni, a ntá tjínkaon sín ts'ejókoni sín ntiha. Ntá k'uéjókoni sín ijnko semana ntá chr'éxin sákjuíni chjasin Roma. ¹⁵ Ntá tí sín k'íchó ni chjasin Roma la ó nohe sín k'íxin tsjijini. Ntá iso sín la xetani sín ntja chjasin Foro Apio la ko í so sín xetani sín chjasin Tres Tabernas. Tíó tí ch'ín Pablo k'uíkon tí jehe sín a kjuanchia ch'án kjuasáya Dios la imá kóchéhe ch'án. ¹⁶ Ntá tíó kjuíji sín chjasin Roma ntá tí ch'ín capitán kjuikénhen tí sín tjejóchjina, k'uáyéhe tí ch'ín jefe ts'ayakonhen ch'án. A ntá ch'ín Pablo la kuítóhe ch'án ókjé kjuák'e ch'an la ijnko soldado a k'uáyakonhen tí jehe ch'án.

Ch'ín Pablo kjuako chjasin Roma

¹⁷ Ntá k'uátsínka iní yaon ntá tí ch'ín Pablo a mé k'uíyēhe ch'án kaín tí sín judío tjetōan kuente chjasin Roma. Ntá tíó kjuixín kójnkotsé kaín sín ntá ntáchro ch'án k'íxin:

—K'íchóni, kohya ninkehó jie kjuásian k'íxin chrókónínkakonna tí sín judío la jehya k'íxin nínkaxonxian tí nkehe k'uékínkáchónki tí sín tsík'axrjeníxinni. A ntá k'jonté itséna sín kjuak'echjina sín tí janhan chjasin Jerusalén la ko kjuínchekjasótēna tí sín romano a. ¹⁸ Ntá k'uitjahya sín ninkehó jie chonta. Ntá tjínkaon sín chrók'uatjántana sín k'íxin k'uitjahya sín ninkehó jie chrók'uénxian. ¹⁹ A ntá tí sín judío a mé imá kónínkaon sín tjanchia sín jie. Ntá t'ichjánxin tsjanchiani k'íxin tí ch'ín César

mé chrókjuinchekitqexín ch'án nkehe tí jie chóntani, kjónté chóntahyani ninkehó jie ts'eka tí sín tí nacióon kuènténi. ²⁰ Méxra k'uíyahará kixin tjinkaonni ts'íkuan tí jahará la ko tsonixjaharáni kixin tinkáchónkini tí nkexro tjejóhnen kaín tí sín israelita mé xíkaha t'ikonrá kixin tjechron-tetoxínni cadena ntihi.

²¹ Ntá ntáchro sín kixin:

—K'uáyehyani ninkehó xroon chrókjuixin Judea kuènte tí jaha la ko kuihya nijnko tí sín kichó ni judío chróntáchro sín ichrén nkehe jínahya tsíkijch'e. ²² Tjinkaonni chrókuinhinni nkexrí tjenkayáxian kixin ó noheni kixin itsjé chjasin t'ántaxínhin sín tí nkehe nixin tjákua —mé xíkaha ichro sín.

²³ Ntá chr'éxin kjueyá sín ijnko yaon tsinhin sín nkehe tsochrónka ch'ín Pablo. Ntá kójnkotsé nchónhya chojni tí nchia kjuák'e ch'án. Kuenté yaon chrónka ch'án nkexrí tí kjuachaxin kuènte Dios. Nixjehe ch'án sín kixin chrókuitekaon sín tí nkehe kjuako ch'ín Jesús, la chrónkaxin ch'án kixin nkexrí nixja tí ley kuènte ch'ín Moisés la ko tí tsíkjin tí sín profeta ósé.

²⁴ Ntá iso tí sín mé kuítekaon sín tí nkehe ntáchro ch'ín Pablo. A ntá í so sín na kuítekakonhya sín. ²⁵ Ntá jnkokoáhya kjuenkayáxian tí jehe sín la iso sín tjinkaon sín kixin sáchrókjui sín, ntá ch'ín Pablo mé ntáchro ch'án kixin:

—Ntoá nixja tí nkehe chénka Nchakuen Dios tí sín tsik'axrjeníxinni ósé chrónkaxin ch'ín profeta Isaías ntáchro kixin:

²⁶ Sátjia nixjehé tí chojni a

kixin jehe sín kjónté tjejótinhin sín la tienxínhya sín,
la kjónté tjejótsjehe sín la t'ikonhya sín.

²⁷ A ntá asén tí chojni tí chjasin i la tsík'óna imá cha
la ntatsjon sín la tsík'ikjehe

la ikon sín la tsíchr'áto

kixin t'ikonxínhya sín

kixin tinhín sín la tjinkakonhya sín chrókuienxín sín,

la tjinkakonhya chrókuienxín asén sín.

Í tjinkakonhya sín chrókjan sín chrókuinkáchónki sín tí janhan kixin ntá
janhan chrókjuintakitoha sín jína.*

Mé xíkaha tsíkjin ch'ín Isaías. ²⁸ Méxra chróónohará jahará kixin ijie tí sín jehya judío me ts'áyéhe sín tí nkehe tsjanjon Dios tsaáxin sín kixin jehe sín mé tsinhin sín.

²⁹ Ntá xíkaha ichro ch'ín Pablo ntá tí sín judío sákjuí sín la tinkákjo sín kichó sín.

³⁰ A ntá ch'ín Pablo kuítqhe ch'án tí nchia tsíkjen ch'án iyó nánó. La kjuanjon ch'án kjuachaxin k'uéjó tí sín kjuíjitsjehe ch'án. ³¹ La kjuako ch'án tí kjuachaxin kuènte Dios la ko kjuako ch'án kuènte Ìnchéni Jesu-cristo. La kohya ninkexró k'uínkákonhen tió kjuako ch'án. Ó tjen.

* 28:27 28.26–27 Isaías 6.9-10

Tí xroon ikjin ch'ín Pablo chr'énhen ch'án tí sín romanos

Ch'ín Pablo ikjin xroon k'uáyéhe tí nínko chjasin Roma

¹ Janhan Pablo mé t'ahá xrá Jesucristo mé kjian tí xroon i. Kjueyána Dios kixin sít'ahá ch'án xrá tsjákuá tí tan jína tsaáxinni.

² Tiha mé tsintáchro Dios senó kixin tsoxiteyá éxi nixja tí xroon nixjaxin tí sín tsíchronka itén ch'án ósé. ³ Tí tan a mé chrónka nkexrí tjen Ìnchéni Jesucristo Xjeen Dios. Jehé ch'án mé tsík'óna ch'án chojni k'uaxrjeníxin ch'án tí sín tsík'axrjeníxin tí rey David. ⁴ Tí kjuachaxin jié mé kjuáqoxin kixin jehé ch'án mé chaxín Xjeen Dios kixin ó xechón ch'án la chóna ch'án Nchákuen Dios imá tjeotan. ⁵ Kjuasáyé Jesucristo k'uáyéheni kjuachaxin kixin sich'eheni ch'án xrá sátsjichronkaxinni itén ch'án kixin kaín xín chojni chónhya ch'án kuenté chjasintajni chrókuitekaon sín ch'án la ko chrótjuéhe sín ch'án. ⁶ Jahará k'uék'ejorá éxi tjejó tí jehé sín, a ntá jie la kjueyará Dios kixin chrókuítekáonrá Jesucristo.

⁷ Janhan ikjian tí xroon chr'anhánrá kaín rá tjejorá chjasin Roma. Tjuahará Dios la kjueyará ch'án kixin tjóá chrók'uejorá. Kjuasáyé It'éni Dios la ko Ìnchéni Jesucristo kixin kjuanjon ch'án kjuaxróxin k'uayéherá.

Ch'ín Pablo tjinkaon chrókjuitsjehe ch'án chjasin Roma

⁸ Xrankíxixin kjuachaxién Jesucristo tjánchàxian Dios kjuasáya kixin jahará ó kuítekáonrá ch'án la ko nkuixin chjasintajni nixja sín nkexrí tinkáchónkirá ch'án. ⁹ Dios, tí nkexro t'ahá xrá kaín asenná xrjanka tí tan jína kuènte Xjeen ch'án, mé nohe ch'án kixin xráxín xráxinkavan tí jahará tió nixjahá ch'án. ¹⁰ Xráxín tjáncháha Dios kixin tí chrókjuanjon ch'án kjuachaxin la chrókjuasántsjahará. ¹¹ Kixin tjínkavan chrókjuasántsjahará tí jahará kixin chrókjuínkítsa tí jahará kixin chrók'uitjará jína nkexrí chrók'uejorá ntoá. ¹² Me xíkaha tsöcháhará la ko tsöchàna kixin jnkokoá tinkáchónkini Ìnchéni, jahará la ko janhan.

¹³ Kíchóni, tjínkavan chrókónohará kixin nchónhya veces tjínkavan chrókjuasántsjahará kjánchó naxá xitjahya tsjasán. Tjínkavan chrókjuasán kixin chrókjuít'a xrá kuènte Ìnchéni kixin chrókjuachani nchónhya chojni chrókjuinkáchónki Dios éxi kjuít'a xrá í so chjasin naxá chónhya sín Dios. ¹⁴ T'ichjánxin tsjákoḥá kaín chojni, á chojni griego o á chojni jehya griego o á chojni nohe o á chojni noehya. ¹⁵ Mé xíkaha xrá ó tjéchonhan chrókjuasán chrókjuákohará tí tan tsaáxinrá tí jahará tjejorá chjasin Roma.

Tí kjuachaxin kuènte tí tan jína

¹⁶ Tósuànahya xrjanka tí evangelio kixin táha ijnko tan jína kixin chóna kjuachaxin kuènte Dios chrókuaáxin kaín xín tí chojni chrókuitekaon, mé saoxin tí sín judío la ko kjaxin tí sín jehya judío. ¹⁷ Kixin tí tan jína kuènte Dios tjakuexin tí jeheni kixin chrókótjuáxin ijiéni kixin tinkáchónkini ch'án la jehó ch'án tinkáchónkini. Éxi ntáchro xroon itén Dios kixin: “Tí nkexro kótjóá kixin kuítekaon sín Dios mé táhó ts'ejóchónxin sín.”*

Tí jie tjasin chojni

* 1:17 Habacuc 2.4

¹⁸ Dios tjen nkaya nkajni mé tsonínkakonhen ch'án tí sín jínahya tjasin jie, mé sinchekjasóte sín ch'án. Tí jie jínahya tjasin sín mé t'inkákonhen kixin chrókónohe sín tí nkehe jína chaxín. ¹⁹ Jehe sín ó nohe sín jína nkexri tjen Dios kixin jehe ch'án kjuakuexín ch'án tí jehe sín. ²⁰ Tí kjuachaxin kuènte Dios kjónté t'ikonhyani la kjánchó noexínni kixin tí nkehe kjuích'éna ch'án. Kixin tí naxa k'ónahya chjasintajni kónoxín kixin jehó ch'án mé Dios t'etqan la ko chóna ch'án kjuachaxin jnkochrín. La ntá tí sín jínahya xitjahya tsontáchro sín kixin k'uénoehya sín. ²¹ Kjónté nohe sín kixin xikaha itjen Dios la tjikosáyehya sín ch'án la ko ni tjanchehya sín ch'án kjuasáya. Tjenkayáxin sín tí nkehe ninkehó sinkíhya kixin jínahya asén sín la tí sítié ó kuítóhe sín. ²² Kjónté ntáchro sín kixin imá nohe sín kjánchó imá lontj sín kixin antsi kjuasin sín jie. ²³ A ntá ó kjuixin kjuinkí sín tí nkehe tinkáchónki sín la ko kuítekakonhya sín tí kjuachaxién Dios itjen jnkochrín, t'enhya. A ntá ijie tinkáchónki sín tí nkehe tsikjanqya tóyohé chojni it'en. Kjaxin tinkáchónki sín koxroxé tsikjanqya la ko konche la ko iko chóna noó toté.

²⁴ A ntá xikaha Dios kuítóhe ch'án tí jehe sín kixin chrókjuich'e sín tí nkehe jínahya tjenkayáxin sín ntá xikaha ch'e sín ijnko nkehe chrókósuèxin sín ch'ehe kichó sín ²⁵ kixin kuítekakonhya sín tí nkehe chaxín kuènte Dios, a ntá tí nkehe jínahya mé kjueyá sín. Kjuích'éna sín dios kuènte sín tí nkehe tsikjich'éna Dios. A ntá tí nkexro kjuích'éna tí nkehe la titekakonhya sín. Jehe ch'án mé chrókjuancheheni ch'án kjuasáya jnkochrín kixin jehe ch'án mé kaín tí nkehe siín mé kuènte ch'án. Amén.

²⁶ La ntá xikaha kjuích'e sín ntá Dios kuítóhe ch'án tí jehe sín kixin chrókjuich'e sín tí nkehe chrókósuèxin sín chrókjuich'e sín. Kjónté tí chojni chjin la kuítóhe sín tí ichjin sín la ntá kjuích'éna sín asén sín chojni ntoa. ²⁷ A ntá kjaxin xikaha tí chojni ntoa kuítóhe sín chróchóna sín chojni chjin la tjinkaon sín tí nkehe ntoáhya. La ntá ch'e sín nkehe chrókósuèxin sín ch'ehe kichó sín jnkokón ntoa sín. Mé xikaha mé tí cuerpo kuènte sín mé tsjasótexín sín tí jie kjuasin sín.

²⁸ Tjinkakonhya sín tsoxraxinkaon sín Dios ntá jehe ch'án mé kuítóhe ch'án tí jehe sín kixin xikaha tsjenkayáxin sín tí nkehe jínahya kixin sich'e sín tí nkehe chrókjuich'ehya sín. ²⁹ Nchónhya jie chóna sín mé tí nkehe ntoáhya ch'e sín, la tjinkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjinkaon sín jehó sín chróchóna sín itsjé nkehe, la ko imá tjasin sín jie, la ko jehe sín chjinoxínhin sín, la ko tjinkaon sín chrók'óyán sín kichó sín, la ko itje sín kjuanínkaon, la ko ch'ia sín la ko jínahya sín xriko sín kjuach'ia. ³⁰ T'ántaxínhin sín kichó sín la ko nínkakonhen sín Dios, la ko jehó sín chrók'uetqan sín, la ko nchehnke sín, la ko jehó sín ch'éna sín nkehe jínahya tjasixín chojni jie, la ko tjikosáyehya sín it'é sín la ko iné sín. ³¹ Tienxínhya sín la nchexiteyáhya sín nkehe nixja sín, la ko tjuèhya sín kichó sín, la ko tjinkakonhya sín sinchek'itjáyenhen sín ichrén jie kjuasinhin kichó sín, la ko tikonóehya kichó sín. ³² Jehe sín ó nohe sín jína kixin nkexri k'uetqan Dios la jehe sín ó nohe sín kixin tí jie kjuasin sín chrók'uenxín sín, la kjónté xikaha ó nohe sín, la naxa tjasin sín jie la kjaxin chéhe sín chrók'uikon sín ókjé nkexro chrókjuasin jie xikaha.

2

Dios nchekitoexín ch'án tí jie tjasin chojni

1 Mé xikaha jahará xitjahya tsontáchrórá kixin chontahyará jie a ntá tékará jie tí í so sín tjasin jie. A ntá tí xikaha ch'erá la jahará xritjéyará nkexrí chrókjuasótexínrá kjaxin kixin jahará jnkokón jie tjásinrá. 2 Ó noheni kixin ntoá sinchekitoexín Dios tí jie kjuasin chojni kixin sinchekjasóte ch'án tí sín xikaha tjasin jie. 3 A ntá jahará la tékará jie í so chojni ntá jahará kjaxin la xikaha jnkokón jie tjásinrá. ¿Á tjenkayáxinrá kixin tsjachará tsinkeherá tí sinchekjasótiar Dios ní? 4 ¿Á kjoniehérá tí kjuaxróxin tsjéjehya tjanjon Dios kixin tjechónhen ch'án naxá nínkakuanhýará ch'án? A ntá jahará la kuiénxinhyará kixin Dios tjuàhará kixin tjinkaon ch'án chrókuítóhérá tí nkehe jínahya tjenkayáxinrá. 5 Kjánchó jahará imá icha asánrá, tjinkákonhyará chrókuítóhérá tí nkehe jínahya tjenkayáxinrá, a ntá antsí má nchek'ánkírá tí nkehe jínahya tsjasótexínrá tí yaon tsjixixín tió tsonoxín kixin sinchekjasóte Dios chojni. 6 Jehe ch'án mé tsjenkehe ch'án jnkojnko chojni nkehe tí xra tsíkjich'e sín. 7 Tsjanjon ch'án kjuachón ts'áyéhe tí sín tjejá sín tí nkehe náxrjón la ko tí kjuachaxin ts'itjáyanhya la ko xráxín kjuích'e xra jína. 8 A ntá tsonínkaon Dios sinchekjasóte ch'án kaín tí sín nchehnke la ko tí sín tjinkakonhya chrókjuich'e sín tí nkehe jína. A ntá náhí, la íchá má kóxrjínhín sín kjuích'e sín tí nkehe jínahya. 9 Mé xikaha tsjasóte sín la ko kjuaxróxinhya tsonhen kaín tí sín kjuích'e tí nkehe jínahya, mé senó tí sín judío la ko kjaxin tí sín jehya judío. 10 A ntá Dios mé tsjanjon kjuachaxin la ko tsjanjon ch'án kjuaxróxin la ko tsjikosáyehe ch'án kaín tí sín kjuínchexiteyéhe ch'án kjuích'e tí nkehe jína, mé senó tí sín judío la ko kjaxin tí sín jehya judío.

11 Dios la t'ikon kixin kaín chojni la jnkokón sínkí. 12 Kaín tí sín tjasin jie kixin noehya sín tí ley tsíkjin ch'ín Moisés la kjónté chónhya sín tí ley la its'en sín. A ntá tí sín ó nohe tí ley tsíkjin ch'ín Moisés ntá tjasin sín jie, la tí ley a mé tsjanchia jie tsjasótexín sín. 13 Jehya tí sín ó chrókuinhón tí ley la ó chrókótjuáxin ijíé sín. Náhí. Tí sín sinchexiteyéhe sín tí nkehe k'uetqon Dios mé tsotjuáxin ijíé sín. 14 A ntá tí sín jehya judío chóntahya sín tí ley t'etueñhen sín la ntá tió jehó sín chrókjuínchexiteyéhe sín éxí nixja tí ley la jehí jehó sín t'etueñhen asén sín. 15 Kixin tí kjuínchexiteyá sín ch'e sín tí nkehe jína mé tjákoxin sín kixin asén sín xraxinkakonxín sín tí nkehe ntoá la ko asén sín tjanchankíhi sín á jína tjejó sín o náhí. 16 Itsi tí yaon la Dios mé sinchekitoexín kjuachaxin Inchéni Jesucristo kaín nkehe imó kjuích'e chojni éxí nixja tí tan jína tjákua janhan.

Tí sín judío la ko tí ley tsíkjin ch'ín Moisés

17 A ntá jahará ntáchrórá kixin jahará judíorá la tinkachónkirá tí ley tsíkjin ch'ín Moisés la ko nchehnkerá kixin tinkachónkirá Dios. 18 Ó nohará tí nkehe tjinkaon Dios la ko tí ley ó kjuakohará kixin chrókjuéyará tí nkehe jína. 19 Ihnkerá kixin nohará tsjákohérá tí sín t'ikonhya la ko jahará mé xrohi ts'inkáséyanxín tí sín ixri sitié, ichrorá. 20 Ntáchrórá kixin nohará tsjákohérá tí sín noehya la ko tsjínkítará tí sín tienxínhya kixin jahará chontará tí ley chrónka kjuaxrexinkaon jína la ko tí nkehe chaxín, ichrorá. 21 Jahará tjákohérá í so chojni, a ntá jahará, ¿nkekuènté tjákoéhyará asánrá xikaha? Jahará tjákohérá chojni kixin chrókueéhya sín, a ntá jahará la, ¿nkekuènté teerá? 22 Ntáchrórá kixin xitjahya tsochóntha chojni yaá chojni chjin, a ntá jahará la, ¿nkekuènté xikaha ch'erá? Ntáchrórá kixin titekákonhyará tí nkehe tsíkjanoya, kjánchó jahará, ¿nkekuènté teerá tí nkehe tjete síin nkaxenhen njnko? 23 Nchehnkerá kixin chontará tí ley,

a ntá jahará chontahyará kjuasáyé Dios kixin kjuinchexiteyéhyará éxi k'ueṭoan tí ley. ²⁴ Ntoá ntáchro tí xroon itén Dios kixin: “Tí sín jehya judío la t'ántaxínhñ sín Dios kixin tí ijjárá.”

²⁵ A ntá tí chaxín kjuinchexiteyará tí ley tsíkjin ch'ín Moisés la ntá jehya chónkó tsíkará xroye. A ntá tí kjuinchexiteyéhyará tí ley la éxi tsikahyará ninkehó xroye. ²⁶ A ntá tí sín tsikahya xroye kjánchó titekaon sín nkexrí t'etōan tí ley la tjejó sín éxi ó tsíka sín xroye kjónté chaxínhya chónṭa sín. ²⁷ A ntá tí nkexro kuáhya xroye tí cuerpo chónṭa kjánchó nchexiteyéhe tí ley, mé jehe sín tsjanchia sín jiē tí jahará kixin jahará kuítekákonhyará kjónté chontará tí xroon nixja tí ley la ko kjónté ó tsíkará xroye. ²⁸ A ntá tí xíkaha la chaxínhya judío jahará kixin ó ntója ó chontará xroye la chaxínhya tsíkará xroye kixin chrítaón cuérporá ó, chontará. ²⁹ A ntá tí chojni chaxín judío la t'ichjánxin chróchónṭa sín xroye nkaya asén sín. Jehya tí ley chrók'ueṭoan xíkaha chrókonhen. Náhí. Táha la Nchakuen Dios. Jehya kixin chojni chrókóxrjínhñ kixin ó nchōxon. Náhí. Dios mé tsōxrjínhñ kixin nchōxon tíha.

3

¹ ¿A ntá nkehe tsonhen kixin ntáchro sín kixin judío sín la ko nkehe tsonhen kixin tsíka sín xroye? ² Chaxín xíkaha jína kixin Dios kjuanjon tí itén ch'án saoxín k'uáyéhe tí sín judío kixin chrókjuinchexiteyá sín. ³ A ntá ¿nkehe tsonhen tí jnkójn tí jehe sín chrókjuinchexiteyáhya sín? Kjónté xíkaha chrókjuich'e sín la, ¿á chrókuítōhe Dios chrókjuinchexiteyáhya ch'án tí nkehe tsíntáchro ch'an? ⁴ Kjá náhí. Dios la sinchexiteyá kaín nkehe tsíntáchro ch'án kjónté kaín chojni chrókjuich'ia. Ntáchro xroon itén Dios kixin:

Tsontáchro chojni kixin ntoá tí nkehe ntáchroa.

Tíha mé tsjachaxian tí tsjanchia sín jiē.*

⁵ Tí jiē chóntani mé tjakōxin kixin Dios mé nohe nkexrí sinchekitōexín ch'án ijjé chojni. ¿A ntá nkehe chróchroni? ¿Á ntoáhya chrókjuich'e Dios kixin chrókjuinchekjasóteni ní? (A ntá janhan nixja éxi nixja chojni ó.)

⁶ Kjá náhí. A ntá tí jehya ijnko nkexro jína tí jehe ch'án, ¿ntá nkexrí chrókjuinchekitōexín ch'án ijjé chojni chjasintajni?

⁷ A ntá tí chrókjuínkítsa tí kjuach'ia kuèntana kixin chrókónoaxínrá tí nkehe chaxín kuènte Dios, ¿a ntá nkekuènté ts'ékaráni jiē kixin janhan mé ijnko chojni chónṭa jiē? ⁸ Tí xíkaha la, ¿á chrókjuich'eni tí nkehe jínahya kixin ntá chrókui tí nkehe jína? Mé xíkaha ichro iso chojni t'ekani jiē kixin xíkaha tjakoni, ichro sín. Tí sín a chrókjuasóte sín kixin xíkaha ichro sín.

Kaíni chóntani jiē

⁹ ¿Ntá nkexrí? Jeheni judíoni la, ¿á antsí má tjeoanni, a ntá tí sín í so la, á náhí? Kjá náhí. Kixin kaín ni chojni judíoni la ko tí sín jehya judío mé kaín ni kjuinchexiteyéheñi tí jiē kjuasinni. ¹⁰ Ntáchro tí xroon itén Dios kixin:

Kohya ninkexró chrókjuich'e tí nkehe jína, la kohya nijnko chojni.

¹¹ Kohya ninkexró tienxín,

Kohya ninkexró chrókjueyá Dios.

¹² Kaín chojni k'uék'aji sín tí ntja jínahya la ko kaín chojni jnkokón k'uáji sín ntoáhya,

* 3:4 Salmo 51.4

kohya ninkexró chrókjuich'e tí nkehe jína la kohya nijnko chojni.†

13 Tí isin chojni la éxí tòyε tsíxrankehe tsíxravá chojni kixin tí nejen chojni ch'iyaxín.

La tí veneno kuènte konche chón̄ta ir'va chojni.‡

14 Tí ir'va chojni tsíkaón nkehe jínahya la ko kjuanínkaon.§

15 Xritinká sín kixin tjínkaon sín chrók'óyán sín chojni.

16 Tí nt̄ja k'uáji sín tió xíkaha kjuích'e sín mé kjuínchek'itjáyan sín kaín kjuaxróxin k'uéchón̄ta ókjé chojni.

17 Chón̄hya sín tí nt̄ja tjanjon kjuaxróxin*

18 kixin kjuenkayáxinhya sín chróchrakonhen sín Dios.†

Mé xíkaha ntáchro itén Dios.

19 Ó noheni kixin kaín tí nkehe nixja tí xroon chón̄ta tí ley mé k'uetuēnhen kaín tí sín tinkáchónki tí ley kixin ntá kaín chojni chjasintajni chrótání sín kixin kaín chojni tsjasóte kixin Dios mé sinchekitoēxin ijíé kaín chojni. 20 Kixin ninkexró chrókjuacha chrókótjuáxin ijíé sín kixin chrókjuinchexiteyéhe sín tí nkehe t'et̄oan tí ley. Tí ley la jehó ch'e xra tsqnoexínni kixin chón̄tani j̄ie.

Tsaáxinni kixin tinkáchónkini Cristo

21 A ntá jehya tí ley chrókuaáxinni. La ntá ó kónoxín nkexrí Dios tsaáxinni la k̄jaxin tí xroon chón̄ta ley la ko tí nkehe nixja tí sín profeta la ó nixja xíkaha. 22 Tsotjuáxin ijíéni kixin titekaonni Jesucristo kixin kaín chojni chrókuaáxin tí tsitekaon sín tí jehe ch'án kixin t'íkon ch'án kixin jnkokón tsjehe kaín chojni. 23 Kixin kaín xín chojni kjuasin j̄ie la k'uáyèhya sín tí kjuachaxin chrókuaáxin sín. 24 A ntá kjuasáyé Dios kixin k'uenyákonhenni Cristo Jesús la kótjuáxin ijíéni. 25 Dios mé ichr'án ch'án Cristo, kuámá ijíéni, k'uenyákonhenni ch'án kixin chrókuinkáchónkini ch'án ntá chrókuaáxinni. Mé xíkaha kjuích'e Dios kixin kjuakoxin ch'án kixin ntoá kjuenkayáxin ch'án kixin kónínkakonhya ch'án kjónté nchónhya j̄ie tsíkjasinni senó. 26 Xíkaha kónhen kjuakoxin Dios kixin jína ch'án ijie la nax̄a t̄jehónhen ch'án sinchetjóá ch'án ijíé tí sín kuítekaon Jesús.

27 A ntá ¿nkekuènté chrókjuinchehnkeni? Xitjahya sinchehnke chojni nkayakon Dios kixin jehya kixin kjuínchexiteyéheni tí nkehe k'uet̄oan tí ley ntá chrókuaáxinni. Náhí. Kixin Ìnchéni kuítekaonni ntá kuaáni. 28 Mé xíkaha ó noheni kixin tsotjuáxin ijíéni tí tsitekaonni Dios kixin Dios tahya cuenta á kjuínchexiteyéheni tí nkehe k'uet̄oan tí ley.

29 ¿Xá Dios mé kuènte tí sín judío ó? ¿Á k̄jaxinhya Dios kuènte tí sín jehya judío? K̄já k̄jaxin Dios mé kuènte tí sín jehya judío. 30 Kixin kohya í jnko Dios la jehe ch'án sinchetjóá ch'án ijíéni kixin tinkáchónkini ch'an la tahya ch'an cuenta á chón̄tani xroye o náhí. 31 A ntá tí tinkáchónkini Ìnchéni, la ¿á í chrókjuinchexiteyáhyani tí ley? K̄já náhí. Íchá ant̄sí má jína chrókjuinchexiteyéheni tí ley.

4

Tí kjuakoxin ch'ín Abraham

1 ¿Nkehe tsixroni kixin nkehe k'uitja ch'ín Abraham, tí nkexro k'uaxrjeníxinni ósé? 2 Ntá ch'ín Abraham tí chrókótjuáxin ijíé ch'án

† 3:12 3.10–12 Salmo 14.1–3, Salmo 53.1–3 ‡ 3:13 Salmi 5.9, 140.3 § 3:14 Salmo 10.7

* 3:17 Isaías 59.7-8 † 3:18 Salmo 36.1

kíxin tí xr̄a kjuích'e ch'án ntá chrókóhnke ch'án, kjónté jehya nkayakon Dios. ³ A ntá ntáchro xroon itén Dios kíxin: “Ch'ín Abraham kuítekaon Dios ntá táhó kuaáxin ch'án la ko kótjuáxin ijíé ch'án.”* ⁴ Jnkojín chojni kjuích'e xr̄a la jehya k'uáyéhekoá ch'án tí chichaon. Náhi. Táha la tí xr̄a kjuích'e ch'án mé kjuacha ch'án. ⁵ A ntá kjónté jnkojín chojni kjuích'e hya ninkehó xr̄a ntá chrókuítekaon ch'án Dios a ntá Dios la sinchetjóá ch'án kjónté tí nkexro chóna jie, kíxin tí kuítekaon ch'án Dios la táhó mé kuaáxin ch'án. ⁶ Mé kjáxin tsíntáchro ch'ín David kíxin náxrjón tí nkexro kótjóá kíxin Dios kuáhya kuentá nkerí jie tsíkjasin ch'án. ⁷ Ntáchro ch'ín David kíxin:

Náxrjón tjejó tí nkexro kjuíncheyaon Dios kjónté jínahya kjuích'e sín la kjuakjlin ch'án ijíé sín.

⁸ Náxrjón tjejó tí nkexro kíxin Ínchéni kuáhya ch'án kuentá tí jie k'uéchóna sín.†

⁹ ¿Á jehó tí sín ikuá xroye la náxrjón tjejó sín o á kjáxin náxrjón tjejó tí sín chóntahya xroye? Ó chrónkani kíxin Dios la kuikonóhe tí ch'ín Abraham kíxin kuítekaon tí jehe ch'án la táhó mé kótjuáxin ijíé ch'án.‡ ¹⁰ ¿A ntá nkesá tsíkjincheyaon Dios tí ch'ín Abraham? ¿Á ó tsíka ch'án xroye o naxa náhi? Kjá naxa náhi. Senó tsíkjincheyaon Dios tí jehe ch'án. ¹¹ Ntá chr'éxin ch'ín Abraham ikuá ch'án tí xroye éxí ijnko sello kjuakoxin Dios kíxin ó kótjuáxin ch'án kíxin kuinkáchónki ch'án Dios. Kíxin ntá xikaha ts'óna ch'ín Abraham xjeen kaín chojni tinkáchónki Dios, kjónté chojni tsíkahya xroye. Ntá kjáxin jehe sín la Dios sinchetjóá ijíé sín. ¹² La ko jehe ch'ín Abraham mé ts'axrjeníxin ch'án kaín tí sín tsíka xroye kíxin ntá chrókuinkáchónki sín éxí kuinkáchónki tí jehe ch'án kjónté naxa tsíkahya ch'án xroye.

Tí nkehe tsíntáchro Dios la tsoxiteyá kíxin tinkáchónki sín tí jehe ch'án

¹³ Dios tsíntáche ch'ín Abraham kíxin jehe ch'án la ko tí sín ts'axrjeníxin ch'án ts'áyéhe sín chjasintajni ts'ejó sín. A ntá tí nkehe ts'áyéhe ch'ín Abraham la jehya kíxin kuítekaon ch'án tí ley. Náhi. Ts'áyéhe ch'án tíha kíxin kuítekaon ch'án Dios la ntá Dios mé kjuínchetjóá ijíé ch'án. ¹⁴ A ntá tí jehó tí sín tsíkjinchexiteyéhe tí ley ó chrók'uáyéhe sín tí nkehe chrókjuanjon Dios, a ntá tí nkehe tinkáchónkini la ó chrókóhónko xikaha la ko tí nkehe tsíntáchro Dios la kjá ninkehó sínkíhya tí xikaha. ¹⁵ Kíxin tí ley la tjikao kíxin tsjasótéxin chojni, a ntá tí chrókókohya ley la chrókókohya nkehe chrókjuanchia jie.

¹⁶ Méxr̄a tí nkehe tsíntáchro Dios la kjuasáyé ch'án tsjanjon ch'án kíxin kuinkáchónki ch'ín Abraham tí jehe ch'án la ntá Dios sinchekitonhen tíha kaín tí sín tsík'axrjeníxin ch'án. Jehya jehó tí sín tinkáchónki tí ley chrók'uáyéhe sín tí nkehe tsjanjon Dios. Náhi. Kjáxin tí sín tsitekaon éxí kuítekaon ch'ín Abraham mé ts'áyéhe sín tíha. A ntá jehe ch'án mé k'óna ch'án it'é kaín ni. ¹⁷ Éxí nixja xroon itén Dios kíxin: “Janhan kjuánjuan kjuachaxin kíxin jaha ts'óna it'é nchónhya chojni chjasintajni.”§ Mé xikaha tjetsjehe Dios kíxin jína kuítekaon ch'ín Abraham tí jehe ch'án. Tí Dios a mé sinchexechón tí chojni tsík'en la ko t'etōan ch'án kíxin ts'óna tí nkehe naxa kohya.

¹⁸ Kjónté k'uéchóntahya ch'ín Abraham xjeen ch'án la kuítekaon ch'án la chónhen ch'án kíxin ts'óna ch'án it'é nchónhya chojni éxí tsíchronka

* 4:3 Génesis 15.6 † 4:8 4.7–8 Salmo 32.1–2 ‡ 4:9 Génesis 15.6 § 4:17 Génesis 17.5

Dios kixin xikaha nchónhya chojni ts'axrjeníxin ch'án. ¹⁹ Ch'ín Abraham k'uéchóntha ch'án chjina ijnko ciento nánó la kjánchó k'uitjáyenhya ch'án tinkáchónki ch'án Dios, kjónté jehe ch'án la ko tjan Sara mero its'en sín la ko ó má táda nána sín kixin naxa chróchóntha sín xjeen sín. ²⁰ Ch'ín Abraham la kóxakuenhya ch'án la ko chrakonhya ch'án kixin tí nkehe tsjanjon Dios. Náhí. Íchá antsí má kuinkáchónki ch'án Dios la ko kjuanchehe ch'án kjuasáyé Dios. ²¹ Ó nohe ch'ín Abraham kixin Dios chóntha kjuachaxin sinchexiteyá kaín nkehe tsintáchro ch'án. ²² Dios k'uikon kixin jehe ch'ín Abraham kuítekaon ch'án ntá Dios kjuínchetjóá ijje ch'án.

²³ La jehya kixin tsík'óna tí xroon kixin tí ch'ín Abraham ó. ²⁴ Náhí. Tsíkin sín xroon kixin kjaxin jeheni chrókótjuáxin ijje ní kixin tsitekaonni Dios. Tíhi mé tí nkexro kjuínchexechón Ìnchéni Jesucristo. ²⁵ Jehe ch'án mé k'uenyákonhenni ch'án kixin tí jie chóntani. Ntá xechón ch'án ínaá kixin tsotjuáxin ijje ní kixin ó kuítekaonni tí jehe ch'án.

5

Kótjuáxin tí jie chóntani

¹ Kótjuáxin tí jie chóntani kixin tinkáchónkini Cristo la kjuaxróxin ts'ejókoni Dios kixin k'uenyákonhenni Ìnchéni Jesucristo. ² Kjuasáyé Cristo kixin jína tsochjineheni Dios kixin tinkáchónkini ch'án ntá ts'áyéheni kjuachaxin kuente ch'án. Ntá tí kjuachaxin la jína tsjinkítsa kixin jína ts'ejóni la ko tsóchéheni ts'ejóchónhenni kixin ntá tsjintaxín ts'áyéheni tí kjuachaxin jie kuente Dios. ³ Kjaxin jehya táhó. Náhí. Kjaxin tsóchéheni kjónté nchónhya nkehe tsohenni kixin ó noheni kixin xikaha tsohenni kixin ntá ts'itjani tsoínkakonhyani. ⁴ A ntá tí xikaha jína chrók'uejóni ntá tsjachani kixin jína ts'ejóchónhenni. ⁵ A ntá tí tjejóchónhenni la tósuéhyaní kixin Dios imá tjuèheni ch'án la tí Nchakuen ch'án kjuanjon ch'án mé nchechéhe asénni.

⁶ Tí jehóni xitjahya chrókuaáni. A ntá tíó ikui Cristo la k'uenyákonhenni ch'án kixin tí jie chóntani. ⁷ Kjá ninkexró chróntáchro chrók'uenyákonhen sín í jnko chojni kjónté ijnko chojni imá jína tjuèhe kichó. Kohya nkexro xikaha chrókjuich'e. ⁸ A ntá Dios mé kjuakoxín kixin imá tjuèheni ch'án kixin kjónté naxa chóntani jie la Cristo k'uenyákonhenni. ⁹ A ntá Dios mé kjuínchetjuáxin ch'án ijje ní kixin Cristo k'uenyákonhenni ch'án ntá ó noheni kixin jehe ch'án tsaáxinni ch'án kaín tí nkehe chrókjuasótéxínni. ¹⁰ Kjónté naxa k'uenínkakonhenni Dios la jehe ch'án mé kjuanjon ch'án kjuaxróxin kixin k'uenyákonhenni tí Xjeen ch'án. A ntá chaxín tsaáxinni ch'án kixin tjechón ch'án la ntá ijje kjuaxróxin tjejókoni ch'án. ¹¹ La jehya chrókótíhó. Kjaxin tsóchéheni kixin tinkáchónkini Dios kixin kjuasáyé Ìnchéni Jesucristo kixin Cristo chóntaxínni kjuaxróxin tí tjen Dios.

Adán la ko Cristo

¹² Mé xikaha ó jnko nkexro kjuasin jie ntá k'uixin jie kuenté chjasintajni. Mé xikaha kjuankíxin k'uén chojni ntá kaín chojni kjuankíxin k'uén kixin kaín sín kjuasin sín jie. ¹³ Kixin ósé la k'uékohya ley ntá ó xráxin k'uixin jie chjasintajni kjánchó naxa kohya ley chrókjuanchia jie chrókjuasótéxín sín. ¹⁴ Desde kjuák'e ch'ín Adán hasta kjuák'e ch'ín Moisés la k'uéchóntha kjuachaxin tí kjuach'én kixin tí jie kjuasin sín mé k'uenxín sín. Kjánchó tí jie kjuasin sín la yóehya tí nkehe kjuích'e ch'ín Adán,

kuítekakonhya ch'án tí nkehe k'uetqan Dios. Ntá ch'ín Adán yóhë tsotsjehe éxí tí nkexro tsi chr'éxin.

¹⁵ Ntá tí jië kjuasin ch'ín Adán la xitjahya chrókóyóhë tí nkehe tsjanjon Dios kixin tí jië kjuasin jnkokoá chojni la ntá nchónhya chojni k'uenxín. A ntá tí tsaáxinni la kjuasáyé Dios ichr'án jnkokoá nkexro mé Jesucristo la antsí má jína tíha kixin tsaáxin nchónhya chojni. ¹⁶ A ntá tí jië kjuasin jnkokoá chojni la tóyóehya tí nkehe tsjanjon Dios tsaáxinni. Kixin tí jië kjuankíxin kjuasótéxin chojni kixin kjuasin jnkokoá chojni jië. A ntá tí tsaáxinni la kjuasáyé Dios sincheakaáni ch'án la ko nchetjóá ch'án tí jië chóntani kjónté nchónhya jië kjuasin chojni. ¹⁷ Tí kjuach'én la k'uéchónta kjuachaxin kixin tí jië kjuankíxixín kjuasin jnkokoá chojni. A ntá kjuasáyé Dios kjuínchetjóá ch'án tí jië chóntani la ntá antsí tsochóntani kjuachaxin ts'ejóni jína kixin k'uenyákonhenni jnkokoá nkexro, mé Cristo tíha.

¹⁸ A ntá tí jië kjuasin ch'ín Adán la ntá kaín chojni kjuasin sín jië chrokjuasótéxin sín. A ntá ijie la Cristo mé kótjuáxin ijíé kaín chojni kixin tí jína ch'án k'uenyákonhenni ch'án. ¹⁹ Mé xíkaha kuítekakonhya jnkokoá chojni, mé Adán tíha, ntá nchónhya chojni kjuasin jië. A ntá jnkokoá nkexro jína kuítekaon kjuakoxin, mé Cristo tíha, a ntá nchónhya chojni tsaáxin tí jehe ch'án kjónté k'uéchonta sín jië.

²⁰ Ikui tí ley kuínhin sín ntá kónoxín kixin íchá antsí kjuasin sín jië. A ntá antsí k'uíxin jië la kjónté xíkaha la antsí má kuikonóeheni Dios kixin jehe ch'án tsjinkitsani ch'án tsaáxinni. ²¹ Mé xíkaha tí jië k'uíxin k'uéchónta kjuachaxin kjuikao kjuach'én chrók'uenxínni. A ntá kjuasáyé Dios kjaxin antsí má chóna ch'án kjuachaxin sinchetjóá ch'án tí ijíeni la ko tsjanjon ch'án kjuachón jnkochrín kixin Ìnchéni Jesucristo ikui ch'án k'uenyákonhenni ch'án, tsaáxinni.

6

Ó k'uén tí jië ntá Cristo kjuínchexechónni

¹ A ntá ijie ¿nkehe tsixroni? ¿A naxa chrókjuasinni jië kixin ntá Dios naxa chrókjuakoxin ch'án kixin chrókuikonóeheni ch'án? ² Kjá náhi. A ntá jeheni la éxí chojni tsík'en chrokjuahya tsjasin jië. ¿A ntá nkekuènte naxa chrókjuasinni jië inaá? ³ ¿Á noahyará jahará kixin tí kuíkiteni kixin tinkáchónkini Cristo la yóhë k'uénkoni ch'án? ⁴ Tí kuíkiteni la éxí yóhë xravákoni Cristo la ko tsík'enkoni ch'án kixin ntá ó xechónni ntá chrók'uajini ijnko ntja nixin mé xíkaha Cristo xechónxin ch'án tí kjuachaxin jíé chóna tí It'é ch'án.

⁵ Kixin tí chaxín k'uenxínni éxí ik'uén tí jehe ch'án la ntá kjaxin tsoxechónni éxí xechón tí jehe ch'án. ⁶ Ó noheni kixin nkexrí k'uejóni senó mé táha mé k'uenxín Cristo kjuák'enkánixín ch'án ntacruz kixin ntá chrók'uitjayanxín kaín tí jië k'uékjasinni kixin ijie í chrókjuinchexiteyèhyani tí jië. ⁷ Tí nkexro ó k'uén la ntá ó kuítóhe tí jië. ⁸ A ntá jeheni tí k'uenxínni Cristo la ó noheni kixin ts'ejókoni tí jehe ch'án. ⁹ Kixin ó noheni kixin Cristo jnkokoá vez xechón ch'án a ntá í ts'enhya ch'án inaá kixin tí kjuach'én í chóntahya kjuachaxin kixin naxa ts'óyán tí jehe ch'án. ¹⁰ Tí ik'uén Cristo la ó naá ik'uén ch'án kixin k'uenyákonhenni ch'án kixin tí ijíeni. Ntá xechón ch'án ijie kixin tsjak'eko ch'án Dios. ¹¹ A ntá kjaxin jahará chrókjuenkayáxinrá kixin ik'uénrá, xitjahya tsjásinrá jië kixin ntá ijie la

xíxechonrá chrókjuich'eherá xra Dios kixin tinkachónkirá Cristo Jesús, mé Ìnchéni tíha.

¹² Méxra chrókjuitoéhyará kixin chrókjan tí jie chrók'uetuēnhen tí cuérporá inaá kixin tí jie chrók'uetōan kixin chrókjuinchexiteyéhérá tí nkehe tjenkayáxinrá. ¹³ Tjánjonhyará tí cuérporá kixin chrók'óna nkehe chrókjuásixínrá jie. A ntá íchá jína chróchjehérá asánrá Dios éxi ijnko chojni tsík'en ó xíxechón inaá. Chjehérá Dios tí cuérporá ts'óna ijnko nkehe sich'exín ch'án xra jína. ¹⁴ Kixin tí jie la í chóntahya kjuachaxin ts'etuēnhen tí jahará. Jehya tí ley ts'etōan ijie. Náhi, jehó kjuasáyé Dios.

Kjuíncheyóexin ch'ín Pablo nkexrí tí chojni ch'exón xra

¹⁵ A ntá ijie ¿nkexrí? ¿A chrókjuasinni jie kixin í t'etuēnhyani tí ley? Kjá náhi. Kjuasáyé Dios tsaáxinni la kjá í chrókjuasinhvani jie. ¹⁶ Jahará ó nohará jína kixin tí sich'ehe ni ijnko lámō xra la tsitekakönhenni ch'án la tí xikaha la t'ichjánxin ch'ehe ni xra tí lámō la t'ichjánxin sinchexiteyéhēni ch'án. Mé xikaha tónhen tí naxa sinchexiteyéhēni tí jie la táha mé ts'enxínni. A ntá tí tsitekaonni Dios la mé chrók'uejóni jnkójína. ¹⁷ Jahará la óse k'uékjásinrá jie, a ntá ijie kjuasáyé Dios kuikonóahará ch'án kixin kaín asánrá kuítekaonrá tí nkehe xrakohará. ¹⁸ A ntá ó kuítóhéra tí k'uékjinchexiteyéhérá tí jie. A ntá ijie ó kjuánjonrá asánrá kixin sich'erá xra jína kuēnte Ìnchéni. ¹⁹ A ntá jie nixja éxi ijnko chojni ó kixin jahará la tiénxinhyará jína tí nkehe i. A ntá xikaha tí senó kjuínchexiteyéhérá tí nkehe ntoáhya la ko jínahya kixin sich'erá tí nkehe jínahya. A ntá ijie la xikaha chrókjuánjonrá tí cuérpo kuéntará kixin chrókjuich'exínrá tí xra jína éxi tjinkaon Dios kixin ntá jehe ch'án chrókjuinchetjóará ch'án.

²⁰ A ntá tí jahará tió naxa kjuínchexiteyéhérá tí jie la ntá xit-jahya sich'erá tí xra jína ntoá. ²¹ ¿A ntá nkehe chrókjuachará kixin xikaha kjuich'erá tí nkehe chrókósuáxinrá ó? Ntá xikaha kjuéyará tí nkehe ts'énxinrá ó. ²² Na ntá ijie ó kjuin tí nkehe k'uék'etuānhanrá k'uékjásinxínrá jie. A ntá ijie ch'eherá xra Dios. Táha la tsjinkitsa kixin ts'ejoxínrá jína kixin ntá tsjixixín tsotjuáxinrá ts'ayéhérá kjuachón jnkochrín. ²³ A ntá tí chrókjuasinni jie la chrókjuachani kixin éxi chrók'uenni ó. A ntá tí nkehe chrókjuincheqitōnhēni Dios la kjuachón jnkochrín kixin tinkáchónkini Ìnchéni Cristo Jesús.

7

Kjuíncheyóexin ch'ín Pablo kuēnte tí sín tsikótehe

¹ Kíchóni, jahará ó choxinrá tí ley la ó nohará kixin tí ley chóna kjuachaxin ts'etuēnhen tí chojni naxa tjejóchón ó. ² Tíha mé ts'axrjexín éxi ijnko chojni chjin tsikótehe la tí xii tjan chóna kjuachaxin ts'etuēnhen tjan kixin naxa tjechón ch'án. A ntá tió tsík'en tí xii la ntá tí tjachjin la ó kuítóhe tí k'uék'etuēnhen ch'án tjan. ³ A ntá tí jehe tjan chrókuakja í jnko chojni ntoá tí naxa tjechón xii tjan la ó chrókjuasin tjan jie. A ntá tió tsík'en xii tjan la jehe tjan la ó kuítóhe tí k'uék'etuēnhen ch'án tjan la jína tsotehe tjan í jnko chojni ntoá la jehya jie tíha.

⁴ Mé xikaha jahará kíchó ni mé k'uenyákonhēni Cristo la ntá jahará la éxi tsík'enrá kixin í t'etuānhyará tí ley la éxi chrókuákjárá í jnko xiará la mé xikaha tinkachónkirá Cristo. Cristo mé xechón ch'án inaá kixin ntá jína chrókjuich'ehe ni xra Dios. ⁵ Tió naxa k'uékjasinni jie a ntá tí ley chrókjuich'e xra kixin chrókjuasinhvani jie, a ntá íchá antsí má kjuasixínni

jię tí cuerpo kuènténi, la táha mé kjuixín tí ts'énxínni. ⁶ A ntá ijie la éxí yóhe ik'uénni, a ntá tí ley chóntahya kjuachaxin naxa ts'etueñhenni. A ntá ijie í kohya nkehe t'inkákohenen kixin jína sich'eñeni xra Dios kixin k'ónani ijnko chojni nixin kixin tí Nchakuen Dios k'uáyéñeni. A ntá í t'etueñhyani tí ley ntaxin tsík'óna.

Tí jię naxa chonta

⁷ A ntá tí xikaha la, ¿nkehe chróchroni? Kixin tí ley la, ¿á jię táha ní? Kja náhi. Kjánchó janhan chrókónonahya nkehe tí jię tí chrókohya tí ley chróchrónka. Chrókónonahya kixin tí nkehe ókjé chrókjuakéhyasenná tí chróchrónkahya tí ley kixin chrókjuakéhyasenná tí nkehe ókjé. ⁸ A ntá tió kónòna tí ley a ntá tí jię antsí kjuacha k'uętoan. La ntá k'uixín kaín nkehe ntáchro asenná. A ntá tí chrókohya ley la chrókónoxínhyasenná tí jię chrók'uénxian. ⁹ A ntá tí ósé la nonahya nkehe tí ley. A ntá tió nòna nkehe tí ley, a ntá antsí kjuásian jię la ntá ó nòna kixin tí jię kjuásian me ts'énxian. ¹⁰ Mé xikaha kónhen kixin tí ley chrókjuanjon kjuachón ntá kjuikao tí ts'énxínni. ¹¹ Ntá tí jię mé kjuacha k'uętoan kixin sintaxiteyáhyasenná tí ley. A ntá tí ley mé kjuanchia jię ts'énxian.

¹² Mé xikaha tí ley la chaxín jína la ko tí nkehe t'ętoan Dios la kjaxin jína. ¹³ Mé xikaha tí nkehe jína la ¿á táha chrók'uénxian? Kja náhi. Tí jię kjuásian mé ts'énxian. Mé xikaha kjuakoxin tí nkehe jię kixin tsonoxín tí jię kixin tí ley la jína. Mé xikaha kjuakoxin tí ley kixin tí jię tjasin chojni mé imá jínahya tíha.

¹⁴ Ó noheni kixin tí ley la kuènte Dios tíha. A ntá janhan la kjuintaxiteyáhyasenná tí ntáchro asenná kixin tí jię kjuacha k'uętuanna. ¹⁵ A ntá tí janhan la tí nkehe tjét'a la kjaxin naxa tianxínhyasenná kixin janhan la t'ahya tí nkehe tjínkavan chrókjuít'a, a ntá ijie mé it'a tí nkehe tóxrjínahya chrókjuít'a. ¹⁶ A ntá tí nkehe tjínkakonhyasenná chrókjuít'a la tíha me it'a la mé xikaha jtátsoanxián kixin tí ley la jína. ¹⁷ A ntá jehya janhan it'a tíha. Náhi tí jię chonta mé ch'e tíha. ¹⁸ Kixin janhan ó nòna kixin tí ntáchro asenná la kohya nkehe jína chrókjuít'a. Tjínkavan chrókjuintaxiteyá tí nkehe jína kjánchó tjachahya sit'a tíha. ¹⁹ T'ahya tí nkehe jína chrókjuít'a. Tí nkehe jínahya tjínkakonhyasenná chrókjuít'a mé it'a. ²⁰ A ntá tí it'a tí nkehe jínahya tjínkakonhyasenná chrókjuít'a la ntá jehya janhan it'a tíha. Náhi. Tí jię chonta mé ich'e tíha.

²¹ Tónòna tíhi. Tí tjínkavan chrókjuít'a tí nkehe jína la mé íchá antsí it'a janhan tí nkehe jínahya. ²² Kjónté xikaha la tóxrjínna chrókjuintaxiteyáhyasenná tí ley kuènte Dios. ²³ T'íkuan kixin tí nkehe ntáchro asenná mé t'inkákohenen tí nkehe tjínkavan chrókjuít'a. A ntá tí jię chonta mé éxí tjéchjinaxián tíha.

²⁴ Nòna tí janhan. ¿Xá nkexro chrókjuatsen tí jię chóna tí cuerpo kuèntana chrók'uénxian? ²⁵ Kjuasáya tjaha Dios kixin ikui İnchéni Jesucristo kuaáxinni. Mé xikaha tí janhan la it'óna tjenkayáxian kixin chrókjuintaxiteyáhyasenná Dios a ntá tí t'óna mé ntáchro asenná chrókjuintaxiteyáhyasenná tí nkehe kuènte tí jię.

8

Tjéjóchónxinni Nchakuen Dios

¹ A ntá ijie tí sín tinkáchónki Cristo Jesús la kohya jię chrókjuasótéxín sín. Jehé sín í tjínkakonhyasenná nchexiteyá sín xikaha ntáchro asén sín. Jehó tjínkaon sín sinchexiteyéhe sín Nchakuen Dios. ² Kixin tí nkehe t'ętoan

Nchakuen Dios mé tjanjon kjuachón kixin tinkáchónkini Cristo Jesús. Tíha mé kjuatsen tí nkehe kuènte jie chrók'uenxínni. ³ A ntá Dios kjuích'e tí nkehe kjuachahya kjuích'e tí ley kuènte ch'ín Moisés kixin jeheni kjuachahyani chrókjuinchexiteyéheni tíha. A ntá Dios mé ichr'án ch'án Xjeen ch'án k'óna éxí chojni. La xra ó kui ch'án k'uenyákonhen ch'án tí ijiéni kaín ni ntihi chjasintajni la kjuatsen ch'án tí jie chrók'uitjáyaxínni. ⁴ Mé xikaha kónhen kixin ntá jeheni jína chrókjuinchexiteyéheni tí nkehe t'etoan tí ley la chrókjuinchexiteyéhyani tí nkehe ntáchro asénni ó. Náhí. Chrókjuinchexiteyéheni tí nkehe ntáchro Nchakuen Dios.

⁵ A ntá tí sín tjinkaon nchexiteyéhe tí nkehe ntáchro asén sín ntá táhó tjenkayáxin sín. A ntá tí sín tjinkaon nchexiteyéhe Nchakuen Dios la ntá xritjeyá sín tí nkehe kuènte Nchakuen Dios. ⁶ A ntá tí sín tóxakonhen tí nkehe ntáchro asén sín la táhó ts'énxín sín. A ntá tí sín tóxakonhen tí nkehe kuènte Nchakuen Dios la tsochóntaxín sín kjuachón la ko kjuaxróxin. ⁷ A ntá tí sín imá tóxrjínhin tí nkehe ntáchro asén sín ó la mé nínkakonhen sín Dios kixin tjinkakonhya sín la ko titekakonhya sín tí ley. ⁸ Tí sín tóxrjínhin sín tí nkehe ntáchro asén sín ó la xitjahya sinchechéhe sín Dios.

⁹ A ntá jahará la nchexiteyéhyará tí nkehe ntáchro asánrá. Náhí. Jahará nchexiteyéherá Nchakuen Dios tí chaxín chontará Nchakuen Dios. A ntá tí nkexro chóntahya Nchakuen Cristo la í tinkáchónkihya sín Cristo. ¹⁰ A ntá tí Cristo tjejókoará tí jahará la tí asánrá la tjechón kixin Dios kuikonóahará, kjuínchetjóá ch'án tí ijiará, kjánchó tí cuerpo la éxí tsík'en kixin tí jie chontará. ¹¹ A ntá jahará ó chontará Nchakuen Dios, tí nkexro kjuínchexechón Cristo Jesús. Tí Dios a mé kjuínchexechón Cristo la ntá kjaxin tsochéhe ch'án kjuachón nixin tí cuerpo kuéntará kjónté chónta jie kixin tí Nchakuen Dios chontará jahará.

¹² Mé xikaha kichó ni, ó chóntani nkehe sinchexiteyéheni, kjánchó í chrókjuenkayáxinhyani tí nkehe ntáchro asénni. ¹³ A ntá jahará tí chrók'uejorá éxí ntáchro asánrá la tíha la mé chrók'uenxínrá. A ntá jahará ó chontará Nchakuen Dios ntá chrók'uen tí nkehe ntaxin kjuenkayáxinrá la ntá jehó Nchakuen Dios chrók'uejochonxínrá.

¹⁴ Kaín tí nkexro t'etuñhen Nchakuen Dios la mé ó k'óna xjeen Dios. ¹⁵ Ntá Nchakuen Dios ó k'uayéherá jahará la jehya tí nchakuen tí nkehe k'uék'etuñhanrá ósé kixin chróchrakonrá. Náhí. Ntá tí Nchakuen chóntani la k'ónaxínni xjeen Dios. A ntá tí Nchakuen ch'án nchexraxinkaonni tsocháchroni kixin: "It'éni Dios kuéntá tí jeheni." ¹⁶ Tí Nchakuen Dios tónoxín nchakuenni kixin k'ónani xjeen Dios. ¹⁷ A ntá ó k'ónani xjeen ch'án la kjaxin tsjanjon ch'án tí nkehe ts'áyéheni éxí tsintáchro ch'án ósé. Mé ts'áyèkoni Cristo tí nkehe tsjanjon Dios. Tí chaxín tsjasóteni éxí Cristo kjuasóte ntá chr'éxin ts'ejókoni ch'án kjuaxróxin.

Tí kjuachaxin jie itsi chr'éxin

¹⁸ A ntá ijie la tóxakuenhyani kjónté nkehe ts'atsínkani tsjasótexínni kixin tíha la ninkehó sínkíhya kixin tíha la xitjahya tóyohé tí nkehe ts'áyéheni chr'éxin kixin antsí má jína náxrjón tíha. ¹⁹ Tí nkehe tsík'óna tjejóchónhen kixin ts'íkon tí sín tsík'óna xjeen Dios. ²⁰ Kjónté kaín nkehe tsík'óna síin la ts'itjáyán tíha la jehya kixin xikaha tjinkaon tí nkehe tsík'óna. Náhí. Jehí xikaha tsík'etoan Dios. Ntá tjejóchónhen kaín nkehe tsík'jich'éna Dios ²¹ kixin chróchónta kjuachaxin chrók'uitjáyanyha. Ntá náxrjón ts'ixin kaín nkehe éxí náxrjón ts'ejó tí sín tsík'óna xjeen

Dios. ²² Ó noheni kixin kaín tí nkehe kjuích'éna Dios la naṣa ts-
jasóte éxí yóhe tjetéxin ijnko chojni nchekokjíhi xjeen. ²³ A ntá jehya
jehó tí nkehe tsík'óna t'ikon chojni chrókjoté. Náhi. Kjaxin jeheni
tjasóteni kjónté chóntani Nchakuen Dios kixin tí Nchakuen Dios la mé
tí nkehe xrankixín kuákjani la naṣa ts'áyéheni inaá tí nkehe naṣa ts-
janjon Dios. Tjéjtjasóteni la ko tjejóchónhenni kixin tsjintaxín ts'ónani
xjeen Dios la ko ts'áyéheni tí cuerpo chónhya ts'en. ²⁴ Mé ó kuaáxinni
la naṣa tjejóchónhenni tí nkehe t'ikonhyani. Tí k'uíkonní tí nkehe
tjejóchónhenni ntá t'ichjánxinhya chrók'uejóchónhenni. Tí nkehe ó t'ikonni
la t'ichjánxinhya chrók'uejóchónhenni naṣa chrók'uikonní inaá. ²⁵ A ntá
tí chónhenni tí nkehe naṣa t'ikonhyani la ntá t'ichjánxín tsonínkakonhyani
tsochónhenni.

²⁶ Mé kjaxin xikaha tí Nchakuen Dios tjinkítsani tí noehyani
nkexrí tsonixjeheni Dios kixin chaxín noehyani tsonixjeheni ch'án
éxí chrónixjani. A ntá tí Nchakuen Dios tjinkítsa nixjaxín ch'án tí jeheni
kjónté noehyani nkexrí tsochrónóaxinni éxí tjinkaon ch'án. ²⁷ Dios mé
nohe ch'án nkehe tónhen asénni la nohe ch'án nkehe ichro tí Nchakuen
ch'án kixin tí Nchakuen ch'án mé chrónóaxín éxí tjinkaon Dios la nixjaxín
ch'án tí sín tinkáchónki Dios.

²⁸ Ó noheni kixin Dios la k'ueṭoan kaín nkehe chrók'uaxrje jína kixin tí
sín tjuèhe ch'án kixin tsíkjeýá ch'án sín kixin xikaha tjinkaon ch'án. ²⁹ Tí
sín tsíkjeýá Dios ósé la ntá tsík'íyehé ch'án kixin ts'óna sín éxí tí Xjeen ch'án
kixin ntá tí Xjeen ch'án mé ts'etueñhen nchónhya tí sín kichó ch'án. ³⁰ Mé
xikaha tí sín tsíkjeýá Dios ósé mé kjaxin k'uíyehé ch'án sín la ko tí sín
k'uíyehé ch'án la kjuínchetjóá ch'án ijíé sín la ntá tí sín kjuínchetjóá ch'án
ijíé la kjuanjon ch'án kjuachaxín kuénte ch'án tsochóna sín.

³¹ ¿A ntá nkehe chróchroni tí xikaha? Tí Dios tjuèhe tí jeheni, ¿a
ntá nkexro chrókjuacha chrókónínkakonhen tí jeheni? ³² Kixin Dios la
kjiakuènhya tí Xjeen ch'án. Kjuanjon ch'án k'uenyákonhenni kaín ní, a
ntá tí ó kjuanjon ch'án Xjeen ch'án la kjá kaín nkehe chrókjuanjon ch'án.
³³ ¿Nkexro chrókjuacha chrókjuanchia jje chrókónínkakonhen tí sín kjueya
Dios? Kixin Dios la ó kjuínchetjóá ijíé tí sín a. ³⁴ ¿Nkexro chrókjuinchekjásóte
tí jehe sín? Kixin Cristo la ó k'uenyákonhen sín la kjaxin xechón ch'án inaá
la itjen ch'án tí tja chjina Dios tjen nkaya nkajní la tjechronóa ch'án kixin
kaín tí jeheni. ³⁵ ¿Xá nkexro chrókuakitsjeheni tí tjuèheni Cristo? Kjónté
ichrén nkehe chrókónhenni la ko chrókónínkakonhen chojni tí jeheni la
ko kjónté chrók'uenxínni kjinta la ko chróchóntahyani ikéni o kjónté tí
kjuaxikaon chrók'uenxínni la chrókuítóehya ch'án tí jeheni. ³⁶ Éxí ntáchro
xroon itén Dios kixin:

Tí tinkáchónkini tí jaha la síin kjuaxikaon kaín yaon chrók'uenxínni.

Chrók'óyánni sín éxí t'óyán sín kolélo tí matanza.*

³⁷ Kaín tíha la antsí chrókjuachaxínni kixin kjuachaxién tí nkexro tjuèheni.

³⁸ Ó noheni kixin ninkehó nkehe tsjachahya tsakitsjeheni tí tjuèheni
Dios. Kjónté tí its'enni, o kjónté tí tjejóchónni, o kjónté tí sín ángel, o tí
kjuachaxién tí jínahya, o kjónté tí nkehe sítonhen ijie, o tí nkehe tsonhen
chr'éxin, ³⁹ o kjónté tí nkehe síin nkaya nkajní, o tí nkehe imá nínka
síin chjasintajni, o íjnko nkehe kjuích'éna Dios. Mé kohya nijnko tí
nkehe a tsjacha tsakitsjeheni tí tjuèheni Dios kjuakoxín tí jehe ch'án kixin
k'uenyákonhenni Ìnchéni Jesucristo.

* 8:36 Salmo 44.22

9

Dios kjueyá tí sín Israel

¹ Ntoá xrjanka kixin janhan ijnko chojni tinkáchónki Cristo la t'ayahya. Tí nkehe tjenkayáxian la Nchakuen Dios nchextraxinkaonna kixin chaxín. ² Imá t'avá asenná la ko náxrijónhya tjèn ³ kixin tjínkavan kjónté chrók'uitjáyanxinna tí tinkáchónkia Cristo kixin ntá jína chrókuinkáchónki Cristo tí sín kichiná naxá kjéhyana. ⁴ Jehé sín mé tsík'axrjeníxin sín tí sín Israel la Dios k'uáyéhe sín éxi xjeen ch'án la ko Dios chónthehe tí jehe sín la kjuanjon kjuachaxién ch'án la kjaxin k'uáyéhe sín tí nkehe k'uetqan Dios la ko ti ley tsíkjin ch'ín Moisés la ko k'uáyéhe sín kjuachaxin ts'etqan sín kixin nkehe tí xra tsonhen nkaxenhen njnko la ko k'uáyéhe sín tí nkehe tsintácho Dios. ⁵ Tsík'axrjeníxin sín tí sín tsík'axrjeníxinni ósé la kjaxin Cristo tsík'axrjeníxin tí sín israelita tió k'óna ch'án chojni. Jehé ch'án mé Dios kuènte kaín nkehe la tinkáchónkini ch'án jnkochrín. Amén.

⁶ A ntá tí nkehe chrókuakja tí sín Israel kjuanjon Dios la jehya kixin chróxiteyáhya tíha. Náhí. Kixin jehya kaín tí sín tsík'axrjeníxin tí sín israelita mé chrók'óna sín chojni chjasin Israel. ⁷ Kixin kénhya tí sín k'uaxrjeníxin ch'ín Abraham chrók'óna xjeen ch'án. Dios mé tsintáche ch'ín Abraham kixin: “Tí sín ts'óna kjéhya jaha mé ts'axrjeníxin sín tí ch'ín Isaac.”* ⁸ Tíhi mé tienxínni kixin ninxeró xitjahya ts'óna xjeen Dios kixin tí tsík'axrjeníxin sín chojni ó. Náhí. Jehó tí sín tinkáchónki tí nkehe tsíchenka Dios tí ch'ín Abraham mé jehe sín mé chaxín tsík'axrjeníxin sín ch'án. ⁹ Tí nkehe tsíchenka Dios tí ch'ín Abraham mé tíhi: “Itsi ijnko yaon mé tjan Sara sich'éna tjan ijnko xjan.”†

¹⁰ A ntá jehya táhó. Náhí. Kjaxin tí yaá chánjan tsík'jich'éna tjan Rebeca mé chóna jnkokoá it'é xjan mé it'in Isaac, mé tsík'axrjeníxinni ch'án. ¹¹ A ntá tí xjan la naxá kokjéhya xjan la ninkehó nkehe jína o jínahya kjuích'e xjan. Ntá kjuakoxin Dios kixin chóna ch'án kjuachaxin éxi tsíkjenkayáxin ch'án tsjeyá ch'án nkexro ts'íyehé ch'án la tahya ch'án kuentá nkehe tí xra kjuích'e sín. ¹² Ntá kjónté la ntá chenka ch'án tí tjan Rebeca kixin: “Tí ch'ín sao mé sich'ehe xra tí ch'ín tsoyo.”‡ ¹³ Mé kjaxin xikaha ichro xroon itén Dios kixin: “Tjuahá Jacob, a ntá Esau la náhi.”§

¹⁴ ¿A ntá nkehe chróchroni? ¿Á ntoáhya tjenkayáxin Dios? Kjá náhi. ¹⁵ Kixin tsintáche Dios tí ch'ín Moisés kixin: “Tsojtjuahá tí nkexro tjínkavan tsojtjuahá la ko tsíkonógha tí nkexro tjínkavan tsíkonógha.”* ¹⁶ Jehya éxi tjínkaon chojni o jehya kixin tí nkehe ch'e chojni. Náhí. Ó jehí Dios tsíkikonóehé ti jehe sín. ¹⁷ Tí ntácho xroon itén Dios mé nixjehé Dios tí ch'ín rey Egipto kixin: “Kjuánjuan kjuachaxin kixin jaha k'óna rey kixin tjínkavan chrókjuákoxiān kjuachaxin kuèntana kixin ntá kuenté chjasin-tajni chrókónohe la chrókuitekaon tí njna.”† ¹⁸ Mé xikaha tí tjínkaon Dios tsíkonóehé ch'án chojni la tsíkonóehé ch'án, a ntá tí nkexro tjínkakonhya ch'án tsíkonóehé ch'án la tsíkonóehya ch'án.

¹⁹ A ntá tsontáchorá kixin: “A ntá tí xikaha la, ¿nkekuènté t'eka Dios chojni jie? ¿Nkexro chrókjuacha chrókjuanjonko tí nkehe t'etqan Dios?”

²⁰ ¿Xá nkexro tí jahará kixin chróntácherá Dios xikaha? ¿Á ti ch'i tsík'óna nchetje chróntáche tí ìnehé ch'i kixin: “¿Nkekuènté xikaha kjuích'énani?”

* 9:7 Génesis 21.12 † 9:9 Génesis 18.10 ‡ 9:12 Génesis 25.23 § 9:13 Malaquías 1.2-3

* 9:15 Éxodo 33.19 † 9:17 Éxodo 9.16

chróchro. ²¹ **A** ntá kjaxin tí nkeexo ch'éna ch̄ mé chóna kjuachaxin tjinkaon sich'éna ch'án tí nkehe tóxrjín̄h̄n ch'án sich'éna ch'án, tí tjinkaon ch'án nchetje sich'éna ch'án nkehe imá náxrjón ɔ tjinkaon ch'án sich'éna ch'án nkehe náxrjónh̄ya.

²² Tjinkaon Dios chrókjuakoxin ch'án tí kjuachaxin kuente ch'án chrókjuinchekjasóte ch'án chojni la kjónté xikaha kónhen la kjuacha ch'án kónínkakhya ch'án la kuikonóeh̄e ch'án tí sín chrókjuinchekjasóte ch'án kixin chrókjuinchek'itjáyan ch'án sín. ²³ Mé xikaha kjuich'e ch'án kjuakoxin ch'án tí kjuachaxin imá jié chóna ch'án kixin jehe ch'án kuikonóeh̄eni ch'án kixin xikaha tsikjenkayáxin ch'án ósé kixin náxrjón chrók'uejókoni tí jehe ch'án. ²⁴ Mé xikaha Dios tsikjeyá ch'án iso tí sín judío la ko iso tí sín jehya judío. ²⁵ Mé xikaha ntáchro tí xroon tsikjin ch'ín Oseas kixin:

Tí sín jehya chjasenná la mé sintak'ian chjasenná.

La tí sín k'uetjuahya mé tsotjuah̄a sín ijie. †

²⁶ Tí chjasin ntiha tsintáchro ch'án kixin: “Jahará jehya chjasenná”,

a ntá ijie sintak'ian xjeen Dios tjechón. §

Mé xikaha ichro itén Dios. ²⁷ Kjaxin nixja ch'ín Isaías kuente tí sín israelita tsintáchro ch'án kixin: “Nchónh̄ya chojni ts'axrjenixin tí sín Israel éxi tí nchónh̄ya nchesen siín ntayaon kjánchó tsjéhya tí jehe sín tsjacha sín tsaá sín. ²⁸ Ntá tjoka tsonhen tí nkehe tsintáchro Ìnchéni sinchexiteyá ch'án.”*

²⁹ Ntá kjaxin ch'ín Isaías tsintáchro ch'án ósé kixin:

Tí Ìnchéni chóna kaín kjuachaxin kuítóehya chrók'uitjáyan kaín tí sín k'uaxrjenixin Israel éxi k'uitjáyan tí sín chjasin Sodoma la ko Gomorra. †

Tí sín judío la ko tí tan jina

³⁰ ¿Ntá nkehe tsixroni? Tí sín jehya judío kjueyáhya sín Dios sinchetjóá ijie sín ntá kjónté la k'uitja sín kixin tsotjóá ijie sín kixin tinkáchónki sín Cristo. ³¹ **A** ntá tí sín israelita chrókjuinchexiteyéh̄e sín ley kixin chrókótjuáxin ijie sín kjánchó kjuachahya sín kjuínchexiteyéh̄e sín tíha. ³² **A** ntá nkekuenté kixin xikaha k'uitjahya sín nkexrí chrókuinkáchónki sín Dios? Kixin kjueyáhya sín nkexrí chrókjuinchetjóá ch'án ijie sín kixin tinkáchónki sín ch'án. Jehó tí xra kjuich'e sín chrókuaáxin sín, ichro sín. La méxra xikaha tjen tí xro kóténkixin sín. ³³ Mé xikaha chronkaxín xroon itén Dios kixin:

Mé xikaha kjuaké tí xro chjasin Jerusalén mé tí xro tsóténkixin sín la ko tí tjo ts'ánótjenxin sín.

A ntá tí sín chrókuitekaon tí jehe la chrókósuèhya sín. †

10

¹ Kíchóni, kaín asenná níxjah̄a Dios kixin tjínkavan kixin tí sín israelita chrókuaá sín. ² Janhan ntáxrjan kixin tí sín israelita imá tjinkaon sín chrókjuich'ehe sín xra Dios kjánchó chaxính̄ya kixin jehe sín la tienxính̄ya sín. ³ Kjaxin noehya sín kixin nkexrí chrókjuinchetjóá Dios tí ijie sín. **A** ntá jehó sín xritjeyá sín nkexrí chrókótjóá sín la tjinkakhya sín chrókjuinchexiteyéh̄e sín Dios. ⁴ **A** ntá Cristo mé kjuínchexiteyá kaín nixja tí ley. **A** ntá ijie kaín tí sín kuítekaon tí jehe ch'án mé sinchetjóá ch'án ijie sín.

† 9:25 Oseas 2.23 § 9:26 Oseas 1.10 * 9:28 Isaías 10.22–23 † 9:29 Isaías 1.9 † 9:33 Salmo 118.22

⁵ A ntá tí chrókótjóá ijje sín kixin tí ley la ch'ín Moisés mé tsíkjin ch'án xíkíhi: “Tí nkexro chrókjuinchexiteyéhe kaín tí ley la táhó chrókuaáxin sín.”* ⁶ A ntá tí chrókjuínchetjóá Dios tí ijjeni kixin tí tinkáchónkini ch'án ó mé ntáchro xíkíhi: “Ntáchrohyará kixin, ¿Xá nkexro sáchrókjuí nkaya nkajní? (Tí xíkaha la t'axrjexín kixin naḡa chrókui Cristo.) ⁷ La ko ntáchrohyará kixin: ¿Xá nkexro chrók'uinkajin tí imá ninka?” (Mé t'axrjexín tíha kixin chrókjuíakajín sín Cristo chrók'uaxrjetaón ch'án kixin itjen ch'án tí síin tí sín tsík'en, ichro sín.) ⁸ ¿A ntá nkehe ichro? Ntáchro kixin: “Itén Dios la chjinaxón tjen tí tjejorá kixin ó nohará la ko xraxinkaon asánrá.”† Tí tan a mé tí nkehe tinkáchónkini kjuakoni. ⁹ Tí ir'va tsontáchroxian kixin choxian Jesucristo mé Ìnchéni la ko tí asán tsitekaon kixin Dios kjuínchexechón ch'án ntá kjaxian tsaá. ¹⁰ A ntá tí asán tsitekaon la nta Dios sinchetjóá ch'án tí jaha la ko tí ir'va tsontáchroxian kixin choxian Jesucristo ntá sinchekaá ch'án tí jaha.

¹¹ Ntáchro xroon itén Dios kixin: “A ntá tí sín chrókuitekaon tí jehe ch'án la chrókósuehya sín.”‡ ¹² Dios la t'íkon jnkokón tsjehe kaín chojni á tí sín judío o á tí sín jehya judío. Tí Ìnchéni la mé Ìnché kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe. ¹³ Mé xíkaha ntáchro xroon itén Dios kixin: “Kaín tí sín tjanchaxín nkehe ihnjé Ìnchéni la tsaá sín.”§ ¹⁴ ¿A ntá nkexrí chrókjuanchehe sín ch'án kixin chrókjuinkítsa ch'án sín tí naḡa kuítekakonyha sín ch'án? ¿A ntá nkexrí chrókuitekaon sín tí jehe ch'án tí naḡa kuénhya sín nkexro tí jehe ch'án? ¿A ntá nkexrí chrókuinhin sín tí kohya nkexro tsjakohé sín tí itan a? ¹⁵ ¿La nkexrí chrókjuichronka sín tí tan tí kohya nkexro ichr'án sín sátsji? Éxí ntáchro xroon chóna itén Dios kixin: “Náxrjón tí sín xrichronka itan jína.”*

¹⁶ Kjánchó kénhya sín titekaon sín tí itan tsaáxinni. Tsintáchro ch'ín Isaías kixin: “Ìnchéni ¿xá nkexro ó kuítekaon tí tan xrichronkani?”† ¹⁷ Méxra t'ichjánxin tsinhin sín, a ntá chrókuitekaon sín, a ntá tí tan tsinhin sín mé itén Cristo.

¹⁸ A ntá tjánchánkía kixin: ¿Á kuénhya sín tí tan? Kjá ó kuínhin sín. Ntáchro xroon itén Dios kixin: A ntá tí nkehe kjuako sín la ó kuínhin chojni kuenté chjasintajni. Tí nkehe nixja sín la ó kjuixraká hasta kjuèxin chjasintajni.”‡

¹⁹ Ntá tjánchánkía inaá: ¿Xá tí sín Israel la naḡa kíenxínhya sín ní? Senó ntáchro ch'ín Moisés kixin: Ijnko chjasin jehya chjasin kuéntana la tsoninkákonhénra sín kixin injko chjasin tjinkakonhya tsinhin la tsoninkákonhénra sín. §

²⁰ Ntá ntáchro ch'ín Isaías kixin: Tí sín xritjeyáhya tí janhan la mé tí sín a mé k'uitja sín tí janhan. La ko kjuákuaxian tí sín kjuanchankíhya kixin nkexro tí janhan.*

²¹ La ko nixja ch'ín Isaías kuente tí sín israelita kixin: “Kuenté yaon k'uíyaha injko chjasin síin chojni titekakonyha sín la ko jiehe sín.”†

11

Tí sín Israel tsíkjejá Dios

* 10:5 Levítico 18.5 † 10:8 Deuteronomio 30.12–14 ‡ 10:11 Isaías 28.16 § 10:13 Joel 2.32 * 10:15 Isaías 53.1 † 10:16 Isaías 53.1 ‡ 10:18 Salmo 19.4 § 10:19 Deuteronomio 32.21 * 10:20 Isaías 65.1 † 10:21 Isaías 65.2

¹ **A** ntá ijie tjánchánkiá kixin: ¿Dios la á kuítóhe ch'án tí sín Israel? Kjá náhí, kixin janhan kjaxian israelitana la t'ikiníxinna ch'ín Abraham la ko k'uaxrjeníxinna ch'ín Benjamín. ² Kixin ósé tsíkjejá Dios tí sín israelita kixin ts'óna sín chjasén ch'án. **A** ntá ijie la kjá sinchek'itjáyanhya ch'án sín. ¿Á noahyará jahará nkexrí nixja xroon itén Dios tí chrónka ch'ín profeta Elías nkexrí nixjehe ch'án Dios tjanchia ch'án jie kuènte tí sín Israel? Mé ntáchro xikihi: ³ “Ínchéni, jehe sín k'óyán sín tí sín chrónka itán la ko k'óxíka sín tí altar kuèntá ntá jehóni kuítóheni tjechónni la tjinkaon sín kjaxin chrók'óyán sín tí jeheni.”* ⁴ **A** ntá Dios kjuátehe ch'án kixin: “Naxa kuítóhe yato míl chojni kuítekaon sín tí janhan kjuíxienhya sín toch'in sín tí nkehe tsíkjanoya Baal.”† ⁵ Ntá kjaxin xikaha ijie naxa kuítóhe iso tí sín naxa tinkáchónki Dios. Kjuasáyé Dios kixin kujkonóehe ch'án tí sín la tsíkjejá ch'án kixin tsaá iso tí jehe sín. ⁶ Mé xikaha kjuasáyé Dios sinchekaá ch'án tí jehe sín kixin jehya tí xra kjuích'e sín chrókuaáxin sín. Náhí. Kjuasáyé Dios mé sinchekaá sín ch'án. Kixin tí xra chrókjuich'e sín ntá chrókuaáxin sín la jehya kjuasáyé Dios tí xikaha.

⁷ **A** ntá tí xikaha la, ¿nkexrí? Tí sín israelita la k'uitjahya sín tí nkehe xritjejá sín. **A** ntá tí sín kjueyá Dios la k'uitja sín. **A** ntá tí sín í so a la icha asén sín la kuítekakonhya sín. ⁸ Éxí ntáchro xroon itén Dios kixin: “Dios kjuanjonhya kjuachaxin chrókiénxín tí sín a la ko mé kjaxin xikaha naxa sítonhen tí yaon ijie. La kjuanjonhya ch'án kjuachaxin kixin chrók'uikon sín la ko chrókiénxín sín.”‡ ⁹ Kjaxin tsíntáchro ch'ín David kixin: Tí kia tjasin sín mé tjasixín sín jie, tsjasótéxín sín.

¹⁰ Tí ikon sín ts'ikonxínhya sín kixin ts'óna sín ntakótán ntá tí jie kuènte sín mé jnkochrín yámá sín. §

Tsaá tí sín jehya sín judío

¹¹ **A** ntá ijie tjánchánkiá: Tí sín judío la tí kjuasin sín jie la ¿á ó naá kuítóexón Dios tí jehe sín? Kjá náhí. Tió kuítekakonhya tí sín judío a ntá tí sín jehya judío la mé kjuacha sín kuaá sín. **A** ntá tí sín israelita la kónínkaon sín kixin kjuachahya sín. ¹² **A** ntá tí jie kjuasin tí sín judío, a ntá kuítóhe Dios tí jehe sín, a ntá tí sín jehya judío antsí k'uitja sín nkexrí tsinkáchónki sín Dios. **A** ntá tí nkehe ntoáhya kjuích'e tí sín judío ntá tí sín jehya judío kjuacha sín kuaá sín. **A** ntá tí chrókjan tí sín judío chrókuítekaon sín Cristo la antsí má náxrjón tíha.

¹³ Chonta iso nkehe chrókuinhínrá jahará jehya judiorá kixin Dios mé chr'ánna kixin tsjakohá tí sín jehya judío la antsí tjeotan tí xra kuènte Ínchéni chrókjuít'a. ¹⁴ Tjínkavan kixin tí sín chjasenná chrókóchjinoxínhin sín kixin jahará tinkáchónkirá Dios kixin ntá chrókjuacha chrókuaá iso tí jehe sín. ¹⁵ Kuítóhe Dios tí sín judío, a ntá iso tí sín jehya judío k'uitja sín tí kjuaxróxin kuènte Dios. **A** ntá tí chrókuítekaon tí sín judío kjaxin la yóhe éxí chróxechón chojni tsík'en tí jehe sín. ¹⁶ Tí chrókjuinchetjóá Dios tí niotja xrankíxixín chrók'óna tí ich'o la ntá kuenté tí ch'o chrókjuinchetjóá ch'án. **A** ntá kjaxin tí chrókjuinchetjóá ch'án tí nuèé ijnko nta la kjaxin kaín tí chaon tí nta chrókjuinchetjóá ch'án.

* **11:3** 1 Reyes 19.10, 14 † **11:4** 1 Reyes 19.18 ‡ **11:8** Deuteronomio 29.4; Isaías 29.10

§ **11:10** Salmo 69.22–23

17 Ntá isó tí sín judío la éxí iso chaon tí nta olivo mé xíkaha tsíchrinjin la ntá jahará la éxí ijnko chaon nta olivo nteje tsík'óna injerto mé xíkaha ts'ejóchónxin tí nta chaon tí tronco tí nta olivo jína xráxín tjechón. 18 Ntáchrohyará kixin tí chaon tí nta la antsí jína. Íchá jína tsontáchorá kixin jehya tí nta t'etuenhen ti nuéé nta. Náhí. Tí nuéé mé tsjinkjtsa tí nta mé xíkaha tí jahará.

19 Ntá jahará tsontáchorá kixin: “A ntá tí chaon tí nta la tsíchrinjin kixin ntá jeheni tsitoheni lùké tí nta chaon tsíchrinjin”. 20 Tíha la chaxín. Kjánchó chrínjin kixin kuítekakonhya Dios. A ntá jahará la tjejorá ntiha kixin tinkachónkirá Dios. A ntá chrokjuinchehnkehyará. Íchá jína chróchrakonrá. 21 Kixin Dios la kuíkonóghya ch'án tí nta chaon kuènte tí nta tronco la ntá mé xíkaha kjaxin tí jahará la tsíkonóghyará ch'án. 22 Tsjehérá kixin Dios la imá jína kjánchó kjaxin sinchekjásóte ch'án tí sín titekakonhya. A ntá jína ch'án la kjuínkjtsa ch'án tí jahará. Kjánchó chrók'uejorá jnkojína éxí tjinkaon tí jehe ch'án. A ntá tí náhi la chaxín jahará la tsítóhará ch'án. 23 A ntá tí sín judío tsítóhe sín tí nkehe ntoáhya k'uékjich'e sín ntá jehe ch'án kjónté senó kóchrínjin ch'án la ntá ijie sinchetséxin ch'án tí tronco inaá kixin jehe ch'án la imá chóna ch'án kjuachaxin kixin xíkaha sich'e ch'án. 24 A ntá jahará jehya judiorá mé tsíkóchrínjinrá ch'án nta olivo nteje. A ntá antsí má xra tsotséxin tí nta olivo jína. A ntá tí sín judío la nta chaon kuènte tí tronco nta olivo jína la antsí xrahya tsjatsuenhen tsotséxin kichó inaá kixin ó nta chaon kuènte.

Tí tsjixixín ntá tsaáxin tí sín Israel

25 Kichóni, tjínkavan tsonohará tí nkehe jehó Dios nohe kixin sinchehnkehyará jahorá kixin ó nohará. Mé tí sín Israel tsitekakonhya sín hasta ts'ixenjian kaín tí sín jehya judío tsitekaon. 26 Tió xíkaha tsonhen ntá kaín tí sín Israel tsaá sín kixin tí xroon itén Dios ntáchro kixin:

Tí nkexro sinchekaáni mé tsjixín ch'án chjasin Jerusalén la tsjatsen ch'án ti jie kuènte tí sín tsík'axrjenixin ch'ín Jacob.

27 Tíhi mé kjuachaxin nixin kuèntana ts'áyéhe tí jehe sín kixin janhan mé kjuatsiyān ijie sín.*

28 Xíkaha kixin tí tan nixin tsaáxinni ntá tí sín judío mé tsonínkakohen sín Dios kixin ntá jahará ts'ayéhérá tí nkehe kuènte Dios. Kjánchó Dios naxa tjuèhe tí jehe sín judío kixin jehe ch'án tsík'jeyá ch'án tí sín tsík'axrjenixin tí jehe sín. 29 Kixin tí kaín nkehe kjuanjon Dios la tsakitsjehya ch'án la ko tsítóehya ch'án tí sín tsík'íyehé ch'án. 30 Senó la jahará k'uékitekákonhyará Dios a ntá ijie la tí sín judío titekakonhya sín. A ntá jahará la kjónté la kuíkonóghará Dios. 31 Mé xíkaha jehe sín kuítekakonhya sín Dios la ntá kjónté xíkaha la jehe ch'án tsíkonóghé tí jehe sín éxí kuíkonóghará ch'án. 32 Kixin Dios la kuítóhe ch'án kaín chojni kixin chrókjuasin sín jie kixin ntá tsjakoxin ch'án tí kjuachaxin kuènte ch'án kixin sinchetjóá ch'án kaín sín kjónté chojni chóna jie.

33 A ntá tí kjuachaxin kuènte Dios la imá jie la ko imá nohe ch'án. Ninkexró tsjachahya tsochronkaxín nkexrí tjenkayáxin ch'án la ko ninkexró tsjachahya tsienxín tí ntja kuènte ch'án. 34 Ntáchro xroon itén Dios kixin: “¿Xá nkexro chrókienxín nkexrí tjenkayáxin Ìnchéni la xá nkexro chrókjuinkjtsa chrókjuakohé tí jehe ch'án? 35 ¿Xá nkexro kjuanjon nkehe senó k'uáyéhe Dios a ntá ijie tjinkaon chrók'uáyéhe inaá?”† 36 Kixin

* 11:27 Salmo 14.7, Isaías 59.20 † 11:35 Isaías 40.13–14

kaín nkehe la tixín tí tjen Dios kixin kaín nkehe la kjuich'éna ch'án kixin jehe ch'án chóna ch'án. Mé xikaha tjancheheni kjuasáyé Dios jnkochrixin. Amén.

12

Chjehérá cuérporá Dios kixin sinchetjóá ch'án

¹ Mé xikaha kichó ni, xrjanóahará kixin Dios ó kuikonóahará ch'án ntá jahará chróchjehérá cuérporá Dios éxi ijnko nkehe tjechón kixin jehe ch'án ó kjuíntatjóará ch'án la mé xikaha chrókóxrjínhjin ch'án. Tíhi mé ijnko nkehe ntoá t'ichjánxin chróchjeheni ch'án. ² Chrokóxrjánhyará tí nkehe síin chjasintajni. Náhi. Chrókónixin tí nkehe tjenkayáxinrá kixin jina chrókjuenkayáxinrá. Xikaha ntá chrókónohará kixin nkexrí tjinkaon Dios kixin ntoá chrók'uejorá éxi tóxrjínhjin ch'án.

³ Kjuasáyé Dios kjuanjon ch'án tí xra tjet'aha ch'án. Mé xikaha nixjahará kaín rá kixin chrókjuenkayáxinhyará kixin imá tjeoanrá. Náhi. Chrókjuenkayáxinrá jina éxi tí kjuachaxin tjáhará Dios éxi nkexrí tinkachónkirá ch'án. ⁴ Mé xikaha ijnko cuerpo la nchónhya parte chóna. A ntá tí parte la jehya jnkokón xra chrókjuich'e. ⁵ Mé kjaxin xikaha tí jeheni kjónté nchónhyani la ts'ónani jnkokoá cuerpo kuente Cristo. Mé xikaha jnkokoá chrókjuenkayáxinni kixin ó k'ónani jnkokoá cuerpo.

⁶ Dios kjuanjon nchónhya clase xra éxi tjinkaon ch'án chróchjéhe ch'án jnkojnko chojni tí xra. Ntá t'ichjánxin jina sich'eni tí xra kjuanjon ch'án. A ntá tí kjuanjon ch'án kjuachaxin kixin tsochronkaxinni tí tan kuente ch'án ntá t'ichjánxin sich'eni tí xra éxi titekaonni ch'án. ⁷ A ntá tí kjuanjon ch'án xra tsjinkitsani í jnko nkexro ntá t'ichjánxin jina sich'eni tí xra a. A ntá tí nkexro tsik'áyéhe kjuachaxin tsjako la t'ichjánxin jehó tí xra a chrókjuako. ⁸ Tí nkexro tsik'áyéhe kjuachaxin nhexraxinkaon í jnko nkexro la kaín asén chrókjuich'e ch'án tí xra a. A ntá tí nkexro tsjanjon ichrén nkehe la chrókójiehya chrókjuanjon ch'án. A ntá tí nkexro t'etóan la jina chrókjuich'e ch'án xra la ko tí nkexro chrókjuinkitsa tí sín chóntahya la kjuaxróxin chrókjuinkitsa sín.

Tí nkehe chrókjuich'e tí sín tinkáchónki Cristo

⁹ Kaín asánrá chrótjuèherá kichuára. Chrókjuítóherá tí nkehe jínahya tjenkayáxinrá la chrókjuenkayáxinrá tí nkehe jina. ¹⁰ Chrótjuèherá kichuára la ko chaxin chrókjuíkosáyehérá kichuára.

¹¹ Chrókósáhyará la chrókjuich'eherá Inchéni xra kaín asánrá.

¹² Chrókócháhará kixin tjejóchónhénrá la chrókóninkákonhyará kjónté chrókjuasótiará. Chrókjuítóehýará chrónixjehérá Dios.

¹³ Chrókjuinkitsará tí sín tinkáchónki Inchéni tí chóntahya sín nkehe sine sín. Chjehérá kjuachaxin ts'ejó tí sín tsjijinixjahará sín.

¹⁴ Nixjehérá Dios la tsjanchehérá ch'án kixin sincheyaon ch'án tí sín chonkíhará. Tjanchehérá Dios tsjinkitsa tí jehe sín la jehya kixin chrókóninkákonhénrá sín.

¹⁵ Tócháhaokoará tí sín tjejóchéhe sín la ko tí tjejótsjanka sín la koirá chrótsjankará.

¹⁶ Kjuaxróxin chrók'uejorá. Chrókjuinchehnkehyará. Náhi. Chrókóyóhará éxi tí sín nòa. Chrókjuinchehnkehyará kixin nohará.

¹⁷ Chrókjuich'ehyará jínahya tí sín kjuít'ahará ichrén nkehe jínahya. Náhi. Íchá jina chrókjuákoxinrá nkehe jina kixin chrók'uikon

kaín chojni. ¹⁸ Chrókjuéyará jnkojína chrók'uejóra. Exí nkexrí chrókjuachará la kjuaxróxin chrók'uejorá kaín rá. ¹⁹ Tjuahará kichó ni, la chrókjuinçekjasótehyará jahorá tí sín ichrén nkehe kjuít'ahará. Náhi. Tjtohérá kixin Dios sinčekjasóte tí sín a. Ntáchro xroon itén Dios kixin: “Ixra kuéntana sintakitoaxián tíha. Janhan tsjénkahá tí sín a, ichro Ìnchéni.”* ²⁰ Kjaxin ntáchro xroon itén Dios kixin: “Tí sín nínkakonhan t'énxín sín kjinta la chróchjehé sín nkehe chrókjone sín la tí t'énxín sín ntá la kjaxin chróchjehé sín nkehe chrók'ui sín. Mé xikaha chrókjuich'e kixin chrókósuèhe sín kixin tí nkehe kjuich'e sín.”† ²¹ Chrókuitoéhyará kixin chrókjuacha tí nkehe jínahya chrók'uetuanhanrá. Náhi. Chrókjuich'erá tí nkehe jína kixin chrókjuachahya tí nkehe jínahya chrók'uetóan.

13

¹ Kaín chojni t'ichjánxin sinchexiteyéhé sín tí gobierno kixin tí kjuachaxin chóna sín la Dios tsíkjanjon kixin kohya nijnko gobierno chrók'uejé tí jehya kjuachaxién Dios. ² Mé xikaha tí sín tjanjonko tí sín t'etóan la kjaxin nínkakonhen sín tí nkehe k'uetóan Dios. A ntá tí sín xikaha ch'e la mé jehe sín tjejá sín jie tsjasótexín sín. ³ A ntá tí sín gobierno t'etóan la sinčekjasótehya sín tí nkexro titekaon ch'e nkehe jína. Náhi. Tsonínkakonhen sín tí nkexro ch'e tí jínahya. Tí tjínkáonrá tsonínkakuanyará sín la chrók'uejorá jnkojína. Chrókjuinçekxiteyéhérá sín kixin chrókónínkakuanyará sín. ⁴ Kixin Dios k'uetóan tí xra tjejóch'e sín kixin ntá jahará la jína chrók'uejorá. A ntá tí chrókjuich'erá nkehe jínahya la chróchrakonrá kixin jehya chónkó tjejó tí gobierno. Náhi. Chóna sín kjuachaxin sinčekjasótiará sín kixin jehe sín la Dios k'uetóan tjejó sín tí xra a kixin sinčekjasóte sín tí sín jínahya tjenkayáxin. ⁵ Mé xikaha t'ichjánxin sinchexiteyéhérá tí gobierno la jehya jehí kixin chrókjuinçekjasótiahýará sín. Náhi. Ó jehí jahará chróxráxinkáonrá kixin t'ichjánxin sinchexiteyéhérá sín. ⁶ La kjaxin jehya táhó. Náhi. T'ichjánxin chrókjuenkehérá gobierno tí chichaon kuente tí xra ch'erá tjanchia sín kixin tí gobierno la Dios k'uetóan tjejó sín t'etóan sín.

⁷ Kjaxin chrókjuenkehérá kaín chojni tjasikéhérá. Tí nkexro síká kuente xra la chrókjuenká sín kuente tí xra, la tí nkexro síká ichrén nkehe nčekji ntá tíha kjaxin chrókjuenká sín, la kjaxin chrókjuíkosáyehérá tí sín t'etóan. ⁸ Kjaxin chrókjuasikéhyará ninkexró. T'ichjánxin chrótuèherá kichuára kixin tí nkexro tjuèhe kichó la mé xikaha kjuínchexiteyá tí nkehe k'uetóan tí ley. ⁹ Kixin ntáchro tí mandamiento kixin: “Tjakéhya asánrá í jnko chojni chjin la ko t'oyánhyará kichuára la ko teehyará la nixjahýará kjuach'ia kuente í jnko chojni. La ko tjakéhya asánrá nkehe ókjé.”* Kaín tíha la ko í so nkehe t'etóan Dios mé tienxínni t'axrjexín kixin: “Chrótjuèheni kichó ni éxi tjuèxín asénni.” ¹⁰ Tí chojni tjuèhe kichó la ninkehó nkehe jínahya sich'ehe kichó. Mé xikaha chrótjuèhe kichuára la mé xikaha mé chróxiteyá jína tí nkehe nixja tí ley.

¹¹ Kaín tíha chrókónoheni tí tjejóni kixin ó kui tí hora chrók'uejótshèheni chrók'uajuahyani. Tí nkexro tsaáxinni la í séhya itsi ch'án ijie, a ntá tí kjuankíxinni kuítekaonni itén ch'án la ísé tsixín ch'án. ¹² A ntá tí tie la í séhya tsjak'e kixin ó tsi tí t'inkáséyan la chrókuítóheni tí nkehe ch'eni

* **12:19** Deuteronomio 32.35 † **12:20** Proverbios 25.21–22 * **13:9** Éxodo 20.13–15, 17; Deuteronomio 5.17–19, 21; Levítico 19.18

kuènte sítíe la chróchóntani kjuachaxin kuènte Nchakuen Dios kixin tsjinkitsa ts'ajini tí t'inkáséyan, éxí ijnko soldado t'inkáyate ch'án ka tsík'óna chica kixin kohya nkehe tsonhen ch'án. ¹³ Chrók'uejóni jnkojína éxí nkexrí chrók'uajini chaxín ntoá tí t'inkáséyan a. Chrókjuasinhyani kia chrókjuanjoxin chojni la ko chrókókoanhyani la ko chrókjuenkayáxinhyani chróchóntani nchónhya chojni chjin la ko chrókjuenkayáxinhyani tí nkehe ntáchro asénni la ko chrókjueyáhyani kjuanínkaon la ko chrókóchjinoxíenhyani. ¹⁴ A ntá jahará tákjára tí kjuachaxin kuènte Ìnchéni Jesucristo tsjinkitsará la tíha mé éxí chrók'uínkayára nkehe tsík'óna chica kixin kohya nkehe chrókónhanrá. La ko chrókjuenkayáxinhyará tí nkehe ntoáhya tjenkayáxin chojni jínahya.

14

Tjóntahyará kichuára

¹ A ntá kjónté ijnko chojni kánhyó tinkáchónki Ìnchéni la chrók'uejokoará ch'án la ko chrókjóntahyará ch'án kjónté kánhyó nohe ch'án. ² A ntá iso sín chaxín nohe sín la tjinkaon sín chrókjóné sín kaín nkehe. A ntá tí sín kánhyó tinkáchónki sín Ìnchéni ntá tjinkaon sín chrókjónéhya sín nto, ntá kayoa ó chrókjóné sín. ³ Tí nkexro chrókjóné kaín nkehe chrókjonjehya tí nkexro tjinkaon chrókjónéhya nkehe. A ntá tí sín chrókjónéhya nkehe chrókjontahya sín tí sín chrókjóné sín kaín nkehe kixin kjónté xikaha la Dios tsakja tí jehe sín. ⁴ ¿Xá nkexro jaha kixin chrókjóné tí nkexro ch'ehe xra í jnko nkexro? Tíha la xra kuènte tí lámogé ch'án tsontáchro á jína kjuích'e ch'án xra o náhí. A ntá kjá tsjak'e ch'án jína kixin Ìnchéni chóna ch'án kjuachaxin tsjinkitsa ch'án tsjak'e tí ch'ín a jína.

⁵ Iso sín tjenkayáxin sín kixin imá tjetoan ijnko yaon a ntá í jnko yaon la náhí. La í so sín ntáchro sín kixin kaín yaon la ó jnkokón. Ntá jnkojnko sín la jehó sín chrókjuenkayáxin sín kixin nkehe tí chaxín titekaon sín. ⁶ Tí sín xraxinkaon tí yaon la tjikosáyehe sín Ìnchéni la kjaxin tí sín tinkáchónkihya sín xikaha la tjikosáyehe sín Ìnchéni kjónté xraxinkakonhya sín tí yaon. Kjaxin tí sín ine kaín nkehe la ine sín kixin xikaha tjikosáyehe sín Ìnchéni la kjaxin tjanchehe sín kjuasáyé Dios. A ntá kjaxin tí sín nehya kaín nkehe la xikaha mé tjikosáyehe sín Ìnchéni la kjaxin tjanchehe sín kjuasáyé Dios.

⁷ Nijnko tí jeheni tjejóni kixin jehóni chrók'uejotanni la ko jehya jehí chrók'uenni. ⁸ Tí tjejóni la tjejóni kixin sich'ehe ni xra Ìnchéni la kjónté its'enni la kuènte ch'án tí jeheni. Méxra kjónté chrók'uejochónni o kjónté chrók'uenni la kuènte ch'án tí jeheni. ⁹ Méxra xikaha ntá Cristo la ik'uén ch'án la ko xechón ch'án inaá kixin k'óna ch'án Ìnché tí sín tsík'en la ko tí sín tjejochón.

¹⁰ A ntá jahará la, ¿nkekuènte tjóntará tí kichuára o nkekuènte chontehyará kaín sín kjuasáya? Kixin kaín ni tsochjinani tí tjen Dios kixin tsontáchro ch'án á jína xra kjuích'eni o náhí. ¹¹ Ntáchro xroon itén Dios kixin:

Méxra janhan takjénxian asenná, ichro Ìnchéni, kixin tí tjen la ts'ejóxin toch'in kaín chojni

kixin kaín chojni la tsjanchia sín kjuasáya kixin janhan mé Dios kuènte sín.*
 12 Mé xikaha jnkojnkonni chrókónoheni kixin tsochenkani Dios nkexrí kjuich'eni.

Tjachruehyará kichuára

13 Méxra chrókjóntahyará kichuára. Íchá jína kixin ninkehó nkehe chrókjuich'ehyará kixin ntá tí sín kichó ni chrókjuasinxinhya sín jie kixin tí chrókjuasin sín jie ntá xikaha chrók'uitjáyanxín tí tinkáchónki sín Ìnchéni. 14 Janhan tinkáchónkia Ìnchéni Jesús la ntá xikaha ó nòna kixin kohya ninkehó nkehe jehí tjuáhya. A ntá ijnko nkexro tjenkayáxin kixin jehya nkehe jína tíha ntá chaxín tjuáhya tí nkehe kixin xikaha tjenkayáxin ch'án. 15 Tí tjenkayáxin tí kichuá kixin tí nkehe inte la ntoáhya a ntá tí xikaha ch'e la tjuéhya tí kichuá. Kixin jehya tí nkehe chrókjónte ó chrókjuinçek'itjáyanxián tí kichuá kixin Cristo k'uenyákonhen ch'án kjaxin. 16 Chrókjuich'ehyará nkehe jínahya kixin ntá xikaha chrók'uántaxínjin sín tí nkehe jína tinkáchónkirá. 17 Kixin tí kjuachaxién Dios la jehya tí nkehe chrokjóneni o tí nkehe chrok'uini. Náhi. Tí tjen tí kjuachaxién Dios la chrók'uejóni jnkojína la ko kjuaxróxin chrók'uejóni la ko chrókóchéheni kixin chóntani Nchakuen Dios. 18 Tí nkexro ch'ehe Cristo xra mé chrókjuinchechéhe Dios la ko chrókjuinchechéhe chojni.

19 Mé xikaha chrókjueyáni kaín tí nkehe tjikao kjuaxróxin kixin ntá tsjinkitsani tí sín kichó ni kixin ntá kjaxin sín antsí chrókuinkáchónki sín Ìnchéni. 20 Chrókjuinçek'itjáyanhyará tí xra kuènte Dios kixin tí nkehe chrókjónterá ó kixin kaín nkehe chrókjónterá la ó tsikjinchetjóá Dios. Tí jínahya la tí chrókjóneni ókjé nkehe ntá xikaha la í so chojni chrók'uitjáyanxín tí nkehe tinkáchónki sín. 21 Ntá íchá jína chrókjóntehyará into la ko chrók'uihyará vino la ko ninkehó nkehe chrókjuich'ehyará tí xikaha chrókjuasixín jie kichuára. 22 Tí nkehe tinkáchónkirá la jahóra chrókónohará kixin Dios la tjetsjehe ch'án. A ntá jína tsjak'e tí nkexro tí chrókjuasixínnya ch'án jie tí nkehe tjenkayáxin ch'án. 23 A ntá tí nkexro ine nkehe la tjenkayáxin sín kixin tsjasixín sín jie ntá chaxín xikaha yamá sín jie kixin kénhya asén sín kjóne sín tí nkehe. La tió kénhya asén sín tjenkayáxin sín la ó kjuasin sín jie.

15

Nchechéhéra kichuára la jehya jahóra

1 Tí antsí tinkáchónkini Ìnchéni ntá chrókuinkitsani tí sín kánhyó tinkáchónki tí jehe ch'án la chrókjuich'ehyani tí nkehe chrókóchéxinni jehóni. 2 Kjaxin kaín ni chrókjuinchechéheni kichó ni kixin chrók'uejó sín jína la ko kixin antsí chrókuinkáchónki sín Ìnchéni. 3 Kixin kjaxin Cristo kjuich'ehya ch'án tí nkehe chrókóchéxin ch'án jehó ch'án. Náhi. Kjuínchexiteyá ch'án éxi ntáchro xroon itén Dios kixin: “K'uinka kjuasótexinna kaín tí kjuanínkaon chóna tí sín nínkakonhen Dios.”* 4 Kaín nkehe chrónka xroon itén Dios senó la tsikjin sín ósé kixin chrókónoheni kixin ntá chrók'uejóchónhenni la chrókónínkakonhyani kixin tíha mé nchechéheni. 5 Dios, mé tí nkexro tjinkitsani la ko nchechéheni, la

* 14:11 Isaías 45:23 * 15:3 Salmo 69:9

kjaxin tsjinkĩtsa ch'án tí jahará kixin ts'ejorá jnkojína la ko jnkokón tsjenkayáxinkoará kichuára kixin xikaha kjuákoxin Cristo Jesús. ⁶ Kixin kaín ní jnkokoá chrók'uákjenxinni Dios la chrókjuancheheni kjuasáyé ch'án mé jehe ch'án mé It'é Ìnchéni Jesucristo.

Tí tan jína xrakohe tí sín jehya judío

⁷ Chrókjuánjonrá kjuachaxin ts'ejó í so chojni la chrótjuèherá sín kixin éxí Cristo tsík'áyéhe ch'án tí jahará mé xikaha tsjikosáyehérá Dios. ⁸ Janhan jína chróntáxrjan kixin Cristo ikui sich'ehe xra tí sín judío kixin tsoxiteyá tí nkehe tsíchenka Dios tí sín tsík'axrjeníxinni ósé kixin xikaha tsjákoxin kixin Dios la jína ch'án la sinchexiteyá ch'án tí nkehe tsíntáχρο ch'án. ⁹ La kjaxin ikui ch'án kixin kjónté tí sín jehya sín judío la chrokjuanchehe sín kjuasáyé Dios kixin kuikonóhehe ch'án sín éxí chrónka tí xroon itén Dios kixin:

Janhan la ko tí sín tjejó ókjé nación mé tsjancheheni kjuasáyé Dios

la ko tsotsjeni himno kixin ts'ákjenxinni ihnié ch'án.†

¹⁰ Kjaxin ntáχρο í jnko parte xroon itén Dios ínaá kixin:

Tsochákoará kaín tí sín kuènté Dios.‡

¹¹ Kjaxin ntáχρο xroon itén Dios ínaá kixin:

Tjanchehérá kjuasáyé ìnchéni Dios kaín rá kjónté jehya judíora

mé kaín chojni chrókjuanchehe sín kjuasáyé Dios.§

¹² Kjaxin ch'ín Isaías tsíkjin kixin:

Ts'axrjeníxin ch'ín Isaí ijnko nkexro

la ts'etuenhen ch'án kaín tí sín jehya judío,

a ntá tí sín a mé tsinkáchónki sín tí nkexro a.*

Mé xikaha ichro itén Dios.

¹³ Dios mé tjetjanjon ch'án kjuachaxin tjejóchónhenni la jehe ch'án nchechéheni ch'án la tjanjon ch'án kjuaxróxin ts'ejóni kixin titekaonni tí jehe ch'án kixin ntá ts'ánkí tí kjuachéhe tjejóchónhenni kjuachaxièn Nchakuen ch'án.

¹⁴ Kíchóni, chaxín tónona kixin jahará la jína tjejorá la kaín xín kjuaxrexinkaon jína tjenkayáxinrá la nohará tsjínkĩtsará chénkará kichuára. ¹⁵ La kjónté xikaha la chrakonhya ikjian tí xroon i chr'anhánra xrjanka kaín tí nkehe kixin chrók'uitjáyanhýará chróxráxinkáonrá kaín nkehe. Mé xikaha it'á tí xra kixin kjuasáyé Dios kjuanjon ch'án tí xra.

¹⁶ Kixin sít'aha Jesucristo xra tsotjanka tí sín jehya judío tí itén Dios. Tí xra mé tjákua tí tan jína tsaáxin chojni kixin ntá janhan tsánjuan tí sín jehya judío ts'áyéhe Dios éxí ijnko nkehe tsóxrjínhin ch'án kixin Nchakuen ch'án kótjuáxin sín.

¹⁷ Janhan mé ijnko chojni tinkáchónki Cristo Jesús la mé xikaha siín kjuachaxin tsochána kixin t'aha xra Dios. ¹⁸ Chrokjuahya tsohnke tsontáxrjan í jnko nkehe. Jehó tsóxrjanka nkexrí tí kjuachaxin kjuanjon Cristo chjina kixin tsotjanka tí sín jehya judío tí itén ch'án kixin tsitekaon sín Dios. Ntá xikaha kuítekaon sín kixin tí itan kjuákua la ko tí nkehe jína kjuít'a. ¹⁹ Kixin tí kjuachaxièn Dios mé kjuákoxián tí kjuásian kjuaxroon la ko kjuákoxián tí kjuachaxin kuènte Nchakuen Dios. Mé xikaha kjuintaxiín kjuákua tí tan jína tsaáxin chojni Cristo xrankíxixín chjasin Jerusalén la nkuíxín chjinaxón ntiha la hasta estado Ilirico. ²⁰ Mé xikaha

† 15:9 2 Samuel 22.50; Salmo 18.49 ‡ 15:10 Deuteronomio 32.43 § 15:11 Salmo 117.1

* 15:12 Isaías 11.10

tjínkavan tsjìkjàkua tí tan tsaáxinni tí chjasin naxa tienhyé sín ihnié Cristo kixin tí janhan tjínkakhya tsjìxronkaxian tí xra kuente í jnko chojni xráxin tjech'e xra. ²¹ Íchá jina éxí ntáχρο xroon itén Dios kixin: Chrókuinhin tí sín naxa kienhyé sín tí tan kuente ti jehe ch'án. La ko chrókienxín tí sín naxa kienhyé tí tan kuente ch'án.†

Ch'ín Pablo tjenkayáxin ch'án sátsji ch'án chjasin Roma

²² Nchónhya veces tjínkavan chrókjuasántsjahá tí jahará kjánchó naxa xitjahya kjuasán ntiha. ²³ Kjánchó ijie la ó kjuixinna tí xra nkuíxín tí tjèn ntihi. Ntá itsjé nánó tjínkavan chrókjuasántsjahá tí jahará ²⁴ a ntá ijie ts'atsínka tsonixjahará tí sátsjia nación España. Ntá tsochána ts'íkuān tí jahará ntá tsjixin ntá chr'éxin tjínkavan kixin jahará tsjínkítsarā tí sátsjia. ²⁵ A ntá ijie la sátsjija chjasin Jerusalén, sátsjikian tí nkehe tsjinkítsa tí sín kichó ni ntiha. ²⁶ Kixin tí sín estado Macedonia la ko estado Acaya kjuenkayáxin sín tsjejo sín chichaon kixin tsochr'énhen sín tí sín kichó ni ntiha tsochjéhe tí sín nòa tjejó chjasin Jerusalén. ²⁷ Jehe sín kóxrjínhin sich'e sín xikaha kixin tí sín judío tinkáchónki Cristo kjuínkítsa tí jehe sín tsonohe sín itén Dios. Ntá ijie la jehe sín chrókjuinkítsa sín inaá chrókjuanjón sín iso tí nkehe chóna sín chrók'uáyéhe tí sín judío tinkáchónki Ìnchéni. ²⁸ A ntá tió tsjixin tí xra la ts'áyéhe sín tí chichaon la ntá janhan sátsjia España la ts'atsínkua tsonixjahará. ²⁹ Ó nòna kixin tió sátsjia la Cristo mé imá sincheyaon ch'án tí janhan la ko tí jahará.

³⁰ Kichóni kjuasáyé Ìnchéni Jesucristo la ko tí Nchakuen ch'án tjanjon kjuachaxin tsotjuèheni kichó ni mé xrjannóahará kixin jnkokoá chrókjuenkayáxinni kixin tí xra tjét'a la ko chrónixjehérá Dios kixin tí janhan. ³¹ Tjanchehérá Dios kixin tsjinkítsa ch'án tí janhan kixin kohya nkehe tsonna kixin kaín tí sín titekakhya Dios siín chjasin Judea. La ko tjanchará kixin jina sátsjikian tí nkehe tsjinkítsa tí sín kichó ni tjejó chjasin Jerusalén kixin jina chrók'uáyéhe sín. ³² Ntá tí tjinkaon Dios la tsochána tsjasán tí tjejorá jahará la ko kjuaxróxin tsjak'é tí tsjasántsjahará. ³³ Dios tjanjon kjuaxróxin ts'ejokoará kaín rá. Amén.

16

Ch'ín Pablo nixjéhe ch'án tí sín chóxin ch'án

¹ Tétuanhanrá tsjínkítsarā tí tjan kichó ni Febe ch'e tjan xra ninko chjasin Cencrea ² mé tjánjonrá kjuachaxin tsjak'e tjan kjuachaxién ihnié Ìnchéni éxí ch'eherá í so sín kichó ni tinkáchónki Ìnchéni. Tsjínkítsarā tjan ichrén nkehe t'ichjánxinhin tjan kixin jehe tjan kjaxin kjuínkítsa tjan nchónhya chojni la kjaxin kjuinkítsa tjan tí janhan.

³ Nixjehérá tjan Priscila la ko ch'ín Aquila. Jehe sín jnkokoá kjuích'ekoni xra kixin kjaxin sín mé ch'ehe sín Cristo xra. ⁴ Jehe sín chrók'uenxín sín kixin kjuínkítsana sín tí janhan mé xikaha tjaha sín kjuasáya la jehya janhván, kjaxin kaín sín kichó ni ninkoé tí sín jehya judío. ⁵ Nixjehérá kjaxin kaín kichó ni tóchjina ntōe tjan Priscila la ko ch'ín Aquila. Nixjehérá tí ch'ín choxian jina Epeneto mé jehe ch'án la saoxín kuítekaon ch'án Cristo estado Acaya. ⁶ Nixjehérá tjan María kixin kjaxin tjan kjuích'e tjan xra tí tjejorá ntiha. ⁷ Kjaxin nixjehérá tí sín tsíkjixin chjasenná mé ch'ín Andrónico la ko ch'ín Junias. Tí k'uikjèna ntōechiso la

† 15:21 Isaías 52.15

kjāxin tí jehe sín k'uikjehe sín. Kjāxin kaín tí í so sín apóstol la tjikosáyehe sín tí sín a. Jehe sín senó kuinkáchónki sín Cristo ntá chr'éxin janhan.

⁸ Nixjehérá ch'ín Amplias kixin jehe ch'án mé ijnko nkexro choxian la ko tjuahā tinkáchónki Ìnchéni. ⁹ Nixjehérá ch'ín Urbano kixin jnkokoá kjuít'akian ch'án xra kuènte Jesucristo la ko nixjehérá tí ch'ín choxian Estaquis. ¹⁰ Nixjehérá ch'ín Apeles. Jehe ch'án la kjónté nchónhya nkehe kónhen ch'án kjuasóte ch'án kixin tinkáchónki ch'án Cristo. Kjāxin nixjehérá tí sín kjéhya ch'ín Aristóbulo. ¹¹ Kjāxin nixjehérá tí ch'ín kjéhyana Herodión la ko kjāxin nixjehérá kaín tí sín kjéhya ch'ín Narciso kixin kjāxin sín tinkáchónki sín Ìnchéni. ¹² Nixjehérá tjan Trifena la ko tjan Trifosa. Kjāxin jehe sín kjuích'e sín xra kuènte Ìnchéni la ko nixjehérá kjāxin tí tjan kichó ni Pérsida. Kjāxin kjuínkítsa tjan kjuích'e tjan xra kuènte Ìnchéni. ¹³ Kjāxin nixjehérá ch'ín Rufo, ijnko chojni tsíkjeýá Ìnchéni la ko nixjehérá tí ìné ch'án kjāxin kixin kjāxin tjan kjuínkítsa tjan tí janhan la éxi naná k'uikuān tí jehe tjan. ¹⁴ Kjāxin nixjehérá ch'ín Asíncrito la ko ch'ín Flegonte la ko ch'ín Hermas la ko ch'ín Patrobas la ko ch'ín Hermes la ko tí í so sín kichó ni tjejóko tí jehe sín ntiha. ¹⁵ Nixjehérá kjāxin ch'ín Filólogo la ko tjan Julia la ko ch'ín Nereo la ko tí tjan kichó ch'án la ko ch'ín Olimpas la ko kaín tí sín kichó ni tinkáchónki Ìnchéni tjejóko sín ntiha.

¹⁶ Kjāxin tsehérá tja kichuárá kjuachaxin ihníé Ìnchéni. Kaín tí sín nínko kuènte Cristo ntihi xraxinkaon sín tí jahará la nixjahará sín.

¹⁷ Kichóni, xrjanóahará kixin chrótsjehérá nkexro tí sín tjixrónkáxin chrók'óxika tí sín jnkokoá tinkáchónki Ìnchéni. Jehe sín titekakonhya sín tí itén Dios kjuákohará k'uitjará. Tí xíkaha ch'e sín la chrók'uaxrjekjanxínrá ntiha. ¹⁸ Tí nkexro xíkaha ch'e la jehya Ìnchéni Jesucristo ch'ehe xra. Náhi. Jehí tjinkaon sín chrókjuixrónkáxin sín la nixja sín tí nkehe náxrjón ó la xíkaha ch'iehe sín asén tí chojni naxa noehya. ¹⁹ Kaín chojni ó nohe kixin jahará la ó kuítekaonrá Ìnchéni. Mé xíkaha chàna tí janhan la tjínkavan chrókóxakonhanrá chrókjuích'erá xra jína. Jehya kixin chrókjuích'erá nkehe jínahya. ²⁰ Tí Dios tjanjon kjuaxróxin mé tjoka tsinkátja Satanás, í ts'etuñhya. A ntá Ìnchéni Jesucristo mé sintayaonrá ch'án.

²¹ Ch'ín Timoteo nixjahará ch'án. Jehe ch'án jnkokón ch'ekoni xra. La kjāxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjahará sín.

²² Janhan Tercio ikjian tí xroon i k'uetqan ch'ín Pablo la kjāxin nixjahará kjuachaxién Ìnchéni.

²³ Ch'ín Gayo nixjahará ch'án. Jehe ch'án kjuanjon kjuachaxin kjuak'é janhan ntqe ch'án la ko kaín tí sín kuènte nínko tójnkotsé ntqe ch'án. La ko nixjahará ch'ín Erasto. Jehe ch'án mé tesorero kuènte chjasin la ko tí ch'ín kichó ni Cuarto kjāxin nixjahará ch'án.

²⁴ Ìnchéni Jesucristo sincheyaon ch'án kaín tí jahará. Amén.

²⁵ Ntá ijie tsjancheheni kjuasáyé Dios kixin jehe ch'án tjínkítsa ch'án kixin jína chrók'uejorá éxi chrónka tí tan jína tsaáxinni la ko éxi kjuakoni kuènte Jesucristo. Tíha mé chaxín chrónka éxi Dios k'uetqan nchenoheni ch'án tí nkehe ninkexró k'uénoehya desde k'óna chjasintajni. ²⁶ A ntá ijie kaín ni tsoñoxínni nkexrí nixja xroon ikjin tí sín profeta kixin nkexrí k'uetqan Dios itjen jnkochrín. Ntá kaín nkehe k'uénoehya ninkexró a

ntá tsochóxin kuenté chjasintajni kixin tsinkáchónki sín la ko tsitekaon sín Dios.

²⁷ Itjen jnkokoá Dios la jehó ch'án imá nohe ch'án la jehó ch'án mé tjancheheni kjuasáya kixin tinkáchónkini Ìnchéni Jesucristo jnkochrixin. Amén. Ó tjen.

Tí xroon saoxín ikjin ch'ín Pablo chr'énhen ch'án tí sín tinkáchónki Cristo síin chjasin Corinto

Ch'ín Pablo mé ikjin ch'án xroon ichr'án ch'án tí nínko chjasin Corinto

¹ Janhan Pablo mé kjueyána Dios tjinkaon ch'án kixin kjuachaxin kuènte Ìnchéni Jesucristo mé chrókjuít'aha ch'án xra. Janhan la ko kichó ni Sóstenes mé ² ikjinni tí xroon i chr'ánhanráni tí jahará tójnkotsérá nínko chjasin Corinto. Ó kjuínchetjóará Ìnchéni Jesucristo na mé kjueyára Dios tí jahará kixin chrók'uaxrjekjanxínrá tí sín tjasin jie kixin tjinkaon ch'án tí jahará kixin tjóá chrók'uejorá la ko xikaha kjueyá ch'án kaín xín tí sín tjanchehe sín ìnchéni Jesucristo kixin chrókjuinkítsa ch'án sín, tíha mé Ìnché sín la ko Ìnchéni. ³ Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Ìnchéni Cristo mé tjencheyaon tí sín ntiha

⁴ Jnkochrínín tjáncháha Dios kjuasáya kixin sintayaonrá ch'án tí jahará kixin tinkachónkirá Ìnchéni Cristo Jesús. ⁵ Na mé Dios tjáhará kjuachaxin kuènte ch'án ntá xikaha antsí jína nohará chrónkaxínrá kixin nkexrí tinkachónkirá Ìnchéni la ko kjaxin antsí jína tiénxínrá kaín nkehe chaxín ntoá. ⁶ Tí nkehe kuínhínrá kixin nkexrí tjen Cristo na ntá jie jahará tjákoxínrá. ⁷ Ntá jahará ó chontará kaín xín tí kjuachaxin kuènte Nchakuen Dios, la í ninkehó t'itjáyankíhya tí kjuachaxin kuènte ch'án k'uayéhérá nachrohe tjejochonhénrá tsokjan Ìnchéni Jesucristo. ⁸ Ntá Ìnchéni ts'ayakonhanrá ch'án kixin tsítóéhyará tí tinkachónkirá ch'án hasta tsjixraká tí yaon tsjixixín. Ntá ninkexró ts'ekahyará jie kixin ntoáhya tjejoch'erá, tsixro sín, tí yaon tsokjan ch'án. ⁹ Ó noheni kixin Dios chaxín sinchexiteyá ch'án tí nkehe ntáchro ch'án kixin jehe ch'án mé tsíkjeýará ch'án kixin chrókuinkachónkirá tí Xjeen ch'án Jesucristo, mé Ìnchéni tíha.

Jnkokoáhya kjuenkayáxin tí sín tinkáchónki Cristo ntiha chjasin Corinto

¹⁰ Kichóni, xrjanóaxínrá tí kjuachaxin ihnié Ìnchéni Jesucristo kixin jnkokoá chrókjuenkayáxinrá la ko chrók'uaxrjentahyará ókjé na mé jnkokoá chrókjuenkayáxinkoará kichuára. ¹¹ Kichóni, ó kuínhan tí nkehe chrónka tí sín kjéhya ch'ín Cloé kixin síin kjuanínkaon tí tjejorá tójnkotsérá ntiha. ¹² Na mé ntáxrjan kixin isorá ntáchrórá kixin jahará chréhérá tí janhan Pablo, la ko í sorá ntáchrórá kixin jahará chréhérá tí ch'ín Apolos, la ko í sorá ntáchrórá kixin jahará chréhérá tí ch'ín Pedro, la ko í sorá ntáchrórá kixin chréhérá Cristo. ¹³ ¿Xá nkekjáin Cristo síin kixin? ¿Á jehya jnkokoá Cristo tinkáchónkini? ¿Á janhan Pablo k'uényákonhanrá ní? ¿Á kuíkitexínrá tí nina ní? ¹⁴ Tjáncháha Dios kjuasáya kixin nijnko tí jahará kuíkítiahyará ntiha. Jehó ch'ín Crispo la ko ch'ín Gayo mé kuíkíte janhan. ¹⁵ Na mé nijnkorá xitjahya tsontáchrórá kixin nina kuíkitexínrá. ¹⁶ Kjaxin jehó kuíkíte tí ch'ín Estéfanos la ko tí sín kjéhya ch'án. Xráxinkakonhya á kuíkíte í so sín o náhi. ¹⁷ Kixin tí xra chjina Cristo jehya kixin chrókuíkíte chojni. Náhi. Tí xra chjina Ìnchéni kixin tsóxrjankaxián

tí tan tsaáxinni. Tjínka¹⁸konhya kixin chrókjuáko¹⁹xian palabra náxrxjón noi kixin xikaha chrókjuákua ntá chrókju²⁰intamá tí kjuachaxin jié kónoxín tí k'uénxin Ìnchéni Jesús tí ntacruz, kjuák'enkáni ch'án, k'uenyákonhenni ch'án.

Cristo mé tjako²¹xin tí kjuachaxi²²én Dios la ko tjako²³xin ch'án kixin imá nohe Dios

¹⁸ Chronkaxinni kixin k'uenyákonhenni Cristo tí ntacruz. A ntá tí tsinhin tí sín xráxín ts'itjáyan ntá ts'ikon sín tíha éxí nkehe chónkó. A ntá kaín ni chojni kuaáni mé t'ikonni kixin kjuachaxin jié tíha. ¹⁹ Mé xikaha ntáchro xroon itén Dios tsíkjin sín ósé kixin Dios mé sinchek'itjáyan tí nkehe tjenkayáxin tí sín imá nohe, la ko tsítóenta ch'án tí nkehe ntáchro tí sín imá tienxín sín.*

²⁰ Mé nkehe tsonhen ntáchro sín kixin imá nohe sín la ko nkehe tsonhen tjako sín la ko nkehe tsonhen tí imá nohe sín nixja sín? Táha la nkehe síin chjasintajni ó. A ntá Dios mé t'ikon ch'án kixin lontj sín kixin xikaha ichro sín. ²¹ Kixin Dios antsí nohe ntá xikaha kuítóehya ch'án kixin kjuachaxin kuènte sín ó chrókjuacha sín chróchóxixín sín ch'án. Ntá kórxjínhin Dios chrókju²²eyá ch'án chrókjuinchekáá ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

²² Tí sín judío mé tjinkaon sín chrók'uikon sín kjuaxroan jié, ichro sín. A ntá tí sín nkíva griego mé xritjeyá sín kixin antsí chrókónohe sín, ichro sín. ²³ A ntá jeheni kaín ni tinkáchónkini Cristo la tjinkakonhyani chrókónoheni kaín tíha la mé jehó Cristo tjako²⁴xinni. Chronkani kixin ijnko ntacruz kjuák'enkáni ch'án, k'uénxin ch'án. A ntá tí sín judío ntáchro sín kixin ijnko nkehe chrókósuèheni chrókuinkáchónkini tíha, ichro sín. A ntá tí sín jehya judío ntáchro sín kixin chojni lontj tí jeheni kixin xikaha tinkáchónkini, ichro sín. ²⁴ A ntá tí sín kju²⁵eyá Dios, kjónté judío sín na o griego sín, la kaín ni ntáchroni kixin Cristo mé k'uenyákonhenni ch'án. Mé xikaha tjako²⁶xin Dios tí kjuachaxin jié la ko tí kjuaxrexinkaon jína kuènte ch'án. ²⁵ Ntá jehé sín ntáchro sín kixin éxí ijnko nkehe chónkó tí nkehe kjuenkayáxin Dios, na kjónté xikaha la antsí tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhe sín ch'án. La ko kjaxin ntáchro sín kixin jiéhya tí kjuachaxin chón²⁷ta Dios. A ntá tí sín antsí má chón²⁸ta kjuachaxin ntihi chjasintajni kjónté la tóyóehya sín Dios kixin antsí chón²⁹ta ch'án kjuachaxin t'etoan ch'án.

²⁶ Kíchóni, xráxinkáonrá nkexrí k'uéjorá ntá kjónté kju²⁷eyará Dios tí jahará. Na mé tsjéhyará imá kónohará éxí t'ikon tí sín chjasintajni la kjónté kju²⁸eyará Dios tí jahará. La ko tsjéhyará imá kuétoanrá la ko tsjéhyará k'uaxrxjenixínrá tí sín imá k'uék'etoan. ²⁷ Ntá kjónté Dios mé kju²⁹eyá iso tí sín noehya éxí t'ikon tí sín chjasintajni kixin xikaha tjinkaon ch'án chrókjuinchesuèhe ch'án tí sín imá nohe ntihi chjasintajni. La ko kjaxin kju³⁰eyá Dios iso tí sín chón³¹tahya kjuachaxin éxí t'ikon tí sín chjasintajni kixin xikaha tjinkaon ch'án chrókjuinchesuèhe ch'án tí sín imá chón³²ta kjuachaxin ntihi chjasintajni. ²⁸ Dios mé kju³³eyá ch'án iso tí sín t'etoanhya la ko iso tí sín ninkehó sínkíhya tónhen sín ntihi chjasintajni kixin jehé ch'án mé chrókjuinche³⁴k'itjáyan ch'án kjuachaxi³⁵én tí sín jehó chrók'u³⁶etoan.

²⁹ Méxra xikaha ninke³⁷xró tsjachahya sinchehnke tí tjen Dios. ³⁰ A ntá tí kjuachaxin kuènte Dios mé tinkáchónkirá Cristo Jesús, a ntá chón³⁸taxinni Cristo kjuaxrexinkaon jína, la ko tí kjuachaxin kuènte ch'án kóxíka tí

* 1:19 Isaías 29.14

jië kuènteni, la ko tí kjuachaxin kuènte ch'án sinchetjuáxinni ch'án, la ko tí ijnié ch'án k'ueñaxinni ch'án. ³¹ Mé xikaha éxi chrónka tí xroon tsíkjin sín ósé ntáchro kixin: “Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuakoxin ch'án kixin imá t'etóan tí kjuachaxin kuènte Dios.”†

2

Ch'in Pablo mé tjako ch'án kixin Jesucristo kjuák'enkání ch'án ntacruz

¹ Kíchóni, tió kjuasán ntiha chjasánrá níxjhará chrókjuákohará nkexrí tjen Dios la jehya ijnko tan tienxínhya chojni la ko jehya itan imá noi chrókjuákoáxinrá. ² Kixin tió k'uejóni jnkokoá ntiha kjuenkayáxinhya janhan kixin í so nkehe chrók'uitja chrórxjanka la jehó tjínkavan chrórxjanka kixin Jesucristo la kjuák'enkání ch'án tí ntacruz. ³ K'uejóni jnkokoá ntiha la ntá jahará ó nohará kixin janhan kjuak'é éxi chrókjuachahya kixin sixránkana, chrákonna. ⁴ Tí kjuankíxian níxjhará la ko xrxjankaxián tí tan tsaáxin chojni, la tjínkakonhya chrókjuáchrúaixinrá tí nkehe náxrjón níxja chojni tsíkónohe má. Náhí. Tió kjuákohará kónoxín kixin tjékian Nchakuen Dios la ko kónoxín tí kjuachaxin jié kuènte ch'án, ⁵ kixin jehya kjuaxrexinkaon kuènte chojni tsíkónohe má chrókuinkachónkirá. Náhí. Tí kjuachaxin kuènte Dios mé chrókuinkachónkirá.

Nchakuen Dios mé tsochóxixinni ch'án

⁶ Kjánchó tió tjáqohá tí sín chaxín ó nohe sín tinkáchónki Ìnchéni mé xrxjanka tí kjuaxrexinkaon antsí noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etóan chjasintajni, na mé tí kjuachaxin kuènte sín la tjoka ts'itjáyan. ⁷ Jeheni mé antsí chrónkani tí nkehe jehó Dios nohe, na mé tí nkehe tsíkjenkayáxin ch'án naxa k'ónahya chjasintajni kixin nkexrí tsaáxinni. ⁸ Nijnko tí sín t'etóan chjasintajni kienxínhya sín tí nkehe tsíkjenkayáxin Dios. A ntá tí chrókiénxín sín tíha la ntá chrókjuák'enkaníhya sín Ìnchéni tjetoan tí ntacruz. ⁹ Éxi ntáchro xroon itén Dios tsíkjin sín ósé kixin:

Naxa k'uikónhya chojni la ko naxa kíenhya chojni,
la ko naxa kjuenkayáxinhya chojni

kixin nkexrí siín kaín xín nkehe kjuích'éna Dios ts'áyéhe tí sín tjuèhe ch'án.*

¹⁰ A ntá Dios mé nchenoexínni kaín tíha kixin chóntani Nchakuen ch'án. Na mé tí Nchakuen Dios mé tjetsjehe kixin nkexrí siín kaín xín nkehe la ko kjaxin nkexrí tjen tí nkehe tjenkayáxin Dios.

¹¹ Na mé ninkexró mé noehya nkexrí tjenkayáxin asén chojni. Na mé jnkojnko chojni mé nohe kixin nkexrí tónhen asén. Méxra xikaha kjaxin kohya nkexro nohe nkexrí tjenkayáxin Dios la jehó tí Nchakuen ch'án mé nohe. ¹² A ntá jehya tí nchakuen chojni chjasintajni k'uáyéheni. Náhí. Tí Nchakuen kuixin tí tjen Dios mé k'uáyéheni kixin ntá tsonoexínni kixin kaín xín nkehe kjuínchekitonhenni Dios. ¹³ Kjaxin jeheni chrónkani tíhi, a ntá jehya chronkaxínni tí nkehe tsíkónohe chojni ó. Náhí. Tí Nchakuen Dios mé nchenoexínni nkexrí tsjakóexínni tí sín chónta Nchakuen ch'án.

¹⁴ Kjánchó tí sín naxa chóntahya Nchakuen Dios mé xitjahya ts'áyéhe sín tí nkehe tjanjon Nchakuen Dios. Na mé éxi lóco t'ikon sín kaín tíha kixin jehó tí sín chónta Nchakuen Dios mé tsjacha sín tsienxín sín tíha. ¹⁵ A ntá tí nkexro chónta Nchakuen Dios mé chrókjuacha chrókónohe

† 1:31 Jeremías 9.23 * 2:9 Isaías 64.4

nkexrí síin kaín xín nkehe. Kjánchó tí nkexró chóntahya Nchakuen Dios tsjachahya tsjanchia jie tí jehe ch'án. ¹⁶ Méxra ntáchro xroon itén Dios kixin: ¿Xá ninkexró chrókónohe kixin nkexrí tjenkayáxin Ìnchéni kixin chrókjuacha sín chrókjuakohe sín ch'án inaá?† Kjánchó jeheni la ó chóntani tí kjuaxrexinkaon kuènte Cristo.

3

Tí sín jnkokoá kjuích'ehe sín Dios xra

¹ Mé xikaha, kichó ni, kjuachahya janhan chróníxjahará éxi chojni t'etuenhen asén sín Nchakuen Dios. Náhí. Éxi chojni naxa nchexiteyéhe sín tí nkehe ntáchro asén sín, na mé éxi xjan ntsíntí na ntá kjuankíxin kuinkáchónki Cristo mé xikaha tí jahará. ² Janhan na kjuákoáxinrá nkehe xrahya éxi yóhe ijnko xjanhnté tí jahará naxa nchekakí ìné tsjen kixin naxa xitjahya sine nkehe cha. Mé xikaha tí jahará naxa xitjahya sinterá nkehe cha ³ kixin naxa éxi chojni ó nchexiteyéhérá tí nkehe ntáchro asánrá kixin tí naxa síin kjuachjinoxínhin la ko síin kjuanínkaon la ko jnkokoáhya tjenkayáxinrá, la mé tjejoch'erá éxi ch'e kaín xín chojni chjasintajni. ⁴ Isorá ntáchrorá kixin chréhérá tí janhan Pablo, la ko í sorá ntáchrorá kixin chréhérá tí ch'ín Apolos. Na mé éxi chojni chjasintajni ó tjenkayáxinrá.

⁵ ¿Xá nkexro tí Pablo la ko nkexro tí Apolos? A ntá jeheni ó jehí ijnko chojni kjuích'ehe Dios xra, a ntá jahará kuinkachónkirá Ìnchéni kixin janhan kjuákoahará. Jnkojnkoní kjuích'eni tí xra kjuanjon Ìnchéni. ⁶ Janhan kuènka, a ntá ch'ín Apolos ìntá kjuáka ch'án, a ntá Dios la mé kjuínchek'ánkí ch'án tí nkehe a. ⁷ Méxra tí nkexro k'uenkaxin la ko tí nkexro tjáka ntá la kánhyó tjetoan kixin Dios mé chóna kaín kjuachaxin la jehe ch'án nchek'ánkí kaín nkehe síin. ⁸ A ntá tí sín t'enka la ko tí sín tjáka ntá la ó jnkokón ch'e sín xra, a ntá Dios mé tsjenkehe sín jnkojnko tí xra kjuích'e sín. ⁹ Méxra jeheni mé jnkokoá ch'ehe ni Dios xra, a ntá jahará mé éxi tí nontee Dios, ntaha ch'e ch'án xra, la ko kjaxin jahará mé tí nchia tjech'éna ch'án. ¹⁰ Janhan mé tí maestro ch'éna nchia kixin Dios kjuanjon kjuachaxin tsjaké tí xro xrankíxín, a ntá í jnko nkexro sich'éna nchia chrítaón tí xro a. A ntá jnkojnko nkexro t'ichjánxin ntoá chrókjuích'éna sín nchia chrítaón tí xro a, ¹¹ kixin kohya ninkexró tsjacha tsjak'e í jnko xro xrankíxín tí nchia a kixin táha la ó tsíkjin tsík'óna, kixin Jesucristo tíha. ¹² A ntá chrítaón tíha mé tsjacha sich'éna chojni nchia tsík'óna chica oro, la ko chica plata, la ko xro náxrjón tjeje, la ko inta tabla, la ko kaní, la kontaxro. ¹³ Na mé tsonoxín nkehe tí xra kjuích'e jnkojnko chojni tíó tsi tí yaon tsjixixín. Kixin tí yaon a mé tsi xrohi. A ntá tí xrohi mé tsjakoxin nkexéhe tí xra tsoche la ko nkexéhe tí xra tsochehya. ¹⁴ A ntá tí jnkojín chojni kjuích'éna ijnko nchia tsochehya la mé tsjacha ch'án tí xra kjuích'e ch'án. ¹⁵ A ntá tí chróche tí nchia kjuích'éna ijnko chojni, ntá chrók'uitjáyan kuenté. A ntá tí nkexro kjuích'éna nchia la tsaá éxi yóhe chrókuinkéhe ch'án xrohi.

¹⁶ ¿Á noahyará kixin jahará kaín rá na mé ijnko ninkoe Dios la ko Nchakuen Dios mé chóna asánrá? ¹⁷ A ntá jnkojín nkexro tjinkaon ts'óxika tí ninkoe Dios na mé Dios mé sinchek'itjáyan tí nkexro xikaha sich'e kixin tí ninkoe Dios la tjóá tíha. A ntá tí ninko a mé jahará tíha.

† 2:16 Isaías 40.13

¹⁸ Ninkexró chrókjuenkayáxin kixin imá nohe. Tí jnkojínra tónhen asánra kixin imá nohará éxi nohe chojni chjasintajni ó, na ntá chrókjanra chrók'ónara éxi chojni noehya kixin ntá chrók'uitjára chrók'ónara ijnko chojni chaxín nohe. ¹⁹ Tí nkehe nohe tí chojni chjasintajni la mé ijnko nkehe lontj t'ikon Dios. A ntá ntáchro tí xroon itén Dios tsíkin sín ósé kixin: “Tí nkehe tsík'itjá sín ch'iyáxin sín la tíha mé tsokjan ts'enixín sín.”*

²⁰ La ko kjaxin ntáchro xroon itén Dios kixin: “Ínchéni la ó nohe ch'án kixin kaín nkehe tjenkayáxin tí sín ntáchro sín kixin imá nohe sín la mé ijnko kjuaxrexinkaon lontj tíha, ichro Dios.”† ²¹ Méxra chrókjuinchehnkehýará jahará kixin chréhérá ijnko chojni imá nohe, kixin kaín xín nkehe siín la kuéntará jahará, ²² mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sítónhen jie, la ko tí nkehe tsonhen chr'éxin, la kaín la kuéntará tí jahará. ²³ A ntá jahará la Cristo mé t'ayakonhanrá. Kixin Cristo la jehe ch'án la mé kuénte Dios.

4

Tí xra kjuich'e tí sín kjueya Ínchéni

¹ Jahará chrók'uikonrá tí jeheni éxi chojni ch'ehó Cristo xra k'uáyéheni tí xra tjakoni tí nkehe kuénte Dios ninkexró k'uénoehya. ² A ntá ijnko chojni k'uáyéhe xra ts'etöan chrókjuakoxin kixin jína ch'án la ko jína ch'e ch'án xra. ³ A ntá janhan tóxakonnahya tí nkehe chróntáchorá jahará chrókjuanchiará jie tí janhan kixin tí xra t'aha Dios, la ko kjaxin tóxakonnahya tí nkehe chróntáchro í so chojni chjasintajni, chrókjuanchia sín jie tí janhan. Kjaxin janhan la tékahya jie asenná. ⁴ Kjánchó janhan tjenkayáxinhya kixin chonta jie. Kjánchó jehya xikaha tsontáxrjan kixin Dios t'ikon kixin chontahya jie janhan. Náhí. Jehe Ínchéni mé tsotsjehe ch'án nkehe tí jie chonta janhan. ⁵ Méxra naxa kjuixrakáhya yaon chrókjuinchekitöexínra ichrén jie. Chonhénra tí tsi Ínchéni kixin jehe ch'án mé sinchenoxín ch'án kaín tí nkehe síma tí sítié, la ko sinchenoxín ch'án kaín xín nkehe imó tjenkayáxinín asén chojni. A ntá Dios mé tsjanjon ch'án tí nkehe tsjacha jnkojnko chojni.

⁶ Kichóni, nixjahará tí nkehe i kixin jína chrók'uejorá jahará ntá xikaha kjuintayöaxian éxi ch'ín Apolos la ko éxi janhan kixin chrók'uitjára kixin chrókjuenkayáxinra jehó tí nkehe tsíkin sín ósé, kixin nijnko nkexro chrókjuinchehnkehya kixin chréhe sín ijnko chojni, a ntá tsochóntehya sín kjuasáyé tí í jnko chojni. ⁷ ¿Méxra nkexro ntáchro kixin jahará antsí tjetöanra? ¿Xá nkehe chontará naxa kjuanjonhya Dios kixin? Tí kjuanjon Dios kaín nkehe chontará, ¿ntá nkekuénte nchehnkerá kixin jahóra tsíkjýará tíha?

⁸ Jahará tónhanrá kixin imá rícorá. Na mé chaxín chontará kaín xín nkehe tjenkayáxinra. Ntá jie tónhen asánra éxi ijnko rey, la í t'ichjánxianhyará ninkehó tí jeheni kixin naxa chrókjuinkitsani. Tí chrókóchaxín chrók'ónara ijnko rey chaxín ntá kjaxinni chróchóntani kjuachaxin chrók'uetöanni. ⁹ Ntá tónhen asenná kixin jeheni chojni kjueya Ínchéni mé kjuanjon Dios kixin jeheni chrókjuixixín chrók'uejóni éxi chojni kuítönhenni kixin noxín chrók'uenni ts'ikon kaín xín chojni chjasintajni la ko ts'ikon tí sín ángel kjaxin. ¹⁰ A ntá jeheni tinkáchónkini

* 3:19 Job 5.13 † 3:20 Salmo 94.11

Cristo, a ntá xikaha t'ikon sín tí jeheni éxí chojni lɔntj. A ntá t'ikon sín tí jahará éxí imá nohará. Jeheni la éxí chóntahyani kjuachaxin, a ntá jahará la éxí imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín. ¹¹ A ntá kjónté naxa jie jeheni t'enzinni kjinta, la ko t'enzinni nta, la ko chóntahyani ikéni, la ko nínkakohenni chojni, la ko chóntahyani nkerí ts'ejóni. ¹² La ko tóxrjéni kixin itjani ch'exinni xra. A ntá tió t'ántaxínhinni sín la tjancheheni Dios kixin sincheyaon ch'an tí jehe sín. La ko tió chónkíhi sín tí jeheni la tónínkakuenhyani sín. ¹³ Tió t'ántaxínhinni sín la jnkojína tjateheni tí jehe sín. T'ikon sín tí jeheni éxí chjinínó ntihi chjasintajni, na mé éxí ijnko nkehe ninkehó sínkíhya la ko mé xikaha naxa sitónhen tí yaon jie.

¹⁴ Ikjian tihi na jehya kixin chrókujuíntasuàhará. Náhi. Tjínkavan chrókujuíntaxráinkáonrá kixin éxí xjanna t'íkuən tí jahará, tjuahará. ¹⁵ Kjónté chróchontará ite mil chojni chrókujakohará nkexrí tjen Cristo la chontahyará itsje it'ará. Ntá janhan mé k'óna it'ará tí jahará tió kuítekáonrá Cristo Jesús kixin kjuákohará tí tan jína tsaáxinni. ¹⁶ Mé xikaha xrxjanóahará kixin chrókuakoxínra éxí tí janhan.

¹⁷ Méxra kuétuanhan tí ch'in Timoteo kixin tsjiji ch'an ntiha. Na mé éxí xjanna t'íkuən tí jehe ch'an, tjuaha ch'an, kixin kjuákoha ch'an ntá kuítekaon ch'an Ìnchéni ntá xráxin jína ch'e ch'an xra. Ntá tsjiji ch'an sintaxraxinkáonrá ch'an nkexrí tjákoxiən tí ntje Cristo éxí xráxin tjákua kaín xín nínko t'atsínka tí janhan. ¹⁸ Ntá iso tí jahará imá ihnkerá kixin tjenkayáxinrá kixin chaxínhya chrókjuasántsjahará. ¹⁹ A ntá tjoka chrókjuasántsjahará tí chaxín xikaha tjinkaon Ìnchéni. A ntá jehya jehó tí nkehe nixja tí sín xriko kjuahnke mé chrókuinhan. Náhi. Na mé ts'íkuən á chaxín chóna sín kjuachaxin kixin xikaha nixja sín. ²⁰ A ntá tí kjuachaxién Dios la jehya tí nkehe tsonixjani ó. Náhi. Tí tjákoxinni la tí kjuachaxién Dios. ²¹ ¿Nkehe tjinkáonrá tí jahará, kixin á chrókjuasán chrókujuíntakjasótiará? o ¿á tjinkáonrá kixin jnkojína chrókjuasán?

5

Tsitoexín ijnko jie tjachehe kichó chojni

¹ ¿Á chaxín tsík'ikon sín kixin tí tjejorá ntiha la ijnkorá mé chontará nájoanrá éxí ichjiánrá? Tíha mé ijnko jie jie, la mé kjónté tí sín chónhya Dios la xikahya ch'e sín. ² A ntá kjónté xikaha tsíkónhen la imá ihnkerá. Íchá jína imá chrók'uavará. A ntá tí xikaha ch'e ijnko chojni ntá chrókuétuenhénra ch'an sáchrókjui ch'an, chrók'uejokoahyará ch'an ntiha. ³ A ntá ntáxrjan janhan kjónté tjenhya cuerpo kuéntana tí tjejorá ntiha la tí tjenkayáxiən la ntaha tjèn éxí chrókjuak'é janhan, ntá t'akjénxian ihnje Ìnchéni Jesucristo la ntáxrjan kixin ó kjuixin kjuenkayáxiən kixin nkexrí chrókjuasóte tí ch'in xikaha tsík'ich'e. ⁴ Tió tsojnkotsérá kaín rá ntiha la éxí koyá tsjak'é ntiha la kjánchó nchakuenná ó la ko kóí tí kjuachaxién Ìnchéni Jesús ts'ejókoará ntiha. ⁵ A ntá tí ch'in a la nchek'ayéhérá tí ch'in Tsochren kixin tsjasóte tí cuerpo kuénte ch'an. Ntá tió tsokjan Ìnchéni mé tsaá asén ch'an.

⁶ Jahará chrókuinchehnkehýará kixin tí nkehe tsíkónhen ntiha. ¿Á noahýará nkehe ntáchro sín, kixin tí ch'o a mé tjiko intsíkoá tí xroan nchek'ánkí niotja, ntá kjónté la tsosán kaín tí ch'o? ⁷ Méxra chrókuakítsjerá ntója kaín tí xroan ntaxin nchek'ánkí niotja, kixin ntá jahará ts'ejorá éxí

niotja tsík'óna ch'o nixin tsíkjikohya xroan nchek'ánki niotja. Éxí niotja ine sín tí yaon pascua, mé jahará tíha. Kíxin jehe Cristo, éxí ijnko kolélo t'óyán sín tí yaon pascua, mé k'uenyákonhenni ch'án. ⁸ A ntá chrókjuasinni tí kia a la kaín asénni chrórxaxinkaonni, tíha la éxí tí niotja chóntahya xroan nchek'ánkíxin. La jehya kíxin chrókjuasinni tí kia naxa chróhóntani kjuanínkaon kíxin táha la yóhe tí xroan ntaxin nchek'ánki tí niotja a.

⁹ A ntá í jnko xroon chr'anhánrá k'uéntáxrjan kíxin ninkehó chrók'uítohyará tí sín tjasin jie chóna chojni chjin ókjé. ¹⁰ Ntá jehya kíxin kuétuanhanrá kíxin chrók'uítohyará tí sín chjasintajni tjasin jie chóna chojni chjin ókjé, la ko tí sín tjinkaon jehó sín tsochóna itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhi. Tí xikaha chrókjuich'erá la t'ichjánxin chrók'uaxrjéxinrá tí chjasintajni. ¹¹ Méxra ó kuétuanhanrá kíxin chrók'uítohyará ninkehó jnkojín chojni ntácho sín kíxin kichó ni tí jehe sín, ntá naxa tjasin sín tí jie chóna sín chojni chjin ókjé, la ko tjinkaon sín jehó sín tsochóna sín itsjé nkehe, la ko tí sín naxa tinkáchónki sín nkehe tsíkjanoya, la ko tí sín naxa tinkáchónki kjuach'ia, la ko tí sín tókoan, la ko tí sín teé chichaon, la mé tí chojni xikaha ch'e la chrókjóntekoahyará sín. ¹² Jehya xraa chrókjuintakitoaxián tí ijje tí sín jehya kuènte njnko ntiha. A ntá tí xra kuéntará jahará kíxin chrókjuinchekitoexínrá tí ijje tí sín kichó ni tójnoktsé njnko ntiha. ¹³ A ntá Dios mé sinchekitoexín ch'án ijje tí sín jehya kuènte njnko. Méxra, takítsjekjanxinrá tí ch'ín jínahya kjuasin jie tí tjejorá ntiha.

6

Chrókjuikjanahya sín jie nkayakon tí ch'ín juez tinkáchónkihya Ìnchéni

¹ A ntá jnkojínrá chrókjuánjonkoará kichuára chrókjuikjanahyará jie nkayakon tí ch'ín juez tinkáchónkihya Ìnchéni. Íchá jína chrókjuirá chróchenkará tí sín tinkáchónki Dios. ² ¿Á noahyará kíxin tí sín tinkáchónki Ìnchéni mé sinchekitoexín sín ijje kaín xín chojni chjasintajni? A ntá xikaha sinchekitoexínrá ijje kaín xín chojni chjasintajni, ¿ntá nkekuènte tsjachahyará sinchekitoexínrá kjónté ijnko jie ntsí? ³ ¿Á noahyará jahará kíxin kjónté tí sín ángel tsotsjeheni nkehe tí xra kjuich'e sín? A ntá ijnko nkehe intsi ntihyó, la ¿á xitjahya chrókjuásiyóxinrá? ⁴ A ntá xikaha chrókjuánjonkoará kichuára, ¿ntá nkekuènte tjikjanchará jie nkayakon tí sín tikiníxinhya kuènte njnko? ⁵ Ntaxrjan xikaha kíxin chrókjuintasuáhará. ¿Xá kohya ninkexró kichó ni ntiha chóna kjuaxrexinkaon jína tsjacha sincheyóxinhin ijje kichó ni? ⁶ Jahará jnkokoá kichuára ntá tjanjonrá, la ko kjaxin sátjikjanchará jie nkayakon tí ch'ín juez tinkáchónkihya Ìnchéni.

⁷ Kjónté ijnko jie ntsí ntá imá tjanjonkoáxinrá kichuára; tíha mé t'óna ijnko jie jie. Íchá jína chrókóninkákonhyará kíxin tí nkehe jínahya kjuít'ahará sín. Íchá jína chrókuitohérá sín kjónté tsaáhará sín. ⁸ Kjánchó kjaxin jahará ntoáhya tjejoch'erá kíxin kjónté jnkokoá kichuára la teeherá sín.

⁹ ¿Á noahyará kíxin tí sín jínahya ch'e la ts'áyèhya sín kjuachaxin kuènte Dios? Chrókuitoéhyará chrókjuít'áyahará sín, chrókónohará kíxin tí sín tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjachehe kichó sín, la ko tí chojni t'ó chjin, t'ó ntoa, la ko tí sín jnkokón ntoa sín tórxjinhín kichó sín, ¹⁰ la ko tí xichee, la ko tí sín tjinkaon sín jehó sín tsochóna sín itsjé nkehe, la ko tí sín tókoan, la ko tí

sín ch'éna kjuach'ia, la ko tí sín ixri ch'ia sín kixin tsjacha sín chichaon, na mé ts'áyèhya sín kjuachaxin kuènte Dios. ¹¹ Xikaha k'uéjórá isorá senó. Ntá jie ó k'uíjmárá, kjuínchetjórá Dios, ntá ó xika ijíará kjuachaxin ihníé Ìnchéni Jesucristo la ko kjuachaxin kuènte Nchakuen Dios.

Tí cuerpo ó tsíkótjóa

¹² Siín kjuachaxin kaín nkehe chrókjuít'a, kjánchó iso nkehe la ó chónkó. Siín kjuachaxin kaín nkehe chrókjuít'a, kjánchó chrókuítóahya ninkehó nkehe chrók'uetuanna. ¹³ Chaxín tí nkehe ntáchro sín kixin ó k'óna tí nkehe sineni kixin tseeni ó sátsji, la ko ó tsík'óna tseeni kixin ts'inka nkehe sineni. Kjánchó Dios mé sinchek'itjáyay yóí tíha. A ntá k'ónahya tí cuerpo kuènteni kixin chrókjuasixínni jie. Náhí. Tí cuerpo kuènteni mé k'óna kixin tsochjéxínni Ìnchéni kjuasáya, la ko jehe Ìnchéni mé ts'ayakonhen ch'án tí cuerpo kuènteni. ¹⁴ Méxra Dios mé kjuínchexechón Ìnchéni, mé xikaha sinchexechónxinni ch'án tí kjuachaxin kuènte ch'án.

¹⁵ ¿Á noahyará kixin jnkójnko cuerpo kuèntará mé it'ó tí cuerpo kuènte Cristo? ¿Á chrókjuít'a janhan kixin it'ó tí cuerpo kuènte Cristo chrók'óna it'ó cuerpo kuènte ijnko chojni chjin ch'iyehé nchónhya chojni ntoa? Méxra kjá náhí. ¹⁶ ¿Á noahyará kixin tió ijnko chojni ntoa chrókuakja ijnko chojni chjin chóna nchónhya chojni ntoa, ntá tí jehe sín yóí sín chrók'óna sín jnkokoá cuerpo? Kixin ntáchro xroon itén Dios kixin: “Yóí sín la ts'óna sín jnkokoá chojni.”* ¹⁷ A ntá tí jnkójín chojni tinkáchónki Ìnchéni, ntá jehe la ko Ìnchéni mé ts'óna jnkokoá.

¹⁸ Méxra chrókjuítóhérá chróchontahyará chojni chjin ókjé. Tí í so jie tjasin chojni na mé jehya tí cuerpo kuènte sín nchekjasóte sín. A ntá tí sín tjasinko jie chojni chjin ókjé la mé nchekjasóte sín tí cuerpo kuènte sín. ¹⁹ ¿Á noahyará kixin jnkójnko cuerpo kuèntará mé éxi ijnko njnko itjen Nchakuen Dios kjuanjon ch'án k'uayéhérá, la ko chontará tí Nchakuen ch'án tjóá? Jahará la jehya ìnché tí cuerpo kuèntará ²⁰ kixin jahará la tjete k'ueñaxínrá Dios. Méxra chjeéxinrá kjuasáyé Dios tí cuerpo kuèntará la ko tí nchakónrá kixin yóí la kuènte Dios.

7

Chenka ch'án tí sín tsíkótehe kixin nkexrí chrók'uejó sín

¹ A ntá jie tsjatahá tí nkehe tsíkjinrá kjuanchankínará, na mé ntáxrjan kixin chaxín chrókójína kixin tí chojni ntoa chrókuakjahya ichjién. ² Kjánchó tí xikaha imá tjinkaon sín tsochóna sín itsjé chojni chjin tjasinko sín jie, la íchá jína jnkójnko chojni ntoa chróchóna jnkójnko ichjién kuènte la ko jnkójnko chojni chjin chróchóna jnkójnko xii kuènte. ³ Tí chojni ntoa la ko tí chojni chjin chrókjuínchexiteyéhe sín kíchó sín. ⁴ Tí chojni chjin jehya ìnché tí cuerpo kuènte tjan, na mé kuènte xii tjan. Ntá kjaxín xikaha tí chojni ntoa la jehya ìnché tí cuerpo kuènte ch'án, na mé kuènte ichjién ch'án. ⁵ Chrókjuíncheniéhyará kichuárá, jehí jnkokoá chrókjuenkayáxinrá yóírá kixin tsochonteherá iso yaon kixin ntá kaín asánrá chrónixjehérá Dios. Ntá tsjixin ntá chrókóchjineherá kichuárá inaá kixin chrókuítóéhyará kixin ch'ín Tsochren chrókjuacha chrókjuachroerá ch'án chrókjuásinrá jie.

⁶ Kaín tíhi tjonkará kixin tsonohará kixin siín kjuachaxin xikaha na kjánchó jehya kixin xikaha tétuñhanrá. ⁷ A ntá janhan ntáxrjan kixin

* 6:16 Génesis 2.24

chrókójína kixin kaín rá chojni ntoará chrókóyóhara éxi tí janhan. Kjánchó Dios chjéhe kjuachaxin jnkojnko chojni, la iso la ijnko nkehe tjenkayáxin, la í so la íjnko nkehe tjenkayáxin.

⁸ A ntá tí sín naᵗa tóteehya la ko tí chojni tsíkók'án na ntátjan sín kixin chrókójína kixin xikahó chrók'uejó sín chrókóteehya sín éxi tí janhan xikaha. ⁹ Kjánchó tí chrókjuachahya sín tí tjak'e asén kichó sín, naᵗa chrókjuasin sín jie, ntá íchá jína chrókótehe sín kixin jehya jína kixin jnkochrínín chrókjuak'ó asén sín.

¹⁰ A ntá jahará ó tsíkjixin tsíkótahará, la tétuanhanrá tíhi: a ntá jehya kixin kjuachaxin kuéntana tétuanxínrá. Náhí. Kjuachaxin kuènte Ìnchéni mé tétuanxínrá kixin tí chojni chjin chrókjuákehya xii. ¹¹ A ntá tí chrókjuákehya ijnko chojni chjin tí xii, ntá xikahó chrókuitóhe tjan jehó tjan la ko chrókójína chrókóyóxin, chrókjuinhin tí kjuanínkaon kixin tí kjuákehya kichó sín. Kjaxin xikaha tí chojni ntoa la chrókjuákehya tí ichjién.

¹² A ntá tí nkehe tétuanhan tí í so sín jaí la kuéntana janhvàn, jehya kuènte Ìnchéni, kixin tí tjen ijnko ch'ín kichó ni chóna ch'án ichjién ch'án tinkáchónkihya Ìnchéni, na kjónté naᵗa tjinkaon tjan chrókjuak'eko tjan tí jehe ch'án la chrókjuákehya ch'án tí jehe tjan. ¹³ La ko tí tjen ijnko tjan kichó ni chóna xii tjan tinkáchónkihya Ìnchéni, ntá kjónté naᵗa tjinkaon ch'án chrókjuak'eko ch'án tí jehe tjan, ntá chrókjuákehya tjan tí jehe ch'án.

¹⁴ Kixin tí xii tjan tinkáchónkihya Ìnchéni ntá jie ó kótjóá ch'án kixin tí ichjién mé tinkáchónki Dios, la ko tí ijnko tjan tinkáchónkihya Ìnchéni ntá jie ó kótjóá tjan kixin tí xii tjan mé tinkáchónki Dios. A ntá tí xikahya, la tí xjeen sín chrókótjuáhya, na ntá jie la mé ó kótjóá tí xjeen sín. ¹⁵ A ntá tí ch'ín ntoa o tí tjachjin tinkáchónkihya Ìnchéni tjinkaon chrókjuákehya kichó sín, la ája nohe sín tjákehya kichó sín, kixin Dios tjinkaon kixin kjuaxróxin chrók'uejorá. ¹⁶ Jahará chojni chjinrá, ¿nkexrí chrókónohará kixin nkexrí chrókuaá xiará? La ko jahará chojni ntoará, ¿nkexrí chrókónohará kixin nkexrí chrókuaá ichjiánrá?

¹⁷ A ntá jnkojnko chojni chrók'uejó sín éxi tsíkjanjon Ìnchéni kjuachaxin tsík'áyehya sín, la ko éxi tí k'uejó sín tió k'uíyehya sín Dios, kjánchó chrókuitóehya sín tí jehe ch'án. Mé xikaha tétuanhan kaín tí njnko. ¹⁸ Tí chrók'uíyehya Dios ijnko ch'ín chóna xroye, ntá xikahó chrókuitóhe ch'án. A ntá tí chrók'uíyehya Dios ijnko ch'ín chónahya tí xroye a, ntá kjónté chrókuaahya ch'án tí xroye a. ¹⁹ Na mé tjetuanhya á chóna chojni tí xroye o á chónahya chojni tí xroye. Na mé tí nkehe tjetuan kixin chrókjuinchexiteyeheni tí nkehe k'uejtoan Dios. ²⁰ Chrók'uejóni jnkojnkoní éxi k'uejóni tí k'uíyeheni Dios. ²¹ A ntá tió Dios k'uíyaha jaha, kjónté jaha ijnko chojni ch'exón xra, ntá chrókóxakuanhya kjónté xikahó tjech'e xra. Kjánchó tí chrók'uitjá tí tsaáxian la chrókuaákjá tíha. ²² Kixin tí nkexro kjuích'exón xra tió k'uíyehya Ìnchéni kixin tsinkáchónki ch'án, la mé jie chóna ch'án tí kjuachaxin tjanjon Ìnchéni. Kjaxin tí nkexro k'uítuenhya tió k'uíyehya Ìnchéni la mé jie mé ch'ehe ch'án xra Cristo. ²³ Dios imá tjete k'uenaxín ch'án tí jahará. Méxra chrókjuánjonhyará kjuachaxin kixin ókjé chojni chrók'óna inchará. ²⁴ Méxra kichó ni, éxi k'uejorá tió k'uíyahará Dios kixin tsinkáchónkirá ch'án, la xikahó naᵗa chrók'uejorá jie kixin chontará Ìnchéni tsjinkítsa.

25 **A** ntá tí chojni naxa tóteehya sin na mé janhan chontahya nkehe kuente Ìnchéni chrókuétuanhan sín. Kjánchó tsoxrjanka tí nkehe tjenkayáxian janhvàn, a ntá chrókuítekaonrá tí janhan kixin kuikonóana Ìnchéni. 26 Mé xikaha tónna kixin chrókójina kixin jnkojnko chojni chrókótehe sín éxi tjejó sín chrókóteehya sín, kixin ijie la kjuaxróxinhya tjejóni. 27 **A** ntá tí chontará ichjiánrá ntá chrókjuakeéhyará tjan. **A** ntá tí chontahyará ichjiánrá ntá íchá jina chrókjuéyáhyará. 28 Kjánchó tí chrókótahará la jehya jie tíha, la ko tí chrókótehe ijnko tjan tjarisoá la kjaxin jehya jie. **A** ntá tí sín tsíkótehe la tsochóna sín kjuaxikaon, mé xikaha janhan chrókjuínkítsa sín kixin chróchóntahya sín kjuaxikaon.

29 Mé xikaha tjetjonkará kichó ni kixin tsjéhya yaon naxa t'itjayan tsokjan Ìnchéni. Mé xikaha tí chojni ntoa chóna ichjién sín, la antsí tjetooan saxín chrórxaxinkaon sín Ìnchéni, la ntá chr'éxin chrórtjuéhe sín ichjién sín. 30 **A** ntá tí sín tsjánka la chrók'uejó sín éxi chrótsjánkahya sín. La ko tí sín chéhe la chrók'uejó sín éxi chéhya sín. La ko tí sín t'ena nkehe la chrók'uejó sín éxi chóntahya sín tí nkehe tsík'ena sín. 31 La ko tí sín kjuacha nkehe siín chjasintajni la chrók'uejó sín éxi ninkehó chróchóntahya sín, kixin kaín nkehe t'ikonni chjasintajni ntihi mé tjoka tsjeje.

32 Tjínkakhonhya kixin jahará chrókóxakonhanrá. Tí ch'ín ntoa chóntahya ichjin antsí má tóxakonhen tí xra kuente Ìnchéni chrókjuinchexiteyéhe ch'án tí nkehe tóxrjínhin Ìnchéni. 33 **A** ntá tí ch'ín tsíkótehe antsí tóxakonhen tí nkehe siín chjasintajni kixin xikaha mé sinchechéhe ch'án ichjién ch'án. 34 Óké tjenkayáxin tí tjan tsíkótehe la ko tí tjan tsíkóteehya kixin tí tjan tsíkóteehya la antsí má tóxakonhen tjan tí xra kuente Ìnchéni kixin tjinkaon tjan kixin Dios sinchetjóá tí cuerpo kuente tjan la ko tí asén tjan. **A** ntá tí tjan tsíkótehe mé tóxakonhen tjan tí nkehe siín chjasintajni kixin xikaha sinchechéhe tjan xii tjan.

35 Tjetjonkará tíhi kixin tjínkavan kixin jina chrók'uejorá, jehya kixin xikaha chrókuétuanhanrá. Náhí. Tjínkavan kixin kjuasáya chrók'uejorá jnkojína la jehó Ìnchéni chrókjuich'eherá xra.

36 **A** ntá jnkojínrá tjenkayáxinrá kixin chrókójina chrókótehe ijnko xjaanrá chjin kixin ó tsícha tjan, la ntá tí xikaha la ó nchoxon tsotehe tjan na mé jehya jie. 37 **A** ntá jnkojínrá tjínkáonrá kaín asánrá kixin chrókóteehya xjaanrá chjin la kjaxin tjan xikaha tjenkayáxin tjan la antsí jina tíha. 38 Mé xikaha tí titoherá xjaanrá chjin kixin tsotehe tjan la ó nchoxon. La ko kjaxin tí tjínkakhonhya tjan kixin chrókótehe tjan na mé antsí jina tíha.

39 Tí tjan tsíkótehe mé k'uituénxín tjan kjuachaxin tí ley kixin tsjak'eko tjan tí xii tí naxa tjechón ch'án. **A** ntá tí chrók'uen ch'án ntá tsochóna tjan kjuachaxin tsotehe tjan inaá tí nkexro tsoxrjínhin tjan, kjánchó jehó ijnko nkexro tinkáchónki Ìnchéni mé chrókótehe tjan. 40 Kjánchó antsí chrókóchéhe tjan tí jehó tjan chrókótehe tjan, tí í chrókóteehya tjan. Méxra xikaha tjenkayáxian janhan la ko kjaxin tónna janhan kixin chonta janhan tí kjuachaxin kuente Nchakuen Dios.

8

Tí nkehe ine sín tjokehé sín tí nkehe tsíkjanoya

¹ A ntá jie tsoxrjanka kuènte ti ko its'en tjokehe sín tí nkehe tsíkjanoya. Na mé chaxín kaín ni noheni tíha. Ntá chrókóxakonhenni kixin tí chrók'uitjani má ntá chrókóhnkeni má. Antsí tjetooan chrótjuèheni kichó ni kixin xikaha antsí chrókuinkáchónkini Ìnchéni. ² Tí jnkójín nkexro ntáchro kixin nohe ch'án, na mé chaxínhya tíha la naxa t'itjáyán tí nkehe chrókónohe ch'án. ³ A ntá jnkójín nkexro tsotjuèhe Dios la Dios tsochóxin tí jehe ch'án.

⁴ A ntá tí chrókjóneni nto tsíkjokehe sín tí nkehe tsíkjanoya, la ó noheni jina kixin tí nkehe tsíkjanoya la t'etuánhya ninkehó ntihi chjasintajni, la ko ó noheni kixin jnkokoá Dios tjen. ⁵ A ntá síin nkehe nchek'in sín díos nkaya nkajni la ko chjasintajni na, kjánchó tí xikaha la kjá chrók'uixin itsjé díos la ko itsjé ìché sín. ⁶ A ntá jeheni chóntani jnkokoá Dios na mé It'éni tíha, la jehe ch'án mé kjuích'éna ch'án kaín xín nkehe la ko tjejóni kixin chrókuinchexiteyéheni ch'án. La ko kjaxin itjen jnkokoá Ìnchéni Jesucristo, na mé kaín xín nkehe síin la kjuích'éna ch'án la ko kjaxin tí jeheni tsíkjach'éna ch'án.

⁷ Kjánchó kénhya chojni nohe sín tíhi. Na mé iso sín ó kuènnen sín kuinkáchónki sín tí nkehe tsíkjanoya, a ntá jie tió ine sín tí nkehe tsíkjokehe chojni tí nkehe tsíkjanoya na mé tjenkayáxin sín kixin ó tsík'áyéhe ijnko díos, kixin naxa noehya sín má, ntá ntáchro sín kixin ó kuámá sín tí jie kuènte tí nkehe tsíkjanoya. ⁸ Ó noheni chaxín kixin tí nkehe jina chrókjóneni. Náhí. Jehya kixin chrók'uejóxinni jina kixin tí nkehe chrókjóneni na ko tí nkehe chrókjónehyani. ⁹ Méxra tjtóéhyará kixin tí kjuachaxin chontará sinterá kaín xín nkehe mé xikaha chrókuachroe ijnko chojni kichó ni naxa noehya jina tinkáchónki Ìnchéni ntá tíha chrókuasixín sín jie. ¹⁰ A ntá tí chrók'uikon sín kixin jahará ó nohará jina ntá ts'ejorá sinterá nkehe nkaxenhen ijnko njnko nkehe tsíkjanoya, ntá tí chojni kichó ni naxa noehya jina ntá chrók'uikon sín xikaha ntá kjaxin jehe sín tsotjinkaon sín sine sín tí nkehe tsíkjokehe chojni ijnko díos chaxínhya. ¹¹ A ntá jahará ó nohará jina ntá xikaha tjejoch'erá itsará sijnchek'itjáyánrá tí kichó ni naxa noehya jina tinkáchónki Ìnchéni kixin Cristo k'uenyákonhen tí jehe ch'án kjaxin. ¹² Méxra tí xikaha chrókuich'erá la chrókuásinhínrá jie tí sín kichó ni naxa tinkáchónkihya sín Ìnchéni jina, na mé xikaha kjaxin chrókuásinrá jie chrókuitekákuenhyará Cristo. ¹³ Méxra tí xikaha chrókuasixín jie ijnko kichó ni kixin tí nkehe chrókjóneni, ntá íchá jina chrókjónehyani nto inaá kixin xikahya ntá chrókuichroexín tí sín kichó ni ntá chrókuasixín sín jie.

9

Tí kjuachaxin chóna ijnko apóstol

¹ Chaxín janhan la kohya nkexro t'etuanna kixin janhan la chonta kjuachaxin kixin ijnko apóstol tsíkjeýá Ìnchéni kixin janhan k'uíquán ch'án. Jahará mé tjáko_xínrá tí xra kjuít'a kuènte Ìnchéni. ² Iso sín ntáchro sín kixin jtásoanhyana sín kixin ijnko apóstol tsíkjeýá Ìnchéni. Ntá jahará kaín rá mé chrókuátsóanrá tí janhan kixin tí kuítekáonrá kuinkáchónkirá Ìnchéni mé xikaha tjáko_xínrá kixin chaxín janhan tsíkjeýána ch'án.

³ Méxra chonta jina chrókuátaha tí sín xritjontana, chróntáxrjan kixin:
⁴ Janhan chonta kaín kjuachaxin chrók'uayáha nkehe chrókjónè la ko

chrók'uia. ⁵ Kjaxin chonta kjuachaxin chróchonta ijnko chojni chjin tinkáchónki Ìnchéni chrók'uajikian éxí chóna tí í so sín tsíkjejá Ìnchéni, la ko tí sín kíchó Ìnchéni, la ko éxí chóna ch'ín Pedro. ⁶ ¿Á tjenkayáxinrá kixin ch'ín Bernabé la ko janhan jehóni chóntahyani kjuachaxin tsítóheni tí xrá sich'exínni tjani? ⁷ ¿Nkexro ch'e xrá soldado ntá ch'ichákoen ch'án ó chrókuicháxinhin? Nkexro k'uénka nta to uva ntá kjónehya ch'án to? ¿La ko nkexro t'ayakonhen kolélo ntá k'uíhya tí tsjen t'énhen sín va? ⁸ Ntáchrohyará kixin janhvàn kjuenkayáxian tíha kixin kjaxin xroon tsíkjin ch'ín Moisés xikaha nixja. ⁹ Méxra kjaxin ntáchro tí xroon tsíkjin ch'ín Moisés óse kixin: “Chrókuéjójáhyará kamposa ir'va koxinta tí tsinkátja va noatrigio tió tsónkéhe sín noa.”* Tíha mé t'axrjéxin kixin jehya koxinta ó tóxakonhen Dios. ¹⁰ Náhi. Tóxakonhen ch'án kixin tí jeheni. Méxra xikaha nixja tí xroon kixin chrók'uejóxinni jína. A ntá tí nkexro kjuínchentá nche la ko tí nkexro tsónkéhe noa, yóí sín la chróchónhen sín chrók'uáyéhe sín tí nkehe k'óna. ¹¹ A ntá tí k'uénkani tí itén Dios asánra, la kjá chróchóntani kjuachaxin chrókuanchaharáni ichrén nkehe t'ichjánxinhinni. ¹² A ntá tí xikaha í so sín chóna sín tí kjuachaxin tjanchia sín nkehe ts'áyéhe sín, ntá jeheni antsí má chóntani kjuachaxin chrók'uáyéheni nkehe.

Kjonté chóntani kjuachaxin xikaha la kjuanchahyani nkehe, kjonté kánhyó náxrjón k'uéjóni kixin tjinkakonhyani chrókuanchiani nkehe chrók'uichjánxinhinni kixin ách'e xikaha ntá chrók'uinkákonhen tí itén Cristo chrókuakoni. ¹³ Jahará ó nohará kixin tí sín ch'e xrá küente ninko mé ntaha xránjon nkehe ine sín. La ko tí sín t'óyáxin sín ko tí altar tsochéhe sín Dios kjaxin ine sín tí ntóe tí ko t'óyáxin sín tíha. ¹⁴ Méxra xikaha kjaxin k'uetóan Ìnchéni kixin tí sín ch'e tí xrá ó chrónka sín tí tan tsaáxinni na mé tí xrá a chrók'uaxrjenixin tí nkehe chrókjóné sín. ¹⁵ Kjonté janhan sín kjuachaxin xikaha chrókujuít'a, la xikahya kjuít'a la ko kjaxin xikahya ikjian tí xroon í kixin jahará chróchjínará ichrén nkehe. Náhi. Kjonté chrók'uénxian kjinta chrókuáncháhyará nkehe kixin tjínkakhya kixin ninkexró chrókuakitsjena tí kjuachéhe chonta.

¹⁶ Jehya kixin chrokujuintahnke chrókuákua tí tan tsaáxinni. Náhi. Janhan na ó jehí sít'a tí xrá a. Nòa tí janhan tí chrókuákohya tí tan jína chrókuaáxin chojni. ¹⁷ A ntá tí janhvàn tjínkavan chrókuákua la xikahó chrókuacha janhan. A ntá tí tjákua itén Dios kixin xikaha kuítuanna ntá xikahó ntaxiteyá tí xrá chjína Dios. ¹⁸ ¿A ntá nkehe chrókuacha janhan? Tíha mé chrókuacha janhan kixin chróköchána má kixin chrókuákua tí itan tsaáxinni la ninkehó chrókuáncháhya chrókuacha la ntá tí xikaha la chrókuákjaáhya tí kjuachaxin tí chrókuákua.

¹⁹ Méxra kohya nkexro t'etuanna. Kjánchó ó jehí chrókujuít'aha kaín xín chojni xrá kixin xikaha antsí tsjé chojni chrókuacha janhan kixin chrókuitekaon sín Cristo. ²⁰ Ti tjèn tí síin tí sín judío ntayóhá éxí jehe sín xikaha janhan kixin xikaha chrókuacha jnkojín sín chrókuitekaon sín. Na mé t'axrjéxin kixin tí chrókuacha iso ti sín nchexiteyéhe tí ley k'uetóan ch'ín Moisés, la t'ichjánxín kixin kjaxin janhan chrókujuintaxiteyá tí ley kjonté janhan la xikahya t'etuanna tí ley. ²¹ A ntá tí chrókuacha jnkojín tí sín nchexiteyéhya tí nkehe k'uetóan ch'ín Moisés la ntayóhá éxí tí jehe sín xikaha janhan kjaxin, kjonté chaxín t'etuanna tí nkehe k'uetóan Dios méxra ntaxiteyá tí nkehe k'uetóan Cristo. ²² Tió tjèn tí síin tí sín tienxínhya

* 9:9 Deuteronomio 25.4

jína, ntá kjaxin janhan t'óna éxí tí jehe sín kixin xikaha chrókjuacha jnkojin tí jehe sín chrókuitekaon sín. Méxra ntayóha éxí kaín xín chojni xikaha janhan kixin xikaha chrókjuacha janhan kixin chrókuaá iso tí jehe sín. ²³ Mé xikaha kaín tíha tjét'a kixin chrókuinhin sín tí tan chrókuaáxin sín la ko kjaxinna qntsí má chrókjuintayaonna Dios.

²⁴ Jahará ó nohará kixin tió itsjé sín tsinkáko kichó sín la kjánchó ójnkó nkexro tsjacha tí tsitonhen nkehe. A ntá jahará xikaha chrókuinkará kixin chrók'uayéhérá tí nkehe chrókujtonhanrá. ²⁵ Tí sín tinkáko kichó sín na mé jína t'ayakonhen sín asén sín, títohe sín kaín xín nkehe chrókjuich'ehe sín dañó kixin tjinkaon sín chrókjuacha sín, chrók'uáyéhe sín kjónté ijnko corona tsík'óna kayoa ó tjoka tsqxámá. Kjánchó jeheni ch'eni xra kuènte Ìnchéni kixin ntá ts'áyéheni ijnko nkehe chónhya tsqxámá. ²⁶ A ntá janhan jehya éxí ijnko chojni t'ikonhya chrókuinka. Jehya éxí xrintó ó chrókjuánjonkian. ²⁷ Náhí. Janhan tjánjonkian tí cuerpo kuèntana, tétuanhan kixin jína chrókjuinchexiteyàna kixin tóxakonna kixin chrókjuásian ichrén jie ntá janhan chrókjuachahya kjónté senó kjuákoha itsjé chojni.

10

Tí nkehe t'etqan ch'án kuènte tí nkehe tsíkjanoya

¹ Tjínkavan janhan kixin chrókónohará kichó ni kixin tí sín k'uaxrjenixinni ósé, kaín sín k'uixinkánkí sín chrínkí tí tjuj, la ko kaín sín k'uátòye sín Ntayaon Kjátse, ² la ko kaín sín k'uéchréhe sín ch'ín Moisés éxí yóhe chrókuikite sín kixin jnkokoá k'uéjé sín tí tjen tí tjuj la ko tí ntayaon la ko kjuinchexiteyéhe sín ch'án kixin jehe ch'án k'uék'etqan ch'án. ³ La ko kaín sín kjóne sín jnkokón nkehe kujxin nkaya nkajní ⁴ la ko kaín sín ik'ui sín jnkokón nkehe kjuanjon Dios kixin ik'ui sín ntá k'uaxrjexín ijnko tjo kjuincheyaon Dios, na mé tí tjo a la mé t'axrjexín kixin Cristo tíha. ⁵ Kjánchó itsjé tí jehe sín kjuinchechèhya sín Dios, méxra kónínkaon ch'án la tí nteje ó k'uénxin tí sín a.

⁶ Kaínxín tíha kónhen kixin chrórxaxinkakonxínni jeheni, chróntáchrohya asénni chrókjuich'eni tí nkehe jínahya éxí kjuich'e tí jehe sín. ⁷ Méxra chrókuinkachónkihyará jahará nkehe tsíkjanoya éxí k'uékinkáchónki iso tí jehe sín, éxí ntáchro tí xroon itén Dios tsíkjin sín ósé kixin: “Kaín sín k'uéjótjaxin sín kjóne sín la ko ik'ui sín, ntá kjuixin la k'uínkatjen sín la ité sín”.* ⁸ Méxra chrókjuasinkohyani jie chojni chjin ókjé éxí kjuich'e iso jehe sín ntá ik'uén sín, ventitres mil sín, jnkokoá yaon.† ⁹ Kjaxin chrókjuinchekóninkakonhyani Ìnchéni éxí kjuich'e sín ntá ik'uén sín kixin kjónehe sín konche,‡ ¹⁰ la ko chrók'uántaxíenhyani Dios éxí k'uántaxínhin tí jehe sín ntá tí ángel kuènte kjuach'én mé kui k'óyan sín.§

¹¹ Kaín tíha kónhen tí sín k'uaxrjenixinni ósé kixin chrókónoexínni la ko k'óna xroon chrónka xikaha kixin nchexraxinkaonni tí jeheni tjejóni jie kixin í séhya tsjixixín tsjeje chjasintajni. ¹² A ntá tí nkexro ntáchro kixin ntoá tjen na chrókóxakonhen kixin chrókjuichroehya. ¹³ Jahará naxa k'uatsínkahyará ninkehó nkehe tí chrókjuachahya chojni chrókónhen. Méxra jahará chrórxáxinkáonrá Dios kixin jehe ch'án chrókuítqehya ch'án tí jahará kixin chrók'uatsínkará nkehe imá xra chrókjuachahyará. Méxra tí

* 10:7 Éxodo 32.6 † 10:8 Números 25.6–9 ‡ 10:9 Números 21.5–6 § 10:10 Números 16.41–49

itsi ichrén nkehe tsonhanrá la Dios tsjinkĩtsará ch'án kixin chrókjuachará chrók'uatšínkará tí nkehe chrókónhanrá.

¹⁴ Méxra tjuahará jahará kichó ni, la ntá ntáxrjan kixin chrókjuítóhérá tí nkehe tsíkjanoya. ¹⁵ Nixjahará jahará kixin jahará chojni ó tienxín. Méxra jahórá chrokJuenkayáxinrá kixin á jína tí nkehe ntáxrjan. ¹⁶ Tí tjanchiani kjuasáya kixin tí nkehe it'ini na mé kaín ni jnkokoá tjákoxinni tí ijníé Cristo ó k'uíti. La ko tió tóchrít'oni tí niotja ineni, na mé kaín ni jnkokoá tjákoxinni tí cuerpo kuènte Cristo. ¹⁷ Kjonté nchónhyani jeheni la kaín ni na jnkokoá niotja ineni kixin kaín ni jnkokoá k'ónani cuerpo kuènte Cristo.

¹⁸ Chrókónohará nkexrí ch'e tí sín chjasin Israel, na mé ine sín tí ko tsíkjokehé sín Dios ntá xíkaha tjákoxin sín kixin xíkaha tinkáchónki sín. ¹⁹ Ntáxrjanhya kixin tí nkehe tsíkjanoya la chóna kjuachaxin, la ko ntáxrjanhya kixin tí nto tsíkjokehé sín tí nkehe tsíkjanoya la antsí chóna kjuachaxin. ²⁰ Náhi. Ntáxrjan kixin tí nkehe tjanjon tí sín chónhya Dios na mé tjókehé sín tí nchakuen tí jínahya la jehya Dios tjókehé sín tíha. Méxra janhan tjínakonhya kixin xíkaha chrókjuich'erá jahará chróxráxinkáonrá tí nchakuen tí jínahya. ²¹ Tí its'ini tí nkehe xraxinkakonxíni ijníé Ìnchéni ntá kjáxin tí chrók'uini tí nkehe xraxinkakonxín sín tí nchakuen tí jínahya la jehya jína tí xíkaha chrókjuich'eni chrók'uini. Tí sineni tí nkehe xraxinkakonxíni tí cuerpo kuènte Ìnchéni ntá kjáxin tí chrókjóneni tí nkehe xraxinkakonxín sín tí nchakuen tí jínahya la jehya jína tí xíkaha chrókjuich'eni chrókjóneni tí nkehe. ²² ¿A jína chrókjuincheóninkaonni Ìnchéni ní? ¿Á jeheni antsí chóntani kjuachaxin la ntá jehe ch'án la náhi ní?

Chóntani kaín kjuachaxin kaín xín nkehe na kjonté antsí tjetoan tsotjuèheni kichó ni

²³ Siín kjuachaxin ichrén nkehe chrókjuich'eni. Kjánchó jehya kixin kaín nkehe la jína. Siín kjuachaxin ichrén nkehe chrókjuich'eni na kjánchó kénhya nkehe chrókjuinkĩtsa chrókónoheni tí nkehe kuènte Dios. ²⁴ Chrókjuéyáhyará tí nkehe chrók'uejóxínrá jína jahórá. Náhi. Kjáxin chrókjuéyárá tí nkehe chrók'uejóxin jína í so chojni.

²⁵ Chrókjónterá kaín nto sítóxin la chrókjuanchankíhyará ninkehó kixin tí xíkaha ntá ntoáhya chrókjuenkayáxinrá, ²⁶ kixin kuenté chjasintajni la kaín xín nkehe siín la kuènte Ìnchéni.

²⁷ A ntá jnkojín chojni tinkáchónkihya Ìnchéni chrók'uíyahará sín kixin chrókjóntekoará sín la ko tjínkáonrá sáchrókjuirá ntaha la ntá ó nchoxon chrókjónterá tí nkehe tjáhará sín la chrókóxakuanhyará chrókjuanchankíhyará ninkehó. ²⁸ Kjánchó tí chróntáchro jnkojín sín kixin tí nto la ó tsíkjokehé sín ijnko nkehe tsíkjanoya, ichro sín, ntá tí xíkaha la chrókjóntehyará jahará, chrókóxakonhanrá kixin ntoáhya chrókjuenkayáxin tí nkexro chrónka xíkaha. ²⁹ Méxra ntáxrjan tíhi kixin tjínakonhya kixin ntoáhya chrókjuenkayáxin chojni ókjé, jehya kixin ntoáhya chrókjuenkayáxinrá jahará.

Kjánchó isorá tsjanchankínará kixin nkekuènte chrókóxakonhanrá nkehe chrókjuenkayáxin ókjé chojni kixin tí kjuachaxin chontará. ³⁰ Tí tjáncháha Dios kjuasáya kixin tí nkehe iné, ¿ntá nkekuènte kixin chrókjontana chojni kixin kuènte kjoné? ³¹ Tí chrókjónterá nkehe la ko chrók'uirá nkehe la ko ichrén xra chrókjuich'erá la chrókjuákoxinrá kixin Dios kjuínkĩtsará. ³² Ch'ehyará ninkehó nkehe chrókjuichroexin í

so chojni kjónté judío sín la kjónté jehya judío sín la o tí chojni nínkoé Dios. ³³ Janhan mé tjéyá kixin kaín xín xra tjét'a chrókóxrjínhín kaín xín chojni, na mé jehya kixin tjéyá kixin janhvàn chrókjuak'é jína. Náhí. Kjaxín tjínkavan kixin chrókuaáxin í so chojni.

11

¹ Chrókjuákoxinrá jahará éxi kjuákoxiàn janhan kixin janhan mé kjuákoxiàn éxi kjuákoxin Cristo.

Jína chrók'uejó tí chojni chjin tió tójnkotsé chojni

² Kíchóni, chàna kixin xráxín xráxinkáonrá tí janhan la ko nchexiteyéhérá tí nkehe kjuákohará. ³ A ntá tjínkavan kixin chrókiénxinrá kixin Cristo t'etuenhen jnkójnko chojni ntoa, la ko kjaxín xíkaha jnkójnko chojni ntoa mé t'etuenhen tí ichjién, la ko kjaxín xíkaha Dios mé t'etuenhen Cristo. ⁴ A ntá tí jnkójín chojni ntoa xrasixín kachjinke ch'án tí tjenixjehe ch'án Dios, o xrasixín ch'án kachjinke ch'án tí tjechronka ch'án iten Dios, mé xíkaha tjákoxin ch'án kixin chóntehya ch'án kjuasáyé tí Ìnchéni t'etuenhen ch'án. ⁵ A ntá ijnko chojni chjin tjóchín kja tjan tí tjenixjehe tjan Dios la o tjóchín kja tjan tí tjechronka tjan iten Dios, mé xíkaha tjákoxin tjan kixin chóntehya tjan kjuasáyé tí xì tjan. Mé tóyóhe éxi tsíkjin tjan xíkaha. ⁶ A ntá tí chojni chjin tjínkakonhya kixin chrók'uiáxin kja tjan nkehe mé chrókjin tjan. Kjánchó tí chrókósuèhe tjan chrókjin tjan, ntá chrók'uiáxin kja tjan tóte tió tójnkotsérá. ⁷ Kixin tí chojni ntoa chrókjuasinhya ch'án kachjinke ch'án kixin jehe ch'án mé éxi retratoé Dios la ko t'inkaséyanxín ch'án tí kjuachaxín kuènte Dios. A ntá tí chojni chjin mé t'inkaséyanxín tjan tí kjuachaxín kuènte tí xì tjan. ⁸ Kixin tí chojni ntoa saoxín k'óna mé k'uaxrjeníxinhya ch'án chojni chjin. Náhí. Tí chojni chjin mé k'uaxrjeníxín tí chojni ntoa. ⁹ Chaxín k'ónahya tí chojni ntoa kixin jehó tsjak'e ch'án. Náhí. Tí chojni chjin mé k'óna kixin tsjak'ekotoxin ch'án. ¹⁰ Ntá t'ichjánxin kixin tí chojni chjin ts'íáxin kja sín tóte chrókjuákoxin sín kixin t'ítuenhen sín kixin xíkaha ts'ìkon tí sín ángel. ¹¹ Kjánchó kaín ni tinkáchónkini Cristo t'ichjánxin kixin tí chojni ntoa chrókjuinkitsa tí chojni chjin la ko tí chojni chjin chrókjuinkitsa tí chojni ntoa. ¹² Kixin chaxín tí chojni chjin na tí chojni ntoa k'uaxrjeníxín. A ntá jie tí chojni chjin na mé t'axrjeníxín tí chojni ntoa. A ntá kaín ni k'uaxrjeníxinni Dios.

¹³ Jahará nkechorá, ¿á ó nchoxon kixin ijnko chojni chjin tjóchín kja tjan chrónixjehe tjan Dios? ¹⁴ Jahórá chrókónohará kixin chrókósuèhe tí chojni ntoa chóna kaxíhi kjinjin. ¹⁵ A ntá tí chojni chjin chóna kaxíhi kjinjin la mé ntoá tíha kixin ó kuítuenxin tjan kixin tsochóna tjan kaxíhi tjan kjinjin kixin tsojtóchínhya kja tjan. ¹⁶ A ntá tí tjen jnkójín nkexro titekakonhya tíha xíkaha ntá chrókónohará kixin jeheni la ko kaín xín tí sín nínkoé Dios la xíkahó kuènhenni.

Ntoáhya kjóne sín tí niotja xraxinkakonxín sín Ìnchéni

¹⁷ Méxra tí nkehe tjéjkian la mé ijnko nkehe tóxrjinnahya tjejoch'erá. Tió tójnkotsérá ntiha la ijnko nkehe jína chrókjuich'erá. A ntá náhi la ijnko nkehe jínahya tjejoch'erá. ¹⁸ Na mé saoxín na mé ntáchro sín kixin tió tójnkotsérá la jnkokoáhya tjenkayáxinrá. Ntáxrjan kixin ách'e chaxín xíkaha tjejorá. ¹⁹ ¿Xá t'ichjánxin kixin chrók'uaxrjentará kixin chrókónoexinni kixin nkexro chaxín tinkáchónki Ìnchéni la ko nkexro tí náhi? ²⁰ Méxra tí xíkaha jnkokoáhya tjenkayáxinrá ntá tió tójnkotsérá

chrókjónterá nioṭṭja la chaxínhya xraxinkákonxínrá Ìnchéni tí xíkaha. ²¹ Kíxin tió sinterá la senó isorá tjejonterá tí nkehe tsíkjasánkoará, la isorá la kjónté naxa t'énxinrá kjinta, la í sorá la tsíkókoaná. ²² ¿Á chontahyará nchia ntoará? Ntahó chrókjónxínrá la ko chrók'uíxinrá nkehe. Mé xíkaha chontahyará kjuasáyé tí nínkoe Dios la ko nchesuèhérá tí sín nòà chóntahya ninkehó. ¿Nkehe tsontáxrjan? ¿Á tsontáxrjan kíxin jína tjejoch'erá? Kjá náhí. Jehya jína tjejoch'erá.

Jína chróxraxinkakonxínni Ìnchéni
(Mt. 26.26-29; Mr. 14.22-25; Lc. 22.14-20)

²³ Kíxin Ìnchéni mé chjína ch'án tí nkehe kjuákoará: kíxin tí tie tsíkóxi ch'án na mé jehe ch'án kuákja ch'án tí nioṭṭja ²⁴ ntá kjuixin kjuanchia ch'án kjuasáya ntá kóchrít'o ch'án tí nioṭṭja ntá ntáchro ch'án kíxin: “Tíhi mé ntóna xránjon its'en kíxin jína ts'ejóxin tí jahará. Méxra xíkaha sích'erá kíxin tsoxraxinkákonxínrá tí janhan”, ichro ch'án. ²⁵ La ko kjaxin xíkaha tió kjuixin kjóne sín ntá kuákja ch'án tí vaso la ntáchro ch'án kíxin: “Tíhi mé tjakoxin kíxin chaxín tsoxiteyá ijnko nkehe nixin kuènte Dios kíxin ts'ítji jnina. Tió its'irá tíhi mé tsoxraxinkákonxínrá tí janhan”, mé chro ch'án. ²⁶ Kíxin tí interá tí nioṭṭja la it'irá tí inté to uva mé xíkaha tjejotjákoxinrá kíxin xíkaha k'uénxin Ìnchéni. Mé xíkaha tsjákoxinrá tsjixrakájia yaon tsokjan ch'án.

Ntoá chrókjóneni tí nioṭṭja kuènte Ìnchéni

²⁷ A ntá jnkójín nkexro chjini chrókjóné sín tí nioṭṭja la ko chrók'ui sín tí inté to uva xraxinkakonxínni Ìnchéni, mé xíkaha chrókjuasin sín jie chrókjuikosáyehya sín tí cuerpo la ko tí ijnié Ìnchéni. ²⁸ Méxra jnkójnkoni chrókjuenkayáxinni senó kíxin á chóntahyani jie na ntá chrókjóneni tí nioṭṭja la ko chrók'uini tí inté to uva. ²⁹ A ntá tí xíkaha chjini chrókjóneni la ko chjini chrók'uini la chaxínhya chróxraxinkakonxínni tí cuerpo kuènte Ìnchéni la mé tí xíkaha chrókjuich'eni la chrókjuasótexinni tíha. ³⁰ Mé xíkaha itsjérá níhará la ko itsjérá tsankahyará la ko jnkójínrá k'uénrá. ³¹ A ntá tí chrókjuatsqanni nkexrí tjen asénni jeheni ntá Ìnchéni t'ichjánxienhya chrókjuinchekjasóteni ch'án. ³² A ntá kjónté chrókjuinchekjasóteni Ìnchéni ntá chrók'uitjani chrókjuinchexiteyéhēni ch'án, ntá chrókjuasótehyani éxí tsjasóte tí í so chojni chjasintajni.

³³ Méxra kichó ni, tió tójnkoisésá sinterá la chróchonhénrá chrókui tí í so sín ntá chrókjóntekoará sín jnkokoá. ³⁴ A ntá tí nkexro ik'uén kjinta la íchá jína senó chrókjónexín nkehe ntōe ó kíxin ntá chrókjuinchekjasótehyará Dios kíxin xíkaha ntoáhya tójnkoisésá. A ntá tí í so nkehe la tsjásiyóxian janhan tió tsjasántsahará.

12

Nchakuen Dios mé chjéhe kjuachaxin jnkójnko chojni

¹ Kichóni, tjínkavan kíxin tsonohará jína kíxin nkexrí siín tí kjuachaxin tjanjon Nchakuen Dios t'áyéhe jnkójnko chojni.

² Jahará ó nohará jína kíxin tió naxa kuinkachónkehýará Ìnchéni na mé kuinkachréhérá tí nkehe tsíkjanoya nixjahya. ³ Méxra chrókónohará kíxin nijnko nkexro nixjaxin kjuachaxin Nchakuen Dios tsjacha ts'ántaxínhin

Jesús, la ko nijnko nkexro tsjacha tsontácho sín kixin Jesús mé Ìnché sín tí nijxaxinhya sín tí kjuachaxin Nchakuen Dios.

⁴ A ntá nchónhya xra kuènte kjuachaxin Nchakuen Dios síin la kjánchó jnkokoá Nchakuen Dios mé tjetjanjon. ⁵ La ko síin nchónhya nkexrí sich'eheni xra Ìnchéni, kjánchó Ìnchéni la ójnkó nkexro tíha. ⁶ La ko nchónhya nkehe t'axrjexín tí xra ch'e jnkojnko chojni la kjánchó jnkokoá Dios tjetjanjon tí kjuachaxin ch'exinni xra kaín ni. ⁷ Jnkojnko chojni mé kujtonhen kixin chrókjuakoxin kjuachaxin kuènte Nchakuen Dios kixin xikaha chrókjuinkitsa kichó. ⁸ Iso chojni mé ts'áyéhe kjuachaxin tsonixja sín kjuaxrexinkaon jina kixin tjinkitsa Nchakuen Dios, la ko í so chojni ts'áyéhe kjuachaxin tsochronka ijnko nkehe kuènte Dios noehya tí í so sín kixin Nchakuen Dios mé tjinkitsa sín tsonixja sín. ⁹ La ko í so chojni mé ts'áyéhe kjuachaxin antsí tsinkáchónki Dios kixin Nchakuen Dios mé tjinkitsa. La ko í so chojni mé ts'áyéhe kjuachaxin sinchekitohe chojni jina. ¹⁰ La ko í so chojni mé ts'áyéhe kjuachaxin tsjasin sín kjuaxroan, la ko í so chojni mé ts'áyéhe kjuachaxin kixin Dios sinchenohe sín ijnko nkehe tsochenka sín tí í so kichó ni, la ko í so chojni mé ts'áyéhe kjuachaxin tsjatsqanxín á kjuachaxin kuènte Nchakuen Dios o á kjuachaxin kuènte ijnko nchakuen jínahya chronkaxin ijnko chojni, la ko í so chojni mé ts'áyéhe kjuachaxin kixin ijnko nkíva ókjé naxa k'uitjahya sín tsonixjaxin sín ijnko nkehe kuènte Dios, la ko í so chojni mé ts'áyéhe kjuachaxin tsochronkaxin nkexrí t'axrjexín tí nkehe ókjé nkíva tsíchronka tí í jnko chojni. ¹¹ Kjánchó kaín tíha jnkokoá Nchakuen Dios mé tjinkitsa, na mé k'uáyéhe jnkojnko chojni jnkojnko kjuachaxin éxí tjinkaon tí Nchakuen Dios nkerí xra chrókjuich'e sín.

Kaínni k'ónani jnkokoá cuerpo kuènte Cristo

¹² Cristo la éxí yóhe ijnko cuerpo chóna nchónhya parte. A ntá ijnko cuerpo la jnkokoá kjánchó nchónhya parte chóna. Kjónté nchónhya parte chóna tí cuerpo la tí cuerpo la ójnkó. Mé xikaha Ìnchéni Cristo la ójnkó tí jehe ch'án. ¹³ Kaínni kjónté chojni judío la kjónté chojni jehya judío, la kjónté chojni ch'exón xra, la kjónté chojni t'ítuenhya, kaín ni na mé jnkokoáxon Nchakuen Dios kuíkitexínni, na kaín ni k'ónani jnkokoá cuerpo kuènte Cristo, na mé éxí jnkokoá nkehe ik'uíni kaín ni na mé k'uáyéheni tí jnkokoá Nchakuen Dios.

¹⁴ Kixin tí cuerpo kuènteni la jehya jnkokoá parte chóna. Náhi. Itsjé parte chóna tí cuerpo. ¹⁵ Tí chróntácho tí toteni kixin: “Jehya itja tí jeheni na mé jehya jeheni kuènte tí cuerpo”, na mé chaxinhya tíha kixin ó jehe cuerpo kuènte. ¹⁶ Kjaxin tí chróntácho ijnko ntatsjoni kixin: “Jehya ikon tí jeheni na mé jehya jeheni kuènte tí cuerpo a”, na mé chaxinhya tíha kixin ó jehe cuerpo kuènte. ¹⁷ Tí chaxin kuenté cuerpo kuènteni chrók'óna ikonni, ¿ntá nkexrí chrókuinhinni? A ntá tí chaxin kuenté cuerpo kuènteni chrók'óna ntatsjoni, ¿ntá nkexrí chrókókaxraxéheni? ¹⁸ A ntá Dios kjuanjon ch'án kjuachaxin nkexrí ch'e xra jnkojnko nkehe kuènte cuerpo kuènteni kixin jehe ch'án nkexrí tjinkaon ch'án kóxrjínhin ch'án. ¹⁹ A ntá tí chrók'óna jnkokoá nkehe tíha, ¿a ntá nkexrí chrókjuak'e tí cuerpo a? ²⁰ Kjánchó jie nchónhya parte chóna tí cuerpo kuènteni la ó jnkokoá tíha.

²¹ Tí ikonni la mé xitjahya tsontáche tí tjani kixin: “T'ichjánxienhyani tí jaha”, la ko kjaxin tí kjani xitjahya tsontáche tí toteni kixin:

“T'ichjánxinnahya tí jaha.” ²² Náhí. Tí nkehe kuènte tí cuerpo tónhenni kixin tjetuanhya na mé kjónté antsí má t'ichjánxin ²³ la ko í so nkehe kuènte tí cuerpo la kánhyó chónteheni kjuasáya na kjánchó antsí nchek'ítsáni ka. La ko tí nkehe náxrjónhya la antsí tóxakonhenni kixin tsonoxínhya. ²⁴ A ntá tí nkehe náxrjón na mé t'ichjánxienhya ka ts'ítsá. Mé xíkaha Dios kjuíncheyóxin kaín tí nkehe kuènte tí cuerpo kuènteni la ko jehe ch'án antsí chjéhe ch'án kjuasáya tí nkehe chrókjuikosáyehyani jeheni ²⁵ kixin ninkehó xitjahya chróxikeyehe tí cuerpo kixin kaín tí nkehe la jnkokón tjinkítsa kichó. ²⁶ Tió tsíkóníhi ijnko parte kuènte tí cuerpo la kaín tí í so parte la kjaxin tjeté; la ko tió tjikosáyehye sín ijnko parte la kuenté tsochéhe.

²⁷ A ntá jahará na mé kuènte tí cuerpo kuènte Cristo la ko jnkojnkorá mé ijnko parte kuènte tí cuerpo kuènte ch'án. ²⁸ Méxra Dios kjueyá ch'án chojni sich'ehe ch'án xra kuènte njnko, na mé saoxín kjueyá ch'án tí sín apóstol; la ko yóxin kjueyá ch'án iso chojni chjéhe ch'án kjuachaxin tsochrónka sín ijnko nkehe kjuínchenohe sín ch'án. La ko nixin kjueyá Dios iso chojni chjéhe ch'án kjuachaxin tsjako sín itén ch'án, la ko kjaxin kjueyá ch'án iso chojni chjéhe ch'án kjuachaxin tsjasin sín kjuaxroan, la ko kjaxin kjueyá ch'án í so chojni chjéhe ch'án kjuachaxin sinchekitohe chojni níhi jína, la ko kjaxin kjueyá ch'án í so kjojni chjéhe ch'án kjuachaxin antsí tjinkítsa kichó, la ko kjaxin kjueyá ch'án í so chojni chjéhe ch'án kjuachaxin ts'etoan xra kuènte ch'án, la ko kjaxin kjueyá ch'án í so chojni chjéhe ch'án kjuachaxin tsonixjaxin sín í jnko nkiva. ²⁹ Kénhya chojni tsík'óna apóstol, la ko kénhya chojni chóna kjuachaxin sinchenohe sín Dios ijnko nkehe tsochrónka sín, la ko kénhya chojni chóna kjuachaxin tsjako sín itén Dios, la ko kénhya chojni chóna kjuachaxin sinchekitohe sín chojni jína, la ko kénhya chojni chóna kjuachaxin tsonixjaxin sín ijnko nkiva ókjé, la ko kénhya chojni chóna kjuachaxin tsochrónkaxin sín nkexrí t'axrjéxin tí nkehe chrónka tí sín nixjaxin ijnko nkiva ókjé. Chaxín kjá náhi. ³¹ Méxra tjeyará tí kjuachaxin antsí jína chrótjáhará Dios. Ntá jie tsjákohará ijnko ntia antsí jína chrók'uejorá.

13

Chrótjuèheni kichó ni

¹ Tí chrónixja nkívee chojni ó la ko kjaxin chrónixja éxi nixja tí sín ángel, ntá naxa chrótjuahya kichó ni la ó chónkó tíha la mé éxi chrókóyóna chica tsjánka ó la ko éxi ijnko chica platillo nchevékjan sín ó, kixin ninkehó són chónahya. ² La ko tí chrónixja itén Dios, la ko tí chrókianxian kaín nkehe kuènte Dios naxa noehya chojni, la ko tí chrókónóna kaín nkehe, la ko antsí chrókuinkachónkia Dios ntá chrókjuacha chróntátjan ijnko jna sáchrókjui ókjé, kjónté tí xíkaha ntá naxa chrótjuahya kichó ni, ntá ninkehó sínkíhya tí janhan. ³ Tí chrókjuintakitonhan tí sín nòa kaín nkehe chonta, la ko tí chrókjuánjuan kjuachaxin kixin chróchena kuenténa, kjónté tí xíkaha ntá naxa chrótjuahya kichó ni la ntá ninkehó sínkíhya tíha.

⁴ Tí tjuèheni kichó ni na ts'ejóchónhenni kichó ni, tsonínkakuenhyani kichó ni, la ko sinchejína asenni, la ko tsochjinoxienhyani, la ko sinchehnkehyaní, la ko tsohnkehyaní, ⁵ la ko ch'ehyaní ninkehó nkehe náxrjónhya, la ko tjeyáhyani nkehe kuènteni ó, la ko tsonínkakonhyani tjoka, la ko

tsochóntahyani kjuanínkaon isé, ⁶ la ko kjaxin tsochèhyani tió í jnko chojni tjasin jie. Náhi. Chrókóchéheni tió ijnko nkehe jina sítónhen. ⁷ Tí tjuèheni kichó ni la kjónté kaín nkehe chrókjuasótexínni la chrókuitekaonni kixin jina sín la ko naxa chrok'uejóchónhenni chrókónínkaonhyani.

⁸ Tí tjuèheni kichó ni la jnkochrín tsjak'e ts'itjáyannya. A ntá itsi ijnko yaon í t'ichjánxínnya tsochronka chojni itén Dios, la ko tsokohya kjuachaxin tsonixjaxin chojni ókjé nkíva, la ko tsokohya kjuachaxin tsonohe chojni má. ⁹ Naxa t'itjáyan tí nkehe chrókónoheni la ko naxa t'itjáyan tí nkehe chróchronkaxínni. ¹⁰ A ntá tió tsonoheni kaín xín nkehe ntá tí nkehe ntoáhya k'uénoheni la mé ts'itjáyan.

¹¹ Tió naxa chánjan janhan k'uéníxja éxi chánjan la ko k'uékjenkayáxian éxi chánjan. Ntá kóntetona ntá kujtoha tí nkehe kuènte chánjan. ¹² Méxra éxi ijnko xrosenta t'ikonxínhyani jina jie, ntá tsi ijnko yaon chr'èxin ntá ts'ikonxínni jina kaín nkehe. Ijie naxa t'itjáyan tí nkehe chrókónona; ntá tsi ijnko yaon tsonona jina kaín xín nkehe éxi xikaha kjaxin Dios chóxin ch'án tí janhan. ¹³ Méxra, iní nkehe tjejó jnkochrín, la mé ts'ejó chojni tsinkáchónki Dios, la ko ts'ejó chojni tsochónhen sín, la ko ts'ejó chojni tsotjuèhe kichó. A ntá iní nkehe síin, la kjánchó antsí má t'ichjánxin tsotjuèheni kichó ni.

14

Tí nixjaxin chojni ókjé nkíva

¹ Chrókóxakonhanrá kixin chrótjuèhérá kichuára la ko kjaxin chrókjuéyará kixin Nchakuen Dios chrótjáhará kjuachaxin. Kjánchó antsí chrótjinkáonrá tí kjuachaxin tsochronkará ijnko nkehe kuènte Dios. ² Méxra, tí nkexro nixjaxin ijnko nkíva ókjé mé nixjehe sín Dios ó la ntá chojni la náhi, kixin kohya ninkexró tienxín tí nkehe nixja sín la mé nchakuen sín ó mé chronkaxín sín ijnko nkehe kuènte Dios noehya tí í so sín. ³ A ntá tí nkexro chronkaxín ijnko nkíva tienxín tí í so sín ijnko nkehe kuènte Dios mé nixjehe chojni ntá xikaha tjinkítsa tí í so sín kixin antsí chrók'uitja sín nkehe kuènte Dios la ko chrókóchéhe sín. ⁴ A ntá tí nkexro nixjaxin ijnko nkíva ókjé la mé tjinkítsa jehó ch'án antsí tsonohe tí kjuachaxin kuènte Dios. A ntá tí nkexro chronkaxín ijnko nkehe kjuínchenohe Dios mé tsjinkítsa tí sín kuènte njnko kixin antsí chrók'uitja sín nkehe kuènte Dios.

⁵ Tjinkavan kixin kaín rá chróchontará kjuachaxin chrónixjaxinrá ijnko nkíva ókjé. Kjánchó antsí tjetoan chróchontará kjuachaxin chróchronkará ijnko nkehe kjuínchenohará Dios. A ntá kánhyó tjetoan chrónixjaxinrá ókjé nkíva tí noahyará tsochronkaxinrá nkexrí t'axrjexín tí nkehe chróchronkará kixin chrókuinhin kaín tí sín tinkáchónki Inchéni kixin antsí chrók'uitja sín nkehe kuènte Dios. ⁶ A ntá kichó ni, tí chrókjuasántsahará chrónixjaáxinrá ijnko nkíva ókjé la ó chónkó tíha. Íchá jina chrónixjaáxinrá ijnko nkíva tiénxinrá chróxrjankaxián ijnko nkehe kjuínchenona Dios la chróxrjankaxián ijnko nkehe kuènte Dios naxa noahyará, la chróxrjankaxián ijnko nkehe tjinkaon Dios chrókónohará, la chrókjuákoáxinrá ókjé nkehe njxin.

⁷ Kixin kjaxin tí ison flauta la ko tí isón arpa, tí jnkokónhya chróntáchro jnkojnko són, ntá chrókjuachahyani chrókjuatsoanni nkehe tí ntáchro tí són a. ⁸ La ko éxi yóhe tí síin guerra, tjanjonko kichó sín, la ntá ntoáhya chrók'uánoa sín tí chica trompeta, ntá kohya nkexro chrókóyaxínhin sín

sáchrókjuikjanjonko kichó sín. ⁹ Kjaxin xikaha tí jahará tí nixjahyará ijnko tan tienxín sín, ¿ntá nkexrí chrókónohe sín nkehe tí ntáchrórá? Mé xikaha tjejonixjará éxí chjéhe xrinto ó. ¹⁰ Chaxín síin itsjé nkiva chjasintajni la ko kaín nkiva la síin chojni tienxín sín. ¹¹ Kjánchó tí chrókianxinhya janhan tí nkehe tsontáchro ijnko nkexro, ntá tí nkexro a ts'ikon tí janhan éxí ijnko nkexro tsíkijxin ókjé la ko kjaxin janhan ts'ikuan tí jehe ch'án éxí ijnko nkexro tsíkijxin ókjé. ¹² Méxra jahará imá tjinkáonrá chrók'uayéhérá ijnko xra kuènte Nchakuen Dios, ntá chrókójina chrókjuéyará tí xra chrókjuinkitsa tí í so sín kuènte njnko kixin antsí chrók'uitja sín ijnko nkehe kuènte Dios.

¹³ Méxra tí nkexro nixjaxin ijnko nkiva ókjé la chrókjuanchehe Dios kixin chrókjuinkitsa chróchronkaxin ch'án nkexrí t'axrxjén tí tan a. ¹⁴ Kixin tí tsonixjaxian Dios ijnko nkiva ókjé, ntá tí nchakuenná ó mé tjenixjehé Dios, la ntá tí kjuaxrexinkaon kuèntana la ókjé tjen. ¹⁵ A ntá tí xikaha, ¿nkehe chrókjuít'a? Íchá jina chrónixjaxian Dios tí nchakuenná la chrókianxian janhan, la ko tió chrótsje janhan himno la chrótsjexian nchakuenná la ko chrókianxian janhan. ¹⁶ Kixin tí tsochjéexinrá kjuasáya Dios nchakuanrá ó ntá tjejótinhin í so chojni, ¿ntá nkexrí kixin tí sín naxa kienxinhya sín tí nkehe nixjehérá Dios chróntáchro sín "Amén, ó nchoxon"? ¹⁷ Kjónté imá náxrjón tí chrókjuanchehérá Dios kjuasáya la ntá chrókienxinhya tí sín tjejótinhin, ntá chrokjuinkitsahya kixin chrók'uitja sín nkehe kuènte Dios. ¹⁸ Tjáncháha Dios kjuasáya kixin antsí chonta janhan kjuachaxin tsonixjaxian ókjé nkiva, la ntá jahará la kánhyó nixjará xikaha. ¹⁹ Kjánchó tió tójnkotsé chojni kichó ni la mé ntáxrjan kixin antsí tjínkavan chróníjja janhan kjónté in'ó palabra ó tienxín sín kixin xikaha chrókjuakuxian sín, la ntá kánhyó chrókójina kjónté ite mil palabra chróníjjaxian ijnko nkiva ókjé tienxinhya chojni.

²⁰ Kíchóni, chrókjuenkayáxinhyará éxí chánjan. Kjánchó chrók'uejorá éxí chánjan naxa noehya nkehe jínahya. A ntá chrókjuenkayáxinrá éxí chojni nteto. ²¹ Tí xroon tsíkjin sín ósé nkexrí k'uetqan Dios mé ntáchro kixin: "Janhan tsonixjaxian ókjé nkiva la ko itén chojni ókjé kixin tsinhin tí nacióon Israel na kjónté tsitekakonhya sín, xikaha ichro Ìnchéni."* ²² A ntá tí kjuachaxin tsonixjaxin chojni ókjé nkiva mé xránjon kixin chrókjuakoxin chojni chrókuinhin tí sín tinkáchónkihya Ìnchéni, jehya kixin t'ichjánxin chrókuinhin tí sín tinkáchónki Ìnchéni. A ntá tí kjuachaxin tsochronka chojni ijnko nkehe kjuínchenohe sín Dios mé xránjon kixin chrókjuakoxin chojni chrókuinhin tí sín tinkáchónki Ìnchéni, jehya kixin chrókuinhin tí sín tinkáchónkihya Ìnchéni. ²³ A ntá tió tójnkotsérá kaín rá tinkáchónkirá Ìnchéni, a ntá kaín rá chrónixjaxinrá ókjé nkiva, ntá tí chrók'uixenhen nchia ijnko chojni naxa kuènhya sín xikaha, o chrók'uixenhen nchia ijnko chojni naxa tinkáchónkihya Ìnchéni ntá chrókuinhin sín xikaha la kjá tsontáchro sín kixin ó k'uixíjjanrá. ²⁴ Kjánchó tí chróchronkará kaín rá ijnko nkehe kjuínchenohará Dios ntá chrók'uixenhen nchia ijnko nkexro tinkáchónkihya Ìnchéni, o chrók'uixenhen ijnko chojni naxa tienhyé, ntá chrókuinhin sín nkehe tjejonixjará kaín rá ntá chróxrxinkaon sín tí jie chónta sín ntá chrókuítqhe sín kaín jie chónta sín. ²⁵ Ntá tsonoxín tí nkehe

* 14:21 Isaías 28.11-12

mó tjenkayáxin sín nkaya asén sín ntá ts'ejóxin toch'in sín tsoxraxinkaon sín Dios la ko tsontáchro sín kixin chaxín tjejókoará Dios.

Ntoa chrókjuich'eni kaín xín nkehe tió tójkotséni

²⁶ A ntá kichó ni, ¿nkehe chrókónhen? Tió tójkotséni na mé isorá chrótsjerá salmo, la ko isorá chrókjuàkorá, la ko isorá chróchronkará ijnko nkehe kjuínchenohará Dios, la ko isorá chrónixjāxinrá ijnko nkiva ókjé, la ko isorá chróchronkaxínrá nkexrí t'axrjexín tí nkehe nixjāxin tí í so sín ókjé nkiva. Kjánchó kaín tíha tsonhen kixin tí sín kuente nínko chrók'uitja sín nkehe kuente Dios. ²⁷ A ntá tí chrónixjāxin sín ijnko nkiva ókjé na mé yaá o iy'á chojni chrónixja sín la ko chrók'uixinkí chojni tsonixja, la ko t'ichjāxin kixin jnkojín nkexro nohe tsochronkaxín nkexrí t'axrjexín tí nkehe nixja sín. ²⁸ A ntá tí kohya ninkebro tí nínko ntaha tsjacha tsochronkaxín nkexrí t'axrjexín tí nkehe chrónixja sín, ntá chrónixjāxinhya sín ókjé nkiva tí tjejótójkotsé sín, na mé chrónixjehe sín asén sín ó la ko chrónixjehe sín Dios ó. ²⁹ Tjánjonra kjuachaxín kixin tsonixja yaá o y'á chojni k'uáyéhe sín kjuachaxín tsochronka sín nkehe kjuínchenohe sín Dios. A ntá tí sín tjejótinhin mé chrókjuenkayáxin sín á ó nchoxón tí nkehe kuínhin sín. ³⁰ A ntá tí xríñahya chrókjuinchenohe Dios ijnko nkehe ijnko nkexro tjetjāxin ntá chróchronka ch'án tíha. A ntá tí nkexro senó kjuankíxin chrónka nkehe la chrókónhen ch'án chrónixjahya ch'án. ³¹ Ó nchoxon jnkojnkora chróchronkará nkehe tjáhará Dios kixin xíkaha kaín rá chrók'uitjára la ko chrókócháhará. ³² A ntá tí nkexro k'uáyéhe kjuachaxín tsochronka nkehe kjuínchenohe Dios kjāxin t'ichjāxin chrókónhen tsochronkaxín íjnko nkexro. ³³ Kixin Dios tjanjon tí kjuaxróxin, a ntá tjinkakonhya ch'án kixin yóxinhya chrók'uejóni.

Tiό tójkotsé chojni kichó ni tinkáchónki Ìnchéni ³⁴ chrónixjahya tí chojni chjin jnkosiné servicio. Kohya kjuachaxín xíkaha, na mé chrókjuinchexiteyéhe sín tí sín ntoa éxi t'etōan tí ley kuente Dios. ³⁵ Tí tjinkaon sín tsonohe sín nkehe na mé chrókjuanchankíhi sín xii sín tió tjiji sín ntōe sín. Náxrjónhya chrónixja ijnko chojni chjin nkehe jnkosiné servicio.

³⁶ Chrókónohará kixin tí itén Dios xrankíxixínhya tí tjejorá la ko jehya jahorá k'uayéhérá tíha. ³⁷ A ntá tí tjen jnkojín nkexro tjenkayáxin kixin nixja itén Dios o tjenkayáxin kixin tí Nchakuen Dios tjinkítsa tí jehe ch'án ntá chrókónohe ch'án kixin tí nkehe tjejkian mé ijnko nkehe tsík'etōan Ìnchéni. ³⁸ A ntá tí nkexro titekakonhya tíhi na ntá jahará chrókuitekákueñhyará ch'án kjāxin.

³⁹ Méxra kichó ni, chrókjuéyará kixin chrók'uayéhérá kjuachaxín chróchronkará nkehe kjuínchenohará Dios la ko chrókuitōhérá tsonixjāxin chojni ókjé nkiva. ⁴⁰ Kjánchó kaín xín nkehe la jnkojína la ko kjuasáya chrókónhen.

15

Tsíxechón Cristo

¹ A ntá jie kichó ni, tjínkavan chróxraxinkáonrá nkehe tí tan kuaáxinrá kjuákohará. Tíha mé kuitekáonrá, la mé tíha mé tjejóxinrá jína. ² Kjāxin tí nkehe kjuákohará mé kuaáxinrá, tí tjejóhyará tí nkehe kjuákohará; tí la náhi la chónkó kuinkachónkirá tí nkehe kjuákua.

³ Səoxín, kjuákohará tí nkehe k'uayáha kixin Cristo k'uenyákonhen ijíeni, na mé xíkaha kjuínchexiteyá ch'án tí nkehe ntáχρο tí xroon itén Dios ⁴ la ko tsíkjavá sín ch'án la ko tsíxechón ch'án tí níxin yaon éxí ntáχρο tí xroon itén Dios. ⁵ Ntá k'uíkon ch'ín Pedro tí jehe ch'án, ntá chr'éxin inaá tí teyó sín k'uék'ajiko ch'án k'uíkon sín tí jehe ch'án. ⁶ A ntá chr'éxin chjina quinientos chojni kíchó ni jnkokoá k'uéjó sín k'uíkon sín ch'án. A ntá jie itsjé tí sín a naxa tjejó sín, a ntá jnkojín sín na ó tsík'en sín. ⁷ Chr'éxin k'uíkon ch'ín Jacobo tí jehe ch'án, la ko k'uíkon kaín tí í so sín apóstol inaá.

⁸ A ntá kjuixixín janhan k'uíkuan Ìnchéni éxí ijnko xjan naxa xetjahya yaon chrókokjíhi. ⁹ Kjánchó janhan kánhyó tjetooan la mé tóyóehya tí í so sín tsíkjeýá Ìnchéni la ko tósuána chrók'óna ijnko nkexro ch'ehe xra Ìnchéni kixin janhan mé k'uénínkakonhan tí sín nínkoe Dios. ¹⁰ Kjónté jínahya kjuít'a la kjuasáyé Dios la ko kjuachaxin kuénte ch'án mé kjuítóxinhin tí kjuenkayáxian, na mé chónkóhya kuíkonóna ch'án, kixin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhí. Dios kjuínkítsana ch'án kjuít'a xra. ¹¹ Kjánchó tjetuanhya á janhan o á jehe sín kjuako sín, kixin xíkaha tí itan kjuakoni, a ntá kuítekáonrá.

Tsoxechón tí sín tsík'en

¹² A ntá tí tjakoni kixin Cristo la xechón, ¿ntá nkekuénte ntáχροrá jnkojínrá kixin tsoxechónhya chojni tsík'en? ¹³ Tí chrókóchaxín tí nkehe ntáχροrá kixin tsoxechónhya chojni tsík'en, ntá kjaxin chrókóchónhya Cristo. ¹⁴ A ntá tí chaxínhya xechón Cristo, ntá chónkó tí nkehe tjakoni la ko ninkehó sínkíhya la ko chónkó tí nkehe kuítekáonrá. ¹⁵ A ntá tí chaxínhya xíkaha tsíkónhen, la jeheni la ijnko chojni ntoáhya chrónka kuénte Dios, kixin ó chrónkani kixin Dios kjuínchexechón Cristo. A ntá tí chrókóchaxínhya kixin chrókóchón Cristo, ntá kjaxin chrókóchaxínhya kixin chrókéchón chojni tsík'en ¹⁶ kixin tí chrókéchónhya tí chojni tsík'en, ntá kjaxin Cristo chrókéchónhya ch'án. ¹⁷ A ntá tí Cristo chrókéchónhya ch'án ntá chrókóchónkó tí kuítekáonrá tí jehe ch'án kixin naxa chrókjuínhya tí ijíará. ¹⁸ La ko tí chrókóchaxín tíha ntá chrók'uitjáyan tí sín kuítekaon Cristo ik'uén sín. ¹⁹ Méxra tí chrókuinkáchónkini Cristo kixin chrókjuinkítsa ch'án tí jeheni chjasintajni ntihyó, ntá kohya chojni chrókóyóhe tí jeheni, imá chrókóndéni chrók'uejóni kaín ni.

²⁰ Kjánchó náhi, la chaxín ó xechón Cristo. Jehe ch'án éxí tí nkehe tsík'óna səoxín kixin jehe ch'án səoxín xechón ch'án. ²¹ Méxra jnkokoá chojni ntoa kjuankixin kjuasin jie, ntá kjuankixin k'uén kaín xín chojni chjasintajni, la ko kjaxin jnkokoá chojni ntoa xechón, ntá xíkaha tsoxechón kaín chojni tsík'en. ²² Kixin tí jie kjuasin ch'ín Adán ntá kaín xín chojni sít'enxín sín. A ntá Cristo la kaín ni tsochóntaxínni kjuachón. ²³ Jnkojnkonni éxí tsojhenni tocar, na mé səoxín xechón Cristo, a ntá chr'éxin tió tsokjan ch'án ntá tsoxechónni kaín ni kuítekaonni tí jehe ch'án. ²⁴ A ntá ó tsi yaon tsjixixín ntá sinchek'itjáyan Cristo kaín xín nkehe t'etooan la ko kaín xín kjuachaxin ókjé, ntá tsjanjon ch'án tí xra t'etooan kixin ts'áyéhe It'é ch'án Dios. ²⁵ Na mé t'ichjánxin ts'etooan Cristo tsjixrakájia tí yaon tsjachahya tí sín nínkakonhen ch'án. ²⁶ A ntá tí nkehe tsjixixín ts'itjáyan la mé tí kjuach'én. ²⁷ A ntá Dios kjuanjón kjuachaxin kixin kaín nkehe síin mé chrók'uetuēnhen Cristo.* Kjánchó tió xíkaha ntáχρο tí xroon itén Dios tsíkjin sín ósé kixin kaín xín nkehe mé ts'etuēnhen ch'án, ntá ó noheni jina

* 15:27 Salmo 8.6

kíxin jehya kíxin Dios la chrók'uítuenuen ch'án inaá. Náhí. Jehe ch'án mé chjéhe Xjeen ch'án kaín kjuachaxin ts'etuenuen ch'án kaín xín nkehe. ²⁸ A ntá tí tsjixin tsjacha Cristo ts'etuenuen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhe ch'án It'é ch'án Dios kíxin ntá Dios mé ts'etuenuen ch'án kaín xín nkehe.

²⁹ A ntá í jnko nkehe, la iso sín tikiteyákonhen tí sín tsík'en. ¿Nkekuènte xikaha ch'e sín tí titekakonhya sín kíxin tí sín tsík'en tsoxechón sín inaá?

³⁰ A ntá tí xikaha, ¿nkekuènte kíxin kaín yaon kjuaxróxinhya tjejóni nínkakhenni chojni? ³¹ A ntá kichó ni, kaín yaon siín kjuachrakon chrók'uèn janhan. Chaxín tíhi, kjánchó chàna kíxin jahará kjaxinrá tinkachónkirá Ìnchéni Jesucristo. ³² Kjónté kónínkakonna chojni chjasin Éfeso éxi iko jiehe la kjónté kjuak'é ntiha, ¿la ntá nkehe chrókjuacha tí janhan tí chrókóchaxínhya chróxechón chojni tsík'en? Tí xikaha la ó nchoxon tí nkehe ntáchro tí sín titekakonhya Ìnchéni kíxin chrókjóne sín la ko chrók'ui sín kíxin ijie la o ntóye chrók'uen sín.

³³ Chrókúitōēhyará chrokjuit'áyahará sín. Éxi ntáchro sín kíxin: “Tí chrók'uejókotoxinni chojni jínahya ntá chrók'uitjáyán tí nkehe jína tjenkayáxinni.” ³⁴ Chrókjanrá ntia jína ntoá la chrókjuásinhyará jie. Méxra isorá naxa chonhyará Dios. Na mé ntáxrjan tíhi kíxin chrókósuàhará.

Nkexrí tsoxechón tí sín tsík'en

³⁵ Kjá jnkojínra tsjanchankínará kíxin: “¿Nkexrí tsoxechón tí sín tsík'en la ko nkexrí tsotsjehe tí cuerpo tsochóna sín?” ³⁶ Lontirá tjanchankínará xikaha. Tí noatje t'enkanı nonte t'ichjánxin its'en ts'itjáyán kíxin tsjak'echón tí nkehe ts'ayan. ³⁷ Tí nkehe t'enkanı la jehya tí ka a. Náhí. Tí nkehe t'enkanı la noatrigo o í jnko tje. ³⁸ Kjánchó Dios kjuanjón kjuachaxin kíxin jnkojnko nta ts'óna éxi tjinkaon ch'án, la ko jnkojnko nta tsochóna tje kuènte. ³⁹ A ntá jehya kaín tí cuerpo la jnkokon. Náhí. Ijnko la cuerpo kuènte chojni, la ko í jnko la cuerpo kuènte ko, la ko í jnko la cuerpo kuènte koxroxé, la ko í jnko la cuerpo kuènte koche. ⁴⁰ Na mé kjaxin xikaha siín cuerpo kuènte tí sín ángel tjejó nkaya nkajní la ko siín cuerpo kuènte chojni tjejó chjasintajni. A ntá tí cuerpo kuènte tí sín ángel la náxrjón tsjehe la ko kjaxin tí cuerpo kuènte tí chojni la náxrjón tsjehe, kjánchó ókjé nkexrí tsjehe. ⁴¹ Ókjé nkexrí t'inkaséyanxín tí yaon la ko ókjé nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjónté itsjé konotsé la ókjé t'inkaséyanxín jnkojnko. ⁴² Kjaxin xikaha tsonhen tí chojni tsík'en tsoxechón sín. Tí nkehe tsoxravá la mé ijnko nkehe tsotje, a ntá tí nkehe tsoxechón la mé ijnko nkehe ts'itjáyánhya. ⁴³ Tí nkehe tsoxravá la ijnko nkehe náxrjónhya tíha, la ntá tí nkehe tsoxechón la ijnko nkehe imá náxrjón. Tí nkehe tsoxravá la ijnko nkehe chónthaha kjuachaxin, la ntá tí nkehe tsoxechón la ijnko nkehe tsochóna kjuachaxin. ⁴⁴ Tí nkehe tsoxravá la mé cuerpo kuènte chojni chjasintajni ó. La ntá tí nkehe tsoxechón la mé cuerpo antsí tsochóna kjuachaxin kuènte Nchakuen Dios. A ntá tí chóntani cuerpo kuènte chojni chjasintajni ó na mé kjaxin tsochóntani cuerpo antsí tsochóna kjuachaxin kuènte Nchakuen Dios.

⁴⁵ A ntá éxi ntáchro tí xroon itén Dios kíxin: “Tí chojni ntoa k'óna saoxín mé ch'ín Adán tíha mé k'uáyéhe ch'án kjuachón ó.”† A ntá tí ó kjuixixín ikui í jnko ch'ín éxi yóhe Adán, kjánchó jehe ch'án mé chóna

ch'án nchakuen tjanjon kjuachón. ⁴⁶ Kjánchó jehya saoxín k'óna tí cuerpo antsí chóna kjuachaxin kuente Nchakuen Dios. Náhí. Saouxín k'óna cuerpo kuente chojni chjasintajni ó, la ntá chr'éxin k'óna cuerpo antsí chóna kjuachaxin kuente Nchakuen Dios. ⁴⁷ Tí nkexro k'óna saoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajní kuixin ch'án. ⁴⁸ Tí cuerpo siín chjasintajni mé yóhe tí cuerpo k'uéchóna tí nkexro tsík'óna nche. A ntá tí cuerpo siín nkaya nkajní mé yóhe tí cuerpo chóna tí nkexro kuixin nkaya nkajní. ⁴⁹ Éxí senó tóyóheni tí nkexro k'óna nche, ntá xikaha chr'éxin tsoyóheni tí nkexro kuixin nkaya nkajní.

⁵⁰ Ntá tsotjonkará nkehe, kichó ni. Tí cuerpo k'óna nto la ko hueso chóntani jie xitjahya sátsjikoni tí tjen Dios t'etōan ch'án. Na mé tí nkehe tsjeje xitjahya ts'áyéhe tí nkehe tsjejeheya. ⁵¹ A ntá tsotjonkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxinhin tí cuerpo chóntani. ⁵² A ntá xrínahya titàya tjejóni ntá éxí chróchr'áton konni la ko chrókuakitjenkini konni xikaha tió tsjixixín tsinhinni tsontácho trompeta, la ntá kaín chojni tsík'en tsoxechón, í ts'enhya sín, la ko kjaxin jeheni kaín ni ts'ixitóxinhin tí cuerpo chóntani. ⁵³ A ntá tí cuerpo chóntani la tsjeje, ntá t'ichjánxin ts'inkáya nkehe chónhya tsjeje. La ko tí cuerpo chóntani la ts'en ntá t'ichjánxin ts'inkáya nkehe chónhya ts'en. ⁵⁴ A ntá tió tí cuerpo chóntani la tsjeje, na mé t'ichjánxin ts'inkáya tí nkehe chónhya tsjeje, la ko tió tí cuerpo chóntani la ts'en, na mé t'ichjánxin ts'inkáya tí nkehe chónhya ts'en. Ntá tí xikaha na ntá tsoxiteyá éxí nixja tí xroon itén Dios ntácho kixin: “Tsjachahya tí kjuach'én la mé tsjacha tí kjuachón.” †
⁵⁵ “Jaha kjuach'én, ¿kjá tí kjuachaxin kuenta kixin chrókjuacha jaha? Jaha kjuach'én, ¿kjá tí kjuachaxin kuenta kixin chrók'oyánni?” § ⁵⁶ Tí jie tjasinni mé kuixin tí ts'enni. A ntá tí ley k'uetōan ósé antsí k'uixixín jie. ⁵⁷ A ntá tjancheheni Dios kjuasáya kixin ichr'án ch'án Ìnchéni Jesucristo kixin táha mé tsaáxinni.

⁵⁸ A ntá jahará kichó ni, imá tjuahará. Chrókuitoéhyará tinkachónkirá Ìnchéni. Jnkochrixin chrókuich'ehérá Ìnchéni xrá antsí jina kixin ó nohará jahará kixin tí xrá ch'eheni Ìnchéni jehya chónkó tíha.

16

Tí ofrenda tjenájín sín tsochr'énhen sín tí sín tjejó chjasin Jerusalén

¹ A ntá tí chichaon tjenájínrá kixin tsjínkĩtsará tí sín kichó ni tinkáchónki Ìnchéni na mé chrókuich'erá éxí kuétuñhan tí sín nñko estado Galacia. ² Jnkojnko domingo jnkojnkorá chrókuakitsjentehérá nkerí sík chichaon kjuachará tí semana kjuich'erá xrá kixin t'ichjánxinhya chrókuasánja janhan ntá chrókuénájínrá chichaon. ³ A ntá tió tsjasán janhan tsétuñhan tí sín tsjéyará kixin sátsji sín chjasin Jerusalén, na ntá tsokjian xroon tsjikoxín sín tí chichaon tsikjénájínrá tsjikaán tí sín kichó ni ntiha. ⁴ A ntá tí chrókójina kjaxin janhan sáchrókujiyá, a ntá sáchrókuikian tí jehe sín kjaxin.

Tjenkayáxin ch'ín Pablo nkexrí sátsji ch'án

⁵ Tí sátsjia la t'ichjánxin ts'atsínka janhan estado Macedonia ntá chr'éxin tsjasán ntiha chjasin Corinto. ⁶ Ách'e ntahó chrókuitoná chrók'uatínkajia

nchakuen kin. **A** ntá jahará chrókjuínkĩtsará tí janhan tió sátsjia ókjé chr'éxin. ⁷ Méxra tjínkakonhya chrók'uatšínkoá chrótsjahará ó. Náhi. Tjínkavan chrókuitona iso yaon tí tjeorá ntiha tí Ìnchéni chrókjuanjon kjuachaxin. ⁸ Kjánchó tsitona chjasin Éfeso tsjixrakájia yaon Pentecostés, ⁹ kixin ntihi antsi chonta kjuachaxin chrókjuít'a xra kuènte Ìnchéni la ko jina chrókónhen tí xra kjónté nchónhya chojni nínkakonna.

¹⁰ **A** ntá tí tsjiji ch'ín Timoteo ntiha la antsi jina chrónixjehérá ch'án kixin kjuaxróxin chrók'uejokoará ch'án kixin jehe ch'án kjaxin ch'ehe Ìnchéni xra éxi janhan. ¹¹ Kaín tí jahará chróchonteherá ch'án kjuasáya. Tjínkĩtsará ch'án kixin jina itsi ch'án ntihi tsitsjehe ch'án tí janhan kixin tjéchonhan chrókui ch'án la ko tí í so sín kichó ni.

¹² **A** ntá tí kichó ni Apolos la imá xrjanógha ch'án kixin kjaxin chrókjuijiko ch'án tí í so kichó ni, kjánchó tjinkakonhya ch'án jie. Chr'éxin tsjiji ch'án tió ts'ixranka.

Kjuixixín nixja ch'ín Pablo

¹³ Chrókjuenkayáxinrá la ko chrók'uejotsjehérá. Chróchrakonhyará la ko chrókjuítóehyará tí tinkachónkirá Ìnchéni. ¹⁴ Kaín nkehe chrókjuich'erá la koí chróttjuèhérá kichuárá.

¹⁵ Na ntá kichó ni, ó nohará kixin tí sín kjéhya ch'ín Estéfanos saoxín kuinkáchónki sín tí tan tsaáxin chojni tí estado Acaya, la ko jehe sín kuákja sín xra a tjínkĩtsa sín tí sín kichó ni tinkáchónki Ìnchéni. ¹⁶ Tjínkavan kixin chrókjuinchesteyéhérá tí sín tjínkĩtsa éxi tí jehe sín la ko kaín tí sín ch'e xra. ¹⁷ Chàna kixin ó kui ch'ín Estéfanos la ko ch'ín Fortunato la ko ch'ín Acaico, kixin jahará kjónté tjeohyará. ¹⁸ **A** ntá jehe sín kjuínchechéhe sín asenná éxi kjuínchecháhará sín. Chróchonteherá kjuasáyé chojni xikaha.

¹⁹ Tí sín tójnkotsé estado Asia xraxinkaon sín tí jahará. Kjaxin ch'ín Aquila la ko tjan Priscila la ko tí sín tójnkotsé ntóe sín ima xraxinkaon sín tí jahará kixin tinkachónkirá Ìnchéni. ²⁰ Kaín tí sín kichó ni ntihi xraxinkaon sín tí jahará. Nixjehérá kichuárá kaín rá tsehérá tja kichuárá jnkójina.

²¹ Janhan Pablo xráxinkavan tí jahará ikjian xroon chr'anhánrá la tjaná kjinxián tí letra i.

²² Tí nkexro tjuèhya Ìnchéni Jesucristo la tsjasóte. **A** ntá jeheni, la Ìnchéni xrákiá.

²³ **A** ntá kjuasáyé Ìnchéni Jesucristo mé sintayaonrá ch'án. ²⁴ Tjuahará kaín rá kixin kaín ni tinkáchónkini Cristo Jesús. Amén. Ó tjen.

Tí xroon yóxin ikjin ch'ín Pablo chr'énhen ch'án tí nínko chjasin Corinto

¹ Janhan Pablo mé kjueyána Dios kixin sít'aha Ìnchéni Jesucristo xra, la ko kichó ni Timoteo ikjinni tí xroon i chr'ánhanrání tí jahará nínkoé Dios chjasin Corinto la ko kaín tí í so kichó ni tinkáchónki Ìnchéni tjejorá nkuíxín estado Acaya. ² Kjuasáyé It'éni Dios la ko Ìnchéni Jesucristo chrókuintayaonrá ch'án la ko chrótjáhará ch'án kjuaxróxin.

Tí kjuasóte ch'ín Pablo

³ Tjancheheni kjuasáyé Dios It'é Ìnchéni Jesucristo. Jehe It'éni mé tikonóeheni ch'án la ko xráxín nchechéheni ch'án. ⁴ Jehe ch'án mé nchechéhe ch'án kaín tí jeheni tió tsi ijnko kjuaxróxinhya kixin ntá ts-jachani sinchechéheni í so chojni kjuaxróxinhya ts'atsínka sín éxí yóhe jehe ch'án kjuínchechéhe ch'án tí jeheni. ⁵ Mé xikaha tjejótjasóteni éxí yóhe kjuasóte Cristo ntá kjaxin jehe ch'án imá sinchechéheni ch'án kixin tinkáchónkini ch'án. ⁶ Tjejótjasóteni kixin tí jahará chrókócháxínrá la ko chrókuaáxínrá. A ntá Dios nchechéhe tí jeheni kixin kjaxin jahará chrókócháhará kixin ntá chrókjuachará kjónté chrókjuasóterá éxí tjasóteni jeheni. ⁷ Na mé ó noheni kixin chaxín ntoá tinkachónkirá Ìnchéni kixin ó noheni kixin jnkokón tjejótjasóteni kaín ni ntá kjaxin jnkokón sinchechéhe Dios tí jeheni kaín ni.

⁸ Kíchóni, tjinkaonni kixin chrókónohará kixin nkexrí imá kjuasóteni tí k'uéjóni tí estado Asia. Imá náxrjónhya kjuasóteni la chrókjuachahyani, la k'uitjáyenhenni tí tjenkayáxinni kixin chrók'uaxrxéxinni ntiha naxa chrók'uejóchónni. ⁹ Ó kónoheni kixin chrók'uenxínni ntiha. Mé xikaha kónhenni kixin chrókónoexínni kixin tí jehóni la chrókjuachahyani tíha. Náhi. Chrókuinkáchónkini Dios, mé tí nkexro nchexechón chojni tsík'en. ¹⁰ Jehe Dios mé kjuínchekaáni ch'án la ko naxa sinchekaáni ch'án kixin tí nchónhya nkehe chrók'uenxínni. Méxra ó noheni kixin chaxín jehe ch'án sinchekaáni ch'án ¹¹ tí tjínkítsaráni tjanchehéra Dios kixin tsjinkítsani ch'án. A ntá tí tsjé chojni chrókjuanchehe Dios kixin tsjinkítsani ch'án ntá chr'éxin itsjé chojni tsjanchehe sín ch'án kjuasáyé kixin xikaha jehe ch'án kjuínkítsani ch'án.

Nkeuènte sákuũhya ch'ín Pablo tí chjasin Corinto

¹² Chéheni kixin noheni kixin ntoá k'uéjóni ntihi chjasintajni kjuích'yehyani chojni, mé xikaha k'uéjokoaráni. Ntá jehya kjuachaxin kuènteni kjuachaxínni xikaha. Náhi. Kjuachaxin kuènte Dios mé kjuínkítsani kixin xikaha k'uéjóni. ¹³ Tió chr'ánhanrání xroon, kjinhyani nkehe chrókiénxinhyará. Náhi. Jehó tí nkehe chrókjuínchekuáxínrá chrókiénxinrá. Tjéchonhan kixin chrókiénxinrá jína. ¹⁴ A ntá ó tinkakiénxinrá ntsí kixin tió tsokjan Ìnchéni Jesús tsócháhará kixin xikaha kjuakoqharáni jeheni la ko kjaxin tsóchéheni kixin jahará kuítekáonrá.

¹⁵ Mé xikaha kjuenkayáxian kixin saoxín chrókjuasántsjahará tí jahará kixin chrókócháhará kixin yáya chrókjuasántsjahará. ¹⁶ Kjuenkayáxian janhan chrókjuasántsjahará saoxín tió sáchrókjuia estado Macedonia la ko chrókjuasántsjahará ínaá tió chrókjanxian ntiha. Mé xikaha

chrókuínkítsarána tió sáchrókjuiyá janhan estado Judea. ¹⁷ ¿Á tjenkayáxinrá kixin ntoáhya kjuenkayáxian chrókjuasán ntiha ní? ¿Á tjenkayáxinrá kixin iyó nkehe kjuenkayáxian kixin jnkokoá chróntáxrjan kixin chrókjuasán la ko chrókjuasánhya? ¹⁸ Méxra tjetsjehe Dios kixin xikaha kjuáteheni tí jahará kixin chrókjuijini la ko chrókjuijihyani. ¹⁹ Kixin Cristo Jesús mé Xjeen Dios, na mé tí nkexro kjuakoxin ch'ín Silvano la ko ch'ín Timoteo la ko kjuakoxian janhan tí k'uéjóni ntiha, mé xikahya k'uéchronka ch'án, kjuich'iyahya ch'án ninkehó. Náhí. Kaín nkehe tjakoni kuènte Cristo la chaxín tíha. ²⁰ Kixin kaín nkehe tsíchronka Dios la mé jehe Cristo kjuínchexiteyá ch'án. Mé xikaha tió tjancheheni Dios kjuasáya la mé ntáchroni “Amén, ó nchoxon” kixin tí kjuachaxin kuènte Cristo Jesús. ²¹ A ntá Dios mé kjuínkítsa ch'án tí jeheni la ko tí jahará kixin kaín ni ntoá chrókuínkáchónkini Cristo la ko jehe ch'án mé kjueyáni ch'án. ²² Kjaxin jehe ch'án tsíkjinchekani ch'án xroye, na mé kjuanjon ch'án Nchakuen ch'án tsochóna asénni senó kixin tsonoxénni kixin chaxín ts'áyéheni nkehe chr'éxin.

²³ A ntá tí naxa kjuasánhya janhan chjasánra Corinto éxi kjuenkayáxian la tjetsjehe Dios kixin tjínkakonhya kixin chrókóxakonhanrá tí chrókuéntuáhára tí jahará inaá. ²⁴ Jehya kixin chrókuétuanhánra kixin nkexrí chrókuínkáchónkirá Inchéni kixin ó nõna kixin ntoá tinkachónkirá ch'án. Ó jehí tjínkaonni chrókuínkítsaráni kixin antsí má chrókócháhará.

2

¹ Mé xikaha kjuenkayáxian kixin chrókjuasánhya janhan ntiha inaá tí naxa xrásinrá kjuanínkaon. ² A ntá tí naxa chrókjuíntak'avará, ¿a ntá nkexro chrókjuínchechàna inaá tí chrókjuínchechànahyará jahará kixin janhan kjuíntak'avará? ³ Mé xikaha ikjian tí xroon chr'anhánra senó kixin tjínkakonhya chrókjuasán chrókjuínchekóxakonnará inaá. Náhí. Jahará chrókjuínchechànará. Méxra ó nõna kixin tí chrókóchàna janhan ntá chrókócháhará kaín rá. ⁴ Kjánchó tió ikjian tí xroon a chr'anhánra senó la imá kóxakonhen asenná tsjanka kjaxin. Kjánchó jehya kixin ikjian tí xroon a chr'anhánra kixin chrókjuíntak'avará. Náhí. Ikjian tí xroon chr'anhánra kixin chrókónoaxínra kixin imá tjuahará tí jahará.

Ch'ín Pablo chrókjuínchek'itjáyenhen ch'án tí jie kjuasin tí nkexro a

⁵ A ntá tí nkexro kjuínchexakonna la jehya janhvàn kóxakonna. Náhí. Kaínra kóxakonhanrá. Kjánchó tjínkakonhya tjetóxin tsontáxrjan tíha. ⁶ Na mé itsjé tí jahará nixjehérá ch'án kóyakoterá ch'án kixin chrókjuasinhya ch'án jie xikaha la táhó la ó tjen. ⁷ Ntá jie chrók'uitjáyanhanrá tí jie kjuasin ch'án, chrókjuínkítsará ch'án, kixin tí náhi la ts'itjáyanxin ch'án tí kjuancheníhi. ⁸ Méxra xrjanóghára kixin chrókjuakoxínra inaá kixin chaxín tjuéhérá ch'án. ⁹ Mé xikaha senó ikjian xroon chr'anhánra kuènte tí kjuanínkaon chontará kixin tsononaxian á chrókjuínchexiteyànará kaín nkehe chrókuétuanhánra. ¹⁰ A ntá tí sijnchek'itjáyenhenrá ijnko chojni ichrén jie kjuasin ch'án ntá janhan kjaxian sintak'itjáyanhan ch'án tí jie kjuasin ch'án. Méxra tí chaxín k'ué ichrén jie chrókjuíntak'itjáyanhan ijnko chojni la ó kjuixin kjuíntak'itjáyanhan ch'án tí jie a kixin chrók'uejorá jnkójina. Kjaxin xikaha tjetsjehe Cristo, ¹¹ kixin ntá tí ch'ín Tsochren na tsjachahya ch'án tsjachroe ch'án tí jeheni, kixin ó noheni nkexrí ch'ia tí ch'ín Jínahya.

Kóxakonhen ch'ín Pablo tí kjuák'e ch'án chjasin Troas

¹² A ntá tió kjuasán tí chjasin Troas chrókjuàkua tí tan jína kuènte Cristo la antsí xránjon kjuachaxin kixin chrókónhen xra kuènte Ìnchéni. ¹³ Kjánchó náxrjónhya tjen asenná kixin k'uitjahya tí kichó ni Tito. Ntá tuénxín níxjahá tí jehe sín tjejó ntiha ntá sákjuia tí estado Macedonia.

Ntá ó tsjacha sín tsochónta sín kjuachaxin kuènte Cristo

¹⁴ Kjuasáyé Dios kixin xráxín jehe ch'án tjinkjtsani ch'án ntá tjachani kixin chóntani tí kjuachaxin kuènte Cristo Jesús. Ntá kaín nketí sáchrókjuini mé tjakoxinni tí tan kuènte ch'án éxi ijnko nkehe xraxé náxrjón chrókóxrjínhin kaín xín chojni. ¹⁵ Kaínni la éxi yóhe tí xraxé náxrjón kuènte chjincó chrókjuanjon Cristo chrók'uáyéhe Dios kixin tíha mé chrókónoexín tí sín tsaá la ko kjaxin chrókónoexín tí sín ts'itjáyan. ¹⁶ Tí sín ts'itjáyan mé tókaxraxéhe sín éxi ts'enxín sín tí xraxé a. A ntá tí sín tsaá mé tóxrjínhin sín kixin ijnko nkehe tsjanjon kjuachón tíha. ¿Xá nkexro chrókjuacha chrókjuich'e tíha? ¹⁷ A ntá jeheni mé xrinchekjihyani nkexrí nixja itén Dios éxi ch'e nchónhya chojni chrókjuacha sín chichaon. Náhí. Kaín asenni tjakoni itén Dios kixin kjueyáni ch'án sich'eheeni Cristo xra, la ko tjetsjehe ch'án tí xra tjejóch'eni.

3

Tí pacto nixin

¹ A ntá xikaha ntáchroni, ¿á tjenkayáxinrá kixin kjuankixinni tsochronkani inaá kixin jína tí jeheni, o á t'ichjánxin kixin chrókjuijikoni xroon kixin tsonoaxínrá kixin jína tjakoni? ¿Xá t'ichjánxin kixin chrókjuanchaharáni ijnko xroon tsochrónka kixin jína tjakoni? ¿Xá t'ichjánxin kixin chrókjuanchaharáni ijnko xroon tsochrónka kixin jína tí jeheni éxi ch'e í so sín? ² Náhí. T'ichjánxienhyani nijnko xroon kixin jahará mé éxi yóhe ijnko xroon tsikjinni xrikoni chróchóxin la ko chrókjuinchekuáxin kaín xín chojni tsonoexín sín kixin jeheni mé ch'eheeni Cristo xra. ³ T'ikon sín noxín kixin tí jahará mé éxi yóhe ijnko xroon tsikjin Ìnchéni Cristo xrikoni nchekuáxin chojni. Kjánchó jehya ntahni tsikjinxin ch'án. Náhí. Kjuanjon ch'án Nchakuen ch'án tjechón chontará la kjaxin jehya xrotabla tsikjin ch'án. Náhí. Táha la asén chojni.

⁴ Ntá ó noheni chaxín tíhi kixin tinkáchónkini Dios kixin tjinkjtsani Cristo. ⁵ Jehya kixin ó jehí chróchóntani kjuachaxin kixin chrókjuich'eni xra. Náhí. Kaín tí xra ch'eni na Dios tjetjanjon kjuachaxin. ⁶ Jehe ch'án mé kjuanjon ch'án kjuachaxin kixin chrókjuich'eheeni ch'án xra tsochenkani chojni tí tan nixin kui. Tíha jehya ijnko nkehe tsikjin chojni chrókjuinhexiteyéheeni. Náhí. Tíha mé kjuachaxin kjuanjon Nchakuen Dios kixin sinchexiteyéheeni ch'án. Kixin tí ley ntáchro kixin its'en chojni. Kjánchó tí Nchakuen Dios la mé tjanjon kjuachón.

⁷ Tí ley tsik'óna letra xrotabla mé imá kuikao t'inkaséyan la mé kjuachahya tí sín israelita chrókomá sín ikon ch'ín Moisés kixin imá tjákiní tsjehe ikon ch'án.* Kjánchó tí t'inkaséyan kjuankixin ó tinkák'anka. Méxra tí xikaha tí ley tjanjon kjuach'éni mé kuikao ijnko t'inkaséyan imá náxrjón. ⁸ ¿á chrókójehya kixin antsí má t'inkaséyan kuikao tí tan nixin kuixin kjuachaxin Nchakuen Dios? ⁹ Méxra xikaha tí ley k'uéchónta kjuachaxin jíé kjónté ntáchro kixin its'en chojni, a ntá antsí má jína tí tan chrónka

* 3:7 Éxodo 34.29–35

Dios kixin tsotjuáxin tí jie chóntani. ¹⁰ Méxra tí kjuachaxin k'uéchónta tí ley k'uék'etōan ósé la ninkehó tóyóehya tí kjuachaxin jie tjen jie. ¹¹ A ntá tí k'uéchónta kjuachaxin tí nkehe séhyó ntá tinkákjeje, a ntá antsí má chónta kjuachaxin tí nkehe tsjak'e jnkochrín.

¹² Mé xikaha tí nkehe tsejehya tjejóchónhenni ntá chrakonhyani chronkaxinni kaín tíha. ¹³ Ch'ehyani éxi kjuích'e ch'in Moisés k'uikjèxin ch'án ka ikon ch'án kixin tsonoehya tí sín israelita kixin ó tinkákjeje tí t'inkaséyan chónta ch'án. ¹⁴ Kjánchó jehe sín naxa kienxínhya sín la ko naxa xikaha tjejó sín ijie tió nchekuáxin sín tí nkehe k'uituenhen sín ósé kixin tí ka naxa t'inkákonhen tí chrókienxín sín kixin naxa kjuínhya tí ka. A ntá tí chrókuinkáchónki sín Cristo la ntá jehe ch'án chrókjuatsen tí ka a. ¹⁵ A ntá kjónté jie tió nchekuáxin sín tí xroon tsíkjin ch'in Moisés la tjejó sín éxi naxa t'inkákonhen tí ka a kixin tienxínhya sín. ¹⁶ A ntá tió ijnko chojni tsjankixin tsinkáchónki Ìnchéni ntá tí ka t'inkákonhen la tsjin. ¹⁷ A ntá Ìnchéni mé Nchakuen Dios tíha. A ntá tí tjen Nchakuen kuènte Ìnchéni Dios la ntiha kohya nkehe ts'inkákonhen. ¹⁸ A ntá jeheni kaín ni kohya nkehe t'inkákonhen ikonni la mé tjejóni éxi xrosenta tjákiní tí kjuachaxin kuènte Ìnchéni, na mé tinkák'ixitóxin tí kjuaxrexinkaon kuènténi kixin antsí chrókóyóhèni éxi tí jehe ch'án kixin antsí tsochóntani tí kjuachaxin kuènte ch'án, kixin Ìnchéni, na tí Nchakuen a, mé xikaha ch'e xra.

4

¹ Méxra xikaha chrókóxrjéhyani chrókjuich'eni tí xra kjuanjon Dios kixin jehe ch'án kuikonóeheni ch'án. ² Ó kuítóhèni kaín nkehe imó la ko kaín nkehe chrókósuèxinni, la ko ch'iyehyani kíchó ni, la ko tjitoxienhyani itén Dios. Náhi. Jehí tí nkehe ntoá chrónkani. A ntá xikaha chrókónoexín kaín xín chojni kixin ntoá tjejóni éxi tjinkaon Dios. ³ A ntá jeheni mé tjakoni tí itan tsaáxinni, kjánchó iso sín kjónté xikaha tinhin sín mé tienxínhya sín kixin xráxin jehe sín la ts'itjáyan sín. ⁴ A ntá jehe sín kuítekakonyha sín, a ntá tí dios kuènte chjasintajni mé kjuínchek'ikonhya sín kixin chrókienxínhya sín, kixin ntá chrók'uikonhya sín tí t'inkaséyan kuènte tí tan kuènte Cristo, mé tí nkexro chónta kjuachaxin, a ntá jehe ch'án la mé yóhe éxi tsjehe Dios. ⁵ Tió tjakoni na mé jehya tjakoni kixin jeheni chrókuitekáonrá. Náhi. Chronkaxinni kixin chrókuitekáonrá Jesucristo mé Ìnchéni la ko chrónkani kixin jeheni mé t'aharáni xra tsjinkítsani tí jahará kixin tjuahará Jesús. ⁶ Na mé jehe Dios k'uetōan kixin tí xrohi ts'inkaséyanxín tí sítié a na mé kjaxin jehe ch'án kjuanjon ch'án xrohi ts'inkaséyanxín nkaya asénni kixin chrókjuachani chrókónoheni nkexrí tjen tí kjuachaxin jie kuènte Dios t'inkaséyanxín Ìnchéni Jesucristo.

Nkexrí chrók'uejóni kixin tinkáchónkini Ìnchéni

⁷ A ntá tí cuerpo kuènteni la yóhe ijnko chj tsík'óna nchetje tjinká nkehe tjete, mé xikaha ts'ikon sín kixin tí kjuachaxin jie chóntani la kujxin tí tjen Dios kixin jehya kuènteni tíha. ⁸ Chóntani nchónhya kjuaxikaon la kjónté tsjachahya tí kjuaxikaon a. Imá tóxakonhenni la kjónté titóehyani tinkáchónkini ch'án. ⁹ Kjónté chónkíhi sín tí jeheni kjánchó Dios la kuítóehya ch'án tí jeheni. Kjónté k'uékoni kjuítsínkani kjánchó kjuínchek'itjáyanhyani sín. ¹⁰ Kjónté nketí sájtjini xráxin chrók'uenxinni éxi k'uénxin Ìnchéni Jesús, kixin xikaha tjakoxxinni

tí kjuachón chóna ch'án. ¹¹ Méxra jeheni naxa tjejóhónni la xráxin siín kjuaxikaon kixin chrók'uenxínni kixin tinkáchónkini Jesús kixin kjaxin xikaha chrókjuakoxínni tí kjuachón chóna ch'án kjónté chrók'uen tí cuerpo chóntani. ¹² Kjónté xikaha chrók'uenxínni, a ntá jahará tsochon-tará kjuachón.

¹³ Éxí ntáchoo tí xroon itén Dios tsíkjin sín ósé kixin: “Kuítékavan ntá xikaha xrxanka.”* A ntá kjaxin jeheni kuítékaonni ntá xikaha chrónkani. ¹⁴ A ntá ó noheni kixin Dios mé tí nkexro kjuínchexechón tí Ìnchéni Jesús kjaxin sinchexechón ch'án tí jeheni koíni. A ntá jehe ch'án tsjiko ch'án tí jeheni la ko tí jahará kjaxinrá tí tjen Dios. ¹⁵ Kaín tíha kónhen kixin jahará jína chrók'uejoxinrá. La ko kjaxin xikaha nchónhyará chrók'uayéhérá tí kjuasáyé Dios, ntá antsí tsjé chojni ts'ejóni tsjancheheni Dios kjuasáyé kixin tí kjuachaxin jié chóna ch'án.

¹⁶ Méxra chrókóxrjéhyani kjónté tinkákjeje tí cuerpo chóntani kixin ó noheni kixin jnkojnko yaon Ìnchéni mé tjenchek'ánkí ch'án tí kjuaxrexinkaon kuénténi. ¹⁷ A ntá tí nkehe tjasótexínni tí tjejóni ntihi jie mé tíha la tjoka ts'atsínka la ts'áyèxinni ijnko nkehe imá jié la ko í tsjejehya tíha. ¹⁸ Ntá chrókómáhyani tí nkehe siín chjasintajni ntihyó. Náhi. Chrókjueyáni tí nkehe naxa t'ikonhyéni kixin tí nkehe t'ikonxínni ikonni na mé nkehe chóxin tsjeje. A ntá tí nkehe t'ikonhyani mé nkehe tsjejehya.

5

¹ A ntá ó noheni kixin tió tsjeje tí cuerpo chóntani na mé yóhe éxí ijnko nchia tjoka tsjeje, a ntá Dios mé kjuích'éna jnkojnko nchia nixin ts'itjáyanhya jnkochríxin nkaya nkajni kixin jehya tja chojni kjuích'énaxín tíha. ² Tí naxa chóntani cuerpoéni ntihi la náxrxónhya tjejóni tjinkaonni tí ókjé cuerpo tsochóntani nkaya nkajni ³ kixin táha ts'inkáyani éxí ijnko ka, ntá xitjahya chrókótjóchínni. ⁴ Tí naxa tjejóhónxinni tí cuerpo chóntani jie la náxrxónhya tjejóni tjasóteni. Tjinkakonhyani xikahó chrókuitøekoni tí cuerpoéni ntaxin, na mé tjinkaonni kixin tí cuerpoéni ntaxin chrókónixin ó. Ntá chrók'uitjáyan tí chrók'uenxínni la ntá chrókuakjani tí kjuachón nixin. ⁵ Dios mé kjuenkayáxin ch'án kixin xikaha sinchekítønhenni ch'án ntá kjuínchekítønhenni ch'án tí Nchakuen ch'án kixin ntá chrókónoexínni kixin chaxín ts'áyéheni tí nkehe tsjanjon ch'án.

⁶ Mé xikaha xráxin ó noheni kixin tí naxa tjejóni ntihi naxa chóntani cuerpoéni ntá naxa tjejókohyani Ìnchéni. ⁷ A ntá jeheni tjejóni tinkáchónkini ch'án kjónté t'ikonhyani ch'án. ⁸ Kjánchó jeheni na imá chéheni tjinkaonni chrókuítøheni tí cuerpoéni chóntani jie kixin sáchrókjuini tí tjen Ìnchéni, chrók'uejókoni ch'án ntiha. ⁹ Méxra xikaha tjinkaonni chrókjuinchechéheni Ìnchéni kjónté naxa chróchóntani cuerpoéni ntihi la o í chróchóntahyani, la naxa chrókuinkáchónkini ch'án. ¹⁰ Kixin kaín ni t'ichjánxin tsochjineheni Cristo tí tjen ch'án t'etøan ch'án kixin nkehe ts'áyéheni jnkojnkonni kixin nkerí xra kjuích'eni á jína o náhi tí naxa k'uéchóntani cuerpoéni ntihi chjasintajni.

Tí tan tjanjon kjuaxróxin

¹¹ Méxra xikaha noheni chróchrakønhenni tí kjuachaxin jié kuénte Ìnchéni ntá tóxakonhenni tjakøheni chojni kixin chrókuinkáchónki sín

* 4:13 Salmo 116.10

ch'án. Ó nohe Dios kixin nkexrí tjejóni la ko tjinkaonni kixin kjaxinrá chrókónohará. ¹² Jehya kixin chrótjonkará ínaá kixin jína ch'eni xra. Náhi. Jehí ntáchroni kixin síin nkehe chrókóchàxinrá kixin tí jeheni ntoá chrónkani kixin chrókónohará nkexrí chrókjuáteherá tí sín imá nchehen sín kixin imá náxrjón nixja sín a ntá xraxinkakonhya sín tí jie chóna asén sín. ¹³ A ntá tí lóconi na mé tíha kixin tjinkaonni chrókjuich'eheni Dios xra. A ntá tí jehya lóco tí jeheni la mé jehí tjinkaonni chrókjuinkitsani tí jahará. ¹⁴ Kixin Cristo la imá tjuèhe kaín xín chojni ntá t'etuenhenni ch'án kixin ó noheni jína kixin jehó ch'án k'uenyákonhenni ch'án tí ijjeeni kaín ni kixin éxí kjaxinni ik'uénni kaín ni kixin jehe ch'án k'uenyákonhenni ch'án. ¹⁵ Mé xikaha Cristo mé k'uenyákonhen ch'án kaín ni. Na ntá jeheni tjejóchónni mé tjejóchónxinni ch'án la jehya tí kjuaxrexinkaon kuènteni chrókjuinchexiteyéheni. Náhi. Chrókjuinchexiteyéheni ch'án kixin k'uenyákonhenni ch'án la ko xechón ch'án ínaá kixin tsaáxinni ch'án. ¹⁶ A ntá jie jeheni tjenkayáxinhanyi éxí tjenkayáxin chojni chjasintajni ó. Kjánchó senó k'uéchóxinni Cristo kixin nkexrí kjuák'e ch'án chjasintajni ó, a ntá jie la xikahya t'ikonní ch'án. ¹⁷ Méxra tí nkexro tinkáchónki Cristo mé k'óna íjko chojni nixin. A ntá kaín nkehe ntaxin la ó kjuixin k'uátsínka la ntá jie la kaín nkehe ó k'óna nixin.

¹⁸ Kaín tíha mé tí xra kjuích'e Dios. Jehe ch'án mé kjuanjon ch'án kjuaxróxin kixin jína chrók'uejókoni ch'án kixin k'uenyákonhenni Cristo. Ntá jie jeheni k'uáyéheni tí xra tsochénkani í so chojni kixin kjuaxróxin chrók'uejóko sín ch'án. ¹⁹ A ntá ó noheni kixin Dios ichr'án Cristo k'uenyákonhenni ch'án, ntá xikaha Dios tjinkaon kixin kjuaxróxin chrók'uejóko ch'án tí sín chjasintajni, la ko jehe ch'án tahya ch'án kuentá kaín tí jie chóna chojni, a ntá jeheni k'uáyéheni tí xra tsjakoni itén ch'án. ²⁰ Ntá jeheni kjuachaxin kuènte Cristo chronkaxinni kixin Dios chrónóaxinrá ch'án tí jeheni. Mé xikaha tí kjuachaxin kuènte Cristo chrónóaxinráni kixin kjuaxróxin chrók'uejokoará Dios. ²¹ A ntá Cristo la ninkehó jie kjuasinhya ch'án, ntá ijjeeni k'uénxin ch'án. Kjánchó Dios k'uíkon kixin éxí tí jehe Cristo chóna ch'án jie, kjuenkayákonhen ch'án kaín tí jie k'uéchóntani.

6

¹ Ntá kaín ni jnkokoá ch'eheni Dios xra, ntá chrónóaharáni kixin chrókjuítóehyará tí kjuasáyé Dios kjuakuaxinrá ch'án. ² Kixin ntáchro xroon itén Dios kixin:

A ntá tí yaon kóxrjínhin Dios kuínhin ch'án tí nkehe chronòa chojni;

Tí yaon tsaáxin chojni mé kjuínkítsa ch'án tí jehe sín.*

A ntá jie ó kui tí yaon kjueyá Dios. A ntá jie ó kui tí yaon tsaáxin chojni.

³ Ch'ehyani ninkehó nkehe jínahya kixin ntá chrók'uántaxínhin sín tí xra tjejóch'eni. ⁴ Náhi. Kaín nkehe ch'eni tjáqoxinni kixin ch'eheni Dios xra. Na mé tjachani tónínkakhanyi kjónté nchónhya nkehe tjasótéxinni, la kjónté ichrén nkehe t'ichjánxinhinni, la kjónté ichrén kjuaxikaon sín. ⁵ Na mé k'uékonní, la k'uéjóchjinani, la nchónhya k'uíxite chojni kóninkakhenni sín, la ko tí xra kjuích'eni la imá xra. Kjaxin k'uájuahyani la ko kjónehanyi. ⁶ Tjáqoxinni kixin tjóá tjenkayáxinni, la ko tjáqoxinni kixin ó noheni tí nkehe chaxin, la ko tjáqoxinni kixin tónínkakhanyi, la ko tjáqoxinni kixin ch'eni tí jína. La ko chóntani Nchakuen Dios, la ko

* 6:2 Isaias 49.8

kaín asénni tjuèheni kíchó ni, ⁷ la ko chrónkani tí tan ntoá kuènte Dios, la ko tjakoxinni kixin chóntani tí kjuachaxin kuènte ch'án. Ntoá tjejóni ntá xikaha tsjachani ntá kohya nkehe tsonhenni. ⁸ Iso sín náxrjón nixjehe sín tí jeheni la ko iso sín náxrjónhya nixjehe sín, la ko iso sín jína nixja sín nkexrí tjejóni la ko iso sín t'ántaxínhinni sín. Iso sín t'ikon sín tí jeheni éxí chojni ch'ia la ko iso sín ntáchro sín kixin jeheni chojni ntoá chrónka. ⁹ Iso sín ntáchro sín kixin chónhya sín tí jeheni kjónté chóxinni sín. Iso sín tjinkaon chrók'óyánni sín la kjónté naxa tjejóchónni. Kjuateni sín na kjónté k'óyanhyani sín. ¹⁰ T'áváni la kjónté xraxinkaonni kixin Ìnchéni t'ayakonhenni la chéhe. Éxí nòani jeheni na kjónté chénkani itsjé chojni tí itén Dios tsaáxin sín éxí chróchjéhe sín ijnko nkehe imá tjete xikaha. Éxí chóntahyani ninkehó nkehe la kjónté la kaín nkehe chóntani.

¹¹ Kíchóni tjejórá chjasin Corinto, ntoá chrónkani nixjहारáni la ninkehó t'ayahyaráni la mé kaín asénni tjuahará. ¹² Jehya jeheni chrók'uitjáyan kixin chrótjuahará. Náhí. Jahórá t'itjáyan kixin chrótjuéhérá tí jeheni. ¹³ Janhan xrjanóahará éxí ijnko it'é xjan chrónóghé tí xjeen ch'án kixin kjaxinrá kaín asánrá chrótjuéhérá tí jeheni éxí tjuèheni tí jahará.

Jeheni mé éxí ninkoe Dios tjechón

¹⁴ Chrók'uitohyará tí sín tinkáchónkihya Ìnchéni kixin tíha mé éxí yóhe ijnko yunta, jnkokónhya koxinta. ¿La ko nkexrí chrókóyóhe ijnko chojni ó kótjóá la ko ijnko chojni naxa náhi? ¿La ko nkexrí chrókóyóhe tí t'inkáséyan la ko tí sítié? ¹⁵ Xitjahya chrók'uixin kjuaxróxin tí tjen Cristo la ko tí Tsochren. Xitjahya ts'ejóko kíchó ijnko chojni tinkáchónki Cristo la ko ijnko chojni tinkáchónkihya. ¹⁶ Xitjahya chrók'uito tí ninkoe Dios la ko tí nkehe tsikjanoya. Kixin jeheni mé tí ninkoe Dios tjechón, kixin jehe ch'án tsintáchro ch'án kixin;

Ntaha tsjak'é la ko xritjak'é tí tjejó tí jehe sín,
 a ntá janhan mé ts'óna Dios kuènte sín
 la ko jehe sín mé ts'óna chjasin kuèntana.†

¹⁷ Méxra xikaha kjaxin ntáchro Ìnchéni kixin:
 T'axrjekjanxínrá tí jehe sín na ókjé tjejórá;
 tsehyará tí nkehe tjuáhya.

A ntá janhan mé ts'ayáha tí jahará.‡

¹⁸ Ntá janhan mé ts'óna It'ará,

a ntá jahará ts'ónará xjanna ntoa la ko xjanna chjin,
 ichro Ìnchéni Dios chóna kaín kjuachaxin.§

7

¹ Mé xixaha kíchó ni, tí nkehe i mé tsintáchro Dios tsjanjon ch'án. Méxra t'ichjánxin kixin tjóá chrók'uejóni, chrókuítóheni kaín nkehe chrókjuinckejita tí cuérpoéni la ko tí asénni. Ntá chrókóxakonhenni chróchrakonhenni Dios la t'ichjánxin chrókjuancheheni ch'án chrókjuinchetjóáni ch'án kixin jehó ch'án chrókuinkáchónkini.

Tí sín Corinto kjuitoxinhin sín ntje sín

² Chrókjuánjonrá kjuachaxin kaín asánrá chrókuinhínrá tí nkehe chróchronkani. Ninkehó jie chóntehyani ninkexró, la ko kjuích'iyehyani

ninkexró. ³ Jehya ntáchroni tíhi kíxin chrókuékará jie. Náhi. Ó nohará kíxin ósé chrónkani kíxin kaín asénni tjuèheni tí jahará kíxin jnkokoá chrók'uejóni la ko jnkokoá chrók'ueni. ⁴ Janhan la imá tjikosáyahará tí jahará la ko imá chàna kíxin jína tjejorá. Kjónté kaín nkexrí tjejótjasóteni na imá chàna.

⁵ A ntá tió kjuíjini estado Macedonia la xitjahya chrók'ok'éheni kíxin nkuíxín siín chojni nínkakönhenni la ko kóxakonhen asénni. ⁶ Kjánchó Dios na mé tí nkexro nchechéhe asén kaín tí sín tsíkóxrjé mé kjuínchechéhe ch'án asénni kíxin ó kjuíji ch'ín Tito. ⁷ Ntá jehya kíxin tí kjuíji ch'án ó chrókóchéxinni. Náhi. Chéheni kíxin jahará kjuínchechéhérá ch'án. Chrónka ch'án kíxin imá tjinkáonrá chrók'uíkonrá tí janhan la ko chrónka ch'án kíxin tóxakonhanrá kíxin tí jie kjuásinrá la ko kjaxin tóxakonhanrá chrókjuich'erá tí nkehe kuétuñhanrá. Mé kuñhan kaín tíha ntá antsí má kóchána.

⁸ Kjuíntak'ávára kíxin tí xroon kjian chr'anhánrá la kjónté la ntá jie í tóxakonnahya. Na mé senó kóxakonna ntá k'uíkuañ kíxin tí xroon kjuíntaxakonhanrá kjánchó kánhyó isé tíha. ⁹ Ntá jie chàna, kjánchó jehya kíxin tí nkehe kjuíntak'ávára. Náhi. Chàna kíxin tí kjuat'ává a ntá ikjanrá kuinkachónkirá Dios. Kjuachará kjónté tí kjuat'ává ntá kjanrá kuinkachónkirá Dios la kóxrjínhin ch'án. Méxra xíkaha jeheni la ninkehó nkehe jínahya kjuít'aharáni. ¹⁰ A ntá tí kjuat'ává kjuacha chojni ntá sinchechéhe sín Dios kíxin kjuitóxinhin sín tí nkehe tjenkayáxin sín la ntá xíkaha mé tsaáxin sín ntá í ts'ávahya sín chr'éxin. A ntá tí sín kuítóehya tí nkehe kuènte chjasintajni mé t'ává sín kíxin táhó ts'enxín sín. ¹¹ A ntá jahará kjuachará k'uátsínkará tí kjuat'ává éxi kóxrjínhin Dios, a ntá jie kónohará kíxin jína tjejorá, la ó ntoá tjenkayáxinrá, ntá jie chrónkaxínrá nkexrí k'uékjich'erá. Tí nkehe kuinhínrá ntá kjuínchekónínkaonrá la ko kjaxin kjuínchechrakonrá. Ntá chr'éxin ntá tjinkáonrá chrók'uíkonrá tí janhan. Ntá kjuínchekjasóterá tí nkexro kjuasin jie. Kaín tíha kjuákoxinrá kíxin chontahyará ninkehó jie tí nkehe tsíkónhen. ¹² A ntá tí nkehe kjian la jehya kíxin kjuenkayáxian janhan kuènte tí ch'ín kjuasin jie, la ko jehya kíxin kjuenkayáxian janhan kuènte tí ch'ín k'uává ó. Náhi. Íchá jína kíxin jahará chrókjuákoxinrá nkayakon Dios kíxin imá tóxakonhanrá kíxin jeheni xíkaha k'uetoanni. ¹³ Mé xíkaha kjuich'erá ntá kóchéheni.

Kjánchó antsí má kóchéheni kíxin k'uikonni kíxin kóchéhe ch'ín Tito kíxin jahará kaín rá kjuínkítsará kíxin kjuaxróxin kjuák'e ch'án ntiha. ¹⁴ Janhan k'uétjanka tí ch'ín Tito kíxin chàna kíxin tí jahará la jehya kjuach'ia tíha la kósuànahya. Náhi. Kaín nkehe k'uétjonkará la chaxín la ko kjaxin kaín nkehe k'uéntátjan ch'ín Tito la chaxín kíxin chéheni kíxin kuítékáonrá. ¹⁵ A ntá jie antsí tjuahará ch'án kíxin xráxinkaon ch'án kíxin nkexrí jína kuítékáonrá la ko nkexrí imá kjuikosáyehérá ch'án kjuánjonrá kjuachaxin kuítóhe ch'án ntiha. ¹⁶ Ntá imá chàna kíxin ó nòna kíxin jahará sijnchexiteyànará.

8

Antsí má chrókjuínkítsa sín kíchó sín

¹ Ntá jie kíchó ní, tjinkaonni chrókónohará kíxin nkexrí tí sín tinkáchónki Ìnchéni tójnoktsé sín estado Macedonia kjuákoxin sín nkexrí tí kjuasáyé Dios. ² Kjónté nchónhya nkehe tsíkónhen sín la kjónté la kóchéhe sín; la

ko kjónté nòà sín la ǎntsí má kjuínkĩtsa sín tí sín í so éxí chojni chóna itsjé chichaon xikaha kjuích'e sín. ³ Chaxín k'uíkuañ kíxin kjuanjon sín éxí tí nkehe chóna sín la ko ǎntsí má xikjanjon sín inaá kíxin xikaha kjuenkayáxin sín. ⁴ Nchónhya chrónóehē sín tí jeheni kíxin chrókjuanjoni kjuachaxin kíxin chrókjuinkĩtsa sín tí sín kichó ni tinkáchónki Dios. ⁵ Na mé ǎntsí má kjuanjon sín la xikahya kjuenkayáxinni kíxin xikaha chrókjuanjon sín, na mé senó kuinkáchónki sín Ìnchéni, ntá kjuixin ntá kjuínchexiteyēhe sín tí jeheni éxí tóxrjínhìn Dios. ⁶ Méxra chrónóehēni tí ch'ín Tito kíxin chrókjuenájín ch'án chichaon tí tójnokotsérá ntiha éxí kjuankíxin ch'án senó. ⁷ A ntá jahará la tjákoxinrá jína kíxin ǎntsí tinkachónkirá Ìnchéni, la ko ǎntsí k'uitjará chrónkaxínrá itén Dios, la ko ǎntsí k'uitjará nkehe kuènte Dios, la ko ǎntsí chontará kjuachēhe, la ko ǎntsí tjuèhérá tí jeheni. Méxra xikaha ǎntsí chrókjuákoxinrá tí xra jína chrókjuínkĩtsará tí sín kichó ni.

⁸ Jehya ntáxrjan tíhi kíxin chrókuétuanhanrá xikaha. Náhi. Jehí tjínkavan chrókónohará nkexrí jína kjuích'e tí í so sín kíxin kjaxínrá chrókjuákoxinrá kíxin tjuèhérá kichuárá. ⁹ Kíxin ó nohará nkexrí tí kjuasáyé Ìnchéni Jesucristo kíxin k'uéríko ch'án la ntá kónòà ch'án kíxin imá tjuèhe ch'án tí jahará kíxin tí kónòaxín ch'án mé jahará kóríkóxinrá.

¹⁰ Méxra tsotjonkará tí nkehe tjenkayáxian janhan kuènte tí xra i kíxin jahará tí nánó k'uátsínka kjuankíxinrá kjuínkĩtsará kjuánjonrá nkehe, la mé jehya kíxin ó jehí kjuínkĩtsará sín. Náhi. Kjaxin imá kócháhará kíxin kjuínkĩtsará sín. ¹¹ A ntá jie chrókjuintaxín chrókjuánjonrá éxí tí chrókjuachará chrókjuánjonrá éxí xrankíxín tsíkateherá tsjínkĩtsará tsjánjonrá nkehe. ¹² Mé xikaha tí chaxín tjinkaon jnkojín chojni chrókjuanjon sín nkehe, ntá tsoxrjínhìn Dios tí tjanjon sín tí nkehe chóna sín. Dios la tjanchahya ch'án tí nkehe chóntahya chojni.

¹³ Jehya kíxin xikaha tí í so sín chrók'uejó sín jína kíxin tí nkehe kjuínkĩtsará sín la ntá jahará chrók'uitjáyán nkehe t'ichjánxinhanrá. Náhi. ¹⁴ Chrókójína chrókóyóhe chróchontará nkehe jnkokón. A ntá jie jahará chontará tí nkehe chóntahya tí í so sín. A ntá í jnko yaon jehe sín tsochóna sín tí nkehe tsochontahyará. Chrókjuínkĩtsará tí sín chóntahya kíxin chróchontará nkehe jnkokón. ¹⁵ Éxí ntáchro xroon itén Dios kíxin: “Tí sín kjuenájín sín nchónhya la mé xèhya sín ninkehó, la ko tí sín kjuenájín sín tsjéhya na mé kjónté tsjéhya la kjuacha tí nkehe kuicháxinhin kjuenájín sín.”*

Ch'ín Tito la ko tí sín k'uájiko ch'án

¹⁶ A ntá kjuasáyé Dios kíxin kjuínchexraxinkaon ch'án tí ch'ín Tito ntá kóxakonhen ch'án éxí tóxakonna kíxin tí jahará. ¹⁷ Ntá kóxrjínhìn ch'án tí nkehe k'uetuenhenni ch'án, la ntá kjaxin jehe ch'án kóxakonhen ch'án kíxin á jína tjejorá, ntá jehe ch'án tjinkaon ch'án chrókjuijitsjehe ch'án tí jahará.

¹⁸ Kjaxin k'uetoanni sátsjikotoxin tí ch'ín Tito í jnko kichó ni, na mé kaín chjasin tí sín tinkáchónki Ìnchéni mé chóxin sín ch'án kíxin tí xra jína tjech'e ch'án tjako ch'án tí tan tsaáxinni. ¹⁹ La ko kjaxin tí sín kaín tí njnko ntihi kjueyá sín tí nkexro kichó ni kíxin sátsjikotoxin ch'án tí jeheni tí xra sátsjikoni tí chichaon tsjikénhenni tí sín nòà. Na mé tí xra ch'eni kíxin xikaha tsjikosáyeheni Ìnchéni la ko xikaha tjákoxinni

* 8:15 Éxodo 16.18

kíxin tjinkaonni chrókjuinkítsani sín. ²⁰ Tjinkaonni kíxin tsokohya nkexro chrók'uántaxínhinni kíxin tí chichaon xrenájín kjuíjikoni. ²¹ Méxra tjinkaonni chrókjuich'eni tí nkehe ntoá, jehya jehó tí nkehe chrókóxrjínhín Ìnchéni. Náhí. Kjaxin tjinkaonni kíxin chrók'uikon chojni kíxin jína tjejóh'eni.

²² La ko kjaxin k'uetuenhenni sín sátsjikotoxin sín í jnko kichó ni, na mé ijnko nkexro nchónhya nkexrí kjuákoxin ch'án kíxin chéhe ch'án chrókjuinkítsa ch'án kíxin itsjé xra kjuích'e ch'án. A ntá jie antsí má chrókjuich'e ch'án xra kíxin chóxin ch'án tí jahará. ²³ A ntá jnkojín sín tsjanhankí sín kíxin nkehe tí xra ch'e ch'ín Tito la mé chenkará sín kíxin jehe ch'án mé tjinkítsa ch'án tí janhan kíxin xikaha tjinkítsa ch'án tí jahará. A ntá tí tsjanhankí sín kíxin nkehe tí xra ch'e tí í so kichó ni ntá chenkará sín kíxin tí sín kaín njnko k'uetuan sín kíxin sátsji sín ntiha kíxin mé xikaha tsjikosáyehe sín Cristo. ²⁴ Méxra chrókjuákoxinrá kíxin chaxín tjuèhérá kichuára kíxin tsonohe tí sín kichó ni í so njnko la ko kjaxin tsonohe sín kíxin chaxín chéheni kíxin tí jahará.

9

Tí chichaon xrenájín tsjinkítsa tí sín kichó ni

¹ A ntá tí xrenájín chichaon kíxin tsjinkítsará tí sín kichó ni tinkáchónki Ìnchéni, la t'ichjánxienhya tsokjian xroon tsochr'anhánrá ² kíxin xráxin kónona kíxin jahará tjinkáonrá chrókjuinkítsará, na mé xikaha chàna la tjanka tí sín tjejó estado Macedonia kíxin jahará chojni estado Acaya desde tí nánó k'uátsínka xráxin tjejorá tjinkáonrá chrókjuinkítsará. A ntá antsí tsjé sín estado Macedonia tjinkaon sín chrókjuinkítsa sín kíxin jahará xikaha kjuákoxinrá nkexrí tjinkáonrá chrókjuinkítsará. ³ A ntá ichr'an tí sín kichó ni kíxin tjinkavan kíxin tsontáchrohya sín kíxin chaxínhya tí nkehe jína ntátjan sín senó. Mé xikaha jahará chrókóyaxínhanrá chrókjuinkítsará tí sín kichó ni éxi ntátjan sín senó. ⁴ Kíxin tí chrókjuasánkian iso tí sín Macedonia ntá tí chrókónoxín kíxin naxa kohya nkehe tsjánjonrá ntá chrókósuèheni tí jeheni kíxin imá chóxinni kichó ni la ko kjá chrókósuàhará kjaxinrá. ⁵ Méxra xikaha tóna kíxin t'ichjánxin tsontátjan tí sín kichó ni kíxin sátsji sín tsitónxin sín ntja tsjijitsjehe sín tí jahará senó tsjinkítsa sín kíxin tsjenájínrá tí chichaon tsintáchorá senó kíxin chrókjuánjonrá. A ntá chrókóyaxínhanrá kíxin chrókjuánjonrá tí chichaon éxi ijnko nkehe chaxín tjinkáonrá chrókjuánjonrá la jehya éxi ijnko nkehe chrókjuanchaharáni afuerza.

⁶ Xráxinkáonrá kíxin tí nkexro k'uenka tsjéhya na mé tsjéhya tsotjá. A ntá tí nkexro k'uenka itsjé mé tsotjá itsjé. ⁷ Méxra jnkojnko chojni chrókjuanjón tí nkehe kjuenkayáxixín sín asén sín. Na mé tjinkakonhya Dios kíxin kénhya asénni chróchjéheni ch'án nkehe, kíxin Dios mé tjuèhe ch'án tí nkexro chéhe tjanjon nkehe. ⁸ A ntá Dios chónka kaín kjuachaxin jíé ntá tsotjáhará ch'án kaín nkehe t'ichjánxinhanrá kíxin tsochontará nkehe tsochjehérá í so chojni chóntahya kíxin xikaha sich'erá kaín xra jína.

⁹ Éxi ntáchro tí xroon itén Dios kíxin:

Tí nkexro t'óxikayéhe ch'án itsjé nkehe nchekitonhen ch'án tí sín nòna na mé nunca tsjejehya tí xra jína ch'e ch'án.*

¹⁰ Dios mé tjanjon noatje kíxin ts'inka la ko jehe ch'án mé tjanjon nkehe sineni, la ntá kjaxin tsotjáhará ch'án kaín nkehe t'ichjánxinhanrá

* 9:9 Salmo 112.9

la ko jehe ch'án sinchek'ánkí ch'án tí nkehe ts'ènkará la ko jehe ch'án sinchek'ánkí ch'án tí xra jína tjejoch'erá. ¹¹ A ntá tsochontará kaín nkehe tjehe kíxín ntá antsí tsjachará tsjínkĩtsará tí í so sín kíchó ni. A ntá xíkaha tsjijikenhenni sín tí nkehe tsochjehérá tí sín kíchó ni ntá tsjanchehe sín Dios kjuasáya. ¹² Kíxín xíkaha chrókjuínkĩtsará tí sín kíchó ni na jehya kíxín chrók'uáyéhe sín tí nkehe t'ichjánxínhin sín ó, la mé kjaxín chróchjéhe sín Dios kjuasáya. ¹³ Mé xíkaha tsjanchehe sín Dios kjuasáya kíxín tí nkehe kjuánjonrá kjuáoxínrá kíxín nchexiteyéhérá tí tan kuènte Cristo. Kjaxín tsjikosáyehe sín Dios kíxín tí í so nkehe kjuánjonrá k'uáyéhe sín la ko tí nkehe k'uáyéhe í so chojni. ¹⁴ La ko jehe sín tsjanchehe sín Dios kíxín tsjínkĩtsa ch'án tí jahará kíxín jehe sín tjuahará sín kíxín t'íkon sín kíxín tjáoxínrá kíxín tí kjuasáyé Dios chontará. ¹⁵ Tjancheheni Dios kjuasáya kíxín kjuínchekĩtonhenni ch'án ijnko nkehe imá jié tsaáxinni la tsjachahyani tsochronkaxínni kaín tíha.

10

Kjuachaxin ch'óna ch'ín Pablo kíxín tsík'óna ch'án apóstol

¹ Janhan Pablo tió xrjanóahará nkehe la jnkójina xrjanóahará la mé tjáoxian éxí toxrjínhin Cristo. Ntáchrórá kíxín tió tjèn tí tjejorá ntiha la tósuàna, a ntá tí kjín tjèn la imá jièna, ichrorá. ² Méxra xrjanóahará kíxín tí tsjasántsahará tjínkakonhya kíxín chrókjuínchekóninkáonráni kíxín ntá tsonínkakonhánrá jnkójínrá kíxín tsékaráni jié kíxín ixria éxí chojni chjasintajni ó, tsixrorá. A ntá xra ó tsjasán tsjentuáha tí jehe sín. ³ Chaxín tjejóni éxí chojni ó, na kjánchó tió tjanjonni la tjanjonhyani éxí tjanjon chojni chjasintajni. ⁴ Kíxín tí nkehe xraáni tjanjonxinni jehya nkehe kuènte chjasintajni. Náhí. Táha la kjuachaxin kuènte Dios la tíha mé tsjacha sinchek'itjáyan kaín kjuachaxin kuènte tí Jínahya. ⁵ Na mé tsjacha sinchek'itjáyaní tí nkehe ntoáhya tjenkayáxin chojni la ko kaín nkehe nchehnkexín sín t'ínkákonehén kíxín chrókóchóxin chojni Dios. A ntá kjuachaxin kuènte Cristo tjákohe ni kaín chojni kíxín ntá tsítóhe sín kaín nkehe ntoáhya tjenkayáxin sín, a ntá chrókuitekakonhen sín tí jehe ch'án ⁶ la ko tjejóchónhenni sinchekjasóteni kaín tí sín ntiha naxa tjínkakonhya sín chrókjuínchexiteyá sín tí tsjixin tsonoheni kíxín á chaxín tsjachará sínchexiteyará jína.

⁷ A ntá jahará tékaráni jié kíxín tí nkehe t'íkonrá ó. A ntá tí nkexro tjenkayáxin kíxín chaxín ch'ehe Cristo xra la mé kjaxín chrókjuátsoan kíxín kjaxinni jeheni la ch'ehe ni Cristo xra. ⁸ A ntá tí chrókjuíntahnkena ntsí kíxín tí kjuachaxin chonta janhan ntá chrókósuànahya kíxín Inchéni kjuanjón tí kjuachaxin kíxín chrókjuínkĩtsa tí jahará kíxín antsí chrók'uitjará kuènte Dios, la mé jehya kíxín chrókjuíntak'itjáyanrá. ⁹ Tjínkakonhya kíxín chrókjuíntachrakonxínrá tí xroon chr'anhánrá. ¹⁰ Kíxín ntáchró sín kíxín ixra la ko jièhe tí nkehe ikjian janhan, a ntá tí chrókjuak'é ntiha la jiènahya la ko kánhyó chonta janhan kjuachaxin tí nixja janhan. ¹¹ Kjánchó tí nkexro xíkaha ntáchró chrókónohe ch'án kíxín jnkokón nixja janhan éxí nixja tí xroon tsíkjian kjónté ikjín tjèn la ko kjónté tí chrók'uejóni ntiha.

¹² Tjínkakonhyani chrókjuenkayáxinni kíxín chrókóyóhe ni tí í so sín ntáchró sín kíxín jína tí jehe sín. Jehe sín mé lontj sín kíxín ncheyóhe sín asén sín í so chojni. ¹³ A ntá jeheni la chrókjuínchehnkexínhyani

ijnko xra jehya xra kuènteni. Dios mé kjuako nketí sich'eni xra la kjuanjon ch'án kjuachaxin kixin kjuíjini kjuích'eni xra tí tjejorá chjasin Corinto. ¹⁴ Jehya kixin chróchóntahyani kjuachaxin chrók'uetuanhanráni. Tí chaxín jehya jeheni saoxín kjuíjini tí tjejorá ntá xikaha chróchóntahyani kjuachaxin. Ntá náhí, kixin jeheni saoxín kjuíjini ntiha kjuako haráni itan kuènte Cristo. ¹⁵ Chrókjuinchehnkexínhyani ijnko xra kjuích'e ókjé chojni éxí xra chrókjuich'eni jeheni. Náhi. Tjinkaonni kixin antsí chrók'uitjará tsinkachónkirá Ìnchéni ntá xikaha la antsí chrókjuinkítsani tí jahará kixin jehó tí xra k'uáyéhe ni tjejóch'eni. ¹⁶ Kjaxin tjinkaonni chrókjuakoni tí itén Ìnchéni chrókuaáxin chojni í so chjasin sáchrókjuini la ko kjaxin chrókjuinchehnkexínhyani tí xra chrókjuich'e ókjé chojni.

¹⁷ A ntá jnkojín sín tjinkaon sín chrókjuinchehnke sín ntá jehó chróntáchro sín kixin kjuachaxin Ìnchéni mé chóna sín.* ¹⁸ Kixin tóxrjénhya Dios ijnko nkexro jehó chróntáchro kixin jína ch'án. Náhi. Ìnchéni mé tsontáchro ch'án nkexro chaxín jína.

11

Ch'in Pablo la ko tí sín chaxínhya apóstol

¹ Tjínkavan chrókuinhínra ntsí tí lontina. ¿Á chrókjuachará chrókuinhínra nkehe tsontáxrjan? ² Janhan tjínkakonhya kixin í jnko nkexro chrókuinkachónkirá. Kjaxin xikaha tjínkakonhya Dios. Ó ikjuá Cristo kixin chrókuakja ch'án tí jahará. Tjínkavan chrókjuánjuan tí jahará chrókuakja tí jehe ch'án éxí yóhe ijnko tjan tjarisoá chrókótehe jnkokoá xii. ³ Tóxakonna kixin éxí tí konche tí kjuach'ia xriko ntá kjuích'iyeye tjan Eva, ntá xikaha kjaxinrá jahará tsitohérá sit'ayahará ókjé chojni ntá tsitohérá tí nkexrí kaín asánra tinkachónkirá Cristo. ⁴ A ntá jahará cháhará tjánjonrá kjuachaxin tjiji ókjé chojni ntiha chronkaxín sín í jnko Jesús ókjé jehya éxí tí chronkaxínni jeheni, la ko kjaxin cháhará k'uayéhérá ókjé nchakuen jehya tí Nchakuen Dios k'uayéhérá sao, la ko cháhará chrókuítekáonrá ijnko nkehe ókjé chrókuaáxinrá jehya éxí tí nkehe kuítekáonrá senó. ⁵ Ó nòna kixin chaxínhya ninkehó sínkíhyana janhan, a ntá antsí sínkí tí sín chréhérá jahará, ichrorá. ⁶ Kjónté kánhyó náxrjón níxja janhan la jehya kixin kánhyó chrókónòna chrókjuákua. A ntá tjákoáxinrá jahará tíhi kixin kaín nkehe t'a.

⁷ ¿Á ntoáhya kjuít'a janhan xrjan kaxián tí tan tsaáxinni kixin ninkehó kjuáncháya chrókjuacha la ko éxí ijnko chojni nòé kjuak'é janhan kixin tjínkavan chrókjuínkítsará chrók'uitjará? ⁸ Tí sín í so njnko kjuínkítsana sín kjuanjon sín chichaon k'uayáha kixin tsjak'é tsjákohará jahará. ⁹ Tí kjuak'é tí tjejorá jahará la kjónté t'itjáyan nkehe la ninkexró kjuáncháya nkehe. Jehó tí sín kichó ni kjuixín estado Macedonia kjuíkao sín tí nkehe t'ichjánxinna. Méxra tjínkakonhya kixin chrótjahará xra tí jahará la ko xikaha naxa jtét'a jie. ¹⁰ Xikaha chaxín choxian tí tan chaxín ntoá kuènte Cristo, a ntá kohya ninkexró nkuixín estado Acaya tsjacha tsakitsjena tí kjuachéhe chonta. ¹¹ ¿Nkekuènte xikaha ntáxrjan? ¿Á xikaha ntáxrjan kixin tjuahyará tí jahará ní? Náhi. Dios la ó nohe kixin imá tjuahará.

¹² Kjánchó ó jehí tsjintaxín xikaha sít'a kixin tjínkakonhya tsjánjuan kjuachaxin kixin nchehnkexín tí sín ixri ntáchro kixin jnkokón kjuachaxin

* 10:17 Jeremías 9.24

chóna tí nkehe tjàkua la ko tí nkehe tjako sín. ¹³ Kjànchó jehe sín ijnko apóstol chaxínha mé ch'ia sín ncheyóhó sín éxí chojni kjuéyá Cristo. ¹⁴ Jehya ijnko kjuachrakon tíha kíxin kjaxin ch'ín Tsochren kjaxin xíkaha ncheyóhe ch'án éxí ijnko ángel kuènte tí t'inkaséyan. ¹⁵ Méxra xíkaha kjaxin kuènten tí sín ch'ehe tí Jínahya xra mé ncheyóhe sín tí sín jína. Ntá tsjixixín mé tsjasótexín sín tí xra jínahya kjuích'e sín.

Kjuasóte ch'ín Pablo kíxin apóstol tí jehe ch'án

¹⁶ Ntáxrjan ínaá kíxin nijnkorá chrókjuenkayáxinrá kíxin lócona. Kjànchó tí xíkaha tjenkayáxinrá la tjtóhéra tsonixja janhan éxí lócona kíxin kjaxinna jína chrókjuintahnke ntsí. ¹⁷ Tí xíkaha ntahnkexián la jehya kjuachaxin kuènte Ìnchéni ntáxrjanxian tíha. Náhi. Jehí éxí ijnko chojni lóco nixja. ¹⁸ A ntá nchónhya chojni síin nchehnkexín sín tí nkehe nohe sín a ntá jie la kjaxin janhan sintahnke. ¹⁹ Kíxin jahará ntáchrora kíxin imá nohará ntá cháhará tjejó tí sín lóco. ²⁰ Kíxin tjánjonrá kjuachaxin t'etuñhanrá sín la nchexiteyéhérá sín la ko takitsjahará sín tí nkehe chontará la ko ch'éna asén sín éxí ìnché sín tí jahará, la ntá kjoníehyará sín la ko tjate sín nkaya ikonrá. ²¹ Kjóté chrókósuàna tsontáxrjan kíxin jeheni la kánhyó jiehe k'uetñhanrání.

Kjànchó tí nkehe nchehnkexín sín la janhan ntahnkexián kjaxinna, kjóté ntáxrjan tíhi éxí ijnko chojni lóco. ²² ¿Á chojni hebreo jehe sín? Kjaxin janhan. ¿Á chojni israelita jehe sín? Kjaxin janhan. ¿Á k'uaxrjeníxin sín ch'ín Abraham? Kjaxin janhan k'uaxrjeníxian ch'án. ²³ Ch'ehe sín Cristo xra kjànchó janhan la antsí má la jehe sín la kénhyó, kjóté ntáxrjan tíhi éxí ijnko chojni lóco. Janhan la antsí má kjuít'a xra a ntá jehe sín la kénhyó, la ko antsí má kjuak'échjina ntóechiso a ntá jehe sín la kénhyó, la ko antsí má kjuatena chojni a ntá jehe sín la kénhyó, la ko nchónhya veces k'uíxin kjuaxikaon kíxin chrók'uén. ²⁴ In'ó veces tí sín judío kjuatena sín la ko treinta y nueve tí kjuatjoté. ²⁵ Níya kjuatexinna sín inta la ko í jnko vez kjuak'e sín xro. Níya k'uániánkí ntabárcó ntá ntá ijnko yaon la ko ijnko tie tjénkataván ntayaon. ²⁶ K'uájia má, k'uíkuan kjuaxikaon chrók'uénxian tí ntarío la ko chrók'óyánna tí xíchee la ko chrók'óyánna tí sín chjasenná la ko tí sín tsíkjixin ókjé. K'uíkuan kjuaxikaon tí chjasin jie la ko tí nteje la ko tí ntayaon la ko chrók'óyánna tí sín chaxínhya tinkáchónki Ìnchéni. ²⁷ Kóxrjéna kíxin tí xra kjuít'a la ko itsjé nkehe náxrxónhya kónna. Itsjé tie kjuak'échrinhya jína la ko itsjé yaon ik'uén kjinta la ko ik'uén ntá la ko itsjé yaon kjónghya ninkehó la ko kókinna la ko chontahya kaná.

²⁸ Kjóté kaín tíha la ko í so nkehe kónna la mé jnkojnko yaon imá tóxakonna kíxin kaín tí sín tójnko tsé sín kaín tí njnko. ²⁹ ¿Á tjen jnkojínra níhará? A ntá tí xíkaha la koína éxí nina. ¿Á tjen jnkojínra kjuásinra jie? A ntá tí xíkaha la kjaxin tóxakonna. ³⁰ Tí chrókjuintahnkexian nkehe la mé tjínkavan kíxin jehó chrókjuákoxian kíxin kánhyó jieña. ³¹ Dios, It'é Ìnchéni Jesucristo, na mé tí nkexro chrórxaxinkaonni jnkochrínín mé ó nohe ch'án kíxin chaxín tí nkehe ntáxrjan. ³² Ntá tí kjuak'é chjasin Damasco la mé tí ch'ín gobernador kjuíchehe ch'ín rey Aretas xra mé k'uetñenhen ch'án tí sín soldado kíxin tsochónhen sín tí ntója tí chjasin kíxin chrótséna sín chrókjuak'échjina. ³³ Kjànchó síin nkexro k'uínkajinxinna ijnko ntaxra

ijnko ventana tí tját'ò k'uantatjen chjasin la mé xíkaha kuaána, tséhyana sín.*

12

Tí nkehe k'uíkón ch'ín Pablo

¹ Ninkehó tsjachahya tí nkehe tsoxrjanka kuèntana ó. Íchá jína tsoxrjanka tí nkehe k'uíkuan la ko tí nkehe kjuínchenòna Ìnchéni. ² Choxian ijnko nkexro tinkáchónki Cristo. A ntá k'uátsínka catorce nánó sátsíkji ch'án tí níxin nkajní. Nonahya á sátsíkji ko ch'án cuerpo kuènte ch'án o asén ch'án ó. Jehó Dios mé nohe. ³ Méxra ó nòna kixin xíkaha sátsíkji ch'án la ntá nonahya á koí cuerpo kuènte ch'án o asén ch'án ó. Jehó Dios mé nohe. ⁴ A ntá sátsíkji ch'án nkajní. La ntá tí palabra kuínhin ch'án la kohya kjuachaxin nijnko chojni tsochronka. ⁵ Jína chrókjuíntahnkexián kixin xíkaha kónhen tí nkexro a. A ntá tí chrókjuíntahnkexián kixin kjuachaxin kuèntana la jehya jína tíha. Íchá jína chrókjuákoxián kixin janhvàn la chontahya kjuachaxin. ⁶ Tí chrókjuíntahnkexián tí nkehe kònna la chrókólócohyana kixin chaxín tí nkehe chróxrjanka. Kjánchó xíkaha t'a kixin tjínkakhonhya kixin xíkaha chrókjuenkayáxin chojni kixin antsí jína janhan. Náhí. Tjínkavan kixin tí xra t'íkon sín la ko tí nkehe tinhin sín mé chrókjuenkayáxixín sín kixin á jína tí janhan, tsixro sín.

⁷ Méxra chrókjuíntahnkexinhyana ntá xíkaha xránjon kjuachaxin kixin chrók'uayáha ijnko kjuatjoté éxí ijnko ch'í kuikjiáte cuerpo kuèntana mé ijnko nkehe tsík'etunhen ch'ín Tsochren ikui kjuínchekjoténa. ⁸ Iní veces xrjanóaha Ìnchéni kixin chrókjuatsen ch'án tí kjuatjoté chonta. ⁹ Kjánchó ntáchro Ìnchéni kixin jehó tí kjuachaxián ch'án chrókjuachaxián janhan. Kixin tí kjuachaxián ch'án antsí tsjakoxín chojni fuértehya. Méxra ntá chàna kixin fuértehyana kixin ntá xíkaha tsjakoxián tí kjuachaxin kuènte Cristo. ¹⁰ Méxra chàna kjónté fuértehyana la ko kjónté t'ántaxína sín la ko kjónté t'ichjánxinna nkehe la ko kjónté chónkina sín chrók'óyánna sín la ko kjónté siín kjuaxikaon chrókjuasótexinna kixin tí tinkachónkia Cristo. Chàna kixin fuértehyana na mé fuérte janhan kixin Cristo tinkachónkia.

Tóxakonhen ch'ín Pablo kixin tí sín tjejó nínko chjasin Corinto

¹¹ ¿Á lócona kixin xíkaha xrjanka? Kjánchó jahará kuitekákonhyará ntá xíkaha xrjanka. Jahará chróchronkará xíkaha kixin jína janhan. Jehya kixin kánhyó sínkina la ntá tí sín chréhérá la antsí sínkí sín. Náhí. Kjónté janhan la chaxín ninkehó sínkíhyana. ¹² Kjuásian itsje kjuaxroan jié la jína kjuak'é kónínkakhonhya kjuákoxián kixin chaxín janhan ijnko nkexro tsíkjeyá Ìnchéni. ¹³ ¿Xá k'uíkuan tí jahará éxí kánhyó sínkírá a ntá tí í so nínko la antsí sínkí sín kixin tí kjuasán janhan la ninkehó xra tjaáhyará? A ntá tí xíkaha ntoáhya kjuít'a la tónínkakhonhyará.

¹⁴ A ntá ijie ó yaxinna tí níxin vez chrókjuasántsjahará la ko tjaáhyará ninkehó xra. Janhan la tjéyáhya tí nkehe chontará. Tí nkehe tjéyá janhan la mé jahará kixin jahará éxí yóhe xjanna t'íkuan. Méxra tí sín it'é xjan chrókjuenájín sín chichaon chrók'uayakuénxín sín xjeen sín. Jehya xra kuènte tí xjan chrókjuenájín xjan chichaon chrók'uayakuénxín sín tí it'é xjan. ¹⁵ Tóxakonnahya kjónté chrókjuíntakjeje kaín nkehe chonta janhan o

* 11:33 Hechos 9.23–25

kjónté chrók'ueñxian kixin tí jahará la jína chrók'uejorá. A ntá janhan imá tjuahará la kjánchó éxí tóna janhan kixin jahará kánhyó tjuèherá tí janhan.

¹⁶ Méxra kjónté janhan tjaáhyará ninkehó xra la kjónté xikaha ntáchrará kixin kjuít'ayahará, ichrorá. ¹⁷ ¿Xá kjuít'ayahará kixin jnkójín sín ichr'an kjuíjitsjehe sín tí jahará? ¹⁸ Kjuáncháha tí ch'ín Tito kixin tsjijitsjehe ch'án tí jahará la ko kjaxin kuétuanhan tí í jnko kichó ni sátsjikotoxin ch'án. ¿Á kjuít'ayahará ch'ín Tito ní? ¿Á chaxínhya jína k'uéjóni yóini ntiha kixin jnkokón Nchakuen Dios chóntani?

¹⁹ ¿Á tjenkayáxinrá kixin xikaha kjuáteheni kixin chóntani jie ní? Kjánchó xikahya. Dios tjetsjehe kixin nixjani éxí chojni tinkáchónki Cristo. Kichóni tjuahará la kaín tíha ntáxrjan kixin tjínkavan kixin antsí chrókuinkachónkirá Ìnchéni. ²⁰ Tóxakonna kixin tió tsjasántsahará la tsqxrjinnahya nkexrí tjejorá la ko kjaxinrá tsqxrjíanhyará tí nkehe tsontáxrjan. Tóxakonna kixin naxa ts'ixin kjuanínkaon la ko naxa ts'ixin kjuachjínnoxínhin la ko tsoninkákonhénrá kichuára la ko chrókuétóanrá jahorá la ko naxa tsinkachónkirá kjuach'ia la ko naxa ts'ántaxínhínrá kichuára la ko naxa chontará kjuahnke la ko jnkokoáhya tsjenkayáxinrá. ²¹ Tóxakonna kixin tió tsjasántsahará inaá la tí Dios kuéntana mé sinchesuána tí tjejorá la ntá imá tsotsjanika kixin itsjérá tsíkjasinrá jie tí ósé la naxa titoéhyará tí nkehe tjuáhya ch'erá la ko naxa titoéhyará chontará chojni chjin ókjé tjásinkoará jie la ko titoéhyará kaín tí í so nkehe jínahya k'uékjich'erá ósé.

13

Nhexraxinkaon ch'án sín la ko tsjixixín nixja ch'án

¹ A ntá jie la níyaxín tsjasántsahará. A ntá tí kaín nkehe tjínkáonrá tsonóna la mé chróchrónka yaá o iy'á chojni tsík'ikonxín kon sín tí nkehe tsíkónhen. ² Nixjahá tí sín tsíkjasin jie ósé, la ko nixjahará kaín rá kixin kjónté ikjín tjèn la inaá nixjahará éxí nixja tí kjuak'é k'uéjóni tí iyó kjuasántsahará kixin tió tsjasán inaá la í tsikonóahya tí sín kjuasin jie. ³ Jahará tjínkáonrá tsinhínrá á chaxín níxjaxian kjuachaxin kuénte Cristo. Jehya kixin Cristo tsjachahya tsjakoxin ch'án tí kjuachaxién ch'án tí tjejorá ntiha. Náhi. Chaxín tjakoxin ch'án tí kjuachaxin chóna ch'án tí tjejorá ntiha. ⁴ Chaxín tí k'ueñxin ch'án tí ntacruz la mé éxí chóntahya ch'án kjuachaxin. Kjánchó ijie tjechónxin ch'án tí kjuachaxin kuénte Dios. Kjaxinni jeheni éxí kjuák'e ch'án k'uéchóntahyani kjuachaxin la ntá ijie tinkáchónkini tí jehe ch'án la tjejóchónxinni tí kjuachaxin kuénte Dios kixin jína tsjinkitsani tí jahará.

⁵ Jahará chrókjueñkayáxinrá á nchoxon tjejorá, á kaín asánrá tinkachónkirá Ìnchéni. ¿Á noahyará kixin tjejokoará Jesucristo? A ntá jahará tsonohará á chaxín tinkachónkirá o náhi. ⁶ Kjaxin tjínkavan chrókónohará kixin jeheni la jehya chojni chaxínhya tinkáchónki Ìnchéni. ⁷ Nixjeheni Dios kixin chrókuítóehya ch'án tí jahará kixin ninkehó nkehe jínahya chrókuich'erá. Jehya kixin chrókuakoxinni kixin jína tí jeheni. Náhi. Jehí tjinkaonni kixin jahará chrókuich'erá nkehe jína. Ántosénni kjónté tsóntáchro sín kixin chóntani jie. ⁸ Ninkehó nkehe chrókuich'eni kixin chrókuinçek'itjáyanni tí nkehe chaxín. Kaín nkehe ch'eni la tjikosáyeheeni tí nkehe chaxín. ⁹ Méxra chrókochéheni tí t'ichjánxinhya imá chrók'ueñoanni, tí chaxín jína chrók'uejorá. Ntá naxa tsonixjeheni

Dios kixin chrókjuixraká chrók'uejorá ntoá. ¹⁰ Mé xikaha ikjian tíhi senó naxa tsjasántsjáhyará ntiha kixin ntá tió tsjasán la ts'ichjánxinhya naxa s̄nchekóninkáonrána tsoníxjaxiān tí kjuachaxin chonta janhan. Kixin Ìnchéni mé chjina tí kjuachaxin jehya kixin chrókjuintak'itjáyánrá. Náhí. Kjuanjon ch'án tíha kixin jahará antsí chrókuinkachónkirá Ìnchéni.

¹¹ Na ntá kichó ni, chrókócháhará. Tjéyará kixin jina chrók'uejorá. Chrókjuinchechéhérá kichuárá la jnkokoá chrókjuenkayáxinrá la ko kjuaxróxin chrók'uejorá. Kixin Dios mé ts'ejokoará ch'án. ¹² Nixjehérá kichuárá jnkójina la tsehérá tja kichuárá. ¹³ A ntá kaín tí sín tinkáchónki Ìnchéni ntihi mé xraxinkaon sín tí jahará.

¹⁴ Kjuasáyé Ìnchéni Jesucristo la Dios tjuahará la ko tí Nchakuen Dios tjejókoará tjinkitsará kaín rá. Amén. Ó tjen.

Tí xroon ikjin ch'ín Pablo k'uáyéhe tí sín Galacia

Ch'ín Pablo ikjin xroon k'uáyéhe tí nínko chjasin Galacia

¹ Janhan Pablo mé tsíkjeýána Ìnchéni tsjàkua itén ch'án. Janhan la jehya chojni kjueyána la ko jehya chojni ichr'ánna. Náhí. Kjueyána Jesucristo la ko It'éni Dios, mé tí nkexro kjuínchexechón Jesús. ² Janhan la ko kaín tí sín kichó ni tjejókoni ntili ikjinni tí xroon ts'áyéhe tí nínko síin estado Galacia. ³ Tjancheheni It'éni Dios la ko Ìnchéni Jesucristo kjuasáyé ch'án chrókjuíncheyaonrá ch'án la ko chrók'uayéhéra tí kjuaxróxin kuente ch'án. ⁴ Jesucristo mé k'uenyákonhen ch'án ijéni ntá kuaáxinni la mé ijie tsjachahya tí nkehe jínahya síin chjasintajni tsjachroeni mé xikaha tjinkaon It'éni Dios. ⁵ Tjáncháha Dios kjuasáya jnkochríxin mé xikaha tsoxiteyá. Amén.

Kohya íjnko tan tsaáxinni

⁶ Janhan tóxakonna kixin jahará imá tjoka tinkakìtohéra Dios kjueyará kjuasáyé Cristo. Jahará la tjoka ó kjuankíxinrá chréhéra ókjé tan chrókuaáxinrá. ⁷ A ntá chaxínhya xikaha. Kohya íjnko tan tsaáxinni. Jehí iso chojni tjinkaon nchexakonhanrá la ko tjinkaon sín chrókjuítóxinhin sín tí tan chrókuaáxinni kuente Cristo. ⁸ A ntá tí jnkojín nkexro chrókjuakohará ókjé tan chrókuaáxinrá yóehya tí nkehe ó kjuakoni la tí xikaha la Dios mé sinchekjasóte tí sín kixin xikaha sich'e sín, kjónté á janhan o ijnko ángel chrókuiixin nkaya nkajní. ⁹ Senó xrjanka la inaá tsoxrjanka kixin jnkojín nkexro chrókjuako ijnko tan ókjé tsaáxinrá yóehya tí tan ó kuítekáonrá la mé Dios sinchekjasóte tí jehe sín.

¹⁰ Janhan la tjéyáhya kixin chrókóxrjinhin chojni tí xra t'a. Náhí. Tjínkavan kixin Dios mé chrókóxrjinhin tíha. Tí chrókótjínkavan chrókóxrjinhin chojni ó a ntá xikaha la jehya ijnko nkexro ch'ehe xra Cristo.

Ch'ín Pablo k'óna ijnko chojni tjako itén Dios

¹¹ Jahará kichó ni chrókónohará kixin tí tan tjàkua tsaáxinni mé jehya ijnko nkehe kjuenkayáxin chojni ó. ¹² Jehya chojni chjna tí tan la jehya chojni kjuakona. Náhí. Jesucristo mé kjuakona.

¹³ Jahará la kjá ó kuinhínrá nkexrí k'uékjak'é tió naxa k'uéchraha tí sín judío. Ó nohará kixin k'uéchonkíha tí sín tinkáchónki Ìnchéni la ko tjínkavan chrókjuíntak'itjáyan sín.* ¹⁴ Tí naxa k'uék'ájikian tí sín judío la antsí má k'uénòna. A ntá kaín tí sín chjasenná jnkokón nánó k'uéchontakian sín la kánhyó k'uénohe sín. Antsí má k'uékítekavan tí nkehe k'uék'etóan tí sín tsík'axrjeníxinni. ¹⁵ Kjánchó Dios kjueyána kjónté naxa tókjínahya la kjuasáyé ch'án kjueyána ch'án kixin xikaha kóxrjinhin ch'án. ¹⁶ Kjuínchenòna ch'án nkexrí tjen tí Xjeen ch'án kixin tsjáqoha tí sín jehya judío tí tan tsaáxinni. Tió kjueyána Dios la ninkexró kjuakonahya. ¹⁷ La ko kjáxin kjuítsjáhya janhan tí sín tsík'óna apóstol síin chjasin Jerusalén. Náhí. Janhván tuénxín sákjuia chjasin Arabia, a ntá chr'éxin ikjan tí chjasin Damasco.

* 1:13 Hechos 8.3; 22.4–5; 26.9–11

¹⁸ Á ntá iní nánó chr'éxín na ntá sákjuiyá chjasin Jerusalén kixin tsochioxian ch'ín Pedro la ntá ntiha mé kjuák'ekjian ch'án quince yaon. ¹⁹ Kjánchó k'uíkõnnya tí í so sín apóstol. Jehó k'uíkuañ ch'ín Jacobo kichó Ìnchéni. ²⁰ Ó tjetsjehe Dios kixin tí nkehe ikjian la mé chaxín tíha.

²¹ A ntá chr'éxín ntá sákjuia nó estado Siria la ko Cilicia. ²² A ntá tí sín kichó ni tinkáchónki Cristo tjejó estado Judea la naḡa tjatsoanhyana sín. ²³ A ntá ó kuínhón sín kixin tí nkexro k'uéchréhe sín chrók'óyán sín la ntá ijie mé tjako tí tan chrókjuincheck'itjáyan ch'án. ²⁴ A ntá ijie tjanchia sín kjuasáya kixin janhan ó tinkachónkia Ìnchéni.

2

Tí iso sín kjueyá Jesús k'uáyéhe sín ch'ín Pablo

¹ La ntá catorce nánó chr'éxín ntá sákjuiyá chjasin Jerusalén inaá la sákjuikian ch'ín Bernabé la ko kjaxin ch'ín Tito. ² Sákjuiyá ntiha kixin Dios kjuínchenõna kixin sáchrókjuiyá. Ntiha chjasin Jerusalén la kójnkotsékoni tí sín t'etõan nĩnko ntiha la ntá xrjankaxián nkexrí tí tan tsaáxinni tjákoḡa tí sín jehya judío. Mé xíkaha kjuít'a kixin janhan tjinkavan jnkokoá chrókjuenkayáxinni kixin ntá tí xra kjuít'a la jehya chrókóchónkó. ³ A ntá kjónté tí ch'ín Tito kjuák'ekjian ch'án la jehe ch'án mé griego ch'án la k'uetuñanhya sín kixin chrókua ch'án xroye. ⁴ Á ntá iso tí sín kichó ni chaxínhya tinkáchónki Ìnchéni k'uéjókoni sín la jehe sín imó tsík'ixenhen sín kixin tsáyeheni sín kixin tsotsjehe sín nkexrí kixin tí sín kuente Cristo chóna kjuachaxin. A ntá jehe sín tjinkaon sín kixin chrókjuinhexiteyéhéni inaá tí nkehe k'uék'etõan tí ley. ⁵ A ntá tahyani kuenté nkehe tí tjejóchro sín kixin jehí tjinkaonni kixin tí tan tsaáxinni la ntoá chrókuinkachónkirá jahará.

⁶ A ntá tí sín kónoxín t'etõan kjuakõnahya sín ninkehó. A ntá jeheni la tahyani kuentá á chojni t'etõan õ náhí kixin Dios la jnkokón t'ikon ch'án kain chojni. ⁷ A ntá kjuátsoan sín kixin Dios ó chjina tí xra tjákoḡa tí sín jehya judío tí tan jina éxí yóḡe tsíchjéhe Dios xra ch'ín Pedro tjákoḡe ch'án tí sín judío. ⁸ Tí Dios tsík'etuñenhen ch'ín Pedro ts'óna apóstol tsjakõḡe ch'án tí sín judío la ko kjaxin tsík'etuanna ch'án ts'óna apóstol tsjakõḡa tí sín jehya judío.

⁹ Méxra ch'ín Jacobo la ko ch'ín Pedro la ko ch'ín Juan, mé tí sín t'etõan kuente nĩnko, mé kjuátsoan sín kixin Dios tsíkjanjon tí kjuachaxin. Ntá kóchéhe sín kixin jnkokón ch'eni xra la itsé sín tjani la ko itsé sín itja ch'ín Bernabé. Ntá kjuenkayáxinkoni sín kixin jeheni la tsjakõheni tí sín jehya judío la jehe sín nachrohe tsjakõḡe sín tí sín judío. ¹⁰ Jehó k'uetuñanhyana sín kixin tsoxraxinkaonni la ko tsotjuèheni tí sín nõa la xráxín tóxakonhenni sinchexiteyáni tíha.

Ch'ín Pablo kjuentuéhe ch'án tí ch'ín Pedro chjasin Antioquia

¹¹ A ntá tió kjuíji ch'ín Pedro chjasin Antioquia la kjuentuáḡa ch'án kixin ntoáhya kjuích'e ch'án. ¹² Senó k'uékjineko ch'án iso chojni kjónté jehya sín judío. Ntá ikui iso sín kuixín tí tjen ch'ín Jacobo. A ntá kjuankíxin k'uaxrjenta ch'án la kuítóhe kjónekohya ch'án tí sín jehya judío a. Xíkaha kjuích'e ch'án kixin chrakonhen tí sín kui kixin tí sín neko ch'án naḡa tsíkahya sín xroye. ¹³ Tí iso sín kichó ni judío kjaxin kuítekakohenhen sín tí ch'ín Pedro kjónté ntoáhya kjuenkayáxín ch'án. Kjaxin ch'ín Bernabé la kjuacha kjuachroe sín ch'án kixin tí nkehe ntoáhya kjuích'e sín. ¹⁴ A

ntá tió k'uíkuan kixin tí nkehe kjuakoxin sín la tóyóehya tí chrónka tí tan jina tsaáxinni tjako sín la ntá níxjahá tí ch'ín Pedro nkayakon kaín tí sín tsíkójnko tsé. Ntáxrjan kixin: “Jaha mé ijnko chojni judío la kjónté itjen éxi jehya ijnko chojni judío. ¿A ntá kuente tétueñhén tí sín jehya judío kixin chrók'uejé sín éxi chrókóyóhe tí sín judío?”

Tí sín judío la ko tí sín jehya judío la jnkokón tsaá sín kixin chónka sín fe

¹⁵ Jeheni la k'uaxrjeníxinni chojni judío desde tí kokjéxinni la jeheni na chónkahyani jje éxi tí í so chojni chónhya Dios. ¹⁶ Kjónté xikaha la ó noheni kixin tsotjuáxinhya ijje chojni tí nkehe tsík'etóan ch'ín Moisés. Jehó tí sín tinkáchónki Jesucristo mé tsotjóá ijje sín. Méxra kjaxinni tinkáchónkini Jesucristo kixin tjinkaonni sinchetjóá ch'án ijje kixin titekaonni ch'án. Méxra ninkexró tsjachahya tsotjuáxin ijje sín kixin chrókjuinchexiteyéhe sín tí nkehe t'etóan tí ley.

¹⁷ Tí tjinkaonni tinkáchónkini Cristo kixin tsotjuáxin ijje, a ntá jeheni kjaxin xraxinkaonni kixin ó kjuasinni jje. A ntá í jehya Cristo k'uetóan kixin chrókjuasinni jje. Kjá chaxín náhi. ¹⁸ Tí kuítóheni tí ley la ntá naxa chrókjanni chrókuinkáchónkini tí ley inaá la tíha la ó jje kuénteni tíha. ¹⁹ A ntá tí ley la kjuanchia jje k'uénxian. A ntá ijje la tjéchuán kixin tinkachónkia Dios. ²⁰ Janhan la ó tsík'en kixin ó k'uénkian Cristo. A ntá ijje la janhya tjéchuán. Cristo mé tjechónxin tí janhan. La ntá jje la tjéchónxian tí cuerpo chonta kixin tinkachónkia tí Xjeen Dios kixin jehe ch'án la tjuana ch'án la k'uenyákonhenni ch'án. ²¹ Tjínkakhonhya tsjanoá tí kjuasáyé Dios. Tí chrókótjuáxin ijje chojni tí ley tsík'etóan ch'ín Moisés, a ntá ó chónkó ik'uén Cristo tí xikaha.

3

Tí ley o tí fe

¹ Jahará kichó ni gálatas imá lontirá. ¿Nkexro kjuít'ayahará? Kixin tí nkehe kjuákohará mé kuinhínra kixin Cristo k'uénxín tí ntacruz k'uenyákonhenni ch'án. ² Jnkokoá nkehe tjínkavan chrókjuateherá. ¿Á k'uayèxínra Nchakuen Dios kixin kuítekáonra tí nkehe tsík'etóan ch'ín Moisés o á k'uayèxínra Nchakuen Dios kixin kuítekáonra tí tan chrónkani kuinhínra? ³ Imá lontirá jahará. Tí kjuankixixínra la kuítekáonra kjuachaxièn Nchakuen Dios. A ntá jje la tjínkáonra jahóra sjnchekjintaxínra tí xra. ⁴ ¿Á chónkó kaín tí nkehe tsík'atsínkará? Kjá chrókjuinkítsa chrókjuich'e xra tíha. Jehya chónkó tí nkehe kjuasótiaxínra. ⁵ ¿Nkekuénté kjuanjón Dios tí Nchakuen ch'án la ko kjuasin ch'án kjuaxroan k'uíkonra? Jehya k'uayèxínra tíha kixin kuítekáonra tí nkehe tsík'etóan tí ley. Náhi. K'uayèxínra tí nkehe kixin kuinchónkirá tí tan kuinhínra.

⁶ Ch'ín Abraham kuítekaon tí nkehe k'uetóan Dios ntá Dios k'uíkon kixin jina ch'án. ⁷ Méxra chrókónohará jahará kixin tí sín chaxín tikiínxin sín ch'ín Abraham a mé tí sín a chaxín tinkáchónki Dios. ⁸ Tí xroon itén Dios mé chrónka kixin tí sín jehya judío mé sinchetjóá Dios ijje sín kixin tsinkáchónki sín ch'án. Mé xikaha Dios mé chénka ch'ín Abraham ósé tí tan jina, ntáchro ch'án kixin: “Ijnko nkexro ts'axrjeníxin tí jaha mé tsoyaonxín kaín nación.”* ⁹ Mé xikaha kjaxin kaín sín tinkáchónki Dios mé tsoyaon sín jnkokón éxi kóyaon ch'ín Abraham kixin kuítekaon ch'án.

* 3:8 Génesis 12.3

¹⁰ Kaín sín jehó tinkáchónki tí nkehe tsík'et̄oan ch'ín Moisés la tsjasóte sín ḱixin ntáchro xroon itén Dios ḱixin: “Tsjasóte kaín tí sín tsjachahya sinchexiteyéhe tí nkehe tsík'et̄oan tí xroon chóna ley.”† ¹¹ Ntá ó ntoá ntáchro ḱixin kohya nkexro tsot̄juáxin ijíé sín tí tsitekaon sín tí ley. Xroon itén Dios ntáchro ḱixin: “Tí nkexro tsíkót̄jóá la t̄ejóchónxin sín ḱixin tinkáchónki sín Dios.”‡ ¹² Ntá tí chrókuinkáchónkini tí ley tsík'et̄oan ch'ín Moisés la chrókuinkáchónkiyhani Cristo. Ntáchro xroon itén Dios ḱixin: “Tí nkexro sinchexiteyá tí ley la táhó chrók'uejóchónxin sín.”§

¹³ A ntá Cristo k̄uatsen ch'án kaín tí chrók̄juasót̄exinni tí ley. Tí náhi la chrók̄juasóteni ḱixin chrók̄juachahyani sinchexiteyéheni tí ley. Jehe ch'án k̄juenka ch'án tí ijíeni ḱixin k'uenyákonhenni ch'án. Ntáchro xroon itén Dios ḱixin: “Kaín tí chojni chóna j̄e ts'ejót̄j̄an sín ijnko nta ntá its'en la mé x̄ikaha k'uáyéhe sín tí k̄juanínkaon kuènte Dios.”* Mé x̄ikaha k'uíkon sín tí ch'ín Jesús. ¹⁴ Mé x̄ikaha kónhen ḱixin ntá tí nkehe chénka Dios tí ch'ín Abraham senó mé ts'áyéhe tí sín jehya judío ḱixin k̄juachaxién Cristo Jesús. Ntá x̄ikaha kaín ni ts'áyéheni tí Nchakuen Dios ḱixin tinkáchónkini ch'án mé x̄ikaha tsintáchro ch'án.

Tí ley la ko tí nkehe k̄juanjon Dios

¹⁵ Kíchóni, tíhi mé s̄intayóaxian kuènte chojni ó. Tió ijnko chojni ch'éna ijnko xroon tsochóna firma kuènte sín la ntá xitjahya ts'óxika í jnko nkexro la xitjahya í jnko nkexro sich'éna í so nkehe. ¹⁶ A ntá Dios mé tsíkjo ch'án tí ch'ín Abraham ḱixin tsjanjon ch'án nkehe ts'áyéhe tí nkexro ts'axrjeníxin ch'án. Tí xroon itén Dios ntáchrohya ḱixin kaín nkexro ts'axrjeníxin ch'ín Abraham chrók'uáyéhe tíha. Náhi. Ntáchro ḱixin ts'áyéhe jnkokoá nkexro ts'axrjeníxin ch'án la mé Cristo tíha.† ¹⁷ Méx̄ra xr̄janka tíhi. Dios chénka tí ch'ín Abraham ijnko nkehe chaxín la tsoxiteyá tíha ḱixin éxi yóhe ijnko xroon chóna firma tíha. A ntá cuatrocientos treinta nánó chr'éxin la ntá ikui tí ley k'uéchrónka ch'ín Moisés. La ntá k̄jonté x̄ikaha la xitjahya tsoxika tí nkehe tsíchrónka Dios o tsontáchro chojni ḱixin t̄jetoanhya tí nkehe tsintáchro ch'án.‡ ¹⁸ Tí chrók̄juanjon Dios nkehe ḱixin chrók̄juinchexiteyáni tí nkehe k'uetoan tí ley la ntá tí nkehe tsintáchro Dios senó mé chróxiteyáhya. A ntá Dios mé tsíchénka ch'ín Abraham ḱixin sinchek̄jtonhen ch'ín Abraham tí nkehe k̄juasáyé ch'án.

¹⁹ ¿A ntá x̄ikaha la nkehe t̄sonhen tí ley tsík'et̄oan ch'ín Moisés? Chr'éxin k̄juanjon Dios tí ley ḱixin t̄sonoexínni nkehe tí j̄e t̄jasinni. K'uetoan Dios sinchexiteyéhe chojni tí nkehe tsík'et̄oan ch'ín Moisés tsijia tí nkexro ts'axrjeníxin ch'ín Abraham, mé tí nkexro k̄jueyá Dios ḱixin x̄ikaha tsoxiteyá tí nkehe chrónka ch'án. A ntá tí ley mé chrónka tí sín ángel ntá k'uáyéhe ch'ín Moisés la ó chrónkaxón ch'án. ²⁰ A ntá tí nix̄jeh̄e Dios tí ch'ín Abraham la jehó ch'án la ko jehó Dios la méx̄ra t'ichjánxinhya í jnko nkexro.

Tí x̄ra kuènte tí ley

²¹ ¿A ntá á chrók'uaxrjexín ḱixin tí ley tsík'et̄oan ch'ín Moisés chrók̄juanjonko tí nkehe tsjanjon Dios? K̄já náhi. Tí chrók'uixin ijnko ley chrók̄juanjon k̄juachón la ntá chrókót̄juáxin ijíeni tí chrókuitekaonni tí nkehe t'et̄oan tí ley. ²² A ntá tsintáchro xroon itén Dios ḱixin tí j̄e mé

† 3:10 Deuteronomio 27.26 ‡ 3:11 Habacuc 2.4 § 3:12 Levítico 18.5 * 3:13 Deuteronomio 21.23 † 3:16 Génesis 12.7 ‡ 3:17 Éxodo 12.40

t'etuenhen kaín xín chojni ḱixin ntá tí sín chrókuinkáchónki Jesucristo ntá chrók'uáyéhe sín tí nkehe tsíchrónka Dios.

²³ A ntá tí naxa kuihya Cristo la ntá tí ley la k'uetuenhen kaín ni la k'uejóchónhenni ḱixin chrókónoxín tí nkehe chrókuinkáchónkini. ²⁴ Tí ley la éxí ijnko maestro kuènte chánjan k'uetōan. A ntá jie ikui Cristo la jehe ch'án mé kótjuáxinni ch'án ḱixin titekaonni ch'án. ²⁵ A ntá ijie ó titekaonni Cristo la í nchexiteyèhyani kaín tí nkehe t'etoan tí ley.

²⁶ A ntá jahará ó k'ónará xjeen Dios ḱixin ó tinkachónkirá Jesucristo. ²⁷ Kaínrá kuikitiaxínrá kjuachaxién Cristo mé xikaha jehe ch'án kótjuáxinnrá ch'án. ²⁸ A ntá jehya tjetōan á chojni judío o á chojni jehya judío o á chojni ch'exón xra o á chojni t'etōan o á chojni ntoa o á chojni chjin. Kaínni la ó k'ónani jnkokoá ḱixin tinkáchónkini Cristo. ²⁹ A ntá tí tinkáchónkini Cristo chaxín la ntá tí xikaha ó chaxín tsík'axrjeníxinni ch'ín Abraham la ts'áyèhèni tí nkehe tsíchrónka Dios.

4

¹ Mé xikaha ntáxrjan tíhi. A ntá ijnko chánjan tió chrók'uen tí it'é ntá chrókuitōeko tí nkehe kuènte tí it'é la jehe ch'án la tóyóhó ijnko nkexro ch'exón xra ḱixin tí jehe la xitjahya t'etōan xra kjónté chaxín kuènte ch'án kaín tí nkehe a. ² Siín nkexro t'ayakonhen ch'án la t'etōan tí xra kuènte ch'án tsjixrakája tí yaon tsíntáchro tí it'é. ³ Mé xikaha kónhen tí jeheni. Ḱixin tí naxa k'uéchánjanni la kuítekaonni kaín tí nkehe kuènte chjasintajni. ⁴ A ntá ó kjuixraká tí yaon ntá Dios ichr'án tí Xjeen ch'án ikui ch'án k'uaxrjeníxin ch'án ijnko chojni chjin. La kjuínchexiteyá ch'án kaín tí nkehe tsík'etōan tí ley kuènte Moisés. ⁵ Ikui ch'án xikaha ḱixin tsaáxinni ch'án kjónté senó k'uék'etuenhenni tí ley. A ntá jie la chrók'uáyéhe Dios tí jeheni éxí xjeen ch'án.

⁶ A ntá kjuakoxin Dios ḱixin jeheni mé xjeen ch'án mé ichr'án Dios tí Nchakuen Xjeen ch'án tsochóna asènni la tí Nchakuen ch'án mé t'eyaxín: "It'éni jaha mé kuèntá tí jeheni." ⁷ Méxra xikaha jahará la jehya ijnko nkexro ch'exón xra. Náhí. Jahará mé xjeen Dios. Jahará mé xjeen ch'án la jehe ch'án tjinkaon sinchekitōnhanrá tí nkehe kuènte ch'án ḱixin tinkachónkirá Cristo.

Ch'ín Pablo tóxakonhen ch'án ḱixin tí sín tinkáchónki Inchéni

⁸ Ósé la jahará k'uéchonhyará Dios la kjuínchexiteyéhérá tí dios chaxínhya. ⁹ A ntá ijie la ó choxínrá Dios, o íchá jína chróntáchroni ḱixin Dios la ó chóxin ch'án tí jahará. A ntá jehya jína ḱixin naxa chrókuinkachónkirá inaá tí nkehe chóntahya kjuachaxin la ko tí nkehe chónkó ḱixin tí xikaha naxa chrókjuínchexiteyéhérá tí nkehe tinkáchónki chojni. ¹⁰ A ntá jahará la tjásinnrá kia ichrén tí yaon la ko tí nitjó la ko tí yaon kia tí nánó. ¹¹ Imá tóxakonna ḱixin á chónkó tí xra kjuít'a kjuákohará.

¹² Kíchóni, xrjanóahará ḱixin chrókóyóhara éxí tí janhan ḱixin janhan mé tóyóhe éxí k'uejorá senó ḱixin t'etuenhyani tí ley. Janhan la tékahyará ninkehó jie. ¹³ Ó nohará ḱixin tió saoxín kjuákohará tí tan tsaáxinni la k'uésankahyana ḱixin k'uénina k'uéchonta ijnko chin k'uékjínchekjoténa. ¹⁴ Kjónté xikaha k'uénina la jahará kjuanoáhyará tí janhan la k'uéchontará kjuasáya tí janhan. A ntá jahará la jína kjuánjonrá kjuachaxin kjuak'é ntiha. Éxí chrók'uayéhérá ijnko ángel kuènte Dios o éxí chrók'uayéhérá jehe Inchéni Jesucristo mé xikaha kjuak'é jína ntiha. ¹⁵ Nkehe kónhen tí

kjuachéhe k'uéchontará? Kíxin ntáxrjan kíxin jína tí jahará kíxin tjinkáonrá kjónté ikonrá chrókuakítsjerá chróchjinará tí janhan. ¹⁶ A ntá ijie la, ¿á ninkákõnnará jehó kíxin kuinhínrá tí nkehe ntoá xrjanka?

¹⁷ Tí sín í so a la imá tjinkaon sín tí jahará. Kjánchó ntoáhya tí nkehe tjenkayáxin sín kíxin jehe sín tjinkaon sín kíxin chrókuítoghérá tí jeheni kíxin ntá tjinkaon sín kíxin jahará chróchréhérá tí jehe sín. ¹⁸ Jína chrókótjinkáonrá tí í so sín kjánchó ntoá chrókjuenkayáxinrá kíxin jehya tí chrókjuak'é tí tjejorá ó chrókuítekáonrá jína. ¹⁹ T'ikõnni tí jahará éxí xjeenni. Ijie la imá kjuíncheníhi asenná kíxin tóxakonna tí jahará. Éxí yóhe ijnko ìné xjan tsjoté tjan tió sinchekokjíhi tjan xjeen tjan mé xikaha janhan la naxa tsjasótena kíxin tjínkavan kíxin Cristo chrókjuinchetjóá tí jahará. ²⁰ Chrókójína ijie naxa chrókjuak'é ntiha ntá ókjé nkexrí chrónixjahará ntá ijie la nonahya nkehe tí tjenkayáxinrá.

Kjuíncheyóexín ch'ín Pablo tí tjan Agar la ko tí tjan Sara

²¹ A ntá jie chronkará nkehe. Jahará naxa tjinkáonrá chrókjuínchexiteyéhérá tí ley tsík'etõan ch'ín Moisés la ¿á kuiénhyará nkehe chro tí ley? ²² Ntáchro kíxin ch'ín Abraham mé chóna ch'án yaá xjeen ch'án la ijnko mé xjeen tjan ch'exón xra la tí í jnko mé xjeen ichjién ch'án mé ijnko tjan t'ítuenhya.* ²³ Tí xjeen tjan ch'exón xra kokjíhi ch'án éxí tokjíhi chojni ó. A ntá tí xjeen tí tjan t'ítuenhya la mé ó kokjíhi ch'án kíxin tsoxiteyá tí nkehe tsintáchro Dios. ²⁴ Tíhi mé ntayóaxián. Tí yaá chojni chjin mé tóyóexín tí yaá nkehe tsík'etõan Dios. Tí tjan Agar mé tóyóexín tí ley xránjonxín ijna Sinaí. La ntá tí sín titekaon tíha mé éxí chojni ch'exón xra tí jehe sín kíxin t'ítuenhen sín. ²⁵ Mé xikaha tí tjan Agar mé tóyóexín tí jna Sinaí nación Arabia la tíha tóyóexín tí chjasin Jerusalén kíxin tí chjasin la ko tí sín tjejó ntiha la mé t'ítuenhen sín la ko kaín xjeen sín. ²⁶ A ntá tí chjasin Jerusalén itjen nkaya nkajní la mé t'ítuenhya. Náhí. Mé jeheni la kuènteni tíha. ²⁷ Ntáchro xroon itén Dios kíxin: Jaha chojni chjin chontahya chánjan kjónté chrókócháha. Jaha k'uíkõnhya ninkehó kjuatjoté kíxin kjuínchekokjíehya xjan la kjónté chrókócháha.

Tí tjan kuítsínkehe na mé nchónhya ìnté tjan ts'ikon tjan,

a ntá tí tjan kjuak'eko xì tjan la kánhyó ts'ikon.†

²⁸ Kíchóni jeheni la éxí yóhèni ch'ín Isaac kíxin kaín ni la xjeen Dios kíxin xikaha tsintáchro ch'án. ²⁹ A ntá éxí senó tí xjan kokjíhi éxí tokjíhi chojni ó la jehe ch'án k'uéchónkíhi ch'án tí xjan kokjíexín kjuachaxién Nchakuen Dios. Mé xikaha kjaxin sitónhen jie. ³⁰ A ntá ntáchro tí xroon itén Dios kíxin: “Tétuènhén tí tjan ch'exón xra sátsji tjan la ko tí xjeen tjan kíxin tí xjeen tjan la ts'áyèhya ch'án tí nkehe tsitõnhen tí xjeen tí tjan t'ítuenhya.”‡

³¹ Méxra kíchó ni, kaín ni la jehya xjeen ijnko tjan ch'exón xra. Náhí. Jeheni mé xjeen tí tjan t'ítuenhya.

5

Jína chrók'uejorá kíxin kuaáxinrá

¹ Cristo mé kuaáxinni la ntá ó tí ley la t'etuenhyani. Méxra jína chrók'uayakonhénrá tí nkehe kuaáxinrá la í chrókjanhyará chrók'ónará chojni t'ítuenhen ínaá.

* 4:22 Génesis 16.15; 21.2 † 4:27 Isaías 54.1 ‡ 4:30 Génesis 21.10

² Tinhínrã, janhan Pablo mé ntãxrjan kíxin tí chrókuará tí xroye a ntã ó chónkó chrókuinkachónkirã Cristo. ³ Tjínkãvan tsóxrjanka ínaã kíxin tí jnkojín nkexro itsa tí xroye la jehe ch'án mé t'ichjánxin sinchexiteyéhe ch'án kaín tí ley tsíkjin ch'ín Moisés. ⁴ A nta jahará la xritjéyará tsotjáxin ijjarã kíxin sinchexiteyéhérá tí ley la ntã ó kuítóhérá Cristo la ko ó kuítóhérá tí kjuasáyé Dios tjuahará. ⁵ A ntã jeheni la tinkáchónkini Cristo la chóntani Nchakuen Dios la ntã tjejóchónhenni kíxin tsjintaxín tsotjóá ijjiéni. ⁶ Jeheni mé tinkáchónkini Jesucristo la ntã kánhyó tjetóan tí xroye. Antsi tjetóan chrókuinkáchónkini Ìnchéni la ntã tí tinkáchónkini Ìnchéni la chrótjuèhene kichó ni.

⁷ Jahará la jina kjuankíxinrã tinkáchónkirã Ìnchéni. ¿A ntã nkexro k'uetóan kíxin chrókuítóhérá tí nkehe chaxín? ⁸ Jehya nkehe kuénte Dios tí tjejóch'erã méhe. Méxra jehe ch'án la kjueyará ch'án. ⁹ Ntãchro sín kíxin tí ch'o t'óna niotja tsjiko intsíkoã tí xroan nchek'ánki niotja, a ntã ts'ánki kaín tí ch'o. ¹⁰ A ntã janhan tinkáchónkia Ìnchéni la ko ó nòna kíxin jahará kjaxin tinkáchónkirã ch'án la kjã í chrókjuenkayáxinhyará í jnko nkehe. A ntã Dios mé sinchekjasóte ch'án tí nkexro ixri tjixrónkãxin kíxin Dios la chrakuenhya ch'án ninkexró.

¹¹ Kichóni, tí naxã chrókuétoan chrókua chojni xroye la ntã tí sín judío chrókónínkakonnahya sín. Tí xíkaha la chrók'uantaxíenhya sín tí tan jina chrónka nkexrí k'uenxín Cristo tí ntacruz. ¹² Méxra tí sín ntaxakonhanrá la t'etóan sín itsará xroye la íchá jina naã chrók'uaátsínkó chrókóchrít'o sín kaín.

¹³ Jahará kichó ni, la Dios mé kjueyáni kíxin tsaáni kjánchó chóntahyani kjuachaxin ch'eni tí nkehe jínahya. Náhi. Chrókjuinkítsani kichó ni la ko chrótjuèhene kichó ni. ¹⁴ Mé xíkaha tí ley mé t'axrjexín kíxin: “Chrótjuèhérá kichuárã éxi tjuèxinrã asánrã.”* ¹⁵ A ntã tí chrókjóntehérá kichuárã la ko chrókjónterã kichuárã la ntã chrókóxakonhanrá kíxin tí xíkaha la chrókjuinçek'itjáyanrã kichuárã.

Tí jie chrókjuasin chojni la ko tí nkehe t'etóan Nchakuen Dios

¹⁶ A ntã ntãxrjan kíxin chrók'uejorã éxi tjínkaon Nchakuen Dios, a ntã chrókjuéyáhyará tí nkehe jínahya chrókjuenkayáxinrã. ¹⁷ A ntã tí nkehe jínahya tjenkayáxinrã la tjanjonko Nchakuen Dios kíxin Nchakuen Dios la tjanjonko tí nkehe jínahya la tí iyó nkehe tjenkayáxinrã la tjanjonko kichó. Méxra jahará la xitjahya ch'erã tí nkehe tjínkáonrã chrókjuích'erã. ¹⁸ A ntã tí Nchakuen Dios tjetjínkítsará, a ntã jehya tí ley t'etuánhanrá jie.

¹⁹ Xrahya ts'íkonní tí jie tjasin chojni jínahya tjenkayáxin. Mé tíha la tí sín tjasínko jie chojni chjin ókjé, la ko tí chojni ch'e tí nkehe jínahya, la ko tí chojni náxrxónhya tjenkayáxin, ²⁰ la ko tí chojni tinkáchónki nkehe tsíkjanoya, la ko tí chojni nchexroan, la ko tí chojni nínkaon, la ko tí chojni itje kjuanínkaon, la ko tí chojni chjio, la ko tí chojni xrahya tónínkaon, la ko tí chojni tjínkaon jehó tsochónta itsjé nkehe, la ko tí chojni tjínkaon ts'axrjenta, la ko tí chojni t'óxika kichó, ²¹ la ko tí chojni chjinoxínhin, la ko tí chojni tjàya, la ko tí chojni tókoan, la ko tí chojni kóchjinka, la í so nkehe tóyóhe xíkaha. Na mé éxi yóhe senó mé k'uetjónkarã la ko jie la xíkaha tjetjónkarã ínaã kíxin tí nkexro xíkaha tinkákjasin jie mé xitjahya ts'áyéhe sín tí kjuachaxin kuénte Dios.

* 5:14 Levítico 19.18

²² A ntá tió chóntani Nchakuen Dios ntá tsotjuèheni kichó ni, la ko tsöchéheni, la ko kjuaxróxin ts'ejóni, la ko tsochónhenni tsonínkakonhyani, la ko jnkójina ts'ejókoni kichó ni, la ko nchexiteyáni jnkójina. ²³ La ko tsohnkehyaní, la ko ts'etuènhenni asènni kixin tsjasinhyaní jje. Kohya nijnko ley chrókjuinchejasóteni kixin tí jina chrók'uejóni xikaha. ²⁴ Mé tí chojni tinkáchónki Jesucristo la kaín jje k'uéchóna sín la ko tí jínahya k'uékjenkayáxin sín la ó kjuenka Ìnchéni kjuák'enkání ch'án ntacruz. ²⁵ A ntá tí tjejókoni Nchakuen Dios t'ichjánxin tsítóheni kixin Nchakuen Dios ts'etuènhenni.

²⁶ Méxra chrókjuinchehnkehyaní la ko chrókjuachaxínhyani kichó ni la ko chrókóchjinoxíenhyani.

6

Tjínkitsará kichuára

¹ Kichóni, a ntá tí chrók'uíkonrá jnkójín nkexro kjuasin ichrén jje a ntá tí jahará tí chaxín chontará Nchakuen Dios la chrókjuéntuéhérá sín la chrókjuinkitsará sín. A ntá jnkójina chrónixjehérá sín, a ntá jahará la chrókóxakonhanrá kixin xikahya chrókónhanrá chrókjuásinrá jje kjaxin. ² Tsjínkitsará kichuára kixin jóhya tsamará tí nkehe ye. Kixin tí xikaha la ó chrókjuinchehiteyáni tí nkehe t'etqan Cristo.

³ Ntá jnkójín nkexro ntáchro kixin imá tjetóan tí jehe ch'án la chaxínhya tíha la jehó ch'ieyehe asén. ⁴ Jnkójnko chojni chrórxaxinkaon á nchoxon tjenkayáxin la chrókónohe kixin ó nchoxon la jehya jehó chrókjuikosáyehe asén. Náhí. Chrókjuikosáyehe í so chojni. ⁵ Kixin jnkójnko chojni yámá tí jje kuènte.

⁶ Tí nkexro xrakohe tí tan jina la chrókjuinkitsa sín chrókjuanjon sín nkehe chrók'uáyéhe tí nkexro tjako.

⁷ Sich'iyéhyará asánrá. Kohya ninkexró tsjacha tsjanoá Dios. Tí nkehe ts'enka chojni la mé xikahó tsotjá. ⁸ Tí t'enka chojni tí nkehe jínahya tjenkayáxin sín la tí nkehe jínahya tsjacha sín mé ts'enxín sín. A ntá tí nkexro ts'enka tí nkehe tjinkaon Nchakuen Dios la Nchakuen Dios mé tsjanjon tí kjuachón jnkochrín ts'áyéhe sín. ⁹ Mé xikaha chrókóxrjéhyani chrókjuich'eni kaín nkehe jina kixin tí tsqxrjéhyani la ntá chaxín tsjixraká tí yaon tsjachani ts'áyéheni tí nkehe jina. ¹⁰ Méxra xikaha xráxin chrókjuich'eni nkehe jina la antsí t'ichjánxin chrókjuinkitsani tí sín kichó ni tinkáchónki Ìnchéni.

Ch'in Pablo nchexraxinkaon tí sín ntiha la ko kjuixixín nixja ch'án

¹¹ Tsjehérá kixin imá ihyé tí letra tjékjinxian tjaná. ¹² Tí sín tjinkaon ts'etuqanhanrá kixin chrókuará xroye la jehí tjinkaon sín tsjikosáyehe sín chojni la tjinkakonhya sín kixin chrókjuasótéxín sín tí ntacruz kuènte Cristo. ¹³ Kjónté tí sín tsíka xroye la nchexiteyáhya sín kaín tí nkehe t'etqan tí ley. A ntá tjinkaon sín kixin chrókuará xroye kixin ntá kjaxin sín tsqhnke sín kixin tsontáchro sín kixin jahará kjaxinrá tjinkáonrá tsochontará xroye tí cuerpo kuèntará. ¹⁴ A ntá janhan mé tóxrjínahya sjintahnke ninkehó. Íchá jina chróntáxrjan kixin Cristo k'uenyákonhenni. A ntá xikaha k'uenxín Cristo tí ntacruz la ntá tí nkehe k'uék'etqan kuènte chjasintajni la kjaxin k'uitjáyán la ko janhan kjaxin kuítóhā tí nkehe kuènte chjasintajni. ¹⁵ La ntá ninkehó sínkíhya á tsíka chojni xroye o náhi. Tí nkehe sínkí la chrók'ónani ijnko chojni nixin. ¹⁶ A ntá tí sín ts'áyéhe

kjuaxróxin kixin kujkonóghē Dios tí jehe sín la mé kaín tí sín kuítekaon tí nkehe t'etōan ch'án mé kaín tí sín chaxín tsík'óna xjeen ch'án.

¹⁷ A ntá ijie la tjínkəkonhya kixin chrók'uekana jie ninkexró. Janhan mé chaxín chonta tí tsíkjatsəgenxín tsíchrít'ə cuerpo kuèntəna kixin kjuasótexinna kixin kjuít'ahə xra Inchéni Jesús.

¹⁸ Kíchóni tjáncháhə Inchéni Jesucristo kixin kjuasáyé ch'án chrókjuincheyaon ch'án kaín rá. Mé xíkaha tsoxiteyá. Amén. Ó tjen.

Tí xroon chr'énhen ch'ín Pablo tí sín tjejó chjasin Éfeso

Ch'in Pablo ikjin xroon k'uáyéhe tí nínko chjasin Éfeso

¹ Janhan Pablo tsíkjevána Jesucristo kixin xíkaha tjinkaon Dios tsjàkua itén ch'án. Janhan mé ikjian tí xroon chr'anhánrá tí jahará tjejorá chjasin Éfeso tinkachónkirá Dios la ko títékáonrá Cristo Jesús. ² Tjéjtáncháha It'éni Dios la ko Ìnchéni Jesucristo kixin kjuasáyé ch'án chrókjuintayaonrá ch'án la ko chrótjáhará ch'án kjuaxróxin.

Ts'áyéheni tí nkehe jína kuènte Cristo

³ Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xíkaha jehe ch'án mé kjuíncheyaonni ch'án kixin kaín nkehe jína tixin nkaya nkajni kjuanjon ch'án. ⁴ Dios mé kjueyá ch'án tí jeheni kixin chrókuinkáchónkini Cristo tí naxa t'ónahya chjasintajni. Tjinkaon ch'án kixin chrók'uejóni tí tjen ch'án ntá kjuínchetjóáni ch'án kixin kaín jie kjuatsenhenni ch'án. ⁵ Imá tjuèhe Dios tí jeheni ntá tsíkjeváni ch'án kixin ts'ónani xjeen ch'án kixin kuinkáchónkini Jesucristo. Mé xíkaha tsíkjenkayáxin ch'án kixin xíkaha kóxrjínhin ch'án. ⁶ Méxra imá tjancheheni kjuasáya Dios kixin kjuíncheyaonni ch'án kixin ó tinkáchónkini tí Xjeen ch'án, imá tjuèhe ch'án. ⁷ Imá tjuèhe Dios tí jeheni la xíkaha kuaáxinni ijnié tí Xjeen ch'án k'uitji la xíkaha tsjixín kaín ijieni. ⁸ Dios kjuakoxin ch'án kixin imá tjuèheni ch'án. Kjuanjon ch'án kaín kjuachaxin kixin chrókuienxinni jína la ko kjuanjon ch'án kjuaxrexinkaon jína. ⁹ Dios kjuínchenoheni tí nkehe jehó ch'án tjenkayáxin ch'án, mé tí nkehe tóxrjínhin ch'án tsoxiteyá. ¹⁰ Tí nkehe tsíkjenkayáxin ch'án la tsoxiteyá tí yaon tsíchrónka ch'án. La ntá jehe ch'án tsjanjon kjuachaxin kixin Jesucristo ts'etuñhen ch'án kaín xín nkehe siín nkaya nkajni la ko chjasintajni.

¹¹ Dios kjueyáni kixin chrókuinkáchónkini Cristo la ntá xíkaha chrók'uáyéheni tí nkehe tsík'áyéhe ch'án. Kaín tíha la mé xíkaha tsonhen éxi tóxrjínhin Dios. ¹² Mé xíkaha kjuích'e ch'án kixin ntá jeheni kuítekaonni Cristo saoxin chrók'uejóni chrókjuancheheni kjuasáya Dios kixin tí kjuachaxin jie chóna ch'án. ¹³ A ntá kjaxin jahará ó kuinhínrá tí tan jína ntoá chrónka nkexrí tsaáxinni, a ntá ó kuinkachónkirá Cristo. La ntá jnkokoá k'uáyéheni Nchakuen Dios k'ónani xjeen ch'án kixin tinkáchónkini ch'án. Mé xíkaha ó xiteyá tí nkehe tsintáchro ch'án. ¹⁴ Tí Nchakuen Dios kujtonhenni mé kjuínchenoexinni Dios kixin tsakjani kaín nkehe tsjanjon ch'án tió tsaáxin kaín ni tinkáchónkini ch'án. Ntá xíkaha kaín ni tsjancheheni kjuasáyé ch'án kixin tí kjuachaxin jie chóna ch'án.

Ch'in Pablo kjuanchehe Dios kixin qntsí chrókónohe tí sín tinkáchónki Ìnchéni

¹⁵ Méxra ó kuinhan kixin imá tinkachónkirá Ìnchéni Jesús la ko imá tjuèhéra kaín tí í so sín tinkáchónki Dios. ¹⁶ Ntá janhan nunca tjuahya nixjahá Dios tjáncháha kjuasáya kixin ó tinkachónkirá ch'án. ¹⁷ Tjénixjahá Dios, mé jehe ch'án mé ichr'án Ìnchéni Jesucristo, mé It'éni imá tjeotan

la tjetjánháha ch'án kixin tsotjáhará ch'án kjuaxrexinkaon jina kuente Nchakuen ch'án kixin ntá antsí chrókuiénxinrá jina tí nkehe kuente ch'án kixin ntá antsí má chróchoxinrá ch'án. ¹⁸ Kjaxin tjetjánháha Dios kixin tsjinkitsa ch'án tsjanjon ch'án ijnko kjuaxrexinkaon jina kixin ntá tsonohará ts'ejochonhérrá kixin xikaha kjueyará ch'án. La ko tsonohará kixin imá tjettoan tí nkehe sinchekitonhenni ch'án kixin jeheni mé tinkáchónkini ch'án. ¹⁹ La ko kjaxin tjetjánháha Dios tsjinkitsará ch'án tsonohará kixin tí kjuachaxin kuente ch'án mé ijnko nkehe imá jie noehyani nketí kjuéxín. Tí kjuachaxién ch'án mé nchexraxinkaon tí sín tinkáchónki ch'án. Jnkokón tí kjuachaxin chóntani la ko tí kjuachaxin imá jie kjuakoxín ch'án ²⁰ tió kjuínchexechón ch'án Cristo. Ntá Cristo sákjui kjuák'etjaxín ch'án tja chjina tí It'é ch'án itjen nkaya nkajní. ²¹ Mé xikaha kjuanjon Dios kjuachaxin kixin Cristo ts'etuēhen ch'án kaín xín gobierno la ko kaín tí sín t'etoan. Ijie tjet'etuēhen ch'án kaín xín nkehe siín chjasintajni la ko chr'éxín ts'etoan ch'án kjaxin. ²² Cristo k'uáyéhe ch'án kjuachaxin ts'etuēhen kaín xín nkehe siín. Jehe ch'án mé ts'etuēhen kaín tí sín k'óna ninkoé ch'án. ²³ Tí ninko mé éxí tí cuerpo kuente ch'án la jehó ch'án mé t'etuēhen ch'án. Jehó ch'án mé kuente ch'án kaín xín nkehe siín.

2

Kuaáxinni kjuachaxién Dios

¹ La ntá jie Dios mé kjuínchekitonhanrá tí kjuachón jnkochríxín kixin tinkachónkirá Cristo. Senó la jahará la éxí tsík'enrá kixin tí jínahya k'uékjich'erá la ko tí jie k'uékjásinrá. ² Mé xikaha k'uéchréhérá éxí sítónhen chjasintajni. K'uékjinchexiteyéhérrá éxí tóxrjínhin tí nchakuen jínahya t'etuēhen tí xrjnto la ko t'etuēhen kaín xín tí chojni titekakuenhya Dios. ³ Kaínni xikaha k'uék'ejóni tí ósé a naxa kjuínchexiteyéheñi tí nkehe ntáchro asénni la ko kjuínchexiteyáni tí kjuaxrexinkaon jínahya k'uéchóntani. A ntá tí naxa xikahó chrókuich'eni la Dios imá chrókuinckjasóteni éxí tsjasóte tí í so sín. ⁴ A ntá Dios mé imá kuikonóheñi ch'án la ko imá tjuèheni ch'án. ⁵ La ntá kjuanjon ch'án tí kjuachón éxí chóna Cristo. Jeheni la éxí chojni tsík'en k'uék'ejóni xikaha kixin tí jie k'uékjasinni. A ntá jie kjuasáyé Dios tsaáxinrá ch'án. ⁶ Dios mé kjuínchexechón Cristo Jesús la ko kjaxin jeheni tsoxechónni kixin ts'ejókoni ch'án nkaya nkajní. ⁷ Mé xikaha kjuích'e ch'án kjuakoxín ch'án la naxa tjetjākoxín ch'án kixin tjuèheni ch'án la ko kjuínkitsani ch'án kixin tinkáchónkini Cristo Jesús. ⁸ Kjuasáyé Dios kixin kuaáxinrá ch'án kixin tinkáchónkirá ch'án kixin táha la jehya jahóra k'uitjará tíha. Náhí. Táha la mé kjuasáyé Dios kixin tjáhará ch'án. ⁹ Kixin jehya ichrén nkehe jina kjuích'eni kixin chrókuinckhehnkexínni. ¹⁰ Dios mé kjuích'éna tí jeheni ntá chr'éxín kjuínkitsa ch'án kixin tsinkáchónkini Cristo Jesús, kixin ntá chrókuich'eni tí xrj jina kixin xikaha tsíkjenkayáxin ch'án tí senó a.

Kjuaxróxin tjejóni kixin tinkáchónkini Cristo

¹¹ Méxra jahará la jehya chojni judíorá. Mé tí sín judío ntak'inrá sín chojni chóntahya tí xroye tí jahará. A ntá tí sín judío, mé tí sín itsa sín xroye cuerpo kuente sín, mé nchek'in sín asén sín tí chojni chóna xroye. ¹² Xráxinkáonrá kixin tí senó la k'uéchonhyará Cristo. Jahará la jehya kuente tí nación Israel la xikaha k'uéchonhyará tí nkehe tsík'etoan

Dios la ko tí nkehe tsíntáchro ch'án tsjanjon ch'án. Mé xíkaha k'uék'ejorá la k'uéchonhyará Dios la k'uéchoénhyará kixin chrókuaará. ¹³ La ntá ijie la ó tinkachónkirá Cristo Jesús. Jahará tí ósé imá ikjín k'uék'ejorá. La ntá jie la ó kóchjineherá ch'án kixin k'uenyákonhánrá ch'án, k'uítji ijnié ch'án. ¹⁴ Jehe Cristo mé tjejóxinni kjuaxróxin. La ntá tí sín judío la tí sín jehya sín judío ntá jie jnkokoá chrókjuenkayáxin sín kixin k'óna éxi jnkokoá chjasin. Cristo k'óxika ch'án tí kjuanínkaon éxi ijnko tjat'ò k'uinkákonhen. ¹⁵ Jehe ch'án kjuasóte ch'án, la kjuatsen ch'án tí ley. Tí iyó chjasin k'uéjé kjuíchéna ch'án jnkokoá chjasin nixin kixin tinkáchónki sín ch'án. Mé xíkaha kjuanjon ch'án kjuaxróxin. ¹⁶ Mé xíkaha k'uenyákonhenni ch'án k'uénxín ch'án tí ntacruz la kjuakjín ch'án tí kjuanínkaon k'uék'ixin tí iyó chjasin k'uékjanjon sín kixin ntá kjuaxróxin ts'ejóko sín Dios la kaín sín jnkokoá k'óna éxi jnkokoá cuerpo kuènte ch'án.

¹⁷ Cristo mé ikui la kjuakohé ch'án kaín chojni tí tan jína kixin kjuaxróxin ts'ejóni kaín ni, mé tí jahará kjónté k'uék'ejorá ikjín tí tjen Dios la ko kjaxin tí sín chjinaxón k'uéjé. ¹⁸ A ntá kjuachaxin kuènte Cristo la kaín ni kjónté jeheni ó i so chojni mé tsochjineheni It'éni Dios kixin jnkokoá k'uáyéheni Nchakuen ch'án. ¹⁹ A ntá jahará la í tóyóahyará chojni tsikjixin ókjé la ko jahará la jehya ókjé chjasin tjejorá. Kaínni la chóntani kjuachaxin kixin kaín ni la tinkáchónkini Dios la kaín ni la k'ónani chojni kjéhya ch'án. ²⁰ Jahará la mé tsík'ónará ijnko nchia tjat'ò jie k'óna chrítaón tí xro k'uejo tí sín kjuéyá Jesús la ko tí sín tsíchr'án Dios chrónka itén ch'án ósé. La ntá Jesucristo mé tí xro imá t'etóan kuènte tí tjat'ò a. ²¹ Tí xrankixixín mé Cristo la chrítaón k'óna kuenté nchia la tinkák'ánkí tí nchia kixin jína tsjak'e, ntá tsjixraká kixin ts'óna ijnko nínko tjóá kuènte Inchéni. ²² Mé xíkaha jahará tinkachónkirá Cristo la tsojnkotsérá kaín rá ts'óna éxi ijnko nchia kuènte Dios la ntaha tsjak'exenhen tí Nchakuen ch'án.

3

Ch'ín Pablo k'uáyéhe ch'án tí xra tsjakohé ch'án tí sín jehya judío tí tan jína

¹ Mé xíkaha janhan Pablo mé tjéchjinaxián tí tjákua itén Cristo Jesús kixin jína ts'ejorá kjónté jehya chojni judío tí jahará. ² Chrókónohará kixin kjuasáyé Dios kjuanjon ch'án tí xra k'uayáha kixin tsjakohará. ³ Dios mé kjuakoxin tí nkehe tjenkayáxin ch'án ninkexró noehya mé kjuínchenóna tíha la ntá xíkaha ikjian ijnko xroon kánhyó tsjé nixja k'uayéhérá. ⁴ Tió sinchekuáxinrá tíha ntá tsonohará kixin ó nóna tí nkehe kuènte Cristo ninkexró k'uénoehya. ⁵ Tí nkehe la ninkexró k'uénoehya tí ósé a. A ntá jie kjuachaxin kuènte Nchakuen Dios la Dios kjuínchenoexín tí sín kjuéyá Jesús ch'ehe ch'án xra la ko tí sín chrónka itén ch'án. ⁶ Tí nkehe ninkexró k'uénoehya la tíhi: Kuínhin tí sín jehya judío tí tan jína kixin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jína éxi ts'áyéhe tí sín judío. La ntá jnkokoá ts'óna sín tí cuerpo kuènte Cristo la jnkokón ts'áyéhe sín kaín tí nkehe tsíchrónka Dios sinchexiteyá Cristo Jesús.

⁷ Janhan k'uékítekakonhya, a ntá jie kjuasáyé Dios kjuanjon ch'án tí xra i sít'a kixin tsjakua tí itén ch'án kixin tí kjuachaxin kuènte ch'án. ⁸ Janhan mé kánhyó tjetóan kixin janhan la imá intsína la kaín tí í so sín tsíkjinchetjóá Dios la antsí tjetóan sín. Kjónté la Dios mé kjuínchekitonna tí xra imá tjetóan kixin tsotjanka tí sín jehya sín judío tí tan jína nkexrí imá tjetóan tí nkehe kuènte Cristo. ⁹ La k'uayáha tí xra tsotjanka kaín xín chojni nkexrí tsíkjenkayáxin Dios tí ósé kixin nijnko nkexro k'uénoehya

tíha. Mé jehe ch'án mé kjuích'éna ch'án kaín xín nkehe. ¹⁰ Mé xíkaha kónhen kixin ntá tí sín kuènte nínko tsjakuexin sín kaín xín tí sín t'etòan nkaya nkajni kixin tsonohe sín kixin xíkaha kaín nkehe jína tsíkjenkayáxin Dios. ¹¹ Kaín tíha kjuích'e Dios éxi tsíkjenkayáxin ch'án ntá Ìnchéni Jesucristo la ó kjuínchexiteyá tíha. ¹² Kjuasáyé Cristo ntá ó chóntani kjuachaxin tsòchjineheni Dios kixin tinkáchónkini ch'án. ¹³ Méxra xrjanóahará kixin chrókujitòéhyará chrókuinkachónkirá ch'án kjónté tjétjasótena kixin kaín tíha kónhen kixin jahará chrók'uejoxinrá jína.

Cristo imá tjuèheni

¹⁴ Méxra xíkaha tjak'éxian tóch'ian nkayakon It'é Ìnchéni Jesucristo. ¹⁵ Mé tsík'áyéhe ihnjé Dios kaín xín chojni tinkáchónki ch'án mé tí sín siín nkaya nkajni la ko tí sín siín chjasintajni. ¹⁶ Tjáncháha It'éni kixin tsjanjon kjuachaxin kuènte ch'án ts'ayéhérá kjuachaxièn Nchakuen ch'án ¹⁷ kixin Cristo chróchónta asánrá kixin tinkáchónkirá ch'án la ntá ntoá chrók'uejorá éxi ijnko nta tsíkji nuèe nínka la chrótjuèhérá kichuárá. ¹⁸ Ntá jahará la ko tí í so sín tinkáchónki Ìnchéni mé chrókuiénxinrá nkexrí tonxín la ko kjínxin la ko nínkaxín la ko ntetoxín kixin nkexrí tjuèheni Cristo. ¹⁹ Tjáncháha Dios kixin antsí chrókónohará nkexrí imá tjuèhe ch'án tí jeheni mé antsí má tjuèheni ch'án la tsjachahyani tienxinni kaín tíha. A ntá tí jehe ch'án chrókuinkitsani ch'án la antsí chrókuiénxinrá tí kjuachaxin kuènte ch'án.

²⁰ Ijie la chjéheni kjuasáya Dios kixin jehe ch'án chóna kjuachaxin tsjanjon ch'án antsí má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kaín tíhi kjuachaxin kuènte ch'án mé tsjinkitsa tí jeheni. ²¹ Kjuasáyé Dios itjen jnkochrín kixin Cristo Jesús kjuíncheakaá ch'án tí nínko, mé xíkaha ó xiteyá jnkochrín. Amén.

4

Jína chrók'uejókoni kichó ni kixin chóntani Nchakuen Dios

¹ Janhan mé tjechjinaxián tí xra kuènte Ìnchéni. Méxra xrjanóahará kixin jína chrók'uejorá kixin xíkaha Dios tsíkjeýá tí jahará. ² Méxra chrókjuínchehnkehyará la ko chrókójiahyará la ko chrókójinará chrókóninkákonhyará la ko chrótjuèhérá kichuárá. ³ Méxra jína chrók'uejokoará kichuárá kixin chrókjuinkitsa Nchakuen Dios kjuaxróxin chrók'uejorá la ko jnkokoá chrókjuenkayáxinrá. ⁴ Itjen jnkokoá cuerpo la ko itjen jnkokoá Nchakuen Dios la ko Dios k'uíyehé kaín ni kixin jnkokoá nkehe ts'ejóchónhenni. ⁵ Chóntani jnkokoá Ìnchéni la ko jnkokoá nkehe tinkáchónkini la ko ó jnkokoá vez kuíkiteni. ⁶ Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etuenhen ch'án kaín nkehe.

⁷ Jnkojnkonni k'uáyéheni kjuachaxin sich'eheni Dios xra kixin xíkaha kjuanjon Cristo. ⁸ Méxra xíkaha nixja xroon itén Dios kixin:

“Jehe ch'án sákjuí ch'án nkaya nkajni la ko sákjuíko ch'án tí sín tjejóchjina, la ntá kjuínchekitonhen ch'án chojni jnkojnko kjuachaxin kuènte ch'án.”*

⁹ ¿Ntá nkexrí t'axrjexín kixin sákjuí ch'án? Tíhi mé t'axrjexín kixin jehe ch'án mé senó k'uínkajinxin ch'án nkaya nkajni la kjuák'e ch'án chjasintajni. ¹⁰ Jehe ch'án mé k'uínkajinxin ntiha mé ntá jie sáxíkji ch'án

* 4:8 Salmo 68.18

tí nkajní imá noi. La ntá tjet'etueñhen ch'án kaín xín nkehe. ¹¹ Jehe ch'án mé kjuínchekitonhen ch'án ijnko kjuachaxin jnkojnko chojni. Kjueyá ch'án iso chojni k'óna apóstol la ko í so sín tsochrónka sín tí tan tsaáxinni. La ko kjueyá ch'án í so sín ts'óna pastor la ko í so sín tsjako sín itén ch'án. ¹² Mé xikaha tí xrá k'uáyéhe tí sín kjueyá ch'án kixin sich'ehe sín ch'án xrá kixin ntá ts'ánkí tí sín k'óna tí cuerpo kuènte Cristo. ¹³ Ntá xikaha kaín ni jnkokoá tsinkáchónkini tí Xjeen Dios la ko tsochóxinni ch'án jína kixin ntá xikaha ts'ónani chojni ntoá nchexiteyá la ko chrókónoheni éxí nkexrí tjinkaon Cristo. ¹⁴ Méxrá chrók'ónahyani éxí xjan ntsíntsí. Tí xjanntsí la xrahya tsjinkí kjuaxrexinkaon éxí ijnko nkehe sákjuiko xrinto xikaha kixin sich'iyehé sín chojni ijnko nkehe nixin la xrahya titekaon sín. Tí chojni ch'ia tjinkaon sín tsjachroeni sín í jnko ntía ntoáhya kixin chrok'uitjáyhenni Cristo ntá chrókjuasinni jie. ¹⁵ A ntá íchá jína chrónixjani tí nkehe chaxín ntoá la kaín asénni chrótjuèhenni kichó ni ntá xikaha chrókónoheni kixin xikaha tjinkaon Cristo. Jehe ch'án mé tí kja t'etueñhen tí cuerpo kuènte ch'án. ¹⁶ A ntá kjuachaxièn Cristo kuènté tí cuerpo, tí ch'e xrá jnkokón la tjinkítsa kuènté. Ntá jnkojnkoní jína ch'eni xrá la mé xikaha ts'ánkí tí xrá kuènte ch'án la mé jína chrótjuèhenni kichó ni.

Tí kjuachaxin nixin kuènte Cristo

¹⁷ Tíhi mé ntáxrjan la ko tétuanhanrá kjuachaxièn ihnié Ìnchéni. Ijie la chrók'uejohyará éxí ch'e tí sín chónhya Dios. Kaín nkehe tjenkayáxin sín la ntoáhya tíha. ¹⁸ Tí nkehe tjenkayáxin sín la sítié la chónhya sín tí kjuachón tjanjon Dios kixin tienxínhya sín kixin chrohya tsitekaon sín Dios. ¹⁹ Ó tsikjinchek'itjáyan sín tí kjuaxrexinkaon kuènte sín la í tósuèhya sín chrókjuasin sín jie. Imá tóxrjnhin sín chrókjuich'e sín kaín nkehe jínahya. ²⁰ A ntá jahará xikahya xrakohará tí nkehe kjuako Cristo, ²¹ tí chaxín kuinhínrá kuènte ch'án la ko tsíxrakohará tí nkehe chaxín ntoá kuènte ch'án. ²² Méxrá tìtohéré tí kjuaxrexinkaonntaxin k'uékjenkayáxinrá ósé k'uék'ejorá mé ijnko nkehe jínahya naxá t'ayahará. ²³ Jahará t'ichjánxin kixin chrókónixin tí kjuaxrexinkaon kuèntará la ko tí nchakuanrá. ²⁴ Méxrá chrókuákjára tí kjuaxrexinkaon nixin kjuich'éna Dios xikaha tjinkaon ch'án la ntá chrókjuákoxinrá ijnko ntía jína ntoá.

²⁵ Méxrá chrókuìtohéré tí kjuach'ia. Méxrá jnkojnkorá chrónixjehérá kichuárá ntoá kixin kaín ni tsik'ónani jnkokoá cuerpo.

²⁶ Tí chrókóninkáonrá la chrókjuásinhyará jie la chrókóninkákonhyará kuènté yaon. ²⁷ Chrókuìtoéhyará kixin Tsochren chrókjuìt'ayahará.

²⁸ Tí jnkojínrá kuèrá la tìtohéré kjuachee. Íchá jína kixin itjára chrókjuich'exínrá xrá kixin tsochontará chichaon sìnchekìtonhénrá jnkojín nkexro t'ichjánxinhin.

²⁹ Nixjahyará tí nkehe náxrjónhya. Nixjará ijnko tan jína kixin tsjinkítsará ts'ánkí kjuaxrexinkaon kuènte kichuárá la xikaha tsjinkítsará tí sín tjejótinhin. ³⁰ Nchek'ávahyará tí Nchakuen Dios kixin tíha mé k'uayéxinrá éxí ijnko xroye kixin tsonoxínrá kixin jahará mé tinkachónkirá Dios la ko tsochonhénrá tí yaon itsi ch'án ntá tsjintaxín tsaárá.

³¹ Tìtohéré tí kjuanínkaon chontará la ko tìtohéré tí nkehe ntoáhya tjenkayáxinrá la ko tìtohéré tí kjuanotón la ko kaín nkehe jínahya. ³² A

ntá chrókójínará chrókuiikonóhéhérá kíchuárá. Sínchek'itjáyenhénrá ijíé kíchuárá kíxin Dios kjuatsen tí jie chontará kíxin tinkachónkirá Cristo.

5

Jína chrók'uejó tí sín k'óna xjeen Dios

¹ Jahará ó k'óna xjeen Dios la tjuahará ch'án. Méxra chrókóxakonhanrá chrókjuákoxinrá éxi kjuákoxin tí jehe ch'án. ² Chrótjuèhérá kíchuárá éxi Cristo tjuèhe tí jeheni kíxin jehe ch'án la k'uenyákonhenni ch'án, éxi yóhe ijnko kolélo xíkaha kjokehé sín Dios la kóchéhe Dios k'uáyéhe ch'án tí xraxé náxrjón.

³ Ntá jahará mé tsík'ónará chojni kuènte Dios la ntá chrónixjahyará kuènte í jnko chojni chjin ókjé chrókjuásinkoará jie la ko chrókjuenkayáxinhyará ninkehó nkehe náxrjónhya la ko chrókjuakéhya asánrá tí nchónhya nkehe chróchontará. ⁴ Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kíxin jehya kuènte Cristo tíha. Íchá jína antsí má chrókjuancheherá Dios kjuasáya. ⁵ Ó nohará kíxin tí nkexro tjasinko jie í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e asén sín tí itsjé nkehe chróchóntha sín la mé tíha ó yóhe tí nkexro tinkáchónki nkehe tsíkjanoya xíkaha. Mé tí nkexro xíkaha ch'e mé tsjachahya ts'ixenhen tí tjet'etoan Cristo la ko Dios. ⁶ Méxra tjánjonhyará kjuachaxin sit'ayahará ninkexró chrónka tí nkehe chónkó. Méxra xíkaha ntá itsi tí kjuanínkaon kuènte Dios la tsjasóte tí sín titekakuenhya sín tí jehe ch'án. ⁷ Méxra chrók'uitohyará tí sín xíkaha ch'e.

⁸ Senó la k'uék'ájirá ntja sítié. A ntá ijie ó k'ónará chojni kuènte Inchéni la ó xritjejorá tí ntja t'inkaséyan kuènte ch'án. Méxra tjenkayáxinrá jína éxi tí sín xritjejó tí ntja t'inkaséyan. ⁹ Tí t'inkaséyan t'axrjeníxin kaín nkehe jína la ko tí nkehe chaxín la ko tí nkehe ntoá. ¹⁰ Tóxakonhanrá chrókjuich'erá tí nkehe tóxrjínhin Inchéni. ¹¹ Tankiéhyará tí sín ch'e xra náxrjónhya mé tí sín a ch'e xra tí sítié. Íchá jína tsjákoxinrá tí xra tí itjen tí t'inkaséyan. ¹² Chrókósuèheñi chrónixjani kuènte tí nkehe imó ch'e tí sín jínahya. ¹³ Tí t'inkaséyan mé tsonoxíxin kaín xín nkehe la mé tí xrohi ts'ikonxínni jína kaín nkehe. ¹⁴ Mé xíkaha ntáchro xíkahi:

T'àya jaha tjéchrian t'inkatjenxian tí sínn tí sín tsík'en.

Cristo mé tjetjoka xrohi.

¹⁵ Méxra imá chrókóxakonhanrá jnkojína chrók'uejorá. Jehya éxi tí sín noehya chrók'uejorá. Náhí. Chrók'uejorá éxi ijnko chojni nohe má. ¹⁶ Chrókóxakonhanrá chrókjuich'erá xra tí jie kíxin itsi ijnko yaon jínahya xitjahya s'ich'erá xra. ¹⁷ Chrókólontihyará. Chrókóxakonhanrá chrókuiéxinrá tí nkehe tóxrjínhin Inchéni. ¹⁸ Chrókókoanhyará kíxin tíha mé chrók'uitjáyanxínrá. Íchá jína chrókjuánjonrá kjuachaxin chrók'uetuáphanrá Nchakuen Dios. ¹⁹ Chrónixjexínrá kíchuárá tí salmo la ko tí himno la ko chrótsjerá la xíkaha kaín asánrá chrókjuancheherá kjuasáyé Inchéni. ²⁰ Jnkochríxin chjehérá kjuasáya It'éni Dios kíxin kaín nkehe kjuanjon ch'án la ko chrókjuanchaxínrá kjuasáya kjuachaxién ihnié Inchéni Jesucristo.

Jína chrók'uejókoni tí sín kjéhyani kíxin tinkáchónkini Inchéni

21 Títekákonhénrá kíchuará kixin ó tinkachónkirá Ìnchéni. 22 Tí chojni chjin chrókjuinchexiteyéhe xì sín éxí nchexiteyéhe sín Ìnchéni. 23 Tí chojni ntoá chónṭa kjuachaxin ts'etuenhen ichjién éxí Cristo mé ikja t'etuenhen tí nṅko. Kjaxin jehe ch'án kjuínchekaá ch'án tí nṅko, mé tí cuérpóe ch'án. 24 Méxra éxí tí nṅko nchexiteyéhe Cristo mé xikaha kjaxin tí chojni chjin chrókjuinchexiteyéhe tí xì.

25 Tí chojni ntoá chrótjuèhe tí ichjién kixin éxí Cristo la tjuèhe tí nṅko la k'uenyákonhen ch'án. 26 Mé xikaha kjuích'e Cristo kixin sinchetjóá ch'án tí nṅko mé kjuínchetjuáxin ch'án tí ntá kuíkitexín sín kjuachaxién itén ch'án. 27 Ntá tsjanjon ch'án tí jeheni éxí ijnko nṅko imá jína chónṭahya jje la ko chónṭahya ninkehó nkehe náxrxónhya, mé ijnko nṅko tjóá la ko ntoá. 28 Mé xikaha tí chojni ntoá chrótjuèhe tí ichjién sín éxí tjuèxín ch'án cuérpóe ch'án. Tí nkexro tjuèhe ichjién mé kjaxin tjuèhe asén ch'án. 29 Kohya ninkexró nínkakonhen tí cuerpo kuènte. Kaín chojni la ine sín la t'ayakonhen sín cuérpóe sín la mé xikaha Cristo t'ayakonhen tí nṅko. 30 Kaínni mé k'ónani cuerpo kuènte ch'án. Jeheni mé ntq̄e ch'án la ko huésóe ch'án. 31 Ntáchro kixin: “Méxra ijnko chojni ntoá mé tsítq̄he it'é la ko iné kixin tsakja ichjién la yóí sín mé ts'óna éxí jnkokq̄á chojni.”* 32 Tíhi mé ijnko nkehe imá jíe tienxínhya ninkexró. Mé janhan xrxanka kuènte Cristo la tíha mé nṅkoé ch'án. 33 Méxra kjaxin tjéxrxanka kixin chojni ntoá t'ichjánxin tsotjuèhe ichjién sín éxí tjuèxín asén sín la tí chojni chjin chróchónṭehe sín kjuasáya tí xì sín.

6

1 Jahará chánjanrá la t'ichjánxin sijnchexiteyéhérá it'ará la ko inará kixin tjuèhérá Ìnchéni kixin tí xikaha mé jína. 2 Tí nkehe saoxín tsík'ítuenhenni kixin chrókuitekaonni ntá chrókjuanjon Dios nkehe mé tíhi: “Chrókjuikosáyehérá it'ará la ko inará 3 kixin mé náxrxón chrók'uejorá la isé chrók'uejorá ntíhi chjasintajni.”*

4 Jahará it'é xjan la chrókjuínchekónínkakonhyará tí xjaanrá. Íchá jína kixin sijnchek'ánkíxinrá xjaanrá ijnko kjuaxrexinkaon jína kixin ts'ánkíxin xjan tsinkáchónki xjan Ìnchéni.

5 Jahará chojni ch'e xra mé chrókuítekákonhénrá tí lámq̄ará ntíhi chjasintajni la chróchontehérá sín kjuasáya. Sích'eherá sín xra éxí ch'eherá xra Ìnchéni Cristo.

6 Chrókjuích'erá xra jína la jehya kixin tí tjejó sín tjejótsehe sín kixin ntá xikahó ntá jína chrók'uejoxinrá. Náhí. Éxí ch'eherá xra Cristo kaín asánrá sích'erá xra kixin mé xikaha tóxrxínhin Dios. 7 Kaín asánrá chrókjuích'erá xra éxí ch'eherá xra Ìnchéni la jehya éxí chojni ó chrókjuích'eherá xra. 8 Ó nohará kixin jnkojnko nkexro kjónté ch'exón xra o kjónté chojni t'ítuenhya mé jnkojnko sín ts'áyéhe sín tí nkehe tsjanjon Ìnchéni kixin nkexrí tí xra jína kjuích'e sín.

9 Tí jahará chojni lámó mé jnkójina chrókuétuènhénrá tí sín t'ahará xra la séchrókónínkákonhénrá sín. Xráxinkáonrá kixin jahará la ko jehe sín mé jnkokón chrókjuínchexiteyéhérá Ìnchéni itjen nkaya nkajní kixin kaín chojni la jnkokón t'íkon ch'án.

Tí nkehe tjínkq̄tsa t'ayakonhen tí sín tinkáchónki Ìnchéni

* 5:31 Génesis 2.24 * 6:3 Éxodo 20.12; Deuteronomio 5.16

¹⁰ A ntá jie kichó ni, nchefuérte asánrá kixin tjejókoni Ìnchéni la tje-toan tí kjuachaxin kuènte ch'án. ¹¹ Chrókuaáxinrá kaín tí kjuachaxin tsjanjon Dios kixin ntá xikaha jina chrók'uejorá la chrókjuit'ayahará Tsochren. ¹² Jehya tjanjonkoni chojni tsík'óna into la ko hueso. Náhí. Jeheni tjanjonkoni kaín tí nchakuen tí jínahya síin chjasintajni. Tíha mé tjinakaon chrók'uetóan tí chjasintajni sítié. ¹³ Méxra chrókuákjára kaín tí kjuachaxin kjuanjon Dios kixin ntá chrókjuchará tí itsi tí yaon jínahya ntá tí xikaha chrókjueich'erá la chr'éxin la jina chrók'uejorá. ¹⁴ Nchefuérte asánrá. Jina chrók'uejorá. Chrókuítekáonrá tí itan chaxín kixin tí nkehe ntoá mé chrók'uayakonhanrá. ¹⁵ Méxra listo chrók'uejorá sátsjichronkara tí tan tjanjon kjuaxróxin. ¹⁶ La antsí tje-toan chrókuinkachónkirá Ìnchéni. Tíha mé chroku'uinakónhen tí chica flecha tsochr'án Tsochren. ¹⁷ Tí chrókuaáxinrá la táha éxi yóhe ijnko chica casco t'ayakonhen ikja chojni la tí itén Dios la éxi yóhe ijnko chica espada mé tjanjon Nchakuen Dios. ¹⁸ La ko kjaxin chrókuítóéhyará chrónixjehérá Dios la jnkochrín chrókjuanchehérá ch'án kaín nkehe t'ichjánxinhanrá la chrokuanchatóxixínrá Nchakuen ch'án. Chrók'uejotsjehérá la chrókjuanchará kixin tsjinkítsa Dios kaín tí sín tinkáchónki ch'án. ¹⁹ Chrónóehérá ch'án kixin kjaxin janhan tsjinkítsana ch'án tsjanjon ch'án tí tan t'ichjánxin tsoníxja janhan kixin ntá janhan antsí jina chrónixja kixin ntá tsinhin sín tí nkehe ninkexró k'uénoehya kixin nkexrí tjen tí itén ch'án tsaáxin chojni. ²⁰ Dios mé ichr'anna tsoxrjanka tí itén ch'án, mé xikaha tjéchinaxián ijie. Nixjehérá ch'án kixin jina tsoxrjankaxián tí itén ch'án la ko ninkexró tsochrakuanhya.

Kjuixixín nixja ch'ín Pablo

²¹ Kichóni Tíquico, tí nkexro imá tjuèheni la ko xráxin ch'ehe xra Ìnchéni mé tsochenkará ch'án tí jahará nkexrí tjén la ko nkexrí tí xra tjét'a. ²² Mé xikaha tétuanhan ch'án sátsjitsjehe ch'án tí jahará kixin tsochrónka ch'án nkexrí tjejóni la xikaha chrókócháhará.

²³ Tjáncháha It'éni Dios la Ìnchéni Jesucristo kixin tsochjéhe ch'án kaín kichó ni kjuaxróxin kixin tsotjuèhe kichó sín la ko tsinkáchónki sín ch'án. ²⁴ La ko kjuasáyé tí jehe ch'án sincheyaon ch'án kaín tí sín chaxín tjuèhe Ìnchéni Jesucristo. Mé xikaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí sín siín chjasin Filipos

Ch'ín Pablo ikjin xroon k'uáyéhe tí nínko chjasin Filipos

¹ Janhan Pablo la ko Timoteo ch'ezeni xra Jesucristo, mé ikjinni tí xroon i chr'anhánrá kaín tí jahará kíchó ni tinkachónkirá Cristo Jesús tjejorá chjasin Filipos la ko tí sín t'etoan kuènte nínko ntiha.

² Tjanchiani kixin It'éni Dios la ko Ìnchéni Jesucristo kjuasáyé ch'án imá chrókjuincheyaroná ch'án la ko chrók'uayéhérá kjuaxróxin.

Ch'ín Pablo tjechrónóhe ch'án Dios kixin tí sín tinkáchónki Jesús ntiha

³ A ntá tió xráxinkavan tí jahará la imá tjaha Dios kjuasáya ⁴ la ko nixjaha Dios la imá chàna tjáncháha ch'án kixin tsjinkitsa ch'án kaín tí jahará.

⁵ Jahará la kjuínkitsará tió kjuakua tí tan jína tí saoxín kuinhínrá itén Dios la naxa tjejtjinkitsará ijie. ⁶ Ó nòna chaxín kixin xikaha Dios ó kjuankixin ch'án ch'e ch'án xra jína kixin kuítekáonrá mé xikaha naxa tsjintaxín sich'e ch'án tsjixrakájia tí yaon tsokjan Jesucristo. ⁷ Jína kixin tjenkayáxian kuènte kaín tí jahará. Méxra xikaha imá tjuahára. Jahará la ko janhan la jnkokón kjuachaxin k'uáyéheni la kjónté janhan tjéhhjina o itjén tí tjejó tí sín t'etoan tjéxrjanka kixin jína tí tan tsaáxinni. ⁸ Dios la ó nohe kixin imá tjínkavan chrók'uíkuan kaín tí jahará kixin éxi tjuàxinrá Cristo. ⁹ Tjáncháha Dios kixin tsjinkitsa ch'án tí jahará kixin antsí má chrótuéhérá ch'án la ko chrók'uánkí tí kjuaxrexinkaon kuéntará kixin antsí chrókuiénxinrá kaín nkehe. ¹⁰ La ntá chrókónohará chrókuákjára tí nkehe jína. A ntá tí xikaha chrókjuich'erá la jína tjóá chrók'uejorá la ko kohya nkehe chrókjuanchia jje tió tsokjan Jesucristo. ¹¹ Méxra jahará chrókjuich'erá xra jína éxi ijnko nkehe jína chrók'óna kixin kjuasáyé Jesucristo la ntá xikaha la chrókjuikosáyehérá Dios.

A ntá janhan la tjechxonxian Cristo

¹² Kíchóni tjínkavan tsonohará kixin tí nkehe kjuasótexinna la kjuínkitsa kixin kuínhin chojni tí itén Dios tsaáxinni. ¹³ Kaínxín tí chojni siín palacio la ko kaín tí í so sín mé nohe sín kixin tjéhhjinnaxián kixin tinkachónkia Jesucristo. ¹⁴ A ntá tí tjéhhjina la itsjé tí sín kíchó ni antsí má kóxrjínhin sín tjako sín itén Ìnchéni la í chrakonhya sín tinkáchónki sín ch'án.

¹⁵ A ntá chaxín iso sín nixja sín itén Cristo kjánchó chjinoxínhin sín kixin tjínkaon sín chrókjuachaxinna sín. A ntá í so sín tjako itén ch'án kixin tjínkaon sín jína chrókjuinkitsana sín. ¹⁶ Kjánchó iso sín tjínkaon sín chrókjuako sín kixin chrókjuacha sín la ntá kénhya asén sín tjako sín. Mé xikaha ch'e sín kixin tjínkaon sín chrók'uekana sín antsí má jje kixin naxa tjéhhjina. ¹⁷ La í so sín nixja sín kuènte Cristo kixin tjuèhe sín ch'án la ko tjuana sín la ó nohe sín kixin ntihi tjén kixin tsoxrjanka tí itan tsaáxinni. ¹⁸ Kjánchó ántosenná kjónté á chaxín kaín asén sín tjako sín o náhi, la imá chàna kixin chrónka sín tí tan jína kuènte Cristo la antsí má chéhe asenná.

¹⁹ Ó nòna janhan kixin kjónté kaín nkehe tsonna la kjónté xikaha la tsaáxinna kixin kjuasáyará jahará tjejónixjehérá Dios la ko tí Nchakuen Jesucristo mé tjetjinkitsana. ²⁰ Jína tjechxonhan kixin Dios la tsítqehya tí janhan kixin ichrén nkehe jínahya chrókóna. Tjínkavan tsochonta

kjuachaxin kixin jina tsonixja kain asenná nkayakon chojni. Ntá xikaha senó la xikaha ijie tió ts'ikon chojni tí janhan la tsonoxin sín kixin Cristo imá chóna kjuachaxin kjónté á naxa tjéchuán o á ó tsík'ena. ²¹ Kixin janhan na Cristo tjéchonxian la ntá kjónté ts'énxian xikaha la mé chrókuácha. ²² A ntá tí naxa tsjak'é naxa tjéchuán ntá naxa jina sít'aha Ìnchéni xra. Nonahya nkehe tí chrókuákjaá, á chrók'uén o á chrókuak'échuán. ²³ Imá xra chrókjuenkayáxian chrókuákjaá tí yaá nkehe. Janhan na tí chrók'uén la chrókuak'ékian Cristo. A ntá janhan la ntáxrjan kixin íchá jina tíha. ²⁴ Kjánchó t'ichjánxin naxa chrókuak'é kixin naxa chrókuínkítsa tí jahará. ²⁵ Méxra ó nóna kixin naxa tsitona tí tjejorá kixin chrókuínkítsa tí jahará kixin ntá antsí chrókónohará la chrókócháhará kixin jina chrókuinkachónkirá Ìnchéni. ²⁶ Ntá tió tsjasán janhan ts'ejóni inaá la imá tsocháhará la tsjanchehéra kjuasáyé Jesucristo.

²⁷ A ntá jahará chrókuákoxinrá chrók'uejorá jina éxi ntáchro tí tan kjuákoxin Ìnchéni Cristo. Mé xikaha tí tsjasántsjahará o náhi la tjínkavan chrókuinhan kixin naxa imá tinkachónkirá Cristo la ko jnkokoá tjenkayáxinrá la ko jnkokoá tjejoch'erá xra tjakorá tí itan jina tsaáxinni. ²⁸ Chrókuítóehyará kixin tí sín nínkakonhanrá chrókjuintachrakonrá sín. Tí xikaha chróchrakonhyará la chrókónoexin sín kixin ts'itjáyan sín, a ntá chrókónoxin kixin jahará mé chaxín tsaará. Tíha mé Dios tsjinkítsará. ²⁹ Ó kuítõnhanrá tí kjuachaxin kixin tsinkachónkirá Jesucristo la ko kjaxin kuítõnhanrá kjuachaxin tsjasótiaxinrá kixin jahará mé tinkachónkirá ch'án. ³⁰ Jahará la ko janhan jnkokón ch'eni xra. Jahará ó k'uikonrá senó nkexrí kjuít'a xra la ó kuinhínrá ijie kixin naxa tjét'a xra kjónté nínkakonna sín.

2

Kuítóhe Jesús tí kjuachaxin chrók'ueñoan ch'án ntá ijie imá tjetoan ch'án

¹ Tí chaxín tí Cristo nchexraxinkaonrá la tí chaxín Cristo tjuahará ch'án nchecháhará ch'án la tí chaxín tí Nchakuen ch'án xrikoára la tí chaxín nohará kixin tikonóghará ch'án ² la nchechánará kixin jnkokoá chrók'uejokoará kichuára la ko jnkokoá chrótuèhéra kichuára la ko jnkokoá chrókjuenkayáxin nchakuanrá la ko jnkokoá xra chrókjuích'erá. ³ Chrókjuenkayáxinhyará chrókuéñoanrá la ko chrókjuínchehnkehhyará. Náhi. Chrók'ónará chojni t'èñoanhya. Chrók'uikonrá éxi antsí tjetoan tí í so sín, a ntá kánhyó tjetoan tí jahará. ⁴ Ninkexró chrókjueyá tí nkehe kuènte jehó. Náhi. Chrókjuéyará tí nkehe chrókjuínkítsa tí í so chojni.

⁵ Jahará chrókjuenkayáxinrá éxi kjuenkayáxin Cristo Jesús. ⁶ Jehé ch'án chóna ch'án kain kjuachaxin kuènte Dios la kjónté xikaha la tjínkakhya ch'án chrókjuíncheyóhe ch'án éxi Dios. ⁷ A ntá kuítóhe ch'án ntáha tí kjuachaxin k'uéchóna ch'án la k'óna ch'án ijnko chojni ntoa chjasintajni la ko kjuích'e ch'án xra. ⁸ La éxi ijnko chojni k'ueñoanhya kjuák'e ch'án la kjuínchexiteyéhe ch'án Dios kain asén ch'án kixin ik'uén ch'án, mé k'uénxin ch'án tí ntacruz. ⁹ Méxra Dios imá kjuikosáyehe tí jehé ch'án la ko kjuínchek'in ch'án ijnko ihnié imá tjetoan. ¹⁰ Kixin ntá tsinhin kain chojni tí ihnié Jesús ntá ts'ejóxin toh'in sín, mé tí sín síin nkaya nkajni la ko tí sín síin chjasintajni la ko tí chojni síin chrínki nche. ¹¹ La ko kain xín chojni tsochrónka sín kixin Jesucristo mé Ìnché sín mé xikaha tsjikosáyehe sín It'eni Dios.

Tí sín tinkáchónki Cristo tóyóhē éxí xrohi t'inkaséyanxín chjasintajni

¹² Jahará kichó ni imá tjuahará la xráxín kjuinchexiteyànará tí k'uék'ejóni. A ntá ijie la chrókjuinchexiteyànará kjónté ikjín tjén. Chrókuítóéhyará tí nkehe tsjanjon kjuachón la chrók'uayakonhénrá jnkójina ¹³ kixin Diosntaxraxinkaonrá s'ich'erá tí nkehe jína tjinkaon ch'án.

¹⁴ Kaín xrá ch'erá la chrókóninkákúenhyará kichuárá la ko chrókjontahyará kichuárá ¹⁵ kixin tsokohya ninkexró tsontáchro kixin jahará la chontará jje. Kixin jahará la mé tí xjeen Dios chróchontahyará jje, la tjejorá tí síin tí sín jínahya tjasin jje. Na ntá jahará chrók'uinkaséyanxín tí jehe sín éxí tí konotsé t'inkaséyanxín tí chjasintajni sítié. ¹⁶ Méxra jahará chrók'uayakonhénrá jína tí tan tjanjon kjuachón. Tí xikaha chrókjuinchexiteyará jnkójina ntá tió tsi Cristo tsöchéhe asenná kixin xikaha xrá tjejoch'erá kixin ntá tsonóna kixin jehya ó chónkó kjuak'ékjit'a xrá. ¹⁷ Kjónté chrók'uénxián la éxí nkehe chrókjuanchatóxixínrá Dios chrók'uikonrá tí janhan. Mé xikaha chrókjuintaxín tí nkehe chróchjehérá ch'án kixin tinkáchónkirá ch'án, la ntá mé janhan mé tsöchàna la ko tjínkavan kixin kaín rá xikaha chrók'uayéhérá kjuachéhe. ¹⁸ Méxra chrókócháhará jahará kjaxin la chrók'uayéhérá éxí tí kjuachéhe chonta.

Ch'in Timoteo la ko ch'in Epafrodito

¹⁹ Chonhan kixin tí tsjanjon Ìnchéni Jesús kjuachaxin ntá tjoka tsochr'an ch'in Timoteo tsjijtsjehe ch'án tí jahará kixin ntá tsöchàna tsinhan nkexrí tjejorá. ²⁰ Kohya í jnko nkexro chrókjuenkayáxin éxí tí janhan la ko chrókóxakonhen kixin jahará chrók'uejorá jína. ²¹ Kaín tí í so sín tjejá sín tí nkehe tóxrjínhin sín ó la jehya tí nkehe tóxrjínhin Jesucristo. ²² A ntá jahará ó nohará kixin ch'in Timoteo ó kjuakoxin ch'án kixin jína asén ch'án kixin jehe ch'án kjuít'akian ch'án xrá kjuakoni tí tan jína. Éxí ijnko xjanna xikaha kjuínkitsana ch'án. ²³ Mé xikaha tjínkavan tsochr'an ch'án tsjijtsjehe ch'án tí jahará tió tsonóna nkexrí tsji tí xrá kuéntana. ²⁴ La ko kjaxin chonhan kixin Ìnchéni tsjinkitsana kixin tjoka tsjasán kjaxinna.

²⁵ A ntá kjaxin tónhen asenná kixin t'ichjánxin tsochr'an kichó ni Epafrodito tsjiji ch'án tí tjejorá. Jehe ch'án mé jnkokoá ch'ekoni ch'án xrá kjónté nínkakohenni chojni. Jahará k'uéchr'anrá ch'án ntihi kixin jehe ch'án tsjinkitsana ch'án kaín nkehe tjínkavan. ²⁶ Imá tóxakonhen ch'án tsjijtsjehe ch'án tí jahará kixin ó nohe ch'án kixin tsikinhínrá kixin k'uéníhi ch'án. ²⁷ Chaxín k'uéníhi ch'án ó mero chrók'uen ch'án, a ntá Dios kuikonóehé tí jehe ch'án kjánchó jehya jehó ch'án, kjaxin kuikonóna Dios tí janhan kixin kánhyó chrók'uavá. ²⁸ Méxra tjínkavan tsochr'an ch'án kixin ó nóna kixin tsöcháhará ts'ikonrá ch'án inaá la ko xikaha janhan í kánhyó chrók'uavá. ²⁹ Imá chrókócháhará chrókjuiji ch'án kixin jehe ch'án mé ijnko kichó ni tinkáchónki Ìnchéni la ko chrókjuikosáyehérá ch'án éxí chrókjuikosáyehérá kaín tí í so sín éxí jehe ch'án. ³⁰ Jehe ch'án ó mero chrók'uenxín ch'án tí ch'ehe ch'án xrá Cristo. Mé síin kjuaxikaon chrók'uenxín ch'án kixin jehe ch'án kjuínkitsana ch'án kixin jahará xit-jahya ts'inkará tsjínkitsará tí janhan.

3

Tí nkehe chaxín sínkí

1 **A** ntá ijie, kichó ni, chrókócháhará kixin jahará la kuènte Ìnchéni. **A** ntá tí janhan la xrahya tsokjatee tsokjian tí nkehe ó kjian kixin tíha la chrókuinkítisa tí jahará. ² Chróchontará cuidado tí sín ch'e jínahya éxi konia la tóchrít'ò sín cuérpóé sín. ³ **A** ntá tí chojni chaxín chóna xroye la mé tí jeheni kixin jeheni chaxín xraxinkakonxínni Dios kjuachaxién Nchakuen ch'án la ko imá chéheni kixin tinkáchónkini Ìnchéni Jesucristo. Jehya kixin chrókuinkáchónkini kixin tí cuérpóéni chrókóchrínjinni. ⁴ **A** ntá janhan kjaxin jína chróntáxrjan kixin chrókóchrít'ò tí cuérpóé chojni. Ninkexró antsí chróchóna kjuachaxin kixin chrókuitekaon tí nkehe a. ⁵ Janhan mé tsíkana xroye tí k'uéchonta ijní yaon la ko janhan mé tikiíníxian tí sín israelita la tsík'axrjeníxinna tí sín tsík'axrjeníxin ch'ín Benjamín la kjaxin janhan mé hebreo la ko t'aná la naná la hebreo sín. La ko janhan mé tinkáchónkia tí ley éxi tinkáchónki tí sín fariseo. ⁶ **A** ntá imá k'uéninkakonhan k'uéchonkíha tí sín tinkáchónki Jesús la ko imá kjuintaxiteyáha tí ley la kohya ninkexró tsontáchro kixin chaxínhya tíha. ⁷ Ntá kaín tíha la tí ósé k'uékjenkayáxian janhan kixin sínkí tíha, a ntá ijie la tinkáchónkia Cristo la ntá tí nkehe k'uékóxrjinná k'uékjít'a la ntá jie la ninkehó sínkíhya. ⁸ La kjaxin kaín xín nkehe t'íkuan éxi chónkó tíha kixin antsí má tjetooan tsochoxián Ìnchéni Jesucristo. Kaín kjuaxrexinkaon jínahya k'uéchonta la kjuintak'itjayan kixin ijie ó tinkáchónkia Cristo la kaín xín tí nkehe k'uéchonta la t'íkuan éxi chjínínó ó kixin ntá xikaha jína chrókuak'ékian Cristo. ⁹ Chrókóchána kixin jnkokoá chrók'uejókoni ch'án. Tjéyáhya kixin tí ley chrókuiníxín ijíeni tí chrókuinhexiteyéhéni. Náhí. Tinkáchónkia Cristo la tsaáxinni kixin Dios la tsjakjlin tí ijíeni kixin tinkáchónkini ch'án. ¹⁰ Tí nkehe tjínkavan na tsochoxián Cristo la ko tsochonta tí kjuachaxin kjuakoxin ch'án tió xechón ch'án la ko tjínkavan tsjasótexinna éxi kjuasóte ch'án la ko kjónté chrók'uénna éxi k'uénxin ch'án ¹¹ kixin ntá tjínkavan tsjácha tsoxechónna inaá.

Ch'ín Pablo tjinkaon chrókjuacha ch'án

¹² Ntáxrjanhya kixin kjuácha kaín tíha la ko ntáxrjanhya kixin imá ntoá tjén. Kjánchó janhan tjínkavan tsjácha kaín tíha kixin Cristo Jesús mé kjueyána ch'án senó xikaha. ¹³ Kíchóni, ntáxrjanhya kixin janhván kjuácha tíha. Náhí. Janhan mé ts'itjáyanna kaín xín tí nkehe ó kuítóhe senó la t'ichjánxin kaín asenná tjichráha tí nkehe naxa t'itjayan tsjácha. ¹⁴ Kíxín xikaha ntá chrókjuácha chrók'uayáha kaín tí nkehe jína tsjanjon Dios. Jehe ch'án la sinhexiteyá kaín tíha kixin tinkáchónkia Jesucristo.

¹⁵ Kaínni tí tinkáchónkini Jesús kaín asénni la méxra xikaha chrókjuenkayáxinni. **A** ntá tí ókjé nkexrí tjenkayáxinrá la Dios mé nchexraxinkaonrá ch'án kixin ntoáhya tíha. ¹⁶ **A** ntá t'ichjánxin chrók'uejóni éxi tí nkehe ó kjuachani.

¹⁷ Kíchóni, chrók'uejorá éxi kjuak'é janhan la ko chrótsjehérá nkexrí tjejó tí í so chojni tjejóch'e éxi kjuakoni kixin xikaha kjuakoharáni tí jahará. ¹⁸ Nchónhya xrjankaxián senó la ntá xrjanka inaá la imá tsjanka kixin síin nchónhya sín tjejó sín éxi nínkakonhen sín tí Cristo k'uénxin ntacruz. ¹⁹ Tí sín a mé ts'itjayan sín. Tí dios kuènte sín la mé tí nkehe ntáchro asén sín ó la ko tjinkaon sín chrókuinchehnkexín sín tí nkehe chrókósuèxin sín. Jehó tjenkayáxin sín tí nkehe síin chjasintajni ó. ²⁰ **A** ntá jeheni kaín ni la mé chojni kuènte nkajní la tjejóchónhenni kixin ts'inkajinxin nkaya nkajní tí nkexro tsaáxinni, mé Ìnchéni Jesucristo.

²¹ Ntá jehe ch'án mé tsjinkí ch'án tí cuerpo náxrjónhya chóntani kixin ntá tí cuerpo chóntani tsoyóhe éxí tí cuerpo náxrjón chóna ch'án. Tíha mé tsoxiteyá kjuachaxién ch'án jíe kixin ó chóna ch'án kjuachaxin ts'etuenhen ch'án kaín xín nkehe.

4

Jnkochríxín chrókócháhará kixin tinkachónkirá Ìnchéni

¹ Jahará kichó ni imá tjuahará la ko imá tjínkavan chrókjuasántsjahará tí jahará kixin jahará imá nchechànará kixin jahará mé éxí ijnko nkehe ó kjuácha. Méxra jína chrók'uejorá chrókuinkachónkirá Ìnchéni kixin tjuahará kichó ni.

² Xrjanógha tjan Evodia la ko tjan Síntique kixin jnkokoá chrókjuenkayáxin sín kixin jehe sín la jnkokoá kichó sín kixin tinkáchónki sín Ìnchéni. ³ Jaha la jína k'uejóni kjuích'eni xra, méxra xrjanógha tjínkítsa tí sín chjin kichó ni kixin jnkokoá chrókjuenkayáxin sín. Jehe sín kjaxin kjuích'e sín xra tío kjuakoni tí tan jína tsaáxinni. Koí tí ch'ín Clemente la ko í so sín kjuích'ekoni xra. Tí ihnié sín la ó ts'ínixín ts'ínixín ihnié chojni tsaá.

⁴ Nchechéhéra asánra jnkochríxín kixin tjejókoará Ìnchéni. Ínaá kjaṭee xrjanka nchechéhéra asánra. ⁵ Kaín chojni chrókónohe kixin jahará la chojni jínara. Chrórxáinkáonra kixin í séhya tsokjan Ìnchéni.

⁶ Tóxakuanhyará ninkehó. Íchá jína chróchenkará Dios kaín xín nkehe la chrókjuancheherá ch'án kaín nkehe t'ichjánxinhanrá la kjaxin chrókjuancheherá ch'án kjuasáya. ⁷ A ntá jehe ch'án mé tsotjáhará kjuaxróxin. Jeheni tsjachahyani tienxínni tí kjuaxróxin kuènte ch'án kixin imá ijíe tíha. Tí kjuaxróxin mé ts'ayakonhen asánra la ko ts'ayakonhen tí kjuaxrexinkaon kuèntará kixin jnkokoá tinkáchónkirá Cristo Jesús.

Tjenkayáxinrá tí nkehe jína

⁸ Méxra tsjixixín tétuanhanrá kichó ni. Tjenkayáxinrá kaín tí nkehe chaxin, la ko kaín tí nkehe kjuasáya, la ko tí nkehe ntoá la ko tí nkehe jína. Mé xikaha tjenkayáxinrá kaín xín tí nkehe náxrjón la ko tí nkehe tóxrjínhin Dios.

⁹ Chrókjuich'erá kaín tí nkehe kjuákoará la ko tí nkehe kuínhínra xrjanka la ko tí nkehe kuétuanhánra la ko tí nkehe k'uíkonra kjuít'a, mé kaín tíha chrókjuinchexiteyará la ntá tí Dios tjanjon kjuaxróxin mé ts'ejókoará ch'án.

Tí ofrenda kjuanjon tí sín filipenses tsjinkítsa sín tí ch'ín Pablo

¹⁰ Ìnchéni imá nchechàna kixin jahará xráxinkáonra tí janhan ínaá. Ntáxrjanhya kixin tsík'itjáyahanhára tí janhan kixin jahará xitjahya k'uekjínkítsará tí janhan. ¹¹ Jehya kixin ntáxrjan tíha kixin imá t'ichjánxinna kixin janhan na ó kuàna kjuaxróxin tjén kjónté tí nkehe chonta ó. ¹² Janhan ó kuàna tjén kjónté nóana la ko kjaxin ó kuàna tsochonta itsjé nkehe. Kjónté ichrén nkehe ts'átsínka la ó tsjácha kjónté á kjoné jína o náhi la kjónté á chróchonta ichrén nkehe o á chróchontahya ninkehó la ántosénna. ¹³ Kaín xra tsjácha sít'a kixin Cristo tsjinkítsana. ¹⁴ Kjánchó jahará jína kjuích'erá kixin kjuínkítsará kjuánjonra nkehe t'ichjánxinna.

¹⁵ Tíó sákjuíxian estado Macedonia la kjuankíxian kjuákua tí tan tsaáxinni ínaá la jahórá tí nínko chjasin Filipos ichr'anra chichaon

k'uayáha kixin cháhará kjuákohará itén Dios. ¹⁶ Kjaxin tió naxa kjuak'é ch-jasin Tesalónica la jahará ichr'anrá chichaon iso veces kixin kjuínkĩsará tí nkehe k'uichjánxinna ntiha. ¹⁷ La jehya kixin tjínkavan kixin jehó nkehe chrók'uayáha. Náhi. Jehí tjínkavan kixin jahará antsí má chrókjuich'erá tí nkehe tjinkaon Dios kixin ntá antsí chrókjuachará. ¹⁸ Ó k'uayáha kaín nkehe tsíkánjonrá la antsí itsjé chonta. Ó k'uayáha tí nkehe tsíchr'anrá mé tí nkehe kuikao ch'ín Epafrodito, la kaín tíha la ó tsjácha. Tíha la éxí yóhe ijnko nkehe xraxé náxrjón chróchjehérá Dios mé éxí ijnko iko chrók'oyánrá imá chrókóxrjinhin ch'án. ¹⁹ Tí Dios kuéntana mé tsotjáhará kaín xín nkehe naxa t'itjáyan tsákjára kixin chóna ch'án kaín xín nkehe imá náxrjón tjete la tsjanjon ch'án kixin jahará la tinkachónkirá Cristo Jesús. ²⁰ Kjuasáyé It'éni Dios jnkochrín. Mé xikaha tsoxiteyá. Amén.

Tsjixixín nixja ch'ín Pablo

²¹ Janhan tjínkavan tsonixjehérá kaín tí sín tinkáchónki Dios la ko Jesucristo ntiha. Tí sín kichó ni tjejókoni ntihi nixjahará sín. ²² Kjaxin kaín tí sín tinkáchónki Dios la ko tí sín ch'ehe xra tí ch'ín t'etoan romano mé nixjahará sín. ²³ Tjáncháha kixin Ìnchéni Jesucristo mé chrókjuintayaonrá ch'án kaín rá. Amén. Ó tjen.

Tí xroon tsíkjin ch'ín Pablo chr'énhen ch'án tí sín chjasin Colosas

Ch'ín Pablo ikjin xroon k'uáyéhe tí nínko chjasin Colosas

¹ Janhan Pablo tsíkjeýána Jesucristo t'ahá ch'án xra kixin xikaha tjinkaon Dios, la ko kichó ni Timoteo ² mé ikjinni tí xroon i tsochr'ánharáni tí jahará tsíkjinchetjóará Dios la ko kuítekáonrá Jesucristo tjejorá chjasin Colosas. Kjuasáyé It'éni Dios chrókjuintayaonrá kixin kjuaxróxin chrók'uejorá.

Ch'ín Pablo tjanchehe ch'án Dios kjuasáya kixin kaín tí sín tinkáchónki Cristo

³ Jnkochrín tjancheheni kjuasáya Dios la ko tjanchiani kixin chrókjuinkítsa ch'án tí jahará mé jehe ch'án It'é Inchéni Jesucristo. ⁴ Ó kuínhinni kixin jína tinkachónkirá Inchéni Jesucristo la ko tjuèhéra kaín tí sín ó tsíkjinchetjóá Dios. ⁵ Mé xikaha tjejochonhénra kixin ts'ayéhéra tí nkehe chóna Dios tjen nkaya nkajní. Jahará la xikaha tjejochonhénra kixin tjejotinhénra tí tan chaxín kuènte Dios tsaáxinni. ⁶ Tí tan i mé kuínhin chojni la itsjé sín tinkáki tekaon sín la tinkák'ánkí tí kjuachaxin kuènte Dios kuènte chjasintajni. Mé xikaha kónhen tió kuínhénra la ko kuítekáonrá kixin chaxín tjuahará Dios. ⁷ Tíhi mé kjuakohará kichó ni Epafras. Jehe ch'án la jnkokoá kjuích'ekoni ch'án xra kixin jehe ch'án la jína ch'ehe ch'án xra Cristo kixin xikaha tjinkítsa ch'án tí jahará. ⁸ Jehe ch'án mé kui ch'án ntihi chrónka ch'án nkexrí tjuèhéra kichuára kixin Nchakuen Dios tjinkítsa tí jahará.

⁹ Méxra xikaha tí yaon tió kuínhinni nkexrí tjejorá la títoehyani tjancheheni Dios kixin tsjinkítsa tí jahará kixin tsonohará jína nkexrí tóxrjnhin ch'án la ko tjanchiani kixin tsjanjon ch'án kjuachaxin kixin tsiénxinrá kaín nkehe kuènte ch'án. ¹⁰ Tjancheheni ch'án kixin jína chrók'uejorá kixin tinkachónkirá Inchéni la ko chrókjuítóehyará chrókjuich'era éxi tóxrjnhin tí jehe ch'án. Ntá jína chrókjuachará chrókjuich'era xra kuènte ch'án la ntá chrókónohará jína nkexrí tjen Dios. ¹¹ Tjanchiani kixin jehe ch'án chrókjuinkítsa kixin chrók'uejorá fuerte kixin tí kjuachaxin jié kuènte ch'án kixin ntá chrókjuachará la kjónté ichrén nkehe chrókónhanrá la chrókóninkákonhyará. ¹² La ko chrókócháhará chróchjehéra kjuasáya It'éni Dios kixin kjuanjon ch'án kjuachaxin kixin ts'áyéheni tí nkehe tí tjen tí t'inkaséyan mé tí nkehe ts'áyéhe kaín tí sín tsíkjinchetjóá tí jehe ch'án. ¹³ Jehe ch'án mé kuakitsjekjanxinni ch'án tí sítié la ntá kjuanjon ch'án kjuachaxin ts'ejóni tí t'etoan tí Xjeen ch'án, tjuèhe ch'án. ¹⁴ Jehe ch'án kjuínchekaáni ch'án kixin k'uenyákonhenni ch'án la tí ijnjé ch'án mé kjuenká ch'án tí ijjéni.

Kjuaxróxin ts'ejókoni Dios kixin k'uenyákonhenni Cristo

¹⁵ Éxi tsjehe Cristo mé xikaha tsjehe Dios kjónté xitjahya t'ikonni tí jehe ch'án. Cristo la ó xraxín tjen tí naxá t'onahya ninkehó. ¹⁶ Kjuachaxién tí jehe ch'án kjuích'énaxín Dios kaín tí nkehe síin nkajní la ko chjasintajni la ko kaín tí nkehe naxá t'ikonhyani la ko tí nkehe ó t'ikonni. Kjaxin kaín tí sín ángel t'etoan la ko chóna kjuachaxin la mé jehe ch'án kjuích'éna

ch'án kixin sich'ehe sín ch'án xr̄a. ¹⁷ Cristo la ó xr̄axín tjen kjónté nax̄a t'ónahya ninkehó la jehe ch'án t'ayakonhen ch'án kaín nkehe síin kixin tí kjuachaxin kuènte ch'án. ¹⁸ La kjaxin jehe Cristo mé tí kja t'etuenhen tí cuerpo mé tíha mé tí n̄inko. Jehe ch'án senó xechón ch'án kixin jehe ch'án mé ts'etuenhen ch'án kaín nkehe síin. ¹⁹ Dios tjinkaon chróchjéhe ch'án tí Xjeen ch'án kjuachaxin éxi tí kjuachaxin chóna tí jehe ch'án. ²⁰ Kjaxin tjinkaon Dios kixin kjuachaxiën Cristo chrók'uixin kjuaxróxin nkuixín mé chjasintajni la ko nkaya nkajni. Mé x̄ikaha tsjasin ch'án kjuaxróxin kixin jehe ch'án kjuák'enkáni ch'án ntacruz ik'uén ch'án.

²¹ Jahará la óse ikjín k'uék'ejorá la k'uéninkákonhénra Dios kixin tí nkehe jínahya k'uékjich'erá. A ntá jie la kjuaxróxin tjejokoará Dios ²² kixin k'uenyákonhánra Cristo, kjuasóte tí cuérpóe ch'án. Mé x̄ikaha kónhen ch'án kixin ntá tsjanjon ch'án tí jahará ts'áyéhe Dios kixin kjuíntatjóará ch'án, a ntá jie la chontahyará ninkehó jie. ²³ Méxr̄a x̄ikaha chrókuítóéhyará chrókuinkachónkirá Ìnchéni la ko chrókuítóéhyará tí nkehe tjejochonhénra kixin ó kuinhínra tí tan tsaáxinni. Tí tan i mé ó chrónka chojni kuenté chjasintajni la ko janhan Pablo kjaxin tjínk̄itsa xr̄janka x̄ikaha.

Ch'in Pablo ch'e ch'án xr̄a kuènte n̄inko

²⁴ Méxr̄a ijie la tjasótexinna kixin tí jahará la chàna kixin x̄ikaha mé tsjintaxín tjasóte janhan kixin tí nkehe t'itjayan tí nax̄a chrókjuasóte Cristo kixin jehe ch'án mé kjuasóteyákonhen ch'án tí n̄inko mé tí cuérpóe ch'án. ²⁵ Mé x̄ikaha Dios kjueyána kixin s̄it'a xr̄a kuènte n̄inko kixin x̄ikaha tí xr̄a k'uetuanna ch'án kixin ntá jina chrók'uejoxínra tí jahará kixin chrókjuintaxín chróxr̄jankaxián tí itan kuènte Dios. ²⁶ Tí nkehe ninkexró k'uénoehya tjemá óse nchónhya nánó a ntá ijie kjuínchenohe Dios kaín tí sín tinkáchónki tí jehe ch'án. ²⁷ Dios tjinkaon chrókjuínchenohe tí jehe sín tí nkehe tjemá náxr̄jón tjete ts'áyéhe tí sín jehya judío ijie. Tí nkehe k'uénoehya chojni la mé Cristo tjejókoará la jehe ch'án mé tjanjon kjuachaxin ts'ejochonhénra ts'ayéhérá tí kjuachaxin jie kuènte ch'án.

²⁸ Jeheni mé chronkaxínni nkehe kuènte Cristo la nchexraxinkaonni kaín chojni la ko tjáqoheni sín kixin chrókuienxín sín jina. Ntá jnkójnko sín chrók'uánkí kjuaxrexinkaon kuènte sín kixin tinkáchónki sín ch'án. ²⁹ Méxr̄a x̄ikaha tí xr̄a it'á la kaín asenná it'á xr̄a tí kjuachaxiën chjina Cristo.

2

¹ Tjínkavan chrókónohará kixin nchónhya xr̄a kjuít'a kixin chrókjuínk̄itsa tí jahará la ko kjaxin tí sín tjejó chjasin Laodicea la ko kaín tí í so sín nax̄a t'íkonhya tí janhan. ² Tjínkavan kixin jehe sín chrókóchéhe asén sín la ko jnkokóá chrókjuenkayáxin sín chrótjuéhe sín kichó sín. Mé x̄ikaha chrók'uánkí kjuaxrexinkaon kuènte sín chrókuienxín sín jina kixin ntá chrókónohe sín tí nkehe ninkexró k'uénoehya kuènte It'éni Dios, mé Cristo tíha. ³ Jehe ch'án chóna kaín xín kjuaxrexinkaon kuènte Dios la jehe ch'án mé nohe ch'án kaín nkehe. ⁴ Kaín tíha xr̄janka kixin ntá ninkexró chrókjuít'ayahyará tí jahará kixin tí náxr̄jón chrónixja sín ó. ⁵ Kjónté tjenhya tí cuerpo kuéntana tí tjejorá la ntá nchakuenná la mé tjen ntiha kixin xr̄axinkavan tí jahará la chàna kixin t'íkuan kixin jina tjejorá nax̄a tinkachónkirá Cristo.

⁶ Méxra xikaha kuinkachónkirá Ìnchéni Jesucristo la mé xikaha jnkokoá chrókjuenkayáxinkoará tí jehe ch'án. ⁷ Éxí ijnko nta tsikji nuèè nínka mé xikaha chrókuinkachónkirá tí jehe ch'án éxí kjuakohará ch'án la ko chrókjuanchehérá Dios kjuasáya jnkochrín.

Cristo tjanjon ijnko ntia nixin

⁸ Chrókuítóéhyará kixin ninkexró chrókjuít'ayahará kixin tí nkehe ntoáhya chrókjuakohará sín. A ntá jehe sín chrónkahya sín éxí tjinkaon Cristo. Náhí. Tjako sín tí nkehe tjenkayáxin chojni chjasintajni ó la ko tjako sín tí kjuachaxin kuènte tí nkehe jínahya síin chjasintajni.

⁹ Kaínxín kjuachaxin chóna Dios mé chóna Cristo kjónté k'óna ch'án chojni. ¹⁰ La jahará chontará kaín kjuachaxin kuènte Dios kixin ó tinkachónkirá Cristo. Jehe ch'án t'etuenhen ch'án kaín nkehe síin la ko t'etuenhen ch'án kaín nchakuen t'etoan. ¹¹ Kjaxin tió kjuankíxinrá tinkachónkirá Cristo ntá jehe ch'án kjuanjon ch'án jnko xroye k'uayéhérá kjánchó jehya tí xroye kuènte tí cuerpo. Náhí. Kjuakjiin ch'án tí jie k'uékóxrjínhanrá la kjuíntakaará ch'án, mé tíha mé tí xroye kjuanjon Cristo. ¹² Tí kuíkiterá jahará mé xikaha éxí xravákoará Cristo. Ntá ó xechón tí jehe ch'án la kjaxinrá xechónrá kixin ó kuítekáonrá tí kjuachaxin kuènte Dios kixin Cristo la ó xechón ch'án inaá. ¹³ Jahará ósé la éxí tsík'en asánrá k'uék'ejorá kixin tí jie k'uéchontará kixin k'uéchonhyará Dios la k'uéchontahyará xroye kuènte ch'án. A ntá ijie la éxí xechónrá kixin Cristo kjuatsen tí jie chontará. ¹⁴ Mé Dios kjuatsen ch'án kaín tí nkehe tsík'etóan ch'án ósé kjuachahyani nchexiteyáni la ko kjuatsen ch'án kaín tí jie k'uéchóntani kixin Cristo kjuák'enkání ch'án tí ntacruz la xikaha kjuatsenxin ch'án tíha. ¹⁵ Cristo k'uenyákonhenni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchónta tí nchakuen jínahya kixin jehe ch'án kjuínchesuèhe ch'án tí sín jínahya noxín kixin jehe ch'án mé kjuacha ch'án.

Tjeyará tí nkehe síin nkaya nkajní

¹⁶ Méxra ninkexró chrókjontahyará kixin tí nkehe chrókjónterá o tí nkehe chrók'uirá o á tjíkosáyehérá tí yaon kia o tí nitjó nixin o tí yaon t'ok'éheni. ¹⁷ Kaín tí nkehe a la ó tóyóhó tí nkehe itsi. A ntá tí nkehe chaxín la mé Cristo tíha. ¹⁸ Méxra chrókuítóéhyará kixin ninkexró chróntáchro sín kixin ts'itjáyánrá kixin tinkachónkihyará tí sín ángel, tsixro sín. Tí sín a mé chrónkaxín sín tí nkehe éxí kotáchrién sín t'ikónxín sín la nchehnke sín kixin tí nkehe t'axrjeníxin kja sín ó. ¹⁹ A ntá jehe sín la chaxínhya tinkáchónki sín Cristo kixin jehe ch'án mé tí kja t'etuenhen kaín ni la jehe ch'án mé ch'éna ch'án jnkokoá cuerpo kuènte ch'án kaín ni la nchek'ánki ch'án tí cuerpo kixin jehe ch'án t'ayakonhenni ch'án kixin xikaha tjinkaon Dios.

²⁰ A ntá jahará la ó k'uénkoará Cristo la kuitohérá tí nkehe k'uék'etóan kuènte chjasintajni ó. ¿A ntá nkekuènté naxa tjejorá éxí tí chojni síin chjasintajni chrókjuínchexiteyará tí nkehe t'etoan sín? ²¹ Mé xikaha t'etoan sín kixin jahará chrótsehyará tíha la chrókjóntehyará tí nkehe la chrókuákjáhyará nkehe. ²² Kaín tí nkehe ntáchro sín mé nixja kuènte tí nkehe tsjeje la tíha mé t'axrjeníxin ikja chojni ó. ²³ Chaxín kixin jehe sín ntáchro sín kixin jína xikaha sínchexiteyá sín kixin tinkáchónki sín tí sín ángel la nchehnkehya sín la ko itsjé nkehe ch'ehe sín cuérpóé sín, kjánchó

kaín tí nkehe ch'e sín xíkaha la chónkó kixin tjinkĩtsahya kixin chrókuítóhe sín tí nkehe ntoáhya tjenkayáxin sín.

3

¹ A ntá tí jahará la ó tsíxechónkoará Cristo. Méxra chrókuéyará tí nkehe siín nkaya nkajní kixin Cristo la ntiha tjetjaxin ch'án tí tja chjina Dios. ² Chrókuenkayáxinrá tí nkehe siín nkaya nkajní. Chrókuenkayáxinhyará tí nkehe siín chjasintajni. ³ Kixin jahará la ó ik'uenrá la ntá ijie la Cristo la ko Dios chónthehe tí kjuachón kuéntará. ⁴ Jehe Cristo mé chontaxínrá kjuachón jahará la tió tsokjan tí jehe ch'án ntá kjaxínrá ts'ejókoará ch'án ntá ts'íkonrá tí kjuachaxin jié kuènte ch'án.

Tí ntia ntaxin la ko tí ntia nixin

⁵ A ntá chrókuítóhérá kaín tí jié tjenkayáxinrá chjasintajni. Ninkexró chrókuasinko jié chojni chjin ókjé, la ninkexró chrókuich'e nkehe jínahya, la ko ninkexró chrókuich'e ninkehó tí nkehe ntáchro asén sín, la ko kjaxin chrókóxrjienhya sín chróchóna sín itsjé nkehe kixin tíha mé yóhe tí chrórxaxinkaon sín tí nkehe tsíkjangya. ⁶ Méxra tí nkexro titekakonhya tí nkehe t'etóan Dios la tsonínkakohen Dios tí jehe sín la sinchekjasóte sín ch'án. ⁷ Mé xíkaha k'uékjich'erá jahará tí ósé. ⁸ Méxra ijie chrókuítóhérá kaín tí kjuanínkaon la ko tí nkehe tjak'e asánrá la ko tí nkehe jínahya la ko tí t'antaxínhínrá kíchuára la ko tí nkehe jínahya t'axrxjín ir'vará. ⁹ Chrókuich'iyéhyará kíchuára kixin ósé xíkaha k'uékjich'erá á ntá jie la ó chrókuítóhérá kaín tí nkehe ntaxin k'uékjich'erá. ¹⁰ A ntá jie la ó tsík'ónará ijnko chojni nixin. Dios tinkánchetjóará ch'án kixin ts'ónará éxi tí jehe ch'án kixin jehe ch'án kjuích'éna ch'án tí jahará. Mé xíkaha chrókuixraká chróchoxínrá tí jehe ch'án jína. ¹¹ Jehya tjetóan á chojni judío o náhi o á chojni tsíka xroye o náhi o á chojni tsíkjinín kjin o náhi o á chojni noehya o á chojni ch'exón xra o á chojni t'etóan. Tí nkehe tjetóan la tinkáchónkini Cristo la jehó ch'án t'etuèhen kaín nkehe.

¹² Dios la tjuèhe ch'án tí jahará la tsíkjeýará ch'án kixin tsinkachónkirá ch'án. A ntá jahará la ó k'ónará ijnko chojni nixin la chrókuikonóhérá kíchuára la jína chrók'uejorá la ko chrókuinchehnkehyará la ko chrókójahyará la ko chrókóninkákonhyará. ¹³ Chrókóninkákuénhyará kíchuára la chrók'uitjáyanhanrá ichrén jié kjuasínhanrá í jnko chojni kixin Cristo la k'uitjáyenhen ch'án tí jié kjuásínrá la kjaxin jahará la xíkaha chrókuich'erá. ¹⁴ Mé xíkaha chrótjuèhérá kíchuára la jnkokoá chrókuenkayáxinrá. ¹⁵ Tí kjuaxróxin kuènte Cristo mé chrók'uetuèhen asánrá kixin xíkaha kjuenkayáxin Dios k'uúyáhará ch'án kixin chrók'ónará jnkokoá cuerpo kuènte ch'án mé xíkaha chrókuancheherá ch'án kjuasáya.

¹⁶ Tí tan kuènte Cristo jnkochrínín chróchóna asánrá. Mé xíkaha chrókuákohérá kíchuára la chrókuinchechéhérá kíchuára kaín kjuaxrexinkaon jína. Chrótsjerá salmo la ko himno la ko canto kuènte Dios la chrókuancheherá Dios kjuasáya kaín asánrá. ¹⁷ Kaín xra chrókuich'erá la ko tí nkehe chróntáchorá la kaín táha chrókuanchaxínrá ihnjé Inchéni Jesús la chrókuancheherá kjuasáya It'éni Dios kjuachaxièn Jesucristo.

Jnkójina chrók'uejóko kíchó tí sín tinkáchónki Cristo

¹⁸ Jahará chojni chjin la chrókuinchehiteyéhérá tí xiyará kixin mé t'ichjánxin xíkaha chrókuich'erá kixin tinkachónkirá Inchéni. ¹⁹ Jahará

chojni ntoa la chrótjuèhérá tí ichjiánrá la chrókóninkákuénhyará tí jehe tjan. ²⁰ Jahará chánjanrá la chrókjuinchexiteyéhérá it'ará la ko inará kaín nkehe chrók'uetqan sín kixin xikaha mé tóxrjinhin Ìnchéni. ²¹ Jahará it'é xjan la chrókjuinchekóninkakonhyará tí xjaanrá kixin tí xikaha la chrókjuinchek'ávahyará tí jehe xjan. ²² Jahará chojni ch'exón xra chrókjuinchexiteyéhérá tí lámóará ntihi chjasintajni. Jehya kixin tí tjejótsjehe sín ó chrókjuich'erá xra kixin ntá jína chrók'uejoxinrá. Náhí. Kaín asánrá chrókjuich'erá xra kixin ó nohará kixin xikaha ch'eherá Ìnchéni xra. ²³ Kaín nkehe chrókjuich'erá la kaín asánrá chrókjuich'erá xra éxi chrókjuich'eherá xra Ìnchéni la jehya kixin éxi chojni ó chrókjuich'eherá xra. ²⁴ Ó nohará kixin Ìnchéni la sintakitonhanrá tí nkehe chóna ch'án kixin jahará ch'eherá Cristo xra la jehe ch'án mé chaxin Ìnchéni. ²⁵ A ntá tí sín ch'e tí jínahya tsjacha sín tí nkehe jínahya kjuich'e sín kixin Dios la tikonóehya ninkexró ch'e tí nkehe jínahya.

4

¹ Méxra jahará lámorá la jína chrónixjehérá tí sín t'ahará xra. Chrórxáinkáonrá kixin kjaxinrá jahará chontará ijnko Dios tjan nkaya nkajní.

² Chrókjuítóéhyará nixjehérá Dios la ko chrókjuanchehérá ch'án kjuasáya.

³ Kjaxin tjanchehérá ch'án tsjinkitsa tí jeheni kixin tsjanjon Ìnchéni kjuachaxin chrókuinhin chojni tsochrónkaxinni tí itén Cristo. Tí xra k'uénoehya ninkexró mé tjechjinaxián jie. ⁴ Tsjanchehérá Dios kixin tsjinkitsa ch'án tí janhan kixin chrókianxian jína chrókjuákua éxi tjinkaon Dios.

⁵ A ntá jahará la jína chrókjuákohérá itén Dios tí sín naxa tinkáchónkihya Ìnchéni kixin kánhyó tiempo siín kixin tsjàkorá. ⁶ Chrónixjehérá sín jnkojína kixin chrókóxrjinhin sín la chrókónohará chrókjuátéherá nkexrí tsixro jnkojnko chojni.

Kjuixin nixja ch'ín Pablo

⁷ Kíchóni Tíquico, mé ijnko nkexro jína tjinkitsa tí janhan ch'ehe Ìnchéni xra, mé tsjiji ch'án tsochrónka ch'án nkexrí tjén janhan. ⁸ Méxra kuétuqanhan ch'án tsjiji ch'án tí tjejorá kixin tsonohará kixin nkexrí tjejóni kixin chrókócháhará. ⁹ Jehe ch'án la ko kjaxin ch'ín Onésimo mé tjuèheni kíchó ni la ko jehe ch'án mé kjaxin jína ch'e ch'án xra, la mé tsjijitsjehe sín tí jahará. Jehe ch'ín Onésimo mé sín chjasánrá. Jehe sín mé tsochrónka sín kixin nkehe sitónhen tí tjejóni ntihi.

¹⁰ Ch'ín Aristarco mé jnkokoá tjechjinakian ch'ín ntóechiso mé nixjahará ch'án la ko kjaxin ch'ín Marcos mé tí ch'ín a mé naxa kjéhya ch'án ch'ín Bernabé. Ó nohará chrók'uayakonhénrá tí ch'ín Marcos tí tsjijitsjehe ch'án tí jahará la chjehérá ch'án kjuachaxin tsjak'e ch'án jína. ¹¹ Kjaxin nixjahará ch'ín Jesús, kjaxin tikítexin sín ch'án Justo. Jehó tí sín a mé sín judío tinkáchónki Cristo, a ntá ijie tjinkitsa sín tí xra tjet'a la chrónkaxin sín nkehe kuente tí kjuachaxin kuente Dios. La tí sín a mé imá kjuínchehána sín tí janhan. ¹² Ch'ín Epafras nixjahará ch'án. Mé jehe ch'án ch'ehe ch'án xra Cristo la jehe ch'án mé sín chjasánrá. Jehe ch'án jnkochrixin chrónóehé ch'án Dios tjinkaon ch'án kixin kaín asánrá chrókuinkachónkirá Dios éxi tjinkaon ch'án. ¹³ Ó nòna kixin ch'ín Epafras la tóxakonhen ch'án kixin tí jahará la ko tí sín tjejó tí chjasin Laodicea la ko

Hierápolis. ¹⁴ Ch'ín Lucas, mé tí ch'ín ch'e xroan, la kjaxin nixjahará ch'án la ko kjaxin ch'ín Demas nixjahará ch'án.

¹⁵ Nixjehérá tí sín kichó ni tjejó chjasin Laodicea la kjaxin nixjehérá tjan Ninfas la ko tí sín tójkotsé ntoe tjan. ¹⁶ Tió tsjixin sinchekuáxinrá tí xroon tsíkjihi tí tjejó ntiha la ichr'anrá xroon sátsji sinchekuáxin tí sín tjejó ninko chjasin Laodicea la ko kjaxin sinchekuáxinrá tí xroon tsíkjihihi tí jehe sín tió tsjihi tí xroon tí tjejórá. ¹⁷ Kjaxin chenkará ch'ín Arquipo kixin chrókjuinchexiteyá ch'án jina tí xra tsíkjanjon lnchéni sich'e ch'án.

¹⁸ Janhan Pablo tjaná kjinxian tí palabra nixjahará. Jahará chróxráxinkáonrá kixin janhan la tjéchiina la Dios mé chrókjuintayaonrá. Amén. Ó tjen.

Xroon saoxín ikjin ch'ín Pablo chr'énnen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kíchó ni n̄nko chjasin Tesalónica kixin jnkokoá tinkáchónkini It'éni Dios la ko Ìnchéni Jesucristo. Kjuasáyé It'éni Dios la ko Ìchéni chrók'uejorá.

Tí sín ókjé chjasin mé kjuíncheyóhe sín tí sín Tesalónica

² Jnkoyaxón chjéheni Dios kjuasáya la ko t'ákjenx̄inni tí jahará kaín rá kixin jehe ch'án mé chrókjuink̄itsa ch'án tí jahará. ³ Tió nixjeheni It'éni Dios xraxinkaonni kixin kaín asánrá kuítekáonrá Ìnchéni, a ntá tjejoch'erá xr̄a la ko imá tjuéhérá kichuárá ntá jnkokoá tjejochonhénrá tsokjan Ìnchéni Jesucristo. ⁴ Kíchóni jahará, imá tjuahará Dios la ó noheni kixin jehe ch'án tsíkjeýará ch'án tí jahará. ⁵ Na mé x̄ikaha tió kjuíjini chjasánrá kjuakoharáni tí tan jína n̄ixin tsaáxinni chrónkani na jehya iténni ó. Náhí. Kjaxin kjuachaxién Nchakuen Dios kjuakoq̄x̄inni la ko tí Nchakuen Dios mé kjuínchenoheni kixin tí itan kjuakoni la chaxín ntoá. Jahará la ó nohará jína kixin nkexrí k'uejóni tí tjejorá kixin x̄ikaha chrók'uejorá chrókjuakoq̄x̄inrá.

⁶ Mé x̄ikaha kjuíncheyóhérá tí jeheni la ko kjuíncheyóhérá tí Ìnchéni Jesucristo. A ntá tió kuínhínrá tí itén Dios ntá kaín asánrá kuinkachónkirá Ìnchéni la ko kócháhará kixin tí Nchakuen Dios mé t'etuēnhen asánrá kjónté nchónhya nkehe k'uat̄sínkará. ⁷ Mé x̄ikaha kjuakuēx̄inrá kaín tí sín tinkáchónki Ìnchéni ntiha estado Macedonia la ko tí sín estado Acaya. ⁸ Jahará kjuakoq̄x̄inrá tí itén Dios la jehya jehó estado Macedonia la ko tí estado Acaya kjuakoq̄x̄inrá. Náhí. Na mé kaín chjasin chjinaxón ntiha kuínhin sín kixin nkexrí tinkachónkirá Dios. A ntá jeheni na í t'ichj̄ánx̄inhya í jnko nkehe n̄ax̄a chróchronkani, ⁹ kixin ijie jehe sín mé tjejóchronka sín kixin nkexrí kjuíjini chjasánrá a ntá kaín rá kjuánjonrá kjuachaxin k'uejóni la ko kuítekáonrá tí itén Dios kjuakoharáni la ntá kuítohérá kaín tí nkehe tsíkjanoya kixin ntá kjuank̄ix̄inrá kuinkachónkirá Dios tjechón chaxín. ¹⁰ La ko kjaxin tjejóchronka sín kixin jahará tjejochonhénrá tsokjanx̄in nkaya nkajní tí Xjeen Dios na mé Jesús. Ó kjuínchexchón Dios tí Xjeen ch'án Jesús ntá jehe ch'án mé sinchekaáni kixin chrókjuasótéx̄inhyani tí nkehe jínahya chrókjuasótéx̄inni itsi.

2

Tí xr̄a tsík̄jich'e ch'ín Pablo tí chjasin Tesalónica

¹ Kónohará kaín rá kíchó ni kixin jehya chónkó kjuíjini chjasánrá. ² Ó kónohará kixin senó tí sín chjasin Filipos k'uek̄jinchekjasóteni sín la ko k'uek'ántax̄inh̄inni sín. Kjánchó Dios mé kjuink̄itsa ntá chrakonhyani kjuakoharáni tí tan tsaáxinni kuente Dios kjónté imá k'ueñínk̄onhenni sín. ³ Kónohará kixin jehya ntoáhya kjuakoharáni la ko jehya ijnko nkehe

náxrjónhya kjuakoni la ko kjuít'ayahyaráni ninkehó. ⁴ Náhí. Dios mé kjueyá ch'án tí jeheni kixin chrókjuakoni tí tan tsaáxinni, mé xikaha ntoá tjakoni. Jehya kixin chojni ó nchechéheni. Náhí. Nchechéheni Dios tí nkexro nohe nkehe tónhen asénni. ⁵ Ó nohará kixin kjuíuch'iyaxínhyani itan imá náxrjón kixin xikaha chrókuakitsjexínni chichaon chrókjuachani. Náhí. Dios la ó nohe ch'án kixin xikaha kjuíuch'eni. ⁶ Tjeyáhyani kixin chojni chrókjuikosáyeheni sín la á jahará la ó í so chojni. Náhí, xikaha ch'eni, kjónté chóntani kjuachaxin chrók'uetuānhanráni kixin chrókjuánjonrá nkehe chrók'uáyéheni kixin jeheni ch'eheeni xṛa Cristo. ⁷ Jnkojína k'uénixjaharáni k'uék'ejóni. Éxí yóhe ijnko ìné xjan t'àyakonhen xjeen kixin ts'ánkí xjan mé xikaha jeheni k'uàyakonhanráni tí jahará. ⁸ Imá tjuàhará ntá jehya jehó tí itén Dios chrókjuakoharáni. Náhí. Kjónté chrók'uenxínni tí tjakoharáni kixin xikaha imá tjuàhará. ⁹ Kíchóni, chróxraxinkáonrá kixin tió k'uéjóni chjasánrá la mé nchónhya xṛa kjuíuch'eni nchakotjin la ko tie ntá kjuachani chichaon k'uénaxínni nkehe sineni kixin tjinkakonhyani kixin chrótjáharáni xṛa chrókjuánjonrá nkehe chrókjoneni nachrohe k'uejóni ntiha kjuakoharáni itén Dios.

¹⁰ Jahará la ó nohará la ko ó nohe Dios kixin chaxín jína k'uéjókoaráni jahará chojni tinkáchónki Ìnchéni. Nijnko nkexro ts'ekahyani jie kixin ichrén nkehe jínahya chrókjuíuch'eni. ¹¹ Jahará ó nohará kixin kjuakoharáni la ko kjuínchechéheni tí jahará jnkojnkorá éxí ch'e ijnko it'é xjan tjuèhe xjeen ch'án. ¹² La ko k'uetuānhanráni kixin jína chrók'uejorá éxí tjinkaon Dios chrók'uejó tí sín tinkáchónki ch'án kixin jehe ch'án ó k'uíyáhará ch'án kixin chrók'uayéhérá tí kjuachaxin kuènte ch'án.

¹³ Méxṛa jnkochríxín tjancheheni Dios kjuasáya kixin tió kuínhínrá tí tan jína kuènte ch'án kjuakoharáni na ntá kjuátsōanrá kixin chaxín tí tan jína kuènte Dios ntá jehya tan kuènte chojni ḡ ntá kaín rá ó kuítekáonrá tí tan ḡ ntá k'uíxitóxin ntjará. ¹⁴ Mé xikaha jahará kíchó ni kjuasótiará kónínkakonhanrá tí sín chjasánrá éxí yóhe kónhen tí sín kuènte Dios tinkáchónki Ìnchéni Cristo Jesús tí estado Judea kixin tió kjuankíxin kuinkáchónki sín Ìnchéni ntá tí sín judío chjasén sín mé kjuankíxin sín kónínkakonhen sín chrók'óyán sín. ¹⁵ Ḃ ntá tí sín judío a mé tsík'óyán sín Ìnchéni Jesús la ko tsík'óyán sín tí sín tsíchronka tí itén Dios ósé la xikaha kjaxin k'uinkíténi sín. Ḃ ntá xikaha kjuíuch'e sín la kónínkakonhen sín kaín chojni. Ḃ ntá Dios la kóxrjénhya ch'án kixin xikaha kjuíuch'e sín. ¹⁶ Ḃ ntá tjinkaonni kixin chrókjuakoheni tí sín jehya judío tí tan jína chrókuááxin sín ḡ ntá tí sín judío tjinkakonhya sín chrókjuakoni. Na mé xikaha imá nchek'ánkí sín tí jie kuènte sín. Ḃ ntá xikaha kjuíuch'e sín ntá Dios sinchekjasóte ch'án tí jehe sín.

Ch'ín Pablo tjinkaon ch'án sáchrókjuitsjehe ch'án inaá tí sín chjasin Tesalónica

¹⁷ Kíchóni, tió kuítōheni tí jahará ḡ ntá kjónté ókjé k'uéjóni la k'uéxraxinkaonni kaín asénni tí jahará la ko imá tjinkaonni chrókjuíitsjeheni tí jahará inaá. ¹⁸ Na mé xikaha janhan Pablo itsjé veces mé tjínkavan chrókjuasántsjaḡa tí jahará, ḡ ntá tí ch'ín Tsochren mé k'uínkakónna ntá xitjahya tsjasán. ¹⁹ ¿Nkehe tsonhen tí xṛa tjejóch'eni tjejóchóenzinni la ko nkekuènte tjejóchéheni? Jahará mé tsochèxínni tió tsi Ìnchéni Jesucristo kixin kuítekáonrá ch'án. ²⁰ Méxṛa jahará mé kóchèxinni kixin kuítekáonrá.

3

¹ Ntá imá kóxakonhenni. Ntá kjuenkayáxinni kixin chrókójína jehóni chrókuítóhenei chjasin Atenas ² na ntá ichr'ánni tí kíchó ni Timoteo a tsji-jitsjehe ch'án tí jahará kixin kjaxin ixra kuènte Dios tjech'e ch'án tjejókoni ch'án tjako ch'án tí tan kuènte Cristo tsaáxinni. Ntá ichr'ánni ch'án kixin sintaxraxinkaonrá ch'án tí itén Ìnchéni la ko sinchechéhe ch'án asánrá ³ kixin tsqrxjéhya asánrá má kixin tí kjuaxróxinhya tjejot'atsínkará. Kixin xikaha ó nohará kixin t'ichjánxìn tsjasótexínni tí xra kuènte Ìnchéni. ⁴ Naxa k'uéjóni jnkokoá ntiha la ó tjonkará kixin kaín ni kjuaxróxinhya tsonhenni tsjasóteni. A ntá jie la ó nohará kixin chaxín xikaha kónhen. ⁵ Méxra imá kóxakonna ntá ichr'an kíchó ni Timoteo kjuújitsjehe ch'án nkexrí tje-jorá, á naxa tinkachónkirá Ìnchéni o ách'e ch'ín Tsochren chrókjuachroerá chrókuítóhérá tí ntje Ìnchéni a ntá chrókóchónkó kaín tí xra kjuich'eni kjuakoharáni.

⁶ Na ntá ó kjanxìn ch'ín Timoteo chjasánrá Tesalónica chrónka ch'án kixin jína tjejorá naxa tinkachónkirá Ìnchéni, la ko naxa tjejorá tjuèhérá kíchuará la ko chrónka ch'án kixin xraxinkáonrá tí jeheni tjinkaonrá chrókjuijitsjeheni tí jahará. Kjaxin jeheni xikaha tjinkaonni chrók'uikonní tí jahará. ⁷ Mé xikaha kíchó ni tjejót'atsínkani kjuaxróxinhya ntihi na ntá kjónté kóchéhe asénni kuínhinni kixin kaín asánrá naxa tinkachónkirá Ìnchéni. ⁸ A ntá kuínhinni xikaha kixin jína tjejorá naxa tinkachónkirá Ìnchéni Jesús a ntá antsí kóchéhenei. ⁹ Ntá imá tsjancheheni Dios kjuasáya kixin xikaha imá chéhe asénni kixin tí jahará tinkachónkirá ch'án. ¹⁰ Tie la ko nchakotjin chronóeheni Dios kixin tsjanjon ch'án kjuachaxin tsjijit-sjeheni tí jahará inaá kixin naxa t'itjáyan iso nkehe chrókjuakoharáni naxa chrók'uitjárá nkexrí jína chrókuinkachónkirá Ìnchéni.

¹¹ Tjejótjancheheni T'eni Dios la ko Ìnchéni Jesucristo kixin chrókjuinkítsani ch'án chrókjuijitsjeheni tí jahará ¹² la ko tjancheheni Ìnchéni kixin chrókjuinkítsa ch'án tí jahará kixin antsí má chrótjuèhérá kíchuará la ko chrótjuèhérá kaín xín chojni éxí yóhe tjuàhará. ¹³ Tjancheheni ch'án kixin sintaxraxinkaonrá ch'án kixin kaín asánrá chrókuitekáonrá ch'án kixin ntá tsochóntahya asánrá ninkehó jie nkayakon It'eni Dios tió tsokjan Ìnchéni Jesús tsikao ch'án kaín tí sín ó tsikótjóá.

4

Nkexrí tóxrjínhin Dios chrók'uéjóni

¹ Jahará kíchó ni chronóaharáni la ko ntaxraxinkaonráni tí kjuachaxin ihnié Ìnchéni Jesús kixin jína chrók'uejorá tinkachónkirá Ìnchéni éxí tje-joch'erá jie kixin éxí kjuakoharáni. Mé xikaha jína sinchechéhérá Dios.

² Ó nohará tí nkehe kjuakuaxinráni kjuachaxin kuènte Ìnchéni Jesús. ³ Tí nkehe tjinkaon Dios kixin jína tjóá chrók'uejorá la ko chrókjuásinkoahyará jie í jnko chojni chjin ókjé. ⁴ Jnkojnkora chrókónohará chróchontará jnkojnko ichjiánrá la ko jína chrók'uejorá chrótjuèhérá kíchuará. ⁵ Jehya kixin chrókjuakérá asánrá tí nkehe jínahya chrókjuich'erá éxí ch'e tí chojni chónhya Dios. ⁶ Nijnkorá chrókjuich'iyehérá ichjién kíchuará xikaha kixin Ìnchéni mé imá sinchekjasóte ch'án tí chojni xikaha sich'e mé xikaha kjuíntaxraxinkaonráni senó. ⁷ Dios mé k'uíyehenei ch'án kixin jína chrók'uejóni, jehya kixin naxa chrókjuasinni jie. ⁸ A ntá tí sín

chóntehya kjuasáyé tí nkehe tjakoni na mé jehya kixin chóntehya sín kjuasáyé chojni. Náhi. Chóntehya sín kjuasáyé Dios, tí nkexro kjuanjon tí Nchakuen chóntani.

⁹ A ntá tí tjuèhérá kichuárá la í t'ichjánxìnhyá naxá chrókjinni tsochronkani kixin nkexrí chrótjuèhérá kichuárá kixin jehe Dios mé tjetjakohará ch'án nkexrí chrótjuèhérá kichuárá. ¹⁰ Xràxín xikaha tjejoch'erá tjuèhérá kaín tí sín kichó ni tjejó estado Macedonia. Kjánchó chronóaharáni kichó ni kixin antsí má chrótjuèhérá kichuárá. ¹¹ Tóxakonhanrá kixin kjuaxróxin chrók'uejorá. Jnkojnkorá nohará nketí xrá chrókjuich'exínrá tjárá éxi k'uetuānhanráni. ¹² Na mé xikaha chrók'uikon tí sín chónhya Dios ntá chróchóntahará sín kjuasáya la ko chrók'uitjáyanhya ninkehó nkehe chrókuicháxìnhanrá.

Itsi Ìnchéni Jesús

¹³ Kíchóni, tjínkavan kixin chrókónohará nkehe tsonhen tí sín tsík'en. Na mé tjínkavan kixin kánhyó chrótsjankàmará sín chrókóyóahyará tí sín tinkáchónkihya sín Ìnchéni naxá chóenhya sín kixin chróxechón sín inaá. ¹⁴ Kuítekaonni kixin ik'uéen Ìnchéni Jesús la ko xechón ch'án inaá la ko kjaxin titekaonni kixin Dios kjuínchexechón Jesús la ko tió tsokjan Jesús ntá sinchexechón Dios kaín xín tí sín tsík'en kuítekaon sín tí jehe ch'án.

¹⁵ Méxra chénkani tí jahará tí nkehe kjuako Ìnchéni kixin tí naxá tjejóchónni tió tsi ch'án na kjónté naxá tsitónxinhyani ntja, naxá tsochónhenni tí sín tsík'en. ¹⁶ Jehe Ìnchéni mé ts'inkajinxìn ch'án nkaya nkajni la ko itsen tsonixja ch'án kixin tí kjuachaxin jié kuente ch'án la ko ts'èya tí ángel t'etoan la ko tsontácho tí trompeta kuente Dios. A ntá kaín tí sín tsík'en kuítekaon sín Ìnchéni Cristo la senó tsoxechón sín. ¹⁷ A ntá chr'èxin kaín xinni tjejóchónni la ko kaín xín tí sín tsíxechón mé jnkokoā tsochrìinni kixin tí kjuachaxin jié kuente Ìnchéni. A ntá xrikjan tjuì tsoxetani ch'án. Mé xikaha ts'ejókoni ch'án jnkochrìxín. ¹⁸ Méxra xikaha chrókjuìnchechéxínrá kichuárá tí tan í kixin xikaha tsonhen tió tsokjan Ìnchéni.

5

¹ A ntá tí yaon tsonhen tíhi kichó ni t'ichjánxìnhyá naxá tsokjinni í jnko nkehe tsinhínrá. ² Jahará ó nohará jína kixin titàya itsi tí yaon tsokjan Ìnchéni éxi yóhe chrókui ijnko xíchee tí tie a. ³ Ts'ejó sín itsjo sín kixin ijie kjuaxróxin tjejó sín kaín sín la ko ninkehó nkehe tsonhen sín. Ntá xríñahya titàya itsi tí kjuaxikaon jié la ko kjuachrakon mé ts'itjáyanxín tí kjuachón chróchónnta sín éxi yóhe ijnko tjan tjejá xríñahya titàya ts-jankíxín ts'óntáki tjan kixin sinchekokjìhi tjan xjeen tjan na mé jehe tjan xitjahya tsontácho tjan “Náhi”, mé xikaha jehe sín chóntahya sín nkerí tsaáxin sín. ⁴ Ntá jahará kichó ni sítiéhya tjejorá ntá chróchrakonhyará tí yaon itsi Ìnchéni. Tí náhi chróchrakonrá éxi chrókui ijnko xíchee chrókjuintachakonrá. ⁵ Ntá jie kaín rá mé tjejorá tí ntja t'inkáséyan. Jeheni la jehya tjejóni tí ntja sítié a. ⁶ Méxra xikaha chrók'uejójuahyani éxi tjejójua tí sín í so na mé chrók'uejótsejeheni chrókjuenkayáxinni jína. ⁷ A ntá tí sín t'ajua la tjejójua sín tí sítié ó la ko tí sín tókoan la tókoan sín tí sítié a. ⁸ A ntá jeheni na tjejóni tí ntja t'inkáséyan t'ichjánxìn kixin jína chrók'uejóni chrókjuasinhyani jié. Chrókuinkáchónkini Ìnchéni la ko chrótjuèheni ch'án.

Ntá jeheni na Ìnchéni ts'ayakonhenni ch'án tsaáxinni ch'án éxí tí ch'ín soldado t'inkáya ka tsík'óna chica kixin kohya nkehe tsonhen ntakuin ch'án. La ko chrók'uejóchónhenni itsi Ìnchéni tsaáxinni ch'án na mé éxí tí ch'ín soldado a xrasín ch'án nkehe tsík'óna chica t'ayakonhen kja ch'án kixin kohya nkehe tsonhen kja ch'án. ⁹ Kjueyáhya Dios tí jeheni kixin chrókjuinchekjásóteni ch'án. Náhí. Kjueyá ch'án tí jeheni kixin chrókuaáxinni Ìnchéni Jesucristo. ¹⁰ Jehe Jesucristo mé k'uenyákonhenni ch'án kixin chrók'uejókoni ch'án jnkochrín kjointé naxa tjejóhónni o kjointé ó tsík'enni tió tsokjan ch'án. ¹¹ Méxra xikaha chrókjuinchechéhérá kichuára la ko chrókjuínkĩtsará kichuára kixin jina chrók'uejó sín éxí xráxin tjejoch'erá.

Ch'ín Pablo mé nchexraxinkaon ch'án tí sín tinkáchónki Cristo

¹² Kichóni chronoàharáni kixin chróchontehérá kjuasáyé tí sín tjejóch'e sín xra kuente Dios ntiha tjejótjitaón sín ntja chrónka sín itén Ìnchéni. ¹³ Na mé chróchontehérá sín kjuasáya la ko chrótjuèhérá sín má kixin tí xra tjejóch'e sín. A ntá jahará kaín rá jnkójina chrók'uejokoará kichuára.

¹⁴ Méxra tétuanhanráni kichó ni kixin chrókjuéntuèhérá tí sín tjinkakonhya sich'e sín xra la ko chrókjuinchechéhérá asén tí sín kóxrjé asén sín la ko chrókjuínkĩtsará tí sín naxa noehya sín jina la ko chrókóninkákuénhyará ninkexró.

¹⁵ Tóxakonhanrá kixin chrókjuich'ehyará jínahya tí sín jínahya kjuít'ahará. Íchá jina chrókjuákoxinrá nkehe jina chrókjuich'erá kixin ts'ikon kaín xín chojni chjasintajni kixin jina tjejotjenkayáxinrá.

¹⁶ Méxra nchechéhérá asánrá jnkochrín. ¹⁷ Chrókjuitoéhyará chrónixjehérá Dios jnkochrín. ¹⁸ Kjointé ichrén nkehe chrókónhanrá la chróchjehérá Dios kjuasáya kixin xikaha mé tjinkaon ch'án chrókjuákoxinrá kixin tinkáchónkirá Ìnchéni Cristo Jesús.

¹⁹ T'ók'ankahyará tí xrohi t'inkáséyanxín Nchakuen Dios. ²⁰ Chontehérá kjuasáyé nkehe tjako tí sín kichó ni chronkaxín sín kjuachaxin kuente Nchakuen Dios. ²¹ Chrótsjehérá jina tí nkehe tjejóch'e sín. A ntá tí jina na chrókuítekáonrá. ²² Chrókjuitohérá kaín xín nkehe jínahya.

²³ Dios mé tjanjon kaín kjuaxróxin ntá tjancheheni ch'án kixin jehe ch'án sinchetjóará ch'án la ko ts'ayakonhen ch'án nchakuanrá la ko asánrá la ko cuerpo kuéntará kixin tsochóntahya ninkehó jie tió tsi Ìnchéni Jesucristo. ²⁴ Dios tí nkexro kjueyá tí jahará mé jina ch'án la ko kaín tí nkehe ntáchro ch'án la tsoxiteyá.

Ch'ín Pablo kjuixixin nixjehé ch'án sín la ko tjanchehe ch'án Dios kixin chrókjuincheyaon tí jehe sín

²⁵ Kichóni chrónóghérá Dios kixin tsjinkĩtsani ch'án kaín ni.

²⁶ La ko nixjehérá kaín xín tí sín kichó ni ntiha tsehérá tja sín.

²⁷ T'etóanxínni tí kjuachaxin kuente Ìnchéni kixin nchekuáxinrá tí xroon chr'anhanrá tsinhin kaín xín tí sín kichó ni ntiha.

²⁸ Kjuasáyé Ìnchéni Jesucristo sintayaonrá ch'án. Amén. Ó tjen.

Xroon yóxin ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni nínko chjasin Tesalónica kixin jnkokoá tinkáchónkini It'éni Dios la ko Ìnchéni Jesucristo. ² Kjuasáyé It'éni Dios la ko Ìnchéni Jesucristo chrókuintayaonrá ch'án kixin kjuaxróxin chrók'uejorá.

Dios sinchekitoexín ch'án tí ijíé chojni tió tsokjan Ìnchéni Cristo

³ Kichóni chrókjuancheheni Dios kjuasáya jnkochrín kixin tí jahará. Na mé jína xíkaha chrókjuich'eni kixin tinkák'ánkí tí tinkachónkirá Ìnchéni Jesús la ko tinkák'ánkí tí tjuèhéra kichuára tjejorá ntiha. ⁴ Ntá chéheni chenkaní tí sín kichó ni kaín tí nínkoe Dios kixin naxa tjákoxinrá kixin naxa tinkachónkirá Ìnchéni kjonté síin chojni nínkakonhanrá la ko kjonté t'atsínkará itsjé kjuaxróxinnya. ⁵ Tíha mé tjákoxinrá kixin tjinkaon Dios tsotsjehe ch'án kixin á tsjachará ts'ikonrá tí kjuachaxin kuènte ch'án. Méxra xíkaha tjejtjasótexínrá jie.

⁶ Méxra ó nchoxon kixin sinchekjasóte Dios tí sín tjejónchekjasótiará jie. ⁷ Ntá tsjanjon ch'án kjuachaxin kixin ts'ok'áhará kixin ó kjuasótiará la ko kjaxin jeheni ts'ok'éheni tí yaon itsi Ìnchéni Jesús ts'inkajinxin ch'án nkaya nkajní tsíkao ch'án kaín tí sín ángel t'etoan kuènte ch'án na mé tsíkao ch'án xrohi nene. ⁸ Mé xíkaha itsi ch'án kixin sinchekjasóte ch'án tí sín kuítekakuenhya Dios la ko kuítekakonhya tí tan jína kuènte Ìnchéni Jesucristo chrókuaáxin sín. ⁹ A ntá tí sín kuítekakonhya mé tsjasóte sín jnkochrín ts'ítuenhen sín ts'axrjenta sín tí kohya Ìnchéni, í ts'ikonhya sín tí kjuachaxin t'etoanxin ch'án. ¹⁰ Xíkaha tsonhen tí yaon itsi Ìnchéni tsjikosáyehe ch'án kaín xín tí sín kjuínchetjóá ch'án la ko kaín tí sín kuinkáchónki sín ch'án la ts'ikon sín tí kjuachaxin jie kuènte ch'án. Mé xíkaha kjaxinrá jahará kixin ó kuítekáonrá tí nkehe kjuakoharáni.

¹¹ Mé xíkaha jnkochrín tjancheheni Dios kixin jína chrók'uejorá éxi tjinkaon ch'án chrók'uéjó tí sín kjueya ch'án, la ko tjancheheni Dios kixin chrótjáhará ch'án kjuachaxin kuènte ch'án kixin chrókjuinkitsará ch'án kixin chrókjuachará ch'erá kaín tí xra jína tjinkáonrá chrókjuich'erá kixin tinkachónkirá ch'án. ¹² Mé xíkaha kaín xínrá tsjikosáyehéra tí ihníé Ìnchéni Jesucristo la ko jehe ch'án mé kjaxin tsjikosáyahará ch'án kixin tinkachónkirá ch'án. Mé xíkaha kjuasáyé Dios la ko Ìnchéni Jesucristo kixin kuíkonóheheni ch'án.

2

Tsonoxín ijnko ch'ín jínahya

¹ Kichóni, a ntá tí tsi Ìnchéni Jesucristo la ko tsojnkotséni tí tjen ch'án jehe ch'án, méxra xíkaha chrónóaharáni ² kixin chrókjuítóxinhyará tjoka tí nkehe chrókjuenkayáxinrá, la ko ní chróchrakonhyará tí chróntácho jnkójín nkexro tónohe sín kixin ó kjuixraká tí yaon itsi Ìnchéni, la ko chróchrakonhyará xíkaha chrókuínhínrá chróchronka ijnko chojni tjako, la

ko chróchrakonhyará tí tsochronka sín kixin ó k'uáyéhe sín ijnko xroon éxi jeheni tsíkjanjonni chrónka kixin xikaha tsonhen. ³ Tjtoéhyará kixin jnkojin nkexro chrókjuít'ayahará xikaha. Naxa tsihya tí yaon ntá senó itsjé chojni tsonínkakhonhen sín Dios, la ko tsonoxín ijnko ch'ín jínahya chóna jie, na ntá tíha mé tsjasóte jnkochrín. ⁴ Tsjak'e ch'án tsjanjonko ch'án kaín xín nkehe tinkáchónki chojni, mé tsjak'etjaxin ch'án nkaxenhen tí njnko Dios kixin jehe ch'án mé sich'éna asén ch'án éxi Dios tí jehe ch'án.

⁵ ¿Á xráinkákonhyará kixin xikaha k'uéxrjanka senó tí naxa k'uéjóni jnkokoá? ⁶ Ntá jahará ó nohará nkehe tí kjuachaxin naxa chóntehe kixin naxa tjexrakáhya tí yaon tsonoxín tí ch'ín jínahya. ⁷ Ntá jie imó ch'e xra tí kjuachaxin jínahya. Kjónté naxa t'itjáyán kixin sáchrókjuí tí nkexro chóntehe. ⁸ A ntá tí ch'ín jínahya tsonoxín ch'án. Ntá tió tsi Ìnchéni Jesús ntá tí itén ch'án ts'axrjéxín ir'va ch'án ó mé ts'enxín tí jínahya a kixin mé xikaha sinchek'itjáyánxín ch'án tí jínahya tí kjuachaxin jie tsíkao ch'án. ⁹ Méxra tí ch'ín jínahya mé tsíkao ch'án tí kjuachaxin kuènte ch'ín Tsochren la mé xikaha tsochóna ch'án kjuachaxin jie tsjakoxin ch'án sich'iyaxín ch'án tsjasin ch'án kjuaxroan ntoáhya. ¹⁰ Mé xikaha kaín nkehe jínahya sich'iyexín ch'án tí sín xráxín ts'itjáyán sín kixin chrohya sín chrókuitekaon sín tí tan chaxín ntoá chrókuaáxín sín. ¹¹ Méxra tsítóhe Dios tí jehe sín kixin tsitekaon sín kaín nkehe chaxínhya ¹² kixin ntá tsjasóte kaín tí sín kuítekakonhya sín tí tan chaxín chrókuaáxín sín na mé antsí kóxrjínhín sín chrókjuasín sín jie tsjasótexín sín.

Dios mé kjuéyá tí jehe sín kixin chrókuaá sín

¹³ Ntá jeheni chrókjuancheheni Dios kjuasáya jnkochrín kixin jahará kichó ni chojni tjuahará Ìnchéni kixin tí tsíkjeýá Dios tí jahará kixin senó chrókuaáxinrá tí Nchakuen ch'án tsotjuáxinrá la ko tí itén ch'án chaxín ntoá kuítekaónrá. ¹⁴ Méxra xikaha k'uíyahará Dios kixin chrókuaáxinrá tí itén ch'án tjakoni kixin ntá tsjachará ts'ikonrá tí kjuachaxin jie kuènte Ìnchéni Jesucristo.

¹⁵ Mé xikaha kichó ni, jína chrók'uejorá chrók'uitjáyánhyará tí nkehe kjuakoharáni tió k'uéjóni jnkokoá la ko tí nkehe chrónka tí xroon ikjinni k'uayéherá. ¹⁶ Ntá Ìnchéni Jesucristo la ko It'éni Dios na mé tí nkexro kjuasáyé ch'án tjuèhe ch'án tí jeheni la ko nchechéhe ch'án asénni jnkochrín la ko kjuasáyé ch'án tjejóchónhenni itsi Ìnchéni ¹⁷ na mé sinchechéhe ch'án asánrá la ko tsjanjon ch'án kjuachaxin kixin ntoá chrók'uejorá ntá jína chrónixjará la ko kaín xra jína chrókjuich'erá.

3

Nixjehérá Dios kixin tsjinkítsa kaín ni

¹ Méxra kjuixixín chrónoaharáni kichó ni kixin chrókjuancheherá Dios kixin chrókjuinkítsa ch'án tí jeheni kixin tjoka sáchrókjuikjakoni itén Ìnchéni nkuixín kixin ntá tsinhin chojni la tsjikosáyehe sín ch'án éxi yóhe kuítekaónrá jahará. ² Kjaxín nixjehérá Dios kixin chrókjuinkítsani ch'án kixin kohya nkehe chrókónhenni tí síin chojni jínahya nínkakhonhenni kixin kénhya sín tinkáchónki Ìnchéni. ³ Ntá Ìnchéni mé chaxín jína ch'án la jehe ch'án tsítóehya ch'án tí jahará naxa tsjinkítsará ch'án kixin jína ts'ejorá la ts'ayakonhanrá ch'án kixin kohya nkehe jínahya tsonhanrá. ⁴ Ó noheni kixin Ìnchéni la tsjinkítsa ch'án tí jahará kixin naxa sich'erá

xra éxi k'uetuanhanrani. ⁵ Ìnchéni tsjinkĩtsará ch'án tsonohará kixin Dios la tjuahará ch'án la ko tsjinkĩtsará ch'án kixin chrókóninkákonhyará éxi kóninkakonhya Cristo.

T'ichjánxin chrókjuich'eni xra

⁶ Kíchóni t'etoxínini tí kjuachaxin ihnié Ìnchéni Jesucristo kixin chrók'uaxrjekjanxínra tí sín kíchó ni tjinkakonhya sich'e xra la ko xrihya sín éxi kjuakoharáni. ⁷ Ó nohará kixin nkexrí chrók'uejorá chrókjuákoxinra éxi k'uéjó tí jeheni kixin tí k'uéjókoaráni la jehya kixin kjuich'ehyani xra. ⁸ Jehya kixin kjóneni niqtjé jnkójín nkexro ntá chrókjuenkahyani. Náhí. Kóxakönhenni nchakotjin la ko tie kjuich'eni xra kixin ninkehó chóntiäxinyani tí jahará kixin chrókjuánjonra tí nkehe chrókjóneni. Náhí. ⁹ Kjónté chóntani kjuachaxin chrókjuanchaharáni kixin chrókjuinkĩtsará tí jeheni kjánchó jeheni na kjuich'eni xra kjuakoxinni kixin xikaha jahará chrókjuich'erá xra. ¹⁰ Kixin tí naxa k'uéjóni jnkokoá ntiha k'uetoxanni kixin: Tí nkexro tjinkakonhya ch'e xra la kjaxin chrókjonehya. ¹¹ Ó kuínhini kixin tjejorá jnkójínra ninkehó xra ch'ehyará a ntá kjuach'ia ó xrikoará. ¹² A ntá tí kjuachaxiën Ìnchéni Jesucristo t'etoxínini la ko chrónóexinni tí sín a kixin chrókóninkakonhya sín chrókjuich'e sín xra kixin chrókjuacha sín chichaon chrók'uite tí nkehe chrókjone sín.

¹³ Ntá jahará kíchó ni, chrókóxrjéhyará chrókjuich'erá tí nkehe jina. ¹⁴ A ntá tí tjen jnkójín nkexro titekakonhya tí nkehe t'etoxínini tí xroon i la tsjehérá jina nkexro tíha la ntá chrók'uitohyará ch'án la ntá chrókósuèhe ch'án. ¹⁵ Kjánchó jehya kixin chrókjuánjonkoará ch'án. Náhí. Chrókjuinchexraxinkáonra ch'án jnkójína éxi ijnko chojni kíchó ni.

Ó kjuixixín nixja ch'ín Pablo

¹⁶ Ìnchéni mé tjanjon tí kjuaxróxin la ko naxa tsotjáhará ch'án kjuaxróxin jnkochrixin kjónté ichrén nkehe chrók'uatsínkará. Jehé ch'án mé t'ayakonhanra ch'án kaín rá.

¹⁷ Janhan Pablo tjaná mé kjinxian tí nkehe nixjahará. Mé xikaha chrókjuátsoanxínra tí letra kaín carta tsíkjian.

¹⁸ Ntá Ìnchéni Jesucristo mé kjuasáyé sintayaonra ch'án kaín rá. Amén. Ó tjen.

Tí xroon saoxín ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo kjueyána Jesucristo la ko Dios mé tsík'etuanna mé jehe ch'án mé tí nkexro nchekaá chojni. La ko kjaxin k'uetuanna Ìnchéni Jesucristo tí nkexro tjejóchónhenni itsi. ² Ikjian tí xroon chr'anhan jaha Timoteo. T'íkuan éxí xjanna tí jaha kixin jaha tinkachónkia Cristo Jesús. Kjuasáyé It'éni Dios la ko Ìnchéni Jesucristo chrókjuintayavan ch'án la ko chrókuikonóaha ch'án kixin kjuaxróxin tsjak'e jaha.

Chrókjuinchehráxinkaon ch'án sín kixin chrókuitekakuenhya sín tí nkehe chaxínhya

³ Éxí xrjannóaha tió sákjuia estado Macedonia la mé jaha chrókuítgha tí chjasin Éfeso la ntaha chrókuétuénhén iso tí sín ntiha kixin chrókuakohya sín tí nkehe ntoáhya. ⁴ La ko chrókuétuénhén sín kixin chrókuahya sín kuenté tí cuento tsíchronka chojni tí ósé a. Tí tinhin sín tíha la imá tjachaxin kichó sín la ó chónkó tíha. Kaín tíha la í tsjinkitsahya kixin sinchexiteyéheni Dios kixin tinkáchónkini ch'án.

⁵ Tí nkehe tjinkaonni la chrótjuèheni kichó ni kaín ni kixin ó kótjóá asénni la ko ó noheni kixin jina tjenkayáxinni la ko kaín asénni tinkáchónkini Cristo. ⁶ Iso sín la kjuíchròe sín kixin itjo tí nkehe chónkó. ⁷ Tjinkaon sín chrók'óna sín maestro chrókuako sín tí ley a ntá jehe sín tienxínhya sín tí nkehe tjako sín kjánchó ntáchro sín kixin ó ntoá tí nkehe tjako sín, ntá chaxínhya.

⁸ A ntá jeheni la ó noheni kixin tí ley la jina tí chrokuakoni éxí tjinkaon Dios. ⁹ Ó noheni kixin tí sín tjasinhya jie t'ichjánxienhya sín tí ley tsík'etoan Moisés. Tíhi la t'ichjánxinhin tí sín titekakonhya la ko tí sín jiehe la ko tí sín jínahya tjasin jie la ko tí sín chóntahya kjuasáyé Dios la ko tí sín t'óyán it'é la ko iné sín la ko kaín tí sín tjàya. ¹⁰ La ko tí sín tjasinko jie ijnko chojni chjin ókjé la ko tí sín jnkokón ntoa sín takja kichó sín la ko tí sín teé chojni ntá nchekji, la ko tí sín ch'ia la ko tí sín nchenohe Dios ntá chaxínhya. Mé tí ley mé chrókuinhin kaín tí sín ch'e tí nkehe jínahya la nínkakonhen tí nkehe jina tjakoni. ¹¹ Tí nkehe tjakoni mé chaxín tí tan jina sinchekaá chojni la tí Dios tjetooan mé k'uetuanna kixin tsjakua tíha.

Ch'ín Pablo kjuanchehe ch'án kjuasáyé Dios

¹² Tjáncháha kjuasáyé Ìnchéni Jesucristo kixin imá kjuínkitsana ch'án la ko k'uíkon ch'án kixin jina sit'aha ch'án xra ntá chjina ch'án tí xra i. ¹³ Mé xikaha kjueyána ch'án kjónté senó imá k'uék'ántaxínhan tí sín tinkáchónki ch'án la ko k'uéchonkihá sín la ko chrók'oyán sín. Kjónté la Dios imá kuíkonóehe ch'án tí janhan kixin ó nohe ch'án kixin k'uékinkachónkihya janhan tí jehe ch'án la ko k'uénonahya nkehe tí xra k'uékjit'a. ¹⁴ Méxra Ìnchéni antsí má kjuíncheyaonna kixin ntá kjuanjon ch'án kjuachaxin kixin tsinkachónkia ch'án la ko tsotjuaha ch'án. Mé xikaha kaín ni chóntani tí kjuachaxin tinkáchónkini Cristo Jesús.

¹⁵ Tíhi mé chaxín la kaín ni chrókuitekaonni. Ikui Jesucristo chjasin-tajni kixin sinchekaá ch'án tí sín kjuasin jie. Ntá janhan mé antsí má

kjuásian jie. ¹⁶ Kjónté xikaha kjuít'a la Dios antsí má kujkonóna ch'án tí janhan kixin xikaha kjuakoxin Jesucristo kixin kóninkakonhya ch'án. Mé xikaha tsjúkuaxian kaín nkexro sitekaon tí jehe ch'án kixin tsochóna sín kjuachón jnkochrixín. ¹⁷ Ntá jnkochrixín tsochónteheni kjuasáyé tí Rey t'etoan. Jehe ch'án mé ijnko nkexro xráxín tjen la mé ijnko nkexro chónhya ts'en la xitjahya ts'ikonni ch'án. Jehó ch'án mé Dios la imá nohe ch'án. Amén.

¹⁸ Timoteo, éxi xjanna t'íkuan tí jaha, la kaín tí xra i tjaha kixin tsjanjonkoa tí jínahya la tsjacha kixin tinkachónkia jína Ìnchéni la ko tjenkayáxian tí nkehe jína. Mé xikaha sinchexiteyá tí nkehe kuínhín senó kixin tí sín kichó ni chrónkaxín ihnjé Dios. ¹⁹ Í so sín la kjuenkayáxinhya sín tí jína ntá kjuíchròe sín kuitòhe sín tí nkehe tinkáchónki sín. ²⁰ Mé xikaha kónhen ch'ín Himeneo la ko ch'ín Alejandro. Janhan kjuánjuan kjuachaxin kixin ch'ín Tsochren mé sinchekjasóte sín kixin mé xikaha ts'itja sín kixin í ts'ántaxíenhya sín Dios.

2

Nkexrí chrónixjeheni Dios

¹ A ntá saoxín la xrjanóaha kixin kaín chojni chrónixjehé sín Dios la chrókjuanchehe sín kjuasáyé ch'án kixin chrókjuinkítsa ch'án kaín xín chojni. ² Chrókjuanchia sín kixin Dios imá chrókjuinkítsa ch'án kaín tí sín t'etoan la ko tí sín gobierno kixin ntá kjuaxróxin ts'ejóni la ko sinchexiteyéhéni Dios la ko ntoá ts'ejóni. ³ Xikaha mé imá jína la tóxrjínhín Dios, mé tí nkexro tsaáxinni. ⁴ Jehe ch'án mé imá tjinkaon ch'án kixin tsaá kaín xín chojni la ko tjinkaon ch'án kixin tsoñohe chojni tí nkehe chaxín ntoá. ⁵ Mé itjen jnkokoáxón Dios la ko itjen jnkokoáxón nkexro nixjayákonhenni kixin tsochóxinni Dios. Tíha mé Jesucristo mé k'óna chojni ikui ch'án chjasitajni. ⁶ Jehe Jesucristo mé k'uenyákonhenni kaín xinni, kjuenkayákonhen ch'án ijéni kixin tsaáxinni ch'án. Táha mé xiteyá tí tsintáchro Dios ósé kixin xikaha tsoñhen ch'án. ⁷ Méxra tí xra mé kjueyána Dios kixin tsjúkákòha tí sín jehya judío kixin tsinkáchónki sín Jesucristo la ko tsoñohe sín tí nkehe chaxín. Janhan mé tinkachónkia Cristo la xrxjanka tí nkehe chaxín mé t'ayahya.

⁸ Méxra tjínkavan kixin kaín tí sín ntoa mé chrónixjehé sín Dios la chrókjuaya sín tja sín la chrókótjóá asén sín la ko chrókóninkakonhya sín la ko chrókjuéhya sín kjuanínkaon. ⁹ A ntá tí chojni chjin mé ntoá chrók'uitsa sín ka la chrókjuinchehnkehya sín la ko chrókjuasin chóntahya sín kaxíhi sín nkehe tjete xroxrjo náxrjón la ko chrók'uitsahya sín ika imá tjete. ¹⁰ Íchá jína kixin tí chojni chjin chrókjuich'e sín tí xra jína éxi chrókjuich'e kaín tí sín tsíkjinchetjóá Dios. ¹¹ Tí chojni chjin t'ichjánxin chrókuinhin sín itén Dios la chrónixjahya sín la ko chrók'uetóanhya sín. ¹² A ntá janhan tjánjonhya kjuachaxin kixin chojni chjin chrókjuako tí nchónhya chojni síin la ko tjánjonhya kjuachaxin chrók'uetuñhen sín chojni ntoa. Jehe sín la tání sín chrók'uejé sín ¹³ kixin saoxín la Dios kjuích'éna ch'án tí ch'ín Adán la ntá chr'éxin kjuích'éna ch'án tjan Eva. ¹⁴ A ntá ch'ín Adán la ninxeró kjuích'iyehya ch'án. Náhí. Tí tjachjin mé tsíkitekakonhen tjan tí nkexro tsíkich'iyehé tjan ntá xikaha xrankíxixín k'uixín jie. ¹⁵ A ntá tí chojni chjin la kjónté xikaha kjuích'e sín la Dios sinchekaá sín tí jína ts'ayakonhen sín

xjeen sín la tí chaxín tinkáchónki sín Dios la ko tjuèhe sín ch'án la ko ntoá ts'ejó sín la ko jína tsjenkayáxin sín.

3

Jína chrók'uejó tí sín t'etuenhen tí nínko

¹ Ijnko nkehe chaxín tjonka. Tí nkebro tjinkaon sich'e xra kuènte nínko mé imá jína xra tjinkaon ch'án. ² Tí ch'ín chrók'uetuan mé ntoá chrókjuak'e ch'án kixin kohya nkebro chrók'ueka ch'án jie la ko kjaxin chróhónta ch'án jnkokoá ichjién ch'án ó la ko kjaxin chrókjuak'e ch'án jína la ko chrókjuenkayáxin ch'án jína la ko chróhónta ch'án kjuasáyé ch'án la ko kjaxin jína chrónixjehé ch'án tí nkebro tjiji ntøe la ko kjaxin chróónohe ch'án tí nkehe chrókjuako ch'án. ³ La ko kjaxin chrókókoanhya ch'án la ko chrókjuéhya ch'án kjuanínkaon la ko kjaxin chrókóxrjienhya ch'án kixin chrókjuacha ch'án nchónhya chichaon. A ntá chrókójiehya ch'án la ko kjuaxróxin chrókjuak'e ch'án la ko chrókóxrjienhya ch'án chróhónta ch'án itsjé chichaon. ⁴ Jehé ch'án mé kjaxin jína chrók'uetuenhen ch'án tí sín tjejó ntøe ch'án la ko chrókjuentuéhe ch'án xjeen ch'án kixin tsitekaon xjan la tsjikosáyehe xjan it'é xjan. ⁵ Tí tsjachahya ch'án ts'etuenhen ch'án tí sín tjejó ntøe ch'án la ¿ntá nkebrí chrók'uetuan ch'án tí nínko kuènte Dios? ⁶ Íchá jína kixin jehya ijnko nkebro na ntá k'uixenhen chrókjuako kixin tí nkebro na ntá k'uixenhen la imá chrókjuinchehnke ch'án la ntá chrókjuasin ch'án jie éxí kjuasin ch'ín Tsochren ijie senó. ⁷ Kjaxin t'ichjánxin kixin kaín xín tí sín naça tinkáchónkihya Ìnchéni mé tsochónta sín kjuasáyé tí ch'ín t'etuan a. Tí náhí la ts'eka sín ch'án jie ntá tí xíkaha la ch'ín Tsochren tsjacha tsjachrøe tí ch'ín a ntá tsjasin ch'án jie.

Nkebrí chrók'uejó tí sín tsjinkítsa tí xra kuènte nínko

⁸ Kjaxin tí sín diácono ch'e xra kuènte nínko la kjaxin ntoá chrók'uejó sín kixin chróhóntehe sín kjuasáyé chojni. Kjaxin t'ichjánxin kixin chrókjuinchexitéyá sín tí nkehe ntáchro sín la ko chrókókoanhya sín la ko kjaxin chróhóntiaxinhya sín itsjé chichaon chrókjuacha sín. ⁹ T'ichjánxin chróónohe sín jína tí nkehe tinkáchónki sín kixin jehé sín chrórxaxinkaon sín á nchoxon tí xra ch'e sín. ¹⁰ Saoxín chrótsjehe kaín chojni á ninkehó jie chóntahya tí nkebro la ntá tí chaxín jína jehé ch'án la ninkehó jie chóntahya ch'án ntá jína ts'ixenhen ch'án tí xra kuènte nínko. ¹¹ La ko kjaxin tí chojni chjin mé chrók'uejó sín jína kixin chróhónta sín kjuasáyé sín. Kjaxin chrókuinkáchónkihya sín kjuach'ia la ko jína chrók'uejó sín la ko chrókjuinchexitéyá sín kaín nkehe. ¹² Tí sín diácono la mé chróhónta sín jnkokoá ichjién sín la jína chrók'uetuenhen sín xjeen sín la ko jína chrók'uetuan sín ntøe sín. ¹³ T'ichjánxin ijnko xra jína sich'e sín kixin ntá tsjacha sín ts'áyéhé sín ijnko nkehe jína tsjanjon Ìnchéni la ko kjaxin tsosuéhya sín tsochrónka sín nkebrí tinkáchónki sín Cristo Jesús.

Dios mé kjuínchenoheni tí nkehe k'uékiénxínhyani

¹⁴ Tjínkavan tjoka chrókjuasántsjahá tí jaha kjánchó senó tsokjian tí xroon i. ¹⁵ A ntá tí tsoxrjenna isé ntá kjónté tsonoha nkebrí chrók'uejó tí sín naça kjéhya Dios mé tí sín t'óna nínkøe Dios tjechón. Jeheni kaín ní mé tjejó't'ayakonhenni tí tan chaxín ntoá. ¹⁶ Ninkexró chróntáchrohya kixin chaxínhya tí nkehe tinkáchónkini mé ijnko nkehe imá jie tíha la ninkexró k'uénoehya tí senó a.
Dios mé ikui k'óna chojni;

ikui ch'án kjuakoxin ch'án kjuachaxién Nchakuen Dios chóna ch'án kixin jína tí jehe ch'án.

La ntá tí sín ángel mé k'uikon sín ch'án

la kuenté chjasintajni mé ó kuínhin sín nkehe chrónka ch'án

ntá itsjé sín kuítekaon sín ch'án.

Ntá Dios k'uáyéhe tí jehe ch'án nkaya nkajni.

4

Tí sín kuitohe tinkáchónkihya Cristo

¹ A ntá ntáchro Nchakuen Dios kixin tí chjina tsjeje chjasintajni mé iso sín mé tsítóhe sín í tsinkáchónkihya sín Inchéni la ntá tsitekaon sín nchakuen tí jínahya sich'iyehe sín la ko tsitekaon sín tí nkehe tjako tí sín demonio. ² Mé tsinhin sín tí nkehe tjako tí chojni tjuáhya la ch'ia sín. Kjonté imá tsjasin sín jje la í tsosuehya sín kixin éxí tsichján tí tjenkayáxixín sín la í tjenkayáxinhya sín jína. ³ Jehe sín mé tjinkakonhya sín kixin chrókótehe chojni la ko kjaxin tjinkakonhya sín kixin chrókjóneni nto. A ntá jeheni ó noheni kixin Dios mé kjuich'éna ch'án kaín xín nkehe ineni la tjinkaon ch'án kixin tí jeheni tinkáchónkini ch'án la ó noheni tí tan chaxín ntoá mé chrókjuancheheni ch'án kjuasáya ntá chrókjóneni. ⁴ Méxra kaín xín tí nkehe kjuich'éna Dios la jína la kohya nkehe chróntáchroni kixin jehya jína sineni. Chrókjuancheheni Dios kjuasáya la ntá jína chrókjóneni ⁵ kixin tió tsoxraxinkaonni itén Dios la tsonixjeheni ch'án la ntá sincheyaon ch'án tí nkehe sineni.

Ijko chojni jína ch'ehe xra Jesucristo

⁶ Jaha tjákehé tí sín kichó ni kaín tí nkehe i la ntá xikaha imá jína sich'ehé xra Jesucristo la ko antsí tsjinkitsa ch'án ts'ánki kjuaxrexinkaon kuéntá tí tinkáchónkia tí tan kuénté ch'án la ko naxa tjákua tí nkehe jína ó xrákoha. ⁷ Jaha mé tahya kuenté tí cuento chónkó la ko tí nkehe ntoáhya tinkáchónki iso sín. A ntá jaha la chrókuítóéhya chrókuinkachónkia Dios. ⁸ Tí chojni tsítán la jína tíha kjánchó antsí má tjetoan chrórxaxinkaonni Dios. Tíha la tsjinkitsa kixin jína xritjejóni ijje la ko kjaxin tsjinkitsa kixin ts'áyéheni kjuachón jnkochrín tió tsokjan Inchéni. ⁹ Kaín tíhi mé chaxín la kaín chojni chrókuítekaon. ¹⁰ Mé xikaha kjonté t'ántaxínhinni chojni la jína ch'eni tí xra i kixin tinkáchónkini Dios tjechón. Jehe ch'án chaxín sinchekaá ch'án kaín tí chojni titekaon tí jehe ch'án.

¹¹ Kaín tíha mé t'ichjánxin tsétoan la ko tsjákua. ¹² Jaha chrókuítóéhya kixin chrokuanoá sín kjonté naxa ntasoyá. Chrókuákoxéxián tí sín tinkáchónki Inchéni nkexrí chrónixja sín la ko nkexrí ntoá chrók'uejó sín la ko nkexrí chrótjuéhe sín Dios la ko nkexrí chrókuítekaon sín Inchéni la ko nkexrí tjóá chrók'uejó sín. ¹³ Nachrohe tsjasán la jaha sinchekuáxian tí xroon itén Dios kixin tsinhin kaín sín la ko sinchexraxinkávan kaín tí sín kichó ni la ko tjákehé sín. ¹⁴ Sinchek'it'jáyanhya tí kjuachaxién Dios k'uayéhé tió tí sín t'etqan kuente ninko kjuachaxién Dios k'uejotja tja sín chrítaón ikjá.

¹⁵ Chrókóxakonhan chrókjuínchexiteyá kaín tíha kixin kaín chojni tsotsjehe sín kixin jína noha. ¹⁶ Chrókjuenkayáxian jína tí nkehe tjákua kixin jína chrókjuak'e jaha, chrókjuínchexiteyá kaín nkehe la ntá tí xikaha sich'e la tsaá jaha la ko tí sín tjejótinhin tjákua la tsaá sín kjaxin sín.

5

Jína chrók'uejó tí sín tinkáchónki Cristo

¹ Jaha la chrókóninkákuenhya tí sín ó táda. Náhí íchá jína chrónixjehé sín jnkojína éxí chrónixjehé it'á. La kjaxin tí sín ntasoá chrónixjehé sín éxí chrónixjehé kichuá mero. ² A ntá tí sín ó nána la mé chrónixjehé sín éxí chrónixjehé iná xikaha. Kjaxin tí sín tjarisoá mé jnkojína chrónixjehé sín éxí chrónixjehé kichuá mero la kjaxin chróchóntehé sín kjuasáya.

³ La ko kjaxin chrókjuínkítsa tí síchjin tsíkók'án la ko nchekitonhén sín nkehe sine sín tí chaxín kohya nkexro tsjinkítsa sín. ⁴ A ntá tí chojni chjin tsíkók'án chóna xjeen o chóna inté, a ntá tí jehe sín mé chrók'uitja sín chrókjuínkítsa sín kixin sine tí sín kjéhya sín. Tíha mé chrókjuenkaxin sín tí it'é, iné sín kixin kjuínchek'ánki sín, kixin xikaha mé jína tóxrjnhjn Dios. ⁵ Tí tjan chaxín tsíkók'án na jehó tjan tjen tjan mé jehó Dios tinkáchónki tjan la imá chrónóhe tjan Dios tie la ko nchakotjin. ⁶ A ntá tí sín tsíkók'án ixri sín tjasin sín jie la kjónté tjejóchón sín la éxí tsík'en sín xikaha tjejó sín. ⁷ Tétuénhén tí sín kixin sinchexiteyá sín kaín tíha kixin tsokohya nkexro tsjanchia jie. ⁸ A ntá tí nkexro tóxakuenhya kixin tí sín naxa kjéhya la ko kjaxin tóxakuenhya kixin tí sín tjejó ntøe ch'án mé xikahó tjakoxin kixin ninkehó tinkáchónkihya ch'án Dios. Mé xikaha antsí chóna ch'án jie a ntá tí sín tinkáchónkihya Inchéni la kénhyó.

⁹ Tí ts'ínixín ihnié tí sín tsíkók'án la chrók'uinixín jehó tí sín chóna sesenta nánó la ko tí sín k'uéchóna sín jnkokoá xii. ¹⁰ Kjaxin chrókjuakoxin tjan kixin jína ch'e tjan xra la ko chrókjuakoxin tjan kixin jína kjuínchek'ánki xjeen tjan la ko kjaxin jína nixjehe tjan tí nkexro tjiji ntøe tjan la ko kjaxin k'uàyakonhen tjan tí sín tinkáchónki Cristo la nchehnkehya tjan la ko kjaxin kjuínkítsa tjan tí sín níhi la ko í so xra jína kjuích'e tjan.

¹¹ A ntá chrók'uenixínhya ihnié tí sín tsíkók'án naxa tsjéhya nánó chóna kixin tsontácho asén sín kixin í jnko chojni ntoa tsøtehe sín inaá la ntá tsítóhe sín ixra kuente Cristo. ¹² Ntá xikaha tsjasin sín jie kixin sinchexiteyáhya sín tí nkehe tsintácho sín. ¹³ Kjaxin sátsji sín ijnko nchia la í jnko nchia la ntá tsoséhe sín la ntá kjaxin xriko sín kjuach'ia la ko ch'éna sín kjuach'ia la kaín nkehe nixja sín la jehya jína tí xikaha chrónixja sín. ¹⁴ Méxra tí sín tsíkók'án naxa tjarisoá sín la íchá jína chrókótehe sín chróchóna sín xjeen sín la ko chrók'uàyakonhen sín ntøe sín. A ntá tí xikaha la tí sín nínkakonhan la chrókjontahya sín tí jaha. ¹⁵ A ntá iso tí sín tsíkók'án ó kuítóhe sín tinkáchónki sín Inchéni kixin ch'in Tsochren tsíkjachróe sín.

¹⁶ A ntá jnkojín chojni tinkáchónki Cristo ts'ikon sín kixin tsíkók'án tí síchjin kjéhya sín ntá t'ichjánxin tsjinkítsa sín kixin sine tí sín a kixin tsochóntahya sín tí nínko tsjinkítsa. Méxra jehó tí sín chaxín tsíkók'án chóntahya ninkexró tsjinkítsa mé chrókjuínkítsa tí nínko.

¹⁷ Tí nkexro jína t'etøan xra kuente nínko la jehe sín chrókjuacha sín la ko kjaxin antsí chrókjuikosáyehe chojni tí sín chaxín xra ó tjejóchronkaxín sín la ko tjako sín. ¹⁸ Kixin xroon itén Dios mé ntácho kixin: “Chrók'uejójáhyará kamposa ir'va tí koxinta tjejóch'e xra”, la ko kjaxin ntácho kixin: “Tí sín ch'e xra la síin kjuachaxin chrókjuacha sín.”*

* 5:18 Deuteronomio 25.4, Mateo 10.10; Lucas 10.7

¹⁹ Chrókuahya kuenté jnkójín nkexro tsjikao kjuach'ia t'eka jie tí nkexro t'etōan xrā kuènte njnko. T'ichjánxin tsonoxín yaá o iy'á sín tsochrónka kixin chaxín chóna jie tí nkexro a. ²⁰ Chrókuéntuéhé tí sín tjasin jie nkayakon kaín sín kixin ntá tsinhin tí í so sín kixin tsochrakon sín, í tsjasinhya sín jie. ²¹ Tétuanxian kjuachaxiēn Dios la ko Ìnchéni Jesucristo la ko tí sín ángel kjueyá ch'án kixin jnkokón tsjéntuéhé kaín chojni la ko jnkokón tétuēnhén sín kaín tí nkehe xrjanka. ²² Chrókuéyáhya chjini jnkójín sín kixin ts'etōan sín xrā kuènté njnko kixin tí chróchóna sín jie la kjaxin jaha chrókuamá tí jie. A ntá jaha chrókuítōhé kaín nkehe jínahya.

²³ Jaha la jnkoyaxón tóniha tjeté tsqa. Jehya intā ó chrók'uaia. Kjaxin intsi xranvino chrók'uaia ntá chrókuítōaxián jína.

²⁴ Tí ijie jnkójín chojni la t'ikonni noxín tí naxa kuítōexínhya ijie sín. A ntá í so sín nóxinhya tjasin sín jie kjánchó tió tsjixixín la tsonoxín tí jie tjasin sín. ²⁵ Mé xikaha kjaxin ó t'ikonni kixin iso chojni imá ch'e sín tí xrā jína. A ntá í so sín kjónté t'ikonhyani la xitjahya tsjak'emá sín tí nkehe jína ch'e sín.

6

¹ Tí sín ch'exín xrā mé t'ichjánxin tsochónthehe sín kjuasáya tí lamo kuènte sín, kixin ntá tí í so sín la ts'ántaxiēnhya sín ihnié Dios la ko ts'ántaxiēnhya sín tí nkehe tjakoni. ² A ntá tí sín ch'exín xrā la chóna sín lámōé sín tinkáchónki Cristo la mé chrókuítōehya sín tsjikosáyehe sín tí lamo kixin jnkokōá kichó sín. La mé antsí jína chrókuinkitsa sín kixin ó nohe sín kixin tjinkitsa sín ijnko nkexro tinkáchónki Cristo la chrótjuēhe sín kichó sín. Jaha mé tjákohe sín kaín tíha.

Tí nkehe tinkáchónkini tsochēxinni

³ Iso sín tjako tí nkehe jehó sín tjenkayáxin sín la tóyóehya tí nkehe jína kjuako Ìnchéni Jesucristo la ko jehya tí nkehe tinkáchónkini. ⁴ Ó jehí nchehnke sín la ninkehó noehya sín. Tí ntoáhya nixja sín la tíha mé éxi ijnko chin chóna sín la tíha mé tjixín tí kjuachjinoxinhin la ko tjanjonko kichó sín la ko t'ántaxínhin sín kichó sín la ko chónthehya sín kichó sín kjuasáya. ⁵ Mé tí sín la náxrjónhya tjenkayáxin sín la jnkochrínín tjanjonko kichó sín la noehya sín tí nkehe chaxín. Mé tjenkayáxin sín kixin tinkáchónki sín Ìnchéni kixin xikaha chrókuacha sín nchónhya chichaon, ichro sín. Jaha la chrókuítōhé tí sín xikaha ch'e. ⁶ Tí tinkáchónkini Ìnchéni la ijnko nkehe imá tjetōan la ko tjete tíha a ntá kjuaxróxin chrók'uejóni kjónté tí nkehe chóntani ó. ⁷ A ntá tí kokjihini la ninkehó kuikohyani tí kuini chjasintajni la kjaxin tió ts'enni la ninkehó nkehe xitjahya sátsjikoni. ⁸ A ntá tí chóntani nkehe sineni la ko chóntani ikéni la kjónté táho la chrókóhéheni. ⁹ A ntá tí sín tjinkaon sín imá chrókóríko sín mé tí sín a mé tsjichròe sín la lontj sín kixin xikaha tjenkayáxin sín, la mé ts'itjáyanxin sín tíha. ¹⁰ Tí imá tjuēheni chichaon la tíha mé nuéé kaín nkehe jínahya. Jnkójín chojni imá tjinkaon sín tsochóna sín chichaon ntá tsjichròe sín tsítóhe sín tsinkáchónki Ìnchéni la tíha mé imá sinchekjasótexín sín asén sín.

Jína tí nkehe tinkáchónkini

¹¹ Jaha mé tinkachónké Dios la títóhé kaín tí nkehe i. Chrókuak'e ntoá la ko kaín asán chróxráxinkávan Dios la ko chrókuinkachónkia ch'án la ko chrótjuéhé kichua la ko chrókóninkákonhya tjoka la ko

chrókujnchehnkehya asán. ¹² Tjanjonkoa kaín nkehe jehya tí jína la ko kaín asán tinkachónkia Ìnchéni kixin ntá chrókjuacha chrók'uayéhé tí kjuachón jnkochrín kixin mé xíkaha k'uíyaha Dios tí jaha. Jaha la ó tsíchronka kixin tinkachónkia Ìnchéni la ó kuínhin la ko k'uíkon nchónhya chojni. ¹³ Nkayakon Dios, tí nkexro chjéhe kjuachón kaín xín tí nkehe síchón, la ko Jesucristo, tí nkexro tsíchronka jína nkayakon ch'ín Poncio Pilato, mé tétuanhan ¹⁴ kixin sinchexiteyá kaín tí nkehe t'etōan Dios kixin í chrókuínkíhya tí nkehe chrókuinkachónkia la ntá tsókohya ninkexró ts'eka jìe tío tsjixrakájia tí yaon tsokjan Ìnchéni Jesucristo. ¹⁵ Tsjixraká tí yaon kjueyá Dios ntá jehe ch'án mé tsjanjon ch'án kjuachaxin kixin itsi Jesucristo. Dios la jehó ch'án mé chóna ch'án kjuachaxin ts'etōan ch'án. Jehe ch'án mé tí Rey t'etuenhen kaín xín tí sín rey la ko jehe ch'án mé Ìnché kaín chojni. ¹⁶ Jehó Dios mé chónhya ts'en la tí tjen ch'án la imá t'inkaséyan la ko kohya nínkexró tsjacha tsóchjina tí tjen ch'án. Nínkexró k'uíkonhya tí jehe ch'án la ko ninkexró xitjahya ts'ikon tí jehe ch'án. Tsjikosáyeheni ch'án kixin jehe ch'án chóna ch'án kjuachaxin ts'etōan jnkochrín. Amén.

¹⁷ Tí sín chóna itsjé nkehe chjasintajni mé tétuenhén sín kixin sinchehnkehya sín la ko tétuenhén sín kixin tsochóntiāxínhya sín tí nkehe chóna sín kixin jnkochrínhya tsochóna sín tíha. Íchá jína chrókuinkáchónki sín Dios tjechón kixin jehe ch'án tjanjon ch'án kaín xín nkehe kixin mé xíkaha tjinkaon ch'án tsóchéheni. ¹⁸ Tétuenhén sín kixin chrókuich'e sín tí nkehe jína kixin tí chaxín chrókóríko sín la chrókuinkítsa sín kíchó sín la chrók'óxikayéhe sín tí nkehe chóna sín. ¹⁹ Mé xíkaha chrókjuacha sín tí nkehe tjete kixin chr'éxin la jína chrók'uejó sín kixin chrókjuacha chróchóna sín tí kjuachón jnkochrín.

Kjuixixín k'uítuenhen ch'ín Timoteo

²⁰ Jaha Timoteo t'ayakonhén tí xra la tiénhya tí nkehe ntoáhya nixja chojni. Ntáchro sín kixin imá nohe sín kjánchó chaxínhya tíha. ²¹ Iso sín ó xíkaha ntáchro sín kixin imá nohe sín la ntá kjuíchròe sín í tinkáchónkihya sín Ìnchéni. Dios chrókjuintayavan tí jaha. Amén. Ó tjen.

Tí xroon yóxin ikjin ch'ín Pablo chr'énnen ch'án tí ch'ín Timoteo

Ch'ín Pablo nixjehē ch'án tí ch'ín Timoteo

¹ Janhan Pablo mé kjueyána Jesucristo t'ahā ch'án xṛā kixin xikaha tjinkaon Dios kixin mé xikaha ó chrónka ch'án kixin tsjanjon ch'án kjuachaxin tsochóna chojni kjuachón jnkochrixin tí tsinkáchónki sín Jesucristo. ² Ikjan tí xroon i chr'anhan jaha kichó ni Timoteo. T'íkuān éxi xjanna tí jaha mé imá tjuāha. Kjuasáyé It'éni Dios la ko Ìnchéni Jesucristo chrókuintayavan ch'án la ko chrókuiikonòāha ch'án la ko chrótjāha ch'án kjuaxróxin.

Chróchronka ch'án kixin tinkáchónki ch'án Jesucristo

³ Xráxinkāvan tí jaha tió níxjāhā Dios nchakotjin la ko tie la ko tjétjānchāhā kjuasáyé Dios kixin imá tinkachónkia ch'án. Jehē ch'án mé t'ahā xṛā kaín āsenná éxi xikaha mé k'uékjich'e tí sín tsík'axrjeníxinna. ⁴ Xráxinkāvan jnkochrixin nkexrí tsjanka la tjínkāvan kixin chrótsjāhā tí jaha inaá kixin tsochéhē āsenná. ⁵ Ó nòna kixin kaín āsán tinkachónkia Jesucristo. Kjāxin náchrja tjan Loida la ko ìná tjan Eunice mé saoxín kuinkáchónki sín Ìnchéni Jesús la ntá ó nòna kixin kjá kjāxin jaha xikaha tinkachónkia ch'án.

⁶ A ntá ijie ntáxráxinkāvan kixin chrók'uitjāyanhya tí kjuachaxiēn Dios kjuanjon ch'án k'uayéhé tió kjuaké tjaná chrítaón tí jaha. ⁷ Dios la kjuanjonhya Nchakuen ch'án kixin tsochrakonni. Náhí. Kjuanjon ch'án tí Nchakuen ch'án kixin tsochóntani kjuachaxin la ko jína tsotjuèheni ch'án la ko jína tsjenkayáxinni. ⁸ Chrókósuàhya chróchronka kixin tinkachónkia Ìnchéni la ko kjāxin chrókósuàhya chróchronka kixin janhan tjéchjīnaxián tí xṛjanka itén ch'án. Kjónté la íchá jína chrókjuasótexián tí tjākua tí tan tsaáxinni kixin tí kjuachaxin kuēnte Dios ó k'uayéhé. ⁹ Jehē Dios mé kuaáxinni la ko kjueyá ch'án tí jeheni kixin jína chrók'uejóni. La jehya tí xṛā jína kjuích'eni ntá chrókuaáxinni. Náhí. Kjuasáyé Dios kjueyá ch'án tí jeheni kixin tsinkáchónkini Jesucristo. Tí naxā xrankixixínhya chjasintajni mé tsíkjenkayáxin ch'án tíha kixin jehē ch'án mé imá tjuèheni ch'án. ¹⁰ Ntá jie ó kjuākoxin Dios kixin tjuèheni ch'án kixin ó kui tí nkexro tsaáxinni mé Jesucristo. Kjuínchek'itjāyan ch'án tí kjuachaxin k'uéchóna tí kjuach'én kixin kjuacha ch'án xechón ch'án inaá. Chronkaxín itén ch'án nkexrí tsaáxinni ntá ó kónoexínni kixin tí kjuachón kjuākoxin ch'án mé xitjahya ts'itjāyan.

¹¹ Dios mé k'uetuāna sátsjixṛjanka itén ch'án la ko kjueyána ch'án tsjākoḥā tí sín jehya sín judío tí tan jína. ¹² Mé xikaha tjétjasótexinna kaín tí nkehe i la kjónté tósuànahya kixin ó choxian jína tí nkexro tinkachónkia. Mé ó nòna kixin chóna ch'án kjuachaxin ts'àyakonhenni ch'án tsjixrakájia tí yaon tsokjan ch'án. Méxṛā janhan tjāhā ch'án āsenná kixin ts'ayakonhen ch'án.

¹³ T'itjāyanhya tjākua kaín nkehe jína ó kjuākōha. Naxā titekāvan la ko tjuèhé kichuárá kixin tinkachónkia Cristo Jesús. ¹⁴ Kjuachaxiēn tí Nchakuen Dios chóntani jnkojnkoni mé t'àyakonhén jína tí tan tjākua kjuíntakitonhan Dios k'uayéhé.

¹⁵ Jaha mé ó noha kixin kaín tí sín estado Asia mé jehe sín kuítõna sín la ko kjaxin tí ch'ín Figelo la ko ch'ín Hermógenes. ¹⁶ Tjánháha Ìnchéni kixin imá tsikonóhe ch'án tí sín tjejó ntõe tí ch'ín Onesíforo kixin jehe ch'án mé imá kjuínkítsana ch'án la ko kósuèhya ch'án ikui ch'án kjónté tjéhjina. ¹⁷ Tí nantá kjuíji ch'án chjasin Roma ntá kuítóehya ch'án kjueyána ch'án hasta k'uitjana. ¹⁸ Tjánháha Ìnchéni kixin tí yaon itsi ch'án ntá chrókuiikonóhe ch'án tí ch'ín a kixin jaha ó noha jina kixin nkexrí kjuínkítsa ch'án tí janhan tí chjasin Éfeso kjaxin.

2

Kjuíncheyóexin ch'ín Pablo kixin jeheni éxí yóhe ijnko soldado jina kuènte Jesucristo

¹ Jaha xjeenni tákjá tí kjuachaxin kjuasáyé Jesucristo kjuanjon ch'án kixin tsjinkítsa kixin tinkáchónkini ch'án. ² Tí nkehe kuínhín kjuàkua nkayakon nchónhya chojni mé xikaha chjehé tí xrá tí sín jina choxian jina ch'e xrá kixin ntá jehe sín mé xikaha chrókjuakõhe sín í so chojni inaá.

³ Jaha la kjónté nchónhya nkehe kjuasótia la chrókjuacha kixin ijnko soldado jina kuènte Jesucristo. ⁴ Kohya nijnko soldado jina ch'e xrá chrók'uixenhen ókjé xrá kixin t'ichjánxin jnkójínxón xrá sich'e ch'án kixin éxí tjinkaon tí nkexro t'etuenhen ch'án. ⁵ Mé xikaha éxí yóhe ijnko nkexro tsotsítán. Ntá tsjachahya ts'áyéhe ch'án nijnko nkehe tí sinchexiteyèhya ch'án tí sín t'etõan. ⁶ La éxí yóhe ijnko nkexro ch'e xrá nonte ntá chõnta ch'án kjuachaxin saoxín tsakja ch'án tí nkehe ts'óna. ⁷ Chrórxaxinkávan jina kaín tí nkehe xrjanka la ìnchéni mé tsjinkítsa tsiénxian kaín nkehe.

⁸ Xráxinkávan kixin Jesucristo la ó xechón ch'án. Jehe ch'án mé k'uaxrjenixin ch'án ch'ín rey David. Tíha mé tí tan jina tsaáxinni tjétjàkua. ⁹ Tí tan tjéxrjanka mé tjasótexinna. Tíha mé tjéchrontetoxinna cadena éxí ijnko chojni tsíkjàya la kjónté tí itén Dios la jehya tjechrontetoxín cadena. ¹⁰ Méxrá kjónté nchónhya t'atsínka tí janhan la ntáxiteyá kixin tí í so sín kjueyá Dios tsaáxin sín ch'án kixin tsochõnta sín kjuachón jnkochrixin kixin tinkáchónki sín Jesucristo.

¹¹ Tíhi mé chaxín:

Tí jehe ch'án k'uénxinni ch'án a ntá chr'éxin ts'ejókoni ch'án.

¹² La tí tsjasótexinni tí jehe ch'án la ntá kjaxin ts'áyéheñi kjuachaxin kuènte ch'án ts'etõanni.

A ntá tí chrókjuinchemáni tí jehe ch'án na ntá kjaxin ch'án la xikaha sich'e ch'án.

¹³ Kjónté nchexiteyèhyani ch'án la jehe ch'án tjenchexiteyá ch'án kixin Dios la xitjahya sich'ia ch'án.

Chrókjuich'eni tí xrá jina

¹⁴ Nchexaxinkávan sín kaín tí nkehe i. Dios tjetsjehe tétuenhén sín kixin chrókuítóhe sín tí nixja sín tjanjõnxin sín kixin ó chónkó tíha la ninkehó sínkíhya. Tí xikaha ch'e sín la sinchek'itjáyan sín tí sín tjejótinhin. ¹⁵ Sich'e xrá jina kixin tsõxrjínhin Dios tí xrá tjech'e a. Ntoá chrókjuàkua tí tan jina chaxín kixin ntá chrók'uichjánxinhya chrókósuàha. ¹⁶ La títóhé tí nkehe náxrjónhya la ko chónkó nixja iso sín kixin tí sín nixja xikaha la antsí tsínkák'ánkí tí nkehe jínahya nixja sín. ¹⁷ Tí nkehe jehya jina tjako sín mé éxí yóhe ijnko itõn sóa sítinkáchr'enka. Mé xikaha tjako tí ch'ín Himeneo la ko ch'ín Fileto. ¹⁸ Jehe sín mé ó kjuixin kuítóhe sín tí ntja ntoá la ntáchrõ

sín kixin ó kjuixin k'uaátsínka tí tsoxechón chojni. Ntá xikaha ch'iyehé sín tí í so sín la tsjitóxinhin sín tí nkehe tinkáchónki sín. ¹⁹ Kjánchó tí sín tinkáchónki Dios éxi yóhe tí xrə xrankíxixín tja't'ə xitjahya tsoxika la chóna éxi ijnko sello tí itén Dios ntáchro kixin: “Ínchéni mé tjatsəan ch'án tí chojni kuènté ch'án”,* la kjaxin ntáchro kixin: “Kaín tí sín tinkáchónki Cristo mé t'ichjánxin chrókuítəhe sín kaín nkehe jínahya,” mé xikaha ichro itén Dios.

²⁰ Ijnko nchia jíe kuènté tí sín rico la siín vaso tsík'óna chica oro la ko vaso tsík'óna chica plata. La kjaxin siín nkehe tsík'óna ntachiso la ko nkehe tsík'óna nchetje. Iso la xrə ó tsík'óna kuènté tí xrə tjetəan la í so la tsík'óna kuènté tí xrə tjetuanhya. ²¹ A ntá ijnko chojni chrókuítəhe kaín jíe chrókóyóhe éxi ijnko vaso tjóá jína kixin chrókuicháxinhin Ínchéni. A ntá tí nkexro xikaha chrókjuich'ehya tí nkehe jínahya kixin chrókuicháxinhin Ínchéni tí xrə jína.

²² Tjtohé kaín tí nkehe jehya tí jína tóxrjínhin í so tí sín ntasoá a. Chrókjuak'e tí ntja ntoá la ko kaín asán chrókuinkachónkia Cristo la ko chrótjuéhé kaín chojni la ko kjuaxróxin chrók'uejokoa kaín sín. Mé xikaha chrók'uejó kaín xín tí sín kótjóá asén mé kaín tí sín tinkáchónki Ínchéni. ²³ Jaha chrókuahya kuènté tí sín lontj tjenkayáxinhya jína kixin jaha ó noha kixin xrahya chrókjuanjonko kichó sín. ²⁴ A ntá ninkexro ch'ehé xrə Ínchéni chrókjuanjonko kichó sín kixin jína chrókjuinkitsa kichó sín. Chrókónohe sín kaín nkehe jína chrókjuako sín la ko chrókónínkakuenhya sín kichó sín. ²⁵ Kaín asén sín jnkojína chrónixjehé sín tí sín titekakonhya kixin chróchónhen sín kixin Dios chrókjuinkitsa tí sín a chrók'uixinkí tí ntoáhya tjenkayáxin sín kixin ntá chrókónohe sín tí nkehe chaxín ntoá chrókjuich'e sín ²⁶ kixin t'ichjánxin chrókónohe sín nkexrí chrókuaxín sín kixin ch'ín Tsochren tjinkaon chrókjuich'iyehé sín ntá chrókjuasin sín jíe.

3

Nkexrí ts'ejó tí chojni chjasintajni tí yaon tsjixixín

¹ T'ichjánxin chrókónoha kixin tí yaon tsjixixín ntá itsi tí yaon kjuaxróxinhya ts'ejó chojni. ² Tí sín chjasintajni tsinkáchónkihya Ínchéni mé imá chrók'ueətoan sín jehó la ko imá tsəxrjínhin sín chichaon la ko sinchehnke sín la ko imá ts'ántaxínhin sín Dios. Sinchexiteyéhya sín it'é sín la ko iné sín la ko tsochóntahya sín kjuasáya la ko tsinkáchónkihya sín ninkehó dios. ³ Tsotjuéhya sín kichó sín la ko tsikonóehya kichó sín la ko tsjonta sín kichó sín la ko ninkexró tsochrakuenhya sín la ántosén sín tsjasin sín jíe, la ko imá tsøjjehe sín la ko imá tsonínkakonhen sín kaín nkehe jína. ⁴ Jehé sín mé sinchekji kichó sín la ko tsjenkayáxinhya sín jína la ko sinchehnke sín. Tsotjinkaon sín tsjeyá sín tí nkehe ntáchro asén sín ó a ntá tsjeyáhya sín Dios. ⁵ Jehé sín la éxi chojni tinkáchónki Dios xikaha ts'ejó sín. Kjánchó chaxínhya. Tsinkáchónkihya sín tí kjuachaxin kuènté Dios chaxín ntoá.

Méxrə jaha la chrókuankíehya tí chojni ch'e xikaha. ⁶ Iso tí sín a mé ixri sín t'ixenhen ntəe ókjé chojni la ch'iyehé sín tí chojni chjin lontj tjasin jíe la nchexiteyéhe sín kaín tí ntáchro asén sín. ⁷ La xráxín ó tinkák'itja sín kjánchó nunca kuénxínhya sín tí nkehe chaxín ntoá. ⁸ A ntá éxi yóhe tí sín k'uékjinchexroan mé ch'ín Janes la ko ch'ín Jambres mé k'uénínkakonhen sín ch'ín Moisés mé xikaha tí sín tjako ijie nínkakonhen sín tí nkehe chaxín

* 2:19 Números 16.5; Juan 10.14

ntoá. Imá jínahya tí kjuaxrexinkaon kuènte sín la ko titekakonhya sín tí nkehe chaxín tinkáchónkini. ⁹ Kjánchó tsjachahya sín sich'ia sin isé kixin kaín chojni tsonohe kixin tí sín a mé lontj sín kixin éxi xikaha tsíkónhen tí yaá sín k'uékóninkakonhen ch'in Moisés.

Tí nkehe kjuixixín k'uetuenhen ch'in Pablo tí ch'in Timoteo

¹⁰ A ntá jaha mé ó kuítekávan tí nkehe kjuakua. Ó noha nkexrí kjuak'é janhan la ko ó noha tí xra kjuít'a janhan. Ó noha nkexrí tinkachónkia Ìnchéni la ko noha kixin tjokahya kóninkávan la ko noha nkexrí tjuaha chojni. Ó noha kixin kjónté kóninkaon chojni la kuitoahya tí xra a ¹¹ kjónté chónkina sín la ko kjuasótena. Ó noha nkehe kónna tí chjasin Antioquia la ko Iconio la ko Listra. Chrók'óyánna sín la kjuínchekjuasótena sín kjánchó Ìnchéni mé kjuínkítsana kjónté kaín tí nkehe chrókónna. ¹² Kaínxín tí sín tjinkaon tjóá chrók'u'ejó sín nchexiteyéhe Cristo Jesús la t'ichjánxin tsjasóte sín. ¹³ A ntá tí sín jínahya la ko tí sín ixri ch'ia sín mé ts'óna sín antsí jínahya. Jehe sín xrich'ia sín la ch'iaxín sín nkehe jínahya.

¹⁴ Jaha la jína chrókjuak'e la í chrókjuínkihya tí nkehe k'uitjá la ko tí nkehe ó kuítekávan. Jaha la ó noha tí nkexro kjuakoha. ¹⁵ Jaha la desde xjanntsia k'uitjá nkexrí nixja xroon itén Dios la tíha mé tónoexínni kixin Cristo Jesús tsaáxinni kixin tinkáchónkini ch'án. ¹⁶ Ntá kuenté xroon Biblia kjuachaxién Nchakuen Dios kjuínkítsa tí nkexro ikjin la tíha mé jína tsoxrácuexinni tí nkehe chaxín la ko tíha mé jína tsjentuéheni la ko tsjinkítsani tsonoheni nkexrí chrók'uejóni ntoá ¹⁷ kixin tí nkexro tinkáchónki Dios chrókónohe jína la ko chrókjuacha sich'e kaín tí xra jína.

4

¹ Kjuachaxién Dios la ko Ìnchéni Jesucristo, tí nkexro itsi éxi ijnko rey la sinchekitoexín ijie kaín chojni tjejóchón la ko tí chojni tsík'en, ² mé tétuanhan chrókjuakua itén Dios kaín asán kjónté á chrókuinhin sín o náhi. Nixjehé sín jnkojína kixin tsitekaon sín la ko tjéntuéhé sín jnkojína. Chrókóninkákonhya chrókjuakohé sín. ³ Itsi ijnko yaon ntá tsotjinkakonhya sín tsinhin sín tí nkehe jína. A ntá sinchexiteyéhe sín tí nkehe ntáchro asén sín ó. Tsjejá sín nchónhya maestro tsjakohé sín jehó tí nkehe tóxrjínhin sín chrókuinhin sín. ⁴ Méxra tsítóhe sín tí nkehe chaxín ntoá la ntá itsa sín kuènté kaín nkehe chaxínnya. ⁵ Méxra jaha jína chrókjuenkayáxian la chrókjuacha kjónté tsjasótia. Chrókjuintaxín chrókjuich'e xra chrókjuakohé chojni itén Dios tsaáxinni mé xikaha sinchexitejá jína tí xra chonta.

⁶ Ntá janhan ó kjuixraká tí hora tsjasótena la ko ó kjuixraká tí hora its'èn. ⁷ Ó kjuánjonkian jína kaín tí nkehe jínahya la ko ó kjuixinna tí xra kuèntana la ko kuitoahya jína kuinkachónkia Ìnchéni. ⁸ A ntá ijie la tí nkehe tsjtonna mé tjechónhen kixin jína kjuak'é ntihi. Tíha mé tsjanjon Ìnchéni tí yaon itsi ch'án. Jehe ch'án mé ijnko juez jína. Jehya kixin janhván tsákjaá tí nkehe tsjanjon ch'án. Náhi, kjaxin kaín tí nkexro kuítekaon sin ch'án la ko chéhe sín tjejóchónhen sín tió tsi ch'án.

Ch'in Pablo k'uetoan tsjijitsjehe sín ch'án

⁹ Jaha chrókóxakonhan tjoka chrók'uinkatsjehé tí janhan ¹⁰ kixin ch'in Demas la kuitóhe ch'án tí janhan kixin imá kóxrjínhin ch'án tí nkehe kuènte chjasintajni. Satsíkji ch'án chjasin Tesalónica. Ch'in Crescente mé satsíkji ch'án chjasin Galacia a ntá ch'in Tito satsíkji ch'án chjasin

Dalmacia. ¹¹ Jehó ch'ín Lucas naxa tjékian ch'án. Tjékjéyá ch'ín Marcos la tsjúkuana ch'án ntihi kixin jehe ch'án mé jina tsjinkitsa ch'án tí xra chonta ntihi. ¹² A ntá ch'ín Tíquico mé kuétuñhan ch'án sátsji ch'án chjasin Éfeso. ¹³ Tió ts'inka ts'inkakuana tí ka t'ítsate kuítóha chjasin Troas ntóe ch'ín Carpo la ko kjaxin ts'inkakuana tí libro kuéntana la ko koí tí tjoé iko tsik'óna xroon.

¹⁴ Tí ch'ín Alejandro tí ch'ín ch'e xra chica mé nchónhya nkehe jínahya kjuich'ena ch'án. Kjánchó Ìnchéni mé tsjenkehe ch'án kaín nkehe kjuich'e ch'án. ¹⁵ Jaha mé tóxakonhan kixin tí jehe ch'án kixin imá nínkakonhen ch'án tí nkehe tjakoni.

¹⁶ A ntá tí saoxín k'uèya tí síxree tí kjuia tí tjejó sín la ninkexró kjuinkitsahyana. Kaín sín me kuítóna sín janhván. Kjónté xikaha la tjáncháha Dios kixin chrókuahya ch'án kuéntá kixin xikaha kjuich'e sín. ¹⁷ Kjánchó Ìnchéni mé chaxín kjuinkitsana ch'án la kjuanjon ch'án kjuachaxin kixin tsjachana naxa jina tsjaku itén ch'án. Ntá kuínhin kaín tí sín jehya judío. A ntá Ìnchéni kjuinkitsana kixin kjónehyana koxra. ¹⁸ Ìnchéni mé tsjinkitsana kixin naxa tsonnahya kaín nkehe jínahya. Jehe ch'án mé ts'ayakonna ch'án ts'ixanhan tí tjet'etoan ch'án nkaya nkajní. Kjuasáyé ch'án kixin xikaha jnkochrín tsoxiteyá. Amén.

Ch'ín Pablo kjuixixín nixja ch'án

¹⁹ Jaha nixjehé tí tjan Prisca la ko ch'ín Aquila la ko nixjehé tí sín sín ntóe ch'ín Onesíforo. ²⁰ Kuítóhe ch'ín Erasto chjasin Corinto. A ntá ch'ín Trófimo kuítóhe chjasin Mileto kixin kóníhi ch'án. ²¹ Tóxakonhan chrók'uinka naxa t'ixenhya nchakuen kin. Tí ch'ín Eubulo la ko ch'ín Pudente la ko ch'ín Lino la ko tjan Claudia la ko kaín sín kichó ni ntihi nixjaha sín jnkójina.

²² Ìnchéni Jesucristo chrók'uajikoa ch'an la Dios chrókjuintayaonrá kaín rá mé xikaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí ch'ín Tito

Ch'ín Pablo nixjehe tí ch'ín Tito

¹ Janhan Pablo mé t'aha xra Dios la ko tsíkjeýána Jesucristo kixin tsjákoḥa tí í so sín tsíkjeýá Dios kjaxin kixin ts'itja sín tsonohe sín kixin nkexrí chrókuinkáchónki sín tí nkehe chaxín. ² Ntá ts'ejóchónhen sín tsochóna sín kjuachón jnkochrín. Dios la xitjahya sich'ia la kaín tí nkehe tsíchrónka ch'án ósé tí naxa k'ónahya chjasintajni la mé xíkaha tsonhen. ³ Ntá tí yaon tsíntácho Dios la mé jie ó xiteyá la ntá kónoxín tí tan kuènte ch'án. A ntá Dios tí nkexro tsaáxinni mé k'uetōan kixin sít'aha ch'án xra tsjákuá itén ch'án. ⁴ Ikjian tí xroon i chr'anhan jaha Tito. T'íkuañ éxi chaxín xjanna tí jaha kixin yóini tinkáchónkini Jesús. Kjuasáyé It'éni Dios la ko Jesucristo tí nkexro tsaáxinni, chrókjuintayavan la ko chrókuikonóḥa ch'án la ko chrótjaha ch'án kjuaxróxin.

Tí xra sich'e tí ch'ín Tito chjasin Creta

⁵ Kujtoha jaha tí isla Creta kixin jaha chrókuétuēnhén tí sín siín ntiha kixin nkexrí chrók'uejó sín la ko chrókónoxín nkexro ts'etōan kuènte jnkojnko nínko jnkojnko chjasin éxi tí kuétuānhan jaha. ⁶ T'ichjánxin kixin tí nkexro ts'etōan xra kuènte nínko la jína chrókjuak'e kixin kohya nkexro chrók'ueka jie, la ko chróchóna jnkokoḥa ichjién la ko tí xjeen sín chrókuinkáchónki Inchéni kixin tsokohya nkexro chrókjuanchia jie kixin jehya tí jína tjejóch'e sín, la ko kjaxin chrókójiehya sín. ⁷ Mé xíkaha tí nkexro ts'áyēhe tí xra ts'etōan xra kuènte nínko mé ts'etōan nkexrí tsonhen xra kuènte Dios la ntá t'ichjánxin ijnko nkexro tsjenkayáxin jína, chrókjuasinhya jie. La chrókjuinchehnkehya la ko chrókóninkakonhya tjoka. La ko kjaxin jehya ijnko nkexro tókoan la ko jehya ijnko nkexro tjeýá kjuanínkaon la ko chrókóxrjienhya sín chrókjuich'ia sín ntá chrókjuacha sín chichaon. ⁸ Kjaxin jína chrókjuak'e ch'án kixin tí tsjiji ijnko nkexro ntoe ch'án chrókjuanjon ch'án kjuachaxin chrókjuak'e tí nkexro a. La ko jína chrókjuak'e ch'án la ko jína chrókjuenkayáxin ch'án kixin ijnko nkexro ó tsíkjinchetjóá Dios la ko chróchóna ch'án kjuasáyé ch'án. ⁹ Kjaxin t'ichjánxin chrókuítōehya ch'án tí tan jína xrákoḥe ch'án kixin ntá jína tsjákoḥe ch'án í so chojni tí nkehe ntoá la kjónté nkexro tjinkakonhya tsinhin la jína chróchenka ch'án chrókuinhin.

¹⁰ Siín itsjé tí sín nínkaon mé tí sín a la mé tí sín judío la mé nixja sín éxi loñtj sín mé xíkaha ch'iehe sín chojni. ¹¹ Tí sín a la chrók'uíkjhēni ir'va sín kixin tjachróe sín nchónhya chojni kixin tjako sín tí nkehe jehya jína kixin chrókjuich'ia sín chrókjuacha sín nchónhya chichaon.

¹² Ijnko ch'ín kuènte chjasin Creta la mé tsíchrónka ch'án nkexrí tjejó tí sín chjasén ch'án. Ntácho ch'án kixin: “Kaín tí chojni chjaséni mé imá ch'ia sín la ko imá jiehe sín la ko imá kóchjinka sín la ko séhe sín”, mé xíkaha chrónka ch'án. ¹³ Tí nkehé tsíchrónka ch'án mé chaxín ntoá. Méxra antsi fuerte chrókjuéntuéhé sín kixin ntá jína chrók'uejó sín chrórxinkaon sín Dios. ¹⁴ Nixjehé sín kixin chrókuahya sín kuénté kaín tí nkehe tsík'axrjenjín kja tí sín judío tjako la ko chrókuitekakonhya sín tí nkehe t'etōan tí sín nínkakohen tí nkehe chaxín.

¹⁵ Tí sín chaxín tjóá kjuaxrexinkaon kuènte sín ntá kaín nkehe ch'e sín la jína. A ntá tí nkexro titekakonhya la tjuáhya kjuaxrexinkaon kuènte la kohya ninkehó nkehe jína tí kjuaxrexinkaon kuènte sín la kaín nkehe tjenkayáxin sín mé tjuáhya. ¹⁶ Ntáchro sín kixin chóxin sín Dios a ntá tí t'ikonní nkexrí ch'e sín ó noexínni kixin chaxínhya tíha la ch'ia sín. Jehe sín mé ntoáhya tjenkayáxin sín la ko jiehe sín la ko titekakonhya sín. A ntá tí xikaha ch'e sín la, ¿nkexrí chrókjuich'e sín tí xrá jína?

2

Chrókjuako ch'in Tito tí tan chaxín

¹ A ntá jaha chrókjuákua éxí tí chrónka tí tan jína chaxín. ² Tjákohé tí sín ó táda kixin chrókókoanhya sín la ko jína chrók'uejó sín la ko chróchónta sín kjuasáyé sín la ko chróchónta sín ijnko kjuaxrexinkaon jína la ko jína chrókuinkáchónki sín tí nkehe chaxín la ko chrótjuèhe sín kichó sín la ko chrókónínkakonhya sín kjónté tsjasóte sín. ³ A ntá kjaxin xikaha tí sín ó nána la kjaxin jína chrók'uejó sín la kjaxin chrókjuinchekuáxinhya sín chrókuinkáchónki sín kjuach'ia la ko kjaxin chrókókoanhya sín. Chrókjuákoxin sín ijnko kjuaxrexinkaon jína ⁴ kixin xikaha chrókjuákuexin sín tí chojni chjin tjarisoá a kixin chrótjuèhe sín xii sín la ko chrótjuèhe sín xjeen sín ⁵ la ko chrókjuich'e sín xrá jína la ko ntoá chrókjuenkayáxin sín la ko jína chrók'uàyakonhen sín nchia ntóé sín la ko chrókójína sín la ko chrókuitekakonhen sín xii sín. Tí xikaha chrókjuich'e sín chrókjuinchexiteyá sín la kohya nkexro chrók'uántaxínhin tí itén Dios tinkáchónkini.

⁶ Kjaxin xikaha chrókjuinchexraxinkávan tí sín ntasoá kixin jína chrók'uejó sín chróchónta sín kjuasáyé sín. ⁷ Jaha mé chrókjuákoéxian sín kaín nkehe jína la ko chrókjuákohé sín kixin ntoá chrók'uejó sín. ⁸ Jaha la chrónixja tí nkehe jína kixin kohya nkexró chrók'uántaxín la ntá xikaha chrókósuèhe tí sín nínkaon la ntá kohya nkehe jínahya chróntáchro sín kuènte tí jeheni.

⁹ Tétuènhén tí sín xrich'exón xrá kixin chrókjuinchexiteyéhe sín tí lamo kuènte sín la ko chrókójína sín la ko chrónixjankiehya sín tí nkexro ch'ehe sín xrá ¹⁰ la ko kjaxin chrókueéhya sín kixin jehya ijnko chojni chee tí jehe sín. Ntá kaín chojni chrók'uikon sín kixin tjákoxin sín kixin náxrjón tí itén Dios chrókuaáxinni.

¹¹ Kixin Dios mé kjuákoxin ch'án kixin nkexrí tjuèheni ch'án kixin jehe ch'án mé tsaáxin kaín chojni. ¹² Kjuasáyé Dios mé tjákohehi ch'án kixin chrókuítóheni kaín nkehe jie la ko kaín tí nkehe jínahya tjenkayáxinni. La ko jína chrók'uejóni chjasintajni la ko ntoá chrók'uejóni la ko chrókuinkáchónkini Dios. ¹³ Kjaxin chrók'uejóni jína kixin chrókóchéheni chrók'uejóchónhenni tí yaon kjuachaxién Dios jie itsi Dios la ko Jesucristo tí nkexro tsaáxinni. ¹⁴ A ntá jehe ch'án mé k'uenyákonhenni ch'án kixin tjinkaon ch'án tsaáxinni ch'án kixin tsotjuáxin kaín jie chóntani kixin ntá jeheni mé tsónani ijnko chojni sich'ehe ch'án xrá la ko tsóxrjnhinni sich'eni kaín xrá jína tjinkaon ch'án.

¹⁵ Tíhi mé chrókjuákua la ko chrókjuinchexraxinkávan sín la ko chrókuétuènhén sín kjuachaxién Dios. Chrókuítóéhya kixin ninkexró chrókókjoniéhya tí nkehe tjákua jaha.

3

Jína chrók'uejó tí sín tinkáchónki Cristo

¹ Chrókjuinchexraxinkávan sín kixin sinchexiteyéhe sín tí gobiernu la ko tsitekaon sín ichrén xra ts'etəon tí síxreé kixin chrókjuich'e sín kaín xra jína ts'etəon tí sín a. ² La ko chrók'uantaxíenhya sín ninkexró la ko kjuaxróxin chrók'uejó sín la ko chrók'lóna sín ijnko chojni jína la ko chrókjuakoxin sín kixin jehya ijnko chojni nchehnke la chrókjuikosáyehe sín kaín chojni.

³ Jeheni kjaxin ósé k'uélontini la ko k'uékitekakonhyani Dios. Chjini k'uék'ajini la k'uékóxrjínhinni kaín nkehe jínahya. La ko jehya jína k'uék'ejóni la ko k'uéchóntani kjuachjinoxínhin la ko k'uéchjinoxíenheni í so chojni. ⁴ A ntá tí Dios tsaáxinni mé kjuakuexinni ch'án kixin jína ch'án la ko tjuèhe ch'án kaín chojni. ⁵ Jehe ch'án kuaáxinni ch'án la jehya kixin ichrén xra jína chrókjuich'eheeni ch'án. Náhí, ó jehí kuikonóeheni ch'án la ntá kjuínchekaáni ch'án la ko kjuínchetjóáni ch'án. Ntá kokjihiní nixin kixin tí Nchakuen ch'án la mé k'uáyèxinni kjuachón nixin. ⁶ Kjuasáyé Jesucristo tí nkexro tsaáxinni ntá kjuínchekjìtonhenni Dios Nchakuen ch'án kixin tsochóntani kjuachaxin kuèté ch'án. ⁷ A ntá xikaha kjuasáyé ch'án kjuínchetjóáni ch'án kixin ntá tjejóchónhenni tí kjuachón jnkochríxin tsjanjon ch'án.

⁸ Kaín tíha mé chaxín. Tjínkavan kixin jaha chrókuétəon kaín tíha kixin ntá kaín tí sín tinkáchónki Dios mé chrókuitekaon sín chrókjuich'e sín kaín nkehe jína. Kaín tí nkehe la mé jína la ko tsjinkitsa kaín chojni. ⁹ A ntá jaha mé tjuohé tí sín tjachaxin kichó sín lontí sín la ko tjuohé tí nkehe tinkáchónki sín kuènte tí sín tsík'axrjeníxin sín la ko tjuohé tí sín tjanjonxin tí ley kuènte Moisés. Kaín tíha la ó chónkó la ninkehó kjuaxrexinkaon chóntahya.

¹⁰ Jnkojín nkexro tjinkaon tsjixrónkáxin tí tójnkotsé njnko ntiha la nixjehé ch'án jnkojína senó la ko yóxin inaá ntá tí titekakonhya ch'án ntá tjuohé sátsji ch'án ¹¹ kixin ó noha kixin tí chojni xikaha a mé ntoáhya tjenkayáxin sín kixin jehó sín nchek'ánkí sín ijé sín.

Tí nkehe k'uətoan ch'ín Pablo

¹² Tí tsétuanhan ch'ín Artemas la ko ch'ín Tíquico kixin tsjiji sín tí tjen jaha la ntá tjoka chrók'uinkatsjehé tí janhan chjasin Nicópolis kixin ntiha tsjak'é ts'atsinkajia tí nchakuen kin. ¹³ Jína chrókjuinkitsa jaha tí ch'ín Zenas tí ch'ín nixjayákonhen í jnko chojni la ko tí ch'ín Apolos la ko chróchjehé sín kaín tí nkehe t'ichjánxinhin sín tió sátsji sín kixin ninkehó nkehe chrók'uitjáyanhya tí t'ichjánxinhin sín. ¹⁴ Ntá tí sín í so chrók'uitja sín nkexrí sich'e sín tí xra jína la ko chrókjuinkitsa sín kichó sín ichrén nkehe t'ichjánxinhin sín kixin chrókjuakoxin sín kixin jína tjejó sín.

Ó kjuixixin nixja ch'ín Pablo

¹⁵ Kaín tí nkexro tjékian janhan ntihi nixjahá sín jnkojína. Jaha mé nixjehé kaín tí sín tinkáchónki Inchéni ntiha mé kaín tí sín imá tjuèheni sín. Dios mé chrókjuincheyanonrá ch'án kaín rá. Amén. Ó tjen.

TÍ xroon chr'énhen ch'ín Pablo tí ch'ín Filemón

Ch'ín Pablo nixjehẹ ch'ín Filemón

¹ Janhan Pablo tjéçhjinaxián tí xra kuente Cristo Jesús tjékjian tí xroon i la ko kichó ni Timoteo kixin tí jaha Filemón ts'ayéhé. Jaha mé tjuaha kixin jnkokón tjejóch'eni xra kuente Dios. ² Kjaxin chrókuinhin kaín tí sín tinkáchónki Ìnchéni tójnkotsé ntoa la ko tí tjan kichó ni Apia la ko tí ch'ín kichó ni Arquipo, mé tí ch'ín ch'e xra éxí tí jeheni. ³ Kjuasáyé It'eni Dios la ko Ìnchéni Jesucristo chrókjuintayaonrá ch'án kixin chrótjáhará ch'án kjuaxróxin.

Ch'ín Filemón tjuèhe ch'án chojni la ko tinkáchónki ch'án Jesús

⁴ Xráxín tjáncháha kjuasáyé Dios tí xráxinkavan tí jaha tí nixjaha Dios ⁵ kixin ó kuinhan kixin imá tinkáchónkia Ìnchéni Jesucristo la ko imá tjuèhé ch'án la ko kaín tí sín tinkáchónki Dios. ⁶ Tjáncháha Dios kixin tsjinkitsa ch'án tí sín kuitekaon tió kjuáqohé sín kixin ntá tsienxín sín jína nkexrí kaín tí nkehe chótani kixin kjuíncheyaonni Cristo Jesús. ⁷ Imá chàna kixin ó nòna kixin jaha kichó ni imá tjuèhé tí sín kichuá ntiha la ko imá kjuínchechéhé asén tí sín tinkáchónki Ìnchéni.

Ch'ín Pablo chrónóhẹ tí ch'ín Filemón kixin tsikonóhẹ ch'án tí ch'ín Onésimo

⁸ Janhan na kjueyána Jesucristo t'aha ch'án xra méxra chonta kjuachaxin tsétuanhan jaha tí nkehe chrókjuch'e. ⁹ A ntá íchá jína jehó xrjannógha tsítékávan kixin jaha tjuèhé tí janhan. Janhan Pablo mé ó tádana la ko tjéçhjinaxián tí xra kuente Jesucristo. ¹⁰ Méxra xrjannógha tsjinkitsa tí ch'ín Onésimo. Jehé ch'án mé t'íkuan éxí xjanna kixin kjuankixin ch'án tsinkáchónki ch'án Jesucristo tí tjéçhjinakian ch'án ntihi.

¹¹ A ntá tí ósé ch'ín Onésimo mé kjuít'ahya xra jína. A ntá ijie ó nòna kixin imá jína sit'aha ch'án xra tí jaha la ko jína sich'ena ch'án xra kjaxin. ¹² Ntá ijie tsétuanhan ch'án tsijji ch'án tí tjen jaha inaá. Chrótjuèhé ch'án éxí chrótjuèhé tí janhan. ¹³ Janhan tjínkavan chrókuitonakian ch'án ntihi kixin chrókuinkitsana ch'án chrínki tí chrókjuch'e jaha kixin tjéçhjinaxián tí itén Jesucristo. ¹⁴ Kjánchó tjínkakonhya tsjáncháha xikaha tí tjínkakonhya jaha. Jehya kixin jaha chrókuínkitsani kixin chrókuétuanhan xikaha. Náhí. Jehí tjínkaonni éxí jaha tóxrjínhan chrókjuch'e. ¹⁵ Tí ch'ín Onésimo kuítóha ch'án iso yaon a ntá jie la tsochonta ch'án jnkochrín. ¹⁶ Ijie la jehya éxí ijnko chojni tsík'íná chrók'uikuan ch'án. Náhí. Ntá jie la éxí ijnko nkexro ch'e xra antsí jína mé éxí ijnko kichua chrótjuèhé ch'án. Janhan na tjuaha ch'án kjánchó tí jaha la antsí má chrótjuèhé ch'án. Jehya éxí chojni ó chrók'uikuan ch'án. Náhí. Chrók'uikuan ch'án éxí ijnko kichua kuente Ìnchéni.

¹⁷ Méxra tí chaxín t'íkuan tí janhan éxí kichó ni jnkokoá tinkáchónkini Ìnchéni ntá chrók'uayéhé ch'án éxí chrók'uayéhé tí janhan. ¹⁸ A ntá tí ichrén nkehe kuaáha ch'án o ichrén nkehe síkáha ch'án la janhan tsjénkaha tíha. ¹⁹ Janhan Pablo mé tjaná kjinxian tí xroon i na mé janhan

tsjénkaha tíha. A ntá janhan tjínkakhonhya chrókjuintaxraxinkávan tí jaha kixin kaín tí nkehe tjasikàna tí janhan kixin kjuákohá jaha. ²⁰ Méxra kichó ni tsotsenkávan sich'e tí nkehe tjáncháha chaxín tinkachónkia Ìnchéni. Mé xikaha sinchechéhé asenná kixin jaha mé kichó ni tinkachónki Cristo.

²¹ Méxra ikjian tí xroon i chr'anhan kixin ó nòna kixin jaha la sinchexiteyá tíha la ko ó nòna kixin jaha la sich'e antsí má que tí nkehe tjáncháha jaha. ²² Kjaxin tjáncháha kixin tjéyá ijnko nchia tsjak'é. Tjéchonhan kixin jahará la nixjehérá Dios la ntá Dios chrókjuanjon kjuachaxin kixin chrókjuasántsajahará.

Kjuixixín nixja ch'ín Pablo

²³ Kjaxin ch'ín Epafras mé nixjahará ch'án jnkojína. Jehe ch'án mé tjéchinakian ch'án jnkokoá tí ntóéchiso ntihi kixin kjaxin tinkáchónki ch'án Cristo Jesús. ²⁴ Ch'in Marcos la ko ch'ín Aristarco la ko ch'ín Demas la ko ch'ín Lucas mé kaín sín nixjaha sín jnkojína. Jehe sín mé tjinkitsana sín tí xra.

²⁵ Tjétjáncháha Ìnchéni Jesucristo kixin sintayaonrá ch'án kaín rá. Amén. Ó tjen.

Tí xroon k'uáyéhe tí sín Hebreos

Dios nixjaxin ch'án tí Xjeen ch'án

¹ A ntá tí imá ósé Dios mé nixjehe tí sín tsík'axrjenixinni nchónhya veces kixin nchónhya nkexri chrókiénxín sín, nixjaxin ch'án tí sín k'uechrónka tí itén ch'án. ² A ntá jie tió tsjixixín Dios nixjaxin ch'án tí Xjeen ch'án, na mé Dios kjuich'éna ch'án kaín xín nkehe siín kixin kjuachaxién tí Xjeen ch'án, mé tí nkexro k'uáyéhe kaín xín nkehe. ³ Jehe ch'án mé t'inkaséyanxín ch'án tí kjuachaxin kuènte Dios, la ko jehe ch'án mé kjaxin éxi tsjehe Dios xikaha tsjehe tí jehe ch'án. Jehe ch'án t'aykonhen ch'án kaín xín nkehe siín kixin tí kjuachaxin jie chóna tí tan nixja ch'án. A ntá kjuixin kjuínchetjóá ch'án tí jie chónani, ntá sákjuí ch'án kjuák'etjaxin ch'án tí tja chjina It'é ch'án tí tjen ch'án t'etqan ch'án nkaya nkajni.

Tí Xjeen Dios imá t'etqan, a ntá tí sín ángel la kénhyó

⁴ Tí Xjeen Dios k'uáyéhe ch'án kjuachaxin ts'etuenhen tí sín ángel, kixin tsík'áyéhe ch'án tí kjuachaxin kuènte It'é ch'án, a ntá imá t'etqan ch'án, a ntá tí jehe sín la náhi. ⁵ Méxra Dios ntáchehya nijnko ángel kixin:

Jaha mé Xjana,

janhan mé kjuít'ána tí jaha ijie.

la ko kjaxin ntáchrohya Dios kuènte nijnko ángel kixin:

Janhan mé chrók'óna It'é ch'án,

la ko jehe ch'án mé chrók'óna xjana.*

⁶ A ntá tió kui tí jnkokoá Xjeen Dios chjasintajni, ntá ntácho Dios kixin:

Kaín tí sín ángel kuènte Dios chrókjuikosáyehe tí jehe ch'án.†

⁷ A ntá ntácho Dios kuènte tí sín ángel kixin:

Tí sín ángel ch'éna ch'án éxi xrjnto kixin nchakuen sín ó,

la ko tí sín ch'ehe ch'án xra la ch'éna ch'án éxi xrohinene.‡

⁸ A ntá ntáche ch'án tí Xjeen ch'án kixin:

Tí trono kuéntá itjen jnkochrixin, jaha Dios,

la mé jaha mé ijnko nkexro t'etqan jina.

⁹ Jaha tóxrjnhan tí nkehe jina, a ntá ninkákonhén tí nkehe jínahya.

Mé xikaha tí Dios tsíkjejá jaha, la Dios kuéntá kjuíntacháha má,

a ntá tí í so sín k'uájikoa la kánhyó.§

¹⁰ Kjaxin ntácho kixin:

Jaha Inchéni, tí xrankixixín kjuich'éna chjasintajni,

la ko jaha kjuich'éna nkajni.

¹¹ Táha mé ts'itjáyan, a ntá jaha la tsjak'e jnkochrixin.

Kaín tíha tsontaxín éxi iké chojni,

¹² éxi ijnko iké chojni xikaha tsoxrat'o,

ts'ixinkí éxi ijnko iké chojni.

A ntá jaha la ts'ixitóxinhya jnkochrixin tsjak'e,

a ntá tí kjuachón chonta jaha la nunca tsjejehya.*

¹³ Dios la ntáchehya nijnko tí sín ángel kuènte ch'án kixin chrók'uejó sín tja ch'án chjina ntahó chrók'uetqan sín, tsjixinjian kaín xín tí sín

* **1:5** Salmo 2.7; 2 Samuel 7.14; 1 Crónicas 17.13 † **1:6** Deuteronomio 32.43 ‡ **1:7** Salmo 104.4 § **1:9** 1.8-9 Salmo 45.6-7 * **1:12** 1.10-12 Salmo 102.25-27

nínkakonhen sín la chrókjuachahya sín chrók'uetōan sín.† 14 Kaín tí sín ángel mé nchakuen sín ó mé ch'ehe Dios xra mé k'uítuenhen sín tsjinkĩtsa tí sín ts'áyéhe kjuachaxin tsaá sín.

2

Chrókjoniehyani tí nkehe tsaáxinni

1 Mé xikaha chrókjuenkayáxinni jína tí nkehe ó kuínhinni kixin chrókuítōehyani tí ntja ó kuákjani. 2 A ntá tí tan tsíchronka tí sín ángel ósé la mé tsíkónoxín kixin chaxín tíha. A ntá tí sín kuítেকakonhya sín tí tan jína kuínhin sín la kjuasin sín jie, na mé kjuasóte sín la táhó mé kjuacha sín. 3 ¿Xá nkexrí chrókuaáni tí chrókuaahyani kuentá tí nkehe jie chrókuaáxinni? Jehé Ìnchéni tsíchronka ch'án saoxín nkexrí chrókuaáxinni, a ntá chr'éxin tí sín tsíkinhin mé kjuakohe sín tí jeheni. 4 Méxra Dios kjuakoxin ch'án kjuaxroan jie la ko kjuachaxin jie kixin chaxín tíha, la ko noexínni kaín tí kjuachaxién Nchakuen ch'án tsík'áyéheñi éxi tjinkaon ch'án tsjanjon ch'án.

Jesucristo k'óna ch'án chojni

5 Dios la tsíchjéhya tí sín ángel kjuachaxin kixin chrók'uetōan chjas-intajni chr'éxin éxi tí jie tjejónixjani. 6 Náhí. Éxi nixja xroon itén Dios chronkaxín kixin:

¿Xá nkexéhe tí chojni a, jaha It'eni Dios, kixin imá xráxinkávan tí jehé ch'án?

¿Xá nkexro tíha kixin imá tóxakonhan kixin tí jehé ch'án?

7 Jaha tsíkjich'éna ch'án éxi ijnko chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin, a ntá jie la imá kjuíkosáyehé ch'án;

8 la jaha tsíchjehé ch'án kjuachaxin kixin kaín nkehe ts'etuenhen ch'án.* Mé xikaha ntáchro tíha kixin tsíchjéhe Dios tí chojni kjuachaxin kixin chrók'uetuenhen ch'án kaín xín nkehe, ntá Dios kuítōehya ninkehó nkehe chrókuitekakuenhya ch'án. Kjánchó naxa t'ikonhyani kixin á kaín nkehe titekakonhen ch'án. 9 Kjánchó ó noheni kixin Jesús la tsíkjich'éna Dios éxi chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin. Dios mé tjuéhe kaín xín chojni ntá tjinkaon ch'án kixin ch'ín Jesús chrók'uenyákonhen kaín chojni. A ntá jie tsík'áyéhe ch'án kjuachaxin náxrjón la ko Dios tjikosáyehé tí jehé ch'án kixin tí kjuasóte ch'án, ik'uén ch'án.

10 Kaín nkehe siín la kuènte Dios la ko tjejó kixin tí kjuachaxin kuènte tí jehé ch'án. A ntá Dios tjinkaon ch'án kixin kaín xín tí xjeen ch'án chrók'uejó sín tí tjen ch'án tí t'inkaséyan. Méxra Dios kjuanjón Ìnchéni Jesucristo kixin tsjasóte ch'án kixin ntá jína kjuakoxin ch'án kixin ntá jehé ch'án tsaáxinni ch'án. 11 Kaín tí sín tsíkótjóa la ko tí nkexro kjuínchetjóa na mé chóna jnkokoá It'é. Méxra tí Xjeen Dios tósuehya ch'án tsontáchro ch'án kixin kichó ch'án tí jehé sín. 12 Éxi ntáchro tí xroon itén Dios kixin: Tsochénkani tí sín kichó ni kixin nkexro tí jaha,

tsjikosáyahani tsotsjeni himno tí tójnkotsékoni tí sín kichó ni.†

13 Kjaxin ntáchro kixin:

Janhan titekavan Dios.‡

La ko kja_xin ntá_hro ínaá kixin:

Ntihi tjékian tí xjeen Dios tsíkjanjon ch'án tsík'ayáha. §

¹⁴ A ntá tí xjeen chojni mé jnkokoá kichó la k'óna nto la ko ijn_i; la kja_xin ch'ín Jesús xikaha tsík'óna ch'án nto la ko ijn_i kixin jína its'en ch'án kixin jína sinchek'itjáyan ch'án tí nkexro chóna kjuachaxin t'óyan chojni, na mé t'axrjexín kixin diablo tíha, ¹⁵ mé xikaha chrókjuinkekaá ch'án kaín tí sín chrakonhen sín tí kjuach'en, tjejó sín éxí t'ítuenhen sín kaín yaon tjejó sín. ¹⁶ Kja_xin kuihya ch'án kixin chrókjuinkitsa ch'án tí sín ángel. Náhí. Ikui ch'án kixin tsjinkitsa ch'án tí sín tsík'axrjenixin ch'ín Abraham. ¹⁷ A ntá t'ichjánxin chrókóyóhe ch'án éxí tí sín kichó ch'án kixin jína chrók'óna ch'án ncha_t'á t'et_oan kuente Dios la chrókui_konógheni ch'án, ntá jína tsjatsen ch'án ijje kaín chojni kixin k'uenyákonhenni ch'án. ¹⁸ Kixin jehe ch'án kjuasóte ch'án la ko tí Jínahya tjinkaon chrókjuachroe ch'án la kjuachahya, a ntá jie la jína tsjinkitsa ch'án tí sín chrókjuachroe tí Jínahya kixin chrókjuasinhya sín jie.

3

Antsí tjetoan ch'ín Jesús, a ntá ch'ín Moisés la kánhyó

¹ A ntá kichó ni, jahará la tsíkótjóará, la mé Dios tsík'íyahará ch'án kixin ts'ónará xjeen ch'án, a ntá chró_xraxinkáonrá jína Cristo Jesús na mé jehe ch'án mé tí apóstol la ko tí ncha_t'á t'et_oan kuente tí nkehe tinkáchónkini. ² Tí ch'ín Jesús jína kuítekakonhen ch'án Dios, mé tí nkexro tsík_jeyá ch'án sich'ehe ch'án xra, éxí kja_xin ch'ín Moisés jína kjuí_h'e ch'án xra k'uáyakonhen ch'án nt_oe Dios. ³ Dios antsí kjuikosáyehe tí ch'ín Jesús, a ntá ch'ín Moisés la kénhyó, éxí antsí tjikosáyehe sín tí nkexro kjuí_h'éna ijnko nchia, a ntá tí nchia la kénhyó tjikosáyehe sín. ⁴ Jnkojnko nchia k'óna kixin siín nkexro kjuí_h'éna, kjánchó Dios mé kjuí_h'éna kaín nkehe siín. ⁵ Ch'ín Moisés jína kjuí_h'e ch'án xra k'uáyakonhen ch'án tí nchia kuente Dios. Tí xra kjuí_h'e ch'án mé k'uénixja ch'án kuente tí nkehe tsontá_hro Dios chr'éxin. ⁶ A ntá Cristo la mé Xjeen Dios tí jehe ch'án, ntá kjuínchexiteyá ch'án jína la t'ayakonhen ch'án tí nchia kuente Dios, la tíha mé jeheni, kixin tí tsít_oehyani ch'án la naxa tsinkáchónkini ch'án ntá tsochéh_eni kixin tí nkehe tjejó_hnhenni.

Ts'ok'éh_eni tí t_jen Dios

⁷ Mé xikaha éxí ntá_hro Ncha_kuen Dios nixja xroon itén Dios kixin:

A ntá jie tí chrókuinhín_rá tí nkehe ntá_hro Dios,

⁸ chrókjuí_h'ehyará éxí kjuí_h'e tí sín óse kuítekakonhya sín Dios tí yaon kjuí_h'ehe sín prueba Dios tí nteje.

⁹ A ntá ntaha tí sín tsík'axrjenixin_rá óse kjuí_h'éna sín prueba, kjónté cuarenta nánó k'uí_kon sín tí xra kjuí_t'a.

¹⁰ Méxra kónínk_akonhan tí chojni a, ntáxrjan kixin: “Xrácín xrichoe asén sín, tjinkakonhya sín tsochóxin sín ntjaná.”

¹¹ Méxra kónínk_akonhan tí jehe sín, ntátjan sín

kixin chaxín tsoxiteyá kixin ts'ixenhya sín ts'ok'éhe sín tí t_jen janhan.*

¹² Kichóni, chrókó_xakonhanrá kixin chrókó_kohya nijnko tí jahará chró_hchontará asánrá jínahya chrókui_toh_er_a Dios tjechón chrókuítek_akuenhyará tí jehe ch'án. ¹³ Chrókjuíncheché_hérá kichuárá

jnkoinko yaon naxa tjen tiempo kixin nijnko tí jahará chrókjuenkayáxinrá kixin naxa chrókjuásinrá jie, í chróntáchrohya asánrá kixin naxa chrókójahará. ¹⁴ A ntá tí chrók'uejóni jnkójina hasta tsjixixín éxi kuinkáchónkini tí xránkixixín, ntá síin kjuachaxin ts'ejókoni Cristo.

¹⁵ Mé xikaha ntáchro kixin:

A ntá jie tí chrókuinhínrá jahará tí nkehe ntáchro Dios,

chrókjuich'ehyará éxi kjuích'e tí sín ósé kuítekakonhya sín Dios.†

¹⁶ ¿A ntá nkexro tí sín kuínhin itén Dios, a ntá tí chr'éxin kuítekakonhya sín?

¿Á jehya kaín tí sín tsikakitsjexín ch'ín Moisés tí nación Egipto? ¹⁷ ¿A ntá

nkexro tí kónínkakonhen Dios tí cuarenta nánó? ¿Á jehya tí sín kjuasin

jié k'uénxin nteje? ¹⁸ ¿A ntá nkexro ntáche Dios kixin chaxín tsoxiteyá

kixin ts'ixenhya sín ts'ok'éhe sín tí tjen tí jehe ch'án? ¿Á jehya tí sín

kuítekakonhya? ¹⁹ A ntá ó noheni kixin kjuachahya sín k'uixenhen sín kixin

kuítekakonhya sín.

4

¹ Méxra, tsíntáchro Dios kixin tsjanjon ch'án kjuachaxin ts'ixenhenni

ts'ok'éheni tí tjen ch'án, a ntá tóxakonhenni kixin ách'e jnkójín tí jahará

chrókjuachahyará chrók'uixenhenrá ntiha. ² Kixin kjaxin jeheni kuínhini

itén ch'án tsaáxinni éxi kuínhin tí jehe sín, kjánchó tí jehe sín la ninkehó

kjuínkítahya sín tí tan jina kuínhin sín, kixin kjónté kuínhin sín tí tan na

kuítekakonhya sín. ³ A ntá jeheni kuítekaonni, ntá ts'ixenhenni ts'ok'éheni

ntaha, éxi tsíntáchro Dios kixin:

Méxra kóninkakonhan sín tí jehe sín ntátjan sín kixin chaxín tsoxiteyá

kixin ts'ixenhya sín ts'ok'éhe sín tí tjén janhan.*

Kixin Dios la tió kjuixinhin ch'án xra kjuích'éna ch'án chjasintajni ntá

kjuák'e ch'án k'ok'éhe ch'án. ⁴ Mé xikaha í jnko nketí nixja tí xroon itén

Dios chrónka kuènte tí yaon yatoxin ntáchro kixin:

Kjuixinhin Dios kaín xra ntá kjuák'e ch'án k'ok'éhe ch'án tí yaon yatoxin.†

⁵ A ntá inaá ntáchro tí xroon itén Dios kixin:

Ts'ixenhya sín ts'ok'éhe sín tí tjén janhan.‡

⁶ Kjánchó naxa t'itjayan jnkójín chojni chrók'uixenhen sín chrók'ok'éhe

sín. A ntá tí sín saoxín kuínhin tí tan chrókuaáxin sín la k'uixenhya sín kixin

kuítekakonhya sín tí tan a. ⁷ Méxra Dios tsíkjeýa ch'án í jnko yaon, mé tí

yaon jie, a ntá chr'éxin nixjaxin ch'án tí nkehe tsíchrónka ch'ín David éxi

ntáchro tí xroon itén Dios kixin:

A ntá jie tí tsinhínrá tí nkehe ntáchro Dios, chrókjuinchexiteyará.§

⁸ Kixin tí chrókjuanjón ch'ín Josué kjuachaxin kixin chrók'ok'éhe tí sín

israelita,* ntá Dios la í chrónixjahya ch'án kuènte í jnko yaon. ⁹ A ntá naxa

tjehónhen tí ts'ok'éhe tí sín tinkáchónki Dios; ¹⁰ kixin tí nkexro ts'ixenhen

ts'ok'éhe tí tjen Dios tsíkjininhin ch'án tí xra kuènte ch'án éxi yóhe kjaxin

Dios kjuixinhin ch'án tí xra kuènte ch'án ntá kjuák'e ch'án k'ok'éhe ch'án.

¹¹ T'ichjánxin kixin kaín asénni chrókjueyáni nkexrí chrók'uixenhenni

chrók'ok'éheni, kixin chrókóyóehyani éxi tí sín kuítekakonhya.

¹² Kixin tí itén Dios la mé tjehón la ko chóna kjuachaxin. Tíha la imá

taté, a ntá kánhyó taté tí chica espada yánjín taté, la tíha mé t'ixenhen

tí njnka asén chojni la ko nchakuen chojni hasta tí nkaya asén chojni.

† 3:15 Salmo 95.7-8 * 4:3 Salmo 95.11 † 4:4 Génesis 2.2 ‡ 4:5 Salmo 95.11 § 4:7 Salmo

95.7-8 * 4:8 Josué 22.4

Tíha mé nchexraxinkaon chojni kaín nkehe tjenkayáxin sín la ko kaín nkehe ntáchro asén sín. ¹³ Kohya ninkehó nkehe tsíkjich'éna Dios tsjacha chrók'uejóméhe tí jehe ch'án kixin kaín nkehe la noxín síin t'ikon tí nkexro ts'áyéhe kuentá.

Jesús mé tí nchat'á imá tjetooan

¹⁴ Jesús tí Xjeen Dios mé tí nchat'á tjetooan kuénténi mé k'uixenhen tí tjen Dios la méxra chrókuítqehyani tí tinkáchónkini tí jehe ch'án. ¹⁵ Méxra jehe ch'án mé tí nchat'á tjetooan kuénténi mé tsjinkitsa ch'án tí jeheni kixin fuértehyani kixin kjaxin tí Jínahya chrókjuachroe tí jehe ch'án éxi sítónhen tí jeheni, kjánchó jehe ch'án la ninkehó jie kjuasinhya ch'án kjónté xikaha kónhen ch'án. ¹⁶ Méxra kaín asénni chrókóchjineheni Dios tí tjen ch'án t'etooan ch'án kixin chrókuikonóeheni ch'án la ko chrókjuinkitsa ch'án tí jeheni tí nkehe chrók'uichjánxinhinni.

5

¹ Kaín nchat'á t'etooan tsíkónoxín la chojni ó, tsík'áyéhe xra tsonix-ayákonhen chojni nkayakon Dios, la ko tsjanjon nkehe la ko iko its'en kixin ts'itjáyanxín tí jie kuénte chojni. ² Kjaxin tí nchat'á a la fuértehya kixin chojni ó, a ntá chrókóninkakuenhya ch'án tí sín noehya la ko tí sín tsíkjichroe. ³ Kjaxin jehe ch'án, kixin fuértehya ch'án t'ichjánxin tsjanjon ch'án iko its'en kixin tí jie chóna ch'án jehe ch'án éxi tjanjon ch'án nkehe kuénte tí í so chojni chóna jie.

⁴ Ninkexró xitjahya jehó sich'éna asén nchat'á t'etooan. Náhí. Jehó tí sín tsíkjejá Dios tsík'áyéhe tí xra éxi tsík'áyéhe ch'ín Aarón. ⁵ Mé xikaha Cristo, kjuích'énahya ch'án jehó ch'án asén ch'án nchat'á t'etooan. Náhí. Dios mé kjuikosáyehe ch'án mé tsíkjanjon tí xra éxi tsintáchro kixin:

Jaha mé xjanna;

Janhan mé kjuít'ána ijie.*

⁶ Kjaxin í jnko nketí nixja xroon itén Dios ntáchro kixin:

Jaha mé ijnko nchat'á tsjak'e jnkochrín,

éxi yóhe k'uékjak'e ch'ín Melquisedec.†

⁷ Tió kjuák'e Cristo ntihi chjasintajni imá tsjánka ch'án la ko itsen chrónóhe ch'án Dios, kixin Dios chóna kjuachaxin chrókjuinchekaá ch'án kixin chrók'uenhya ch'án; la Dios la kuínhin kixin xikaha kuítekaon ch'án.

⁸ Méxra Cristo, kjónté Xjeen Dios, la kuítekaon ch'án kjuínchexiteyá ch'án kjónté tí kjuasote ch'án. ⁹ Mé kjuínchexiteyá ch'án, ntá kjuacha ch'án k'óna ch'án tí nkexro sinchekaá jnkochrín kaín tí chojni sinchexiteyéhe tí jehe ch'án. ¹⁰ A ntá Dios mé tsíkjich'éna ch'án nchat'á t'etooan éxi yóhe kjuák'e ch'ín Melquisedec.

Jehya jína chrókuítqeheni tí tinkáchónkini Ìnchéni

¹¹ Chóntani nchónhya nkehe chróchrónkani kuénte tíha, kjánchó imá xra chróchrónkaxínni tíha kixin tiénxinhyará jahará. ¹² Ntá k'uátsínka nchónhya tiempo, a ntá ó jína chrók'ónará maestro, ntá náhi kixin naxa t'ichjánxinhanrá nkexro chrókjuakohará inaá tí nkehe xrahya kuénte itén Dios. Éxi xík'ónará lontírá, t'ichjánxin chrók'uirá tsjen inaá kixin xitjahya sinterá nkehe cha. ¹³ A ntá tí sín it'i tsjen ó, na mé yóhe chánjan takí

* 5:5 Salmo 2.7 † 5:6 Salmo 110.4

tsjachahya sín tsjeyá sín nkexrí chrók'uejó sín jína. ¹⁴ Á ntá tí nkehe cha mé ine tí chojni nteto kixin ó nohe sín tí nkehe jína la ko tí nkehe jínahya.

6

¹ Naᵗa chrókjueyáni kixin jína chrókjuenkayáxinni éxí chojni nteto. Chróchenkahyani tí jahará ijie tí nkehe kánhyó xᵗa tsíxarakohará tí xrankíxixín kuènte Cristo. Náhi. T'ichjánxinhya naᵗa chrókjuakoharáni kixin chrókuítóherá tí jiē k'uékjásinrá chrók'uénxinrá, la ko nkexrí chrókuinkachónkirá Dios, ² la ko nkexrí chrókuikite chojni, la ko nkexrí ts'ejotja tjará chrítaón tí sín tinkáchónki Cristo, la ko nkexrí tsoxechón chojni tsík'en, la ko nkexrí chrókuítóexín ijíe chojni. ³ A ntá tí Dios chrókjuanjón kjuachaxin la chrókjuakoni í so nkehe.

⁴ A ntá tí sín ó tsík'áyéhe sín tí xrohi, la ko ó tsjéxín sín tí nkehe kjuanjón Dios, la ko tsík'áyéhe sín tí Nchakuen Dios, ⁵ la ko kóxrjínhín sín tí nkehe jína kuènte itén Dios, la ko kónohe sín nkexrí tí kjuachaxín tsochónta tí chjasintajni chr'éxín, ⁶ a ntá tí chrókuítóhe sín Dios, í chrókuinkáchónkihya sín, ntá xitjahya tsokjan sín inaá, kixin tí xíkaha la éxí chrókjuak'enkani sín ntacruz tí Xjeen Dios inaá la ko chrókjuanoá sín ch'án nkayakon nchónhya chojni. ⁷ Éxí nonte jnkojnko vez t'aniá chrin la tsjátan la ts'óna jína, a ntá kjuacha tí sín kjuích'e xᵗa kixin Dios kjuíncheyaon ntiha. ⁸ A ntá tí t'óna ntach'í la ko kach'í la ninkehó sínkíhya la tsonínkakonhen Dios, la tí tsjixixín mé tsoche.

Tí nkehe tjejóchónhenni mé tjinkítsa kixin jína ts'ejóni

⁹ Kjónté nixjani xíkaha, kichó ni, ó noheni kixin chaxín jína tjejorá k'uitjará tí ntja tsaáxinrá. ¹⁰ Kixin Dios la jína, la ts'itjáyenhya ch'án tí xᵗa jína tjejoch'erá kixin tjuèherá kichuára, mé xíkaha kjuákoᵗxinrá kixin kjuínkítsará tí kichuára tinkáchónki Cristo la naᵗa tjejójtinkítsará sín xíkaha. ¹¹ Tjinkaonni kixin jnkojnkorá chrókjuákoᵗxinrá hasta tsjixixín kixin chontará kjuachéhe chrókjuínkítsará kichuára kixin chaxín ts'ayéhérá tí nkehe tjejochonhénra. ¹² Tjinkakonhyani kixin chrókjanrá chrókósáhará. Náhi. Tjinkaonni kixin chrókjuákoᵗxinrá éxí tí sín chaxín tinkáchónki Ìnchéni tjejóchónhen sín ts'áyéhe sín tí nkehe tsíntáchro Dios kixin tsjanjon ch'án.

¹³ A ntá Dios, tió tsíntáchro ch'án kixin tsjanjon ch'án nkehe ts'áyéhe tí ch'ín Abraham la jehó Dios k'uákjénxín asén kixin kohya nkexro antsí tjeotan chrók'uákjénxín ch'án. ¹⁴ Ntáchro ch'án kixin chaxín sincheyaon ch'án tí ch'ín Abraham la ko nchónhya chojni ts'axrjeníxín tí jehe ch'án.* ¹⁵ Ch'ín Abraham kjuák'echónhen ch'án isé kixin ts'áyéhe ch'án tí nkehe tsíntáchro Dios. ¹⁶ A ntá tió t'ákjénxín chojni ijnko nkexro la mé t'ákjénxín sín ijnko nkexro antsí tjeotan, a ntá jehó sín la náhi. A ntá ts'ákjénxín sín tí xíkaha kixin ijnko nkehe tsoxiteyá, a ntá kohya nkexro tsoxtáchro ninkehó. ¹⁷ Méxᵗa Dios k'uákjénxín ch'án asén ch'án tsíntáchro ch'án kixin chaxín tsoxiteyá, kixin tjinkaon ch'án chrókjuákoᵗxin ch'án noxín kixin chrókónohe tí sín ts'áyéhe tí nkehe tsjanjon ch'án kixin sinchexiteyá ch'án tí nkehe tsíntáchro ch'án la í tsjitóxiénhya ch'án ninkehó tíha. ¹⁸ Mé xíkaha síin yaá nkehe xitjahya ts'ixitóᵗxin, kixin Dios la xitjahya sich'ia; kixin tíha Dios nchenoexínni kixin chaxín tsoxiteyá, la mé jeheni kjuancheheni ch'án kixin chrók'uayakonhenni ch'án la ko tjejóchónhenni

* 6:14 Génesis 22.16-17

tí nkehe tsjanjon ch'án. ¹⁹ Tí tjejóchónhenni xíkaha la jína ts'ejó asénni éxí yóhe tí ntabárcó chóna gancho tjechrúéxin kixin kohya nketí sátsji. Méxra xíkaha kjaxin tí nkehe tjejóchónhenni la sátsíkji hasta nóton tí ka cortina tje nkaxenhen njnko tje nkaya nkajní, ²⁰ tí senó k'uixenhen Jesús kuakitjehe ch'án ijnko ntja ts'ixenxínni. Mé xíkaha jehe ch'án k'óna ch'án nchat'á t'etóan jnkochríxín éxí yóhe kjuák'e tí ch'ín Melquisedec.

7

Ch'ín Jesús mé nchat'á éxí yóhe k'uéjkak'e ch'ín Melquisedec

¹ Tí ch'ín Melquisedec mé k'ué rey kuènte chjasin Salem la ko nchat'á kuènte Dios tje nkaya nkajní. A ntá tió ch'ín Abraham kjanxin ch'án tí tsíkikjanjonko ch'án tí í so sín rey, kjuacha ch'án, ntá ch'ín Melquisedec kjuixinhin ch'án ntja ikui ch'ín Abraham, ntá jehe ch'ín Melquisedec kjuíncheyaon ch'án tí ch'ín Abraham. ² A ntá tí ch'ín Abraham chjéhe ch'án tí ch'ín Melquisedec diezmo kaín xín nkehe tsíkjača ch'án tí tsíkikjanjonko ch'án tí sín rey.* A ntá ihnié ch'ín Melquisedec mé t'axrjéxin saoxín kixin “ijnko rey jína”; a ntá jehe ch'án k'ué rey kuènte chjasin Salem, tíha mé t'axrjéxin kixin “kjuaxróxin”, la mé xíkaha jehe ch'án mé “ijnko rey tjanjon kjuaxróxin”. ³ A ntá ch'ín Melquisedec la noehya sín nkexro ité ch'án la ko nkexro iné ch'án la ko nkexro tsík'axrjeníxin ch'án; la ko noehya sín nkesá tsikokjíhi ch'án la ko nkesá tsík'en ch'án. Mé xíkaha tóyóhe tí Xjeen Dios kixin jehe ch'án mé ijnko nchat'á jnkochríxín.

⁴ A ntá jie, tsjehérá kixin imá t'etóan tí ch'ín Melquisedec kixin tí ch'ín Abraham k'uaxrjeníxinni, la tsíchjéhe ch'án tí ch'ín Melquisedec diezmo tí nkehe tsíkjača ch'án tí tsíkjanjonko ch'án tí sín rey. ⁵ Éxí nixja ley tsík'etóan ch'ín Moisés, kixin tí sín nchat'á tsík'axrjeníxin tí ch'ín Leví chóna sín kjuachaxin tsjanchehe sín kaín xín chojni diezmo kjónté naxa kjéhya sín, tsík'axrjeníxin sín tí ch'ín Abraham éxí tí jehe sín. ⁶ A ntá ch'ín Melquisedec, kjónté tsík'axrjeníxinhya ch'án tí ch'ín Leví, na mé kjuích'ehe ch'án cobra tí ch'ín Abraham, mé tí ch'ín tsík'áyéhe tí nkehe tsintáχρο Dios. Mé xíkaha tí ch'ín Melquisedec tsíkjincheyaon ch'án tí ch'ín Abraham. ⁷ Kohya nkexro tsontáχρο kixin chaxínhya kixin tí nkexro ncheyaon la antsí má t'etóan, a ntá tí nkexro tsíkóyaon la t'etóanhya. Náhi. ⁸ A ntá tí tjejóni, tí sín t'áyéhe tí diezmo la mé chojni ts'en ó. Kjánchó ntáχρο tí xroon itén Dios kixin tí ch'ín Melquisedec mé ijnko chojni naxa tsík'enhya, la naxa tjechón. ⁹ Mé t'axrjéxin kixin ch'ín Leví la ko kaín xín tí sín nchat'á tsík'axrjeníxin ch'án, mé tí sín t'áyéhe sín diezmo jie, la mé kjaxin jehe sín tsíkjenkehe sin diezmo tí ch'ín Melquisedec tió tsíkjenka ch'ín Abraham, ¹⁰ kixin naxa tjiko cuerpo kuènte ch'án tí sín ts'axrjeníxin ch'án, naxa kokjéhya sín tió xeta ch'án tí ch'ín Melquisedec.

¹¹ Tí sín nación Israel tsík'áyéhe sín tí ley kixin tí sín nchat'á levita, mé tsík'axrjeníxin sín tí ch'ín Aarón. A ntá jie tí chaxín chrókjuacha sín chrókjuentoá sín tí sín tinkáchónki tí ley, la í t'ichjánxinhya naxa chrókónoxín í jnko nchat'á í chrókóyóehya éxí tí ch'ín Aarón. A ntá kjuachahya sín xíkaha ntá t'ichjánxin chrókónoxín ijnko nchat'á chrókóyóhe éxí tí ch'ín Melquisedec. ¹² A ntá tí chrók'uixinkí tí nchat'á la kjaxin chrók'uixinkí tí ley. ¹³ A ntá tí xroon itén Dios chrónka tíhi kuènte

* 7:2 7.1-2 Génesis 14.17-20

Ïnchéni. A ntá jehe ch'án la tsík'axrjeníxin ch'án í jnko nkexro kuènte Israel la kohya ninkexró tsík'óna nchat'á tsík'axrjeníxin tí sín a. ¹⁴ Kíxin ó noxín kíxin Ïnchéni tsík'axrjeníxin ch'án tí ch'ín Judá, a ntá ch'ín Moisés la chrónkahya ch'án ninkehó kuènte tí sín ts'axrjeníxin tí ch'ín a tió nixja ch'án kuènte tí sín nchat'á.

¹⁵ A ntá tíhi la antsí má kónoxín kíxin tí nchat'á nixin la tóyóhe éxi ch'ín Melquisedec ¹⁶ kíxin tió k'óna ch'án nchat'á la jehya kíxin xikaha chrók'uetoan ijnko ley kíxin nkexro chrók'uaxrjeníxin ch'án. Náhi. Ó jehí k'óna ch'án nchat'á kíxin tí kjuachaxin chóna ch'án la xitjahya ts'itjáyán. ¹⁷ Kíxin nixja Díos kíxin nkexrí tjen tí jehe ch'án, ntáchro kíxin:

Jaha mé ijnko nchat'á tsjak'e jnkochrínín,
éxi yóhe k'uékjak'e ch'ín Melquisedec.†

¹⁸ Méxra tí nkehe k'uék'etoan senó mé ch'ehya xra jie kíxin kánhyó kjuachaxin k'uéchóna la ko kjuachahya, ¹⁹ kíxin tí nkehe k'uetoan ch'ín Moisés kjuachahya kjuínchetjóá ninkehó nkehe. A ntá jie chóntani ijnko nkehe antsí jína tjejóchónhenni kíxin tíha mé antsí jína tsochjinexinni Díos.

²⁰ A ntá tió ntáchro Díos tíha la tsík'ákjenxin ch'án asén ch'án jehó ch'án. ²¹ La ntá tí í so nchat'á, tió tsíkónoxín sín, tsík'ákjenxinhya Díos asén ch'án. A ntá tió tsíkónoxín tí nchat'á i la Díos tsík'ákjenxin ch'án asén ch'án. A ntá ntáchro xroon itén Díos kíxin:

Ïnchéni tsík'ákjenxin asén ch'án
a ntá ts'ixitóxinhya tí nkehe tsíntáchro ch'án:
“Jaha mé ijnko nchat'á tsjak'e jnkochrínín
éxi yóhe k'uékjak'e ch'ín Melquisedec.”‡

²² Méxra ch'ín Jesús ntáchro kíxin tí pacto t'etoan ch'án la antsí má jína, a ntá tí pacto senó la náhi. ²³ Ntá k'uúxin nchónhya sín nchat'á, kjánchó nkák'en sín, ntá xitjahya naxa chrókjuich'e sín tí xra a. ²⁴ A ntá ch'ín Jesús la ts'enhya ch'án la t'ichjánxinhya kíxin í jnko nkexro chrókuakja tí xra kuènte ch'án chrók'óna nchat'á. ²⁵ Méxra jehe ch'án tsjacha sinchekaá ch'án jnkochrínín tí sín tsochjinehe Díos kíxin tinkáchónki sín tí jehe ch'án kíxin itjen ch'án jnkochrínín chrónóhe ch'án Díos kíxin chrókjuinchekaáni ch'án.

²⁶ Mé xikaha Jesús mé tí nchat'á t'etoan t'ichjánxinhinni; jehe ch'án mé ijnko nkexro tjóá, chóntahya ninkehó jie, la ko tjenkákjanhya ch'án tí sín tjasin jie, a ntá sákjuí ch'án nkaya nkajní. ²⁷ Ntá tóyóehya tí í so nchat'á t'etoan, kíxin t'ichjánxin ts'óyán sín iko tsjanjon sín tsochjéhe sín Díos kaín yaon, saoxín kíxin tí jie kuènte sín, a ntá chr'éxin kíxin tí jie chóna tí í so chojni. A ntá ch'ín Jesús jnkokoqaxón vez kjuanjon asén ch'án ik'uén ch'án. ²⁸ Tí ley k'uék'etoan ch'ín Moisés t'etoan kíxin chojni naxa chóna jie chrók'óna nchat'á, a ntá Díos tsík'ákjenxin asén ch'án tió kjuixin k'óna tí ley, ntáchro ch'án kíxin tí Xjeen ch'án mé ts'óna nchat'á t'etoan kíxin jína kjuínchexiteyá ch'án jnkochrínín.

8

Ch'ín Jesús nixjaxin ch'án ijnko pacto nixin

¹ Tí nkehe antsí má tjeoan chrónkani la mé tíhi kíxin tí nchat'á kuènteni mé t'etoan ch'án, la ko tjetjaxin ch'án nkaya nkajní, nó chjina tí trono t'etoanxín Díos, ² k'óna ch'án nchat'á tí nínko chaxín tsíkjich'éna Ïnchéni,

la jehya chojni tsíkjich'éna tíha. ³ Kaín nchat'á t'etōan tsík'áyéhe xra kixin tsjanjon nkehe la ko iko its'en. Méxra Jesucristo t'ichjánxin kixin tsjanjon ch'án ichrén nkehe. ⁴ Tí chrókjuak'e ch'án chjasintajni, chrók'ónahya ch'án nchat'á kixin naḡa siín nchat'á tjanjon nkehe k'ueṭōan tí ley tsík'áyéhe ch'ín Moisés. ⁵ A ntá tí sín nchat'á k'ueṭōan nkehe tóyóhó tí nkehe siín nkaya nkajní. Noheni kixin tóyóhó kixin tió ch'ín Moisés chrókjuich'éna ch'án ninko la ntáche Dios tí jehe ch'án kixin: “Tjenkayáxian jína, a ntá sích'éna jaha éxí tí nkehe kjuákuáxian chrítaón jna.”* ⁶ A ntá tí nchat'á t'etōan kuènteni tjech'e ch'án xra antsí jína kixin jehe ch'án mé tí nkexro nixjxin tí pacto nixin tsintácho Dios chrónka tí nkehe jína tsonhen chr'éxin.

⁷ A ntá tí pacto tsík'etōan saoxín la tí chróxiteyá jína, la t'ichjánxinhya chrók'óna yóxin pacto. ⁸ A ntá Dios k'uikon kixin kjuínchexiteyáhya tí sín a, éxí ntácho xroon itén Dios kixin:

Ntácho Ìnchéni kixin: Itsi ijnko yaon

mé tsjánjuan ijnko pacto nixin tsochóna tí sín nación Israel la ko tí sín chjasin Judá.

⁹ Jehya xikaha tí pacto kuétuñhan tí sín tsík'axrjenixinrá ósé, tí yaon kjuínkita sín k'uaxrjexín sín tí nación Egipto; kjánchó kjuínchexiteyáhya sín tí pacto kuétuñhan sín, méxra kuitōḡa sín, ichro Ìnchéni.

¹⁰ Tí pacto tsétuñhan tí sín chjasin Israel tió ts'atsínka tí yaon a, mé xikaha tíhi, ichro Ìnchéni:

Sintaxráinkavan asén sín tí ley tsétōan,

a ntá tí kjuaxrexinkaon kuènte sín tsokjian tí nkehe tsétuñhan sín.

A ntá janhan ts'óna Dios kuènte sín,

a ntá jehe sín mé ts'óna chjasin kuéntana.

¹¹ Ts'ichjánxinhya naḡa tsjakōḡe kichó sín

kixin chróchóxin sín Ìnchéni,

kixin kaín sín tsochóxinna sín,

kjonté chojni imá ntsínsí la ko chojni imá hyé.

¹² Sintak'itjayan tí nkehe jínahya kjuích'e sín

la ko í toxráinkakonhya inaá tí jie chóna sín.†

¹³ Xikaha nixja Dios kuènte tí pacto nixin ts'etōan ch'án kixin tsikóntaxin tí pacto saoxín k'ueṭōan ch'án, tíha mé tinkákóntaxin la ko tinkákjeje, na í séhya ts'itjayan.

9

Tí ninko chjasintajni la ko tí ninko nkaya nkajní

¹ A ntá tí pacto saoxín t'etōan nkexrí chrórxaxinkaonni Dios, kixin tí ninko ntihyó chjasintajni. ² A ntá tí ninko k'ueṭjak'e mé tí cuarto saoxín k'ueṭkinchek'in sín tí Cuarto Tjóá, tí kjuák'e tí candelero la ko tí mesa tjejókjen tí niotja k'ueṭrxaxinkakonxín sín Dios. ³ Nóton tí yóxin ka cortina kjuák'e tí cuarto k'ueṭkinchek'in sín tí Cuarto Antsí Tjóá. ⁴ Ntiha k'ueṭjak'e tí altar tsík'óna chica oro k'ueṭjakaxín sín tí chjincō la ko k'ueṭjak'e tí ntacajón chr'ísimá chica oro tjenkáya tí pacto. Nkaxenhen tí ntacajón k'ueṭjak'e ijnko nchésen tsík'óna chica oro k'ueṭ'inka maná k'óna niotja, la ko kjaxin k'ueṭjak'e tí nta k'ueṭjixín ch'ín Aarón kjuankixin k'uayan

* 8:5 Éxodo 25.40 † 8:12 8.8–12 Jeremías 31.31–34

nta ntahte, la ko kjaxin ntiha kjuák'e tí xro chóna tí tan k'ueṭoan Dios. ⁵ Chriáon tí ntacajón k'uék'ejó yaá ángel tsíkjanoya tsíkientoá kanenee chriáon tí kjuák'e tí kjuachaxin kuente Dios; ntaha k'uékjünxín tí jie k'uechóna chojni. A ntá jie la t'ichjánxinhya naṣa tsonixjani kuente tíha.

⁶ A ntá xikaha k'uejó tí nkehe a, a ntá tí sín nchať'á jnkoyaxón t'ixenhen sín tí cuarto saoxín kuente nínko kixin tí xra ch'e sín kuente nínko. ⁷ A ntá tí yóxin cuarto jehó tí nchať'á t'etōan t'ixenhen ch'án jnkokoá vez jnkojnko nánó; a ntá tí t'ixenhen ch'án t'ichjánxín ts'ixenko ch'án ijnié iko tsochjéhe ch'án Dios tsotjuáxin ijie ch'án la ko ijie tí i so chojni. ⁸ A ntá tí Nchakuen Dios nchenoexínni tíhi kixin nachrohe k'uékjich'e xra tí cuarto saoxín la naṣa tjexrankehya kixin chrók'uixenhenni tí Cuarto Antsí Tjóá. ⁹ Kaín tíha tjakoxín ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyán sín xitjahya nchenoexín sín kixin á chaxín kótjóá tí jie k'uechóna sín kixin xikaha k'uéxaxinkaon sín Dios. ¹⁰ A ntá tíha jehó t'etōan kuente tí nkehe chrókjóna sín la ko tí nkehe chrók'ui sín la ko tí chrók'ónti sín kixin chrókótjuáxin ijie sín, kaín tíha mé k'uítuenhen sín kuente cuerpo ó la jehó k'uechóna kjuachaxin tí naṣa kjuinkíhya Dios nkexrí chróxaxinkaon sín ch'án.

¹¹ A ntá ó kui Cristo, jehe ch'án mé nchať'á t'etōan kuente tí nkehe antsí jina itsi. A ntá tí nínko ch'e ch'án xra la antsí jina la ko antsí ntoá, la jehya chojni tsíkjach'éna tíha kixin jehya chjasintajni ntihi tjen. ¹² Tió k'uíxnenhen Cristo tí Cuarto Tjóá, la jehya kixin chrókjuanjon ch'án ijnié kotentso la ko ijnié koxintáxjan. Náhí. Ijnié ch'án kjuanjon ch'án; mé xikaha k'uíxnenhen ch'án jnkokoá vez ntiha mé xikaha kjuenka ch'án kixin chrókuaáxinni jnkochrín. ¹³ A ntá tí ijnié koxinta la ko ijnié kotentso la ko tí nteso kuente tí koxintáxjan tsíchexín tí altar tikitexín tí sín tjuáhya la mé tíha chóna kjuachaxin tsotjuáxin tí chriáon ó. ¹⁴ A ntá tí xikaha, la kjá antsí má chóna kjuachaxin tí ijnié Cristo. Kixin tí kjuachaxin Nchakuen Dios tjen jnkochrín, la Cristo kjuanjon asén ch'án ik'uén ch'án k'uáyéhe Dios, la jehe ch'án la ninkehó jie chónahya ch'án. A ntá ijnié ch'án nchetjóá tí nkehe kjuich'eni senó chrók'uenxínni kixin ntá jie la jina chrókjuich'eheni xra Djos tjechón.

¹⁵ Méxra Jesucristo nixjaxín ch'án tí pacto nixin k'ueṭoan Dios. Kixin k'uenyákonhenni Cristo ntá tsotjuáxin tí jie kjuasinni kjuínchexiteyáhyani tí pacto k'uítuenhenni senó; kixin tí sín k'uíyehé Dios la jina chrók'uáyéhe sín tí nkehe tsjejhya kixin jehe ch'án xikaha tsintáchro ch'án tsjanjon ch'án. ¹⁶ A ntá tí siín ijnko nkehe tsintáchro ijnko chojni kjuák'e na ntá ik'uén la t'ichjánxín tsonoxín kixin chaxín tsík'en tí nkexro tsíkjach'éna. ¹⁷ A ntá tí nkehe tsintáchro ch'án la sínkíhya tí naṣa tjechón tí nkexro tsíkjach'éna; jehó tió chrók'uen ch'án mé sínkí. ¹⁸ Méxra tí pacto xrankixixín tsík'etōan Dios kjuankíxin kjuích'e xra kixin k'uítji ijni. ¹⁹ Ch'ín Moisés tsíchronka ch'án kaín nkehe tsík'etōan tí ley kuínhin kaín tí chojni; a ntá chr'éxin kuákja ch'án ichjoén kolélo kjátse la koí ntarama hisopo, ntá kjuínchekjatjaxín ch'án ijnié koxintáxjan la ko ijnié kotentso tsíkjiko inta, ntá kuikjanjin ch'án tí libro chóna ley la ko kuikjanjin ch'án kaín tí chojni. ²⁰ A ntá ntáchro ch'án kixin: “Tí jni i tsoxiteyáxin tí pacto k'ueṭoan Dios chrókjuinchexiteyéherá jahará.”* ²¹ Tí ch'ín Moisés kjaxin kuikjanjin ch'án jni tí nínko la ko kaín nkehe t'ichjánxín tí nkaxenhen nínko. ²² Kixin

* 9:20 9.19–20 Éxodo 24.6–8

xikaha ntáchro tí ley kixin kaín nkehe la chrókótjuáxin tí jni; a ntá xitjahya chrókótjóá tí jie tí chrók'uíxikjanjinhya jni.

Tí ik'uén Cristo mé tsjinín ijiéni

²³ Méxra t'ichjánxin kixin ik'uén iko kótjuáxin tí nkehe a, táha mé tóyóhó tí nkehe síin nkaya nkajni; a ntá tí nkehe chaxín kuènte nkaya nkajni t'ichjánxin ijnko nkehe antsí jina chrók'uen. ²⁴ A ntá Cristo k'uixenhya tí njnko tsíkijich'énaxín chojni tja, táha mé ijnko nkehe tóyóhó tí njnko chaxín. Náhi. Jehe ch'án mé k'uixenhen ch'án tí nkaya nkajni, a ntá jie mé tjen ch'án tí tjen Dios nijaxín ch'án kaín ni. ²⁵ A ntá jehe ch'án la jehya jnkoyaxón k'uixenhen ch'án ntiha k'uenyákonhenni ch'án. Náhi. A ntá tí nchat'á t'etoan t'ixenhen tí Cuarto Tjóá jnkojnko nánó kixin tsjanjon ch'án ijnjé ko ó. ²⁶ A ntá tí xikaha chrókónhen Cristo la t'ichjánxin kixin jnkoyaxón chrók'óyán sín ch'án desde tí k'óna tí chjasintajni. A ntá jie la ó chjina, tsjixraká tsjeje chjasintajni, a ntá kónoxín Cristo la ik'uén ch'án jnkokoá vez kixin tsjinín ijiéni. ²⁷ Mé xikaha kaín ni its'enni jnkokoá vez, a ntá chr'éxin tsitoxén ijiéni. ²⁸ Mé xikaha kjaxin Cristo jnkokoá vez ik'uén ch'án kixin tsjinín ijié nchónhya chojni. A ntá chr'éxin itsi ch'án inaá, jehya kixin naxa tsjatsen ch'án ijié chojni. Náhi. Sinchekaá ch'án tí chojni ó tsíkótjóá tjejóchónhen itsi ch'án.

10

¹ A ntá tí ley k'uetoxán ch'in Moisés la tóyóhó tí nkehe jina tsi la jehya tí nkehe chrókuaáxinni. Méxra tí ley kjuachahya kjuínchetjóá tí sín kóchjinehe Dios kjuanjon sín iko its'en jnkojnko nánó. ² A ntá tí chrókjuacha tí ley chrókjuínchetjóá ijié sín, ntá chrókjuenkayáxinhya sín kixin naxa chróchóna sín jie, la chrókuítche sín, í chrókjuanjonhya sín iko its'en. ³ A ntá xikaha ich'e sín t'óyán sín ko, la jnkojnko nánó xraxinkakonxín sín tí jie tsíkjasin sín ⁴ kixin ijnjé koxinta la ko ijnjé kotèntso xitjahya tsjinín ijié chojni.

⁵ A ntá tió Cristo kui chjasintajni ntáche ch'án Dios kixin: Tjinkákonhya jaha iko its'en la ko tjinkákonhya jaha ninkehó nkehe chrók'uayéhé. Náhi.

Jaha tsíkijich'ena ijnko cuerpo kixin tsochonta janhan.

⁶ Jaha tóxrjánhya iko tsichján la ko tí í so nkehe chrókjuanjonni chrókjuakjinxian ijie.

⁷ A ntá ntátjan ch'án kixin: “A ntá ijie la ntihi tjén janhan kixin sintaxiteyá tí nkehe tóxrjínhan jaha Dios,

éxi nijxa xroon chrónka nkexrí chrókjuít'a.”*

⁸ Senó ntáchro kixin Dios tjinkakonhya la ko tóxrjénhya ch'án iko its'en chrókjuanjonni la ko ninkehó nkehe chrókjuanjonni chrókjuínxín ijiéni kjónté tí ley k'uetoxan kixin xikaha chrókónhen. ⁹ A ntá chr'éxin tsintáchro kixin: “A ntá k'uinka janhan kixin sintaxiteyá tí nkehe tóxrjínhan jaha Dios,” ichro ch'án. Mé xikaha kjuatsen ch'án tí ko k'uék'óyán sín ósé, a ntá jehe ch'án kjuanjon ch'án ijnko nkehe njxin. ¹⁰ Dios kjuínchetjuáxinni kixin Jesucristo kjuínchexiteyá éxi tóxrjínhin Dios kixin tí cuerpo kuènte ch'án kjuanjon ch'án ik'uén ch'án jnkokoáxón vez para jnkochrín.

¹¹ A ntá kaín nchat'á judío tí xra ch'e sín jnkojnko yaon la jnkokón nkehe its'en tjanjon sín kjánchó tíha la xitjahya tsjinín ijié chojni. ¹² A

* 10:7 10.5–7 Salmo 40.6–8

ntá Jesucristo mé jnkokoá vez k'uenyákonhenni ch'án kixin tsotjuáxin ijjéni la tíha mé sich'e xra jnkochrín. A ntá kjuixin ntá sákjuí ch'án kjuák'etjaxín ch'án nó tí tja chjina kuènte Dios. ¹³ A ntá ntiha tjechónhen ch'án tsjixinjian kain tí sín nínkakonhen ch'án tsjachahya sín ts'etoan sín. ¹⁴ Mé xikaha jnkokoá nkehe kjuích'e ch'án chjéhe ch'án Dios, kixin jína ts'ejó tí sín ó tsikótjóá. ¹⁵ A ntá tí Nchakuen Dios nchenoheni tíhi kixin senó tsíntáchro kixin:

¹⁶ Tí pacto tsotjahá tí jehe sín tió ts'atsínka tí yaon a, ichro Ìnchéni; Sntaxráinkavan asén sín tí ley tsétoan,

a ntá tí kjuaxrexinkaon kuènte sín tsokjian tí nkehe tjínkavan. †

¹⁷ Kjaxin ntáchro kixin:

Í toxráinkakonhya inaá tí ijjé sín la ko tí nkehe jínahya kjuích'e sín. ‡

¹⁸ Mé xikaha tí ó kótjóá ijjéni la t'ichjánxinhya í so nkehe chrókjuanjoni chrókótjuáxin tí ijjéni.

Méxra t'ichjánxin tsqchjineheni Dios

¹⁹ Kíchóni, a ntá la í kohya kjuachrakon ts'ixenhenni tí Cuarto Antsí Tjóá tí tjen Dios kixin kjuachaxién ijnié Jesucristo, ²⁰ chréheni tí ntja njxin mé tí ntja tjechón kuakitjehe ch'án nóton tí ka cortina, tíha mé tí cuerpo kuènte ch'án. ²¹ Jesús mé tí nchat'á tjetooan kuènteni t'etoan tí ntoe Dios. ²² Méxra xikaha chrókóchjineheni Dios kain asénni chrókuinkáchónkini ch'án chaxín kixin jehe ch'án tsíkjinchetjóá ch'án asénni kixin chrókjuenkayáxinhyani kixin naxa chóntani jie kixin tí cuerpo kuènteni kótjuáxin tí nta jehó. § ²³ Chrókuítqehyani chrók'uejóchónhenni tí nkehe tinkáchónkini kixin Dios la chaxín sinchexiteyá ch'án tí nkehe tsíntáchro ch'án. ²⁴ Chrókjueyáni nkexrí chrókjuinkítsani kíchó ni kixin chrótjuèheni kíchó ni la chrókjuich'eni tí nkehe jína. ²⁵ Chrókuítqehyani chrókójkotséni, chrókóyqehyani éxí tí sín í tójkotséhya sín. Náhi. Chrókjuinchehéheni kíchó ni antsí má jie kixin ó noheni kixin í séhya tsokjan Ìnchéni.

²⁶ A ntá tí naxa chrókjuenkayáxinni chrókjuasinni jie tí ó noheni tí nkehe chaxín, la kohya í jnko nkexro chrók'uenyákonhenni chrókótjuáxin tí jie chóntani. ²⁷ A ntá jehó itjen tí kjuachrakon jie tsitoxín jie la ko tí xrohi tjeche ts'itjáyaxín tí sín nínkakonhen Dios. ²⁸ A ntá tí tjen jnkojín nkexro titekakonhya tí ley k'uetqanxín ch'ín Moisés, la tsonoxín yaá o y'á tí sín tsík'ikon tí jie tsíkjasin sín, tíha mé ts'enxín sín la kohya nkexro tsjikonóhehe tí jehe sín. ²⁹ ¿Á tjenkayáxinhyará kixin antsí má chrókjuasóte tí sín kuítekakuenhya tí Xjeen Dios la ko chóntehya sín kjuasáya tí ijnié ch'án la ko t'ántaxínhin sín tí Nchakuen Dios tjuèheni? Kixin tí jni chrónkaxín kixin ts'etqanxín tí pacto la ko tí jni k'ujmáxinni. ³⁰ Noheni kixin tsíntáchro Ìnchéni kixin: “Janhan mé tóna tocar sintakitqaxián ijjé chojni la ko janhan tsjénkahá sín.”* Kjaxin tsíntáchro kixin: “Ìnchéni sinchekitqoxín ijjé tí sín tinkáchónki ch'án.” † ³¹ Méxra kjuachrakon jie chrók'uanótjenyáni tí tja Dios tjechón.

³² A ntá chróxráinkáonrá jahará tí nkehe tsíkónhen ósé kixin tió jahará nantá tsík'ayéhérá tí nkehe t'inkaséyan, a ntá kjuachará kjónté tí nchónhya nkehe tsíkónhanrá. ³³ A ntá jnkojín tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín

† 10:16 10.16-17 Jeremías 31.33-34 ‡ 10:17 10.16-17 Jeremías 31.33-34 § 10:22 Ezequiel 36.25 * 10:30 Deuteronomio 32.35-36 † 10:30 Deuteronomio 32.35-36

la kjuínkítsa tí sín tsík'ekon. ³⁴ A ntá jahará kuikonóehérá tí sín tjejóchjina ntóechiso, a ntá jahará kóninkákonhyará kjónté k'uaxrjahará kaín nkehe chontará, kixin ó nohará kixin nkaya nkajní chontará nkehe antsi jina chónhya tsjeje. ³⁵ Chrókuítóehyará tí nkehe tinkachónkirá kixin ó nohará kixin tíha mé ts'ayéxinrá nkehe chr'éxin. ³⁶ Kjaxin jahará t'ichjánxin chrók'uejochonhénrá chrókóninkákonhyará kjónté ichrén nkehe chrókónhanrá, kixin sich'erá tí nkehe tjinkaon Dios, kixin xikaha chrók'uayéhérá tí nkehe tsintáchro tí jehe ch'án. ³⁷ Kixin xikaha ntáchro xroon itén Dios kixin:
Kánhyó sé

itsi tí nkexro tsi, í sinchexrjenhya.

³⁸ Tí sín kótjóá asén mé tjejóchónxin sín kixin tinkáchónki sín Dios;

a ntá tí sín tsítóhe tí janhan la í tsóchànahya tí xikaha ch'e sín. †

³⁹ Kjánchó jeheni jehya xikaha chrókuítóheni chrókuinkáchónkihyani tí jehe ch'án kixin ntá chrókjuasinni jie chrók'uitjáyánxinni. Náhí. Tinkáchónkini ch'án la tíha chrókuaáxinni.

11

Tí fe

¹ Tí fe chóntani la mé noexínni chaxín kixin tsoxiteyá ts'áyéheni tí nkehe tjejóchónhenni, la ko noexínni chaxín kixin kjónté ijnko nkehe t'ikonhyani la chaxín tjen. ² Tí sín tsík'axrjeníxinni ósé la kóxrjínhin Dios kixin k'uéchónta sín fe.

³ Tí fe mé noexínni kixin Dios tsíkjich'éna kaín nkehe tí kjuachaxin tí nixja ch'án la ko noexínni kixin tí nkehe t'ikonni mé tsík'óna tí nkehe t'ikonhyani.

⁴ A ntá tí fe k'uéchónta ch'ín Abel mé k'óyán ch'án ijnko kolélo ch'éhe ch'án Dios. Tíha ijnko nkehe antsi jina kjuanjón ch'án, a ntá tí nkehe tsíkjanjón ch'ín Caín la náhí. Méxra Dios kóxrjínhin tí nkehe kjuanjón ch'ín Abel ntá ntáchro Dios kixin jina tí ch'ín a. Kjónté ó tsík'en ch'ín Abel la tí nkehe tsíkjich'e ch'án naxa tjakoxin kixin jina tí fe k'uéchónta ch'án.*

⁵ A ntá tí fe k'uéchónta ch'ín Enoc la Dios sátsíkjiko tí jehe ch'án la k'uénhya ch'án, a ntá k'uitjahya sín ch'án kixin Dios sátsíkjiko. Naxa sákjuihya ch'án la xráxin kóxrjínhin Dios nkexrí k'uékjak'e ch'án. † ⁶ A ntá tí chróchóntahyani fe la xitjahya chrókuinchechéheni Dios, kixin t'ichjánxin kixin tí sín chrókóchjinehe sín Dios chrókuitekaon sín kixin chaxín itjen ch'án la ko jehe ch'án tsjenkehe ch'án tí sín xritjeyá sín tí jehe ch'án.

⁷ A ntá tí fe k'uéchónta ch'ín Noé tí Dios chénka tí jehe ch'án tí nkehe naxa k'uikonhya ch'án tsonhen, la kuítekaon ch'án kjuich'éna ch'án ntabárcó kixin tsaáxin ch'án la ko tí sín naxa kjéhya ch'án. Tí fe k'uéchónta ch'án kjuakoxin kixin tí í so chojni chjasintajni la jínahya sín tsjasóte sín. A ntá kóxrjínhin Dios tí jehe ch'án kixin kuítekaon ch'án la tí xra kjuich'e ch'án mé kuaáxin ch'án. †

⁸ A ntá tí fe k'uéchónta ch'ín Abraham tí k'uíyehé Dios tí jehe ch'án la kuítekaon ch'án sákjui ch'án tí nonte tsjanjón Dios ts'áyéhe ch'án, ntá k'uaxrjexín ch'án chjasén ch'án kjónté noehya ch'án nketí nó sátsji ch'án. § ⁹ A ntá tí fe k'uéchónta ch'án k'uékjak'e ch'án tí nonte chrókjuanjón Dios, éxi jehya nontee ch'án tíha. Kjuák'e ch'án nchia tsík'óna ka, la

† 10:38 10.37-38 Habacuc 2.3-4 * 11:4 Génesis 4.3-10 † 11:5 Génesis 5.21-24 † 11:7

Génesis 6.13-22 § 11:8 Génesis 12.1-5

ko kǵaxin xikaha k'uéchónta ch'ín Isaac la ko ch'ín Jacob la ko kǵaxin jehe sín tsík'áyéhe sín tí nkehe tsíntáchro Dios.* 10 A ntá ch'ín Abraham k'uékjak'echónhen ch'án tí chjasin tsíkjich'éna Dios ts'ítjáyanyha.

11 A ntá tí fe k'uéchónta tjan Sara kjónté ó nána tjan, k'uáyéhe tjan kjuachaxin sich'éna tjan ijnko xjan; a ntá kjuíuch'éna tjan ijnko xjan kixin kuítekaon tjan kixin Dios sinchexiteyá tí nkehe tsíntáchro ch'án.† 12 Kǵaxin xikaha ch'ín Abraham, kjónté ó mero chrók'uen ch'án kixin ó táda ch'án, la k'uaxrjeníxin ch'án nchónhya chojni éxi konotsé síin nkajní o éxi nchesen síin chrínta ntayaon, xitjahya ts'ekini.‡

13 A ntá kaín tí chojni a ik'uén sín k'uáyèhya sín tí nkehe tsíntáchro Dios kixin chrók'uáyéhe sín, a ntá k'uéchónta sín fe, la kjónté ikjín k'uikon sín la ko kuítekaon sín kóchéhe sín. Mé xikaha k'uéchónka sín kixin tí chjasintajni jehya chjasén sín. 14 Mé xikaha k'uénixja sín la tienxínni jína kixin naxa xritjeyá sín nketí chrók'óna chjasén sín. 15 A ntá tí chrórxaxinkaon sín tí chjasin tsík'axrjexín sín ntá jína chrókjan sín ntiha ínaá. 16 Kjánchó tjinkaon sín ijnko chjasin antsí má jína, tíha mé chjasin nkaya nkajní. Méxra Dios la tósuèhya ch'án kixin chrókjuinçek'in sín ch'án tí Dios kuénte tí jehe sín, kixin ó tjechónhen tí chjasin ts'áyéhe tí jehe sín.

17 A ntá fe k'uéchónta ch'ín Abraham kixin Dios kjuíuch'e prueba tí jehe ch'án kjuanchia tí xjeen ch'án Isaac, a ntá kjuíukao ch'án chrók'óyán ch'án, chrókjuanjon ch'án. Tjechónhen ch'án chrókjuanjon ch'án kjónté jnkokoáxón xjeen ch'án tsíkjanjon Dios§ tsíntáchro kixin: 18 “Tí ch'ín Isaac ts'axrjeníxin nchónhya xjan.”* 19 A ntá ch'ín Abraham kjuátsoan ch'án kixin Dios imá chónka kjuachaxin, la kjónté chojni tsík'en na nchexechón ch'án, la éxi yóhe chrók'uen tí xjeen ch'ín Abraham ntá chrók'uáyéhe ch'án ínaá.

20 A ntá tí fe k'uéchónta ch'ín Isaac kjuíncheyaon ch'án tí xjeen ch'án ch'ín Jacob la ko Esaú, kixin jína ts'ejó sín.† 21 A ntá tí fe k'uéchónta ch'ín Jacob tió chjina its'en ch'án kjuíncheyaon ch'án jnkojnko tí xjeen ch'ín José, a ntá tí nta tjixin ch'án kjuisójixín ch'án nixjehé ch'án Dios.‡ 22 A ntá tí fe k'uéchónta ch'ín José tió chjina its'en ch'án tsíntáchro ch'án kixin tí sín israelita la chr'éxin ts'axrjexín sín chjasin Egipto, tsík'etōan ch'án kixin tió sátsji sín la sátsjiko sín tí huesóé ch'án.§

23 A ntá tí fe k'uéchónta it'é la ko ìné ch'ín Moisés tió kokjíhi ch'án kjuak'emā sín ch'án iní nitjó kixin tsík'íkon sín kixin ijnko xjan ntoa náxrjón tsjehe ch'án, la ko chrakuenhya sín tí nkehe tsík'etōan tí ch'ín rey kixin chrók'óyán sín xjan.* 24 A ntá tí fe k'uéchónta ch'ín Moisés tió kónteto ch'án la chrohya ch'án its'in ch'án xjeen tí tjan xjeen ch'ín rey Egipto.†

25 Náhi. Kjueyá ch'án kixin kjónté chrókjuasóteko ch'án tí sín tinkáchónki Dios, la kóxrjienhya ch'án kixin séhya náxrjón chrókjuak'e ch'án chrókjuasin ch'án jje. Náhi. 26 Kjuenkayáxin ch'án kixin antsí tjetōan chrókjuasótexín ch'án tí tinkáchónki ch'án tí Cristo itsi chr'éxin, a ntá kánhyó tjetōan chróhónta ch'án kaín nkehe tjete síin chjasin Egipto. Kjuenkayáxin ch'án kixin chrók'uáyéhe ch'án tí nkehe chrókjuanjon Dios. 27 A ntá tí fe k'uéchónta ch'ín Moisés sákjuixín sín tí chjasin Egipto,‡ chrakonhya ch'án

* 11:9 Génesis 35.27 † 11:11 Génesis 18.11–14; 21.2 ‡ 11:12 Génesis 22.17 § 11:17

Génesis 22.1–14 * 11:18 Génesis 21.12 † 11:20 Génesis 27.27–29,39–40 ‡ 11:21 Génesis

47.31–48.20 § 11:22 Génesis 50.24–25 * 11:23 Éxodo 1.2; 2.2 † 11:24 Éxodo 2.10–12

‡ 11:27 Éxodo 2.15

kjónté kónínkaon tí ch'ín rey, a ntá kuítogehya ch'án tí tinkáchónki ch'án Dios kixin éxí t'íkon ch'án tí Dios ninkexró t'íkonhya.

²⁸ A ntá tí fe k'uéchonta ch'ín Moisés kjuasin ch'án tí kia pascua, k'uetōan ch'án kixin chrókuikjanjin sín jni tí puerta, kixin tí ángel t'óyan chojni chrókuincheníehya nijnko tí xjan saō kuente tí sín Israel. § ²⁹ A ntá tí fe k'uéchonta tí sín israelita k'uátōye sín tí Ntāyaon Kjátse kixin k'óna nche xámá, a ntá tió tí sín Egipto tjinkaon sín chróchréhe sín xikaha la kjánchó kjuínhin sín tí nta a.*

³⁰ A ntá tí fe k'uéchonta tí sín israelita la xítjen tí tjat'o t'inkákuènxín tí chjasin Jericó, tió kjuixin k'uántatjen sín yato yaon tí chjasin a.† ³¹ A ntá tí fe k'uéchonta tí tjan Rahab, na mé ijnko tjan k'uéchonta nchónhya chojni ntoa, ntá k'uénkohya tjan kaín tí sín jiēhe kuítékakónhya, kixin tsíkjanjon tjan kjuachaxin kixin kjuaxróxin tsíkitohe ntoe tjan tí sín israelita kjuíjtsàya sín tí chjasin Jericó.‡

³² ¿Nkehe naxa chróntáxrjan? Sintak'itjāyan tiempo naxa chrónixja kuènte ch'ín Gedeón, la ko ch'ín Barac, la ko ch'ín Sansón, la ko ch'ín Jefté, la ko ch'ín David, la ko ch'ín Samuel, la ko tí sín profeta. ³³ Kixin tí fe k'uéchonta tí jehe sín kjuacha sín k'uetōan sín jina ókjé chjasin, la ko jina kjuínchekitoexín sín ijie chojni, la ko k'uáyéhe sín tí nkehe tsíntáchro Dios kixin tsjanjon ch'án, la ko k'uikjehe sín ir'va koxra, ³⁴ la ko k'uanka tí xrohi chróchexín sín, la ko kjuachahya tí espada chrók'uenxín sín. A ntá tí sín chrakon la kófuérte sín, k'óna sín chojni tsehe kjuacha sín kjuánjonko sín tí sín soldado tsíkixin ókjé. ³⁵ Kjaxin k'uék'ixin chojni chjin k'uáyéhe inaá tí chojni tsík'en kuènte sín tsíxechón inaá.

A ntá í so sín la kjuasote sín k'uénxin sín kixin kjuínchemáhya sín kixin kuínkáchónki sín Dios kixin ó nohe sín kixin tsoxechón sín antsí jina inaá. ³⁶ A ntá í so sín kjuasote sín la nchónhya chojni kjuanoá tí jehe sín, la ko tsík'ekon sín la ko kjaxin cadena chróntetoxín sín k'uejóchjina sín. ³⁷ Í so sín la ixro k'uénxin sín, la í so sín cierra chrít'oxin sín, la í so sín la nchónhya nkehe kjuasótexín sín, la í so sín k'uénxin sín espada, la í so sín k'uék'aji sín tsík'inkáya sín tjoē kolélo la ko tjoē kotèntso, nda sín, kjuasote sín, kjuaxróxinhya la náxrjónhya k'uejó sín. ³⁸ A ntá tí sín chjasin ntiha kjuikosáyehya tí sín a la ntá k'uúnkité sín, la tí sín a la chóntahya chjasén sín la sákjuí sín nteje, la ko jna, la ko tjo síxra la ko tōye. ³⁹ Kaín tí sín a kónhen sín prueba kixin á chaxín chóna sín fe la kjónté xikaha k'uáyèhya sín tí nkehe tsíntáchro Dios kixin tsjanjon ch'án ⁴⁰ kixin Dios kjuenkayáxin ch'án ijnko nkehe antsí jina kixin jehó jnkokoá chrók'uáyèkoni sín tí nkehe tsjanjon ch'án.

12

Jehó Cristo chrókuinkáchónkini

¹ Méxra tí jeheni la tsík'antátjenni nchónhya chojni tsíkjakoxin sín tí fe k'uéchonta sín, la ntá chrókuítōhenei ntáha kaín tí nkehe t'inkákonhen, la ko tí jiē chrókuachroeni, a ntá chrókjuich'eni jina tí xra chóntani la ntá chrókjuachani antsí má chrókónoheni. ² Jehó Jesús chrókuinkáchónkini kixin jehe ch'án kjuanjon tí fe chóntani kixin jina kjuakoxin ch'án kjuínchexiteyá ch'án, la kjuasótexín ch'án tí ntacruz, la kuáhya ch'án kuentá kósuèhya

§ 11:28 Éxodo 12.21–30 * 11:29 Éxodo 14.21–31 † 11:30 Josué 6.12–21 ‡ 11:31 Josué 2.1–21

ch'án tí nkehe kónhen ch'án ik'uén ch'án, kixin nohe ch'án kixin tsjixin tsjasóte ch'án ntá náxrjón tsjak'e ch'án la ko tsqchéhe ch'án kixin tsjak'etjaxin ch'án tí tja chjina tí trono kuente Dios.

³ Méxra chrókjuenkayáxinrá jahará nkexrí kjuakoxin ch'in Jesús. Tí sín chóna jie imá kjuínchekjasóte tí jehe ch'án la kjónté jahará xikaha chrókjuasóterá la chrókóxrjéhyará chrókuinkachónkirá ch'án. ⁴ A ntá jahará naxa k'uénxinhyará tí tjanjonkoará tí jie. ⁵ ¿Á k'uitjáyánhanrá tí jahará tí nkehentaxraxinkaonrá Dios kixin éxi xjeen ch'án t'ikon ch'án tí jahará? Éxi ntáchro xroon itén Dios kixin:

Xjeenni, tóninkákonhya tí nkehe tjentuáha Ìnchéni, chrók'uaváhya tí chrókjuentuáha ch'án.

⁶ Kixin Ìnchéni mé tjentuéhe tí sín tjuèhe ch'án la ko nchekjasóte kaín tí sín ts'áyéhe ch'án ts'óna xjeen ch'án.*

⁷ Chrókuítekáonrá tí nkehe t'etqan Dios kixin Dios t'ikon kixin éxi xjeen ch'án tí jahará. ¿Á síin ijnko it'é xjan chrokJuentuéhya tí xjeen? ⁸ A ntá tí chrókjuentuáhyará Dios tí jahará éxi tjentuéhe ch'án kaín tí xjeen ch'án, ntá jahará kjá jehya xjeen ch'án chaxín. ⁹ A ntá tí naxa k'uéchánjanni, na mé it'éni ntihi chjasintajni kjuentuéhe tí jeheni, la jeheni kjuikosáyeheni sín. A ntá xikaha antsí chrókjuinchexiteyeheni It'éni tjen nkaya nkajní kixin chróchóntaxínni kjuachón. ¹⁰ It'éni ntihi chjasintajni kjuentuéheni ch'án kjónté kánhyó sé éxi nkexrí cóxrjínhjin ch'án; a ntá It'éni Dios tjentuéheni ch'án kixin jnkójina chrók'uejóni, kixin chrók'ónani tjóá kixin jehe ch'án la tjóá ch'án. ¹¹ Chaxín ninkehó xikaha chrókjuinchekjasóte Dios tí jeheni chrókóxrjínhinni tí nantá chrókónhenni kixin tí kjuatjoté. A ntá xikaha ts'itjaxínni tí kjuaxróxin éxi ijnko nkehe náxrjón kjuachani.

Tí sín tjanoá tí kjuasáyé Dios

¹² Méxra tjisójirá tí tjará tsikóxrjé la ko tóch'inrá chóntahya fuerza, ¹³ la ko chrókjuéyará tí ntja ntoá. A ntá tí totará níhi xitjahya tjixinrá chrókuitohe jina la ko chrókóníehya inaá.

¹⁴ Chrókóxakonhanrá kixin kjuaxróxin chrók'uejorá kaín rá, jnkójina tjóá chrók'uejorá. A ntá tí tjuáhya chrók'uejorá la xitjahya ts'ikonrá Ìnchéni. ¹⁵ Chrókóxakonhanrá kixin nijnkorá chrókuitoéhyará tí kjuasáyé Dios la ko nijnkorá chrók'ónahyará éxi ijnko nuèe ka tsjá chóna veneno chrókóníexín tí í so chojni. ¹⁶ Nijnko tí jahará chrókjuásinkoará jie ijnko chojni chjin ókjé, la ko chrókjóniéhyará tí nkehe tjóá éxi kjuích'e ch'in Esau, kixin jnkokoá comida kjuínchekjixin ch'án tí nkehe chróchóna ch'án kixin xjan sao jehe ch'án.† ¹⁷ Jahará ó nohará kixin chr'éxin, tió tjinkaon ch'án kixin chrókjuincheyaon it'é ch'án tí jehe ch'án la í xitjahya tsoyaon ch'án kixin kohya nkexrí chrók'uixitóxín tí nkehe tsikjich'e ch'án kjónté imá chrótsjánka ch'án.‡

¹⁸ A ntá jahará la jehya kóchjinará éxi kóchjina tí sín israelita tí jna jina chrótsé sín tí sích'ákjen xrohi, tí tjen tí sítié t'inkaséyanhya la ko tí chjéhe xrinto. ¹⁹ Na ni tsíkíenhyará tí tsíntáchro trompeta, la ko tí itén Dios nixja. A ntá tí sín tsíkinhin tí tan a na mé chronða sín kixin í chrónixjahya ch'án inaá,§ ²⁰ mé xikaha ichro sín kixin tsjachahya sín sinchexiteyá sín tí nkehe k'uetqan ch'án kixin “Tí nkexro tsinkátja tí jna mé its'en, la ixro

* 12:6 Job 5.17; Provérbios 3.11–12 † 12:16 Génesis 25.29–34 ‡ 12:17 Génesis 27.30–40

§ 12:19 Éxodo 19.16–22, 20.18–21

la o chica lanza chrók'óyáxin sín, la kjónté ijnko ko tsinkátja va tí jnā la chrók'uén.”* 21 Ijnko kjuachrakon jie tí nkehe k'uikon sín la kjónté ch'ín Moisés tsintácho ch'án kixin: “Kjāxin síxrankana chrakonna.”†

22 A ntá jahará tsíkóchjineherá tí jnā Sión, tí chjasén Dios tjechón, mé tí Jerusalén itjen nkaya nkajní, la ko nchónhya miles ángel 23 tsíkójnkotsé sín kixin tsochjéhe sín kjuasáyá Dios, la ko tí sín tsíkójnkotsé sín tsík'óna sín xjeen Dios saoxín ts'ínixín ihnié sín nkaya nkajní. Jahará tsíkóchjineherá Dios, jehe ch'án mé Juez sinchekitoexín ch'án ijié kaín chojni, la ko tsíkóchjineherá tí nchakuen chojni jína ó tsíkjinchetjóá Dios, 24 la ko tsíkóchjineherá ch'ín Jesús, jehe ch'án mé nixjāxin ch'án tí pacto nixin kixin tí ijnié ch'án k'uitji kjuínchetjuáxinni ch'án. A ntá antsí jína chrónkaxín tí ijnié ch'án, a ntá kánhyó tí ijnié ch'ín Abel.

25 Chrókóxakonhanrá chrókuítekákonhénrá tí nkexro tjenixja. Kixin tí sín kjuanoá Dios tió kjuínchexraxinkaon ch'án tí jehe sín ntihi chjasintajni ó la kuaáhya sín; a ntá antsí má xitjahya chrókuaáni tí chrókuitekakuenhyani tí nkexro nchexraxinkaonni kujxin nkaya nkajní. 26 A ntá tí itén Dios tí yaon a kjuínchekinkí nonte. A ntá jie tsintácho ch'án kixin: “A ntá inaá jehya nonte ó sintakinkia. Náhi. Kjāxin nkajní sintakinkia”,‡ 27 A ntá tí tsintácho ch'án kixin “inaá” mé t'axrjexín kixin tsjakjīn ch'án tí nkehe jína tsinkí, a ntá tsítóhe ch'án tí nkehe xitjahya tsinkí. 28 A ntá tí ts'áyéheni tí kjuachaxin kjuanjon Dios la xitjahya ts'ixinkí tíha. Méxra chróchjéheni Dios kjuasáya chróxraxinkaonni ch'án chróchrakonhenni ch'án 29 kixin tí Dios kuènteni mé éxi ijnko xrohi tsjacha sinchek'itjāyan kaín nkehe. §

13

Nkexrí chrók'uejóni kixin chrókóchéhe Dios

1 Méxra chrókuitoéhyará chrótjuèherá kichuára. 2 Chrók'uitjāyanhyará chrókjuánjonrá kjuachaxin chrókuitohe ntōará tí sín tsíkjixín kjín. Mé xikaha kjuich'e iso sín la kjónté ángel tsík'áyéhe sín la kónoehya sín.*

3 Xráxinkáonrá tí sín tjejóchjina éxi kjāxinrá chrók'uejochjinakoará tí jehe sín. Xráxinkáonrá tí sín tsík'ekon éxi kjāxin tí jahará xikaha chrókonhanrá kjāxin.

4 Kaínrá chróchonteherá kjuasáya tí kótehe chojni. A ntá jahará tsikótahará la jína chrók'uejokoará kichuára chrótjuèherá kichuára. A ntá tí sín tjinkaon tsochóna chojni chjin ókjé la Dios sinchekjasóte sín kixin xikaha ich'e sín.

5 Kénhyó má chrókóxrjínhanrá itsjé chichaon. Chrókócháhará kjónté tí kánhyó tsjé chontará; kixin tsintácho Dios kixin: “Janhan na tsítóahya tí jahará la ko ts'itjāyannahya tí jahará.”† 6 Mé xikaha chrakonhyani tsontáchroni kixin:

Ínchéni mé tjinkitsani,

méxra chróchrakonhyani kjónté ichrén nkehe chrókjuich'eheni chojni.‡

7 Chróxráxinkáonrá tí sín kjuínkítsa tí jahará kjuakohará sín itén Dios, chrókjuenkayáxinrá nkexrí k'uejó sín ntá xikaha chrókóyohará sín éxi tí fe k'uéchóna sín.

* 12:20 Éxodo 19.12–13 † 12:21 Deuteronomio 9.19 ‡ 12:26 Hageo 2.6 § 12:29 Deuteronomio 4.24 * 13:2 Génesis 18.1–8, 19.1–3 † 13:5 Deuteronomio 31.6 ‡ 13:6 Salmo 118.6

⁸ Jesucristo mé itjen ch'án ijna la ko ijie la ko jnkochrín.
⁹ Chrókuítóéhyará chrókjuakohará chojni ijnko nkehe ókjé chrókuinkachónkirá. Íchá jína tí asánrá chrók'uáyéhe fuerza kixin Dios tjuahará la jehya tjetoo chrókjuinchexiteyéheni tí nkehe t'etoo nkehe sineni. Mé xikaha tí sín kjuích'e xikaha kjuinchexiteyá tí nkehe k'uituenhen sín nkexrí chrókjóné sín la ninkehó kjuinkítsahya tíha.

¹⁰ A ntá jeheni chóntani í jnko altar kixin k'uenyákonhenni Cristo la ntiha kohya kjuachaxin chrókjónexín tí nchat'á kjuích'e xra nkaxenhen njnko ósé. ¹¹ A ntá tí nchat'á t'etoo judío kjuíko sín tí ijnié ko nkaxenhen tí Cuarto Antsí Tjóá kixin tí nkehe la tsjatsen tí ijie sín. A ntá tí cuérpóé tí ko kjuakaxín sín ikon tí chjasin k'uejó sín. ¹² Kjaxin Ìnchéni Jesús kjuasóte ch'án k'uénxin ch'án ikon chjasin kixin tsotjuáxin kaín ijie chojni tí ijnié ch'án. ¹³ Tsochréheni Ìnchéni Jesús éxí k'uénxin ch'án ikon chjasin kjónté tsjasóteni éxí kjuasóte tí jehe ch'án kjuikosáyehya sín tí jehe ch'án. ¹⁴ A ntá ntihi chjasintajni chóntahyani njnko chjasénni chrók'uitjáyanhya; a ntá xritjeyáni tí chjasin itsi chr'éxin. ¹⁵ Méxra chrókuítóehyani chrókjuikosáyeheni Dios kixin Jesucristo k'uenyákonhenni ch'án. Tí xraxinkaonni ch'án la yóhe tí ko tsík'en tsíchjéhe sín Dios. Yóhe xikaha chrókjuanjonni kixin ir'vani ó chrókjuikosáyexínni ch'án. ¹⁶ Chrók'uitjáyanhyará chrókjuích'erá xra jína la ko chrókjuinkítsará kichuárá. Tí xikaha chrókjuích'erá la imá tóxrjnhín Dios.

¹⁷ Chrókuítekákonhénrá tí sín tjakohará chrókjuinchexiteyéhérá tí jehe sín. Jehe sín mé t'ayakonhen sín asánrá kixin jehe sín la ó nohe sín kixin tsjanjon sín kuentá tí tjen Dios. Tsjinkítsará sín kixin tsóchéhe sín sich'e sín xra la tsonínkahya sín. A ntá tí chrókjuinchek'ávárá sín, ntá ninkehó tsjachahya sín tsjinkítsa sín tí jahará.

¹⁸ Nixjehérá Dios kixin tí jeheni kaín ni, kixin chaxín jína kjuenkayáxinni la ko tjinkaonni kixin jína chrók'uejóni. ¹⁹ Tjáncháá xra ó kixin chrónixjehérá Dios kixin chrókjuanjon ch'án kjuachaxin kixin tjoka chrókjan janhan chrók'uejóni.

Tjanchia ch'án kixin chrókóyaon sín

²⁰ Tí Dios tjanjon kjuaxróxin, mé tí nkexro kjuínchexechón Ìnchéni Jesucristo kjónté tsík'en ch'án, jehe Jesucristo mé tí Pastor tjetoo t'ayakonhen tí kolélo, la tí ijnié ch'án mé tsóxiteyáxin tí pacto sich'e xra jnkochrín, ²¹ jehe Dios mé tsjinkítsa tí jahará kixin jína chrók'uejorá la ko kaín xra jína chrókjuích'erá kixin xikaha tjinkaon ch'án; kixin jehe ch'án t'etuénhenni ch'án kaín nkehe nkexrí tjinkaon ch'án kixin tí kjuachaxin chóna Jesucristo. Mé xikaha chjéheni Cristo kjuasáya jnkochrín. Amén.

²² Kichóni, xrjanóghará kixin tóninkákonhyará kixin tí palabra xrjanka sjntaxraxinkáonrá. Méxra ikjian tí xroon kjónté kánhyó tsjé nixja ts'ayéhérá. ²³ Chrókónohará kixin kichó ni Timoteo la í tjechjinahya ch'án jie. Tí tjoka tsi ch'án la tsjasánkian ch'án tí tsjasántsjahará tí jahará.

²⁴ Nixjehérá jnkojína kaín tí sín tjítaón ntja tjako la ko kaín tí sín kichó ni tinkáchónki Dios. Tí sín tinkáchónki Ìnchéni tjejó Italia mé nixjahará sín.

²⁵ Dios sintayaonrá ch'án kaín rá. Amén. Ó tjen.

Tí xroon tsíkjin ch'ín Santiago

Tí ch'ín Santiago tsíkjin ch'án xroon ts'áyéhe kaín tí sín tsíxikayéhe

¹ Janhan Santiago mé t'ahá xrá Dios la ko Ìnchéni Jesucristo nixjahá kaín tí sín tsík'axrjeníxin tí teyó xjeen ch'ín Israel tsíxikayéhe sátsíkji kuenté chjasintajni.

Dios mé tsjanjon tí kjuaxrexinkaon jína

² Jahará kichó ni, chrókócháhará kjónté chrók'uats'ínkará ichrén nkehe náxrjónhya. ³ Ó nohará kixin tí ichrén nkehe chrókónhanrá kixin tinkachónkirá Ìnchéni la t'ichjánxin chrókjuachará la chrókóninkákonhyará. ⁴ Chrókónohará kixin tí chrókóninkákonhyará la tíha mé ijnko xrá jína chaxín kixin ntá jahará ijnko chojni chaxín kjuacha titekaon la í t'itjáyanhya ninkehó.

⁵ Tí jnkojín tí jahará t'itjáyan kjuaxrexinkaon la chrókjuancheherá Dios la Dios mé chrótjáhará ch'án tíha. Jehé ch'án mé xráxin tsjanjon ch'án kaín nkehe ts'áyéhe tí chojni tjanchia la tsonínkakonhya ch'án. ⁶ Tió chrókjuancheherá Dios nkehe la kénxin asánrá chrókjuanchiará la chrókjóhya asánrá ninkehó. A ntá tí chojni tjo asén la éxi ntayaon tjiko xrínto ijnko lado la í jnko lado. ⁷ A ntá tí xíkaha itjo asén sín la chróntáchrohya sín kixin chrók'uáyéhe sín ichrén nkehe chrókjuanjon Ìnchéni. ⁸ A ntá tí nkexro xíkaha tjenkayáxin ijnko nkehe ijie la í jnko nkehe ntóye la jnkokoáhya nkehe tjenkayáxin.

⁹ Tí kichó ni tinkáchónki Cristo la kjónté nòà chóntahya itsjé nkehe chjasintajni la kjónté xíkaha chrókóchéhe kixin tí tinkáchónki ch'án Ìnchéni la antsí má sínki tíha. ¹⁰ A ntá tí nkexro rico kjónté chrók'uitjáyan tí nkehe chóna la antsí chrókóchéhe kixin tinkáchónki ch'án Ìnchéni, kixin tí nkehe chóna ch'án la kánhyó sínki la ts'itjáyan éxi itsjo tsík'óna ka. ¹¹ Tió tsjítjon yaon la tsosóa imá la tí ka tsqxámá la ko tí tsjo la ts'ánótjen la tí náxrjón tsjehe la tsjeje. Mé xíkaha tsonhen tí ch'ín rico, ts'itjáyan ntá tsítóhe ch'án tí xrá k'uéchóna.

Tí nkehe tsonhen chojni

¹² Náxrjón tí nkexro tsjacha ts'atsínka tí nkehe náxrjónhya tsonhen. A ntá tí tsjacha ch'án ts'atsínka kaín tí nkehe náxrjónhya tsonhen ntá ts'áyéhe ch'án tí corona kuente kjuachón kixin Dios tsintáchro ch'án kixin tíha mé tsochjéhe ch'án tí sín tjuèhe ch'án. ¹³ A ntá jnkojínrá tí chróntáchro asánrá chrókjuich'erá ichrén nkehe jínahya, la chróntáchrohyará kixin Dios tsíkjanjon kjuachaxin xíkaha s'ich'erá kixin Dios la tjinkakonhya chrókjuich'e ch'án nkehe jínahya la ko tjinkakonhya ch'án chrók'uetōan ch'án kixin ninkexró chrókjuich'e ijnko nkehe jínahya. ¹⁴ A ntá jnkojín chojni tí ó jehó tjenkayáxixin asén tí jínahya la mé xíkaha tsjachroe, tsjasin sín jje. ¹⁵ Mé xíkaha tí nkehe jínahya tjenkayáxin chojni mé tjiixin tí jje. La mé xíkaha ts'ánkí tí jje la ntá tíha ts'enxín chojni.

¹⁶ Kichóni, chrókjuich'iyéhyará asánrá. ¹⁷ Kaín nkehe jína ntoá t'áyéheni mé tixín nkajní tí tjen Dios tí nkexro kjuich'éna kaín tí xrohi kuente nkajní. Jehé ch'án mé Dios jnkochríxin la jehe ch'án mé xitjahya ts'ixitóxín. ¹⁸ Jehé ch'án kjuanjon ch'án kjuachón k'uáyéheni kixin tí tan ntoá nixja

ch'án, kixin éxí tí nkehe senó tsík'óna, mé xíkaha tjinkaon ch'án chrók'óna tí jeheni.

Tí nkehe chaxín chrókuinkáchónkini

¹⁹ Méxra chróxráxinkáonrá tíhi jahará kichó ni. Káinrá chrók'uejorá chrókuinhínra jína la tjokahya chrónixjará kixin tjokahya chrókóninkáonrá. ²⁰ A ntá tí chojni tjoka tónínkaon la ch'ehya tí xra jína éxí tóxrjínhin Dios. ²¹ Méxra títóhérá tí nkehe tjuáhya la ko tí nkehe jínahya kjuachjinoxínhin síin nkuixín la chrókjuinchehnkehyará, chrók'uayéhérá tí itén Dios chrók'uinka nkaya asánrá. Tí tan a mé chóna kjuachaxin kixin chrókuaxínra.

²² Jehya kixin chrókuinhónrá; jahará chrókjuich'erá éxí tí nkehe tjako tí tan a. A ntá tí náhi la jahóra ch'yiehérá asánrá. ²³ A ntá tí chojni tsinhón tí tan la ntá sinchexiteyáhya la éxí ijnko chojni tsjexín xrosenta tí kon ó. ²⁴ A ntá tí k'uikon tí kon la sátsji la tuénxín k'uitjáyenhen nkexrí tsjehe. ²⁵ A ntá tí nkexro k'uitjáyenhya tí nkehe kuínhin la mé tsjehe ch'án jína tí ley chaxín ntoá, mé tí nkehe chaxín tsaáxinni la titekaon ch'án jína la ich'e ch'án nkehe t'etóan tíha la ntá náxrjón tsjak'e kixin kjuínchexiteyá ch'án.

²⁶ A ntá jnkójín nkexro tjenkayáxin kixin imá tinkáchónki ch'án Dios kjánchó tí noehya tsochjéhe freno nejen la jehó ch'yiehe asén la ninkehó sínkíhya tí nkehe tinkáchónki ch'án. ²⁷ A ntá tí nkexro tinkáchónki Dios chaxín jína la ko tjasinnya jie nkayakon It'eni Dios la mé tíhi: mé chrókjuinkítsa tí chojni nóe la ko tí chojni k'án chónahya nkehe sine sín o níhi sín, la ko chrókjuasinnya tí jie jínahya síin chjasintajni.

2

Jnkokón chrókjuikosáyehe kichó ni

¹ Kichóni, jahará tinkáchónkirá Inchéni Jesucristo imá tjetóan la t'ichjánxin chrókjuikosáyehérá kaín chojni jnkokón. ² Éxí ijnko chojni rico chrók'uixenhen tí tójnko tsérá la chóna koch'aninko oro la ko chóna iké náxrjón, a ntá ntiha kjaxin chrók'uixenhen ijnko chojni nóa chóna iké ntaxín. ³ A ntá tí chrókjuikosáyehérá tí chojni t'itsa ka jína la tsontácherá ch'án kixin: “Ntíhi antsí jína tjak'e.” A ntá tí chojni nóa tsontácherá ch'án kixin: “Jaha la tjak'éxian totá ntiha o tjak'e nonte ó.” ⁴ Mé xíkaha la jnkokónhya tjíkosáyehérá kichuára la tí nkehe jínahya tjenkayáxinra.

⁵ Kichóni tjuahará, tsinhínra tíhi: Dios tsíkjeýá tí sín nóa ntihi chjasintajni kixin antsí má tsinkáchónki sín tí jehe ch'án kixin ts'áyéhe sín tí kjuachaxin kuente ch'án éxí tsintácho ch'án tsochjéhe ch'án tí sín tjuèhe ch'án. ⁶ A ntá jahará mé tjíkosáyehyará tí sín nóa. A ntá tí sín rico mé tjíkosáyehérá. ¿Á jehya tí sín rico tjanchia sín jie sájtiko sín tí jahará nkayakon tí sín t'etóan ní? ⁷ ¿La á jehya jehe sín t'ántaxínhin sín tí ihnié Cristo tjíkosáyeheeni?

⁸ A ntá jahará la jína tjejoch'erá tí nchexiteyará éxí t'etóan tí ley éxí nixja tí xroon itén Dios kixin: “Chrótjuèhérá kichuára éxí tjuèxíná asánrá”. ⁹ A ntá tí jnkokónhya tjíkosáyehyará chojni la ntá xíkaha la tjásinra jie la nchexiteyehyará éxí tí nixja tí ley kuente Dios. ¹⁰ A ntá ijnko nkexro titekaon kaín tí ley la ntá kjuínchexiteyáhya jnkokoá tí nkehe tjetóan la mé tí xíkaha la kjuínchexiteyehya kaín tí nkehe t'etóan tí ley. ¹¹ Ntá Dios tsintácho kixin: “Chrókuákjahyará í jnko chojni chjin ókjé”, la kjaxin tsintácho ch'án kixin: “T'oyánhyará kichuára.” A ntá tí nkexro kuákjahya

í jnko chojni chjin ókjé kjánchó kjuàya la kjuínchexiteyéhya tí nkehe t'etəan tí ley. ¹² A ntá jahará chrónixjará la ko chrókjuínchexiteyará kixin chrókjuanchiahya jiē tí ley sincheakaáni. ¹³ A ntá tí nkexro kuikonóehya í jnko chojni la kjaxin tsikonóehya Dios tí jehe. A ntá tí nkexro kuikonóehē kichó la mé xikaha tsjacha tsaáxin ch'án tí yaon tsjixixin tsitəexín jiē.

Tí fe ch'ehya xra la tsík'en

¹⁴ Kíchóni, ¿nkehe tsonhen ntáchrórá kixin chontará fe a ntá ninkehó nkehe jína tjákoxinhyará? ¿Á ntáchrórá kixin xikahó chrokuááxinrá? ¹⁵ Éxí ijnko kichó ni ntoa o kichó ni chjin chóntahya iké o chóntahya nkehe sine sín t'ichjánxinhin sín jnkojín yaon. ¹⁶ Ntá jnkojín tí jahará tsontácherá sín kixin: “Sátjia jnkojína la ko ts'itsa ká la ko sinte jína.” A ntá tí kjuánjonhyará tí nkehe t'ichjánxinhin tí cuerpoé sín la sínkíhya tí nkehe ntáchrórá. ¹⁷ La mé xikaha tónhen tí fe la tí tjákoxinhyará ninkehó nkehe jína kjuíuch'erá la éxí nkehe tsík'en tí ntáchrórá.

¹⁸ A ntá jnkojín chojni tsontáchró kixin: “Jaha chonta fe a ntá janhan it'a tí xra jína.” Tí xikaha la jaha tjákoxian tí fe kjónté kohya xra la janhan tsjákoxian tí fe la ko tí xra jína tjét'a. ¹⁹ Jaha titekávan kixin jnkokoá Dios itjen la chaxín jína xikaha, kjánchó kjaxin tí jínahya titekaon tíha la ko síxranka chrakon. ²⁰ T'ónahyará lontj. Jahará la nohará kixin tí fe ch'ehya xra la chónkó tíha. ²¹ Dios kóxrjínhin tí nkehe chrókjuíuch'e ch'ín Abraham, tí nkexro k'uaxrjeníxinni ósé, tió chrók'óyán ch'án tí xjeen ch'án Isaac la chrókjuanjon ch'án chrók'uáyéhe Dios. ²² Chrókónohará kixin tí fe k'uéchónta ch'ín Abraham la kjuákoxin ch'án tí xra kjuíuch'e ch'án la ntá xikaha kjuákoxin ch'án kixin antsí má kuinkáchónki ch'án Dios. ²³ Mé xikaha xiteyá éxí ntáchró xroon itén Dios kixin: “Abraham kuítekaon Dios la ntá Dios ntáchró kixin jína ch'án”, la ntá Dios kjuínchek'in ch'án amigo kuènte ch'án.

²⁴ Chrókónohará jahará kixin Dios la t'áyéhe ch'án chojni la nchetjóá ch'án kixin tí xra jína ch'e sín la jehya kixin jehó chrókuinkáchónki sín ch'án. ²⁵ Mé kjaxin xikaha kónhen tí tjan Rahab, tí tjan k'uéchónta nchónhya chojni ntoa. Jehe tjan kjuanjon tjan kjuachaxin kuítəhe ntəe tjan tí sín kjuítsjehe chjasén tjan la ko kjuínkítsa tjan sákuixín sín ókjé ntia, a ntá Dios la kóxrjínhin tí nkehe kjuíuch'e tjan. ²⁶ Éxí tí cuerpoé chojni chóntahya nchakuen la tsík'en la kjaxin xikaha tí fe la tsík'en tí ninkehó tjákoxinhya tí nkehe jína chrókjuíuch'e sín.

3

Tí kjuachaxin chóna nejen chojni

¹ Kíchóni, chrók'ónahya tí jahará nchónhya maestro kixin tí ntoáhya chrókjuàkorá la tíha mé chrókjuasótiaxínrá imá. ² Kaínni chóntani jiē, a ntá tí nkexro ninkehó jiē ntáchróhya la ijnko chojni jína tíha la ó tsjacha ch'án ts'etuenhen ch'án kuénté tí cuerpo kuènte ch'án. ³ Éxí tí kokatə tsochónta chica freno tí ir'va va kixin tsitekaon va la sátsjiko tí inché va la tsjacha ch'án ts'etuenhen kuénté tí cuerpo kuènte va. ⁴ Tjenkayáxinrá kjaxin nkexrí tjejó tí ntabarco kjónté imá jié la tsjacha tí xrintə chjéhe tjan sátsjiko, la ntá tí ch'ín tjiko la kjónté ijnko nta ntsí la tsjacha ch'án sátsjikoxín ch'án tí tjínkaon ch'án sátsjiko ch'án. ⁵ Mé xikaha tí ir'va chojni. Kjónté ijnko nkehe imá ntsí kuènte tí cuerpo kjánchó nchónhya nkehe jínahya ntáchró éxí ijnko xrohi ntsí la tsjacha tsochéxin kuénté ijnko jna

jié. ⁶ Mé xikaha tí ir'vani la éxí ijnko xrohi kixin nchónhya jie t'axrjexín la éxí ijnko veneno ncheníhi cuerpo mé xikaha mé tsjasixín kuente cuerpoé chojni jie. La tí kjuachaxin kuente ir'vani la mé tjixín tí infierno la tíha mé tjixín tí ts'itjáyanxínni. ⁷ Tí chojni la tsjacha sinchesáncho kaín ko jiehe la ko tí ko xritjaká la ko tí konche la ko tí ko sínkankí ntayaon la mé xikaha kjuacha sín nchesáncho sín va. ⁸ A ntá tí ir'va chojni la kohya nijnko chojni tsjacha sinchesáncho. Tíha mé jínahya la xitjahya tsosáncho. Tíha mé éxí ijnko nkehe chóntha nchónhya veneno ts'enxín chojni. ⁹ Tí ir'vani la kjaxin tjikosáyexinni It'éni Dios la tíha kjaxin t'ántaxíenxinni chojni tsíkijich'éna Dios éxí tsjehe tí jehe ch'án. ¹⁰ Kjaxin tí ir'vani t'axrjexín tí nkehe itsjeni kuente Dios la kjaxin tíha t'ántaxínxinni. Kichóni, xikahya chrókjuich'erá. ¹¹ Jnkokoá tòye xitjahya ts'axrje ntá xé la ko kjaxin ntá tsjá. ¹² Kichóni, ¿á jína tí nta híguera chrók'óna to aceituna o tí nta to uva chrók'óna to higo? Kjaxin xitjahya ijnko tòye chrók'uaxrje ntá xíjnta la ko ntiha kjaxin chrók'uaxrje ntá xé.

Tí kjuaxrexinkaon jína

¹³ Tí tjen jnkójín nkexro tí tjejorá nohe jína la ko tienxín la chrókjuakoxín ch'án jnkójína la ko chrókjuinchehnkexínhya ch'án tí nkehe imá nohe ch'án. ¹⁴ A ntá tí jahará chóntha kjuachjinoxínhin asánrá la tjinkáonrá jahorá chrókuétoanrá. A ntá tí xikaha la chrókjuinchehnkexínhyará tí nkehe nohará kixin tí xikaha la ch'iyará la tjinkákonhyará chróchronkará tí nkehe chaxín ntoá. ¹⁵ A ntá tí xikaha sinchehnkerá la jehya tí kjuaxrexinkaon kujxin tí tjen Dios. Tí xikaha la kjuachaxin kuente chojni chjasintajni ó la ko kuente ch'ín Tsochren. ¹⁶ A ntá tí xikaha síin kjuachjinoxínhin la ko tjinkaoon chojni jehó chrók'uetóan la ntá xitjahya tsonhen xra yóxin kixin xikaha síin nkehe jínahya. ¹⁷ A ntá tí síin kjuaxrexinkaon jína tsíkixín tí tjen Dios la saoxín tjejó chojni jína la ko kjaxin kjuaxróxin tjejó sín la ko náxrjón tjejó sín la ko jnkójína nixjehe kichó sín la ko kjaxin tikonóehe kichó sín la ko tí xra jína tjejóch'e sín la tí nkehe ntoá nixja sín. ¹⁸ Tí nkexro tjejá tí kjuaxróxin xikaha chrók'uenká sín kjuaxróxin la ko xikaha chrótjá sín tí nkehe jína.

4

Tí tjanjonxin chojni

¹ ¿Nketí tjixín tí guerra la ko tí kjuanínkaon tjanjonkoaxínrá kichuará? Táha la mé jahorá t'axrjeníxínrá kaín tí kjuanínkaon a. ² Jahará tjinkáonrá tsochontará ichrén nkehe ntá chontahyará ntá tónínkáonrá t'oyánrá kichuará. Tóchjinoxínhanrá kixin tsjachahyará sincheyóherá í so chojni ntá tónínkáonrá. Jahará ts'ayéhyará tí nkehe tjinkáonrá kixin tjanchehyará Dios. ³ La tí tjanchiará la ts'ayéhyará kixin ntoáhya kjuanchiará kixin tjinkáonrá chrókuicháxinhanrá ó la chrókjuinchehnkexínrá. ⁴ Jahará chojni titekakonhya Dios. ¿Á noahyará tí jahará kixin tí imá tsotjuéhérá chjasintajni la ntá tsonínkákonhénrá Dios? A ntá tí jnkójínrá tjinkáonrá tsotjuéhérá chjasintajni la tsokjanrá tsonínkákonhénrá Dios. ⁵ ¿Á tjenkayáxinrá kixin tí nkehe ntáchro xroon itén Dios la á chónkó? Ntáchro xíkíhi: “Tí Nchakuen Dios kjuanjon ch'án k'uayéherá la tjuahará ch'án la tsonínkaon tí tsitohérá ch'án.” Mé xikaha ichro Dios. ⁶ Kixin Dios la imá tjinkítsani ch'án, méxra ntáchro xroon itén Dios kixin: “Dios la nínkakohen tí chojni nchehnke a ntá tjinkítsa

ch'án tí chojni nchehnkehya.”* 7 Méxra chrókuinchehnkehya. Íchá jína chrókuítekáonrá Dios la chrókuánjonhyará kjuachaxin tí jínahya chrók'ueŭtañhanrá ntá chrók'uikon tí jínahya kixin chrók'ueŭtañhya ntá sáchrókjui. 8 Chrókóchjineherá Dios, la tí jehe ch'án kjaxin tsochjinahará ch'án. Jahará chojni chóna jie la chrókjonemará tjárá. Chrókuinchetjóará asánrá kixin chrótjuèhérá Dios la kánhyó chrótjuèhérá chjasintajni. 9 Chrók'uavará la ko chrótsjankará. Chrókuínkirá tí tjanorá la chrótsjankará la chrókuínki tí cháhará la chrók'uavará. 10 Chrókuinchehnkehya chróxráxinkáonrá Ìnchéni a ntá jehe ch'án chrókuínkítsa ch'án antsí chrókónohará.

Chrók'uántaxíenhyani kichó ni

11 Kichóni, chrók'uántaxíenhyará kichuárá. A ntá tí nkexro t'ántaxínhin ijnko kichó la ntá jehe ch'án t'ántaxínhin ch'án tí ley, la t'eka jie tí ley. A ntá tí t'eka ch'án jie tí ley la mé t'óna juez chrínki chrókuitekaon tí ley. 12 Kixin jnkokoqá nkexro kjuanjon tí ley la tí nkexro a mé tí juez la jehe ch'án sinchekaá ch'án chojni la ko sinchekjasóte ch'án chojni. ¿A ntá nkexro tí jaha kixin chrókuanchéhé jie tí kichuá?

Ínoehyani nkehe tsonhen ntóye

13 A ntá jie jahará chrókuinhínrá tíhi kixin tsintáchrórá kixin: “Ijie o ntóye sáchrokuini ijnko chjasin la ntiha chrók'uejóni ijnko nánó chrókuinchekjini nkehe chrókuachani chichaon.” 14 A ntá jahará noahyará nkehe tsonhen ntóye kixin tí tjejóchónni la éxi ijnko tjuj nonte ts'ikonni a ntá tuénxín ts'itjáyan. 15 Íchá jína chróntáchrórá kixin: “Tí tjinkaon Ìnchéni la naxa chrók'uejóchónni la chrókuich'eni tíhi o tíha.” 16 A ntá jahará tí nixjará la imá ihnkerá la kaín tí kjuahnke la mé jínahya. 17 A ntá tí nkexro nohe chrókuich'e tí nkehe jína la ntá ch'ehya xikaha la mé antsí tjasin jie.

5

Tí nkehe chrókuinhin tí sín rico

1 Jahará ricorá chrókuinhínrá tíhi. Chrótsjankará la ko chrók'uíyatorá kixin tí nkehe tsonhanrá tsjasótiará. 2 Tí nkehe rícoxínrá la ó tsikótje la ko tí ka chontará la ó tsík'in kué. 3 Tí oro la ko tí plata chontará ó tsikóchjisen. Tíha mé tjákoxin kixin nkexrí tsonhen ntoará tsoche. ¿Nkehe tsonhen kjuásintonrá nkehe kixin ó tsi tí yaon tsjixixín? 4 A ntá tí nkehe chrókuacha tí sín kjuít'ahará xra la kjuénkehya sín la ntá tjanchia sín jie tí jahará la t'èya sín, ntá Ìnchéni imá t'etōan mé kuínhin kixin xikaha ichro tí sín kjuich'e xra. 5 A ntá ntihi chjasintajni la náxrjón tjejorá la kaín nkehe tóxrjínhanrá ch'erá la éxi iko imá jína ine la tsikótsanka la ntá itsji yaon ntá its'en la mé xikaha tsonhanrá. 6 Kixin jahará la kjuinchekjásóterá la k'oyánrá chojni ninkehó jie chóntahya kjónté kohya nkehe kjuít'ahará sín.

Chrókóninkakonhyani chróchónhenni la chrónixjeheni Dios

7 Méxra kichó ni, chrókóninkákonhyará chróchonhérrá tsokjanjian Ìnchéni. Éxi tí ch'ín ch'e xra nontee chónhen xrakoa chrin senó la ko tí chrin tsjixixín ntá tsotjá ch'án tí nkehe náxrjón k'óna. 8 Mé xikaha jahará la kjaxin chrókóninkákonhyará chróchonhérrá chrókóxrjéhyará kixin tí yaon itsi Ìnchéni la ó chjina tsi. 9 Kichóni, chrókóninkákuenhyará kichuárá

* 4:6 Proverbios 3.34

kíxin ntá chrókuanchahya Dios jje tí jahará kíxin Dios la mé tí juez la ó tjen ch'án tí ntója puerta. ¹⁰ Kíchóni, chrókuankíhírá éxí tí sín k'uéchrónka itén Dios k'uéchrónkaxín sín kjuachaxin ihñié Ìnchéni. Jehe sín kjónté kjuasóte sín la kónínkakonhya sín. ¹¹ A ntá jeheni ntáchroni kíxin kóchéhe tí sín a kjónté kjuasóte sín la kjuacha sín. Jahará la ó kuinhínrá kíxin nkexrí kónhen ch'ín Job. Ó nohará kíxin Ìnchéni kjuínkítsa ch'án hasta kjuixixín kíxin Ìnchéni la imá jína ch'án la kuikonóehe ch'án tí ch'ín a.

¹² A ntá kíchó ni, chrókuakjénxínhyará ihñié Dios tjen nkaya nkajní la ko ni chjasintajni la nijnko nkexro chrók'uakjénxínhyará. Tí chróntáchroná chaxín la chaxín la tí náhi la náhi kíxin Dios la chrókuinchekjásótiahýará.

¹³ A ntá jnkojín tí jahará náxrjónhya tjejorá la chrónixjehérá Dios, a ntá jnkojínrá náxrjón tjejorá la chrótsjerá kuènte Dios. ¹⁴ A ntá tí jnkojín nkexro níhi la chrók'uíyehe sín tí sín táda t'etóan kuènte njnko kíxin ntá chrónixjehé sín Dios kíxin tí sinníhi la ko chróchjéhe sín aceite tí sín a kjuachaxín ihñié Ìnchéni. ¹⁵ Chrónixjehérá Dios kaín asánrá kíxin tí sinníhi chrókuítóhe jína la ntá Ìnchéni chrókuinkítsa sín, a ntá ichrén jje kjuasin sín la jehe ch'án sinchek'itjáyan tíha. ¹⁶ Méxra chróchenkará kíchuará tí jje chontará la ko chrónixjehérá Dios kíxin chrókuítóhará jína. Tí nixjehé Dios ijnko chojni jína tinkáchónki Ìnchéni la chóna nchónhya kjuachaxin tíha. ¹⁷ Tí ch'ín Elías, tí nkexro k'uéchrónka itén Dios, mé ijnko chojni éxí tí jeheni la jehe ch'án kjuanchehe ch'án Dios kaín asén ch'án kíxin ts'aniáhya chrin la ntá k'uániáhya chrin chjasintajni iní nánó ko t'ó. ¹⁸ A ntá chr'éxin kjuanchehe ch'án Dios kíxin ts'aniá chrin la ntá k'uániá chrin inaá chjasintajni la jína k'óna tí nkehe k'uénka sín.

¹⁹ Kíchóni, tí jnkojín chojni chrókuichroe chrókuítóhe tí nkehe ntoá la í jnko nkexro chrókuinkítsa kíxin chrókjan tí nkexro a ²⁰ la chrókónohará tí jahará kíxin jnkojín chojni tjinkítsa ijnko nkexro chóna jje tsokjanxin tí ntja jínahya k'uék'aji ch'án la ntá ó kjuínkítsa kíxin tsaáxin asén tí ch'ín a kíxin ts'itjáyanhya ch'án la ntá chrók'uitjáyan tí nchónhya jje k'uéchóna ch'án. Ó tjen.

Tí xroon saoxín tsíkjin ch'ín Pedro

Ch'ín Pedro ikjin ch'án xroon chr'énnen ch'án tí sín tinkáchonki Ìnchéni tjejó ókjé

¹ Janhan Pedro, mé kjueyána Jesucristo t'aha ch'án xra mé ikjian tí xroon chr'anhánrá jahará sátsíkjurá ókjé chjasin tjejorá, mé tjejorá estado Ponto, la ko Galacia, la ko Capadocia, la ko Asia, la ko Bitinia. ² Kjueyará It'éni Dios kixin jehe ch'án tsíkjenkayáxin ch'án ósé xikaha. Kótjuáxinrá Nchakuen ch'án kixin chrókuítekáonrá ch'án la ko kótjuáxinrá ijnié Jesucristo. Kjuasáyé ch'án chrókjuintayaonrá ch'án kixin antsí chrókuákjárá tí kjuaxróxin kuènte ch'án.

Tjejóchónhenni kixin jehe ch'án sinchekaáni ch'án

³ Tjancheheni kjuasáyé Dios mé It'é Ìnchéni Jesucristo kixin kjuasáyé jehe ch'án kuikonóhēni ch'án kixin éxi kokjéxinni nixin kixin xechón Jesucristo. Mé xikaha tjejóchónhenni sinchekaáni ch'án. ⁴ Mé xikaha ts'ayéhérá jahará tí nkehe tsjanjon Dios chóna ch'án nkaya nkajni mé ijnko nkehe chónhya ts'itjayan, la ko chónhya tsokjita, la ko chónhya tsóxamá. ⁵ Dios mé t'ayakuanxínrá ch'án tí kjuachaxin kuènte ch'án kixin jahará tinkachónkirá ch'án kixin ntá tsjacha tsaará éxi tsíkjenkayáxin ch'án ósé mé tjinkaon ch'án kixin chrókuaará tí tsjixixín tsjeje chjasintajni.

⁶ Méxra xikaha chrókócháhará kjónté ichrén nkehe chrókónhanrá iso yaon kixin jehí t'ichjánxin xikaha itsjé nkehe chrókónhanrá. ⁷ Méxra tí tinkachónkirá Ìnchéni la t'ichjánxin tsjachará nchónhya nkehe chrókónhanrá éxi yóhe chica oro xikaha t'ichjánxin ts'atsínka tí siin xrohi tsotsjexín sín á chaxín jina kohya nkehe tsonhen. A ntá antsí má sínkí tí tinkachónkirá Ìnchéni a ntá tí chica oro la kénhyó sínkí kixin tí chica oro la chóxin tsjeje. Mé xikaha tí tinkachónkirá Ìnchéni t'ichjánxin xikaha tsonhanrá kixin tsontácho Dios kixin jina kjuachará ntá ts'ayéhérá kjuachaxin tió tsi Jesucristo.

⁸ Jahará tjuéhérá Jesucristo kjónté k'uikonhyará ch'án. Ijie tinkachónkirá ch'án kjónté t'ikonhyará ch'án la ko tócháhará ijnko kjuachéhe imá jié kohya nkehe sincheyóhēni kixin imá náxrxón tíha. ⁹ Mé xikaha k'uitjará nkexrí tsaáxin asánrá. Tíha mé tí nkehe tjejochónhénrá tinkachónkirá.

¹⁰ Mé xikaha tí sín profeta tsíki ósé la kjueyá sín nkexrí chrókuaáxin chojni la ko k'uéchrónkaxín sín tí nkehe kjuasáyé Dios chrókjuanjon ch'án chrók'uayéhérá tí jahará. ¹¹ Nchakuen Cristo kjuínchenohe tí sín k'uéchrónka itén Dios kixin Cristo tsjasóte la ko chr'éxin ts'ayéhe ch'án tí kjuachaxin jié. A ntá tí sín k'uéchrónka mé tjinkaon chrókónohe sín nkexro tíha la ko nkesá tsonhen tí nkehe chrónkaxín Nchakuan Ìnchéni. ¹² Kjánchó Dios kjuínchenohe tí jehe sín kixin tí nkehe chrónka sín jehya kixin tjoka chróxiteyá tí k'uéjé sín. Náhí. Hasta tí tjejóni jie mé ó xiteyá tíha. Tí nkehe chrónka sín la mé yóhe tí nkehe kuínhínrá, mé tí tan tsaáxinni k'uéchrónkaxín tí sín kjuakohará kixin tí kjuachaxin Nchakuen Dios kuixín nkaya nkajni mé kjuínkita sí jehe sín. Kjaxin tí sín ángel tjinkaon sín chrók'uinkon sín nkexrí tíha.

Dios k'uúyehę ch'án tí jeheni kixin tjóá chrók'uejóni

¹³ Méxra chrókjuenkayáxinrá jína nkehe chrókjuich'erá kixin chrók'uejorá jnkójina. Kaín asánrá chrók'uejochonhénrá kixin tí nkehe sintakitonhanrá Dios tió tsi Ìnchéni Jesucristo. ¹⁴ Éxi ijnko xjan titekaon mé xikaha jnkójina chrók'uejorá jahará, chrókjuenkayáxinhyará éxi k'uékjenkayáxinrá senó naxa k'uéchonhyará Dios. ¹⁵ Náhi. Jnkójina tjóá chrók'uejorá kixin Dios k'uúyahará la mé jína ch'án la ko tjóá ch'án. ¹⁶ Kixin ntáchro xroon itén Dios kixin: "Jahará chrók'uejorá tjóá kixin janhan na mé ijnko nkexro tjóá."*

¹⁷ Tí ntáchrórá jahará kixin It'ará mé Dios la ko ó nohará kixin jehe ch'án sinchekitoęxín ch'án ijje jnkójnko chojni, kixin t'ikon kixin jnkokón sínkí jnkójnko chojni, a ntá jahará chróxráinkáonrá ch'án jnkochrín tí naxa tjejochónrá ntihi chjasintajni. ¹⁸ Dios mé kjuíntakaará ch'án kixin chrók'uejohyará éxi k'uék'ejó tí sín tsík'axrjenínrá. Jahará ó nohará jína kixin tí nkehe k'uínáxinrá tsaáxinrá jehya ijnko nkehe chrók'ueje éxi chica oro o chica plata. ¹⁹ Náhi. Ná mé k'uínáxinrá ijnie Jesucristo imá tjete. Jehe ch'án mé k'óyán sín la k'uáyehę Dios éxi ijnko kolélo ninkehó xéhya va. ²⁰ Kixin Cristo mé ósé tsíkónoxín ch'án tí naxa k'ónahya chjasintajni. Kjánchó jehya tuénxín kónhen tíha hasta tí chr'éxin ntá kónoxín ch'án kixin jína chrók'uejoxínrá tí jahará. ²¹ Ntá xikaha kónhen Cristo a ntá jie jahará la kuítekáonrá Dios, mé tí nkexro kjuínchexechón Cristo la ko kjuikósáyehe ch'án. Mé xikaha jahará tinkachónkirá Dios la ko tjejochonhénrá sintakaará ch'án.

²² A ntá jie ó kuítekáonrá tí tan chaxín ntoá kixin tjinkjtsará Nchakuén Dios. Tíha mé kótjuáxin asánrá kixin ntá tsotjuéhérá kíchuará. Mé xikaha chrótjuéhérá kíchuará kaín asánrá. ²³ Méxra jahará kokjihará njixin, jehya kixin naxa chrók'uaxrjenínrá it'ará chjasintajni ntihó ts'itjayan. Náhi. Kokjixínrá itén Dios itjen jnkochrín. ²⁴ Kixin ntáchro xroon itén Dios kixin:

Kaín chojni chjasintajni tóyóhę kayoa ó,
a ntá tí kjuachaxin chóna la tóyóhę itsjo t'óna kayoa.
Tí ka la tsqxámá a ntá tí tsjo la ts'anótjen

²⁵ a ntá tí tan kuente Ìnchéni la tsjak'e jnkochrín.†
Tí tan í mé tsaáxinni la kuínhínrá tí jahará.

2

¹ Méxra tjtóhérá kaín nkehe jínahya, la ko kaín kjuach'ia, la ko tí ntoáhya tjenkayáxinrá, la ko tí kjuachjinoxínhin, la ko tí xrikoará kaín xín kjuach'ia. ² Chrók'uejorá éxi chánjan na ntá tsíkókjihi la itsjen ó chrók'ui, mé xikaha jahará chrók'ueyará itén Dios, tíha mé chrókónohará la chrók'uánkixin kjuaxrexinkaon kuéntará kixin chrókuaáxinrá, ³ tí chaxín kjuátsoanrá kixin Ìnchéni la jína.

Cristo mé tí xro tjechón

⁴ Chrókóchjineherá Ìnchéni, mé jehe ch'án me éxi tí xro tjechón. A ntá tí chojni la kuítekakonhya tí xro a, a ntá Dios la kjueya ch'án tí xro a imá tjete sínkí. ⁵ Mé xikaha Dios kjuíchénará tí jahará éxi xro tjechón la Dios chrókjuich'éna ch'án tí jahará jnkokoá njnko kuente ch'án, la mé ts'ónará ncha'tá tsíkjinchetjóá Dios, a ntá chróchjehérá ch'án tí nkehe tóxrjínhin

* 1:16 Levítico 11.44 † 1:25 1.24-25 Isaías 40.6-8

ch'án kixin tinkachónkirá Jesucristo. ⁶ Mé xikaha kjaxin xroon itén Dios ntáchro kixin:

Tsjaké chjasin Jerusalén ijnko xro t'etōan ts'óna nchia, ijnko xro tsikónoxín imá tjete sínki

a ntá tí sín tsitekaon tí jehe ch'án mé tsosuèhya sín.*

⁷ A ntá jahará titekáonrá tí xro kixin imá tjete. A ntá tí sín kuítekakonhya, la mé tsoxiteyá éxí ntáchro xroon itén Dios kixin:

Tí xro náxrjónhya kuítóenta tí sín ch'éna tjat'o,

mé ijie mé k'óna tí xro tjetoan.†

⁸ La ko kjaxin tsoxiteyá tí nkehe ntáchro xroon itén Dios kixin:

Tí xro mé tsóténkixin sín la mé tíha ijnko tjo tsjitsínkaxín sín.‡

Kjánchó jehe sín kóténkixin sín tí xro kixin kuítekakonhya sín tí itén Dios mé xráxín tsíkitoenxín sín xikaha tsonhen sín.

Tí sín tinkáchónki Dios

⁹ A ntá jahará tsik'axrjeníxínrá tí sín tsíkjeýá Dios la ko tsík'ónará nchat'á ch'eherá xra tí rey, la ko tsík'ónará ijnko nación tjóá, la ko tsík'ónará ijnko chjasin kuènte Dios kixin ntá tsochronkará tí xra náxrjón kuènte Dios. K'uíyahará ch'án kixin ts'axrjéxínrá tí sítíé ntá ts'ixenhénrá tí síin xrohi náxrjón t'inkaséyan kuènte ch'án. ¹⁰ A ntá jahará tí ósé la jehya chjasén Dios, a ntá jie la tsík'ónará chjasén ch'án. Tí ósé la Dios k'uékikónóahyará. A ntá jie la kuikonóahará Dios.

Chrók'uejóni ch'eheni xra Dios

¹¹ Kíchóni, xrjanóahará tí jahará kixin éxí chojni tsíkjixin ókjé chrók'uejorá ntihi chjasintajni chrókjuánjonhyará kjuachaxin chrókóxrjínhin asánrá tí nkehe síin chjasintajni, mé tí nkehe tjanjonko asánrá. ¹² Jína chrók'uejorá tí síin tí sín chónhya Dios kixin kjónté t'ántaxínhanrá sín éxí chojni jínahya chóna jie tí jahará, ichro sín, la ntá tí chrók'uikon sín kixin jína tjejoch'erá xra ntá tsjanchehe sín Dios kjuasáya tsjixraká tí yaon tsjanchia ch'án nkehe tí xra kjuich'erá.

¹³ Jahará tinkachónkirá Ìnchéni chrókjuínchexiteyéhérá kaín tí sín t'etōan kuènte chjasintajni, á tí ch'ín rey kixin imá t'etōan ch'án, ¹⁴ o á tí ch'ín gobernador ichr'án Dios kixin sinchekjasóte ch'án tí sín tjasin jie, a ntá tsjikosáyehe ch'án tí sín ch'e tí nkehe jína. ¹⁵ Dios tjinkaon kixin jína chrók'uejorá kixin tí sín noehya la ko tí sín lontj la kohya jie ts'ekará sín tí jahará.

¹⁶ Chrók'uejorá éxí chojni t'ítuenhya, a ntá tí kjuachaxin chontará jehya kixin chróchontaxínrá kjuachaxin kixin chrókjuich'erá tí jínahya. Náhí. Chrókjuákoxínrá éxí chojni ch'ehe Dios xra. ¹⁷ Chrókjuíkosáyehérá kaín chojni. Chrótjuéhérá tí sín kichó ni, la ko chróchontehérá Dios kjuasáya, la ko chrókjuíkosáyehérá tí ch'ín gobierno t'etōan.

Tóyóexin éxí tí nkehe kjuasótéxín Cristo

¹⁸ Jahará chojni ch'exón xra, chrókjuínchexiteyéhérá tí lámóará, chróchontehérá kjuasáyé sín, kjónté tí sín jína la o tí sín jínahya. ¹⁹ Tíha mé ijnko nkehe jína chrókjuákoxínrá kjónté chrókjuasótíaxínrá ijnko nkehe jínahya kixin xikaha mé chrókjuínchexiteyéhérá Dios. ²⁰ A ntá tí tjejoch'erá ichrén nkehe jínahya, ntá nchekjasótíaxínrá sín la nkehe tsonhen kixin chrókóninkákonhyará? A ntá tí chrókjuasótíaxínrá ijnko nkehe jína

* 2:6 Isías 28.16 † 2:7 Salmo 118.22 ‡ 2:8 Isías 8.14

la ntá chrókjuachará chrókóninkákonhyará, la tíha mé tóxrjínhin Dios. ²¹ Méxra xikaha k'uíyahará Dios kixin Cristo kjuasóteyákonhánrá. Tíha mé kjuakoxin ch'án kixin mé xikaha chrókjuich'erá. ²² Kixin Cristo la ninkehó jie kjuasinhya ch'án la ko ninkexró kjuích'yehya ch'án, ²³ la ko ninkehó kjuáteehya ch'án tió k'uántaxínhin sín ch'án; a ntá tió kjuínchekjasóte sín ch'án la ninkehó k'ókjanxinhya ch'án. Náhí. Jehe ch'án kjuanchia ch'án kixin Dios ts'ayakonhen tí jehe ch'án kixin Dios mé ntoá nchekitogexín ijje chojni. ²⁴ Cristo mé kuamá ch'án tí ijieni kixin tí cuérpogé ch'án kjuák'enkáni ntacruz kixin éxi tsík'enni k'uék'ejóni kixin tí jie k'uéchóntani, a ntá jie chrók'uejóni jnkojína. Kixin Cristo kjuasóte ch'án, chrít'o ch'án kixin jahará chrókuitogaxínrá jína. ²⁵ A ntá jahará k'uék'ejorá éxi kolélo tsíkijchroe. A ntá jie k'uitjará tí nkexro ts'ayakonhen asánrá.

3

Nkexrí chrók'uejó tí sín tsíkótehe

¹ Kjaxin jahará chojni chjin ó tsikótahará chrókuitekákónhénrá tí xiyará, kixin kjaxin jnkojín tí sín titekakonhya itén Dios chrókuitekaon sín kixin jína tjen tí tjachjin, kjónté t'ichjánxinhya chróchrónka tjan kixin jína tjen tjan, ² kixin chrók'uikon sín xikaha kixin jína tjen tí tjachjin chóna kjuasáyé tjan. ³ Chrókjuínchehnkexinhýará nkehe náxrjón chróchontará la ko tí nkehe náxrjón chróchóna kaxihará la ko nkehe náxrjón tsík'óna chica oro la ko tí ikará imá náxrjón. ⁴ Náhí. Chrókjuínchejínará asánrá, kixin tí nkehe náxrjón chrók'uitjáyanyha na mé tí asén chojni tójiehya la ko náxrjón. Tíha mé imá sínkí nkayakon Dios. ⁵ A ntá tí ósé xikaha k'uékjenkayáxin tí chojni chjin jína. Jehe sín mé kuinkáchónki sín Dios la ko kjuínchexiteyéhe sín xii sín. ⁶ Mé xikaha kjuích'e tjan Sara kjuínchexiteyéhe tjan tí ch'ín Abraham, mé kjaxin ntáchro tjan kixin ìnché tjan tí jehe ch'án. A ntá tí jahará tí xjeen tí jehe tjan la chrókjuínchexiteyará jína la ko ninkehó kjuachrakon chróchontahýará.

⁷ Kjaxin jahará chojni ntoará tsikótahará chróchontehérá ichjiánrá kjuasáya kixin ó nohará kixin kánhyó tsehe tjan la ko ó nohará kixin yóirá tjáhará Dios tí kjuachón. Xikaha chrókjuich'erá ntá tió chrónixjehérá Dios la kohya nkehe chrók'uinkákonhen.

Tí sín tjasótexín sín kixin jína kjuích'e sín

⁸ Méxra, jnkokoá chrókjuenkayáxinrá kaín rá chrókuikonóghérá kichuárá, chrótjuéhérá kichuárá. Jnkojína chrónixjehérá kichuárá la chrókjuínchehnkehýará asánrá. ⁹ Tí ichrén nkehe jínahya chrókjuít'ahará sín la jahará la xikahya chrókjuich'ehérá sín. Tí chrók'uántaxínhanrá sín la jahará chrók'uantaxíenhyará sín. Náhí. Íchá jína chrókjuancheherá Dios kixin chrókjuíncheyáon ch'án sín kixin Dios la k'uíyahará ch'án kixin chrók'uayéhérá kjuachaxin kuénte ch'án. ¹⁰ Kixin:

Tí nkexro tjinkaon tsotjuéhe asén kixin jína chrókjuak'e kaín yaon la chrónixjahya ch'án ninkehó nkehe jínahya la ko ninkehó kjuach'ia chrók'uaxrjexínhya ir'va ch'án.

¹¹ Tí nkexro la chrókuítoghe tí nkehe jínahya la íchá jína chrókjuich'e tí nkehe jína,

la ko íchá jína chrókjueyá ch'án kjuaxróxin chrókjuak'e ch'án.

¹² Kixin Ìnchéni t'ayakonhen tí nkexro jína la ko tinhin ch'án tí nixjehe sín ch'án,

a ntá tí sín ch'e tí jínahya la tjinkĩtsahya ch'án.*

¹³ ¿Xá nkexro chrókjuít'ahará nkehe jínahya tí jahará tjejoch'erá nkehe jína? ¹⁴ Kjónté chrókjuasótexínrá tí nkehe jína tjejoch'erá kjónté la chrókócháhará chróchrakuenhyará ninkexró la ko chróchrakonhyará. ¹⁵ Náhi. Íchá jína chrókjuíkósáyehérá Cristo nkaya asánrá kixin Ínchárá. Chrók'uejorá listo chrókjuáteherá tí nkehe chrókjuanchankíhará kaín chojni kixin nkexrí tinkachónkirá Ínchéni, la chrókjuinchehnkehyará la kjuasáya chrókjuáteherá. ¹⁶ Chróchontará ijnko kjuaxrexinkaon jína kixin ntá tí sín xrich'ia sín t'ántaxínhanrá sín kjónté jína tjejorá tinkachónkirá Cristo la mé chrókósuèhe sín kixin tí nkehe ntáchro sín la ntoáhya. ¹⁷ Íchá jína chrókjuasótiaxínrá kixin tí jína tjejoch'erá tí xikaha tjinkaon Dios, a ntá chrókósuàhará chrókjuasótiaxínrá tí ichrén jje chrókjuich'erá.

¹⁸ Kixin Cristo kjuasóte ch'án la ko k'uénxin ch'án tí jje kuènteni, ónaá k'uén ch'án kixin para jnkochrín. Jehe ch'án la jína ch'án la kjuasóteyákonhenni ch'án kjónté jínahyani, kixin ntá jína sáchrókjuikoni ch'án tí tjen Dios. A ntá ik'uén ch'án éxi chojni, a ntá Nchakuen ch'án la k'uénhya mé xechón inaá, ¹⁹ kixin tí Nchakuen ch'án sákuíjkakohé tí nchakuen tí sín tsík'en tjejóhchina. ²⁰ Tí sín a mé kuítekakonhya sín tí ósé tíó kjuák'e ch'ín Noé na mé Dios la kónínkakonhya ch'án kjuák'echónhen ch'án nachrohe sít'óna tí arca, na mé ijníkoá chojni kuítekaon sín mé kuaá sín tí kuíte sín ntá. ²¹ Tí ntá a mé tóyóhe tí tikítexín chojni ijje kixin tí xikaha tsonhenni la tsaáxinni ijje. A ntá tí tikite chojni la jehya kixin tsotjuáxin tí cuerpo. Náhi. Tsjancheheni Dios kixin sinchetjóá ch'án tí tjenkayáxinni. A ntá tí nkehe tsaáxinni la mé tí xechón Ínchéni Jesucristo, ²² mé tí nkexro sátsíkji nkaya nkajni itjen ch'án itja chjina Dios. A ntá jehe ch'án la mé t'etuénhen tí sín ángel la ko tí sín t'etoan.

4

Chrókjuich'eheni Dios xra éxi tí kjuachaxin kjuanjon ch'án

¹ Méxra éxi Cristo kjuasóte tí cuérpoé ch'án ntá kjaxínrá kjónté xikaha chrókjuasóterá chrókókakuanhyará kixin tí nkexro kjuasóte tí cuérpoé la ó kuítóhe tí jje. ² A ntá tí naxa chrók'uejochónrá intsi la chrók'uejorá éxi tóxrjnhin Dios. Jehya éxi k'uékóxrjnhanrá. ³ A ntá tí ósé nchónhya nkehe k'uékjich'erá éxi ch'e tí sín naxa chónhya Dios. K'uék'ejorá k'uékjenkayáxinrá tí nkehe jínahya la ko k'uékjásinrá jje k'uéchontará ókjé chojni chjin la ko k'uékókoanrá la k'uekjásinrá kia ntá ntiha kjuánjonxin chojni la ko k'uékinkachónkirá tí nkehe tsíkjanoya. ⁴ A ntá ijje la jahará t'itohyará tí sín a kixin tí jínahya ch'e sín. Méxra xikaha t'ántaxínhanrá sín. ⁵ A ntá tí jehe sín tsjanjon sín kuentá tsochéna sín tí nkexro tjechónhen sinchekitoxén ijje tí sín tjejóhón la ko tí sín tsík'en. ⁶ Méxra kjónté tí sín tsík'en tsixrákóhe sín tí itén Dios kixin tí nchakuen sín chrók'uejó éxi tjinkaon Dios kjónté naxa k'uéjó sín ntihi chjasintajni la kuítóexín tí ijje sín éxi tsitoxén ijje kaín chojni.

⁷ Ó kuichjina tsjeje chjasintajni a ntá xikaha chrók'uejorá jnkojina la ko chrók'uejotsjehérá chrónixjehérá Dios. ⁸ Tí nkehe imá tjetooan kixin antsí chrótjuéhérá kichuárá. A ntá tí tjuéhérá kichuárá la mé tíha chrók'uitjáyanxín tí nchónhya jje chontehérá kichuárá. ⁹ Chrókjuánjonrá kjuachaxin chrókuitohe jnkojin kichuárá ntóará chrókóninkákuénhyará

* 3:12 3.10–12 Salmo 34.12–16

nijnko tí jehe sín. ¹⁰ Jnkojnkorá nkehe tí xṛá tjáhará Dios k'uayéherá chrókjuínkĩtsará kíchuará. Xíkaha jína chrókjuákoxinrá tí kjuasáyé ch'án tjáhará ch'án kíxin nchónhya xṛá k'uayéherá. ¹¹ Tí jnkojínrá tjínkáonrá chrónixjará ichrén nkehe la chrónixjará éxí nixja itén Dios. Tí jnkojínrá tjínkáonrá chrókjuínkĩtsará la chrókjuákoxinrá tí kjuachaxin tjáhará Dios. Kaín tí xṛá chrókjuich'erá chrókjuancheherá Dios kjuasáya kíxin kjuasáyé Jesucristo tinkachónkirá tí jehe ch'án. Kíxin jehe ch'án la kaín tí kjuachaxin siín la kuènte ch'án jnkochrín. Mé xíkaha chaxín. Amén.

Íchá jína chrókjuasótexíni kíxin tí tinkáchónkini Cristo

¹² Kíchóni, chrókóxakuanhyará kjónté ichrén nkehe jínahya chrókónhanrá. Ó jehí t'ichjánxin xíkaha tsonhanrá. Chróntáchrohyará kíxin ókjé nkehe tjasótiaxinrá. ¹³ Náhí. Íchá jína chrókócháhará kíxin xíkaha chrókjuasóterá éxí kjuasótexín Cristo, kíxin kjaxinrá tsocháhará imá tíó ts'ikonrá tí kjuachaxin tsíkao Inchéni tí itsi ch'án. ¹⁴ Chrokócháhará tí t'ántaxínhanrá sín kíxin tinkachónkirá Cristo kíxin tí Nchakuen Dios chóna kjuachaxin t'ayakonhanrá. Jehe sín t'ántaxínhin sín ch'an, a ntá jahará tjikosáyehérá ch'án. ¹⁵ A ntá tí jnkojínrá tjeotjasóterá chrókókehya kíxin ichrén nkehe chrókjuich'erá chrókjuàyará o chrókueerá o ichrén nkehe jínahya chrókjuich'erá o chrókjiatérá kjuanínkaon kuènte ókjé chojni. ¹⁶ Náhí. A ntá jnkojínrá chrókjuasótiaxinrá kíxin tinkachónkirá Cristo la chrókósuàhyará. Náhí. Chrókjuancheherá Dios kjuasáya kíxin xíkaha kónhanrá.

¹⁷ Ntá jie ó kui tí tsitoxín ijje chojni mé xrankíxixín tí sín tsík'óna xjeen Dios. A ntá tí xíkaha tsitoxín ijje tí jeheni xrankíxixín, a ntá íchá tí ó tsjixixín tí sín titekakonhya tí itén Dios. ¹⁸ Íchá tí sín jína la ko xíkaha tsonhen sín ntá tsaá sín a ntá íchá tí sín jínahya chóna jie kjá antsí tjasóte sín.* ¹⁹ A ntá tí nkexro tjasóte éxí tjínkaon Dios la kjónté xíkaha la naxá chrókjuich'e sín nkehe jína la ko chrókjuanjon sín asén sín chrók'uayakonhen Dios mé tí nkexro kjuich'ena sín la mé jehe ch'án xrxín jína ch'án.

5

Tí k'úituenhen tí sín t'etōan kuènte nínko

¹ Tjínkavan tétuanhan tí chojni t'etōan kuènte tí nínko tjeorá ntiha kíxin kjaxin janhan tétōan kuènte nínko éxí tí jehe sín, a ntá janhan mé k'uúkuān kíxin nkexrí kjuasóte Cristo, la ko kjaxin janhan mé tsochonta kjuachaxin kuènte Dios éxí tsochóna tí jehe sín tíó itsi Inchéni chr'éxin. ² Jahará chrók'uayakonhénrá tí kolélo kuènte Dios ntiha kíxin xíkaha tí xṛá k'uayéherá. Jnkojína chrókjuínkĩtsará sín éxí tjínkaon Dios la jehya kíxin ijnko chojni chrók'uetuanhanrá chrókjuich'erá xṛá, la ko kjaxin jehya kíxin imá chrókóxrjínhanrá chichaon. Náhí. Kaín asánrá chrókjuich'erá xṛá jína. ³ Jehya jahará kuèntará tí jehe sín kíxin chjini chrókuétuenhénrá sín. Náhí. Jnkojína chrókjuákoéxinrá tí jehe sín. ⁴ A ntá tíó tsi tí Pastor chaxín t'etōan ntá jahará ts'ayéherá ijnko corona náxrjón tsjehya.

⁵ Kjaxin jahará ntasoará chrókjuínchexiteyéherá tí sín t'etōan kuènte nínko. Kaínrá chrókjuínchexiteyéherá kíchuará chrókjuínchehnkehýará kíxin:

* 4:18 Proverbios 11.31

Dios la tsonínkakohen tí sín nchehnke,
a ntá tí sín nchehnkehya mé tsjinkitsa ch'án.*

⁶ Méxra chrókjuinchehnkehyará, chrókjuinchexiteyéhérá Dios kixin jehe ch'án imá ts'etqan ch'án kixin tsjixraká tí yaon mé jehe ch'án tsotjáhará ch'án kjuachaxin kixin tsétqanrá. ⁷ Chróchjehérá Dios kaín tí kjuaxrexinkaon chontará kixin kjaxin jehe ch'án tóxakohen ch'án tí jahará.

⁸ Chrókóxakohanrá jína chrók'uejorá. A ntá ijie ixri tí nkexro nínkakohanrá mé tí ch'ín Tsochren éxi ijnko koxra tsjánka va xritjeyá va nkehe sine va. ⁹ Tjánjonhyará kjuachaxin kixin jehe ch'án chrókjuacha ch'án chrókjuachroerá ch'án, kixin ó nohará kixin kaín tí sín kichuára nkuixín chjasintajni xikaha tjejótjasóte sín kixin tinkáchónki sín Ìnchéni. ¹⁰ Kjánchó kánhyó sé tsjasótiará, a ntá Dios antsí tsjinkitsará ch'án kixin tsjachará ts'ejorá jína. A ntá jehe Dios a mé tjuahará ch'án la k'uíyáhará ch'án kixin ts'ejokoará ch'án jnkokoá tí tjen Jesucristo chóna kjuachaxin jnkochrín. ¹¹ Jehe ch'án tsjancheheni ch'án kjuasáya kixin chóna ch'án kjuachaxin ts'etqan ch'án jnkochrín. Amén.

Kjuixixín nixja ch'ín Pedro

¹² Ch'ín Silvano mé t'íkuan ijnko kichó ni jína mé kjuinkitsa ikjinni tí xroon kjónté kánhyó tsjé nixja, la ntaxraxinkáonrá kixin kjuíntayaonrá Dios ntá xikaha kjuakoxin ch'án kixin chaxin tjuahará ch'án. Méxra xikaha jína chrók'uejorá kixin tjuahará ch'án.

¹³ Tí njnko tjen Babilonia mé tsíkjeyá Dios éxi tsíkjeyá ch'án tí jahará nixjahará sín la ko kjaxin nixjahará ch'ín Marcos, mé éxi xjanna t'íkuan tí jehe ch'án.

¹⁴ Nixjehérá kichuára jnkojína. Kjuaxróxin chrók'uejorá tinkachónkirá Jesucristo. Amén.

* 5:5 Proverbios 3.34

Xroon yóxin tsíkjin ch'ín Pedro

Ch'ín Pedro chr'énhen ch'án tí xroon tí sín tinkáchónki Cristo

¹ Janhan Simón Pedro, na mé t'ahá xrá Jesucristo. Ikjian tí xroon ts'ayéherá jahará ó tinkáchónkirá Ìnchéni éxí tinkáchónkini jeheni kixin Dios la ko Jesucristo tí nkexro sinchekaáni na mé jína ch'án. ² Sintayaonrá Dios la ko antsí ts'ayéherá kjuaxróxin kixin ó nohará nkexrí tjen Dios la ko Ìnchéni Jesús.

Jína chrók'uejó tí sín tinkáchónki Jesús

³ Dios kjuanjon kjuachaxin tsochóntani kaín nkehe t'ichjánxinhinni kixin chrók'uejóni jína chrórxaxinkaonni tí jehe ch'án. Kixin ó noheni nkexrí tjen tí nkexro k'uíyeheni kixin tí kjuachaxin jié chóna ch'án la ko tí xrá imá jié kjuích'e ch'án. ⁴ Mé xíkaha kjuanjon ch'án kaín xín tí nkehe a, táha la mé imá jié la ko imá tjete sínkí. Mé xíkaha kjuakoxin ch'án kixin chrók'uayéherá kjuachaxin chrók'uejorá éxí tjinkaon ch'án la ko chrók'uitjéherá tí nkehe jínahya kixin chrók'uitjáyaxínhyará tí nkehe k'uékjenkayáxinrá síin chjasintajni. ⁵ A ntá jahará tinkáchónkirá Ìnchéni la kjaxin chrók'uejorá kixin chrók'uejorá jnkójina; a ntá tí jína tjejorá ntá chrók'uejorá antsí chrókónohará; ⁶ a ntá tí kónohará ntá chrók'uejorá chrók'uejorá kixin chrók'uejorá jnkójina; a ntá tí tjenkayáxinrá jína ntá chrók'uejorá chrók'uejorá kixin chrók'uejorá tjoka; a ntá tí tóninkákonhyará ntá chrók'uejorá chaxín xráxinkáonrá Dios; ⁷ a ntá tí chaxín xráxinkáonrá Dios ntá chrók'uejorá chrók'uejorá kichuára; a ntá tí tjejéherá kichuára ntá chrók'uejorá chrók'uejorá kaín chojni.

⁸ A ntá xíkaha tjejoch'erá tinkák'ánkí tí kjuaxrexinkaon kuéntará, ntá jehya kixin chónkó kuinkáchónkirá Ìnchéni Jesucristo. ⁹ A ntá tí nkexro ch'ehya xíkaha la mé éxí ijnko chojni t'íkonhya o ijnko chojni t'íkonhya jína, kixin ó k'uitjáyenhen kixin Ìnchéni ó kjuixin kjuínchetjóá tí jié k'uéchóna ósé. ¹⁰ Méxrā xíkaha kichó ni jnkójina chrók'uejorá kixin ntá tsonohará jína kixin Dios tsík'uejorá tí jahará la ko tsík'iyahará ch'án kixin xíkaha jína chrók'uejorá kixin ntá tsonohará, a ntá xitjahya chrók'uejorá. ¹¹ A ntá xíkaha chrók'uejorá ntá tsonohará Dios kjuachaxin ts'ixénhenrá tí tjen Ìnchéni Jesucristo t'etōan ch'án jnkochrín. Jehe ch'án mé tí nkexro kjuínchekaáni.

¹² Méxrā titoahya ntáxráxinkáonrá kaín tí nkehe i, kjónté ó nohará tí nkehe ntoá kjuákoahará. ¹³ Ntáxrjan kixin jína tí naxā tjén chrók'uejorá kixin ntá tsonohará kaín tí nkehe a ¹⁴ kixin Ìnchéni Jesucristo kjuínchenóna kixin í séhya its'én janhan. ¹⁵ Na mé kaín tíha tjet'a kixin tíó its'én, ntá jahará tsoxráxinkáonrá jnkochrín kaín tí nkehe kjuít'a.

Tí sín k'uikon tí kjuachaxin kuente Cristo

¹⁶ Tí nkehe kjuakoharáni kuente tí kjuachaxin kuente Ìnchéni Jesucristo la ko nkexrí itsi ch'án na mé jehya ijnko cuento kjuích'éna chojni chrók'uejorá kixin. Náhí. Ikonni k'uikonxínconi Ìnchéni la ko tí kjuachaxin kuente ch'án. ¹⁷ K'uikonni tíha tíó It'eni Dios kjuikosáyehe ch'án tí Xjeen ch'án, la ntá kuínhinni nixja Dios tjen nkaya nkajni ntáxro ch'án kixin: “Tíhi mé xjanna tjuahā ch'án. Imá chàna kixin nchexiteyá ch'án éxí

tjínkavan janhan,” ichro Dios. ¹⁸ Mé kuínhinni itén Dios kuixin nkaya nkajni kixin xikaha ntáchro tió k'uejókoni Ìnchéni chrítaón tí jna tjóá.

¹⁹ Mé xikaha k'uechrónka tí sín tsíkjín itén Dios ósé ntá noexínni kixin chaxín tsoxiteyá. A ntá jahará chrók'uejorá chrókuinhínra jína nkehe k'uéntáchoo sín kixin tí tan mé éxí ijnko xrohi t'inkaséyanxín tí sítié tsjixrakájia tí yaon ts'inkaséyan itsi tí konotsé t'inkaséyanxín tí nchítjen mé xikaha ts'inkaséyanxín nkaya asánra. ²⁰ A ntá tjetooan chrókónohará tíhi: kixin ninkehó xroon itén Dios tsík'óna jehó chojni chrókjuacha chrókienxín. ²¹ Náhí. Tí sín k'uechrónka itén Dios la nixjahya sín tí nkehe jehó sín chrókjuenkayáxin sín. Náhí. Tsíkjinchetjóá Dios tí jehe sín, a ntá Nchakuen Dios kjuínkítsa k'uénixja sín itén Dios.

2

Tí sín tjako kjuach'ia (Judas 4–13)

¹ Kjaxin k'uek'ixín tí sín ntoáhya k'uechrónka itén Dios tí chjasin Israel, mé kjaxin xikaha tí jie ts'ixín maestro sit'ayahará. Jehe sín tsochr'ákjenhen sín iso nkehe ntoáhya ts'itjáyanxín tí nkehe chaxín tsaáxinni la xikaha sinchemá sín tí Ìnchéni chrókuaáxinni. Tíha mé tsjixin tsjasótéxín tí jehe sín. ² Nchónhya chojni tsochréhe sín tí nkehe jínahya ch'e sín. A ntá tí xikaha ch'e sín la ts'ántaxíenxín chojni tí ntia ntoá kuènte Ìnchéni. ³ Tsoxrjínhin sín tsochóna sín nchónhya chichaon, ntá tsjanchiaxínra sín chichaon tí nkehe ntoáhya tsjakohará sín. A ntá tí nkehe ts'itjáyanxín sín tjechónhen la kohya nkerí tsaáxin tí jehe sín kixin ósé tjechónhen xikaha tsonhen sín.

⁴ Dios la kjónté tí sín ángel kjuasin jie la kujikonóehya ch'án sín la k'uetooan ch'án kixin sátsji sín tsjasóte sín sátsjik'ikjehe sín tí sítié na tjejóchjina sín tsjixrakájia tí tsitooxín ijíé sín. ⁵ La ko kjaxin kujikonóehya Dios tí sín k'uejó chjasintajni ósé ntá ichr'án ch'án nta kuítee tí sín jínahya, a ntá Dios kjuínchekaá jehó tí ch'ín Noé, na mé tí nkexro kjuako tí tan jína la ko kjuínchekaá ch'án tí yato sín ó.* ⁶ Kjaxin Dios kjuínchek'itjáyan tí chjasin Sodoma la ko tí chjasin Gomorra iche hasta k'óna nteso, kixin chrókónohe chojni jínahya ts'ejó chr'éxín kixin xikaha tsonhen sín.† ⁷ Kjánchó Dios kjuínchekaá ch'án tí ch'ín Lot kixin ijnko chojni jína tí jehe ch'án la ko imá kóxakonhen ch'án tí k'uíkon ch'án tí jie kjuasin tí sín jínahya. ⁸ Tí ch'ín Lot mé jína asén ch'án mé k'uekjak'e ch'án tí síin tí sín jínahya ntá kaín yaon kóxakonhen asén ch'án k'uíkon ch'án la ko kuínhin ch'án tí nkehe jínahya k'uekjich'e sín.‡ ⁹ A ntá Ìnchéni na sinchekaá ch'án tí sín kaín asén kuítekaon tí jehe ch'án kjónté nchónhya kónhen sín. A ntá tí sín jínahya la sinchekjasóte ch'án tí yaon tsitooxín ijíé chojni.

¹⁰ Dios antsí sinchekjasóte ch'án tí sín nchexiteyéhe tí nkehe jínahya ntáchro asén sín a ntá nchexiteyèhya sín tí nkehe t'etooan Ìnchéni. Titekakonhya sín la ko chrakonhya sín chrók'uántaxínhin sín tí sín ángel chóna kjuachaxín. ¹¹ A ntá tí sín ángel imá tsehe sín la ko imá chóna sín kjuachaxín la kjónté tjinkakonhya ts'ántaxínhin tí sín a nkayakon Ìnchéni.

¹² A ntá tí chojni a la éxí yóhe iko tjenkayáxinhya ninkehó la nchexiteyéhe tí nkehe ntáchro asén, la kokjíhi kixin ts'óyán kichó ó. T'ántaxínhin

* 2:5 Génesis 6.1–7.24; 8.18 † 2:6 Génesis 19.24 ‡ 2:8 2.7–8 Génesis 19.1–16, 29

sín tí nkehe tienxínhya sín, mé xíkaha its'en sín éxí its'en tí ko a. ¹³ Tíha mé tsjasótéxín sín kixin jehe sín kjuínchekjasóte í so chojni. Xráxín tóxrjínhín sín ich'e sín tí nkehe ntáchro asén sín. Ijnko kjuatósuehé kixin tjejóntaxín sín ntekoará sín tí kia chontará la kjónté tí xíkaha la naxá tjasin sín jie.

¹⁴ Kohya nijnko chojni chjin chrokjuasinkohya sín jie. Tóxrjéhya sín tjasin sín jie tsjasótéxín sín. ¹⁵ Kuítóhe sín tí ntja ntoá ntá chréhe sín ntja kuènte ch'ín Balaam xjeen ch'ín Beor, kixin kóxrjínhín ch'án chrókjuacha ch'án nchónhya chichaon tí nkehe jínahya chrókjuich'e ch'án. ¹⁶ A ntá t'ichjánxín tsjasóte ch'án kixin tí jie kjuasin ch'án. A ntá ijnko kolócho chjin xitjahya nixja la xrinahya nixja itén chojni la kjuentuéhe tí ch'ín Balaam kixin tí jie chóna ch'án ntá kuítóhe ch'án tí nkehe jínahya chrókjuich'e ch'án. §

¹⁷ Tí chojni tjako mé éxí yóhe tòye tjiáhya ntá la ko éxí tjuí tjakáko xrinto ó; ó kjuixín k'uítuénhen sín sátsji sín tí imá sítié tsjasóte sín jnkochrixín. ¹⁸ Kaín nkehe jínahya nixja sín, a ntá tí jie tjasin sín tóxrjínhín sín chojni chjin ókjé ntá tjachroexín sín tí sín na ntá tjinkaon chrókuítóhe sín tí jie. ¹⁹ Chrónka sín kixin kaín nkehe jínahya la jína, kixin jehe sín nchexiteyéhe sín tí nkehe jínahya ntoáhya; kixin jnkojnko chojni mé nchexiteyéhe tí nkehe kjuacha k'ueúenhen sín. ²⁰ A ntá tí nkexro ó chóxin Ìnchéni Jesucristo tsaáxinni mé kuítóhe sín tí nkehe chrók'uitjáyanxín sín kuènte chjasintajni. A ntá chr'éxín tí chrókuakja sín ntja jínahya inaá tí chrókjuacha tí jínahya chrókjuachroe sín, a ntá antsí má jínahya chrókónhen tí jehe sín. ²¹ Íchá jína chrókónoehya sín tí ntja jína. A ntá jehya jína tí ó nohe sín ntá tsítóhe sín tí nkehe k'ueútoan Dios kuínhin sín. ²² A ntá tí jehe sín kjuínchexiteyá sín éxí ntáchro tí proverbio kixin: “Tí konjā t'ókjan ntá xíkjan xíkine inaá, * la ko tí cochíno na ntá tsik'ónti tjóá ntá xíkjan kjíankí tí nchet'o kjjā.”

3

Tiò tsi Ìnchéni

¹ Kíchóni tjuahará tíhi la xroon yóxin ikjian ts'ayéhérá. Yóí tí xroon a ntáxráxinkáonrá kixin jína chrókjuenkayáxinrá. ² Chróxráxinkáonrá tí nkehe tsichrónka tí sín k'ueúchrónka itén Dios ósé la ko tí nkehe k'ueútoan Ìnchéni, mé tí nkexro tsaáxinni, kjuakohará tí sín kjueyá ch'án.

³ Tjetoan chrókónohará tíhi kixin tí yaon tsjixixín la itsi chojni tsjanoá tí tan jína kuènte Ìnchéni, la sinchexiteyéhe sín kaín nkehe jínahya ntáchro asén sín. ⁴ Tsjanchankí sín nkehe kónhen tí nkehe tsintáchro Cristo kixin tsokjan ch'án, kixin desde ik'uén tí sín tsík'axrjenixinni k'uejó ósé la xíkahó naxá sítónhen éxí tió k'óna chjasintajni. ⁵ Tí sín a titekakonhya sín kixin ósé k'ueúnixja Dios ntá k'óna nkajní la ko chjasintajni na mé kjuin tí ntá ntá kuítóhe nonte xámá. ⁶ A ntá tí ntá k'uitjáyanxín chjasintajni inaá. ⁷ A ntá tí nkajní la ko tí chjasintajni naxá tjejó jie tjejóchónhen tsoche kixin xíkaha k'ueútoan Dios kixin xrohi tsochexín tí yaon tsjixixín tsitoxén ijie chojni la ko kaín tí sín jínahya tsjasóte sín.

⁸ A ntá kíchó ni, chrók'uitjáyanhyará kixin Ìnchéni tí ijnko yaon t'ikon ch'án éxí mil nánó la ko mil nánó t'ikon ch'án éxí ijnko yaon ó.* ⁹ Ntá Ìnchéni í séhya sinchexiteyá ch'án tí nkehe tsintáchro ch'án la jehya

éxi tjenkayáxin í so chojni kixin ó má sé tjejóchónhen sín. Náhí. Jehí tjechónhen ch'án kixin ninkexró chrók'uitjáyanhya kixin tjinkaon ch'án kixin kaín chojni chrókjan sín chrókuinkáchónki sín Dios.

¹⁰ A ntá tí yaon tsokjan Ìnchéni mé tsí éxi xíchee itsi tí tie. A ntá tí nkajní ts'itjáyan, la mé nchónhya kjuachrakon ts'ixikónhen ts'ixikóvékjan. A ntá kaín nkehe sínkáni nkajní na mé ts'itjáyan tsoche, la ko tí chjasintajni tsoche la ko kaín nkehe síin.

¹¹ A ntá tí xíkaha kaín nkehe ts'itjáyan, a ntá jahará la jína chrók'uejorá chrórxáinkáonrá Dios. ¹² Chrók'uejochonhénrá tí yaon itsi Dios chrókóxakonhanrá chrókjuich'erá xrá kixin ntá tjoka chrókui Ìnchéni. A ntá tí yaon tsjixixín mé ts'itjáyan nkajní tsoche, la ko kaín nkehe tsóxika ts'itjáyan kixin imá tsosóa. ¹³ A ntá jeheni tjejóchónhenni nkajní nixin la ko chjasintajni nixin éxi tsintácho Dios kixin tsjanjon ch'án. A ntá ntiha la mé imá náxrjón la ko kjuaxróxin ts'ixin tí chojni jína.

¹⁴ Méxra xíkaha kichó ni, nachrohe tjejochonhénrá kixin itsi tí yaon tsonhen xíkaha la kaín asánrá chrókjuéyará jnkójina chrók'uejorá kixin ts'ikon Dios kixin kjuaxróxin tjejorá chontahyará jie. ¹⁵ Chrókónohará kixin naxá tjechónhen Ìnchéni, tjokahya itsi ch'án kixin í so chojni naxá chrókuitekaon sín ch'án. Kjaxin xíkaha tsíkjin tí kichó ni Pablo tí xroon chr'ánhanrá ch'án éxi tí kjuachaxién Dios tsík'áyéhe ch'án chrónka xíkaha. ¹⁶ Jnkójnko tí xroon tsíkjin ch'án nixja xíkaha la imá xrá chrókiénxín chojni. A ntá tí sín noehya la ko tí sín kánhyó tinkáchónki Ìnchéni ntá tienxínhya sín la ntá ntoáhya tjako sín nkexri t'axrjexín tí nixja tí xroon tsíkjin ch'án la ko kjaxin ntoáhya tjako sín í so nkehe nixja xroon itén Dios. Ntá xíkaha jehó sín tjejá sín nkehe ts'itjáyanxín sín.

¹⁷ Méxra kichó ni, ó nohará tí nkehe senó, ntá chrókóxakonhanrá kixin chrókjuachruèhyará tí kjuach'ia xriko tí sín jínahya ntá chrókuítóhéré tí nkehe jína ntoá tinkáchónkirá. ¹⁸ Ìchá jína antsí má chróchoxínrá Ìnchéni Jesucristo, mé tí nkexro sinchekaáni la ko antsí chrók'uánkí tí kjuachaxién ch'án chróchontará. Méxra tsjikosáyeheni ch'án ijie la ko jnkochrín. Amén. Ó tjen.

Tí xroon saoxín tsíkjin ch'ín Juan

Tí tan tjanjon kjuachón

¹ Ikjinni tí xroon i ts'ayéherá kixin tsonohará kuente tí nkexro xráxin kjuák'e tí naxa t'ónahya chjasintajni, mé tí nkexro kuínhinni nixja la ko tí nkexro k'uikónxin konni. Kixin tí nkexro mé k'uikónni la ko tí nkexro kuákóxin tjani, mé tí nkexro nixja tí tan tsjanjon kjuachón. ² Kjuakoxin ch'án nkexrí kjuák'e ch'án, a ntá kaín tí jeheni k'uikónni ch'án, mé xikaha chrónkaxinni nkexrí kjuák'e ch'án; a ntá tjakuexinni tí jahará nkexrí tjen tí kjuachón jnkochrín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni. ³ Chrónkaxinni tí nkehe k'uikónni la ko tí nkehe kuínhinni, kixin kjaxinrá jnkokoá chrókuinkachónkirá éxi tinkáchónkini tí jeheni, éxi tí jeheni jnkokoá tinkáchónkini It'éni Dios la ko tí Xjeen ch'án Jesucristo. ⁴ Mé xikaha ikjinni tí nkehe i, kixin chrókuintaxín chrókócháhará la ko chrókóchéni.

Dios mé tí xrohi

⁵ Tí tan i mé Inchéni Jesucristo kjuakohe tí jeheni, a ntá jie tjakoharáni tí jahará, kixin Dios mé tí xrohi, a ntá kohya ninkehó sítié tí tjen tí jehe ch'án. ⁶ A ntá tí tsontáchroni kixin tinkáchónkini tí jehe ch'án, a ntá naxa ixrini tí ntja sítié, na mé xikaha ch'iani kixin ch'ehyani tí nkehe ntáchroni. ⁷ A ntá tí xritjejóni tí t'inkaséyan kixin tí Dios mé jehe ch'án tí t'inkaséyan, na mé xikaha jnkokoá tinkáchónkini ch'án, a ntá tí ijnié Xjeen ch'án Jesucristo mé ts'ijmáxin kaín jie chóntani.

⁸ Tí chróntáchroni kixin ninkehó jie chóntahyani, mé xikaha la jehóni ch'iyeheni asénni, a ntá tí nkehe chaxín la chóntahyani. ⁹ A ntá tí tsontáchroni kixin chóntani jie, a ntá tsonoheni chaxín kixin itjen ijnko Dios la jina ch'án la ts'itjáyenhen ch'án kaín jie chóntani la ko sinchetjóáni ch'án kixin kaín tí nkehe jínahya kjuích'eni. ¹⁰ A ntá tí tsontáchroni kixin kjuasinhanyi ninkehó jie, la éxi chróntáchroni kixin Dios la ch'ia ch'án, a ntá tí xikaha tsixroni la chaxínhya tsík'áyéheñi tí tan kuente ch'án.

2

Cristo mé tsonixjayákonhenni ch'án

¹ Kichóni, éxi xjanna t'ikuán tí jahará, a ntá tjékjian tí xroon ts'ayéherá tsochrónka kixin chrókuásinhyará jie. A ntá tí jnkójnra chrókuásinrá jie la chóntani ijnko nkexro tsonixjayákonhenni nkayakon It'éni Dios, tíha mé Jesucristo, la jehe ch'án mé ijnko nkexro jina. ² Jesucristo mé k'uenyákonhenni ch'án kixin tí jie chóntani; a ntá jehya ijieni ó. Náhí. Ijie kaín chojni siín chjasintajni.

³ Tí tsitekaonni tí nkehe k'uetoan Dios ntá tsonoexinni chaxín kixin chóxinni ch'án. ⁴ A ntá jnkójn nkexro ntáchro kixin chóxin Dios, a ntá titekakonyha tí nkehe tsík'etoan Dios, la mé ch'ia la noehya tí nkehe chaxín. ⁵ A ntá tí nkexro titekaon tí nkehe tsík'etoan Dios la chaxín tjuèhe Dios; mé xikaha noheni kixin chaxín jnkokoá tjejókoni ch'án. ⁶ Tí nkexro ntáchro kixin chaxín tinkáchónki Dios chrókjuak'e éxi kjuák'e Jesucristo.

Tí mandamiento nixin

⁷ Kíchóni, méxra tí nkehe tjékjian jehya ijnko nkehe nixin tsík'etōan Dios. Náhí. Tíha mé tí nkehe k'uayéherá tí xrankíxín, mé tí mandamiento ósé tjen, mé tí nkehe ó tsíkinhínra. ⁸ Kjánchó tí nkehe ikjian mé yóhe ijnko nkehe nixin, éxí kjuakoxín Cristo mé xíkaha tjakoxínni, kixin tí sítié la tinkák'itjáyān kixin ijie la ó t'inkaséyanxín tí xrohi chaxín.

⁹ A ntá tí nkexro tsonáchro kixin ixri tí t'inkaséyan, a ntá naça nínkakonhen kichó, na mé tí xíkaha naça itjen tí sítié a. ¹⁰ A ntá tí nkexro tjuèhe kichó mé tjen tí t'inkaséyan, a ntá xíkaha jína tjen, chóntahya jje la chrókjuachruèhya ch'án ninkexró kixin chrókjuasin sín jje inaá. ¹¹ A ntá tí nkexro nínkakonhen kichó mé tjejó sín la ko ixri sín tí sítié a la ko noehya sín nketí nó sátsji sín kixin tí sítié la kjuích'éna ntakótān sín.

¹² Éxí xjanna t'íkuan tí jahará, la méxra tjékjian tí xroon ts'ayéherá kixin tsonohará kixin kjuachaxin ihnié Dios kjuínchetjuáxinrá tí ijjará kixin k'uenyákonhenni Inchéni Jesucristo. ¹³ Jahará it'é xjan, ikjian tí xroon ts'ayéherá jahará kixin choxínra tí nkexro tjen tí xrankíxín. A ntá jahará ntasoírá kjaxin ikjian tí xroon ts'ayéherá jahará kixin kjuachará kixin kjuachahya tí Jínahya chrók'uetuanhanrá.

Ikjian tí xroon ts'ayéherá jahará chánjanrá, kixin choxínra It'eni. ¹⁴ A ntá jahará it'é xjan ikjian tí xroon ts'ayéherá kixin ó choxínra tí nkexro itjen tí xrankíxín tí naça t'ónahya chjasintajni. Ikjian tí xroon ts'ayéherá jahará ntasoírá, kixin naça fuérterá, la ko k'uayéherá tí itén Dios, la ko kjuachará kixin kjuachahya Tsochren chrók'uetuanhanrá.

¹⁵ Chrótjuèhyará tí chjasintajni la ko ni tí nkehe síin chjasintajni. A ntá tí chojni tjuèhe tí chjasintajni, na mé chaxínhya tjuèhe sín It'eni Dios. ¹⁶ Kixin ninkehó tí nkehe chrókjuanjon chjasintajni chrókuixín tí tjen It'eni Dios. Tí nkehe tjinkaon tsjanjon chjasintajni na mé tíhi, mé tí nkehe jínahya chrókjuich'eni, la ko tí chrókjuak'e asénni tí nkehe ts'ikonni, la ko tí kjuahnke xrikoni kixin itsjé nkehe chróchóntani. ¹⁷ A ntá tí chjasintajni sitinkákjeje la ko tí nkehe jínahya tjenkayáxin chojni; a ntá tí nkexro nchexiteyá tí nkehe tóxrjnhjn Dios mé ts'ejó sín jnkochrín.

Tí nkehe chaxín la ko tí nkehe kjuach'ia

¹⁸ Éxí xjanna t'íkuan tí jahará, la chrókónohará kixin ó kuichjina tí yaon tsjixixín. Jahará ó kuínhínra kixin ó tsi tí nkexro nínkakonhen Cristo. A ntá ijie tinkákónoxín nchónhya tí sín a, mé noexínni kixin ó kuichjina tí yaon tsjixixín. ¹⁹ Jehe sín tsík'axrjekjanxín sín tí tjejóni; kjánchó chaxínhya kuinkáchónki sín éxí tinkáchónkini. Náhí. Tí chaxín chrókuinkáchónki sín éxí tinkáchónkini la chrók'uaxrjekjanxínhya sín tí tjejóni, naça chrók'uejókoni sín jnkokóá. A ntá xíkaha kónhen k'uaxrjekjan sín kixin tsonoxín kixin kuinkáchónkihya sín éxí tinkáchónkini.

²⁰ A ntá jahará la Cristo tsíkjanjon Nchakuen ch'án tsík'ayéherá kaín rá, ntá jie tiénxinrá intsí kuénte ch'án. ²¹ Ikjian tí xroon ts'ayéherá kixin ó nohará tí nkehe chaxín, jehya kixin chrókónoahyará; jahará la ó nohará kixin nijnko kjuach'ia tixínhya tí nkehe chaxín.

²² ¿Xá nkexro tí ch'ia? Mé tí nkexro ntáchro kixin Jesús la jehya tí Cristo. Tí nkexro a mé nínkakonhen Cristo, mé titekakonhya It'eni Dios la ko tí Xjeen ch'án. ²³ A ntá tí nkexro titekakonhya tí Xjeen Dios la kjaxin chóntahya sín tí It'é ch'án, a ntá tí nkexro chrónka kixin chóxin tí Xjeen Dios mé kjaxin chóxin sín tí It'é ch'án.

²⁴ Méxra tí nkehe tsíkinhínrá tí xrankíxixín la chróxráxinkáonrá jnkochríxín. A ntá xíkaha tí chróxráxinkáonrá jnkochríxín tí nkehe tsíkinhínrá tí xrankíxixín, la kjaxín xíkaha jnkokoá chrókuinkachónkirá tí Xjeen Dios la ko tí It'é ch'án. ²⁵ Kíxín Jesucristo tsíntáchro ch'án kíxín tsjanjon ch'án tí kjuachón jnkochríxín.

²⁶ Méxra xíkaha tjékjian tí xroon i ts'ayéhérá kíxín chrókónohará kuènte tí sín tjinkaon chrókjuit'ayahará. ²⁷ Kjánchó jahará la ó chontará Nchakuen Dios tsítjáhará Jesucristo, a ntá xíkaha la í t'ichjánxínhya kíxín ókjé nkexro chrókjuakohará, kíxín tí Nchakuen Dios mé tjakohará kaín xín nkehe, mé tjako tí nkehe jína la jehya kjuach'ia tíha. A ntá chaxín chrókuinkachónkirá Cristo éxí kjuako tí Nchakuen ch'án.

²⁸ A ntá jie éxí xjanna t'íkuan tí jahará, chrókuítóéhyará chrókuinkachónkirá Cristo, kíxín tió tsi ch'án la antsí chróchoxínrá ch'án la ko chrókósuàhyará chrókóhjinará tió tsi ch'án, ²⁹ kíxín ó nohará kíxín Jesucristo la jína ch'án. A ntá chrókónohará kíxín kaín nkexro jína la xjeen Dios tíha.

3

Tí sín xjeen Dios

¹ Chrókónohará kíxín It'éni Dios, imá tjuèhe tí jeheni kíxín nchek'in ch'án xjeen ch'án tí jeheni, la mé chaxín jeheni tíha. Mé xíkaha tí sín chjasintajni chónhya sín tí jeheni kíxín jehe sín la xráxín chónhya sín Dios.

² Mé xíkaha kíchó ni, ó tsík'ónani xjeen Dios, a ntá naxa tjakoxínhya ch'án nkehe tsonhenni tí tsjixixín. Kjánchó ó noheni kíxín tió itsi Ìnchéni Jesucristo la ts'ónani éxí tí jehe ch'án, kíxín ts'íkonní kíxín nkexrí tjen tí jehe ch'án. ³ A ntá kaín nkexro tjejóhónhen tí tsi ch'án la chrókuítóe sín ijje sín kíxín tsotjóá sín kíxín jehe ch'án la tjóá ch'án.

⁴ Kíxín kain tí nkexro tjasin jie mé jínahya ch'e sín, kíxín tió tjasin chojni jie la mé xíkaha kuítékakonhya sín tí ley a. ⁵ Jahará ó nohará kíxín Jesucristo kui chjasintajni kíxín tsjatsen ch'án tí ijieni, a ntá jehe ch'án la ninkehó jie chónthaya ch'án. ⁶ Mé xíkaha kaín tí sín chaxín tinkáchónki tí jehe ch'án la mé tjasinhya sín jie; a ntá kain tí sín tinkákjasin jie la tsík'íkonhya sín ch'án la ko xráxín chónhya sín ch'án. ⁷ Éxí xjanna t'íkuan tí jahará; méxra chrókuítóéhyará kíxín ninkexró chrókjuit'ayahará; a ntá tí nkexro ch'e nkehe jína la jína ch'án, kíxín Ìnchéni la jína ch'án. ⁸ A ntá tí nkexro xritjasin jie la mé kuènte tí Jínahya; kíxín tí Jínahya mé kjuankíxín kjuasin jie desde tí xrankíxixín k'óna chjasintajni. Méxra tí Xjeen Dios mé kui chjasintajni kíxín sinchek'itjáyan ch'án kaín tí xra kjuích'e tí Jínahya.

⁹ Nijnko tí chojni tsík'axrjeníxín Dios naxa chrónkákjasin jie, kíxín ó chóntha tí kjuachón kjuanjon Dios; la í xitjahya naxa chrókjuasin jie kíxín ó tsík'óna xjeen Dios. ¹⁰ Mé xíkaha tónoxín kíxín nkexro tí xjeen Dios la ko nkexro tí xjeen tí Jínahya, kíxín tí nkexro ch'ehya tí jína la ko tjuèhya kíchó mé jehya xjeen Dios tíha.

Chrótjuèheni kíchó ni

¹¹ Méxra tí tan tsíkinhínrá tí xrankíxixín mé tíhi, kíxín chrótjuèheni kíchó ni. ¹² Chrókjuich'ehyani éxí kjuích'e ch'ín Caín, kíxín jehe ch'án mé kuènte tí Jínahya, kíxín k'óyán ch'án tí kíchó ch'án. ¿Nkekuènte kíxín k'óyán ch'án? Kíxín tí ch'ín Caín la tí nkehe jínahya kjuích'e ch'án, a ntá tí kíchó ch'án la kjuích'e ch'án tí nkehe jína.

¹³ Kíchóni, chróchrakonhyará tí nínkakonhanrá tí sín síin chjasintajni. ¹⁴ A ntá noheni kixin k'uatšinkani tí kjuach'én, a ntá kjuachón, mé noexínni tíhi kixin tjuèheni kichó ni. Tí nkexro tjuèhya kichó la éxi tsík'en sín xikaha xritjejó sín. ¹⁵ Kaín tí nkexro imá nínkakonhen kichó na mé chojni tjàya tíha, la ko ó nohará kixin ijnko chojni tjàya la xitjahya tsochóna kjuachón jnkochríxín. ¹⁶ Ó noheni kixin nkexro tí tjuèheni, kixin Ìnchéni Jesucristo mé k'uenyákonhenni ch'án; kjaxin jeheni kjónté chrók'uenyákonhenni tí sín kichó ni. ¹⁷ A ntá tí tjen ijnko nkexro rico t'ikon kixin ijnko tí kichó ch'án t'ichjánxinhin nkehe, a ntá tí tsjinkítsahya tí kichó, ¿a ntá nkexrí chrótjuèhe ch'án Dios kaín asén ch'án? ¹⁸ Éxi xjanna t'íkuañ tí jahará, méxra chrótjuèxínhyani tí kichó ni tí tan náxrxón chrónixjani ó. Náhí. Chrókjuakoxínni tí nkehe jina chrókjuich'eni.

Jina tsochjineheni tí tjen Dios

¹⁹ Tíha mé noexínni kixin chaxín ntoá tjejóni, a ntá chrókónoheni kixin chaxín tjejóni éxi tjinkaon Dios. ²⁰ A ntá tí tjoni asénni kixin chóntani ichrén jie, a ntá Dios la imá nohe ch'án la nohe ch'án kaín nkehe tónhen asénni. ²¹ Mé xikaha kichó ni, tí tjothya asénni kixin naxa ichrén nkehe jínahya tjenkayáxinni, a ntá antsí jina tsochjineheni tí tjen Dios, ²² a ntá jehe ch'án tsjanjon ch'án kaín nkehe tsjancheheni ch'án, kixin nchexiteyéheni tí nkehe k'uetōan ch'án la ko ch'eni tí nkehe tóxrxínhin ch'án. ²³ Tí nkehe tsík'etōan ch'án la mé tíhi kixin chrókuitekaonni tí Xjeen ch'án Jesucristo, la ko chrótjuèheni kichó ni éxi k'uetōan ch'án. ²⁴ Tí nkexro nchexiteyéhe tí nkehe k'uetōan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé noexínni kixin jehe ch'án tjejókoni ch'án kixin tí Nchakuen ch'án tsíkjanjon ch'án.

4

Tí Nchakuen Dios la ko tí nchakuen tí nkexro nínkakonhen Cristo

¹ Kíchóni, chrókuitekákonhyará kaín tí sín ntáchro sín kixin Nchakuen Dios mé nixjaxin tí jehe sín. Náhí. Chrótsjehérá tí nkehe ch'e sín kixin chrókónohará kixin á chaxín chóna sín Nchakuen Dios o náhí, kixin tí chjasintajni la ixri nchónhya chojni ch'ia, ntáchro sín kixin nixja sín tí itén Dios. ² A ntá xikaha mé chrókónoaxínrá kixin á chaxín chóna sín Nchakuen Dios kixin kaín tí sín chaxín titekaon sín kixin Jesucristo ikui éxi chojni mé chóna sín Nchakuen Dios. ³ A ntá tí nkexro titekakonhya kixin xikaha tsíki Jesús, na chóntahya sín Nchakuen Dios. Náhí. Chóna sín tí nchakuen tí nkexro nínkakonhen Cristo. Jahará ó kuínhínrá kixin itsi tí nchakuen a, a ntá jie ó tsíki chjasintajni.

⁴ T'íkuañ tí jahará éxi xjanna, kixin jahará la ó titekáonrá Dios, a ntá kjuachará kixin kjuachahya tí sín ch'ia chrók'uetōan, kixin tí nkexro tjejókoará la imá t'etōan, a ntá tí nkexro t'etōan chjasintajni la kánhyó t'etōan. ⁵ Kixin jehe sín la kuènte chjasintajni ó, méxra nixja sín tí nkehe kuènte chjasintajni ó. A ntá tí chojni kuènte chjasintajni ó mé tjejóntinhin sín. ⁶ A ntá jeheni mé xjeen Dios. A ntá tí sín chóxin Dios mé tjejóntinhin sín tí nkehe tjakoni. A ntá tí nkexro chónhya Dios mé tjinkakonhya sín chrókuinhin sín tí nkehe tjakoni. A ntá tíha mé tjatsōanxínni nkexro chóna tí Nchakuen tí nkexro chaxín la ko nkexro chóna tí nchakuen tí nkexro xrich'ia.

Dios mé tjuèheni

⁷ Kíchóni, méxra chrótjuèheni kíchó ni, kixin tí tjuèheni kíchó ni mé tixín tí tjen Dios. Kaín nkexro tjuèhe kíchó mé xjeen Dios, la ko chóxin Dios. ⁸ A ntá tí nkexro tjuèhya kíchó na mé chónhya Dios kixin Dios la xráxin tjuèhe chojni. ⁹ Dios la ó kjuakoxín ch'án kixin tjuèhe tí jeheni kixin tsíchr'án ch'án tí jnkokoá Xjeen ch'án chjasintajni kixin tsochóntaxinni kjuachón tí jehe ch'án. ¹⁰ A ntá tí tjuèheni Dios la mé tíhi: jehya kixin jeheni k'uétjuèheni tí jehe ch'án. Náhí. Jehe ch'án mé xráxin tjuèhe ch'án tí jeheni, a ntá ichr'án ch'án xjeen ch'án k'uenyákonhenni kixin tsotjuáxin tí jie chóntani.

¹¹ Kíchóni, a ntá tí xikaha Dios tjuèhe tí jeheni, a ntá kjaxinni jeheni xikaha chrótjuèheni kíchó ni. ¹² A ntá Dios la ninkexró k'uíkonhya. Kjánchó tí chrótjuèheni kíchó ni la Dios ts'ejókoni ch'án, a ntá tsjinkitsa ch'án kixin chaxín tsotjuèheni kíchó ni. ¹³ Tíhi mé noexínni kixin tjejókoni Dios la ko jehe ch'án tjejóko tí jeheni kixin tsíkjanjon ch'án tí Nchakuen ch'án chóntani. ¹⁴ Jeheni mé k'uíkonxín konni la mé chrónkaxínni kixin It'éni Dios tsíchr'án ch'án Xjeen ch'án kixin tsaáxin chojni síin chjasintajni. ¹⁵ A ntá jnkójín nkexro titekaon la ko chrónkaxín kixin Jesús mé Xjeen Dios mé tjejóko Dios la ko Dios mé tjejóko tí jehe sín.

¹⁶ Mé xikaha mé noexínni la ko titekaonni kixin Dios la tjuèhe tí jeheni. Dios mé xráxin tjuèhe chojni, a ntá tí nkexro tjuèhe Dios mé tjejóko Dios la ko Dios tjejóko tí jehe sín. ¹⁷ Mé xikaha chaxín chrótjuèheni Dios kixin ntá chróchrakonhyani tí yaon tsitoxén ijjéni kixin ó noheni kixin Jesucristo la tjuèheni ch'án la ko jeheni la kjaxin tjuèheni tí jehe ch'án. ¹⁸ Kixin tí tjuèheni Dios la kohya kjuachrakon. Tí chaxín tjuèheni Dios la tíha mé tsakitsje tí kjuachrakon. A ntá chojni chrakon mé chaxín tsjasóte. A ntá jnkójín chojni chrakon la mé chaxínhya tjuèhe Dios.

¹⁹ A ntá jeheni la tjuèheni Dios kixin jehe ch'án senó tjuèhe ch'an tí jeheni. ²⁰ A ntá jnkójín nkexro ntáchro kixin jehe mé tjuèhe Dios, a ntá tuénxín nínnakohen kíchó mé kjuach'ia xriko. Tí tjuèhya ch'án tí kíchó chóxin ch'án, la kjaxin xitjahya tsotjuèhe Dios kixin tsík'ikonhya ch'án Dios. ²¹ Tíhi mé tsík'etōan Jesucristo kixin tí nkexro tjuèhe Dios la mé kjaxin chrótjuèhe kíchó.

5

Tí tinkáchónkini Dios la tsjachahya tí chjasintajni

¹ Kaín nkexro titekaon kixin Jesús mé tí Cristo la jehe mé tsík'axrjeníxin Dios; a ntá tí nkexro tjuèhe tí it'é tí xjan mé kjaxin tsotjuèhe tí xjeen tí nkexro a. ² A ntá tí tjuèheni Dios la ko nchexitéyáni tí nkehe t'etōan ch'án, a ntá noheni kixin kjaxin tjuèheni tí sín tsík'óna xjeen Dios. ³ Tí tjuèheni Dios la t'ichjánxin kixin chrókuitekaonni tí nkehe k'uetōan ch'án, kixin tí nkehe t'etōan ch'án la jehya ijnko nkehe imá xra ⁴ kixin kaín chojni tsík'óna xjeen Dios tsjacha, la ntá tí chjasintajni la náhi. A ntá tí tinkáchónkini Ìnchéni la mé tsjachaxínni la tsjachahya tí chjasintajni. ⁵ A ntá tí sín tinkáchónki kixin Jesús mé tí Xjeen Dios mé tsjachahya tí chjasintajni ts'etūenhen sín.

Tí nkehe chrónkaxín nkexrí tjen tí Xjeen Dios

⁶ Tíó kui Jesucristo la kjuakoxín tí ìnta la ko tí jni. La jehya kixin jehó tí ìnta kjuakoxín ch'án. Náhí. Kjaxin ìnta la ko ijni kjuakoxín ch'án. A ntá tí Nchakuen Dios mé chrónkaxín tíha, kixin tí Nchakuen Dios la chaxín

ntoá. ⁷ Siín iní nkexro chrónkaxín nkaya nkajní: ijnko la It'eni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha. ⁸ A ntá siín iní tí nkehe chrónkaxín ntíhi chjasintajni, mé tí Nchakuen Dios, la ko tí intá la ko tí jni; a ntá tí iní mé jnkokón chrónka. ⁹ ¿Á chrókuitekaonni tí nkehe chrónka chojni ó? A ntá tí nkehe tsichrónka Dios, antsí má tjeoan kixin táha la Dios tsichrónkaxín kixin nkexrí tjen tí Xjeen ch'án. ¹⁰ Tí nkexro titekaon tí Xjeen Dios na mé asén ó tónoexín tíha. A ntá tí sín titekakonhya sín Dios, la ntáchro sín kixin Dios la ch'ia ch'án kixin kuítekakonhya sín tí nkehe tsintáchro Dios kixin nkexrí tjen Xjeen ch'án. ¹¹ Tí nkehe tsichrónka Dios mé tíhi kixin tsjanjon ch'án kjuachón jnkochrín, a ntá tí kjuachón mé chóna tí Xjeen ch'án. ¹² A ntá tí nkexro chóna tí Xjeen Dios mé kjaxin chóna kjuachón; a ntá tí nkexro chónahya tí Xjeen Dios la mé chónahya kjuachón.

Chrónkaxín nkehe kuènte kjuachón

¹³ Tí nkehe mé kjinni kixin jahará ó titekáonrá tí Xjeen Dios, kixin mé tsonoaxínrá kixin chaxín chontará kjuachón jnkochrín.

¹⁴ Tíhi mé chóxixínni Dios kixin noheni kixin ichrén nkehe tsjancheheni ch'án éxí tjinkaon ch'án la jehe ch'án la tsinhin ch'án. ¹⁵ A ntá tí xikaha ó noheni kixin Dios tjetinhin tí nkehe nixjeheni ch'án, a ntá kjaxin ó noheni kixin ó chónatani tí nkehe kjuancheheni ch'án.

¹⁶ A ntá jnkójnra ts'ikonra ijnko kichuára tjasin jie, a ntá tí jehya ijnko jie chrók'uenxín ch'án, la chrókjuancheherá Dios kixin chrókjuinchexraxinkaon ch'án kixin kjuasin ch'án jie, a ntá Dios chrókjuanjon ch'án kjuachón, tí chaxín jehya ijnko jie chrók'uenxín chojni. A ntá tí jie chrók'uenxín chojni la ntáxrjan kixin íchá jina chrókjuanchehyará Dios kixin chrókjuinkitsa tí ch'in a. ¹⁷ Kaín nkehe jínahya la ijie tíha. Kjánchó siín jie ts'enxínhya chojni.

¹⁸ Ó noheni kixin tí nkexro tinkáchónki It'eni Dios tjasinhya sín jie, kixin tí Xjeen Dios tjinkitsa tí jehe sín, a ntá tí Jínahya tsjachahya tsjachroe tí jehe sín.

¹⁹ Ó noheni kixin Dios t'ayakonhen tí jeheni, a ntá tí Jínahya chóna kjuachaxin t'etuènen kuenté chjasintajni.

²⁰ Ó noheni kjaxin kixin Xjeen Dios kui, la ko kjuinkitsa ch'án tí jeheni kixin chrókónoheni nkexrí tjen Dios chaxín. A ntá tjejókoni jnkokoá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxínni ch'án kjuachón jnkochrín. ²¹ Éxí xjanna t'íkuan tí jahará, la títóherá tí dios tsíkjanoya. Amén. Ó tjen.

Yóxin xroon tsíkjin ch'ín Juan

¹ Janhan mé ijnko nkexro ó táda t'ayakonhen nínko mé ikjian tí xroon ts'áyéhe tí sín tsíkjeýá Dios tójnksé sín ntiha, la mé chaxín tjuahá sín: a ntá jehya janhván, la kjaxin kaín tí sín chóxin tí tan chaxín. ² Tjuahará tí jahará kixin tí tan chaxín ó chóna asénni, tíha mé ts'ejókoni jnkochrixin. ³ It'éni Dios la ko Inchéni Jesucristo mé Xjeen Dios chrókjuintayaonrá ch'án la ko chrókuikonóahará ch'án la ko chrótjáhara ch'án kjuaxróxin kixin chaxín tjuahará ch'án.

⁴ Imá chàna k'uikuán kixin isorá tjejorá titekáonrá tí nkehe chaxín, éxí tsík'etóan It'éni Dios. ⁵ A ntá jie jahará kichó ni, xrxanóahará kixin chrótjuéhérá kichuára. Méxra xikaha tjékjian tí xroon i, la jehya ijnko nkehe nixin tsík'etóan Dios. Náhi. Tíha la mé tí nkehe tsík'áyéheni tí kjuák'e Inchéni Jesucristo. ⁶ A ntá tí tjuèheni kichó ni la mé tíhi kixin chrók'uejóni éxí tsík'etóan Dios; a ntá tí nkehe tsík'etóan Dios la mé ó tsíkinhínrá jahará tí senó kixin chrótjuèheni kichó ni.

Tí chojni xrich'ia

⁷ Nchónhya chojni chjasintajni xrich'ia sín titekakonhya sín kixin Jesucristo kui k'óna chojni. A ntá tí chojni xikaha mé ixri xrich'ia la ko nínkakonhen Cristo. ⁸ Chrókóxakonhanrá kixin chrók'uitjáyanyha tí xra kjuich'erá kixin naxa chrók'uayéhérá tí nkehe tsjintaxín ts'ayéhérá.

⁹ A ntá tí sín ijnko nkexro kútohe tí nkehe kjuako Cristo ntá kjuichroe la mé chónahya sín Dios; a ntá tí nkexro títoehya tí nkehe kjuako Cristo mé chóna sín It'éni Dios la ko tí Xjeen ch'án. ¹⁰ A ntá jnkojín sín chrókjuijitsjehe tí jahará, a ntá ntoáhya chrókjuako sín, la chrókjuánjonhyará kjuachaxin chrókuitóhe tí sín a ntoará la ko ni chrónixjeéhyará sín jnkojína. ¹¹ A ntá tí nkexro tsonixjehe tsontáchro kixin: “¿Á jína k'uinka?” na mé éxí tóxrjinhin sín tí nkehe jínahya ich'e tí sín a.

Tí tan tsjixixín

¹² Chonta nchónhya nkehe chrókuinhínrá jahará, kjánchó tjínkakonhya chrókjian xroon ó. Náhi. Tjínkavan kixin tjoka chrókjuasántsjahará tí jahará tsonixjahará kixin chrókjuintaxín chrókóchéheni.

¹³ Tí sín kichuára tójnksé kuènte nínko ntihi, mé tí sín kjaxin tsíkjeýá Dios, mé nixjahará sín. Amén. Ó tjen.

Tí níxin xroon tsíkjin ch'ín Juan

¹ Janhan mé tí nkexro t'ayakonhen nínko mé tjékjian tí xroon ts'áyéhe tí ch'ín choxian, mé tí ch'ín Gayo tí ch'ín chaxín tjuaha.

² Kíchóni, tjáncháha Dios kixin éxi jaha jína tjen tinkachónkia Ìnchéni la jína chrók'uaxrje kaín xra ch'e la ko jína chrókjuak'e jaha. ³ Imá kóchàna tió kui iso tí sín kíchó ni chrónka sín kixin jína tjákoxian tí tan chaxín. ⁴ Kohya ijnko nkehe antsí má nchechána éxi tió kuñhan kixin tí sín t'íkuan éxi xjanna tjejóititekaon sín tí tan chaxín

⁵ Kíchóni, chaxín jína tjech'e xra tjínkítsa tí sín kíchó ni la ko antsí tjínkítsa tí sín tsíkjin ókjé chjasin. ⁶ A ntá tí tsíkójnksé tí sín kíchó ni la tsíchrónka sín kixin nkexri tjuèhé tí jehe sín. Jaha chrókjuínkítsa tí nkehe t'ichjánxin sín tí sátsji sín. Xíkaha mé tóxrjinhin Dios. ⁷ Tió sákjuí sín kjuankíxin sín chrónka sín itén Ìnchéni la chrohya sín chrók'uáyéhe sín ninkehó nkehe kuènte tí sín chónhya Dios. ⁸ Méxra tí jeheni t'ichjánxin chrókjuínkítsani tí jehe sín kixin tsjacha sín tsochrónkaxín sín tí tan chaxín ntoá.

Ntoáhya kjuako ch'ín Diótrefes

⁹ Janhan ikjian ijnko xroon k'uáyéhe tí sín tójnksé ntiha. Kjánchó ch'ín Diótrefes kuitekakonhya ch'án tí nkehe k'uetuènhenni ch'án kixin tjinkaon ch'án chrók'uetoan ch'án jehó ch'án. ¹⁰ Méxra xíkaha tí sátsjia ntiha tsonixjaha ch'án kixin tí kjuach'ia ntáchro ch'án t'ántaxinhin ch'án tí jeheni. Jehya táhó ich'e ch'án. Kjaxin tjanjonhya ch'án kjuachaxin ts'ejó tí sín kíchó ni tjiji; a ntá tí sín tjinkaon chrókjuanjon kjuachaxin la t'etoan ch'án kixin tsjanjonhya sín kjuachaxin la ko t'etoan ch'án kixin tsochjinahya sín tí tójnksé tí chojni.

¹¹ Kíchóni chrókjuákoxinhya tí nkehe jínahya. Íchá jína chrókjuákoxian tí nkehe jína. Tí nkexro ich'e nkehe jína na mé kuènte Dios. A ntá tí nkexro ich'e nkehe jínahya la mé tsík'ikonhya sín Dios.

Jína tjákoxin tí ch'ín Demetrio

¹² Kaín sín ntáchro sín kixin jína tjákoxin tí ch'ín Demetrio la mé chaxín tíha. Kjaxin tí jeheni chrónkani tíha la ko jahará ó nohará kixin tí nkehe ntoá chrónkani.

Kjuixixin nixja ch'án

¹³ Janhan chonta nchónhya nkehe tsontáxrjan, kjánchó tjínkakonhya tsokjian ó ¹⁴ kixin tjínkavan tjoka ts'íkuan tí jaha, a ntá tsjoni.

¹⁵ Kjuaxróxin chrókjuak'e jaha. Kaín nkexro choxian ntihi nixjaha sín. Tétuanhan nixjehé jnkoinko tí sín chóxinni.

Tí xroon tsíkjin ch'ín Judas

¹ Janhan Judas, t'ahá xra Jesucristo, la sana mé Jacobo la mé ikjian tí xroon í ts'áyéhe tí sín tsíkjeýá It'éni Dios tsíkjinchetjóá ch'án kixin tsinkáchónki sín ch'án. Mé xikaha Jesucristo t'ayakonhen ch'án tí jehe sín. ² Imá kuikonóahará ch'án ntá ts'ayéhérá kjuaxróxin kixin tjuahará ch'án.

*Tí sín ntoáhya tjako
(2 Pedro 2.1–17)*

³ Kíchóni, imá tjínkavan tsokjian tí xroon ts'ayéhérá tsochrónka nkexrí tsaáxinni kaín ni. A ntá t'íkuan kixin t'ichjánxin tsokjian tí xroon ts'ayéhérá tsqxrañoaxínra kixin jina chrókiénxinra nkehe chrókuáteherá kixin nkexrí tinkachónkirá Ìnchéni kixin tí fe la mé ónaá tsík'áyéhé tí sín tsíkjinchetjóá Dios. ⁴ A ntá jie ó kuik'ixenhen iso sín ch'ia tí tjejorá. A ntá ósé nixja xroon itén Dios kuente tí sín a kixin tsjasóte sín. Jehe sín la chojni jínahya ntá ntáchro sín kixin tinkáchónki sín Dios la ó ch'iaxón sín ntá imá tjasin sín jie. La titekakonhya sín Dios, jehó t'etóan, la ko titekakonhya sín Ìnchéni Jesucristo.

⁵ Jahará kjónté ó nohará la jehí tjínkavan sintaxráxinkáonra ínaá kixin Ìnchéni Dios kuakitsjexín ch'án Egipto tí sín chjasin Israel, ntá kjónté xikaha la chr'éxin kjuínchek'itjáyan ch'án tí sín kuítekakonhya sín tí jehe ch'án.* ⁶ Kjaxin tí sín ángel kuítekakonhya sín tí k'uetoan Dios ntá kuítóhe sín tí kjuachaxin tsíkjanjon Dios tsík'áyéhe sín la ko kuítóhe sín tí k'uék'ejó sín jina, a ntá jie Dios k'uetoan ch'án kixin ts'ejóchjina sín tí sítié la ts'ejóchónhen sín tsijia tí yaon tsitóexín ijé sín. ⁷ Kjaxin tí sín chjasin Sodoma la ko tí sín chjasin Gomorra la ko tí sín chjasin chjinaxón kóyóhe sín tí sín ángel kuítekakonhya la kjuasinko sín jie chojni chjin ókjé la ko kjuasinko sín jie kíchó sín kjónté jnkokón ntoa sín. Tíha mé chrórxaxinkakonxín kaín chojni kixin nkexrí tsonhen tí sín titekakonhya tsjasótéxín sín tí xrohi jnkochrín ts'ankahya.

⁸ Méxra kjaxin tí chojni a kotáchrién sín tsík'ikónxín kixin ó nchóxon chrókjuasinko sín jie chojni chjin ókjé la ko chrókuítekakonhya sín tí kjuachaxién Ìnchéni la ko chrók'uántaxínhin sín tí sín ángel chóna kjuachaxin t'etóan. ⁹ A ntá tí ch'ín arcángel Miguel kjuánjonko ch'án tí ch'ín Tsochren la ko ikjo sín kjuánjonxin sín nkehe tsonhen tí cuerpo kuente ch'ín Moisés.† A ntá jehe ch'án kjónté xikaha la kjuínchekjasótehya ch'án tí ch'ín Tsochren. Jehó ntáche ch'án kixin: “Ìnchéni mé tsjentuáha tí jaha.” ¹⁰ A ntá tí chojni i t'ántaxínhin sín tí nkehe tienxínhya sín la tjenkayáxin sín éxi ko tienxínhya nchexiteyéhe tí nkehe ntáchro asén, mé xikaha tí nkehe jínahya kjuích'e sín ts'itjáyanxín.

¹¹ jNda tí jehe sín! Chréhe sín éxi kjuích'e ch'ín Caín.‡ Tjinkaon sín chrókuacha sín chichaon ntá ntoáhya kjuích'e sín éxi kjuích'e Balaam, la ko its'en sín éxi ik'uén ch'ín Coré kixin kuítekakonhya sín.§* ¹² Ijnko kjuatósuehe kixin tjejóyákjanxin sín tí síin kia náxrjón chontará, kixin tjejóne sín la ko tjejót'i sín chéhe sín la kjónté xikaha la ninkehó kjuasáya

* 1:5 Éxodo 12.51 Números 14.29–30 † 1:9 Deuteronomío 34.6 ‡ 1:11 Génesis 4.3–8 § 1:11 Números 31.16 * 1:11 Números 16.1–3

chóntahya sín. Tjéjó sín éxí tí sín t'ayakonhen kolélo kjánchó jehe sín t'ayakonhen sín asén sín ó. Jehe sín la éxí tjuj chóntahya ntá tjakáko xrínto; la ko éxí ijnko nta t'ónahya to tí nitjó chrók'óna to, éxí yáya tsík'en tsík'axrjenkíxín nuèé. ¹³ Jehe sín na mé éxí ntáyaon jiehe síxróji lóxrjo ó chóntahya ntá jína mé xíkaha chónkó tí nkehe ch'e sín mé ijnko kjuatósuèhè tíha; la ko éxí konotsé kjuíchrøe sákjuí ókjé; a ntá tjechónhen sátsji sín tsjasóte sín sítié jnkochrín.

¹⁴ A ntá kjuák'e ch'ín Adán, a ntá yatoxín chr'éxín kui ch'ín Enoc nixjaxín kjuachaxién Dios ntáchro ch'án kíxín k'uúkon ch'án itjen Ìnchéni kujkáo nchónhya mil tí sín ángel kuènte ch'án, ¹⁵ kíxín sinchekitogexín ch'án ijje kaín tí sín jínahya kíxín kaín tí jínahya kjuích'e sín la ko kaín nkehe k'uénixja tí sín jínahya k'uántaxínhín sín tí jehe ch'án. ¹⁶ Xrácín tóxrjénhya sín nkehe sitónhen la ko ixri sín tjonta kíchó sín. Jehó xritjeyá sín tí nkehe tóxrjínhín sín tjenkayáxín sín. Ihnke sín nixja sín la ko itjo sín jína chojni kíxín ntá tí sín a chrókjuinkítsa jehe sín.

Nhexraxinkaon ch'án tí sín tinkáchónki Cristo

¹⁷ A ntá jahará kíchó ni, xrácinkáonrá kíxín tí sín tsíkjeyá Ìnchéni Jesucristo ¹⁸ ntáchro sín kíxín tí yaon tsjixixín tsjejexín chjasintajni ts'ixín chojni tsitekakonhya sín ts'ántaxínhín sín tí nkehe tjinkaon Dios la ko tsotjinkaon sín sinchexiteyéhe sín tí nkehe jínahya ntáchro asén sín ó. ¹⁹ Tí sín a mé tjinkaon ts'óxika tí sín jnkokoá tjejótójkotsé kíxín naxá tóxrjínhín sín síh'e sín nkehe síin chjasintajni kíxín chóntahya sín Nchakuen Dios.

²⁰ A ntá jahará kíchó ni tjuahará, antsí jína chrók'uejorá tinkachónkirá Ìnchéni. Chrónixjeexínrá Dios tí kjuachaxín kuènte Nchakuen ch'án. ²¹ Jína chrók'uejorá kíxín tjuahará Dios ts'ejochonhénrá tí yaon tsokjan Ìnchéni Jesucristo kíxín kjuasáyé ch'án tsotjáhará ch'án kjuachón jnkochrín.

²² Chrókujkonóehérá tí sín naxá tienxínhya. ²³ Jnkójín sín chrókjuinchekaará chrókuakitsjekjanxínrá sín chríkjan xrohi, la ko chrókujkonóehérá í so sín kjánchó chróchontará cuidado tí jehe sín kíxín kjónté tí iké sín kjaxín chóna jie.

Tjanchia ch'án kjuasáya

²⁴⁻²⁵ Jnkokoá Dios tjen mé imá nohe ch'án la ko sinchekaáni ch'án la chóna ch'án kjuachaxín ts'ayakonhenni ch'án kíxín chrókjuasinhyani jie la ko tió tsjijini tí tjen ch'án la ninkehó jie chróchóntahyani, imá tsöchéheni tí tjen ch'án ntiha. Kjuasáyé Dios imá chóna ch'án kjuachaxín t'etōan ch'án la ko kjuínchekaáni ch'án kjuachaxín Ìnchéni Jesucristo. Jehe ch'án jnkochrín tjen ch'án chóna ch'án kénxín kjuachaxín. Amén. Ó tjen.

Tí nkehe chrónka Jesucristo k'uíkon ch'ín Juan

1 18

Kaín tí nkehe i mé chénka Dios Jesucristo kixin jehe ch'án tsochénga tí sín ch'ehe ch'án xra tí nkehe tjoka tsonhen. Ntá Jesucristo kjuínchenohe ijnko ángel kuènte ch'án kixin nkexrí chrókónohe tí ch'ín Juan ch'ehe ch'án xra. ² A ntá jehe ch'án mé k'uítuenhen ch'án ntá chrónkaxín tí nkehe chaxín tsíntáchro Dios la ko tí nkehe chrónka Jesucristo la ko kaín tí nkehe tsík'ikon ch'án nkexrí kjuakoxin Dios.

³ Náxrjón tjejó tí sín nchekuáxin tí xroon i la ko kjaxin tí sín tjejótinhin tí palabra chrónka nkehe tsonhen la ko tóxrjínhin sín titekaon sín nkehe nixja tí xroon i kixin ó kuichjina tí hora tsoxiteyá tíha.

Ch'ín Juan ikjin ch'án xroon ts'áyéhe tí yato nínko

⁴ Janhan Juan ikjian tí xroon tsochr'anhan tí yato nínko tjejó estado Asia. Jahará chrók'uayéhérá kjuasáyé Dios la ko kjuaxróxin. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá la ko kjaxin tí yato Nchakuen ch'án tjejó tí trono t'etqanxín ch'án mé tjanjon kjuaxróxin. ⁵ La ko kjaxin kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankíxixín xechón kjónté tsík'en kixin tjetoan ch'án kixin t'etuñhen ch'án kjónté kaín tí sín rey la ko tí sín t'etqan sím chjasintajni. Jehe ch'án mé tjuèheni ch'án la ko tí ijnié ch'án mé k'uíjmáxinni kaín tí jie chóntani. ⁶ Jehe ch'án mé tsíkjanjon kjuachaxin tsík'ónani nchát'á kixin sich'eheeni xra It'éni Dios. Tí kjuachaxin kuènte ch'án me ts'etqan jnkochr'ixín. Mé xikaha tsoxiteyá. Amén.

⁷ Ts'ikon chojni kixin Cristo la ó tsi chríkjan tjuj. Kaín chojni ts'ikon ch'án la ko kjaxin tí sín k'uékónínkakonhen tí jehe ch'án tsíkjinchekjasóte sín ch'án mé ts'ikon sín ch'án la ko kaín chojni chjasin sím chjasintajni tsotsjánka sín tió ts'ikon sín tí jehe ch'án. Mé xikaha tsonhen. Amén.

⁸ Janhan mé tí xrankíxixín la ko tí tsjixixín éxí tí letra xrankíxixín A la tsjixixín Zeta. Mé xikaha ichro Ìnchéni Dios, tí nkexro imá t'etqan. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá.

Ch'ín Juan tsík'ikon ch'án kixin Cristo chónka kjuachaxin

⁹ Janhan Juan mé ijnko kichó tí jahará mé tjékian Jesús la ko tí kjuachaxin kuènte Dios chonta la mé jahará la ko jeheni jnkokón tjejójtjasóteni la jehe ch'án tjinkitsani kixin tsjachani. Kjuakua itén Dios éxí chrónka Jesucristo la mé tíha kjuak'échjinaxián tí isla it'in Patmos. ¹⁰ A ntá ijnko yáon xraxinkakonxínni Ìnchéni la ikui kjuachaxin Nchakuen Dios tí tjén tí janhan la kuñhan kixin nóton tí janhan ijnko nkexro nixja imá itsen éxí itén ijnko trompeta. ¹¹ Mé ntáchro ch'án kixin:

—Janhan mé tí xrankíxixín la ko tí tsjixixín éxí tí letra xrankíxixín A la tsjixixín Zeta. Mé tsokjian jaha ijnko xroon kaín tí nkehe k'uíkuan kixin tsochr'enhén tí yato nínko tjejó tí estado Asia na mé tí nínko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

12 Ntá nkátjía tsjahá kixin nkexro itén tí tjenixjana ntá xrínahya k'uíkuan yato candelero tsík'óna chica oro. 13 A ntá chríkjan tí yato candelero k'uíkuan ijnko nkexro éxi yóhe Xjeen Dios tsík'óna chojni. Ntá tí iké ch'án la ika kjínjin tjenkáya ch'án hasta tsikóyóhe toté ch'án la ko mé chóna ijnko cinta jehó oro tjenkáni ntakuin ch'án. 14 Tí kaxihí ch'án la tjóá éxi kaxree kolélo tjóá o éxi chrinta tsjehe la ko tí ikon ch'án la éxi xrohi nene tsjehe. 15 Ntá tí toté ch'án la éxi chica sine tjákini na ntá tsík'axrjexín tjá. A ntá tí itén ch'án la itsen éxi tóvénto nchónhya ntarío. 16 A ntá tí tja ch'án chjina mé chóna yato konotsé. A ntá tí ir'va ch'án k'uaxrjexín chica espada iyo, yánjín taté. A ntá imá tjákini tsjehe ikon ch'án la éxi yaon t'inkaséyanxín imá.

17 A ntá tí k'uíkuan xikaha la kjuáchr'ítsinka toté ch'án éxi tsík'énna. A ntá jehe ch'án kjuak'etja tja ch'án chjina chrítaón tí janhan ntá nixjana ch'án ntáchro ch'án kixin:

—Chrakonhya jaha. Janhan mé tí xrankíxixín la ko tí tsjixixín. 18 Janhan tí nkexro tjechón. Ik'uén, a ntá ijie la tjéchuán inaá la itjén jnkochríxín. Amén. Janhan chonta llave kuénte chojni its'en la ko kuénte tí síin tí sín tsík'en. 19 Méxra ikjian jaha tí nkehe k'uíkuan mé tí nkehe síin ijie la ko tí nkehe tsonhen chr'éxín. 20 Ninkexró k'uékiexínhya nkexrí t'axrjexín tí yato konotsé k'uíkuan chonta tjana chjina, la ko tí yato candelero tsík'óna chica oro. Mé tí yato konotsé t'axrjexín kixin tí yato ángel t'ayakonhen tí yato nínko la ko tí yato candelero k'uíkuan me kjaxin t'axrjexín tí yato nínko.

2

Tí tan k'uáyéhe tí yato nínko: Tí tan k'uáyéhe tí sín chjasin Éfeso

1 Tsokjian tí nkehe ts'áyéhe tí ángel t'ayakonhen tí nínko Éfeso: “Xikaha ichro tí nkexro chóna yato konotsé itja ch'án chjina la ko xritjak'e ch'án jnkosiné tí yato candelero tsík'óna oro. Ntáchro xikihi: 2 Janhan nòna kaín tí xra ch'erá la ko nòna kixin tóxrjíanhyará tí sín jínahya. Janhan la ó nòna kixin kjuich'erá prueba tí sín ntáchro kixin apóstol tí jehe sín la ntá jehya la ntá kónoxín kixin xrich'ia tí jehe sín. 3 Nchónhya kjuasótiará la kjónté chonhénra kóninkákonhyará la imá kjuich'erá xra kixin tinkachónkirá njina la ko nunca kóxrjéhyará. 4 Kjánchó tjánchiá ijnko jie tí jahará kixin tinkachónkihyará éxi kjuankíxixínra k'uétjuanará. 5 Méxra chróxráxinkáonra kixin ó kujtohéra tí k'uétjuanará la ntá chrókujínkirá tí nkehe tjenkáyáxinra la ko chrókujich'erá xra éxi tí kjuankíxixínra. A ntá tí náhi, la tjoka tsjasán la tsjakíyan tí candelero tí tjejorá tí nunca tsjínkíhyará tí nkehe jínahya tjenkáyáxinra la tí tsokjanhyará tsoxráxinkáonra Dios. 6 Kjánchó chróónohará kixin tóxrjina tí nkehe tjejoch'erá kixin tóxrjíanhyará tí xra ch'e tí sín nicolaítas kixin kjaxin janhan nínkákónhan tí nkehe ch'e sín. 7 Tí nkexro tjinkaon chrókuinhin la chrókuinhin sín tí nkehe nixjehe Nchakuen Dios tí nínko ntáchro kixin: Tí sín tsjacha sinchexiteyàna sín la tsotjahá sín kjuachaxin sine sín tí to t'óna tí nta tjanjon kjuachón itjen tí tjen Dios.”

Tí tan k'uáyéhe tí sín chjasin Esmirna

8 Ikjian tí nkehe ts'áyéhe tí ángel t'ayakonhen tí nínko Esmirna: “Xikaha ichro tí nkexro xrankíxixín la tsjixixín, mé tí nkexro ik'uén la ntá jie tjechón: 9 Janhan la ó nòna kaín nkehe tjejoch'erá. Ó nòna kixin nkexrí

tjejótjasótiará la ko ó òna kíxin nõará kjánchó jehya. Náhí. Jehe sín mé tójnkotsé sín tí ñinkoé tí Jínahya. ¹⁰ Kjánchó chrakonhyará kjónté tsjasótiará. Tí ch'ín Tsochren tsochr'ánxanhanrá ntõechiso jnkojín tí jahará kíxin tsotsjexín nkexrí tí jahará ntá t'ichjánxin tsjasótiará iso yaon. Kjánchó chrókujtoéhyará Dios kjónté chrók'uenrá ntá janhan tsotjáhará tí kjuachón chr'éxin. ¹¹ Tí nkexro tjinkaon chrókuinhin la chrókuinhin tí nkehe nixjehë Nchakuen Dios tí ñinko: Tí nkexro tsjacha sinchexiteyàna sín la í tsjasótehya, la tí yóxin its'en chojni la í ts'enhya tí jehe sín.”

Tí tan k'uáyéhe tí sín chjasin Pérgamo

¹² 'Tsokjian tí nkehe ts'áyéhe tí ángel t'ayakonhen tí ñinko Pérgamo: “Mé xíkaha ichro tí nkexro chóna chica espada yánjín taté: ¹³ Janhan ó òna kaín nkehe tjejoch'erá la ko ó òna nketí tjejórá kíxin tí tjejórá la t'etõan ch'ín Satanás la kjónté la jína kuinkachónkirá tí janhan. Jahará kujtoéhyará kuinkachónkirá tí janhan kjónté tí yaon tsík'en ch'ín Antipas, ijnko nkexro kjuínchexiteyàna jína. Jehe sín tsík'óyánxin sín ch'án tí tjejórá ntiha kíxin ntaha t'etõan ch'ín Satanás. ¹⁴ Kjánchó janhan tjánchía ijnko jië tí jahará kíxin iso nkehe ntoáhya ch'erá. Siín ntiha chjasin Pérgamo tí tjejórá iso sín tjinkakonhya sín tsítóhe sín tí nkehe k'uékjako ch'ín Balaam, tí nkexro k'uék'etuenhen ch'án tí ch'ín Balac kíxin tí sín israelita chrókjuasin sín jië chrókjóné sín tí nkehe tsíkjokehë sín tí nkehe tsíkjanõya la ko chróchóna sín chojni chjin ókjé chrókjuasinko sín jië. ¹⁵ Kjaxin xíkaha tí tjejórá la siín iso sín tjinkakonhya sín tsítóhe sín tí nkehe tjako tí sín nicolaítas. Janhan mé tjínkakonhya tí sín a. ¹⁶ Méxra chrókjanrá chrókuinkachónkirá Dios. A ntá tí náhi, la tjoka tsjasán tí tjejórá la tsjánjonkianxian sín tí espada t'axrjexín ir'va. ¹⁷ Tí nkexro tjinkaon chrókuinhin la chrókuinhin sín tí nkehe nixjehë Nchakuen Dios tí ñinko ntáchro kíxin: Tí nkexro tsjacha sinchexiteyàna sín la tsotjaha sín kjuachaxin chrókjóné sín maná tjechónhen la ko tsotjaha sín ijnko xro tjóá la tí xro la ts'ínixín ihnjé sín ñixin chónhya ninkexró. Jehó tí nkexro ts'áyéhe mé tsonõhe.”

Tí tan k'uáyéhe tí sín chjasin Tiatora

¹⁸ 'Tsokjian tí nkehe ts'áyéhe tí ángel t'ayakonhen tí ñinko chjasin Tiatora: “Mé xíkaha chro tí Xjeen Dios, tí nkexro ikon éxí yóhë xrohi nene sít'axrjexín la ko toté éxí chica sine tjákini tsjehe. ¹⁹ Janhan ó òna kaín tí nkehe tjejoch'erá la ko ó òna kíxin tjuanará la ko tinkachónkirá tí janhan la ko ó òna tí xra tjejoch'erá la ko ó òna kíxin tjejochonhénra tóninkákonhyará. La ko ó òna kíxin antsí tjejoch'erá xra ijie ntá tí kjuankíxixínra la kénhyó. ²⁰ Kjánchó tjánchía ijnko jië tí jahará kíxin tjánjonrá kjuachaxin tjako tí tjan Jezabel. Kjaxin ntáchro tjan kíxin nixja tjan itén Dios kjánchó ch'iyehë tjan tí sín ch'ena xra kíxin kjaxin sín chrókjuasinko sín jië chojni chjin ókjé la ko chrókjóné sín tí nkehe tsík'óyán sín tsíkjokehë sín tí nkehe tsíkjanõya. ²¹ A ntá janhan ó kujtoha tjan intsí kíxin chrókjuinkí tjan tí tjenkayáxin tjan kjánchó tjinkakonhya tjan sich'e tjan xíkaha la tjinkakonhya tjan chrókuítóhe tjan tí jië tjasinko tjan chojni ntoa. ²² A ntá jië tsjánjuan kjuachaxin tsoníhi tjan tsjak'eták'á tjan cama la ko kjaxin tsjasóte kaín tí nkexro kjuasinko tjan jië tí nunca tsítóehya sín tí nkehe tjinkaon tjan sich'e tjan. ²³ A ntá janhan ts'oyán tí xjeen tí jehe tjan. Ntá kaín tí ñinko tsonõxín sín kíxin janhan choxian nkehe tónhen asén kaín chojni. A ntá jnkojnko tí jahará la tsjénkqahará nkexrí

tí xrā kjuich'erá. ²⁴ Ā ntá tí í sorá tjejorá chjasin Tiatira tí chréhyará tí nkehe ntoáhya tjako sín la ko tjínkákonhyará chrókónohará tí nkehe jínahya kuènte ch'ín Tsochren la xikahó la í tsétuanhyará í jnko xrā. ²⁵ Ā ntá jahará la tí nkehe ó chontará la t'ayakonhénrá hasta tsokjan janhan. ²⁶ Ā ntá tí sín tsjacha sinchexiteyána sín la ko xikaha sich'e sín hasta tsjixixín kixin janhan tjínkavan xikaha chrókjuich'e sín na mé janhan tsjánjuan kjuachaxin ts'etuenhen sín kaín nación. ²⁷ Na mé xikaha T'aná mé chjina kjuachaxin tsétoan la kjaxin xikaha jehe sín mé ts'etuenhen sin tí nación yóhe chróchóna sín ijnko chica vara kixin chróchjéhe sín tí chj chrók'ókuen tí chj tsík'óna nchetje. ²⁸ Me kjaxin tsotjahá sín tí konotsé tí tji nchítjen. ²⁹ Ā ntá tí nkexro tjinkaon chrókuinhin la chrókuinhin tí nkehe nixjéhe Nchakuen Dios tí njnko.”

3

Tí tan k'uáyéhe tí sín chjasin Sardis

¹ Tsokjian tí nkehe ts'áyéhe tí ángel t'ayakonhen tí njnko chjasin Sardis: “Xikaha ichro tí nkexro chóna yato Nchakuen kuènte Dios la ko chóna tí yato konotsé: Janhan nòna kaín nkehe ch'erá, ó nòna kixin éxi tsík'en tí xrā ch'erá kjónté nchehnerá kixin tjejochónrá. ² T'áyará. Naxā t'ayakonhénrá kjónté í tsjéhya tí nkehe kuítóhe kixin kjaxin tíha mero its'en. Ó k'uikuān kixin tí xrā ch'erá la t'ikon tí Dios kuèntana kixin ntoáhya. ³ Chróxráxinkáonrá tí nkehe tsíxarakohará la ko tíha chrókjuich'erá la chróktanrá chróxráxinkáonrá Dios. Ā ntá tí naxā tjejochrinrá la titáya tsjasán éxi ijnko síchee la tsonoahyará nkesá tíha. ⁴ Kjánchó naxā síin iso chojni ntaha chjasin Sardis naxā kjuínchekjitaḡhya sín iké sín la jehe sín la ts'ájikian sín kixin chóna sín ka tjóá kixin jehe sín la jina sín. ⁵ Tí sín tsjacha sinchexiteyána sín la ts'áyéhe sín ka tjóá ts'inkáya sín la ko tsoxikahya ihnjé sín chóna tí libro ts'inixín ihnjé tí sín tsaá la ko tsochoxian sín nkayakon T'aná la ko nkayakon tí sín ángel kuènte ch'án. ⁶ Tí nkexro tjinkaon chrókuinhin la chrókuinhin tí nkehe nixjéhe Nchakuen Dios tí njnko.”

Tí tan k'uáyéhe tí sín chjasin Filadelfia

⁷ Tsokjian tí nkehe ts'áyéhe tí ángel t'ayakonhen tí njnko chjasin Filadelfia: “Xikaha ichro tí nkexro tjóá la ko chaxín mé tí nkexro chóna llave kuènte ch'ín rey David. Ā ntá tí tsakitjéhe ch'án puerta la ninkexró tsjachahya ts'ikjéhe, ā ntá tí ts'ikjéhe ch'án puerta la ninkexró tsjachahya tsakitjéhe. ⁸ Janhan ó nòna kaín nkehe tjejoch'erá. Kjuaké tí tjejorá ijnko puerta xitjéhe la ninkexró xitjahya ts'ikjéhe. Kjónté intsíkoá kjuachaxin chontará la jahará kjuínchexiteyará tí nkehe kjuakua la ko kjuínchemáhyará tí janhan. ⁹ Tí sín tsíkitekaoon Satanás la ntáchro sín kixin judío sín kjánchó jehya sín, xrich'ia sín la chr'éxin tsétuanhan sín ts'ejóxin toch'in sín chrínkí totará la ntá tsonohe sín kixin chaxín janhan tjuahará. ¹⁰ Ó kuítekáonrá tí nkehe kuétuanhanrá la jina tjejorá la mé xikaha janhan ts'ayakonhanrá tí ichrén nkehe tsonhanrá tió tsi tí nkehe tsonhen kuènte chjasintajni kixin ó jehí xikaha tsonhen kaín chojni tjejó chjasintajni. ¹¹ Janhan mé tjoka ts'inika. Méxrā t'ayakonhénrá tí nkehe chontará kixin ninkexró chrókuakitsjahará tí nkehe ó kjuachará. ¹² Tí nkexro tsjacha sinchexiteyána la ts'óna sín columna kuènte njnko kuènte Dios kuèntana la nunca xitjahya sátsjixin sín ntiha. La janhan tsokjian

ihnié tí Dios kuèntana tsjiko sín la ko tsokjian ihnié chjasén Dios kuèntana mé tí Jerusalén nixin tsixin nkajní tí tjen Dios kuèntana. Kjaxin tsokjian nina nixin tsochónta sín. ¹³ Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí ninko.”

Tí tan k'uáyéhe tí sín chjasin Laodicea

¹⁴ Tsokjian tí nkehe ts'áyéhe tí ángel t'ayakonhen tí ninko chjasin Laodicea: “Xikaha ichro tí nkexro chaxín ntoá mé tí nkexro chrónka tí nkehe chaxín. Tí kjuachaxién ch'án kjuích'énaxín Dios kaín nkehe. ¹⁵ Ó nòna kaín nkehe tjejoch'erá. Ó nòna kixin jahará la ní jehya kinrá o sóará. Chrókóchaxín chrókókinrá o chrókóchaxín chrókósóará. ¹⁶ A ntá jahará la yásorá la jehya ikinrá la jehya sóará. A ntá ijie ir'va ó tsíkja tí jahará la ts'itjia. ¹⁷ Ntáchrórá kixin jahará rícorá la imá jina tjejorá la ko ninkehó t'itjayanhya tí tjejorá, ichrorá. Kjánchó chontahyará kjuachéhe la ko jehya jina tjejorá la ko nòará la ko ntakótánrá la ko tjóchínrá. ¹⁸ Méxra ijie ntáxraxinkáonrá janhan sintakjihará tí nkehe oro náxrjón ts'ík'axrjexín tja kixin ntá chaxín ts'ónará rico. La ko janhan sintakjihará ika tjóá kixin ts'ínkayará ntá tsjinhanrá kjuatósuèhe kixin í tjóchínhyará. La ko janhan tsjánjuan xroan kolirio tsjiankí ikonrá kixin ts'ikonrá. ¹⁹ Janhan mé tsjéntuáha kaín tí sín tjuaha. Méxra íchá jina chrókjan sín chrókuinkáchónki sín Dios. ²⁰ Tsjehérá janhan itjén ntója puerta, jtét'eya. A ntá jnkójín nkexro chrókuinhin tí tanná ntá chrókuakítjehe tí puerta ntá chrók'uixanhan ntøe sín la chrókjónekian sín la ko jehe sín la ko janhan. ²¹ A ntá tí sín chrókjuacha chrókjuintchexiteyàna la tsjánjuan kjuachaxin ts'ejókan sín tí tétøanxian ntiha la éxi xikaha janhan kjuacha ntá T'aná kjuanjon kjuachaxin tjékian ch'án tí tjen ch'án t'etøan ch'án ntiha. ²² Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí ninko.”

4

Tí sín tjikosáyehe Dios nkaya nkajní

¹ Ntá chr'éxin janhan k'uíkuan ijnko puerta tjexrankehe nkaya nkajní. Ntá kuinhan ijnko itén nkexro éxi trompeta mé tí nkexro nixjana tí xrankixín, ntá jehe ch'án nixjana ch'án, ntáchró ch'án kixin:

—T'jt'ótjen ntihi ntá tsjákoha kaín nkehe tsonhen chr'éxin.

² Ntá tuénxín ikui tí kjuachaxin kuènte Nchakuen Dios k'uayáha ntá k'uíkuan tí trono itjen nkaya nkajní ntá ntiha tjetjaxin ijnko nkexro. ³ A ntá tí ch'ín tjetjaxin tí trono mé tjákiní tsjehe éxi ixro jaspe o ixro cornalina. A ntá jnkontatjen tí trono itjen ijnko konchecha tjákiní tsjehe éxi ijnko xro esmeralda. ⁴ A ntá kjaxin jnkontatjen tí trono k'uíkuan í so veinticuatro trono kjaxin tjejótjaxin veinticuatro sín tada, iké sín la tjóá la ko tjejóya kja sín corona tsík'óna chica oro. ⁵ A ntá tí trono kuènte Dios la ntiha sit'axrjexín tí sitjónkixín la ko sitjonta. A ntá nkayakon tí trono a kjaxin tjejóche yato xrohi la mé tí yato Nchakuen Dios. ⁶ A ntá nkayakon tí trono la kjaxin itjen ijnko ntayaon éxi xroxro tsjehe.

A ntá tí jnkosiné la ko jnkontatjen tí trono tjejó noó nkexro tjejóchón chóna nchónhya ikon nkayakon la ko nóton. ⁷ A ntá tí nkexro tjejón k'uíkuan saoxín mé éxi koxra tsjehe. A ntá tí nkexro yóxin tóyóhe éxi koxinta, a ntá tí nkexro nixin tsjehe éxi chojni. A ntá tí noóxin la éxi kotjuanhnko xritjaká tsjehe. ⁸ A ntá jnkoinko tí noó nkexro tjejóchón

chón̄ta injon kan̄eñe sín la chón̄ta nchón̄hya ikon nóton la ko nkaxenhen, la nchakotjin la ko tie títoehya sín ntáchro sín kíxin:

Santo, santo, santo,

Ïnchéni Dios, jaha chonta kaín kjuachaxin,

jaha xráxin tjen la ko itjen ijie la ko jaha ts'inka ínaá.

⁹ A ntá tí nkexro tjejóchón jnkoyaxon tió tjanchia sín kjuasáyé Dios la ko tjikosáyehe sín ch'án la ko nixjehe sín ch'án chjéhe sín kjuasáyé tí nkexro tjetjaxin tí trono mé tí nkexro tjechón jnkochrín. ¹⁰ La ntá tí veinticuatro tí sín táda tjejóxin toch'in sín nkayakon ch'án ntiha la tjikosáyehe sín tí jehe ch'án kíxin jehe ch'án tjechón jnkochrín la ko tjakjinjin sín corona tjoka sín tí tjen tí trono la ntáchro sín kíxin:

¹¹ Ïnchéni Dios kuènteni, jaha la imá jína la t'ayéhe kjuasáya kíxin tjikosáyahani tí jaha kíxin tí kjuachaxin chonta; kíxin jaha kjuich'éna kaín nkehe síin kíxin jaha kóxrínhan xikaha k'óna.

5

Tí libro la ko tí Kolélo

¹ A ntá tí tja chjina tí nkexro tjetjaxin tí trono, k'uíquañ ijnko libro mé tsíkjin sín nkaxenhen la ko nóton la ko mé tsíkjèxin yato sello. ² La k'uíquañ ijnko ángel chón̄ta kjuachaxin ntá kjuanchankí ch'án itsen ntáchro ch'án kíxin:

—¿Nkexro tí jína chrókjuacha chrókuakitjehe tí libro la ko chróócrítõn tí sello chón̄ta?

³ La ninkexró ní nkajní o ní chjasintajni o ní chrínkí nonte tsjachahya tsakitjehe tí libro la ní komáhya sín. ⁴ A ntá janhan la imá tsjanka kíxin naxa tónoxínhya ninkexró chrókjuacha chrókuakitjehe tí libro o chrókuinchekuáxin tí libro o chrókomá nkehe tí ntáchro tí libro. ⁵ Ntá ijnko tí sín táda ntá nixjana ntáchro kíxin:

—Tsjankahya, tsjehé ntihi tí Koxra k'uaxrjenín Judá la ko tsík'axrjenín rey David. Mé kjuacha la ó tsjacha tsakitjehe tí libro la ko tsóchrítõn tí yato sello —ichro ch'án.

⁶ A ntá jnkosiné tí trono la ko tí tjejó tí noó tí nkexro tjejóchón la ko jnkosiné tí tjejó tí sín táda ntaha mé k'uíquañ tjejin toté ijnko Kolélo tsjehe éxí tsík'óyán sín mé chón̄ta yato ntéé la ko yato ikon. A ntá tí kon mé tí yato Nchakuen Dios la táha mé tsík'ítuenhen t'ayakonhen kuenté chjasintajni.

⁷ A ntá tí Kolélo a kuákja tí libro itjen tja chjina tí nkexro tjetjaxin tí trono. ⁸ A ntá tió k'uáyéhe ch'án tí libro la ntá tí noó sín tjejóchón la ko tí veinticuatro tí sín táda k'uéjõxin toch'in sín nkayakon tí Kolélo. A ntá kaín tí jehe sín chón̄ta sín ison arpa la ko xraá sín ihnti tsík'óna chica oro tsíkaón chjincõ. Tíha mé oración nixjehe Dios kaín tí sín tsíkjinchetjóá ch'án. ⁹ Itsje sín nkehe nixin ntáchro kíxin:

Jaha mé ijnko nkexro jína kjuacha kuákja tí libro la ko kóchrítuan tí sello; kíxin tsík'óyán sín tí jaha la ko tí ijnjá k'uëñaxian tí jeheni ts'áyéhe Dios, mé ts'áyéhe ch'án kenxín chojni kjónté nkexrí tsjehe sín la ko kjónté nkexrí nixja sín la ko chojni kénxín chjasin la ko kaín nación.

¹⁰ Jaha tsíkjich'éñani reyes la ko nchat'á sich'eñeni xra Dios kuènteni, la ko jaha tsíkjánjuan kjuachaxin ts'etõanni chjasintajni. Mé xikaha ichro sín.

¹¹ Ntá tuéñxín k'uíquañ la ko kuñhan itén nchón̄hya sín ángel tjejó sín jnkontatjen tí trono la ko tí sín tjejóchón la ko tí veinticuatro tí sín táda.

Nchónhya millones la ko millones tí jehe sín. ¹² Itsen nixja sín ntáchro sín kixin:

Tí Kolélo tsík'óyán sín,

tíha mé kjuacha k'uáyéhe kjuachaxin ts'etɔan la ko k'uáyéhe tí nkehe tjehe kuènte Dios,

la ko tí kjuaxrexinkaon jína la ko kjuachaxin sich'e xra

la ko mé xikaha tjikosáyeheni ch'án.

¹³ Kjaxin kuñhan kixin kaín nkehe kjuích'éna Dios síin nkajni la ko chjasintajni la ko tí nkehe síin chrínkí nonte la ko kaín nkehe síin ntayaon la kaín tíha mé ntáchro kixin:

Chjéheni kjuasáya tí nkexro tjetjaxin tí trono la ko tí Kolélo

kixin chóna kjuachaxin jnkochrín.

¹⁴ A ntá tí noó sín tjejóchón ntáchro sín kixin:

—Xikaha tsonhen. Amén.

La ko tí veinticuatro tí sín táda k'uejóxin toch'in sín la chjéhe sín kjuasáyé tí nkexro tjechón jnkochrín.

6

Tiyato sello

¹ A ntá k'uikuán kixin tí Kolélo kóchrítɔn tí xránkixixín tí yato sello ntá kuñhan ijnko tí noó tí noó tí sín tjejóchón nixja ch'án éxí kjóna, la ntáchro ch'án kixin:

—Xrákiá tsjehé.

² Ntá k'uikuán ijnko kokate tjóá. A ntá tí nkexro tjejen tí kokate chóna ch'án ijnko arco tí tja ch'án la tsík'áyéhe ch'án ijnko corona. Jehe ch'án mé kjuacha ch'án la naxa xikjacha ch'án inaá.

³ A ntá tí Kolélo kóchrítɔn tí yóxin sello ntá kuñhan tí nkexro yóxin tjechón ntáchro kixin: —Xrákiá tsjehé.

⁴ Ntá sákjuí í jnko kokate kjátse. A ntá tí ch'in tjejen k'uáyéhe ch'án kjuachaxin tsjakjin tí kjuaxróxin síin chjasintajni kixin ntá chojni mé ts'óyán kichó sín kixin jehe ch'án mé tsík'áyéhe ch'án ijnko espada ijié.

⁵ A ntá tí Kolélo kóchrítɔn tí nixin sello la ntá kuñhan nixja tí nixin nkexro tjechón ntáchro kixin:

—Xrákiá tsjehé.

Ntá k'uikuán ijnko kokate tié. A ntá tí nkexro tjejen tí kokate chóna itja ch'án ijnko báscula. ⁶ La ntá kuñhan itén ijnko nkexro jnkosiné tí tjejó tí noó sín tjejóchón mé ntáchro kixin:

—Jehó ijnko kilo trigo ijnko chichaon denario la ko iní kilo cebada ijnko chichaon denario. Kjáncho chrókuinchek'itjáyanhya tí aceite la ko tí vino. (Tíha mé t'axrxjén tsokjinta.)

⁷ A ntá tí Kolélo kóchrítɔn tí noóxin sello ntá kuñhan tí noóxin tí nkexro tjechón ntáchro kixin:

—Xrákiá tsjehé.

⁸ Ntá k'uikuán ijnko kokate sine. A ntá tí ch'in tjejen va a mé it'in ch'án Muerte. A ntá nóton tí jehe ch'án la ikui nkehe tóyóhe tí tjejó tí sín tsík'en. Jehe ch'án k'uáyéhe kjuachaxin ts'etɔan ch'án noóxin parte chjasintajni kixin ntá ts'óyán kichó sín la tsokjinta la ko ts'enxín sín ichin la ko kaín ko jjehe síin chjasintajni mé tsjáya va.

⁹ A ntá tí Kolélo kóchrítɔn tí n'óxin sello ntá k'uikuán chrínkí tí altar tí asén tí sín tsík'enxín tí tan kuènte Dios tsíchrónka sín. ¹⁰ Ntáchro sín itsen kixin:

—Jaha mé Ìnchéni tjóá jína la jaha mé sìnchexiteyá tí nkehe tsíntáchrua, ¿la nkesá sìnchekitoexián ijíé tí sìn siín chjasintajni tsík'óyán tí jeheni? —ichro sìn.

¹¹ A ntá tí sìn a mé k'uáyéhe sìn iké sìn tjóá ntá k'úituenhen sìn naxa ts'ok'éhe sìn í so yaon tsoxetajia tí número tí kíchó sìn ch'ehe xra Cristo naxa ts'enxín sìn éxí k'uén tí jehe sìn.

¹² A ntá tí Kolélo kóchríton tí injonxìn sello ntá xrínahya imá kuínkí nonte. A ntá tí yaon la kótié éxí ika tjiko chojni tsík'en. A ntá nitjó k'óna kjátse éxí jni. ¹³ A ntá konotsé sít'ánótjenxìn nkajní sítjitsínka nonte éxí yóhe tí inta t'óna to higo la síxènjín tí to yoa tíó tsjixraya tí nta kíxín tí imá fuerte chjéhe xrinto. ¹⁴ A ntá nkajní k'uitjayan éxí ijnko xroon tsíxrèya. Ntá kaín jna la ko tí nonte ntsíntsí siín jnkosiné ntayaon sákjuí ókjé. ¹⁵ A ntá kaín tí sìn reyes siín chjasintajni la kjaxin tí sìn t'etoan la ko chojni rico la ko comandante la ko tí sìn chóna kjuachaxin la ko kaín tí sìn ch'exón xra la ko tí chojni náhi mé k'uixenhen sìn tjó siín nteje ts'ejómáxin sìn. ¹⁶ Ntáche sìn tí jna la ko tí tjó kíxín:

—Xrákiá xrátja tí jeheni nchemáni kíxín chrók'uikonhyani tí nkexro t'etoan tjetjaxin trono la ko chrókjuasótehyani tí kjuachrakon jíé tsjanjon tí Kolélo.

¹⁷ Kíxín ó kui tí yaon imá jíé kuènte kjuachrakon la, ¿xá nkexro chrókjuacha chrók'uejó ntiha?

7

Tí sìn israelita chóna sello

¹ A ntá chr'éxín k'uikuán noó sìn ángel tjejóxin toté sìn la jnkojnko sìn tjejó sìn tí chrínta chjasintajni chónthehe sìn tí noó xrinto kíxín tsochjéhya xrinto chjini chrítaón chjasintajni la ko ní chrítaón ntayaon la ko nijnko tí nta yoa. ² Kjaxin k'uikuán í jnko ángel kjuixín nó tjitoxin yaon la chóna sello kuènte Dios tjechón. Ntá tí ángel mé k'uíyehé ch'án itsen tí noó ángel tsík'áyéhe kjuachaxin sinchenihi nonte la ko ntayaon. ³ Ntáchro ch'án kíxín:

—Náhi, sìncheníehya nonte la ko ntayaon la ko kjaxin tí nta la náhi tí naxa tsikahya sello totjen tí sìn ch'ehe xra Dios kuènteni.

⁴ Kuínhan tí número tí sìn tsíka sello la me ciento cuarenta y cuatro mil kaín tí sìn tsík'axrjeníxin tí sìn israelita. ⁵ Teyó mil tí sìn tsíka sello tsík'axrjeníxin tí Judá la ko teyó mil tí sìn tsíka sello tsík'axrjeníxin Rubén la ko teyó mil tí sìn tsíka sello tsík'axrjeníxin sìn Gad ⁶ la ko teyó mil tí sìn tsíka sello tsík'axrjeníxin sìn Aser, la ko teyó mil tí sìn tsíka sello tsík'axrjeníxin sìn Neftalí la ko teyó mil tí sìn tsíka sello tsík'axrjeníxin sìn Manasés ⁷ la ko teyó mil tí sìn tsíka sello tsík'axrjeníxin sìn Simeón la ko teyó mil tí sìn tsíka sello tsík'axrjeníxin sìn Leví la ko teyó mil tí sìn tsíka sello tsík'axrjeníxin Isacar ⁸ la ko teyó mil tí sìn tsíka sello tsík'axrjeníxin sìn Zabulón la ko teyó mil tí sìn tsíka sello tsík'axrjeníxin José la ko teyó mil tí sìn tsíka sello tsík'axrjeníxin sìn Benjamín.

Sín nchónhya chojni chóna ka tjóá

⁹ Ntá kjuixín tíha ntá k'uikuán nchónhya chojni kaín xín nación la ko kaín xín nkexrí tsjehe sìn la ko kaín xín nkíva la ko kaín xín chjasin mé tjejóxin toté sìn nkayakon tí trono la ko nkayakon tí Kolélo. Nchónhya sìn la kohya ninkexró tsjacha ts'ekin nkekjaín tí jehe sìn la tjejóya sìn ka tjóá la tjejóya kajni tja sìn. ¹⁰ Kaín sìn itsen níxja sìn ntáchro sìn kíxín:

Dios kuènteni mé kjuíncheakaáni.

Jehe ch'án mé tjetjaxin tí trono tí tjen tí Kolélo kjuíncheakaáni.

¹¹ Kaín tí sín ángel tjejóxin toté sín jnkontatjen tí trono la ko jnkontatjen tí sín táda la ko tí noó sín tjejóchón la ntá k'uejóxin toch'in sín la k'uísén sín hasta káxin ikja sín nonte nkayakon tí trono la tjanchehe sín kjuasáye Dios. ¹² Ntáchro sín kixin:

Amén. Kjuíncheyaonni Dios la tsochjéheni Dios kjuasáya kixin kaín tí kjuaxrexinkaon jína tjanjon ch'án la ko tjancheheni ch'án kjuasáya.

Tsjikosáyeheheni tí kjuachaxin kuènte ch'án kixin tjinkitsani ch'án jnkochrín. Amén.

¹³ A ntá ijnko tí sín táda kjuanchankina, ntáchro kixin:

—A ntá tí sín tjejóya ika tjóá la, ¿xá nkexro tíha? la ko ¿xá nketí tsíkjin sín?

¹⁴ Ntá janhan ntáxrjan kixin:

—Ínchéni, jaha ó noha. Ntá jehe ch'án ntáchro ch'án kixin:

—Tí sín í tsíkjin sín tí kjuaxróxinhya k'uék'ejó sín, la tí sín a mé tsijen sín iké sín la ko tsíkótjuáxin ijnié tí Kolélo. ¹⁵ Méxra xikaha ntá ijie tjejó sín nkayakon tí trono kuènte Dios la tjejóch'ehe sín xra Dios nchakotjin la ko tie tí nkaxenhen njnko kuènte ch'án. A ntá tí nkexro tjetjaxin chrítaón tí trono mé t'ayakonhen ch'án sín. ¹⁶ A ntá tí sín a mé ts'enixnhyá sín kjinta la ko ts'enixnhyá sín ñnta la ko tsochjánxinhya sín yaon la ko ni sóa kohya nkehe sich'ehe sín. ¹⁷ Kixin tí Kolélo tjen jnkosiné tí trono mé t'ayakonhen ch'án tí jehe sín éxí iko kuènte ch'án la ko sátjiko ch'án tí tjía ntá tjanjon kjuachón la Dios mé sinchexámá kaín tí ntakon tí jehe sín.

8

Tí yatoxin sello la ko tí ihnti oro

¹ A ntá tí Kolélo kóchríton tí yatoxin sello kuènte tí libro la ntá kohya ninkehó ruido nkajni chjina it'ò hora. ² Ntá tuénxín k'uúkuan yato ángel tjejóxin toté nkayakon Dios la jnkojnko sín k'uáyéhe sín jnkojnko trompeta. ³ Ntá chr'éxin ikui í jnko ángel xraá ihnti tsík'óna chica oro la kjuák'exin toté nkayakon tí altar. K'uáyéhe ch'án nchónhya chjincó tsjak'e ch'án kixin sátsjiko tí oración kuènte kaín tí sín tsíkjinchetjóá Dios kixin tsjak'e chrítaón tí altar oro nkayakon tí trono. ⁴ A ntá tí ihnchi kuènte chjincó chrínxín tja tí ch'ín ángel tí tjen Dios la ko kjaxin tí oración kuènte chojni tsíkjinchetjóá Dios. ⁵ A ntá tí ch'ín ángel kuákja ch'án tí ihnti kjuíncheakaón ch'án xrinta kuènte xrohi kuènte tí altar la ik'ue ch'án chjasintajni. La ntá kjónta la ko nchónhya ruido la ko sítjónkixin la ko kuínki nonte.

Tí trompeta

⁶ A ntá tí yato ángel mé chóna sín jnkojnko trompeta ó yaxínhin sín kixin ts'ánao sín.

⁷ A ntá tí ángel saoxín k'uánao trompeta ntá k'uániá toni la ko xrohi tsínkíjkan jni mé xikaha ikui chrítaón chjasintajni. A ntá iche níxin parte nonte la ko níxin parte tí nta la ko kaín tí kayoa siín.

⁸ A ntá tí yóxin ángel k'uánao trompeta la ijnko nkehe yóhe tsjehe éxí ijnko jna jie tjeche la sákjuí kjuíanki ntayaon la ntá níxin parte tí ntayaon la k'óna jni. ⁹ A ntá tí níxin parte kaín tí nkehe siín tí ntayaon la ik'uén la ko níxin parte kaín tí ntabarco la xíka.

¹⁰ A ntá tí nínin ángel k'uánoa trompeta la ntá xrínahya k'uánótjen ijnko konotsé jié k'uánótjénxín nkajní mé tjeche éxí ijnko xrohi jié. K'uánótjen chrítaón nínin parte ntarío la ko tí sít'axrje ntá. ¹¹ Tí konotsé mé it'in Itsjá la tsíkjiánkí nínin parte tí ntá ntá kótsjá tí ntá la nchónhya chojni ik'uén kixin tí ntá xíkaha tsíkótsjá.

¹² A ntá tí noóxin ángel k'uánoa trompeta la kjuíncheníhi ijnko nínin parte tí yaon la ko nínin parte tí nitjó la ko nínin parte tí konotsé. Méxra tí nínin parte kuítóhe sítié la í kohya t'inkaséyan tí nínin parte tí nchakotjin la ko tí tie.

¹³ Ntá tuénxín k'uíkuan la ko kujnhan ijnko ángel tjetjaká jnkosiné nkajní t'èya ch'án itsen, ntáchro ch'án kixin:

—Nòda tí sín tjejó chjasintajni tió tsontáchro tí trompeta ts'ánoa tí iní ángel inaá.

9

¹ A ntá tí n'óxin ángel k'uánoa trompeta la k'uíkuan ijnko konotsé tsík'ánótjénxín nkajní chrítaón chjasintajni ntá k'uáyéhe tí llave kuènte tí tòye nínka. ² A ntá tuénxín xitjehe tí tòye nínka ntá ntiha chrínxín nchónhya ihnchi kuènte tja ntá tí t'inkaséyanxín yaon la ko tí xrínto k'uúxin tié kixin tí ihnchi kuènte tí tòye. ³ A ntá tí ihnchi mé k'uaxrjéxín kochjõa xritjaká chrítaón chjasintajni. A ntá tí kochjõa k'uáyéhe kjuachaxin éxí tí chóna konchíã síin chjasintajni. ⁴ K'uútuénhen va kixin sincheníehya va tí kayoa síin chjasintajni la ko ninkehó nkehe yoa la ko ninkehó ntayoa. Jehó chojni chónahya sello kuènte Dios tí totjen mé sincheníhi va. ⁵ Kjánchó k'uáyèhya va kjuachaxin ts'óyan chojni. Jehó sinchekjoté va chojni hasta in'ó nitjó la tí kjuatjoté mé yóhe kjuatjoté éxí chojni tsíkjiinehe konchíã. ⁶ A ntá tí yaon a tsotjinkaon chojni chrók'uen sín la ntá xitjahya its'en sín. Kjonté tjinkaon sín chrók'uen sín la tí muerte sátsíkji ókjé.

⁷ A ntá tí kochjõa éxí kokatè tsjehe, listo tjen sátsjikjanjon va. A ntá tí ikja va itjen nkehe tóyóhe ijnko corona tsík'óna oro la ko tí kàré la tóyóhe éxí kàré chojni. ⁸ A ntá tí kaxrèe va tsjehe tóyóhe éxí kaxíhi chojni chjin, a ntá tí neno va la tóyóhe neno koxra. ⁹ A ntá tí cuérpoé la tjejanjin nkehe tsík'óna chica kixin kohya nkehe tsonhen va. A ntá ruido kuènte kanènee la éxí nchónhya carro tinkánkákjen kokatè tió xritinká tí síin kjuanínkaon. ¹⁰ A ntá tí ntané va mé tsjiate chojni la éxí ntané konchíã, la tíha mé tsochóna kjuachaxin sincheníhi chojni hasta in'ó nitjó. ¹¹ A ntá tí kochjõa mé chóna ijnko nkexro t'etõan mé ijnko ángel kuènte tí tòye nínka. Tí ángel mé nkiva hebreo mé it'in Abadón la nkiva griego la mé Apolión mé t'axrjéxín kixin táha mé sinchek'itjáyán nkehe.

¹² Mé xíkaha kónhen tí kjuachrakon xrankíxín. A ntá naxa t'itjáyán yaá inaá.

¹³ A ntá tí injonxín ángel k'uánoa trompeta la kujnhan ijnko itén nkexro k'uaxrjéxín tí tjejó tí noó ntèe kuènte tí altar oro tí tjen Dios. ¹⁴ A ntá tí itén tí nkexro ntáche tí injonxín ángel chóna trompeta kixin:

—Tjasintankehe tí noó ángel kuènte tí jínahya tjejóchroé chjinaxón tí ntarío jié it'in Eufrates.

¹⁵ Ntá xíkaha xintankehe tí noó sín ángel kixin ts'óyan sín tí nínin parte chojni. Mé xíkaha yaxínhin sín sátsji sín tí hora la tí yaon la tí nitjó la tí nánó. ¹⁶ Ntá kujnhan tí número tí soldado la ko tí kokatè la doscientos millones.

¹⁷ Mé xikaha xrínahya k'uíkuan tí kokate. A ntá tí sín tjejókjen kokate la tí ntakuin sín chóna nkehe tsík'óna chica kjátse la azul la sine. A ntá tí kokate la ikja la éxi kja koxra la tí ir'va la k'uaxrjexín xrohi la ko ihnchi la ko azufre. ¹⁸ A ntá nixin parte chojni tsík'enxín tí ini clase tí chin tsík'axrjexín ir'va kokate mé xrohi la ihnchi la azufre. ¹⁹ Tí kjuachaxin chóna tí kokate la k'uaxrjexín ir'va va la ko tí ntané va. A ntá ntané la éxi konche tsjehe la tí kja va mé sincheníhi chojni.

²⁰ A ntá tí í so chojni kuítóhe k'uénxinhya tí chin a la kjónté kjuinkíhya sín tí nkehe tjenkayáxin sín la kuítóehya sín tinkáchónki sín nchakuen jínahya la ko tí nkehe tsíkjanoya chica oro la ko chica plata la ko chica bronce la ko ixro la ko inta, mé tí nkehe t'ikonhya la ko tienhya la ko tjihya. ²¹ La kjónté xikaha la kuítóehya sín tí nkehe jínahya ch'e la ko tí chrók'óyán kichó la ko tí nchekjiko kichó la ko tí chóna sín chojni chjin ókjé la ko tí tjinkaon sín chrókueé.

10

Ijnko ángel la ko tí librito ntsí

¹ Ntá k'uíkuan í jnko ángel imá chonta kjuachaxin k'uínkajinxín nkajní tjenkakjan ch'án tjuí la ko ijnko konchecha chrítaón tí ikja ch'án. A ntá tí kàré ch'án imá tjákiní tsjehe éxi yaon, a ntá tí toté la éxi xrohi síchr'ákjen. ² Tjexraá ch'án ijnko libro ntsí tjexrankehe, la ntá toté ch'án chjina la chrítaón ntayaon la ntá toté ch'án kjon la chrítaón nche. ³ Ntá xrínahya k'uèya ch'án itsen éxi ijnko koxra tsjánka va tí tónínkaon va mé xikaha k'uèya la yato kjóna kjuátéyá tí itén ch'án. ⁴ Ntá kjuixin ntáchro tí yato kjóna la chrókjian ntá kujnhan ijnko itén nkexro nkaya nkajní ntáchro kixin:

—Chróchronkahya tí nkehe ntáchro tí yato kjóna la ko ni chrókjinhya tíha.

⁵ Ntá tuénxín tí ángel k'uíkuan ijnko toté tjekjen ntayaon la ijnko toté tjekjen nche ntá kjuaya tja chjina nó nkajní. ⁶ Ntá kjuasin ch'án testigo tí nkexro tjen jnkochríxín mé tí nkexro a mé kjuích'éna nkajní la ko chjasintajni la ko ntayaon la ko káin xín nkehe siín la ntáchro ch'án kixin:

—Í séhya má naxa tsoxrjen ⁷ ntá tsjixraká tí yaon tí yatoxín ángel ts'ánoa trompeta ntá tsoxitéyá tí nkehe jehó Dios nohe kixin xikaha tsíchénka ch'án tí sín k'uékjich'ehe ch'án xra ósé k'uéchronka sín itén ch'án.

⁸ A ntá tí itén nkexro kujnhan k'uaxrjexín nkaya nkajní ntá xínixjana ínaá ntáchro kixin:

—Sátjia tákjá tí libro ntsí tjexrankehe tjexraá tí ángel itjen toté ch'án chrítaón ntayaon la ko chrítaón nche.

⁹ Ntá sákjuia kjuáncháha tí ángel tí libro ntsí ntá jehe ch'án ntáchro ch'án kixin:

—Tákjá la inte. A ntá tí ir'va la tsóxé éxi tsjen kjánchó tí tsaa la tsotsjá.

¹⁰ Ntá kuákjaá tí libro ntsí tjexraá tí ángel ntá kjonè. A ntá ir'va kóxé éxi tsjen ntá chr'éxin la kótsjá nkaya tsena. ¹¹ Ntá tuénxín k'uetuanna ch'án kixin:

—Ínaá tsochronkaxián itén Dios tsinhin nchónhya chjasin la nación la ko nkiva la ko tsinhin tí sín reyes.

11

Iyó testigo

¹ **A** ntá chjina ch'án ijnko ntavara éxí tji tsjehe tsjáchrōaxián ntá ntáchrō ch'án kixin:

—T'ayá tjáchrōa nkaxenhen n̄inko kuènte Dios la ko tí altar la tékia nkekjain nkexro tjejó ntiha tinkáchónki Dios. ² Kjánchó tí ntasin itjen ntója n̄inko la tjáchrōahya kixin táha ó tsík'áyéhe tí sín tsíkjix̄in kjín la ntá jehe sín tsjikosáyehya sín tí chjasin tjóá Jerusalén ijnko cuarenta y dos nitjó. ³ **A** ntá mé janhan tsochr'an iyó testigo kuèntana tsonixjax̄inna mil doscientos sesenta yaon. Tí iké sín la ika tié ts'ejóya sín.

⁴ Tí yaá testigo i mé iyó nta olivo la ko iyó candelero tjejó tí tjen Ìnchéni kuènte chjasintajni. ⁵ **A** ntá tí jnkojín sín tjinkaon sich'ehe sín daño la jehe sín la xrohi ts'axrjex̄in ir'va sín la tsoche kaín tí sín nínkakonhen sín la mé xikaha its'en kaín tí sín tjinkaon sich'ehe sín daño tí jehe sín. ⁶ **A** ntá tí testigo i chóna kjuachaxin ts'ikjehe nkaya nkajní kixin í ts'aniáhya chrin tí tsonixja sín kuènte Dios la ko kjaxin chóna sín kjuachaxin tsontáche sín tí ntá kixin ts'óna jn̄i la ko sinchekjasótex̄in sín chojni chjasintajni nchónhya clase chin nchónhya veces éxí tí tjinkaon sín. ⁷ **A** ntá tí kjuixinhin sín tí xra ntá tí ko jiehe ts'axrjex̄in tí tòye n̄inka mé tsjankixin tsjanjonko tí jehe sín ntá tsjacha va ts'óyan va tí jehe sín. ⁸ **A** ntá tí cuérpōé sín tsitōhe sitsínka tí calle kuènte chjasin jie tí tsíkjak'enkani sín Ìnchéni ntacruz mé tí chjasin mé kjaxin nchek'in sín Sodoma la ko Egipto. ⁹ **A** ntá iní yaon ko t'ō la kaín chojni itsje chjasin la ko kaín nkexrí tsjehe sín la ko nchónhya nkiva la ko nchónhya nación ts'ikon sín tí chojni tsík'en tjejótsínka sín ntiha la ko tsjanjonhya sín kjuachaxin tsoxravá tí chojni tsík'en a. ¹⁰ **A** ntá tí sín tjejó chjasintajni tsochéhe sín kixin xikaha tsík'en tí sín a la antsí má tsochéhe sín la tsochr'án sín nchónhya nkehe nchekitonhen kichó sín kixin xikaha ik'uén tí yaá sín k'uéchrónka itén Dios kixin jehe sín kjuaxróxinhya k'uék'ixin sín tí chjasintajni tí k'uék'ejó tí sín a. ¹¹ **A** ntá chr'éx̄in ó k'uátsínka iní yaon ko t'ō la ntá Dios kjuínchexechón tí iyó tí sín a inaá la k'uàya sín inaá la ntá kaín chojni k'uíkon la imá chrakon sín. ¹² Ntá tuénxín tí iyó sín testigo kuínhin sín ijnko nkexro nixja itsen nkaya nkajní ntáchrō kixin:

—Chriyan xrákiá antsí ntihi.

Ntá chriinxín sín nkajní ijnko tjuj. **A** ntá kaín tí sín nínkakonhen sín la k'uíkon sín kixin xikaha kónhen sákjuj tí iyó sín a. ¹³ Ntá tuénxín imá kuínkí nonte la ntá ijnko ite parte chjasin ntiha la k'uítjayan la yato mil chojni tsík'en kixin tí kuínkí nonte. **A** ntá kaín tí sín xéhe imá chrakon sín la kjuankíxin sín tinkáchónki sín Dios la tjanchia sín kjuasáya.

¹⁴ Mé xikaha kónhen tí yóxin kjuaxikaon la ntá tuénxín itsi tí nixin kjuachrakon inaá.

Tí yatōxin trompeta

¹⁵ **A** ntá tí yatōxin ángel k'uánoa trompeta ntá kuínhin sín ijnko tan nkajní itsen ntáchrō kixin:

A ntá tí sín k'uáyéhe kjuachaxin kuènte chjasintajni la ó kjaxin nchex-itēyēhe sín

Ìnchéni Jesucristo

kixin jehe Jesucristo mé ts'etōan ch'án jnkochríxin.

¹⁶ **A** ntá tí veinticuatro tí sín táda tjejótx̄in sín trono nkayakon Dios la mé k'uísén sín hasta káxin ikja sín nonte la tjanchehe sín kjuasáya Dios.

¹⁷ Ntáchrō sín kixin:

Tjáhani kjuasáya jaha Ìnchéni Dios imá chonta kjuachaxin.

Jaha itjen la ko xráxin tjen la ko jaha ts'inka ínaá.

Kíxin jaha k'uayéhé kjuachaxin jié kíxin xráxin tétōan.

¹⁸ A ntá kaín tí naciōn kónínkaon,

a ntá ó kui tí yaon jaha sìnchekjasóte sìn

la ko kjaxin jaha sìnchekitōexián ijje tí sìn tsík'en

la ko tsjénkehé tí sìn kjuít'aha xra chrónkaxín itán

la ko tí sìn ó kjuínchetjóá la ko tí sìn kjuikosáyehe tí ihniá,

mé tí chojni nteto la ko tí sìn chánjan ntsínsí.

Jaha tjoka sìnchek'itjáyan tí sìn chrókjuínchek'itjáyan chjasintajni.

¹⁹ A ntá xitjēhe tí nínkōe Dios tjen nkaya nkajni, a tí nkaxenhen kónoxín tí caja tjinká tí nkehe tsík'etōan Dios. A ntá sítjónkíxín la ko nchónhya ruido sítjonta la ko kuínkí nonte la ko imá tsan̄ka k'uániá toni.

12

Tí chojni chjin la ko tí dragón

¹ A ntá kónoxín nkajni ijnko kjuaxroan jié mé ijnko chojni chjin iké tjákini éxi yaon tsjehe la chrínkí toté tjan itjen nitjó. A ntá tí kja tjan tjenkáya ijnko corona chóna teyó konotsé. ² A ntá tí chojni chjin a mé tjejá tjan la t'èya tjan kíxin tjtóté tjan kíxin sìnchekokjíhi tjan xjeen tjan.

³ Kjaxin kónoxín í jnko kjuaxroan nkajni mé ijnko dragón kjátse chóna yato kja la ite ntéé la jnkojnko corona jnkojnko kja. [Tí dragón mé ijnko kots'aja jié.] ⁴ Tí ntané mé nkánkákjen níxin parte konotsé kuènte nkajni la ik'ue chrítaōn chjasintajni. A ntá tí dragón kjuák'e chók'èxin tí tjen tí chojni chjin mero tsokjíhi xjeen kíxin tjinkaon tjoka chrókjōne tí xjan tsokjíhi. ⁵ A ntá tí xjan kjuínchekokjíhi tjan mé xjan ntoa kíxin jehe ch'án mé ts'etueñhen ch'án kaín naciōn la tsochóna ch'án ijnko vara chica ts'etōanxín ch'án. Ntá tí xjeen tjan la mé Dios sákjuiko tí tjen ch'án t'etōan ch'án. ⁶ A ntá tí chojni chjin la kuinká tjan sákjuí tjan nteje kíxin tsíkjincheyóxin Dios nketí sátsji tjan kíxin ntaha tsoxranjon nkehe sine tjan mil dos cientos sesenta yaon.

⁷ Ntá chr'èxin xrináhya k'uíxin kjuanínkaon jié nkajni la mé tí arcángel Miguel la ko tí í so ángel xriko ch'án mé kjuánjonko sìn tí dragón, la tí dragón la ko tí ángel kuènte mé kjuánjon sìn. ⁸ Kjánchó kjuachahya tí dragón la kohya lugar kuènte nkaya nkajni. ⁹ Mé xikaha kuakitsjexín sìn tí dragón nkajni. Jehe mé tí konche ósé ikjí mé nchek'in sìn diablo la ko Satanás. Jehe mé k'uékjich'iyeyehe tí chojni kuenté chjasintajni. Jehe la ko tí sìn ángel kuènte k'uaxrjexín ntiha la kjuítsínka chjasintajni.

¹⁰ Ntá kuñhan itén ijnko nkexro nkaya nkajni itsen nixja ntáchro kíxin:

—Ó kui tí tsaáxinni tí kjuachaxién tí Dios kuènténi la ko tí kjuachaxin t'etōan Cristo kíxin ó k'uaxrjexín nkajni tí nkexro t'eka jje tí kichó ni mé kjuanchia jje nchakotjin la ko tie nkayakon Dios kuènténi. ¹¹ Tí sìn kichó ni la kjuacha sìn kuaáxin sìn kíxin tí ijnié tí Kolélo k'uitji la ko kíxin jehe sìn chrónkaxín sìn tí tan tsík'áyéhe sìn la chrakonhya sìn kjónté chrók'uenxín sìn. ¹² A ntá jie la tócháhará kaín rá tjejorá nkajni. Ntá nòa tí sìn tjejó chjasintajni la ko ntayaon kíxin k'uínkajin tí ch'ín diablo la imá nínkaon ch'án kíxin ó nohe ch'án kíxin í kánhyó sé tsjak'e ch'án.

¹³ Ntá tí ch'ín dragón ó nohe kíxin k'uánótjexin nkajni ikui chjasintajni ntá sákjuichréhe tí chojni chjin chóna tí xjan ntoa kíxin chrókjuínchek'itjáyan tjan. ¹⁴ Kjánchó tí chojni chjin k'uáyéhe yaá kanenee

kuènte kotjuanhnko ijíe kixin jina tsjaká tjan sátsji nteje kixin ntá ikjín tsitohe tí konche. Sátsji tjan kixin ntiha tsoxranjon nkehe sine tjan iní nánó ko t'ó. ¹⁵ A ntá tí konche mé k'uaxrjexín ntá ir'va kixin ts'óna ijnko ntarío kixin tjinkaon va chrók'uátjoáko tí tjan a tí ntá a. ¹⁶ A ntá tí nonte kjuínkítsa tí tjan a kixin xitjehe ir'va nonte la kaín tí ntá k'uaxrjexín ir'va tí konche la ntahó sákjuí k'uixenhen. ¹⁷ A ntá tí dragón la imá kónínkakonhen tí tjan a ná imá kónínkaon kjuánjonko tí í so sín naxa kjéhya tí tjan a kixin naxa titekaon sín tí nkehe tsík'etoan Dios la naxa tinkáchónki sín tí nkehe tsíchrónka Jesucristo.

13

Tí yaá bestia

¹ Tí kjuak'é chrínta ntayaon ntá ntaha k'uíkuan chrínxín ijnko bestia chóna yato kja la ko ite ntée chojni t'ántaxínhin Dios. ² Tí bestia k'uíkuan mé tóyóhe kotigre la chóna toté éxí toté ko oso la ko tí ir'va la éxí ir'va koxra. Tí dragón kjuanjón kjuachaxín imá ts'etoan tí bestia a. ³ A ntá ijnko kja tí bestia chóna ijnko tsíchrít'ó jíe chóna chrók'uenxín ntá tsíkitohe jina ntá kuenté chjasintajni la chrakon chojni ntá chréhe sín tí bestia. ⁴ Kjuikosáyehe sín tí dragón kixin jehe kjuanjón tí kjuachaxín k'uáyéhe tí bestia ntá kjaxín kjuikosáyehe sín tí bestia la ntáchro sín kixin: —Xá nkexro chrókóyóhe tí bestia la xá nkexro chrókjuacha chrókjuanjónko tí jehe?

⁵ Kjaxín tí bestia k'uáyéhe kjuachaxín tsontáchro kixin chóna kjuachaxín má la ts'ántaxínhin Dios la tsochóna kjuachaxín cuarenta y dos nitjó. ⁶ Ntá mé xíkaha kjuích'e k'uántaxínhin Dios la ko k'uántaxínhin ihníe Dios la ko k'uántaxínhin tí nínko tjen nkaya nkajní la ko kaín tí sín tjejó ntiha. ⁷ Kjaxín tsík'áyéhe kjuachaxín tsjanjonko tí sín tinkáchonki Dios hasta tsjacha ts'etuñenhen tí sín ntá k'uáyéhe kjuachaxín ts'etuñenhen kaín xín nkexrí tsjehe chojni la ko kaín xín chjasín la ko kaín xín tan la ko kaín xín nación. ⁸ A ntá tí bestia mé kaín xín chojni síin chjasintajni mé tsjikosáyehe sín tí bestia. Tí chojni a mé ts'ínixínhya ihníe tíó k'óna chjasintajni, mé ts'ínixínhya ihníe sín tí libro ts'ínixín ihníe tí sín tsaá. Tí xroon a mé chóna tí Kolélo tsík'óyán sín.

⁹ La jnkojín nkexro tjinkaon chrókuinhin la chrókuinhin tíhi. ¹⁰ Tí nkexro sátsjiko tsjik'íkjehe í so chojni la kjaxín ch'án ts'íkjehe ch'án la tí nkexro tsjayaxín espada la kjaxín espada ts'énxín. A ntá tí nkexro tinkáchónki Dios la t'ichjánxín tsonínkakonhya la ko tsochóna fe.

¹¹ A ntá chr'éxín k'uíkuan í jnko bestia k'uaxrjexín nonte, chóna yaá ntée éxí tsjehe ntée coronta la mé nixja éxí nixja tí dragón. ¹² Tí bestia la chóna kaín xín kjuachaxín éxí k'uéchóna tí bestia saxín tí k'ué la t'etuñenhen tí sín síin chjasintajni kixin tinkáchónki sín tí bestia saxín mé tí bestia tsíchrít'ó kja ntá tsíkitohe jina. ¹³ Kjaxín kjuasin kjuaxroan jíe hasta xrohi k'uánótjénxín nkajní ikui nonte ntá nchónhya chojni k'uikónxín kon sín kixin xíkaha kónhen. ¹⁴ Mé xíkaha tí bestia tsík'áyéhe kjuachaxín kjuasin kjuaxroan tí tjen tí bestia saxín la kjuích'íyehe nchónhya chojni síin chjasintajni. La ntá k'uetuñenhen tí sín síin chjasintajni sích'éna sín ijnko nkehe tsíkjanoya éxí yóhe tsjehe tí bestia tsíchrít'oxín espada la kjónte xíkaha naxa kjuák'echón. ¹⁵ A ntá tí yóxin bestia k'uáyéhe kjuachaxín tsochjéhe kjuachón tí nkehe tsíkjanoya tóyóhe tí bestia saxín kixin ntá tí nkehe tsíkjanoya la jina tsonixja la ko jina ts'etoan its'en

kaín nkexro tinkáchónkihya tí jehe. ¹⁶ Kjaxin ts'etəoan kixin kaín chojni tsochónta marca, á chojni hyé o chojni ntsínsí, la á chojni rico, la á chojni nòa la á chojni ch'exón xra la ko chojni náhi, mé kaín sín tsochónta sín marca, á tja sín chjina o totjen sín. ¹⁷ Ntá ninkexró xitjahya ts'ena la ko ninkexró xitjahya sinchekji tí chóntahya sín marca o ihnié tí bestia o chóntahya sín número kuènte ihnié tí bestia. ¹⁸ T'ichjánxin chrókiénxínrá tíhi. Tí nkexro tienxín la chrókónohe tí número chónta tí bestia kixin tíhi mé tí número chónta ijnko chojni la mé tí número mé seiscientos sesenta y seis.

14

Tí nkehe itsje tí ciento cuarenta y cuatro mil

¹ A ntá k'uíquān tí Kolélo tjaxin toté chrítaón tí jnā Jerusalén. Jehe ch'án tjeko ch'án ciento cuarenta y cuatro mil chojni ts'ínixín totjen sín ihnié tí Kolélo la ko ihnié It'é ch'án. ² Ntá tuénxín kuñhan ijnko itén nkexro kuixín nkaya nkajní mé ijnko ruido éxi nchónhya ntarío la ruido éxi sítjonta itsen la éxi ijnko ruido nchónhya chojni it'in sín isón arpa. ³ Itsje sín nkehe nixin nkayakon tí trono la ko nkayakon tí noó nkexro tjejóchón la ko tí sín táda. Nijnko nkexro chrók'uitjahya tí nkehe tjejótsje sín; jehó tí sín ciento cuarenta y cuatro mil mé sín tsíkaá k'uék'ejó chjasintajni. ⁴ Tí sín a mé k'uéchóntahya sín itsjé chojni chjin la tjóá sín la chréhe sín tí Kolélo kjónté nketí k'uáji. Tí sín a mé kuaá sín tí k'uék'ixín chojni k'uékjasin jie la ko tí sín a mé éxi ijnko ofrenda xrankíxixín k'uáyéhe Dios la ko tí Kolélo kjaxin. ⁵ Kónoxínhya ninkehó kjuach'ia k'uaxrjexínhya ir'va sín. La tí sín la ninkehó jie chóntahya sín tí tjejó sín nkayakon tí trono kuènte Dios.

Tí nkehe chrónka tí iní ángel

⁶ A ntá k'uíquān í jnko ángel tjetjaká jnkosiné nkajní chrónka tí tan tsaáxinni jnkochrixín tsinhin tí sín siín chjasintajni, mé tsinhin kaín nación la ko kaín nkexrí tsjehe chojni la ko kaín xín tan la ko kaín chjasin. ⁷ Ntá t'èya itsen ntáchro kixin:

—Chróchrakonrá la chrórxáinkáonrá Dios la chróchjehérá ch'án kjuasáya kixin ó kjuixraká tí yaon sinchekitəexín ch'án ijje chojni. Tjikosáyhérá ch'án kixin jehe ch'án kjuich'éna ch'án nkajní la ko chjasintajni la ko ntayaon la ko tí sít'axrje ntá.

⁸ Ntá xíki yóxin ángel, ntáchro kixin:

—Ó kjuixin kjuítsínka, ó kjuixin kjuítsínka tí chjasin jie Babilonia. Mé ntiha kuixín tí vino kókuānxín sín kaín nación ntá kjuasin sín jie chónta sín chojni chjin ókjé.

⁹ Ntá xíki tí nixin ángel nixja itsen, ntáchro kixin:

—Jnkojín sín tsjikosáyehe sín tí bestia la ko tí nkehe tsíkjangya kuènte o tsítóhe sín tsochónta tí marca tí totjen sín o tí tja sín, ¹⁰ mé t'ichjánxin its'i sín tí vino tsjasótexín sín kuixín tí tjen Dios kixin xíkaha tjechónhen tí kjuanínkaon kuènte Dios ntá ntiha tsjasótexín sín tí xrohi la ko azufre mé xíkaha tsonhen tí sín a ts'ikon tí sín ángel kuènte Dios la ko tí Kolélo. ¹¹ Tí ihnchi kuènte xrohi sítjasótexín sín síchriin jnkochrixín la tí sín a kuinkáchónki tí bestia la ko tí nkehe tsíkjangya kuènte o chónta sín ihnié kuènte. ¹² A ntá tí sín tinkáchónki Dios la kuítekaon sín tí nkehe k'ueətoan ch'án la ko naxa jína tinkáchónki sín Jesús mé t'ichjánxin chrókuítegehya sín titekaon sín ch'án.

¹³ Ntá kuñhan itén ijnko nkexro kuixín nkajní ntáchro kixin:

—Ikjian tíhi: “Náxrjón tjejó tí nkexro kjónté its'en sín ijie o chr'éxín kixin tinkáchónki sín Ìnchéni.” Kjá jína, ichro Nchakuen Dios, kixin tí jehe sín ts'ok'éhe sín kixin ó kjuích'e sín xrā la tí xrā kjuích'e sín mé kjuacha sín.

Tí nkehe tsík'óna chjasintajni

¹⁴ Ntá xríñahya k'uíquān ijnko tjuj tjóá la chrítaón tí tjuj tjetjāxín ijnko nkexro éxí yóhē tsjehe tí Xjeen Dios Tsík'óna Chojni tjenkáya ijnko corona tsík'óna chica oro tí kja ch'án la ko ijnko chica hoz imá taté tjexraá ch'án. ¹⁵ A ntá nkaxenhen n̄jnko mé k'uaxrjexín í jnko ángel itsen nixja ch'án nixjehe ch'án tí nkexro tjetjāxín chrítaón tjuj ntáchro ch'án kixin:

—Tjankíxian t̄tēxian chica hoz kixin ó kjuixraká tí yaon tsotjá tí nkehe s̄in chjasintajni kixin tí nkehe tsík'óna chjasintajni la ó tsícha.

¹⁶ Ntá tuénxín tí nkexro tjetjāxín chrítaón tjuj ntá kjuínchek'átsínka ch'án chica hoz kuenté chjasintajni la kjuenájín ch'án nkehe tsík'óna chjasintajni.

¹⁷ Ntá k'uaxrjexín í jnko ángel tí n̄jnko tjen nkaya nkajní la kjaxin sákjuiko ch'án ijnko chica hoz imá taté. ¹⁸ Ntá sákjuixin í jnko ángel tí tjen altar la chóna ch'án kjuachaxin kuènte xrohi la itsen k'uíyehē ch'án tí nkexro chóna tí chica hoz imá taté la ntáchro ch'án kixin:

—Tjankíxian t̄tēxian tí chica hoz taté la tjankíxian it̄jā tí racimos to uva tsík'óna chjasintajni kixin ó tsíchjé to —ichro ch'án.

¹⁹ A ntá tí ángel kjuínchek'atsínka tí chica hoz chrítaón tí nonte ntá chrínjin tí to uva tsík'óna tí nonte ntiha. Ntá sákjuik'enka ch'án to tí t̄jāt'o ts'ényaxín sín to. Tíha mé t'axrjexín kixin x̄ikaha Dios sinchekjasóte chojni. ²⁰ A ntá tí to uva tsík'ényaxín sín t̄jāt'o tí ikon chjasin a ntá tí t̄jāt'o a mé k'uaxrjexín nchónhya j̄n̄j noixín éxí tí freno tjinká ir'va kokatē la trescientos kilómetro kjínxín sátsíkji tí j̄n̄j a.

15

Tí yato tí ángel la ko tí chin tsjixixín

¹ Ntá k'uíquān tí nkajní í jnko kjuaxroan j̄jé mé ijnko kjuachrakon: mé tí yato sín ángel kuikao tí yato chin tsjixixín tsoníexín chojni. Tíha mé tí kjuanínkaon kuènte Dios tsjixixín.

² Kjaxin k'uíquān ijnko nkehe tóyóhē ijnko ntayaon tsík'óna éxí xrosentā tsínkíkjan xrohi. La tí sín tsíkjacha kixin kuinkáchónkihya sín tí bestia la ko tí nkehe tsíkjan̄ya kuènte la ko kuáhya sín tí número kuènte ihnjé tí bestia mé tjejóxin toté sín chjinaxón ntayaon tsík'óna éxí xrosentā la ko chóna sín isón arpa tsíkjan̄jon Dios tsík'áyehē sín. ³ Itsje sín isón k'uétsje ch'ín Moisés, tí nkexro kjuích'ehe xrā Dios la ko isón kuènte tí Kolélo la mé ntáchro kixin:

Imá ij̄jé tí kjuaxroan kuéntá kixin kaín nkehe tsík̄jich'éna.

Jaha Ìnchéni Dios kaín kjuachaxin chonta.

Ntoá la ko chaxín tí nt̄ja kuéntá.

Jaha mé ijnko Rey t'et̄oan kuènte chjasintajni.

⁴ ¿Xá nkexro chrakuanhya tí jaha Ìnchéni?

¿Xá nkexro t̄jáhya kjuasáya kixin jaha mé ijnko nkexro jína tjóá?

Kuenté chjasintajni tsjikosáyehe sín tí jaha

kixin k'uikon sín tí xrā tsík̄jich'e la jína tíha.

⁵ Kjuixin tíha la k'uíquān nkajní t̄jexrankehē tí n̄jnko la ko tí cuarto tjóá t'inkachjina tí nkehe tsík'et̄oan Dios. ⁶ A ntá tí n̄jnko a k'uaxrjexín yato

ángel kuikao yato chin. Tí iké sín la ika tjete tjóá tjákini. A ntá tí cinta chóna ntakuin sín mé jehó oro. ⁷ A ntá ijnko tí noó tí nkexro tjejóchón mé kjuanjon ijnko copa k'uáyéhe jnkojnko tí yato ángel mé copa tsík'óna chica oro tsikaón tí nkehe tsjasótexín chojni kuixín tí tjen Dios tí nkexro tjechón jnkochrín. ⁸ A ntá tí nkaxenhen njnko la tsikaón ihnchi kuixín tí kjuachaxin jié kuènte Dios la nijnko nkexro xitjahya ts'ixenhen ntíha tsjixinjian ts'átsínka tí yato tí chin kuikao tí yato ángel.

16

Tí copa tjinká nkehe tsjasótexín chojni

¹ Ntá kujnhan ijnko itén ijnko nkexro imá itsen k'uaxrjexín nkaxenhen njnko, ntáche tí yato sín ángel kixin:

—Sátjia tikikjanjian chrítaon chjasintajni tí nkehe tjía tí yato copa la táha mé tsjasótexín chojni kuixín tí tjen Dios —ichro ch'án.

² A ntá tí ángel saoxín sákjuik'itji tí nkehe tjía tí copa chrítaón chjasintajni. A ntá kaín tí chojni chóna marca kuènte tí bestia la ko tjikosáyehe sín tí nkehe tsíkjanoya kuènte tí bestia mé tsík'ayan sín tosóa, imá tjetéhe sín.

³ A ntá tí yóxin ángel sákjuik'itji tí nkehe tjía copa chrítaón ntayaon. A ntá tí ntayaon la k'óna jni éxi ijnjé ijnko chojni tsík'óyan kichó la kaín ko sínkánki ntayaon ik'uén.

⁴ A ntá tí níxin ángel sákjuik'itji tí nkehe tjía copa chrítaón ntarío la ko chrítaón tí ntá sít'axrje tòye, la ntá tí ntá k'óna jni. ⁵ Ntá tuénxín kujnhan nixja tí ángel kuènte ntá ntáchro kixin:

—Jaha mé ijnko nkexro jína kixin kjuinchekitoexián ijje chojni. Ìchéni jaha ijnko Dios jína, ósé tjen la ko naxa tjen ijje ⁶ kixin jehe sín k'óyan tí sín tinkáchónki tí jaha la ko tí sín tsichrónka itan la ntá jaha Ìchéni chjehé sín ijnjé its'i sín kixin mé xikaha sítjasóte tí jehe sín.

⁷ Kjaxin kujnhan nó altar ijnko nkexro ntáchro kixin:

—Chaxín Ìchéni Dios, jaha mé chonta kaín kjuachaxin la ntoá jína kjuinchekitoexián tí ijje a.

⁸ A ntá tí noóxin ángel sákjuik'itji tí nkehe tjía copa chrítaón yaon, a ntá tí yaon antsí k'uáyéhe kjuachaxin tosóa kixin tsochjánxin chojni tí sóa kuènte. ⁹ A ntá kaín chojni chjánxin tí imá sóa kuènte yaon la k'uántaxínhin sín ihnjé Dios mé jehe ch'án mé tí nkexro chóna kjuachaxin kuènte tí chin a. La kjónté kjuinkíhya sín tí nkehe tinkáchónki sín la xraxinkakonhya sín Dios.

¹⁰ A ntá tí in'óxin ángel sákjuik'itji tí nkehe tjía copa chrítaón tí trono t'etoxánxín tí bestia. A ntá kaín tí k'uéchóna kjuachaxin k'uék'etoxan tí bestia la k'uúxin tié. A ntá tí chojni a la netja nejen sín kixin tjetéhe sín.

¹¹ La kjónté xikaha la kjuinkíhya sín tí nkehe jínahya ch'e sín. Náhí. Íchá má k'uántaxínhin sín Dios tjen nkaya nkajni kixin tjetéhe sín kixin xikaha kónhen sín.

¹² A ntá tí injonxin ángel sákjuik'itji tí nkehe tjía copa chrítaón ijnko ntarío jié it'in Eufrates. A ntá tí ntarío la kjuixié kixin jína tsakitjehe sín ijnko ntía tsjixin tí sín rey tsjixin nó tjitoxin yaon.

¹³ A ntá k'uúkuan kixin ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjexín iní nchakuen tí jínahya éxi korána tsjehe. ¹⁴ Tíha mé nchakuen tí jínahya kjuasixín sín kjuaxroan. A ntá sákjuikjinchekójnksé kaín rey sín chjasintajni kixin tsjanjon sín ijnko

yaon jié kuènte Dios chóna kaín kjuachaxin. ¹⁵ “Tsjehe, janhan titàya ts'inké éxi ijnko xíche. Chéhe tí nkexro tjejótsjehe la t'ayakonhen tí iké kixin ts'itjáyannya kixin chrók'uajihya sín tjóchin sín la chrókósuèhya sín kixin chrókónoxín kixin tjóchin sín.” ¹⁶ A ntá tsojnkotsé tí sín rey tí nonte it'in Armagedón nkiva Hebreo.

¹⁷ A ntá tí ángel yatoxin sákjuik'itji nkehe tjiá copa chrítaón tí xrinto ntá nkaxenhen njnko nkaya nkajní k'uaxrjexín ijnko itén chojni itsen nixja mé kujxin tí tjen tí trono la ntáchro kixin:

—Ó kjuixin kónhen tíha.

¹⁸ A ntá sítjónkixin la ko ruido sítjonta la ntá imá kuínki nonte fuerte. La desde tí kjuankixin k'uixin chojni chjasintajni la xikahya kónhen kuínki nonte a ntá jie antsí fuerte kuínki nonte. ¹⁹ A ntá tí chjasin jié xitjehe nonte la iní k'óna, chjenca. La koí kaín chjasin siín chjasintajni tsík'oya. A ntá Dios xraxinkaon kixin chrókjuínchekjasóte tí sín siín tí chjasin jié Babilonia la k'uetoan ch'án its'i sín tí vino tsjasótexín sín kixin mé xikaha kónínkaon ch'án. ²⁰ A ntá kain tí nonte sínkátaón ntayaon k'uánianki ntá la ko tí jna k'uitjayan. ²¹ A nta nkajní k'uánótjexin toni ijié xrátja chojni mé cuarenta kilo yexín jnkojnko toni. A ntá chojni na antsí má k'uántaxínhin sín Dios kixin tí xikaha kónhen sín xratja sín toni la imá kjoté sín.

17

Tsjasóte tí tjan jínahya

¹ A ntá ikui ijnko tí yatoxin ángel chóna tí yato copa la ntáchro ch'án kixin:

—Xrákiá tsjákoaha nkexrí tsjasóte tí chojni chjin tjasin jie tjetjaxin tjan chrítaón tí nchónhya ntá. ² Tí sín rey t'etoan chjasintajni kjuasinko tjan jie la ko tí chojni siín chjasintajni kókuaxxin sín tí vino a mé kjaxin kjuasixín sín jie.

³ A ntá tuénxín Nchakuen Dios sákjuikian nteje ntá k'uikuan ijnko chojni chjin tjetjaxin chrítaón ijnko bestia kjátse la kuenté tí ko a la síma ihnié náxrxjónhya tsík'ántaxiexín sín Dios la chóna yato kja la ko ite ntéé. ⁴ A ntá jehe tjan chóna tjan iké tjan morado la ko kjátse la teyá tjan chica oro la ko xro náxrxjón la ko perla. Tjexraá tjan ijnko copa tsík'óna chica oro tsíkaón nkehe jínahya tsjasixín tjan jie. ⁵ Tí totjen tjan ts'ínixín ijnko ihnié kohya nkexro tienxín. “Tíha mé tí chjasin jié Babilonia, mé iné tí chojni chjin tjasin jie la ko kain chojni jínahya ch'e siín chjasintajni.” ⁶ Ntá kónóna kixin tí tjan a la tsékanxin tí ijnié tí sín tinkáchónki Dios la ko tí ijnié tí sín tsík'énxín tí chrónka sín kixin tinkáchónki sín Jesús. Ntá k'uikuan xikaha imá chrakonna. ⁷ A ntá ijnko ángel ntáchro ch'án kixin:

—¿Nkekuènté chrakuan? Ntá ijie sintanoha tí nkehe tienxínnya chojni kuènte tí tjan a la ko kuènte tí bestia tjeijken tjan chóna yato kja la ko ite ntéé. ⁸ Tí bestia k'uikuan jaha kjuák'e ósé la ijie tjechónhya kjánchó senó tsochrínxín tí tòye njnka ntá chr'éxin ts'itjayan. A ntá tí sín siín chjasintajni ts'ínixínnya ihnié sín tí libro ts'ínixín ihnié chojni tsaá desde k'óna chjasintajni, la mé jehe sín tsochrakon sín tió ts'ikon sín tí bestia kjuák'e ósé la tsík'en la ntá ijie xikjan ínaá.

⁹ Tí jnkojín nkexro chrókiexín la mé tí yato kja la t'axrjexín yato jna tjeijken tí chojni a. ¹⁰ A ntá tí kja kjaxin t'axrjexín yato rey la ntá in'ó tí sín rey la í t'etuanyha sín ijie la ijnko tí jehe sín t'etoan ijie la í jnko naxa tjihya. A ntá tió tsji tí yatoxin la í kánhyó sé ts'etoan. ¹¹ A ntá tí bestia

kjuák'e senó la ijie tjechónhya mé tí jnínxín rey la jehe ch'án kuènte tí yato rey la chr'éxin la ts'itjáyan.

¹² 'A ntá tí ite ntée tsík'ikuan mé ite rey naxá t'etuanhya. A ntá ijie la ts'áyéhe sín kjuachaxín ts'etóanko tí bestia kjánchó kánhyó sé. ¹³ Tí ite tí rey la jnkokoá tsjenkayáxin sín la tsjanjon sín kjuachaxín kuènte sín kixin ts'etóan tí bestia. ¹⁴ Tsjanjonko sín tí Kolélo a ntá tí Kolélo la tsjacha ts'etóan kixin jehe ch'án mé Ìnché kaín chojni la ko jehe ch'án mé tí Rey ts'etuñhen kaín rey la ko tí sín tjejóko ch'án mé tsík'íyehé Dios la tsíkjejá ch'án sín la jína nchexiteyá sín.

¹⁵ Kjaxín ntáchro tí ch'in ángel kixin:

—Tí ntá k'uikuán la chrítaón tjetjaxín tí chojni chjin tjasin jie la mé t'axrjéxin kixin nchónhya chjasin la ko nchónhya chojni la ko nchónhya nación la ko nchónhya nkíva. ¹⁶ A ntá tí bestia k'uikuán la ko tí ite ntée la tíha mé tsonínkakhonhen tí tjan tjasin jie la tsitohe tjan tjóchin tjan la sine tí bestia tí nto chóna cuérpoé tjan la ko tsoche tí huésóé tjan. ¹⁷ Dios tsík'etuñhen asén sín kixin xikaha sich'e sín éxi tjinkaon ch'án kixin jnkokoá tsjenkayáxin sín la ko tsjanjon sín kjuachaxín kuènte tí sín rey kixin ts'etóan tí bestia tsoxiteyája tí nkehe tsintáchro Dios. ¹⁸ A ntá tí chojni chjin k'uikuán la táha mé tí chjasin jie t'etóan tí sín rey t'etóan chjasintajni.

18

Kjuítsínka chjasin Babilonia

¹ Ntá chr'éxin k'uikuán í jnko ángel k'uínkajinxín nkajní chóna nchónhya kjuachaxín ntá chjasintajni antsí k'uínkaséyanni tí tjákini tsjehe ch'án.

² Ntá k'uíyato ch'án itsen ntáchro ch'án kixin:

—Ó kjuítsínka, ó kjuítsínka tí chjasin jie Babilonia. Ntá tí jínahya ó kjuacha k'uixenhen t'etóan ntiha la ntiha siín kaín xín clase nchakuen jínahya la ko siín kaké ko xritjaká tjuáhya la ko jínahya. ³ A ntá kaín xín nación kókuaxín tí vino kjuínchekji tjan ntá kjuasínko tjan sín jie la ko tí sín rey t'etóan chjasintajni kjaxín kjuasínko tjan jie. La tí sín nchekji nkehe chjasintajni kórícoxín sín kixin k'uena tjan nchónhya nkehe.

⁴ Ntá kujnhan í jnko itén nkexro kujxin nkaya nkajní ntáchro kixin:

—T'axrjéxinrá tí chjasin ntiha kixin tí jahará tinkachónkirá tí janhan kixin chrók'uícahyará tí ijie sín la ko chrókjuasótéxínhyará tí nkehe tsonhen sín. ⁵ Kixin tí nchónhya jie tinkák'ánkí hasta kjuixraká nkajní la Dios ó nohe tí jie chóna sín. ⁶ Ch'eherá tjan éxi tí jehe tjan kjuích'ehe tjan í so chojni kixin xikaha tsjasótéxín tjan. Chrókjuenkehérá tjan iyó veces éxi tí tsík'ich'éna tjan ik'ui í so chojni. ⁷ Antsí chrókjuasóte tjan tóyóhe tí nkehe kjuích'e tjan kixin kjuínchehnke tjan la ko k'uéchóna tjan kaín nkehe tóxrjínhin tjan. Jehe tjan ntáche asén tjan kixin: “Ntihi tjetjaxian éxi ijnko reina. Jehya ik'ána kixin chrókjuasótena.” ⁸ Mé xikaha kjaxín jnkokoá yaon itsí tí kjuaxikaon tsonhen tjan mé its'en tjan la ko tsjasótéxín tjan kjinta la tsoche tjan kixin Ìnchéni imá chóna kjuachaxín la jehe ch'án sinchekjasóte ch'án tjan.

⁹ A ntá tí sín rey siín chjasintajni tsíkjasínko sín tjan jie la ko nchónhya nkehe kjuínchexenke sín tjan la mé tsotsjánka sín la ts'eya sín tió ts'ikon sín ts'aya ihnchi tió tsoche tjan. ¹⁰ Ntá jehe sín tsitohe sín ikjín kixin chrakon sín kixin xikaha tsjasóte tjan la tsontáchro sín kixin:

—Nòà tí jaha chjasin jié Babilonia, chjasin imá t'etòan kixin titàya kjuasótia.

¹¹ Tí sín xrinčekji nkehe la kjaxin tsjánka sín, t'èya sín kixin xikaha kónhen tí chjasin ntiha kixin kohya nkexro ts'enehe sín tí nkehe sinčekji sín. ¹² Kjuínčekji sín chica oro la chica plata la ko ixro náxrjón la ko perla la ko ika náxrjón lino la ko ka seda la ko ika color morado la kjátse la ko kjaxin kaín xín clase nta náxrjón xraxé la ko tí nkehe tsík'óna neno elefante la ko inta náxrjón la ko bronce la ko ixro chica la ko ixro mármol. ¹³ Kjaxin xrinčekji sín canela la ko xroan xraxé náxrjón la ko chjinco la ko xroan mirra la ko crema la ko vino la ko aceite la ko harina náxrjón la ko noa trigo la ko iko tamá nkehe la ko kolélo la ko kokatè la ko carreta la ko chojni ch'exón xra kjaxin kjuínčekji sín. ¹⁴ Tsontáche sín tí chjasin a kixin:

—Í chontahya kain to tjete imá k'uékóxrjínhan. Ó k'úitjayan kaín nkehe náxrjón tjete k'uéchonta.

¹⁵ Tí sín k'uékjinčekji tí nkehe la kóríco sín kixin kjuacha sín tí xra kjuích'e sín tí chjasin ntiha. Ikjín k'uéjo sín kixin chrakon sín kixin xikaha kónhen kjuasóte tí chjasin. Tsjánka sín la t'èya sín ¹⁶ la tsontácho sín kixin:

—Nòà tí chjasin jié. Éxí ijnko chojni chjin tsík'itsa ka lino náxrjón la ko ika morado la kjátse la ko teyá nkehe oro la ko xro náxrjón tjete la ko perla. ¹⁷ A ntá jnkorato koá kjuixin kjuéje tí nkehe imá tjete —ichro sín.

Kaín tí nkexro t'etòan tí ntabarco la ko tí sín tsík'ixenhen tí ntabarco la ko tí sín ch'e xra chrítaón ntayaon kuítóhe sín ikjín ¹⁸ la tió k'uúikon sín tí ihnchi síche tí chjasin ntiha la k'óyako sín kixin:

—¿Xá nkexéhe í jnko chjasin chrókóyóhe tí chjasin jié i?

¹⁹ La tjíkanjin kja sín nche la tsjánka sín t'èya sín kixin:

—Nòà tí chjasin jié. Kóríco tí sín k'uéchonta ntabarco chrítaón ntayaon kixin tí chjasin i la ntá jnkorató koá kjuixin k'úitjayan tí nkehe chóna sín.

²⁰ A ntá jahará tjejórá nkajní tócháhará kixin xikaha kónhen tí chjasin a. Tócháhará jahará k'uájikoará Ìnchéni la ko jahará k'uéchronkará itén Dios la ko kaín rá kuinkachónkirá tí jehe ch'án kixin Dios kjuínčekjasóte tí chjasin a kixin tí jje kjuasin sín kjuínčekjasótiará sín tí jahará.

²¹ A ntá ijnko ch'in ángel chóna kjuachaxin kjuatsen ijnko xro éxí ijnko xro jié kuènte molino la k'uenkí ch'án ntayaon la ntá ntácho ch'án kixin:

—Mé xikaha tsonhen tí chjasin Babilonia, tí chjasin jié la nunca ts'ikonhya chojni chr'éxin. ²² Nunca tsienhya sín música kuènte isón arpa la ko flauta la ko trompeta tí ntja la ko ninkexró xitjahya sich'e ninkehó xra ntiha la ko kjaxin tsienhya sín ninkehó tóvéntó xro molino. ²³ Í ts'inkaséyanxínhya xrohi kuènte ninkehó lámpara la kjaxin í tsienhya sín ts'ixin kia tsotehe chojni ntiha. Tí sín k'uékjinčekji nkehe ntiha la imá k'uék'etòan kuènte chjasintajni la tí sín k'uékjich'iyehe tí sín siín chjasintajni la k'uékjich'e sín jínahya, k'uédkjinchexroan sín.

²⁴ A ntá tí chjasin jié ntiha tsikónoxín ijníé tí sín tsik'en k'uéchronka itén Dios la ko tí sín tinkáchónki tí jehe ch'án la ko kain tí sín tsík'enxín chjasintajni.

19

¹ Ntá chr'éxin ntá kjuínhan itén nchónhya nkexro tjejó nkaya nkajní itsen nixja, ntácho sín kixin:

¡Aleluya! Kjuasáyé Dios kuaáxinni la ko jehe ch'án t'inkaséyanxín ch'án ti jeheni la imá chóna kjuachaxin Dios kuènteni.

² Kíxin jehe ch'án ntoá kjuínchekjasóte ch'án tí tjan kjuasin nchónhya jie kíxin jehe tjan kjuachroe tjan chojni síin chjasintajni kíxin tí nkehe jínahya k'uékjich'e tjan.

Dios kjuínchekjasóte tjan kíxin k'óyán tjan tí sín k'uékjich'ehe ch'án xra.

³ La ntá kjaxin inaá xíntácho kíxin:

—¡Aleluya! Kjuasáyé Dios kíxin tí ihnchi síchexín tí jehe tjan tsítøehya chrin hasta tí ntíhi.

⁴ A ntá tí veinticuarto tí sín táda la ko tí noó nkexro tjejóchón tjejóxin toch'in sín hasta káxin kja sín nonte kjuikosáyéhe sín Dios tí nkexro tjetjaxin tí trono la ntácho sín kíxin:

—¡Amén! ¡Aleluya! ¡Kjuasáyé Dios!

⁵ Ntá xríñahya kuínhin sín itén ijnko nkexro tjen nó trono ntácho kíxin: Chjehérá kjuasáya tí Dios kuènteni kaín rá ch'ehérá ch'án xra la kuítekákonhénrá ch'án, mé kaín tí jahará kjónte chánjan ntsíntsi o chojni ntøto.

Tí kia tsøtehe tí Kolélo

⁶ Kjaxin kuínhan nkehe éxí itén nchónhya chojni éxí nchónhya ntario sítovéntó la ko imá itsen síjtonta la ntácho kíxin:

¡Aleluya! Kjuasáyé Ìnchéni ó kjuankíxin t'etøan Ìnchéni Dios kuènteni chóna kaín kjuachaxin.

⁷ Chrókóchéheni la chrókjuikosáyeheni Dios kíxin ó kjuixraká tí yaon ts'ixin kia kuènte Kolélo.

La tí tjan tsøtehe la tsíkóyaxínhin tjechónhen,

⁸ mé tsík'áyéhe kjuachaxin tsík'itsa ka lino náxrjón tjóá tjákini.

A ntá tí ka lino náxrjón a mé t'axrjexín kíxin tí jína k'uéjó tí sín tinkáchónki Dios.

⁹ Ntá tí ch'in ángel k'uøtøan ch'án kíxin:

—Ikjian tíhi: “Náxrjón tjejó tí nkexro k'uáyéhe kjuachaxin sátsji tí kia tsøtehe tí Kolélo.”

A ntá ntácho ch'án inaá kíxin:

—Tí palabra a mé chaxín ntoá nixja Dios.

¹⁰ Ntá kjuak'éxian toç'hian toçé tí ángel kíxin chrókjuikosáyaha ch'án, kjánchó jehe ch'án ntácho ch'án kíxin:

—Xikahya chrokjuich'e kíxin janhan kjaxian t'aha xra Dios éxí tí jaha la ko éxí tí sín kichuá kuítøehya kuítekaon tí tan jína chrónka Jesús. Jehó Dios mé chrókjuikosáyehé jaha.

Tí nkehe k'uéchrónka Jesús mé k'uéchrónka tí sín profeta.

Tí nkexro kjuák'ekjen kokaçe tjóá

¹¹ Ntá k'uíkuan kíxin nkajní tjexrankehe la ntaha kónoxín ijnko kokaçe tjóá la ko tí nkexro tjejken va mé it'in Jína la ko Chaxín kíxin ntoá kjuínchekitøexín ch'án ijíé chojni la ko ntoá kjuánjonko ch'án chojni. ¹² A ntá tí ikon ch'án mé tjákini éxí xrohi nene xikaha tsjehe. A ntá tí kja ch'án la chóna nchónhya corona la ko ts'ínixín ijnko ihnjé ijnko nkexro la jehó ch'án mé nohe ch'án tíha. ¹³ Tjenkáya ch'án ijnko ka tsík'ixikjanjin jni ntá ihnjé ch'án mé Itan Kuènte Dios. ¹⁴ Chréhe tí sín soldado kuènte nkajní. Iké sín mé ka lino náxrjón tjóá la tjejókjen sín kokaçe tjóá. ¹⁵ Ir'va tí jehe ch'án k'uaxrjexín espada imá taté kíxin táha mé tsjik'óyánxin ch'án tí sín síin kaín nación la ko ts'etøanxín ch'án ijnko chica vara. Jehe

ch'án mé sinchekitoexín ch'án ijíé sín éxí t'énxin sín to uva toté sín mé xíkaha ts'etuñhen ch'án kixin its'i sín vino tsjasótexín sín kixin mé xíkaha tsixin tí kjuanínkahe kuènte Dios chóna kaín kjuachaxin. ¹⁶ Iké ch'án mé ts'ínixín kixin jehe ch'án me Rey t'etuñhen kaín rey la ko jehe ch'án mé Ìnché kain chojni.

¹⁷ Ntá tuénxín k'uíkuan ijnko ángel t'exín toté tí tjen yaon la k'uéyato ch'án itsen k'uéyatohe ch'án tí ko xritjaká, ntáchro ch'án kixin:

—Xrákirá tójkotsérá ntihi kixin Dios tsjanjon nkehe sinterá ijie. ¹⁸ Sinterá cuerpo kuènte reyes la ko sinterá cuerpo kuènte tí sín comandante la ko cuerpo kuènte chojni jjehe la ko ntøe kokate la ko cuerpo kuènte tí sín tsíkjiták'á va la ko cuerpo kuènte kaín chojni libre o chojni ch'exón xra la chojni hyé o chojni ntsínsí.

¹⁹ K'uíkuan tí bestia la ko tí sín reyes t'etøan chjasintajni la ko tí soldado kuènte sín, tsíkójkotsé sín tsjanjonko sín tí nkexro t'jekjen kokate la ko kóí tí sín soldado kuènte ch'án. ²⁰ A ntá itsé sín tí bestia kixin sátsji tsjasóte la ko kjaxin itsé sín tí nkexro ntoáhya k'uékjako itén Dios la ko k'uékjasin ch'án kjuaxroan náxrjón nkayakon tí bestia mé xíkaha kjuích'e tí nkexro ntoáhya kjuako, kjuích'iyehé ch'án tí sín tsíkítóhe tsíka marca kuènte tí bestia la ko kjuikosáyehe sín tí nkehe tsíkjanøya kuènte tí bestia. Ntá tí bestia la ko tí nkexro ntoáhya kjuako itén Dios mé k'uítuñhen sín sátsji tí síin xrohi tsoche t'ejóchónxinhín sín tsochéxin azufre. ²¹ A ntá tí í so sín la ts'énxín tí espada k'uaxrjexín tí ir'va tí nkexro t'jekjen tí kokate tjøá la kaín ko xritjaká ts'ixin tí síin tí cuerpo kuènte tí jehe sín la hasta tsokjehe va sine va.

20

Tí mil nánó

¹ Ntá xrínahya k'uíkuan ijnko ángel k'uínkajinxín nkajní t'jexraá llave kuènte tí tøyè nínka la ko ijnko cadena jíé t'jexraá ch'án. ² A ntá tí ángel a itsé tí dragón mé tí konche ósé kjí mé tíha tí ch'ín diablo la ko Satanás la kjuak'e ch'án ijnko mil nánó. ³ Ich'án ch'án sákjuí tøyè nínka ntá k'uíkjehe ch'án la ko kjuak'e ch'án ijnko sello chrítaón puerta kixin ntá tí dragón chrókjuich'iyehya tí chojni síin kaín nación hasta chrók'uaatsínkajia tí mil nánó. A ntá ts'atsínka tí mil nánó ntá tsoxintankehe kjánchó séhya its'e.

⁴ Ntá tuénxín k'uíkuan tí trono la ko tí sín t'ejótjaxín tsík'áyéhe sín kjuachaxin sinchekitoexín ijíé chojni. Kjaxin k'uíkuan asén chojni tsíchrínjin kja kixin kuítekaon sín Jesús la ko tsíchrónkaxín sín itén Dios. Jehe sín la kuínkáchónkihya sín tí bestia la ko tí nkehe tsíkjanøya kuènte la ko kuítóehya sín ikuá sín marca tí totjen sín o tí itja sín. Mé k'uíkuan kixin tsíxechón sín la ko ts'etøanko sín Cristo ijnko mil nánó. ⁵ Ntá í so chojni tsík'en la naaxa xechónhya hasta ts'atsínkajia tí mil nánó. Tíha mé xrankíxixín tsoxechón chojni. ⁶ Náxrjón t'ejó tí sín tsíkjinchetjøá Dios mé tí sín a mé senó tsoxechón sín. A ntá tí yóxin chrók'uen sín la tíha chónthya ninkehó kjuachaxin naaxa xíkaha chrókónhen sín. Jehe sín mé nchat'á kuènte Dios la ko kuènte Cristo la ts'etøanko sín ch'án tí mil nánó.

⁷ A ntá ts'átsínka tí mil nánó ntá ch'ín Satanás tsoxintankehe tí kjíchroé. ⁸ La sátsjikjich'iyehé tí chojni síin kuénté chjasintajni la ko sátsjikjich'iyehé tí chjasin Gog la ko Magog. La tsójkotsé sín kixin tsjanjon sín la ko tí soldado kuènte tí jehe sín. Nchónhya sín tsójkotsé ntiha éxí tí nchesen

siín ntayaon. ⁹ Mé xikaha sátsji sín tí tonxín la ko tí tekaxín nonte la ts'ántatjen sín tí tjejó tí sín tsíkjinchetjóá Dios mé tí chjasin jié tjuèhe ch'án. A ntá xrohi tsixin nkajní kixin tsochexín tí sín jínahya ts'itjáyanxín sín. ¹⁰ A ntá tí diablo tsíkjich'iyehé tí jehe sín kjaxín sátsji tsochexín xrohi la ko azufre tí sátsíkji tsíchexín tí bestia la ko tí nkexro ntoáhya kjuako itén Dios. Mé ntiha mé tsjasótexín nchakotjin la ko tie jnkochrín.

Tsitoxén ijié chojni tí tjen tí trono jié tjóá

¹¹ Ntá k'uikuán ijnko trono jié tjóá la ko tí nkexro tjetjaxín nó ntiha. A ntá tí tjen ch'án ntiha la ó k'uitjáyanakoá nonte la ko nkajní la í kónoxínhya inaá tí nonte. ¹² Ntá k'uikuán tí sín tsík'en; chojni hyé la ko chojni ntsínsí tjejóxin toté sín nkayakon Dios la ntá xitjehe iso libro la ko xitjehe í jnko libro ts'ínixín ihnié tí sín tsaá. Ntiha tsitoxén ijié chojni tsík'en éxí nixja tí í so libro nkehe tí xra kjuích'e sín ts'ínixín ntiha. ¹³ Tí sín tsík'enxín ntayaon la ntiha xrakuaxín sín la tí sín sátsíkji tí siín chojni tsík'en la ntiha xrakuaxín sín kaín sín tsochjina sín tsitoxén ijié jnkojnko sín kixin nkexrí tí xra kjuích'e sín. ¹⁴ Ntá tí kjuachaxin kuènte kjuach'én la ko tí tsík'ejó tí asén tí sín tsík'en sátsji tsoche tí xrohi tsochexín, mé tí muerte yóxin tíha. ¹⁵ La ko ntaha sátsji tí chojni ts'ínixínhya ihnié sín tí libro ts'ínixín ihnié chojni tsaá.

21

Nkajní nixin la ko nonte nixin

¹ Ntá k'uikuán ijnko nkajní nixin la ko ijnko nonte nixin kixin tí nkajní saoxín la ko tí nonte saoxín tsík'itjáyan la ko kjaxín kohya ntayaon. ² Janhan Juan k'uikuán tí chjasin jié tjóá. Táha mé tí Jerusalén nixin k'uínkajinxín nkajní kuixin tí tjen Dios la kuenté tsíkóyóxin éxí ijnko chojni chjin tsothehe tsík'itsa kixin tsákja tí xií. ³ Ntá kuínhan ijnko itén ijnko nkexro itsen kuixin nkajní ntáchro kixin:

—Dios itjen tí siín chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuènte sín. ⁴ Jehe ch'án mé sinchexámá kaín ntakon sín la í tsokohya nkexro its'en la tsokohya nkexro tsoxsjánka la ko ts'áváhya sín la ko tsokohya kjuatjoté kixin kaín tí nkehe k'uékónhen ósé la ó kjuixin k'uátsínka.

⁵ A ntá tí nkexro tjetjaxín tí trono ntáchro ch'án kixin:

—Janhan mé t'ána kaín nkehe nixin.

Kjaxín ntáchro ch'án kixin:

—Ikjian tíha kixin tíha mé palabra chaxín la chrókuítekáván kaín tíha.

⁶ Ntá chr'éxin chrónka ch'án kixin:

—Kaín nkehe la ó kjuixin tsík'óna. Janhan la tí xrankíxixín la ko tí tsjixixín éxí tí letra xrankíxixín A la ko tsjixixín Zeta. Tí nkexro t'enxín ntá la janhan tsotjahá sín tí ntá its'i sín mé tí ntá tjanjon kjuachón la ninkehó ts'ixinkíéhya sín tíha. ⁷ Tí nkexro tsjacha tsitohya tí janhan la ts'áyehé sín kaín tí nkehe tsotjahá sín. La janhan mé ts'óna Dios kuènte sín, a ntá jehe sín mé xjanna ts'íkaan tí jehe sín. ⁸ A ntá tí chojni chrakon la chojni titekakonhya la tí sín chjinoxínhin la ko tí chojni ts'óyán kíchó la ko tí chojni tsákja chojni chjin ókjé la ko tí chojni xrinchexroan la ko chojni tinkáchónki nkehe tsíkjanoya la ko kain chojni ch'ia mé tí sín a mé ts'ítuenhen sátsji sín tí siín xrohi tsochexín sín azufre tió itsi tí yóxin muerte.

Tí Jerusalén nixin

⁹ Ntá ikui ijnko tí yatoxin ángel chóna tí yatoxin copa tsíkaón tí yatoxin chin tsjixín tsjasótexín chojni. Ntá ntáchro ch'án kixin:

—Xrákia tsjákoḥa tí tjan tsoṭeḥe tí Kolélo.

¹⁰ Ntá k'uíkuḥa ijnko nkehe kjuákoḥin Nchaḥuen Dios la ntá tí ángel sákuíkián ijnko jna jíe la ko noi la kjuákoḥa ch'án tí chjasin jíe tjóá mé tí Jerusalén ts'inkajinxín nkajní tsíkixín tí tjen Dios. ¹¹ A ntá tí chjasin a mé tjákinixin kjuachaxin kuente Dios. A ntá tjákiní éxí ijnko xro imá náxrjón tjeṭe éxí xro jaspe éxí xrosenta tsjehe. ¹² A ntá jnkontatjen tí chjasin chóna tja't'o noi la chóna teyó puerta la jnkojnko ángel jnkojnko puerta tjejónta la ihnié tí teyó tí sín tsík'axrjenixin sín Israel ts'ínixin jnkojnko puerta. ¹³ La iní puerta la nó tjitoxin yaon la iní puerta la nó norte la iní puerta la nó tjiatóxín yaon la iní puerta la nó sur. ¹⁴ Tí tja't'o tsík'antatjen tí chjasin chóna teyó xro chónaxín fuerza tí tja't'o la jnkojnko ihnié tí teyó tí sín k'uájiko tí Kolélo a mé ts'ínixin jnkojnko tí xro a.

¹⁵ A ntá tí ángel tjenixjana chóna ijnko nta vara oro, éxí tji tsjehe, tsjachoxín tí chjasin la tí puerta kuente chjasin la ko tí tja't'o t'inkákuénxin. ¹⁶ Tí chjasin la cuadrada la tí kjinjinxín jnkokón la ko tonxín la jnkokón. A ntá tí ángel kjuachoxín tí chjasin tí nta vara éxí tji tsjehe tsíkjachoa ch'án tí chjasin mé chóna dos mil dos cientos kilómetro tí kjinjinxín la ko tí ntetoxín la ko tí tonxín la jnkokón. ¹⁷ Ntá tsíkjachoa ch'án tí tja't'o tsíkintajin tí chjasin a la chóna sesenta y cuarto metro kixin éxí tjachroa chojni chjasintajni mé xikaha kjuachoa tí ángel.

¹⁸ Tí tja't'o tsík'antatjen tsík'óna xro jaspe, a ntá tí chjasin tsík'óna jehó chica oro tóyóḥe jehó xrosenta tjóá. ¹⁹ Tí xro tsík'óna xrankíxixín tsík'antatjen tí tja't'o la nchónhya xro chjini náxrjón tsínkíkjan. A ntá tí xro xrankíxixín la jaspe, a ntá tí xro yóxin la zafiro, la tí xro níxin la ágata, a ntá tí noóxin la esmeralda. ²⁰ A ntá tí n'óxin xro la xro mármol la tí injonxín la cornalina, la tí yatoxin la crisólito, a ntá tí jnixin la berilo, la tí xro naxín la topacio, la tí texín la crisoprasa. A ntá tí tejnkoḥin la jacinto, a ntá tí teyóxin la amatista. ²¹ A ntá tí teyó puerta mé tjejó perla la jnkojnko puerta tsík'óna jnkoka perla. A ntá tí ntia jíe kuente chjasin la tsík'óna jehó chica oro éxí xrosenta tsjehe.

²² Ntaha la k'uíkoḥya ninkehó njnko tí chjasin a, kixin Ìnchéni Dios chóna kaín xín kjuachaxin la jehe ch'án la ko tí Kolélo mé tí njnko ntiha. ²³ Tí chjasin a mé t'ichjánxinhya yaon la ko ni nitjó ts'inkaséyanxín. Kixin tí t'inkaséyanxín la Dios la ko tí Kolélo mé tí xrohi kuente. ²⁴ A ntá tí chojni kuente kaín nación tsíkaá la ts'ikonxín tí xrohi kuente tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchóna sín. ²⁵ A ntá tí puerta kuente chjasin la tsíkjèhya tí nchaḥotjin la ntaha la tsokohya ts'ixin tie. ²⁶ Ntaha sátsjiko kaín xín nación tí nkehe náxrjón k'uéchóna sín chjasintajni. ²⁷ A ntá ntaha mé xitjahya ts'ixenhen ninkehó nkehe tjuáhya, la ninkexró chjinoxínhin o chojni ch'ia. Jehó ts'ixenhen tí sín ts'ínixin ihnié tí libro ts'ínixin ihnié tí sín tsaá, mé tí libro chóna tí Kolélo.

22

¹ A ntá tí ángel kjuákoḥa ijnko ntarío tjóá, a ntá tí nta a mé tjanjon kjuachón. Táha mé t'ikonxínni éxí xrosenta la mé k'uaxrjexín tí trono kuente Dios la ko tí Kolélo. ² A ntá jnkosiné tí calle tjeṭoan kuente tí chjasin a la ko nanánko tí ntarío ntiha itjen tí inta tjanjon kjuachón mé t'óna to

teyó veces jnkojnko nánó kixin t'óna to jnkojnko nitjó. Tí ka kuènte tí nta la xroaṅ tsitoexín jína tí naciòn siín ntiha. ³ La mé ntiha tsokohya ninkehó kjuachjinoxínhin la tí trono kuènte Dios la ko kuènte tí Kolélo la ntiha tjen tí chjasin. La tí sín ch'ehe ch'án xra la mé tsjikosáyehe sín ch'án. ⁴ Ts'ikon sín tí kàrè Dios la ko tsochónta sín ihñié ch'án tí totjen sín. ⁵ Ntiha la tsokohya ts'ixin tie la tí sín siín ntiha la t'ichjánxjenhya sín xrohi kuènte lámpara la ko ni xrohi kuènte yaon kixin Ìnchéni Dios mé ts'inkaséyanxín sín ntiha la ko tsochónta sín kjuachaxin kuènte Dios jnkochrín.

Tí itsi Ìnchéni la kánhyó sé

⁶ A ntá tí ángel mé nixjana ch'án ntáchro kixin:

—Tí itan a mé chaxín la chrókuitekákonzén tí tan a. La ko Ìnchéni mé tí Dios nchexraxinkaon tí sín nixja kjuachaxin ihñié ch'án mé ichr'án ch'án tí ángel kuènte ch'án kixin tsjakuexín ch'án tí sín ch'ehe ch'án xra, tí nkehe tjoka tsonhen.

⁷ —jTjoka ts'inka janhan!

Náxrjón tjejó tí sín titekaon tí itén Dios nixja tí libro i.

⁸ Janhan Juan, kuñhan la ko k'uikuṅa tíha. A ntá chr'éxin kjuixin kuñhan la ko k'uikuṅa tíha ntá kjuak'éxian toçh'ian chrínki toté tí ángel kixin xikaha kjuakona la ntá chrókuikosáyaha ch'án. ⁹ A ntá jehe ch'án ntáchro ch'án kixin:

—Xikahya s'ich'e kixin janhan kjaxin t'aha xra Dios éxi tí jaha xikaha la ko éxi tí sín kichuá mé tí sín nixja itén Dios la ko kaín tí sín tjinkaon chrókuitekaon nkexrí nixja tí libro i. Mé jehó Dios chrókuikosáyehé.

¹⁰ Kjaxin k'uetuanna ch'án kixin:

—Chrókuak'echjinahya tí nkehe jahvá kuinhín kuènte Dios éxi nixja tí libro i kixin ó kuichjina tí yaon tsoxiteyá. ¹¹ A ntá tí sín ch'e jínahya ája nohe sín ch'e sín tí jínahya. A ntá tí nkexro ntoáhya ch'e la ája nohe ch'e tí nkehe ntoáhya. A ntá tí nkexro ch'e nkehe tóxrjinhin Dios la naṅa chrókuich'e xikaha la ko tí nkexro tsíkjinchetjóá Dios la naṅa jina chrók'uejó sín chrókuitekaon sín tí jehe ch'án.

¹² —Chaxín tjoka ts'inka janhan la ts'inkakian tí nkehe tsotjahará jnkojnkorá kixin nkexrí tí xra chuich'erá. ¹³ Janhan mé tí xrankixixín la ko tí tsjixixín la janhan mé tí saoxín la ko tí tsjixixín éxi tí letra xrankixixín A la tsjixixín Zeta.

¹⁴ Náxrjón ts'ejó tí nkexro tsíkjen iké kixin tsochónta sín kjuachaxin tsqchjinehe sín tí nta tjanjon kjuachón kixin jina ts'ixenxín sín tí puerta kuènte chjasin. ¹⁵ A ntá ntója tsitohe tí chojni jínahya kuitekakonzehya la ko tí chojni nchexroaṅ la ko tí sín chóna nchónhya chojni chjin la ko tí chojni tjáya la ko tí chojni tinkáchónki tí nkehe tsíkjanoya la ko tí chojni tóxrjinhin xrich'ia.

¹⁶ —Janhan Jesús mé ichr'an tí ángel kuèntana kixin tsochénta kaín nínko kaín tíha. Janhan mé k'uaxrjeníxian tí rey David la ko janhan tí konotsé itji tí chjina t'inkáséyan. ¹⁷ Tí Nchakuen Dios la ko tí sín tinkáchónki tí Kolélo ntáchro kixin:

—Xrákiá.

La tí sín tjejótinhin la ntáchro sín kixin:

—Xrákiá.

A ntá tí nkexro t'enxín ntá tjinkaon ntá la chrók'ui tí ntá tjanjon kjuachón la ninkehó ts'ixinkíhya tíha.

18 Kaín nkexro tjejótinhin itén Dios ts'ínixín tí libro i la chrókónohe sín tíha: Jnkojín sín chrókjuich'éna í so nkehe chrónixja la Dios mé antsí sinchekjasóte tí jehé sín tsoníhi sín éxí nixja tí libro i. 19 A ntá jnkojín nkexro tsjatsen jnkojín palabra chóna tí libro i la Dios tsjatsen tí nkehe chrók'uáyéhe sín chóna tí libro ts'ínixín ihnié tí sín tsaá la ko Dios tsjatsen tí nkehe chróchóna sín tí tjen tí chjasin tjóá kixin éxí nixja tí libro i.

20 A ntá tí nkexro chrónkaxín tí tan i mé ntáchro kixin:

—Tjoka ts'inka janhan.

Amén. ¡Xrákiá. Ìnchéni Jesús!

21 Ìnchéni Jesucristo mé sincheyaonrá kaín rá. Amén.